


Wængongui nänö
Apänegainö



New Testament in Waorani (EC:auc:Waorani)

Wængonguĩ nänö Apänegainö
New Testament in Waorani (EC:auc:Waorani)

copyright © 2009 Wycliffe Bible Translators, Inc.

Language: Waorani

Translation by: Wycliffe Bible Translators, Inc.

Waorani [auc], Ecuador

Copyright Information

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Waorani

© 2009, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 4 Mar 2019 from source files dated 20 Jul 2017
9bedab5a-39ff-5163-a35b-8056cbb8690

Contents

Mäateo	1
Mäadoco	76
Odoca	121
Wäö	200
Näni Cægäinö	257
Odömänoidi	329
1 Coodintoidi	363
2 Coodintoidi	395
Gadataidi	416
Epetoidi	428
Pidipenteidi	440
Codotenteidi	448
1 Tetadönitenteidi	456
2 Tetadönitenteidi	463
1 Tımoteo	467
2 Tımoteo	477
Tito	484
Pidemöö	489
Ebedeoidi	491
Tantiago	518
1 Pegodo	526
2 Pegodo	536
1 Wäö	542
2 Wäö	550
3 Wäö	552
Codaa	554
Nänö Odömongäinö	557

Itota Codito ingantedö ante Määteo nänö watapæ ante yewæmongainta

Itota Codito wæmæidi (Odoca 3.23-38)

¹ Nē Ponguingä, ante dodäni nāni nē angaingä iñömö Itota Codito inongä ingampa. Tömengä iñömö Abadäo wodi pæingä nē ingaingä inte Awënë Dabii wodi pæingä mönö inongä ingacäimpa. Tömengä wæmæidi iñmai ëmongadänimpa, ante yewæmonte ongompa.

² Abadäo wodi wengä Itæca ëñagacäimpa.

Ayæ wææ Itæca wodi wengä Aacobo ëñagacäimpa.

Ayæ wææ Aacobo wodi wënäni Oodaa nāni caipæ ëñagadänimpa.

³ Ayæ wææ Oodaa wodi Tämata ingante monte Pade tönö Dada inate tapæigacäimpa.

Ayæ wææ Pade wodi wengä Etedöo ëñagacäimpa.

Ayæ wææ Etedöo wodi wengä Adäma ëñagacäimpa.

⁴ Ayæ wææ Adäma wodi wengä Äminadabo ëñagacäimpa.

Ayæ wææ Äminadabo wodi wengä Näatöo ëñagacäimpa.

Ayæ wææ Näatöo wodi wengä Tädämöo ëñagacäimpa.

⁵ Ayæ wææ Tädämöo wodi pæte Adacaba ingante möninqe Boodo ingante tapæigacäimpa.

Ayæ wææ Boodo wodi pæte Odoto ingante monte Obedo ingante tapæigacäimpa.

Ayæ wææ Obedo wodi wengä Yæte ëñagacäimpa.

⁶ Ayæ wææ Yæte wodi wengä Dabii ëñate pædinque awënë odeye bagacäimpa.

Ayæ wææ Dabii wodi pæte Odiya wodi nänöogængä iningä ingante möninqe Tadömöo ingante tapæigacäimpa.

⁷ Ayæ wææ Tadömöo wodi wengä Doboäo ëñagacäimpa.

Ayæ wææ Doboäo wodi wengä Abiya ëñagacäimpa.

Ayæ wææ Abiya wodi wengä Ata ëñagacäimpa.

⁸ Ayæ wææ Ata wodi wengä Ootapato ëñagacäimpa.

Ayæ wææ Ootapato wodi wengä Oodäo ëñagacäimpa.

Ayæ wææ Oodäo wodi wengä Otiya ëñagacäimpa.

⁹ Ayæ wææ Otiya wodi wengä Ootäo ëñagacäimpa.

Ayæ wææ Ootäo wodi wengä Acadæ ëñagacäimpa.

Ayæ wææ Acadæ wodi wengä Etequiya ëñagacäimpa.

¹⁰ Ayæ wææ Etequiya wodi wengä Mänatee ëñagacäimpa.

Ayæ wææ Mänatee wodi wengä Ämöö ëñagacäimpa.

Ayæ wææ Ämöö wodi wengä Ootiya ëñagacäimpa.

¹¹ Ininqe Ootiya wodi quëwengäñedë idægoidi inänite babidöniaidi ponte ö æ gobæ wabæca mäodäni gogadänimpa.

Ayæ wææ Babidöniabæ nāni goyedë Ootiya wodi wënäni Eecöniya nāni caipæ ëñagadänimpa.

¹² Mänii Babidöniabæ ö ænte godäni ate ayæ wææ Eecöniya wodi wengä Tadatiedo ëñagacäimpa.

Ayæ wææ Tadatiedo wodi wengä Dodobabedo ëñagacäimpa.

¹³ Ayæ wææ Dodobabedo wodi wengä Abiodo ëñagacäimpa.

Ayæ wææ Abiodo wodi wengä Ediaquimö ëñagacäimpa.

Ayæ wææ Ediaquimö wodi wengä Atodo ëñagacäimpa.

¹⁴ Ayä wæä Atodo wodi wengä Tadoco ëñagacäimpa.

Ayä wæä Tadoco wodi wengä Aquii ëñagacäimpa.

Ayä wæä Aquii wodi wengä Ediodo ëñagacäimpa.

¹⁵ Ayä wæä Ediodo wodi wengä Edeadado ëñagacäimpa.

Ayä wæä Edeadado wodi wengä Mäatäo ëñagacäimpa.

Ayä wæä Mäatäo wodi wengä Aacobo ëñagacäimpa.

¹⁶ Ayä wæä Ootee wodi ingante Aacobo tapäigacäimpa.

Ayä Ootee wodi ëñate päte wæä Itota badä ingungä ingante Mäadiya ingante mon-gacäimpa.

Mäadiya ingante mongä ate tömengä wæätë Itota ingante mangacäimpa. Tömengä iñömö Awënë bacæcäimpa, ante cædinque Wængongui ouinguipæ gao cæcä ate edæ, Codito, ante nänö në pemongaingä ingacäimpa.

¹⁷ Mänömai i incæ Abadäo wodi päinani wæä nänömoidi wæä, önompo tipæmpoga wæä mempoga go mempoga mänimpoga nani yebæñedë ate Abadäo wodi päingä Dabii ëñagacäimpa. Ayä wæä Awënë Dabii wodi päinani wæä nänömoidi wæä, önompo tipæmpoga wæä mempoga go mempoga mänimpoga nani yebæñedë ate Oodeoidi inänite wabæca Babidöniabæ ænte gogadänimpa. Ayä Babidöniabæ ænte godäni ate tömënanäni päinani wæä nänömoidi wæä, önompo tipæmpoga wæä mempoga go mempoga mänimpoga nani yebæñedë ate mönö Codito nänö ponguinque ëñagacäimpa.

Itota Codito ëñacampa
(*Odoca 2.1-7*)

¹⁸ Itota Codito iimai ëñagacäimpa. Wäänä Mäadiya wodi nänö baquecäñedë Ootee wodi tömengä ingante do, Monguimo, angä ëñëningä inte ayä mönämai iñongante Wængongui Tæiyä Waëmö Önöwoca angä ëñëninge do yädëmadä bacä adänitapa.

¹⁹ Yädëmadä ingä adinque Ootee cöwë nö cædongä inte, Piiinte änäni wæcæ wæ, ante wædinque, Awëmö pango cæcæboimpa, ante pönengantapa.

²⁰ Ante önöwënenque pönëninge möwocodë wiimöñongä Wængongui tömengä anquedo ingante da pönongä pöninque anquedo iñömö iimai angantapa. “Ootee, Awënë Dabii päimi inömi inte bitö nänöogängä Mäadiya ingante guiñënamäi æncæbi-impä. Tömengä iñömö Wængongui Tæiyä Waëmö Önöwoca angä ëñente beyænque ënengä adinque bitö iñömö tömengä ingante ee moncæbiimpä. ²¹ Tömengä Wëñängä onguiñängä ingante mancæcäimpa. Mangä pæcä ate tömengä iñömö, Botö gui-idëmini miini wæquinque wënæ wënæ cæminipa, ante adinque botö æmo beyænque quëwencæminimpä, ante cæcæcäimpa cæbii. Bitö tömengä ëmöwo ante, Në Ængä inongä ingampa, ante Itota pemoncæbiimpä,” ante anquedo Wængongui nänö në da pönöningä ponte Ootee ingante angacäimpa.

²² Iinque Wængongui beyä në apænegaingä iimai ante nänö yewæmongainö bai ante iinque batimpä.

²³ “Baquecä incæ yädëmadä badinque Wëñängä onguiñängä ingante mancæcäimpa.

Mangä ëñacä adinque tömengä ëmöwo, Ëmänoedo, ante godö pemoncædänimpä.”

Ante nani yewæmongainö bai cædinque tömengä ëmöwo, “Wængongui mönö weca quëwengampa,” ante, Ëmänoedo, ante pemonte inongäimpä.

²⁴ Ootee mänii wiimonte nänö omæmongä ate Wængongui nänö da pönöningä anquedo nänö ämai ëñente cædinque oncönë ænte gocä incæte guëa mönämai ingadäimpä.

²⁵ Edæ bamoncadengä ëñacä ate, Itota, ante pemonte ate tömëna mäniñedë ate guëa mongadäimpä.

¹ Itota Bedëe nāni quëwëñömö ëñacä ate mänïñedë edæ Edode Oodeabæ awënë odeye nānō ïnedë edæ nē nō ëñëñāni gobæ nænque tamönō quëwëñāni inte Eedotadëe pongadānimpa. ² Ponte āninque,

—Oodeo Awënë Odeye ïñömö ñöwocä ëñadingä ïñömö æyömönō owocää, ante ëñencæte ante wæmönipa. Edæ nænque tamönō quëwëñömöni Awënë nēmō ta ñongæ adinque mönitō tömengä weca ædæ wææninque edæ, Bitō Wængonguï ïmidō angüënë, ante watapæ apæñecæ pömöni ïmönipa, änānitapa.

³ Ayæ, Wacä Awënë Odeye ëñacampa, ante tededāni ëñente wædinque mänïömæ tömāmæ awënë odeye Edode wæætë piinte bayongä Eedotadëe quëwëñāni tömānāni tömengä tönō godongāmæ guiñente wædānitapa. ⁴ ïninque, Wængonguï quï, ante nē godönāni ñænænāni tönō Wængonguï nānō wææ angainō ante nē odömönāni tönō tömānāni ïnānite Edode añecä godongāmæ pönānitapa. Pönāni ate tömengä, Codito nāni angaingä ïñömö æyömönō ëñaquingää, ante æbānō yewæmonte öñō amïñii. ⁵ Åñongante,

—Oodeabæ ïñömö Bedëe nāni quëwëñömö mänïñömö ëñacæcäimpa, ante Wængonguï beyæ nē apæñecä incæ ïmaï ante yewæmongacäimpa, ante apæñedānitapa.

⁶ “Oodabæ awënë gobedönadodoidi tæiyænāni ïñönāni mīnitō adobæca Oodabæ quëwëñinque Bedëe ïñömö mīni quëwencabo ïñömö mēa pönī ïmīni incæte edæ wīi öñömīnique incæmīnimpa. ïñæmpa Wëñængä adocanque ëñate pædinque nē Awënë bate taodique nē aacä bai ïnogä inte botō guidënāni idægoidi ïnānite aacæcäimpa.” Ante yewæmongä amönipa.

⁷ Ante apæñedāni ëñente wædinque Edode wæætë nē nō ëñëñāni ïnānite awëmō añtete pönāni ate, Nēmō æyedënō mä pönī tamō amīnitawo. Åñongante tömënāni, Mänïñedë tamō atamönipa, ante apæñedāni. ⁸ Eñëninque Edode ïñömö,

—Mīnitō wæætë Bedëe ïñömö mäo nē ëñadingä ingante diqui diqui minte aedāni. Tömengä ingante adinque wæætë adodō pöninque apænemīni ëñëmoedāni. Edæ mīnitō gote æbānō wëñæ ingante apænemīni bai botō adobaï edæ gote ædæ wææninque edæ, Wængonguï Awënë ïmidō angüënë, ante watapæ apæñecæte ante ämopa, ante Edode önonque ante pönëninque apænegacäimpa.

⁹ Angä ëñëninque nēmō nē adināni ïñömö Bedëe taadō gote æmō ayönāni edæ ado nēmō tömënāni nænque tamönō quëwëñinque nāni adimō incæ wo go adinque edæ tē wocæ goyönānite nēmō Wëñæ owoyömö oncömanca tæcædæca ïnō næ gongæ adānitapa. ¹⁰ Adinque tömënāni edæ, Mönō acæ pönongä ïñömö ongongampa, ante pönëninque watapæ togadānimpa. ¹¹ Mänïñ nāni adincönë go guite ayönāni Wëñængä ïñömö wäänä Mäadiya tönō ongongä adinque tömënāni Wëñængä weca ædæ wææninque, Bitō Wængonguï Awënë ïmidō angüënë, ante watapæ apæñedānitapa. Ayæ tömënāni nāni ænte pönincoo wi æmpodique oodo tönō oguï waa quï tönō tī nā öni pæquï tönō, Bitō quï impa, ante pædæ godönāni ængacäimpa. ¹² Idæwaa adinque tömënāni möwocodë wīimöñönānite wacä ponte apæñecantapa. Mīnitō awënë Edode weca ocæ ëmænte godāmaï ïedāni, angä ëñëninque tömënāni wæætë yaatænque godinque tömënāni ömæ wadæ gogadānimpa.

Ooteidi Equitobæ wodii winönānipa

¹³ Godāni ïninque edæ Ootee wīimöñongä Wængonguï anquedo ingante da pönongä ponte apæñedinque, “Edode do Wëñængä ingante wænnoncæte ante diqui mincæcäimpa cæbii. Ængæ gantite Wëñængä nāna badancaya ïnate ö ænte Equitobæ wodii goe. Ayæ gote quëwëñömīni botō ämo ate pöedāni,” angä.

¹⁴ Eñëninque Ootee tömengä nānō wīimöönæ ayaönænëña incæ ængæ gantidique Wëñængä nāna badancaya ïnate ö æninque edæ Equitobæ gocantapa. ¹⁵ Godinque Ootee nāni wencabo ïñömö Edode nānō wænguinganca quëwencæ gogadānimpa. Go quëwëñāni ïninque mönō Awënë Wængonguï ïmaï ante nānō apæñegainō ante ïinque

batimpa. “Botö Wëñængä Equitobæ quëwëñongante äñebo pongantapa,” ante Wængonguï beyä nê apænecä nänö yewæmongainö bai edæ do iinque batimpa.

Wëñænäni inänite Edode angä wënönäni wëñänipa

¹⁶ Edode guiquënë, Nëmö nê nö ëñänäni botö äñinö ante ëñänämaï inte dæ godänipa, ante adinque edæ ænguï bacantapa. Ænguï badinque tömengä, Wëñænäni inänite mäo wænödäni, angantapa. Äninqe tömengä, Mëa wadepo iñonte nëmö ta atamönipa, ante nê ëñänäni nani äñimpoga ante pönëninque, Mëa wadepo ëñadinäni tönö ayä ëñadinäni tönö Bedëë quëwënäni incæ Bedëë eyequeï quëwënäni incæ onguïñænänique inänite mäo wænödäni, angantapa. Ininque nê wënönäni wæätë awënë nänö adinänique inänite capo ado tedæ wënönäni wængadänimpa. ¹⁷ Wëñänäni wädäni ininque Wængonguï beyä nê apænegaingä Eedëmiya wodi iïmaï ante nänö angainö bai edæ iinque batimpa.

¹⁸ “Nämaa nani quëwëñömö nê Ca ca wæwënä nänä Ca ca wæpämö ëñänänitapa. Wäänä nê Yæ yæ äñönä inte,

Daquedä iñömö, Botö wëñænäni, ante wädä ëñänänitapa.

Dæ äñäni pönente wædinque wäänä ædö cæte piyänë cæquinää,” ante Eedëmiya wodi yewæmongacäimpa.

¹⁹ Ayä ate awënë Edode wængä ininque Ootee iñömö Equitobæ ayä quëwëninque wïimöñongä Wængonguï anquedo ponte a ongöninque tömengä ingante apænecantapa.

²⁰ “Ootee ëñëmi. Wëñængä ingante wænoncæ äñönäni incæ dobæ wëñänipa cæbii. Ængä gantite Wëñængä nana badancaya inate Idægobæ adodö ænte gocæbiimpa,” angä.

²¹ Ëñëninque Ootee iñömö edæ ængä gantidinque nana badancaya inate Idægobæ adodö ænte gocantapa. ²² Mäniñedë wæmpo Edode wængä ininque, Wæätë tömengä wengä Adoquedao Oodeabæ awënë odeye bacantapa, ante tededäni ëñente wædinque Ootee iñömö, Botö Oodeabæ ædö cæte wæätë goquimoo, ante guïñente wæcantapa. Wæätë tömengä möwocodë wïimöñongä wacä angä ëñëninque Oodeabæ wodo tebä godinque Gadideabæ gocantapa. ²³ Godinque Ootee nani wencabo Näatadeta ponte quëwënänitapa. Ininque, Näatadënö ingampa, ante pemoncädänimpa, ante Wængonguï beyä nê apænegaingä nänö angainö bai cædinque wädäni ñowo mönö Codito ingante, Näatadënö, ante pemonte bai apænegadänimpa.

3

Wäö önömæca ponte apænecä ëñänäni

(Mäadoco 1.1-8; Odoca 3.1-9, 15-17; Wäö 1.19-28)

¹ Mäniñedë Wäö mönö nê æpänë guidönongä inte Oodeabæ önömæca ponte apænecä ëñengadänimpa. ² Ponte apænëdinque tömengä, “Öönädë Awënë incæ inguipoga tömämæ Awënë Odeye bacæcäimpa cæminii. Minitö wënæ wënæ cædinö ante, Ancaa wæwente awædö, ante ñimpo cæädäni,” ante Wäö apænecä ëñänänitapa.

³ Mänömainö ante nê apænecä ingantedö ante Wængonguï beyä nê apænegaingä Itaiya wodi iïmaï ante do yewæmongacäimpa.

“Önömæca iñömö adocunque ogä tedete aa pecæcäimpa.

‘Awënë nänö ponguinö ante minitö tee moncate bai cæädäni.

Taadö töinö pinonte bai cædinque minitö wënæ wënæ mini cædinö ante edæ wido cæädäni,’ ante aa pecä ëñengäimpa,”

⁴ Ante Itaiya wodi nänö nê angaingä inte Wäö ñowo pongantapa. Tömengä weocoo ante cämeyo ocaguincoo nonte badonte wëñate mongäëninque pacadeyænta ante ämontai badonte encadeyæñongäimpa. Tömengä cænguï ante ñäwäiique cæninque tömengä bequi ante guïñëmænque ade bete quëwëñongäimpa. ⁵ Quëwëñongä, Eedotadëë quëwënäni tönö Oodeabæ tömäo quëwënäni tönö Oododänonga biyönæ tömäo quëwënäni tönö tömengä weca tate bee tëninque äñänitapa. ⁶ Bitö ämaï näwangä wënæ

wënæ cæte quëwëmöni inte wæmönipa, ante wædäni ëñëninque Wäo Oododänö æpænë guidongä guidänitapa.

⁷ Ayæ Paditeoidi tönö Tadoteoidi guiquënë Wäo nänö guidöñömö pönäni adinque tömengä ayæ wæætë tömënäni inänite angantapa. “Tæntæ pæimäni bai inöminäni inte mīnitö iñömö ëñënämaï cæte quëwëmīnīpa. Oo pōnī wænompadāni, ante æcānō wææ angä ëñëninque wodii winonte pōmīnīi. ⁸ Iñæmpa Wængonguī Awënë gāmænō mīnitö dicæ ocæ ëmænte poncæ cæmīniyaa. Nō cæte pōmīnī ininque mīnitö nē ocæ ëmænte pōnāni nāni waa cædō bai adobāi waa cædāni. ⁹ Ayæ nāmā wææ äninque, ‘Mōnitö adomōnique docā Abadāo wodi pæimōni inte mōni quëwenguinque imōnīpa,’ ante mīni tedewënō ante pōnënāmaï inguënë quëwëmīnīi. Iñæmpa Wængonguī, Botö pæināni bacædänimpa, angä bai dicacoo incæ dobæ tömengä pæināni bai bacædönimpa. ¹⁰ Edæ awæ yecæte ante awænca nāni mæ yequinca eyewa pōnī næænāni bai Wængonguī nänö panguinca næænte bai do edæ a ongongampa. Tömengä wainca ante a ongöñongä ömæcawæ bai wīi pōnente cædāni adinque awæncaca wægo yete godö gongapamö iya tante bai cæcæcäimpa, ante ämo ëñëmäimīnīpa.”

¹¹ Ayæ, “Mīnitö wënæ wënæ mīni cædinō ante wido cæcæmīnīpa, ante cædinque botö mīnitö imīnite æpænë guidōmo guimīnīpa. Incæte botö mänōmaï cæbo ate wacā ayæ poncæcäimpa. Tömengä iñömö tæi ëmongä ewocadongä iñongante botö wæætë wædāmo inōmo inte tömengä awæncata incæ ædō cæte godö ænte nææmäimoo. Tömengä da pōnongä pōninque Wængonguī Tæiyæ Waëmö Önöwoca incæ pō guidinque mīnitö mīmō mēnongacæcäimpa. Ayæ mīnitö wënæ wënæ cædinō ante gonga tante bai tömengä cæcæcäimpa. ¹² Waocā, Todigo tömēmō wati wati tænōninque botö tænōniñömö önōmancaque baquinque botö apænte æninque waiña tömāmō oncōnē da wencæboimpa, ante timpodæ næænte wo ææntodö wo ææntodö cædinque ontapocoo wææincoo wadæ nēmænte wo ewengampa. Waocā mänōmaï wo ewencæte ante timpodæ næængä bai mönō nē Ponguingä iñömö adobāi oo pōnī apænte ancæcäimpa. Todigo waiñacooque oncōnē da wente nē mangä bai tömengä adobāi nē waëmö ināni inänite apænte ængä ate tömënäni tömengä nempo guicædänimpa. Wæætë wadæ nēmænte wo ewente bai cædinque tömengä nē ontapocoo wææincoo bai ināni inänite cōwë bæcoyömö iya tangä gonte wæcædänimpa,” ante Wäo apænægacäimpa.

Itota æpænë guicampa

(Mäadoco 1.9-11; Odoca 3.21-22)

¹³ Wäo ayæ apæneyongä Itota iñömö Gadideabæ quëwëninque, Wäo botö imote æpænë guidongä guicæboimpa, ante cædinque Oododänonga pongantapa. ¹⁴ Ponte, Guidömi guiiboe, äñongante Wäo wæætë wææ äninque,

—Botö waëmö imopa diyæ bitö imite guidōmo guiquimīi. Bitö wæætë botö imote guidömi guiibo bai waa incædönimpa.

¹⁵ Ante wæyongante Itota wæætë,

—Cōwë ee cæbi, ämopa. Wængonguī nänö änō ante tömänö ëñente nō cæmō inguënëmö imompa.

Ante apænecä ëñëninque Wäo Ao ante ee guidongä guiigacäimpa. ¹⁶ Guiite æpæ do tao gongænte æmō ayongä iñontobæ öönæ incæ wëä godōmonte bayö Wængonguī Önöwoca incæ equemö wææ bai tömengäa wææ pō guicä acantapa. ¹⁷ Wææ guicä ayongä edæ öönädë inö apænedinque, “Mäningä iñömö botö Wëñængä inongä inte botö nē waadecä ingampa. Tömengä ingante adinque botö watapæ tobopa,” ante öönädë inö apænecä ëñengacäimpa.

4

Itota incæ wënæ wënæ cæcæcäimpa, ante wënæ cæcampa

(Mäadoco 1.12-13; Odoca 4.1-13)

¹ Ayæ mäniñedë edæ, Itota iñömö wënæ angä ëñente æbänö cæquingää, ante Wængonguī Önöwoca incæ Itota ingante önömæca mäicä æigacäimpa.

² Æi quëwëninque tömengä wantæpiyæ coadenta eönæ mänimpoönæ itædë woy-owotæ cænämaï quëwëninque gue ænente wægacäimpa. ³ Gue ænente wæyongä wënæ awënë, Wënæ wënæ cæe, ante nê änewengä inongä inte Itota weca pöninge,

—Bitö Wængonguï Wëmi imitawo. Näwangä i inique dica incæ päö ämi ba cæ-maïmipa.

⁴ Äñongante Itota iñömö,

—“Cænguinque cænte ædö cæte quëwenguïi. Wængonguï nänö apænedö tömänë ëñente cædinque waocä cænguï cænte bai quëwencæcäimpa.” Mänömainö ante Wængonguï beyæ yewæmonte ongö apa änewëë, äninge Baa angantapa.

⁵ Wënæ awënë ayæ Itota ingante Eedotadëë tæiyæ waëmö nâni quëwëñömö ænte mäocä gocantapa. Ayæ Wængonguï oncö ñænænconga wænömënæca ænte mäi gönongä næ gongængantapa. ⁶ Næ gongæñongante wënæ awënë wæætë,

—Bitö Wængonguï Wëmi imitawo. Näwangä i inique bitö to wæibi ate dodäni iïmainö ante nâni yewæmongainö bai iïnque ba abaimpa.

“Bitö beyæ ante cædinque Wængonguï tömengä anquedoidi inänite angä pöninge, tömënâni bitö imite wææ aate iñæ æmpodäni ate

bitö dicaa tee tëwadämaï incæbiimpa,”

ante yewæmonte ongompa cæbii.

⁷ Äñongante Itota,

—Iñæmpa godömenque ante yewæmongatimpa. “Bitö Awënë bitö Wængonguï iñongante bitö wæætë edæ, ‘Ëñënämaï cæbo incæte mönö Awënë Wængonguï æbänö cæquingäa,’ ante acæte ante cædämaï incæbiimpa,” ante adobai wææ yewæmonte ongö apa änewëë, ante Itota angantapa.

⁸ Ayæ wæætë wënæ awënë Itota ingante æibæ pönï onquiyaboga mäicä æicantapa. Æi ongöñongä wënæ awënë iñömö awënë odeye ömæcoo inguipoga tömäo ongöñömæcoo adoyömö a ongonde bai ado tedæ odömöninge awënë odeyeyidi waa pönï nâni ëmönö adobai odömongä acantapa. ⁹ Itota ingante apænedinque wënæ awënë,

—Bitö botö weca ædæ wæænninge, Tatänabi bitö Wængonguï Awënë bai inömi imipa, ante watapæ apænebi ëñëmoe. Mänömainö ante apænebi ëñëninge botö wæætë, Mäniömæ tömäo ongöñömæ pönömo æninge bitö tömämæ Awënë babaimipa, ante wënæ incæ änewengantapa.

¹⁰ Änewëñongante Itota wæætë,

—“Bitö Awënë Wængonguï weca ædæ wæænninge tömengä ingante, Bitö Wængonguï imidö angüënë, ante watapæ apænecæbiimpa. Ayæ tömengä adocanque ingante nê cæbi incæbiimpa,” ante Wængonguï beyæ yewæmongatimpa cæbii. Botö weca ongönämaï gobæwe, angantapa. ¹¹ Angä go ate Wængonguï tömengä anquedoidi pöninge Itota beyæ pönö waa cægadänimpa.

Gadideabæ ponte Itota mä apænecampa

(Mäadoco 1.14-15; Odoca 4.14-15)

¹² Ayæ quëwëñongä, Wäö ingante dobæ tee mönedänipa, ante tededäni ëñente wædinque, Itota wæætë Gadideabæ wadæ gogacäimpa. ¹³ Wadæ godinque tömengä Näatadeta ponte wodo pänta godinque godömenque go gäwapæ yæwedeca Tabodöïdi tönö Nempatadiidi nâni owogaimæ iñömö pöninge edæ Capënaömö nâni quëwëñömö ponte quëwengantapa. ¹⁴ Itota mäniñömö ponte quëwengä inique Itaiya wodi Wængonguï beyæ nê apænecä nänö angainö bai mäniñedë iïnque batimpa.

¹⁵ “Tabodöömæ tönö Nempatadiibæ ingäiñömö,

Gäwapæno gämænö godö,

Oododänö æmæmäa iñömö,

Gadideabæ iñömö wii oodeoidi wadäni nâni quëwëñömö impa.

¹⁶ Nê ëñënämaï inäni wëmö iñömö contayönäni,

tömënäni weca ñäö guinæ tamö bai adänitapa.

Tömënäni nâni wænguimämo oo iñonte wëmö iñömö contayönäni,

mönö Codito ñäö ëmongä inte do pongä adänitapa.”

Ante Itaiya wodi nänö yewëmongainö bai ante cædinqe Itota mänñömö ponte apænecä ëñënanitapa.

¹⁷ Itota mänñedë iimaï ante mä apænecä ëñënanitapa. “Öönädë Awënë incæ inguipoga tömämæ Awënë Odeye oo bacæcäimpa cæminii. Minitö wënæ wënæ cædinö ante, Ancaa wæwente awädö, ante pönente ñimpo cædäni,” ante cöwë apænecä ëñengadänimpa.

*Në gæyæ dadöwënäni inänite Itota aa pecampa
(Mäadoco 1.16-20; Odoca 5.1-11)*

¹⁸ Ayæ mänñi pöninqe Itota gäwapæ Gadideapæ yæwedeca gote cægonte ayongä Timönö Pegodo nani änogä tönö Æntade nana caya inate acantapa. Në gæyæ dadöwëna inöna inte tömëna ñöwo dicamöñæ apænë wo guitodonte dadöwëñöna Itota gote acantapa. ¹⁹ Tömëna inate Itota,

—İñäna, botö miñæ edæ tee empo pöeda, ämopa. Në dadonte ænte pömïna inte botö weca pönöminate botö pönö cæbo ate minatö wæætë në apænemïna badinqe waodäni inänite në ænte pömïna bacæminaimpa, angantapa.

²⁰ Angä ëñëninque tömëna dicamöñæ do ëmö cæte godinqe Itota miñæ edæ tee empo wadæ godatapa.

²¹ Mänñömö ongonte wadæ godinqe Itota wada inate Tebedeo wëna Tantiago tönö Wäö nana caya inate acantapa. Tömëna mæmpo tönö wipodë ongonte dicamöñæ tadömoncöna adinqe Itota tömëna inate, Botö miñæ pöeda, angä. ²² Æñëninque tömëna Ao äninque Tebedeo wëna Tantiago tönö Wäö wæmpocä ingante wæætë, Mæmpo ëñëmi, änatapa. Në cædäni tönö wipodë owote cæyöminite mönatö bitö imite ëmö cæte godinqe Itota miñæ gomönapa, äninque adodaque wadæ gogadäimpa.

*Tæiyænäni inänite Itota odömonte apænecä ëñënanipa
(Odoca 6.17-19)*

²³ Ayæ Gadideabæ tömämæ godinqe Itota iñömö Wængonguï apænecä nani ëñente yewëmongainta ate odömöincönë go guite odömonte apænegacäimpa. Öönädë Awënë incæ inguipoga tömämæ Awënë oo badinqe waa cæte aacæcäimpa, ante apænecä ëñengadänimpa. Ayæ waodäni wënæ wënæ inte nani wæwënö ante ayæ quïëmë beyæ wæncæ cæte wädäni incæ Itota tömënäni nani wädö ante pönö cæcä ate tömänäni waa badänitapa. ²⁴ Adinqe, Itota mänömaï cæcampa, ante Tidiabæ tömämæ gode änanï ëñëninque waodäni pöninqe në wënæ wënæ inte wæwënäni inänite tömengä weca ænte pönänitapa. Ayæ nantate wæwënäni tönö wënæ inte quëwënäni inänite ænte pöninqe dowænte inäni tönö cömäinäni inänite tömengä weca ænte pönäni adinqe tömengä godö cæcä ate në wënæ wënæ ininäni inte tömänäni waa bagadänimpa.

²⁵ Ayæ Gadideabæ quëwënäni tönö Decapodibæ quëwënäni pönönäni wädäni Ee-dotadëë quëwënäni tönö Oodeabæ quëwënäni ayæ Oododänö æmæmäa quëwënäni tæiyænäni pöninqe tömengä miñæ tee empote gogadänimpa.

5

Itota änanquidi æite apænecä ëñënanipa

¹ Tæiyænäni pönäni adinqe Itota iñömö änanquidi æi tæ contayongä tömengä miñæ në godäni pönäni. ² Ate tömengä iñæ ænete nanguï tedete iimaï ante odömonte apænecä ëñengadänimpa.

*Waocä iimaï cæte watapæ tote quëwencæcäimpa, ante
(Odoca 6.20-23)*

³ “Waodäni, Botö waëmö ewocabopa diyæ öönädë Awënë weca go guiquimoo, ante në wädäni iñömö tömënäni nani watapæ toquinque edæ öönädë Awënë Odeye nempo tömënäni quëwenguinö do ëadänipa,” angantapa.

⁴ “Nē wæwente quēwēnāni iñōmō tōmēnāni nāni watapæ toquinque wædānīpa. Edæ Wængonguī tōmēnāni inānite waadete godō cæcā ate tōmēnāni wampo pōnencædānīpa.”

⁵ “Nē gānē pōnente ædæmō cæte quēwēnāni iñōmō tōmēnāni nāni watapæ toquinque edæ inguipoga tōmāmæ ænīnque awēnēidi bai bacædānīpa.”

⁶ “Wængonguī nō pōnī nānō entawēnō bai adobaī entawencæboīpa, ante æcānō cænguī cæīnente bai wæda, æcānō tepæ gæwænte bai wæda tōmēnāni iñōmō nāni watapæ toquinque wædānīpa. Edæ tōmēnāni tōmo cænte bai Wængonguī nānō nō entawēnō ænte ædæmō entawente tocædānīpa,” ante Itota apænecantapa.

⁷ “Wadāni quēwencædānīpa, ante nē godō waadete waa cædāni iñōmō tōmēnāni nāni watapæ toquinque cædānīpa. Edæ mǎnōmaī nē cædāni inānite wadāni wæætē, Quēwencæmīnīpa, ante nǎēmǎ apænedīnque godō waadete waa cæcædānīpa.”

⁸ “Mīmō ñǎō bai nē entawēnāni iñōmō tōmēnāni nāni watapæ toquinque edæ Wængonguī ingante do acædānīpa,” ante apænecantapa.

⁹ “Guēadō guēa pīināmaī iedāni, ante nē wææ wææ ānāni iñōmō tōmēnāni nāni watapæ toquinque edæ wææ ānānīpa. Tōmēnāni inānite wadāni edæ, Mīnitō Wængonguī wēñǎēmīni imīnīpa, ante do apænedāni ēñente tocædānīpa.”

¹⁰ “Nō cædāni beyænque wadāni pīinte pānāni nē wæwēnāni iñōmō edæ tōmēnāni nāni watapæ toquinque wæwēnānīpa. Tōmēnāni öönædē Awēnē Odeye nempo nāni quēwengūinō edæ do ēadānīpa.”

¹¹ “Wadāni botō beyǎe pīinīnque mīnitō imīnite babæ ante ānānitawo. Mīnitō imīnite edæ togænte pānānitawo. Īnīnque edæ mīni watapæ toquinque impa. Ayǎe, Nē wīwa cæmīni imīnīpa, ante wadāni pīinte ānewēnāni wæmīni ĩnīnque edæ mīni watapæ toquinque impa. ¹² Edæ, Öönædē mönō ænguīnō ante nanguī ongompa, ante pōnēnīnque mīnitō ñōwo wadāni nāni pīinte cæyedē incæ watapæ toedāni. Edæ mīnitō imīnite pīinte pānāni bai mīnitō ayǎe dæ ānedē Wængonguī beyǎe nē apænegaināni inānite adobaī pīinte pangadānīpa, ante toquēnē wæwēmīni,” ante Itota odōmonte apænegacāīpa.

Cati bai imīnīpa. Ñǎō bai imīnīpa, ante (Māadoco 9.50; Odoca 14.34-35)

¹³ Godōmenque apænedīnque Itota, “Mīnitō iñōmō inguipoga quēwēnāni beyǎe cati quīmonte cæī bai inte ongōmīnīpa. Īnīnque mīnitō cati bai yǎepǎe ēmonte bai inōmīni inte wæætē edæ nongǎemonte bai badāmaī iedāni. Cati iñōmō yǎepǎe ēmōnāmaī nongǎemonte ba adīnque edæ æbānō cæte wæætē yǎepǎe waa ēmonguī. Waa impa cænguīnānī anguēnē. Īñǎempa wido cæte nāni pīnǎ gāwate cængongūnque babāīpa,” ante odōmonte apænecantapa.

¹⁴ Ayǎe, “Ñǎō bai ēmōmīni inte mīnitō iñōmō edæ inguipoga quēwēnāni beyǎe tīca ēnente bai cædīnque, Edonque acædānīpa, ante cæmīni imīnīpa. Ānanquīdī tæiyǎenāni mǎnonte quēwēnāni ĩnīnque edæ ædō cæte wē womonte inguī. Edæ edonque abāīpa. ¹⁵ Waocā ædō cæte tī wodōnote godō cængǎenē boo cæcaquīngǎā anguēnē. Edæ, Mönō quēwencabo edonque acæīpa, ante cædīnque waocā tī wodōnodīnque wænōmēnæcapaa cō cæcā ate edonque bæco aquīnāni. ¹⁶ Mīnitō guīquēnē, Wadāni mönō waa cædīnō adīnque mönō Mǎempo öönædē nē quēwengǎ ñǎō bai tōmengǎ nānō ēmōnō ante waa ate apænecædānīpa, ante cædīnque cōwē ñǎō bai pōnēnīnque waa cæte quēwēdāni,” ante Itota odōmonte apænecantapa.

Wængonguī nānō wææ angāinō ante

¹⁷ Ayǎe ĩmaī ante godōmenque odōmonte apænecantapa. “Wængonguī, ĩmaī cæedāni, ante Mōītee wodi ingante angǎ ēñēnīnque tōmengǎ nānō wææ yewǎemongāinō ante ayǎe Wængonguī beyǎe nē apænedāni nāni yewǎemongāinō ante mīnitō, Mānīnō ante Itota wido cæcæte ante pongampa, ante ædō cæte pōnēmīni. Īñǎempa wīi wido cæcæte ante pōnīmo inte botō tōmēnāni nāni angāinō bai ĩnque cæbo bacæīpa,

ante pómo imopa. ¹⁸ Edæ nāwangä ämopa. Inguipoga tönö öönæ iinque baganca Wængonguü, İımaı cædäni, ante nänö wææ angainö iñonte adodeque pönı wê wom-onte badämaı ingäimpa. Edæ guiyä tänoncaı incæ picæ yewæmönı incæ adodeque cöwê wadæ cædämaı iñonte tömengä nänö angainö baı tömänö adodö iinque cæte bacäimpa. ¹⁹ İinque Wængonguü nänö wææ angainö ante æcänö adodeque pönı ante êñênämaı cæda iñömö tömengä iñömö edæ öönæde Awënë Odeye nempo quëwengä incæte önonganque pönı inguingänö anguënë. Ayæ adobaı Wængonguü nänö wææ angainö adodeque pönı ante odömöninque, Mänıne ante êñênämaı cædäni, ante æcänö odömönte apæneda tömengä iñömö öönæde Awënë Odeye nempo quëwengä incæte önonganque inguingänö anguënë. Wæætê mäninö Wængonguü nänö wææ angainö ante nê êñente cædinque æcänö adodö ante odömönte apæneda guiquënë tömengä wæætê öönæde Awënë Odeye nempo quëwëninque ñænængä pönı inguingänö anguënë. ²⁰ Incæte mïnitö imïnite İımaı ämopa. İımaı cædäni, ante nani wææ yewæmongainö ate nê odömönäni nani cægancaque nö cæmïni incæte Paditeoidi nani cægancaque nö cæmïni incæte mïnitö wïi godömenque nö cæmïni İinque mïnitö edæ öönæde Awënë Odeye nempo ædö cæte guıte quëwëmaimïniı,” ante Itota odömönte apænecantapa.

*Pïinte nani änö ante Itota odömönte apænecampa
(Odoca 12.57-59)*

²¹ Mänömainö ante apænedinque Itota godömenque odömönte apænecantapa. “Möıtee wodi iñömö, ‘Wacä ingante godö wænönämaı İe. Nê wænongä nänö apænte pante wæquinque impa,’ ante dodäni İnänıte tömengä nänö wææ angainö ante mïnitö iñömö do êñëninque Ao ämïnitawo. ²² Botö iñömö edæ godömenque ante nö ämopa. Nani caıpæ iñönäni æcänö tömengä tönıñacä ingante pïina iñömö tömengä nänö apænte pante wæquinque cæcampa. Ayæ tömengä tönıñacä ingante æcänö, Êñênämaı İmıpa, äna edæ tömengä ingante nê Apænte nani Äincabo weca nänö panguinque ænte gönoncædänımpa. Edæ wacä ingante æcänö, Bitö mımö ömædëmi inte wïi êñencædö, ante nê äna iñömö tömengä tadömengadænguıpo gonga bæcoyömö nänö wıdo cæquinque angampa töö,” ante Itota apænecäimpa.

²³ Ayæ, “Mänömaı beyæ bitö, Wængonguü quı, ante nani İya täımoga godoncæte ante tæcæ cædinque, Æ, botö tönıñacä ingante edæ wënæ wënæ cæbo pïingampa, ante pönëmi İinque, ²⁴ bitö godonguincoo nani İya täımoga gäänê ñönöninque bitö tönıñacä weca täno gote nö apæneyömi minatö guëa piyænê cæmïna ate bitö iñömö adodö ponte godöe,” angantapa.

²⁵ Ayæ, “Bitö İmite nê pïinte cæcä iñömö nê apænte anguinäni weca gönoncæte ante ænte idömæ goyongä bitö tömengä ingante waa apænebi êñëninque tömengä wæætê piyænê cædinque ee abaingampa. Edæ taadö godinque guëa waa apænedinque piyænê cædämaı İmına İinque tömengä iñömö nê awënë apænte anguingä weca ænte mäocä gobäımıpa. Ayæ awënë nê apænte angä ingante pædæ godongä äninque tömengä bitö İmite wæætê wææ wänongä ingante angä êñëninque tömengä wæætê bitö İmite bæı ongönte do tee mönebaingampa. ²⁶ Tee mönecä İinque edæ bitö godönte äınta tömanta pönı pædæ godönte tabäımıpa, ante ämo êñëmaımıpa,” ante Itota apænecäimpa.

Nani godö towëmämo ante Itota odömönte apænecampa

²⁷ Ayæ apænedinque, “Möıtee wodi, ‘Bitö nänöogængä İnämaı İñongante bitö godö mönämaı incæbiımpa,’ ante nänö wææ angainö ante êñëninque mïnitö Ao ämïnitawo. ²⁸ Botö godömenque apænedinque nö ämopa. Onquiyængä ingante wıwa toınente adingä iñömö tömengä nänöogængä İnämaı İñongante do godö monte baı mımö dobæ wentamö entawengampa.”

²⁹ Ayæ, “Bitö tömëmö İnö incæ adinque wënæ wënæ toınente babi İinque tömëmi adımö incæ o togæmönte baı cædinque wënæ wënæ bitö cædinö ante wıdo cæbi waa İmımpa. Wæætê bitö wënæ wënæ adımö wıdo cædämaı İinque bitö baö tömäo

tadömengadænguipo wido cæte baquïnö anguënë. ³⁰ Adobaï bitö önompoca tömëmæ inö incæ wænæ wænæ cædimi inte tömëmi cædimpo incæ aa wi æmpote baï cædinque bitö wænæ wænæ cædinö ante wido cæbi waa imaimpa. Edæ a wi æmpote wido cædämaï imi ininque bitö baö tömäo tadömengadænguipo wido cæte baquïnö anguënë,” ante Itota apænegacäimpa.

Näni pämwænte wædö ante Itota odömonte apænedinque
(Määteo 19.9; Mäadoco 10.11-12; Odoca 16.18)

³¹ Godömenque odömonte apænedinque Itota, “Ayæ, ‘Onquiyængä ingante æcänö pämwæinena tömengä inömwö yewæmwöinta ænte yewæmwöinque, Bitö imite æmwæwo pämwæmopa, ante yewæmwönte onquiyængä ingante godongä æncæcäimpa,’ ante dodäni näni angainö ante do ëñëninque Ao äminitawo. ³² Botö edæ wadö ante iimaï ante nö ämopa. Onquiyængä awëmwö todämaï ee quëwëñongante tömengä nänöogængä godö pämwængä ininque onquiyængä në towengä nänö baquinque wacä ingante godö möwengampa. Ayæ onquiyængä pämwænte goyongä wacä onguinængä tömengä ingante godö möninque adobaï në towengä bacampa, ante apænebo ëñëmaïminipa,” ante Itota apænegacäimpa.

Cöwë baquïnö anguënë, ante näni änewënö ante

³³ “Ayæ wæætë edæ, ‘Botö Wængonguï cöwë quëwengä baï botö änö cöwë baquïnö anguënë, ante ämi ininque Wængonguï ëñengä beyænque bitö äninö ante cöwë cædinque bitö wadö cædämaï incæbiimpa,’ ante Möitee wodi dodäni inänite angacäimpa. Minitö inömwö tömengä nänö wææ angainö ante ëñëninque Ao äminitawo. ³⁴ Botö wadö ante nö ämo ëñëedäni. Edæ mäninö, Botö änö nöingä baquïnö anguënë, ante änämaï iedäni. Ayæ mäninö ancæte ante minitö Wængonguï ëmwöwo ante apænedämaï imini incæte minitö, Öönæ täi ongö baï impa, ante apænedämaï iedäni. Inæmpa, Öönæ, ante ämini ininque minitö Wængonguï öönæde waa pöni nänö contayömö ante apænebaïmini apa änewëminii. ³⁵ Ayæ Wængonguï ëmwöwo ante änämaï ininque minitö, Imæca cöwë ongö baï botö änö cöwë baquïnö anguënë, ante adobaï apænedämaï iedäni. Inæmpa, Imæca, ämini ininque minitö Wængonguï pi cæwate nänö ongöñömö ante apænebaïmini apa änewëminii. Ayæ, Eedotadë cöwë ongö baï botö änö cöwë baquïnö anguënë, ante apænedämaï iedäni. Inæmpa Eedotadë inömwö mönö Tæiyæ Awënë Odeye ongongä apa änewëminii. ³⁶ Ayæ adobaï, Botö änö nöingä baquïnö anguënë, ancæte ante bitö, Tömëmo ocabo täi ongö baï impa, ante mini änewënö ante änämaï ie. Inæmpa bitö ocaguï wentamö encabi ininque bitö ædö cæte adoguinque pöni godö cæbi näämænta baquii. Ayæ näämænta encabi ininque bitö ædö cæte adoguinque pöni godö cæbi wentamö baquii anguënë. ³⁷ Ininque minitö Ao äinëmini inte ‘Ao’ äninque mäninque ædäni. Ayæ edæ Baa äinente wædinque ‘Baa’ äninque edæ mäninque ædäni. Godömenque äninque minitö edæ në wiwa cædongä angä beyænque äminipa töö,” ante Itota odömonte apænegacäimpa.

Näëmæ wænæ wænæ näni cædö ante
(Odoca 6.29-30)

³⁸ Ayæ godömenque odömonte apænedinque Itota, “Iimaï ante dodäni näni angainö ante ëñëninque Ao äminitawo. ‘Bitö godö cæbi beyæ wacä awinca tæigæmongä bacä ininque tömengä näëmæ cæcä beyænque bitö awinca adobaï tæigæmwömi bacæbiimpa. Ayæ bitö godö cæbi beyæ wacä бага tä tobæ gogacä ininque tömengä näëmæ cæcä beyænque bitö бага adobaï tä tobæ gogacæbiimpa.’ ³⁹ Botö wæætë wadö ante nö ämo ëñëedäni. Në wiwa pönö cæcä ingante näëmæ cædämaï iedäni. Edæ wacä bitö tömempaga inö pönö tamongä wædimi inte bitö wæætë æmwæmpaga inö dadi ëmwæmwönte ee ongömi wæætë tamongæ. ⁴⁰ Ayæ wacä, Bitö imite në apænte angä weca ænte godinque botö bitö weocoo æncæboimpa, ante cæyongä bitö mänincooque tömengä ingante pædæ godöninque wacoo bitö yabæ mongæncoo tönö ee abi ö æncæcäimpa. ⁴¹ Ayæ wacä bitö imite, Bado, mäninganca mongænte mäobi goboe, angä ëñëninque

bitö tömengä nänö äninganca mäobi goyongante ayä adonganca godömenque mongænte mäobi gocæ. ⁴² Ayä nê, Pönömi æmoe, angä ingante godömi ængæ. Ayä wacä, Bitö quinca pönömi ænte cæte ate wæætê pönömo æe, ante nê angä ingante bitö pæ gompodämaï incæbiimpa,” ante Itota apænegacäimpa.

Nê piinte änäni inänite waadete cæedäni, ante (Odoca 6.27-28, 32-36)

⁴³ Ayä apænedinque Itota, “Minitö dodäni nâni angainö ante do ëñëninque edæ Ao ämînitawo. Tömënäni iñömö, ‘Bitö guidengä ingante waadete cæe,’ äninque edæ, ‘Nê piingä ingante näëmæ piinte cæe,’ ante wææ änänitapa. ⁴⁴ Botö iñömö edæ wadö ante nö ämo ëñëedäni. Minitö imînite nê piinte cædäni inänite mînitö wæætê waadete cæedäni. Ayä mînitö imînite nê togænte pänäni beyä ante Wængonguï ingante apæneedäni. ⁴⁵ Mänömaï cædinque mînitö mönö Mæmpo öönædê nê quëwengä wëñæmîni bacæmîniimpa. Edæ nê wiwa cædäni beyä incæ nê waa cædäni beyä incæ Mæmpo Wængonguï angä nænque tamompa. Ayä nê nö cædäni beyä incæ nê nö cædämaï inäni beyä incæ Wængonguï angä cöönæ cæpa. ⁴⁶ Minitö guiquënë mînitö imînite nê waadedänique inänite waadete pönëmîni ininque mînitö mîni cædinö beyä ante dicæ paga ænguimîniyaa. Iñæmpa odömäno awënë beyä nê æwënäni incæ mînitö waadete pönenganca adonganca cædinque tömënäni inänite nê waadete pönënanique inänite waadete pönënanipa töö. Bitö godömenque cæbitawogaa. ⁴⁷ Ayä mînitö tönîñadänique inänite waadete apænedinque mînitö dicæ godömenque cæmîniyaa. Iñæmpa wadäni nê, Nämä cæte quëwenguïmo, ante nê ëñënämaï cædäni incæ mîni cædö bai adonganca cædäni apa quëwëmîni. ⁴⁸ Mönö Mæmpo öönædê quëwengä nê nö waa cædongä ingä bai mînitö adobai cædinque picæmîni badinque nö waa cæte quëwëedäni,” ante Itota odömonte apænegacäimpa.

6

Æbänö cæte waa cæquïi, ante Itota apænecampa

¹ Itota ayä godömenque iïmaï ante odömonte apænegacäimpa. “Minitö edæ, Wængonguï nänö änö ëñente nö cæbote, ante cæmînitawo. Ininque mînitö, Waodäni botö imote waa acædänimpa, ante änämaï inte wiï waodäni ayönäni cædinque waa cæedäni. Edæ, Waodäni botö imote waa acædänimpa, ante pönëninque cæmîni ininque mönö Mæmpo öönædê nê quëwengä iñömö mînitö cædi beyä wæætê pönönämaï imaingampa,” angantapa.

² Ayä, “Wadäni nê wadö ante wadö cædäni guiquënë, Ömaadäni inte nê wädäni qui, ante pædæ godoncæte ante cædinque, Botö æbänö waa pönî cæboo, ante tömänäni ponte waa acædänimpa, ante pönente todompeta nâni ancadeca we we öönänipa. Tömënäni mînitö odömöincönê go guiite ongöninque ayä taadö gote cægöninque, Botö waa pönî cæbo aedäni, ante yedæ änäni ëñente godongämæ pönäni ate tömënäni tömänäni ayönäni godönänipa. Bitö iñömö tömënäni nâni, Pönö waa acædänimpa, wädö bai wädämaï inte edæ pæ wëenete godöe. Tömënäni waodänique godö waa adäni æninque mäninque ænänipa. Wængonguï guiquënë waa adämaï incæcäimpa. Näwangä ämopa. ³ Bitö iñömö, Ömaadäni inte nê wädäni qui, ante godoncæte ante cædinque bitö guidengä eyequeï pönî ongongä incæ adämaï incæcäimpa, ante wææ cæe. ⁴ Mänömaï wææ cædinque awëmö godömi æncædänimpa. Mänömaï cæbi adinque bitö Mæmpo nê wëmö iñömö nê acä inongä inte awëmö bitö godönî ante wæætê eyepæ pönongä æncæbiimpa,” ante Itota angacäimpa.

Wængonguï ingante æbänö apænequïi, ante Itota apænecä (Odoca 11.2-4)

⁵ Ayä godömenque apænedinque, Itota, “Wadäni Wængonguï ingante apænedinque nâmanque ante nâni cæbai mînitö iñömö wiï adobainö ante Wængonguï ingante

apæneedáni. Mánináni guiquënë, Botö apænebo adinque waodáni pönö waa acædän-
impa, ante pönëwëninque mînitö odömöincönë go guidinque næ gongæninque Wæn-
gonguî ingante apænedänipa. Ayæ tömënäni nâni quëwëñömö ñænquedæmpo iñömö
gote næ gongæninque Wængonguî ingante apænedänipa. Nâwangä ämopa. Tömënäni
waodänique godö waa adâni æninque mäninque ænänipa. Wængonguî guiquënë waa
adâmaî incæcäimpa. ⁶ Bitö iñömö tömëmi oncönë guite odemö tee mönedinque mönö
Mæmpo në awëmö quëwengä ingante apænee. Mänömaî cæbi adinque bitö Mæmpo
wëmö iñömö në acä inongä inte awëmö bitö cædinö ante wæætë eyepæ pönongä
æncæbiimpa,” ante Itota odömönte apænecantapa.

⁷ Ayæ, “Nämä cæte quëwenguîmo, ante në änäni önonque nâni tedewënö bai
tededämaî inte mînitö nö cædinque Wængonguî ingante apæneedáni. Tömënäni iñömö,
Wantæpiyæ tedebo beyænque Wængonguî ëñencæcäimpa, ante babæ ante pönëninque
önöneque tedewënanipa cæmîni. ⁸ Mînitö iñömö edæ tömënäni önöneque tedete nâni
cædö bai edæ cædämaî iedâni. Iñæmpa mönö Mæmpo ingante apænedämaî iñömönte
tömengä mönö anguinö ante wëenëhedë do ëñengä apa tedewëmîni. ⁹ Ìninque edæ iïmaî
ante Wængonguî ingante apæneedáni.

‘Mönitö Mæmpo në öönædë quëwënömi inte ëñëmi.

Bitö ëmöwo Tæiyæ Waëmö ëmömi adinque mönitö bitö ëmöwo ante waa adinque
apænemönipa.

¹⁰ Bitö öönædë Awënë në ingaîmi inte inguipoga Awënë Odeyebi edæ bitö baquinque
quingæ pöe.

Öönædë owodâni ëñente cædâni bai inguipoga adobaî bitö änö ante edæ ëñente cæte
bacæimpa.

¹¹ Mönitö imönite bitö, Cænguî, ante iïmö iñö iïmö iñö bitö pönönî ñöwoönæ incæ eyepæ
pönömi ænte cæmönie.

¹² Mönitö imönite në waa cæquënänäni inte pönö wënæ wënæ cædâni adinque
mönitö godö ñimpo cæmöni quëwënanäni bai bitö në panguënëmi incæ adobaî cædinque
mönitö në waa cæquënëmöni inte wënæ wënæ cæmöni adinque pönö ñimpo cæbi
quëwëmönie.

¹³ Ayæ mönitö wënæ wënæ cæinente wædö ante bitö pönö wææ cæbi ate mönitö taadö
oda cædämaî inte wënæ wënæ cædämaî incæmönimpa.

Edæ në wîwa cædongä nempo ongönte wæyömönite bitö gä peyæmpote æmi
quëwencæmönie, ämönipa.

Tömëmique edæ Awënë Odeye tæi pîñæmi iñömi mönitö bitö nempo ongömönipa.

Nämä ñäö bai entawëmi inte bitö cöwë tæi ëmömi inömi iïmipa.

Amëe, ante, Nâwangä impa, ante apænemönipa.’

Mänömaînö ante Wængonguî ingante apæneedâni,” ante Itota odömönte apæne-
gacäimpa.

¹⁴ Ayæ godömenque odömönte apænedinque Itota iïmainö ante apænegacäimpa.
“Mînitö imönite wënæ wënæ cæyönänite mînitö godö ñimpo cæmîni ñininque mönö
Mæmpo në öönædë quëwengä adobaî mînitö wënæ wënæ cædinö ante pönö ñimpo
cæcä quëwëmaîmînipa. ¹⁵ Wæætë mînitö waodâni nâni wënæ wënæ cædinö ante ñimpo
cædämaî imîni adinque edæ mönö Mæmpo adobaî mînitö wënæ wënæ cædinö ante
ñimpo cædämaî inte pönö piincæcäimpa,” ante Itota apænegacäimpa.

Wængonguî beyæ ante æbänö cænämaî i, ante

¹⁶ Ayæ odömönte apænecantapa. “Wadö ante në wadö cædâni guiquënë iïmaî ante mä
pönëninque cædänipa. Wængonguî beyæ ante ee ate cænämaî inte botö wæwente bai
ëmömo adinque wadâni botö imöte waa acædänimpa, ante awinca nämönänipa. Mînitö
iñömö Wængonguî beyæ ante cædinque ee ate cænämaî imîni ñininque tömënäni nâni
cæbaî cædämaî iedâni. Wæætë nämönämaî inte Wængonguî beyænque ante cænämaî
iedâni. Nâwangä mînitö imönite ämopa. Tömënäni waodänique godö waa adâni æninque
mäninque ænänipa. Wængonguî guiquënë waa adâmaî incæcäimpa. ¹⁷ Bitö guiquënë

Wængongui beyænque ante ee ate cænāmaī inte cæbi ĩninqe awınca ñā mēmōnte ayæ ocabo öni pæcate cæe. ¹⁸ Bitö ee ate cænāmaī ĩmi ĩninqe, Waodāni edonque acædānĩmpa, ante ānāmaī inte wæætē, Mæmpoque acæcāĩmpa, ante mænōmaī cæe. Bitö mænōmaī cæbi adinqe mōnō Mæmpo nē wēmō ĩñōmō quēwengā ĩnongā inte wēmō ĩñōmō edonque adinqe awēmō bitö cædĩnō ante wæætē eyepæ pōnongā æncæbiĩmpa,” ante Itota apænegacāĩmpa.

*Öönædē mīni waa pōni manguincoo ante
(Odoca 12.33-34)*

¹⁹ Godōmenque odōmōnte apænedinqe Itota, “Tōmēmo māincoo, ante mancæte ante wædinqe mīnitō inguipogaque cayæ cænte to tamōnte ĩñōmō cabo tē gæte da wēnāmaī ĩedāni. Edæ nē ö ænāni bæ tate nāni ö ænguinque inguipogaque da wēmīni apa quēwēmīni. ²⁰ Öönædē ongoncoo guiquēnē to tamōnāmaī ĩmpa. Cayæ guidāmaī ĩ ĩninqe māincoo wodāmaī ongōmpa. Ayæ nē ö ænguināni adobaī māniñōmō bæ tate guidāmaī ĩnāni ĩninqe māincoo cōwē wē wodōnāmaī ee ongōmpa. ĩninqe, Waadete mīni cædĩncoo cabo tē gæte baī cædinqe mīnitō öönædē waa pōni ĩncoo mīni ænte manguinque ñōwo ĩñōmō waodāni ĩnānite waadedinqe ee cæedāni. ²¹ Edæ waa pōni mīnitō māincoo ongōñōmō mīnitō māniñōmō adoyōmō quēwencæte ante wēmīni ĩmīnĩpa, ante adinqe botō mænōmainō ante apænetabopa,” ante Itota odōmōnte apænecantapa.

*Awinca wainca mōnō ĩmōnō ante
(Odoca 11.34-36)*

²² Ayæ odōmōnte apænedinqe, “Baonga quēwēninqe mōnō edonque adinqe cæcāĩmpa, ante mōnō awınca ĩmōmōmpa. ĩninqe awınca wainca ĩmōnte edonque ate baī bitö mīmōno adobaī ñāö entawēninqe, Nō cæbote, ante pōnēmi ĩninqe bitö baonga nō cæte quēwēmaīmĩpa. ²³ Wæætē edæ awınca wīi wainca ĩmōninqe adāmaī inte baī wentamō entawēmi ĩninqe bitö, Wīwa cæbote, ante mīmōno pōnēñōmite bitö baonga wīwa cæbaīmĩpa. Edæ mīmō ñāö entawēñōmi wentamō ba ĩninqe bitö quēwenguimāmo mæ māmōnte baī baquinō anguēnē,” ante Itota apænecantapa.

*Wængongui beyæ cædinqe māincoo beyæ cæqui
(Odoca 16.13)*

²⁴ Ante apænedinqe Itota ayæ odōmōnte apænecantapa. “Mēnaa awēnēna bayōnate waocā ĩñōmō mēnaa awēnēna nāna ānō ante ædō cæte ĩñente cæquingāā. ĩñæmpa adocanque ingante pīininqe tōmengā wacā ingante waadebaingampa. Wæætē ĩingā mīñæ tee empo godinqe tōmengā māningā ingante edæ wīwa adinqe ĩmō cæte gobaingampa. Mīnitō adobaī Wængongui beyæ ante nē cæmīni inte ædō cæte māincoo beyæ ante cæte quēwenguimīni,” ante Itota angacāĩmpa.

*Mæmpo Wængongui mōnō ĩmōnte aacampa, ante
(Odoca 12.22-31)*

²⁵ Āninqe, Itota ayæ godongāmæ odōmōnte apænedinqe, “Mænōmaī beyæ botō mīnitō ĩmīnite ĩmaī āmōpa, angantapa. Mīnitō inguipogaque mīni quēwenguimāmo ante wædāmaī ĩedāni. Cængui bequi ante ayæ weocoo ante wædāmaī ĩedāni. Cængui cænte beyænque mōnō dicæ quēwēmōngaa. Weocooque mōnō mōngænō beyænque dicæ quēwēmōngaa. Mōnō quēwēmāmo ĩñōmō godōmenque ĩmpa. ²⁶ Ayamōidi awænæca nē cæwodāni ĩnānite amīnitawo. Tōmēnāni dicæ tōmēmō mīnte pæ ate tā pete daga wente mænāniyaa. Incæte mōnō Mæmpo öönædē quēwēnongā inte wæætē tōmēnāni ĩnānite eyepæ godongā cænāni aedāni. Mīnitō guiquēnē ayamōidi ĩnāmaī ĩñōmīnite Wængongui mīnitō ĩmīnite godōmenque waa adinqe eyepæ pōnongā cænte apa wæwēmīni. ²⁷ Edæ Wængongui nānō anganca quēwenguēnēmīni inte mīnitō, Wantæ ĩño incæ godōmenque quēwēmōte, ante wæwēmīni incæte edæ ædō cæte nāmā cædinqe godōmenque wantæpiyæ quēwenguimīni.”

²⁸ Äninqe Itota godömenque odömonte apäñecantapa. “İninqe mīnitö, Weocoo quincodö wēñaquīi, ante pönente quīnante wæwēmīni. İñæmpa ongaicoo ömædē pæ iñömö weocoo ante daque daque dadāmaī inte wodonte tināmaī tömenque pæ aedāni. ²⁹ Incæte Awēñē Tadömö wodi waëmoncoo pönī ēñagaingā incæ wīi ongai baī ēñagacäimpa. Ongai iñömö godömenque waëmö pönī ēnodānīpa. ³⁰ Gaguīmæ iñömö iimö ate edæ gongapamö guitodonte tanguinque pæ incæte ñöwoönæ Wængonguī pönongā waëmö wēñate ēnopa. İninqe, Waëmö ēnodö nē pönongā inte Wængonguī mönö imonte godömenque eyepæ pönī pönongā ænte wēñacäimpa, ante pönēmīniyaa. ³¹ İninqe mīnitö, ‘Quīmönö impa cænguīmöö,’ ante, ‘Quīmænö impa bequīmöö,’ ante ayæ, ‘Quincodö impa wēñaquīmöö,’ ante pönēninqe guīñente wæwēnāmaī iedāni. ³² Mäninö ante wadāni nē ēñēnāmaī ināni nāni cabo nāni cabo wædāni incæte mīnitö guiquēñē, Mönö æinente wædö ante mönö Mæmpo iñömö edæ do ēñengampa, ante pönēninqe edæ guīñente wædāmaī incæmīnīmpa. ³³ Wæætē edæ, Wængonguī Awēñē Odeye nempo quëwencæboimpa, ante nanguī cædinque mīnitö, Tömengā nö cæte nānö waa quëwēñö baī adobaī nö cæte waa quëwencæboimpa, ante adobaī nanguī cædāni. Mänömaī quëwencæte ante täno wæmīni adinque Mæmpo Wængonguī mäninö ante do edæ eyepæ pönī pönongā æñömīni mänincooque mīni wædö ante adobaī eyepæ pönongā æncæmīnīmpa. ³⁴ Mänömaī i ininqe, İimö ate æbänö cæquīi, ante guīñente wædāmaī iedāni. Edæ iimö ate mäninö ante pönēninqe eyepæ pönente inguīmpa. İninqe mīnitö, Ñöwoönæque æbänö cæquīi, ante guīñente pönēninqe mäninganca pönente quëwēdāni,” ante Itota odömonte apäñegacäimpa.

7

Wadāni inānite apænte änāmaī iedāni, ante (Odoca 6.37-38, 41-42)

¹ Mänömainö ante odömonte apäñedinque Itota godömenque apäñegacäimpa. “Mīnitö wacā ingante, Wēnæ wēnæ imīpa, ante apænte änāmaī iedāni. Edæ mīni apænte wæquinque mīnitö wadāni inānite apænte äminīpa. ² Mīnitö wadāni inānite tee mante godömīni nāni ænganca wæætē adoganca pönönāni æncæmīnīmpa. Ayæ mīni apænte anganca adoganca apænte änāni wæcæmīnīmpa. ³ Bitö tönīñacā wædænque wēnæ wēnæ cæcā iñongante bitö guiquēñē nanguī bitö wēnæ wēnæ cædinö ante pönēnāmaī inte quīnante tömengā ingante piinte änewēmīi. Tömengā edæ awinca guiyā mä owo ëmongā baī entawente wæyongante bitö wæætē awæmpa wææ ëmongā baī wææ entawēmi inte ædö cæte ate baī tömengā ingante apænte ämīi. ⁴ Edæ tömēmi awinca awæmpa wææ ëmonte baī bitö wēnæ wēnæ adimö ëmömi inte bitö tönīñacā ingante, ‘Biwī, bitö awinca guiyangā mäë owo baī ate æ wimömoe,’ ante edæ abīpa diyæ æ wimonguīmīi. ⁵ İñæmpa wadö tedete wadö cædömi inte bitö edæ tömēmi awinca awæ wææ ongompa täno wido cæte ate edonque adinque bitö tönīñacā awinca guiyā mä owodö æmoncæbiimpa.”

⁶ Äninqe Itota godömenque apäñedinque, “Guintaidi inānite, Tömēnāni cænguī, ante tæiyæ waëmö cænguī godönānitawoo. Edæ godönāmaī ināni baī mīnitö adobaī Wængonguī nānö tæiyæ waëmö apäñedö ante nē Baa änāni inānite apäñedāmaī iedāni. Ayæ odæ wængänāidi weca waodāni wamoncoo waa pönī ëmoncoo wææntodönāmaī ināni baī mīnitö adobaī Wængonguī beyæ waa pönī nāni apäñegainö ante nē ēñente cædāmaī ināni inānite apäñedāmaī iedāni. Edæ odæ wængänā pinā gāwa baö wänā ñænte baī cædinque tömēnāni ēñēnāmaī inte cædinque dadi ëmænte tömēmīni baö wangö pocænte baī pīimāinānīpa, ante mīnitö apäñedāmaī ñīne cædāni,” ante Itota apäñegacäimpa.

Pönömi æmoe, ante mönö angäimpa, ante (Odoca 11.9-13; 6.31)

⁷ Ayæ apäñedinque Itota, “Pönömi æmoe, ante nē angā baī cædinque mīnitö mīni ænguīnö ante Wængonguī ingante apäñeedāni. Æyömönö iī, ante nē diqui diqui mingā

baï cædinque mīnitō, Æbānō īi, ante ædæmō ēñencæte ante Wængonguī ingante wede pōnente apæneedāni. Odemō mōnitō beyæ wi ænecæimpa, ante aa pecā baï cædinque mīnitō, Æbānō cæquimoo, ante ēñencæte ante Wængonguī ingante nanguī apæneedāni. ⁸ Edæ, Pōnōmi æmoe, ante nē ānāni īñōmō edæ do ænānīpa. Nē diqui diqui mīnāni adobaï do adānīpa. Ayæ odemō ponte nē aa pedāni tōmēnāni nāni guiquinque edæ do wi ænete baï bacæimpa.”

⁹ Ayæ, “Bitō waobi īnōmi inte ēñēmi. Bitō wēñængā cænguī ante pāo angā ēñēninque bitō dicæ dicaque pædæ godōmiyaa. ¹⁰ Gæyæ angā īninque bitō tæntæ incæ dicæ pædæ godōmiyaa. ¹¹ Mīni waocabo nē wīwa cædōmīni incæ, Quīnō waa ī, ante ēñēninque mīnitō wēñænāni īnānite waëmoncooque godōmīni ænānīpa. Īninque mōnō Mæmpo öönædē nē quēwengā īñōmō nē ānāni īnānite waëmoncooque ante godōmenque pōnongampa,” ante Itota odōmonte apænecantapa.

¹² Ayæ, “Mīnitō, Waodāni botō īmote waa cædāni æninque waa tobaïmopa, ante wæmīnitawo. Īninque mīni ante wædō baï ante mīnitō tōmēnāni īnānite adobaï waa cædāni. Māniñonque ante wææ ancæte ante dodāni, Īmaï cædāni, ante wææ angadānīpa. Ayæ Wængonguī beyæ nē apænedāni adodō ante ancæte ante yewæmongadānīpa. Īninque botō ānō baï cædinque mīnitō tōmēnāni nāni angāinō baï do edæ cæbaïmīnīpa,” ante Itota odōmoncæte ante apænecantapa.

*Odemō guiyānemō ante
(Odoca 13.24)*

¹³ Itota godōmenque odōmoncæte ante īmaï apænecantapa. “Mīnitō guiyānemō guidinque quēwenguīnō taadonque pōedāni. Wænguīnō godō guiquīnemō guiquēnē yabæ īnō ñænānemō ongō adinque tæiyānāni önonque pō guite edæ tōmēnāni nāni wænguinque ñænānonque godānīpa. ¹⁴ Wæætē wædænque īnāni guiquēnē diqui minte guiyānemō adinque quēwenguīnō guiyānō guite pōnānīpa,” ante Itota apænecantapa.

*Awæ æbānō iwæ, ante tōmenca bete ēñengæimpa, ante
(Odoca 6.43-44)*

¹⁵ Itota ayæ godōmenque odōmonte apænecantapa. “Pancadāniya, Wængonguī beyæ nē apænemōni īmōnīpa, ante nē babæ apænedāni īñōnānite mīnitō gomō ate tōmēnāni īnānite ēñēnāmaï īedāni. Tōmēnāni īñōmō edæ mēñēidi baï īnāni incæ obega æmontai baï wēñate baï babæ cædānīpa. Obega ee quēwēnāni baï ee cæmōni īmōnīpa, ante edæ babæ ante pōnāni tamēñedāni. ¹⁶ Edæ tōmenca adinque mīnitō, Awæ æbānō iwæ, ante tā pete bete do ēñēmīni baï, Īnāni ædānidō īnāni, ante ēñencæte ante tōmēnāni nāni cædīnō adinque edæ do ēñencæmīnīpa.”

“Yowemō æncæte ante waodāni dicæ daa mongæwāa tā pete ænāniyaa. Igowæñeca æncæte ante waodāni dicæ wæntowāa edæ tā pete ænāniyaa. ¹⁷ Waiwæ tōmāwæ wainca incapa. Baawæ wæætē baaca incapa. ¹⁸ Waincawæ incæ ædō cæte baaca incaquīī. Wæætē wīwa iwæ incæ ædō cæte wainca incaquīī. ¹⁹ Awæ quīwæmenque wainca incadāmaï ī īninque māniwæ tōmēwæ mæ yete gongapamō guitodōnāni gonguinque ñongæmpa. Tōmēnāni adobaï nāni gonte wæquinque babæ cædānīpa. ²⁰ Īninque, Awæ æbānō iwæ, ante tōmenca adinque do ēñēnāni baï waocā nānō cædō ante adinque, Tōmengā æbānō ingāa, ante edæ do ēñencæmīnīpa,” ante Itota apænecacāimpa.

*Wīi tōmānāni öönædē guiquīnāni, ante
(Odoca 13.25-27)*

²¹ Ayæ godōmenque odōmonte apænedinque Itota īmaï apænecantapa. “Botō īmote, ‘Awēnē, bitō botō Awēnē īmīpa,’ ante nē tededāni nāni tededō beyænque ædō cæte öönædē Awēnē Odeye ömæ guiquīnāni. Wæætē mōnō Mæmpo öönædē quēwengā nānō ānō baï nē cædingā īñōmō tōmenganque guicæcāimpa. ²² Īninque bayonte pancadāniya botō īmote, ‘Awēnē, Awēnē,’ āninque, ‘Bitō beyæ apænecamōniī ae, ancædānīpa. Ayæ, Bitō emōwo apænedinque wēnæ inte wido cægamōniī ae. Bitō emōwo apænedinque mōnitō, Ate pōnecædānīpa, ante bamōnengæ cædinque nanguī waa cægamōniī ae,’

ancädänimpa. ²³ Ēñēninque botō wæætē, ‘Īñæmpa botō mīnitō ĩmīnite cōwē adāmaī inte tæcæ abopa. Nē ēñēnāmaī cædimīni inte botō weca ongōnāmaī gobæwedāni,’ ancæboimpa,” ante Itota apænecacāimpa.

*Nē mænōna ĩnate ante
(Māadoco 1.22; Odoca 6.47-49)*

²⁴ Ayæ wæætē odōmōninque Itota ĩmaī apænecantapa. “Īninque edæ botō apænebo ēñēninque nē ēñente cædāni ĩñōmō tōmēnāni waocā nē ēñengā inte nānō nō ēñente cæi bai cædānipa. Nē ēñengā ĩñōmō tæēmoncaa mænongampa. ²⁵ Tæēmoncaa mænongā ate cōönæ nanguī cæ ate æpæ eyede āninque pō tapæmpa. Ayæ woboyæ nanguī pæmænte pō incæte oncō tæēmoncaa mænonte ongō ĩninque ædō cæte cabænte bobænte guiquīi. Nē ēñente cædāni ĩñōmō māniñōmō mænongā bai inte todānipa. ²⁶ Wæætē botō apænebo ēñēninque nē ēñēnāmaī cædāni guiquēnē tōmēnāni ĩñōmō waocā ocai ōmæcacā nānō ēñēnāmaī cæi bai cædānipa. Nē ōmæcacā ĩñōmō ěmōnaiya aquīi ĩñōmō mænongampa. ²⁷ Aquīi ĩñōmō mænongā ate cōönæ nanguī cæ ate æpæ eyede ante tapæmpa. Ayæ woboyæ nanguī pæmænte pō adinque mānincō ōñonte ætæwo goquinque edæ do acapowate bogocæ tæ go wææmpa. Nē ēñēnāmaī cædāni ĩñōmō māniñōmō mænongā bai inte wædānipa,” ante Itota odōmonte apænecacāimpa.

²⁸ Māninganca ante ĩnque apænecā ēñēninque tōmānāni, Quīnō bai angāā, ante guīñente wædinque, ²⁹ Wīi mōnō ĩmonte nē odōmōnāni nāni odōmōnō bai tōmengā ĩñōmō nē angā inte bai edæ godōmenque nōingā ante odōmongā ēñēmōmpa, ante tedegādānipa.

8

*Nē baadingā ingante Itota wadæ caacampa
(Māadoco 1.40-45; Odoca 5.12-16)*

¹ Māniī ānanquidi ongōninque ĩnque apænete wæængā adinque tæiyænāni tōmengā mīñæ wæængadānipa. ² Tōmengā mīñæ tee empote wææ goyōnāni wacā baate ēñawengā ĩnongā inte eyepæ pō bee tēninque Itota ōnōwa gāānē ædæ wæænīnque apænecantapa.

—Awēnē, Bitō Ao āmi inte wadæ caabi ĩninque botō waintai baabaīmopa.

³ Āñongante Itota pædæ wææmpo gampo caadinque,

—Ao āmopa. Bitō waintai baacæbiimpa.

Angā ĩninque ñōmæintai nānō ēñadintai dæ baadinque tōmengā waintai edæ do baacantapa. ⁴ Itota edæ tōmengā ingante,

—Botō æbānō cæboo, ante wadāni ĩnānite māo apænedāmaī ĩmāwe. Wæætē, Nāwangā impa, ante acædānipa, ante cædinque bitō, Wængonguī quī, ante nē godongā weca tōingā godinque waintai bitō baadintai odōmōmi acæcāimpa. Ayæ Mōitee wodi wææ ante nānō angaincoo bai ænte pōninque bitō waintai bitō baadi beyæ ante edæ, Wængonguī quī, āninque nē godongā ingante pædæ godōmi æncæcāimpa, ante Itota angacāimpa.

*Capitāo ingante nē cæcā ingante Itota cæcā waa bacampa
(Odoca 7.1-10)*

⁵ Māniī pōninque Capēnaōmō pō guīyongā odōmāno tontadoidi awēnē capitāo incæ, Itota pōnō cæcæcāimpa, ante apænecæte ante pongantapa. ⁶ Pōninque tōmengā,

—Awēnē, botīmote nē cæcā ĩñōmō cōmāingā badinque nanguī pōni nantate oncōnē ōñongampa cæbii.

⁷ Ante āñongante Itota,

—Gote cæbo waa bacā ae.

⁸ Angā ēñēninque,

—Awēnē ēñēmi. Botō waēmō ĩmopa diyæ bitō botō oncōnē pō guīquīmīi. Edæ bitō adoyōmō ongōninque āmi ĩninque botō ĩmote nē cæcā waa bacæcāimpa. ⁹ Bitō ĩñōmō Awēnē Wængonguī ingante nē ēñente cædōmi ĩmi bai botō adobai wacā awēnē

ingante nē ēñente cæbo ïmopa. Ìninqe botö awënë äabo inte botö awënë beyænque ämo ēñēninqe tontadoidi wæætē guiñente wædinque botö änö ante ēñente cædänipa. Ìninqe adocanque ingante botö, Goe, ämo ēñēninqe edæ do gocampa. Wacä ingante, Pöe, ämo ēñente pongampa. Ayæ botö ïmote nē cæcä ingante, Cæe, ämo ēñēninqe edæ do cæcampa.

¹⁰ Ante tontado capitäo nanguï ēñengä inte apænecä ēñente wædinque Itota wæætē tömengä miñæ tee empo pönäni ïnänite apænedinque,

—Minitö ïminite näwangä ämopa. Mönö idægocabo ïñömönte mäningä wede pönengä ingä bai adocanque incæ edæ dæ angä awædö, angantapa. ¹¹ Incæte ïimaïnö ante apænebo ēñēdäni. Mönö wæmæidi Abadäo wodi Itæca wodi Aacobo wodi öönædē Awënë Odeye ææmæe ponte waa beyönäni edæ nænque tamönö gämænö quëwënäni tönö nænque guidö gämænö quëwënäni ïñömö idægoidi ïnämaï ïnäni incæ tæiyænäni adoyömö pöninque mönö wæmæidi tönö godongämæ becædänimpa. ¹² Wæætē Wængonguï Awënë Odeye ömæ nē guiquënänäni guiquënē tömënäni wëmö ïñömö, näni guingo imonte Yæ yæ wæyömö mäniñömö guitodonte wæquinänidö angüenē.

¹³ Äninqe Itota wæætē tontado capitäo ingante,

—Ñöwo wadæ goe. Bitö pönönö bai do bacäimpa.

Ante äñongä adoyedē Itota nänö äniñedē incæ awënë ingä nē cæcä do waa bagacäimpa.

Pegodo nänöogængä badä ingante Itota cæcä waa bacä
(Mäadoco 1.29-31; Odoca 4.38-39)

¹⁴ Ayæ Itota mäniñömö pöninque Pegodo oncönē pö guite ayongä Pegodo nänöogængä wäänä daicawo gawænte möimoga öñongä acantapa. ¹⁵ Adinque tömengä önompo pædæ wææmpote bæi ongongä ate onquiyængä wæætē gancæ badinque ængæ gantidinque Itota beyæ pönö cæcantapa.

Nantate wæwënäni ïnänite Itota cæcä waa badänipa
(Mäadoco 1.32-34; Odoca 4.40-41)

¹⁶ Mäniönæ gäwadecæ ba ïninqe wënæ tönö quëwënäni tæiyænäni ïnänite ænte pönäni adinque adodeque äninqe Itota wënæ inte wido cæcantapa. Ayæ quiëmē quiëmē nantate wæwënäni ïnänite, Waa baedäni, angä waa badänitapa. ¹⁷ Itota mänömaï cæcä ïninqe Wængonguï beyæ nē apænecä Itaiya wodi do ïimaï ante nänö angainö bai ïinque batimpa. “Mönö nantate wæwëmämo ö æninqe mönö daicawoidi teëmente gote mäo wido cæte bai cædinque tömengä teëmente wængä beyænque quëwëmö imopa,” ante Itaiya nänö angainö bai Itota cægacäimpa.

Itota miñæ nē goinēna
(Odoca 9.57-62)

¹⁸ Itota ïñömö, Tæiyænäni godämæ gongænäni awædö, ante pönēninqe tömengä miñæ nē godäni ïnänite, Gäwapæ æmæe wedeca mantamini taoboedäni. ¹⁹ Äninqe ayæ ongönongante wacä tömënäni näni wæe yewæmongainö ante nē adingä inte nē odömongä ïnongä inte Itota weca pöninque,

—Awënë nē Odömömi ēñēmi. Bitö ædömē goyömite botö bitö miñæ pö gocæboimpa.

²⁰ Angä ēñēninqe Itota wæætē edæ,

—Babæ guintaidi ïñömö ontatodē monguï ëadäni ïnänipa. Ayamöidi ongonta ëadäni ïnänipa. Botö Waobo ëñagaimö guiquënē monguï ömaabo ïmo apa poncæ ämii, ante Itota wæe apænegacäimpa.

²¹ Ayæ wacä tömengä ëmiñængä incæ tömengä ingante,

—Awënë ëñēmi. Botö täno gote botö wæmpo wængä ate daga wente ate pömoe.

²² Äñongante Itota wæætē,

—Ïñæmpa nē wæwocadäni incæ tömënäni guidänäni wænäni ate ee abi daga wencædänimpa. Bitö wæætē botö miñæ ee pöe, angacäimpa.

Itota angä eñente woboyä æpæ næ gongæmpa
(Mäadoco 4.35-41; Odoca 8.22-25)

²³ Mänii tao gocæte ante wipodë guiiyongä tömengä miñæ næ godäni godongämæ guiidinque tömengä tönö tao godänitapa. ²⁴ Tao wogaa goyönäni woboyä iñontobæ nangui pöni pämmæninque æpæ mængonta mængonta pöninque gao gao goyonte wipo ñänæ ñänæ æi guidentapa. Itota iñömö mö ñongantapa. ²⁵ Mö ñongä adinque tömengä tönö godäni iñömö tömengä weca gote, Ömæmoncæcäimpa, ante tao cædinque,

—Awënë, bete wæncæ cæmompæ cæbii.

²⁶ Ante äñönäni,

—Mïni pönëgade, quimæ guññewëminii.

Äninque tömengä ængæ gantidinque, Woboyä pämmænämaï imäwe. Gäwapæ incæ cædämaï næ gongæmäwe, angä eñente woboyä pämmænämaï iñö gäwapæ incæ næ gongæninque ñancæ ñancæ gongæmænimpæ. ²⁷ Äñongä tömënäni ancaï guññëninque nämäneque tededinque,

—Æcämë inte angä eñente woboyä incæ æpæ incæ gongæmpa, ante guññente wægadänimpæ.

Guedatabæ iñömö wënæ inte næ ènempoda
(Mäadoco 5.1-20; Odoca 8.26-39)

²⁸ Mänii æmæmäa tao ti wæænte Guedatabæ pöñongä wënæ inte quëwëna iñömö wao wodido quëwente pöninque Itota ingante mämö bee ténatapa. Tömëna iñömö, Waodäni taadö godämaï incädänimpæ, ante wææ cæcæte ante næ piinte cædöna inte edæ, ²⁹ pö bee téninque ogæ tededatapa.

—Bitö Wængonguï Wëmi inömi incæ quimæ mönatö weca pöwë. Iinque bayedë möna pante wæquënönö ante pönëninque bitö ñöwo do pancæte ante pömitawo, ante wædatapa.

³⁰ Ante äñönate odæ wængänäidi nangui inäni a ongonde cænäni adinque, ³¹ wënæidi guiquënë Itota ingante äninque,

—Bitö cöwë wido cæcæte ante pönëmi ininque edæ odæ wængänäidi baönë ämi gobäimönipa.

³² Ante ancaa tedete äna eñëninque Itota,

—Gobæwedäni, angä.

Eñëninque tömënäni tao godinque odæ wængänäidi baönë guiiyönäni odæncato wæætë ontadäa wæænömëmö iñömö gäwapæno pogodo wæi guiite becadote capo wængadänimpæ.

³³ Becadote wænäni adinque odæ wængänäidi næ aadinäni guiquënë pogodo wodii winonte tömënäni quëwëñömö mäo, Itota mänömaï cæcä wæmönipa, ante tededänitapa. Ayæ, Wënæidi tönö næ quëwëñina inate Itota mänömaï cæcampa, ante wæmönipa, ante apænedäni. ³⁴ Eñëninque tömænäni Itota ingante bee tencæte ante tömënäni näni quëwëñömö tate pönänitapa. Tömengä ingante adinque, Mönitö ömæ iñömö quëwëñämaï gobäwe, ante nangui angadänimpæ.

9

Në cömäingä ingante Itota angä dao dao gocampa
(Mäadoco 2.1-12; Odoca 5.17-26)

¹ Mäninö ante änäni eñëninque Itota wadæ godinque wipodë go guiidinque imæmäa tate tömengä quëwëñömö pongacäimpa. ² Pongä adinque wadäni næ cömäingä möimpataa öñöñongante edæ æmatæ æmatæ bæi ongöninque tömengä ingante næænte pönänitapa. Næænte pönäni adinque, Næ næænte pöninäni tönö næ cömäingä wede pönente pönänipa, ante adinque Itota iñömö næ cömäingä ingante,

—Botö wëmi eñëmi. Wënæ wënæ bitö cædimämo ante ñöwo ñimpo cætimpæ.

³ Ante apænecä eñëninque edæ næ wææ odömönäni guiquënë pancadäniya nämäneque pönente tededinque, “Iingä iñömö Wængonguï ingampa diyæ mänömaï

cæquiringää. Edæ babæ ancædö.” ⁴ Ante pönëñönäni Itota tömëñäni näni pönëwënö ante önöwëñinque do ëñëñinque edæ,

—Minitö mimöno quimæ wiwa ante pönëwëminii. ⁵ “Në cömäingä nänö wënæ wënæ cædimämo ante do ñimpo cætimpa,” ante botö Wængongui bai ämo ëñëñinque minitö guiquënë, Wængongui ingampa diyæ mänömaï cæquiringää, ante pönëmïnipa. Ayæ wæætë, “Ængæ gantidique dao dao gocæcäimpa,” ante botö Wængongui bai cæbo adinque minitö edæ, Wængongui ingampa diyæ mänömaï cæquiringää, ante adobaï pönëmïni imaimïnipa, ante awædö. Ìñæmpa mänömainö ante pönëmïni ininque minitö edæ æbänö cæquënëmo imo äminii. ⁶ Incæte waodäni näni wënæ wënæ cædimämo ante botö Waobo ëñagaïmo inte inguipoga quëwëñinque në ämo inte ñimpo cæbo quëwëñäñipa, ante minitö edæ ëñencæmïnipa, ante botö imai cæbopa.

Äñinque edæ në cömäingä ingante edæ,

—Ængæ gantidique bitö möimpata topo cædinque ænte tömëmi oncönë næænte goe.

⁷ Angä ëñëñinque cömäingä ïningä incæ edæ ængæ gantidique tömengä oncönë wadæ gocantapa. ⁸ Dao dao gocä ate wædinque godongämæ ongönäni ïñömö, Æbänö cæcäi, ante ëñëñämaï inte guïñente wædinque, Wængongui pönö cæcä beyænque waocä ñöwo në angä badinque mänömaï cæcä amönipa, ante pönëñinque, Wængongui bitö ñäö bai ëmömi inte täï piñænte cæbi amönipa, ante watapæ apænegadäñimpa.

Mäateo ingante Itota angä tee empote gocampa

(Mäadoco 2.13-17; Odoca 5.27-32)

⁹ Itota edæ mäninö godömenque gocæ cæte ayongä adocanque Mäateo ïñömö, Odömäno awënë qui bacæimpa, ante godonte äinta näni äincönë ongonte cæcä adinque Itota guimö adinque Mäateo ingante angantapa.

—Botö miñæ pöe, angä.

Ëñëñinque Mäateo edæ do ængæ gantidique Itota miñæ tee empote wadæ gocantapa.

¹⁰ Ayæ ate Itota tömengä miñæ në godäni tönö Mäateo oncönë go guite cængöñönäni odömäno awënë beyæ në æwëñäni tönö në ëñëñämaï cædäni tönö nanguï inäni ponte godongämæ cænänitapa. ¹¹ Adinque Paditeoidi guiquënë tömengä miñæ në godäni inänite äñinque,

—Minitö Awënë në Odömongä ïñömö odömäno awënë beyæ në æwëñäni tönö në ëñëñämaï cædäni tönö quimæ godongämæ cæwengää.

¹² Äñäni ëñëñinque Itota,

—Në waa ingä guiquënë, Cæbi waa baboe, änämaï ingampa. Në wënæ wënæ inte wæcä guiquënë dotodo ingante, Cæbi waa baboe, ante do aa pecampa. ¹³ Pancadäñiya, Nämä incæ nö entawëmo imopa, ante në äñäni inänite adinque botö në dotodo bai adobaï inömo inte tömëñäni inänite aa pedämaï incæboimpa. Wadäni guiquënë, Nämä wënæ wënæ cæbo imopa, ante në äñäni guiquënë, Wængongui gämænö poncædäñimpa, ante botö tömëñäni inänite aa pecæ pönömoimpa. “Baö, Wængongui qui baquimpa, ante në iya täñäni inänite wiï ainëwædö, wæætë godö waadete waa cædäni inänite ainëmo imopa,” ante Wængongui angä apa quëwëñäni. Nöwo edæ godinque Wængongui nänö äno æbänö ante angä ëñente pömæwedäni, ante Itota apænegacäimpa.

Ee ate cænämaï ingæimpa, ante në äñäni

(Mäadoco 2.18-22; Odoca 5.33-39)

¹⁴ Mäñiñedë Wäö miñæ në godäni pöninque Itota ingante äñinque,

—Paditeoidi tönö Wäö miñæ möni gocabo tönö möñitonque Wængongui beyæ ante ee ate wiï cämönipa. Bitö miñæ në godäni guiquënë quïñante Wængongui beyæ ante cædämaï inte edæ do cænänii.

¹⁵ Äñäni ëñëñinque Itota wæætë,

—Onguiñængä në monguingä nänö wente ænte në pönäni bai inönäni inte botö miñæ në godäni ïñömö ædö cæte wæwente bai cænämaï inguïñäñii. Wæætë ayæ ate guiquënë,

Monguingä, näni në änongå bai iñömote wadäni ponte botö imote ö ænte gocædänimpa. Mänömaï cædäni ate botö miñæ në godäni iñömö mäniñedë ate wæætë cænämaï inte wæcædänimpa, ante apænedinque Itota godömenque iïmaï ante apænegacäimpa.

¹⁶ “Wacä dicæ miincoo æninque pedæncooga pönö tadömonguingäa. Mänömaï cæcä iñinque edæ miincoo incæ dobæ gäni tamonte guipite ate godömenque wänä tente baquënë. Minitö, Awente bai cænämaï inte waa quëwengäimpa, ante miini änewënö guiquënë pedæncoo bai inte ëwenguincoo bai ënëpa. Codito nempo watapæ quëwengäimpa, ante botö apænedö guiquënë miincoo bai inte quëwenguine ënëpa. Iñinque ëwenguine tönö quëwenguine edæ ædö cæte adoyömö ëñente cæquii. ¹⁷ Ayæ adobai yowepæ biinömæ näni ämæ miimæ æninque waodäni ædö cæte picæ æmontaicadedë godö pe ñiñænguïnänii. Edæ picæ æmontaicadedë pe ñiñænäni iñinque yedæ æninque ætæwo goquïnö anguënë. Wæætë edæ æmontai miincadedë pe ñiñænte ate yedæ æninque tæi æbænämaï ee ongöñö edæ miimæ tönö æmontaicide adobai ee ongongäimpa, apa quëwëminii,” ante Itota apænegacäimpa.

Gaido wëñængä beyæ cæcæ goyongante

onquiyængä Itota weocoo gampocampa
(Mäadoco 5.21-43; Odoca 8.40-56)

¹⁸ Tömënanï inänite tæcæ apæneyongä wacä tömënanï odömöincö awënë inongä inte Itota weca ponte ædæ wææninque apæñecantapa.

—Botö wëñængä baquëcä iñömö edæ dobæ wæncæ cæcampa cæbii. Bitö ponte tömengä ingante gampobi ate quëwencæcäimpa.

¹⁹ Angä ëñëninque Itota iñömö ængæ gantidique tömengä tönö goyöna tömengä miñæ në godäni godongämæ godänitapa. ²⁰ Idömæ goyönäni edæ wacä onquiyængä wantæpiyæ dote wadepo cöwë wepæ wantæ bidämaï wææ wæwëningä iñömö ñöwo Itota önöñabæ inö pöninque tömengä weocoo yæwedecooque gampocantapa. ²¹ “Tömengä weocooque gampote waa bawënëmote,” ante onquiyængä nämä pönëninque gampocantapa. ²² Gampocä ate Itota dadi ëmæmonte adinque,

—Onquiyæmi, wæwënämaï ie. Bitö wede pönënö beyæ edæ wantæ bawënëmipa.

Ante äñongä do edæ wantæ bawënegacäimpa.

²³ Itota mäniï godinque awënë oncönë go guiite ayongä në ööña bai öönäni tönö nanguï inäni cægonte Yæ yæ wædäni inänite adinque, ²⁴ tömënanï inänite,

—Gä goedäni, äninque, Iñæmpa iñömö wëñængä wodi wii æmæwo wængampa. Önonque edæ mö ñongampa.

Angä ëñëninque tömënanï, Angantedö amini, ante tömengä ingante badete todänitapa. ²⁵ Ayæ mäniï angä taodäni adinque Itota pö guiidinque wëñængä baquëcä wodi ingante pædæ wææmpo bæi ongonte töö æmængä ate wëñængä ængæ ganticantapa. ²⁶ Mänömaï cæcä adinque në adäni iñömö gode ä gode ä cædäni ate mäniñömö quëwënäni tömänäni ëñengadänimpa.

Babetamöna inate Itota gampomongä waa adapa

²⁷ Itota wadæ gote godömenque goyongä babetamöna tee empo ponte aa pedinque, —Awënë Dabii pæïmi inömi inte mönatö imönote pönö waadete waa cæbi æmönæ, ante ancaa aa pedatapa.

²⁸ Aa peyöna tömengä edæ oncönë go guicä adinque adoyömö pö guiidatapa. Guiida adinque Itota tömëna inate,

—Mina änö ante nö waa cæquimo, ante pönëmïna.

Äñongante,

—Ao. Awënë, bitö änö bai cæcæbiimpa, ante pönëmönäpa.

²⁹ Apænedä ëñëninque Itota pædæ gopo gampomöninque,

—Në pönëmïna inïmïna inte mïna pönenganca do waa bacæminäimpa.

³⁰ Ante äñongä edæ tömëna awinca wi æmonte bai adatapa. Itota iñömö edæ,

—Botö cædinö ante apænedämaï inguënë quëwëmīnaa. Edæ pæ wëëneyöminā eñēnāmaï incædānīmpa, ante nanguï angantapa.

³¹ Ìnīnque wadæ godīnque Itota nānō ānīnō ante wīī eñēnte cædinque tōmēna, Itota mānōmaï cæcā waa bamontamōnapa, ante tōmāmæ māo apæneda eñēngadānīmpa.

Wēnæ inte wido cæyongā babetadecā ìningā tedecampa

³² Wadæ goyōna edæ wēnæ tōnō cæcā inte babetadecā ìnongā ingante Itota weca ænte pōnāni. ³³ Adīnque wēnæ ingante Itota wido cæyongā babetadecā ìningā ìñōmō edæ do tedecā adīnque tōmānāni ancaï guīñēnīnque,

—Itota nānō cædō baï mōnō idægocabo adocanque incæ dicæ cæcā atamongaa, ante wædānītpa.

³⁴ Padīteoidi guīquēnē,

—Wēnæidi awēnē tōnō cædingā inte tōmengā wido cæcā apa ānewēnānīi, ante pīingadānīmpa.

Itota waodāni ìnānīte waadete waa acampa

³⁵ Itota ìñōmō nanguï nāni quëwēñōmō ayæ wædænque nāni quëwēñōmō wayōmō wayōmō godīnque Wængonguï angā nāni eñēnte yewæmongainta ate odōmōincōnē go guīi go guīi cædinque odōmongā adānītpa. Ayæ, Mōnō Awēnē Odeye inguīpoga oo ponguīnō anguēnē, ante nānō waa pōnī ānīnō ante apænecā eñēnānītpa. Ayæ quīēmē daicawo cæpāmo adīnque quīēmē wæncæ cæte wæwēnō adīnque tōmengā godō cæcā waa badānītpa. ³⁶ Cæningancoo baï waodāni incæ bacoo ìnāni ìñōnāni nē aadingā dæ angā baï ìnānīpa, ante acantapa. Mānōmaï ìnāni inte babæidi wīñaate wædināni baï ængæ gantidāmaï ìnāni baï waodāni incæ wæwēñōnāni Itota tōmēnāni tōnō godongāmæ wæwente baï pōnēngantapa. ³⁷ Ayæ tōmengā mīñæ nē godāni ìnānīte apænedīnque,

Tōmēmoncoo bacoo baï ìnāni ìñōnānīte tā pete ìnāni baï nē gode ānāni ìñōmō mēnāniya pōnī ìnānīpa cæmīnīi. ³⁸ Tōmēmoncodē gæquī angā Awēnē ìñongante mīnītō tōmengā ingante apænedīnque, Tōmēmoncodē nē gæquīnāni da godōmi gote gæte baï āñete poncædānīmpa, ante Wængonguï ingante apæneedāni, ante Itota apænegacāīmpa.

10

Itota angā ate dote ganca ìnāni nē gode ānāni badānīpa

(Māadoco 3.13-19; Odoca 6.12-16)

¹ Ayæ ate tōmengā mīñæ nē godāni ònompo tipæmpoga go mēnāniya mānimpodāni ìñōnānīte Itota āñecā pōnāni ate tōmengā, Botō pōnō cæbo ate mīnītō nē āmīni badīnque wēnæidi nē wentamō ewocadāni ìnānīte wido cæcæmīnīmpa, angantapa. Ayæ, Quīēmē daicawo gawænāni incæ quīēmē beyæ wæncæ cæte wæwēnāni incæ mīnītō eyepæ inte godō cæmīni ate nē wæwēnīnāni waa bacædānīmpa, ante pōnō cægacāīmpa.

² Itota nānō nē da godōnīnāni ònompo tipæmpoga go mēnāniya mānimpodāni ìnānīpa, ante adīnque, Dote, ante nāni gocabo ìnānīpa, ante tededānīpa. Tōmēnāni ìīmaï emōnāni ìnānīpa. Tānoda Timōnō Pegodo mōnō ānongā tōnō Æntade nāna caya ìnāpa. Ayæ Tebedeo wēna Tantiago tōnō Wāo nāna caya ìnāpa. ³ Pedipe tōnō Batodōmēē mēnaa ìnāpa. Odōmāno awēnē beyæ nē æwēningā Määteo tōnō Tōmato mēnaa ìnāpa. Adepeo wengā Tantiago tōnō Tadeo ìnāpa. ⁴ Wacā, Mōnō omæ ingæīmpa, ante nē nanguï cædingā incæ wacā Timōnō ingampa. Ayæ Itota ingante odōmonte nē godonguingā Codaa Icadīote mōnō ānongā ingacāīmpa. Mānimpodāni Itota mīñæ nāni, Dote, ante gocabo ìnānīpa.

Wængonguī Awēnē ingantedō ante apæneedāni, ante Itota angā godānīpa

(Māadoco 6.7-13; Odoca 9.1-6)

⁵ Ìnīnque Itota mīñæ nāni, Dote, ante gocabo ìñōnānīte tōmengā, “Mīnītō idægoidi ìnāmaï ìnāni taadō godāmaï inte edæ Tāmadiāidi nāni quëwēñōmō go guīidāmaï ìedāni, ante da godongantapa. ⁶ Edæ cæningāidi obegāidi gueogæ gote baï ìñōnāni inte mōnō

idægocabo taadö oda cædinque tömënäni nāni wē womonte wænguino godānipa, ante adinque mīnitō tömënäni weca gote cædāni. ⁷ Godinque mīnitō, Öönædē Awënē Odeye oo poncæcāimpa cæmīnii, ante māo apænemīni ēñencædānimpa. ⁸ Ayæ quiēmē beyæ nantate wæwënāni adinque godō cæmīni ate waa bacædānimpa. Do wænīnāni īnānite godō cæmīni ate nāni ömæmoncædānimpa. Baate īnāni īnānite godō wadæ caamīni waintai baacædānimpa. Wænæidi inte godō wido cædāni. Botō önonque ānāmaī inte pönō cæbo ænimīni inte mīnitō botō cæbo bai adobaī cædinque wadāni īnānite ānāmaī inte önonque godō cæmīni æncædānimpa,” ante Itota angantapa.

⁹ Ayæ, “Mīnitō gocæ cædinque, Godonte æinta, ante tigitamō incæ oodo incæ padata incæ edæ wente æincadedē da wente ænāmaī iedāni. ¹⁰ Edæ wadāni beyænque nē cæcā īñömō tömengā eyepæ ænte quëwencæcāimpa cæmīnii. Māincoo da wenguincade ænāmaī inte goedāni, Weocoo mīni ēñacooque ēñate awæncata mīni ewataque ewate ongonto mīni nææntoque næænte goedāni,” angantapa.

¹¹ Ayæ apænedinque Itota tömengā mīñæ nē godāni īnānite angantapa. “Nanguī pōnī nāni quëwëñömō incæ wædænque īnāni nāni quëwëñömō incæ mīnitō māniñömō go guidinque waocā nē nō cæcā ingante ante diqui minte adinque māningā oncōnē go guite owodinque wayömō mīni go quëwenganca mānincōnenque quëwëedāni. ¹² Mānincōnē go guidinque, Īñānāni, waa quëwëedāni, ædāni. ¹³ Ayæ āninqe, Mīnitō weca æbānō pō guite quëwenguimōnii, āñōmīni Ao ānāni ate mīnitō tömënāni weca go guite gānē pōnēninque ee quëwëedāni. Wæætē nō cædāmaī īnāni adinque mīnitō edæ ee quëwënāmaī edæ wadæ gomīni wæcædānimpa. ¹⁴ Edæ, Pōedāni, ānāmaī īnāni adinque ayæ mīnitō apænemīni ēñenāmaī īnāni īninqe mīnitō wæætē tömënāni oncodo tao godinque, Mīnitō quëwëñömō nāwate awædō, ante odōmoncæte ante cædinque önōwa wadæ wadæ cæwate wadæ goedāni. ¹⁵ Edæ nāwangā āmopa. Botō apænte anguiönæ īñonte Todōmä īñömō quëwengaināni tönō Gömoda īñömō quëwengaināni tönō nanguī pante wæwëñōnāni mīnitō imīnite nē Baa ānāni guiquēnē godōmenque pante edæ wæwencædānimpa,” ante Itota tömënāni īnānite da godongā godānitapa.

Togænte pancædānimpa, ante

¹⁶ Ayæ āninqe Itota, “Cōwā ædāni, angantapa. Mīnitō īñömō nē cæningāidi bai īñōmīnite botō īñömō mēñe bai īnāni weca da godōmo godinque mīnitō tæntæ nāmā wææ cæcæte ante nānō ēñente cæbaī adobaī ēñente cædāni. Wæætē edæ equemō nānō ee cæbaī mīnitō adobaī pīnāmaī inte ee cæte quëwëedāni. ¹⁷ Ayæ edæ mīnitō imīnite bæi ongōninque waodāni tömënāni nē apænte ānāni weca māo pædæ godōnāni æncædānimpa. Ayæ godōmenque tömënāni odōmōincōnē māo ænte godinque mīnitō imīnite tæi tæi pancædānimpa cæmīnii. Īninqe mīnitō edæ, Æbānō cæquīnānii, ante do ēñēmīni inte edæ nāmā wææ aædāni. ¹⁸ Ayæ, Awënēidi tönō nē ēñenāmaī īnāni adobaī ēñencædānimpa, ante cædinque botō āmo ēñēninque mīnitō imīnite māo pancabaa awënēidi gobedōnadodoidi weca ayæ tömāmæ awënēidi odeyeidi weca gōnōnāni gongæninque mīnitō botō beyæ apænecæmīnimpa. ¹⁹ Māniñedē tömënāni nāni ænte māo gōnōñedē, Quīnō bai apænequīmoo, ante guīñēnete wædāmaī iedāni. Māniñedē edæ quīnō bai apænequīi, ante do ēñencæmīnimpa. ²⁰ Īñæmpa wīi nāmā pōnēninque apænequīmīni wæætē mönō Wæmpo Önōwoca incæ apænecā ēñēninque apænequīmīni imīnipa,” ante Itota apænecāimpa.

²¹ Ayæ godōmenque apænedinque Itota, “Māniñedē edæ nāna caya īñōnate adocanque nāemæ pīininqe, Wænoncæ, āninqe tömengā tōniñacā ingante da godongā gocæcāimpa. Nāna wencaya īñōnate mæmpocā īñömō nāemæ pīininqe, Wænoncæ, āninqe tömengā wengā ingante da godongā gocæcāimpa. Ayæ wëñænāni incæ wæmpoda īnate nāemæ pīininqe māo apænedāni ēñēninque wadāni tömënāni wæmpoda īnate māmō wænōnāni wæncædānimpa. ²² Ayæ, Coditoidi imīnipææ, ante tömānāni botō emōwo beyænque mīnitō imīnite nanguī pīincædānimpa. Pīināni wæwēmīni incæ æcānō iimæca iinque baganca wæntædāmaī inte botō emōwo beyæ pīinte badāmaī ingāa

tömengä ingante botö ämo beyænque quëwencæcäimpa. ²³ Mäniñedë ate waodäni togænte pancæte ante mîni quëwëñömö pönäni ate wædinque mînitö iñömö wayömö wadäni nâni quëwëñömö wodii winödäni, ämopa. Edæ näwangä ämopa. Edæ mönö Idægobæ wayömö wayömö wodii winöningue pancayömonga goyöminî botö Waobo ëñagaïmo inte edæ do poncæboimpa,” ante Itota apænecäcäimpa.

²⁴ Ayä, “Në odömongä ingante piinte cæyönäni tömengä miñæ në gocä ingante edæ ædö cæte piinte cædämaï inguinäni. ²⁵ Awënë në odömongä wæwente quëwëñongä tömengä miñæ në gocä guiquënë ædö cæte wæwëñämaï quëwenguingää. Edæ në cæcä tömengä awënë bai bacä ininque idæwaa edæ imaimpa. Botö oncö ëacä bai në Awënë imo iñömote wadäni, Wënæ awënë Beedeboobi imidö anguënë, ante piñäni incæ mînitö botö tönö mîni quëwencabo iñöminite wadäni godömenque wënæ wënæ ante piincædänimpa,” ante Itota apænecä ëñengadänimpa.

*Guiñänämaï iedäni, ante
(Odoca 12.2-7)*

²⁶ Ayä apænedinque, “Incæte tömënäni inänite guiñänämaï iedäni. Iñæmpa, Adämaï incædänimpa, ante quiëmë wë womonte i incæ iincayæ ate tömäa wi ænete bayonte edonque pönî bacäimpa. Ayä quiëmë awëmö cæteï incæ iincayæ ate edonque pönî acædänimpa. ²⁷ Botö wëmö iñömö mînitö imînite apænebo ëñente ate mînitö botö apænedö ante ñäö apäiyömö apænecæminimpa. Ayä godö wæntæ botö äniñö ëñente ate mînitö æibæ oncömanca æidinque ogæ tedete apænemîni ëñencædänimpa. ²⁸ Ayä në baonque wænönäni inte önöwoca wænönämaï inäni inänite adinque mînitö tömënäni inänite guiñänämaï iedäni. Wæætë edæ baö tönö önöwoca tadömen-gadænguipo në ömæe ëwëñongä ingante guiquënë mînitö tömengä ingante guiñente wæedäni.”

²⁹ Äninqe, Itota godömenque apænecantapa. “Wacä ayamöidi önömpo æmæmpo que mänimpodäni beyæ tiguitamö adotamonque ante pædæ godongä amînitawo. Incæte mînitö Mæmpo änämaï iñonte ayamö adocanque incæ yæipodë wæænämaï ingampa. ³⁰ Mönö ocaguï incæ æpoguïno encamöö, ante Mæmpo Wængonguï do ëñëningue mönö imonte aacampa. ³¹ Edæ, Ayamöidi bacoo pönî ininque önönque inänipa, ante në äningä inte mönö Mæmpo iñömö mînitö imînite wæætë waa acä apa guiñëwëminii,” ante Itota apænecäcäimpa.

*Waodäni ëñëñönäni mönö Itota ingante Ao angäimpa, ante
(Odoca 12.8-9)*

³² Godömenque apænedinque Itota, “Æcänö waodäni ëñëñönäni botö imote Ao äninque, Bitö botö Awënë inömi imipa, ante äna tömengä öönædë æiyongante botö tömengä ingante wæætë edæ Ao äninque, Bitö iñömö botö miñæ në gogaïmi inömi imipa, ante botö Mæmpo ëñëñongä ancæboimpa. ³³ Wæætë waodäni ëñëñönäni botö imote në Baa angaingä ingante guiquënë botö Mæmpo öönædë në quëwengä ëñëñongä botö tömengä ingante adobaï edæ Baa ancæboimpa,” ante Itota apænecäcäimpa.

*Botö beyænque guëa piincædänimpa, angampa
(Odoca 12.51-53, 14.26-27)*

³⁴ Ayä apænedinque Itota, “Inguipoga quëwënäni piyænë cæte wæætedö wæætë cædämaï inte quëwencædänimpa, ante cæcæte ante Itota imæca pongaingä ingampa, ante mînitö pönëminitawo. Iñæmpa yaëmë næænte bai pömo imopa. ³⁵ Botö apænedö beyæ onguïñæna nâna wæmpocaya incæ næëmæ piincædaïmpa, ante pömo imopa. Onquiyæna adobaï nâna badancaya incæ næëmæ piincædaïmpa. Nâna wæntecaya incæ næëmæ waadedämaï inte piincædaïmpa, ante pömpa. Mänömaï cæbo imopa, ante pönëminiyaa. ³⁶ Ininque, botö änö beyæ nâni owocabo incæ næëmæ waadedämaï piincædänimpa,” ante apænecäcäimpa.

³⁷ Ayä apænedinque Itota iïmaï apænecantapa. “Edæ æcänö mæmpo tönö wäänä inate ædæmö waadedinque botö imote wæætë pönömenque waadedä iñömö tömengä

iñömö botö nē ěmĩñængä ädö cæte baquingää. Adobaĩ wēñængä ingante ädæmō waadedinque botö ĩmote pñnōmenque nē waadecä iñömö tömengä wæætē botö nē ěmĩñængä ädö cæte baquingää. ³⁸ Ayä æcänö botö miñä pñinēna tömengä iñömö edæ, Awä botö wænguiwä, ante näænte ponte baĩ cædinque, Wænñnāni wæmo incæte Itota miñä cōwē gocæboimpa, ante poncæcäimpa. Wæætē æcänö mänōmaĩ cädāmaĩ ĩna guiquēnē tömengä ädö cæte botö nē ěmĩñængä inguingää. ³⁹ Æcänö nämanque pñente, ĩmæcaque waa quēwenguimo, ante ānaa tömengä iñömö quēwēnāmaĩ incæcäimpa. Wæætē edæ, Wæmo incæ wæwēmo incæ botö öönädē Awēnē angä ěñente cōwē cæcæboimpa, ante æcänö āna guiquēnē tömengä iñömö edæ cōwē quēwencæcäimpa,” ante Itota apænecäimpa.

*Nē pñengä nänö waa cædinö beyä eyepä æncæcäimpa
(Mäadoco 9.41)*

⁴⁰ Ayä apænedinque, “Minitö ĩminite Ao äninque waocä botö ĩmote do edæ Ao äningä ingampa. Ayä botö ĩmote Ao äninque botö ĩmote nē da pñongaingä ingante do edæ Ao äningä ingampa. ⁴¹ Wængongui beyä nē apænecä ingante bitö, Wængongui beyä nē apænebi inte pöe, āmi ĩninque Wængongui beyä nē apænecä nänö paga ænganca bitö adopo æncæbiimpa. Ayä nē nō cæcä ingante, Bitö nē nō cæbi inte pöe, āmi ĩninque nē nō cæcä nänö paga ænganca bitö adopo æncæbiimpa. ⁴² Näwangä ämopa. Bitö Itota miñä nē gobi inte æpä becæbiimpa, ante bitö guiyangä ingante pædæ godömi ængä ĩninque bitö godöni beyä eyepä æncæbiimpa,” ante apænedinque Itota tömēnāni ĩnānite da godongä gogadānimpa.

11

*Wäö tömengä miñä nē goda ĩnate da pñongä pñnapa
(Odoca 7.18-35)*

¹ Ayä tömengä miñä nāni, Dote, ante gocabo ĩnānite ĩnque apænedinque Itota wadæ godinque tömēnāni nāni quēwēñömö odōmoncæte ante ayä, ěñencädānimpa, ante apænecæte ante wayömö wayömö gocantapa.

² Māniñedē edæ Wäö iñömö tee mönete ongñongante wadāni tömengä weca pñinque, Mönö Codito ĩmaĩ cæcampa, ante tededāni ěñente wædinque Wäö wæætē tömengä miñä goda ĩnate Itota weca da godongä godatapa. ³ ĩnque Wäö beyä ancæte ante pñinque tömēna ĩmaĩnō ante Itota ingante apænedatapa.

—Bitö iñömö dodāni nāni, Nē Ponguingä, ante nē angāimi adobi ĩmitawo. Wæætē tömēnāni nāni nē angāimi ĩnāmaĩ ĩmi ĩninque bitö wæætē, Wacä ponguingä, ante wänö cōedāni, āmitawoo. Æbänö mönitö cæquimōni, ante ěñencæte ante wæmōnipa.

⁴ Ante äñönate Itota wæætē, “Mīnatö ponte ěñññmīna botö æbänö apænebo ěñēmīnatawo, ante ayä, Botö æbänö cæbo aminatawo, ante minatö wæætē Wäö weca gote mao apænemina ěñengäeda. ⁵ Botö godö cæbo ate babetamö ĩnināni incæ waa bamonte adāni aminapa. Cömante ĩnināni incæ waa bate dao dao godāni aminapa. Baate ĩnināni incæ æmontai waëmontai baadāni aminapa. Babetamonca ĩnāni ĩñññnānite botö godö cæmōmo ate önōmonca waa bamoncate ěññññāni aminapa. Do æmæwo wænte öññññāni ĩññññānite botö godö cæbo ate ñāni ömæmōnāni aminapa. Ömaadāni inte wæyñññānite botö Wængongui waa pñni nänö pññ cægāinö ante apænebo ěñente todāni aminapa. ⁶ Ayä, Botö beyä waocä wiĩ piĩnte wadæ gocä iñömö tömengä watapæ nänö quēwenguingue edæ oda cädāmaĩ incæcäimpa, ante apænebo ěññññinque minatö Wäö ingante mao adodö ante apænemina ěñengäeda,” ante Itota angantapa.

⁷ Angä ěññññinque Wäö beyä nē āñina wadæ goyōna edæ Itota wæætē tömānāni ĩnānite, Wäö æbänö ingää, ante apænecantapa. “Mīnitö guiquēnē quīnō acæte ante önōmæca gomīnitapa. Cæwipa woboyä pæmænte ate æmænö ædæ æmænö ædæ gobaingä ingante mīnitö dicæ acæ gomīnitawogaa. ⁸ ĩnque edæ quingänö ingante acæte ante gomīnitapa. Waocä wecoo waëmoncoo mongænongä ingante mīnitö dicæ

acæ gominitawogaa. Ìñæmpa waëmoncoo mongængä ìñömö awënë oncönë quëwengä apa quëwënanii. ⁹ Ìninqe edæ quinante gominitawo. Minitö mini në go acæ cædongä ìñömö edæ Wængonguï beyæ në apænecä ingantawo. Näwangä impa. Wængonguï beyæ në apænecä Wäö ingampa. Incæte tömengä wii Wængonguï beyæ në apænegaïnäni bai ìnongä inte godömenque nanguï cæcä ingampa, ante apænebo ëñëmaimïnipa. ¹⁰ Wængonguï iïmai angampa, ante yewæmongatimpa.

‘Botö beyæ në apænecä ingante da pönömo pöninqe tömengä taadö täno beyænte bai cæcæcäimpa.

Tömengä bitö Codito ìmi beyæ ante taadö waa pinonte bai waa cæcæcäimpa.’

Mänömaïnö ante dodäni adocä Wäö ingantedö ante pönëninque yewæmongadänimpa.

¹¹ Nöwo ìñömö ämo ëñëedäni. Ìmæca mini ëñagaincabo ìñömïnite æpænë mönö në guidönongä Wäö adocanque ñænængä ìñongante wacä tömengä bai edæ dæ angampa. Incæte öönædë Awënë Odeye nempo quëwënanii ìñönäni adocanque guiyangä pönï ingä incæte Wäö pönömenque wædangä ingampa,” ante Itota apænecantapa. ¹² Ayæ iïmai ante godömenque apænecantapa. “Wäö täno nänö apænedöñedë ayæ godömenque ñöwo ganca täi pïñænäni pogodo pöninqe, Öönædë Awënë Odeye nempo mönö wäänë guicæimpa, ante tee tate guite bai cædinque, Mönö Awënë incæcäimpa, ante edæ ö ænte bai cædänipa. ¹³ Edæ Wængonguï beyæ në apænegaïnäni tönö, Ìïmai cædäni, ante në wææ angaingä tönö tömënäni tömänäni edæ, Awënë poncæcäimpa, ante cöwë Wäö nänö ponganca apænegadänimpa. ¹⁴ Ìninqe, Ediya wodi ayæ poncæcäimpa, ante näni në änongä Wäö ìñömö adocä ingampa, ante pönëmïniyaa. ¹⁵ Èamonca ongonte ëñëedäni,” angantapa.

¹⁶ Godömenque apænedinque Itota iïmai angantapa. “Inguipogaque ante në quëwënanii ìñömö quingämë bai ìnänipa. Quiëmë bai edæ quëwënanipa. Wëñænäni mönö godonte æïñömö täë contate owempodäni näni owempodö bai edæ adobai cædänipa, ante awædö. Wëñænäni näni owempote cæcabo incæ ææmæ cæte bai owempote cædinque wadäni ìnänite aa pedänipa. ¹⁷ ‘Minitö beyæ ööña we we ööñömöni mïnitö wæætë edæ äwadämai ìmïnitapa töö,’ ante owempodinque wëñænäni pïinte tedewënanipa. Ayæ wæætë, Waocä do wængä ate näni wæbai ante wëñænäni näni owempote cæcabo ìñömö, ‘Mönitö Ca ca wæyömöni mïnitö wæætë edæ wædämai ìmïni wæmönipa,’ ante pïininqe aa pedäni bai ñöwodäni ìñömö edæ adobai pïinte tedewënanii ìnänipa. ¹⁸ Ìïmai edæ impa. Wëñænäni näni wædö bai Wäö ìñömö cænguï cænämai tepæ bedämai ponte quëwëñongante ñöwodäni guiquënë, Wënæ tönö Wäö quëwengampa, ante pïinänipa. ¹⁹ Ayæ wæætë botö Waobo ëñagaimo inte edæ ponte në cænte bete quëwëmo adinque botö ìmotedö ante mïnitö ìñömö, Cæowæobi inte cæmipa. Beowæobi inte bebipa, ante badete tomïnipa. Ayæ godömenque, Odömäno awënë beyæ në æwënanii tönö në ëñënämai cædäni ìñönäni bitö tömënäni æmigo ìmpææ, ante botö ìmote pïininqe mïnitö wëñænäni näni pïinte aa pedö bai änewëmïnipa töö. Incæte, Në nö ëñënäni ìñömö nö cædänipa, ante adinque, Näwangä nö ëñënänipa, ante mönö ëñengæimpa,” ante Itota apænegacäimpa.

Në ëñënämai cædäni ìnänite Itota pïingampa

(Odoca 10.13-15)

²⁰ Ayæ, Minitö quëwëñömö botö bamönengæ nanguï cæbo adimïni incæ mïnitö wënæ wënæ mini cædinö ante, Ancaa wæwente awædö, ante dicæ wæmïnitawogaa, ante pïininqe Itota wayömö wayömö tömengä nänö nanguï cædiñömö quëwënanii ìnänite iïmainö ante mä pïingantapa. ²¹ “Codatï ìñömö quëwëmïni ëñëedäni. Betaida ìñömö quëwëmïni ëñëedäni. Minitö mini wæwenguinque ëñënämai cæte quëwëmïnidö angüënë. Edæ botö mïnitö weca täi pïñænte botö cædi bai Tido näni quëwengäiñömö Tidö näni quëwengäiñömö adobai cæbo bai mäniñömö quëwengäiñäni ìñömö tömënäni dobæ wënæ wënæ näni cægäinö ante ñimpo cædinque weocoo gömæ ëmoncoo wëñadinque gönai öni pæcate Ca ca wæcægadänimpa. ²² Ìninqe mïnitö ìmïnite

ämopa. Wængongui nänö apænte anguiönæ iinque bayonte Tido iñömö quëwengainäni tönö Tidöo iñömö quëwengainäni inänite nanguï pangä wæwënäni incæte tömengä mīnitö imīnite godömenque pangä wæwencæminimpa. ²³ Ayæ Capënaömö iñömö quëwëmini ëñëedäni. Mīnitö imīnite Wængongui dicæ öönæde wo ææntodongä æi gote toquimīniyaa. Iñæmpa tadömengadænguipo wææntodongä guï wæcæminimpa. Edæ botö mīnitö weca tæi pīñænte botö cædi bai Todömä nāni quëwengaiñömö adobai cæbo bai tömënäni nāni quëwengaiñömö edæ godömenque ñöwo ganca edæ mä ongoncædönimpa. ²⁴ Iinque edæ ämo ëñëedäni. Wængongui nänö apænte anguiönæ iinque bayonte Todömä quëwengainäni inänite nanguï pangä wædäni incæte mīnitö imīnite godömenque pangä wæcæminimpa,” ante Itota tömënäni inänite pīngacäimpa.

*Botö weca pö guëmæedäni, angampa
(Odoca 10.21-22)*

²⁵ Ayæ mäniñedë Wængongui ingante apænedinque Itota, “Mæmpo ëñëmi. Wadäni nāmā ocai encadäni tönö nanguï adinque nē ëñënäni tönö mäninö bitö ëñengainö ante ëñënämaï incædänimpa, ante cædinque bitö cægainö ante wë wodonte bai pæ wëënegabiimpa. Wæætë edæ wëñænäni nāni pönënö bai nē pönënäni inänite wæætë bitö edonque odömömi adinque do ëñënänipa. Bitö öönæde Awënë ingaïmi inte inguipoga Awënë adobi inömi inte edæ mänömaï cæbipa, ante adinque botö bitö imite waa ate pönëninque apænebopa. ²⁶ Mæmpo, bitö tömëmi änö bai cædinque waa cæbi adinque botö Ao ämpa,” ante Wængongui ingante waa apænecantapa.

²⁷ Wængongui ingante iinque apænedinque Itota godongämæ ongönäni inänite wæætë apænecantapa. “Botö Mæmpo nö ëñengä inte pönö odömongä beyænque botö iñömö tömänö ante nē ëñëmo imopa. Ayæ, Botö tömengä Wëñæmo iñömote botö Mæmpoque botö imote nē againgä iñongante wadäni adāmaï inänipa. Wæætë edæ Mæmpocä ingante botö tömengä Wëñæmo inömo inte adoboque nē agaïmo imopa. Iinque, Botö abo bai iñänique adobai ate bai pönencædänimpa, ante cædinque botö mīnitö imīnite odömömo adinque mīnitö adobai Mæmpocä ingante nē ate bai pönëmīni bamīnipa.”

²⁸ “Teëmë mongænte bai nangæ batawëmīni iinque mīnitö botö weca pömīni ate botö wæætë teëmë mongænte mīni wæwënö ante ö æmo ate mīnitö wæætë ganca pönente guëmancæminimpa. ²⁹ Edæ botö mimöno gänë pönëninque nāmā beyænque änāmaï quëwëmo adinque mīnitö botö weca pömīni iinque botö mīnitö tönö iñacabo cæcæboimpa. Edæ wagadada awæmpaa goti wīmoncate äämencaque goda bai möna guëa cæcaya bayömöna botö nö ëñënömo inte pönö odömonte apænebo ëñëninque mīnitö önöwoca wampo pönente guëmancæminimpa. ³⁰ Edæ botö tönö äämencaque bai cædinque bitö iñömö oo wīmoncadimpa mongænte bai edæ do cæcæbiimpa. Botö mongæncoo wodæi iñonte bitö wæætë edæ wodæi mongænte gote bai nangæ badāmaï incæbiimpa,” ante Itota iinque apænegacäimpa.

12

*Guëmanguiönæ iñonte tömëmö tä pete ænänipa
(Mäadoco 2.23-28; Odoca 6.1-5)*

¹ Mäniñedë guëmanguiönæ iñonte Itota tömëmoncodë tæcæguedencodë gocantapa. Goyongä tömengä miñæ nē godäni guiquënë gæwænte wædinque tömëmö tä pe tä pe æninque tæcæ cænca cædäni. ² Adinque Paditeoidi guiquënë Itota ingante wæætë,

—Bitö miñæ nē godäni æbänö cædänii, ante cöwä aquënë. Iñæmpa, Guëmanguiönæ iñonte mäninö bai cædāmaï iedäni, ante dodäni nāni wææ angainö ante ëñënämaï inte iñänäni iñömö do cædänipa töö.

³ Ante pīñönänite Itota,

—Mīnitö iñæmpa docä Dabii wodi tönö godongämæ godäni tönö gæwænte wædäni iinque tömengä æbänö cægacäi ante yewæmonte ongö incæte mīnitö iñömö adāmaï

inte bai anewemini awædö. ⁴ Tömengä iñömö Wængongui onconë go guicantapa. Mänincönë, Wængongui qui, ante në godönänique cængui impa, ante wææ nani angainö bai cædinque tömënanï, Wængongui qui, ante päö ñoncæ ñoncæ cædonänimpa. Incæte määni päö wii Dabiidi cængui inï incæ Dabii do cængantapa. Ayæ tömengä tönö cægönäni adobai godongämæ cængadänimpa. ⁵ Ayæ, Wængongui qui, ante në godönäni iñömö Wængongui onconë ñænæncönë iñömö önönæque nani cæbai guëmanguionæ iñonte adobai cædäni incæte wentamö entawënamai önonque cæcædänimpa, ante Möitee wodi wææ yewæmongacäimpa. Minitö iñömö mäninö ante adamai inte bai anewemini töö, angantapa.

⁶ “Ayæ apænebo ëñeedäni. Minitö, Wængongui oncö ñænæncö waa pönï ongoncompa, ante ayömini edæ botö ñöwo minitö weca në ongömo guiquënë wii Wængongui oncö bai ongömo inte wii önömoque ongömopa. Wæætë edæ nämä nö cædömo inte botö iñömö edæ godömenque waa pönï ongömo apa quëwëmini. ⁷ Incæte, Wængongui iimainö ante apænecampa. ‘Wængongui qui, äninque mini iya tänö ante pönömenque waa adinque botö në waadete mini godö waa cædö ante godömenque waa abopa,’ ante Wængongui angampa. İninque minitö iñömö Wængongui nänö angainö ante ëñëmini inte bai iinani wentamö mongænamai iñönänite, Mini pante wæquinque mänömai cæminipa, ante apænte piinamai incædöminimpa. ⁸ Botö iñömö Waobo në ëñagäimo iñömö Tæiyæ Awënë inömo imopa. İninque botö në guëmanguionæ Awënë inömo inte edæ, Guëmanguionæ iñonte edæ æbänö cæqui, ante adobo në Ämo imopa,” ante Itota apænecäimpa.

Ni cömampoingä

(Mäadoco 3.1-6; Odoca 6.6-11)

⁹ Äninque wadæ godinque Itota iñömö Wængongui angä nani ëñente yewæmongainta ate oodeoidi nani odömöincönë go guigacäimpa. ¹⁰ Mäniñömö ni cömampoingä a ongongä adinque Paditeoidi guiquënë, Itota wapiticæ cæcä ininque mönö mäo piinte angäimpa, ante në änäni inte tömengä ingante änänitapa.

—Guëmanguionæ iñonte wacä waa bacæcäimpa, ante cædäni, ante Wængongui wææ angantawo.

¹¹ Ante Itota ingante äñönänite tömengä wæætë,

—Guëmanguionæ iñonte waocä tömengä cæningä ontatodë goyæ gui adinque mini waocabo imini incæ æcämë pædæ guipote ænämäi imaingä. ¹² Cæningä önonganque iñongante waocä iñömö waëmö pönï ingampa, ante adinque guëmanguionæ i incæte woadäni beyæ cöwë waa cæcäimpa, ante ämo ëñëmaiminipa.

¹³ Äninque ni cömampoingä ingante wæætë,

—Pædæ pompobi, angä.

Ëñëninque tömengä pædæ gopodique æmæmpo bai waa empocä bacantapa.

¹⁴ Adinque edæ Paditeoidi guiquënë wadæ godinque, Æbänö cæte tömengä ingante wænömö wænguingä, ante godongämæ pönëninque tedegadänimpa.

Codito æbänö cæquingä, ante Itaiya nänö apænecainö

¹⁵ Tömënanï, Wænongäimpa, ante pönente tededäni wædinque Itota iñömö wadæ gocantapa. Wadæ goyongä tæiyænäni tee empo godäni ate wædinque tömengä godö cæcä ate në wënæ wënæ inte wæwëninäni tömänäni waa badänitapa. ¹⁶ Ayæ në waa badänäni inänite, Minitö, Botö æbodö imo, ante mäo apænedämai iedäni, ante wææ angantapa. ¹⁷ İninque Itaiya wodi Wængongui beyæ në apænecä iimainö ante nänö yewæmongainö bai iinque cætimpa.

¹⁸ “Wængongui iimai ante apænecampa. Botö imote në cæquingä incæcäimpa, ante botö në apænte ænongä iñömö a ongongä aedäni.

Adocä botö në waadedongä iñongante botö tömengä ingante adinque watapæ tobopa.

Botö Önöwoca ingante da pönömo ænte ewocadinque botö imo në cæcä iñömö,

Botö nö cæte apænte ancæboimpa, ante tömengä oodeoidi inämai inäni inänite mäo apænecäimpa.

¹⁹ Incæte tömengä wii wæatedö wæatë piincæcäimpa. Ogæ tededämaï incæcäimpa. Waodäni taadö godinque tömengä dicæ Yæ yæ ante tedecä ëñenäniyaa.

²⁰ Cæwipa bede næænimpa wä tadämaï inäni bai waocä wæwengä iñongante tömengä adobaï në wæwengä ingante wido cædämaï ingampa.

Ayæ gongapæncade cömencaGUI mini tente täämämöque go adinque pi ongömönämaï inäni bai tömengä adobaï waocä wæntæye bayongante tömengä ingante godö piinämaï ingampa.

Adocä botö imote në cædongä ingaingä inte tömengä në Awënë nänö baganca cöwë nöingä ante apænte äninque cöwë waa cæcæcäimpa.

²¹ Ayæ botö imote në cædongä në Awënë bacä adinque wadäni oodeoidi inämaï inäni incæ, Tömengä emöwo beyænque mönö quëwengäimpa, ante pönencædän-
impa,”

ante Itaiya wodi Wængongui beyæ nänö yewæmongainö bai Itota mönö Codito ñöwo ponte waa cæcä ingampa.

Wænæ tönö cæcä imaingampa, ante wapiticæ änanipa

(Mäadoco 3.20-30; Odoca 11.14-23, 12.10)

²² Mäniñedë wacä wænæ tönö quëwëwongä inte babetamongä babetadecä bad-
ingä iñongante wadäni tömengä ingante ænte mämönäni pongä adinque Itota godö
cæcä ate tömengä awinca adinque në tedecä bacantapa. ²³ Cæcä waa bacä adinque
tömänäni, Æbänö cæcää, ante GUIñente wædinque, “Awënë Dabii wodi päingä wabänö
imaignampa,” ante pönente wægadänimpa.

²⁴ Mänömainö ante wädäni ëñëninque Paditeoidi GUIquënë, “Iñæmpa wænæidi awënë
Beedeboo tönö në cæcä inongä inte Itota wænæidi inänite wido cæbaingampa,” ante
tedewënanitapa.

²⁵ Wapiticæ tömënäni pönönö ante ëñente wædinque Itota tömënäni inänite, “Awënë
odeye nempo quëwëwänäni iñömö næmæ wæatedö wæatë cædäni ininque awënë odeye
nänö ömædempote wæquinque tömënäni nämä ewente cæbainänipa. Ayæ adocönë
owocabo incæ adoyömö godongämæ quëwëwänäni incæ næmæ wæatedö wæatë
cædäni ininque tömënäni oncö woquinque näwæ gobainänipa. ²⁶ Ayæ Tatäna nempo
quëwëwänäni iñömö edæ næmæ piinque wæatedö wæatë cædinque tömengä ingante
wido cædäni ininque Tatäna dicæ tömënäni awënë odeye imaignä. ²⁷ Minitö, Beedeboo
tönö cædinque Itota wænæidi inänite wido cæcampa, ante tedewëminipa. Mäninö
mini änewënö näwangä i bai minitö miñæ në godäni GUIquënë æcänö tönö cæte wido
cædänii. Ininque minitö miñæ në godäni incæ mini änewënö beyænque ante næmæ
piinque minitö iminute wæatë apænte äninque piincædänimpa anguënë. ²⁸ Botö
iñömö Wængongui Önöwoca tönö cæte wænæidi inänite wido cæbo apa änewëmini.
Mänömaï i ininque botö Wængongui Awënë Odeye inömo inte minitö weca do pömo
aedäni,” ante Itota apænecäcäimpa.

²⁹ Ayæ apænedinque tömengä, “Në tæi piñængä ingante wii goto wininque waocä ædö
cæte tömengä oncönë GUIite mäincoo ö ænguingä. Edæ në ëacä ingante bæi ongonte
goto winte ate pö GUIite ö ænäni bai botö iñömö wænæ inte në bæi ongonte wido cæbo
imopa,” angantapa.

³⁰ Ayæ, “Botö tönö æcänö wii godongämæ cæcä iñömö tömengä iñömö edæ Baa
ante botö imote piinte cæcä ingampa. Ayæ botö, Waodäni botö miñæ poncædänimpa,
ante cæyömo waocä botö tönö wii cæcä iñömö tömengä wæatë botö miñæ poncæ
cæyönänite tatodongä wadæ godänipa,” ante apænecantapa.

³¹ Ayæ, “Ininque apænebo ëñëedäni, angantapa. Mini waocabo wænæ wænæ cæmini
incæ Mæmpo Wængongui ingantedö ante babæ ante godö wiwa ämini incæte Wæn-
gongui wæatë tömänö beyæ pönö ñimpo cæcä beyænque quëwëwëwänäni. Wæatë
edæ Wængongui Önöwoca ingante babæ ante godö wiwa ämini ininque Wængongui
mäninö ante cöwë ñimpo cædämaï incæcäimpa. ³² Ayæ botö Waobo ëñagaimo iñömote
botö imotedö ante waocä piinque adodeque angä incæte Wængongui godö ñimpo

cäcä ate quëwencäcäimpa. Wæætë botö Tæiyæ Waëmö Önöwoca ingantedö ante æcänö pïininque babæ äna guiquënë tömengä inguipoga nänö quëwengäñedë incæ wænte ate nänö goyedë incæ Wængonguï tömengä nänö wënæ wënæ äninö ante cöwë ñimpo cädämaï incäcäimpa,” ante Itota apænegacäimpa.

Awæ æbänö iwæ, ante tömenca bete ëñengäimpa, ante (Odoca 6.43-45)

³³ Ayæ waomö mönö cædinö ante awæ incate bai impa, ante odömoncæte ante Itota iïmaï ante apænegacäimpa. “Awæ æbänö iwæ, ante ëñencæte ante mönö tömenca tä pete bete ëñengäimpa. Awæ waiwæ iwæ ïinque tömenca wainca incaquiwæ impa. Wæætë awæ baawæ iwæ ïinque edæ tömenca baaca incaquiwæ iwæmpa, ante ëñengäimpa. ³⁴ Mïmönë mönö pönëmämo eyede tate bai tao godedinque mönö mäniimämoque ante pönëninque tedemompa. ïinque mïnitö tæntæ pæimïni bai imïni iñömö wiwa cæte quëwëmiini inte mïnitö ædö cæte waa ante apænequimïni. ³⁵ Ayæ waa pöni mäincoo da wente ate tadonte ænänï bai cædinque në waa cäcä iñömö mïmönë waa pöni nänö entawëninö ante pönëninque waa pöni tedete waa cæcampa. Në wiwa cäcä guiquënë mïmönë wiwa nänö entawëninö ante pönëninque wiwa tedete wënæ wënæ cæcampa.”

³⁶ “Edæ apænebo ëñëedäni. Wængonguï tömengä nänö apænte anguiönæ iñonte, Mäniine quïnante önonque tedebitawo, ante angä ëñëninque mïni waocabo edonque apænequënëmiini imïnïpa. ³⁷ ïinque mïni tedepämo tömämämo ante Wængonguï apænte äninque edæ pancamïniya imïnite ñimpo cædinque edæ pancamïniya imïnite, Mïni panguinque tedewëminïpa, ancäcäimpa,” ante Itota apænegacäimpa.

Mä cæte odömömi amönïe, ante änanïpa (Mäadoco 8.11-12; Odoca 11.29-32)

³⁸ Apænecä ëñëninque në odömönäni tönö Paditeoidi pancadäniya Itota ingante apænedinque,

—Awënë në Odömömi ëñëmi. Pönencädänïmpa, ante mä cæte bitö odömönö ante mönitö äinente wämönïpa.

³⁹ Äñönäni Itota wæætë,

—Mïni në wiwa cæcabo inte Wængonguï ingante ëmö cæte pangote bai mïni wadæ godincabo iñömö mïnitö, Mä cæte odömömi adinque pönëmaimönïpa, ante ancaa ämïni awædö. Näwangä ämo ëñëedäni. Nöwomïni imïnite mä cæte odömönämaï ingäimpa. Cönäö wodi beyæ nänö cægäinö ante edæ mäninque mïni aquinque cäcäimpa änewëmiini. ⁴⁰ Mëönaa go adoönæque iñonte gæyæ cæcadë Cönäö wodi nänö ongongaï bai edæ botö adobaï Waobo ëñagaïmo inte edæ mëönaa go adoönæque adopoönæ wao wodido ongoncæboimpa. ⁴¹ Cönäö wodi Wængonguï beyæ apænecä ëñëninque Nïnebaidi wënæ wënæ nänï cægäinö ante ñimpo cædinque Wængonguï gämænö pongadänïmpa. Cönäö wodi wädangä iñongante botö në ñænæmo inte nö ante apænebo ëñëninque mïnitö wæætë ëñënämaï imïnïpa. ïinque Nïnebaidi Wængonguï gämænö në pongäinänï incæ Wængonguï në apænte angä weca pöninque mïni ñöwo quëwencabo tönö godongämæ gongænte ongöninque, Mïni panguinque ëñënämaï ingamïnïmpa töö, ante apænte pïinänidö angüënë.

⁴² “Ayæ adobaï betamonca gämænö ömæ awënë onquiyängä iñömö awënë Tadömöö wodi nanguï ëñente nänö apænedö ante ëñencæte ante doönæ quëwëninque pongacäimpa. Tadömöö wædænque ëñengä iñongante botö godömenque nanguï ëñëmo inte mïnitö weca ongöñömete mïnitö iñæmpa wïi ëñëmiinïpa töö. ïinque mäningä onquiyängä incæ Wængonguï në apænte angä weca pöninque mïni ñöwo quëwencabo tönö godongämæ ongöninque, Mïni panguinque ëñënämaï ingamïnïmpa töö, ante apænte pïincäcäimpa,” ante Itota apænegacäimpa.

Wënæ waodë owote godingä inte adodö pongampa, ante (Odoca 11.24-26)

⁴³ Ayæ apænedinque Itota iïmaï ante apænegantapa. “Waocä baönë owote ate tao godinque wënæ iïñömö edæ, Quingänö baönë go guidinque edæ guëmante quëwengui-moo, ante diqui diqui minte ayongä önömæca to aminte i ate wædinque edæ, ⁴⁴ ‘Botö tao godincönë adodö go guite quëwencæboimpa,’ ante pönëninque adodö pongampa. Ponte ayongä waocä önonganque bayongante wacä önöwoca tömengäa owodämaï ingä adinque wënæ wæætë, Æ waocä botö owodincö bai inongä inte ñöwo önonconque bai wadæ ñëmænte mäincoo cabo tē gæte bai ömæwocacä ingä abopa. ⁴⁵ Ante adinque tömengä wæætë godinque wënæidi godömenque wiwa cædäni tiæte ganca mänimpodäni inänite ænte pongampa. Tömënäni tömänäni waocä baönë godongämæ pö guite owodäni ate waocä iïñömö wënæ yewæninque godömenque wæwengampa. Ñöwomini guiquënë wiwa mini cæcabo adobai bate wæwencæminimpa,” ante Itota apænegacäimpa.

Itota badä tönö tömengä biwiidi
(Mäadoco 3.31-35; Odoca 8.19-21)

⁴⁶ Itota oncönë a ongöninque nanguï inäni inänite apæneyongä tömengä nänö biwiidi tönö tömengä wäänä tömengä ingante bee tente apænegæte ante oncodo ponte a ongönäni. ⁴⁷ Adinque wacä añecæ ponte apænegantapa.

—Bitö badä bitö biwiidi bitö imite apænegæte ante oncodo ponte yabæque ongönänipa cæbii.

⁴⁸ Äñongante Itota wæætë,

—Botö badä ædänö inää ante ämoo. Ayæ botö biwiidi ædänidö inänii ante ämoo, ante pönëmïni.

⁴⁹ Äninque, Itota tömengä miñæ nē godäni gämænö oo cæmöninque,

—Iinäni iïñömö botö badäidi botö biwiidi inönäni inänipa, ante mänömainö ämo abaiminipa. ⁵⁰ Mönö Mæmpo öönæde nē quëwengä nänö änö bai ëñente æcänö cæte quëwëna mäningä edæ botö biwi ingampa. Mäningä botö biwinque ingampa. Mäninä botö badä inampa, ante pönencæboimpa, ante Itota apænegacäimpa.

13

Waocä nänö quiyadö ante odömönte apænegacampa
(Mäadoco 4.1-9; Odoca 8.4-8)

¹ Mäniönæ edæ Itota oncodo tao godinque gäwapæ wedeca godinque tæ conta-gacäimpa. ² Tömengä nänö tæ contate ongöñömö nanguï inäni tömäo goto ponte ongönäni adinque tömengä wæætë wipodë go guite tæ contate wäi wocænte owoyongä tömënäni ayæ gäwapæ yæwedecaque ömaaque ongönänitapa. ³ Ayæ ömaaque ongönäni inänite apænedinque tömengä, Wængongui Awënë nempo quëwëninque æbänö cæquiï, ante ëñencæminimpa, ante botö imæca quëwënäni nani cædönö ante odömönte apænebo ëñeedäni.

Äninque Itota nanguï apænegantapa. “Waocä nē quiyacä iïñömö quiyacæ gocampa.

⁴ Gote quiyayongä pancamonga taadö iïñömö wææmompä. Taadö wæænte eyepodimö öñöñönte ayamöidi pöninque dobæ ade cænänipa. ⁵ Pancamonga guiquënë dicamontaa onguipoi woyedömö iïñömö eyepote wææmpä. Onguipoi woyedömö öñömö inte pæquinämaï quingæ tä bocate pædinque æmonga æipa. ⁶ Edæ guingo icate æmæwo näñe wæmpä. Ininque oguimento yæyæmë guiwadämaï inte cöñe bawadämaï iñönte nænque tï näwäñö wänä cacadinque edæ guingo icate näñe wæmpä. ⁷ Pancamonga guiquënë ömentacodë nänö eyepodimö iïñömö pæquinämaï tä bocate gä æiyonte ömentacoo pö incootonque ganta cæca ate näñe wæmpä. Wampo incapa pæquiï. ⁸ Waëmonguipoga quiyadimö guiquënë tä bocate waa pædinque tömëmö nanguï pönï incapa. Incate pancawæncaa tiëë ganca, pancawæncaa tetenta ganca, pancawæncaa todëinta ganca mänimpomö incapa. Quiyacä nänö quiyadö ante edæ botö mäninque ante apænebopa.

⁹ Èamonca ongönte ëñeedäni,” ante Itota apænegacäimpa.

*Önömoncaque eñente pönenämaï inänipa, ante
(Mäadoco 4.10-12; Odoca 8.9-10)*

¹⁰ Ayä tömengä miñä ne godäni tömengä weca ponte apänedinque, Itota eñemi. Bitö tömənäni inänite inguipoga quëwənäni nani cæinö ante odömoninque quinante mäninque ante odömonte apänebitawo.

¹¹ Äñönänite Itota, “Öönädë Awënë Odeye nempo æbänö quëwenguïi, ante mïni waocabo wëenëhedë mïni eñënëmaï ingainö ante botö ñowo mïnitö imïnite pönö edonque apänebo ate mïnitö adomïnique ne eñëmïni bamïnipa. Wæætë tömənäni inänite guiquënë botö mäninö ante godö apänedämaï imopa. ¹² Edä ne ëacä ingante godönäni nänö godömenque æi bai botö ne eñengä ingante godö apänebo ate tömengä godömenque waa pönï eñente bacæcäimpa. Wæætë ne ömæpocä inongä ingante wædænque nänö ëadi incæ ö ænänï bai ne eñënëmaï ingä guiquënë adobai wædænque nänö eñënö incæ ö ænte bai ewente bai baquinö angüënë. ¹³ Incæte edä awincaque adinque ne adämaï inäni inte tömənäni önömoncaque eñëninque ne eñënëmaï inäni inte pönënëmaï inänipa. Ininque botö, Wængonguï Awënë nempo æbänö quëwenguïi, ante eñënëmaï incädänimpa, ante cædinque imæca quëwənäni nani cæinonque ante odömonte apänebopa, angantapa. ¹⁴ Edä Wængonguï beyä apänedinque Itaiya wodi iïmaï ante nänö yewæmongainö bai ñowo quëwənäni incæ iinque cædänipa. ‘Nawangä eñencæte ante cædinque mïnitö önömoncaque eñëninque pönënëmaï imïni inte eñënëmaï incämïnimpa.

Nawangä acæte ante cædinque mïnitö awincaque adinque wæætë pönënëmaï imïni inte adämaï incämïnimpa.

¹⁵ Mäninäni, Wïi aïnëwædö, ante awinca mönæ guimonte bai cædinque, Önömonca wïi eñëinëwædö, ante tee mömoncate bai cædinque, Mïmönë wïi pönëinëwædö, ante mïmö ömædë inäni inänipa.

Wïi mänömaï i bai tömənäni awinca adinque önömonca eñëninque mïmönë pönencædönänimpa.

Ayä tömənäni nani waa baquinque edä dadi ëmæninque botö gämænö poncædönänimpa.’

Ante Itaiya wodi nänö angainö bai iinque cætimpä,” ante Itota apänegacäimpa.

¹⁶ Ante Itota tömengä miñä ne godäni inänite apänegantapa. “Mïnitö guiquënë awinca do adinque önömonca do eñëninque mïni toquinque impa. ¹⁷ Nawangä ämopa. Wængonguï beyä ne apänegainäni tönö ne nö cægainäni tönö ñowo mïni adö ante nanguï aïnente wædäni incæte adämaï ingadänimpa. Ayä mïni ñowo eñënö ante nanguï eñëinente wædäni incæte eñënëmaï ingadänimpa,” ante Itota apänegacäimpa.

*Quiyacä nänö cædö ante pönente iïmaï impa
(Mäadoco 4.13-20; Odoca 8.11-15)*

¹⁸ Itota ayä tömənäni inänite godömenque apänegantapa. “Mänïi quiyacä nänö quiyainö ante apänedinque botö, Wængonguï Awënë ingante æbänö eñenguïi, ante odömoncæte ante apäneyömo mïnitö ëamonca ongonte eñëedäni, angantapa. ¹⁹ Awënë Wængonguï Odeye nempo æbänö cæte quëwenguïi, ante mönö apänedö ante önömoncaque eñëninque waocä mïmöno pönënëmaï ingä ininque tömengä mïmöno nänö eñëninö incæ wënæ ne wiwa cæcä inongä inte pö ö ængampa. Mäningä ne pönënëmaï ingä iñömö taadö wedeca eyepodimö bai ingampa. ²⁰ Woyedömö dicamontaa eyepodimö bai ingä guiquënë tömengä Wængonguï nänö apänedö eñëninque quingæ Ao ante watapæ tocampa. ²¹ Ayä ate adocä incæ tömëmö woyedömö bai oguïmento yæyämë guiwadämaï bai ingä inte wantæ iñö quëwengampa. Wængonguï nänö apänedö beyä pïinäni wæyongä tömengä ingante wënæ wënæ cæcæte ante togänäni ate wædinque tömengä guïñente wædinque edä ëmö cæte gocampa,” angantapa.

²² Ayä, “Ömentacodë wæænte pædimö bai ingä guiquënë tömengä eñëninque godömenque quëwëinongä inguipoga quëwente quïëmë beyænque mönö wæpämö pöninque

ayä, Mäincoo beyænque toquïmo, ante nãni oda cæte wæwëmãmo pöningue ömentacoo ñancate cæ bai cæyonte Wængongui nãnö apænedinö incæ incadãmaï bai bapa. ²³ Onguipoga waingui-poga quiyadimö bai ingä guiquënë tömengä Wængongui nãnö apænedö ëñente wede pönëningue edæ tömëwæ incate bai Wængongui beyä nanguï cæcampa. Pancadãniya edæ tiëë ganca incate bai nanguï cædãnipa. Wadãni guiquënë tetenta ganca incate bai cædãnipa. Ayä wadãni todëinta ganca incate bai cædãnipa,” ante Itota apænecä ëñëñanitapa.

Waimö tönö ömentacoo quiyate pæmö ante odömongampa

²⁴ Ayä wæætë inguipoga quëwënãni nãni cæinö ante odömöninque Itota godömenque apænegacãimpa. “Öönädë Awënë Odeye iñömö gönea tömëmö waimö në quiyacä bai ingampa. ²⁵ Tömengä quiyate gocä ate waodãni mö ñöñönãni wacä në piïnte cædongä inte wæætë tömengä nãnö quiyadiñömö awëmö ponte, Ömentacoo pæcæïmpa, ante adoyömö pönö ni quiyate wadæ gocä. ²⁶ Ate waimö tänä nä bocate waiwæ pædinque tömëmö incayö adoyömö tæcæguedë ömentacoo pæ. ²⁷ Adinque në cædãni guiquënë në ëacä weca pöningue, ‘Awënë, bitö gönea quiyadiñömö tömëmö waimö minãmaï imitawo. Ædönö ponte ömentacoo adoyömö pæ, ante wæmönipa.’ ²⁸ Ante äñönãni, ‘Wa. Mönö piïnte äongä cæbaingampa. Wabãnö ii.’ Ante pönëñongä tömënãni, ‘Ininque bitö ämi godinque abæ wiquimöni, ämitawo.’ ²⁹ Änãni ëñëningue në ëacä wæætë edæ, ‘Inãmpa mänömaï cæmini ininque waiwæ tönö ömentacoo guëa abæ wite babaimpa. ³⁰ Ininque minitö ñöwo edæ ömæ widãmaï inte to amïña peganca ee amïni guëa pæcæïmpa. Amïñayedë edæ në pedãni inãnite botö, Ömentacoo täno tæ gæte topo cæte iya täninque tömëmö waimö guiquënë tä pete mämö ñönödãni, ancæboïmpa,’ ante në ëacä apænecampa.” Mänömaïnö ante odömoncæte ante Itota apænegacãimpa.

Möotatamö guidimö ante odömonte apænecampa

(Mäadoco 4.30-32; Odoca 13.18-19)

³¹ Ayä wæætë inguipoga mönö adö ante odömöninque Itota godömenque apænedinque, “Waocä möotatamö tömëmö ænte mäo tömëmoncodë quiyacä bocate pæ aminitawo. Mänimö guidimö inte ñænæ pæ bai Wængongui Awënë Odeye nempo mini quëwencabo iñömö adobai yebænte pæpa. ³² Edæ möotatamö mini ænte quiyamö guidimö pönö i bai wamö mini quiyamö adomonque incæ adobai guiyãmö pönö i iñömö edæ dæ ampa. Incæte möotatamö iñömö tä bocate pædinque möotatawæ edæ ocãñequi doyæ pæwæ bapa. Wii tömäa ocãñequi mini quiyadiwæ bai edæ ocäa inãmaï inte möotatawæ iñömö edæ ñænæ awæ i adinque ayamöidi ponte awænëmæ ongönãnipa. Möotatamö guidimö incæ mänömaï pæ bai Wængongui Awënë nempo quëwënãni iñömö wædænque ininãni incæ nanguï yebænguïnãni inãnipa,” ante odömöninque Itota apænegacãimpa.

Päo yedæ æmpoqui da wenguï ante odömonte apænecä

(Odoca 13.20-21)

³³ Ayä wæætë inguipoga quëwënãni nãni cæinö ante odömöninque Itota godömenque iïmaï ante apænecantapa. “Päo yedæ æmpocæïmpa, ante onquiyængä ñænængade tee manguincade ænte tee mäninque ædina nãni ämö ænte mempoga go adopoque da wëningue ayä yedæ æmpoqui ænte pönö da wëningue wempo wempo ædæmö cædengä ate päömo yedæ æmpote tömäo näämænta bapa. Yedæ æmpote ate päömo tömäo näämænta ba bai öönädë Awënë Odeye nempo mini quëwencabo iñömö tömämini nö ëñente bamïnipa,” ante odömöninque Itota apænegacãimpa.

Inguipoga nãni cæi bai impa, ante Itota odömongampa

(Mäadoco 4.33-34)

³⁴ Nanguï inãni mäniñömö ongönãni iñönãnite Itota inguipoga quëwënãni nãni cæinö ante odömöninque mäninque ante tömënãni inãnite apænecantapa. ³⁵ Edæ Wængongui beyä në apænegaingä iïmainö ante doyedë apænegacãimpa.

“Wængongui æbänö cæcää, ante botö inguipoga quëwënäni nani cæinö ante odömön-
inque botö iñæ ænete apænegæboimpa.

Wængongui nänö badongaiñedë ayæ godömenque ñöwo ganca
nänö wë wodonte ëñengainö ante botö ñöwo apænegæboimpa,”
ante docä nänö angainö bai ñöwo iñömö iinque cæquinque Itota odömonte apæne-
gacäimpa.

Ömentacoo ante iimaï ante impa

³⁶ Ayæ nanguï inäni inänite emö cæte godinque Itota oncönë pö guicä adinque tö-
mengä miñæ në godäni guiquënë tömengä ingante mämö änänitapa. Gönea ömentacoo
quiyadincoo ante apænedinque bitö æbänö ante odömoncæte ante apænebii. Edæ
edonque apænebi ëñëmönie.

³⁷ Äñönänite tömengä, “Tömëmö waïmö në quiyadingä botö äningä iñömö botö
Waobo ëñagaïmo inte mäningä bai imopa. ³⁸ Gönea botö äniñömö bai iinguipo impa.
Tömëmö waïmö botö änimö bai inäni guiquënë Awënë Odeye ingante nani ëñencabo
inänipa. Ömentacoo botö änincoo bai inäni guiquënë wënæ inte në ëñënäni iñönäni
³⁹ në piïnte quiyacä botö äningä bai iñömö edæ wënæidi awënë ingampa. Amiña bai
guiquënë inguipoga iinque bayedë ingäimpa. Ayæ amiña tä pete bai cädäni guiquënë
Wængongui anquedoidi inänipa.”

⁴⁰ “Iinque edæ nani amiña bayedë ömentacoo të gæte topo cæte nani iya täi bai
edæ adobai iinque bayedë baquinö anguënë. ⁴¹ Mäniñedë edæ Waobo ëñagaïmo inte
botö anquedoidi inänite ämo pöninque tömënäni gönea iñömö ömentacoo të gæte bai
cæcädänimpa. Botö nempo quëwënäni pancadäniya oda cæte ëñënämaï cädänipa.
Iinque, Oda cæcädänimpa, ante në cädäni tönö në ëñënämaï cädäni tönö tömänäni
inänite botö anquedoidi iñömö abæ wite bai të gæte mäo, ⁴² gongapamö nani ämogate
Ca ca wæyömö wido cæcädänimpa. ⁴³ Mäniñedë edæ në nö entawëmini guiquënë mönö
Mæmpo Awënë Odeye iñongä tömengä nempo në quëwëmini iñömö edæ nænque tamö
guinæ gongæ bai adobai guinæ edæ gongæncæminimpa. Èamonca ongonte ëñëedäni,”
ante Itota angacäimpa.

Wæmoncoo wë wodonte mäincoo, ante

⁴⁴ Godömenque odömöninque Itota iimainö ante apænegantapa. “Öönädë Awënë
Odeye nempo mini quëwencabo iñömö wæmoncoo onguipodë ææ wote nani wë
wodonte mäincoo bai impa. Waocä gote mäincoo adinque adodö ææ wote æninque
wayömö wë wodongampa. Wodonte ate tömengä watapæ todinque tömengä ëadincoo
tömancoo godonte eyepæ æninque tömengä wæmoncoo nänö wë wodönimæ æncæte
ante ömæ në ëadingä weca do godinque mäniimæ tömämæ beyæ ante edæ eyepæ pædæ
godöninque ængampa. Waocä mänömaï tömengä ëadincoo tömancoo nänö godöni
bai cædinque öönädë Awënë Odeye iñömö, Botö nempo quëwencæminimpa, ante
tömengä Wëñængä ingante eyepæ godöninque inguipoga tömäo quëwënäni inänite
ængacäimpa,” ante Itota apænegacäimpa.

Wamö adomonque pöni wæmö imö ante

⁴⁵ Ayæ godömenque, “Öönädë Awënë Odeye nempo guicæte ante cæcä iñömö
wamoncoo pededamö nani ämoncoo godonte æncæte ante në diqui diqui mingä bai
ingampa. ⁴⁶ Iinque wamö pededamö nänö äinënimö adomonque wæmö pöni i ate
tæcæ adinque waocä wadæ gote tömengä nänö ëadincoo tömancoo godonte eyepæ
æninque wæætë mänimö wamö incæ godonte ængampa,” ante Itota odömonte apæne-
gacäimpa.

Dicamöñæ ante odömonte Itota apænegacampa

⁴⁷ “Ayæ wæætë edæ, Öönädë Awënë Odeye iñömö edæ dicamöñæ gäwapæ nani dadöi
bai tömää gæyæidi ænte bai cæcampa. ⁴⁸ Dicamöñæ eyede dadöninque yæwedeca wëa
manta cönöninque täë contate apænte adinque, Näwäaquinä i, adinque ö æ otodë da

wëninque, Baacä i, adinque wido cædäni bai Wængongui Awënë adobai cæquiringänö angüënë. ⁴⁹ Edæ iinque bayedë Wængongui anquedoidi pöninge në nö cædäni inänite apænte æninque në wiwa cædäni inänite adinque nänënë gönongä ⁵⁰ ongöñönänite gongapamö edæ guitodongä guicædänimpa. Tömënanï edæ mäniñömö guite ongöninque ämogate wædinque Ca ca wæcædänimpa,” ante Itota odömonte apænegacäimpa.

Wæmoncoo incæ müincoo tönö pedæncoo ante

⁵¹ Mäniñö ante iinque odömonte apænedinque Itota tömënanï inänite,
—Botö odömonte apænedö tömänö ante edonque ëñëmïnitawo.

Äñongante,
—Ao ëñëntamönipa.

⁵² Ante apænedäni ëñëninque tömengä apænecantapa.

—Ïninque æcänö, Öönædë Awënë Odeye æbänö cæcää, ante ædæmö ëñëninque në odömonte apæneda i tömengä iñömö wæmoncoo në da wente mangä bai adobai inongä inte Wængongui nänö änö ante entawengä ingampa. Ayæ edæ në ëacä nänö da wëncade wi ænedinque müincoo tönö pedæncoo tadonte odömongä bai në odömonte apænecä iñömö adobai cæcampa. Edæ doyedë nänö ëñënö incæ ñöwo nänö ëñënö incæ müimönë waa pönï nänö entawënö ante edonque odömonte apænecampa, ante Itota mäninge ante idæwaa apænegacäimpa.

Näatadeta iñömö ponte Itota apænecampa

(Mäadoco 6.1-6; Odoca 4.16-30)

⁵³ Wængongui Awënë æbänö cæcää, ante odömoncæte ante imæca quëwënanï nänï cæinö ante nänö odömöninö tömänö ante iinque apænedinque Itota wadæ gocantapa.

⁵⁴ Tömengä nänö pægaiñömö ponte tömënanï odömöincönë pö guidinque mäniñömö quëwënanï inänite odömonte apænecantapa. Ëñëninque tömënanï ancai guñëninque,

—Ïngä iñæmpa, æbänö cæte nangui ëñengä ingää, änänitapa. Tömengä edæ æbänö cæte tæi piñæninque bamönengæ cæcää, ante ëñencæte ante wæmönipa. ⁵⁵ Ïngä iñæmpa awæmpa në tímöwengä wengä imaingä inte bamönengæ mänömai cæcampa, ante awædö. Tömengä wäänä ëmöwo Mäadiya ingampa, ante awædö. Tömengä biwiidi önönänique Tantiago tönö Ootee, Timönö tönö Codaa inämai inänitawogaa. ⁵⁶ Tömengä biwinqueidi mönitö tönö tömänäni ongönäni aedäni. Ïninque tömengä wæætë æbänö cæte nangui ëñengä badinque edæ nangui cæcää.

⁵⁷ Ante pönente wædinque tömënanï tömengä beyæ ante piinte badänitapa. Piinte badäni adinque Itota tömënanï inänite angantapa.

—Ïñæmpa Wængongui beyæ në apænecä iñömö tömengä tömämæ gote apæneyongante tömengä ingante waa adänipa. Wæætë tömengä nänö pægaiñömö pöninge oncönë pö guite apæneyongä edæ mäniñömonque tömengä ingante wiwa adänipa töö, ante apænegacäimpa.

⁵⁸ Incæte, Pönënamai iñönänite botö ædö cæte nangui mä cæquimoo, ante pönente wædinque tömengä tömënanï weca edæ wædænque pönï cægacäimpa.

14

Wäö æpænë në guidönongä wængampa

(Mäadoco 6.14-29; Odoca 9.7-9)

¹ Tömënanï mäniñedë, Itota æbänö cæcää, ante mäo änäni ëñëninque pancabaa awënë Edode do ëñengacäimpa. ² Tömengä iñömö tömengä ingante në cædäni inänite apænecantapa. “Wäö wodi æpænë në guidönongä incæ Ïngä Itota iñömö adocä inte a ongongä awædö. Tömengä do wænte ñäni ömæmöninque pongampa töö. Mäniñö beyænque tömengä tæi piñænte entawëningä inte në nangui cæcä ingampa,” ante awædö, angantapa.

³ Wäö wodi iñömö iimai wængacäimpa. Do iñedë awënë Edode iñömö tömengä biwi Pedipe manguiwëningä Ædodiya ingante ö ænte möningä inongäimpa. Mäningä

Ædodiya Wäo ingante püingä beyænque Edode iñömö Wäo ingante bæi ongonte goti winte tee mönedongäimpa. ⁴ Edæ Wäo iñömö nänö caate wænguinque Edode ingante iimainö ante do wææ äningä inongäimpa. “Edode eñëmi, bitö Wængongui nänö angainö bai eñënamai inte edæ mäningä onquiyængä ingante manguiwëmipa töö,” ante cöwë wææ äningä inongäimpa.

⁵ Angä eñente püinque Edode, Wäo ingante botö æbänö cæte wænonguimo, ante cædongäimpa. Incæte tömänäni, Wængongui beyæ në apænedongä Wäo ingampa, ante tededäni eñëningä inte Edode, Botö imote püinäni wæcæ wæ, ante guiñente wædinque Wäo ingante wænönämaï inte ata cæpodongäimpa. ⁶ Incæte Edode nänö eñagaiönæ iinque bayö wadäni ponte godongämæ bete ayönäni edæ Ædodiya wengä baquecä tode pete äwacä adinque Edode wæætë nangui todongäimpa. ⁷ Iinque tömengä, Wængongui ayongä näwangä ämopa, ante baquecä ingante ämongäimpa. Waa pönï bitö tode pete äwadi beyæ bitö quiëmë ante æinente ämi adinque botö bitö änö ante cöwë pönömo æncæbiimpa, ämongäimpa. ⁸ Angä eñëninque baquecä wæætë wäänä weca gote, Æbänö anguimoo, ante äñongä wäänä guiquënë, iimai æe, angä eñëninque baquecä wæætë Edode ingante,

—Iimai pönö cæbi æmoe. Wäo æpænë guidönongä ingante wangö tamencate tömengä ocabo iñï coyomænætaca cö cæte ænte mämö pædæ pönömi æmoe.

⁹ Angä eñente wædinque awënë odeye iñömö, Æ eñente awædö. Quinö ñöwo cæquimoo, ante nangui wædongäimpa. Incæte godongämæ becönäni eñëñönänite, Wængongui ayongä cöwë godoncæboimpa, ante në äningä inte në wænongä ingante tömengä, Baquecä nänö äninö bai cædäni, ämongäimpa. ¹⁰ Angä eñëninque në wænongä tee möneincönë go guidinque edæ Wäo ingante mao bæi ongöninque wangö tomencadongäimpa. ¹¹ Ayæ Wäo ocabo iñï coyomænætaca cö cædinque baquecä weca ænte mämö pædæ pönönäni æninque baquecä wæætë wäänä inante godongä ænönäimpa.

¹² Ayæ Wäo wodi tömengä miñæ në godinäni pöninque tömengä baö iñï ænte mao daga wëninque wæætë Itota weca pöninque, Wäo wodi mänömaï wängä wæmönipa, ante tömengä ingante apænegadänimpa.

5.000 ganca inäni inänite Itota godongä cænänipa

(Mäadoco 6.30-44; Odoca 9.10-17; Wäo 6.1-14)

¹³ Wäo wodi do wängäimpa, ante apænedäni eñente wædinque Itota wæætë edæ, Önomæca gocæboimpa, ante wipodë gui contate wogaa gocantapa. Gocä ate, Mäniñömö gocæ cæcampa, ante tededäni eñëninque tæiyænäni tömënäni nani quëwëñömö wacönë ta wacönë ta ömaaque oo pænta täno gote mä ongönänitapa. ¹⁴ Itota iñömö wipodë wogaa pö ti wæænte ayongä nangui inäni dobæ ponte mä ongönäni adinque, Æbänö cæte quëwenguinänii, ante tömënäni tönö godongämæ wæte bai pönengantapa. Ayæ daicawo gawænäni inänite godö cæcä ate waa badänitapa. ¹⁵ Gäwadecæ bayö tömengä miñæ në godäni tömengä weca pöninque,

—Ñöwo wëmö bacæ cæpa cæbii, änänitapa. Ayæ, Önomæca incæ cængui dæ ä adinque bitö godongämæ ongönäni inänite ämi woadäni quëwëñömö gote cængui godonte ænte cæncædänimpa.

¹⁶ Äñönänite Itota,

—Goquinäni, ante quinante äminii. Minitö wæætë godömini cæncædänimpa, ämopa.

¹⁷ Äñongante,

—Iñæmpa päö önompo æmæmpoque gæyæ mä pönï i. Cængui näæmönipa diyæ godömöni cænguinanii.

¹⁸ Ante wææ äñönäni Itota iñömö,

—Mänimpodänique näæmini incæ ænte mämö pædæ pönömini æmoedäni, angantapa.

¹⁹ Ayæ godongämæ mä ongönäni inänite angä gaguimäa tæ contadäni ate tömengä päö önompo æmæmpoque gæyæ mä æninque öönædë inö æmö adinque, Wængongui,

bitö waa pönömi ænte cæmönipa. Ante apænedinque pöö pä æ pä æ cædinque tömengä miñæ nê godäni inänite pædæ pönongä æninque tömënäni wæætê godömenque tömänäni inänite di mæñæ di mæñæ cædäni ænte cænänitapa. ²⁰ Mänömai pönö cæcä æninque tömänäni tömo pönî cænänitapa. Cænte ate edæ tömënäni ao mæ ao mæ nâni ñönöni ee öñoncoo pædæ wææmpo ö æ da da wente æninque tömengä miñæ nê godäni iñömö otodê önompo tipæmpoga go mentodêa cænguî eyede da wënäni contagatimpa. ²¹ Nê cænäni iñömö edæ onguñænänique incæ tinco müido ganca mänimpodäni iñönäni onquiyænäni tönö nâni wencabo tönö godömenque nanguî inäni inte cængadänimpa.

*Itota æpæ yædopæno dao dao gocampa
(Mäadoco 6.45-52; Wäö 6.16-21)*

²² Tömänäni iinque cænäni ate Itota tömengä miñæ nê godänique inänite do angantapa. Mînitö tano wipodê guîi contate æmæ wedeca tao goyömiini botö wæætê godongämæ ongönäni inänite ämo godäni ate ayæ poncæboimpa. ²³ Angä Ao ante tao goyönäni tömengä wæætê wadäni inänite, Ñowo goedäni, angä wadæ godänitapa. Ayæ tömengä Wængonguî ingante apæneceate ante änanquidi æicantapa. Æite apænedinque wëmö bayö tömengä adocanque a ongongacäimpa. ²⁴ Tömengä miñæ nê godäni guiquënë taocæte ante cædinque edæ tæcætibæ wiyate cæwoyönäni edæ woboyæ pæmænte nanguî pönö edæ æpæ incæ incæ cæte mængonta mængonta cæyonte wipo wäi wocæntapa. ²⁵ Ayæ tawadiya nänö peyedê bayonte edæ Itota iñömö æpæ yædopænoque edæ dao dao pongä adänitapa. ²⁶ Yædopæno edæ dao dao pongä gomö adinque tömengä miñæ nê godäni edæ ancai guñëninque,

—Quiëmê imai. Waocä wænte babæningä wabänö cægongä, ante Yæ ante guñente wædänitapa.

²⁷ Ante wæyönäni edæ Itota iñömö,

—Ee piyænê cæte guñënämaï iedäni. Botö imo apa guñëwëminii.

²⁸ Ante äñongä, Pegodo guiquënë,

—Awënë, bitö imitawo. Nö nö imi inte bitö æpæ yædopæ bitö weca ämi pömoe.

²⁹ Angä ëñëninque,

—Pöe.

Äñongä Pegodo wipodê ongöninque edæ ti wææninque yædopæno edæ dao dao gote Itota weca tæcæ obo ponte ayongä, ³⁰ woboyæ nanguî nanguî pæmæ ate wædinque ancai guñëninque æpænê tæi guïidinke Yæ wæcantapa.

—Awënë, æpæ bete wæncæbointaye.

³¹ Ante wæcä adinque Itota tömengä ingante edæ quingæ pædæ gopo töö æmæninque,

—Iñæmpa botonque iñömote pönëninque pöe, antabopa. Quinante wapiticæ edæ pönëmitapa, angantapa.

³² Ayæ wipodê guïda ate woboyæ iñontobæ næ pæmænämaï gongæ. ³³ Adinque wipodê ongönäni wæætê Itota weca ædæ wæænte apænedinque,

—Nawangä bitö Wængonguî Wëñæmi inömi imipa, ante watapæ apænedänitapa.

*Caate wædäni inänite Itota cæcä waa badänipa
(Mäadoco 6.53-56)*

³⁴ Ayæ æmæmäa taodinque tömënäni Guënetadete bæ ti wæænänitapa. ³⁵ Ti wæænäni adinque mänïömæ quëwënäni guiquënë, Tömengä Itota ingampa, ante do adinque tömämæ mao gode ä gode ä cædäni ëñëninque wënæ wënæ inäni inänite tömänäni inänite tömengä weca ænte mämönäni pönänitapa. ³⁶ Itota ingante, Bitö weocoo ämi yæwedecoque gampote waa bacædänimpa. Änäni wædinque tömengä Ao angä ëñëninque nê gampo gampo cædäni iñömö tömänäni edæ waa inäni bagadänimpa.

¹ Dodäni näni wææ angainta ate nê odömönäni tönö Paditeoidi pancadäniya Eedo-tadëë quëwëninque mänñedë Itota weca pöninque iïmai änänitapa.

² —Bitö miñä nê godäni iñömö dodäni näni angainö ante quïnante ëñenämaï inte wapiticä cädäni wæmönipa. Tömënanï iñæmpa mempodämaï inte wentamö nampote cænguï cænäni awädö.

³ Ante piïnäni wædinque Itota wæætë,

—Minitö guiquënë dodäni näni angainonque ante ëñente cæcæte ante cæd-inque Wængonguï nänö wææ angainö ante edæ quïnante ëñente cädämaï iminiï.

⁴ Wængonguï, “Bitö wæmpo ingante bitö badä inante waadedinque waa cæe,” angacäimpa. Ayä, “Wæmpocä ingante wäänä inante nê piïnte wiwa angä ingante wænömïni wæncæcäimpa,” ante wææ angacäimpa.

⁵ Minitö guiquënë iïmai änewëninque edæ wææ cæminipa. Waocä mæmpocä ingante waa cæquënegä iñongante wäänä inante adobaï waa cæquënegä iñongante minitö wæætë wææ äninque, Waocä wæmpocä ingante wäänä inante iïmainö ante apænecæcäimpa, änewëminipa. Wæætë edæ “Mæmpo, bitö quï, ante, Badä, minö quï, ante botö pönömo miña ænguënenö incæ ñöwo wæætë edæ, Wængonguï quï, ante do edæ godonte impa.” ⁶ Ante apænedinque waocä wæmpoda inate wiï godonguënegä ingampa, ante minitö iñömö edæ wææ änewëmini awädö. Iñæmpa mänömainö ante wææ änewëninque minitö edæ dodäni näni angainonque ante cæcæte ante cædinque Wængonguï nänö wææ angainö ante edæ, Önöneque impa, ante bai cæminipa töö. ⁷ Minitö waa cæmini inte bai nê änewëmini iñöminite edæ ämo ëñëedäni. Mini cädö ante Wængonguï iïmai ante apænecampa, ante Itaiya wodi nöingä ante yewæmongacäimpa.

⁸ “Iïnäni iñömö botö imote önöneque waa apænete bai tededäni incæte, tömënanï mimöno æmæ pönente edæ gobæ ongonte bai inäni awädö.

⁹ Ayä botö weca ædæ wæænte waa ate bai tededinque tömënanï, Wængonguï imidö anguënë, ante önöneque tedewëninque önonque edæ cädänipa.

Waodänique näni wææ änönö ante odömonte apænedänipa töö.”

Ante Wængonguï piïngampa, ante yewæmongacäimpa.

¹⁰ Mänömainö ante apænete ate Itota wæætë nanguï ongönäni inänite aa pecä pönäni adinque apænegacäimpa.

—Botö apænebo ëñëninque ocaidë pönente ædæmö ëñëedäni, angantapa. ¹¹ Önönë guidi beyænque waocä mimö wentamö entawënämaï ingampa. Wæætë mimönë wiwa pönëninque nänö önöne tao gode beyænque tömengä wentamö mongængampa, ante apænebo ëñëedäni.

¹² Ante apænecä ate tömengä miñä nê godäni iñömö tömengä weca ponte änänitapa.

—Bitö mänömainö ante apænebi ëñëninque Paditeoidi iñömö guingo imonte piïnäni apa änewëë.

¹³ Äñönäni tömengä,

—Awæ botö Mæmpo minämaï iwæ to wite bai wido cæte bacäimpa. Paditeoidi iñömö wiï botö Mæmpo quïnäni inönäni inte adobaï edæ wido cæte wæcädänipa.

¹⁴ Edæ babetamönäni bai ëñënëmaï inäni inte tömënanï iñömö wadäni adobaï babetamönäni bai inäni inänite nê ænte mäodäni inäni apa cæminii. Tömënanï inänite gomö aedäni. Edæ babetamongä ingante wacä adobaï babetamongä inongä ingante ænte mäocä gocä ininque tömëna nänä babetamoncaya guëa ontatodë mongæncädë guibainapa.

¹⁵ Ante apænecä ëñëninque Pegodo,

—Mänömainö ante odömonte apænedinque bitö æbänö ante odömoncæte ante apænebitapa, ante apænebi ëñëmönie.

¹⁶ Äñongante Itota,

—Minitö incæ ocäi ömæcadäni bai inömini inte ëñënëmaï iminitawo. ¹⁷ Edæ quincoomë önöne guidincoo incæ cæncädë guite ate goiwaa ogä mente wido cæte ba apa änewëminii. ¹⁸ Wæætë önöne waocä nänö tedewëno guiquënë mimönë nänö wiwa pönëno beyænque tao godepa. Ininque waocä önöwoca mäninö beyænque

wentamö ewocacampa. ¹⁹ Edæ waocä mīmönē nänö entawente taodinö beyæ wiwa ante pönengampa. Mīmönē nänö piinte pönönö beyænque waocä godö wænongampa. Mīmönē towēinente tömengä nänöogängä inämaï iñongante godö mongampa. Ayæ æcämenque iñongante mīmönē towēinente beyænque waocä godö mongampa. Mīmönö æinente wædinque wacä qui awēmö ængampa. Mīmönē wiwa pönēninque wacä ingante godö babæ wapiticæ apænecampa. Ayæ wacä ingante piinte tedecampa. ²⁰ Iñinque mīmönö tao godi beyænque waocä wentamö ewocacampa. Wæætē mempodämaï inte nänö cænö beyæ waocä wentamö ewocadämaï ingampa, ante edæ Itota apænecacäimpa.

*Onquiyängä oodeocä inämaï inte wede pönente angampa
(Mäadoco 7.24-30)*

²¹ Mäniñömö quēwente wadæ godinque Itota Tido nāni quēwēñömö Tidöo nāni quēwēñömö eyequeï pongacäimpa. ²² Mäniñömö ponte quēwēñongä onquiyängä Cānaāmæ nē ēñate pædingä inte adoyömö quēwente tadinque tömengä weca pöninque aa pecantapa.

—Awēnē bitö Awēnē Dabii wodi pæimi inömi inte ēñēmi. Botö beyæ pönö waadete waa cæe. Botö wēñängä onquiyängä wēnæ inte quēwente wæwengampa cæbii.

²³ Ante mänömaï aa pecä wædinque Itota pæ wēnecantapa. Pæ wēnecä adinque tömengä miñæ nē godāni guiquēnē tömengä weca pöninque wææ apænedānitapa.

—Mönö miñæ tee empote Yæ yæ nē änewēnongä ingante ämi gocæe.

²⁴ Ante wææ änāni ēñēninque Itota wæætē,

—Cænināni obegaidi gueogæ gote wæwēnāni baï möni idægocabo adobaï inte wē wömonte wædāni adinque Mæmpo Wængonguï, Tömēnānique inānite cæquimi goquimi, äninque botö imote da pönongä wii pontawoo.

²⁵ Angä ēñēninque onquiyängä iñömö wæætē Itota önöwa gäänē ædæ wææninque apænecantapa.

—Awēnē, botö beyæ cæbi waa bacæe, angantapa.

²⁶ Äñongante Itota wæætē,

—Wēnāni cænguï inguēnē waocä dicæ guintamöidi cænguï ante wææntodonguingä. Bitö edæ wabi iñömite botö bitö beyæ ædö cæte cæquimoo.

²⁷ Angä ēñente wædinque,

—Awēnē iñæmpa nē eadāni nāni cænte eyepodimö wæænte ænömengadæmpa inö önöñö guintamöidi ade cæmpa.

²⁸ Äñongante Itota,

—Onquiyæmi ēñēmi. Bitö nanguï pönēnīmi iñömite bitö änö ante do cæte impa.

Ante tæcæ apæneyongä tömengä wengä edæ do adoyedē edæ waa bagacäimpa.

Caate wædāni inānite Itota cæcä waa badānīpa

²⁹ Mäniñömö quēwēninque wadæ godinque Itota Gadideapæ ömaaque pö änanquidi æi tæe contacantapa. ³⁰ Tæe contate ongöñongä nanguï ināni godongämæ pöninque wēnæ wēnæ inte wædāni inānite ænte pönānitapa. Pæ opa pæ opa godāni tönö tente tobænte wædāni inānite babetamö ināni tönö babetade ināni inānite Itota weca ænte mämö ñö cædānitapa. Ñö cædāni ongöñönānite Itota tömänāni inānite godö cæcä ate waa badānitapa. ³¹ Godongämæ ongönāni guiquēnē, Itota godö cæcä ate babetade inināni incæ tededāni ēñēmönīpa, ante guñente wædānitapa. Tente tobænte wædināni incæ waa badāni amönīpa. Pæ opa pæ opa godāni inināni incæ waa bate godāni amönīpa. Babetamö inināni incæ waa adāni wæmönīpa, ante guñente wædinque edæ Wængonguï ingante apænedinque, Möni idægocabo Wængonguï inömi inte edæ bitö adobique ñäö baï emömi inte edæ tæi piñænte cæbi amönīpa, ante watapæ apænecadānimpa.

*4.000 ganca ināni inānite Itota godongä cænānīpa
(Mäadoco 8.1-10)*

³² Mäniñedē Itota tömengä miñæ nē godāni inānite aa pecä pönāni ate apænecantapa.

—Ílnáni botö weca ongönáni iñömö meönaa go adoönæque iñonte botö weca ongöñönáni tömënáni cængui ömæpodáni badáni ate wædinque botö tömënáni tönö godongämæ wæte bai pönemopa. Cænāmaī inte gue ænente wæyönānite botö, Oncönē goedāni, āmo gote bai tömënāni edæ idömæ godinque nangæ badinque edæ bocæ bocæ cæte wæcædönānimpa.

³³ Angä wædinque tömengä miñæ nē godāni wæætē,

—Ēnodāni ināniyaa. Önomæca incæ pāo impa æninque godömöni cænguinānii.

³⁴ Ante wæyönānite Itota,

—Minitö pāo æpodö nææmīni.

Åñongante,

—Pāo önompo æmæmpoque go mēa gæyæ guiyä pönī mēa pönī mæ ongompa, ante edæ apænedānitapa.

³⁵ Itota iñömö godongämæ ongönāni nanguī ināni iñönānite angä tæ contadānitapa.

³⁶ İninque pāo önompo æmæmpoque go mēa tönö gæyæ tönö nāni næænincoo pædæ godönāni æninque tömengä Wængongui ingante, Bitö waa pönömi cæncæmönimpa, ante apænedinque pä æninque tömengä miñæ nē godāni inānite pædæ pönongä æninque tömënāni wæætē wadāni inānite pædæ pædæ godönāni ænānitapa. ³⁷ Æninque tömānāni godongämæ cæninque tömo pönī cænānitapa. Idæwaa cænāni ate tömënāni pä ænte nāni cænte ñönönī ee öñoncoo wente æninque Itota miñæ nē godāni otodē pönö da wēnānitapa. İninque önompo æmæmpoque go mentodēa cængui eyedē contagatimpa. ³⁸ Nē cænīnāni iñömö onguiñænānique coatodo miido ganca iñönāni onquiyænāni tönö nāni wencabo tönö tömënāni æpodānimē godömenque nanguī pönī inönānimpa. ³⁹ İinque cænāni ate Itota iñömö, Goedāni, angä godāni ate tömengä wipodē guī contate imæmāa Mäagadabæ pongacāimpa.

16

Mä cæte odömömi amönie, änānipa

(Mäadoco 8.11-13; Odoca 12.54-56)

¹ Itota pongä adinque Paditeoidi tönö Tadoteoidi iñömö, Mönö ämö eñëninque tömengä oda cæbaingampa, ante cædinque Itota ingante apænedinque, Bitö, Pönencædānimpa, ante öönædē mä cæi bai cæbi amönie. ² Änāni eñëninque tömengä wæætē,

—Minitö iñæmpa gæwædecæ iñonte æmö adinque, “Baänæ watamö bacæ wiñadæ pönī gongæmpa,” ante do eñëmīnīpa. ³ Ayæ ñäö bayö edæ, “Cöönæ cæcæ guinæ wepæ bai gongæmpa,” äninque minitö, Öönæ æbänö ëönæpa, ante adinque do edæ eñëmīnīpa. İninque, Wængongui quīnö cæcæ cæcampa, ante quīnante wīi eñëmīni.

⁴ Nöwomīni iñömö edæ nē wīwa cæmīni inte minitö Wængongui ingante pangocæte bai ëmö cæte gomīni imīnīpa. Edæ, Mä cæte odömömi adinque pönëmaimönīpa, ante ancaa ämīni awædö. Incæte Cönäö wodi mä pönī nänö cægäinö ante adinque minitö pönenguënëmīni iñöminite mäninque mīni aquinque ante odömönte ingäimpa.

Äninque Itota tömënāni inānite ëmö cæte wædæ edæ gogacāimpa.

Wapiticæ nāni apænedö yedæ æmpoqui bai impa, ante

(Mäadoco 8.14-21)

⁵ Tömengä miñæ nē godāni guiquënë tao gocæ cædinque pāo wīi pönente ænāmaī inte æmæmāa tao ti wæænānitapa. ⁶ Itota iñömö mänīi pāo tömënāni nāni ænāmaī inö ante wīi tededinque wadö ante pönente iīmaī apænecantapa.

—Pāo yedæ æmpoqui, ante Paditeoidi tönö Tadoteoidi nāni da wente cæi ate gomö aedāni.

⁷ Angä eñente wædinque tömengä nänö nē ëmiñænāni wæætē nāni caboque tededinque,

—Pāo ænte pönāmaī imöimpa, ante Itota wabänö mänömaī beyæ ämaingampa.

⁸ Ante nāmāneque tededāni wædinque Itota iñömö,

—Mīni pönēegade. Pāo ænāmaī inte mīni pōnīnō ante quīmæ tedewēmīnii.
⁹ Awincaque adinque adāmaī īmīnitawo. Edæ pāo ōnompō æmæmpoquē æninque botō godōmo æninque tinco mīido ganca īnāni nāni cæninō ante awincaque adimīni inte mīnitō mīmōno pōnēnāmaī īmīni awædō. Ayæ cænte ate nāni wææntodōnincoo wente ænte mīni contadinō īñōmō cænguī æpotodēnō ongontawo, ante pōnēmīniyaa.
¹⁰ Ayæ ate botō ōnompō æmæmpoquē go mēa pāo ænte godōmo æninque coatodo mīido ganca īnāni nāni cæninō ante adinque mīnitō īñōmō edæ ēñēnāmaī īmīnitawo. Ayæ edæ ñænæ otodē mīni wente ænte contadinō cænguī æpotodēnō ongontawo, ante pōnēmīniyaa. ¹¹ Mānīnō ñōwo botō, Gomō aedāni, ante wææ āninque botō wīi pāonque ante apænetabopa, ante quīnante wīi ēñēmīnii. Incæte botō, Pāo yedæ æmpoquī, ante Paditeoidi tōnō Tadoteoidi nāni da wente cæi ate gomō aedāni, ante wææ āmopa.

¹² Angā ēñente pōnente wædinque tōmēnāni, Gomō aedāni, ante apænedinque Itota wīi ōnonque pāo da wente cæinque ante wææ angampa. Wæætē edæ Tadoteoidi tōnō Paditeoidi wapiticæ ante nāni odōmonte apænedō ante tōmengā, Gomō aedāni, ante wææ angampa, ante do ēñēnānitapa.

*Bitō Coditobi īnōmi īmīpa, ante Pegodo angampa
 (Māadoco 8.27-30; Odoca 9.18-21)*

¹³ Mānīi īmæmāa tate ate Tetadea Pidipobæ eyequei pōninque tōmengā mīñæ nē godāni īnānite apænedinque Itota,

—Botō Waobo ēñagaīmo īñōmote wadāni botō īmotedō ante tededinque, Æbodō īmoo, ante apænedāni ēñēmīnii.

¹⁴ Āñongante tōmēnāni wæætē apænedānitapa.

—Bitō īmitedō ante apænedinque pancadāniya, Æpænē nē guidongaingā Wāo wodi incæ Itota adocā īmaingampa, ante tededāniya. Wadāni guiquēnē, Ediya wodi incæ Itota īnongā īmaingampa, ante apænedāniya. Wadāni guiquēnē, Eedēmiya wodi ingampa, ante apænedāniya. Ayæ, Wīi Eedēmiya ingā īninque Itota Wængonguī beyæ nē apænegaināni īñōnānite adocā īmaingā ingampa, ante tededāniya.

¹⁵ Ante tōmengā mīñæ nē godāni apænedāni ēñēninque Itota wæætē,

—Mīnitō diyæ, Æbodō īmoo, ante pōnēmīnii.

¹⁶ Āñongante Timōnō Pegodo wæætē,

—Wængonguī nē quēwengā Wēmi ingāimi inte bitō īñōmō Coditobi īnōmi īmīpa.

¹⁷ Ante apænecā ēñēninque Itota īñōmō,

—Timōnō bitō Ōōnata wēmi īnōmi inte ēñēmi. Wīi waocā apænecā beyæ bitō mānōmaīnō ante ēñēmitapa. Wæætē bitō nanguī toquinque edæ botō Mæmpo ōōnædē nē quēwengā incæ bitō īmite pōnō odōmonte apænecā ēñēmitapa. ¹⁸ Ayæ edæ īmaī ante bitō īmite āmopa. Bitō dicamō baī īnōmi īmīpa, ante pōnēninque botō bitō ēmōwo ante Pegodo pōnō pemōmo ēmōmīpa. Incæte dicabo tæīmō ī baī bitō nō ānīnō īñōmō edæ tæine ī īñonte botō mānīmoga tæi mænonte baī pōnō badōmo ate mīnitō mīni pōnencabo bacæmīnīmpa. Īninque mīnitō, Itota nē Codito ingampa, ante mīni pōnencabo īñōmō tæi ēmōmīni badinque mānīmoga tæi ongonte baī wede pōnēñōmīnīte nē tæi pīñænāni tadōmengadænguipo owote ta pōnāni incæ ædō cæte godōmenque māmō bæ taquīnānii. ¹⁹ Edæ ōōnædē Awēnē Odeye nempo guiquinque ante odemō wi ænequī baī botō bitō īmite pōnōmo æncæbiīmpa. Æmi ate bitō nē āmi badīmi inte inguipoga bitō wææ ānō incæ ōōnædē dobæ wææ angāinō inte ongongæīmpa. Ayæ bitō quīēmē inguipoga ñīmpo cæbi ī īñonte mānīi adobaī ōōnædē dobæ ñīmpo cæte ongongæīmpa.

²⁰ Ante īinque apænedinque Itota tōmengā mīñæ nē godāni īnānite īmāinō ante wææ angantapa. Mīnitō īñōmō botō īmotedō ante apænedinque, Codito īnongā ingampa, ante gode ānāmaī inte edæ pæ wēēneedāni, angacāīmpa.

*Itota, Īmaī cædāni wæncæboīmpa, ante apænecāmpa
 (Māadoco 8.31-9.1; Odoca 9.22-27)*

²¹ Ayä Itota mäniñedë mä odömöninque tömengä miñä nä godäni inänite apänedinque, Botö cöwë Eedotadëë goquënëmo imopa, angantapa. Gobo ate oodeoidi nä aadäni näni Picæncabo tönö, Wængongui qui, ante nä godönäni ñænänäni tönö nä odömönäni tönö godongämä cædinque botö imote wænæ wænæ cædäni wæwencæboimpa. Ayä botö imote godömenque wænönäni wæncæboimpa. Incæte Wængongui angä beyænque botö mëönaa go adoönæque iñonte edæ ñäni ömæmonte quëwencæboimpa, ante apänegacäimpa. ²² Mänömainö ante apänecä ëñëñönäni Pegodo guiquënë Itota ingante nänënë mäo godinque Itota ingante püingantapa.

—Awënë, quimä wæncæ änewëë. Wængongui pönö wææ aacä beyä bitö caate wädämaï incæbiimpa.

²³ Ante wææ äñongante Itota dadi ëmäñinque Pegodo ingante näëmä püinque, —Bitö Tatänabi bai inömi inte edæ botö weca ongönämaï wadæ gobäwe, angantapa. Bitö wii Wængongui nänö pönönö ante pönëmi inte wæætë edæ waodänique näni pönëwönö bai pönëninque mänömainö ante bitö botö imote ægodawaqui ñönonte bai cædinque wææ änewëmi awädö, angacäimpa.

²⁴ Ayä tömengä miñä nä godäni inänite apänecantapa. —Æcänö botö miñä pöinëna ina tömengä iñömö nämä beyä ante pönënämaï inte edæ botö miñä tee empote poncæcäimpa. Nämä nänö wænguiwä mongænte ponte bai cædinque tömengä, Botö wämo incæ caate wæbo incæ Itota ingante cöwë tee empote gocæboimpa, ante poncæcäimpa. ²⁵ Edæ æcänö, Nämä wææ gompodinque quëwencæboimpa, ante cædinque botö miñä pönämaï ingä guiquënë tömengä iñömö edæ quëwënämaï incæcäimpa. Wæætë edæ, Wænönäni wämo incæte botö Itota miñä tee empote cöwë gocæboimpa, ante æcänö äna guiquënë tömengä wæætë quëwencæcäimpa. ²⁶ Edæ waocä inguipoga ongoncoo tömancoo ö æncæte ante cædinque nämä önöwoca incæ pædæ godongä wë womonte ba ininque edæ tömengä nänö ömæwocate wæquinque ämaingampa. Iñæmpa eyepæ godongampa diyä önöwoca wæætë ämaingäa.

²⁷ Ante Itota iñömö, “Edæ botö Waobo ëñagaïmo inte botö Wæmpo ñäö tömäo guinä gongäñonte botö edæ botö anquedoidi tönö edæ godongämä poncæboimpa. Ayä pömo ate botö tömämïni mïnitö cægäï ganca ante eyepæ pædæ pönömo æncæmïnimpa. ²⁸ Edæ näwangä ämopa. Mïnitö iñömö ongömïni pancamïniya iñömö ayä wænämaï mïmïni quëwëñömïni botö Waobo ëñagaïmo inte Awënë Odeye bate ponte a ongömo adinque mïnitö botö nempo quëwencæmïnimpa,” ante Itota apänegacäimpa.

17

*Itota wæmö pöni ñäö bai ëmongä bacä adänipa
(Mäadoco 9.2-13; Odoca 9.28-36)*

¹ Mänïnö ante apänecä ate Itota önompo ämæmpoque go adoönæque iñonte Pegodo ingante ayä Tantiago tönö Wäö näna caya inate mänimpodäni inänite änanquidi mäicä adodänique æigadänimpa. ² Æite ongönönäni edæ Itota awinca tömënäni ayönäni edæ wii cöwë nänö ëmönö bai wæmö pöni ñäö bai edæ ëmongä bamongä adänitapa. Edæ nænque ti näwante ñäö bai bate ëmongä ininque tömengä weocoo näämænta ñäö incoo ëñacä adänitapa. ³ Ayä ayönäni edæ doyedë pöni nä æigaïna iñömö Möitee wodi tönö Ediya wodi incæ iñontobä a ongöninque Itota tönö godongämä tedegönäni. ⁴ Adinque edæ Pegodo guiquënë Itota ingante apänecantapa.

—Awënë ëñëmi. Iñömö mönö waa pöni ongonte awädö. Bitö Ao ämi ininque botö oncontaicoo mentaiya go adotaique mäñöninque bitö oncontai ante adotaique Möitee oncontai ante adotaique Ediya oncontai ante adotaique mäñömaïmopa.

⁵ Ante ayä tedeyongä boguimämo wæmö pöni ocabogadäni obo wæäninque guinä gongä ayönäni boguimämodë önönepämoque apänecantapa.

—Iingä iñömö botö Wengä inongä inte botö nä waadegaingä inongä ingampa. Tömengä ingante adinque botö watapæ tobopa. Mïnitö tömengä pönö apänecä ëñëedäni.

⁶ Angä wædinque tōmengä miñæ nē æidāni iñōmō ancai guiñēninque do do wāate bai cædinque guidōmēmæ tæ go wæænānitapa. ⁷ Go wæænāni adinque Itota tōmēnāni weca ponte godō gampodinque,

—Guiñēnāmaï inte ængæ gantiedāni, angantapa.

⁸ Ayæ æmō ayōnāni Itotaque adocanque ongongä agadānimpa.

⁹ Ayæ ānanquidi inō wææ pōñōnāni Itota tōmēnāni inānite angantapa.

—Minitō mā pōni botō emōnō wiimonte bai mini adinō ante gode ānāmaï pæ wēneyōmīni botō iñōmō Waobo nē ēñagaimo inte edæ wænte ate ñāni omæmon-cæboimpa. Ñāni omæmōmo ate minitō edæ māñiñedē ate apæñecæmīnimpa.

¹⁰ Angä ēñente wædinque tōmengä tōnō nē æidināni tōmengä ingante ānānitapa.

—Mānōmaï i ininque, Ediya wodi tāno poncæcāimpa, ante nē odōmōnāni iñæmpa quīnante apænedānii.

¹¹ Āñōnāni Itota wæætē,

—Ediya wodi nāni ānongä iñōmō tāno pongä ingampa. Nāwangä impa. Pōninque tōmengä, Doyedē ingaï bai ñōwo wæætē adobaï bacæimpa, ante badongampa. ¹² Botō wæætē iimainō ante apænebo ēñeedāni. Ñōwocā mōnō Ediya inongä inte do pongäimpa ante aquēnē. Do pōningä ingante edæ awincaque adinque, Æcānō ingää, ante ēñēnāmaï inte cædāni guiquēnē quiēmē nāni cæinēnō incæ edæ do cædānipa. Ayæ adobaï, Tōmengä ingante nāni cædi bai botō Waobo ēñagaimo iñōmote botō imote adobaï wēnæ wēnæ cædāni wæcæboimpa, ante apænebo ēñeedāni.

¹³ Ante apæñecä ēñēninque tōmengä tōnō nē æidināni iñōmō edæ, Æpænē mōnō guidōningä Wāo ingantedō ante apæñecampa, ante tæcæ ēñēnāni inte wægadānimpa.

Itota wēnæ ingante angä go ate wēñængä waa bacampa

(Māadoco 9.14-29; Odoca 9.37-43)

¹⁴ Māniñ ānanquidi æidināni inte adodō wæænīnque nanguï pōni ināni weca pōnāni adinque wacā onguiñængä Itota weca ponte da guicapodinque angantapa.

¹⁵ —Awēnē ēñēmi. Botō wengä onguiñængä ingante waadete waa cæ æmopa. Tōmengä iñōmō edæ ancaa quidi quidi dowænte wæwēninque wantæ wantæ iñō gongapamō tæ wææ tæ wææ cæcampa. Ayæ æpænē tæi gui tæi guii cæcampa. ¹⁶ Ante wædinque, Botō wengä ingante pōnō cæmīni waa bacæcāimpa, ante botō bitō miñæ nē godāni weca ænte pōmo adinque tōmēnāni ædō cæte cæquīnānii.

¹⁷ Āñongante Itota tōmēnāni inānite,

—Ñōwomīni mini ædæmō cædāmaï incabo mini pōnēegade impa, angantapa. Minitō weca æpogadō quēwēmoï. Wapiticæ cæmīni iñōmīnite æpogadō piyænē cæte wæwēmoï. Edæ wēñængä ingante iñōmō botō weca ænte māmōmīni pongæedāni, angantapa.

¹⁸ Ayæ wēnæ ingante piīninque Itota, Tao gobāwe, angä tao gocā ate wēñængä iñōmō dobæ waa bacantapa.

¹⁹ Ayæ ate tōmengä miñæ nē godāni adodānique Itota weca pōninque tōmengä ingante,

—Mōnitō guiquēnē bitō bai wido cæcæ cædinque edæ quīnante wido cædāmaï intamōnii.

²⁰ Ante wæyōnānite,

—Wede pōnēmīnīpa diyæ wido cæquīmīnii. Edæ mini pōnēnō mōotatamō bai guiyā pōni ewocamīni ininque minitō ānanquidi iñōmō ongonquidi adinque, Nānēnē gobāwe, ante āmīni bai edæ ānanquidi incæ do gä gote wayōmō gongæncædōnimpa. Edæ quiēmē cæcæte ante āmīni ininque tōmānō edæ do cæte babaimpa, ante nāwangä apænebo ēñeedāni. ²¹ Incæte māniñ wēnæ inte wido cæcæte ante cædinque cænguï wantæpiyæ cænāmaï inte Wængonguï ingante apænete ate edæ wido cæquï impa, ante Itota apæñecä ēñēnānitapa.

Wænōnāni wæncæboimpa, ante Itota adodō ante apæñecä

(Māadoco 9.30-32; Odoca 9.43-45)

²² Mánii Gadideabæ pöninge godongämæ goyönänite Itota iimaïnö ante apænecantapa. Adocanque, Waocä ne ëñagaingä iñömö æyömönö ongongää, ante godö odömöninque botö imote waodäni nempo pædæ godongä æncædänimpa. ²³ Nè ænani wæætë botö imote wænönäni nãne wæncæboimpa. Ayæ mëönaa go adoönæque iñonte edæ Wængongui angä beyænque botö edæ ñäni ömæmonte quëwencæboimpa.

Itota mänömainö ante apænecä ëñëninge tömengä miñæ ne godäni wæætë edæ nanguï wæwente bagadänimpa.

Wængongui oncö beyæ, ante Itota eyepæ godongampa

²⁴ Mánii pöninge tömënäni Itota tönö godongämæ Capënaömö nani quëwëñömö pöñönäni wadäni guiquënë Wængongui oncö beyæ ante tigitamö didacöma nani änantamö mentamonga ante ne änonäni inte Pegodo weca ponte änanitapa.

—Minitö Awënë ne Odömongä guiquënë Wængongui oncö beyæ ante didacöma tigitamö cöwë pönönämai ingantawo.

²⁵ Äñönänite Pegodo,
—Cöwë ne pönongä ingampa.

Äninge oncönë pö wäänë guiiyongante Itota täno apænecantapa.

—Timönö, æbänö ante pönëmi, angantapa. Iimæca ne quëwëmö mönö eyepæ ænte quëwengæimpa, ante imæca awënë odeyeidi iñömö edæ tömënäni nempo ne quëwënäni inänite, Pönömini æmoedäni, änanitawo. Wæætë edæ wadäni inänite änanitawo. Ædänidö inänite änani, ante pönëmi, ante Pegodo ingante Itota angantapa.

²⁶ Äñongante Pegodo,
—Wadäni inänite änanipa.

Ante apæneyongä Itota wæætë edæ,

—Mänömai i ininque edæ mönö Awënë Wængongui nempo ne quëwënömö inte wii godonguënömö imompa. ²⁷ Incæte wii piinte bacædänimpa, ante botö iimai ämopa. Bitö gäwapäa mäo dadonte wëä tadöñömi gæyæ tänocä tacä æe. Æninge gæyæ önöneca wi ænete ayömi adotamonque incæ coatodo didacöma emontamö incæ edæ gæyæ önöne ongontamö adinque bitö tadonte æncæbiimpa. Mänintamö ænte mäo bitö beyæ botö beyæ eyepæ godömi æncædänimpa, angä gote Pegodo cægacäimpa.

18

Æcänö ñænængä inte ne angä inguingää, ante tededänipa
(Mäadoco 9.33-37; Odoca 9.46-48)

¹ Mäniñedë Itota miñæ ne godäni tömengä weca ponte apænedinque,
—Bitö öönæde Awënë Odeye iinque bayömi æcänö bitö nempo quëwëninge ñænængä pöni inongä inte ne angä inguingää, änanitapa.

² Itota iñömö wëñængä guiyangä ingante edæ aa pecä pongä ate tömengä ingante tæcæguedë goncædinque tömënäni inänite wæætë apænecantapa.

³ —Näwangä ämo ëñeedäni. Minitö öönæde Awënë Odeye nempo guicæte ante wapiticæ mini pönëwënö wido cædinque wëñænäni nani piyænë cæte pönënö bai pönëedäni. Mänömai cædämai imini ininque Awënë Odeye nempo cöwë guidämai inte wæbaiminipa. ⁴ Incæte iingä wëñængä, Önömoque imopa, ante pönengä bai æcänö adobainö ante pönente quëwëna guiquënë tömengä iñömö edæ öönæde Awënë Odeye nempo quëwëninge ñænængä pöni inte edæ ne angä ingampa. ⁵ Ayæ æcänö botö emowo apænedinque mäningä bai wëñængä ingante, Pöe, ante godö waa cæcä iñömö tömengä iñömö edæ botö imote edæ do, Pöe, ante pönö waa cæcä ingampa, ante Itota apænecäimpa.

Wacä oda cæcæcäimpa, ante nani wæquinque cædänipa
(Mäadoco 9.42-48; Odoca 17.1-2)

⁶ Itota ayæ apænecantapa. “Wadäni godö cædäni beyæ botö imote ne pönënäni incæ pancadäniya edæ dobæ oda cæte wënæ wënæ cædänipa. Ininque, Wëñængä adocanque guiyangä pöni ingä incæ oda cædämai incæcäimpa, ante wææ cæcæte ante cædinque ne

godö cæcæ cædingä ingante iïmaï cædäni ïninqe tömengä toquënegä ïmaingampa. Waodäni näni dacæ godö dacæ godö cæquinca ñænænca æninqe tömengä önömenca æ wëmencadinque tömengä ingante tæcætibæ wido cædäni ïninqe tömengä edæ, Wënæ wënæ cædämaï inte becadote wæmo beyænque Wængonguï botö ïmote wïi godömenque pangampa, ante wædinque waa toquënegä ïmaingampa. ⁷ Quiëmë beyæ oda cædinque inguipoga quëwënäni näni wæquinque wënæ wënæ cædänipa. Në pönënäni incæ pancadäniya wïi ëñente do oda cædänipa. Cöwë mänömaï impa. Incæte, Oda cæcæcäimpa, ante në cæcä ïñömö edæ tömengä nanguï nänö caate wæquinque cæcampa,” ante apænecäimpa.

⁸ Ayæ, “Bitö önompoca cædinque wënæ wënæ cæbi ïninqe önompö aa wi æmpote wido cæte baï cædinque wënæ wënæ bitö cædinö ante wido cæbæwe. Bitö önöwa wapiticæ godinque wënæ wënæ cæbi ïninqe bitö önöwa aa wi æwate wido cæte baï cædinque wënæ wënæ bitö cædinö ante wido cæbæwe. Ìñæmpa inguipoga quëwëninque bitö æmæmpoque empobi incæte æmæntique entibi incæte bitö öönædë æidinque cöwë wænämaï quëwëmi ïninqe waa ïmaimpa. Edæ tipæmpoga empobi inte tipæntiya entibi inte edæ bitö gonga cöwë bæcote wæwenguïñömö wïi æmæwo wido cæte wæquïmidö anguënë. ⁹ Ayæ bitö awinca wïwa adinque wënæ wënæ cæbi ïninqe bitö awinca oo togæmonte wido cæte baï cædinque wënæ wënæ bitö cædinö ante wido cæbæwe. Ìñæmpa inguipoga quëwëninque bitö æmæmonque ëmömi inte bitö godömenque quëwëmi ïninqe waa ïmaimpa. Edæ wïi tipæmonga ëmömi inte edæ bitö tadömengadænguipo gonga cöwë bæcote wæwenguïñömö wïi wido cæte wæquïmidö anguënë,” ante Itota angacäimpa.

*Bodego wë womonte ba, ante odömonte apænecampa
(Odoca 15.3-7)*

¹⁰ Ayæ, “Ìngä guiyangä ïñömö önonganque ingampa, ante mïnitö adocanque ingante incæ pïinte adämaï ïmæwedäni. Ìñæmpa tömënäni ïnänite në aadäni anquedoidi incæ öönædë quëwëninque botö Mæmpo në öönædë quëwengä awinca cöwë adänipa cæmïni. ¹¹ Edæ botö Waobo ëñagaïmo inte edæ wë womönäni ïnänite diqui minte æncæte ante pömo ïmopa,” ante Itota apænecantapa.

¹² Ayæ, “Æbänö ante pönëmini edæ. Waocä obegaidi tiëë ganca ëacä ongöñönäni adocanque pangocæte nänënë gocä adinque në ëacä ïñömö nöobenta i nöebe ganca ïnäni änämænë ongöñönänite ëmö cæte diqui mincæ wïi goquingä, ante pönëminii. Cöwë edæ diqui diqui mincæ gocæcäimpa. ¹³ Godinque në pangocæ godingä ingante ëadente acä ïninqe në ëacä waa tobaingampa. Edæ pangocæ godämaï ïnäni nöobenta i nöebe ganca ïnäni ïnänite adinque cöwë tocä ïnongä inte tömengä tæcæ nänö adingä beyæ godömenque tocampa. ¹⁴ Mïnitö Mæmpo öönædë në quëwengä adobaingä, Guiyangä wë womonte wænämaï incæcäimpa, ante cöwë diqui diqui mingampa,” ante Itota odömonte apænecäimpa.

*Në wënæ wënæ cæcä ingante pïinämaï inte waadecäimpa
(Odoca 17.3)*

¹⁵ Godömenque odömöninque Itota apænecantapa. “Bitö tönïñacä bitö ïmite wënæ wënæ cæcä wædinque bitö tömengä weca gote ämi adomïnaque nänënë gote ongöeda. Ongöñöminate bitö tömengä ingante, Mänömaï cæbitapa, ante ämi ëñengæ. Mänömaï ämi ëñengä ïninqe tömengä waadete babaingampa,” ante apænecäimpa. ¹⁶ Ayæ godömenque apænecantapa. “Wæætë tömengä ëñënämaï inte waadedämaï ingä ïninqe bitö Wængonguï angä ëñente näni yewæmongainö baï cæe. Waocä æbänö cæcä, ante adinque waoda mënaa ïna incæ mënaa go adocanque ïnäni incæ adoyömö ante apænedäni ïninqe tömënäni näni apænedö beyænque ante mönö, Nö impa, ante ëñengæimpa, ante Wængonguï beyæ yewæmongatimpa. Ìninqe bitö, Mönö adoyömö ante apænecäimpa, ante waoda mënaa ïnate ämi incæ adocanque ingante ämi incæ æcämenque bitö tönö goda tömengä adoyömö ante nöinö ante apænecäimpa. ¹⁷ Ayæ

apænemini ate nē wēnæ wēnæ cædingā cōwē ēñēnāmaī ingā ate wædinque bitō iñōmō, Itota nē Codito ingampa, ante mīni pōnencabo weca gote apænebi ēñenguināni. Ayæ tōmēnāni wææ ānāni ate tōmengā godōmenque ēñēnāmaī ingā iñinque tōmengā, Nāmā cæte quēwenguīmo, ante nē ēñēnāmaī cædāni baī ingampa. Ayæ, Odōmāno awēnē beyæ nē æwengā baī ingampa cæbii. Tōmengā ēñēnāmaī cæcāinō anguēnē, ante bitō edæ tōmengā ingante gomō ae,” ante Itota angantapa.

¹⁸ Ayæ apænedinque, “Nāwangā āmopa. Mīnitō inguipoga nē āmīni inte apænte āmīni iñinque mīni apænte āninō incæ öönædē dobæ apænte ante impa. Ayæ inguipoga mīnitō apænte āninque ñimpo cæmīni iñinque mīni cædō baī öönædē adobaī do ñimpo cæte ingæimpa.”

¹⁹ Ante apænedinque Itota ayæ apænedinque, “Mīnitō imīnite iūmaī āmopa, angantapa. Inguipoga mēmīnaa guēa adoyōmō pōnente apæneyōmīna botō Mæmpo öönædē nē quēwengā iñōmō mīna āmaī ante tōmānō cæcæcāimpa. ²⁰ Edæ mēmīnaa imīna incæ mēmīnaa go adocanque imīni incæ æpomīnimē inōmīni incæ mīnitō adoyōmō ponte botō emōwo apænete ongōñōmīni edæ botō adoyōmō mīnitō tōnō godongāmæ ongoncæboimpa,” ante Itota apænegacāimpa.

²¹ Ayæ ate Pegodo tōmengā weca ponte āninque,

—Awēnē, botō tōññacā botō imote wēnæ wēnæ cæcā adinque botō tōmengā ingante æpogadō godō ñimpo cæbo ee goquingā. Edæ öonmpo æmæmpoque go mempoga mānimpoga ñimpo cæbo ee goquingā, āmii.

²² Äñongante Itota,

—Iñæmpa, wīi öonmpo æmæmpoque go mempogaque anguīi. Edæ godōmenque bitō ānimpoga pīnāmaī inte ñimpo cæbi ate wæætē adopoga wæætē adopoga ayæ cōwē tetenta ganca wæætē wæætē ñimpo cædinque coatodo tiento nōobenta ganca mānimpoga pīnāmaī inte ñimpo cæbi goquingā. Mānōmaī ante Itota tōmengā miñæ nē godāni inānite, Cōwē pīnāmaī inte ñimpo cæquīmīni, angacāimpa.

Nē cædongā nānō waadedāmaī cædō ante odōmongampa

²³ Itota ayæ apænecantapa. “Māninō beyæ bitō ānō baī cædāni wædinque imæca awēnē odeye nānō apænte āmaī öönædē Awēnē Odeye incæ tōmengā ingante nē ēñēmīni imīnite æbānō apænte angampa, ante odōmōmo aquīmīni, angantapa. ²⁴ Imæca awēnē iñōmō, Botō imote nē cædāni incæ botō imote debe ināni inte eyepæ pōnōnāni æncæboimpa, ante cæyongā adocanque tudento ñænængade nāni godonte æinta incæ diete miido ganca nānō pōnongā æni beyæ wæætē pōnōnāmaī debe ingā adinque tōmengā ingante ænte māmōnāni pongampa. ²⁵ Pongā adinque tōmengā awēnē iñōmō, Ömæpocā inte tōmengā ædō cæte pōnongā ænguīmoo, ante pōnente wædinque iūmaī angantapa. Wacā ingante nē cædāni tōmengā nāni wencabo bacædānimpa, ante cædinque botō nē pōnōnāmaī ingā nāna gæncaya nāni wencabo tōmānāni inānite bæi ongonte wacā ingante godonte eyepæ ænguīmoo, angā. ²⁶ Eñente wædinque edæ nē cæcā iñōmō tōmengā weca ædæ wææninque edæ, ‘Awēnē, waadete cædinque ee abi adinque botō ayæ ate botō debe inganca tōmanta pōnōmo æncæbiimpa.’ ²⁷ Ante wæcā ēñēninque awēnē iñōmō nē cæcā ingante guēa wæte baī pōnēninque, Tōmāā edæ godonte impa, āninque godō ñimpo cæcā abæ tawænte gocantapa.

²⁸ “Incæte tōmengā tōnō wadāni nāni godongāmæ cæcabo iñōnāni wacā guiquēnē adocā ingante tiēē tiguītamō ganca nānō pōnongā æni beyæ wæætē pōnōnāmaī debe inongāimpa. Adinque nē abæ tawænte godingā incæ tōmengā ingante debe ingā ingante godō yao ongonte ñimāmencate cædinque, ‘Do bitō æninta pōnōmi æmo tō.’

²⁹ Ante pīngā wædinque tōmengā tōnō nē cæcā inte nē debe ingā wæætē nē āningā weca da guicapodinque, ‘Bitō waadete cædinque ee abi iñinque botō ayæ ate pōnōmo æncæbiimpa.’ ³⁰ Ante wæyongā edæ Baa āninque tōmengā, Tōmanta edæ cōwē pōnōmi æmo ate tabaīmipa, āninque edæ tee mōnecā ongonantapa.”

³¹ “Adinque edæ tömëna tönö nê cædäni guiquënë, Mänömaï cæcä, ante wædinque püinque awënë weca gote, Mänömaï cæcampa, ante wæmönipa. ³² Änäni ëñëninque wënæ wënæ nê cædingä ingante äñecä pongä ate tömengä ingante awënë, ‘Botö ïmo nê cædïmi inte nê wënæ wënæ cæbitapa töö. Ìñæmpa bitö nanguï ämi beyænque botö edæ, Tömanta edæ godonte impa, ante ñimpo cæbo abæ tawænte gobitapa. ³³ Ìnque botö guëa wæte pönente cæbo bai bitö tönö nê cæcä ingante bitö adobai guëa wæte pönëmi bai waa incædönimpa.’ ³⁴ Änque awënë äingä badinque, Tömengä tömanta nänö æninta botö imote adodö nänö pönonguinganca botö, Tömengä ingante ænte pancæminimpa, ämopa. Änque tömengä ingante tee mönete oncönë nê pänäni ïnänite pædæ godongä ænänipa.” ³⁵ Mäninque ante odömonte apænedinque Itota godömenque apænegacantapa.

—Edæ mïni waocabo ïñömïnite mïnitö wacä nänö wënæ wënæ cædinö ante godö ñimpo cædämaï ïmïni adinque awënë nänö apænte änö bai botö Mæmpo öönædë nê quëwengä ïñömö adobai mïnitö wënæ wënæ cædinö ante ñimpo cædämaï inte tömänö ancæcäimpa, ante apænegacäimpa.

19

Nänöogængä ingante nani pämcænö ante (Mäadoco 10.1-12; Odoca 16.18)

¹ Mänii Gadideabæ quëwente ïnque apænete ate Itota Oododänö æmæmäa godinque Oodeabæ pongacäimpa. ² Pongä adinque nanguï ïnäni tee empo goyönäni tömengä gampocä waa badänitapa.

³ Paditeoidi guiquënë, Godö ämö ëñëninque Itota wabänö adodeque oda cædete wæcä tocæï, ante pönëwënäni inte tömengä weca pöninque änänitapa.

—Wængonguï æbänö ante wææ angacäi. Waocä tömengä nänöogængä ingante quïëmë beyænque pämengä ïnque edæ nö cæte intawo.

⁴ Ante äñönäni Itota,

—Mïnitö ïñæmpa Wængonguï beyæ ante nani yewæmöinta adämaï inte ämïnitawo. Wëñëñedë edæ waocä ingante nê Badongaingä ïñömö, “Onguïñængä ingampa, ante ayæ, Onquiyængä ingampa, ante badongacäimpa,” ante yewæmongatimpa. ⁵ Ayæ, “Mänömaï beyæ waocä mæmpocä ingante ëmö cæte wäänä ïnante ëmö cæte godinque onquiyængä ingante, Botö nänöogængä, ante æmæwo moncæcäimpa. Ìnque mënaa ïniina incæ tömëna nana gæncaya badinque adocanque bai bacædaimpa,” ante yewæmongatimpa. ⁶ Ìnque tömëna nana gæncaya adocanque bai badinque nänënë mënaa ïnämaï ïnapa. Mänömaï beyæ Wængonguï, Adocanque bai ïnapa, ante nana gæncaya nänö nê badongaina ïñönate waocä wæætë pangö cædämaï incæcäimpa.

⁷ Äñongante tömënäni wæætë,

—Ìnque, Æmæwo pämcæmo goquïmi, ante yewæmöninque mäninta bitö yewæmöninta onquiyængä ingante godömi ængä ate bitö önonque pämcæcæbiimpa, ante Möitee wodi quïnante wææ angacäi, ante ëñencæte ante mönitö wæmönipa.

⁸ Änäni ëñëninque Itota edæ,

—Ìñæmpa, Mïmö ömædëmïni ïnömïni inte mïnitö wënæ wënæ cæinëmïni ïmïnipa, ante wædinque edæ Möitee, Nänöogængä ingante pämcænguïmi, ante yewæmongacäimpa. Wëñëñedë ïñömö edæ wii mänömaï ingatimpa. ⁹ Wæætë onquiyængä wacä ingante godö todämaï ïñongante tömengä ingante nê pämcæningä ïñömö tömengä dobæ nänö towenginque edæ wacä onquiyængä ingante godö mongampa. Ayæ onquiyængä pämcænte goyongä wacä onguïñængä tömengä ingante godö möninque adobai nê towengä bacampa, ante ämo pönëmaïmïnipa.

¹⁰ Angä ëñëninque tömengä mïñæ nê godäni guiquënë,

—Ìñæmpa nana gæncaya ïna inte pämcænämaï ingäimpa, ante bitö änö bai nö ïinque edæ waocä wëmö cæcä bai waa ïmaimpa, ante pönente wæmönipa.

¹¹ Ante wæyönänite Itota,

—Wēmō cæcā, ante mīni änō bai ante waocā ædō cæte cæquiringā. Wængonguī nānō änīnānique mānīnō ante Ao ante mōnāmaī inānīpa. ¹² Edæ ædānidō mōnāmaī inguinānī, ante pancadāniya guiquēnē wāānā cæncadē ēñayedē edæ ongænca babetamiñænāni ēñagāināni inte mōnāmaī ināni. Pancadāniya wæætē waodāni cædāni beyænque babetamiñænāni badinque mōnāmaī inānīpa. Ayæ pancadāniya guiquēnē öönädē Awēnē Odeye nempo beyæ ante nāmā pōnēnīnque Ao ante edæ mōnāmaī inānīpa. Edæ æcānō botō änō ēñente Ao āna, tōmenganque mānōmaī cæcæcāimpa, ante Itota odōmongā ēñengadānīpa.

*Wēñænāni inānite gampo cæcadinque waa apænecampa
(Mäadoco 10.13-16; Odoca 18.15-17)*

¹³ Ayæ ate, Wēñænāni inānite Itota pōnō gampo cæcadinque tōmēnāni beyæ Wængonguī ingante apænecæcāimpa, ante cædinque wadāni tōmengā weca ænte pō ænte pō cædāni adinque tōmengā miñæ nē godāni guiquēnē, Ænte pōnāmaī iedāni, ānīnque Baa Baa ānāni. ¹⁴ Ate wædinque Itota iñōmō edæ,

—Wēñænāni inānite ee amīni poncædānīpa. Edæ mānīnāni nāni pōnēnō bai adobai pōnēnāni inte edæ öönädē Awēnē Odeye nempo do quēwēnāni inānīpa. Inīnque mīnītō iñōmō wēñænāni inānite Baa ānāmaī iedāni.

¹⁵ Änīnque wēñænāni inānite pædæ gopo gampo cæcadinque wadæ gogacāimpa.

*Mäincoo nē nanguī ēacā Itota weca ponte apænecampa
(Mäadoco 10.17-31; Odoca 18.18-30)*

¹⁶ Ayæ wacā Itota weca pōnīnque,

—Awēnē nē Odōmōmi apænēbi ēñēmoe, angantapa. Botō æbānō waa cæbo inīnque cōwē wānāmaī wantæpiyæ quēwēmaīmoo.

¹⁷ Ante āñongā Itota edæ,

—Wængonguī adocanque nē waa cæcā ingā incæte bitō botō imonte ānīnque, Æbānō waa cæquīmo, āmīi. Incæte, Quēwenguīmo, ante wæbi inīnque bitō, ĩmaī cæedāni, ante Wængonguī nānō wææ angāinō ante ēñente cæe.

¹⁸ Angā wædinque,

—Ædedō ante āmīi.

Äñongante Itota wæætē,

—ĩmaī. “Wacā ingante godō wānōnāmaī. Bitō nānōogængā ināmaī iñongante godō mōnāmaī. Wacā quī awēmō ænāmaī. Wacā æbānō cæcāā, ante godō babæ wapiticæ ānāmaī. ¹⁹ Wæmpocā ingante wāānā inante waa adinque godō waa cæe. Ayæ, Nāmā ante bitō waadete cæbi bai wadāni inānite adobai godō waadete cæe.”

²⁰ Angā ēñēnīnque edēningā iñōmō,

—Botō mānīnō bitō änō bai do cæte pægaīmo inte botō quīnō edæ godōmenque cæquīmoo.

²¹ Äñongante Itota wæætē,

—Bitō, Ædāmō nō cæbo bacæboīpa, āmi inīnque edæ öönädē bitō waēmōncoo ængūinque edæ ñōwo godinque imæca bitō mānīncoo tōmancoo godonte ænīnque bitō ænīnta wæætē ömæpodāni inte wædāni inānite tōmanta godōmi æncædānīpa. Ayæ edæ botō imote tee empote pōe.

²² Angā ēñēnīnque edēningā iñōmō edæ, Botō mäincoo, ante nānō nanguī ēacoo ante pōnente wæwente wædinque wadæ gogacāimpa.

²³ Gocā inīnque edæ Itota tōmengā miñæ nē godāni inānite apænedīnque,

—Nāwangā āmo ēñēedāni, angantapa. Öönädē Awēnē Odeye nempo guīte quēwēncæte ante cædinque waodāni ömæpodāni inte botō miñæ pōnānīpa. Mäincoo nanguī ēacā guīquēnē æbānō cæte ömæpocā inte botō miñæ ponte guīte quēwēngūingāā, angantapa. ²⁴ Ayæ cāmeyo iñōmō guīyangā ingampa diyæ daagō guīyampite pædæ tacāā. Cāmeyo ñænængade inongā inte pædæ tadāmaī ingā bai nē ēacā adobai ingampa. Tōmengā nāmā ayongā ñænængā inongā inte edæ æbānō cæte Wængonguī Awēnē Odeye nempo do wāānē guīte quēwēngūingāā.

²⁵ Ante apænecä wædinque tömengä miñä ne godäni wæætë ancai guiñëninque,
—Iñæmpa mänömaï i ïninqe æcänö wäänë guite quëwenguingää, änänitapa.

²⁶ Itota tömënäni inänite cöwä adinque apænecantapa.

—Waomïnique incæ nämä miñi cædö beyænque ædö cæte quëwëmaimïni. Wæætë Wængonguinque nämä tömänö do cæcä ingampa.

²⁷ Angä ëñente wædinque Pegodo guiquënë,

—Mönitö iñömö edæ möni ëadincoo owæ caate bitö miñä ömæpomöni inte pömöni abipa. Ömæpomöni imöni inte edæ quïnö ænguimönii.

²⁸ Añongante Itota wæætë tömënäni inänite angantapa.

—Nawangä ämopa. Botö badömo ate tömancoo miñcooque iinque bayonte botö Waobo ëñagaïmo iñömö edæ tömëmo ñäö ëmönö ëmöninque edæ pö tæ contacæboimpa. ïninqe miñitö botö imote ne tee empogaïmiñi inte mäniñedë ate tömëmiñi tæ contaimpaa tipæmpoga go mempaa pö tæ contadinque awënëidi badinque edæ idægoidi tipæmpoga go mencabodäniya inänite apænte ancæminimpa.

²⁹ “Ayæ godömenque ämopa. Miñitö nawangä oncodo tao godinque miñitö töniñadäni inänite ëmö cæte godinque badä inante mæmpocä ingante wënäni inänite botö ëmöwo beyænque ëmö cæte pömïnitapa. ïninqe iïmaï ante nawangä ämopa. Æcänö botö beyænque mänömaï cædinque tömengä nänö ëadi ömæ ëmö cæte goda iñömö tömengä nänö ëmö cæte godincoo bai adopocoo æncæcäimpa. Wiï adopogaque edæ æninque tömengä wæætë edæ godömenque adopocoo adopocoo æninque tiëë ganca mäniimpoga æncæcäimpa. Ayæ botö pönö cæbo æninque tömengä cöwë wantæpiyæ wänämaï quëwencæcäimpa. ³⁰ Incæte edæ täno yæcado ongöninäni pancadäniya wæætë yæmiñä gote ongönäni bacædänimpa. Ayæ yæmiñä ongöninäni inte wæætë yæcado ponte ongoncædänimpa,” ante Itota apænecäimpa.

20

Në cædäni æbänö cædänii, ante odömonte apænecampa

¹ Itota ayæ edæ, Öönædë Awënë Odeye nempo æbänö quëwënänii, ante odömoncæte ante iïmaï apænecäimpa. “Waocä ne ömæ ëacä nänö cæbai Öönædë Awënë Odeye incæ adobai cæcampa. Në ëacä ñäö bayö oncodo taodinque, Æcänö ñöwoönæ botö yowementacodë cæquïnaa. ² Ante adinque tömengä beyæ ne cæcædäni inänite, Miñitö tömäa itædë cæmiñi ate botö adocanque ingante deënadio tigitamö adotamonque pönöninque wacä ingante wacä ingante adotamonque adotamonque pönömo æncæminimpa, añongante Ao ante yowementacodë cæcæ godänipa. ³ Gote cæyönäni tömantadä æñonte ne ëacä tömënäni nani godonte æiñömö gote ayongä wadäni önonque cædämaï a ongönäni. ⁴ Adinque tömengä, ‘Miñitö adobai gote cæmiñi ate eyepæ godömo æncæminimpa.’ Angä ëñëninque Ao ante godänipa. ⁵ Ayæ tæcæbæcä iñonte adobai tömengä wadäni inänite angä godäni ate wæætë ædæ wæicä iñonte adobai taodinque wadäni inänite angä godäni. ⁶ Ate edæ awæncabo wæiyongante edæ adocä tao ayongä wadäni önonque a ongönäni adinque tömengä tömënäni inänite, ‘Quinante tömäa itædë edæ cædämaï a ongömïni.’ ⁷ Ante añongä, ‘Iñæmpa mönitö imönite, Cædäni, änänipa cæquimönii.’ Änäni ëñëninque, ‘Miñitö adobai edæ botö yowementacodë gote cædäni,’ angä godänitapa,” ante Itota odömonte apænecantapa.

⁸ Ayæ, “Gawadecæ pöni bayonte ne ëacä iñömö tömengä beyæ ne apænecä ingante äninque, ‘Botö beyæ ne cædäni inänite aa pebi pönäni ate bitö tömënäni nani cædi beyæ godömi eyepæ æncædänimpa. Awæncabo wæiyongä ñöwo pöni gote cædinäni inänite edæ täno godömi änäni ate wæætë wëenë gote cædinäni inänite edæ ayæ ate godömi æncædänimpa.’ ⁹ Angä ëñente aa peyongä awæncabo wæiyongä gote cædinäni inte täno pönäni ate deënadio tigitamö adotamonque adotamonque godongä änäni. ¹⁰ Ate adinque täno gote cædinäni guiquënë, Mönö godömenque ænguï impa, ante pönëñönäni tömengä godongä æninque edæ deënadio tigitamö incæ adotamonque

adotamonque adopo adopo ænänipa. ¹¹ Æninque tömënäni në äacä ingante püinte tedinque, ¹² ‘Mönitö tömää itädë näwancate cæmöni incæ iñæmpa cæbii. Ayæ pönäni guiquënë wantæ iñö adoque ooda ganca cädäni incæ mönitö bai adopo godömi ænäni wæmönipa töö.’ ¹³ Ante püñönäni në äacä wæætë adocanque ingante apænedinque, ‘Iñæmpa botö bitö imite wënæ wënæ cæbogaa. Edæ, Deëradio tigitamö adotamonque pönömo æncæbiimpa, äñömo Ao änämaï imitawoo. ¹⁴ Bado, bitö qui incæ ænte goe. Edæ bitö æni bai ayæ ponte cædingä ingante adopo godonguënëmo intabopa. ¹⁵ Edæ botö äadincoo incæ, Æcänö ingante godonguimo, ante pönente wædinque ædö cæte tömömo incæ änämaï inguimoo. Botö në waa cæbo iñömote bitö guiquënë edæ püinte abi awædö,’ ante në äacä angampa.”

¹⁶ Mäniganca ante odömonte apænedinque Itota iñömö, “Mänömaï cädäni in-
inque botö, Täno yæcado ongöninäni inte wæætë yæmiñæ gote ongoncædänimpa,
antabopa. Ayæ, Yæmiñæ ongöninäni inte wæætë yæcado ponte ongoncædänimpa, ante
apænetabopa,” ante apænegacäimpa.

Itota, Wæncæboimpa, ante wæætë adodö ante apænecä
(Mäadoco 10.32-34; Odoca 18.31-34)

¹⁷ Mänii godinque Eedotadëe gocæ cædinque tömengä miñæ, Dote, ante näni gocabo
inänite Itota nänënë ænte mäodinque idömæ goyönäni apænecantapa.

¹⁸ —Ñöwo iñömö edæ mönö Eedotadëe iñömö æicæimpa. Æi gote ongömö ate
adocanque, Waocä në ëñagaingä æyömönö ongongäa, ante wädäni inänite godö odö-
mongä bæi ongonguinäni. Ayæ, Wængongui qui, ante në godönäni ñænænäni tönö
në odömönäni nempo tömengä botö imote pædæ godongä æninque tömënäni wæætë
botö imote apænte äninque, Cöwë wæncæcäimpa, ancædänimpa. ¹⁹ Ayæ edæ, Awæ
ñænquedimæ cædinque tömengä ingante timpote wænödäni, ante tömënäni oodeoidi
inämaï inäni nempo botö imote wæætë mäo godönäni æncædänimpa. Æninque
tömënäni wæætë botö imotedö ante badete todinque ayæ tæi tæi päninque awäa
timpodäni wæncæboimpa. Näñe wæmo ate Wængongui angä beyænque botö mëönaa
go adoönæque iñonte ñäni ömämoncæboimpa, ante Itota apænegacäimpa.

Tantiago tönö Wäö badä, Botö ämaï ante cæe, angampa
(Mäadoco 10.35-45)

²⁰ Tebedeo wëna Wäö tönö Santiago iñöna tömöna badä iñömö tömöna wëna tönö
Itota weca ponte ædæ wææninque edæ, Botö ämaï ante cæe, ante apænecä. ²¹ Eñëninque
Itota,

—Minö quinö apænecæte ante pömiï.

Äñongante,

—Bitö Tæiyæ Awënë Odeye bate tæ contadinque edæ botö wëñäna inate ämi ate
adocanque bitö tömëmæmi inö adocanque dipæmæmi inö tæ contaquïna ämopa,
angantapa.

²² Eñëninque Itota wæætë,

—Iñæmpa adämaï inte mïnitö ämïni awædö. Botö nantate wæwenguimæ bai becabo
bai mïnatö edæ adotaca becate bai Ao ante botö beyæ nantate wæwenguimïnaa. Edæ
æpænë guiite bai botö wænguimæ bai guiñänämaï imïnapa diyæ botö beyæ wænguimï-
naa.

Äñongante,

—Ao ante guiñänämaï cæcæmönaimpa, änatapa.

²³ Itota wæætë,

—Botö nanguï caate wæwëmo bai mïnatö adotaca bete bai äanque bai caate wæcæmi-
naimpa. Näwangä impa. Incæte æcänö botö tömëmæ inö æcänö botö dipæmæ inö
tæ contaquïna botö edæ pönö änämaï imopa. Wæætë botö Mæmpo do, Mäninaque
mänimpaa tæ contaquïna, ante në badongaingä inte tömengä adocanque godö angä
contaquïna, ante Itota apænegacäimpa.

²⁴ Mänömainö ante tededapa töö, ante eñëninque wadäni diete ganca tömengä miñäe në godäni guiquënë iñäna näna caya inate edæ piinänitapa. ²⁵ Piinäni ininque Itota aa pecä pönäni ate tömënäni inänite iimaï apäñecantapa.

—Oodeoidi inämaï inäni awënëidi æbänö cædänipa, ante do eñëmünipa. Tömënäni iñömö nämä beyænque ante cædinque nanguï piinte änäni wædinque tömënäni nempo quëwënäni wæætë do eñente cædänipa. Ayæ tömënäni weca në ñænænäni inönäni iñömö, Tömëmoque ämo eñente cædäni, ante piinte änäni wædänipa. ²⁶ Minitö guiquënë tömënäni nämä beyænque ante nanguï änäni bai wii adobaï cæquëñemüni imünipa. Wæætë müni cabo iñömüni adocanque ñænængä pönï ingä bacæte ante cædinque tömengä wæætë edæ munitö beyæ në cæcä baquëñengä ingampa. ²⁷ Ayæ yacado ongöinente wæcä iñömö tömengä yacado ongoncæte ante cædinque wæætë edæ yamiñäe pönï gote tömänäni inänite në cæcä badinque tömengä nämä beyæ ante cædämaï inguëñengä ingampa. ²⁸ Edæ Waobo eñagaïmo inte adobaï, Botö beyæ pönö cæcædänimpa, ante wii pömo imopa. Wæætë wadäni beyæ godö cæcæte ante pömoimpa. Ayæ edæ nanguï inäni tee mönete bai wæwëñönäni botö wæætë, Tömënäni wibänete tacædänimpa, ante tömëmo wepæ incæ godoncæte ante pömo imopa, ante Itota apäñegacäimpa.

Babetamöna iñönate Itota gampomongä waa bamönapa

(Mäadoco 10.46-52; Odoca 18.35-43)

²⁹ Itota mäninö godinque Eedicoo näni quëwëñömö ponte tayönäni tömengä miñäe nanguï inäni tee empote godänitapa. ³⁰ Goyönäni onguïñäna babetamöna iñömö taado wedeca täe contate a ongöñöna, Itota pongampa, änäni eñëninque aa pedatapa.

—Awënë, bitö Dabii wodi pæïmi inömi inte mönatö imönate pönö waadete waa cæe.

³¹ Ante äñöna godongämæ godäni guiquënë, Apocænë inguënë quëwënaa, änäni incæ godömenque yedæ aa pedinque,

—Awënë, bitö Dabii wodi pæïmi inömi inte mönatö imönate pönö waadete waa cæe, änatapa.

³² Itota iñömö näe gongæninque äñecä pöna adinque,

—Münatö imünate quïnö cæbo äminaa.

³³ Angä eñëninque,

—Awënë gampomömi awinca wi ænete bai aquimöna, ante wämöna.

³⁴ Äñöna Itota tömëna godongämæ wæte bai pönëninque edæ pædæ gopo gampomon-gantapa. Gampomongä ate tömëna waa ada badinque Itota miñäe do godatapa.

21

Itota Eedotadëe iñömö pongampa

(Mäadoco 11.1-11; Odoca 19.28-40; Wäö 12.12-19)

¹ Mänii gote Eedotadëe obo pöninque Odibowænquidi ontacamö goimö Betapaguee näni quëwëñömö ganca pönönäni Itota tömengä miñäe në goda mënaa inate da godöninque angantapa. ² Tömëna inate,

—Mänii näni quëwëñömö ongö amüna. Tömëñömö go guiite ayömiina bodo onquiyæ näna wencaya ñäni ñäi a ongö acæminaimpa. Ñäni ñäi a ongö adinque münatö mänina inate ñi cæyænte botö weca ænte pöeda. ³ Ayæ münatö imünate wæe änäni eñëninque münatö wæætë edæ, Awënë nänö ænguëñönö ante ænte gomönapa, ante apäñeeda. Ayæ, Tömengä iinque cæte ate do da pönongä æncæminimpa, ante apäñeeda, angantapa.

⁴ Do iñömö Wængonguï beyæ në apäñecä iimainö ante nänö apäñegainö ante edæ iinque bacäimpa, ante mänömaï cætimpa.

⁵ “Tiöno iñömö quëwënäni inänite iimaï äedäni,

‘Badogaa, munitö Awënë Odeye ñöwo munitö weca pongä äedäni.

Edæ mönö mäincoo mongæwëñongä bodo wengäa täe contate mönö Awënë pongampa. Tömengä gänë pönengä inte bodoga contate pongä äedäni,’ ante ancæminimpa.”

Ante docä nänö apänegainö ante ñöwo iinque cætimpä.

⁶ Mänömainö ante angä eñente godinque tömengä miñäe në goda iñömö Itota nänö äninö bai do cædinque, ⁷ bodo nana wencaya inate töi töi ante pöinque tömëna weocoo yabæcooque æidämæ wo cæyabæda ate Itota wænömënæca inö æi yiyæ tæ contacantapa. ⁸ Adinque edæ nangui inäni, Itota nänö ponguinö, ante tömënäni weocoo yabæcooque ñö cædinque bee podöwayönäni wadäni guiquënë gönea gote yæpæma öñabo tapænte mämö bee bee podöwadäni ate tömengä podöwainonque gocantapa. ⁹ Gocä adinque täno godäni tönö ayæ pönäni tönö godongämæ godinque nangui inäni yedæ äninque,

—Bitö Awënë Dabii wodi pæimi inömi inte pömi adinque, Möni quëwenguinque impa, ante, Badogaa, ante tomönipa. Awënë Wængongui emöwo beyænque pömi ininque bitö toquinque edæ Wængongui bitö imite waa cæcæcäimpa. Ayæ öönæde iñömö adobaï, Badogaa, möni quëwenguinque, ante ingæimpa.

¹⁰ Ante mäni cædinque pöñönäni, Itota Eedotadëe pongä adinque mäniñömö quëwënäni ancaï guñëninque,

—Mäningä æcänö ingäa.

¹¹ Ante wæyönäni godongämæ pönäni iñömö,

—Itota ingampa. Tömengä iñömö Wængongui beyæ në apænecä inongä inte Gadide-abæ Näatadeta quëwente pongä ingampa, ante apänegadänimpa.

Wængongui oncö tæiyæ waëmö bacæimpa, ante cæcä

(Mäadoco 11.15-19; Odoca 19.45-48; Wäö 2.13-22)

¹² Itota iñömö Wængongui oncö ñænæncönë yabæcönë pö guidinque mäniñömö mäincoo mänäni tönö wadäni në godonte ænäni tönö ongönäni adinque tömengä tömänäni inänite, Oncodo taoedäni, äninque da tadongä oncodo tao godänitapa. Ayæ campio ante näni godonte æimpa tönö equemö godoncæte ante në mänäni näni cönöimpa tönö bæ tacä tömampaa guidömëmæ tæ go wææntapa. ¹³ Ayæ tömënäni inänite angantapa.

—Wængongui beyæ iimainö ante yewæmongatimpä. “Wadäni botö oncönë pö guidinque botö imote apænecädänimpa,” ante Wængongui angä incæte minitö wënæ wënæ cæmini beyænque Wængongui oncö incæ në awëmö ö ænäni näni womöincönë bai wentamö bapa töö.

¹⁴ Äninque Itota ayæ Wængongui oncö ñænæncönë yabæcönë ongöñongä pæ opa pæ opa godäni tönö babetamönäni tömengä weca pönäni adinque tömengä godö cæcä ate waa badänitapa. ¹⁵ Mänömai mä cæcä waa badäni ate wædinque, Wængongui qui, ante në godönäni ñænænäni tönö në odömönäni guiquënë püinte badänitapa. Ayæ wëñænäni Wængongui oncö ñænæncö yabæque ongöinque yedæ äninque, “Badogaa, Awënë Dabii pæimi inömi adinque möni quëwenguinque impa,” ante Yæ änänitapa. Änäni eñëninque në godönäni ñænænäni tönö në odömönäni ængui badinque ¹⁶ Itota ingante änänitapa.

—Wëñænäni æbänö änäni eñënämai imitawo.

Äñönäni Itota,

Do eñëmopa. Iñæmpa minitö guiquënë Wængongui beyæ ante iimainö ante yewæmonte ongö adämai inte änewëmitawo.

“Bitö tæcæ eñadäni tönö goömæ në gänäni inänite apænëbi eñente,

tömënäni Ao ante nö pöni tededinque,

Wængongui tæiyæ waëmö ingänö, ante watapæ apænedänipa.”

Mänömainö ante yewæmonte i apa änewëminii.

¹⁷ Äninque Itota edæ tömënäni inänite emö cæte wadæ godinque Betänia näni quëwëñömö gote mongacäimpa.

Iigowæ ömæcawæ i adinque Itota püingampa

(Mäadoco 11.12-14, 20-26)

¹⁸ Ñäö bayö Eedotadëe näni quëwënö gämänö adodö pöinque Itota gæwænte wæcantapa. ¹⁹ Gomö adinque iigowæ a ongö ponte ayongä öñaboque emæ adinque,

—Ömæcabi ïmi cöwë incadämaï incæbiimpa.

Äñongä iigowæ incæ guiñë wænimpa. ²⁰ Guiñë wæ adinque tömengä miñæ në godäni iñömö,

—Quimæ iigowæ iñontobæ guiñë wæ amöö.

²¹ Ante wæyönäni Itota iñömö edæ,

—Nawangä ante minitö iminite apænebopa. Wii æmæ pönëmini inte wede pönëmini iñinque minitö iigowæ inte botö cæbaï adobaï do cæbaïmini. Ayæ godömenque cædinque minitö änanquidi ongö ate, “Änanquidi eñëmi, äninque, Bitö cabænte wo gote gäwapænë guie,” ante ämini iñinque edæ minitö äninö baï do babaimpa. ²² Wængongui ingante wede pönëmini iñinque quiëmë incæ ante tömengä ingante apænemini incæ mini äninö tömänö æncæminimpa, ante apænegacäimpa.

*Awënë imipa, ante æcänö änaï, ante Itota ingante änanipa
(Mäadoco 11.27-33; Odoca 20.1-8)*

²³ Itota ayæ Wængongui oncö ñænæncönë yabæcönë pö guidinque odömonte apænecä eñëñönäni, Wængongui qui, ante në godönäni ñænænäni tönö oodeoidi inänite në aadäni, Näni Picæncabo, näni änäni tönö tömengä weca pöninque änanitapa.

—Æcänö në angä inte bitö imite angä cæbii. Iñæmpa, Në ämi bacæbiimpa, ante æcänö pönö äna eñente në ämi inte baï cæbii, ante eñencæte ante wæmönipa.

²⁴ Änäni eñëninque,

—Mïni ämaï botö adodeque ämo eñëninque minitö täno apænemini eñente ate mäniñedë ate botö wæætë, Æcänö në äna inte pönö angä cæboo, ante apænebo eñëmaïminipa. ²⁵ Wäö wodi ingante guiquënë, Bitö æpænë guidoncæbiimpa, ante æcänö äna eñente guidongäi, ante pönëminii. Wængongui öönädë apænecä eñente cæcantawo. Wæætë edæ waodänique änäni eñente cæcantawo. Ædö ante pönëminii.

Itota angä eñëninque tömënäni nämäneque wæætedö wæætë tedecöninque, “Wa, æbänö anguii, ante wædänitapa. Iñæmpa, Wængongui angä eñëninque Wäö cægacäimpa, ämö baï Itota wæætë mönö imonte, ‘Quinante pönënämaï iminitawo,’ ancædongäimpa,” ante wædänitapa. ²⁶ Wæætë edæ, “Waodäni tömänäni, Wængongui beyæ në apænecä Wäö wodi ingacäimpa, ante pönënanipa, ante pönente wædinque Itota ingante në änäni iñömö, Wadäni pïnnäni wæcæ wæ, äninque, Waodänique änäni eñente Wäö cægacäimpa, ante mönö ædö cæte anguii.”

²⁷ Ante pönëninque tömënäni Itota ingante edæ,

—Wa, eñënämaï imönipa.

Ante wæyönäni Itota edæ,

Iñinque botö adobaï, Æcänö në angä inte pönö angä cæboo, ante mini äninö ante apænedämaï incæboimpa, angacäimpa.

Mæmpocä wëna æbänö cæda, ante odömongampa

²⁸ Itota odömoncæte ante apænedinque,

—Mïnitö guiquënë odömonte tedebo ate ämo eñente apænemini eñëmoedäni. Iïmaï impa. Waocä tömengä wëna mënaa iñöna adocanque weca godinque mæmpocä iñömö, “Botö wëmi, bitö ñöwoönæ yowementacodë cæte pöe.” ²⁹ Äñongä edæ, “Wii goinëmo,” angampa. Wæætë edæ ayæ ate pönencöninque edæ, Botö ædö cæte Baa äninque quëwëmoo, ante pönëninque edæ mæmpocä nänö äninö ante eñëninque edæ cæcæ gocampa. ³⁰ Ayæ ate mæmpocä wæætë wacä wengä weca adobaï mäo äñongä tömengä edæ, “Bitö mæmpobi ämi eñente gocæboimpa,” ante apænecä incæte edæ godämaï ingampa. Mäninque ante tedebo. ³¹ Nöwo minitö iminite ämopa, Mæmpocä nänö äno baï æcänö cæcäi, ante pönëmini.

Äñongante,

—Tänocä.

Ante apæneyönäni Itota tömënäni inänite wæætë,

—Nawangä ämopa. Minitö Awënë Wængongui Odeye nempo pö guidämaï iñöminite odömäno awënë beyæ në æwënäni tönö onquiyænäni mäincoo beyæ ante në towente

quëwënäni tönö täno ponte do guicädänimpa. ³² Edæ Wäo wodi mīnitō weca ponte nō cæte tōinō ante odömōñongante mīnitō iñōmō pōnēmīnitawogaa. Ayæ godōmenque awënë beyæ nē æwënäni incæ māincoo beyæ ante nē towente quëwënäni tönö incæ do pōnēnānīpa. Ayæ mīnitō mānōmaī cædāni adīmīni incæte wæætē wënæ wënæ mīni cædīnō ante wædāmaī inte wīi pōnēmīnitapa tōō, ante Itota apænecacāimpa.

Nē aadāni inguënēnāni incæ wiwa cædānīpa, ante (Māadoco 12.1-12; Odoca 20.9-19)

³³ Ayæ godōmenque apænedinque Itota, “Wængonguī Awënë æbānō cæcāā, ante ëñencæmīnīmpa, ante botō iñæca quëwënäni nāni cæinō ante odōmonte apænebo ëñeedāni. Edæ iīmaī impa. Ömæ ëacā yowementacodē da da māo da caate wææ cædinque, Tömēmō ænte pīnā pīnā gāwate wæ yopænte tōmēmæ ænguīñōmō ante cædinque ææ wote badongantapa. Ayæ, Yowementacodē awēmō guidāmaī incædānīmpa, ante cædinque æi wænōmēnæca gomō aquīñōmō mænongā ate nē ëacā iñōmō wabæca gocæ cædinque wadāni ömæ wite nē aate tā pedāni inānite apænecantapa. Botō yowementacodē incæ mīnitō ömæ wite aedāni. Aayōmīnite botō, Mīnitō quī, ante pancamonga pōnōmō æncæmīnīmpa, angā Ao aññōnāni wadæ gocantapa. ³⁴ Ayæ yowedepo wodo bayonte tōmengā ingante nē cædāni inānite, Mīnitō yowementacodē nē aadāni weca godinque botō yowemō incæ pancamonga ämīni ænīnque botō weca wæætē māmōmīni æmoedāni, angā godānitapa. ³⁵ Angā godinque pōnāni adinque yowementacodē nē aadāni guiquēnē nē æncæ pōnāni inānite bæi ongōnīnque adocanque ingante nanguī tæi tæi pānīnque wacā ingante godōmenque wænōnāni wængā ate ayæ wacā ingante dicaca tacadāni. ³⁶ Adinque māo apænedāni wædinque nē ëacā iñōmō wæætē godōmenque nanguī ināni da godongā gote pōnāni adinque nē aadāni guiquēnē adobaī cædāni wædānitapa.”

³⁷ Ayæ godōmenque odömōnīnque Itota apænecantapa. “Inīnque nē ëacā iñōmō, ‘Tömēmō wengā ingante da godōmō gocā adinque tōmēnāni guīñente wædinque ee abainānīpa,’ ānīnque tōmengā ingante da godongā tōmangā pōnī gocantapa. ³⁸ Yowementacodē nē aadāni guiquēnē gomō ayōnāni nē ëacā wengā dicæ pongā adinque, ‘Tōmengā ingampa. Wæmpocā māincoo inī edæ iingā iñōmō nē ænguingā ingampa cæmōō. Mōnō edæ māo wænōmō wængā ate edæ mōnō quī babaimpa.’ ³⁹ Ånewēnīnque tōmēnāni nē ëacā wengā ingante edæ bæi ongōnte yowementacodē wææ cæte iñōmō yabæque edæ, Ömæ, ante wænōnāni wængantapa.”

⁴⁰ Ante māninganca odōmonte apænedinque Itota iñōmō tōmengā ingante nē ānīnāni inānite angantapa. “Inīnque mīnitō iñōmō, Nē ëacā pōnīnque edæ yowementacodē nē aaquēnēnāni inānite æbānō cæquingāā, ante pōnēmīni.”

⁴¹ Ante aññongante tōmēnāni wæætē,

—Ömæ, ante nē wænōnīnāni inānite tōmengā nāēmæ edæ, Ömæ, ante wæñongā wæncædānīmpa. Ayæ wæætē, Ædānidō nō cædinque yowedepo iñō yowedepo iñō tā pete pōnōnāni ænguīmoo, ante adinque awënë, Mīnitō wæætē aacæmīnīmpa, angā Ao ante aacædānīmpa, ante apænedānitapa.

⁴² Itota ayæ tōmēnāni inānite,

—Wængonguī angā ëñente nāni yewæmongaintaa æbānō ongō ante mīnitō adāmaī inte ämīni awædō, angantapa.

“Dica ænte adinque, Wënæ wënæ inca, ante nē mænōnāni nāni wido cædinca incæ gomonga wæmonca inca inīnque täno nāni ññōnīnca bæbængapa do bacapa.

Wængonguī Awënë incæ mānōmaī cæcā adinque mōnō waocabo guīñente wædinque waa amōmpa,”

Ante yewæmonte impa abaimīnīpa. ⁴³ Mānīnō mīni ëñēnāmaī inō beyæ mīnitō Awënë Wængonguī Odeye nempo quëwente mīni cæquēnēnō incæ ö ænte bai cæcā wæcæmīnīmpa. Ayæ wæætē wadāni inānite tōmēmō wainca incate bai nō cædāni inānite godō angā ëñēnīnque tōmēnāni wæætē tōmengā nempo quëwente waa cæcædānīmpa.

⁴⁴ Botö iñömö mäniī dica waëmonca bai iñömo inte ämo eñëninque nê wacä iñömö tömengä iñömö mänincaa tæ go wæëninque wædænque tobænte wacä bai inongä inte botö önöwa gäänê ædæ wææncæcäimpa. Wæætê æcänö ingante Wængongui piinte mänincaca tacacä inaa tömengä guiquënë quiëmê bai yintai bai goquinö anguënë, ante pönëminiyaa.

⁴⁵ Ante nê aaquënëni nani cæinö ante odömöninque Itota apænecä eñente wædinque, Wængongui qui, ante nê godönäni ñænænäni tönö Paditeoidi iñömö, Iñæmpa mönö imonte piinte angä awædö, ante pönente wædinque, ⁴⁶ Quinö cæte tömengä ingante bæi ongonte ö ænguī, ante cöwä adänitapa. Incæte, Waodäni tömänäni, Wængongui beyæ nê apænecä Itota inongä ingampa, ante pönënanipa, ante wædinque, Pïinäni wæcæ wæ, äninque edæ ñimpo cægadänimpa.

22

Monguimæno ante odömonte apænecampa (Odoca 14.15-24)

¹ Wængongui Awënë æbänö cæquingää, ante eñencæminimpa, ante imæca awënë nänö cæinö ante Itota tömänäni inänite wæætê odömonte apænecäimpa.

² “Inguipoga awënë odeye tömengä wëñæ beyæ monguimæno ante nänö cæbai öönæde Awënë Odeye iñömö adobai cæcampa. ³ Inguipoga awënë iñömö tömengä ingante nê cædäni inänite, Wëenê botö äninäni inänite wente ænte pödäni. Angä tē tē wente ænäni eñëninque edæ, Wii pöinewædö, änäni. ⁴ Eñente wædinque awënë wæætê wadäni tömengä ingante nê cædäni inänite da godöninque, ‘Wëenê botö äninäni weca godinque botö beyæ iimainö ante apænemini eñencædänimpa. Botö wengä monguimæno ante wagadaidi onguinænäni tönö cæninäni oguimo pöni inäni inänite do wænöninque botö ææmænoca do eyepæ cæbopa. Botö wengä monguimæno pö beedäni, ante mæmpocä angampa, ante edæ botö beyæ apænecäni.’ ⁵ Angä eñëninque gote apæneyönäni tömënäni eñënämaī inte önönque wadæ godinque pancadäniya gönea ante goyönäni wadäni godonte æncæte ante godänitapa. ⁶ Wadäni ayæ ongönäni guiquënë eñënämaī inte awënë nänö da godonte nê cædäni inänite piinte wænæ wænæ cædäni wæyönäni mäo wænönäni wænänitapa.”

⁷ “Mänömaī cædäni ate wædinque awënë odeye iñömö äingä badinque tömengä ton-tadoidi inänite angä eñëninque nê wænöninäni inänite mäo capo wænönäni. Wænäni adinque godömenque onconcoo tömënäni nani eadincöo iya tänäni. ⁸ Ininque edæ awënë wæætê tömengä ingante nê cædäni inänite, ‘Monguimæno do eyepæ cæte ongö incæte botö nê äninäni waa cædänipa diyæ ämo bequinäni. ⁹ Ininque minitö wæætê edæ iyænompoga iyænompoga mäo godinque æcämenque ingante bee téninque tömënäni tömänäni inänite ämini ææmæno pö becædänimpa.’ ¹⁰ Angä eñente cædinque nê cædäni taadönque pö bee bee bee téninque waa cædäni incæ wiwa cædäni incæ tömänäni inänite äñete ænte mämönäni pö monguimæno oncönê pö guidinque eyede goto gongænte bedänitapa.”

¹¹ Ayæ, “Awënë odeye iñömö eñacæ pö bedäni inänite acæ guiyongä edæ adocanque monguimæno bequi weocoo awënë odeye nänö pönönincoo incæ wëñadämaī inte önöncooque ee mongængä. ¹² Adinque, ‘Æmigo, bitö ædö cæte monguimæno weocoo wëñadämaī inte önöncooque ee mongænte guibii,’ ante äñongä edæ pæ wëenecä. ¹³ Adinque awënë odeye iñömö nê aadäni inänite äninque, ‘Nê monguimæno weocoo wëñadämaī ingä ingante minitö goti wimpote wææ goti wëwate edæ wëmö iñömö nani guingo imonte Yæ yæ ante wæyömö mäo wido cædäni,’ ante awënë odeye angampa. ¹⁴ Mänömaī nani cædö bai adobai impa. Edæ nangui inäni inänite Wængongui, Pödäni, angä incæte edæ wædænque inäni inänite apænte Ao ante ængampa,” ante Itota apænecäimpa.

Tæiyæ Awënë nänö äintamö ante tededänipa (Mäadoco 12.13-17; Odoca 20.20-26)

¹⁵ Itota mänömaï apænecä eñente wædinque Paditeoidi wadæ godinque godongämäë ponëë cöinque, Mönö püinte apænte anguinque ante quïnö cæmö ate Itota adodeque wapiticä tedinque oda cæquingää. ¹⁶ Ante pönëninque tömënäni në ëmiñænäni tönö Edodeidi inänite da godönäni godinque Itota weca pöninque,

—Awënë në Odömömi eñëmi. Bitö nö pönente cæbi ïmipa, ante do eñëmönipa. Ayä bitö ayömi mönitö tömämöni önömönique ïmöni adinque bitö, Waodäni æbänö anguinäni, ante ayä, Æbänö cæquinäni, ante wädämaï inömi inte edæ Wængonguï taadö ante guïñenämaï inte nö odömönte apænebipa. ¹⁷ ïninque bitö æbänö pönëmi. Odömäno gobiedöno beyä ante tæiyä awënë Tetædo tigitamö nänö änintamö ante æbänö wææ yewæmonte ï, ante eñencæte ante wæmönipa edæ. Godonte edæ waa cæte intawo. Wæætë wënæ wënæ cæte intawo, ante apænebi eñencæmönimpa.

¹⁸ Äñönäni Itota ïñömö tömënäni do, Cæmö wapiticä tedecæcäimpa, ante näni äñinö ante do eñëninque tömënäni inänite wæætë edæ,

—Mïni wadö tedete wadö cæcabo ïñömö edæ quïnante botö ïmote, Æbänö cæmö oda cæquingää, ante cæminii. ¹⁹ Tetædo tigitamö nänö änintamö odömömini aquïmo.

Äñongä deëradio tigitamö adotamonque ænte pönäni. ²⁰ Adinque tömënäni inänite Itota,

—Æcänö awinca baï yewæmonte badonte ï. Edæ æcänö ëmöwo ante yewæmonte ï.

²¹ Äñongante,

—Awënë Tetædo awinca baï yewæmonte badonte impa. Adocä ëmöwo ante yewæmonte ongö amönipa.

Änäni eñëninque Itota ïñömö edæ,

—Awënë Tetædo quï ï ïninque edæ Tetædo ingante godongäëimpa. Wæætë Awënë Wængonguï quï ï ïninque Wængonguï ingante godonguï ï apa änewëminii.

²² Ante Itota nänö äñinö eñente beyä, Quiëmë baï angää, ante ancai guïñente wædinque wadæ gogadänimpa.

Edö cæte ñäni ömæmonguï, ante wädänipa

(Mäadoco 12.18-27; Odoca 20.27-40)

²³ Mänïönæ adoönæ ïñonte Tadoteoidi në, Waocä wæninque ñäni ömæmönämaï æmäwo wængampa, ante në änewënäni inte Itota weca pöninque, ïmainö ante eñencæte ante wæmönipa, äñänitapa.

²⁴ —Awënë në Odömömi eñëmi. Möitee wodi mönö beyä ante wææ yewæmöninque ïïmaï ante yewæmongacäimpa. Waocä möninque wëñæ tapæidämaï inte wængä ate tömengä tönïñacä wæætë owæmpoingä ingante möninque wëñæ tapæidinque, Botö tönïñacä wodi wængä ingampa, ante pæpogacæcäimpa, ante yewæmongacäimpa.

²⁵ Ñöwo ïñömö möni cabo ïñömönite adodäni näni caipæ önompo æmæmpoque go mënaa ïnäni ïñönäni bamoncadengä möninque wëñæ tapæidämaï manguïwëninque edæ näñe wængä ate ayæmengä wæætë owæmpodingä ingante mongä. ²⁶ ïninque ayæmengä incæ adobaï wëñæ ömæpocä näñe wængantapa. Ayä wææ wacä ayæmengä adocä ingante monte ate wëñæ adobaï tapæidämaï inte edæ näñe wængantapa. Ayä wææ wacä adobaingä, ayä wææ wacä tapæidämaï inte näñe, ayä wææ wacä, ayä wææ ayæmengä pönï adocä ingante möninque wëñæ tapæidämaï inte näñe wængantapa. ²⁷ Onquiyængä guiquënë owæmpote wædinque tömengä pönï näñe wængantapa.

²⁸ ïninque, Mönö ñäni ömæmonguïönæ, ante mïni äönæ ïñonte mäningä owæmpoingä ïñömö æcänö nänöogængä baquingää. Edæ tömengä ingante ïñömö edæ tömänäni manguïwengadänimpa. ²⁹ Äñönänite Itota wæætë,

—Mïnitö ïñæmpa. Wængonguï angä eñente näni yewæmöinta adämaï inte baï ämïni awädö. Wængonguï adocanque tæï piñængä inte edæ tömää cæcampa, ante pönënämaï inte edæ oda cæte ämïni awädö. ³⁰ Edæ Wængonguï anquedoidi öönæde cöwë owodäni baï ïñönäni inte waodäni ñäni ömæmöninque godö ñänönämaï ïnäni inte edæ mönämaï inguinänidö angüënë. ³¹ Wæætë do wængainäni näni ñäni ömæmonguïönö ante eñencæminimpa, ante Wængonguï beyä yewæmonte ongö adämaï ïmïnitawo.

³² “Botö iñömö Abadäo Wængonguimo ingaïmo inte ayæ Itæca Wængonguimo ingaïmo inte botö AACOBO Wængonguimo adobo ïmo anguënë,” angacäimpa. Ante nê angaingä inte edæ æmæwo wäninäni tömënäni Wængonguingä ædö cæte inguingää. Wæætë edæ miï quëwënäni quëwënäni tömënäni Wængonguï ïnongä ingampa. Ìninqe edæ nê wænte godinäni incæ ayæ miïnäni quëwënäni ïnänipa, ante pönenguënë änewëminii.

³³ Ante apænecä ëñëninque godongämæ ëñengönäni guiquënë, Æbänö cæte Itota waa pöni odömönte apænecä ëñëmönii, ante wægadänimpa.

*Wængonguï nänö wææ angaïne mënea täïneda pöni ënepa
(Mäadoco 12.28-34)*

³⁴ Tadoteoidi guiquënë, Ædö cæte gomonga anguiï, ante edæ pæ wëenedänitapa. Mänömaï Itota nänö nö äninö beyæ pæ wëenedänipa, ante tededäni ëñëninque Paditeoidi wæætë godongämæ pönänitapa. ³⁵ Itota æbänö cæte wapiticæ ämaingää, ante pönëñönäni adocanque idægoidi nani wææ angainö ante nê ate ëñënongä iñömö Itota ingante angantapa.

³⁶ —Awënë nê Odömömi ëñëmi. Wængonguï, Ìimai cædäni, ante nänö wææ angaïnecoo ante pönëninque ædedö täïne pöni ï ïñonte mönö nanguï ëñente waa cæquiï.

³⁷ Äñongante Itota iñömö,

—Ìimai ante nänö wææ angaïne iñömö edæ täïne pöni ïñonte mönö nanguï ëñente waa cæcäimpa. “Wængonguï mönö Awënë ingante bitö mimö entawente waadedinque bitö ocai encabi inte nö pönëninque bitö önöwoca ewocabi inte edæ tömengä ingante ædæmö waa waadete pönë.” ³⁸ Mänine nänö wææ angainö waa pöni ï ïninqe mänine täno waa cæquiï impa. ³⁹ Ayæ wade nänö angainö adobaï nanguï waa ëñente cæquiï impa. “Bitö nämä bitö waadete waa cædö bai adobaï pönëninque wadäni ïnänite adobaï waa waadete cæe.” ⁴⁰ Ìimai cædäni, ante Möitee wodi nänö wææ angainö ayæ Wængonguï beyæ nê apænedäni nani angainö cæcæte ante cædinque edæ mänine Wængonguï mënea nänö wææ angaïne ëñente cæte beyænque edæ tömänö edæ do eyepæ cæte impa, ante Itota apænecäimpa.

*Codito æcänö päïngä ïnongä ingää, ante apænecampa
(Mäadoco 12.35-37; Odoca 20.41-44)*

⁴¹ Mänii Paditeoidi adoyömö ponte ayæ ongöñönäni Itota tömënäni ïnänite angantapa. ⁴² Itota iñömö tömënäni ïnänite,

—Codito iñömö æcänö ingää, ante pönëminii. Æcänö Wengä ïnongä ingää, ante pönëminii.

Ante äñongante Paditeoidi wæætë,

—Awënë Dabii päïngä ïnongä ingampa.

⁴³ Äñönänite Itota edæ,

—Awënë Dabii päïngä ïnongä iñongante edæ Dabii tömë edæ Codito ingantedö äninque quïnante, Awënë ïmipa, angacäimpa.

⁴⁴ “Awënë Wængonguï incæ botö Awënë ingante apænedinque,

Botö tömëmæ ïnö tæ contayömi,

bitö ïmite nê piïnäni ïnänite bæ tabo ate

bitö önöwa gäänë ongöñönänite bitö pinä gawacæbiimpa, angacäimpa.”

Ante Wængonguï Önöwoca apænecä ëñëninque Dabii wodi yewæmongacäimpa.

⁴⁵ Codito nê Awënë ingampa, ante awënë Dabii wodi nänö nê angaingä ïnongä inte edæ adocä Codito iñömö ædö cæte näëmæ Awënë Dabii wodi päïngä inguingää, ante pönenguënë änewëminii.

⁴⁶ Ante äñongä edæ tömänäni, Mönö ædö cæte wæætë anguiï, äninque ëñënamäi inte edæ pæ wëenegadänimpa. Ayæ iincayæ ate, Apænëbi ëñëmönii, ante ædö cæte anguïmoo, ante edæ tömänäni guïñente wædinque änämaï ingadänimpa.

23

Paditeoidi tönö në odömönäni inänite Itota püinte angä
(Mäadoco 12.38-40; Odoca 11.37-54, 20.45-47)

¹ Pæ wëenedäni adinque tömengä miñäë në godäni godongämä ongönäni nangui inäni tönö ongöñönänite Itota tömänäni inänite apänegacäimpa.

² “Në odömönäni tönö Paditeoidi iñömö Möitee wodi nänö angainö ante në ëñänäni inte në nö odömönte apänedäni inänipa. ³ Mänömaï inäni adinque mïnitö iñömö tömönäni äninö ante tömänö ante cöwë ëñente cæedäni. Wæætë tömönäni nänäi cæi bai cædämaï iedäni. Edæ, iïmaï cæedäni iïmaï cæedäni, ante nänäi äno ante tömönäni nämä incæ ëñänämaï cædänipa. ⁴ Edæ mäincoo teëmenco mo paate wadäni önönancapæ cö cædancapänäni bai cædinque tömönäni, Wadäni guëmancædänimpa, ante cædämaï inäni inte önompogonca adopogoncaque incæ gä ænancapänämaï inänipa.”

⁵ “Quiëmë cædäni incæ tömönäni cöwë, Wadäni botö imote waa acædänimpa, ante cædänipa. Wadäni, Bitö Wængongui beyä nänäi yewæmongainta nanguï abi imipa, ante pönëninque mönitö imönite waa acædänimpa, ante babæ cædinque mäninta æmontaicade ñänäë pönï badonte mïni tente önoncaipoga wo cæte encapodänipa. Ayä, Bitö Wængongui ingante nanguï apänebi imipa, ante pönencædänimpa, ante cædinque tömönäni weocoo ñä cæwate ñä cæwate doyä guënë ëwa badöninque doyä pönï wëñate mongänänipa. ⁶ Ayä äämä becaë godinque tömönäni, Botö täno bete tocæboimpa, ante waëmompaa pönï tæ contate bete todänipa. Ayä Wængongui angä nänäi ëñente yewæmongainta ate odömöincönë pö guidinque tömönäni nämanque ante pönëninque waëmompaa pönï tæ contate todänipa. ⁷ Ayä waodäni nänäi godonte äiñömö wainö pancadë goyönäni wadäni pö bee téninque, Në odömömi, bitö imite waa amönipa, ante apänedäni ëñëninque edæ në odömönäni iñömö nanguï todänipa,” ante Itota apänegacantapa.

⁸ Ayä apänedinque, “Mïnitö guiquënë mïnitö Awënë në Odömongä adocanque pönï iñongä mïni caipäë iñömönite wadäni, Awënë në odömömi imipa, ante änämaï incædänimpa, ante wææ cæedäni. ⁹ Ayä mönö Mæmpo adocanque pönï öönädë quëwengä ingä adinque mïnitö waocä ingantedö ante apänedinque, Mönö mæmpo ingampa, ante änämaï iedäni. ¹⁰ Ayä, Mönö Awënë në Odömongä iñömö adocanque pönï Codito inongä ingampa, ante ëñëmïni iñömönite wadäni, Në ämi imipa, ante änämaï incædänimpa, ante wææ cæedäni. ¹¹ Ayä edæ mïni cabo iñömönite wacä beyä wacä në godö cæcä iñömö ñänängä pönï ingä incæcäimpa. ¹² Edæ nämä ængö cæte bai cædinque æcänö, Botö botö, äna tömengä iñömö edæ wææntodonte bai önonque bacæcäimpa. Wæætë æcänö, Botö botö, änämaï inte, Önömoque imopa, äna iñömö edæ tömengä ingante ængö cæte bai cædäni adinque wadäni tömengä ingante waa acædänimpa,” ante Itota tömengä miñäë në godäni inänite apänegacäimpa.

¹³ Ayä në odömönäni tönö Paditeoidi inänite Itota püinte angantapa. “Mïnitö iñömö mïni pante wæquinque edæ wadö tedete wadö cæmïni iminipa. Wadäni öönädë Awënë Odeye nempo guidämaï incædänimpa, ante mïnitö odemö tee mönete bai wææ cæmïnipa. Tömëmïni guidämaï imïni inte mïnitö wadäni guicæ cæyönänite edæ tömönäni nänäi guidämaï wæquinque edæ wææ cæmïnipa. ¹⁴ Në odömömi tönö Paditeoidi imïni mïni wadö tedete wadö cædincabo inte mïni wæquinque impa. Owæmpoïnäni oncö ö æmïni incæte mïnitö, Wantæpiyæ botö tedebo beyænque wadäni botö imote waa acædänimpa, ante Wængongui ingante wantæpiyæ në tademïni inte godömenque mïni panguinque ingäimpa,” ante Itota angacäimpa.

¹⁵ Ayä apänedinque, “Në odömömi tönö Paditeoidi imïni mïni wadö tedete wadö cædincabo inte mïni wæquinque. Edæ, Adocanque incæ mönitö ëmiñängä bacæcäimpa, ante mïnitö æpäë tömämä wogaa gote diqui diqui mïninque inguipoga taadö tömänö gote diqui diqui minte ayömïni adocanque Ao angä adinque mïnitö tömengä ingante

godö odömömini. Æñëninque tömengä guiquënë minitö wënæ wënæ goquinö godömenque godinque gomonga në wënæ wënæ cæcä badinque tadömengadænguipo nänö gomonga panguinque minitö miñæ tee empote gocampa töö.”

¹⁶ Ayæ, “Babetamömini mini wæquinque babæ ante mäomini ate edæ oda cæte godänipa. Æñæmpa Æmaï änewëminipa. ‘Botö äno nöingä baquinö anguënë, ancæte ante æcänö, Wængonguï tæiyæ waëmö oncö tæi ongö bai impa, äna tömengä önonque tedete apænecampa, ante änewëminipa. Wæætë edæ, Wængonguï tæiyæ waëmö oncö oodo mä ongö bai impa, ante æcänö äna guiquënë tömengä nö angä inte cæcæcäimpa,’ ante minitö Æñömö babæ wapiticæ äminipa. ¹⁷ Mini babetamö incabo mimö ömädë incädö. Edæ Wængonguï tæiyæ waëmö oncönë oodo öñö adinque, Oodo incæ godömenque waa pönï impa, ante babæ ante pönëminipa. Æñæmpa oodo æninque, Wængonguï oncö waëmö ëmonguinta, ante ænte badönäni beyænque oodo tæiyæ waëmö bapa, ante pönëminiyaa.”

¹⁸ “Ayæ edæ minitö babæ apænedinque, ‘Botö äno nöingä baquinö anguënë, ancæte ante waocä, Wængonguï qui, ante baö näni iya täimpaa tæi ongö bai impa, ante æcänö äna önonque tedecampa. Wæætë mäninö ancæte ante, Baö iya täimpaa näni iya tanguingä bai impa, ante æcänö äna Æñömö tömengä nö ante cæcæcäimpa,’ ante minitö babæ wapiticæ äminipa. ¹⁹ Mini babetamö incabo ämini ëñëmoedäni. Ædö waa intawo. Näni iya täimpaa incädö tæiyæ waëmö intawo. Wæætë edæ baö näni iya tanguingä incæ tæiyæ waëmö intawo. Æbänö ante pönëmini. Æñæmpa baö æninque, Wængonguï qui, ante iya tänäni beyænque baö näwaaquingä bacampa, ante pönëminiyaa. ²⁰ Æninque, Botö äno nöingä baquinö anguënë, ancæte ante waocä, Näni iya täimpaa tæi ongö bai impa, ante æcänö äna tömengä, Iya täimpaa tönö baö näni iya tanguingä tönö tömää beyæ, ante bai dobæ angampa. ²¹ Ayæ æcänö, Wængonguï tæiyæ waëmö oncö beyænque ante näwangä baquinö anguënë, äna tömengä Wængonguï oncö beyæ ayæ mänincönë në owocä beyæ adobai dobæ angampa. ²² Ayæ æcänö, Öönädë beyænque näwangä baquinö anguënë, äna tömengä edæ Wængonguï nänö containpaa beyæ ayæ containpaa në Contacä beyæ adobai dobæ angampa,” ante apænecäimpa.

²³ Ayæ apænedinque Itota, “Në odömömini tönö Paditeoidi incæ mini wadö tedete wadö cædincabo inte mini wæquinque impa. Tömëmini mini minte pædimö tönö guimö oguï wayabo tönö tömëmö mini tä pete ænimö tæ gæte diete ganca mini cabo tæ gædincoo ñö cædinque adocooque æninque, Wængonguï qui, ante godöninque waa cæminipa. Incæte edæ Wængonguï, Nö cædäni, ante nänö äno ante, Godö waadete waa cædäni, ante nänö äno ante, Wede pönente cædäni, ante nänö äno ante minitö mini wæquinque ëñente cædämaï iminipa. Æmaï täno waa cæquënëmini inte minitö mänincoo ayæ godömenque Wængonguï ingante godömini inguënëmini iminipa. ²⁴ Babetamömini babæ ante mäomini ate edæ oda cæte godänipa. Minitö, Diète ganca minitö mäincoo ongö adinque adocooque cöwë godonguï i, äninque owætaca bequïñömö guincawæ owoyö tæ wedote bai cæminipa. Wæætë edæ Wængonguï nänö äno bai cædämaï inte minitö edæ cämeyo ñænængade pönï owoyö önonque ade bete bai pönënaï inte cæminipa, ante awädö,” ante Itota apænecäimpa.

²⁵ Ayæ në odömönäni tönö Paditeoidi inänite godömenque æninque tömengä, “Mini wadö tedete wadö cæcabo inte mini wæquinque impa. Owæta tönö cængæ yabætaque ñongate bai minitö wadäni ayönäni në waa cæmini inte wæætë edæ cæncadenta inö wentaga engate bai cæminipa. Mini wacä qui ö æinënö ayæ nämanque ante mini towënö beyæ owæta cæncadenta inö opogö tagate eyede bai impa diyæ. ²⁶ Bitö Paditeobi babetamömi ëñëmi. Cæncadenta inö täno ñä mënongabi ininque yabæta inö ñongate wainta baquinö anguënë,” angacäimpa.

²⁷ Ayæ, “Në odömömini tönö Paditeoidi incæ mini wadö tedete wadö cædincabo inte mini wæquinque impa. Minitö wao wodido bai yabæque waëmö paate bai Æñonte cæncadë inö wao bayetoca ñömænte öö wayömö bai entawëmini iminipææ.

²⁸ Æninque wadäni yabæque adinque, Minitö nö entawëmini iminipa, ante pönëñönäni

míntō wíwa míni pōnēnō beyæ wadō tededinque wadō cædinque edæ mímö wentamō entawēmínipa,” ante Itota piingacáimpa.

²⁹ Tömēnāni inānite ayæ piinque, “Nē odömōmīni tōnō Paditeoidi incæ míni wadō tedete wadō cædincabo inte míni wæquinque. Edæ Wængonguī beyæ nē apænegaināni wodido, ante míntō do mænōnomínipa. Ayæ, Nē nō cægaināni wodido, ante mænōninque míntō oncontai waēmō pōnī paadomínipa. ³⁰ Ayæ, ‘Mæmæidi nāni quēwengaiñedē quēwēmōni baī mōnitō tömēnāni tōnō, Wængonguī beyæ nē apænedōnāni inānite māo wænōnāmaī inte ee quēwencædōmōnimpa,’ ante ämínipa. ³¹ Mänōmainō ante apænedinque míntō, Wængonguī beyæ nē apænegaināni inānite nē wænongaināni pæimōni imōnipa, ante nāmā incæ edonque pōnī apænte ämínipa. ³² Edæ míntō wæmæidi nē wænongaināni inte nāni pe ññængaimāmo wī eyepæ inte baī cædinque míntō ñōwo godōmenque eyede pe ññænte baī capo wænōmäewedāni,” ante Itota badete baī angacáimpa.

³³ Ayæ äninque, “Míni tæntæcabo pæimīni baī imīni eñeedāni. Míni obecabo pæimīni baī imīni eñeedāni. Míntō tadōmengadænguipo míni pante wæquēnēnō ante æbānō cæte aamō cæte edæ tabaimīniyaa. ³⁴ Ininque Wængonguī beyæ nē apænedāni tōnō nē nō eñēnāni tōnō nē odömōnāni inānite botō ñōwo míntō weca da pōnōmo pōnānipa. Adinque míntō iñōmō edæ pancadāniya inānite wænōmīni wæncædānimpa. Pancadāniya inānite míntō awāa timpomīni wæncædānimpa. Ayæ pancadāniya inānite míntō odömōincōnē bæi ongōninque tæi tæi pāmīni caate wædinque tömēnāni wayōmō quēwēnāni weca wayōmō quēwēnāni weca wodii goyōnāni míntō tee empo tee empo togænte goquimīni, ante awædō. ³⁵ Mänōmaī wēnæ wēnæ cæyōmīni edæ ñōwomīni beyænque tömāa inguipoga wepæ aa bedinque nāate baquimīnidō anguēnē. Edæ Adāo wodi wengā Abedo nē nō cægaingā wepæ tōnō ayæ quēwente nē eñente cædāni inānite godō wænōnāni wængaināni tōnō tömēnāni tömānāni wepæ beyæ míntō nāate wæcæmīnimpa. Ayæ míntō Wængonguī oncō ññæncō boyæ iya täimpaa gäänē ongōninque Bedequiya wengā Tacadiya ingante godō wænōmīni wengā ininque tömengā wepæ nāate wæmīnipa. ³⁶ Ñōwomīni míni wepæ nāate wæquinque tömanguipo aa betīnō anguēnē, ante ämo eñeedāni,” ante Itota tömēnāni inānite idæwaa piinte apænegacáimpa.

*Eedotadēē quēwēnāni beyæ ante Itota wæcampa
(Odoca 13.34-35)*

³⁷ Ayæ Eedotadēē iñōmō quēwēnāni beyæ ante pōnēninque Itota, “Eedotadēē quēwēmīni eñeedāni, angantapa. Wængonguī beyæ nē apænedāni inānite míni wænongaincabo inte ayæ Wængonguī nānō da pōnōnāni inānite dicaca tacamīni iñōmīnite botō iñōmō míntō imīnite waadete pōnō cæinente nanguī wæbopa. Tawadiya wæmōnā iñōmō, Botō wēnāni, ante gompodinique tæcæenēmæ wēä pōnō ö ænā baī botō adobai, Botō wēnāni pōedāni, ante æpogadō äñōmote míntō, Wīi pōinente awædō, ante Baa ämīni wætabopa. ³⁸ Ñōwo iñōmō edæ míni quēwēñōmō önonconcooque baconcoo tamēñedāni. ³⁹ Ñōwo iñōmō edæ botō dæ äñōmo míntō, ‘Awēnē Wængonguī emōwo beyænque pōninque bitō toquinque edæ waa cæcæbiimpa,’ ante míni anguinganca míntō edæ botō imote adāmaī incæmīnimpa ante ämo eñeedāni,” ante Itota apænegacáimpa.

24

*Wængonguī oncō ññæncō bæ tate bacæimpa, ante
(Mäadoco 13.1-2; Odoca 21.5-6)*

¹ Itota Wængonguī oncō ññæncō oncodo tao gocantapa. Wadæ gocæ cæyongā tömengā mīñæ nē godāni iñōmō, Wængonguī oncō ññæncō æbānō waa pōnī mænonte iī, ante odōmoncæte ante tömengā weca pōnāni. ² Ate wædinque Itota wæætē,

—Míntō guiquēnē mänincoo tömancoo edæ waa amīnitawo. Nāwangā ante míntō imīnite apænebopa. Mänincoo míni acoo incæ tömanca bæ tadāni wæænca adinque

panguimæ panguimæ godinque dica adocaque pōni incæ wænömænæca ongōnāmaī ingæimpa, ante apænecāimpa.

Oo iinque bacæimpa, ante æbānō ate eñenguīi, ante

(Mäadoco 13.3-23; Odoca 21.7-24, 17.22-24)

³ Mānii taodinque Odibowænquidi pō æite tæ contate ongōñongā tōmengā miñæ nē godāni adodānique tōmengā weca ponte apænedānitapa.

—Bitō änō ante æyedēnō iinque baquīi, ante eñencæte ante wæmōnipa. Edæ bitō ponque æyedēnō ponguīmii, ante ayæ mōnō inguipoga quēwēnō æyedēnō æmæwo iinque baquīi, ante eñencæte ante wæmōnipa. Īinque, Æbānō mā odōmonte baī ba adinque edæ, Oo pōni impa, ante wædinque eñenguīmōnii, ante eñencæte ante wæmōnipa.

⁴ Āñōnāni Itota,

—Wapiticæ odōmōñōnāni mīnitō wæætē, Mōnō oda cædāmaī ingæimpa, ante nāmā wææ aquēnē quēwēmīnii. Edæ iīmaī baquī i ataqueedāni. ⁵ Edæ wadāni nanguī ināni botō emōwo ante babæ tedete pōninque, “Botō Codito inōmo imopa,” ante apænedinque wapiticæ māodāni godinque edæ nanguī ināni tōmēnāni miñæ oda cæte wapiticæ gocædānimpa. ⁶ Edæ, Wabæca awēnē tōnō pō bee tēninque wæatedō wæætē cædapa, ante tededāni eñencæmīnimpa. Ayæ wayōmō nāni guēadō guēa cæte wænōnō ante tededāni incæte edæ guīñente wædāmaī iedāni. Edæ mānīnō botō ānīnō baī cōwē bacæimpa. Ba incæte mōnō inguipoga quēwēnō iñōmō māniñedē wīi æmæwo iinque bacæimpa. ⁷ Adobæca quēwēnāni iñōnānite wabæca quēwēnāni ponte bee tēninque guēadō guēa cæquināni inānipa. Adobæca awēnē odeye nempo quēwēñōnānite wabæca awēnē odeye tōmengā nānō enempodāni māmō bee tēninque guēadō guēa cæte wænonte wænguīnāni inānipa. Ayæ waodāni nāni cæinente wænguinque cænguī incæ tōmāā capo wængæimpa. Ayæ wayōmō wayōmō goinque pō wæcædānimpa. ⁸ Incæte mānīi nāni wæwēnō ba ĩinque edæ ōnonque mā pōni nāni wæwenguī inguīnō anguēnē.

⁹ Mānōmāinō ante Itota godōmenque apænecāimpa. “Māniñedē edæ mīnitō imīnite mīni wæquinque ō ænte māo godōnāni wæyōmīni godōmenque wænōnāni wæncæmīnimpa. Ayæ māniñedē botō emōwo apænemīni beyæ tōmāmæ quēwēnāni mīnitō imīnite pīincædānimpa. ¹⁰ Ayæ adoyedē mīni pōnencabo incæ pancadāniya guingo imonte baī badinque edæ pōnēnāmaī inte Baa anguīnāni. Ayæ mīni cabo incæ nāēmæ pīinque pancadāniya, Nānō wænguinque, ante wacā ingante nāēmæ godoncædānimpa. ¹¹ Ayæ nē babæ ante apænedāni ponte, Wængonguī beyæ nē apænemōni imōnipa, ante odōmōnāni adinque pancadāniya edæ oda cæte wadō pōnente baquināni inānipa. ¹² Ayæ eñēnāmaī inte nāni cæpāmo godōmenque yebænte baī nanguī ba ate wædinque nē pōnēnīnāni inte wodo tōmānāni edæ Baa ānīnque waadedāmaī bacædānimpa. ¹³ Edæ æcānō iīmæca iinque baganca wæntædāmaī inte botō emōwo beyæ pīinte badāmaī inaa tōmengā edæ botō æmo beyænque cōwē wænāmaī quēwencæcāimpa. ¹⁴ Ayæ edæ, Awēnē Odeye nempo watapæ quēwengæimpa, ante mīni pōnencabo tōmāmæ quēwēnāni inānite māo apænemīni eñencædānimpa. Mānōmaī apænedinque iinque cæmīni ate māniñedē ate edæ iinque baquīnō anguēnē,” ante Itota tōmengā miñæ nē godāni inānite apænecāimpa.

¹⁵ Ayæ apænedinque Itota, “Īinque, Wængonguī beyæ nē apænecāingā Daāniedo wodi, Nōmæi baī ōō wadō nāni wo ewenguīmāmo incæ Wængonguī oncō tæiyæ wæmoncōnē ænte māmō cō cæquinānidō anguēnē, angacāimpa. Daāniedo nānō yewæmongainta adinque nē adingā iñōmō tōmengā do eñēmaingampa. Īincayæ ate mānōmaī cō cædāni ongō adinque, ¹⁶ māniñedē Oodeabæ quēwēmīni iñōmō edæ ānanquidi do wodii winonte æibæwedāni. ¹⁷ Ayæ oncōmanca ongōmīni ĩinque māincoo æncæte ante oncōnē wæi guīdāmaī inte oncōmancaque oncōmancaque wodii winōmæwedāni. ¹⁸ Ayæ tōmēmoncodē cæmīni ĩinque yacoo æncæte ante oncōnē ocæ emænāmaī inte godōmenque wodii winōmæwedāni. ¹⁹ Māniñōnæ iinque bayedē nē yædēmadā ināni tōnō goōmæ nē gānōnāni tōnō tōmēnāni nāni wæquīmāmo baquīnō anguēnē.

²⁰ Ayä mīnitō mīni wodii wīnonguīōnæ ante pōnēnīnque edæ Wængonguī ingante, Wīi edæ cōōnædepo bacæimpa, ante ayä, Guēmanguīōnæ īñonte badāmaī ingæimpa, ante äedāni. ²¹ Edæ māniñedē waodāni nanguī nāni wæwēmāmo nāni angā baquinō anguēnē. Edæ Wængonguī nānō badongaiñedē mǎnōmaī nāni wæwēmāmo baī dæ āñonte ayä godōmenque ñōwo ganca dæ ānōmpa. Ayä godōmenque īinque baganca mǎnōmaī nāni wæwenguīmāmo baī dæ anguīnō anguēnē. ²² Edæ wantæpiyæ nāni wæwenguī impa, ante adinque Wængonguī, Mānimpōōnæque edæ wæwencædānimpa, ante pōnōmenque ante ānāmaī ingā baī quingānō quēwenguēnē dæ ancædōnānimpa. Incæte, Nē quēwenguīnāni botō angaiñāni wīi wantæpiyæ wæwencædānimpa, ante cædinque Wængonguī dobæ pōnōmenque āninque, Idæwaa impa, ancæcāimpa,” ante Itota apænecāimpa.

²³ Ayä, īinque bayonte æbānō inguīi, ante apænedinque Itota godōmenque īimaī ante apænecantapa. “Māniñedē wadāni mīnitō īmīnite, ‘īñōmō mōnō Codito ponte ongongā tamēñedāni,’ ante ayä, ‘Wayōmō ponte a ongongā atamōnīpa,’ ante tededāni ēñēnīnque mīnitō īñōmō edæ ēñēnāmaī īmāewedāni. ²⁴ Wadāni māniñedē ponte a ongōnīnque nāmā incæ ante, Tōmēmo Codito īnōmo īmopa, ante babæ ante tedequināni. Ayä, Wængonguī beyä nē apænebo īnōmo īmopa, ante babæ ante tedequināni. Tōmēnāni, Wængonguī nānō apænte ængaiñāni incæ æmæwo oda cædinque wapiticæ gocædānimpa, ante cædinque bamōnengæ baī cædinque öōnædē cæi baī cædinque nō odōmonte baī cæquināni īñānīpa. Incæte Wængonguī nē apænte ængaingā inte edæ ee aqingā diyæ æmæwo oda cædinque wapiticæ goquināni. ²⁵ Edæ īinque badāmaī īñonte botō ñōwo do apænebo ēñēdāni. ²⁶ īinque, pōnente quēwēñōmīni wadāni, ‘Cōwā aedāni, öōmæca mæ ongongampa,’ ante ānāni ēñēnīnque mīnitō acæ taodāmaī īedāni. Ayä, ‘Oncō guimongacōnē a ongongā apa quēwēdāni,’ ante ānāni incæte pōnēnāmaī īedāni. ²⁷ Edæ nænque tamōnō gāmænō nāīnīnque guīdō gāmænō quingæ gote baī edæ tōmānāni edonque ayōnāni botō Waobo ēñagaiimo inte botō ponque poncæboimpa. ²⁸ Edæ abadæidi ñōmæingāa weö pōnāni baī mīnitō tōmāmīni adoyedē īñontobæ botō weca ponguīmīni īmīnīpa,” ante Itota apænecāimpa.

Waoçä ēñagaiğä īimaī pōnīnque cæcæcāimpa, ante (Māadoco 13.24-37; Odoca 21.25-33, 17.26-30, 34-36)

²⁹ Ayä godōmenque apænedinque Itota, “Māniñē nāni wæwēmāmo nāni angā īinque go ate nænque īñontobæ wēmō badīnque apāicā apāidāmaī ingæimpa. Nēmōncoo öōnædē īnō wææ tæ wæænīnque waa tæ waa tæ wæængæimpa. Öōnædē tæi ongongaincoo incæ wançæ wançæ cæte baī wapiticæ goquinō anguēnē. ³⁰ Māniñedē ate botō Waobo nē ēñagaiimo inte oo pōñōmo öōnædē ate baī ba adinque wabæca nāni cabo wabæca nāni cabo tōmāmæ quēwēnāni Ca ca wæcædānimpa. Wæyōnāni botō Waobo nē ēñagaiimo inte boguīmāncodē māmō pōnīnque botō tæi pōni pīñæmo inte ñāo apāite baī wæmō ēmonte wææmo acædānimpa. ³¹ Māniñedē todompeta mōnō ancadeca yedæ ænete baī we öōñonte botō anquedoidi īñānite da godōmo godīnque tōmēnāni boguīmā æmænō betamonca æmænō betamonca nānō pō goīnō godīnque öōnædē tōmāne godīnque edæ Wængonguī nānō apænte ængaiñāni īñānite āñete poncædānimpa,” ante Itota apænecantapa.

³² Ayä, “Wængonguī Awēnē æyedēnō ponguingāa, ante botō iigowæ æbānō iwæ ante odōmonte apænebo ēñēdāni. Tōmēwæ mīiwæ badīnque iigowæ wayabo tånā nā boca adīnque mīnitō, Öñabo nānō bocaīnepo inte nænque nāwatedæ baquinque bocapa, ante pōnēnīnque edæ do ēñēmīnīpa. ³³ Ayä adobaī māniñō botō apænedinō baī edæ do ba adīnque mīnitō, Waoçä nē ēñagaiğä īñōmō edæ do odemō pōni ongōnīnque edæ oo poncæcāimpa, ante ēñencæmīnīmpa. ³⁴ Nāwangā āmopa. Ñōwomīni ayä mīimīni quēwēnīnque wænte godāmaī īñōmīni māniñō botō apænedinō baī tōmānō edæ do īinque baquinō anguēnē. ³⁵ Öōnædē ongōñōmō inguīpoga tōnō wo ewente baī dæ ba incæte botō angaiñonque guiquēnē edæ dæ badāmaī inte edæ cōwē tæi ongongæimpa,” angantapa.

³⁶ Ayä, “Mäniönæ æyedënö i, ante, Mäniñepo ædepodö i, ante eñencæte ante mïni wædinö ante æcämenque incæ eñenämäi ingampa. Tömänäni eñenämäi iñönäni edæ Wængongui anquedoidi incæ eñenämäi inänipa. Wæmpocä Wëmo incæ eñenämäi iñömote Wæmpocä iñömö tömengä adocanque incæ edæ nê eñengä ingampa,” ante Itota apænecäimpa.

³⁷ Ayä godömenque iïmäi ante apænecantapa. “Waobo nê eñagaïmo inte botö ponguiönæ iïnque bayedë guiquënë Nöwee wodi Docä näni angaingä nänö quëwëñedë dodäni näni quëwengaï bai adobaï edæ quëwenguinäni inänipa. ³⁸ Mäniñedë æpæ ayä änämäi iñedë nê quëwengaïnäni iñömö önonque cænte bete, Monguingä, ante godonte ate möninqe tömënäni Docä Nöwee oncö bai wipo mäenonte nänö guiquiönæ iïnque baganca quëwencægädänimpa. ³⁹ Tömënäni inänite æpæ ænte gocæ cæganca tömënäni, Æpæ anguimpa, ante eñenämäi näni quëwengaï bai adobaï eñenämäi cæyönäni botö Waobo eñagaïmö inte adobaï edæ iñontobæ poncæboimpa. ⁴⁰ Mäniñedë waoda tömëmoncodë guëa cæyöna adocanque ingante ö ænäni goyongä adocanque wæætë a ongoncæcäimpa. ⁴¹ Ayä onquiyæna guëa apo cæyöna adocanque ingante ö ænäni goyongä adocanque wæætë a ongoncæcäimpa,” ante Itota odömonte apænecantapa.

⁴² Ayä, “Awënë æyedënö ponguingää, ante eñenämäi imini inte mïnitö mïmïni inte edæ cöwä aquënë quëwëñänii. ⁴³ Nê awëmö ængä æyedënö ponguingää, ante eñente bai nê ëacä iñömö, Bæ tate guidämaï incæcäimpa, ante wææ wänoncædongäimpa, ante eñente quëwëedäni. ⁴⁴ Wao Wëmo eñagaïmo inte botö adobaï mïnitö eñenämäi iñömïni do iñontobæ ponguïmo imo ante mïnitö botö ponguinö ante wänö cöedäni,” ante Itota angacäimpa.

*Awënë quincöo ante nê ædæmö aacä
(Odoca 12.41-48)*

⁴⁵ Ayä Itota iïmäi apænecantapa. “Inguipoga awënë iñömö, Æcänö nê eñengä inongä inte botö quincöo ante ædæmö aacä inguingää, äninque, Mänömaï inte cæcä ingante adinque botö ämo ate tömengä nê angä badinque botö oncönë quëwëñäni inänite ædæmö aadinque cænguï eyepæ iñonte godongä cæncædänimpa, angampa. ⁴⁶ Ante awënë wayömö gote ponte ayongä, Nê cæcä botö änö ante eñente cæcampa, ante adinque awënë wæætë tömengä ingante godö waa cæcä tömengä ingante godö waa cæcä ate nê waa cæcä iñömö edæ waa tocæcäimpa. ⁴⁷ Mïnitö iminïte näwangä ante apænebopa. Nê eñente cædingä ingante awënë, Bitö botö mäincoo tömancoo edæ nê aabi bacæbiimpa, ancæcäimpa.”

⁴⁸ “Wæætë edæ tömengä ingante nê cæcä incæ wënæ wënæ cæcä inongä inte mïmöno pönëwëninque, Botö awënë wabänö wantæpiyæ pönämäi imaingampa, ante pönengä iïnque æbänö babaï. ⁴⁹ Tömengä edæ wadäni näni cæcabo iñönänite näëmæ piïninque tæi tæi pangä iïnque ayä nê ti nämæ bete quidi quidi dowænte badäni tönö godongämæ cænte becä. ⁵⁰ Ininque tömengä, Æönædö ponguingää, ante wädämaï iñongante, Æyedënö ponguingää, ante eñenämäi iñongante edæ awënë iñontobæ pongä wæbaingampa. ⁵¹ Pöninque awënë iñömö eñenämäi cædingä ingante baö wido wido todinque tömengä ingantedö äninque, Nê wadö tedete wadö cædïnäni näni panguinö gote tömënäni tönö godongämæ ongonte wæcæcäimpa. Ante cædinque awënë tömënäni näni guingo imonte Ca ca wæyömö wido cæcä wæcæcäimpa,” ante Itota apænecäimpa.

25

Baquedäni näni cæinö ante odömongampa

¹ Mäninganca apænedinque Itota ayä godömenque odömonte apænecäimpa. “Mäniñedë öönædë Awënë Odeye nempo quëwëñäni iñömö baquedäni diete ganca näni cæi bai adobaï cæcædänimpa. Baquedäni iñömö, Edëningä ñöwoönæ monguingä, ante tica ënëincade æninque tömengä ingante bee tencæte ante tao godänipa. ² Baquedäni incæ tömënäni tinco ganca inäni nê eñenäni iñönäni edæ adoganca tinco ganca inäni

nē ēñēnāmaī ināni inānīpa. ³ Nē ēñēnāmaī ināni guiquēnē tōmēnāni tica ēñēincade æninque gongapæncade ænāmaī goyōnāni, ⁴ nē ēñēnāni guiquēnē gongapæncadedē godō pe ñīñænte gongapæ eyepæ ænte godānīpa. ⁵ Mānōmaī ænte gote ayōnāni nē monguingā wantæpiyæ pōnāmaī dæ angā adinque tōmēnāni tōmānāni edæ mōinente ædo ædo cædinque mō ñōnānīpa.”

⁶ “Mō ñōñōnāni ayaōnæñēña pōnī bayonte edæ, ‘Nē monguingā pongā ataqueedāni. Tao bee tenguēnē quēwēmīnīi.’ ⁷ Ante aa pedāni ēñēninque edæ baquedāni tōmānāni ængæ gantidinque, Tica ēñēincade waēmō tī wodōnote bacæimpa, ante wadæ wadæ cædānīpa. ⁸ Cæyōnāni nē ēñēnāmaī ināni guiquēnē nē ēñēnāni inānite, ‘Mōnitō tica ēñēincade edæ wodo mōnæ ãmōmpa cæmīnīi. Mīnitō næænīmæ incæ pancapāa pōnōmīni æncæmōnīmpa.’ ⁹ Åñōnāni, ‘Īñæmpa, mōnitō beyæ mīnitō beyæ adobaī wīi eyepæ imāimpa, ante awædō. Edæ godoncæte ante nē mānāni weca gote godonte æedāni.’ ¹⁰ Ånāni ēñente godonte æncæ goyōnāni edæ nē monguingā do pongā adinque nē ēñente eyepæ næænīnāni ĩñōmō monguingā tōnō godongāmæ monguīmæno oncōnē becæ guidāni ĩnīnque edæ odemō tee mōnete ĩntapa. ¹¹ Ayæ ate edæ wadāni gongapæ eyepæ ænte pōñōnāni do tee mōnete ĩ adinque tōmēnāni, ‘Awēnē, awēnē ēñēmi. Odemō wī ænebi guīimōnie.’ ¹² Ante wæyōnāni awēnē wæætē, ‘Mīnitō ĩmīnite nāwangā āmopa. Mīnitō æmīnidō ĩmīnīi, ante botō cōwē adāmaī ĩmopa,’ angampa.” Māninque ante odōmoncæte ante Itota ĩmaī angantapa.

¹³ “Mīnitō guiquēnē, Æōnædō ĩ, æyedēnō ĩ, ante ēñēnāmaī ĩmīni ĩnte edæ wānō conte quēwēedāni,” angacāimpa.

*Tadento nāni godonte æinta ante odōmongampa
(Odoca 19.11-27)*

¹⁴ Ayæ æbānō baquīi, ante odōmoncæte ante Itota, Waocā nē ēacā nānō cæī baī bacæimpa, ante apænegacāimpa. “Nē ēacā wayōmō gocæte ante cædinque tōmengā ingante nē cædāni inānite āñete māmōngā pōñōnānite, Botō ēadinta incæ pōnōmo æninque mīnitō nē aamīni badinque botō beyæ godonte æncæmīnīmpa. ¹⁵ Åninque nē ēacā ĩñōmō, Nē cædāni æbānō nanguī cædinque aaquīnānīi, ante adinque tadento ñænængade nāni godonte æinta incæ adocanque ingante ònompo æmæmpoque mānīmpota pædæ pōnōninque wacā ingante tadento mentaa mānīmpota pædæ pōnōninque wacā ingante tadento adotaque pædæ pōnongampa. Ayæ wadæ gocā. ¹⁶ ĩnīnque tadento ònompo æmæmpoque mānīmpota nē æningā ĩñōmō do godinque godonte æ godonte æ cædinque ònompo æmæmpota tōmengā nānō ænīmpota adopota æñōngā edæ tadento ònompo tipæmpoga bapa. ¹⁷ Ayæ tadento mentaa nē æningā adobaī godonte æ godonte æ cædinque mentaa nānō ænīnta adopota wæætē æñōngā edæ tadento mēa go mēa bapa. ¹⁸ Wæætē adotaque nē æningā guiquēnē tōmengā wadæ godinque onguīpodē ææ wodinque awēnē godonte æinta æninque tee moncate wē wodongampa,” angantapa.

¹⁹ Ayæ, “Wantæpiyæ ate tōmēnāni awēnē adodō pōninque, Botō quī eyepæ æncæboīmpa, ante cædinque tōmēnāni nāni ænte aadinta ante cōwā acantapa. ²⁰ Ònompo æmæmpoque tadento nē æningā ĩñōmō edæ æmæmpota adopota nānō godonte ænīnta ænte pōninque awēnē ingante, ‘Awēnē, bitō botō ĩmote, Aacæbiīmpa, ante tadento ònompo æmæmpoque mānīmpota pædæ pōnōmi æntabopa. Æninque botō godonte ænte godonte ænte edæ nanguī cædinque edæ mānīmpota adopota æmæmpota dobæ æmoī ae.’ ²¹ Angā wædinque tōmengā awēnē ĩñōmō, ‘Badogaa. Botō ĩmote nē cæbi ĩnōmi ĩnte bitō ædæmō aabi ĩnte ñōwo waa cæbi æmopa. Bitō wædænque æninque cōwē ædæmō aabi adinque botō ñōwo nanguī pōnī botō ēadīncoo pōnōmo æninque bitō wæætē edæ nē aabi bacæbiīmpa. Botō bitō awēnē ĩnōmo ĩnte watapæ tote quēwēmo ĩñōmote bitō edæ āñōmonque baī bitō watapæ tote quēwēngūnque pōe,’ angantapa.”

²² “Ayæ mēa tadento nē æningā adobaī pōninque, ‘Awēnē, bitō botō ĩmote, Aacæbiīmpa, ante tadento mentaa mānīmpota pædæ pōnōmi æninque botō godonte ænte godonte ænte edæ nanguī cædinque edæ mentaa mānīmpota adopota dobæ æmoī ae.’

²³ Angä wædinque tömengä awënë iñömö, 'Badogaa. Botö imote në cæbi inömi inte bitö ædæmö aabi inte ñöwo waa cæbi æmopa. Bitö wædænque æninque cöwë ædæmö aabi adinque botö ñöwo nangui pöni botö ëadincoo pönömo æninque bitö wæætë edæ në aabi bacæbiimpa. Botö bitö awënë inömo inte watapæ tote quëwëmo iñömote bitö edæ äänömonque bai bitö watapæ tote quëwenguinque pöe,' angantapa."

²⁴ "Ayæ ate edæ adotaque në æningä wæætë pöninque, 'Awënë, bitö në waadedämaï cædömi inte bitö wii gadiñömö wayömö incæ edæ do wogaabipa. Ayæ bitö wii miñömö wayömö incæ edæ do tä pete gæte bai æmipa, angantapa. ²⁵ Ìninque botö edæ ancai guiñente wædinque edæ tao godinque onguipodë ææ wote bitö tudento daga wëninque edæ wë wodontabopa. Bado, bitö qui incæ edæ do æmipa,' angantapa."

²⁶ "Angä ëñente wædinque tömengä awënë wæætë, 'Botö imote në cæbi inömi inte bitö wiwa pönëmi inte wæntæye cæbi abopa. Botö æbänö gadämaï iñömö do wogaabopa, ante bitö edæ do ëñemitapa. Botö minämaï iñömö do tä pete gæbopa, ante bitö äninö edæ do ëñëniimi inte cæbitapa töö. ²⁷ Ìninque mäninö ante do ëñëniimi inte bitö edæ padata botö godonte æinta æninque edæ në godonte ænäni weca godonte ænguënëmi imitapa töö. Mänömaï cæbi bai botö ocæ ëmænte pöninque edæ botö qui do æninque wadäni näni guidöninta tönö edæ do æncædömoimpa töö.' ²⁸ Äninque tömengä ingante në cædäni inänite awënë angantapa. 'Minitö ñöwo iingä tudento adotaque tömengä nänö nææninta ö æninque edæ tudento önompo tipæmpoga në næængä ingante pædæ godömiini æncæcäimpa. ²⁹ Edæ në ëadäni inänite tömänäni inänite godömenque godonte ingäimpa. Ìninque tömënäni qui nangui ëacædänimpa. Wæætë edæ ëadämaï inte ömæpocä ingä quiquënë tömengä nänö ëadincoo wædænque pöni i incæte edæ ö ænte dæ ba wæcæcäimpa. ³⁰ Ayæ edæ mäningä botö imote në cædingä incæ wæntæye inongä inte cædämaï iñongante minitö wëmö iñömö näni guingo imonte Ca ca wæwëñömö tömengä ingante edæ guitodonte wido cæmiini wæcæcäimpa,' ante tömengä awënë angampa."

Tömämæ quëwënäni inänite apænte angëimpa, ante

³¹ Itota mänömainö ante odömonte apænedinque godömenque apænegacäimpa. "Botö anquedoidi tönö godongämæ pöninque botö Waobo në ëñagaïmo inte ñäö apäite bai në ëmömo inte poncæboimpa. Mäniñedë botö pöñedë botö Awënë tæ containpaa tæ contadinque edæ öönædë waa pöni ongönäni bai waa pöni ongoncæboimpa. ³² Mäniñedë tömämæ quëwënäni botö weca godongämæ ponte a ongoncædänimpa. Ayæ në aacä tömengä cæninäni inänite apænte adinque bodegoidi æmænö cönöninque cabodaidi æmænö nänö cönönö bai cædinque botö iñömö edæ imæca quëwënäni tömänäni inänite apænte adinque pancadäniya inänite æmænö gönöninque wadäni inänite æmænö gönömo ongoncædänimpa. ³³ Obegaidi bai në ëñente cædäni inänite botö tömëmæ inö gönöninque wæætë cabodaidi bai në ëñënämaï cædäni inänite botö dipæmæ inö gönöncæboimpa."

³⁴ "Gönöninque botö Awënë Odeyebo inömo inte botö tömëmæ inö në ongönäni inänite ancæboimpa. 'Botö Mæmpo nänö në waademini inte pödäni. Tömengä inguipoga nänö badongaiñedë äninque, Awënë Odeye nempo miini quëwenguinö impa, ante do badongacäimpa. Ìninque Awënë Odeye nempo miini quëwenguënëno ñöwo ænte quëwëedäni. ³⁵ Edæ botö gue ænente wæyömo minitö cænguï në pönömiini cængaboimpa. Tepæ gæwænte wæbo adinque minitö në pönömiini begaboimpa. Botö Wabo imo inte cowodë bai pömo adinque minitö, Pö guï, ämiini ëñëninque minitö weca guite ëñagaboimpa. ³⁶ Ayæ ömaabo inte wæyömo minitö pönömiini wëñagaboimpa. Wënæ wënæ inte wæyömo minitö ponte në waadete cægaïmiini iminipa. Tee mönete oncönë ongonte wæwëñömote botö weca ëñacæ në pongaïmiini inömiini inte minitö ñöwo wæætë edæ botö nempo guite quëwencæminimpa,' ancæboimpa."

³⁷ "Ämo ëñëninque edæ në nö cædäni quiquënë, 'Awënë iñæmpa æyedëno bitö gue ænente wæyömi dicæ pönömöni cæmitawogaa, ancædänimpa. Ayæ tepæ gæwæñömi

dicæ pönömöni bebitawogaa. ³⁸ Æyedënö wacä incæ pömi adinque mönitö dicæ, Pö guii, antamöniyaa. Ayæ ömaabi adinque dicæ pönömöni wëñhabitawogaa. ³⁹ Ayæ wënæ wënæ inte wæyömi incæ tee mönete wæyömi incæ mönitö dicæ acæ pontamöniyaa.’ ⁴⁰ Ante wæyönäni botö Awënë Odeyebo inömo inte edæ tömënäni inänite, ‘Inæmpa botö töninädäni inönänite adocanque önonganque inongante minitö waa cægaïmini inte edæ botö imote do waa cæte iminipa ämo ëñeedäni,’ ante tömënäni inänite ancæboimpa,” angantapa.

⁴¹ “Ayæ botö dipæmæ inö nê ongönäni inänite botö nê Awënë inömo inte ancæboimpa. ‘Minitö nê tente wæquënëmini guiquënë ñöwo edæ gä gobæwedäni. Edæ Wængongui do badöinque, Wënæ tönö tömengä anquedoidi nänö nê ëmiñænäni tönö wantæpiyæ cöwë wænämaï nani bæcote wæquiñömö, ante nänö badongaïñömö minitö maninömö edæ gote guibæwedäni,’ ante edæ ancæboimpa. ⁴² ‘Edæ botö gue ænente wæbo adinque minitö edæ dicæ pönömini cæntabogaa. Gäwænte wæyömo minitö dicæ pönömini betabogaa. ⁴³ Ayæ Wabo imo inte cowodë bai pömo adinque minitö dicæ, Pö guii, äminitawogaa. Ömaabo inte wæyömo weocoo dicæ pönömini wëñatabogaa. Wënæ wënæ inte wæbo incæ tee mönete wæbo incæ minitö inömö edæ dicæ ëñacæ pöminitawogaa,’ ancæboimpa.”

⁴⁴ “Ämo ëñente wædinque nê ëñänämaï inäni inömö, ‘Awënë ëñëmi. Bitö æyedënö gue ænente tepæ gæwænte wæbitawo. Ayæ wabi bai inte æyedënö pömi atamöniyaa. Weocoo ömaabi inte wæbi adinque, daicawo gawæmi adinque, tee mönete wæbi adinque mönitö bitö beyæ dicæ cædämaï intamöniyaa.’ ⁴⁵ Äñönäni botö inömö edæ tömënäni inänite, ‘Inæmpa wacä ingante önonganque inongante minitö cædämaï ingaïmini inte botö imote edæ maninö do cædämaï ingaminipa. Ämo ëñëmaïminipa,’ ante püincæboimpa. ⁴⁶ Ininque tömënäni nani tente wæwenguinö incæ æmäwo wadæ gocädänimpa. Wæætë nê nö cædäni guiquënë cöwë wænämaï nani quëwenguinö æmäwo gocädänimpa,” ante Itota apænecäimpa.

26

Itota ingante bæi ongongæimpa, ante cædänipa
(Mäadoco 14.1-2; Odoca 22.1-2; Wäö 11.45-53)

¹ Ayæ maninö tömänö iinque apænete ate Itota tömengä miñæ nê godäni inänite apænecantapa.

² —Mëönaa go ate wodo pänta gogaïönæ bai Patowa mönö ææmæ cænguïönæ impa, ante do ëñëminipa. Maniönæ inönte botö Waobo ëñagaïmo inömöte botö imote bæi ongöninque edæ, Awæ ñænquedimæ cæte iingä ingante töö godöninque daagö timpote wææ tiwadinque edæ æænö gö cæte wænödäni, ante botö imote pædæ godönäni æncädänimpa, ante apænecäimpa.

³ Maniñedë, Wængongui qui, ante nê godongä ñænængä pönï Caiapato oncönë godongämæ pöninque wadäni nê godönäni ñænænäni tönö oodeoidi inänite nê aadäni nani Picæncabo inömö, ⁴ adoyömö pönëinque, Mönö æbänö babæ cæte Itota ingante awëmö bæi ongonte ænte wænungui, ⁵ ante pönënäni incæte,

—Inæmpa ææmæntedæ inönte wænömö bai tömänäni ænguï bate Yæ yæ ante püinte cæcædönänimpa, ante pönente wædinque mönö ædö cæte maninödë cæqui, ante wægadänimpa.

Itota ocaboga onquiyængä ogui wapæ gao cæcacampa
(Mäadoco 14.3-9; Wäö 12.1-8)

⁶ Itota maninödë Betänia godinque nê baadingä Timönö oncönë guii ëñadinque cæncongantapa. ⁷ Cæncöñongä wacä onquiyængä inömö tömengä weca pö guidinque ogui wapæ nani nangui godonte ænimæ dica adabatodo waincadedë pe ñiñænte nänö manimæ incæ ñöwo ænte mämö Itota ocaboga edæ gao cæcacantapa. ⁸ Mänömaï cæcä adinque Itota miñæ nani gocabo inömö püinque,

—İñæmpa önonque gao guënente bai cæcampa töö, änänitapa. ⁹ Edæ iimæ iñömö nangui pöni æninta beyæ godonte ænguënemæ imæmpa. Godonte ænte bai ömæpodäni inänite wæætë godonguënë apa.

¹⁰ Ante piinäni wædinque Itota iñömö,

—Quimæ piwëminii. İngä onquiyængä iñömö botö imote waa pöni cæcä apa quëwëminii. ¹¹ İñæmpa ömæpodäni ante mini äninäni minitö weca cöwë quëwëñönäni botö wæætë minitö weca wii wantæpiyæ quëwencæboimpa. ¹² Mänimæ ogui wapæ botonga gadongadınque tömengä botö baö daga wenguinque eyepæ iñonte edæ öni paacantapa. ¹³ Minitö iminite näwangä ante apænebopa. Waa pöni botö apænedö apænedınque tömämæ æyömömë apænedäni ëñänäni mäningä onquiyængä nänö cædinö ante adobaï tededäni ëñente pönencædänimpa, ante Itota apænegacäimpa.

Itota ingante Codaa odömonte godoncæte ante cæcampa
(Mäadoco 14.10-11; Odoca 22.3-6)

¹⁴ Ayæ mäniñedë näni, Dote, äincabo iñönäni adocanque Codaa Icadiote näni äongä iñömö, Wængongui qui, ante në godönäni ñænänäni weca gocantapa. ¹⁵ Godınque apænecantapa.

—Botö, Itota æyömönö ongongää, ante pönö odömömo ate minitö bæi ongonte æmini inınque æpotadö, Eyepæ i, ante pönömini æmaimoo.

Angä ëñenınque tömënäni padata tıguitamö incæ todëinta ganca tee mampote tömengä ingante pædæ godönäni. ¹⁶ Æningä inte tömengä cöwë cöwä adınque, Æbänö cæte Itota ingante odömonte pædæ godömo ate ænguınäni, ante pönente cægacäimpa.

Päö tönö owæta Itota pædæ pönongä cænte bedänipa
(Mäadoco 14.12-25; Odoca 22.7-23; Wäö 13.21-30; 1 Coodintoidi 11.23-26)

¹⁷ Mäniñedë oodeoidi päö yedæ æmpoqui ömæmö i näni ææmæ cæte cænguionæ tæcæ ba adınque Itota miñæ në godäni iñömö, Wodo pænta gogaionæ bai Patowa mönö ææmæ cænguionæ impa, ante pönente wædinque tömengä weca ponte änänitapa.

—Æyömönö bitö beyæ Patowa ææmæ ante cæmöni ate cænguimii.

¹⁸ Äñönäni tömengä nänö ëmiñænäna mënaa inate äınıque,

—Mınatö waodäni näni quëwëñömö godınque onguiñængä botö në äningä ingante bee tëınıque mınatö iımainö ante apænemına ëñengäeda. “Mönö Awënë iımaï angampa. Botö wænguionæ oo pöni bapa cæbii. Botö në ëmiñänäni tönö botö bitö oncönë Patowa ææmæ ponte cæncæmönimpa, angampa,” ante ämına ëñengäeda, angä.

¹⁹ Eñente wædinque tömëna Itota nänö änö bai cædinque, Patowa ææmæ cænguı impa, ante cædatapa.

²⁰ Gäwadecæ bayö Itota tönö, Dote, näni äincabo ponte godongämæ cæncæte ante ongönänitapa. ²¹ Cæncöñönäni Itota,

—Näwangä ante apænebo ëñeedäni. Mıni cabo incæ adocanque, Æncædänimpa, ante botö imote odömonte pædæ godonguingä ingampa.

²² Ante apænecä ëñenınque tömënäni wæwente bayönäni adocanque adocanque,

—Awënë, botö imotedö ante dicæ apænebitawogaa.

²³ Ante tedeyönäni Itota wæætë,

—Botö tönö guëa adotaca në mıi cædingä iñömö tömengä botö imote në odömonte pædæ godonguingä ingampa. ²⁴ Edæ dodäni Wængongui beyæ näni yewæmongainö bai cædinque botö Waobo ëñagaimo inte cöwë wænte goquënëmo imodö anguënë. İınıque edæ botö imo në odömonte godonguingä iñömö tömengä nänö wæquinque ingäimpa. Mäningä wii ëñate bai waa toquënengä incædongäimpa.

²⁵ Ante apænecä wædinque Codaa iñömö Itota ingante në odömonte godonguingä iñömö edæ,

—Awënë në Odömömi ëñëmi, botö imotedö ante ämitawogaa.

Ante äñongante edæ Itota,

—Tömëmi nämä incæ, Botö imotedö, ante do tedebi imipa.

²⁶ Ante apäñecantapa. Ayä cæncõñõnani Itota päö bæi ongonte äñinque Wængongui ingante waa ate apäñedinque päö pä äñinque tömengä miñä nê godäni inänite pædæ godö pædæ godö cæcantapa.

—Botö baö bai impa, ante pædæ pönömo äñinque minitö Ao ante cæedäni.

²⁷ Äñinque ayä bequimä owætaca bæi ongonte äñinque Wængongui ingante waa ate pönente apäñedinque pædæ godöñinque,

—Botö wepæ bai impa, ante pædæ pönömo äñinque tömämïni Ao äñinque godongämä intaca beedäni, angantapa. ²⁸ Botö wepæ iimä bai impa. Wængongui do apäñedinque, Botö pönö cæbo ate minitö Ao ämïni ininque mönö godongämä waa cæte quëwengäimpa, angacäimpa. Nöwo adobai miñe äñinque apäñebopa. Botö wepæ ante Ao ante ämïni inte mönö godongämä waa cæte quëwengäimpa. Edæ nangui imïni mïni wënæ wënæ cædinö beyä ante ñä mënongaquimä impa. ²⁹ Näwangä ämopa. Botö Mæmpo Awënë Odeye iñongä botö tömengä nempo quëwëñinque minitö tönö godongämä miimä botö beganca mänimä yowepæ nöwo ämæwo bebo tamëñedäni, ante Itota apäñegacäimpa.

*Dicæ abogaa, ante Pegodo angingä, ante apäñecampa
(Mäadoco 14.26-31; Odoca 22.31-34; Wäö 13.36-38)*

³⁰ Ayä Wængongui ingante ämotamïni ante tao godinque Odibowænquidi godänitapa. ³¹ Goyönänite Itota apäñecantapa.

—Wængongui beyä yewämöñinque, “Nê aadingä ingante tacabo dæ wængä ininque edæ cæningäidi obegaidi panguimä goquimpa,” ante nani yewämönte angainö bai cædinque minitö tömämïni nöwoönæ woyowotæ incæ botö dæ ämo beyä guingo imonte badinque edæ panguimä goquimïni imïnipa. ³² Panguimä gomïni incæte botö edæ ñäni ömämönte ate Gadideabæ täno gote a ongõñömo minitö ayä pöedäni.

³³ Angä wædinque Pegodo guiquënë,

—Iñæmpa dæ ämi beyä tömänäni guingo imonte badinque panguimä godäni incæte edæ botö guiquënë cöwë panguimä godämaï incæboimpa.

³⁴ Äñongante Itota wæætë,

—Bitö imite näwangä ante apäñebo ëñëe. Nöwoönæ woyowotæ incæ tawadiya pedämaï iñonte bitö botö imotedö ante wadö ante apäñedinque, Dicæ abogaa, ante edæ mempoga go adopoque anguimi imïpa.

³⁵ Angä ëñente wædinque,

—Iñæmpa bitö tönö guëa wæmo incæte botö cöwë, Dicæ abogaa, ante edæ änämaï incæboimpa.

Äñongä tömengä miñä nê godäni tömänäni adodö ante angadänimpa.

*Guetëmänii iñömö Itota Wængongui ingante apäñecampa
(Mäadoco 14.32-42; Odoca 22.39-46)*

³⁶ Mänii godinque Itota yabæ incæ Guetëmänii nani äñömö tömengä miñä nê godäni tönö gocantapa. Mäniñömö pöninque tömengä tömënäni inänite,

—Tæ contate ongõñömini botö godömenque godinque Wængongui ingante apäñete pömoedäni.

³⁷ Äñinque Pegodo tönö Tebedeo wëna inate ænte mäocä goyönäni Itota iñömö nangui wæwente badinque ancai guiñëñinque, ³⁸ tömënäni inänite,

—Botö wænguimämo pönö anguënë, ante botö önöwoca incæ pämænte wæte wængui wæ, ante wæbo tamëñedäni. Minitö guiquënë ëamonca godongämä wææ aacöedäni.

³⁹ Äñinque Itota wædænque godömenque godinque guidömëmä ñongænte Wængongui ingante apäñecantapa. “Botö Mæmpo, bitö Ao äñinque edæ ti nä wænguimä bai ö ænte bai cædinque botö imote edæ, Wænämaï incæbiimpa, ämi ininque botö edæ waa tobaïmopa. Incæte botö änönö bai wii cædinque wæætë tömëmi änönö bai cæe,” ämopa.

⁴⁰ Ante apäñecä ate tömengä miñä ne godäni weca adodö ponte ayongä tömännäni mö ñönäni adinque tömengä Pegodo ingante,

—Botö tönö wänö conguenemini incæ minitö adoque ooda incæ wii aacöminii.

⁴¹ Mímöno waa cäinämönipa, ante ewocayömini baö aquíñö eñamini inte wäntäye bamünipa. İnıneque edæ wänö cöınneque nämä beyenque ante Wængonguı ingante apäñedinque edæ, Wıi wänæ wänæ cäinämöni bacämönimpa, ante apäñeedäni.

⁴² Änıneque Itota adodö wadæ gote wæätë apäñedinque, “Botö Mæmpo, botö bedämaı iñömote bitö ö äñämaı imi inıneque botö cöwë bitö ämaı becæboimpa.”

⁴³ Ante Wængonguı ingante apäñete ate ponte ayongante möwo möınente ämö cæte wædinque mö ñönäni. ⁴⁴ Adinque edæ tömengä wæätë adodö godınneque ñöwo mempoga go adopoque nänö apäñedinö ante adodö ante Wængonguı ingante inıneque apäñecantapa. ⁴⁵ Ayä tömengä miñä ne godäni weca wæätë adodö pönınneque,

—İñæmpa cöwë mömini edæ cöwë guëmämıni awädö. Aquënë quëwëedäni. Botö Waobo eñagaimo inte botö wæwenguıönæ do bayonte edæ botö imote ne wänæ wänæ cädäni inänite ne godö odömonguingä iñömö do godongäi ataquëedäni. ⁴⁶ Ængæ gantite mönö gocäimpa. Botö imo ne odömonte godonguingä obo pönı pongä tamëñedäni, angacäimpa.

Itota ingante bæi ongonte äñänıpa

(Mäadoco 14.43-50; Odoca 22.47-53; Wäö 18.2-11)

⁴⁷ Ayä apäñeyongä edæ Codaa wodi tömännäni näni, Dote, ante gocabo adocabo inıngä incæ ñöwo pongantapa. Wængonguı quı, ante ne godönäni ñænänäni tönö oodeoidi inänite ne aadäni näni Picæncabo tönö da pönönäni pönınneque wadäni tæiyänäni adobaı yaëmë næänınneque canta næänäni inte Codaa miñä pönänıtapa. ⁴⁸ Doyedë iñömö ne odömonte godoncæ cæcä Codaa iñömö tömengä miñä poncæ cädäni inänite iımaı ante wëñëñedë apäñedingä inongäimpa. “Botö odömonte quëë bemömo adinque minitö wæätë, Tömengä ingampa, ante adinque tömengä ingante edæ bæi ongonte ö äedäni.”

⁴⁹ Ante do äningä inte Codaa ñöwo iñömö Itota weca pönınneque,

—Awënë ne Odömömi imi, bitö imi.

Änıneque edæ waa cæte baı quëë bemongantapa. ⁵⁰ Adinque Itota wæätë,

—Botö miñä ne godımi eñëmi. Mänınö ante bitö ponque pö cæbäwe.

Äñongä wadäni tömengä weca pönınneque pædæ gopo bæi ongonte Itota ingante äñänıtapa.

⁵¹ Wængonguı quı, ante ne godongä ñænængä pönı ingante ne cæcä mänıñömö ponte a ongongä adinque Itota tönö pönıngä adocanque pædæ guiipote yaëmë o togænte äınneque mäningä ne cæcä ingante tæi pänınneque önömonca wangö tamoncacantapa.

⁵² Adinque Itota iñömö tömengä ingante,

—Yaëmë adodö mını tie, ämopa. Edæ yaëmë ne o togænte næänäni tömänäni inänite yaëmenca adobaı tacädäni wæncädänimpa. ⁵³ İñæmpa æbänö ante pönëmi edæ. Wængonguı anquedoidi adocabodänıneque tei müido ganca iñönänite botö Mæmpo ingante apäñebo baı tömengä do angä inıneque anquedoidi näni cabo näni cabo incæ önompo tipæmpoga go mencabodäniya botö beyæ ponte cæbäınänıpa, ante pönëmiyaa.

⁵⁴ Incæte botö Codito inömo inte botö Mæmpo ingante mänömaı apäñebo eñente cæcä baı dodäni, Codito iımaı wæncæcäimpa, ante Wængonguı angä eñente näni yewæmongäinö ante ædö cæte inıneque bacädönimpa, ante awädö, ante apäñegacäimpa.

⁵⁵ Ayä wæätë ñöwo pönäni inänite Itota apäñecantapa.

—Minitö iñæmpa, Bitö ne ö äñımi imıpa, ante baı cædinque botö imote canta tönö yaëmë nææante ö æncæte ante pömini awädö. Botö Wængonguı oncö yabæcönë iımö iñö iımö iñö apäñecönömo minitö botö imote yao ongönämaı ee amınitapa töö. ⁵⁶ Incæte minitö Wængonguı beyä ne apäñedäni näni yewæmongäinö baı ñöwo inıneque baquinque cæmini abopa.

Ante apäñecä eñëınneque tömengä emiñængä ne godınäni tömänäni edæ näwæ panguımæ cæte wodii wıngadänimpa.

Në Apænte nāni Ānoncabo weca Itota ongongampa
(Mäadoco 14.53-65; Odoca 22.54-55, 63-71; Wäö 18.12-14, 19-24)

⁵⁷ Ayä Itota ingante në yao ongonte ännāni guiquënë, tömengä ingante mäo godinque edæ, Wængonguī qui, ante në godongä ñænængä pōni inongä Caiapato weca ænte godānitapa. Māniñömö do pōninque në wææ ante odömönāni tönö oodeoidi inānite në aadāni nāni Picæncabo tönö do a ongönānimpa. Māniñömö Itota ingante ænte māmönāni pongacäimpa. ⁵⁸ Pegodo guiquënë tömengä miñä ayä ayä godinque, Wængonguī qui, ante në godongä ñænængä pōni inongä oncö yacömoyä iñömö pö guidinque, Itota ingante æbänö cæquināni, ante wææ wänönāni weca pōninque tæ contate waa acongantapa.

⁵⁹ Wængonguī qui, ante në godönāni ñænänāni tönö në Apænte nāni Ānoncabo tömänāni, Mönö apænte ante wænömö wæncæcäimpa, ante cædinque, Itota nänö wænguinque wænæ wænæ cæcä ingampa, ante æcänö babæ ante anguingää, ante diqui diqui minönānimpa. ⁶⁰ Incæte nanguī ināni ponte babæ apænedāni incæte, Æcänö eyepæ babæ ānaa, ante edæ dæ angä wædānitapa. Ayä ate mënaa në babæ wapiticä änöna inte awënëidi weca pö guiite, ⁶¹ apænedinque,

—İingä, “Wængonguī tæiyä waëmö oncö ongö incæte botö iñömö tæi piñämo inömo inte godö cæbo bai wo tænguimæ wææmāimpa. Ayä mëönaa go adoönæque iñonte botö wæætë do mænömaimopa,” angä ëñentamönapa töö. ⁶² Ante apænedāni ëñëninque në godongä ñænængä pōni inongä incæ ængä gantidinque Itota ingante,

—İñæmpa pæ wëenebii. Tömëna bitö imitedö ante godö äninque nāna äninö ante bitö æbänö ämii.

⁶³ Äñongä Itota cöwë änāmaī edæ pæ wëenecä. Adinque në godongä ñænængä pōni inongä wæætë,

—Wængonguī në Quëwengä inte tömengä nänö ëñëñongä edæ näwangä ante apænebi ëñëmönii, ämopa. Mönö Codito iñömö Wængonguī Wengä inongä ingampa. Bitö iñæmpa mänimidö inömi imitawo.

⁶⁴ Mänömaī angä ëñëninque Itota wæætë,

—Tömëmi bitö äninö bai mänimodö inömo imopa. Incæte botö godömenque apænebo ëñëedāni. İncayä ate botö iñömö edæ Waobo ëñagaimo inte edæ Wængonguī në Tæi Piñængä ingä tömëmængä inö tæ contabo adinque minitö ayä ate botö öönæde boguimancodë pömo acæminimpa.

⁶⁵ Ante apæneccä ëñente wædinque në godongä ñænængä pōni inongä piinte badinque, Æñente awædö, ante bai cædinque edæ nāmā weocoo wänä ñænte,

—Wængonguī ingampa mänömaī cæquiringää. Edæ tömengä nāmā incæ babæ ante në wænæ wænæ apæneccä ininque idæwaa. Wacä tömengä ingantedö, Wænæ wænæ cæcä atabopa, ante në ancæcäimpa, ante ñöwo diqui diqui mināmaī ingæimpa. Tömengä nāmā Wængonguī Wengä inte bai babæ ante nänö änewëninö ante do ëñëmīni inte minitö, ⁶⁶ edæ æbänö ante pönëmīni.

Ante äñongä në apænte änāni guiquënë,

—Nänö wænguinque änewengampa töö.

⁶⁷ Ante apænte äninque edæ pancadāniya Itota tömengä awinca towæ tänömöninque tæi tæi pänānitapa. Wadāni guiquënë tömengä ingante tamöninque,

⁶⁸ tömengä ingante,

—Bitö Codito imitawo. Æcänö bitö imite awëmö në pānaa, ante Wængonguī beyænque apænedinque apænebi ëñëmönii, ante badete togadānimpa.

Pegodo incæ, Dicæ abogaa, angampa
(Mäadoco 14.66-72; Odoca 22.56-62; Wäö 18.15-18, 25-27)

⁶⁹ Ayä Pegodo guiquënë māniī yæipodë yacömöñāa contate ongöñongä onquiyængä në cæcä iñömö tömengä weca ponte apænedinque,

—Māningä Gadideabæ quëwëningä Itota tönö bitö guëa cægömitapa töö.

⁷⁰ Ante apæneyongä tömänāni nāni ayömö Pegodo,

—Dicæ. Bitö änö ante æbänö ämii, ante dicæ ëñëmogaa.

⁷¹ Ante äninque Pegodo yademö gäänë tao gote ongongä adinque wacä onquiyængä wæætë godongämæ ongönäni inänite apænedinque,

—Mäningä adobaï Itota Näatadeta quëwënongå tönö në cægöningä ingä aedäni.

⁷² Ante apæneyongä Pegodo wæætë,

—Wængongui ëñëñongä botö näwangä ämo ëñëedäni. Ìingä onquiyængä nänö në äningä ingante botö dicæ abogaa, angantapa.

⁷³ Ayæ wantæ ate mäniñömö ongönäni Pegodo weca pöninge,

—Ïñæmpa Itota tömengä tedecä baï adode në tedebe inte bitö tömengä miñæ mïni në gocabo adobi ïmipa töö.

⁷⁴ Äñönäni edæ Pegodo wæætë, Wængongui ëñëñongä apænedinque botö nöingä ämopa, ante Wængongui ëmowo ante babæ tedewëninque tömënäni inänite,

—Mïni në angä ingante dicæ abogaa.

Mänömaï ante tæcæ änewëñongä edæ tawadiya dobæ petapa. ⁷⁵ Pe wædinque tömengä, Æ Itota nänö äninö baï impa, ante wæcantapa. Itota, “Tawadiya pedämaï iñonte bitö botö imotedö ante wadö ante apænedinque, Dicæ abogaa, ante edæ mempoga go adopoque anguimi ïmipa,” angantapa. Ante Pegodo, Ñöwo nänö pequinque do pecampa, ante wædinque oncodo taote edæ guingo imonte wædinque edæ Ca ca wægacäimpa.

27

Itota ingante Pidato weca ænte mäo gönönäni

(Mäadoco 15.1; Odoca 23.1-2; Wäö 18.28-32)

¹ Ayæ ñäö bayonte, Wængongui qui, ante në godönäni ñænänäni tönö ood-eoidi inänite në aadäni näni Picæncabo tönö apænte äninque edæ, Itota ingante wænongæimpa, ante godongämæ Ao angadänimpa. ² Äninque tömengä ingante yao ongonte goti winte äninque edæ odömänoidi beyæ Oodeabæ awënë gobedönadodo Pidato ingante mäo gönönäni ængacäimpa.

Codaa wodi iïmaï cædinque wængampa

³ Ayæ, Itota ingante wænongæimpa, änäni ëñente wædinque Codaa tömengä ingante në godöningä guiquënë, Æ tömengä nänö wænguinquemë cæboinö ante pönëmogaa, ante guingo imonte wæcantapa. Ayæ, Wængongui qui, ante në godönäni ñænänäni tönö në aadäni näni Picæncabo adodö æncædänimpa, ante todëinta padatamö tömënäni näni pönontamö adodö pædæ godoncæte ante gocantapa.

⁴ Ayæ tömënäni inänite,

—Ïñæmpa cæboo. Edæ Itota wënæ wënæ cædämaï ïningä iñongante botö në godönimo inte wiwa cæbo imo ante awædö.

Ante äñongante tömënäni guiquënë,

—Tömëmi wënæ wënæ cædimi inte wentamö bitö entawënö adinque mönitö ædö cæte wæquimöni. Tömëmi edæ në cædimi inte edæ abaimipa töö.

⁵ Änäni wædinque edæ tigitamö incæ Wængongui tæiyæ wæmö oncönë wo wææntodöninge Codaa oncodo tao godinque edæ nämä önömenca wëä æi goti guemencate dobæ wægacäimpa.

⁶ Mäninta wo wææntodongä ate wædinque, Wængongui qui, ante në godönäni ñænänäni incæ tigitamö yao yao ongonte äninque,

—Wepæ näadintamö adinque Wængongui Baa ancæcäimpa, ante pönente wædinque mönö, Wængongui qui, ante ædö cæte godonguimöö.

⁷ Ante godongämæ pönencöninge tömënäni, Oodeoidi inämaï inäni wodido bacæimpa, ante ömæ në dai bædongä ëadiömæ incæ mäniï tigitamö godonte ængadänimpa. ⁸ Ìininque wepæ näadintamö godonte näni ænimæ ante, Wepænguipo impa, ante näni pemönimæ iñömö ñöwo ganca impa. ⁹ Ìininque do iñömö Eedëmiya wodi Wængongui beyæ iïmaï ante nänö apænëgainö baï iinque batimpa. “Idægoidi, Tömengä

beyæ mänimopotamö godonte ængæimpa, ante nani änimpotamö incæ todëinta tiguittamö padatamö äninque, ¹⁰ tömënäni Wængonguï botö imote nänö äninö bai ëñente cædinque edæ dai bædongä ëadiömæ godonte äñänitapa,” ante Eedëmiya nänö angainö bai do iinque batimpa.

Pidato weca Itota ongongampa

(*Mäadoco 15.2-5; Odoca 23.3-5; Wäö 18.33-38*)

¹¹ Itota iñömö awënë gobedönadodo Pidato weca a ongöñongante awënë gobedönadodo iñömö tömengä ingante,

—Bitö oodeoidi Awënë Odeyebi imitawo.

Äñongante,

—Bitö tömëmi änö bai botö mänimodö imopa, Itota angantapa.

¹² Ayæ, Wængonguï qui, ante nê godönäni ñænänäni tönö nê aadäni nani Picæncabo guiquënë Itota ingante äninque, Wënæ wënæ cæbipa töö, ante äñönäni tömengä edæ pæ wëëncä. ¹³ Ate wædinque Pidato wæætë,

—Bitö æpogadö wënæ wënæ cæbi imipa, ante nanguï äñäni ëñënämaï inte bitö ædö cæte edæ pæ wëënebii.

¹⁴ Äñongante Itota iñömö tömënäni nani äninö ante adodeque ante apænedämaï ingä adinque awënë gobedönadodo wæætë, Quiëmë bai pæ wëëncä awädö, ante wægacäimpa.

Itota wæncæcäimpa, äñänipa

(*Mäadoco 15.6-20; Odoca 23.13-25; Wäö 18.38-19.16*)

¹⁵ Mänimæ awënë gobedönadodo mäninödë wadepo iñö wadepo iñö cöwë iimaï cædongäimpa. Oodeoidi ææmæ nani cæyedë gobedönadodo iñömö, Nê tee mönete ongönäni inänite adinque minitö æcänö ingante ämïni ñimpo cæbo goquingää, ante äñongä äñäni ëñëninque tömengä tömënäni nani äningä adocanque ingante ñimpo cæcä godongäimpa. ¹⁶ Mäninödë adocanque wënæ wënæ nänö cædinö beyæ tee mönete a ongongampa, ante tömänäni do ëñëñönänimpa. Mäningä ëmowo Badabato inongäimpa.

¹⁷ Ininque nanguï inäni godongämæ pönäni ate Pidato tömënäni inänite edæ,

—Æcänö ingante minitö beyæ ñimpo cæbo abæ tawænte gocä ænguimïni. Badabato ingante ñimpo cæbo gocä ænguimïni. Wæætë edæ Itota Codito mïni äñongä ingante ñimpo cæbo gocä ænguimïni, angacäimpa.

¹⁸ Edæ do iñömö, Itota gomonga cæcä ate wædinque tömënäni tömengä ingante piunte adönänimpa. Mäninö beyænque tömënäni Itota ingante bæi ongonte botö nempo ænte mämö pædæ pönönänitapa, ante Pidato do ëñengantapa.

¹⁹ Ayæ odömänoidi nani apænte anguimpaa ayæ ongöñongä Pidato nänöögängä iñömö wacä ingante da pönongä pöninque Pidato ingante nänöögängä beyæ apæñecantapa. “Botö ñowoönæ möwocodë wiimöninque mäningä nê nö cædongä beyæ nanguï wogæi wogæi cæwënente wæbopa cæbii. Bitö tömengä ingante gampodämaï inte gomö aquënë quëwëë, ämopa,” ante bitö nänöögängä angampa, angantapa.

²⁰ Angä ëñente wæyongä, Wængonguï qui, ante nê godönäni ñænänäni tönö nê aadäni nani Picæncabo nani äincabo guiquënë wadäni nê godongämæ ongönäni inänite äñänitapa. Minitö Pidato ingante iimaï æedäni. Badabato ingante ñimpo cæbi gocæ. Itota ingante wæætë ämi wænönäni wængæe, ante æedäni, äñänitapa. Awëneidi incæ mänömaï äñäni ëñëninque godongämæ ongönäni Ao äñänitapa. ²¹ Awënë Pidato iñömö tömënäni inänite äninque,

—Mënaa ongöna iñönate minitö æcänö ingante ämïni ñimpo cæbo goquingää.

Äñongante,

—Badabato ingante ämönipa.

²² Äñäni wædinque Pidato wæætë,

—Ininque Itota Codito mïni äñongä ingante æbänö cæquimoo, ante ämïni.

Äñongante tömänäni edæ,

—Awæ ñænquedimæ ämi cæte gönonte wænönäni wængæe töö.

²³ Änäni ëñëninque Pidato ayæ,

—Ïñæmpa quïnö wënæ wënæ cæcantawo.

Äñongä tömënäni godömenque yedæ äninque adodö,

—Ämi awäa timpote wænönäni wængæe.

²⁴ Ante ancaa änewëñönäni Pidato iñömö, Tæcæ wæætedö wæætë änäni inte tömënäni wënæ wënæ cædäni wæqui wæ, ante guiñente wædinque ayæ, Ædö cæte botö godömenque cæquimoo, ante pönente wædinque edæ æpæ pi ñiñænte tömënäni ayönäni önonpome mempodinque tömënäni inänite angantapa.

—Tömengä wënæ wënæ cædämaï iñongante botö, Wænongæimpa, änämaï imo inte tömengä wepæ näadämaï imo aedäni. Wæætë mïnitö guiquënë, Wæncæcäimpa, ante në änimïni inte edæ näate bacæminimpa, ante adinque botö mempobo aedäni.

²⁵ Angä ëñëninque tömänäni Ao äninque edæ,

—Möni äninö beyænque mönitö incæ mönitö wënäni incæ tömengä wepæ beyæ näate bai bacæmönimpa töö.

²⁶ Änäni ate awënë gobedönadodo Pidato tömënäni näni äninö ante ëñente cædinque edæ Badabato ingante ñimpo cædinque tömënäni nempo pædæ godongä äñänitapa. Wæætë edæ Itota ingante edæ Pidato angä æmontai badöimenca tæi tæi pänäni ate tömengä ingante ñænque quepote awäa näni gönonguinque edæ da godongä ænte godänitapa.

²⁷ Awënë gobedönadodo nänö wææ wänönäni guiquënë Itota ingante ænte godinque awënë gobedönadodo oncönë Podætodio näni ancönë mangui guiyongä tontadoidi bacabo Itota weca godongämæ äñete pönänitapa. ²⁸ Pöninque tömënäni, Awënë imi inte awënë weocoo wëñacæbiimpa, ante bai cædinque badete todinque Itota weocoo gä tadongadinque wæætë opatawæ ëmoncoo pönö da wëñadinque, ²⁹ daa mongæmenca bai äninque que cædinque, Awënë poganta wencacæbiimpa, ante bai cædinque pönö daga wencadänitapa. Ayæ cæwipa ænte mämö pædæ pönonte änäni äninque tömengä tömëmæmpoca pæ mangä adinque tömënäni da guicapodinque tömengä ingante,

—Badogaa, bitö oodeo awënë odayebi imipææ, ante badete togadänimpa.

³⁰ Ayæ tömengäa towæ towæ tänongadinque cæwipa äninque tæi tæi ancaa pancadänitapa. ³¹ Ayæ iinque badete todinque tömënäni opatawæ ëmoncoo gä tadongadinque tömengä nämä weocoo daga wëñadänitapa. Ayæ edæ tömengä ingante awæ timpote wænoncæte ante töö æmænte ænte tao mäodäni gogacäimpa.

Itota ingante awäa timpodäni wængampa

(Mäadoco 15.21-32; Odoca 23.26-43; Wäö 19.17-27)

³² Ænte mäo godinque tömënäni Tidëne quëwengä Timönö ingante bee tëninque tömengä ingante edæ, Bitö ægodöe, Itota ingante möni timpoquiwæ ænte mongænte goe, änäni mongænte gocantapa.

³³ Mänii Itota ingante ænte mäo godinque Godogota näni äñömö mönö tededö “Ocatainö” iñömö mäniñömö pönänitapa. ³⁴ Mäniñömö pönäni ate wadäni, Nantate beyæ becæcäimpa, ante cædinque yowepæ biinömæ näni ämæ tönö moncapæ adoyömö wempo cædëninque pædæ pönö cæyönäni tömengä önonque yædæ bedinque edæ Baa angantapa.

³⁵ Ayæ Itota ingante awæ ñænquedimæ näni ænte pöniwäa töö godöninque pönö timpodinque wææ tiwadinque ængæ gantidëñänitapa. Ængæ gantidëñäni ate wægöñongä tömënäni wæætë tömengä weocoo ini ante, Æcänö quince nö ta adinque tömengä mänincoo æncæcäimpa, ante wææntodöninque adocooque adocooque äñänitapa. Mänömaï cæyönäni Wængongui beyæ näni apænegaïnö bai iinque cætimpa. “Botö weocoo ini ö äninque tömënäni näni caboque wacä ingä wacä ingä nënempodänitapa. Ayæ, Æcänö quince nö ta adinque tömengä mänincoo æncæcäimpa, ante cædänitapa.” ³⁶ Tömënäni tæe contadinque tömengä ingante wææ aadänitapa. ³⁷ Ayæ, Itota në wængüenengä ingampa, ante quïnante äñanii, ante edonque acäimpa, ante cædinque tömënäni,

“İngä Itota İñömö oodeoidi Awënë Odeye İnongä İngampa,” ante yewämöningue edæ awæmpaa tömengä ocaboca İnö tee tinte wo cædänitapa.

³⁸ Ayæ wada nê ö ænte quëwënina İnate adoyedë tömengä tönö adocanque tömëmæ İnö adocanque dipæmæ İnö godö timpote ængæ gantidëdäni wægongadaimpa. ³⁹ Ayæ wodo pænta nê godäni guiquënë Itota İngante godö wënæ wënæ ante badete todinque pica pica cædinque, ⁴⁰ tömengä İngante wapiticæ apænedinque,

—Bitö İñæmpa Wængonguı tæiyæ waëmö oncö incæ bæ tate wo ëwëningue edæ mëönaa go adoönæque İñonte do mænönca ämitawo. Mänömaı cæcæ änimi inte bitö tömëmi edæ nãmä incæ cæte quëwëmawe. Bitö nö Wængonguı Wëmi İmi İninqe edæ o togæmpote o togæwate wææe, ämönipa töö.

⁴¹ Äñönäni edæ, Wængonguı quı, ante nê godönäni ñænänäni guiquënë nê odömönäni tönö ayæ oodeoidi İnänite nê aadäni näni Picæncabo tönö adobaı İımaı ante edæ badete todänitapa.

⁴² —Tömengä, Wadäni quëwencædänimpa, ante waa cæcantawoo. Nöwo İñæmpa ædö cæte nãmä waa cæte quëwenguingä. Idægoidi awënë odeye İngampa diyæ ti wæænte goquingä. Edæ ti wæænte gocä adinque mönitö wæætë edæ, Nawangä İmpa, ante pönëmaı wædö. ⁴³ Ayæ nãmä İngantedö äninque tömengä edæ, Botö Wængonguı Wëmo İnömo İmopa, ante angämææ. Tömengä, Wængonguı cöwë pönö cæcæcäimpa, ante wede pönengä İñongante Wængonguı wæætë tömengä İngante edæ waa acampa diyæ ñimpo cæcä goquingä, ante badete todänitapa. ⁴⁴ Ayæ nê ö æna guiquënë tömengä tönö godongämæ timpote wægöna İninqe Itota İngante pınte adobaı wënæ wënæ ante badete togadaimpa.

Itota wængampa

(Mäadoco 15.33-41; Odoca 23.44-49; Wäö 19.28-30)

⁴⁵ Tæcæbæcä pönı bayö tömämæ İñontobæ wëmö badinque ayæ ayaönäa wæiganca mæ mämönte baı İnimpa. ⁴⁶ Ayæ edæ ayaönäa wæiyonte Itota nanguı pönı yedæ äninque, “Edii, Edii, nëma tabatäni,” äninque mönö tededö, “Botö Wængonguıña, botö Wængonguıña, ædö cæte botö İmo ëmö cæte gobiya.”

⁴⁷ Ante wæcä ëñëningue godämæ ongönäni guiquënë,

—Æ. Ediya İngante aa pecä apa.

⁴⁸ Äñönäni adocanque do pogodo gote önætämö ænte pöninqe biinömæ baı önömænque ænte aa bedöningue næænte, Cæwipaca pædæ æænömo becæcäimpa, ante cæyongä, ⁴⁹ wadäni guiquënë,

—Ee aquënë. Ediya edæ ponte wabänö cæcä quëwenguingä abaimpa, angadänimpa.

⁵⁰ Itota İñömö wæætë ogæ tededinque do wængacäimpa. ⁵¹ İninqe edæ Wængonguı oncö tæiyæ waëmoncönë weocoo odemö näni wææ wodöincoo adoyedë önönæca İnö tæcæguedë pönı tænguımæ wæantapa. Ayæ goinque bayonte dica incæ tæ gämëntapa. ⁵² Ayæ wao wodido incæ wi ænote bayonte edæ Wængonguı quınäni do wængaınäni incæ pancadäniya ñäni ömæmöninqe ⁵³ tömënäni wodido abæ tawænte godänitapa. Edæ ñöwo İñömö, Itota ñäni ömæmongä ate tömënäni nê ñäni ömæmöninäni inte Eedotadë näni waëmö quëwëñömö ponte a ongöñönäni nanguı İnäni agadänimpa.

⁵⁴ Mänı goinque do pö adinque ayæ, Æbänö cætimpa, ante tömänö adinque edæ tontado capitäö tönö wææ wänönäni tönö ancai guıñëningue,

—Nawangä İmpa. İngä İñömö Wængonguı Wengä İngainö ante pönenguënë, angadänimpa.

⁵⁵ Do İñömö Itota Gadideabæ quëwente pöñongante onquiyænäni nanguı İnäni tee empote pöninqe tömengä beyæ nê cædinäni inte ñöwo adodäni adoyömö pö gongæninque pömö adänitapa. ⁵⁶ Mäadiya Mäagadadënë tönö wacä Mäadiya İnatapa. İinä İñömö Tantiago tönö Ootee badä İnantapa. Ayæ Tebedeo wëna tömëna badä tönö wadäni adobaı Itota wæñongante gobæ agadänimpa.

Itota wodi baö ini mäo daga wänänipa
(Mäadoco 15.42-47; Odoca 23.50-56; Wäö 19.38-42)

⁵⁷ Ayäe gäwadedcäe bayonte Ootee nē nangui ēacä incä Itota miñäe nē gocä do badingä inte Adimatea iñömö pägaingä inte pongä ingantapa. ⁵⁸ Tömengä iñömö ñowo Pidato weca godinque, Itota wodi baö ini pönömi äemoe, angantapa. Pidato Ao äninque nē cädäni inänite, Tömengä baö ee amini äncäcäimpa, angantapa. ⁵⁹ Itota wodi baö ini gämiyate pädäe wäenonte änte godinque waemö weocoo ninocoo nani ancoo wini wini caadinque, ⁶⁰ Ootee, Botö wodido baquimpa, ante dicamontaa nänö wodintatodē miintatodē mäo guidö ñö cädinque daga wengantapa. Ayäe dicabo da päñäe pönö tee mönodinque wadäe gogacäimpa. ⁶¹ İmaı cäyongä Mäadiya Mäagadadēnä tönö wacä Mäadiya tönö Itota wodido obo contate acönatapa.

Itota wodido iñömö wæe wänönäni a ongönäni

⁶² Ayäe guëmanguiönäe bacä cäpa, ante nani täno cäönäe iinque cädäni ate iimö ate, Wængongui qui, ante nē godönäni ñänänäni tönö Paditeoidi guiquenē Pidato weca ponte ⁶³ tömengä ingante äninque,

—Awënë eñemi. Mäningä nē babä äningä iñömö tömengä miingä iñedē apäenedinque, Mëönaa go adoönäque iñonte botö ñäni ömämöncaëboimpa, ante nänö äninö ante pönente wämönipa. ⁶⁴ Ayäe tömengä miñäe nē godinäni incä tömengä baö ini awemö ö ämainäni ante edäe wämönipa. Änäni iinque tömēnäni, “Dobä ñäni ömämongäimpa,” ante godömenque babä änäni edäe wänäe wänäe babaimpa cäbi. Ñowo wæe wänönäni inänite ämi godinque tömēnäni mäningä nänö wodintatodē täemö tee mönodinque mëönaa go adoönäque ganca wæe wänonte acädänimpa. Edäe wii godömenque wänäe wänäe bacäimpa, ante cäcäbiimpa, ämönipa.

⁶⁵ Äñönäni Pidato wæetē,

—Bado, wæe wänönäni mä ongönäni. Minitö tömēnäni inänite änte mäomini goyönäni minitö wæetē mini eñeninö bai do cädinque täemö tee mönote cädäni.

⁶⁶ Angä eñente godinque täemö mönodinque Itota nänö wodintatodē dai tee bädodänitapa. Ayäe, Awënë emöwo adinque wi änodämaı incädänimpa, ante dai bäyömö aqiiñedē ongontoca da guidonte awënë emöwo adimpaca yewäemonte bai bagatimpa. Ayäe wæe wänönäni inänite änte mäo gö cädäni wæe wänongadänimpa.

28

Itota do wäningä inte ñäni ömämönte quëwengampa
(Mäadoco 16.1-8; Odoca 24.1-12; Wäö 20.1-10)

¹ Mänii guëmanguiönäe iinque go ate wacä tēmāna baquinque ñäö ba iinque Mäadiya Mäagadadēnä tönö wacä Mäadiya iñömö Itota wodido acäete ante gogadäimpa. ² Awënë Wængongui anquedo do wæe pöninque edäe dicabo wäa godö oo wi änocantapa. Ayäe goinque nangui ocä ocä cätimpa. Anquedo iñömö dicaboga täe contacantapa. ³ Tömengä awinca näinte cäe bai emönongä inte tömengä weocoo näämänta pönii emoncoo mongänte a ongongä. ⁴ Adinque edäe nē wæe wänönäni guiquenē ancaı guiñente wädinque do do wäate bai badinque ämäwo wänte bai öñönänitapa. ⁵ Mänii onquiyäna pönönate Wængongui anquedo iñömö,

—Guiñenämaı ieda. Itota nani awäa timpodäni wäningä ingante minatö diqui diqui miminapa, ante edäe do eñemopa. ⁶ İñömö edäe dä angampa. Tömengä nänö äninö bai cädinque do edäe ñäni ömämöninque tao gocäimpa. Pö guiite aeda. İntatodē nänö öñontatodē iñömö edäe önantatoque impa. ⁷ Ayäe nē adimäna inte edäe quingäe pogodo gote tömengä miñäe nē godinäni inänite gode ante apäenedinque, “Itota dobä ñäni ömämongäimpa ataqeedäni, äeda.” Ayäe iñömö tömengä Gadideabä täno godinque a ongönongä minitö gote aedäni, ante minatö gode ante apäenedä eñeedäni. Bado, ämo eñeminapa edäe.

⁸ Angä ëñëninque tömengä wodido abæ tawænte wadæ godinque tömöna, Ancai guiñente wæte todadö, äninque watapæ todinque Itota miñæ në godinäni inänite gode ancæ pogodo godatapa. ⁹ Goyöna edæ Itota incæ iñontobæ mäo bee téninque edæ, Minatö, angä ëñëninque edæ iñäna tömengä weca pöninque önöwaca ædæ wæænte mö ongöwate, Wængonguï Awënë imidö angüënë, ante watapæ apæneyöna, ¹⁰ Itota iñömö edæ,

—Guiñënämaï ieda, angantapa. Ayæ, Minatö botö biwiidi inänite gode äninque iimaï äeda. Minitö Gadideabæ godinque botö imote acæminimpa, ante tömënäni inänite äeda, ante Itota angacäimpa.

Në wææ wänöninäni babæ ante apænedänipa

¹¹ Onquiyäna gode ancæ goyöna Itota wodido në wææ wänöninäni pancadäniya wæætë tömënäni näni quëwëñömö godinque, Wængonguï quï, ante në godönäni ñænänäni inänite apænedinque, Iimaï cætimpä, ante tömänö ante apænedänitapa. ¹² Apænedäni ëñëninque edæ në godönäni ñænänäni guiquënë në aadäni näni Picæncabo tönö pönë cöninque godongämæ Ao äninque tontadoidi në wææ wänönäni iñönänite tiguitamö padatamö bacoo godöninque, ¹³ tömënäni inänite iimaï angadänimpa.

—Wadäni Itota wodi baö ante wäyönäni edæ minitö önonque, Mö cöñömöni tömengä miñæ në godinäni awëmö ponte ö ænänitapa, ante babæ apæneacæminimpa. ¹⁴ Ayæ mäninö äñömöni awënë gobedönadodo ëñëninque, Quimæ möwëminii, ante piingä adinque edæ mönitö wæætë wææ cædinque tömengä ingante ämöni ëñëninque tömengä pänämaï ñimpo cæyongä minitö guiñente wädämaï incæminimpa.

¹⁵ Äninque në godönäni ñænänäni iñömö në wææ wänöninäni inänite nanguï tiguitamö godönäni ænänitapa. Mänintamö äninque awënëidi babæ näni äninö bai adodö ante apænedinque, Tömengä miñæ në godäni ö ænänitapa, ante babæ wapiticæ apænegadänimpa. Ininque tömënäni näni babæ apænedö ëñëninque edæ oodeoidi gode ante tededinque godömenque ñöwo ganca ayæ wapiticæ ante tededänipa.

Itota, Apæneacæ goedäni, angampa

(Mäadoco 16.14-18; Odoca 24.36-49; Wäö 20.19-23)

¹⁶ Önompo æmæmpoque go adodänique Itota miñæ näni godincabo guiquënë mänii Itota nänö änö bai cædinque Gadideabæ godinque änanquidi æiyönäni ¹⁷ Itota a ongongä adinque tömengä weca ædæ wæænte, Wængonguï Awënë imidö angüënë, ante watapæ apæneyönäni pancadäniya guiquënë, Wabänö i, ante pönënämaï ingadänimpa. ¹⁸ Itota iñömö tömënäni weca pönömenque pöninque,

—Wængonguï pönö cæcä beyænque botö iñömö öönæde Tæiyæ Awënë inömo inte inguipoga adobai në Tæiyæ Awënë badinque nämä tæi piñæmo inte në ämo imopa. ¹⁹ Ante wædinque minitö guiquënë inguipoga tömämæ quëwënäni weca godinque, Itota miñæ gocædänimpa, ante apænemini ëñente botö miñæ në godäni bacædänimpa. Ayæ mönö Mæmpo ëmöwo apænedinque, ayæ Wængonguï Wëmo iñömote botö ëmöwo apænedinque, ayæ Wængonguï Tæiyæ Wæmö Önöwoca ëmöwo apænedinque minitö tömämæ quëwënäni inänite æpænë guidömöni guicædänimpa. ²⁰ Ayæ botö minitö iminute botö äninö ante, Tömänö ante adodö cædäni, ante odömömöni ëñente cæcædänimpa. Ayæ botö edæ ñöwo incæ ayæ inguipoga iinque baganca cöwë minitö tönö ongonte godongämæ cæcæboimpa. Näwangä inguinö angüënë, ante Itota angacäimpa.

Itota Codito ingantedö ante Mäadoco nänö watapæ ante yewæmongainta

Wäo önömæca ponte apæ necä ëñënanipa

(Mäateo 3.1-12; Odoca 3.1-9, 15-17; Wäo 1.19-28)

¹ Ponguingä, ante nani Codito angaingä inongä inte Wængongui Wengä Itota ingantedö ante botö Mäadocobo watapæ ante yewæmömopa.

² Doyedë inömö Wængongui beyæ apænedinque, Codito ingante Wængongui iimai angäimpa, ante Itaiya wodi yewæmongacäimpa.

“Taadö bitö goquinö waa wëwaquingä, ante bai cædinque botö,

Botö beyæ në gode änongä ingante da godömo täno beyænte gocä ate bitö ayæ gocæbiimpa, ämopa.

³ Önömæca inömö adocanque ogæ tedete aa pecæcäimpa.

Tömengä inömö, ‘Awënë nänö ponguinö ante minitö tee moncate bai cædinque,

taadö töinö pinonte bai cæedäni,’ ante aa pecä ëñengäimpa,”

⁴ Ante Itaiya wodi nänö në angaingä inongä inte Wäo nïwo önömæca pöningue æpænë guidongantapa. Mänömaï cædinque tömengä mäninömö pönäni inänite apænedinque, Minitö, Idæwaa wënæ wënæ cæte awädö, ante ocæ emænte Wængongui gämænö pöningue æpænë guiicæminimpa. Mänömaï cæmini adinque Wængongui minitö cædinö ante në panguënegä incæte pünämaï inte nïmpo cæcæcäimpa. ⁵ Ante Wäo mänömaï apæneyongante Oodeabæ tömäo quëwënanäni Eedotadëë quëwënanäni tömänäni tömengä weca pö pö bee tente ëñëningue, Näwangä ämipa. Bitö ä bai ëñënanämaï cæte quëwëmöni inte idæwaa wënæ wënæ cæte awädö, ante wädäni ëñëningue Wäo Oododänö æpænë guidongä guidänitapa.

⁶ Wäo inömö weocoo ante cämeyo ocaguincoo nonte badöincoo mongænte adobai pacadeyænta ante æmontai badonte encadeyænongäimpa. Tömengä cængui ante nïwäique cænte tömengä bequi ante guinëmænque ade bete në quëwënongäimpa.

⁷ Iimai ante apæ necä ëñënanitapa. “Incayæ ate në Ponguingä guiquënë tömengä tæi emongä ewocadongä inte nangui cæcä ingampa. Botö guiquënë wädämo pöni inömo inte tömengä awæncata eyepæ imopa godö nï cæquimoo. ⁸ Botö ononque æpænë guidömo guimimipa. Tömengä wæætë da pönongä ate Wængongui Tæiyæ Wæmö Önöwoca pö guicä ewocacæminimpa,” ante Wäo mäninädë apænegacäimpa.

Itota æpænë guiicampa

(Mäateo 3.13-17; Odoca 3.21-22)

⁹ Ininque Gadideabæ Näatadeta quëwente Itota mäninädë pongä adinque Wäo Oododänö æpænë tömengä ingante guidongä guiicantapa. ¹⁰ Ininque æpænë guidingä inte do ää ta gongænningue Itota æmö ayongä öönæ gä godonte bayö equemö wææ bai Wængongui Tæiyæ Wæmö Önöwoca incæ tömengä wææ guicä acantapa. ¹¹ Ayæ ëñëningante, “Bitö botö Wëmi inömi inte në botö waadebi imipa, ate tobopa,” ante öönädë inö apæ necä ëñengacäimpa.

Itota incæ wënæ wënæ cæcæcäimpa, ante wënæ cæcampa

(Mäateo 4.1-11; Odoca 4.1-13)

¹² Mäninädë Itota ingante Wængongui Önöwoca incæ, Æibawë, äningue önömæca mäicä æicantapa. ¹³ Æi quëwëningue wantæpiyæ coadenta öönæ önömæca quëwënongante wënæ awënë Tatäna pöningue, Wënæ wënæ cæcæcäimpa, ante Itota ingante cædongäimpa. Ayæ Itota mänömaï babæidi quëwënomö quëwënongante Wængongui tömengä anquedoidi inänite da pönongä pöningue tömënanäni tömengä beyæ pönö waa cægadänimpa.

Itota Gadideabæ pöninge tæcæ mä cæcampa
(Mäateo 4.12-17; Odoca 4.14-15)

¹⁴ Mänömaï cæte ate ayæ awënë odeye Edode dobæ Wäo ingante tee mönecä ate mäniñedë Gadideabæ pöninge Itota mä Wængonguï nänö waa pöni cægainö ante iïmaï ante apænecäimpa. ¹⁵ “Ponguingä, ante dodäni nani angaiñedë botö Wængonguï Awënë Odeyebo inömo inte ñöwo iinque bayedë do pömopa, ante apænebo ëñeedäni. Mïnitö wënæ wënæ mïni cædimämo wido cædinque waa pöni botö apænedinö mïni ëñenö ante pönëdäni,” ante Itota angacäimpa.

Në gæyæ dadöwënäni inänite Itota aa pecampa
(Mäateo 4.18-22; Odoca 5.1-11)

¹⁶ Ayæ mäniï pöninge Itota gäwapæ Gadideapæ yæwedeca gote cægonte ayongä Timönö tönö Æntade tömengä töninacä inate acantapa. Në gæyæ dadöwëna inöna inte tömëna dicamöñæ æpænë wo guitodonte dadöwëna acantapa. ¹⁷ Tömëna inate Itota, —Iñäna, botö miñæ edæ tee empo pöeda, ämopa. Në dadonte ænte pömina inte botö weca pönöminate botö pönö cæbo ate mïnatö wæætë në apænemiina badinque woadäni inänite në ænte pömina bacæminaimpa, angantapa. ¹⁸ Angä ëñëninque tömëna dicamöñæ do ëmö cæte godinque Itota miñæ edæ tee empo wadæ godatapa.

¹⁹ Itota iñömö godömenque gote ayongä Tebedeo wëna Tantiago tönö Wäo adobaï wipodë dicamöñæ tadömoncöna acantapa. ²⁰ Adinque Itota do, Botö miñæ pöeda, angä ëñëninque tömëna Ao äninque wæmpocä ingante wæætë, Mæmpo ëñëmi, änatapa. Bitö nempo wipo ëmö cæte gomönapa, äninque adodaque wæmpocä ingante ëmö cæte Itota miñæ wadæ godatapa.

Itota angä ëñente wënæ incæ tao gopa
(Odoca 4.31-37)

²¹ Ayæ tömënäni quëwëñömö Capënaömö mämongä pönänitapa. Oodeoidi guëman-guïönæ bayonte Itota iñömö Wængonguï apænecä nani ëñente yewæmongainta ate nani odömöincönë do pö guidinque odömonte apænecä ëñënanitapa. ²² Ëñëñönäni tömengä nämä tæï piñëninque në angä inongä inte nö odömonte apænecä ëñente wædinque tömënäni, Wadäni në wææ odömönäni guiquënë mänömaï odömonte apænedäni ëñëmongaa. Itotaque nämä në ëñente entawëningä inte nö pöni odömonte apænecä ëñëmönipa, ante wädänitapa. ²³ Ayæ wënæ wentamö ëwocacä inte në quëwengä mäniñedë tömënäni odömöincönë a ongöninque iñontobæ yedæ ante apænecantapa.

²⁴ —Bitö Itota Näatadeta quëwëñimi inte quïnante mönatö weca pömi. Mönatö imönate edæ æmæwo wido cæcæte ante wabänö pömitawo. Bitö æmömidö imii, ante botö do atabopa. Bitö Wængonguï Tæiyæ Wæmö Wëmi inömi imipa, ante edæ do ëñëmopa.

²⁵ Ante tedeyongante Itota tömengä ingante wææ äninque,

—Apocænë quëwenguënë tedewëë. Waocä baönë quëwënömi inte edæ tao gobäwe.

²⁶ Angä ëñëninque wënæ në wentamö ëwocacä iñömö waocä ingante quidi quidi mäo tæ gotodö go wææñongante, Yæ yæ, äninque dobæ tao gotapa.

²⁷ Itota angä wënæ tao gocä adinque tömänäni guïñente wædinque nani caboque wæætedö wæætë tededinque,

—Iingä iñömö quïnö bai ante cæcä. Tömengä në angä inongä inte edæ mä pöni odömonte apænecampa. Edæ wënæidi në wentamö ëwocadäni inänite tömengä angä ëñente cædänipa, ante awædö.

²⁸ Ante pönente wædinque tömënäni, Itota mänömaï cæcampa, ante tededinque Gadideabæ tömäo quëwënäni inänite mäo gode ä gode ä cædäni do ëñengadänimpa.

Pegodo nänöogæ wäänä ingante Itota cæcä gançæ bacä
(Mäateo 8.14-15; Odoca 4.38-39)

²⁹ Mäniï Itota oodeoidi odömöincönë ongöninque iinque odömonte apænecä ate tömënäni tao godinque Tantiago tönö Wäo miñæ godinque Timönö tönö Æntade

oncönë go guidänitapa. ³⁰ Go guiiyönänite wadäni, Timönö nänöogängä wäänä daicawo gawænte möimoga öñongampa, änäni. ³¹ Eñente wædinque Itota tömengä weca go gongæninqe pædæ wææmpote bæi ongonte töö æmängä ate tömengä ængæ ganticantapa. Ayæ gancaë badinque tömengä wæætë tömënäni beyæ cæcantapa.

Daicawo gawænäni inänite Itota cæcä waa badänipa
(Mäateo 8.16-17; Odoca 4.40-41)

³² Mäniönæ gawadecæ pönï nænque wëmö bayö wadäni daicawo gawænäni inänite wænæ inte quëwënäni inänite tömänäni inänite Itota weca ænte pönänitapa. ³³ Ayæ mäniñömö quëwënäni tömänäni adoyömö pöningue odemö goto gongænänitapa. ³⁴ Ayæ quiëmë beyæ wænæ wænæ inte wædäni adinque Itota nanguï inäni inänite godö cæcä waa badänitapa. Ayæ wænæidi nanguï inäni inänite wido cædinque Itota, Botö æbodö imoo, ante në adimïni inte tededämaï imæwedäni, ante tömënäni inänite wææ angacäimpa.

Itota oodeoidi odömöincönë go guiidinque apænecampa
(Odoca 4.42-44)

³⁵ Ayæ tæcæ oque pönente wëmö iñonte ængæ gantidinque Itota oncodo tao gote gomonga önömæca godinque Wængonguï ingante apænecantapa. ³⁶ Apæneyongante Timönöidi, Ædönö gocäi, ante tee empo tee empo gote, ³⁷ adinque,

—Dæ ämi wædinque tömänäni bitö imite ante diqui diqui minänipa cæbii.

³⁸ Ante äñönänite Itota wæætë,

—Mönö wayömö gocäimpa. Eyequeï nani quëwëñömö nani quëwëñömö mäo botö apænebo eñencædänimpa, ante cæcæte ante tate pontabopa.

³⁹ Ante në äningä inte Gadideabæ tömäo godinque oodeoidi odömöincönë go guii go guii cædinque Wængonguï nänö apænedö ante Itota apænecä eñengadänimpa. Ayæ wænæidi inänite wido cæcä gogadänimpa.

Në baadingä ingante Itota wadæ caacampa
(Mäateo 8.1-4; Odoca 5.12-16)

⁴⁰ Ayæ wacä cöwë baate eñawengä inongä inte Itota weca ponte da guicapodique, —Bitö Ao ämi inte wadæ caabi ininque botö do waintai baabaïmopa.

⁴¹ Äñongante Itota tömengä tönö guëa wæwente bai nanguï pönengä inte pædæ wææmpo gampo caadinque,

—Ao ämopa. Bitö waintai baacæbiimpa.

⁴² Angä ininque ñömæintai nänö eñadintai dæ baadinque tömengä waintai edæ do baacantapa. ⁴³ Itota edæ tömengä ingante do da godöningue nanguï angantapa.

⁴⁴ —Eñëmi. Botö æbänö cæboo, ante edæ wadäni inänite mäo apænedämaï imæwe. Wæætë, Näwangä impa, ante acædänimpa, ante cædinque bitö, Wængonguï qui, ante në godongä weca töingä godinque waintai bitö baadintai odömömi ædæmö acæcäimpa. Ayæ Möitee wodi wææ ante nänö angaincoo bai ænte pöningue bitö waintai bitö baadi beyæ ante edæ, Wængonguï qui, äninque në godongä ingante pædæ godömi æncæcäimpa, ante Itota në baadingä ingante nanguï angantapa.

⁴⁵ Angä incæte në baadingä wæætë wadæ godinque eñënämaï inte gode ä gode ä cædinque edæ, Itota wadæ caacä waintai baaboï aedäni, ante mäo tedecä eñënänitapa. Mänömaï eñënämaï cæcä beyænque Itota, Tömënäni weca ñöwo ædö cæte edonque goquimoo, ante wædinque nänënë gote önömæca gomonga cægongantapa. Incæte tömengä weca æmænö quëwënäni æmænö quëwënäni cöwë pö pö cægadänimpa.

2

Në cömäingä ingante Itota angä dao dao gocampa
(Mäateo 9.1-8; Odoca 5.17-26)

¹ Ayæ täönæ quëwëninque ocæ emænte Capënaömö pongä adinque wadäni, Itota oncönë ponte ongongampa. ² Ante tededäni wædinque nanguï inäni acæ pönäni oncönë

eyede pōnī guuidinque odemō incæ tōmāo wææ ongōnānitapa. Mānōmaī tōmāo goto ongōnāni inānite tōmengā Wængonguī nānō apænedō ante apæneca. ³ Ēñēñōnāni wadāni tōnō godongāmæ pōninque mengāa go mengāa ināni incæ cōmāingā nānō möimpataa æmætæ æmætæ bæi ongonte næænte pōnānitapa.

⁴ Ponte ayōnāni wadāni Itota weca eyede pōnī goto ongōnāni adinque nē ænte māmō pōnīnāni iñōmō, Ædō cæte guiquīi. Ante wædinque oncōmāa inō æidāmæ mæi æidinque Itota önōnæca inō epæ cædāni ompite gongæñō tōmēnāni cōmāingā möimpataa bæi ongōninque tōmengā ingante Itota weca edæ pædæ wæænōnāni. ⁵ Wæænte ongongā adinque, Tōmēnāni æbānō wede pōnente cædānipa, ante adinque Itota cōmāingā ingante,

—Botō wēmi wædāmaī ie. Wēnæ wēnæ bitō cædimāmo ante bitō ñōwo ñimpo cæte quēwencæbiimpa.

⁶ Ante apæneca ēñēninque nē wææ odōmōnāni guiquēnē pancadāniya godāmæ tæ contate ongōninque nāmāneque pōnente tededinque, ⁷ “Quīmæ ānewēē. ĩngā iñōmō Wængonguī ingampa diyæ mānōmaī cæquingāa. Edæ babæ ancædō. Waomō wēnæ wēnæ mōnō cædimāmo ante Wængonguinque nē ñimpo cæcā ingampa.” ⁸ Ante mīmōnoque pōnēñōnāni Itota tōmēnāni nāni pōnēwēnō ante önōwēnenque do ēñente bai pōnēninque edæ,

—Mīnitō quīmæ mānōmaīnō ante pōnēwēmīni.

⁹ “Botō nē cōmāingā nānō wēnæ wēnæ cædimāmo ante ñimpo cæbo quēwencæcāimpa,” ante botō Wængonguī bai āmo ēñēninque mīnitō guiquēnē, Wængonguī ingampa diyæ mānōmaī cæquingāa, ante pōnēmīnipa. Wæætē edæ, “Ængæ gantidinque möimpata æninque dao dao gocæcāimpa,” ante botō Wængonguī bai āmo ĩninque mīnitō adobai, Wængonguī ingampa diyæ mānōmaī cæquingāa, ante pōnēmīni ĩmaīmīnipa, ante awædō. ĩñæmpa mānōmaīnō ante pōnēmīni ĩninque mīnitō edæ æbānō cæquēnēmo ĩmo āmīni. ¹⁰ Incæte botō Waobo ēñagaīmo inte inguipoga quēwēninque waomīni mīni wēnæ wēnæ cædimāmo ante nē āmo inte ñimpo cæbopa, ante mīnitō edæ ēñencæmīnimpa, ante botō ĩmaī cæbopa.

Āninque edæ nē cōmāingā ingante edæ,

¹¹ —Bitō ĩmite āmo ēñē. Ængæ gantidinque bitō möimpata topo cæte æninque edæ tōmēmi oncōnē næænte goe.

¹² Angā ēñēninque cōmāingā ĩningā incæ edæ tōmānāni ayōnāni ængæ gantidinque möimpata topo cæte nææ nææ tao gocā adānitapa. Dao dao gocā adinque tōmēnāni, Æbānō cæcāi, ante ēñēnāmaī inte guñente wædinque,

—Wēñēñedē mānōmaī cædāni atamōniyaa. Ñōwo iñōmō mā pōnī cæcā amōnipa, ante pōnēninque, Wængonguī bitō ñāō emōmi inte waa pōnī cæbi amōnipa, ante watapæ apænegadānimpa.

Debi ingante Itota angā tee empote gocampa
(Māateo 9.9-13; Odoca 5.27-32)

¹³ Itota wæætē adodō gāwapæ wedeca gocantapa. Ayæ nanguī ināni adoyōmō pō pō cædāni adinque tōmengā tōmēnāni inānite odōmonte apæneca ēñēnānitapa.

¹⁴ Ayæ godōmenque cægonte ayongā Adepeo wengā Debi iñōmō, Odōmāno awēnē quī bacæimpa, ante godonte æinta nāni æincōnē awēnē beyæ æncæte ante ongongā adinque Itota tōmengā ingante,

—Botō miñæ pōe.

Angā ēñēninque Debi edæ ængæ gantidinque tōmengā miñæ wadæ edæ gocantapa.

¹⁵ Ayæ ate Itotaidi Debi oncōnē pō guite cængōñōnāni odōmāno awēnē beyæ nē æwēnāni tōnō nē ēñēnāmaī cædāni tōnō nanguī ināni adoyōmō pō guite godongāmæ cænānitapa. Edæ tæiyænāni tōmengā miñæ nē godāni inōnānimpa. ¹⁶ Paditeoidi inōnāni inte nē odōmōnāni guiquēnē ponte ayōnāni nē ēñēnāmaī ināni tōnō awēnē beyæ nē æwēnāni tōnō Itota godongāmæ cængā adinque tōmēnāni tōmengā miñæ nē godāni inānite ānānitapa.

—Odömāno awēnē beyæ nē æwēnāni tönō wadāni nē ēñēnāmaī cædāni tönō Itota quīmæ godongāmæ cæwengää.

¹⁷ Äñōnāni Itota wæætē tōmēnāni inānite,

—Nē waa ingā guiquēnē, Cæbi waa baboe, änāmaī ingampa. Nē wēnæ wēnæ ingā guiquēnē dotodo ingante do, Cæbi waa baboe, ante aa pecampa. Pancadāniya, Nāmā incæ nō entawēmo imopa, ante nē änāni inānite adinque botō nē dotodo baī adobaī inōmo inte tōmēnāni inānite aa pedāmaī incæboimpa. Wadāni guiquēnē, Nāmā wēnæ wēnæ cæbo imopa, ante nē änāni guiquēnē, Wængonguī gāmænō poncædānimpa, ante botō tōmēnāni inānite aa pecæ pontabopa, ante Itota apænægacäimpa.

Ee ate cænāmaī ingæimpa, ante nē änāni

(Mäateo 9.14-17; Odoca 5.33-39)

¹⁸ Wäo miñæ nē godāni tönō Paditeoidi tönō māniñedē Wængonguī beyæ ante ee ate cænāmaī inōnānimpa. Ininque wadāni Itota weca pōninque änānitapa.

—Wäo miñæ nē godāni tönō Paditeoidi miñæ nē godāni tönō tōmēnānique, Wængonguī beyæ, ante ee ate cænāmaī inānipa. Bitō miñæ nē godāni guiquēnē quīnante Wængonguī beyæ ante cædāmaī ināni inte do cænānii.

¹⁹ Änāni ēñēninque Itota wæætē,

—Onguīñängä nē monguingä nānō wente ænte nē pōnāni baī inōnāni inte botō miñæ nē godāni iñōmō ædō cæte wæwente baī cænāmaī inguīnānii. Edæ botō tönō watapæ quēwēnāni inte tōmēnāni ædō cæte wæwente baī cænāmaī inguīnānii. ²⁰ Wæætē ayæ ate guiquēnē, Monguingä, nāni nē änongä baī iñōmote wadāni ponte botō imote bæi ongōninque ò ænte gocædānimpa. Mānōmaī cædāni ate botō miñæ nē godāni iñōmō māniñedē ate wæætē cænāmaī inte wæcædānimpa, ante apænedinque Itota godōmenque iīmaī ante apænægacäimpa.

²¹ “Wacä dicæ miincoo æninque pedæncōoga pōnō tadōmonguingä. Mānōmaī cæcä ininque edæ miincoo incæ dobæ gäänē tamonte guipite ate godōmenque wānā tente baquēnē. Mīnitō, Awente baī cænāmaī inte waa quēwengæimpa, ante mīni ānewēnō guiquēnē pedæncōo baī inte ewenguīne ēnepa. Codito nempo watapæ quēwengæimpa, ante botō apænedō guiquēnē miincoo baī inte quēwenguīne ēnepa. Ininque ewenguīne tönō quēwenguīne ædō cæte adoyōmō ēñente cæquīi. ²² Ayæ adobaī yowepæ biinōmæ mīimæ æninque wacä ædō cæte picæ æmontaicadedē godō pe ñiñänguingää. Edæ picæ æmontaicadedē pe ñiñängä ininque yedæ ææninque ætæwo goquīnō anguēnē. Wæætē edæ æmontai miincadedē pe ñiñænte ate yedæ ææninque tæi æbænāmaī ee ongonguī apa quēwēmīni,” ante Itota apænægacäimpa.

Guēmanguïönæ iñonte tōmēmō tā pete ænānipa

(Mäateo 12.1-8; Odoca 6.1-5)

²³ Ayæ ate guēmanguïönæ iñonte Itota tōmēmoncodē tæcæguedencodē gocantapa. Goyongä tōmengä miñæ nē godāni tōmēmō inca tæcæ tā pe tā pe ænte idōmæ godāni.

²⁴ Adinque Paditeoidi guiquēnē Itota ingante äninque,

—Bitō miñæ nē godāni æbānō cædānii, ante cōwā aquēnē. Iñæmpa, Guēmanguïönæ iñonte māniñō baī cædāmaī iedāni, ante dodāni nāni wææ angainō ante ēñēnāmaī inte iñāni ēñēnāmaī inte quīmæ cædānii.

²⁵ Ante pīññōnānite Itota,

—Docä Dabii wodi tōmengä nānō nē emiñænāni tönō ömæpodāni pōni inte gæwænte wædinque æbānō cægadānii, ante yewæmonte öñō incæ mīnitō iñæmpa adāmaī inte ämīni awædō. ²⁶ Wængonguī qui, ante nē godōnānique cænguī impa, ante wææ nāni angainō baī cædinque dodāni päö, Wængonguī qui, ante ñoncæ ñoncæ cædōnānimpa. Incæte Abiatade wodi nē godongä ñænängä pōni inongä nānō godōñedē māniñedē Dabii wodi Wængonguī oncōnē go guīdinque māniñi päö do ænte cæninque tōmengä miñæ nē godāni inānite godōmenque godongä cænānitapa, ante yewæmonte öñō apa ānewēmīnii.

²⁷ Ante apænedinque Itota ayæ,

—Wængonguī quīnante, Guēmanguiōnæ, ante badongacāi, ante pōnēmīni. Guēman-cædānīmpa, ante cædinque Wængonguī waomō beyænque ante, Mīnitō guēmanguiōnæ, ante badongacāīmpa, ante pōnenguēnēmīni īmīnīpa. Ædānidō māniōnæ īñonte cædāmaī īnānīi, ante pōnēnīnque Wængonguī dicæ māniōnæ beyænque ante waodāni īnānīte badongantawogaa. Ædō cæte mānōmaīnō ante pōnēwēmīnīi. ²⁸ Īnīnque botō Waobo nē ēñagāīmo īñōmō Tæiyæ Awēnē īnōmo inte edæ guēmanguiōnæ Awēnē īnōmo īmōpa. Ayæ, Guēmanguiōnæ īñonte edæ æbānō cæquīi, ante adobo nē Āmo ingāīmo īmōpa, ante Itota apænēgacāīmpa.

3

*Nī cōmampoingā**(Māateo 12.9-14; Odoca 6.6-11)*

¹ Īncayæ ate Itota wæætē oodeoidi Wængonguī apænecā nāni ēñente yewæmon-gainta ate nāni odōmōincōnē go guīcantapa. Māniñōmō onguīñængā nī cōmampote wædongā inte a ongongantapa. ² Māniñedē Paditeoidi pancadāniya, Itota wapiticæ cæcā īnīnque mōnō wæætē pīinte angæīmpa, ante nē ānewēnāni inte cædōnānīmpa. Ñōwo īñōmō tōmēnāni, Guēmanguiōnæ ī incæte Itota nī cōmampoingā ingante, Waa bacæcāīmpa, ante cæcā īnīnque mōnō māo pīinte angæīmpa, ante babæ cæcæte ante cōwā adānitapa. ³ Ante cōwā ayōnāni nī cōmampoingā ingante Itota,

—Bitō ængæ gantīdīnque tæcæguedē pō næ gongæe.

⁴ Ānīnque wæætē nē pīinte ancædāni īnānīte ānīnque,

—Guēmanguiōnæ īñonte mōnō æbānō cæquēnēmō īmōō, ante wææ angatīi. Mōnō edæ waa cæquēnēmō īmōmpa, ante pōnēmīnitawo. Wæætē edæ, Wēnæ wēnæ cæquēnēmō īmōmpa, ante pōnēmīnitawo. Quēwencædānīmpa, ante mōnō waa cæquēnēmō īmōmpa, ante pōnēmīnitawo. Wæætē, Wæncædānīmpa, ante mōnō wænonguēnēmō īmōmpa, ante pōnēmīnitawo. Mānōmaī ante Itota angā īnīnque tōmēnāni edæ pæ wēenedānitapa. ⁵ Adīnque tōmengā ænguī badīnque tōmēnāni īnānīte æmætæ gomō æmætæ gomō adīnque edæ, Mīmō ōmædēīnāni incædō, ante wædīnque nī cōmampoingā ingante,

—Pædæ pompobi, angā ēñēnīnque pædæ pompodīnque nē cōmampodīngā incæ ædæmō waa empocā bapocantapa. ⁶ Adīnque edæ Paditeoidi guīquēnē wadæ tao godīnque Edodeīdi tōnō bee tēnīnque, Mōnō æbānō cæte Itota ingante wænōmō wænguingāā, ante godongāmæ pōnēnīnque tedegadānīmpa.

Gāwapæ wedeca nanguī īnāni pōnānīpa

⁷ Itota īñōmō tōmengā nānō nē ēmīñænāni tōnō wadæ tao godīnque gāwapæ wedeca godāni adīnque Gadideabæ quēwēnāni nanguī īnāni tee empote godānitapa. ⁸ Īnīnque wadāni Oodeabæ, Eedotadēē, Idōmeabæ, Oododānō æmæmāa, Tīdo eyequeī, Tīdō eye-queī māniñōmō quēwēnte tededīnque, Itota mānōmaī cæcampa, ante tededāni ēñente wædīnque bacoo īnāni māniōmæ tōmāo quēwēnāni inte tōmengā weca pōnānitapa. ⁹ Adīnque Itota, Goto gongæñāni wæcæ wæ, ante pōnēnīnque tōmengā mīñæ cōwē nē godāni īnānīte, Wīpo ænte pōmīni ate botō wīpodē wāi wocænte owocæboīmpa, angantapa. ¹⁰ Wēēnē īñōmō, Itota nanguī īnāni īnānīte gampocā waa badānīpa, ante nē adīnāni inte tōmēnāni ñōwo, Mōnō gampo cæte waa bacæīmpa, ante cædinque goto gongæñāni wædīnque mānōmaīnō ante ānongāīmpa.

¹¹ Ayæ Itota ingante adīnque wēnæīdi nē wentamō ēwocadāni incæ tōmengā ōnōwa gāānē ædæ wæænīnque,

—Bitō Wængonguī Wēmi īnōmi īmīpa tōō, ante Yæ ānānitapa. ¹² Ēñente wædīnque Itota wæætē, Botō æbodō īmoo, ante cōwē ānāmaī īnguēnē quēwēmīnīi, angacāīmpa.

*Itota angā ate dote ganca īnāni nē gode ānāni badānīpa**(Māateo 10.1-4; Odoca 6.12-16)*

¹³ Ayä änanquidi æidinqe Itota, İinani İnänite ämo poncädänimpa, ante aa pecä tömengä weca pönänitapa. ¹⁴ Pönäni ate tömengä dote ganca İnani mänimpodäni İnänite, Minitö botö miñäe quëwëñöminite botö wadäni weca da godömo gote apænemini ëñencädänimpa, äninque, Botö beyäe nê gode ämini incæminimpa, angacäimpa. ¹⁵ Ayä pönö apænebo ëñëninque minitö täi emömini inte wënæidi İnänite nê ämini badinque wido cæcæminimpa. ¹⁶ Tömengä dote ganca nänö apænte ænani İñömö İmaï emönönänimpa. Tānocä Timönö emongä incæte Itota wawo Pegodo pemongacäimpa. ¹⁷ Tebedeo wodi wëna Tantiago tönö Wäö nana caya nê yedæ tededa İna adinque Itota, “Detæbo nänömoda bai İnapa,” ante, Mæmæ beyäe, ante Boänede pemongacäimpa. ¹⁸ Ayä Æntade, Pedipe tönö Batodömëe, Mäateo tönö Tömato, Adepeo wengä Tantiago tönö Tadeo İnänitapa. Ayä, Mönö omæ ingäimpa, ante nanguï cædongä inte wacä Timönö ingantapa. ¹⁹ Ayä Itota ingante odömönte nê godonguingä Codaa İcadiote nani ānongä ingacäimpa. Mänimpodäni İnänite Itota angä nê gode ānani bagadänimpa.

*Wënæ tönö cæcä İmaingampa, ante wapiticä ānänipa
(Mäateo 12.22-32; Odoco 11.14-23, 12.10)*

²⁰ Ayä ate Itota oncönê pongacäimpa. Pongä adinque bacoo İnani wæætê pö pö goto gongænani adinque wadäni guiquënë, Itotaidi quiodö cænguİNāni, ante wædonänimpa. ²¹ Ayä, Quimæ. Ocai edæ omædæcacä pönente bai cæcämææ, ante pönente tededönänimpa. Mänömaïnö ante tededäni ëñëninque Itota guidënanı guiquënë tömengä ingante bæi ongönte æncæte ante wadæ pönänimpa.

²² Ayä nê wææ odömönani guiquënë Eedotadëe quëwente pöninque, “İñæmpa wënæ awënë Beedeboo tönö quëwengä inte Itota mäningä tönö cædinque wënæidi İnänite wido cæcä İmaingampa,” ante tedewënanı.

²³ Eñente wædinque Itota aa pecä pönäni ate, “Tatāna mīni ānongä İñömö nāmā incæ ædö cæte wido cæquingäa, ante ëñencæminimpa, ante botö, Inguipoga æbänö cædāni, ante odömömo aedāni. ²⁴ Awënë odeye nempo quëwënanı İñömö pīinani badinque næmæ wæatedö wæætê cædāni İninque awënë odeye nänö omædempote wæquinqe tömënanı nāmā ewente cædānıpa. ²⁵ Ayä adocönê owocabo incæ adoyömö godongāmæ quëwënināni incæ næmæ wæatedö wæætê cædāni İninque tömënanı oncö woquinqe nāwæ gobaİNānıpa. ²⁶ Ayä Tatāna nempo quëwënanı İñömö edæ næmæ pīinte badinque wæatedö wæætê cædinque tömengä ingante wido cædāni İninque Tatāna dicæ tömënanı awënë İmaingäa,” ante Itota odömönte apænecantapa.

²⁷ Ayä, “Nê täi pīñängä ingante wīi goto wininque waocä ædö cæte tömengä oncönê guite mäincoo ö ænguingäa. Edæ nê ëcä ingante bæi ongönte goto winte ate pö guite ö ænani bai botö İñömö wënæ inte nê bæi ongönte wido cæbo İmopa,” angantapa.

²⁸ Ayä, “Nāwangä apænebo ëñëedāni, angantapa. Mīni waocabo wënæ wënæ cæmīni incæ wadāni İnänite godö babæ ānewëmīni incæte edæ Wængonguï wæætê tömānö ante pönö ñimpo cæcä beyænque quëwencæminimpa. ²⁹ Wæætê Wængonguï Tæiyæ Waëmö Önöwoca ingante waocä godö babæ ante wënæ wënæ apænecä İninque tömengä æmæwo wentamö mongængä bagaingä İninque cöwë wantæpiyæ wentamö mongæncæcäimpa. Mänömaï beyæ Wængonguï ñöwopāmo İñönte ñimpo cædāmaï inte İincayæ pömāmo İñönte adobai ñimpo cædāmaï inte cöwë pancæcäimpa,” ante Itota apænecäimpa.

³⁰ Äninque, Minitö botö İmote, Bitö wënæ nê wentamö ewocacä tönö quëwente cæbaimıpa, äminıtawoo. İñæmpa, Wængonguï Tæiyæ Waëmö Önöwoca tönö quëwente cæbo apa ānewëmīni, ante Itota apænecäimpa.

*Itota badä tönö tömengä biwīidi
(Mäateo 12.46-50; Odoco 8.19-21)*

³¹ Ayä Itota wānā tömengä biwīidi tönö mäniı nani ponque pö do pöninque yabæque ayä ongöninque, Guıi āñete tæ. ³² Änani ëñente āñecæte ante ponte apænecä ëñëninque wadäni Itota weca contate ongönani Itota ingante wæætê apænedinque,

—Bitö badä bitö biwiidi tönö bitö ïmite ante oncodo ponte yabæque ongönänipa cæbii.

³³ Ante añönänite,

—Botö badä ædänö inää ante ämoo, ante pönëmini. Ayæ botö biwiidi ædänidö inänii ante ämoo, ante pönëmini.

³⁴ Äninqe godämæ contate ongönäni inänite adinqe,

—Ïinäni ïñömö edæ botö badäidi botö biwiidi inönäni inänipa, ante mänömainö ämo abaïminipa. ³⁵ Edæ Wængonguï nänö änö bai ëñente æcänö cæte quëwëna mäningä botö biwi ingampa. Mäningä botö biwinque ingampa. Mäninä botö badä inampa, ämo abaïminipa, ante Itota apænecäimpa.

4

Wacä nänö quiyadö ante odömonte apænecampa

(Mäateo 13.1-9; Odoca 8.4-8)

¹ Wæætë gäwapæ yæwedeca gote odömoncæ cæyongä nanguï inäni tömäo goto ponte ongönäni adinqe Itota wipodë go guiite tæ contate wäi wocænte owoyongä tömënäni ayæ gäwapæ yæwedecaque ömaaque ongönänitapa. ² Ïninqe tömënäni inänite nanguï pönï odömöninqe Itota, Wængonguï Awënë nempo quëwëninque æbänö cæquïi, ante ëñencæminimpa, ante botö ïmæca quëwënäni nänï cæinö ante odömonte apænebo ëñëedäni.

Äninqe ïmaï ante odömonte apænecä ëñengadänimpa. ³ “Apænebo ëñëedäni. Wacä në quiyadongä ïñömö quiyacæ gocampa. ⁴ Gote quiyayongä pancamonga taadö ïñömö eyepote wææmompä. Taadö wæænte eyepodimö öñöñonte ayamöidi pöninqe dobæ ade cænänipa. ⁵ Pancamonga guiquënë dicamontaa onguipoi woyedömö ïñömö eyepote wææmpä. Onguipoi woyedömö öñömö inte pæquinämaï quingæ tä bocate pædinque æmonga æipa. ⁶ Ïninqe oguimento yæyæmë guiwadämaï inte cöñe bawadämaï ïñonte nænque tï näwäñö wänä cacadinque edæ guingo icate näñe wæmpä. ⁷ Pancamonga guiquënë ömentacodë nänö eyepodimö ïñömö pæquinämaï tä bocate gä æiyonte ömentacoo pö incootonque ganta cæca ate näñe wæmpä. Wampo incapa pæquïi. ⁸ Wæmonguipoga quiyadimö guiquënë tä bocate waa pædinque tömëmö nanguï pönï godömenque incapa. Pancawænca edæ todëinta ganca, pancawænca teitenta ganca, pancawænca tiëë ganca mänimpomö incapa. Quiyacä nänö quiyadö ante edæ botö mäninqe ante apænebopa.”

⁹ Mänömaï impa, ante ïinque apænebopa. Èamonca ongonte edæ ëñëedäni, ante Itota apænecäimpa.

Önömoncaque ëñente pönënämaï inänipa, ante

(Mäateo 13.10-17; Odoca 8.9-10)

¹⁰ Ayæ ate nanguï ongönänäni dæ godäni ate Itotaidi adodänique ongöñönäni edæ, Dote, ante nänï gocabo tönö wadäni tömengä miñæ godäni tönö tömengä weca ponte änänitapa. Itota ëñëmi. Bitö mäninö ante apænedinque æbänö ante odömoncæte ante apænebitawo. ¹¹ Äñönänite, “Wængonguï Awënë Odeye ïñömö æbänö awëmö cæcää, ante mini waocabo wëñëñedë ëñënämaï ininö incæte ñöwo edonque pönö apænebo ate mïnitö adomïnique në ëñëmini bamïnipa. Gobæ ongönäni inänite apænedinque, Inguipoga quëwënäni nänï cæi bai impa, ante botö panca ante odömonte apænebo ëñëänäni. ¹² Dodäni Wængonguï beyæ apænedinque ïmainö ante yewæmongadänimpa. Wængonguï nänö në ñimpo cæquëñënäni inämaï inäni inte tömënäni ïñömö awincaque adinqe wïi ædæmö adäni inte önömoncaque ëñëninque ædæmö ëñënämaï inäni inte edæ ocæ ëmænte pönämaï incädänimpa, ante yewæmongadänimpa. Mänömaï ïinque bacäimpa, ante beyænque botö tömënäni inänite wïi edonque apænebopa,” ante Itota apænecantapa.

Quiyacä nänö cæinö ante pönente ïmainö ante ëñëgäimpa

(Mäateo 13.18-23; Odoca 8.11-15)

¹³ Itota ayæ tömënäni inänite godömenque apænecantapa. “Botö mäninö inguipoga nāni cæinö ante do odömonte apænebo eñëninque mīnitö eñënämaï imīnitawo. Ininque ñöwo godömenque odömonte apænebo incæte mīnitö ædö cæte godömenque eñen-guimīnii.”

¹⁴ “Iīmaï impa. Nē apænecā iñömö tömēmö quiyate bai cædinque Wængonguï tömengä nänö apænedö ante apænecampa. ¹⁵ Pancadāniya guiquënë taadö eyepote wæænīmö bai ināni inte Wængonguï nänö apænedö ante eñëninque mīmōno pönënāmaï iñönānite ayamö ade cængä bai Tatāna incæ ponte ö ængampa. ¹⁶ Wadāni guiquënë dicamontaa woyedömö iñömö eyepote wæænīmö bai ināni inte tömënāni Wængonguï nänö apænedö eñëninque quingæ Ao ante watapæ todānipa.”

¹⁷ “Ayæ ate adodāni wantæ iñö quëwëñönānite wadāni Wængonguï nänö apænedö beyæ pīnāni wädānipa. Ayæ wadāni wënæ wënæ cæcæte ante togænte pānāni wädānipa. Ininque oguimento yæyæmë guiwadāmaï nāñe wænte bai ināni inte tömënāni guīñente wædinque emö cæte godānipa. ¹⁸ Ayæ wadāni guiquënë ömentacodë eyepote wæænīmö bai ināni inte Wængonguï nänö apænedö eñëñönāni, ¹⁹ inguipoga quëwente quīemë beyænque mönö wæpāmo pompa. Ayæ, Māincoo beyænque toquīmo, ante nāni oda cæte wæwëmāmo pōninque wacoo wacoo nāni æinënö pōninque edæ ömentacoo ñancate cæ bai cæyonte Wængonguï nänö apænedinö incæ incadāmaï bai bapa. ²⁰ Onguipoga wainguipoga quiyadīmö bai ināni guiquënë tömënāni Wængonguï apænedinö eñente Ao āninque wede pönënāni inte tömëwæ incate bai Wængonguï beyæ nangui cædānipa. Pancadāniya todēinta ganca incate bai nangui cæyönāni, pancadāniya godömenque teitenta ganca incate bai cædānipa. Pancadāniya nangui pōni tiëë ganca incate bai cædānipa,” ante Itota apænecā eñëñānitapa.

*Gongapæncade ante odömonte apænecampa
(Odoca 8.16-18)*

²¹ Ayæ tömënāni inänite Itota iīmaï odömōninque apænecantapa. “Waomīni gongapæncade ti wodōnodinque dicæ owætadë boo cæcamīniyaa. Dicæ möimoga ænömengadæ inö māo concæmīniyaa. Wæætë edæ wænömënæcapaa concæmīni ñäö bæco amīnipa. ²² Quīnö ante wë wodonte bai i iñömö mäninö ante iīncayæ ate tadonte edonque ate bai eñënguinque ñöwo wë wodonte impa. Quīnö bee ocate bai i iñömö mäninö iīncayæ ate wi æncate edonque aquinque ñöwo bee ocate impa. ²³ Æamonca ongonte eñënguënë cæmīnii,” angantapa.

²⁴ Ayæ tömënāni inänite godömenque apænedinque Itota, “Önōmonca eñëninque eñënguënë cæmīnii. Mīnitö mīni tee mante godoncade incæ adocadeca tee mäninque Wængonguï mīnitö imīnite adodö pönōninque godömenque ayæ pönongä æncæmīn-impā. ²⁵ Edæ nē ëacā ingante godönāni ængä bai nē eñengä ingante godö apænebo eñente entawëninque tömengä godömenque eñente bacæcäimpa. Nē ëadāmaï ingä guiquënë tömengä wædænque pōni nänö māincoo iñonte māincoo tömancoo ö ænāni wæcā bai nē eñëñāmaï ingä adobaï tömengä wædænque pōni nänö eñente entawënö iñonte ö ænte bai cæbo dæ ba ate wæcæcäimpa.” Mänōmāinö ante Itota tömengä emīñænāni inänite odömonte apænecā eñëñānitapa.

Guiyämö pæpa, ante odömonte apænecā

²⁶ Ñöwo iñömö öömaque ongönāni inänite godömenque odömōninque Itota iīmaï ante apænecäimpa. “Waocā quiyacā ate awëmö pæ bai inte Wængonguï Awënë Odeye pönö cæcā ate tömengä nempo nē quëwënāni awëmö yebæninque bacoo pōni badānipa. Apænebo eñëedāni. Waocā gönea quiyate ate, ²⁷ woyowotæ mö ñōninque baänæ nāni ömæmōñongä iīmö iñö iīmö iñö tömēmö nänö quiyadīmö incæ awëmö tä bocate pæpa. Waocā iñömö, Æbämë cæte tä bocate pæpa, ante acantawogaa. ²⁸ Edæ onguipo beyænque tömengä nänö quiyadīmö incæ tä bocate pædinque æmonga æi cænguimæ baate ate ayæ cænguï yagapa. ²⁹ Yaga adinque, Amīñate cænguï bapa, ante edæ pete ængampa,” ante odömonte Itota apænecäimpa.

Möotatamö guidimö ante odömonte apäenecampa
(Mäateo 13.31-32; Odoca 13.18-19)

³⁰ Ayäe godömenque apäenedinque Itota, “Wængongui Awënë Odeye nempo æbänö quëwënanî, ante mönö quïnö odömonte ate ëñenguî. Edæ, Inguipoga quïnö pæte yebænte bai î adinque, Mäninänî adobai yebänänîpa, ante ëñengäimpa. ³¹ İmaî impa. Möotatamö mîni ænte quiyamö guidimö pönî î bai wamö mîni quiyamö adomonque incæ adobai guiyamö pönî î iñömö edæ dæ ampa. ³² Incæte möotatamö iñömö tä bocate pædinque möotatawæ edæ ocäñequi doyæ pæwæ bapa. Wîi tömäa ocäñequi mîni quiyadiwæ bai edæ ocäa inämaî inte möotatawæ iñömö edæ ñænæ awæ impa. Adinque tömëwæ ibæñömö ayamöidi gänë iñömö ponte ongönänîpa. Möotatamö guidimö incæ mänömaî pæ bai Wængongui Awënë nempo quëwënanî iñömö wædænque ininänî incæ nanguî yebænguinänî inänîpa,” ante Itota odömonte apäenegacäimpa.

Inguipoga nänî cæi bai impa, ante Itota odömongampa
(Mäateo 13.34-35)

³³ Ayäe Itota, Wængongui Awënë nempo quëwëninque æbänö cæquîi, ante ëñencädänîmpa, ante imæca quëwënanî nänî cæinö ante godömenque nanguî pönî odömöninque godongämæ ongönänî nänî ëñenganca apäenedinque idæwaa. ³⁴ Mäninonque bai odömonte apäenedinque tömënanî inänite cöwë godömenque apäenedämaî inongäimpa. Incæte tömengä miñæ në godäni adodänique ongöñönänite Itota edonque pönî, Mänömaî impa, ante tömänö ante apäenecä ëñengadänîmpa.

Itota angä ëñente woboyæ æpæ næ gongæmpa
(Mäateo 8.23-27; Odoca 8.22-25)

³⁵ Mänionæ gäwadecæ bayonte Itota tömengä ëmiñænänî inänite,
—Gäwapæ æmæmäa taocäimpa.
³⁶ Änînque ömaa ongönänî inänite ëmö cæte taocæ cædinque tömengä nänö apäened-
impodë adopodë ayæ contayongante mantadäni taocantapa. Adinque wadäni wapodë
godongämæ taodänitapa. ³⁷ Tao wogaa goyönänî woboyæ iñontobæ nanguî pönî
pæmäenînque æpæ mængonta mængonta pöninque gao gao wipodë änëñö, ³⁸ Itota
yæmiñæmpo bee podoncate mö ñongantapa. Ömämoncæcäimpa, ante tao cædinque,
—Awënë, bete wæncæ cæmompä mö ñömîi.
³⁹ Änänî ëñëninque ñänî ömäemonte ængæ gantidinque,
—Woboyæ, pæmäenämaî imäwe. Gäwapæ incæ cædämaî næ gongæmäwe.
Ante äñongä woboyæ pæmäenämaî iñö gäwapæ incæ næ gongæninque ñancæ ñancæ
gongæmäenîmpa. ⁴⁰ Ayæ tömënanî inänite,
—Mîni pönëegade, quimæ guiñëwëminîi.
⁴¹ Äñongä tömënanî ancaî guiñëninque nämæneque tededinque,
—Æcämë inte angä ëñente woboyæ incæ æpæ incæ gongæmpa, ante guiñente
wægadänîmpa.

5

Wënæ wentamö ewocacä tönö në quëwengä
(Mäateo 8.28-34; Odoca 8.26-39)

¹ İninque Itotaidi mänîi æmæmäa tao godinque Guedatabæ pö ti wæänänitapa.
² Itota mänömaî pöninque gäwapæ tao ti wæængä adinque onguïñængä wënæ wentamö
ëwocacä tönö në quëwengä inongä inte edæ waodänido quëwente tao bee tengantapa.
³ Tömengä waodänido cöwë në quëwengä ingante ædö cæte goto winguïnänîi. Daagö-
menca incæ täëmö impa goto winguïnänîi. ⁴ Ëno pönö goto wimænte wææ ëno pönö
goto wîwate bacæcäimpa, ante anca cæyönänî tömengä daagömë wangö ñæ wangö ñæ
cædongäimpa. Æcämænque incæ täi piñængä inte tömengä ingante ænguingäa. Edæ dæ
änongäimpa. ⁵ Itädë incæ woyowotæ incæ tömengä änanquidi æite wææ waodänido
pö änanquidi æite wææ ocæ ëmænte pö pö cæte Yæ yæ äninque dicaca nämä incæ

äwænonga äwænonga cæte wencata bai ēñate quëwëngäimpa. ⁶ Ìnque Itota go dibæ pongä adinque tömengä quingæ pogodo godinque Itota weca ædæ wææninque, ⁷ ogæ tededinque,

—Itota ēñemi, bitö nē Æibæ Quëwengä Wængonguī Wëmi inömi incæ quimæ botö weca pöwëë. Edæ, Åmogate wæcæcäimpa, ante botö imote cædämaī imäwe, ante nanguī angantapa.

⁸ Edæ tömengä tæcæ pö bee tēñongante wënæ ingante Itota iūmaī ante äningä inongäimpa.

—Wentamö nē wentamö ëwocabi inte ämo ēñëe. Bitö waocä baonga guidëmi inte ñöwo tao gobäwe, ante Itota täno angä ēñente wædingä inte wënæ ñöwo, Cædämaī imäwe, angantapa.

⁹ Ìnque Itota,

—Bitö æmömidö imii.

Åñongante,

—Tontadoidi tæiyænäni adinque, Deguiönö, änänipa. Mönitö adobai tæiyæ pönī imönipa, ante botö ëmöwo adobai Deguiönö ëmömopa.

¹⁰ Ante apænedinque ayæ, Mönitö imönite wabæca wido cædämaī incæbiimpa, ante ancaa angantapa. ¹¹ Mänñömö odæ wængänäidi nanguī inäni eyequeī änanquidi a cængönäni adinque, ¹² wënæidi incæ Itota ingante,

—Ïi odæ wængänäidi weca ämi godinque tömënäni baönë guite quëwëmönie.

¹³ Ante tedete äñönänite Itota Ao angä ēñente wædinque wënæidi wentamö ëwocadäni inömwö tao gote odæ wængänäidi baönë go guidänitapa. Ìnque odæncato dote müido ganca inäni incæ ontacamö cægöninque tömäne to wæi gäwapæno pogodo wæi guite becadote capo wænänitapa.

¹⁴ Becadote wænäni adinque odæ wængänäidi nē aadinäni guiquënë pogodo wodii winonte tömënäni quëwëñömö mäo bee tente apænedinque idömæ mäo gode ä gode ä cæte, Itota mänömaī cæcä wæmönipa, ante apænedäni ēñëninque wadäni, Æbänö cæcäi, ante acæte ante pönänitapa. ¹⁵ Itota weca ponte ayönäni wënæidi tönö nē quëwëningä incæ ñöwo önonganque bate weocoo ëñacä inte tæe contate ongongä adinque tömënäni, Mönö Deguiönö ënemocä äningä ingampa, ante guñente wægadänimpa. ¹⁶ Nē adinäni guiquënë ñöwo pönäni inänite apænedinque, Wënæ ënemocä iningä ingante Itota æbänö cæcäi, odæ wængänäidi inänite Itota æbänö cæcäi, ante apænedäni. ¹⁷ Ëñëninque tömënäni wæætë Itota ingante, Mönitö weca quëwënamäi gobäwe, änäni.

¹⁸ Ëñente wædinque wipodë go guicæ cæyongante wënæidi inte quëwëningä inömwö, Bitö miñæ mäobi goboe. ¹⁹ Åñongante Baa äninque Itota,

—Tömëmi oncönë gote, Wængonguī Awënë wënæidi inänite wido cæcä önömoque baboi amünipa, ante bitö guidënäni inänite mäo apænebi ëñencædänimpa. Ayæ, Botö wæwente quëwëñömote tömengä guëa wæwente bai pönente pönö cæcä waa batabopa, ante apænebi ëñencædänimpa.

²⁰ Itota angä ëñëninque wadæ godinque tömengä Decapodibæ mäo, Itota waa cæcä waa batabopa, ante apænece. Ëñente wædinque tömänäni, Æ æbänö cæte mänömaī waa bacäi, ante guñente wægadänimpa.

Gaido wëñængä beyæ cæcæ goyongante

onquiyængä Itota weocoo gampocampa

(Mäateo 9.18-26; Odoca 8.40-56)

²¹ Mänii wipodë guite tömengä imämäa ta ti wæængä ate nanguī inäni acæte ante pö goto goto godämæ gongänänitapa. Itota ayæ gäwapæ wedeca ongongantapa. ²² Ayæ ongönongä wacä oodeoidi odömwöincö awënë inongä inte tömengä ëmöwo Gaido inömwö Itota ingante adinque pöninque tömengä önöwaca gäänë ædæ wææninque, ²³ tömengä ingante,

—Botö wëñængä baquecä inömwö edæ dobæ wæncæ cæcampa cæbii. Bitö ponte tömengä ingante gampobi waa bate quëwëncæcäimpa, ante nanguī angantapa.

²⁴ Gaido mänömaï angä eñëninque Itota wæætë tömengä miñæ gocantapa. Idömæ goyongante nanguï inäni bee tente goto goto pönäni. ²⁵ Ìninqe godämæ ongönäni tönö onquiyængä adocanque wantæpiyæ dote wadepo iñonte wepæ wantæ bidämaï cöwë wææ wæwëningä inte adobaï ponte tömënäni miñæ gocantapa. ²⁶ Doyedë iñömö onquiyængä waa bawënencæte ante cædinque tömengä quincöo tömancoo eyepote pædæ godongä äninque dotodoidi tæiyænäni cædäni caate wæcä incæte tömengä waa bawënënämaï inte godömenque wënæ wënæ bate wædongäimpa.

²⁷ Mänömaï quëwente wæyongante wadäni, Itota mänömaï cæcampa, ante tededäni eñente wædinque tömengä ñowo goto pönäni tönö pöninque Itota önöñabæca inö ponte weocooque godö gampocantapa. ²⁸ Edæ, “Tömengä weocooque gampote waa bawënemote,” ante pönëningä inte, ²⁹ tömengä godö gampoyongä wepæ nänö gowete wæwënimæ wantæ bi ate tömengä, Wantæ biwënëmopa, ante önöwënenque pönengantapa. ³⁰ Itota iñömö, Æ, tæi piñante botö entawënö incæ edæ wacä beyæ cæquinque do gotimpa, ante wæwënente awædö, äninque goto gongænäni tæcæguedë næ gongæninque dadi ëmænte cöwä adinque,

—Botö weocoo æcänö pönö gampodaï, angantapa.

³¹ Äñongante tömengä nänö në ëmiñænäni guiquënë,

—Ënodäni pönänipa aquimii. Æcänö gampodaï, ante ämii.

³² Wææ änäni incæte tömengä, Æcänö botö imote wede pönëninque gampodaï, ante godömenque tömão cöwä cöwä acantapa. ³³ Ayongante onquiyængä guiquënë, Wampo bawënëmopa, ante pönëningä inte nanguï guñëninque do do wäate wædinque Itota weca ponte ædæ wææncate tömänö ante töingä apænecä eñengantapa. ³⁴ Apænecä eñëninque Itota wæætë,

—Onquiyæmi eñëmi. Bitö wede pönënö beyæ edæ wampo bawënëmipa. Ñowo edæ wädämaï inte waa godinque nö bawënente quëwëe, angantapa.

³⁵ Ante tæcæ apæneyongä oodeoidi odömöincö awënë Gaido oncönë quëwënäni mäniñedë pöninque edæ Gaido ingante apænedänitapa.

—Bitö wengä iñömö ñowo æmæwo wængampa cæbii. Ñowo Awënë në Odömongä ingante quinante godömenque anguii.

³⁶ Ante ponte äñönänite Itota tömënäni æbänö tededäni ante eñënämaï inte baï cædinque oodeoidi odömöincö awënë Gaido ingante apænedinque,

—Guiñënämaï inte önonque wede pönëe, angantapa.

³⁷ Ayæ godongämæ ongönäni inänite, Ee ongödäni, äninque Pegodo ingante, Tantiago tönö Wäö nana caya inate mänimpodänique inänite ænte gocantapa. ³⁸ Tömënäni tönö godinque Itota tömënäni odömöincö awënë oncönë ponte ayongä mänincönë woadäni nanguï cægöninque edæ Ca ca wædinque ogæ tedete Yæ yæ änäni acantapa.

³⁹ Adinque Itota oncönë guidinque,

—Quimæ ogæ tedete cægöwëminii. Quimæ Ca ca wæminii. Ìñæmpa iñömö wëñængä wodi edæ wii æmæwo wængantapa. Edæ mö ñongampa.

⁴⁰ Ante apænecä eñëninque tömënäni, Angantedö amïni, ante tömengä ingante badete todänitapa. Itota wæætë edæ, Gä goedäni, angä oncodo tao godänitapa. Ìninqe wëñængä wæmpo tönö wäänä inate Itota tömengä miñæ në pöninäni tönö mänimpodänique inänite ænte manguiçä wëñængä wodi nänö öñoncönë wäänë guidänitapa.

⁴¹ Wëñængä wodi ingante Itota pædæ wææmpo bæi ongonte töö æmæninque,

—Tadita cömi, äninque mönö tededö, “Wëñæmi onquiyæmi ængæ gantibi,” angantapa.

⁴² Angä eñëninque wëñængä baquecä dote wadepo eñadingä inte dobæ ængæ gantite dao dao gocä. Adinque tömänäni ancai guñente wædänitapa. ⁴³ Itota wæætë, Botö æbänö cæboo, ante minitö mão apænedämaï iedäni. Äninque edæ wëñængä beyæ cænguï angä godöna cængantapa.

6

Näatadeta iñömö ponte Itota apænecampa

(Mäateo 13.53-58; Odoca 4.16-30)

¹ Itota wadæ godinque tömengä miñæ në godäni tönö tömengä nänö pægaiñömö pongadänimpa. ² Ayæ, Guëmanguïönæ impa, äninque Itota tömënäni odömöincönë go guidinque tæcæ odömönte apænecä ëñëninque mäniñömö ongönäni nanguï inäni guïñente wædinque näni caboque tededänitapa.

—İingä iñæmpa ædö cæte nanguï ëñente apænecää. Æbänö cæquïi, ante æcänö tömengä ingante godö odömongä adinque tömengä mänömaï bamönengæ cæcää, ante ëñencæte ante wæmönipa. ³ İingä iñæmpa mönö awæmpa në timöwengä imaingä inte bamönengæ mänömaï cæcampa, ante awædö. Edæ Mäadiya wengä inongä inte tömengä iñömö önönänique mëmö ingampa. Tantiago tönö Ootee, Codaa tönö Timönö tömënäni mëmö inämaï ingantawogaa. Tömengä biwinqueidi incæ mönitö tönö wïi ongönäni atamöö.

Ante pönente wædinque tömengä beyæ ante püinte badänitapa. ⁴ İninque püinte badäni adinque Itota wæætë angantapa.

—İñæmpa, Wængonguï beyæ në apænecä inte tömämæ gote apæneyongante tömengä ingante waa adänipa. Wæætë tömengä nänö pægaiñömö ponte apæneyongante mäniñömonque wæætë wiwa adänipa. Tömengä nänö guidënäni tönö tömengä oncönë owodäni tönö mänimpodänique tömengä ingante wiwa adänipa töö.

⁵ Äninque Itota adopoque adopoque gampocä waa badänitapa. Mänömaï wædænque cædinque tömengä, Ædö cæte gomonga cæquïmoo. ⁶ Äninque, Mïni pönëegade. Quïnante pönënämaï imïni, ante wægacäimpa.

Wængonguï Awënë ingantedö ante apæneedäni, ante Itota angä godänipa

(Mäateo 10.5-15; Odoca 9.1-6)

Ayæ wayömö näni quëwëñömö wayömö näni quëwëñömö mäo odömöninque Itota apænecä ëñengadänimpa. ⁷ Ayæ, Dote inäni, näni änönäni inänite aa pecä pönäni ininque, Ñöwo mïnitö æmænö mëmïnaa æmænö mëmïnaa goyöminite botö pönö cæbo ate mïnitö awënëidi bai badinque edæ wënæidi wentamö ewocadäni inänite në ämïni incämïnimpä, ante da godongä godänitapa. ⁸ Ayæ, İimaï cædäni, angantapa. Mïnitö taadö godinque ongontoque mïni nææntoque næænte goedäni. Cænguï incæ mäincoo da wenguincade incæ ænämaï inte godinque tigitamö önoncamoncadädë da wënämaï inte ömæpomïni goedäni. ⁹ Awæncata mïni ewataque ewate weocoo mïni ëñacooque ëñadinque wacoo ænämaï goedäni, angantapa. ¹⁰ Ayæ godömenque äninque Itota,

—Godinque æcönënö täno go guimïni owodinque mïnitö wayömö mïni go quëwëngüganca mänincönenque go guii go guii cædinque quëwëedäni. ¹¹ Æyömmöme goyöminite wadäni, Pöedäni, änämaï inte mïnitö apænedö ante wïi ëñënäni wædinque mïnitö wæætë tömënäni inänite ëmö cæte iïmaïnö ante goedäni. Mïnitö iñæmpa, Pöedäni, änämaï imïni adinque mönitö gomöni tamëñedäni, ante odömoncæte ante mïnitö önöwa wadæ wadæ cæwadinque wadæ goedäni.

¹² Äninque Itota tömengä ëmïñænäni inänite, Ñöwo goedäni, äninque da godongä godänitapa. Godinque tömënäni wabæca quëwënäni inänite mäo, Mïnitö wënæ wënæ mïni cædinö ante wæwente pönëninque ñimpo cædäni, ante mäo apænedäni ëñënänitapa. ¹³ Wënæidi nanguï inäni inänite widö cædänitapa. Ayæ woadäni nanguï inäni wënæ wënæ inte wädäni iñönänite oginguipæ öni öni paadäni ate waa bagadänimpa.

Wäö æpænë në guidönongä wængampa

(Mäateo 14.1-12; Odoca 9.7-9)

¹⁴ Itota ëmöwo ante apænedäni ëñëninque tömämæ quëwënäni do ëñëninque gode ä gode ä cæte tedeyönäni Edode pancabaa awënë odeye incæ, Itota æbänö cæcää, ante ëñengacäimpa. İninque tömengä iñömö,

—Æpænē nē guidōnongā Wäo wodi dobæ wænte ñāni òmæmōningā inte iingā Itota iñōmō imaingampa. Māninō beyænque tōmengā tæi piñænte entawēnongā inte nē nanguī cæcā ingampa, ante pōnēmopa, angantapa.

¹⁵ Ayæ wadāni,

—Ediya wodi imaingampa.

Ante tedeyōnāni wadāni wæætē,

—Wængonguī beyæ nē apænegaīnāni bai tōmengā adocā imaingampa.

¹⁶ Ante tededāni ēñēninque Edode iñōmō,

—Botō nē wangō tamencadongā Wäo wodi adocā incæ edæ ñāni òmæmonte a ongōmaingampa, ante wædongäimpa.

¹⁷ Wäo wodi iñōmō iimaī wængacäimpa. Do iñedē awēnē Edode nānō tōniñacā Pedipe ayæ mīingā iñongā Pedipe manguiwēningā Ædodiya ingante Edode iñōmō, Botō nānōogængā bacæcäimpa, ante ò ænte mongā. Ìninque tōmengā adocā Wäo wodi ingante bæi ongonte goti winte tee mōnedongäimpa. ¹⁸ Edæ Wäo iñōmō nānō caate wænguinque Edode ingante iimaīnō ante do wææ āningā inongäimpa. “Edode ēñēmi, Wængonguī nānō angāinō bai ēñēnāmaī inte bitō tōniñacā nānōogængā ingante edæ manguiwēmipa tōö.”

¹⁹ Ante wææ angā ēñēninque Ædodiya guiquēnē Wäo nānō āninō beyæ cōwē pīininque tōmengā ingante wænoncæ cæcā incæte ædō cæte tōmengā ingante wænonguingā.

²⁰ Edæ, Wäo tæiyæ waēmō onguīñængā inte nē nō cæcā ingampa, ante do ēñēnongā inte Edode iñōmō Wäo ingante edæ guīñente wædongā inongäimpa. Ìninque tōmengā ingante edæ wææ gompodongäimpa. Ayæ Wäo apænecā ēñēninque Edode, Angā ēñente æbānō cæquimoo, ante nanguī wæcā incæte tōmengā ingante ēñēninque todongäimpa.

²¹ Ìncayæ ate Edode nānō ēñagāiōnæ iinque bayonte Ædodiya, Æōnædō wænonguimoo, ante nānō āniōnæ eyepæ batimpa. Edode iñōmō, Māniōnæ bai ēñagaboimpa, ante ææmæ cædinque wente ængā ate tōmengā miñæ awēnēidi tōnō tontadoidi awēnēidi tōnō Gadideabæ quēwēnāni awēnēidi tōnō tōmānāni becæ pōnānitapa. ²² Ponte bete cængōñōnāni Ædodiya wengā baquēcā incæ tæcæguedē pō gongænte tode pete āwacā adinque awēnē odeye Edode tōnō godongāmæ ongōnāni nanguī todōnānimpa. Ìninque baquēcā ingante Edode ānongäimpa,

—Waa pōni bitō tode pete āwadī beyænque bitō quiēmē ante æinente āmi ate botō ēñente da pōnōmo æe.

²³ Äninque ayæ godōmenque āninque, Wængonguī ēñēñongā nōingā āmopa, ānongäimpa. Quiēmē impa bitō æinēmi botō tōmāā edæ do godōmo æncæbiimpa. Edæ bitō æinente āmi iinque botō awēnē odeyebo inōmo inte botō ēnempodō incæ edæ tæcæ pā cæte pōnōmo æmaīmipa. ²⁴ Angā ēñēninque taodinque,

—Badā ēñēmi, quīnō anguimoo.

Äñongante wānā edæ do,

—Botō iimaī āmopa, ānantapa. Wäo æpænē nē guidongā ocabo wangō tomencate pædæ pōnōmi æmoe, ancæbiimpa, āmopa.

²⁵ Änā ēñēninque awēnē weca do ponte guidinque baquēcā wæætē,

—Wäo æpænē nē guidongā ingante wangō tomencate tōmengā ocabo iñi coyomēnætaca cō cæte do pōnōmi æmoe.

²⁶ Angā ēñente wædinque awēnē odeye iñōmō, Æ ēñente awædō. Quīnō ñōwo cæquimoo, ante nanguī wædongäimpa. Incæte tōmengā, Botō iñæmpa godongāmæ becōnāni ēñēñōnānite, Wængonguī ayongā cōwē godoncæboimpa, ante nē ānimo inte edæ ædō cæte ñōwo Baa anguimoo. ²⁷ Ante pōnente wædinque tōmengā nānō āninō, Cōwē godonguī impa, ante pōnēninque Edode wæætē nē wænongā ingante, Bitō godinque wangō tomencate ænte māmōmi ængæe. ²⁸ Angā ēñēninque nē wænongā wæætē tee mōnincōnē gote guidinque Wäo ingante wangō tomencacā wængantapa. Ayæ Wäo ocamō iñi coyomēnætaca cō cædinque baquēcā weca ænte māmō pædæ pōnongā æninque baquēcā wæætē wānā inante godongā ænōnāimpa.

²⁹ Mänömaï wængäimpa, ante gode änäni eñente wædinqe Wäo wodi tömengä miñä ne godinäni incæ pöninge tömengä baö ini ænte mäo daga wengadänimpa.

5.000 ganca inäni inänite Itota godongä cænänipa

(Mäateo 14.13-21; Odoca 9.10-17; Wäo 6.1-14)

³⁰ Mänii Itota ne nänö da godöninäni iñömö ocä emænte ponte godämæ gongænte, Mänömaï cætamönipa. Mänömaï odömönte apænemöni eñänanitapa. ³¹ Ante apænedänitapa. Ayæ, wadäni nanguï owentædæ pænta owentædæ pænta wææ cægönäni adinqe tömönäni ædö cæte cæquänäni. Cænguï incæ ædö cæte cænguänäni. Adinqe Itota,

—Minitö adomînique botö miñä önömæca gote wædænque guëmæedäni, angantapa.

³² Angä Ao ante tömönäni adodänique Itota miñä wadæ godinqe önömæca gocæte ante wipodë wææ contate wogaa godänitapa. ³³ Goyönänite wadäni guiquënë, Itotaidi incæ godänipa, ante adinqe wacönë ta wacönë ta godinqe tæiyänäni tee ta tee ta go ömaaque oo pænta pogodo gote do edæ pöninge a ongönänitapa. ³⁴ Ayæ wipodë wogaa mämö tæcæ æænöncaoyönäni Itota iñömö ti wæænte ayongä nanguï inäni do ponte a ongönäni acantapa. Tömönäni ne aacä dæ añongä obegaidi quëwenguänäni inäni inte adodänique ongönäni bai inäni inte wæwänänipa, ante pönente tömengä tömönäni tönö godongämæ wæwente bai pönengantapa. Ininqe nanguï odömönte apænecä eñänanitapa. ³⁵ Ayæ gäwadecæ bayö Itota miñä ne godäni tömengä weca ponte äninque,

—Ñöwo wëmö bacæ cæpa cæbii, änänitapa. Ayæ, Önömæca incæ cænguï dæ ampa.

³⁶ Inäni inänite ämi idömæ owodäni weca godinqe ayæ nanguï inäni nani quëwëñömö godinqe cænguï godonte cænguänänie.

³⁷ Äñönänite Itota wæætë,

Minitö wæætë godömini cæncædänimpa, ämopa.

Äñongante,

—Æ, ënodäni inäniyaa. Inæmpa ocho apäicä cæte beyæ paga æinta æninque mänimpota päö ante godonte æninque edæ wii eyepæ imaimpa. Mönitö wadæ gote mänimpota beyæ päö godonte æninque iñömö godongämæ ongönäni inänite godömöni cænguänäni, ämitawoo.

³⁸ Ante wæyönänite Itota,

—Päö æpodö nææminii. Acæ goedäni.

Angä atë pöninge,

—Päö önömpo æmæmpoque gæyæ mäa pönii mä ongompa.

³⁹ Ante apænedäni eñäninqe Itota godongämæ mä ongönäni inänite, Ñöwo mîni cabo mîni cabo gaguimäa tæ contaedäni. ⁴⁰ Angä eñäninqe pancadäniya tiëë ganca nani cabo nänënë pancadäniya tincoenta ganca nani cabo nänënë tömänäni nani cabo nani cabo tæ contadänitapa. ⁴¹ Tæ contadäni ate päö önömpo æmæmpoque gæyæ mäa æninque öönädë inö æmö adinqe, Wængonguï, bitö waa pönömi ænte cæmönipa, ante apænedinqe päö pä pä æ cædinqe tömengä, Nanguï inäni cænguï ante ænte mäo cö cædäni, ante tömengä miñä ne godäni inänite pædæ pönongä æninque mäo cö cædänitapa. Ayæ gæyæ mäa iñönte adobai æninque tömengä tömänäni inänite di mäñä di mäñä cæcä æninque cænänitapa. ⁴² Äninque tömänäni tömo pönii cænäni, ⁴³ ate edæ tömengä emiñänäni päö tönö gæyæ nani ao mænte ñönöni ee öñoncoo pædæ wææmpo ö æ da da wente æninque otodë önömpo tipæmpoga go mentodëa cænguï eyede da wänäni contagatimpa. ⁴⁴ Në cænäni iñömö onguñänäni edæ tinco müido ganca mänimpodäni nanguï inäni nani wencabo cængadänimpa.

Itota yædopæ dao dao gocampa

(Mäateo 14.22; Wäo 6.16-21)

⁴⁵ Itota ayæ do tömengä nänö ne emiñänäni inänite, Ægodöedäni. Minitö täno wipodë guite æmä wedeca Betaida tao goyömini botö wæætë wadäni ne cænänäni inänite ämo godäni ate pömoedäni. ⁴⁶ Angä Ao ante tao goyönäni tömengä wadäni

inänite wæætē angā godāni ate adocanque ongonte Wængonguī ingante apænecæte ante ānanquidi æicantapa. ⁴⁷ Ayæ wēmō bayō tōmēnāni tæcætibæ wogaa goyōnāni tōmengā adocanque ōmaa ongonte ayongā, ⁴⁸ tōmengā nānō ēmiñænāni wiyate taocæ cæyōnāni edæ woboyæ nanguī pæmænte pōnōmenque ænte pō ædō cæte goquīnānii. Adinque tawadiya nānō peyedē edæ tæcæpæ pōnī ī gāwapæ wænōmēnæcapæ inō edæ Itota iñōmō æpæno yædopæ dao dao obo ponte wodo pænta gocæ cæcantapa. ⁴⁹ Yædopæ edæ gocā gomō adinque tōmēnāni Yæ āninqe, Waocā wænte babæningā wabānō cægongā, ante wædānitapa. ⁵⁰ Edæ tōmengā ingante adinque tōmānāni ancai guīñente wædānitapa. Tōmengā iñōmō tōmēnāni inänite do apænedinque,

—Ee piyænē cæte guīñēnāmaī iedāni. Botō īmo apa guīñēwēmīnii.

⁵¹ Āninqe wipodē pō guicā ate woboyæ incæ næ gongæ pæmænāmaī batapa. Ba adinque tōmēnāni godōmenque guīñēninqe, Quinante mānōmaī cæ, ante wædānitapa. ⁵² Edæ, Itota æbānō iñontobæ pāo nanguī pōnī pōnō badongā, ante nē adināni incæte tōmēnāni mimō ōmædē ināni inte baī wīi pōnente wægadānimpa.

Caate wædāni inänite Itota cæcā waa badānīpa
(Māateo 14.34-36)

⁵³ Ayæ æmæmāa taodinqe tōmēnāni Guēnetadetebæ ti wææninqe wipo ñā cæmencadānitapa. ⁵⁴ Mānōmaī ti wæænte ñā cæmencayōnāni māniñōmō quēwēnāni guiquēnē, Tōmengā Itota ingampa, ante do adānitapa. ⁵⁵ Ante adinque māniñōmæ tōmāo pogodo godinque wēnæ wēnæ wæwēnāni inänite ñōnæmpado ñō cædinque, Itota æyōmōnō ongongāā, ante ēñēninqe tōmēñōmō tōmengā nānō ongōñōmō do ænte pōnānitapa. ⁵⁶ Ayæ wadāni nāni nanguī pōnī quēwēñōmō incæ wædænque nāni quēwēñōmō incæ idōmæ incæ, Itota ædōmē gocāā, ante adinque wadāni wæncæ cædāni inänite māniñōmō ænte māmō taadō wedeca ñō cædāni ōñōnānitapa. Iñāni wæætē tōmengā ingante, Bitō weocoo yæwedecooque āmi gampote waa bamōnie. Ante wæyōnānite, Ao angā ēñente nē gampo gampo cædānique tōmānāni waa ināni bagadānimpa.

7

Mimōno tao godī beyænque waocā wentamō ēwocacampa
(Māateo 15.1-20)

¹ Ayæ Paditeoidi tōnō nē wææ odōmōnāni tōnō pancadāniya Eedotadēē quēwente māniñēdē Itota weca ponte godongāmæ gongænte ayōnāni, ² Itota miñæ nē godāni pancadāniya mempodāmaī inte wentamō empote cænāni adānitapa. ³ Edæ dodāni, Ōnompō ædæmō mempoīnānique cæncædānimpa, ante nāni wææ angainō ante Ao āninqe, Bapogabo cæte wæcæ wæ, ante Paditeoidi tōnō oodeoidi tōmānāni ancaa mēmpote ate cænōnāni inānīpa. ⁴ Ayæ, Ædæmō āadānique cænguīnāni inānīpa, ante pōnēninqe oodeoidi nāni godonte æiñōmō gote pōninqe ædæmō āate ate cænānīpa. Ayæ dodāni godōmenque nanguī nāni wææ angainō ante pōnente Ao ante cædinque tōmēnāni owæta cængæ tiguicade awæmpa tōmancoo ancaa mēnongate quēwēnānīpa. ⁵ Ininqe dodāni nāni wææ angainō ante Ao ante tōmānō ante ēñente cæte quēwēnāni inte Paditeoidi tōnō nē wææ odōmōnāni ñōwo iñōmō Itota ingante edæ piñte āninqe,

—Bitō miñæ nē godāni iñōmō quīnante dodāni nāni angainō ante ēñēnāmaī inte wentamō nampote cænguī cænānii.

⁶ Ante piñnāni wædinque Itota wæætē,

—Mīnitō guiquēnē waa cæmīni inte baī nē ānewēmīni iñōmīnite mīni cædō ante Wængonguī iīmaī apænecampa, ante Itaiya wodi nōingā ante yewæmongacāimpa. “Iñāni iñōmō botō īmote ōñoneque waa apænete baī tededāni incæte, tōmēnāni mimōno æmæ pōnente edæ gobæ ongonte baī ināni awædō.

⁷ Ayæ botō īmote waa ate baī ædæ wæænte tededinque, Wængonguīmi īmidō anguēnē, ante apænedāni incæte tōmēnāni botō īmote ōnonquedō ante cædānīpa. Waodānique nāni wææ ānōnō ante odōmonte apænedānīpa tōō.”

Ante Wængongui pïingampa, ante yewæmongacäimpa. ⁸ Edæ Wængongui, ïimai cæedäni, ante nänö wææ angainö ante Baa änimini inte minitö waodänique nani änewenö ante Ao ante cæminipa töö, angantapa.

⁹ Ante apænedinque Itota godömenque,

—Minitö dodäni nani angainonque ante ëñente cæcæte ante cædinque Wængongui nänö wææ angainö ante wido cædinque dicæ waa cæminiyaa. ¹⁰ Möitee wodi, “Bitö Wæmpo ingante bitö badä inante waadedinque waa cæe,” angacäimpa. Ayæ, “Waocä wæmpocä ingante wäänä inante pïinte wænæ wænæ angä ininque minitö tömengä ingante wænömini wæncæcäimpa,” ante wææ ante yewæmongacäimpa. ¹¹ Incæte minitö ïimainö ante wææ cæminipa. Waocä mæmpocä ingante waa cæquëngä ïñongante wäänä inante adobai waa cæquëngä ïñongante minitö wæætë wææ äninque, Bitö wæmpocä ingante wäänä inante apænedinque ïimai ante apænegacäi-impä, änewëminipa. Bitö, “Mæmpo, bitö qui, ante, Badä, minö qui, ante do botö pönonguënönö incæ ñowo wæætë Wængongui ingante do edæ godonte impa,” ante, Codobänö nani änö impa, ante apænegacäiimpä. ¹² Äninque minitö Wæmpo beyæ wäänä beyæ nê cæquëngä ingante wææ ämini beyæ tömengä wii cæcampa. ¹³ Mänömai cædinque minitö dodäni nani angainö mini Ao ante äñinonque ante ëñëninque Wængongui nänö angainö ante edæ, Öñoneque impa, ante bai cæminipa töö. Ayæ adobai wapiticæ äninque minitö wadö wadö cædinque wænæ wænæ cæminipa töö, ante Itota apænegacäimpa.

¹⁴ Ayæ nanguï inäni inänite Itota aa pecä pönönänite apænegacäntapa.

—Minitö tömämäni iminite apænebo ëñëninque ocaidë pönente ædæmö ëñëedäni. ¹⁵ Quincoomë yabæque ongoncoo incæ waocä önönë guidi beyænque tömengä mimö dicæ wentamö entawengüngä. Wæætë mimönë wiwa pönëninque nänö tao godincoo beyænque mimö wentamö mongængampa, ante apænebo ëñëedäni.

¹⁶ Èamonca ongonte ëñëedäni.

¹⁷ Ante apænedinque Itota nanguï ongönäni inänite ëmö cæte oncönë gote wäänë guicä ate tömengä nänö nê ëmiñänäni guiquënë, Mänömainö ante odömonte apænedinque bitö æbänö ante odömoncæte ante apænebitapa, ante ëñencæte ante wæmönipa.

¹⁸ Ante wæyönänite Itota,

—Minitö incæ ocai ömæcadäni bai inömini inte ëñënämai iminitawo. Cængui incæ waocä mimönë guiipa wentamö ëwocaquingä. ¹⁹ Edæ wii mimönë guiipa. Wæætë cæncadë guiite goiwaä ogä mente wido cæquinque i apa änewëminii.

Mänömainö äninque Itota, Tömää cængui waëmö impa, angacäimpa. ²⁰ Äninque godömenque,

—Mimönë wiwa pönëninque nänö tao godincoo beyænque waocä wentamö ëwocacampa. ²¹ Edæ mimönë nänö entawente taodinö beyænque waocä önöwëninque wænæ wænæ ante pönengampa. Mimönë towëinente nänö pönönö beyænque waocä godö towente quëwengampa. Mimönö äinente wædinque wacä qui awëmö ængampa. Mimönë nänö pïinte pönönö beyænque godö wænongampa. Nänöogängä inämai ïñongante waocä mimönë towëinente nänö pönönö beyænque godö mongampa. ²² Mimönë nanguï äinente wædinque mäincooque ante pönëwengampa. Mimönë nänö taodi beyæ wacä ingante pïinte cæcampa. Mimönë pönëwëninque, Wacä edæ oda cæcädänimpä, ante babæ cæcampa. Wiwa nänö pönëwënö beyænque quingämë bai cæte quëwengampa. Mimönë nänö pïinte adö beyæ waocä, Wacä bai ñänämo pönï bacæboimpä, ante cæcampa, ayæ wacä ingante godö wænæ wænæ ante babæ angampa. Mimönë nämä ante waa ate nänö pönönö beyænque, Tömëmoque waëmö imopa, ante nämä waa acampa. Mimö ömædengä inte ëñënämai cæte önonque quëwengampa. ²³ Mänii wiwa cæpämö tömämämo mimönë nänö pönönö beyænque waocä wentamö ëwocacampa, ante Itota apænegacäimpa.

*Onquiyæ oodeo inämai inte Itota ingante pönente angä
(Mäateo 15.21-28)*

²⁴ Mäniñömö quëwente godinque Itota Tido eyequei gogacäimpa. Ayä, Awëmö guite owoyömo wadäni adämaï incädänimpa, ante pönëninque oncönë pö wäänë guite ongonä incæte ædö cæte wii aquinänii. ²⁵ Edæ, Itota owocampa, ante do tededäni ëñëninque wacä wäänä, Botö wengä onquiyängä iñömö wënæ nê wentamö ewocacä ingante ënemocampa, ante wædinque Itota weca ponte ædæ wæænte apænecantapa. ²⁶ Itota ëñëmi. Wënæ botö wengä tönö nê quëwengä ingante wido cæquimi, angantapa. Mäniï onquiyängä Tidopënitibæ nê ëñagaingä inte guidiego tededö nê tedecä inongä. ²⁷ Adinque Itota, Wii oodea onquiyängä inongampa, ante wædinque angantapa.

—Wënäni cænguï inguënë waocä dicæ quintamöidi cænguï ante wææntodonguingä. Bitö edæ wabi iñömite botö bitö beyä ædö cæte cæquimoo.

²⁸ Äñongante,

—Awënë iñæmpa wëñænäni cænguï cæninque eyepodäni wæænte ænömengadæmpa inö öñöñö quintamöidi ade cæmpa.

²⁹ Ante apæneyongä Itota,

—Bitö nö apænedimi inte waa gocæbiimpa. Wënæ bitö wëñängä nänö wädö incæ dobæ edæ ëmö cæte wadæ gotimpa.

³⁰ Angä ëñëninque oncönë go guite ayongä tömengä wëñängä önonganque bate möimoga ongonä agacäimpa.

Babetamoncacä ingante Itota waa cæcampa

³¹ Mäniï Tido gote quëwëninque Itota wadæ godinque Tidöo wodo pænta gocanque go Gadideapæ wedeca poncæ cædinque Decapodibæ yaatænque pongantapa. ³² Gadideapæ wedeca pongä adinque wacä önömonca babetamoncacä inte önöne wapiticæ tedecä ingante Itota weca ænte pöninque, Gampo cæbi waa babaingampa. ³³ Äñönäni Itota babetamoncacä ingante nänënë ænte godinque önömonca pædæ guipomonca-cantapa. Ayä nämä önompo towæ tänompodinque wapiticæ tedecä ingante godö gampo cæguënëwacantapa. ³⁴ Ayä öönädë inö æmö adinque öö guëmante äninque babetamoncacä ingante, “Epata,” äninque mönö tededö, “Önömonca wi æmoncabäwe,” angantapa.

³⁵ Äñongä edæ önömonca tee mömoncate bai inï wi ænete bai badinque önonguënëwa ñimæncæguënëwa gote bai cæguënëwadinque töö tedecantapa. ³⁶ Itota, Botö cæbo nê adimini inte gode änämaï iedäni, äninque ancaa angä incæte nê adinäni iñömö godömenque nanguï gode ä gode ä cæte tededäni ³⁷ Eñente wædinque tömänäni nanguï guñëninque, “Edæ önömonca babetamonca ininäni inänite Itota cæcä ate önömonca ëñënanäni badäni. Önöne babetade ininäni inänite cæcä ate önöne tededäni badäni atamönipa. Tömää edæ waa cæcä ingampa,” ante nanguï tedete wægädänimpa.

8

4.000 ganca inäni inänite Itota godongä cænänipa

(Mäateo 15.32-39)

¹ Mäniñedë wadäni tæiyä pöni inäni ponte ëñëñönäni tömënäni cænguï dæ ä adinque Itota tömengä miñæ nê godäni inänite aa pecä pönäni ate,

² —Inäni botö weca ongönäni iñömö mëönaa go adoönæque iñonte botö weca ongöñönäni tömënäni cænguï ömæpodäni badäni ate wædinque botö tömënäni tönö godongämæ wæte bai nanguï pönëmo imopa. ³ Cænämaï inte gue ænente wæyönänite botö, Oncönë goedäni, ämo gote bai tömënäni edæ idömæ godinque tepæ gæwëninque edæ nangæ badinque bocæ bocæ cæte wæcædönänimpa. Edæ pancadäniya gobæ quëwente pönäni abopa.

⁴ Ante apænecä ëñente wædinque tömengä miñæ nê godäni wæætë,

—Inæmpa önömæca incæ päö impa æninque godömöni cænguïnänii.

⁵ Ante wæyönänite Itota,

—Päö æpodö nææmïni. Äñongante,

—Önompo æmæmpoque go mëa më ongompa.

⁶ Ante apäneyönäni Itota godongämæ nanguï ongönäni inänite angä onguipoiya tæ contadänitapa. Ayæ päö önompo æmæmpoque go mäa näni næänincoo pædæ godönäni æninque tömengä Wængongui ingante, Bitö waa pönömi cæncæmönimpa, ante apänedinque pä æninque tömengä miñæ nê godäni inänite, Pædæ godö pædæ godö cæmïni cæncædänimpa, ante godongä æninque wadäni inänite godäni ænte cænänitapa. ⁷ Ayæ gæyæ mäa pönï næänänitapa. Mänïi näni næænï æninque Wængongui ingante apänedinque adobaï angä pædæ godö pædæ godö cædäni. ⁸ Æninque tömö pönï cænänitapa. Ayæ idæwaa cænäni ate tömënäni pä ænte näni cænte ñönönï ee öñoncoo wente æninque Itota miñæ nê godäni otodë pönö da wënänitapa. Æninque önompo æmæmpoque go mentodëa cænguï eyede contagatimpa. ⁹ Nê cænäni iñömö onguïñænänique ante tee mampote coatodo miïdo ganca bai inäni inte ongönönänimpa. Æninque cænäni ate Itota angä wadæ godänitapa. ¹⁰ Godäni ate Itotaidi do wipodë gui contate cæwodinque imæmäa pöninque Dadämänotabæ pongadänimpa.

*Mä cæte odömömi amönïe, ante Paditeoidi änänipa
(Mäateo 16.1-4; Odoca 12.54-56)*

¹¹ Itota pongä adinque Paditeoidi ponte bee téninque tömengä ingante, Æbänö cæbii, æbänö ämii, ante ancaa änänitapa. Ayæ, Mönö ämö ëñente tömengä oda cæbaingampa, ante cædinque Itota ingante apänedinque, Bitö, Pönencædänimpa, ante öönædë mä cæi bai cæbi amönïe. ¹² Änäni ëñëninque Itota, Ancaa änäni awædö, ante wæwente badinque öö öö ante guëmangantapa.

—Ïñæmpa ñöwomïni, Mä cæte odömömi adinque pönëmaimönipa, ante ancaa ämïni awædö. Näwangä ämö ëñëdäni. Ñöwomïni imïnite mä cæte odömönämaï ingæimpa.

¹³ Ante äninque tömënäni inänite emö cæte godinque wipodë guiite æmæmäa taocæ cæte cæwodinque wadæ gocantapa.

*Wapiticæ apänedäni ëñëninque gomö aedäni, angampa
(Mäateo 16.5-12)*

¹⁴ Mänïi æmæmäa näni tao gocæ cæyedë tömengä miñæ nê godäni guiquënë päö wïi pönente ænämaï inte godäni ininque päö adoque pönï näni wëenëñedë ñönöninque wipodë öñompa. ¹⁵ Itota iñömö mänïi päö tömënäni näni ænämaï inö ante wïi tededinque wadö ante pönente apänenecantapa.

—Päö yedæ æmpoqui, ante Paditeoidi tönö Edode näni da wente cæi ate gomö aedäni. ¹⁶ Angä ëñente wædinque tömengä nänö nê emiñænäni wæætë näni caboque tededinque, Päö ænte pönämaï imöimpa, ante Itota wabänö mänömaï beyæ ämaingampa.

¹⁷ Ante nämäneque tededäni wædinque Itota wæætë tömënäni inänite, —Päö ænämaï inte mïni pöninö ante quimæ tedewëminii. Botö päö ante dicæ wæboga. Nanguï cæbo adimïni inte mïnitö ayæ ëñënämaï imïnitawo. Edæ mimö ömædëminii inte tedewëminipa, ante awædö. ¹⁸ Edæ awincaque adinque ayæ adämaï imïnitawoo. Önömoncaque ëñëninque ëñënämaï imïnitawoo. Edæ botö æbänö cætabopa, ante adimïni inte edæ wïi pönëmïnitawo. ¹⁹ Päö önompo æmæmpoque botö pä ænte godönï incæ tincö miïdo ganca inäni näni cænte ñönönï ee öñöñonte æpotodënö cænguï wente æmïnii.

Äñongante,

—Önompo tipæmpoga go mentodëa.

²⁰ Ayæ päö önompo æmæmpoque go mäa guiquënë coatodo miïdo ganca inäni näni cænte ñönönï ee öñoncoo æpotodënö cænguï wente æmïnii.

Äñongante,

—Önompo æmæmpoque go mentodëa.

²¹ Apänedäni ëñëninque tömengä edæ,

—Ïñæmpa Tadoteoidi tönö Paditeoidi wapiticæ ante näni odömönte apänedö ante botö, Gomö aedäni, ante wææ ämopa, ante mïnitö ayæ ëñënämaï imïnitawoo, angacäimpa.

Betaida iñömö babetamongä ingante gampomongampa

²² Mäninö godinque Betaida iñömö pönäni adinque wadäni babetamongä ingante Itota weca ænte pöninque, Gampomonguimi. ²³ Änäni eñëninque Itota babetamongä önompo bæi ongonte töö æmænte tömënäni quëwëñömö tao yabæque ænte mäocä gocantapa. Ayæ godö towæ tänömönte gampo cæmöninque, Pancaa tæcæ abi edæ, angantapa.

²⁴ Äñongä edæ tæcæ iñæ æmante,

—Awæ cægonte bai waodäni incæ cægönäni abopa. ²⁵ Itota wæætë godö gampo cæmongä ate babetamongä iningä incæ ñöwo cöwä adinque edæ waa bamöninque tömäo edonque pönä acantapa. ²⁶ Ininque tömengä ingante Itota,

—Iñömö näni quëwëñömö yaatænque wadæ godinque tömëmi oncönë goe, angä gogacäimpa.

Bitö Codito inömi imipa, ante Pegodo angampa

(Mäateo 16.13-20; Odoca 9.18-21)

²⁷ Itota iñömö tömengä miñæ në godäni tönö wadæ godinque Tetadea Pidipobæ wædænque inäni näni quëwëñömö wædænque inäni näni quëwëñömö go go cædäni-tapa. Idömæ godinque tömengä nänö në emiñænäni inänite Itota angantapa.

—Wadäni botö imotedö ante tededinque, Æbodö imoo, ante apænedäni eñëmïni.

²⁸ Äñongante,

—Bitö imitedö ante apænedinque pancadäniya, Æpænë në guidongaingä Wäö wodi incæ Itota adocä imaingampa, ante tededänipa. Wadäni guiquënë, Ediya wodi incæ Itota inongä imaingampa, ante apænedänipa. Wadäni guiquënë, Wængonguï beyæ në apænegaïnäni bai Itota iñömö adocä imaingampa, ante bitö imitedö ante tededänipa, änänitapa.

²⁹ Ante tömengä miñæ në godäni apænedäni eñëninque Itota,

—Ayæ minitö guiquënë, Æbodö imoo, ante ämïni.

Äñongante Pegodo iñömö,

—Bitö mönö Codito inömi imipa.

³⁰ Angä eñëninque, Botö imotedö ante, Codito inongä ingampa, ante gode änämaï edæ pæ wëëneedäni, ämopa, ante Itota wææ angacäimpa.

Itota, Iïmaï cædäni wæncæboimpa, ante apænecampa

(Mäateo 16.21-28; Odoca 9.22-27)

³¹ Ayæ mäniñedë Itota tömengä miñæ në godäni inänite iïmaï ante mä odömönte apænecacäimpa. Botö Waobo eñagaïmo inte nanguï caate wæquënëmo imopa. Edæ në aadäni näni Picæncabo tönö, Wængonguï quï, ante në godönäni ñænænäni tönö në odömönäni tönö mäninäni iñömö botö imote Baa änäni wæquënëmo imopa. Ayæ botö imote godömenque wænönäni wæncæboimpa. Incæte botö do wænönäni wænimo inte edæ mëönaa go adoönæque iñonte ñäni ömæmoncæboimpa. ³² Mänömaï ante Itota edonque apænecantapa. Apænecä eñëñönäni Pegodo guiquënë Itota ingante nänënë mäocä godinque, Quimæ wæncæ anewëë, wææ ante tæcæ piincæ cæyongante, ³³ Itota edæ tömengä miñæ në godäni gämænö dädi emænte adinque Pegodo ingante näëmæ piiniquinque angantapa.

—Bitö Tatänabi bai inömi inte edæ botö weca ongönämaï wadæ gobæwe. Wïi Wængonguï nänö änönö ante pönëmi inte bitö waodäninque näni pönëwënonque ante pönëninque mänömaïno ante tedebe awædö, angantapa.

³⁴ Ayæ tömengä emiñænäni tönö nanguï ongönäni inänite aa pecä pönäni ate Itota tömänäni inänite apænedinque,

—Æcänö botö miñæ pöinäna ina tömengä nämä beyænque ante pönänämaï inte botö miñæ tee empote poncæcäimpa. Nämä nänö wænguïwæ ænte mongænte ponte bai cædinque tömengä, Botö wænguïmo incæ caate wæbo incæ Itota ingante cöwë tee empote gocæboimpa, äninque poncæcäimpa. ³⁵ Edæ æcänö, Nämä wææ gompodinque quëwæncæboimpa, ante cædinque botö miñæ pönämaï ingä guiquënë

tömengä iñömö edæ quëwënämaï incæcäimpa. Wæætë edæ, Wænönäni wæmo incæte botö Itota miñæ tee empote godinque tömengä waa pönï nänö cægainö ante apænecæboimpa, ante æcänö cæda guiquënë tömengä edæ ayæ quëwencæcäimpa. ³⁶ Edæ waocä inguipoga ongoncoo tömancoo ö æncæte ante cædinque nämä önöwoca incæ pædæ godongä wë womonte ba ïninque edæ tömengä nänö ömæwocate wæquinque mäincooque æmaingampa. ³⁷ Ìñæmpa eyepæ godongampa diyæ önöwoca wæætë æmaingä. ³⁸ Nöwodäni Wængonguï ingante pämænte godinque në ëñënämaï cædäni weca quëwëninque minitö iñömö botö Waobo në ëñagäimo beyæ ante guingo imonte wæmïnitawo. Botö apænedö beyæ ante guingo imonte wæmïnitawo. Ìñæmpa botö Mæmpo ñäö guñæ gongæñonte anquedoidi tæiyæ waëmö ëmönäni tönö dibæ pöninque botö wæætë botö beyæ ante në guingo imonte wædingä beyæ ante näëmæ guingo imonte wæcæboimpa.

9

¹ Mänömaïnö äninque Itota godömenque,

—Botö weca ongömïni pancamïniya iñömö iïmaï ba acæmïnimpa, ante näwangä ämopa. Minitö ayæ wænämaï miïmïni quëwëñömïni botö Wængonguï Awënë Odeye inömo inte tæi piñæninque Tæiyæ Awënë babo acæmïnimpa, ante Itota apænecäcäimpa.

Itota waëmö pönï ñäö bai ëmongä bacä adänipa
(Mäateo 17.1-13; Odoca 9.28-36)

² Mäninö ante apænecä ate Itota iñömö önonpo æmæmpoque go adoönæque iinque go ate Pegodo ingante Tantiago tönö Wäö ïnate mänimpodänique ïnänite änanquidi mäicä adodänique æibæ æite ongongadänimpa. Æite ongöñönäni edæ Itota awinca tömënäni ayönäni edæ wii cöwë nänö ëmönö bai waëmö pönï ñäö bai edæ ëmongä bamongä adänitapa. ³ Tömengä weocoo ñäö pönï näämænta weocoo ëñacä adinque tömënäni, Ædö cæte iincoo bai näämænta pönï yamonte cæquinänii, ante edæ wædänitapa. ⁴ Ayæ ayönäni edæ doyedë pönï në æigäina iñömö Möitee wodi tönö Ediya wodi incæ Itota tönö edæ godongämæ pö gongæninque tedegöna adänitapa. ⁵ Adinque Pegodo guiquënë Itota ingante,

—Awënë në Odömömi ëñëmi. Ìñömö mönö waa pönï ongonte awædö. Bitö ämi ïninque mönitö oncontacoo mentaiya go adotaique mænöninque bitö oncontai ante adotaique Möitee oncontai ante adotaique Ediya oncontai ante adotaique mænömaïmönipa, angantapa.

⁶ Edæ Wäö tönö Tantiago tönö godongämæ guñente wædinque Pegodo, Æbänö ante tedequimoo, ante ëñënämaï inte mäninö ante önonque tedecantapa. ⁷ Ayæ edæ boguïmämo ocabogadäni obo wææninque ganta owo ïninque önönepämoque boguïmämodë apænecantapa. “Ïngä iñömö botö Wengä botö në waadecä ingampa cæmïni. Tömengä pönö apænecä ate ëñëdäni,” ante apænecä ëñengadänimpa. ⁸ Æñëninque quingæ gomö gomö ayönäni wada edæ do dæ goda iñönate Itota adocanque ñöwo tömënäni weca ongongä agadänimpa.

⁹ Ayæ änanquidi ïnö wææ pöñönäni Itota tömënäni ïnänite angantapa. Mäninö miïni adinö ante minitö gode änämaï pæ wëneyömiïni botö Waobo ëñagäimo inte edæ wænte ate ñäni ömæmoncæboimpa. Ñäni ömæmömo ate minitö edæ mäniñedë ate apænecæmïnimpa. ¹⁰ Ante angä ëñëninque tömënäni gode änämaï pæ wënedäni incæ nämæneque, Mäninö tömengä nänö ñäni ömæmonguïmämo ante æbänö ante apænecä, ante wædönänimpa. ¹¹ Ìninque Itota ingante,

—Mänömaï ï ïninque, Ediya wodi täno poncæcäimpa, ante në odömönäni iñæmpa quïnante apænedänii.

¹² Äñönänite Itota wæætë,

—Ediya wodi näni änogä iñömö täno pongä ingampa. Näwangä impa. Pöninque tömengä, Doyedë ingäi bai ñöwo wæætë adobai nö pönï bacäimpa, ante badongampa. Ìninque dodäni Waocä në ëñaquingä ingantedö ante yewæmöninque, Nanguï caate

wæyongante wadāni pīiniquē Baa ancædānimpa, ante quīnante yewæmongadānii, ante pōnēmīni. ¹³ Incæte botō iīmāinō ante apænebo ēñēedāni. Nōwocā mōnō Ediya inongā inte do pongāimpa ante aquēnē. Tōmengā pongā adinque wadāni edæ dodāni nāni yewæmongāinō baī adobaī cædinque quiēmē ante nāni cæinēwēnō ante do cædānīpa, ante Itota tōmengā tōnō nē æidīnāni inānite apænegacāimpa.

*Itota wēnæ ingante angā go ate wēñængā waa bacampa
(Māateo 17.14-21; Odoca 9.37-43)*

¹⁴ Itotaidi mānīi wæænīnque tōmengā nānō nē ēmīñænāni æidāmaī ināni weca ponte ayōnāni wadāni nanguī ināni goto gongænāni adānitapa. Nē æidāmaī ināni tæcæguedē ongōñōnānite nē wææ odōmōnāni guiquēnē tōmēnāni tōnō wæætedō wæætē ānāni adānitapa. ¹⁵ Itota do pongā adinque edæ goto gongænīnāni tōmānāni guīñente wædinque wadæ pogodo ponte bee tēnīnque, Bitō pōmi, ānānitapa. ¹⁶ Āñōnānite Itota, —Tōmēnāni tōnō quīnō ante apænedīnque wæætedō wæætē āmīnīi.

¹⁷ Āñongante adocanque tæcæguedē ongongā inte wæætē apænedīnque, —Awēnē nē Odōmōmi ēñēmi. Botō wengā wēnæ babetadecā ingante ēwocampa, ante wædinque botō tōmengā ingante bitō weca ænte pontabopa. ¹⁸ Æyōmōmē ongōñongante wēnæ pō guīdinque wēñængā ingante cōwē gotodongā tæ go wæængampa. Īnīnque wēñængā wodi māwanta tadedīnque wentoquēnē wentoquēnē angadinque pæ opate bacampa. Mānōmaī cæcā ate wædinque botō bitō miñæ nē godāni inānite, Wēnæ inte wido cæedāni, āmo cæquēnēnāni incæ ædō cæte cæquīnānīi.

¹⁹ Ante apæneyongā Itota tōmēnāni inānite,

—Nōwomīni mīni pōnēegade. Botō mīnitō weca æpogadō quēwēmoī. Pōnēnāmaī inte cæyōmīnite botō æpogadō piyænē cæte wæwēmoī. Edæ wēñængā ingante botō weca ænte māmōmīni pongædāni, angantapa.

²⁰ Ænte pōnāni ate wēnæ incæ Itota ingante adinque do wēñængā ingante do do wāate baī cædinque wido cæcā tæ go wæængantapa. Ayæ māwantabo tadedīnque бага wentoquēnē wentoquēnē angadinque edæ pæntæmæ pæntæmæ gocā. ²¹ Adinque wæmpocā ingante Itota,

—Æyedēnō mānōmaī bacāi.

Āñongante,

—Wēñængāñedē do badingā inte quēwengampa. ²² Quēwēñongante wēñængā ingante wantæ wantæ iñō wantæ wantæ iñō, Gongapamō guitodōmo gonte wæncæcāimpa, ante wēnæ incæ cæcā. Ayæ, Æpænē adobaī guitodōmo becadote wæncæcāimpa, ante cæcampa cæbīi. Nāwangā tæi pīñæmi ĩnīnque bitō mōnatō wæwēnō ante pōnente cæbaīmīpa. ²³ Āñongante,

—Bitō guīquēnē wabānō wede pōnēmi ĩmitawoo. Edæ wede pōnēñongante edæ waocā beyæ tōmāā do cæte impa.

²⁴ Angā ēñente wædinque wæmpocā iñōmō yedæ ānīnque,

—Bitō ĩmite pōnēmōpa. Edæ botō æmæ pōnēnō ante bitō cæbi ate ædæmō wede pōnente bacæboimpa, ante wæbopa.

²⁵ Ante āñongā nanguī ināni do pogodo pōnāni ate wædinque Itota iñōmō wēnæ nē wentamō ēwocacā ingante pīinte ānīnque,

—Wēnæbi bitō, Babetamonca babetade bacædānimpa, ante nē cæbi ĩnōmi inte ñōwo tao godīnque wīi adodō guīquīmi incæbiimpa, angantapa.

²⁶ Ēñente wædinque nanguī Yæ yæ ānīnque wēñængā ingante wido cæcā do do wāate tæ go wæænīnque pæntæmæ pæntæmæ goyongante wēnæ tao gocantapa. Gocā ate wēñængā do wænīnāni baī oñongā ate wædinque pancadāniya, Æmæwo wæmaingampa, ante wædāni. ²⁷ ĩnīnque Itota iñōmō pædæ wææmpo ōnōmpo bæi ongote ængæ gāntācantapa.

²⁸ Itota ayæ wadæ godīnque oncōnē pō guīyongante tōmengā nānō nē ēmīñænāni awēmō ānīnque,

—Mönitö guiquënë bitö bai wido cæcæte ante cædinqe quïnante wido cædämaï intamönii.

²⁹ Ante wæyönänite,

—Wënæ mäningä bai ingante wido cæcæte ante cædinqe wantæpiyæ cænämaï inte Wængongui ingante nanguï apænete ate wido cæcæimpa, ante apænecä ëñengadänimpa.

Wëñönäni wæncæboimpa, ante Itota adodö ante apænecä

(Mäateo 17.22-23; Odoca 9.43-45)

³⁰ Ayæ wadæ gote Gadideabæ wodo pænta godinqe Itota, Wadäni adämaï iñönänite ³¹botö ëmiñänäni adodänique ongöñönänite odömönte apæneco ëñencædänimpa, ante cæcantapa. Ayæ tömënäni inänite iimainö ante awëmö apænecantapa.

—Adocanque, Waocä nê ëñagaingä æyömönö ongongää, ante godö odömöninqe botö imote waodäni nempo pædæ godongä æncædänimpa. Nê ænäni wæætë botö imote edæ wëñönäni näñe wæncæboimpa. Incæte mëönaa go adoönæque iñönte botö adobo incæ ñäni ömæmoncæboimpa.

³² Ante apæneyongante tömengä ëmiñänäni önömoncaque ëñëninque ëñënämaï inäni inte, Æbänö ante tedebii, ante guïñente wædinqe änämaï pæ wëenegadänimpa.

Æcänö ñænængä inte nê angä inguingää, ante tededänipa

(Mäateo 18.1-5; Odoca 9.46-48)

³³ Mänii godinqe Capënaömö iñömö ponte oncönë guiidinqe tömënäni inänite Itota,

—Idömæ pöninqe æbänö ante tedeminitawo.

³⁴ Äñongante edæ, Mönö cabo incæ æcänonque ñænængä pönï inongä inte nê angä inguingää, ante tedewëñänäni inte guingo imonte wædinqe pæ wëenedänitapa.

³⁵ Ininqe tæ contadinqe Itota iñömö, Dote, nani äincabo inänite, Pödäni, angä pönäni ate,

—Yacado ongömote, ante nê änongä iñömö tömengä wæætë yæmiñængä pönï gote ongönte tömänäni beyæ nê godö cæcä bate waa tobaingampa.

³⁶ Äninqe Itota wëñængä guiyangä ingante æninqe tæcæguedë goncæte pæ mäninqe tömënäni inänite wæætë apænecantapa.

³⁷ —Æcänö botö ëmöwo apænedinqe mäningä bai wëñængä ingante, Pöe, ante godö waa cæcä iñömö tömengä iñömö edæ botö imote edæ do, Pöe, ante pönö waa cæcä ingampa. Ayæ edæ botö imote, Pöe, ante nê waa cæcä iñömö tömengä iñömö wii botö adoboque imote waa cæcä ingampa. Wæætë botö imote nê da pönöningä ingante Wængongui ingante adobaï edæ, Pöe, ante do waa cæcampa, ante Itota apænecäimpa.

Mönö imonte æcänö pïinämaï ina mönö tönö cæcampa

(Mäateo 10.42; Odoca 9.49-50)

³⁸ Itota mänömaï apænecä ëñëñönäni Wäö guiquënë,

—Awënë nê Odömömi ëñëmi. Wacä bitö ëmöwo apænedinqe wënæidi inte wido cæcä atamönipa töö. Ayæ, Wii mönö cabo ingampa, ante adinqe mönitö tömengä ingante Baa äninqe, Cædämaï imäwe, antamönipa.

³⁹ Ante apæneyongante Itota wæætë,

—Ee amini cæcædäni. Edæ æcänö botö ëmöwo apænedinqe öönædë nani cæi bai mä cæda, tömengä ædö cæte botö imotedö ante do wënæ wënæ anguingää. ⁴⁰ Edæ mönö imonte æcänö pïinämaï ina tömengä mönö cabo inongä inte bai mönö tönö godongämæ cæcä ingampa töö. ⁴¹ Näwangä ämopa. Bitö Codito nänö nê ëmiñänömi imi ænte bee, ante wacä mïnitö iminute æpæ adotacaque pönongä bemini ininqe nê pönöningä wæætë tömengä nänö pönöninö beyæ eyepæ æncæcäimpa, angacäimpa.

Wacä oda cæcæcäimpa, ante nani wæquinque cædänipa

(Mäateo 18.6-9; Odoca 17.1-2)

⁴² Mänömainö apænedinqe Itota godömenque apænecantapa. “Wadäni godö cædäni beyæ botö imote nê pönänäni incæ pancadäniya edæ dobæ oda cæte wënæ wënæ

cädänipa. İninque, Wēñængä adocanque guiyangä pönı ingä incæ oda cädämaı incæcäimpa, ante wææ cæcæte ante cædinque nē godō cæcæ cædingä ingante iımaı cädäni ininque tōmengä toquēnengä imaingampa. Waodäni nāni dacæ godō dacæ godō cæquinca ñænænca æninque tōmengä önömenca æ wēmencadinque tōmengä ingante tæcætibæ wido cädäni ininque tōmengä edæ, Wēnæ wēnæ cädämaı inte becadote wæmo beyænque Wængonguı botō imote wıı godōmenque pangampa, ante wædinque waa toquēnengä imaingampa. ⁴³ Bitō önompoca cædinque wēnæ wēnæ cæbi ininque bitō önompo aa wi æmpote baı wido cæte baı cædinque wēnæ wēnæ bitō cædinō ante wido cæbæwe. İñæmpa inguipoga quēwēninque æmæmpoque empobi incæte bitō cōwē bitō wænāmaı quēwenguınque öönädē æibi waa imaimpa. Edæ wıı tipæmpoga empobi inte edæ bitō gonga cōwē bæcote wæwenguıñömō wıı æmæwo wido cæte wæquımidō anguēnē. ⁴⁴ Edæ māniñömō tadōmengadænguipo iñömō cængota wænāmaı gonga emönāmaı bæcoquinō anguēnē.”

⁴⁵ Ayæ, “Bitō önōwaca wapiticæ godinque ēñēnāmaı cæbi ininque önōwa aa wi æwate baı wido cæte baı cædinque wēnæ wēnæ bitō cædinō ante wido cæbæwe. İñæmpa inguipoga quēwēninque æmæwaque ewabi incæte bitō cōwē bitō wænāmaı quēwenguınque öönädē æibi waa imaimpa. Edæ wıı tipæmpoga ewabi inte edæ bitō tadōmengadænguipo wido cæte wæquımidō anguēnē. ⁴⁶ Edæ māniñömō tadōmengadænguipo iñömō cængota wænāmaı gonga emönāmaı bæcoquinō anguēnē.”

⁴⁷ “Ayæ ægodawate tæ go wæænte baı cædinque bitō awınca beyæ ēñēnāmaı cæbi adinque bitō awınca cāi cæmonte baı cædinque wēnæ wēnæ bitō cædinō ante wido cæquımi, ämo. Edæ bitō, Botō tipæmonga emonte incæ tadōmengadænguipo wıı goınente awædō, ante pönente wædinque edæ cāi cæmonte awınca æmæmonque emōmi inte quēwēninque Wængonguı Awēnē Odeye weca æite waa tobaimipa. ⁴⁸ Edæ māniñömō tadōmengadænguipo iñömō cængota wænāmaı gonga emönāmaı bæcoquinō anguēnē,” ante Itota apænecantapa.

⁴⁹ Ayæ godōmenque apænedinque, “Waodäni, Ööingä ñömænāmaı ingæimpa, ante cædinque cati ñænæ quımōnique gongapamō æñō cæte biyadänipa. Waomıni tōmāmıni adobaı caate wædinque ædæmō biyate baı badinque ñömænāmaı inguımınidō anguēnē. ⁵⁰ Cati quımonte cæi iñömō wæme inte gæpæ emompa. Incæte nongæmonte ba adinque mınitō wæætē æbänō nō cæmıni wæætē gæpæ emonguı i. Ööingä wæme bacæimpa, ante quımonte cæi wēä wēä pæmönāni baı cædinque mınitō mıni caipæ incæ piyænē cæte wacä ingä wacä ingä waa cæte quēwēedäni,” ante Itota odōmonte apænecä ēñengadänimpa.

10

Nänöogængä ingante nāni pämænō ante (Mäateo 19.1-12; Odoca 16.18)

¹ Māniı Capēnaömō ongōninque wadæ tao iguidinque Oodeabæ ganca Oododänō æmæ wedeca pongantapa. Pongä adinque nanguı ināni wæætē pō pō cädäni adinque Itota cōwē nänō odömōı baı adobaı odōmonte apænecä ēñēnānitapa. ² Paditeoidi guiquēnē, Godō ämō ēñēninque Itota adodeque oda cædete wæcä tocæı, ante cædinque tōmengä weca pōninque, Itota ēñēmi, änānitapa. Wængonguı æbänō ante wææ angacäı. Waocä tōmengä nänöogængä ingante pämængä ininque edæ nō cæte intawo.

³ Ante äñönāni tōmengä wæætē,

—Möıtee wodi æbänō ante yewæmōninque mınitō imınite wææ angacäı.

⁴ Angä ēñēninque,

—Æmæwo pämæmo goquımi, ante yewæmōninque māninta bitō yewæmōninta onquiyængä ingante godōmi ængä ate bitō önonque pämæncæbiimpa, ante Möıtee wodi wææ ante yewæmongacäimpa.

⁵ Ante apænedäni ēñēninque Itota,

—İñæmpa, Mīmō ömædēmīni inōmīni inte mīnitō wēnæ wēnæ cæinēmīni imīnīpa, ante wædinque Mōitee wodi, Mänōmaī cædāni, ante yewæmongacäimpa. ⁶ Edæ wēenēnedē Wængonguī nānō badongaiñedē tōmengä, “Onguīñængä ingampa, ayæ, Onquiyængä ingampa, ante badongacäimpa. ⁷ Mänōmaī beyæ waocä mæmpocä ingante emō cædinque wäänä inante emō cæte godinque onquiyængä ingante, Botō nānōogængä, ante æmæwo mongä ate tōmēna nāna gæncaya inōna inte mōninque guëa quëwencædaimpa. ⁸ İninque æmæwo mōninque tōmēna nāna gæncaya incæ adocanque bai bate quëwencædaimpa,” ante Mōitee wodi nānō yewæmongaī bai cædinque tōmēna nāna gæncaya do mōninque nānēnē ināmaī adocanque bai do bacäimpa. ⁹ Mänōmaī beyæ Wængonguī, Adocanque bai inapa, ante nāna gæncaya nānō nē badongaina iñōnate waocä wæætē pango cædāmaī incæcäimpa.

¹⁰ Angä wædinque Itota tōnō oncōnē guidinque tōmengä miñæ nē godānique, Æbānō ante ämitawo. Godōmenque apænebi eñēmōnie. ¹¹ Ante añōnānite Itota,

—Æcānō nāwā nānōogængä ingante pāmæninque wacä onquiyængä ingante mōna tōmengä wiwa towengä do badinque nāwā nānōogængä ingante wiwa cæcampa. ¹² Onquiyængä guiquēnē tōmengä nānōogængä ingante pāmænte godinque wacä ingante godō mongä ininque tōmengä adobaī wiwa towengä bacampa, ante Itota apænecä eñengadānīmpa.

Wēñænāni inānite gampo cæcadinque waa apænecampa

(Mäateo 19.13-15; Odoca 18.15-17)

¹³ Ayæ ate, Wēñænāni inānite Itota pōnō gampo cæcadinque waadete apænecæcäimpa, ante cædinque wadāni tōmengä weca ænte pō ænte pō cædāni adinque tōmengä miñæ nē godāni guiquēnē, Ænte pōnāmaī iedāni, äninque Baa Baa änāni. ¹⁴ Ate wædinque Itota ænguī badinque nē Baa änōnāni inānite wææ äninque,

—Wēñænāni inānite ee amīni poncædānīmpa. Edæ mänināni nāni pōnēnō bai adobaī pōnēnāni inte edæ Wængonguī Awēnē Odeye nempo do quëwēnāni inānīpa. İninque mīnitō iñōmō wēñænāni inānite Baa änāmaī iedāni. ¹⁵ Edæ nāwangä apænebo eñēedāni. Wēñængä do pōnengä inte Ao angä ingä bai Wængonguī Awēnē Odeye ingante do pōnēninque nē Ao änāni iñōmō tōmēnānique tōmengä nempo guidinque quëwēnānīpa. Wadāni guiquēnē Wængonguī Awēnē Odeye ingante Baa ante pōnēnāmaī ināni guiquēnē tōmēnāni ædō cæte tōmengä nempo guidinque quëwenguīnāni, ante Itota apænecäcäimpa.

¹⁶ Äninque edæ wēñænāni inānite bæi ongonte pæ mäninque, Wængonguī mīnitō imīnite waadete pōnō cæcæcäimpa, ante Itota gampo cæcacä gampo cæcadinque waa apænecäcäimpa.

Mäincoo nanguī ëacä Itota weca ponte apænecampa

(Mäateo 19.16-30; Odoca 18.18-30)

¹⁷ Ayæ godōmenque gocæ cæyongä wacä edæ Itota weca pogodo ponte da guicapod-inque,

—Awēnē nē waa Odōmōmi apænebi eñēmoe. Botō æbānō cædinque cōwē wænāmaī wantæpiyæ quëwēmaīmoo.

¹⁸ Äñongante Itota edæ,

—Wængonguī adocanque nē waa cæcä iñongante bitō botō imote, Nē waa cæbi imīpa, ämīi. ¹⁹ İmaī cædāni, ante Wængonguī nānō wææ angainō ante bitō tōmēmi do eñēmīpa. “Wacä ingante godō wænōnāmaī ie. Bitō nānōogængä ināmaī iñongante godō guëa mōnāmaī ie. Wacä quī adinque awēmō ænāmaī ie. Wacä wēnæ wēnæ cæcä atabopa, ante godō babæ wapiticæ änāmaī ie. Wacä quī æncæte ante cædinque babæ cædāmaī ie. Wæmpocä ingante wäänä inante waa adinque tōmēna inante godō waadete cæe,” ante wææ yewæmongacäimpa, ante bitō edæ do eñēmīpa, angantapa.

²⁰ Ante apænecä eñēninque nē äningä guiquēnē Itota ingante wæætē,

—Awēnē nē Odōmōmi eñēmi. Botō mäninō bitō änō bai tōmānō eñente cædinque pægaboī ae.

²¹ Apäñecä eñëninque Itota tömengä ingante cöwä adinque waadete pönëninque,
—Adodeque ayä eñente cæquënëmi ïmipa, ante ämo eñëe. Öönädë bitö waëmoncoo ænguinque edæ ñöwo godinque ïmæca bitö mänincoo tömancoo godonte æninque bitö æninta wæætë ömæpodäni inte wædäni ïnänite tömanta godömi æncädänimpa. Ayä edæ botö ïmote tee empote pöe.

²² Angä eñëninque, Botö mäincoo nanguï impa, ante pönente wædinque në äcä ïñömö nanguï wæwëninque wadæ gogacäimpa.

²³ Gocä adinque Itota godongämæ adinque tömengä nänö në ëmiñænäni ïnänite,
—Wængonguï Awënë Odeye nempo guiite quëwencæte ante cædinque woadäni ömæpodäni inte botö miñæ pönänipa. Mäincoo nanguï äcä guiquënë æbänö cæte ömæpocä inte botö miñæ ponte guiite quëwenguingää, angantapa.

²⁴ ïninque tömengä miñæ në godäni tömengä nänö apäñedö beyä ante, Æbänö angää, ante guiñente wæyönänite Itota wæætë,

—Botö wëmini eñëedäni. Wængonguï Awënë Odeye nempo guiite quëwencæte ante cædinque ante waocä mäincoo mangä beyænque eyepæ cæcampa diyä guiiquingää.

²⁵ Edæ cämeyo guiyangä ingampa diyä daagö guiyampite pædæ tacää. ïninque, cämeyo ñænængade ïnogä inte pædæ tadämaï ingä bai në äcä adobaï ingampa. Tömengä nämä ayongä ñænængä ïnogä inte edæ æbänö cæte Wængonguï Awënë Odeye nempo do wäänë guiite quëwenguingää.

²⁶ Ante apäñecä eñëninque godömenque nanguï pönï guiñente wædinque tömënäni nämäneque tededinque,

—Ïñæmpa mänömaï ï ïninque æcänö wäänë guiite quëwenguingää.

²⁷ Ante nämäneque tededäni ïnänite adinque Itota,
—Waomïnique incæ nämä mini cædö beyænque ædö cæte quëwëmaïminii. Wængonguï guiquënë wïi wao bai cædongä inte nämä incæ tömänö do cæcä ingampa.

²⁸ Ante apäñecä ate Pegodo tömengä ingante äninque,

—Mönitö ïñömö möni äadincoo owæ caate bitö miñæ ömæpomöni pömöni ae.

²⁹ Tæcæ äñongante Itota tömënäni ïnänite wæætë,

—Minitö botö beyä ante pönëninque waa pönï botö apäñebodö beyä ante pönëninque pömïnitapa. ïninque edæ botö ïmaï ante näwangä ämopa. Æcänö mäninö beyä tömengä oncodo taodinque tömengä tönïñadäni ïnänite ëmö cædinque mæmpocä tönö wäänä ïnante ëmö cæte wëñænäni ïnänite ëmö cæte godinque tömengä göneacoo ëmö cæte owæ caate godinque botö miñæ æcänö wadæ pöna ïñömö, ³⁰ tömengä ïñömö inguipoga quëwënincoo wëñë nänö äadincoo bai adopocoo æninque godömenque adopo adopo tië ganca mänimpoga adopo æncæcäimpa. Ayä onconcoo æninque tömengä tönïñadäni tömengä badäidi tömengä wëñænäni tië ganca bai yebänäni bai æninque, tömengä göneacoo wæætë bacoo æncæcäimpa. Incæte tömengä ingante togænte pancädänimpa. ïncayä pömämo bayonte botö, Bitö quëwenguïmämo, ante godömo æninque tömengä cöwë wantæpiyæ wänämaï quëwencæcäimpa. ³¹ Incæte edæ täno yæcado ongöninäni inte pancadäniya wæætë yæmiñæ gote ongönäni bacädänimpa. Ayä yæmiñæ ongöninäni inte wæætë yæcado ponte ongönäni bacädänimpa, ante Itota apäñegacäimpa.

*Wæncæboimpa, ante Itota wæætë adodö ante apäñecampa
(Mäateo 20.17-19; Odoco 18.31-34)*

³² Mänii Eedotadëe ante ñöwo änämäñë æiyönäni Itota incæ täno beyænte æicä. Ate wædinque tömengä ëmiñænäni guiquënë, Tömengä nänö wænguinque täno æicampa, ante wæyönäni ayä pönäni guiquënë guiñente wædönänimpa. Itota ïñömö tömengä miñæ, Dote, ante näni gocabo ïnänite nänënë ænte mäocä goyönäni tömengä, Botö ïmote ïmaï cædäni bacæboimpa, ante edonque apäñecantapa. ³³ Eñëñönänite, “Ñöwo ïñömö mönö edæ Eedotadëe ïñömö æicäimpa. Mänïñömö æi pö gongæmö ate adocanque, Waocä në eñagangä æyömönö ongongää, ante godö odömongä bæi ongonguinäni. Ayä, Wængonguï qui, ante në godönäni ñænænäni tönö në odömönäni

nempo tömengä botö imote pædæ godongä æninque tömënäni wæætë botö imote apænte äninque, Cöwë wæncæcäimpa, äninque oodeoidi inämaï inäni inänite wæætë pædæ mäo godönäni. ³⁴ Æninque iinäni wæætë botö imotedö ante badete todinque botonga tawimæ towæ tänongadinque æmontaimenca tæi tæi pänäni ämogate wæyömote botö imote godömenque wænönäni wæncæboimpa. Wæætë do wænimo inte botö mëönaa go adoönæque iñonte ñäni ömæmoncæboimpa,” ante Itota wæætë apænecäimpa.

*Tantiago tönö Wäö, Mönatö ämaï cæe, ante wædapa
(Mäateo 20.20-28)*

³⁵ Ayæ Tebedeo wëna Santiago tönö Wäö iñömö Itota weca pöninque,
—Awënë në Odömömi ëñëmi. Mönatö quiëmë ämöna cæbi waa tobaimönapa,

³⁶ Äna ëñëninque,
—Mīnatö beyæ quīnō cæbo æmīna.

³⁷ Äñongante,
—Awënë inömi inte bitö ñäö ëmömämöde tæ contadinque mönatö imönate iimäi cæcæbiimpa, ante ämönapa. Adocanque bitö tömëmæmi inö adocanque dipæmæmi inö ämi tæ contaquimöna.

³⁸ Ante äna ëñente wædinque Itota wæætë,
—Iñæmpa mīnatö ëñënämaï inte mänömaï ämīna awædö. Edæ botö nantate wæwenguimæ bai becabo bai mīnatö edæ adobai adotaca becate bai Ao ante botö beyæ nantate wæwenguimīnaa. Ayæ botö wænguimämo ante mīnatö adopænë guite bai adobai Ao ante botö beyæ guiñënämaï inte wænguimīnaa.

³⁹ Ante äñongante,
—Ao ante guiñënämaï cæcæmönaimpa.
Ante apæneyönate Itota,
—Botö nanguï caate wæwëmo bai mīnatö adotaca becate bai äanque bai caate wæquimīna imīnapa. Botö wænguimämo ante mīnatö adopænë guite bai adobai wænguimīna imīnapa. Näwangä impa. ⁴⁰ Incæte botö tömëmæmo inö botö dipæmæmo inö æcänö tæ contaquīna, ante wīi botö godö ämo imopa. Wæætë, Awënë containpaa mänīnaque tæ contaquīna, ante do badongaingä inte Mæmpo Wængonguï iñömö tömengä adocanque godö angä contacædaimpa, ante Itota apænecäimpa.

⁴¹ Mänömainö ante tededapa töö, ante ëñëninque wädäni diete ganca tömengä miñäe në godäni guiquënë Santiago tönö Wäö inate piinänitapa. ⁴² Piinäni ate wædinque Itota aa pecä pönäni ate tömënäni inänite wæætë apænecantapa.

—Mīnitö, Oodeoidi inämaï inäni æbänö cædänipa, ante do ëñëminipa. Tömënäni nāni, Awënëidi, ante në änönäni iñömö nämä beyænque ante cædinque nanguï piinte änäni wædinque awënëidi nempo quëwënäni incæ wæætë do ëñente cædänipa. Ayæ tömënäni weca në ñænænäni inönäni iñömö, Tömëmoque ämo ëñente cædäni, ante piinte änäni wædänipa. ⁴³ Mīnitö guiquënë tömënäni nämä beyænque ante nanguï änäni bai wīi adobai cæquënëmīni imīnīpa. Wæætë mīni cabo iñömīni adocanque ñænængä pönī ingä bacæte ante cædinque tömengä täno edæ mīnitö beyæ në cæcä baquënergä ingampa.

⁴⁴ Ayæ yæcado ongöinente wæcä iñömö tömengä yæcado ongoncæte ante cædinque wæætë edæ yæmiñæ pönī gote tömänäni beyæ në cæcä badinque tömengä nämä beyæ ante cædämaï inguënergä ingampa. ⁴⁵ Edæ Waobo ëñagaïmo inte adobai, Botö beyæ pönö cæcædänimpa, ante wīi pömo imopa. Wæætë wädäni beyæ godö cæcæte ante pömoimpa. Ayæ edæ nanguï inäni tee mönete bai wæwëñönäni botö wæætë, Tömënäni wibænete tadinque quëwencædänimpa, ante tömëmo wepæ incæ godoncæte ante pömo imopa, ante Itota apænecäimpa.

*Batīmeo babetamongä ingante Itota angä waa bamongä
(Mäateo 20.29-34; Odoca 18.35-43)*

⁴⁶ Itota mäninö godinque Eedicoo nāni quëwëñömö pongadänimpa. Tömengä nänö në ëmiñænäni tönö tæiyænäni tönö Eedicoo iñömö wodo pænta tayönäni wacä

babetamongä Tımeo wodi wē Batımeo iñömö taadö wedeca, Pönömi æmoe, ante äneçönongäimpa. ⁴⁷ İnıneque wadäni, İtota Näätatadeta pædingä inte pongampa, ante tededäni eñëninque tõmengä ogæ tedete,

—İtota eñëmi. Awënë Dabii wodi pæimi iñömi inte botö wædö ante pönente cæe.

⁴⁸ Ante tæcæ añongante godongämæ godäni pancadäniya, Apocænë inguënë quëwëe, ante änäni incæte tõmengä godömenque yedæ aa pedınque,

—Awënë Dabii wodi pæimi iñömi inte botö wædö ante pönente cæe.

⁴⁹ Änıneque ancaa aa pecä eñëninque İtota næ gongæninque,

—Babetamongä ingante aa pemini pongædäni.

Angä eñëninque babetamongä ingante,

—Ængæ gantıdınque wædämaı imäwe. Bitö imite, Pöe, angä apa quëwëe.

⁵⁰ Änäni eñëninque babetamongä incæ ayacooga gäni tadongate do ængæ gantıdınque İtota weca pongä. ⁵¹ Adınque,

—Bitö beyæ quınö cæquımoo.

Äñongante babetamongä,

—Awënë në Odömömi eñëmi. Cæbi waa bamonte aboe.

⁵² Angä eñëninque İtota,

—Waa bitö bamonguınque botö imote pönëmitapa. Önonque wadæ gobäwe.

Äñongante tõmengä do waa bamonte adınque İtota miñæ taadonque gogacäimpa.

11

İtota Eedotadëe iñömö pongampa

(Mäateo 21.1-11; Odoco 19.28-40; Wäö 12.12-19)

¹ Mänii gote Eedotadëe obo pönınque Odıbowænquıdi näni anquıdi ontacamö goınö Betapaguee näni quëwëñömö ganca ayæ Betänia näni quëwëñömö ganca pönönäni İtota tõmengä miñæ në goda inate mënaa inate da godönınque angantapa. ² İimaı angantapa.

—Mänii näni quëwëñömö ongö amına. Tömëñömö go guıte ayömına bodo wë picængä incæ waocä ingante mongænämaı inıngä inte ñäni ñæıngä a ongongä acæmi-naimpa. Adınque ñi cæyænte ænte pöeda. ³ Wacä, Quınante ñi cæyæmınaa, ante wææ angä eñëninque minatö wæætë edæ, Mönö Awënë nänö ænguënënë ante ænte gomönapa. Tõmengä iınque cæte ate adodö do da pönongä æedäni, ante äeda.

⁴ Angä eñente gote ayöna bodo wë taadö wedeca odemö awäa ñänö ñæ a ongö adınque ñi cæyænte ænte gocæte ante cæda.

⁵ Adınque mäniñömö ongönäni guıquënë,

—Bodo wë quımæ ñi cæyæwëmınaa.

⁶ Äñönänite İtota nänö äniñö adodö äna eñëninque, Ao änäni. ⁷ Eñëninque ñi cæyænte İtota weca töi töi ænte pönatapa. Ænte pönınque tõmëna weocoo yabæcooque æidämæ wo cæyabæda ate İtota wænömënæca inö æi yiyæ tæ contacantapa. ⁸ Adınque nanguı inäni, İtota nänö ponguınö, ante tõmënäni weocoo yabæcooque pönö bee podöwayönäni wadäni guıquënë gönea gote yæpæma öñabo tapænte mämö bee podöwadäni ate tõmengä podöwaınonque gocantapa. ⁹ Gocä adınque täno godäni tõnö ayæ pönäni tõnö nanguı inäni godongämæ godınque yedæ änıneque,

—Möni quëwenguınque impa, ante, Badogaa, ante tomönipa. Awënë Wængonguı emöwo beyænque pömi inıneque bitö toquınque edæ Wængonguı bitö imite waa cæcæcäimpa. ¹⁰ Mönö mæmæ Dabii wodi pæimi iñömi imipa, ante adınque mönitö, Awënë odeye Dabii wodi nempo näni waa quëwengaı baı bitö nempo mönitö waa quëwenguınque impa. İnıneque, Badogaa, ante yedæ añömöni æibæ pönı quëwënäni incæ, Badogaa, ancædänimpa.

¹¹ Ante yedæ añönäni İtota Eedotadëe pö ti wæænınque Wængonguı oncö ñænæncönë yabæcönë pö guıdınque mäniñömö ongoncoo tõmäa acantapa. Ayæ, Gäwadecæ pönı ba awædö, ante tõmengä emiñænäni dote ganca inäni tõnö wadæ tao Betänia gogacäimpa.

Iigowæ ömæcawæ i adinque Itota püingampa
(Mäateo 21.18-19)

¹² Gote Betänia monte baönæ pöñönäni Itota gæwænte wædinque, ¹³ Quinö impa cænguimoo, ante gomö ayongä iigowæ öñabo emæ incæ incate bocabaimpa, ante gote ayongä ömæcawæ acantapa. Önönepoque i beyæ incadämaï intapa. ¹⁴ Ante iigowæ inte apænedinque,

—Iigowæ ëñëmi. Incaquinämaï inte bitö incaquimi cænguinanii.

Äñongante tömengä nänö nê emiñænäni edæ ëñëe gongænänimpa.

Wængongui oncö tæiyæ waëmö bacæimpa, ante cæcä
(Mäateo 21.12-17; Odoca 19.45-48; Wäö 2.13-22)

¹⁵ Do näni ponguënönö Eedotadëe pönänitapa. Itota iñömö Wængongui oncö ñænæncönë yabæcönë pö guidique mäniñömö mäincoo mänäni tönö wadäni godonte æncæte ante godongämæ pönäni tönö ongönäni adinque tömänäni inänite, Oncodo tao goedäni, ante da tadongä tao godänitapa. Ayæ campio ante näni godonte æimpa tönö equemö godoncæte ante nê mänäni näni cönöimpa tönö bæ tacä tömampaa guidömëmæ tæ go wææntapa. ¹⁶ Ayæ wadäni mäincoo mongænte yacönenque gocæte ante cæyönänite Itota, Ìncodo mongænte godämaï ïedäni, äninque wææ cæcantapa. ¹⁷ Ayæ tömënäni inänite angantapa.

—Wængongui beyæ iimainö ante yewæmongatimpa. “Tömämæ quëwënäni botö oncönë pö guidique botö imote apænecädänimpa,” ante Wængongui angä incæte minitö wænæ wænæ cæmïni beyænque Wængongui oncö incæ nê awëmö ö ænänäni näni womöincönë bai wentamö bapa töö.

¹⁸ Ante odömonte apæneyongante, Wængongui quï, ante nê godönäni ñænænäni tönö nê wææ ante odömönäni tönö ëñëe gönänitapa. Wadäni önönänique guiquënë, Itota quinante waa pöni apænecä ëñëmönii, ante wädäni. Adinque awënëidi wæætë, Itota beyænque pïinäni wæcæ wæ, ante pönëninque Itota ingante guiñente wædinque, Quinö cæmö wæmaingää, ante wænoncæte ante pönente cægadänimpa. ¹⁹ Gäwadecæ bayonte Itotaidi iñömö oncodo tao godinque godömenque yabæque tao gogadänimpa.

Iigowæ ömæcawæ do guiñë wæ adänipa
(Mäateo 21.20-22)

²⁰ Baänæ ate iimö näni pöninö adodö ponte ayönäni iigowæ yæwaguinto ætæwowate tömëwæ æi ayawæ edæ dobæ guingo iwate wænimpa, ante adänitapa. ²¹ Adinque Pegodo, Itota iimö nänö äni bai impa, ante pönëninque,

—Awënë nê Odömömi cöwä ae. Bitö pïinte äniwæ inte iigowæ edæ dobæ guiñë wæ атаque.

²² Äñongante tömënäni inänite Itota wæætë,

—Wængongui ingante wede pönëmæwedäni, angantapa. ²³ Ìi änanquidi iñömö ongö iñonte waocä, “Änanquidi ëñëmi, äninque, Bitö cabænte wo gote gäwapænë guiie,” angä ëñëninque änanquidi tömë gäwapæno do wo gote guiqui i, ante pönëminitawo. Edæ näwangä ante minitö iminite apænebopa. Æcämenque incæ edæ æmæ pönënämaï inte, Botö äno bai do bacæimpa, ante wede pönëninque äna ininque tömengä nänö äninö bai do æmaingampa. ²⁴ Mänömaï beyæ botö minitö iminite apænebopa. Minitö quïëmë incæ ante Wængongui ingante apænedinque, Tömengä näwangä pönongä æncæboimpa, ante wede pönente apænemini ininque minitö äninö tömänö edæ do æncæminimpa.

²⁵ Ayæ edæ, “Minitö, Wïwa cæbo incæte Wængongui öönädë nê quëwëngä inte botö imote pönö ñimpo cæcä ininque botö waa tobaïmopa, ante wæminitawo. Ìñæmpa, Wængongui mänömainö cæcæcäimpa, ante cædinque minitö tömengä ingante apænecæte ante ongöninque täno piyænë cæte cædäni. Wacä wænæ wænæ cæcä wædömini inte minitö wæætë tömengä ingante pönö ñimpo cædäni, ante Itota apænecäcäimpa.

²⁶ Wæætë edæ minitö pönö ñimpo cædämaï imini ininque minitö wænæ wænæ cædinö

ante mīnitō Mæmpo öönædē nē quēwengä inongä inte tömengä adobaī ñimpo cædämaī imaingampa,” ante Itota apænegacäimpa.

*Awënë imipa, ante æcänö änaī, ante Itota ingante änänipa
(Mäateo 21.23-27; Odoca 20.1-8)*

²⁷ Eedotadēē iñömö adodö pönänitapa. Itota Wængonguī oncö ñænæncönē yabæcönē go guite cægöñongä, Wængonguī qui, ante nē godönäni ñænænäni tönö nē wææ ante odömönäni tönö nē aadäni nāni Picæncabo, nāni änäni tönö tömengä weca ponte änänitapa. ²⁸ Tömengä ingante,

—Æcänö nē angä inte bitö imite angä cæbii, änänitapa. Æcänö bitö imite, Nē ämi imipa, pönö äna æninque bitö nē ämi inte baī edæ mänömaī cæbii. ²⁹ Ante wæyönänite Itota näemæ æninque,

—Botö mīnitö änö baī adodeque ämo ëñëninque mīnitö wæætē apænemīni ëñëmoedäni. Apænemīni ëñente ate, Botö cædinö ante æcänö nē angä inte pönö äna æninque cæboī, ante botö wæætē apænebo ëñëmaīmīnīpa.

³⁰ Wäö wodi ingante æcänö, Æpænē guidonguimi, äna ëñëninque tömengä wæætē guidongäi, ante pönemīni. Edæ Wængonguī angä ëñente cæcantawoo. Wæætē waodänique änäni ëñente cæcantawoo. Æcänö Wäö ingante änaa, ante apænemīni ëñëmoedäni. ³¹ Angä ëñente wædinque tömënäni, Æbänö anguiī, ante wæætedö wæætē nämäneque tededinque, “Wængonguī angä ëñente Wäö guidongantapa, ante ämö baī Itota wæætē mönö imonte, ‘Quinante Wäö ingante pönënämaī imīnitapa,’ ancædongäimpa. ³² Ante pönente wædinque wæætē, Wængonguī beyæ nē apæneca Wäö wodi inongäimpa, ante tömänäni pönënänīpa. Ante pönëninque awënëidi wæætē, Waodänique änäni ëñente Wäö guidongantapa,” ante mönö ædö cæte anguiī. Edæ pīnänī wæcæ wæ. ³³ Ante guñente wædinque Itota ingante edæ,

—Wa. Æñënämaī imönīpa.

Ante wæyönänite Itota wæætē,

—İninque edæ, Æcänö nē angä inte pönö äna æninque botö cæboī, ante mīnitö änö ante botö adobaī apænedämaī incæboimpa, ante angacäimpa.

12

*Nē aadäni inguënänäni incæ wiwa cædänīpa, ante
(Mäateo 21.33-46; Odoca 20.9-19)*

¹ Ayæ mänīñedē Itota, Wængonguī æbänö cæcää, ante ëñencædänīpa, ante imæca quēwënäni nāni cæinö ante odömöninque iīmaī apænecantapa. “Waocä yowementacodē mīninque wææ da da mäo da caadinque, Tömëmoncoo ænte pīnä pīnä gäwate tömëmæ ontatodē wæ yopænte æñömö, ante ææ wote badongä. Ayæ yowementacodē awëmö guidämaī incædänīpa, ante æi wænömënæca gomö aquíñömö mäenongä. Ate wabæca gocæ cædinque wadäni ömæ wite nē aadäni inänite, Botö yowementacodē incæ ömæ wite aedäni, angantapa. Aayöminite botö, Mīnitö qui, ante pancamonga pönömo æncæmīnīpa, angä Ao ãñönäni wadæ gocantapa.”

² “Ayæ yowedepo bayonte tömengä ingante nē cæcä ingante apænedinque, Bitö yowementacodē nē aadäni weca godinque pancamonga ämi æninque botö weca wæætē mämömi æmoe, angä gocantapa. ³ Angä godinque pongä adinque yowementacodē nē aadäni guiquënë nē æncæ pönīngä ingante bæi ongonte tæi tæi päninque ömæpocä da tadönäni gocantapa. ⁴ Adinque nē ëcä iñömö wacä ingante tömengä ingante nē cæcä ingante angä gote pongä adinque yowementacodē nē aadäni adobaī tæi tacadäni wæyongante, Guingo imonte wæcæcäimpa, ante tömengä ingante godö wiwa cædänitapa. ⁵ Ayæ wæætē nē ëcä wacä ingante da godongä godinque yowementacodē pongä adinque nē aadäni wæætē tömengä ingante wænönäni wængantapa. Ayæ wæætē nanguī inäni inänite da godongä pönäni adinque pancadäniya inänite tæi tæi päninque pancadäniya inänite wænönäni wænänitapa.”

⁶ “Adocanque pōni nē ēacā weca ongōnongäimpa. Mäningä iñōmō nē ēacā wengä onguĩñangä iñongante nē ēacā tömengä ingante nanguĩ waadedongäimpa. İninqe nē ēacā iñōmō, ‘Tömēmo wengä ingante da godōmo gocā adinque tömēnāni guĩñente wædinque ee abaiñanipa,’ ante pōnēninque tömengä ingante da godongä tömangä pōni gocantapa. ⁷ Gote dicæ pongä adinque tömēnāni, ‘Tömengä ingampa. Wæmpocā mäincoo iñi edæ iingä iñōmō nē ænguingä ingampa cæmōō. Mönō edæ mao wænōmō wængä ate edæ mönō qui babaimpa.’ ⁸ Änewēninque tömēnāni nē ēacā wengä ingante edæ bæi ongonte wænōninque tömengä baō iñi yowementacodē wææ cæte yabæque edæ, Ömäe, ante wido cædänitapa. Mäninque apænebopa.”

⁹ Ante tededinque Itota apænegacäimpa. Ayæ mänii nē änināni inänite wæætē iñimai angantapa. “İninqe yowementacodē nē aaquēnēnāni inänite nē ēacā æbänō cæquingää, ante pōnēmini. Tömengä edæ, Ömäe, ante do pōninque nē aaquēnēnāni inänite godō wænōninque wadāni inänite yowementacodē godongä æninque aacædänimpa.”

¹⁰ Äninque Itota, “Minitō guiquēnē dodāni nāni yewæmongainta adāmai inte botō imote ämīnitawo. Edæ iñimaiñō ante Wængonguĩ angä ēñente yewæmongadänimpa. ‘Dica ænte adinque, Wēnæ wēnæ inca, ante nē mænōnāni nāni wido cædinca incæ gomonga wæmonca inca ininqe täno nāni ñönōnca bæbængapa do bacapa.

¹¹ Wængonguĩ Awēnē incæ mänōmai cæcä adinque mönō waocabo guĩñente wædinque waa amompa,’
Ante yewæmonte i abaiñinipa.”

¹² Mänōmai apæneçä ēñente wædinque awēnēidi wæætē, İñæmpa nē aaquēnēnāni nāni cæinō ante odōmonte apænedinque Itota mönō imonte piinte angä awädō, ante pōnēninque tömengä ingante bæi ongoncæ cædänitapa. Incæte, Wadāni piināni wæcæ wæ, ante wædinque ee adinque bæi ongōnāmai inte tömēnāni edæ wadæ gogadänimpa.

*Tæiyæ Awēnē nänō äintamō ante tededänipa
(Mäateo 22.15-22; Odoca 20.20-26)*

¹³ Mänii awēnēidi incæ ayæ ate Paditeoidi pancadäniya tönō Edodeidi pancadäniya inänite da godōninque, Minitō gote Itota ingante äñōmini wabänō tömengä nänō pante wæquinque adodeque wapiticæ bai tedebaingampa. ¹⁴ Änāni ēñēninque Itota weca wadæ pōninque,

—Awēnē nē Odōmōmi ēñēmi. Bitō nō pōnente cæbi imipa, ante do ēñēmōnipa. Ayæ bitō ayōmi mönitō tömāmōni önōmōnique bai imōni adinque bitō iñōmō, Waodāni æbänō anguñānii, ante ayæ, Æbänō cæquĩñānii, ante wædāmai imi inte Wængonguĩ taadō ante bitō guĩñēnāmai inte nō odōmonte apænebipa. İninqe apænebi ēñēmōnie. Odōmäno gobiedōno beyæ ante tæiyæ awēnē Tetædo tigitamō nänō änintamō ante æbänō wææ yewæmonte i, ante ēñencæte ante wæmōnipa.

¹⁵ Godonte edæ waa cæte intawo. Wæætē wēnæ wēnæ cæte intawo. Ante äñōnānite Itota iñōmō, Waa cæte bai tedewēnānipa, ante do ēñente wædingä inte tömēnāni inänite,

—Botō imotedō ante cædinque, Æbänō cæmō ate oda cæquingää, ante quĩnante cæminii. Deēnadio tigitamō ænte pōmini aboedāni.

¹⁶ Angä ēñente ænte pōnāni adinque,

—Æcänō awinca bai yewæmonte badonte i. Æcänō emōwo ante yewæmonte i.

Ante äñongante,

—Awēnē Tetædo awinca bai yewæmonte badonte impa. Adocä emōwo ante yewæmonte ongō amōnipa.

¹⁷ Ante apænedāni ēñēninque Itota tömēnāni inänite,

—Awēnē Tetædo qui i ininqe edæ Tetædo ingante godongäimpa. Wæætē Awēnē Wængonguĩ qui i ininqe Wængonguĩ ingante godonguĩ i apa anewēminii.

Angä ēñēninque tömēnāni, Æ, nō pōni ante apæneçampa, ante tömengä ingante waa adinque guĩñente wægadänimpa.

Ædö cæte ñāni ömæmonguii, ante wædānīpa
(Mäateo 22.23-33; Odoca 20.27-40)

¹⁸ Ayæ Tadoteoidi nē, Waocā wæninque ñāni ömæmönāmai æmæwo wængampa, ante nē ānewēnāni inte Itota weca pōninque, Mōni ānō ante āmi ēñēmaimōnīpa, āninque,

¹⁹ —Awēnē nē Odōmōmi ēñēmi. Mōitee wodi mōnō beyæ ante wææ yewæmōninque iīmaī ante yewæmongacāimpa. Waocā mōninque wēñæ tapæidāmai inte wængā ate tōmengā tōniñacā wæætē owæmpoingā ingante mōninque wēñæ tapæidinque, Botō tōniñacā wodi wengā ingampa, ante pæpogacæcāimpa, ante yewæmongacāimpa.

²⁰ “Īninque wadāni iīmaī cædānitapa, ante apænemōni ēñēe. Edæ ōnompō æmæmpoque go mengāa nāni caipæ iñōnānite bamoncadengā mōninque wēñæ tapæidāmai manguiwēninque edæ nāñe wængā. ²¹ Wængā ĩninque wææ ayæmengā adocā ingante mōninque wēñæ tapæidāmai nāñe wængā. Ayæ wææ wacā adobāi wēñæ tapæidāmai nāñe. ²² Ayæ wææ wēñæ tapæidāmai nāñe, ayæ wææ wēñæ tapæidāmai nāñe, ayæ wææ wēñæ tapæidāmai nāñe, ayæ wææ ayæmengā pōni adocā ingante mōninque wēñæ tapæidāmai nāñe wængantapa. Onquiyængā guiquēnē anca owæmpote wædinque tōmangā pōni nāñe wængantapa. ²³ Īninque, Mōnō ñāni ömæmonguiōnæ, ante mīni āōnæ iñonte māningā owæmpoingā iñōmō æcānō nānōogængā baquingāā. Edæ tōmengā ingante iñōmō edæ tōmānāni manguiwengadānīpa.”

²⁴ Āñōnānite Itota wæætē,

—Mīnitō iñæmpa. Wængonguī angā ēñente nāni yewæmōinta adāmai inte baī āmīni awædō. Wængonguī adocanque tæi piñængā inte edæ tōmāā cæcampa, ante pōnēnāmai inte edæ oda cæte āmīni awædō. ²⁵ Edæ Wængonguī anquedoidi öönædē cōwē owodāni baī iñōnāni inte waodāni ñāni ömæmōninque godō ñānōnāmai mōnāmai inguinānidō anguēnē. ²⁶ Wæætē do wængaināni nāni ñāni ömæmonguinō ante Mōitee wodi ocāñequiya ante yewæmōninque adotaa æbānō yewæmongacāi, ante mīnitō adāmai inte āmīni awædō. Edæ Mōitee wodi ingante Wængonguī iīmaī angacāimpa. “Botō iñōmō Abadāo Wængonguīmo ingaīmo inte ayæ Itæca Wængonguīmo ingaīmo inte botō Aacobo Wængonguīmo adobo īmo anguēnē.” ²⁷ Ante nē angaingā inte edæ æmæwo wænīnāni tōmēnāni Wængonguī ædō cæte inguingāā. Wæætē edæ mīi quēwēnānique tōmēnāni Wængonguī ĩnongā ingampa, pōnenguēnē quēwēmīni. Nē wænte godīnāni incæ ayæ mīināni quēwēnāni iñānīpa. Mīnitō edæ wadō ante tededimīni inte edæ oda cæte wapiticæ ānewēmīnīpa, angacāimpa.

Wængonguī nānō wææ angaine mēnea tæīneda pōni ēnepa
(Mäateo 22.34-40)

²⁸ Mānōmai āñōnānite nō apænecā ēñente wædinque adocanque nē wææ ante odōmongā iñōmō Itota weca pōninque,

—Wængonguī, Īmaī cædāni, ante nānō wææ angainecoo ante pōnēninque ædedō tæīne pōni ī iñonte mōnō nanguī ēñente waa cæquīi.

²⁹ Āñongante Itota iñōmō,

—Īmaīne ante nānō wææ angaine iñōmō edæ tæīne pōni ēne iñonte mōnō nanguī ēñente cædinque waa cæcāimpa, angantapa. “Idægoidi, āmo ēñēedāni. Wængonguī mōnō Awēnē iñōmō, tōmengā adocanque ĩnongā inte edæ nāwā Awēnē ĩnongā ingampa. ³⁰ Mānōmai Awēnē Wængonguī ingampa, ante adinque bitō mīmō entawente tōmengā ingante waadedinque ōnōwoca ēwocabi inte ædæmō waadete pōnencæbiimpa. Ayæ edæ bitō ocai encabi inte nō pōnēninque bitō baō tæi piñænte ēñabi inte edæ godō waadete cædinque tōmengā ingante waa waadete pōnēe,” ante nānō yewæmongaine tæīne iñonte mōnō nanguī ēñente waa cæcāimpa. ³¹ Ayæ wade nānō angaine adobāi tæīne iñonte mōnō ēñente waa cæcāimpa. “Nāmā bitō waadete waa cædō baī adobāi pōnēninque bitō wadāni iñānīte adobāi waa waadete cæe.” Māninque. Īmaī cædāni, ante Wængonguī nānō wææ angainō ante tæīneda baī wade edæ dæ ampa.

³² Ante apænecā ēñēninque nē wææ odōmongā iñōmō,

—Awënë nē Odömömi näwangä edæ ante apænebi ëñëmopa. Wacä wængonguï dæ äñongante adocanque mönō Wængonguï ïnongä ingampa, ante nö ämipa. ³³ ïninqe tö-mengä ingante mīmōno entawente waadedinque mönō ocai encamō inte nö pönëninque mönō baō tæi piñæmō inte godō Wængonguï ingante waadete cædinque nämä mönō pönënō bai wadäni inänite adobai waadete godō waa cæmō adinque Wængonguï waa acampa. Näwangä impa. Baō bataa iya tante godömō incæ, Wængonguï quï, ante mönō ancaa godömō incæ Wængonguï ayongä wædænque waa cæte impa. Wæætē mäninō bitō äninō bai cæmō adinque Wængonguï godömenque waa acampa.

³⁴ Ante nē wææ odömongä nö ëñente apænecä wædinque Itota edæ,

—Bitō Wængonguï Awënë Odeye nempo obo pönï ongömi inte guibaïmipa, ante awædō.

Angä ëñëninque tömänäni, Mönō æbänō godömenque anguï, ante guïñënete wædinque præ wëënegadänimpa.

Codito æcänō Pæingä ïnongä ingää, ante

(Mäateo 22.41-46; Odoca 20.41-44)

³⁵ Præ wëënedäni adinque Itota ayæ Wængonguï oncö ñænæncö yabæcönë ongöninque odömonte apænecantapa.

—Dodäni näni wææ yewæmongainō ante nē odömönäni ïñömō mönō Codito ingantedō ante apænedinque, Awënë Dabii wodi pæingä ïnongä ingampa, ante quïnante änänii, ante pönëmini. ³⁶ ïñæmpa Dabii wodi incæ Wængonguï Tæiyæ Waëmō Önöwoca tönō apænedinque,

“Botō Awënë ingante apænedinque Awënë Wængonguï incæ iïmaï ante apænægacäimpa. Bitō botō tömëmæ inō tæ contate ongöñömi,

Bitō ïmite nē piñäni inänite bæ tabo ate,

bitō önöwa gäänë ongönäni inänite piñä gæwacæbiimpa.”

Ante Awënë Dabii wodi incæ yewæmongacäimpa. ³⁷ Codito ïnongä ingampa, ante awënë Dabii wodi nänō nē angaingä ïnongä inte edæ adocä Codito ïñömō ædō cæte näëmæ Awënë Dabii wodi pæingä inguingää, ante pönenguënë änewëminii. Mänömainō ante Itota odömonte apænecä ëñëninque tæiyænäni godongämæ ongönäni waa ëñengadänimpa.

Në wææ odömönäni inänite Itota piingampa

(Mäateo 23.1-36; Odoca 11.37-54, 20.45-47)

³⁸ Itota godömenque iïmaï ante odömonte apænægacäimpa. “Cædämaï, ante wææ ante näni yewæmongainta nē ate odömönäni inänite mïnitō gomō aedäni. Tömënanii ïñömō doyæncoo wæmoncoo wëñate mongænte todänipa. Waodäni näni godonte äññömō cægöñönanite wadäni pō bee tëninque tömënanii inänite, Nē odömömi, bitō ïmite waa amönipa, ante apænedäni ëñëninque edæ nē odömönäni ïñömō nanguï todänipa. ³⁹ Ayæ tömënanii odömöincönë go guïdinque tömënanii nämanque ante pönëninque wæmompaa pönï tæ contate todänipa. Ayæ ææmæ becæ godinque tömënanii, Botō täno bete tocæboimpa, ante wæmompaa pönï tæ contate bete todänipa.

⁴⁰ Ayæ owæmpoinäni oncö yo mongænte bai cædinque ö æwënäni inte nē wææ odömönäni ïñömō, Botō ïmote waa acädänimpa, ante cædinque Wængonguï ingante nöingä apænëte bai cædinque babæ cædinque wantæpiyæ tededänipa. Tömënanii godömenque näni nanguï pönï pante wæquinque mänömaï nämä beyænque ante cädänipa, ante adinque mïnitō ïñömō ee gomō aedäni,” ante Itota wææ angacäimpa.

Owæmpoingä incæ, Wængonguï quï, ante godongampa

(Odoca 21.1-4)

⁴¹ Mäniñedë Wængonguï oncö yabæcönë ïñömō, Wængonguï quï, ante näni wënoncadedë da wënonänimpa. Mänincönë pō guïdinque tömënanii näni da wënoncade gäänë tæ contadinque Itota a ongöñongä nanguï inäni adoyömō pöninque daga daga wënäni acantapa. Pancadäniya nanguï ëädäni inte nanguï pönï da wënäni acantapa. ⁴² Ayæ a

ongöñongä owæmpoingä ömæpocä inte önotamonque incæ mentamonga ænte mämö daga wengantapa. ⁴³ Adinque Itota tömengä nänö në ëmiñænäni inänite aa pecä pönäni ate,

—Näwangä ante apænebo ëñeedäni. Wadäni tömänäni wædænque pönï godonte bai wii eyepæ daga wëñönäni iingä owæmpoingä iñömö ömæpocä inte wædongä incæte godömenque nanguï godonte bai godongä abopa. ⁴⁴ Edæ mäninäni guiquënë nanguï ëadäni inönäni inte, Quëwenguinta impa, ante cö cædinque tömënäni nani wii æinentaque ayæ ongöintaque godönäni. Iingä ömæpocä ingä guiquënë tömengä nänö quëwenguinta incæ, Wængonguï quï bacæimpa, ante tömanta edæ daga wengampa, ante Itota apænegacäimpa.

13

*Wængonguï oncö ñænæncö bæ tate bacæimpa, ante
(Mäateo 24.1-2; Odoca 21.5-6)*

¹ Mänii Wængonguï oncö ñænæncö yabæcönë ongonte iinque apænete tao goyongä tömengä nänö në ëmiñængä adocanque Itota ingante,

—Awënë në Odömömi ëñëmi, angantapa. Dicacoo wainca wænömënæca wænömënæca nani mænongaincadoo waincö ongö cöwä ae.

² Äñongante edæ,

—Bitö guiquënë, ñænængade nani mænongaincö ongö abii. Mänincoo mïni acoo incæ tömanca bæ tadäni wæænca adinque panguimæ panguimæ godinque dica adocaque pönï incæ wænömënæca ongönämaï ingæimpa, ante Itota apænegacäimpa.

*Oo iinque bacæimpa, ante æbänö ate ëñenguï, ante
(Mäateo 24.3-28; Odoca 21.7-24, 17.22-24)*

³ Mänii taodinque Odibowænquidi go æidinque tömënäni Wængonguï oncö ñænæncö gomö nani ayömö tæ contayongä Pegodo tönö Tantiago, Wäo tönö Æntade mänim-podäni Itota ingante awëmö änänitapa. ⁴ Mänii bitö äninö ante æyedënö iinque baquii, ante ëñencæte ante wæmönipa. Ayæ, Iïmaï cæbo ate mïnitö, Oo pönï impa, ante ëñencæmïnimpa, ante Wængonguï æbänö mä cæquingää, ante apænebi ëñëmaïmönipa.

⁵ Ante wæyönänite Itota, “Wapiticæ odömöñönäni mïnitö wæætë, Mönö oda cædämaï ingæimpa, ante nämä wææ aquënë quëwëmïni. Edæ iïmaï baquï i ataqeedäni. ⁶ Edæ wadäni nanguï inäni babæ tedete pöninque botö ëmöwo ante, ‘Botö mänimodö inömo imopa,’ ante apænedinque wapiticæ edæ mäodäni godinque nanguï inäni tömënäni mïñæ oda cæte wapiticæ gocædänimpa,” ante apænecantapa.

⁷ Ayæ, “Wabæca awënë tönö pö bee téninque wæætedö wæætë cædapa, ante tededäni ëñencæmïnimpa. Ayæ wayömö nani guëadö guëa cæte wænönö ante tededäni incæte edæ guïñente wædämaï iedäni. Edæ mäninö botö äninö bai cöwë bacæimpa. Ba incæte mönö inguipoga quëwënö iñömö mäniñedë wii æmäwo iinque bacæimpa. ⁸ Adobæca quëwënäni iñönänite wabæca quëwënäni ponte bee téninque guëadö guëa cæquinäni inänipa. Adobæca awënë odeye nempo quëwëñönänite wabæca awënë odeye tontadoidi mämö bee téninque guëadö guëa cæte wænonte wænguïnäni inänipa. Ayæ wayömö wayömö goinque pö wæcædänimpa. Ayæ waodäni nani cæinente wænguinqe cænguï incæ tömäa capo wængæimpa. Mänii wëñæ mä nantate bai wæwente bamini incæte mïni godömenque wæwenguinqe ingæimpa.”

⁹ Ante apænedinque Itota godömenque, “Tömëmïni nämä incæ wææ aadedäni. Edæ mïnitö imïnite bæi ongöninque edæ në apænte änäni weca mäo pædæ godönäni æncædänimpa. Ayæ godömenque tömënäni odömöincönë mäo gönönäni gongæñömïni mïnitö imïnite tæi tæi pancædänimpa. Ayæ botö beyænque pancabaa awënëidi gob-edönadodoidi weca ayæ tömämaë awënëidi odeyeyidi weca mäo gönönäni gongæninque mïnitö botö beyæ apænecæmïnimpa. ¹⁰ Edæ iinque bayedë botö äñedë ayæ badämaï iñonte, Botö æmo beyænque quëwencæmïnimpa, ante waa pönï botö apænedö ante tömämaë quëwënäni doyedë ëñencædänimpa. ¹¹ Iinque mäniñedë mïnitö imïnite

näni bæi ongonte ænte goyedë, Në apænte änäni weca ongöninque æbänö ante apænequimoo, ante wädämaï iedäni. Edæ, Æbänö waa apænequii, ante Wængonguï Tæiyæ Waëmö Önöwoca apænecä ëñente ate apænecæminimpa. Wii nämä pönëninque wæætë Wængonguï nänö apænedö ëñëninque apænecæminimpa.”

¹² “Mäniñedë edæ näna caya iñönte adocanque näëmæ piinque, Wænoncæ, äninque tömengä töniiñacä ingante da godongä gocæcäimpa. Näna wencaya iñönte mæmpocä iñömö näëmæ piinque, Wænoncæ, äninque tömengä wengä ingante da godongä gocæcäimpa. Ayæ wënænäni incæ wæmpoda inate näëmæ piinque mäo apænedäni ëñëninque wadäni tömënäni wæmpoda inate mämö wænönäni wæncædäimpa. ¹³ Ayæ, Coditoidi iminipææ, ante tömänäni botö ëmöwo beyænque minitö iminite nanguï piincædänimpa. Piinäni wæwëmini incæte æcänö iimæca iinque baganca wæntædämaï inte botö ëmöwo beyæ piinte badämaï inaa botö tömengä ingante æmo beyænque quëwencæcäimpa,” ante Itota apænecantapa.

¹⁴ Ayæ, “Wadäni pö ñömæi bai öo wadö näni wo ewenguimämo incæ tæiyæ waëmö iñömö ænte mämö cö cæcædänimpa, ante doyedë yewæmongatimpa. Docä nänö yewæmongainta adinque në adingä iñömö tömengä do ëñëmaingampa. Iincayæ ate cö cædäni ongö adinque edæ mäniñedë Oodeabæ quëwëmini iñömö änanquidi do wodii winonte æibæwedäni. ¹⁵ Ayæ oncömanca ongömini iinque mäincoo æncæte ante oncönë wæi guidämaï inte oncömancaque oncömancaque wodii winömæwedäni. ¹⁶ Ayæ në gönea cæmini iinque yacoo æncæte ante oncönë ocæ ëmænämaï inte godömenque wodii winömæwedäni. ¹⁷ Mäniönæ iinque bayedë yædëmadä inäni tönö goömæ në gänönäni tönö tömënäni näni wæquimämo baquinö angüënë. ¹⁸ Ayæ minitö mini wodii winonguionæ ante pönëninque edæ Wængonguï ingante, Wii edæ cöönædepo bacæimpa, ante apæneedäni. ¹⁹ Edæ mäniñedë waodäni nanguï näni wæwëmämo näni angä baquinö angüënë. Edæ Wængonguï nänö badongaiñedë mänömaï näni wæwëmämo bai dæ äñonte ayæ godömenque ñöwo ganca dæ änompa. Ayæ godömenque iinque baganca mänömaï näni wæwenguimämo bai dæ angüinö angüënë.”

²⁰ “Edæ wantæpiyæ näni wæwenguï impa, ante adinque Wængonguï, Mänimpöönæque edæ wæwencædänimpa, ante pönömenque ante änämaï ingä bai quingänö quëwenguënë dæ ancædönänimpa. Incæte Wængonguï, Mänimpodäni inänite apænte æmo beyænque në quëwenguinäni inänipa, ante nänö apænte ængainäni inänite waadete pönëninque dobæ, Mänimpöönæque wæwencædänimpa, ante cædinque pönömenque angacäimpa,” ante Itota apænegacäimpa.

²¹ Ayæ, Iinque bayonte æbänö inguüi, apænedinque Itota godömenque iimäi ante apænecantapa. “Mäniñedë wadäni minitö iminite, ‘Iñömö mönö Codito ponte ongongä tamëñedäni,’ ante ayæ, ‘Wayömö a ongongä atamönipa,’ ante tededäni ëñëninque edæ minitö iñömö ëñënämaï imæwedäni. ²² Wadäni mäniñedë ponte a ongöninque nämä incæ ante, Tömëmo Codito inömo imopa, ante babæ ante tedequinäni. Ayæ, Wængonguï beyæ në apænebo inömo imopa, ante në babæ ante tedequinäni. Tömënäni, Wængonguï nänö apænte ængainäni incæ æmæwo oda cædinque wapiticæ gocædänimpa, ante cædinque bamönengæ bai cædinque öönädë cæi bai cædinque nö odömonte bai cæquinäni inänipa. Incæte Wængonguï në apænte ængaingä inte edæ ee aquingä diyæ æmæwo oda cædinque wapiticæ goquinänii. ²³ Edæ iinque badämaï iñönte botö ñöwo do apænebo ëñente cædäni. Oda cædämaï incæboimpa, ante nämä wææ aabæwedäni,” ante Itota angacäimpa.

Waobo ëñagaimo inte botö iimäi ponte cæcæboimpa, ante (Mäateo 24.29-35, 42, 44; Odoca 21.25-36)

²⁴ Äninque Itota ayæ godömenque apænedinque, “Mäniï näni wæwëmämo näni angä iinque go ate nænque iñontobæ wëmö badinque apäicä apäidämaï ingæimpa. ²⁵ Nëmöncoo öönädë inö wææ tæ wæëninque waa tæ waa tæ wæængæimpa. Öönädë tæi ongongaincoo incæ wancæ wancæ cæte bai wapiticæ goquinö angüënë. ²⁶ Mäniñedë

edæ botö Waobo në ëñagaïmo inte boguïmancodë pöningue täi pöni pïñæmo ïninqe edæ ñäö apäite bai waëmö ëmonte wææmo acædänimpa. ²⁷ Mänömaï pöningue botö anquedoidi ïnänite ämo godinque tömënäni æmænö betamonca æmænö betamonca boguïmä nani pö goïnö godinque inguipoga tömäne godinque öönæ tömäne godinque Wængonguï nänö apænte ængainäni ïnänite äñete poncædänimpa.”

²⁸ Ante Itota godömenque apænedinque, “Iigowæ æbänö iwæ, ante odömonte apænebo ëñëninque pönëedäni, angantapa. Tömëwæ müwæ badinque iigowæ wayabo tänä nä boca adinque mïnitö, Öñabo nänö bocaïnepo inte nænque näwantedæ baquinque bocapa, ante pönëninque edæ do ëñëmïnipa. ²⁹ Ayæ adobaï mänïnö botö apænedö bai edæ do ba adinque mïnitö, Waocä në ëñagaingä do odemö pöni ongöningue inguipoga oo poncæcäimpa, ante ëñencæmïnipa. ³⁰ Näwangä ämopa. Nöwomïni ayæ mümïni quëwëninque wænte godämaï ïñömïni mänïnö botö apænedinö bai tömänö edæ do ïninqe baquinö angüënë. ³¹ Edæ öönædë ongöñömö inguipoga tönö wo ewente bai dæ ba incæte botö angaïnonque guiquënë dæ badämaï inte edæ cöwë täi ongongæimpa,” angacäimpa.

³² Ayæ, “Mänïönæ æyedënö i, ante, Mänïnepo ædepodö i, ante ëñencæte ante mïni wædinö ante æcæmenque incæ ëñënämaï ingampa. Tömänäni ëñënämaï ïñönäni edæ Wængonguï anquedoidi incæ ëñënämaï ïnänipa. Wæmpocä Wëmo incæ ëñënämaï ïñömote Wæmpocä ïñömö tömengä adocanque incæ edæ në ëñengä ingampa,” angantapa.

³³ Äninque ayæ godömenque apænedinque Itota tömënäni ïnänite ïmaï angantapa. “Ïninqe, Äyedënö baquïi, ante ëñënämaï ïmïni inte edæ mönämaï mümïni wänö cöninque edæ Wængonguï ingante apæneedäni. ³⁴ Botö ponguïnö ïñömö waocä ëacä nänö cæi bai impa. ïngä waocä ïñömö wabæca gocæ cædinque, Botö imote në cædäni në änäni badinque botö oncö waa aacædänimpa, ante adocanque ingante, Mäninganca cæe, wacä ingante edæ, Mäninganca cæe, wacä ingante, Mäninganca cæe, ante odömöningue odemö wæe a congä ingante, Cöwä ae, äninque wadæ gocä. ³⁵ Ïninqe botö në ëacä bai ïñömote mïnitö, Mönitö Awënë æyedënö ponguingä, ante ëñënämaï ïmïni inte gäwadedæ ayaönænëña tawadiya peyedë ñäö ba, æyedëmë poncæcäimpa, ante wadö congüënë cæmïni. ³⁶ Edæ, Wïi mö ñömöni ponguingä ingänö angüënë, ante cædinque mümïni quëwëmaïmïnipa. ³⁷ Mïnitö imïnite botö änö ante tömänäni ïnänite adobaï, Wänö congüënë quëwëmïni,” ante Itota angacäimpa.

14

Itota ingante bæi ongonte ængæimpa, ante cædänipa
(Mäateo 26.1-5; Odoca 22.1-2; Wäö 11.45-53)

¹ Mëönaa go ate wodo pænta gogaïönæ bai Patowa ææmæ baquimpa, ante pönëninque oodeoidi ñöwo, Päo yedæ æmpoquï ömæmö i mönö cænguïönæ inguimpa, ante cædönänimpa. Mänïñedë, Wængonguï quï, ante në godönäni ñænænäni tönö në wæe ante odömönäni ïñömö, Mönö awëmö cæte Itota ingante bæi ongonte ænte mäo wængongæimpa, ante cædönänimpa. ² Oo pöni impa, ante wædinque awënëidi,

—Ïñæmpa ææmæntedæ ïñonte wænömö bai tömänäni ænguï bate Yæ yæ ante piinte cæcædönänimpa, ante adinque mönö ædö cæte mäniñedë cæquïi, ante wægadänimpa.

Itota ocaboga onquiyængä oguï wapæ gao cæcacampa
(Mäateo 26.6-13; Wäö 12.1-8)

³ Itota ïñömö Betänia godinque në baadingä Timönö oncönë go guite ëñacantapa. Guïi ëñate cæncöñongä onquiyængä adoyömö pö guicantapa. Tömengä oguï wapæ näwä näadodopæ nani änömæ nänö nanguï godonte ænimæ dica adabatodo waincadedë pe ñiñænte mäningä inte ñöwo ænte mämo Itota weca pongantapa. Pöningue tömengä mänincade wencade ao mänodinque Itota ocaboga edæ gao cæcacantapa. ⁴ Adinque godongämæ ongönäni pancadäniya ænguï badinque nani caboque tededinque,

—Ĩñæmpa oguĩ wapæ incæ önonque guënente bai cæcampa töö. ⁵ Edæ waocä adoque wadepo cæte beyæ paga æninque todetiento deēnadiota nāni æninta ayæ godömenque æninta beyæ godonte ænguēnemæ imæmpa. Godonte ænte bai ömæpodāni inānite wæætē godonguēnē apa.

Ante nāmāneque tededinque onquiyængä ingante nanguĩ pīinte änānitapa.

⁶ Itota wæætē,

—Quimæ pīiwēmīnii. Īngä onquiyængä iñömö botö imote waa pōni cæcä apa quēwēmīnii. Ee aquēnē quēwēmīnii. ⁷ Edæ ömæpodāni mīni änināni mīnitö weca cōwē quēwēnāni adinque mīnitö æyedēmē tömēnāni beyæ waa cæinēmīni inte edæ do waa cæbaiimīnīpa. Botö guiquēnē mīnitö weca wīi wantæpiyæ ongoncæboimpa. ⁸ Adinque mānimæ oguĩ wapæ botonga gadongadinque tömengä edæ botö baö daga wenguinque eyepæ iñonte öni paacantapa. Īnīnque tömengä nānö cæganca ante do cæcä apa ānewēmīnii. ⁹ Mīnitö imīnite nāwangä ante apænebopa. Tömāmæ æyömömē wadāni nāni ēñente toquinque botö imotedö ante apænedāni ēñēnānii māningä onquiyængä nānö cædinö ante adobai tededāni ēñente pönencædānimpa, ante Itota apænegacāimpa.

*Itota ingante odömonte godoncæte ante Codaa cæcampa
(Mäateo 26.14-16; Odoca 22.3-6)*

¹⁰ Ayæ māniñedē nāni, Dote, äincabo iñönāni adocanque Codaa Icadiote nāni änongä iñömö, Itota æyömönö ongongää, ante odömonte pædæ pönömo æncæmīnimpa, ante cædinque, Wængonguĩ quĩ, ante nē godönāni ñænænāni weca wadæ gocantapa.

¹¹ Godinque tömengä, Īmaĩ cæcæboimpa, ante apænecä ēñēninque awēñēdi nanguĩ todinque Ao äninque, Cæbi ate tiguitamö pönömöni æncæbiimpa, änāni. Ēñēninque Codaa Ao äninque, Æbānö cæte godö odömömo ænguīnānii, ante cōwä adinque anca cægacāimpa.

*Awēñē Itota päö tönö owæta pönongä cænte bedānīpa
(Mäateo 26.17-29; Odoca 22.7-23; Wäö 13.21-30; 1 Coodintoidi 11.23-26)*

¹² Oodeoidi päö yedæ æmpoquĩ ömæmö ĩ nāni cænguionæ tæcæ ba ate tömēnāni, Wodo pænta gogaionæ bai Patowa mönö cænguionæ impa, ante pönente cædinque, Wængonguĩ quĩ impa, ante codotedo māniönæ edæ cōwē wænönönānimpa. Īnīnque māniönæ iinque ba adinque tömengä nānö nē emiñænāni Itota ingante äninque,

—Ædönö ämi gote mönitö Patowa ææmæ ante cæmöni ate bitö bete cænguimīi.

¹³ Änāni ēñēninque Itota tömengä nānö nē emiñænāna mēnaa ĩnate da godöninque,

—Māniĩ nanguĩ nāni quēwēñömö gote taadö goyömināte onguĩñængä incæ cadabodē æpæ iyænte næænte pö bee tengä adinque minatö tömengä miñæ tee empote goeda.

¹⁴ Tömengä æcönēnö guicä adinque māniĩ oncö nē äcä ingante äninque minatö, “Mönö Awēñē nē Odömongä inte ĩmaĩ angampa. Bitö oncönē guicönē æcönēnö ante, Bitö oncö, ante ämi guidinque botö nē emiñænāni tönö botö Patowa ææmæ bete cænguimönii, angampa.” ¹⁵ Ante äñömināte tömengä æmongapaa mäi odömöninque ñænæncö awæmpa nānö do cönöincö odömongä adinque minatö mänincönē mönö beyæ tömää eyepæ cæcæmīnaimpa.

¹⁶ Angä ēñente tao godinque nāni quēwēñömö ponte ayöna, Itota nānö änö bai tömää do cæte ongompa, ante adinque tömēna Patowa ææmæ ante cædatapa.

¹⁷ Gäwadecæ bayonte dote ināni nāni cabo Itota miñæ godongämæ pönānitapa.

¹⁸ Ponte tæ contate cæncöñönānite Itota,

—Nāwangä ante apænebo ēñēdāni. Mīni cabo incæ adocanque botö tönö ñöwo godongämæ cæncongä incæ, Æncædānimpa, ante botö imote odömonte pædæ godonguīngä ingampa.

¹⁹ Ante apænecä ēñēninque, Wæinente awædö, ante pönēninque tömengä ingante adocanque adocanque äninque tömānāni adoyömö,

—Botö imotedö ante dicæ apænebitawogaa.

²⁰ Äñönāni Itota wæætē,

—Önompo tipæmpoga go mēmīnaa iñōmīni adocanque botō tōnō guēa adotaca mī cæte cængä incæ tōmengä nē cæquiringä ingampa. ²¹ Edæ dodāni Wængonguī beyæ ante nāni yewæmongai bai cædinque botō Waobo ēñagaimo inte cōwē wænte goquēnēmo imodō anguēnē. Incæte botō imote nē odōmonte godōnongä guiquēnē tōmengä nānō wæquinque cæquiringä ingampa. Māningä wīi ēñate bai waa toquēnengä incædongäimpa. ²² Ayæ tæcæ cæncōñōnāni Itota pāo bæi ongonte æninque Wængonguī ingante waa ate apænedinque pāo pā æninque tōmēnāni inānite pædæ godō pædæ godō cæcantapa.

—Botō baō bai impa, ante pædæ pōnōmo æninque mīnitō Ao ante cæedāni.

²³ Äninque ayæ bequīmæ owætaca bæi ongonte æninque Wængonguī ingante waa ate apænedinque pædæ godōninque nēnemocā æninque tōmānāni bedānitapa. ²⁴ Beyōnāni tōmēnāni inānite apænedinque,

—Botō wepæ iīmæ bai impa. Wængonguī do apænedinque, Botō pōnō cæbo ate mīnitō Ao ämīni ininque mōnō godongämæ waa cæte quēwengäimpa, angacäimpa. Nōwo adobai miine äninque apænebopa. Botō wepæ ante Ao ante ämīni inte mōnō godongämæ waa cæte quēwengäimpa. Edæ nanguī ināni beyæ gowequīmæ impa. ²⁵ Botō iñōmō Awēnē Odeye badinque ocæ emænte pōninque mīimæ botō beganca māniimæ yowepæ nōwo æmæwo bebo tamēñedāni, ante Itota apænegacäimpa.

Pegodo incæ, Dicæ abogaa, apænequiringä ingampa, ante (Mäateo 26.30-35; Odoca 22.31-34; Wäo 13.36-38)

²⁶ Ayæ Wængonguī ingante ämotamīni ante tao godinque Odibowænquidi godānitapa. ²⁷ Goyōnānite Itota iīmai ante apænecantapa.

—Dodāni Wængonguī beyæ yewæmōninque, “Nē aadingä ingante tacabo dæ wængä ate cæningäidi obegaidi wæætē panguīmæ goquimpa,” ante nāni yewæmonte angainō bai cædinque botō dæ ämo beyæ guingo imonte wædinque tōmāmīni edæ nāwæ goquīmīni iminipa, ante awædō. ²⁸ Panguīmæ gomīni incæte botō edæ nāni omæmonte Gadideabæ tāno gote a ongōñōmo mīnitō ayæ pōedāni.

²⁹ Angä ēñente wædinque Pegodo guiquēnē,

—Iñæmpa dæ ämi beyæ tōmānāni guingo imonte badinque panguīmæ godāni incæte edæ botō guiquēnē cōwē panguīmæ godāmai incæboimpa.

³⁰ Äñongante,

—Bitō imite nāwangä ante apænebo ēñēe. Nōwoönæ woyowotæ incæ tawadiya mempoga pedāmai iñonte bitō iñōmō botō imotedō ante wadō ante apænedinque, Dicæ abogaa, ante mempoga go adopoque anguīmi imipa.

³¹ Angä ēñente wædinque Pegodo wæætē,

—Iñæmpa botō bitō tōnō wæmo incæte māninō ante cōwē änāmai incæboimpa.

Ante nanguī äñongä tōmānāni adodō ante apænegadānimpa.

Guetēmānii iñōmō Itota Wængonguī ingante apænecampa (Mäateo 26.36-46; Odoca 22.39-46)

³² Mānii godinque yabæ incæ Guetēmānii nāni äñōmō pōninque tōmengä miñæ nē godāni inānite Itota,

—Tæ contate ongōñōmīni botō godōmenque gote Wængonguī ingante apænete pōmoedāni.

³³ Äninque Pegodo Tantiago Wäo mānimpodānique inānite ænte māocā goyōnāni Itota iñōmō nanguī wæwente badinque guīñente wæcantapa. ³⁴ Ayæ tōmēnāni inānite,

—Botō wæwēmāmo entawēninque pæmænte wæte wænguī wædō. Mīnitō guiquēnē tæ contadinque ēamonca wānō cōedāni.

³⁵ Äninque wædæ pō gote ædæ wæænte guidōmēmæ ñongæninque Wængonguī ingante, Bitō Ao ämi botō caate wæquintedæ wīi ba ate waa tobāimopa. ³⁶ Äninque, “Mæmpo, botō Wæmpo ēñēmi. Bitō tæi piñæmi inōmi imipa. Bitō ti nā wænguīmæ bai ö ænte bai cædinque botō imote edæ, Wænāmai incæbiimpa, ämi ininque botō edæ waa tobāimopa. Incæte botō änōnō bai wīi cædinque wæætē tōmēmi änōnō bai cæe,” ämopa.

³⁷ Äninqe tömënäni weca adodö ponte ayongä mö ñönäni adinqe tömengä Pegodo ingante,

—Timönö edæ mömitawo. Botö tönö wänö congruënemi incæ bitö adoque oda ganca incæ wii aacömi. ³⁸ Edæ, Mimöno waa cæinëmönipa, ante ewocayömini baö aquiñö ëñamini inte wæntæye bamini. Ìninqe edæ mìnitö wänö cöninge nämä beyænque Wængongui ingante apænedinqe edæ, Wii wænæ wænæ cæinëmöni bacæmönimpa, ante apæneedäni.

³⁹ Äninqe Itota wæætë wadæ godinqe wëenë nänö äninö bai apænedinqe Wængongui ingante adodö ante apænecantapa. ⁴⁰ Ayæ adodö ponte ayongä möwo möinente ædo ædo cædinque mö ñönäni acantapa. Acampa, ante wædinque tömënäni, Æbänö anguimö, äninqe edæ pæ wëenedänitapa. ⁴¹ Itota wæætë mempoga go adopoque gote apænedinqe ñowo adodö pöninge edæ tömënäni inänite,

—Ayæ edæ guëmante mö ñöminii. Edæ idæwaa. Ñowo iinqe cætimpä. Botö Waobo ëñagäimo inte edæ botö wæwenguiönæ do edæ ba ininqe nê wænæ wænæ cædäni nempo nê pædæ godömoncæ cædingä iñömö botö imote do odömonte godongäi атакедäni. ⁴² Ñowo edæ ængæ gantidinqe mönö gocæimpa. Botö imo nê odömonte godonguingä iñömö edæ obo pöni pongä tamëñedäni, angacäimpa.

Itota ingante bæi ongonte ænte godänipa

(Mäateo 26.47-56; Odoca 22.47-53; Wäö 18.2-11)

⁴³ Ayæ apæneyongä edæ Codaa wodi tömënäni nani, Dote, ante gocabo adocabo iningä incæ ñowo pongantapa. Do iñömö, Wængongui qui, ante nê godönäni ñænænäni tönö nê wææ odömönäni tönö nê aadäni nani Picæncabo tönö wadäni inänite, Codaa miñæ goedäni, ante da godönönänimpa. Ñowo iñömö tömënäni nani nê da godönäni inte tæiyænäni yaëmë næænte canta næænte Codaa miñæ pönänitapa. ⁴⁴ Doyedë iñömö nê odömonte godoncæ cæcä Codaa iñömö tömengä miñæ poncæ cædäni inänite iimaï ante wëenëñedë apænedingä inongäimpa. “Botö odömonte queë bemömo adinqe mìnitö wæætë, Tömengä ingampa, ante adinqe tömengä ingante bæi ongonte äninqe wææ cæte mäomini gocæcäimpa.” ⁴⁵ Ante do äningä inte Codaa iñömö ñowo Itota weca pöninge,

—Awënë nê Odömömi imi.

Äninqe edæ waa cæte bai edæ queë bemongantapa. ⁴⁶ Mänömaï queë bemonte odömongä adinqe tömengä miñæ pönäni incæ Itota ingante pædæ gopo bæi ongonte ænänitapa.

⁴⁷ Wængongui qui, ante nê godongä ñænængä pöni inongä ingante nê cæcä incæ mäniñömö ponte a ongongä adinqe Itota gäänë ongongä adocanque pædæ guipote yaëmë o togænte äninqe mäningä nê cæcä ingante tæi päninqe önömonca wangö tamoncacantapa. ⁴⁸ Adinqe Itota iñömö ñowo pönäni inänite,

—Mìnitö iñæmpa, Bitö nê ö ænimi imipa, ante bai cædinque botö imote canta tönö yaëmë næænte ö æncæte ante pömini awædö. ⁴⁹ Iñæmpa Wængongui oncö ñænæncönë yabæcönë iimö iñö iimö iñö apænecöninge botö mìnitö weca a ongönömote mìnitö edæ bæi ongönämaï ee aminitapa töö. Incæte Wængongui angä ëñente nani yewæmongainö bai iinqe baquinque ante cæcæimpa.

⁵⁰ Ante apæneyongante tömänäni edæ ëmö cæte wodii winönänitapa. ⁵¹ Adocanque edëningä guiquënë ömaacä inte yabæcooque ninocoo nani ancooque pönö winiyate Itota miñæ gocantapa. Tömengä ingante yao ongönänitapa. ⁵² Adinqe tömengä wæætë gä tadongate wecoo ömaacä wodii winongacäimpa.

Në Apænte nani Änoncabo weca Itota ongongampa

(Mäateo 26.57-68; Odoca 22.54-55, 63-71; Wäö 18.12-14, 19-24)

⁵³ Wængongui qui, ante nê godongä ñænængä pöni inongä weca ænte godinqe Itota ingante gönönäni gongænte ongongantapa. Ayæ, Wængongui qui, ante nê godönäni ñænænäni tönö nê aadäni nani Picæncabo tönö nê wææ odömönäni tönö tömänäni pö bee bee bee tente godongämæ ongönänitapa. ⁵⁴ Pegodo guiquënë tömengä miñæ

ayæ ayæ godinque, Wængongui qui, ante nē godongā ñænængā pōnī inongā oncō yacōmoyæ iñōmō wäänē guicantapa. Māniñōmō guidique tōmengā wææ wānōnāni tōnō gongapamō tæ contate a ootocongantapa.

⁵⁵ Wængongui qui, ante nē godōnāni ñænænāni tōnō nē Apænte nāni Ānoncabo tōmānāni, Mōnō apænte ante wænōmō wæncæcāimpa, ante cædinque, Itota nānō wænguinque wænæ wænæ cæcā ingampa, ante æcānō nē adingā inte godō anguingāā, ante ancaā diqui diqui miñōnāni mānōmāinō ante nē anguēnengā edæ dæ angantapa.

⁵⁶ Edæ nanguī ināni pōninque babæ apænedinque, Mānōmāi cæcā atamōnipa, ante apænedāni incæte adoyōmō apænedāmaī ināni inte wapiticæ wapiticæ ānānitapa.

⁵⁷ Ayæ ate pancadāniya ængæ gantidique, Tōmengā ingante apænte angæimpa, ante cædinque babæ wapiticæ ante āninque,

⁵⁸ —Īngā iīmaī ante apænecā ēñentamōnipa. “Īncō Wængongui tæiyæ waēmō oncō woadāni ōnompoca nāni mænōnincō incæte botō cæbo wo tænguīmæ wænguimpa. Ayæ mēōnaa go adoñæque iñonte wacō wīi ōnompoca mænonguincō wæætē mænōncæboimpa,” ante apænecā ēñentamōnipa tōō, ante tededāni.

⁵⁹ Incæte adodeque ante apænedinque adoyōmō āninque tōmēnāni godōmenque āninque wadō wadō wapiticæ ante apænedānitapa.

⁶⁰ Ēñente wædinque, Wængongui qui, ante nē godongā ñænængā pōnī inongā guiquēnē godongāmæ ongōnāni tōnō tæcæguedē dibæ ongonte ængæ gantidique Itota ingante,

—Īñæmpa pæ wēēnebii. Bitō æbānō cæbitapa, ante iīnāni nāni ānīnō ante bitō æbānō āmii.

⁶¹ Ante āñongante edæ Itota cōwē ānāmaī pæ wēēnecā. Adinque nē godongā ñænængā pōnī inongā wæætē godō āninque,

—Wængongui mōnō Waēmō inongā Wengā mōnō Codito inongā ingampa. Bitō iñæmpa mānimidō inōmi imitawo.

⁶² Āñongante Itota iñōmō,

—Ao. Mānimodō inōmo imopa. Īninque iīncayæ ate botō Waobo ēñagaīmo inte Wængongui nē Tæi Piñængā ingā tōmēmængā inō tæ contabo adinque mīnitō ayæ ate botō ōñædē boguīmancodē pōmo acæmīinipa.

⁶³ Ante apænecā ēñente wædinque nē godongā ñænængā pōnī inongā iñōmō piinte badinque, Ēñente awædō, ante bai cædinque edæ nāmā weocoo wānā ñæninque,

—Idæwaa, angantapa. Nōwo wacā ingante, Itota wænæ wænæ cæcā atabopa, ante nē āincædongā ingante godōmenque diqui diqui mināmaī ingæimpa. ⁶⁴ Tōmengā nāmā Wængongui Wengā inte bai babæ godō tedewengampa tōō. Īninque edæ tōmengā babæ nānō ānewēnō ante do ēñēmīni inte edæ æbānō ante pōnēmīnii.

Ante āñongante nē apænte ānāni tōmānāni edæ, Nānō pante wænguinque edæ ānewengampa tōō.

⁶⁵ Ante apænte ānāni ate edæ pancadāniya Itota tōmengāā towæ tånongadinque tōmengā awinca weocoota pōnō ñāne cæmōninque tæi tæi pāninque tōmengā ingante,

—Æcānō pānaa, ante Wængongui beyænque apænebi ēñēmōnie.

Ante badete toyōnāni wææ wānōnāni guiquēnē tōmengā ingante bæi ongonte tæi tæi pangadānimpa.

Pegodo incæ, Dicæ abogaa, angampa

(Māateo 26.69-75; Odoca 22.56-62; Wäö 18.15-18, 25-29)

⁶⁶ Ayæ Pegodo guiquēnē yæipodē yacōmōñāa guii contate ongōñongā onquiyængā, Wængongui qui, ante nē godongā ñænængā pōnī inongā ingante nē cæcā iñōmō adoyōmō pō guicantapa. ⁶⁷ Ponte ayongā Pegodo gongapamō ootocæ cæcā adinque onquiyængā ædæmō cōwā adinque,

—Māningā Nāatadeta iñōmō quēwēnongā Itota tōnō bitō guēa cægōmitapa tōō.

⁶⁸ Angā ēñente wædinque,

—Dicæ. Bitō ānō ante æbānō āmii, ante dicæ ēñēmogaa.

Äninqe tao yabædemö gäänë gongæñongä tawadiya wëenengä petapa. ⁶⁹ Ayæ wæætë Pegodo ingante adinque onquiyængä iñömö godongämæ ongönäni inänite,
—Mäningä adocabodäni iningä inte ongonä ataqeedäni.

⁷⁰ Ante apæneyongä Pegodo wæætë, Dicæ bitö angänö imogaa, angantapa. Ayæ wantæ ate mäniñömö ongönäni adobai,

—Iñæmpa Gadideabæ quëwëniimi inte bitö näwangä Itota tönö tee empo në pömi imipa töö.

⁷¹ Änäni ëñente wædinque Pegodo wæætë, Botö Wængongui ëñëñongä nöingä ämopa, ante Wængongui ëmöwo ante babæ tedewëninque tömënäni inänite wæætë,

—Mïni angantedö ingante dicæ abogaa. Dicæ abo ante bai änewëmïnipa töö.

⁷² Ante tæcæ änewëñongä iñontobæ tawadiya ayængä petapa. Ayængä pe ëñente wædinque Pegodo Itota nänö äninö ante pönengantapa. Itota do iñömö, “Tawadiya mempoga pedämaï iñonte bitö botö imotedö ante wadö ante apænedinque, Dicæ abogaa, ante edæ mempoga go adopoque anguimi imipa,” änogäimpa. Ante pönente wædinque Pegodo, Ñöwo nänö pequinque do pecampa, ante wædinque Ca ca wægacäimpa.

15

Itota incæ Pidato weca ongongampa

(*Mäateo 27.1-2, 11-14; Odoca 23.1-5; Wäö 18.28-38*)

¹ Wængongui quï, ante në godönäni ñænænäni tönö në aadäni näni Picæncabo tönö në wææ odömönäni tönö tömënäni iñömö në änäni inönäni inte oodeoidi näni në Apænte Änoncabo inönänimpa. Ininque mäniï ñäö bayonte tömënäni, Æbänö cæquïi, ante pönente wædinque godongämæ pönëë cöninque Ao äninque Itota ingante goto winte töö æmænte ænte godinque odömäno awënë Pidato wodi nempo mäo pædæ godönäni ængantapa. ² Pidato guiquënë tömengä ingante,

—Oodeoidi Awënë Odeyebi bitö imitawoo. Äñongante,

—Bitö tömëmi änö bai botö mäniimodö imopa, ante Itota angantapa.

³ Wængongui quï, ante në godönäni ñænænäni guiquënë, Iingä Itota iñömö wënæ wënæ cæcampa, ante wadö wadö ante piiniquine Pidato ingante ancaa änänitapa. ⁴ Änäni ëñente wædinque Pidato wæætë Itota ingante,

—Iñæmpa pæ wëënebii. Bitö æpogadö wënæ wënæ cæbi imipa, ante nanguï änäni apa quëwëë.

⁵ Äñongante Itota tömënäni näni äninö ante cöwë apænedämaï ingä adinque awënë gobedönadodo wæætë, Quiëmë bai pæ wëëncä awædö, ante guïñente wægacäimpa.

Itota wæncæcäimpa, änänipa

(*Mäateo 27.15-31; Odoca 23.13-25; Wäö 18.38-40, 19.1-16*)

⁶ Mäniimæ awënë gobedönadodo mäniñedë wadepo iñö wadepo iñö cöwë iïmaï cædongäimpa. Oodeoidi ææmæ cæyönänite gobedönadodo iñömö, Në tee mönete ongönäni inänite adinque mïnitö æcänö ingante ämïni ñimpo cæbo goquingää, ante änäni ëñëninque tömengä tömënäni näni äningä adocanque ingante ñimpo cæcä godongäimpa. ⁷ Doyedë wadäni ænguï badinque, Awënë ingante wido cæcäimpa, ante cædinque wænonte cæyönäni adocanque Badabato näni änogä tömënäni tönö godongämæ cædongä inongäimpa. Ininque awënëidi në wiwa cædäni inänite bæi ongonte goto winäni ongöñönäni Badabato adobai tömënäni tönö godongämæ tee mömænete ongönongäimpa. ⁸ Ininque ñöwo iñömö wadäni tæiyænäni Pidato weca pöninque, Cöwë bitö cædö bai ñöwo adobai mönitö beyæ cæquimi ante wæmönipa.

⁹ Änäni ëñëninque Pidato iñömö,

—Oodeoidi Awënë Odeye ingante pönö ñimpo cæbo abæ tawængä ænguimïni. Æbänö cæbo ænguimïni.

¹⁰ Edæ do iñömö Itota gomonga cæcä ate wædinque, Wængongui quï, ante në godönäni ñænænäni incæ tömengä ingante piinte adönänimpa. Mäniñö beyænque

tömēnāni Itota ingante bæi ongonte botō nempo ænte māmō pædæ pōnōnānimpā. Ante pōnente wædinque Pidato, Oodeoidi Awēnē Odeye ingante ñimpo cæbo goquingā, äminitawoo, ante ñōwo angantapa. ¹¹ Ìninqe, Wængongui qui, ante nē godōnāni ñænænāni guiquēnē godongāmæ ongōnāni ñānite apænedinque, Minitō Pidato ingante iīmaī æedāni, ānānitapa. Ānāni ēñēninqe oodeoidi wæætē Pidato ingante, Wīi bitō ānongānō ante ämōnipa. Wæætē Badabato ingante ñimpo cæbi gocæe, ante ānāni. ¹² Ēñēninqe Pidato godō āninqe,

—Īninqe oodeoidi Awēnē Odeye mīni ānongā ingante æbānō cæquīmoo, ante äminii.

¹³ Āñongante tömēnāni ogæ tededinque,

—Awæ ñænquedimæ ämi cæte wænōnāni wængæe töö.

¹⁴ Ānāni ēñente wædinque Pidato,

—Īñæmpa quīnō wēnæ wēnæ cæcantawoo.

Āñongante godōmenque yedæ āninqe adodō,

—Ämi awāa timpote wænōnāni wængæe töö.

¹⁵ Ancaa ānewēñōnāni Pidato iñōmō, Mānīnāni pīnāmaī piyænē cæcædānimpā, ante cædinque Badabato nāni āningā ingante godō ñimpo cædinque tömēnāni nempo pædæ godongā ānānitapa. Wæætē edæ Itota ingante edæ Pidato wodi angā ämontai badōimenca tæi tæi pānāni ate ñænque quepote awāa nāni gōnonguinque edæ da godongā ænte godānitapa.

¹⁶ Pædæ godongā ate nē tontadoidi tömengā ingante töö æmænte wadæ godinque awēnē gobedōnadodo oncōnē Podætodio nāni ancōnē mangui guiyongā tontadoidi bacabo Itota weca godongāmæ āñete pōnānitapa. ¹⁷ Pōninqe tömēnāni, Awēnē ñmi inte awēnē weocoo wēñacæbiimpā, ante bai cædinque badete todinque Itota ingante wæætē opatawæ ēmoncoo pōnō da wēñadinque daa mongæmenca āninqe que cædinque, Awēnē poganta, ante bai pōnō daga wencadānitapa. ¹⁸ Ayæ Yæ yæ āninqe,

—Badogaa, bitō oodeo awēnē odayebi ñmipææ.

¹⁹ Ante badete todinque cæwipaca ancaa tæi tæi pancadinque tömengāa towæ towæ tånongadinque da guicapote ædæ wææninqe, Bitō Tæiyæ Waēmō Awēnē ñmi amōnipa, ante bai badete todānitapa. ²⁰ Ayæ iinqe badete todinque tömēnāni opatawæ ēmoncoo gā tadongadinque tömengā nāmā weocoo da wēñadānitapa. Ayæ edæ tömengā ingante awæ timpote gōnoncæte ante töö æmænte ænte tao mäodāni gogacāmpa.

Itota ingante awāa timpodāni wængampa

(Mäateo 27.32-44; Odoca 23.26-43; Wäo 19.17-27)

²¹ Māniñedē Tidēne quēwēnongā Timōnō guiquēnē Adecantodo tōnō Odopo tömēna wæmpo ñnongā inte tömengā yabæque gote pōnongāimpā. Ìninqe Itota ingante ænte godinque ayōnāni māningā Timōnō ñōwo wodo tebæ gocæ cædinque pongā adānitapa. Ìninqe tontadoidi, Bitō ægodōe. Itota ingante möni timpoquiwæ ænte mongænte goe, ānāni ænte mongænte gocantapa.

²² Mānōmaī godinque Godogota nāni āñōmō mönō tededō “Ocatañō” iñōmō Itota ingante ænte pōnānitapa. ²³ Māniñōmō pōnāni ate wadāni, Nantate beyæ becæcāimpā, ante cædinque biñōmæ nāni wædænque ti nāmæ tōnō mīidapæ nāni ānōmæ adoyōmō wempo cædēninqe pædæ pōnō cæyōnāni tömengā ononque yædæ bedinque edæ bedāmaī ingantapa. ²⁴ Ayæ tömengā ingante awæ ñænquedimæ nāni ænte pōniwāa töö godōninqe pōnō timpodinque wææ tiwadinque ængæ gantidēnānitapa. Ængæ gantidēnāni ate wægōñongā tömēnāni wæætē tömengā weocoo ñni ante, Æcānō quīnca nō ta adinque tömengā mānīncoo æncæcāimpā, ante wææntodōninqe adocooque adocooque ānānitapa.

²⁵ Edæ nænque tömantadæ æñonte māniñedē incæ tömengā ingante iinqe timpote edæ ængæ gantidēnāni wægongacāimpā. ²⁶ Ayæ, Itota wæncæcāimpā, ante quīnante apænte ānāni, ante tömānāni ponte adinque ēñencædānimpā, ante yewæmōninqe,

“Oodeoidi Awënë Odeye ïnongä ingampa,” ante yewæmöninque awæmpaa wo cædänitapa. ²⁷ Ayæ wada në ö ænte quëwëniina ïnate adoyedë tömengä tönö adocanque tömëmæ ïnö adocanque dipæmæ ïnö godö timpote gantidëdäni wægongadaimpa. ²⁸ ïninque, Në ëñëñämaï cædäni näni cabo tönö tömengä adocä ingampa, ante Wængonguï angä ëñente näni yewæmongainö bai ñöwo ïinque bagatimpa.

²⁹ Ayæ wodo pænta në godäni guiquënë Itota ingante godö babæ ante badete todinque pica pica cædinque,

—Bitö ïñæmpa Wængonguï tæiyæ waëmö oncö incæ bæ tate wo ëwëninque mëönaa go adoönæque ïñonte do mænonguïmi inte edæ, ³⁰ o togæmpote o togæwate ti wææninque edæ quëwëmæwe.

³¹ Ayæ, Wængonguï quï, ante në godönäni ñænænäni tönö në wææ odömönäni adobai näni cabo nämæneque godongämæ badete todinque,

—Tömengä, Wadäni quëwencædänimpa, ante waa cæcantawoo. Ñöwo ïñæmpa. Nämä beyænque eyepæ cæcampa diyæ quëwenguingä. ³² Idægoidi awënë odeye ingä ïninque tömengä ti wæænte gocä adinque mönitö wæætë, Tömengä näwä Codito ingampa, ante pönëmaï wædö.

Ante badete toyönäni në ö æna tömengä tönö godongämæ timpote wægöna incæ adobai Itota ingante pïininque wënæ wënæ ante badete togadaimpa.

Itota wængampa

(Mäateo 27.45-56; Odoca 23.44-49; Wäö 19.28-30)

³³ Tæcæbæcä pönï bayö tömämæ ïñontobæ wëmö badinque ayæ ayaönäa wæiganca mä mämönte bai ïnimpa. ³⁴ ïninque ayaönäa wæiyonte Itota nanguï pönï yedæ äninque, “Edoi, Edoi, nëma tabatäni,” äninque mönö tededö, “Botö Wængonguïña, botö Wængonguïña, ædö cæte botö ïmote ëmö cæte gobiyaa.”

³⁵ Ante wæcä ëñëninque godämæ ongönäni guiquënë,

—Æ. Ediya wodi ingante aa pecä apa.

³⁶ Äñönäni adocanque do pogodo gote önætämö ænte pöninque biinömæ bai önömænque æninque aa bedonte näæninque edæ, Becæcäimpa, ante cædinque cæwipaca pædæ æænongantapa.

—Ee aquënë quëwëedäni. Ediya wabänö ponte o togænte pædæ wæænongä abaimpa.

³⁷ Angä ate Itota ïñömö wæætë ogæ äninque edæ æmæwo guëmäninque wængacäimpa. ³⁸ ïninque edæ Wængonguï tæiyæ waëmoncönë weocoo odemö näni wææ wodöincoo adoyedë önönæca ïnö tæcæguedë pönï tænguïmæ wææntapa. ³⁹ Mänömaï ogæ äninque do wængä adinque tontadoidi awënë capitäo guiquënë,

—Näwangä impa. ïngä ïñömö Wængonguï Wængä ingainö ante pönenguënë, an-gacäimpa.

⁴⁰ Ayæ onquiyænäni Mäadiya Mäagadadënë näni änongä, Otite tönö Tantiagomö badä Mäadiya, Tadömee, mänimpodäni adobai oo gote gomö a ongönänitapa. ⁴¹ Tömënanï ïñömö Gadideabæ quëwengäñedë Itota miñæ gote pönö waa cædinäni inte ñöwo pö gobæ ongöninque pömö adänitapa. Itota Eedotadëe pö æñongante wadäni onquiyænäninque godongämæ tee empote pöninäni inte ñöwo pöninque a ongönänitapa.

Itota wodi baö ïni mäo daga wënanipa

(Mäateo 27.57-61; Odoca 23.50-56; Wäö 19.38-42)

⁴² Oodeoidi näni, Gäwadecæ ba ate guëmanguïönæ inguimpa, ante näni täno cæönæ ingatimpa. ïninque gäwadecæ oo ba ate wædinque, ⁴³ Adimatea ïñömö quëwëningä inte Ootee, Wængonguï Awënë Odeye nempo mönö æyedënö quëwengæimpa, ante wänö conte bai quëwëngäimpa. Tömengä oodeoidi näni Apænte Äincabo adocä ïnongä inte ñænængä ïnongäimpa. Tömengä ïñömö Pidato weca ñöwo guïñëñämaï pö guïdunque, Itota wodi baö pönömi ænte wëmoe, angantapa. ⁴⁴ Angä ëñëninque Pidato, Wa. Wabänö wængäi, ante pönente wædinque awënë capitäo ingante äñete pongä adinque, Do wængäi. ⁴⁵ Äñongante edæ, Dobæ wængäimpa, ante apænecä ëñëninque Pidato wæætë

Ootee ingante, Itota wodi baö ini o togænte æmæwe. ⁴⁶ Angä eñëninque Ootee iñömö edæ waëmö weocoo nino nani änoncoo godonte æninque Itota wodi baö ini wi æmpote wææ wi æwadinque pædæ wæænonte ænte gocantapa. Ayæ mänincoo wini wini caate dicamontaa wointatodë guidö ñö cæte daga wëninque dicabo edæ da pæñæ pönö tee mönogacäimpa. ⁴⁷ Mänömaï cæyongante Mäadiya Mäagadadënë nani änongå tönö Otite badä Mäadiya mänimpodaque tömengä ingante nani da wëniñömö adatapa.

16

Itota do wæningä inte ñäni ömæmonte quëwengampa

(Mäateo 28.1-10; Odoca 24.1-12; Wäö 20.1-10)

¹ Tömënanï guëmanguïönæ iinque go ate Mäadiya Mäagadadënë nani änongå tönö Tantiago badä Mäadiya tönö Tadömee tömënanï iñömö, Itota wodi baö öni pæcäimpa, ænte cædinque oguï waquï godonte ænänitapa. ² Ænte ate wacä tëmæna baquinque ñäö tæcæ bayonte iinänï do godinque nænque tæcæ mæ awæ nänö tamöñedë Itota wodido pöninque, ³ nämæneque änänitapa.

—Dicabo nani moncadodinca æcänö tæi piñængä inte pönö da tæñæna ate mönö guite aquï. ⁴ Ante wædinque go gongænte pömo ayönäni dicabo ñænængade pönï nani äninca incæ dobæ dicabo ñænængade pönï do da tæñæi a öñö adänitapa. ⁵ Adinque tömengä wodido wäänë guite ayönäni edëningä bai ingä doyæncoo näämænta ëmoncoo wëñate tömëmæ inö tæ contate a ongongä adinque onquiyænäni wæætë edæ ancai guñente wædänitapa. ⁶ Edëningä iñömö,

—Guñente wædämaï iedäni. Minitö, Itota Näatadeta quëwëningä ingante edæ wadäni awæ timpodäni ate në wæningä ingante edæ diqui diqui mimini awædö. Tömengä edæ dobæ ñäni ömæmonte tao gocäimpa. Iñömö edæ dæ angampa. Iintodë nänö öñontatodë iñömö edæ öñontatoque iï ataqeedäni. ⁷ Ayæ Pegodo tönö tömengä nänö në ëmiñæninänï tömänäni inänite gode ænte apænedinque minitö në adimini inte iïmainö ænte apæñecæminimpa. “Itota iñömö täno Gadideabæ godinque a ongöñongante minitö adoyömö godinque tömengä nänö äninö bai godinque tömengä ingante acæminimpa,” ænte gote apænedäni.

⁸ Ante apæñecä eñëninque, Æbänö ænte mänömaï angää, ænte ancai guñente do do wæate wædinque onquiyænäni iñömö Itota wodido abæ tawæ tao wodii winönänitapa. Guñente wædönäni inte tömënanï wadäni inänite bee tëninque apænedämaï pæ wëënegadänimpa.

Itota ingante Mäadiya Mäagadadënë acampa

(Wäö 20.11-18)

⁹ Itota tömënanï nani guëmäniönæ go ate iimö baänæque do ñäni ömæmonte pö a ongöñongante Mäadiya Mäagadadënë tänocä agacäimpa. Iingä onquiyængä iñömö wëëñedë wënæidi tiæte ganca inänï ënempoyongante Itota wido cædongäimpa. ¹⁰ Ñöwo iñömö Itota miñæ nani quëwëñincabo ayæ ca wæwëñönänite Mäadiya Mäagadadënë incæ tömënanï inänite mäo apæñecantapa. ¹¹ Itota ayæ miingä ingä atabopa, ænte apæñecä eñëninque tömënanï wii pönënanique ongongadänimpa.

Wada tömengä nänö në ëmiñænina Itota ingante adapa

(Odoca 24.13-35)

¹² Mänömaï wii pönënanï ate tömënanï nani Itota miñæ godincabo incæ mënaa idömæ gote ayöna Itota incæ wacä bai bate cægongä adatapa. ¹³ Ate wædinque tömëna wadæ godinque Itota miñæ nani godincabo wadäni inänite apænedinque, Mänömaï cægongä atamönapa, äna eñëninque edæ cöwë pönënämaï ingadänimpa.

Tömengä nänö da godöninänï inänite Itota angampa

(Mäateo 28.16-20; Odoca 24.36-49; Wäö 20.19-23)

¹⁴ Ayæ ænte onte ganca inänï nani Itota miñæ godincabo cænte tedete a cöñönäni Itota pö a ongongä adänitapa. Tömengä iñömö, Minitö pönëgade impa. Wadäni, Itota do

edæ ñäni ömæmonte cægongä atamönipa, ante apænedäni ëñëninque mïnitö mïmö ömædëmïni inte wïi pönëmïni, ante Itota pïingacäimpa.

¹⁵ Ayæ tömënäni inänite, “Wængonguï nänö badongainäni inguipoga tömäo quëwënäni iñönänite mïnitö botö imotedö ante mäo tömänäni inänite watapæ apænemïni ëñencädänimpa. ¹⁶ Edæ æcänö wede pönëninque æpænë guida tömengä botö godö æmo beyænque quëwencæcäimpa. Wæætë në pönënämaï ingä guiquënë tömengä nänö apænte pante wæquinque pönënämaï ingampa. ¹⁷ Botö cæbo ate në pönënäni adobaï edæ iïmaï mä cädäni adinque wädäni do ëñencädänimpa. Botö ëmöwo apænedinque tömënäni wënæidi inänite wido cæcädänimpa. Ayæ wädäni tömënäni tededö mä tedecädänimpa. ¹⁸ Ayæ tæntæ bæi ongönäni incæte wænguimæ bedäni incæte wënæ wënæ badämaï incädänimpa. Ayæ caate wädäni inänite gampodäni ate do waa bacädänimpa,” ante Itota apænegacäimpa.

Itota incæ öönædë æicampa

(Odoca 24.50-53)

¹⁹ Ìinque tömënäni inänite apænecä ëñënäni ate edæ Wængonguï öönædë ængö cæcä æidinque Wængonguï tömengä nänö tömëmæ inö mönö Awënë Itota iñömö tæ contagacäimpa. ²⁰ Ìinque tömengä nänö ëmiñænïnäni wæætë edæ tömämæ wadæ godinque wabæca mäo wabæca mäo apænedäni ëñënänitapa. Mönö Awënë incæ cæcä ate tömënäni mä cädäni adinque në ëñënäni wæætë, Nö impa, ante wægadänimpa. Mäninque ante yewæmonte impa.

Itota Codito ingantedö ante Odoca nänö watapæ ante yewæmongainta

Odoca imo yewæmömopa, ante

¹ Nöwodäni nangui inäni incæ, Mönitö weca æbänö iinque cægatimpa, ante do yewæmoncæ cædänipa. ² Doyedë quëwënäni iñömö, Æbänö cægatimpa, ante nê agaiñäni inte mäninö ante, Näwangä impa, ante nê apænedäni badinque adode beyæ ante nê cædäni bagadänimpa. Tömënäni mönitö imönite adodö ante pönö apænedäni ëñentamönipa. Iinque iinäni apænedäni möni ëñenö bai ñöwodäni wæætë edæ adobaï pönï ante yewæmoncæ cædäni iinque botö iñömö edæ, Adobainö ante yewæmoncæboimpa, antabopa. ³ Teopido bitö ñænämi pönï inömi inte ëñëmi. Botö iñömö, Wëenënedë æbänö mä pönï cægatimpa, ante ayæ, Nöwo ganca æbänö cæte i, ante ëñencæte ante nangui cædinque ædæmö ëñënimö inte botö edæ, Bitö Teopidobi acæbiimpa, ante adodö adodö ante yewæmömopa. ⁴ Wadäni odömönte apænedäni ëñëninque bitö wæætë, Nö intawo, ante ëñencæte ante cædinque botö yewæmöninta adinque edæ do ëñencæbiimpa. Mänömainö ante yewæmömö ae.

Wäö ëñaqingä, ante anquedo ponte apænecampa

⁵ Wængongui qui, ante nê godönäni pancadäniya Abiyaidi nani cabo iñönänite adocanque Tacadiya ëmongacäimpa. Tömengä iñömö Oodeabæ awënë odeye Edode wodi nänö ingaiñedë, Wængongui qui, ante nê godongä ingacäimpa. Tömengä nänögængä Aadö wodi päingä Editabeti ingacäimpa. ⁶ Tömëna iñömö nana gæncaya inöna inte Wængongui ayongante nö cæte quëwëninque Wængongui, Iimaï cædäni, ante nänö wææ angainö ante ëñente quëwëñonate wadäni, Eñënamai quëwënapa, ante ædö cæte anguinänii. ⁷ Editabeti owæntacä inte wëñæ mänämai quëwëñongante wëñæ dæ ä wædinque nana gæncaya picæna badinque quëwengadaimpa.

⁸ Dæ ä wædinque quëwëñonate Tacadiya wodi tönö godongämæ nani godoncabo nani godönedë ba iinque tömengä iñömö, Wængongui qui, ante godongantapa. ⁹ Godöñongante tömënäni, Æcänö ñöwo guidinque ogui waqui tanguingä, ante acæte ante cædänitapa. Tömënäni cöwë nani cæi bai cædinque tömënäni ëmowo wataa wataa yewæmöninque adoyömö da wëninque adotaque tadonte adänitapa. Ayönäni, Tacadiya ëmowo impa, ante adinque änäni ëñëninque tömengä Awënë Wængongui tæiyæ waëmö oncönë guidinque ogui waqui tangantapa. ¹⁰ Waodäni tömänäni, Nöwo ogui waqui iya tangäimpa, ante yabæcönë godongämæ pöninque Wængongui ingante apænecadänimpa. ¹¹ Tacadiya iñömö tæcæ tancæ cæyongä Wængongui nänö da pönöningä anquedo tömënäni nani iya täimpaa gäänë tömëmæ inö pö næ gongænte a ongongä acantapa. ¹² Adinque Tacadiya, Æbänö cæqui, ante ancai guiñente wæcantapa. ¹³ Wæyongante anquedo guiquënë,

—Tacadiya, guiñënamai ie. Bitö Wængongui ingante apænëbi ëñëninque tömengä bitö änö ante do cæcampa. Bitö nänögængä Editabeti iñömö onguiñængä ingante mancæcäimpa cæbii. Mangä ëñacä adinque bitö tömengä ëmowo, Wäö, pemoncæbiimpa. ¹⁴ Wëñængä waa pönï ëñacä adinque bitö watapæ tocæbiimpa. Wadäni nangui inäni adobaï wëñængä ëñacä ate tocædänimpa. ¹⁵ Wængongui incæ, Botö ayömo bitö wengä wadäni bai guiyä inämai ñænængä pönï ingä abopa, angä beyæ waodäni adobaï tömengä beyæ ante adinque tocædänimpa. Yowepæ biinömæ incæ wapæ incæ tömengä ti nämæ tömämæ bedämai incæcäimpa. Wäänä cæncadë ayæ ongöñongante Wængongui Tæiyæ Waëmö Önöwoca incæ tömengä pö guicæcäimpa. ¹⁶ Ayæ bitö wengä picængä badinque mäo apænecä ëñëninque idægoidi nangui inäni Wængongui gämænö poncædänimpa. ¹⁷ Ayæ Wængongui Önöwoca ingante Ediya wodi

nänö ewocagai bai adobai ewocadinque bitö wengä iñömö adocä nänö täi piñængai bai adobai täi piñængä incäcäimpa. İnıne tömengä iñömö mönö Awënë nänö ponguinö ante täno beyänte bai cädinque odömongä ate mämpoidi wëñänäni inänite pönente waadete cäcädänimpa. Ayä tömengä apäncä eñëninque nē eñënëmaı cädäni incä nö cäte quëwënëni nani eñënë bai nö eñente cäcädänimpa. Mänömaı cädinque bitö wengä adocä apäncä eñente cädinque waodäni mönö Awënë nänö ponguinö ante eyepä pöni cädinque tömengä ingante ante wänö concädänimpa. Mänömainö ante anquedo Tacadiya ingante apänegacäimpa.

¹⁸ Angä eñëninque Tacadiya wäetë anquedo ingante apänedinque,

—İñämpa botö nänöögänä picänä inampa. Botö adobai picämo imopa. Ædö cäte, Nö impa, ante eñenguımo.

¹⁹ Äñongä anquedo wäetë,

—Botö Gabodiedo ingaimo imo apa änewëë. Wängongui weca nē ongömo iñömote tömengä iñömö, Botö watapä apänedö ante bitö Tacadiya ingante apänete pöe, ante da pönongä pontabopa. ²⁰ Nöwo iñömö botö änö pönënëmaı imi inte bitö babetadebi badinque tededämaı iñömote botö apänedö ante iinque cäbo ba ate tedecäbiimpa, ante anquedo Tacadiya ingante apäncantapa.

²¹ Mänömaı tedeyöna wadäni, Tacadiya taqingä, ante wänö cöninque, Wängongui täiyä wäemö oncönë guidinque aiquedö taqingä, ante wägadänimpa. ²² Tömengä tadinque tededämaı ingantapa. Ayä godömenque tededämaı inte önompoque oo cäpo oo cäpo cäcä adinque tömënëni, Wängongui täiyä wäemö oncönë guite ongöninque Tacadiya wiimonte bai mä pöni adingä inte ñöwo edä babetadecä inte tacampa, ante wädänitapa.

²³ Wängongui beyä ante cäe, ante nani iinque äniönä ganca cädinque Tacadiya wodi oncönë gocantapa. ²⁴ Mäniñedë ate tömengä nänöögängä Editabeti yädëmadä badinque edä önompo ämämpoque apäicä ganca oncönë wë womongantapa. ²⁵ Tömengä iñömö edä, “Wëñëñedë, Owäntabi imipa, ante piinäni wäbo adinque Wängongui botö imote waadete pönö cädinque ñöwo wäetë, Piiñämaı incädänimpa, ante cäcampa,” ante pönëninque Editabeti togacäimpa.

Itota eñäqingä, ante

²⁶ Editabeti önompo ämämpoque go adoque apäicä yädëmadä nänö iñedë Wängongui tömengä anquedo Gabodiedo nani ängä ingante da pönongä pöninque Gadideabä Näatadeta nani quëwëñömö gocantapa. ²⁷ Godinque tömengä baqucä Mäadiya nani ängä weca pongantapa. Tömengä ingante Awënë Dabii wodi päingä Ootee, Monguımo, ante do äningä inongäimpa. ²⁸ İnıne anquedo Gabodiedo Mäadiya weca pö guidinque tömengä ingante,

—Wängongui nänö nē waadebi inte eñëe. Wängongui bitö imite waa cäcäcäimpa. Wadäni onquiyänäni inänite Wängongui pönömenque pönö waa cädongä inte bitö imite edä godömenque waa pöni pönö cäcä acäimpa. ²⁹ Ante täcä apäneyongä tömengä ancai guiñëninque, Quinö bai i ante botö imote apäncä, ante wäcantapa.

³⁰ Wäyongante anquedo wäetë,

—Mäadiya, bitö guiñënëmaı ie. Wängongui incä edä bitö imite nanguı waadete pönö acampa. ³¹ Bitö ñöwo edä yädëmadä badinque bitö wëñängä onguiñängä mancäbiimpa. Tömengä eñäcä ate bitö tömengä emöwo, Itota ingampa, ante pemoncäbiimpa. ³² Tömengä iñömö edä nanguı täi piñänte cäcä incäcäimpa. İnıne tömengä ingantedö ante, Æibä pöni nē Quëwengä Wengä ingaingä ingampa, ante apäncäimpa. Ayä Awënë Wängongui incä tömengä ingante apänedinque, Bitö Awënë bayömi mämmä awënë odeye Dabii wodi nempo dodäni nani quëwengai bai bitö nempo adobai quëwencädänimpa, ante adocä Itota ingante pönongä änte Awënë Odeye bacäcäimpa. ³³ İnıne Aacoboidi tömengä nempo quëwëñönänite tömengä cöwë tömënëni Awënë Odeye incäcäimpa. Tömengä nänö Awënë Odeye inguımämo iñömö

edæ dæ badāmaï ingæïmpa, ante Wængonguï nänö da pönöningä Mäadiya ingante angantapa.

³⁴ Mäadiya wæætë tömengä ingante,

—Botö ïñæmpa onguïñängä tönö mönāmaï inte wëñæ ædö cæte manguïmoo.

³⁵ Ante wæyongante anquedo wæætë edæ,

—Wængonguï Tæiyæ Waëmö Önöwoca incæ bitö weca poncæcäïmpa. Wængonguï Æibæ Quëwënongå tömengä nänö tæï piñænö incæ wææ owo baï cæcæcäïmpa. Mänömaï beyæ bitö Wëñängä Onguïñängä incæ Tæiyæ Waëmö ëñacä ate, Wængonguï Wëñängä ingampa, ante pemoncædänïmpa. ³⁶ Ayæ godömenque apænebo ëñëe. Editabeti bitö guïdengä ïñömö picængade pönï ïñongante, Owæntacä ingampa, ante tededänitawo. Incæte tömengä picængadecä incæ dobæ edæ önompo æmæmpoque go adoque apäicä yædëmadä inte tömengä wëñängä edæ onguïñängä ingante ënengampa.

³⁷ ïñæmpa quiëmë ante Wængonguï nänö änönö ante tömäa edæ cöwë cæcæïmpa.

³⁸ Ante anquedo angä ëñente wædinque Mäadiya,

—Mönö Awënë beyænque në cæbo ïmopa. Bitö änö baï Ao ämo bacæïmpa.

Ante apæneca ëñëninque Wængonguï nänö da pönöningä incæ ëmö cæte wadæ gogacäïmpa.

Editabeti weca Mäadiya ëñacæ gocampa

³⁹ Mäniñedë ate Mäadiya wodi wadæ godinque änämænë quingæ æidinque Oodeabæ quëwënanï nänï quëwëñömö adoyömonque incæ pöninque, ⁴⁰ Tacadiya oncönë pö guïdinque Editabeti ingante, Waa quëwëmi, angantapa. ⁴¹ Mäadiya mänömaï apænecä ëñëninque Editabeti wodi wengä cæncadë ongöninque wogæi wogæi tocantapa. Editabeti ïñömö Wængonguï Tæiyæ Waëmö Önöwoca incæ tömengäa pö guïcä ïninque ædæmö pönï ëwocacä bacantapa. ⁴² Mänömaï badinque adocä ogæ tededinque,

—Mönö onquiyæncabo ïñömönte bitö adobique bitö waa toquinque impa, angantapa. Wængonguï wamöni ïmönite pönömenque waadedinque bitö ïminite godömenque nanguï waadecampa. Bitö në ënënongå ingante Wængonguï nanguï waadecä beyæ tömengä adobäi tocæcäïmpa. ⁴³ Botö önömoque ïñömöte bitö ïñömö mönö Awënë badä ïnömi inte edæ botö weca quïnante pömii. ⁴⁴ Tæcæ edæ apænëbi önömonca ëñëñömo botö cæncadë në ongönongä incæ wogæi wogæi watapæ tocä ae. ⁴⁵ Mönö Awënë bitö ïmite nänö änïnö ante bitö ïñömö, Tömengä cöwë cæcæcäïmpa, ante pönëninque bitö toquinque edæ në pönëmi ïmitapa.

⁴⁶ Editabeti mänömaï apæneyongä Mäadiya wæætë ämotamini ante baï ïïmaï an-gacäïmpa.

“Botö mïmöno pönëninque, Mönö Awënë ïñömö edæ waa pönï mönö ïnongä ingampa, ante watapæ apænëbopa.

⁴⁷ Ayæ, Quëwencæbiïmpa, ante botö ïmote në Æengä ïñongante botö Wængonguï ingante ante pönëninque edæ watapæ tote ëwocabopa.

⁴⁸ Botö tömengä ingante në cædömo inte önömoque pönï ïñömöte tömengä wæætë botö ïmote waa acampa.

Ïncayæ nänömoidi wææ ïncayæ nänömoidi wææ ïnänï tömänänï botö ïmotedö ante apænëdinque,

Tömënä ïñömö Wængonguï nänö në waadedä ingadäïmpa, ante apænecædänïmpa.

⁴⁹ Wængonguï në Tæï Piñænongä inte botö ïmote pönö nanguï cæcä beyænque edæ apænecædänïmpa.

Tömengä ëmöwo ïñömö edæ Tæiyæ Waëmö ëmongampa.

⁵⁰ Ayæ ïncayæ nänömoidi wææ ïncayæ nänömoidi wææ ïnänï tömengä ingante guïñente cæyönänite tömengä wæætë waadete pönö waa cæcæcäïmpa.

⁵¹ Tömengä në tæï piñænongä inte tömengä önompoca cæte baï nanguï cæcantapa.

Ayæ wadäni, Tömëmoque waëmö ïmopa,

ante önöwëninque pönënanï ïnänite tömengä angä näwæ godänitapa.

⁵² Ayæ awënëidi nāni tæ containpaa ongöñönānite tömengä tömēnāni inānite wido cæcä godānitapa.

Wæætē öñönānique inānite ængö cæcä contadinque tömēnāni wæætē awënëidi bai badānitapa.

⁵³ Ayæ gue ænente wædāni inñönānite tömengä waa pōni cænguī godongä æninque tömēnāni tömo pōni cænānitapa.

Wæætē nanguī ēadāni tömēnāni inānite da godongä godinque ömæpodāni inte godānitapa.

⁵⁴ Mönö idægocabo inñömö tömengä ingante nē cæmö inñömönte tömengä mönö tönö godongämæ cæcantapa.

Ayæ, Waadete botö pönö waa cægainö bai adodö cæcæboimpa, ante pönēninque tömengä nñowo pönö waadete waa cæcä æmompā.

⁵⁵ Abadäö wodi pæimö inñömönte tömengä mönö mæmæidi inānite nänö angainö bai cædinque,

cöwē nimpō cædāmaī inte pönö waadete cæcampa.”

⁵⁶ Ante Mäadiya wodi ämotamīni ante bai angantapa. Ayæ Editabeti weca mēa go adoque apäicä quēwente ate ayæ ate tömengä oncönē gogacäimpa.

Wäö ēñacampa

⁵⁷ Editabeti wodi guiquēnē oo pōni ēnēninque tömengä wēñængä onguinængä mangacäimpa. ⁵⁸ Ayæ tömengä guidēnāni tönö godongämæ quēwēnāni inñömö, Æ mönö Awēnē wīi pīingä inte Editabeti ingante ædæmö waadete waa cæcampa, ante tæcæ ēñēmōnipa, äninque Editabeti tönö godongämæ togadānimpa. ⁵⁹ Ayæ adoque Wængonguī itæde go ate wēñængä ingante æmontaique öo togænca cædāni inñömö godongämæ pōninque tömengä wæmpo emöwo bai ante, Tacadiya, ante pemonca cædānitapa. ⁶⁰ Cæyönānite wäänä Baa äninque,

—Tömengä emöwo Wäö emoncæcäimpa, ante wææ angadäimpa.

⁶¹ Äñongante tömēnāni wæætē,

—Inñampa bitö guidēnāni Wäö emönāmaī. Dæ ämönānipa.

⁶² Äninque wæmpocä ingante ömö cædinque, Æmongänö emonguingä ämii, ante odömömi amōnii. ⁶³ Äñönānite tömengä tededāmaī inongä inte önompocaque odö-mongä adinque yewæmōinta äninque pædæ pönönāni ate tömengä inñömö edæ, “Tö-mengä emöwo Wäö emoncæcäimpa,” ante yewæmongä adinque tömānāni edæ guinente wægadānimpa. ⁶⁴ Yewæmongä ate tömengä öngüenēwa nīimæ cæguenēwate bai baguenēwate ate edæ tömengä ogæ tedinque Wængonguī ingante, Waa pōni cæbi abopa, ante watapæ edæ apænecantapa. ⁶⁵ Ininque mäninñömö godongämæ quēwēnāni tönö Oodeabæ änämænē quēwēnāni tönö tömānāni, Mänömaī batimpa, ante nanguī tededānitapa. ⁶⁶ Tededāni ēñēninque nē ēñēnāni wæætē, “Inñängä wēñængä inñömö æbänö nänö baquinque edæ pæquingä,” ante tömānāni godongämæ wægadānimpa. Edæ tömengä tönö Wængonguī godongämæ cæcä ingacäimpa.

Tacadiya ämotamīni ante angampa

⁶⁷ Wēñængä wæmpocä Tacadiya guiquēnē Wængonguī Tæiyæ Waemö Öñowoca ingante ewocadinque Wængonguī beyæ apænedinque ämotamīni ante bai apænecantapa.

⁶⁸ “Mönö idægocabo Wængonguī inñömö adocä mönö Awēnē inñongante mönö tömengä ingante waa ate watapæ apænecäimpa.

Tömengä inñömö, Botö quināni bate abæ tawænte bai quēwencædānimpa, ante tömengä do æncæ pongä acäimpa.

⁶⁹ ‘Önömoncawæ wææ emoncate bai wææ gompcæcäimpa,’ ante cædinque tömengä mönö imonte nē ænguingä ingante da pönongä pōninque iingä wæætē ængä beyænque quēwēmompā.

Wængonguī ingante nē cægainingä awēnē odeye Dabii wodi pæingä inongä inte tömengä mänömaī cæcä beyænque quēwēmompā.

⁷⁰ Wængonguī iñömö tōmengä beyä nē apæneganāni tæiyä waēmö ingaināni iñōnānīte tōmēnāni tōnō apænedinque,

Cōwē cæcæboimpa, ante nānō apæneganō bai ñōwo edæ iinque cæcampa.

⁷¹ Mōnō iñömö nē piinte ānāni nempo ongōñōmonte tōmengä,

Piinte cædānīpa, ante adinque mōnō iimonte gā pe æmpote ö ængä beyænque quēwē-mompa.

⁷² Mānōmaī cædinque tōmengä mōnō mæmæidi inānīte nānō angainō bai cædinque ñōwo waadete pōnō cæcampa.

Ayä, Botō pōnō cæbo ate mīnitō Ao ämīni iinque mōnō godongämæ wææ cæte quēwengäimpa, ante tōmengä tæiyä waēmö nānō angainō ante cōwē pōnēnongä inte ñōwo iinque cæcampa.

⁷³ Edæ mæmæ Abadäo wodi ingante, Botō nē Quēwēmo ingaimo inte nöingä ämopa, ante Wængonguī iimainō ante nānō pōnō cæquinō ante nō apænecäimpa.

⁷⁴ Abadäo ēñēmi. Nē piinte cædāni nempo wæwēñōmīnīte botō gā pe æmpote ö æninque pōnō cæbo ate eyepæ badinque mīnitō wæætē guññēnāmaī inte botō Wængonguī imo beyä cæcæminīpa, ante Wængonguī nē pōnō cæquiringä inte apænecäimpa.

⁷⁵ Wængonguī iñömö edæ, Mīnitō tæiyä waēmö ewocadinque mīni quēwenganca botō weca nō pōnī cæte quēwencæminīpa, ante pōnō cæcä ingacäimpa,” ante wēñængä mæmpocä Tacadiya wodi apænecantapa.

⁷⁶ Ayä wēñængä ingante tōmengä iimaī ante godōmenque apænecantapa.

“Botō wēmi bitō imite botō wæætē apænebo ēñēe, angantapa.

Nē Æibæ Pōnī Quēwengä beyä bitō nē apænebi inōmi imīpa, ante bitō imitedō ante apænecædānīpa.

Mōnō Awēnē taadō pīnongäimpa, ante bitō edæ tāno beyænte gote bai cædinque,

⁷⁷ mōnō Awēnē quīnāni inānīte iimaī ante odōmonte apænecæbiimpa.

Wēnæ wēnæ mīni cædō ante Wængonguī pōnō ñimpo cæcä ate mīnitō iñömö edæ,

Tōmengä ængä beyænque mōnō quēwenguī impa, ante do ēñencæminīpa, ante apænebi ēñencædānīpa.

⁷⁸ Edæ mōnō Wængonguī incæ mōnō wēnæ wēnæ wædōnō ante waadete pōnō waa cædinque,

öönædē Quēwengä ingante mōnō weca da pōnongä pōninque nænque tæcæ tamō bai ēmongä acäimpa.

⁷⁹ Mānōmaī cædinque mōnō wænguimāmo beyä wēmö iñömö awædō,

ante wæyōmonte tōmengä ponte a ongongä adinque mōnō nænque pämo oo tote bai quēwēmompa.

Ayä, Mīnitō mīni gänē pōnente quēwenguīnō taadonque poncæminīpa, ante tōmengä tōö æmænte māmongä pōmompa.”

Mānōmainō ante Tacadiya wodi tōmengä wēñængä ingante apænecäimpa.

⁸⁰ Wēñængä iñömö do pædinque önōwoca tæi pīñænte ewocagacäimpa. Idægoidi weca tōmengä nānō ponte a ongonganca önōmæca quēwengacäimpa.

2

Itota ēñacampa

(Mäateo 1.18-25)

¹ Wäo idægoidi weca nānō pōñedē iinque bayonte awēnē Tetædo Agoto iñömö, Æpomīnidō imīnīi, ante acæte ante cædinque odōmāno ömæ nē quēwēnāni inānīte edæ, Mīnitō emōwo tōmāmīni yewæmoncæminīpa, angacäimpa. ² Tidiabæ awēnē Tidēnio ingāñedē odōmāno awēnē tāno angä. ³ Eñēninque adocanque tōmengä mæmæidi nāni quēwengäiñömö wacä tōmengä mæmæidi nāni quēwengäiñömö tōmānāni yewæmoncæte ante edæ go go cægadānīpa.

⁴ Iinque Oodeabæ Awēnē wodi Dabii wodi päingä inongä inte Ootee iñömö Gadideabæ Nāatadeta nāni quēwēñömö quēwēninque adobai tōmengä mæmæ Dabii wodi nānō quēwengäiñömö Bedēe iñömö gogacäimpa. ⁵ Edæ Ootee nānōogængä inguingä Māadiya

yæðemadä iñongante tömöna nana gæncaya inguina guëa yewæmoncæ godatapa. ⁶ Bedëe ponte quëwëñöna Wëñængä iñömö iñque pædinqe ⁷ bamoncadengä incæ onguiñængä inte iñmai ëñagacäimpa. Mäniñömö mongui incönë iñömö mäniñedë eyede pöní goti ongönäni ate wædinqe tömöna wæætë cænënaní cængui oncontaidë guiyantaidë go guida ate Wëñængä ëñacantapa. Iñique guiyantaidë ëñacä ate wäänä Wëñængä ingante weocoo wini wini caadinqe cænënaní cænguincadedë ñö cædä öñongantapa.

Obegaidi inänite në aadäni inänite anquedoidi apænedäni

⁸ Idægoidi cæninaní obegaidi nani äñönäni iñönänite në aawënäni iñömö eyepancadë adoönæ woyowotæ a cönönänimpa. ⁹ A cönönäni mönö Awënë anquedo ponte a ongöñongä mönö Awënë nänö ñäö ëmönö beyænque godongämæ guinæ gongæ adinqe në aadäni ancai guñente wæðanitapa. ¹⁰ Anquedo iñömö tömënaní inänite, “Guiñënanímaí imæwedäni. Míni nanguí ëñente toquinque ante botö ñöwo watapæ apænebo ëñeedäni. Minitö tönö inguipoga tömäo quëwënäni adobaí adode beyænque watapæ tocæminimpa. ¹¹ Mönö Awënë Codito iñömö, Æmo beyænque quëwencæminimpa, ante në Ængä baquingä inongä inte do edæ ëñacantapa. Edæ minitö beyæ ante tömengä ñöwoönæ incæ awënë Dabii wodi nänö quëwengaiñömö ëñacantapa. ¹² Nö impa, ante gote acæminimpa. Wëñængä ingante wäänä wini wini caadinqe edæ cæninaní cænguincadedë ñö cædä ate a öñongä adinqe minitö, Nö impa, ante ëñencæminimpa.”

¹³ Ante anquedo äñongä wadäni nanguí inäni öönæðë owodäni incæ iñontobæ tontadoidi ongönäni bai tömengä tönö godongämæ ponte a ongöninqe ämotamini ante bai äninque Wængongui ingante iñmai ante watapæ apænedänitapa.

¹⁴ “Wængongui æibæ pöní quëwëñongä inte edæ ñäö apäite bai ëmongänö angüënë. Tömengä inguipoga iñömö waadete pönö cæcä beyænque míni waocabo edæ gänë pönenguimínidö angüënë.”

¹⁵ Ante ämotamini ante bai äninque anquedoidi öönæðë adodö wadæ æite godäni ate në aawënäni iñömö nani cabo tedinque,

—Mönö Awënë mönö imonte apæneçä mönö ëñënö ante, Æbänö cæcäi, ante mönö Bedëe gote æðemö acæimpa. ¹⁶ Äninque pogodo ponte ayönäni Mäadiya tönö Ootee a ongöñöna Wëñængä iñömö cæninaní cænguincadedë a öñongä adänitapa. ¹⁷ Iñque adinqe wadæ godinqe, Wëñængä æbänö ingäa, ante anquedo apæneçä nani ëñënö ante gode ä gode ä cæte wayömö wayömö quëwënäni inänite tededäni ëñënanitapa. ¹⁸ Eñëninque tömänäni wæætë, Në aawënäni æbänö ante apænedäni, ante guñente wæðanitapa. ¹⁹ Mäadiya guiquënë, Wëñængä æbänö ingä änanii, ante nämä pönëe congantapa. ²⁰ Në aawënäni guiquënë, Wængongui ñäö apäite bai ëmönongä inte pönö waa pöní cæcä æmönipa. Edæ anquedo nänö apænedö bai do cæcä amönipa, ante apænedinqe eyepancadë ocæ ëmænte gogadänimpa.

Bitö Wengä, ante mæmpoda Wëñængä ingante Wængongui oncönë ænte pönäpa

²¹ Ayæ, Adoque Wængongui itæðë go ate æmontaique ëö togængæimpa, ante idægoidi cöwë nani cæi bai cædinqe Wëñængä ingante ëö togænänitapa. Ayæ Mäadiya yæðemadämaí nänö iñedë anquedo nänö pemöninö bai äninque mæmpoda Wëñængä ëmöwo ante, Itota, pemongadäimpa.

²² Wäänä mänimpoönæ wepæ näte inampa, ante Möitee wodi nänö angaimpoönæ iñque go ate tömöna, Wëñængä iñömö Wængongui Awënë qui ingampa, ante mönö godongæimpa, ante tömengä ingante Eedotadëe iñömö ænte gogadäimpa. ²³ Edæ, “Onguiñænäni bamoncadënaní tömänäni tæiyæ waëmö bacæðänimpa, ante tömënaní Wængongui Awënë nempo pæðæ godongæimpa,” ante Awënë Wængongui nänö angainö ante ëñëninque Mäadiya tönö Ootee do cædatapa. ²⁴ Ayæ, Equemöna nana gæncaya, Wængongui qui, ante godongæimpa. Wii mänömaí cæte tæcæ wengä wengä pæda mënaa inate godongæimpa. Ootee tönö Mäadiya iñömö mänömaí cædinqe, Wængongui qui impa, ante mënaa inate ænte pöninqe pæðæ godöna ængacäimpa.

²⁵ Māniñedē adocanque edæ tōmengā ěmōwo Tīmeōnō Wængonguī beyænque ante nō cædongā inte Eedotadēē iñōmō quēwengacāimpa. Idægoidi wampo pōnente quēwencædānimpa, ante Wængonguī æyedēnō ædæmō cæquingāā, ante tōmengā wānō cōnonte quēwēnongāimpa. Ayæ Wængonguī Tæiyæ Waēmō Ōnōwoca ingante tōmengā cōwē ěwocacā inongāimpa. ²⁶ Wængonguī Tæiyæ Waēmō Ōnōwoca do apænecā ěñēnīnque Tīmeōnō wodi iñōmō, Botō ayæ wænāmaī mīimō quēwēmoyedē mōnō Awēnē Codito ingante aquīmo ĩmopa, ante do ěñēningā inongāimpa. ²⁷ Nōwo iñōmō Wængonguī Ōnōwoca angā ěñēnīnque tōmengā Wængonguī oncō ñænæncōnē yabæcōnē pō guicantapa. Māniñedē Itota mæmpoda iñōmō idægoidi wææ ante nāni cægaīnō baī cæcæte ante cædinque Wēñængā Itota ingante ænte pō guida. ²⁸ Adinque Tīmeōnō iñōmō edæ Wēñængā ingante bæi ongonte pæ mānīnque Wængonguī ingante, Tōmēmi waa toquinque mōnitō ĩmōnite pōnō cæbipa, ante apænecantapa.

²⁹ “Bitō Tæiyæ Awēnē inōmi inte ěñēmi. Bitō ĩmite nē cæbo iñōmote bitō doyedē, Cæbo acæbiimpa, angabiimpa.

Īnīnque bitō ānīnō baī ñōwo edæ ĩnque cæbi adīmo iñōmote bitō āmi ate wænte goboe.

³⁰ Edæ bitō, Quēwencæmīnīmpa, ante

nē Ænguingā ingante ñōwo da pōnōmi ponte ěñacā do abopa.

³¹ Mānōmaī cædinque bitō, Wadāni nāni cabo wadāni nāni cabo waodāni tōmānāni acædānimpa,

ante cædinque bitō nē Ænguingā ingante ñōwo da pōnōmi ponte a ongongā acæimpa.

³² Idægoidi ĩnāmaī ĩnāni incæ tōmēnāni nāni cabo nāni cabo incæ edonque acædānimpa, ante cædinque bitō da pōnōmi pōnīnque tōmengā ñāō apāite baī a ongongā acædānimpa.

Ayæ mōni idægocabo iñōmōnite bitō, Wēñængā ængā beyænque botō quīmīni iñōmō ñāō baī waēmō pōni ěmōnīnque quēwencæmīnīmpa, ante pōnō cæbi abopa.”

³³ Ante āmotamīni ante baī Tīmeōnō wodi, Wēñængā æbānō cæquingā ingāā, ante tedecā ěñēnīnque Wēñængā mæmpo tōnō tōmengā badā iñōmō guīñente wædatapa.

³⁴ Tīmeōnō wæætē, Mīna waa toquinque ĩngā Wēñængā ingante æmīnāpa, ante apænēdinque tōmengā badā Māadiya ingante ĩmaī ante godōmenque apænecantapa.

—Picængā badīnque ĩngā Wēñængā cæcā beyænque idægoidi pancadāniya tæ go wæante baī wæyōnāni pancadāniya wæætē ængæ gantite baī quēwencædānimpa. Wængonguī iñōmō, Wēñængā ingante ate ěñencædānimpa, ante odōmonte cæyongā pancadāniya wæætē adocā ingante godō pīinte tedecædānimpa. ³⁵ Ante apænēdinque Tīmeōnō iñōmō Māadiya ingante apænecantapa. Mānōmaī bayonte, Nanguī ĩnāni æbānō ante mīmōno pōnēnāni, ante edonque acæimpa. Bitō iñōmō yaēmē yete baī wæwente ěwocacæbiimpa, ante apænecacāimpa.

³⁶ Ayæ wadā iñōmō Wængonguī beyæ nē apænēdā iñōmō tōmēnā ěmōwo Ānā adobaī ongōnantapa. Atedoidi nāni cabo iñōnāni adocanque Pānoedo wēnā ĩnōnā inte tōmēnā picængadedā ingadāimpa. Tōmengā iñōmō baquēcāñedē mōnīnque nānōogængā tōnō ōnōmpo æmæmpoque go mēa wadepo quēwente ate onguīñængā guiquēnē nāñe wængacāimpa. ³⁷ Onquiyæñā iñōmō ñōwo otenta i coatodo wadepo nānō ěñagāinganca owæmpoīnā quēwēnā inte tōmēnā Wængonguī oncō ñænæncōnē yabæcōnenque cōwē quēwēnīnque taodāmaī ĩnōnāimpa. Itædē woyowotæ tōmēnā cōwē, Wængonguī ingampa, ante waa cædinque Wængonguī ingante apænecæte ante wantæpiyæ cænāmaī quēwēnā ĩnōnāimpa. ³⁸ Tōmēnā ñōwo eyepæ pōni māmō bee tēnīnque Itota ingante adinque Wængonguī ingante waa ate pōnēnīnque apænecantapa. Ayæ wadāni, Mōnitō Eedotadēē iñōmō quēwēmōni iñōmōnite Wængonguī æyedēnō pōnō cæcā beyæ abæ tawænte quēwēnguīmōnīi, ante nē wānō cōnāni ĩnānite dodā Ānā iñōmō Wēñængā ingante do adīnā inte, Wēñængā nē Ænguingā inte do ěñate pongā atabopa, ante cōwē apænēdā ěñengadānimpa.

Nāatadeta ocæ ěmænte godānīpa

³⁹ Ayæ mäniī, Awënë Wængonguī, İımaī cædäni, nänö angainö ante iınque cæte ate Ootee näni wencabo Gadideabæ gocæte ante wadæ godinque Näatadeta tömëniäni näna quëwëniñömö pongadänimpa. ⁴⁰ Wëñængä iñömö edæ picængä pædinque tæi piñængä bacantapa. Ayæ ocai encacä inte nanguī ëñente bagacäimpa. Ayæ Wængonguī waadete pönö apæ necä ëñente ëwocadinque tömengä nê waadete pönö cæcä ingacäimpa.

Wængonguī oncönë Itota gote ongongampa

⁴¹ Wodo pænta gogaiönæ bai Patowa mönö ææmæ cænguionæ ñöwo impa, ante pönëninque idægoidi Patowa ante Eedotadëë godinque ææmæ cædönänimpa. Itota mæmpoda adobai Patowa näni ämæ cöwë cæyedë wadepo iñö wadepo iñö Eedotadëë goda ingadaimpa. ⁴² İninque Itota dote wadepo iñonte Wængonguī beyæ ante ææmæ cöwë näni cædö bai Ootee näni wencabo do gote cædänitapa. ⁴³ Ææmæ tömää iınque cædinque oncönë poncæte ante taadonque pöninque mæmpoda adämaī iñö nate Itota guiquënë Eedotadëë iñömö ayæ quëwengantapa. ⁴⁴ Godongämæ mönö poncabo tönö pongä iımaingampa, ante pönëna inte taadö tömää itädë pöninque tömëna guidëniäni weca tömëna æmigoidi weca diqui diqui mincæ cæyöna, ⁴⁵ edæ dæ angä. Ate wædinque tömengä ingante diqui mincæte ante Eedotadëë adodö ocæ ëmænte gogadaimpa.

⁴⁶ Mëönaa go adoönæque iñonte diqui diqui minte ate edæ Wængonguī oncö ñænæ oncönë yabæcönë pö guite ayönate Itota iñömö nê odömönäni weca ëñëë cöinque, Æbänö i, Æbänö cæquīī, ante angä adatapa. ⁴⁷ Tömengä apæ necä ëñëninque tömänäni, Æ tömengä iñömö ocai nê encacä waa ëñengä amönipa, änänitapa. Ayæ, Itota ingante, Æbänö i, ante änäni ëñëninque tömengä wæætë nö apæ necampa, ante wædinque tömänäni guñente wædänitapa. ⁴⁸ Mæmpoda iñömö mäniñömö pö guite ayöna Itota mänömaī cæcä adinque guñente wædatapa. Tömengä badä tömengä ingante,

—Botö Wëmi ëñëmi. Mönatö imönate quinante mänömaī cæbii. İñæmpa bitö wæmpo tönö mönatö bitö imite ante ancaa diqui diqui minte wæwentamönapa.

⁴⁹ Äñongante tömengä wæætë,

—Mīnatö iñæmpa, Mæmpocä oncönë Itota ongonguënegä ingampa, ante ëñënämaī imīnatawo. Quinante wayömö diqui diqui mīmīnatawo.

⁵⁰ Äñongante, Æbänö ante angäa, ante ædæmö ëñënämaī inatapa.

⁵¹ Tömengä wæætë mæmpoda miñæ gote Näatadeta pöninque tömëna näna änö ante cöwë ëñente cæcantapa. Wäänä guiquënë tömengä nänö cædīnö ante nämä pönëë congä ingacäimpa. ⁵² Itota iñömö edæ nanguī ëñengä bate pædongäimpa. Picængä bayongante Wængonguī tönö waodäni adobai tömengä ingante cöwë godömenque godömenque waadete adönänimpa.

3

Wäö æpænë nê guidongä önömæca quëwente apæ necä

(Mäateo 3.1-12; Mäadoco 1.1-8; Wäö 1.19-28)

¹ Tibedio quıte wadepo tömämæ awënë nänö inöñedë Pontio Pidato wodi näni ängängä adoyedë Oodeabæ awënë iñongante Edode wæætë Gadideabæ awënë inongäimpa. Adoyedë iñömö Edode wodi nänö tönīñacä Pedipe Itodeabæ Todacönitebæ awënë iñongä Ditäniato wodi adoyedë Abidëniabæ awënë inongäimpa. ² Mänimpodäni mäniömæ awënëidi iñönäni Änato wodi tönö Caiapato wodi adoyedë, Wængonguī qui, ante nê godöna ñænænä pönī inöna inönainpa. Tömëna näna inöñedë adoyedë edæ Tacadiya wodi wengä Wäö ingante önömæca iñömö ayæ quëwëñongante Wængonguī apænegacäimpa. ³ Wäö wodi iñömö Oododänonga ömaaque go tömäö cægöinque iımaī apæ necä ëñëänitapa. Mīnitö, Idæwaa wënæ wënæ cæte awædö, ante ocæ ëmænte Wængonguī gämænö pöedäni. Ayæ, Wënæ wënæ botö cædīnö ante Wængonguī piñämaī inte pönö ata cæpocä quëwëmopa, ante edonque acäimpa, ante odömöninque æpænë guiedäni, ante Wäö angacäimpa. ⁴ Mänömaī cædinque Wængonguī beyæ nê apænegängä Itaiya wodi iımaī ante nänö yewæmonte apænegainö bai Wäö adobai cægacäimpa.

“Adocanque önömæca ongöningue iïmaï ante yedæ tedecä ëñencædänimpa.
‘Awënë nänö ponguinö ante tee monte bai cædinque,
taadö töinö pinonte bai cædäni.

⁵ Onquiyabo incæ änanquidi incæ, Mæmö pöni bacæimpa, ante ææ wocæimpa.

Biyönæ iñömö tee möningue mæmö pöni badongæimpa.

Taadö idiquibæ iñonte töinö pinongæimpa.

Wënæ wënæ iñonte wainö pöni taadö badongæimpa.

⁶ Taadö mänömaï mæmö pöni ba iñinque tömämæ quëwënäni incæ, Wængonguï pönö ængä beyænque mönö quëwenguinö impa, ante edonque acædänimpa, ‘ancæcäimpa.’”

⁷ Ante yewæmonte ongompa cæminii, ante Wäö wodi æpænë guicæte ante pönäni nanguï inäni iñönänite iïmaï angantapa. “Minitö iñömö tæntæ pæimini bai inte në babæ cæmini iñinque edæ ëñenguënë quëwëmini. Wængonguï nänö piinte panguimämo ante edæ, Wænompadäni, ante æcänö äna ëñëningue minitö wodii winonte pöminii.

⁸ Wængonguï Awënë gämænö minitö ocæ ëmænte poncæ cæminitawo. Nö nö pöminii iñinque edæ në ocæ ëmænte pönäni wainca incate bai waa cædäni bai minitö iñömö edæ adobai waa cædäni. Minitö nämæneque pönëningue, ‘Mönitö mæmæ Abadäo wodi pæimöni imöni beyænque Wængonguï mönitö imönite waa acæcäimpa,’ ante nämä wææ ancæ cæminitawo. Iñæmpa Wængonguï angä bai Abadäo wodi pæimini mini inö bai dicacoo incæ dobæ adobai bacædönii apa änewëminii. ⁹ Awæ iñömö wainca incadämaï i iñinque edæ do yete gongapamö iya tangæimpa. Awæ yecæte ante awænca eyewa næænäni bai Wængonguï nänö panguimämo iñömö edæ oo pöni pö apa quëwëminii,” ante Wäö apænægacäimpa. ¹⁰ Angä wædinque godongämæ ongönäni pancadäniya wæætë,

Mänömaï i iñinque æbänö cæquënëmöni imönii. ¹¹ Äñönänite Wäö,

—Weocoo mencooga në mangä iñömö weocoo ömaacä ingante adocooque godongä æncæcäimpa. Cænguï në ëacä adobai cænguï ömæpocä ingante godongä æncæcäimpa, angantapa. ¹² Ayæ odömäno awënë nänö ärinta në ænäni guiquënë adobai æpænë guicæte ante pöninque Wäö ingante änanitapa.

—Në odömömi ëñëmi. Mönitö iñömö æbänö cæquënëmöni imönii. ¹³ Äñönänite tömengä wæætë,

—Minitö awënë, Mänimpota, ante nänö änimpotä ante wadäni inänite ämini pædæ pönönäni eyepæ æninque minitö wæætë, Tömëmöni qui, ante godömenque änämaï iedäni, angantapa. ¹⁴ Ayæ tontadoidi adobai tömengä ingante,

—Mönitö guiquënë æbänö cæquënëmöni imönii.

Äñönänite Wäö wodi iïmaï angantapa.

—Minitö wacä tömengä nänö godonte äinta ö æncæte ante pæmënänämaï iedäni. Ayæ wacä wënæ wënæ cædämaï iñongante minitö, Wënæ wënæ cæbitapa, ante babæ wapiticæ änämaï iedäni. Ayæ minitö cædi beyæ minitö awënë eyepæ pönongä æninque piyænë cæte godömenque äinente wædämaï iedäni, angantapa.

¹⁵ Äñongante godongämæ ongönäni iñömö, Wængonguï doyedë, Codito ponguingä, ante nänö në angaingä iñömö edæ iingä Wäö wabänö imaingampa, ante önöwënenque pönënanäni inte edæ, Wäö æbänö cæquingä, ante acæte ante a ongönänitapa. ¹⁶ Wäö wæætë tömänäni inänite apænedinque, “Botö guiquënë näwangä minitö imönite æpænë guidömo guiminipa. Iñcayæ ate në Ponguingä guiquënë tömengä iñömö näwangä næænægä pöni iñongante botö guiquënë guiyämo inömo inte tömengä awæncata incæ ædö cæte ñi cæquimoo. Tömengä iñömö minitonga gonga bæcote bai cædinque Wængonguï Tæiyæ Waëmö Önöwoca ingante edæ da pönongä æncæminimpa. ¹⁷ Waocä, Todigo tömëmö wati wati tænoninque botö tænoniñömö önömancaque baquinque botö waiña tömämö oncönë da wencæboimpa, ante timpodæ næænte wo ææntodö wo ææntodö cædinque ontapocoo wææincoo wadæ ñëmænte wo ëwengampa. Waocä mänömaï wo ëwencæte ante timpodæ næængä bai mönö në Ponguingä iñömö adobai

oo pönī apænte ancæcäimpa. Edæ waëmō ināni inānite apænte æninqe tōmengä ontapocoo bai ināni inānite gonga cōwē bæcoyōmō iya tangä gonte wæcædänimpa.”

¹⁸ Mänōmainō äninque Wäo wodi godōmenque wade wade apænedinque tōmēnāni inānite, Ämo ēñēmaimīnīpa, angacäimpa. Ayæ, Codito ingantedō ante watapæ apæneçä ēñengadänimpa. ¹⁹ Incæte tōmengä pancabaa Awēnē Edode ingante, Bitō tōniñacä nänōogængä Ædodiya ingante mömii, ante pīininqe Edode nänō wiwa cædinō ante tōmānō ante pīingä adinque, ²⁰ Edode wodi guiquēnē godōmenque wiwa cædinque Wäo ingante tee mōneçä wægacäimpa.

Itota æpænē guiicampa

(Mäateo 3.13-17; Mäadoco 1.9-11)

²¹ Mänīi Wäo tōmānāni inānite æpænē nänō guidōñedē Itota ingante adobai guidongä guiicantapa. Guiite ate Wængongui ingante apæneyongä öönæ wi ænete bai bayonte edæ ²² Wængongui Tæiyæ Waëmō Öñowoca equemō wææ contate bai tōmengäa edonque pönī wææ guicä ate öönæde apænedinque,

—Bitō botō Wēmi botō nē waadebi imīpa. Bitō imite waa adinque waa tobopa, ante öönæde apæneçä ēñengacäimpa.

Itota nänō mæmæidi

(Mäateo 1.1-17)

²³ Todēinta wadepo nänō ēñagañnedē iinqe bayonte Itota māniñnedē tāno cæçä ingacäimpa. Tōmengä ingante nē pæpogadongä iñōmō Ootee iñongante wadāni, Itota wæmpocä ingampa, ante pönēnōnānīpa.

Ootee wodi mæmpo wææ Edii wodi ingacäimpa.

²⁴ Edii wodi mæmpo wææ Mäatato,
Mäatato wodi mæmpo wææ Debi,
Debi wodi mæmpo wææ Mēedequi,
Mēedequi wodi mæmpo wææ Cāna,
Cāna wodi mæmpo wææ docä Ootee wodi ingacäimpa.

²⁵ Mänīi docä Ootee wodi mæmpo wææ Mäatatia,
Mäatatia wodi mæmpo wææ Ämoto,
Ämoto wodi mæmpo wææ Nāacö,
Nāacö wodi mæmpo wææ Etedi,
Etedi wodi mæmpo wææ Näagai ingacäimpa.

²⁶ Näagai wodi mæmpo wææ Mäato,
Mäato wodi mæmpo wææ docä Mäatatia,
docä Mäatatia wodi mæmpo wææ Tēmei,
Tēmei wodi mæmpo wææ Ooteco,
Ooteco wodi mæmpo wææ Oodaa ingacäimpa.

²⁷ Oodaa wodi mæmpo wææ Owāna,
Owāna wodi mæmpo wææ Deta,
Deta wodi mæmpo wææ Dodobabedo,
Dodobabedo wodi mæmpo wææ Tadatiedo,
Tadatiedo wodi mæmpo wææ Nēedi ingacäimpa.

²⁸ Nēedi wodi mæmpo wææ docä Mēedequi,
docä Mēedequi wodi mæmpo wææ Adi,
Adi wodi mæmpo wææ Cotäö,
Cotäö wodi mæmpo wææ Edēmadäö,
Edēmadäö wodi mæmpo wææ Ede ingacäimpa.

²⁹ Ede wodi mæmpo wææ Ootowee,
Ootowee wodi mæmpo wææ Ediyedede,
Ediyedede wodi mæmpo wææ Oodīi,
Oodīi wodi mæmpo wææ docä Mäatato ingacäimpa.

³⁰ Mänii docä Mäatato wodi mæmpo wæä docä Debii,
 mänii docä Debii wodi mæmpo wæä Timeönö,
 Timeönö wodi mæmpo wæä docä Oodaa,
 docä Oodaa wodi mæmpo wæä wacä docä Ootee,
 mänii docä Ootee wodi mæmpo wæä Öönäö,
 Öönäö wodi mæmpo wæä Ediyaquimö ingacäimpa.

³¹ Ediyaquimö wodi mæmpo wæä Mēedeä,
 Mēedeä wodi mæmpo wæä Mēna,
 Mēna wodi mæmpo wæä Mäatata,
 Mäatata wodi mæmpo wæä Näätäni ingacäimpa.

³² Näätäni wodi mæmpo wæä Awēnē Dabii,
 Awēnē Dabii wodi mæmpo wæä Yæte,
 Yæte wodi mæmpo wæä Obedo,
 Obedo wodi mæmpo wæä Boodo,
 Boodo wodi mæmpo wæä Täna,
 Täna wodi mæmpo wæä Näatöo ingacäimpa.

³³ Näatöo wodi mæmpo wæä Äminadabo,
 Äminadabo wodi mæmpo wæä Adämii,
 Adämii wodi mæmpo wæä Adöni,
 Adöni wodi mæmpo wæä Etedöo,
 Etedöo wodi mæmpo wæä Pade,
 Pade wodi mæmpo wæä wacä docä Oodaa ingacäimpa.

³⁴ Mänii docä Oodaa wodi mæmpo wæä Aacobo,
 Aacobo wodi mæmpo wæä Itæca,
 Itæca wodi mæmpo wæä Abadäo,
 Abadäo wodi mæmpo wæä Tade,
 Tade wodi mæmpo wæä Näacodo ingacäimpa.

³⁵ Näacodo wodi mæmpo wæä Tedogo,
 Tedogo wodi mæmpo wæä Dagao,
 Dagao wodi mæmpo wæä Pedego,
 Pedego wodi mæmpo wæä Ebedo,
 Ebedo wodi mæmpo wæä wacä docä Täna ingacäimpa.

³⁶ Mänii Täna wodi mæmpo wæä Cainäo,
 Cainäo wodi mæmpo wæä Adapacadæ,
 Adapacadæ wodi mæmpo wæä Temö,
 Temö wodi mæmpo wæä Docä Nöwee,
 Docä Nöwee wodi mæmpo wæä Nämeco ingacäimpa.

³⁷ Nämeco wodi mæmpo wæä Mäatotadëo,
 Mäatotadëo wodi mæmpo wæä Ęnoco,
 Ęnoco wodi mæmpo wæä Aadedo,
 Aadedo wodi mæmpo wæä Mäadadede,
 Mäadadede wodi mæmpo wæä wacä docä Cainäo ingacäimpa.

³⁸ Docä Cainäo wodi mæmpo wæä Ęnoto,
 Ęnoto wodi mæmpo wæä Teto,
 Teto wodi mæmpo wæä Adäo,

Adäo wodi ingante nē badongaingä iñömö edæ mönö Mæmpo Wængongui inongä
 ingacäimpa. Mäninäni iñömö edæ Itota mæmæidi ingadänimpa.

4

Itota wënæ wënæ cæcæcäimpa, ante wënæ cæcampa
(Mäateo 4.1-11; Mäadoco 1.12-13)

¹ Mänii Oododänonga quëwëninque Wængongui Tæiyæ Waëmö Önöwoca ingante ædæmō ewocacä inongä inte Itota inömmö wadæ gocantapa. Goyongante Wængongui Önöwoca tömengä ingante önömæca ænte mäocä gogacäimpa. ² Godinque coadenta eönæ mänimpoönæ quëwëñongante wënæ awënë pöninque, Wënæ wënæ cæe, ante ancaa cædongäimpa. Itota inömmö mänimpoönæ cænämaï iningä inte edæ iinque bayonte gæwænte wæcantapa. ³ Adinque wënæ awënë tömengä ingante,

—Bitö näwangä Wængongui Wëmi inömi inte dica incæ päö ämi ba cæmaïmipa.

⁴ Äñongante,

—“Cæntedö quëwengui i. Inæmpa Wængongui nänö apænedö ante tömänö ante eñente quëwengäimpa,” ante yewæmonte ongö apa, äninque Itota edæ Baa angacäimpa.

⁵ Ayæ Itota ingante onquiyaboga ænte mäicä æite ongöñongante wënæ awënë wæætë inguipoga awënë odeyeidi ömæ tömäo ongöñömæ adoyömo a ongonte bai adotedæ odömongä acantapa. ⁶ Odömongä ayongante Itota ingante äninque wënæ awënë wæætë,

—Awënëidi waincönë pöni ongöñinque waëmoncooga mongäñinque tæi piñäñinque tömëñäni nempo quëwëñäni inänite nanguï äñäni eñente do cædänipa, ante abii. Tömëñäni waëmö pöni nani emömämo ante æcänö emonguingää, ante, Tæi piñænte nani enempodö ante æcänö empoquingää, ante, botö inömmö edæ do ænte enempogäimo inte tömëmoque në ämo inte godömo äñänipa. Ininque bitö imite, Bado, godömo æe, ämopa. ⁷ Ininque bitö mänincoo æncæte ante botö weca ædæ wæäñinque, Tatänabi bitö Wængongui bai inömi imipa, ämi adinque botö wæætë, Bado, bitö tömämae Awënë babipa, ante edæ pönömo æmaïmipa, ante wënæ awënë änewengantapa.

⁸ Angä eñëñinque Itota,

—Iimaï ante yewæmongatimpa. “Awënë Wængongui weca ædæ wæænte tömengä ingante apænedinque, Bitö adobique Wængonguimi imidö angüënë, ante watapä apæñecæbiimpa. Ayæ, Wængongui beyænque cæcæbiimpa,” ante wæe yewæmonte ongö apa quëwëe, ante Itota angacäimpa.

⁹ Wënæ awënë ayæ Itota ingante Eedotadëe ænte mäocä goyongante Wængongui oncö ñænæ oncömäa ænte mäicä æicantapa. Æite næ gongäñongante wënæ awënë wæætë, Bitö näwangä Wængongui Wëmi imipa, ante acædänimpa, ante bitö to wæibæwe.

¹⁰ Äninque wënæ awënë godömenque apænedinque, “Iimaï ante do yewæmonte ongompa,

Bitö imite wæe aacædänimpa, ante cædinque

Wængongui tömengä anquedoidi inänite da pönongä

¹¹ pöninque bitö imite inäe æmpodäni ininque,

bitö dicaa tee tæwadämaï incæbiimpa,”

ante yewæmongatimpa cæbii.

¹² Äñongä Itota wæætë,

—Inæmpa iimaï ante ingatimpa. “Bitö, Mönö Awënë Wængongui æbänö cæquingää, ante acæte ante cædämaï incæbiimpa. Eñëñämaï cæbo incæte edæ mönö Awënë Wængongui botö imote cöwë wæe aaquingä, ante acæte ante wënæ wënæ cædämaï incæbiimpa,” ante wæe yewæmonte ongö apa änewëe, Itota angacäimpa.

¹³ Ante Itota angä ate wënæ awënë incæ, Itota wënæ wënæ cæcæcäimpa, ante nänö änewënë iinque cædinque iincayæ ate nänö ponte cæquinque edæ wadæ gogacäimpa.

Gadideabæ godinque Itota täno cæcampa

(Mäateo 4.12-17; Mäadoco 1.14-15)

¹⁴ Itota inömmö Wængongui Önöwoca nänö tæi piñänö ewocadinque Gadideabæ adodö pongacäimpa. Do pongäimpa, ante adinque wadäni wayömo gode ä gode ä cædäni eñengadänimpa. ¹⁵ Tömengä inömmö mäniömæ wayömo wayömo godinque tömëñäni nani odömoincönë go guite go guite cædinque odömonte apæñecä adinque tömänäni, Waa pöni odömonte apæñecampa, ante tedegadänimpa.

*Nāatadeta iñömö ponte Itota apænecampa
(Māateo 13.53-58; Māadoco 6.1-6)*

¹⁶ Wæætē Nāatadeta tōmengā nānō pægaiñömö pōninque tōmēnāni guēmanguiñōnæ iñonte Itota nānō cōwē cæi bai ñowo cæcantapa. Oodeoidi Wængongui apænecā nāni ēñente yewæmongainta ate odömöincōnē go guidique tōmengā mǎninta ate apænecæte ante ængæ ganticā. ¹⁷ Adinque tōmengā ingante Itaiya wodi Wængongui beyæ nānō yewæmongainta pædæ pōnōnāni ængantapa. Æninqe, Mǎniñömö yewæmonte i, ante ñi cæpote adinque, Ìimai yewæmonte ongompa, ante apænecantapa.

¹⁸ “Wængongui Awēnē Ōnōwoca botonga pō guicā ate botō tōmengā ingante ēwocabopa.

Ìninqe tōmengā botonga gao cæte bai cædinque tōmengā nānō tæi piñæmāmo da pōnōninque botō ìmote angantapa.

Bitō ōmaadāni wæwēnāni inānite Wængongui Awēnē waa pōnō cæcæcāimpa, ante watapæ apænebi ēñencædānimpa, angacāimpa.

Nē tee mōnete bai wædāni inānite bitō, Wængongui pōnō wi ænecā beyænque mīnitō abæ tawænte gocæmīnimpa, ante godō apænebi ēñencædānimpa.

Nē babetamōnāni inānite, Mīnitō wæætē waa acæmīnimpa, ante bitō godō cæcæbiimpa. Piinte cædāni ate wæwente quēwēñōnānite bitō wæætē gā pe æmpobi abæ tawænte bai gocædānimpa.

¹⁹ Ayæ, Wængongui Awēnē nānō waadete cæquīnepo do batimpa, ante apænebi ēñencædānimpa, ante Wængongui botō ìmote do da pōnongā pōmo ìmopa.”

²⁰ Ante Itaiya wodi nānō yewæmongainta adinque adodō nā nā capodique mǎniñömö nē cæcā ingante pædæ godōninque Itota tæ contacantapa. Mǎnōmāi cæcā adinque tōmēnāni nāni odömöincōnē nē ongōnāni tōmānāni tōmengā ingante cōwā adānitapa.

²¹ Ayōnānite,

—Wængongui botō ìmotedō ante apænecā ēñēninqe nāni yewæmongainō bai ñowoñæ ēñēñōmīni edæ do ìinque ba amīnipa.

²² Ante apænecā ēñēninqe tōmānāni, Tōmengā nangui waadete pōnō tedecampa, ante apænedinque tōmengā ingante waa adinque guiñente wædānitapa.

—Ìngā iñæmpa Ootee wengā ìmaingā inte bamōnengæ mǎnōmāi cæcampa, ante awædō, ante nāni caboque tededānitapa.

²³ Mǎnōmāi ante wæyōnānite Itota tōmēnāni nāni pōnēnō ante ōnōwēnenque ēñēninqe,

—Botō ìmote apænedinque mīnitō, “Bitō dotodo bai ìnōmi inte nāmā incæ cæte waa babāwe,” ante dodāni nāni angainō bai ante tedemīni awædō. Ayæ, “Capēnaōmō iñömö bitō waa cæbi adinque tededāni ēñēmōnipa. Mǎniñömö bitō cædinō bai tōmēmi ēñagaiñömö adobai wīi cæbii,” ante wæmīni abopa.

²⁴ Äninqe Itota godōmenque apænedinque,

—Nāwangā ämopa. Wængongui beyæ nē apænecā iñömö tōmengā quēwēniñömö ponte apæneyongante, Wīi ēñēinē wædō, ante Baa änānipa. ²⁵ Nāwangā edæ ämo ēñēedāni. Docā Ediya wodi quēwengāñedē mēa go adoque wadepo ayæ tæcæ wadepo iñonte tōmēnāni ōmæ tōmāo nāni gæwænte wægaimāmo baquinque cōōnæ cædāmāi ingatimpa. Mǎniñedē Idægobæ iñömö owæmpoināni nangui ināni quēwēñōnānite, ²⁶ tōmēnāni weca Ediya ingante da godōnāmāi inte Wængongui wæætē edæ, Bitō Tidō eyequei gote Tadopata iñömö quēwengā owæmpoingā weca goe, angā gogacāimpa. ²⁷ Adobai Wængongui beyæ nē apænegaingā Editeo wodi quēwengāñedē Idægobæ æmontai nē baadāni nangui ināni iñōnānite Wængongui tōmēnāni inānite wadæ caadāmāi inte wæætē edæ Tidiabæ quēwengā Nāāmāo ingante wadæ caacā waintai baagacāimpa.

²⁸ Ante Itota apænecā ēñēninqe mǎnincōnē ongōnāni tōmānāni piinte äināni badānitapa. ²⁹ Äināni badinque tōmengā ingante tōmēnāni nāni quēwēñömö yabæ inō wido cædānitapa. Ayæ tōmēnāni nāni mænonte quēwenquidi tōmāne ænte mǎo godinque

tömənäni, Bæ tamö guidömëmæ tæ wææncæcäimpa. ³⁰ Ante cæyönäni, Itota iñömö tæcæguedë godinque aamö cæte wadæ gogacäimpa.

Itota angä ëñente wënæ incæ tao gopa
(Mäadoco 1.21-28)

³¹ Wadæ godinque Gadideabæ Capënaömö näni quëwëñömö pöninque Itota tömənäni näni guëmanguïönæ bayonte tömənäni inänite odömonte apænecä ëñënanitapa. ³² Ëñëñönäni tömengä nämä tæi piñæninque në angä inongä inte nö odömonte apænecä ëñente wædinque tömənäni, Æ tömengä iñömö nö pönī odömonte apænecä ëñëmönipa, ante wädänitapa.

³³ Mäniñedë edæ onguïñængä wënæ wentamö ëwocacä tönö në quëwengä iñömö tömənäni odömöincönë a ongöninque iñontobæ yedæ ante aa pecantapa.

³⁴ —Quimæ quëwëë. Bitö Itota Näatadeta quëwënimī inte quinante mönatö weca pömīi. Mönatö imönate edæ æmæwo wido cæcæte ante wabänö pömitawo. Bitö æmömidö imīi, ante botö do atabopa. Bitö Wængonguī Tæiyæ Waëmö Wëmi inömi imīpa, ante edæ do ëñëmopa.

³⁵ Ante tedeyongante Itota wææ äninque,

—Apocænë quëwenguënë tedewëë. Waocä baönë quëwënömi inte edæ tao gobäwe.

Angä ëñëninque wënæ guiquënë tömänäni ayönäni waocä ingante mæo tæ gotodö go wææñongante tömengä baonga wënæ wënæ cædämaī inte tao gotapa. ³⁶ Itota angä wënæ tao gocä adinque tömänäni guñente wædinque nämæneque tededinque,

—Tömengä æbänö cæte në angä ingäa. Iñæmpa në angä inongä inte tömengä tæi piñæninque wënæidi në wentamö ëwocadäni inänite angä tao godäni awædö.

³⁷ Ante pönente wædinque tömənäni, Itota mänömaī cæcampa, ante tededinque mäniömæ tömäo gode ä gode ä cædäni ëñengadänimpa.

Pegodo nänöogæ wäänä ingante Itota cæcä gançæ bacä
(Mäateo 8.14-15; Mäadoco 1.29-31)

³⁸ Mäni tömənäni odömöincönë ongonde apænedinque Itota tao godinque Timönö oncönë go guicantapa. Go guiyongante wädäni, Timönö nänöogængä wäänä iñömö nanguī daicawo gawænte nangæ bacampa cæbii, änäni. ³⁹ Ëñëninque Itota tömengä weca go gongæninque daicawo inte piinte bai äninque, Idæwaa impa, angä dæ batapa. Ininque tömengä gançæ badinque ængæ gantidinque tömənäni beyæ cæcantapa.

Nantate wæwënäni inänite Itota cæcä waa badänipa
(Mäateo 8.16-17; Mäadoco 1.32-34)

⁴⁰ Nænque gæwadecæ bayonte nantate wæwënäni inänite Itota weca ænte pönäni adinque tömengä wacä ingante wacä ingante godö gampocä ate tömənäni waa badänitapa.

⁴¹ Ayæ waodäni nanguī inäni baönë wënæidi quëwëñönänite Itota angä ëñëninque tao godinque,

—Bitö Wængonguī Wëmi inömi imīpa, ante Yæ änänitapa.

Ininque Itota, Botö Codito inömo imopa, ante do ëñënanipa, ante wædinque wënæidi inänite, Apocænë imæwedäni, ante edæ wææ angacäimpa.

Itota oodeoidi odömöincönë go guite apænecä
(Mäadoco 1.35-39)

⁴² Ayæ baänæ ate Itota wayömö önömæca gocantapa. Gocä adinque wädäni tömengä ingante ante diqui diqui minte tömengä weca do pöninque, Mönitö imönite emö cæte godämaī incæbiimpa, ante wææ cæcæte ante cædänitapa. ⁴³ Ate wædinque tömengä wææ äninque,

—Botö, Wængonguī Awënë Odeye nempo watapæ quëwenguinö anguënë, ante cöwë apænequënëmo imopa. Wængonguī, Mänömainö ante apænecæbiimpa, ante botö imote da pönongä pönimo inte botö tömänäni quëwëñömö gote apænequënëmo inte gobopa.

⁴⁴ Ante Oodeabæ godinque tömənäni odömöincönë go guī go guī cædinque Itota apænecä ëñengadänimpa.

5

Gæyæ nanguī pōni dadōwēnānīpa
(*Māateo 4.18-22; Māadoco 1.16-20*)

¹ Ayæ Itota Guënetadetepæ wedeca gote ongōnīnque Wængonguī nānō apænedō ante apænecantapa. Eñencæte ante cædinque nanguī ināni godongāmæ pō goto ongonte eñēē congadānīpa. ² Apænecā eñēñōnāni tōmengā gomō ayongā gæyæ nē dadōwēnāni dicamōñæ yamoncæte ante ti wæænīnque tōmēnāni nāni ti wææ godimpo mēa wipo gāwapæ wedeca omædempo wāi wocæ acantapa. ³ Adīnque Itota adoque wipodē Timōnō wipodē guīdīnque tōmengā ingante, Tæcæpæno gāmænō eyequei wo go wāi wocæe, angā gā go wāi wocængā īnīnque Itota tæ contate tōmēnāni inānite odōmonte apænecā eñēnānitapa. ⁴ Tōmēnāni inānite īnque apænedīnque Timōnō ingante,

—Bitō wipo tæcæpæno godōmenque ænte gobi ate mīnitō dicamōñæ wo guitodonte gæyæ dadonte æncæmīnīpa.

⁵ Añongā Timōnō,

—Awēnē eñēmi. Tōmāā woyowotæ gæyæ dadoncæte ante dicamōñæ anca guītodōñōmōni wīi datapa. Incæte bitō āmi beyænque botō Ao ante cæcæboīpa.

⁶ Ante māo guitodōñōnāni gæyæ nanguī pōni da ate dicamōñæ wodo wægo tengatīpa. ⁷ Inīnque Timōnōidi wa wipodē ongōnāni ponte godongāmæ æncædānīpa, ante omō cædāni adīnque wa wipo ænte pōnāni ate gæyæ mēa wipodē eyede pōni ñōnōnāni ate wipo emā guīcæ cætīpa. ⁸ Inīnque, Itota angā beyænque gæyæ nanguī pōni æmōnīpa, ante adīnque Timōnō Pegodo īñōmō Itota onōwa gāānē ædæ wæænīnque,

—Awēnē eñēmi. Botō wēnæ wēnæ entawēmo īñōmote bitō waēmō pōni entawēmi inte nānēnē goe, angacāīpa.

⁹ Ante guīñente wæyongante nē dadōwēnāni wadāni adobaī, Æbānō cæte nanguī pōni gæyæ dadonte æmōō, ante wædinque ancaī guīñēnīnque Timōnō tōnō godongāmæ wædānitapa. ¹⁰ Ayæ Timōnō tōnō godongāmæ gæyæ nē dadōwēna Tebedeo wodi wēna Tantiago tōnō Wāo adobaī guīñente wægadāīpa. Inīnque Itota īñōmō Timōnō ingante,

—Guīñēnāmaī incæbiīpa. Gæyæidi gæte bitō æmaī bitō īncayæ ate waodāni inānite gæte baī cædinque apænebi eñēnīnque ponte quēwencædānīpa.

¹¹ Angā eñēnīnque wipo emōnaiya ænte māmō ñā cæcadodīnque tōmēnāni māincoo tōmancoo edæ emō cædinque edæ Itota mīñæ wadæ gogadānīpa.

Nē baadingā ingante Itota wadæ caacampa
(*Māateo 8.1-4; Māadoco 1.40-45*)

¹² Inīncayæ ate Itota wadāni nāni quēwēñōmō gote quēwēñongante wacā cōwē baate eñawēnongā inte tōmengā weca ponte guīdōmēmæ ædæ wæænīnque angantapa,

—Awēnē, bitō Ao āmi inte wadæ caabi īnīnque botō waintai baabaīmopa.

¹³ Añongā Itota pædæ wæampo gampo caadīnque,

—Ao āmopa. Bitō waintai baacæbiīpa.

Ante tæcæ añongā ñōmæintai nānō eñadīntai edæ dæ baadīnque tōmengā waintai do baacantapa. ¹⁴ Inīnque Itota tōmengā ingante,

—Eñēmi. Bitō waintai baadīmi inte wadāni inānite māo apænedāmaī ie. Wæætē, Nāwangā īpa, ante acædānīpa, ante cædinque bitō, Wængonguī quī, ante nē godongā weca tōingā godīnque waintai bitō baadīntai odōmōmi ædæmō acæcāīpa. Ayæ Mōitee wodi wææ ante nānō angaincoo baī ænte pōnīnque bitō waintai bitō baadī beyæ ante edæ, Wængonguī quī, ānīnque nē godongā ingante pædæ godōmi æncæcāīpa, ante wææ angantapa.

¹⁵ Wææ angā incæte, Itota mænōmaī cæcampa, ante nanguī gode ā gode ā cædāni eñēnīnque nanguī ināni Itota apænecā eñencæte ante ayæ tōmēnāni nāni caate wædō waa bacæte ante goto pō goto pō cægadānīpa. ¹⁶ Itota īñōmō wantæ wantæ īñō onōmæca nānēnē godīnque Wængonguī ingante wæætē wæætē apænegacāīpa.

Nē cōmäingä ingante Itota angä dao dao gocampa
(*Mäateo 9.1-8; Mäadoco 2.1-12*)

¹⁷ Ayä adobai iimö iñö iimö iñö Itota cōwē odōmonte apänegacäimpa. Mäniñedē oodeoidi nāni wææ angainö ante nanguī adinque nē ēñēnāni iñömö nē odömönāni iñönānimpa. Wadāni adobai, Mönö wææ angainö ante ēñente cæcäimpa, ante nanguī änāni guiquēnē Paditeoidi nāni änāni iñönānimpa. Īninqe Itota mäniñedē odōmonte apäneyongä mänināni nē odömönāni tönö Paditeoidi iñömö Gadideabæ nāni quēwēñömö ta Oodeabæ nāni quēwēñömö ta pöninque ayä Eedotadēē iñömö ta pöninque Itota weca pöninque tæ contate a ongönānitapa. Mäniñedē wadāni wa wa badinque wænæ wænæ inte wädāni iñönānite Itota iñömö Awēnē Wængonguī nānō tæi piñænö entawēninque nanguī cæcä waa badönānimpa. ¹⁸ Īninqe wadāni nē cōmäingä nānō möimpataa æmætæ æmætæ bæi ongonte nææninque, Itota weca ænte mangui ñö cæcäimpa, ante pönānitapa. ¹⁹ Ponte ayönāni wadāni eyede pönī goto ongönāni adinque nē ænte māmö pönināni iñömö, Ædö cæte guiquīi. Ante wædinque oncömāa iñö æidämæ mäi æidinque dai bæte mænöniñömö epæ cædāni ompite gongæñö tömēnāni cōmäingä möimpataa bæi ongöninque tōmengä ingante godongämæ ongönāni weca tæcæguedē Itota weca pædæ wæænönāni ongongantapa. ²⁰ Mänömaī cædāni adinque Itota, Nāwangä wede pönente cædānipa, ante adinque,

—Æmigo, wænæ wænæ bitö cædimāmo ante ñöwo ñimpo cætimpā.

²¹ Äñongä Paditeoidi tönö nē wææ odömönāni nāmāneque pönente tededinque, “Wænæ wænæ cædingä ingante æcänö ñimpo cæquingää. Īngä iñömö Wængonguī ingampa diyæ mänömaī cæquingää. Edæ babæ ancædö.”

²² Ante pönēñönāni Itota tömēnāni nāni pönēwēnö ante do ēñēninque,

—Minitö mimöno quimæ wænæ wænæ pönēwēmīni. ²³ “Nē cōmäingä nānō wænæ wænæ cædimāmo ante godö ñimpo cæbopa,” ante botö Wængonguī bai ämo ēñēninque mīnitö guiquēnē, Wængonguī ingampa diyæ mänömaī cæquingää, ante pönēmīnipa. Ayä wæætē, “Ængæ gantidinque möimpata ænte dao dao gocæcäimpa,” ante botö Wængonguī bai ämo ēñēninque mīnitö adobai, Wængonguī ingampa diyæ mänömaī cæquingää, ante pönēmīni ĩmaīmīnipa, ante awædö. Īñæmpa mänömaīnö ante pönēmīni ĩninqe mīnitö edæ æbänö cæquēnemo ämīni. ²⁴ Incæte botö Waobo ēñagaimo inte inguipoga quēwēninque woadāni nāni wænæ wænæ cædimāmo ante nē ämo inte pönö ñimpo cæbopa, ante mīnitö edæ ēñencæmīnipa, ante botö iimāi cæbopa.

Äninqe nē cōmäingä ingante edæ,

—Bitö ĩmite ämo ēñē. Ængæ gantidinque bitö möimpata topo cæte æninque tōmēmi oncönē næænte goe.

²⁵ Angä ēñēninque cōmäingä ĩningä incæ edæ tōmānāni ayönāni ængæ gantidinque, Wængonguī ñäö bai emönongä inte pönö tæi piñænte cæcä æmopa, ante apänedinque tōmengä nānō öñöninta topo cæte tao oncönē ænte gocantapa. ²⁶ Gocä ate wædinque tōmānāni, Æbänö cæcäi, ante ēñēnāmaī inte guñente wædinque, Wængonguī bitö ñäö bai emömi inte waa pönī cæbi amönipa, ante watapæ apänegadānimpa. Ayä,

—Ñöwo iñömö mä pönī cæcä amönipa, ante ancai guñente wædānitapa.

Debii ingante Itota angä tee empote gocampa
(*Mäateo 9.9-13; Mäadoco 2.13-17*)

²⁷ Ayä ate Itota tao gote ayongä odömāno awēnē nānō äninta ante nē ængä Debii ingante acantapa. Tōmengä iñömö Awēnē nānō æimpa gäänē tæ contate ongongä adinque Itota tōmengä ingante,

—Botö miñæ pöe.

²⁸ Angä ēñēninque do ængæ gantidinque Debii mänincoo tōmancoo emö cæte Itota miñæ wadæ gogacäimpa.

²⁹ Ayä ate Debii, Itota beyæ, ante tōmengä oncönē ææmæ nanguī pönī cæcantapa. Īninqe ææmæ becæte ante awēnē beyæ nē æwēnāni nanguī ĩnāni pö tæ contate

cænönäni wadäni adobaï pö tæ contate cænäni. ³⁰ Adinque Paditeoidi tönö tömönäni në odömönäni guiquënë Itota miñæ në godäni inänite piinte äinique,

—Odömäno awënë beyæ në æwönäni tönö wadäni në wænæ wænæ cädäni tönö minitö quimæ godongämæ ponte tæ contate bete cæminii.

³¹ Ante piñönäni Itota wæætë tömönäni inänite,

—Në waa ingä guiquënë, Cæbi waa baboe, änämaï iñongante në wænæ wænæ ingä guiquënë dotodo ingante, Cæbi waa baboe, ante do aa pecampa. ³² Pancadäniya, Nämä incæ në nö entawëmo imopa, ante në änäni iñönänite botö iñömö edæ në dotodo bai adobaï inömo inte tömönäni inänite aa pedämaï incæboimpa. Wadäni guiquënë, Nämä wænæ wænæ cæbo imopa, ante në änäni iñönänite botö, Tömönäni, Idæwaa wænæ wænæ cæte awädö, ante Wængongui gämænö poncädänimpa, ante cædinque tömönäni inänite aa pecæ pongaboimpa, ante Itota apænægacäimpa.

Ee ate cænämaï ingäimpa, ante në änäni

(Mäateo 9.14-17; Mäadoco 2.18-22)

³³ Itota ingante iïmaï ante ayæ änänitapa. Wäö miñæ në godäni iñömö, Wængongui beyæ, ante ee ate cænämaï inänipa. Ayæ Paditeoidi miñæ në godäni adobaï ee ate cädänipa. Bitö miñæ në godäni guiquënë do cænte bete quëwönänipa töö.

³⁴ Änäni ëñëningue Itota wæætë,

—Onguïñängä në monguingä wente ænte pönäni iñönänite minitö wæætë, Ee ate cænämaï iedäni, ante edæ ædö cæte wææ anguimiiii. Monguingä nänö wente ænte në pönäni bai inönäni inte botö miñæ në godäni iñömö ædö cæte wæwente bai cænämaï inguïnänii. ³⁵ Wæætë ayæ ate guiquënë, Monguingä, näni në ängongä bai iñömote wadäni ponte botö imote ö ænte gocädänimpa. Mänömaï cädäni ate botö miñæ në godäni iñömö mäniñedë ate wæætë cænämaï inte wæcädänimpa, ante Itota apænægacäimpa.

³⁶ Ayæ, Wængongui Awënë nempo quëwëningue æbänö cæquii, ante ëñencädänimpa, ante Itota imæca quëwönäni näni cæinö ante odömönte iïmaï ante apænecantapa.

—Miincoo badonte ate waocä dicæ adocoo wänä ñænte pancacooga æninque pedæncooga pönö tadömonguingä. Mänömaï cæcä ininque edæ miincoo incæ do wänä tente baquënë. Ayæ pedæncoo ëmönö bai miincoo wiï adobaï ëmompä. Minitö, Awente bai cænämaï inte mönö quëwengäimpa, ante mini änewönö guiquënë pedæncoo bai inte wote baquïne ënepä. Wængongui gämænö pöninque quëwencæminimpa, ante botö apænedö guiquënë miincoo bai inte quëwenguïne ënepä. Ininque wote baquïne tönö quëwenguïne tönö ædö cæte mënea ante ëñente cæquii. ³⁷ Ayæ adobaï yowepæ biñömæ miimæ æninque waocä ædö cæte picæ æmontaicadedë godö pe ñiñænguingä. Inæmpä picæ æmontaicadedë pe ñiñängä ininque edæ tæi æbæ æmæwo goquënë. ³⁸ Miimæ wæætë miincadedë pe ñiñängäimpa. Adobaï botö odömönö miimæ bai inönte dodäni näni odömöwönö ædö cæte botö odömönö tönö adoyedë ëñente cæquii. ³⁹ Incæte, “Gönänimæ iñömö waëmepæ imæmpä,” ante në bedömini inte minitö miimæ ædö cæte quingæ bequimiiii, ante Itota angacäimpa.

6

Guëmanguïönæ iñönte tömömö tä pete ænäni

(Mäateo 12.1-8; Mäadoco 2.23-28)

¹ Ayæ ate guëmanguïönæ iñönte Itota tömëmoncodë tæcæguedencodë gocantapa. Goyongä tömengä miñæ në godäni iñömö tömömö inca tä pete æninque dacæ dacæ cædinque ade cæ ade cæ godäni. ² Adinque Paditeoidi guiquënë,

—Inæmpä, Guëmanguïönæ iñönte mäniñö bai cädämaï iedäni, ante dodäni näni wææ angainö ante minitö ëñänämaï inte quimæ cæminii.

³ Ante piñönänite Itota,

—Docä Dabii wodi tömengä nänö ëmiñänäni tönö ömæpodäni inte gæwænte wædinque æbänö cægadänii, ante yewæmonte öñö incæ minitö inæmpä adämaï inte bai ämini awädö. ⁴ Wængongui quï, ante në godönänique cængui impä, ante wææ näni

angainö bai cædinque dodäni päö, Wængongui qui, ante ñoncæ ñoncæ cædönänimpa. Incæte Dabii wodi Wængongui oncönë go guidinque mäniï päö do ænte cæninque tömengä miñæ në godäni inänite godömenque godongä cænänitapa, ante yewæmonte öñö apa änewëminii.

⁵ Ante apænedinque Itota tömënäni inänite ayæ apænecantapa.

—Botö iñömö Waobo në ëñagäimo iñömö Tæiyæ Awënë inömo inte edæ guëmanguïönæ Awënë inömo imopa. Ìninqe botö, Guëmanguïönæ iñonte edæ æbänö cæquiï, ante adobo në Ämo ingäimo imopa, ante Itota apænegacäimpa.

Ni cömampoingä

(Mäateo 12.9-14; Mäadoco 3.1-6)

⁶ Ìncayæ ate guëmanguïönæ adobaï waönæ iñonte Itota oodeoidi odömöincönë go guiite odömonte apæneyongä onguiñængä önompo tömëmæ inö ni cömampote wædongä inte mäniñömö a ongongantapa. ⁷ Mäniñedë në odömönäni tönö Padi-teoidi guiquënë, Itota wapiticæ cæcä ininque mönö wæætë piinte angæimpa, ante në änewënäni inönänimpa. Ñowo iñömö tömënäni, Ñowoönæ guëmanguïönæ i incæte Itota ni cömampoingä ingante, Waa bacæcäimpa, ante cæcä ininque mönö mäo piinte angæimpa, ante babæ cæcæte ante cöwä adänitapa. ⁸ Mäninö, Mönö piingæimpa, ante näni pönëwënö ante Itota iñömö öñöwënenque edæ do ëñëninque edæ ni cömampoingä ingante,

—Bitö ængæ gantidinque tæcæguedë pö næ gongæe.

Angä ëñëninque ængæ gantidinque pö næ gongægantapa. ⁹ Ìninqe Itota në piinte ancædäni inänite,

—Ämo apænemini ëñëmoedäni. Guëmanguïönæ iñonte mönö æbänö cæquënëmö imöö, ante wææ angatïi, ante pönëmini. Mönö waa cæquënëmö imompa, ante pönëminitawo. Wæætë edæ, Mönö wënæ wënæ cæquënëmö imompa, ante pönëminitawo. Guëmanguïönæ iñonte edæ, Quëwencædänimpa, ante cæquënëmö imompa, ante pönëminitawo. Wæætë mönö edæ ömæe ewenguënëmö imompa, ante pönëminitawo. ¹⁰ Äninqe æmætæ gomö æmætæ gomö edæ tömänäni inänite adinque ni cömampoingä ingante,

—Pædæ pompobi.

Angä ëñente cædinque në cömampodingä incæ pædæ æmpote edæ ædæmö waa empocä bapocantapa. ¹¹ Ìninqe tömënäni, Guëmanguïönæ incæ mänömaï cæcampa, ante ængui badinque, Itota ingante mönö æbänö cæquiï, ante piininqe näni cabo nämäneque tedegadänimpa.

Itota angä ate dote ganca inäni në gode änäni badänipa

(Mäateo 10.1-4; Mäadoco 3.13-19)

¹² Mäniñedë Wængongui ingante apænecæte ante Itota änanquidi æidinque tömäa woyowotæ apænee congantapa. ¹³ Ñäö ba adinque tömengä miñæ në pöninäni inänite aa pecä pönäni ate tömengä, Botö beyæ në gode ämini incæminimpa, ante dote ganca inäni mänimpodäni inänite apænte ængacäimpa. ¹⁴ Tömengä nänö në da godönäni baquinäni iñömö edæ iïmaï ëmönönänimpa. Tānocä Timönö ëmongä ingä incæte Itota wawo Pegodo pemongacäimpa. Ìngä Pegodo tönö Æntade nāna caya, Tantiago tönö Wäö nāna caya, Pedipe tönö Batodömëe, ¹⁵ Mäateo tönö Tömato, Adepeo wengä Tantiago inönänimpa. Ayæ, Mönö ömæ ingæimpa, ante nanguï cædongä inte wacä Timönö inongäimpa. ¹⁶ Tantiago wengä Codaa tönö Itota ingante odömonte në godonguingä ingaingä inte wacä Codaa Icadote näni ämongä inatapa. Mänimpodäni inänite Itota apænte ængacäimpa.

Tæiyænäni inänite Itota gampocä waa badänipa

(Mäateo 4.23-25)

¹⁷ Mänimpodäni tönö Itota mäemö iñömö wææninqe næ gongæante ongongantapa. Mäniñömö tömengä miñæ në godäni nanguï inäni do ponte a ongönönänimpa. Ayæ

tömənāni tönö wadāni Eedotadēē iñōmō quēwēnāni tönö Oodeabæ tōmāo quēwēnāni ayæ Tido eyequei Tidōo eyequei gāwapæ wedeca quēwēnāni nangui ināni do ponte a ongönōnānimpā. Tömēnāni, Itota apānecā ēñengæimpā, ante ayæ, Wēnæ wēnæ inte wæwēmō inte mōnō waa edæ bacæimpā, ante pōninque a ongönānitapā. ¹⁸ Ayæ wēnæidi nē wentamō ēwocadāni tönō quēwēnte wæwēnāni māniñōmō ponte ongönāni inānite Itota adoyōmō wææ pōninque godō cæcā waa badānitapā. ¹⁹ Ayæ, Itota tæi pīñænte entawengā inte pōnō cæcā ate waa badānipā, ante adinque tōmānāni tōmengā ingante gampocæte ante cædānitapā.

Mīni toquinque, ante ayæ, Mīni wæquinque, ante (Māateo 5.1-12)

²⁰ Ayæ Itota tōmengā miñæ nē godāni inānite gomō adinque apānecā ēñēnānitapā.

“Mīnitō, Botō waēmō imopā diyæ Awēnē Odeye nempo guiquimoo, ante nē wæwēmīni iñōmō watapæ mīni toquinque Wængongui Awēnē Odeye nempo mīni quēwenguinō edæ do ēaminipā,” angantapā.

²¹ “Inguipogaque gæwænte wæmīni inte edæ mīni watapæ toquinque Wængongui pōnongā tōmō pōni cæncæmīnimpā,” angantapā.

“Mīnitō inguipogaque wæwēnte quēwēmīni inte edæ mīni watapæ toquinque Wængongui pōnō waadete cæcæcāimpā,” angantapā.

²² “Botō Waobo ēñagaimō miñæ gomīni beyænque wadāni mīnitō imīnite badete todinque piinte adinque wido cædānitawo. Botō beyænque mīnitō emōwo ante, Wiwa emōwo awædō, ante Baa ānānitawo. Edæ mīni waa toquinque inguipogaque mānōmaī cædānipā. ²³ Ōönædē mōnō ænguīnō ante nangui ongompā, ante pōnēninque mīnitō ñōwodāni nāni piinte cæyedē incæ watapæ toedāni. Iñāni nē piinte cædāni wæmæidi incæ Wængongui beyæ nē apānegaināni inānite edæ adobai piinte cægadānimpā, ante toquēnē wæwēmīni. ²⁴ Wæætē edæ māincoo nangui nē ēamīni guiquēnē iincayæ ate mīni wæquinque edæ inguipogaque watapæ quēwēmīnipā,” ante Itota apānecantapā.

²⁵ “Nē tōmō cæmīni guiquēnē iincayæ ate mīni gæwænte wæquinque edæ inguipogaque tōmō cæmīnipā,” ante apānecantapā.

“Nē Ca ca tomīni adobai iincayæ ate Ca ca mīni wæquinque edæ inguipogaque tomīnipā,” angantapā.

²⁶ “Mīnitō imīnite ante tōmānāni waa apānedāni iinque edæ mīni wæquinque ingæimpā. Iñæmpā iñāni nē waa apānedāni adodāni mæmæidi adobai cægadānimpā. Wadāni babæ wapiticæ apānedāni incæ, Wængongui beyæ nē apānebo imopā, ante nē ānewēnāni inānite iñāni mæmæidi iñōmō adobai waa apānegadānimpā,” ante Itota apānegacāimpā.

Nē piinte cædāni inānite waadete cæcæimpā, ante (Māateo 5.38-48, 7.12)

²⁷ Ayæ godōmenque apānedinque Itota, “Mīnitō nē ēñēmīni iñōmīnite āmo ēñēedāni. Mīnitō imīnite nē piinte cædāni inānite mīnitō wæætē waadete cæedāni. Mīnitō imīnite nē piinte adāni inānite mīnitō wæætē waa cæedāni. ²⁸ Wēnæ wēnæ bacæmīnimpā, ante nē ānāni inānite mīnitō wæætē waa apānete godō cæedāni. Mīnitō imīnite nē wēnæ wēnæ cædāni inānite mīnitō wæætē tōmēnāni beyæ ante Wængongui ingante apānedāni. ²⁹ Wacā bitō imite imæmpaga inō tamongā wædimi inte bitō wæætē æmæmpaga inō dadi emæmonte ee ongōmi tamongæ. Ayæ yogui beyæ bitō yabæcoo ō ængā adinque ōnōnancapæncōo tönō ee abi ō ængæ. ³⁰ Māincoo ante nē angā ingante tōmengā nānō ānoncoo edæ ee godōmi ængæ. Ayæ bitō māincoo nē ō ængā ingante, Wæætē adodō pōnōmi æmoe, ānāmaī incæbiimpā. ³¹ Mīnitō, Wadāni botō imote waa cæcædānimpā, ante wæmīnitawo. Edæ māniñō ante mīni wædō bai adobai wædānipā, ante pōnēninque mīnitō wæætē wadāni tōmānāni inānite waa cæedāni,” ante Itota angacāimpā.

³² Ayæ apānedinque, “Mīnitō imīnite nē waadedānique inānite waadete pōnēmīni inte wadāni inānite waadedāmaī imīni adinque edæ Wængongui dicæ mīnitō imīnite

waadete pönö aqingäa. Ìñæmpa nè ëñënamäi cädäni incæ nè waadete pönënanique inänite waadete pönëninque mīnitō cæganca do cädänipa töö. ³³ Ayæ adobaï mīnitō imīnite waa cädänique inänite waa cæmīni inte wadäni inänite waa cädämaï imīni adinque Wængonguï mīnitō imīnite dicæ waa aqingäa. Ìñæmpa mīnitō cädö baï nè ëñënamäi cädäni incæ adobaï do cädäni apa cæmīnii. ³⁴ Ayæ, Adodö pönongä æncæboimpa, ante pönëwëninque mīnitō nè adodö pönonguingä ingante godömīni inte wadäni inänite godönämaï imīni adinque Wængonguï mīnitō imīnite dicæ waa aqingäa. Ìñæmpa nè ëñënamäi inäni nāni cabo incæ, Adodö pönongä æncæboimpa, ante pönëwëninque nè adodö pönonguinganque ingante godöningue mīnitō cädö baï adobaï cädänipa töö.”

³⁵ “Wæætë mīnitō imīnite nè pīnāni inänite waadete pönëninque waa cæedäni. Ayæ tömënanī nāni änö ante, Adodö pönömi æmoe, ante änämaï inte ee godömīni æncædän-impā. Mänömaï waadete cæmīni ininque mīnitō iincayæ ate mīni waadete cægäinö beyæ nanguï æmaimīnīpa. Ayæ mönö Mæmpo Æibæ pönī nè Quëwengä iñongante tömengä ingante nè waa ate pönënamäi inäni inänite tömengä godö waadete cæcampa. Nè wīwa cädäni inänite tömengä godö waadete cæcampa. Ininque mīnitō tömengä nänö cæi baï adobaï waadete cæmīni ininque Mæmpocä waadete nänö entawëno baï mīnitō adobaï entawëninque tömengä wëmīni imāimīnīpa. ³⁶ Mönö Mæmpo pönö waadete nänö waa cægäi baï mīnitō adobaï wadäni inänite godö waadete waa cæedäni,” ante Itota angacäimpa.

*Wadäni inänite apænte änämaï iedäni, ante
(Mäateo 7.1-5)*

³⁷ Ayæ wæætë Itota iïmaï ante apænecantapa. “Wacä ingante apænte änämaï imīni ininque mönö Mæmpo wæætë mīnitō imīnite apænte änämaï incæcäimpa. Ayæ, Wacä nänö tente wæquinque wënæ wënæ cæcampa, ante änämaï imīni ate mönö Mæmpo wæætë, Mīni tente wæquinque wënæ wënæ cæmīnīpa, ante apænte änämaï incæcäimpa. Wacä wënæ wënæ cæcä ingante mīnitō ñimpo cæmīni ee gocä ate mönö Mæmpo adobaï mīnitō imīnite ñimpo cæcä quëwencæmīnīpa. ³⁸ Wadäni inänite ee godödäni. Mīnitō ee godömīni ænāni ininque wadäni wæætë mīnitō imīnite ee pönönāni æncæmīnīpa. Nè pönönāni iñömö tömënanī nāni tee mäincadedë da wëninque da wæænonte wanæ wanæ cædinque eyepote wæænguinque eyede pönī da wëninque mīnitō ænguincadedë pönö wäne cädäni edæ æncæmīnīpa. Edæ mīnitō tee mante mīni godöincade incæ adocadeca tee mante baï cædinque Wængonguï mīnitō imīnite eyepæ pönongä æncæmīnīpa,” ante Itota apænecäimpa.

³⁹ Ayæ, Wængonguï Awënë nempo quëwëninque æbänö cæquï, ante ëñencædänīpa, ante Itota imæca quëwënanī nāni cæinö ante odömöninque iïmaï apænecantapa. “Babetamongä ingante wacä babetamongä incæ ædö cæte mäo odömongä goqingäa. Ìñæmpa mänömaï cædinque nāna babetamoncaya ompite adopiticæ guëa go wææ guibainapa. ⁴⁰ Nè odömönte apænecä iñömö nè ëñengä inte odömöñongante tömengä nänö nè ëmīñängä guiquënë dicæ godömenque ëñengä ingäa. Incæte iinque odömönte apænecä ëñëninque tömengä nänö nè ëmīñängä abæ tawëninque wæætë nè odömongä baï bacæcäimpa,” ante Itota apænecäimpa.

⁴¹ Ayæ apænedinque, “Bitö tönīñacä wædænque wënæ wënæ cæcä iñongante bitö guiquënë nanguï bitö wënæ wënæ cædinö ante wædämaï inömi inte tömengä ingante quīnante pīinte änewëmīi. Ìñæmpa tömëmi awinca gäänë awæmpa wææ ongompa, ante adämaï inte baï cæbīpa töö. ⁴² Tömëmi awinca gäänë awæmpa wææ ongompa, ante bitö adämaï inte bitö tönīñacä ingante, ‘Biwī, bitö awinca guiyä mäë owo baï ate æ wimömoë,’ ante edæ abīpa ænguimīi. Ìñæmpa bitö nè wadö tedete wadö cädömi inte edæ tömëmi awinca gäänë wææ ongompa täno wido cæte ate edonque adinque bitö tönīñacä awinca guiyä owodö æncæbiimpa,” ante Itota angacäimpa.

*Awæ æbänö iwæ, ante tömenca bete ëñengäimpa, ante
(Mäateo 7.17-20, 12.33-35)*

⁴³ Ayæ godömenque apænedinque Itota, “Waincawæ incæ ædö cæte baaca incaquiï. Wæætë wiwa iwæ incæ ædö cæte wainca incaquiï. ⁴⁴ Awæ æbänö iwæ, ante ëñencæte ante mönö tömenca tä pete bete ëñengæimpa. Igowæñeca æncæte ante waodäni dicæ daa mongæwæa edæ tä pete ænäniyaa. Yowemö æncæte ante waodäni dicæ daacamëña tä pete ænäniyaa. ⁴⁵ Mönö waocabo iñömö adobaï iñömö inte cæmompä. Mímönë mönö pönëmämo eyede tate bai tao godedinque mönö mänimämoque ante pönëninque tedemompä. Waocä në waa cæcä guiquënë waa pönï tömengä nänö pönënö ante entawëninque waa tedecampä. Në wiwa cæcä guiquënë tömengä nänö wiwa pönënö ante entawëninque wiwa tedecampä,” ante Itota apænegacäimpa.

*Në mænöna ante
(Máateo 7.24-27)*

⁴⁶ Ayæ godömenque apænedinque, “Minitö iñömö botö imote, ‘Awënë, mönitö Awënë imipa,’ ante tedemini incæte botö änö ante quínante wii ëñente cæminii. ⁴⁷ Nöwo iñömö edæ apænebo ëñeedäni. Botö gämænö ponte ëñëninque waocä botö änö ante do ëñente cæcä iñömö tömengä iïmaï ingampä. ⁴⁸ Waocä adocanque oncö mænoncæte ante guiibæ ææ wodinque dicaboga mænoncæte ante gönongä bai në ëñente cæcä iñömö adobaï cæcä ingampä. Tömengä oncö tæï mænonte ongö ininque æpæ äninque quingæ pö incæte oncö ædö cæte wancæ wancæ cæquiï. Iñæmpä tæï mænonte ongompä. ⁴⁹ Wæætë waocä guiibæ ææ wote gönönämaï yabæque oncö mænongä ate yabæque mænöiñömö æpæ äninque pö ate oncö dobæ bogo cæte tæ wææninque æmæwo gopa. Botö apænebo ëñëninque waocä në ëñënämaï cæcä iñömö tömengä në yabæque mænongä bai inte ocai incadämaï inte bai ëñënämaï cæcampä,” ante Itota iinque apænegacäimpa.

7

*Capitäö ingante në cæcä ingante Itota cæcä waa bacampä
(Máateo 8.5-13)*

¹ Ayæ tömënäni inänite iinque apænedinque Itota Capënaömmö nani quëwëñömmö gogacäimpa. ² Mäniñömmö quëwëninque odömmäno tontadoidi awënë capitäö ingante në cæcä iñömö wënæ wënæ badinque æmæwo wæncæ cæcä ingantapä. Awënë capitäö ingante në cæcä iñongante awënë wæætë tömengä ingante nanguï waadecantapä. ³ Ininque, Itota waa cæcä ingampä, ante mämö apænedäni ëñëningä inte tontado capitäö iñömö oodeoidi inänite në aadäni nani Picæncabo inänite apænedinque, Minitö Itota weca godinque tömengä ingante ämini ëñente pöninque tömengä wæætë botö imote në cæcä ingante cæcä waa bacæcäimpa. ⁴ Angä ëñente godinque në aadäni nani Picæncabo guiquënë Itota weca pöninque tömengä ingante nanguï änanitapä.

—Mönö oodeocabo iñömmonte mäningä tontado capitäö iñömö mönö imonte waa cæcampä, ante wædinque bitö tömengä beyæ waa cæcæbiimpa. ⁵ Tömengä iñömö mönö oodeocabo iñömmonte waadete cædinque, Wængonguï apæneca nani ëñente yewæmongainta ate minitö odömmöincö impä, ante do mænonte pönongä æmompä cæbii.

⁶ Änani ëñëninque Itota në aadäni nani Picæncabo tönö wadæ gocantapä. Oncö obo pönönänite tontado capitäö iñömö tömengä guidënanäni inänite, Go bee tëninque botö beyæ Itota ingante iïmaï ante apæneedäni, angantapä. “Awënë ee ongöe. Botö wæmmö imopa diyæ bitö botö oncönë pö guiquimii, ante capitäö bitö imite angampä,” ante apæneedäni, angä ponte apænedänitapä. ⁷ Ayæ adobaï, “Botö wii wæmmö inömo inte edæ bitö weca pönämaï intabopä. Incæte bitö adoyömmö ongöninque ämi ininque botö imote në cæcä waa bacæcäimpa. ⁸ Bitö iñömö Awënë Wængonguï ingante në ëñente cædömi imi bai botö adobaï wacä awënë ingante në ëñente cæbo imopa. Ininque botö awënë ëabo inte botö awënë beyænque ämo ëñëninque tontadoidi wæætë guïñente wædinque botö änö ante cædänipä. Ininque adocanque ingante botö, Goe, ämo ëñëninque edæ do gocampä. Wacä ingante, Pöe, ämo ëñëninque edæ do pongampä. Ayæ botö imote në cæcä ingante, Cæe, ämo ëñëninque edæ do cæcampä.” Mänömainö ante Itota

ingante botö beyæ ante apænemini eñengædani, ante tontado capitäo iñömö tömengä guidënanäni inänite angä godinque tömënanäni wæætë capitäo nänö änö bai ante Itota ingante adodö ante apænedänitapa.

⁹ Mänömaïnö ante tontado awënë beyæ apænedäni eñëninque Itota wæætë, Mäningä tontado awënë iñömö waa pönï eñengampa, ante wædinque godongämæ ongönäni inänite,

—Nawangä ämopa. Mönö idægocabo iñömönte mäningä wede pönengä ingä bai adocanque incæ edæ dæ angä awædö, angantapa.

¹⁰ Ayæ në bee tencæ pöninäni oncönë wadæ gote ayönäni capitäo ingante në cæcä iñömö do waa bacä agadänimpa.

Æmæwo wæningä ingante Itota angä nänä ömæmongampa

¹¹ Itota iñömö iimö ate Näino nänä quëwëñömö gocæte ante goyongante tömengä nänö në emiñænäni tönö wadäni nanguï inäni godongämæ gogadänimpa. ¹² Mäniñömö yabædemö obo pöñongä onguïñengä æmæwo wæningä ingante næænte pönänitapa. Tömengä badä owæmpoingä inongä inte tömengä wengä adocanque wængä wædinque pongantapa. Ayæ mäniñömö quëwënanäni nanguï inäni wäänä tönö godongämæ pönäni acantapa. ¹³ Wäänä ingante adinque Itota tömengä tönö guëa wæwente bai pönëninque,

—Wædämaï ie.

¹⁴ Äninque do wæningä ingante tömënanäni nänä daga wenguimpa gäänë ponte gam-pocä ate në næænänäni næ gongænänitapa. Itota iñömö,

—Edëniimi, bitö imite ämopa. Ængæ gantie, angantapa.

¹⁵ Eñëninque në wæningä incæ ængæ gantidinque tæcæ tedecä adinque Itota wäänä ingante pædæ godongä ængantapa. ¹⁶ Itota mänömaï cæcä adinque tömänäni nanguï guïñente wædinque Wængonguï ingante watapæ apænedinque,

—Wængonguï beyæ në apænecä täï emongä inongä inte mönö weca a ongongä amompa, änänitapa.

Ayæ,

—Wængonguï quimö iñömönte Wængonguï incæ mönö weca ponte godongämæ cæcampa. Nawangä impa, ante nanguï todänitapa.

¹⁷ Ayæ Oodeabæ tömäo quëwënanäni inänite wayömö gomonga quëwënanäni inänite mäo gode ä gode ä cæte, Itota æbänö cæcä, ante apænedäni eñengadänimpa.

Wäo tömengä miñæ në goda inate da pönongä pönapa

(Mäateo 11.2-19)

¹⁸ Wäo miñæ në godäni adobaï, Itota æbänö cæcä ingä, ante eñëninque Wäo ingante mämö apænedäni eñengantapa. Mäniñö ante apænedäni eñente wædinque Wäo iñömö tömengä miñæ në goda mënaa inate añecä pönatapa. ¹⁹ Pöna adinque Wäo tömëna inate, Minatö mönö Awënë weca godinque botö beyæ ante iimaï ante äeda, angantapa. Awënë eñëmi. Bitö iñömö dodäni nänä, Në Ponguingä, angäimi adobi imitawo. Wæætë tömënanäni nänä në angäimi inämaï imi ininque bitö wæætë, Wacä ponguingä, ante wänö cöedäni, ämitawoo. Æbänö mönitö cæquimönii, ante botö beyæ ante eñencæte ante äeda. Ante Wäo mënaa inate Itota weca da godongä godatapa. ²⁰ Godinque Itota weca pöninque iimaï ante apænedatapa.

—Wäo æpænë në guidönongä iñömö mönatö imönate da pönöninque bitö imite iimaï angampa. Awënë eñëmi. Dodäni nänä, Në Ponguingä, angäimi bitö iñömö adobi imitawo. Wæætë tömënanäni nänä angäimi inämaï imi ininque bitö wæætë, Wacä ponguingä, ante wänö cöedäni, ämitawoo. Æbänö mönitö cæquimönii, ante eñencæte ante Wäo mönatö imönate da pönongä pontamönapa, änatapa.

²¹ Mäniñedë incæ daicawo gawænäni tönö wënæ wënæ inte wæwënanäni nanguï inäni inänite Itota godö waa cæcä waa badänitapa. Wënæidi në wiwa ewocadäni inänite tömengä wido cæcä ate waodäni nanguï inäni waa badänitapa. Babetamönäni nanguï inäni inänite tömengä gampomongä waa bamönänitapa. ²² Ininque mänömaï cæcä waa ayönate ñowo pöna inate Itota,

—Botö godö cæbo ate babetamö inināni incæ do adāni amināpa. Cömante inināni incæ waa bate dao dao godāni amināpa. Baate inināni incæ ñowo æmontai waëmontai baadāni amināpa. Babetamonca ināni iñōnānite botö godö cæbo ate önōmonca eñēnāni badāni amināpa. Do æmæwo wænte öñōnāni iñōnānite botö godö cæbo ate ñāni ömæmonte quëwēnāni amināpa. Ömaadāni inte wæwēnāni inānite botö Wængonguī Awēnē pönö waa cæcæcāimpa, ante watapæ apænebo eñencædānimpa. Ininque minatö ponte eñēñōmīna botö æbānō apænebo eñēmīnatawo, ante ayæ, Botö æbānō cæbo aminatawo, ante minatö ñowo wæætē Wäö weca gote mao apænemīna eñengæda, angantapa.

²³ Ayæ, “Botö beyæ waocā wīi pīinte wadæ gocā iñōmō tōmengā nānō watapæ to-quinque oda cædāmaī incæcāimpa, ante Wäö ingante mao apænemīna eñencæcāimpa,” ante Itota angantapa. ²⁴ Angā eñēnīnque Wäö beyæ nē ānīna wadæ goda adinque Itota wæætē godongāmæ ongōnāni inānite, Wäö æbānō ingāā, ante apænecantapa. “Mīnitö guiquēnē quīnō acæte ante önōmæca gomīnitapa. Cæwīpa woboyæ pæmænte ate æmænō ædæ æmænō ædæ gobaingā ingante mīnitö dicæ acæ gomīnitawogaa. ²⁵ Ininque edæ quingānō ingante acæte ante gomīnitapa. Edæ waocā weocoo waëmoncoo mongæñongā ingante mīnitö dicæ acæ gomīnitawogaa. Iñæmpa weocoo waëmoncoo nē mongæñāni iñōmō nāmanque ante pōnente nāni ænte māincoo beyæ ante nē towēnāni inte tōmēnāni iñōmō awēnē oncōnē quëwēnāni apa quëwēnāni. ²⁶ Ininque edæ quīnante gomīnitawo. Mīnitö mīni nē go acæ cædongā iñōmō edæ Wængonguī beyæ nē apænecā ingantawo. Nāwangā impa. Wængonguī beyæ nē apænecā Wäö ingampa. Incæte tōmengā wīi Wængonguī beyæ nē apænegaināni baī inongā inte godōmenque nanguī cæcā ingampa, ante apænebo eñēmaīmīnīpa. ²⁷ Wængonguī iīmaī angampa, ante yewæmongatīpa.

‘Botö beyæ nē apænecā ingante da godōmo godinque tōmengā taadö tāno beyænte baī cæcæcāimpa.

Tōmengā bitö Codito īmi beyæ ante taadö waa pīnonte baī waa cæcæcāimpa.’

Mänōmaīnō ante dodāni adocā Wäö ingantedö ante pōnēnīnque yewæmongadānimpa. ²⁸ Ñowo iñōmō āmo eñēedāni. Imæca mīni eñagāincabo iñōmīnīte æpænē mönō nē guidōnongā Wäö adocānque ñænængā iñongante wacā tōmengā baī edæ dæ angampa. Incæte Wængonguī Awēnē Odeye nempo quëwēnāni iñōnāni adocānque guiyangā pōnī ingā incæte Wäö pōnōmenque wædangā ingampa,” ante Itota apænecantapa.

²⁹ Itota mänōmaīnō ante apænecā nē eñēnāni iñōmō odōmāno awēnē beyæ nē æwēnāni incæ wadāni incæ tōmānāni Wäö nānō nē guidōngainānīque inōnānimpa. Ininque tōmēnāni, Wængonguī nō cæcā ingampa, ante tōmānāni apænedānitapa. ³⁰ Paditeoidi tōnō idægoidi nāni wææ angāinō ante nē ate eñēnāni guiquēnē Wäö nānō guidōngaināni ināmaī inōnānimpa. Ininque tōmēnāni guiquēnē Wængonguī gāmænō ponguēñēnāni incæte edæ Baa ānānitapa.

³¹ Godōmenque apænedinque Itota iīmaī angantapa. “Mänōmaī ī ininque inguīpogaque ante nē quëwēnāni iñōmō quingāmē baī inānīpa. Quīēmē baī edæ quëwēnānīpa. ³² Wēñænāni mönō godonte æiñōmō tæ contate owempodāni nāni owempodö baī edæ adobaī cædānīpa, ante awædö. Wēñænāni nāni owempote cæcabo incæ ææmæ cæte baī owempote cædinque wadāni inānite aa pedānīpa. ‘Mīnitö beyæ ööña we we öñōmōni mīnitö wæætē edæ äwadāmaī imīnitapa tōö,’ ante owempodīnque wēñænāni pīinte tedewēnānīpa. Ayæ wæætē, Waocā do wængā ate nāni wæbaī, ante wēñænāni nāni owempote cæcabo iñōmō, ‘Mōnitö Ca ca wæyōmōni mīnitö wæætē edæ wædāmaī imīni wæmōnīpa,’ ante pīinīnque aa pedāni baī ñowodāni iñōmō edæ adobaī pīinte tedewēnāni inānīpa.”

³³ “Edæ iīmaī impa. Wēñænāni nāni wædö baī Wäö æpænē mönō nē guidōnongā iñōmō cænguī cænāmaī yowepæ biñōmæ nāni wædænque tī nāmæ bedāmaī ponte quëwēñongante mīnitö guiquēnē, Wēnæ tōnō Wäö quëwengampa, ante pīimīnīpa.

³⁴ Ayæ wæætē botö Waobo eñagāimo inte tōmāā cænguī cænte yowepæ biñōmæ bete

mīnitō weca ponte quēwēñōmote mīnitō guiquēnē, Cæowæobi inte cæmipa. Beowæobi inte bebipa, ante badete tomīnipa. Ayæ godōmenque, Odōmāno awēnē beyæ nē æwēnāni tōnō wadāni nē ēñēnāmaī cædāni iñōnānīte bitō tōmēnāni æmigo imipææ, ante botō imote pīnīnque mīnitō wēñænāni nāni pīinte aa pedō baī ānewēmīnīpa tōō.
³⁵ Incæte, Nē nō ēñēnāni iñōmō nō cædānīpa, ante adīnque, Nāwangā nō ēñēnānīpa, ante mōnō ēñengæīmpa,” ante Itota apænēgacāīmpa.

Paditeocā Timōnō oncōnē Itota go guīte ēñacampa

³⁶ Ayæ ate adocanque Paditeocā incæ Itota ingante, Botō oncōnē pō cæe, angā Ao ante Paditeocā oncōnē godīnque pō guīte cæ congantapa. ³⁷ Tōmēnāni quēwēñōmō onquiyængā nē wēnæ wēnæ cæte quēwengā īnongāīmpa. Tōmengā iñōmō, Paditeocā oncōnē Itota cæncongampa, ante tededāni ēñēnīnque oguī wapæ dica adabatodo waincadedē pe ñīñænte næænte pongantapa. ³⁸ Pō guīdīnque tōmengā Itota ōnōwaca īnō pō næ gongæīnque Ca ca wæcantapa. Ca ca wæyongā Itota ōnōwaca īnō ōmæ petæ petæ wææ aa bee adīnque onquiyængā wæætē tōmengā ocaguīncooca wadæ cæwacantapa. Ayæ queē bewadīnque oguī wapæ gao cæwacantapa. ³⁹ Mānōmaī cæcā adīnque, Pō cæe, nē āningā inte Paditeocā iñōmō nāmāneque pōnēnīnque, “Itota iñōmō Wængonguī beyæ nē apænecā inte baī tōmengā, Æcānō botō imote gampocāā, ante ayæ, Quiēmē baī onquiyængā ingāā, ante ēñencædongāīmpa. Īñæmpa nē wēnæ wēnæ cædongā ingampa, ante do ēñencædongāīmpa.” ⁴⁰ Ante pōnēñongā Itota wæætē,

—Timōnō, bitō imite adodeque apænebo ēñēe.

Åñongante Paditeo wæætē,

—Ao, nē Odōmōmi īmi, apænēbi ēñēmoe.

⁴¹ Angā īnīnque Itota,

—Onguīñængā adocanque nē godōwengā inte quēwēñongante onguīñæna mēnaa īnante godongā ate debe badapa. Adocanque ingante nanguī quīnīento ēmō godongā ate nanguī debe bayongante wacā ingante wædænque tincoenta ēmō godongā ate wædænque debe bacampa. ⁴² Nē godōningā nānō ānīmpota ōmæpoda inte tōmēna, Ædō cæte wæætē adodō pōnonguīmōnaa, ante wæyōnate nē godōningā iñōmō edæ, Ōmæpomīna inte mīnatō ædō cæte adodō pōnōmīna ænguīmoo, ante botō ænāmaī inte ñīmpo cæcæboīmpa, angampa. Īnīnque Timōnō bitō imite āmopa. Mēnaa īnate ñīmpo cæte ānāmaī ingā adīnque nē godongā ingante æcānō godōmenque nanguī waadete pōnēngūngāā, ante pōnēmīi.

⁴³ Åñongante Timōnō,

—Wa. Godōmenque nanguī ēmō debe ingā iñōmō tōmengā wabānō godōmenque waadete pōnengā īmaīngampa, āmopa.

Angā ēñēnīnque Itota,

—Nāwangā ante pōnēmīpa.

⁴⁴ Ānīnque Itota onquiyængā gāmænō dadi ēmænte adīnque Timōnō ingante apænēdīnque,

—Īngā onquiyængā ingante edæ abi. Botō bitō oncōnē pō guīyōmote bitō, Mēwaquīmæ, ante bitō dicæ pōnōmīyaa. Tōmengā guīquēnē ōmæ wææmōnte aa bewadīnque tōmengā ocaguīnca wadæ cæwacā ae. ⁴⁵ Bitō guīquēnē waadedāmaī inte queē bemōnāmaī iñōmīte tōmengā iñōmō botō pō guīyedē tāno queē bewadīnque cōwē queē bewacā ae. ⁴⁶ Bitō guīquēnē oguīngūipæ gao cæcadāmaī iñōmīte tōmengā iñōmō oguī wapæ gao cæwacā ae. ⁴⁷ Īnīnque botō, Tōmengā mānōmaī cæcampa, ante odōmōnīnque bitō imite āmo ēñēe. Edæ tōmengā nanguī wēnæ wēnæ cæcā īñongante Wængonguī godō ñīmpo cæcā ate tōmengā wæætē nanguī waadete pōnēngampa. Bitō iñōmō edæ wædænque wēnæ wēnæ cæbi iñōmīte Wængonguī pōnō ñīmpo cæcā ate bitō wæætē wædænque waadete pōnēmī abopa.

⁴⁸ Ānīnque onquiyængā ingante apænēdīnque Itota,

—Wēnæ wēnæ bitō cædīnō ante pōnō ñīmpo cæbo æe.

⁴⁹ Angä ëñëninque wadäni godongämä cä cönäni guiquënë godö wëntæ wëntæ äninque,

—Íngä ïñömö edæ waocä wënæ wënæ nänö cædinö ante, Pönö ñimpo cæbo æe, ante nê angä ïñömö edæ æcänö ingää.

⁵⁰ Ante wædinque tedeyönäni Itota ïñömö onquiyængä ingante,

—Bitö wede pönënö beyænque quëwencæbiimpa. Nöwo edæ wädämaï inte goe, angacäimpa.

8

Itota beyæ, ante onquiyænäni godongämä cædänipa

¹ Ayæ ate Itota nanguï ïnäni näni quëwëñömö wayömö wædænque ïnäni näni quëwëñömö wayömö wayömö godinque, Awënë Wængonguï Odeye nempo watapæ quëwencæminimpa, ante waa apæncä ëñengadänimpa. Ayæ tömengä tönö dote ganca ïnäni mänimpodäni godongämä godänitapa. ² Ayæ onquiyænäni adobaï Itota miñæ godänitapa. Tömënanäni pancadäniya wënæidi nê wiwa ëwocadäni tönö nê quëwengainäni ïñönänite wadäni nantate wæwengainäni ïñönänite Itota cæcä ate tömänäni do waa badänäni inte ñöwo tömengä miñæ tee empote godäni ïñönänimpa. Adocanque Mäadiya Mäagadadënë näni angaingä tömengä baonga wënæidi tiæte ganca ïnäni tao godäni ïninque tömengä önonganque badingä inte Itotaidi tönö godinque pönö cæcä ïnongäimpa. ³ Wacä onquiyængä Wäönä nänöogængä Tiota guiquënë Edode nänö ëadincoo nê aacä ïñongante Wäönä ïñömö Totänä tönö ayæ wadäni onquiyænäni nanguï ïnäni tönö adobaï Itotaidi tönö godongämä godinque pönö cædönänimpa. Tömënanäni näni ëadincoo incæ ænte pöninque Itotaidi beyæ ante pönö cædönänimpa.

Waocä nänö quiyadö ante Itota odömonte apæncampa (Mäateo 13.1-9; Mäadoco 4.1-9)

⁴ Nanguï ïnäni wayömö näni quëwencabo wayömö näni quëwencabo bacoo ïnäni godongämä ponte a ongöñönänite Itota apæncantapa. Wængonguï nänö apænedö ante waodäni æbänö ëñënanäni, ante ëñencädänimpa, ante inguipoga quëwënäni näni cæinö ante ïmainö ante apæncantapa. ⁵ “Waocä nê quiyadongä ïñömö quiyacæ gocampa. Gote quiyayongä pancamonga taadö ïñömö wææmompä. Taadö wæante eyepodimö öñöñonte pïnä gäwadäni ædö cæte pæquii. Ayæ ayamöidi pöninque dobæ ade cænänipa. ⁶ Pancamonga guiquënë dicamontaa ïñömö wææninque pæquinämaï gä æidinke oguimento guiwapa pæquii. Guiwadämaï inte edæ guingo icadinke tömencaguï näñe wæncaguimpa. ⁷ Pancamonga guiquënë ömentacodé nänö eyepodimö ïñömö pæquinämaï tä bocate gä æiyonte ömentacoo adoyömö pö incootonque ganta cæca ate näñe wæmpä. Wampo incapa pæquii. ⁸ Wæmonguipoga quiyadimö guiquënë tä bocate waa pædinque tömëmö tiëë ganca mänimpomö nanguï pönö incapa. Quiyacä nänö quiyadö ante edæ botö mäninke ante apænebopa.”

Mänömainö ante apænedinke Itota ogæ tededinke, “Ëamonca ongonde edæ ëñeedäni,” angacäimpa.

Önömonque ëñente pönënamäi ïnäniipa, ante (Mäateo 13.10-17; Mäadoco 4.10-12)

⁹ Tömengä miñæ nê godäni ïñömö, Itota ëñëmi, änänitapa. Mäninö ante apænedinke bitö æbänö ante odömoncæte ante apænebitawo. ¹⁰ Äñönänite tömengä, “Wængonguï Awënë Odeye nempo æbänö quëwenguï, ante mini waocabo wëñëñedé mini ëñënamäi ingainö ante botö ñöwo edonque pönö apænebo ate minitö adomïnique ëñëmïni ïminipa. Wæætë wadäni ïnänite edæ botö inguipoga quëwënäni näni cæinonque ante odömöninque apænebopa. Edæ tömënanäni, Awıncaque adinke wii ædæmö adäni inte önömoncaque ëñëninque ædæmö ëñënamäi incädänimpa, ante dodäni Wængonguï beyæ ante näni yewæmongainö bai ïinke bacäimpa, ante botö tömënanäni ïnänite mänömainonque ante apænebopa,” ante Itota apæncantapa.

Quiyacä nänö cæinö ante pönente iimainö ante ëñengæimpa
(*Mäateo 13.18-23; Mäadoco 4.13-20*)

¹¹ Itota ayæ godömenque apænecantapa. “Botö nê quiyacä nänö cæinö ante apænedinque iimainö ante odömoncæte ante apænetabopa. Tömëmö quiyadimö iñömö Wængongui nänö apænedö bai impa. ¹² Taadö wæænte öñömö botö änömö guiquënë nê ëñänäni bai impa. Tömänäni Wængongui nänö apænedö ante tæcæ ëñëñönänite wænæ awënë pöningue, Quëwënämaï incädänimpa, ante cædinque Wængongui nänö angainö ante ö ængä ininque tömënäni ömætawënäni inte ædö cæte pönente quëwenguinänii. ¹³ Dicamontaa wæænte pædimö bai inäni guiquënë Wængongui nänö apænedö ante watapæ ëñente todinque nê Ao änäni inänipa. Tömänäni iñömö oguimento guiwadämaï bai inäni inte wantæ iñö pönänäni ate tömënäni nänö pönönö beyæ ante wädäni piinte cädäni ate tömënäni wæætë guiñente wædinque emö cæte godänipa. ¹⁴ Ömentacodë wæænte pædimö bai inäni guiquënë tömënäni ëñëningue godömenque quëwëñönäni inguipoga quëwente quiëmë beyænque mönö wæpämö pö ate guiñente wædinque pædämaï inänipa. Mäincooque beyæ ayæ önonque towente nänö wædö beyæ tömënäni ömentacoo incootonque nã caate bai cæ ininque edæ wampo encädänipa pæquinänii. ¹⁵ Onguipoga wainguipoga quiyadimö bai inäni guiquënë tömënäni nö pönente waa cæte quëwënäni inänipa. Tömënäni iñömö edæ Wængongui nänö apænedö ante ëñëningue do bæi ongonte wede pönänäni inänipa. Wæntæye inämaï inäni inte tömënäni ee cædinque tömëwæ incate bai waa cädänipa. Botö mänömainö tömänö ante odömoncæte ante nê quiyacä nänö cædö ante apænetabopa,” ante Itota apænecäimpa.

Gongapæncade, ante odömonte apænecampa
(*Mäadoco 4.21-25*)

¹⁶ Ayæ, “Gongapæncade ti wodönodinque waodäni dicæ owætadë boo cæcadäniyaa. Möimoga äñömengadæ inö dicæ concæcadäniyaa. Wæætë, Mäniñömö nê pö guidäni acädänimpa, ante cædinque gongapæncade awæmpa æmongapaa concädäni nãö bæco adänipa. ¹⁷ Quiëmë ante wë wodonte i iñömö mäninö tömänö ante iincayæ ate edonque ate bai ëñengæimpa. Quinö nïwo bee ocate bai i incæ mäninö tömänö iincayæ ate wi æncate bai inönte edonque acæimpa,” ante Itota apænecantapa.

¹⁸ Ayæ, “Nê ëacä ingante godönäni ængä bai nê ëñengä ingante godö apænebo ëñente entawëningue tömengä godömenque ëñente bacæcäimpa. Nê ëadämaï ingä guiquënë tömengä, Ëabopa, ante pönëningue nänö wædænque pönï ëadincö iñönte ö äñänäni wæcä bai nê ëñänämaï ingä adobai tömengä, Entawëmopa, ante pönengä ininque wædænque pönï nänö entawönö iñönte edæ ö ænte bai cæbo dæ ba ate wæcæcäimpa cæminii. Ëamonca ongonte ëñenguënë quëwëminii,” ante Itota apænecäimpa.

Itota wäänä tönö tömengä biwiidi pönänipa
(*Mäateo 12.46-50; Mäadoco 3.31-35*)

¹⁹ Mäniñedë tömengä wäänä tönö tömengä biwiidi pöninque tömengä weca guicæte ante cæyönäni wädäni goto ongönäni ate wædinque, Ædö cæte guiqui. ²⁰ Ante wädäni adinque wacä,

—Itota ëñëmi. Bitö badä tönö bitö biwiidi bitö imite ante oncodo ponte yabæque ongönänipa cæbii.

²¹ Ante apænecä ëñëningue Itota,

—Wængongui nänö änö ëñëningue nê ëñente cädäni iñömö tömënäni botö badä bai botö töninädäni bai inänipa, angacäimpa.

Itota angä ëñente woboyæ æpæ næ gongæmpa
(*Mäateo 8.23-27; Mäadoco 4.35-41*)

²² Mäniñedë tömengä miñæ nê godäni inänite Itota,

—Gäwapæ æmæmäa taocæimpa.

Angä ëñente cædinque tömengä tönö wipodë guidinque tæcæ taocæ wogaa godänitapa.

²³ Tao wogaa goyönäni Itota wipodë näñe ñongäenique edæ mö ñongantapa. Mänö-mai mö ñöñongä goyönänite woboyä nangui pöni pämmäenique edæ æpæ mængonta mængonta pöningue wipodë baguimä guii adinque tömënäni, Æpæ bete wængui wæ, ante Yæ wädänitapa. ²⁴ Itota weca gote, Ömæmoncæcäimpa, ante tao cædinque,

—Awënë, möni Awënë, ëñenguënë quëwëe. Bete wæncæ cæmompæ cæbii.

Änäni ñäni ömæmonte ængä gantidique, Woboyä æpæ idæwaa mængonta cæbipa. Næ gongämäwe, angä. Næ gongäenique ñancæ ñancæ gongämæmpa. ²⁵ Ayä tömënäni inänite,

—Mïni pönëegade incæ quïnante wïi pönëmïni.

Äñongante tömënäni ancai guïñëningue, Æbänö anguimöö, ante nämäneque tede-gadänimpa.

—Ïngä ïñömö æcänö ïnongä inte mänömai angä ëñëningue woboyä incæ æpæ incæ næ gongæmpa, ante wæmönipa, ante tedegadänimpa.

Guedatabæ ïñömö wënæ inte në ënempocä

(Mäateo 8.28-34; Mäadoco 5.1-20)

²⁶ Mänii Gadideabæ ëmö cæte godinque Itotaidi ämmäma wogaa tao godinque Guedatabæ pö ti wæänänitapa. ²⁷ Wipodë manta wo cæyönäni Itota ti wæænte tæcæ ömaa goyongante onguïñängä wënæidi tönö në quëwengä ïñömö mämö bee tengantapa. Ïngä ïñömö tömënäni quëwëñömö në quëwengängä inte ñöwo wantæpiyæ oncönë quëwënämai inte ömaacä quëwëningue waodänidoque cöwë quëwengä ïnongäimpa. ²⁸ Itota ingante adinque tömengä önöwa ïnö ædæ wæäninque edæ Yæ angantapa.

—Itota ëñëmi, bitö Æibæ Quëwengä Wængongui Wëmi ïnömi incæ quimä botö weca pöwëe. Botö imote edæ, Ämogate wæcæcäimpa, ante cædämai imäwe, ante nangui angantapa.

²⁹ Edæ tæcæ pönongante tömengä wentamö nänö në ewocadongä ingante Itota, Gobäwe, ante do angä ëñente wædingä inte ñöwo mänömai angantapa. Mänii wënæ ïñömö wantæ wantæ ïñonte onguïñängä ingante bæi ongonte bai cædongäimpa. Ïningue mäningä onguïñängä ingante waodäni daagömenca edæ ëno pönö goto wimænte wææ ëno pönö goto wiwadinque wææ wänönönänimpa. Incæte tömengä daagömë wangö ñæ wangö ñæ cædongäimpa. Ayä tömengä ingante wënæ wæætë wæætë da godongä önömæca wodii winonte quëwëningä inte adocä ñöwo Itota weca ponte angacäimpa.

³⁰ Angä ëñëningue Itota wæætë,

—Æmömidö imii.

Äñongante,

—Botö ëmöwo Deguiönö ëmömopa, angantapa.

Edæ tontadoidi Deguiönö nani änoncabo bacoo inäni bai botö në ënempodäni adobai wënæidi bacoo inänipa, ante adinque, Deguiönö ëmömopa, ante onguïñängä angantapa. ³¹ Wënæidi guiquënë Itota ingante wæætë wæætë äningue, Mönitö imönite tadömengadængui-poga wido cædämai imäwe, ancaa änänitapa.

³² Mäniiñömö odæ wængänäidi nangui inäni änanquidi a cængönäni adinque, Ïñömö odæ wængänä baönë ämi go guuite quëwënguimöni, änäni ëñëningue Itota, Ao angä.

³³ Ëñëningue waocä baönë quëwente tao godinque wënæidi odæ wængänä baönë wæætë go guidäni ate odæncato wæætë ontadäa wæänömëmö ïñömö gäwapæno pogodo wæi guuite becadote capo wængadänimpa.

³⁴ Itota mänömai cæcä ate wædinque odæ wængänäidi në aadinäni guiquënë pogodo wodii winonte tömënäni quëwëñömö mämö bee tente apænedinque idömæ mämö gode ä gode ä cæte, Itota mänömai cæcä wæmönipa, ante apænedänitapa. ³⁵ Ëñëningue wadäni wæætë, Æbänö cæcäi, ante acæte ante pönänitapa. Itota weca ponte ayönäni wënæidi tönö në quëwëningä incæ ñöwo önonganque bate wecoo ëñacä inte Itota önöwa gäänë ëñë congä adinque guïñente wægadänimpa. ³⁶ Wënæ tönö quëwëningä ingante Itota mänömai cæcä ante në adinäni ïñömö ñöwo pönäni inänite, Mänömai cæcantapa, ante do apænedänitapa. ³⁷ Ëñëningue Guedatabæ quëwënäni tömänäni

ancai guiñente wædinque Itota ingante, Mönitö weca quëwënämaï ñöwo gobäwe, änäni ëñente wædinque tömengä wipodé ïmämäa poncæte ante guicä. ³⁸ Adinque wënæidi tao godäni ate nê önonganque bate quëwengä ïñömö Itota ingante, Bitö miñä mäobi goboe, angä ëñëninque Itota wæætë, Bitö ee quëwëmi, äninque,

³⁹ —Tömëmi oncönë adodö godinque, Wængonguï æbänö nanguï cæcä waa batawoo, ante mäo apänebi ëñencädänimpa.

Angä ëñëninque oncönë godinque tömënäni näni quëwëñömö tömäo cægöninque tömengä, Itota mänömaï cæcä ate waa batabopa, ante mäo apänecä ëñengadänimpa.

Gaido wëñængä beyä cæcæ goyongante

Itota weocoo onquiyængä gampocampa

(Mäateo 9.18-26; Mäadoco 5.21-43)

⁴⁰ Itota ïmämäa ocä ëmænte pongä adinque, Æyedënö ponguingäa, ante nê wædinäni inte tömänäni tömengä ingante waa ate togadänimpa. ⁴¹ Mäniñedë wacä oodeoidi odömöincö awënë ïnongä inte tömengä ëmöwo Gaido ïñömö pö Itota önöwaca ïnö ædæ wæäninque tömengä ingante, Botö oncönë quingä pöe, ante nanguï angantapa. ⁴² Edæ botö wëñængä onquiyængä adocanque ïnongä inte dote wadepo nänö ëñagai ïñonte edæ wæncæ cæcampa cæbii, ante wæcantapa.

Ïninque Itota tömengä miñä gocantapa. Idömæ goyongante nanguï ïnäni goto goto pöninque wodo mö ñongänäni wæcantapa. Wampo impa goquingäa. ⁴³ Mäniñedë wacä onquiyængä pongantapa. Tömengä ïñömö wantæpiyæ dote wadepo ïñonte wepæ wantæ bidämaï cöwë wææ wædinque waa bawënencæte ante cædinque tömengä quincöo tömancoo eyepote pædæ godongä äninque dotodoidi æcämenque incæ onquiyængä beyä ædö cæte waa cæquïnänii. ⁴⁴ Mänömaï quëwente wædongä inte tömengä ñöwo Itota önöñabæca ïnö pöninque tömengä weocoo yæwedecooque godö gampo cæyongä wepæ ïñontobæ edæ wantæ bitapa.

⁴⁵ Itota ïñömö edæ,

—Æcänö botö ïmote pönö gampodäi.

Äñongante tömänäni, Æcänö gampodatawogaa, ante adoyömö ante änäni ate wædinque Pegodoidi wæætë,

—Awënë ëñëmi. Bitö weca tömänäni goto goto godäni apa ämii.

⁴⁶ Itota wæætë,

—Ïñæmpa adocanque botö ïmote wede pönëninque gampocantapa. Tæi piñænte botö entawënë incæ edæ wacä beyä cæquinque do gotimpa, ante wæwënente awædö.

⁴⁷ Äñongante onquiyængä ïñömö, Ædö cæte wë womonguïmoo, ante pönente wædinque do do wäate baï guiñëninque Itota weca ædæ wææncate tömänäni ayönänite apänedinque, Botö waa bawënencæte ante bitö ïmite pönö gampotabopa. Tæcæ pönö gampo cædinque waa babo ae. ⁴⁸ Ante apänecä ëñëninque Itota,

—Onquiyæmi ëñëmi. Bitö wede pönëno beyä edæ wantæ bawënëmpa. Ñöwo edæ nö bawënëmi inte wampo pönente waa goe, ante godö ædämö apänecantapa.

⁴⁹ Ante tæcæ apäneyongä oodeoidi odömöincö awënë Gaido oncönë quëwengä mäniñedë pöninque edæ Gaido ingante apänecantapa.

—Bitö wengä ïñömö ñöwo æmæwo wængampa cæbii. Nê Odömongä ingante ñöwo bitö godömenque änämaï incæbiimpa.

⁵⁰ Ante ñöwo pöningä Gaido ingante angä ëñëninque Itota wæætë,

—Gaido, guiñënämaï ïe. Bitö wede pönëmi adinque bitö wengä miingä quëwencæcäimpa.

⁵¹ Äninque Itota godömenque godinque awënë oncönë pö guicæ cædinque Pegodo ingante Tantiago tönö Wäö ïnate wëñængä wæmpo tönö wäänä ïnate mänimpodänique ïnänite ænte manguicä wäänë guidänitapa. Wädäni ïnänite wæætë wææ cæcä guidämaï ïnänitapa. ⁵² Tömänäni Ca ca wædinque wëñængä wodi ingante ante pönente wæwënäni adinque Itota tömënäni ïnänite,

—Ca ca wædāmaī iedāni. Īñæmpa iñōmō wēñængä wodi edæ wīi æmæwo wængantapa. Mö edæ ñongampa.

⁵³ Angä ēñente wædinque tōmēnāni, Æmæwo wænte oñongampa, ante do adināni inte wæætē edæ, Antedō amīni, ante tōmengä ingante badete todānitapa. ⁵⁴ Īninqe Itota wēñængä ingante pædæ wææmpo bæi ongonte tōō æmæninque ogæ tedinque,

—Wēñæmi, ængæ gantibi, angantapa.

⁵⁵ Åñongä tōmengä do wæningä inte ñāni ömæmonte quēwēninque ængæ ganticantapa. Itota wēñængä beyæ cænguī angä godōna cængantapa. ⁵⁶ Adinque mæmpoda, Æbānō cæte mānōmaī cæcää, ante guñente wædatapa. Incæte Itota wæætē, Botō æbānō cæboo, ante mīnatō wadāni iñānite apænedāmaī incæmīnaimpa, angacāimpa.

9

Wængonguī Awēnē ingantedō ante apæneedāni, ante Itota angä godānipa
(Māateo 10.5-15; Māadoco 6.7-13)

¹ Tōmengä mīñæ nē godāni, Dote iñāni, nāni änōnāni iñānite Itota angä pōnāni ate, Botō nē āmo inte botō tæi pīñænō ante ñōwo pōnōmo ænte entawēninque mīnitō tæi pīñæninque nē amīni bacæmīnaimpa. Īninqe mīnitō amīni ate wēnæidi tōmānāni do gocædānaimpa. Adobaī amīni ate wēnæ wēnæ inte wæwēnāni waa bacædānaimpa. ² Mīnitō, Wængonguī Awēnē Odeye inguipoga do pongāimpa, ante apænemīni ēñencædānaimpa. Ayæ wēnæ wēnæ iñāni iñānite godō cæmīni waa bacædānaimpa, ante Itota mānimpodāni iñānite da godongä gogadānaimpa.

³ Īimaī angacāimpa.

—Mīnitō ömæpomīni taadō goedāni. Ongonto incæ māincoo da wenguincade incæ cænguī incæ godonte æinta incæ tōmancoo edæ ænāmaī inte ömæpomīni godinque edæ ēñacooque ēñate goedāni, angantapa. ⁴ Ayæ, Godinque æcōnēnō tāno go guimīni owodinqe mīnitō wayōmō mīni go quēwenganca mānincōnenque go guī go guī cædinque quēwēdāni. ⁵ Æyōmōmē goyōmīnite wadāni, Pōedāni, änāmaī inte mīnitō apænedō ante wīi ēñēnāni wædinque mīnitō wæætē tōmēnāni iñānite emō cæte iimāinō ante goedāni. Mīnitō iñæmpa, Pōedāni, änāmaī imīni adinque mōnitō gomōni tamēñedāni, ante odōmoncæte ante mīnitō önōwa wadæ wadæ cæwadinque wadæ goedāni.

⁶ Angä godinque tōmēnāni quēwēñōmō wayōmō tōmēnāni quēwēñōmō wayōmō tōmāo godinque Itota nānō da godōnīnāni iñōmō mōnō Awēnē ingantedō ante māo watapæ apænedāni ēñēnānitapa. Ayæ wēnæ wēnæ iñāni iñānite godō cædāni ate waa bagadānaimpa.

Itota æcānō ingää, ante Edode wæcampa
(Māateo 14.1-12; Māadoco 6.14-29)

⁷ Tōmānāni māñīñedē, Itotaidi æbānō cædāni, ante tedeyōnānite pancabaa awēnē od-eye Edode incæ do ēñengantapa. Itota iñōmō æcānō ingää, ante wædinque pancadāniya, Wäo wodi do wænte ñāni ömæmōningä inte iingä Itota imaingampa, ante tededāni ēñente wædinque awēnē Edode guñente wæcantapa. ⁸ Wadāni guiquēnē, Ediya wodi ponte a ongōmaingampa, ante tedeyōnāni wadāni guiquēnē, Wængonguī beyæ nē apænegaīnāni incæ adocanque docā incæ do ñāni ömæmōningä inte a ongōmaingampa, ante tededāni. ⁹ Eñente wædinque Edode wæætē,

—Botō tōmēmo āmo ēñēninque Wäo wodi ingante wido tamencadāni wængantapa. Īninqe māningä Itota nāni nē tededongä guiquēnē æcānō ingää.

Ante wædinque Edode, Æbānō cæte Itota ingante aquīmoo, ante nanguī cægacāimpa.

5.000 ganca iñāni iñānite Itota godongä cænānipa
(Māateo 14.13-21; Māadoco 6.30-44; Wäo 6.1-14)

¹⁰ Itota nānō da godōnīnāni iñōmō tōmengä weca adodō pōninque, Mānōmaī mānōmaī cætāmōnipa, ante nanguī tededāni ēñengacāimpa. Eñente ate tōmengä tōmēnāni iñānite nānēnē Betaida eyequēi ænte māocā. ¹¹ Goyōnānite wadāni do ēñēninque tee

empote pönäni adinque Itota, Waa pömīni abopa, ante waadete apænedinque, Mīnitō Wængonguī Awënë Odeye nempo watapæ quëwencæminimpa, ante apænecantapa. Ayæ, Pancadāniya waa baquënëni inānīpa, ante adinque tōmengä godō cæcä ate waa badānitapa.

¹² Ayæ gāwadecæ bayonte edæ, Dote, ante nāni Itota miñæ gocabo iñömō tōmengä weca pōninque ānānitapa.

—Iñömō önömæca impa cæbii. Bitō godongāmæ ongōnāni inānite āmi idōmæ owodāni weca godinque ayæ nanguī ināni nāni quëwëñömō godinque oncō eyepæ i ate cæninque moncædānimpa.

¹³ Āñōnānite Itota,

—Mīnitō wæætē godōmīni cæncædānimpa. Āñongante,

—Iñæmpa pāo önōmpo æmæmpoque gæyæ mæa pōnī mānimpoque nææmōnīpa tōō. Īninque bitō wæætē, Tōmānāni beyæ cænguī gote ænte pōedāni, āmitawoo.

¹⁴ Onguīñænānique tinco miido ganca ināni edæ mæ ongōnōnānimpa. Incæte Itota tōmengä miñæ nē godāni inānite angantapa.

—Mīnitō tōmānāni inānite, Tincoenta ganca mīni cabo nānēnē tincoenta ganca mīni cabo nānēnē āmīni tæ contacædānimpa.

¹⁵ Angä ëñēninque ānāni tæ contadānitapa. ¹⁶ Itota pāo önōmpo æmæmpoque æninque gæyæ mæa æninque öönædē æmō adinque Wængonguī ingante, Bitō waa pōnōmi ænte cæmōnīpa, ante apænecantapa. Ayæ pāo tōnō gæyæ pā æ pā æ cædinque tōmengä miñæ nē godāni inānite pædæ godongä æninque tōmēnāni tōmānāni inānite di mæñæ di mæñæ cædāni ænte cængadānimpa. ¹⁷ Tōmānāni eyepæ ænte tōmo pōnī cænānitapa. Ayæ ao mæ ao mæ cæte ñōnōnāni ate Itota miñæ nē godāni wæætē ao mæ nāni ñōnōnī ee öñoncoo pædæ wææmpo ö æninque önōmpo tipæmpoga go mentodæa cænguī eyede da wēnāni contagatimpa.

Bitō Coditobi inōmi imīpa, ante Pegodo apænecampa

(Māateo 16.13-19; Māadoco 8.27-29)

¹⁸ Ayæ ate Itota nānēnē godinque Wængonguī ingante apæneyongä tōmengä miñæ nē godāni tōmengä tōnō godongāmæ ongōnōnānimpa. Tōmēnāni inānite angantapa.

—Wadāni botō imotedō ante apænedinque, Æbodō imoo, ante apænedāni ëñēmīnii.

¹⁹ Āñongante tōmēnāni wæætē,

—Bitō imitedō ante apænedinque pancadāniya, Wäo æpænē nē guidongaingä incæ Itota adocā imaingä ingampa, ānānīpa. Wadāni pancadāniya wæætē, Ediya wodi ingaingä incæ Itota adocā imaingä ingampa, ānānīpa. Pancadāniya wæætē, Wængonguī beyæ nē apænegaingä adocanque do wængaingä inte ñāni ömæmonte quëwënongä incæ Itota adocā imaingä ingampa, ante tededānīpa.

²⁰ —Mīnitō guiquënë, Botō æbodō imoo, ante pōnēmīnii.

Āñongante Pegodo,

—Wængonguī nānō nē angāimi inōmi inte bitō iñömō edæ nē Coditobi inōmi imīpa, angantapa.

Itota, Īmaī cædāni wæncæboimpa, ante apænecampa

(Māateo 16.20-28; Māadoco 8.30-9.1)

²¹ Pegodo mānōmāinō ante apænecä ëñēninque Itota wæætē angantapa. Mīnitō botō imotedō ante apænedinque, Codito inongä ingampa, ante gode ānāmaī iedāni āmopa, ante nanguī āninque edæ wææ angacāimpa. ²² Āninque,

—Botō Waobo ëñagaīmo inte nanguī caate wæquënëmo imopa. Nē aadāni nāni Picæncabo tōnō, Wængonguī quī, ante nē godōnāni ñænænāni tōnō nē odōmōnāni tōnō māniināni edæ botō imote Baa ānāni wæquënëmo imopa. Ayæ botō imote godōmenque wænōnāni wænguënëmo imopa. Incæte Wængonguī angä beyænque botō mēōnaa go adoönæque iñonte edæ ñāni ömæmonte quëwencæboimpa, ante apænecacāimpa.

²³ Ante apænedinque Itota tōmānāni inānite godōmenque apænedinque,

—Æcänö botö miñæ pöinena ina tömengä nämä beyænque ante pönenämaï inte iimö iñö iimö iñö botö miñæ tee empote poncæcäimpa. Nämä nänö wænguiwæ næænte ponte bai cædinque tömengä, Botö wænguimo incæ caate wæbo incæ Itota ingante cöwë tee empote gocæboimpa, äninque poncæcäimpa. ²⁴ Edæ æcänö, Nämä wææ gompodinque quëwencæboimpa, ante cædinque botö miñæ pönämaï ingä guiquënë tömengä iñömö edæ quëwënëmaï incæcäimpa. Wæætë edæ, Wænönäni wæmo incæte botö Itota miñæ tee empote cöwë gocæboimpa, ante æcänö äna guiquënë tömengä wæætë quëwencæcäimpa. ²⁵ Edæ waocä inguipoga ongoncoo tömancoo ö æncæte ante cædinque nämä önöwoca incæ pædæ godongä wë womonte ba ininque edæ tömengä iñæmpa quëwengampa diyæ mäincoo ëaquiringä. ²⁶ Minitö pancaminiya botö beyæ ante botö apænedö beyæ ante guingo imonte wæminitawo. Iñæmpa botö Mæmpo nänö ëmönö tönö anquedoidi tæiyæ waëmö inäni nani ëmönö guinæ gongæñonte botö Waobo në ënagäimo inte edæ nämä ñäö apæite bai dibæ pöinque botö wæætë në guinente wægaingä beyæ ante näëmæ guingo imonte edæ wæcæboimpa. ²⁷ Näwangä ämopa. Botö weca ongömini pancaminiya ayæ wænämaï edæ miimini quëwëñömini botö Wængongui Awënë Odeybo babo ate botö nempo guicæminimpa, ante Itota apænegacäimpa.

Itota waëmö pöni ñäö bai ëmongä bacä adänipa

(Mäateo 17.1-8; Mäadoco 9.2-8)

²⁸ Mänömainö ante apænedingä inte Itota adoque Wængongui itädë go ate Wængongui ingante apæneccæte ante æidinque Pegodo ingante Wäö tönö Tantiago inate mänimpodäni inänite änanquidi ænte mäicä æidänitapa. ²⁹ Æite go apæneyongä tömengä awinca iñömö edæ wii cöwë nänö ëmönö bai waëmö pöni ñäö bai edæ ëmongä bamongä adänitapa. Ayæ tömengä weocoo nänö ëñacoo iñömö edæ näinte bai ëmoncoo badinque näämænta pöni ëñacantapa. ³⁰ Ayæ ayönäni edæ onguinæna mënaa edæ Möitee wodi tönö Ediya wodi incæ iñontobæ a ongöninque Itota tönö tededatapa. ³¹ Tömëna iñömö ñäö apæite bai ëmöna inte Itota tönö godongämæ apænedatapa. Godongämæ apænedinque tömënäni, Itota æbänö ñöwo Eedotadëë godinque iinque cædinque oo wænte wadæ gocæcäimpa, ante tededänitapa. ³² Mänömainö ante tedeyönäni Pegodoidi guiquënë möinente a ongöninque ædæmö ñäni ömæmonte æmö ayönäni Itota ñäö apæite bai ëmongä adinque tömengä tönö onguinæna mënaa godongämæ adiyæ ongönäni adänitapa. ³³ Onguinæna iñömö Itota ingante tæcæ ëmö cæte gocæ cæyöna Pegodo guiquënë,

—Awënë ëñëmi. Iñömö mönö waa pöni ongonte awädö. Bitö ämi ate mönitö oncontaioco mentaiya go adotaique mænöninque bitö oncontai ante adotaique Möitee oncontai ante adotaique Ediya oncontai ante adotaique mænömaimönipa.

Mänömainö ante tededinque Pegodo, Æbänö ante tedequënëmo imoo, ante ëñënëmaï inte önonque tedecantapa. ³⁴ Mänömaï tedeyongä boguimancoo obo wæænte wææ owoyö adämaï inäni inte, Boguimancoo ganta cæ wæcæ wæ, ante Pegodoidi guinente wædänitapa. ³⁵ Ayæ boguimancodë önönepämoque apænecantapa. “Ingä botö Wengä botö në apænte ængaingä ingampa cæminii. Tömengä pönö apæncä ate ëñëdäni.”

³⁶ Ante apæncä ëñente ayönäni Itota ñöwo adocanque a ongongä adänitapa. Iinque tömengä miñæ në godäni në adinänique inte pæ wëenedinque tömënäni nani adinö ante maniiñedë wädäni inänite apænedämaï ingadänimpa.

Itota wënæ ingante angä go ate wëñængä waa bacampa

(Mäateo 17.14-21; Mäadoco 9.14-29)

³⁷ Mänii änanquidi æi iimö ate wææ pönönäni Itota ingante bee tencæte ante nanguï inäni pönänitapa. ³⁸ Godongämæ ponte nanguï inäni ongönönäni onguinængä adocanque edæ ogæ tededinque,

—Në Odömömi ëñëmi. Botö wengä onguinængä ingante pönö waa æ. Tömengä adocanque botö wengä ingampa cæbii. ³⁹ Tömengä nänö në ëwocadongä inte wënæ incæ tömengä ingante edæ bæi ongongä ate tömengä iñontobæ Yæ yæ angampa. Ayæ godö

cæcä ate botö wengä edæ do do wäadinque önöne mäwanta tadecampa. Wënæ iñömö wantæ iñö tao godinque adodö pö guiite edæ cöwë quëwëninque botö wengä ingante edæ ewencæ cæcampa cæbii. ⁴⁰ Bitö miñæ nê godäni inänite botö, Wënæ inte wido cæedäni, ancaa äñömo tömënäni nê cæquënänäni incæ ædö cæte wido cæquinänii, ante wæbopa.

⁴¹ Ante wæyongante Itota,

—Ñöwomïni miini ædæmö cædämaincabo miini pönëegade impa. Minitö weca æpogadö quëwëmoï. Wapiticæ cæyöminite botö æpogadö piyänë cæte wæwëmoï. Äninque mæmpocä ingante apænedinque, Bitö wengä ingante botö weca ænte pöe.

⁴² Angä ëñente ænte mämongä pöñongante wënæ incæ yæipodë bæ tacä do do wäate wæwengantapa. Tömengä wentamö nänö nê ewocadongä ingante Itota iñömö edæ, Ee ae, ante wææ angantapa. Ayæ wëñængä ingante pönö cæcä ate tömengä wæætë önonganque bayongante mæmpocä ingante Itota pædæ godongä ængacäimpa.

⁴³ Mänömaï cæcä adinque, Wængonguï incæ tæi piñænongä inte mänömaï cæcampa, ante pönëninque tömänäni ancai guiñente wægadänimpa.

Ïimaï cædäni wæncæboimpa, ante adodö ante apënegä

(Mäateo 17.22-23; Mäadoco 9.30-32)

Mänömaï cæcä ate guiñente wæyönäni tömengä miñæ nê godäni inänite Itota iimaï ante apënegacäimpa.

⁴⁴ —Ñöwo ämo ëñenguënë quëwëminii. Adocanque, Waocä nê ëñagaingä æyömönö ongongää, ante godö odömöninque botö imote waodäni nempo pædæ godönäni æncædänimpa.

⁴⁵ Äninque tömengä nänö apænedö æbänö i, ante wædänitapa. Wë womonte iñinque tömënäni ædö cæte ëñenguinänii. Ayæ, Æbänö ante ämii, ante anguënänäni incæ edæ guiñënete wædinque pæ wëenegadänimpa.

Æcänonque nê angä inguingää, ante tededänipa

(Mäateo 18.1-5; Mäadoco 9.33-37)

⁴⁶ Tömengä miñæ nänö nê gocabo iñömö, Möni cabo incæ æcänonque ñænængä pöni inongä inte nê angä inguingää, ante wædinque nämä incæ wæætedö wæætë tedeyönänite ⁴⁷ Itota önöwënenque do ëñengantapa. Ëñëninque wëñængä adocanque ingante bæi ongöninque tömengä gäänë iñömö gö cæcantapa. ⁴⁸ Tömënäni inänite apënegantapa.

—Waocä botö ëmöwo beyænque iingä wëñængä ingante, Pöe, ante waa cæcä iñömö tömengä botö imote adobaï edæ, Pöe, ante do waa cæcampa. Botö imote æcänö, Pöe, äninque waa cæda tömengä adobaï botö imote nê da pönongä ingante Wængonguï ingante edæ adobaï, Pöe, ante do waa cæcampa. Edæ miini waocabo wædämini iñöminite waocä guiyangä pöni inongä nänö entawënö bai nê entawengä iñömö tömengä ñænængä pöni inongä ingampa, ante apënegacäimpa.

Në piinte cædämaï ingä iñömö godongämæ cæcä ingampa

(Mäadoco 9.38-40)

⁴⁹ Wäö iñömö Itota ingante apænedinque,

—Awënë ëñëmi. Wacä incæ mönö cabo inämaï inongä inte bitö ëmöwo apænedinque wënæidi inänite wido cæcä atamönipa. Ìninque mönitö wæætë edæ, Bitö mönitö tönö gobi imipa Itota ëmöwo apænequimii, ante tömengä ingante edæ wææ antamönipa.

⁵⁰ Ante apæneyongante Itota,

—Ïñæmpa minitö iminite nê piinte cædämaï ingä iñömö tömengä wæætë minitö tönö godongämæ cæcä ingampa cæminii. Tömengä ingante wææ änämaï incæminimpa, angacäimpa.

Tantiago tönö Wäö inate Itota wææ angampa

⁵¹ Oo pöni nänö æiquionæ bacæ cæyonte Itota, Eedotadëe iñömö botö cöwë gocæboimpa, ante gocæ cæcantapa. ⁵² Wadäni inänite tömengä, Poncæcäimpa, ante

mīnitō tāno beyænte goedāni, ante da godongā godānitapa. Godinque tōmēnāni iñōmō Tāmadiabæ godinque tōmengā beyæ cæcæte ante Tāmadiaidi nāni quēwēñōmō gocæ cæyōnāni, ⁵³ Tāmadiaidi wæætē edæ, Eedotadēē gāmænō Itota gocā awædō, ante adinque, Mōnitō weca pōnāmaī incæcāimpa, ante wææ ānānitapa. ⁵⁴ Īmaī cædāni adinque Wāō tōnō Tantiago tōmengā nānō ēmiñæna iñōmō,

—Awēnē ēñēmi. Baa ānāni adinque oōnædē gonga āmōna wææ gonte wænguiñāni, āmi, ānatapa.

⁵⁵ Āñōnate Itota wæætē edæ dadi ēmæmonte wææ ante tōmēna ĩnate, “Īñæmpa mīnatō ĩmīnate æwocadō angā ēñente āmīnaa, ante mīnatō edæ ēñēnāmaī ĩmīna awædō.

⁵⁶ Īñæmpa botō Waobo ēñagāimo ĩmo iñōmō edæ waodāni ĩnānite ōmæe ēwencæte ante wīi pongāimo ĩmopa. Wæætē edæ, Botō æmo beyænque quēwencædānimpa, ante pongaboimpa,” ante pīngacāimpa. Ayæ wadāni nāni quēwēñōmō gogadānimpa.

Itota miñæ nē goinēnāni

(Māateo 8.19-22)

⁵⁷ Taadonque goyōnāni Itota ingante wacā angantapa.

—Awēnē, bitō ædōmē goyōmite botō bitō miñæ pō gocæboimpa.

⁵⁸ Angā ēñēnīnque Itota wæætē,

—Babæ guintaidi iñōmō ontatodē mongui ēadāni ĩnānipa. Ayamōidi ongonta ēadāni ĩnānipa. Botō Waobo ēñagāimo wæætē edæ mongui ōmaabo ĩmopa poncæ āmi, angacāimpa.

⁵⁹ Ayæ wacā ingante Itota,

—Botō miñæ pōe.

Angā ēñente wædinque tōmengā,

—Awēnē ēñēmi. Botō tāno gote botō wæmpo wængā ate daga wente ate pōmoe.

⁶⁰ Āñongante Itota wæætē,

—Īñæmpa nē wæwocadāni incæ tōmēnāni guidēnāni wænāni ate ee abi daga wencædānimpa. Bitō wæætē, Wængongui Awēnē Odeye do pongāimpa, ante gote apānebi ēñencædānimpa. ⁶¹ Ayæ wacā adobaī,

—Awēnē bitō ĩmite tee empote goinēmo incæ ee ongōñōmi tāno gote botō guidēnāni ĩnānite, Gobopa, ante apānete pōmoe. ⁶² Āñongante Itota wæætē,

—Ōmæ nē mangæ mangæ cædongā iñōmō tōō pōnī minte pæquimpa, ante cæquēnengā ingampa. Tōmengā dadi ēmænte adinque tōō pōnī cæcampa diyæ tōō minte pæquī. Ayæ adobaī Wængongui Awēnē Odeye nempo quēwēnīnque nē cæquēnengā iñōmō tōmengā dadi ēmænte inguipogaque ante acā ĩnīnque Awēnē beyæ ante ædō cæte cæquingā.

10

72 ganca ĩnāni ĩnānite Itota da godongā godānipa

¹ Ayæ ate mōnō Awēnē godōmenque tetenta i doo ganca ĩnāni mānimpodāni ĩnānite ĩmaī angantapa. Mīnitō æmænō mēmīnaa æmænō mēmīnaa godinque botō nē goquīñōmō ante wayōmō nāni quēwēñōmō māo wayōmō nāni quēwēñōmō māo tāno beyænte gomīni ate botō ayæ poncæboimpa, ānīnque da godongā gogadānimpa. ² Īmaī ante da godongā godānitapa. “Nāwangā āmopa. Waocā tōmencacodē do pequinca nanguī inca baī Awēnē nempo nē quēwenguēñēnāni adobaī nanguī ĩnāni ĩnānipa. Incæte nē tā pedāni wædænque ĩnāni baī nē gode ānāni iñōmō adobaī mēnāniya pōnī ĩnānipa cāmīnī. Mīnitō Wængongui ingante apānedinque, Awēnē, bitō tōmencacodē nē ēabi inte āmi ēñēnīnque gote apānecædānimpa, ante æedāni. ³ Nōwo mīnitō iñōmō goedāni, āmopa. Mēñeidi weca ongōnīnque codotedoidi iñōmō tæēmō ĩnānipa diyæ nāmā wææ aaquīnānī. Mīnitō iñōmō codotedoidi aquīñāni baī adobaī aquīmīnī iñōmīnīte botō āmo mēñe baī ĩnāni weca edæ gomīni ataquēdāni. ⁴ Godonte mīni ænguinta wente æī ænāmaī inte māincoo mongænte godāmaī ĩedāni. Awæncata næænte godāmaī ĩedāni. Taadō godinque wacā ingante bee tēnīnque apānedāmaī inte goedāni.

⁵ Æcönēmenque go guite, Mīni quēwencabo gānē pōnente waa quēwēedāni, āmīni ēñencādānīmpa. ⁶ Mānincōnē quēwengā Ao angā īnīnque tōmengā gānē pōnente waa quēwēmaīngampa. Wæætē Baa angā īnīnque mīnitō adomīnīque gānē pōnente waa quēwēmaīmīnīpa. ⁷ Mānincōnē mīni go guīdīncōnē quēwēñōmīnīte mānīncōnē quēwēnāni pædæ pōnōnāni ænte cænte bete quēwēedāni. Edæ nē cæcā īñōmō tōmengā nānō cædi beyæ eyepæ ænguēnengā īngampa. Mīnitō adocōnenque quēwēnīnque wacōnē wacōnē godāmaī īedāni. ⁸ Æyōmōmē goyōmīni māniñōmō quēwēnāni, Pōedāni, ānāni ēñente wædinque mīnitō tōmēnāni cænguī pōnōnāni ænīnque cæedāni. ⁹ Wēnæ wēnæ wæwēnāni īnānīte godō cæmīni waa bacādānīmpa. Ayæ tōmēnāni īnānīte, ‘Wængonguī Awēnē Odeye mīnitō weca oo pongā acæmīnīmpa,’ ante apæneedāni. ¹⁰ Ayæ tōmēnāni quēwēñōmō go guīyōmīnīte Baa ānāni īnīnque mīnitō wæætē tōmēnāni taadonque tao godīnque tōmēnāni īnānīte, ¹¹ ‘Mīnitō quēwēñōmō onguīpoi wadæ cæwate gomōna tamēñedāni. Incæte Wængonguī Awēnē Odeye mīnitō weca oo pongā acæmīnīmpa,’ ante æedāni. ¹² Edæ mīnitō īmīnīte āmōpa. Wængonguī nānō apænte anguīōnæ īnīnque bayonte Todōmā īñōmō quēwengāināni guīquēnē nanguī pante wæwēñōnāni mīnitō īmīnīte nē Baa ānāni guīquēnē godōmenque nanguī pante wæwengūināni īnānīpa,” ante Itota angacāīmpa.

*Nē ēñēnāmaī quēwēnāni īnānīte Itota pīīngampa
(Māateo 11.20-24)*

¹³ Ānīnque Itota nē ēñēnāmaī quēwēnāni īnānīte pīīnīnque īīmaī angantapa. “Co-datīī īñōmō quēwēmīni ēñēedāni. Betaida īñōmō quēwēmīni ēñēedāni. Mīnitō mīni wæwengūinque ēñēnāmaī cæte quēwēmīnidō anguēnē. Edæ botō mīnitō weca tæi pīñante botō cædi baī Tido nāni quēwengāīñōmō Tidōō nāni quēwengāīñōmō adobaī cæbo baī māniñōmō quēwengāināni īñōmō wēnæ wēnæ nāni cægāinō ante dobæ nīmpo cædinque gōmæ ēmoncoo da wēñadinque gōnaiboga tæ contadinque Ca ca wæcægādānīmpa. ¹⁴ Īnīnque Wængonguī nānō apænte anguīōnæ īnīnque bayonte Tido īñōmō tōnō Tidōō īñōmō quēwengāināni īnānīte nanguī pangā wæwēnāni incæte tōmengā mīnitō īmīnīte godōmenque pangā wæwencæmīnīmpa. ¹⁵ Ayæ Capēnaōmō īñōmō quēwēmīni ēñēedāni. Wængonguī mīnitō īmīnīte dicæ oōnæde wo ææntodongā æi gote toquīmīniyaa. Īñæmpa tadōmengadænguīpo wææntodongā guī wæcæmīnīmpa,” angantapa. ¹⁶ Ānīnque Itota wæætē tetenta i doo īnāni īnānīte apænedīnque, “Mīnitō apæneyōmīni æcānō ēñengā tōmengā īñōmō edæ botō īmote do ēñengā īngampa. Wæætē mīnitō īmīnīte nē Baa angā īñōmō tōmengā edæ botō īmote do Baa angā īngampa. Ayæ botō īmote nē Baa āningā īnē tōmengā botō īmote nē da pōnōningā īngante do Baa angampa,” ante apænedīnque tōmēnāni īnānīte Itota angā godānītapa.

Tetenta i doo īnāni do godīnāni īnē ocæ ēmænte pōnāni

¹⁷ Angā godīnāni īnē tetenta i doo ganca īnāni adodō ocæ ēmænte pōnīnque watapæ todīnque Itota īngante apænedīnque,

—Awēnē, bitō ēmōwo apænedīnque mōnītō wēnæidi īnānīte āmōni ēñēnīnque bitō ēmōwo beyænque godānīpa.

¹⁸ Ante todāni ēñēnīnque Itota wæætē,

—Nāīnēte quīngæ cæ baī Tatāna īñōmō wēnæ awēnē incæ oōnæde īnō wæængā nē agaīmo īnē botō adobo āmōpa. ¹⁹ Botō pōnō āmo ate mīnitō īñōmō nē āmīni badīnque edæ tæntæ tōnō emēñe īngante pīnā gāwadāni baī adobaī tæi ēmōmīni īnē tæntæ baī nē cædāni īnānīte wido cæcæmīnīmpa. Ayæ mōnō īmōnte nē pīīnēte cædongā incæ tæi pīñante cæcā incæte mīnitō īñōmō godōmenque tæi ēmōmīni īnē māningā nānō tæi pīñante cæpāmo ante tōmāmāmo ante edæ wido cæcæmīnīmpa. Edæ æcāmēnque incæ mīnitō īmīnīte æmæwo wido cædāmaī incæcāīmpa. ²⁰ Incæte mīnitō āmīni ēñēnīnque wēnæidi do ēñente cædāni beyænque todāmaī īedāni. Wæætē, Mōnītō ēmōwo oōnæde dobæ yewæmōnte ongōmpa, ante adīnque mīnitō mānōmaī beyænque watapæ toedāni, angacāīmpa.

*Mæmpo Wængonguĩ ingante apænedinque Itota tocampa
(Mäateo 11.25-27, 13.16-17)*

²¹ Äninqe Wængonguĩ Tæiyæ Waëmö Önöwoca ingante ewocadongä inte Itota mäniñedë edæ watapæ todinque Wængonguĩ ingante iĩmaĩ ante apænecantapa. “Mæmpo ëñëmi. Bitö, Wadäni nämä ocai encadäni tönö nanguĩ adinque në ëñënäni tönö mäniñö bitö cægainö ante ëñënämaĩ incädänimpa, ante cædinque bitö cægainö ante wë wodongabiimpa. Wæætë wëñänäni tæcæ ëñadäni bai inäni inänite bitö edonque odömömi adinque do ëñënänipa. Bitö öönædë Awënë ingaĩmi inte inguipoga Awënë adobi inömi inte edæ mänömaĩ cæbipa, ante adinque botö bitö imite waa ate pönëninque apænebopa. Mæmpo, bitö tömëmi änö bai cædinque waa cæbi adinque botö Ao ämopa, ante apænebopa,” ante Wængonguĩ ingante apænegacäimpa.

²² Ayæ, “Botö Mæmpo incæ, Bitö Awënë inömi inte aacæbiimpa, ante tömäo iñömö ongoncoo botö nempo pædæ pönöninque tömäo iñömö quëwënäni tömänäni inänite adobai botö nempo pædæ pönongä æninqe botö iñömö edæ tömancoo ënempodinique tömäo iñömö quëwënäni inänite në ënempobo imopa. Wængonguĩ Wëmo iñömote, Æbodö imoo, ante Mæmpoque ëñengä ingampa. Botö wæætë tömengä Wëmo inömo inte, Wængonguĩ æcänö ingää, ante adoboque në ëñëmo imopa. Ayæ, Iñänique në ëñënäni incädänimpa, ante botö në angainäni inänite odömonte botö apænebo ëñëninque tömënäni wæætë, Wængonguĩ æcänö ingää, ante në ëñënäni badäni ate mönitö adomönique äanque bai në ëñëmöni imönipa.”

²³ Ante apænedinque Itota dadi ëmæninque tömengä miñæ në godänique inänite apænedinque, “Nöwo mini adinö adinque në ëmömini inte minitö mini watapæ quëwenguinque impa. ²⁴ Iĩmaĩ impa, ante apænebo ëñëedäni. Wængonguĩ beyæ në apænegainäni nanguĩ inäni tönö imæca awënëidi nanguĩ inäni incæ mini adinö bai ante ainente wægainäni incæte edæ adämaĩ ingadänimpa. Mini ëñëniñö ante adobai ëñëinente wægainäni incæte tömënäni ëñënämaĩ ingadänimpa,” ante mäninganca Itota apænecä ëñengadänimpa.

Tämadiabæ quëwengä incæ në waa cæcä ingampa, ante

²⁵ Ayæ ate adocanque idægoidi näni wææ angainö ante në ate ëñengä iñömö, Itota æbänö wapiticæ apænebaingää, ante cædinque ængæ gantidinique tömengä ingante iĩmaĩ angantapa.

—Awënë në Odömömi ëñëmi. Botö æbänö cæte cöwë wænämaĩ wantæpiyæ quëwenguimoo, ante wæbopa.

²⁶ Äñongante Itota,

—Möitee wodi, iĩmaĩ cædäni, ante wææ yewæmöninque æbänö ante yewæmongä ongö abii.

²⁷ Äñongante në odömongä wæætë,

—Iĩmaĩ ante yewæmongacäimpa. Bitö mimmö entawëmi inte Wængonguĩ mönö Awënë ingante waadedinique bitö önöwoca ewocadinque ædæmö waadete pönencæbiimpa. Bitö baö tæi piñante ëñabi inte godö waadete cædinque bitö ocai encabi inte nö pönëninque waa waadete pönëe. Ayæ adobai bitö nämä bitö waadete waa cædö bai adobai pönëninque godongämæ quëwënäni inänite adobai waa waadete cæe.

²⁸ Ante apænecä ëñëninque Itota tömengä ingante wæætë,

—Bitö nö ëñëmi inte nöingä apænebitapa. Mäniñö bitö äniñö bai cæbi ininque bitö wænämaĩ quëwëmaimipa.

²⁹ Angä ëñëninque guñente wædinque në odömongä iñömö, Botö cæquëñenö ante wii cæbopa, ante Itota ëñënämaĩ incæcäimpa, ante nämanque ante wææ äninqe,

—Iñæmpa wa. Godongämæ quëwënäni, ante bitö äniñäni iñömö ædänidö inänii.

³⁰ Äñongante Itota wæætë, Mönö guidengä æcänö ingää, ante odömoncæte ante iĩmaĩ apænegacäimpa.

—Onguñengä adocanque Eedotadë quëwente Eedicoo wæidö cægöñongante në ö äñäni tömengä ingante iñontobæ bæi ongonte weocoo gäni tadongadinque tæi tæi

pänäni nangæ bacä ïinque wadæ godäni. ³¹ Ate, Wængongui qui, ante nê godongä adocanque adodö wæidö godö godinque nê nangæ bate öñongä ingante gomö adinque ee wodo pänta æmä wedeca gocampa. ³² Ayæ ate Debii wodi päinäni näni Wængongui oncönê cæcabo incæ adocanque adobai adoyömö wææ pöninque nê nangæ bate öñongä ingante gomö adinque ee wodo pänta gocampa. ³³ Ayæ ate wacä Tämadiabæ nê quëwëningä incæ ado wæidö godinque nê nangæ öñongä weca adoyömö ponte gomö adinque, Tömengä ædö cæte quëwëngüää, ante tömengä wædö ante bai nanguï pönente cæcantapa. ³⁴ Ìngä ïñömö nê nangæ bate öñongä weca pöninque tæi tæi pänäni nänö æbäadiñömö oginguipæ tönö yowepæ ti nämæ biinömæ näni ämä gao caadinque weococa wini caacampa. Ayæ, Tæ contate gocæcäimpa, ante adocä Tämadiabæ quëwëngä ïñömö nämä nänö nê mongænte goquëngä bodo önöñabæ nê nangæ badingä ingante ængö cæcä tæ contayongante bodo ingante töö töö ænte gocampa. Ayæ taadö pönäni näni cænte guite möincö ganca ænte mäo guiddinque nê nangæ badingä ingante waa cæcampa. ³⁵ Ìimö ate padata näni godonte æinta mentaa tadöningue mänincönê nê aacä ingante pædæ godöningue, Bitö nê nangæ badingä ingante waa cæe. Quiëmê æinengä adinque bitö godömi ængä ate botö bitö weca adodö pöninque bitö godönimpo adopo wæætê pædæ pönömo æncæbiimpa, ante gocampa. Mänömaï cæcampa. ³⁶ Äninque Itota tömengä ingante nê äningä ingante godömenque angantapa. Bitö ïmite ñöwo ämo ëñëningue bitö wæætê apænebi ëñëmoe. Nê nangæ bate öñongä weca pönäni mengäa go adocanque inäni incæte æcänö tömengä tönö godongämæ quëwënäni bai inte waa cæcantawoo, ante pönëmi.

³⁷ Äñongante nê odömongä wæætê,

—Tömengä ingante nê waadete godö waa cædongä incæ tömengä guiddengä bai cæcampa.

Ante apæncä ëñëningue Itota wæætê,

—Tömengä nänö cædö bai bitö adobai godinque cæbæwe, angacäimpa.

Mäadota tönö Mäadiya näna caya oncönê Itota ëñacampa

³⁸ Ayæ taadö goyönäni tömënäni quëwëñömö pongä adinque onquiyængä tömengä ëmöwo Mäadota ïñömö Itota ingante angä tömengä oncönê pö guite ëñacantapa.

³⁹ Mäadota tönñacä Mäadiya ïñömö Itota önöwaca inö tæ contadinque tömengä apæncä ëñë congantapa. ⁴⁰ Mäadota guiquënë nê ëñadäni beyæ ante nanguï cæte wædinque Itota weca pöninque,

—Awënë, botö tönñacä ëmö cæte gocä ate botö adoboque nanguï cæbo ate wædämaï ïmitawo. Edæ ämi pö cæcæe.

⁴¹ Äñongante Itota,

—Mäadota, Mäadota, bitö wa wa wa cæcæte ante wæwëmi awædö. ⁴² Wæætê adoque pöni cædinque edæ eyepæ impa. Mäadiya do, Quinö waa cæquimoo, ante apænte pönëningä inte botö önöwaca inö pö tæ contate ëñë congä adinque botö wæætê tömengä ingante, Goe, änämaï incæboimpa, angacäimpa.

11

Wængongui ingante æbänö apænequii, ante Itota apæncä

(Mäateo 6.9-15, 7.7-11)

¹ Itota ayæ ate wayömö gote Wængongui ingante apæncantapa. Ìinque apæncä adinque tömengä nänö nê ëmiñængä adocanque tömengä ingante apænedinque,

—Awënë ëñëmi, Wäö tömengä nänö ëmiñänäni inänite odömonte, Wængongui ingante æbänö ante apænequii, ante nänö apænedö bai bitö mönitö ïmönite adobai ante odömonte apænebi ëñënguimönii.

² Ante wæyönäni Itota,

—Wængongui ingante apæncæte ante iimaï ante apæneedäni, “Mönitö Mæmpo nê öönæde quëwënömi inte ëñëmi.

Mönitō bitō ēmōwo tæiyæ waēmō ēmōmi adinque bitō ēmōwo ante waa adinque apænemōnipa.

Bitō öönædē Awënë nē ingaïmi inte inguipoga Awënë Odeyebi bitō baquinque edæ quingæ pœ. Öönædē owodāni ēñente cædāni bai inguipoga adobai bitō änō bai ēñente cæcæimpa.

³ Mönitō ïmönite bitō, Cænguï, ante ïimō ïñō ïimō ïñō eyepæ pönōmi ænte cæmōnie.

⁴ Mönitō wænæ wænæ cæmōni incæte bitō nē panguënēmi incæ pönō ñimpo cæbi quëwëmōnie. Mönitō adobai edæ wadāni mönitō ïmönite wænæ wænæ cædāni adinque ñimpo cæmōni quëwënāni ae.

Mönitō wænæ wænæ möni cæinënō godō gocæte ante cæmōni adinque bitō wææ cæbi ate mäninō godō godāmai inte mönitō wæætē wænæ wænæ cædāmai incæmōnimpa, Wæætē edæ nē wiwa ëwocadongā nempo ongöñömönite bitō gā pe æmpobi quëwëmōnie.”

Mänömaïnō ante apænete Wængonguï ingante apæneedāni, Itota angantapa.

⁵ Äninqe tömënāni ïñante godömenque apænedinque Itota,

—Bitō ïimai cæbi ïninqe bitō æmigo æbänō cæbaingää, ante pönëedāni. Ayaönænēña incæ bitō æmigo weca godinque bitō, “Botō æmigo ēñēmi. Päömo bodogaa tånoque pönōmi ænimo inte ayæ ate botō adopo pönōmo æncæbiimpa. ⁶ Edæ wacā botō æmigo incæ wayömō gocæte ante botō weca pongampa cæbii. Botō, Quinō impa diyæ godōmo cænguingää, ante wædimo inte bitō ïmite ämopa.” ⁷ Äñōmi tömengä guicönē öñöninque, “Botō odemō ædæmō tee mönedinque botō wëñænāni tönō möimoga öñōmo inte diyæ ædō cæte ængæ gantite godōmo ænguïmii. Ee ae.” ⁸ Äninqe bitō æmigo incæ bitō ämi beyænque ængæ gantite pönönāmai ingampa. Incæte wæætē wæætē äñōmi tömengä, Ancaa ēñente awædō, äninqe ængæ gantidinque bitō ïmite do pönongä æmaïmipa. ⁹ Ante apænedinque botō ïñömō mïnitō ïmïnite ïmai ämopa. Pönōmi æmoe, ante nē angä bai cædinque mïnitō mïni ænguïñō ante Wængonguï ingante apæneedāni. Æyömönō ïi, ante nē diqui diqui mingä bai cædinque mïnitō, Æbänō ïi, ante ædæmō ēñencæte ante Wængonguï ingante wede pönente apæneedāni. Odemō mönitō beyæ wi ænecæimpa, ante aa pecä bai cædinque mïnitō, Æbänō cæquïmoo, ante ēñencæte ante Wængonguï ingante nanguï apæneedāni. ¹⁰ Edæ, Pönōmi æmoe, ante nē änāni ïñömō edæ do ænānipa. Nē diqui diqui mïnāni ïñömō do adānipa. Ayæ odemō ponte nē aa pedāni tömënāni nāni guiquinque edæ do wi ænete bai bacæimpa.

¹¹ Ante apænedinque Itota godömenque apænecantapa.

—Wëñæ mæmpobi ïmi, ēñēmi. Bitō wëñængä päö ante angä ēñëninque bitō dicæ dicamō incæ godōmi ængäa. Gæyæ ante angä ēñëninque bitō tæntæbo incæ dicæ godōmi ængäa. ¹² Enquëmo angä ēñëninque bitō emëñe incæ dicæ godōmi ængäa.

¹³ ïninqe mïnitō nē wiwa cædömïni incæ, Wëñængä beyæ quïnō waa ï, ante ëñëmïni inte do godömïni ængampa. Mönō Mæmpo ïñömō waa pönï cædongä ïñongante änāni ëñëninque tömengä nē änāni ïñante tömengä Tæiyæ Waëmō Öñöwoca ingante da pönongä æncædānimpa, ante Itota apænegacäimpa.

*Wænæ tönō cæcä ïmaingampa, ante wapiticæ änānipa
(Mäateo 12.22-30; Mäadoco 3.20-27)*

¹⁴ Ayæ wænæ nē babetadecä ïñömō waocä baö do guite ongöñongante Itota tæcæ wido cæcantapa. Wænæ tao gocä ate onguïñængä tededāmai ïningä incæ do tedecä ate wædinque godongämæ ongönāni wæætē guïñente wædinque waa agadānimpa.

¹⁵ Pancadāniya guiquënë, “Ïñæmpa wænæ awënë Beedeboo tönō godongämæ cædinque Itota wænæidi ïñante wido cæcä ïmaingampa töö,” ante tedewënānitapa.

¹⁶ Wadāni guiquënë, Æbänō cæmō ate Itota oda cæquingää, ante cædinque tömengä ingante, Bitō öönædē nāni cæi bai mä odömōmi ate pönëmaïmōnipa, änānitapa. ¹⁷ Mänömai babæ cæcæte ante änewënānipa, ante Itota do ëñëningä inte ïimai angantapa. “Awënë odeye nempo quëwënāni näëmæ wæætédō wæætē cædāni ïninqe awënë nänō ömædempote wæquinque tömënāni nämä ewente cædānipa. Ayæ

adocönë owocabo incæ adoyömö godongämæ quëwëninäni incæ näëmæ wæætedö wææte cädäni ïinque tömënanäni oncö woquingue näwæ gobainäni. ¹⁸ Minitö, Wënæ awënë Beedeboo tönö cædinque Itota wënæidi inänite wido cæbaingampa, ante änewëminipa töö. Ìñæmpa awënë Tatäna nempo quëwënanäni ïñömö näëmæ wæætedö wææte pïinäni ïinque adocabodäni inämaï ïñönänite tömengä dicæ tömënanäni inänite ënempobaingäa. ¹⁹ Minitö, Beedeboo tönö cædinque Itota wënæidi inänite wido cæcampa, ante tedewëminipa. Mäninö mini änewënö näwangä i bai minitö miñæ në godäni guiquënë æcänö tönö cæte wido cädäni. Ìnque minitö miñæ në godäni incæ mini änewënö beyænque ante näëmæ pïinque minitö iminute wææte apænte äninque pïincädänimpa anguënë. ²⁰ Botö ïñömö Wængonguï tönö godongämæ cædinque wënæidi inänite wido cæbo apa änewëmini. Mänömaï i ïinque botö Wængonguï Awënë Odeye inömo inte minitö weca do pömo aedäni,” ante Itota apænecäimpa.

²¹ Ayæ, “Ïimaï impa. Në tæi pïñængä ïñömö tæëmoncoo wëñate mongäinque, Wææ godö cæinca, ante tæëmonca næante tömengä oncö boyæ wææ godö wææ godö cæyongä tömengä ëadincoo ïñömö edæ ee ongompa. Tatäna ïñömö mänömaï ingampa. ²² Incæte wacä godömenque tæi ëmongä inte pöinque mäningä ingante edæ bæ tacampa. Ayæ tæëmonca, Wææ godö botö cæinca, ante mäningä nänö äninca ñöwo pöningä ïñömö gä pe æmpote ö æninque tömengä nänö ëadincoo adobai gä pe æmpote ö ænte mäo nënempocampa. Botö ïñömö në tæi ëmömo pöni inömo inte edæ godömenque tæi ëmongä nänö gänä cæbai cæbopa,” angantapa.

²³ Ayæ, “Botö tönö æcänö wii godongämæ cæcä ïñömö tömengä ïñömö edæ botö imote Baa ante pïinte cæcä ingampa. Ayæ botö, Waodäni botö miñæ poncädänimpa, ante cæyömo waocä botö tönö wii cæcä ïñömö tömengä wææte botö miñæ poncæ cæyönänite tatodongä wadæ godänipa,” ante Itota apænecantapa.

Wënæ waodë owote godingä inte adodö pompa, ante (Mäateo 12.43-45)

²⁴ Ayæ apænedinque Itota iïmaï ante apænecantapa. “Waocä baönë owote ate tao godinque wënæ wentamö nänö ëwocadingä ïñömö edæ, Quingänö baönë go guidinque edæ guëmante quëwenguimoo, ante diqui diqui minte ayongä önömæca to aminte i ate wædinque edæ, ‘Botö tao godincönë adodö go guiite quëwencæboimpa,’ ante pönëninque adodö pongampa. ²⁵ Ponte ayongä waocä önonganque bayongante wacä önöwoca tömengäa owodämaï ingä adinque wënæ wææte, Æ waocä botö owodincö bai ïnongä inte ñöwo wadæ ñëmænte mäincoo cabo tæ gæte bai ömæwocacä ingä abopa. ²⁶ Ate adinque tömengä wææte godinque wënæidi godömenque wentamö ëwocädäni tiæte ganca mänimpodäni inänite ænte pongampa. Tömënanäni tömänäni waocä baönë godongämæ pö guiite owodäni ate waocä ïñömö wënæ yewäninque godömenque wæwengampa,” ante Itota apænecäimpa.

Æbänö cæte watapæ quëwenguï, ante

²⁷ Itota tæcæ apæneyongante onquiyængä ïñömö godongämæ ongönäni tönö ongöninque ogæ tededinque,

—Bitö imite në mangainä inte edæ tömënanäni nänä toquingue impa. Bitö imi goömæ gänongainä inte edæ tömënanäni watapæ nänä quëwenguingue impa.

²⁸ Ante ogæ tedecä ëñëninque Itota wææte,

—Ìñæmpa Wængonguï nänö änö ëñëninque në cädäni guiquënë tömënanäni wææte nänä watapæ quëwenguingue ëñente cädänipa, ante apænecäimpa.

Öönæde nänä cæi bai cædinque mä cæbi amönie, änänipa

²⁹ Mäniñedë godömenque nanguï inäni pönäni adinque Itota, iïmaï ante apænecantapa. “Minitö wiwa mini cæcabo iminipa. Minitö edæ, Mä cæte odömömi adinque pönëmaimönipa, ante ancaa ämini awædö. Näwangä ämo ëñëdäni. Cönäo wodi beyæ cædinque Wængonguï bamönengä nänö cægainö ante minitö pönënamäi ïñöminite

edæ mǎninqwe mǎni aquinqwe cæcæimpa ānewēmīnii. ³⁰ Nīnebaidi pōnencædānimpā, ante Cōnāō wodi ingante Wængonguī angā quēwengacāimpā. Nōwomīni pōnencæmīnimpā, ante adobāi cædinque Wængonguī botō Waobo ēñagāimo iñōmote adobāi angā quēwēmo acæmīnimpā. ³¹ Doyedē iñōmō betamonca gāmænō omæ awēnē inongā inte onquiyængā incæ awēnē Tadōmōō wodi nanguī ēñente nānō apænedō ante ēñencæte ante doōnæ quēwēninqwe pongacāimpā. Tadōmōō wædænque ēñengā iñongante botō godōmenque nanguī ēñēmo inte mīnitō weca ongōñōmote mīnitō iñæmpā wīi ēñēmīnīpā tōō. Iñinqwe mǎningā onquiyængā incæ Wængonguī nē apænte angā weca pōninqwe mǎni nōwo quēwencabo tōnō godongāmæ ongōninqwe, Mīni pante wæquinque ēñēnāmāi ingamīnīpā tōō, ante apænte pīingūngā ingampā. ³² Cōnāō wodi Wængonguī beyæ apæneçā ēñēninqwe Nīnebaidi wēnæ wēnæ nāni cægāinō ante wæwente pōnēninqwe ñimpo cægadānimpā. Cōnāō wodi wædangā iñongante botō wæætē nē ñænæmo inte apænebo ēñēninqwe mīnitō iñōmō ēñēnāmāi imīnīpā. Iñinqwe Nīnebaidi incæ Wængonguī nē apænte angā weca pōninqwe mǎni nōwo quēwencabo tōnō godongāmæ gongænte ongōninqwe, Mīni pante wæquinque ēñēnāmāi ingamīnīpā tōō, ante apænte pīinānidō anguēnē,” angantapā.

*Mōnō awīncā gomō aquīnemō bai ēmompā, ante
(Māateo 5.15, 6.22-23)*

³³ Ayæ godōmenque apæneçantapā. “Gongapæncade tī wodōnodinqwe waodāni dicæ awēmō iñōmō wē wodōnāniyāa. Owæta boo cæcadāniyāa. Wæætē, Māniñōmō nē pō guīdāni acædānimpā, ante cædinque gongapæncade awæmpā æmongapāa cō cædāni ñāō bæco adānīpā. ³⁴ Mōnō baō tōmāo beyæ mōnō awīncā tīcā ēnente bai ēmōmompā. Mōnō nō pōnēninqwe amō iñinqwe mōnō ñāō tīcā ēnente cægonte bai wāa cæte quēwēmompā. Wæætē wīwā pōnente amō iñinqwe mōnō wēmō iñōmō cægonte bai inte wīwā cæte quēwēmompā. ³⁵ Mānōmāi beyæ bitō, Wēmō ewocadāmāi incæboimpā, ante bitō onōwocā cōwā adīnque nāmā wææ cæe. ³⁶ Iñinqwe bitō baō tōmāo ñāō entawēninqwe bitō onōwocā adobāi ñāō ewocabi iñinqwe quīomenque incæ wēmō entawēnāmāi imāimīpā. Gongapæncade ñāō bæco edonque abi bai edæ ñāō ædæmō entawēninqwe edonque adīnque wāa quēwēmāimīpā,” ante Itota apænegacāimpā.

*Paditeoidi tōnō nē wææ odōmōnāni inānite Itota pīingā
(Māateo 23.1-36; Māadoco 12.38-40; Odoca 20.45-47)*

³⁷ Iñinqwe apæneçā ate adocanque Paditeocā tōmengā ingante, Pō cæe, angā ēñente pō guīte cæncæte ante ongongā. ³⁸ Adīnque Paditeocā iñōmō, Itota quīnante mempodāmāi inte cængāā, ante guīñente wæcā. ³⁹ Iñinqwe mōnō Awēnē tōmengā ingante,

—Mīnitō Paditeoidi iñōmō edæ owæta tōnō podato cæncadē inō wentamō ēnencōo ee adīnque yabæque mēnongate bai cæmīni imīnipææ. Māincooque æīnente mīni wædō beyæ ayæ wīwā mīni cædō beyæ edæ mīmōno wentamō entawēmīni imīnīpā. ⁴⁰ Mīni ēñēgadē. Nē badongā iñōmō yabæque badōninqwe cæncadē inō badōnāmāi ingantawogāa. Iñæmpā mōnō baō nē badongāingā iñōmō adocā mōnō onōwocā badongacāi apa quēwēmīnii. ⁴¹ Iñinqwe mīnitō wæætē wādāni inānite ædæmō waadedīnque mīnitō māincoo pædæ godō pædæ godō cæmīni iñinqwe tōmancoo edæ ñā mēnongate bai ba adīnque mīnitō wæætē edæ ñāō bai entawencæmīnīpā.

⁴² Paditeoidi mīni wæquinque iīmāi cæmīnīpā. Māincoo diete ganca mānimpocōo ænte cō cædinque, Adocōoque Wængonguī quī impā, ante mōnō godongæimpā, ante cæmīnīpā. Mīnitō mānōmāi cædinque edæ õñabo mīni mīnte pæyabo, Oguī wāa cænguī, ante mīni tā pete æñabo incæ edæ, Wængonguī quī impā, ante pancayaboga godōmīnīpā. Māninganca cædinque mīnitō wāa cæmīni incæte wādāni inānite nō cædāmāi imīni inte Wængonguī ingante waadete pōnēnāmāi imīnīpā tōō. Iñæmpā māñinō õñabo godonguēnēmīni inte mīnitō godōmenque waadete pōnēninqwe nō cæquēnēmīni imīnīpā.

⁴³ Ayæ Paditeoidi mīni wæquinque impa. Mīnitō odömōincōnē go guiddinque nāmanque ante pōnēninque wæmompaa pōnī tæ contate tomīni awædō. Ayæ waodāni nāni godonte æimancadē godinque mīnitō nāmanque pōnēninque, Wadāni, Waa quēwēedāni, ante apænedinque mōnitō imōnite waa acædānimpa, ante mīni wæquinque edæ ānewēmīnīpa tōō.

⁴⁴ Ayæ waocā wodido ñōmæi ongō bai mīnitō iñōmō mīni wæquinque edæ wentamō entawēmīnīpa. Mānōmaī entawēmīnīpa, ante ēñēnāmaī inte wadāni edæ mīni ānō ante ēñente cædinque edæ oda cædānīpa, ante Itota pīngantapa.

⁴⁵ Īninque adocanque idægoidi nāni wææ angāinō ante nē ate ēñengā iñōmō Itota ingante apænedinque,

—Awēnē, mānōmaī āninque bitō mōnitō imōnite adobai pīinte ānewēmi awædō.

⁴⁶ Āñongante,

—Mīnitō dodāni nāni wææ angāinō ante nē adīmīni inte edæ mīni adobai wæquinque impa. Edæ, Cædāmaī cædāmaī, ante ancaa wææ āninque mīnitō iñōmō edæ māincoo teēmencoo mō paate wadāni önōnancapæ cō cædancapænāni bai cæmīnīpa tōō. Ayæ wæætē önompogonca adopogoncaque incæ gā ænancapænāmaī cæte bai cædinque mīnitō mīni wæquinque edæ, Æbānō cæte waa quēwenguīi, ante odōmonte apænedāmaī imīnīpa tōō, ante Itota apænecantapa.

⁴⁷ Ayæ godōmenque apænedinque, “Wængonguī beyæ nē apænegāināni inānite mīnitō mæmæidi incæ nē wænōnāni ingadānimpa. Mīnitō iñōmō, Nē wænongāināni nānōmoidi imōnīpa, ante bai cædinque, Wængonguī beyæ nē apænegāinānido, ante mænōnomīnīpa tōō. Mīni wæquinque edæ mānōmaī cæmīnīpa. ⁴⁸ Īninque, Mōnitō mæmæidi wænongadānimpa, ante ēñēnimōni inte tōmēnāni wodido ante mænōnomōnīpa, āninque mīnitō mæmæidi nāni cægāinō ante Ao āninque cæmīnīpa tōō,” ante Itota pīngantapa.

⁴⁹ Ayæ iīmaī ante apænecantapa. “Mānōmaī beyæ Wængonguī mōnō nē ēñengaingā ĩnongā incæ iīmaī ante apænegacāimpa. ‘Botō beyæ nē apænedāni tōnō botō nē da godōnāni inānite botō, Idægoidi weca gote apæneedāni, āmo gocædānimpa. Āmo gote pōnāni adinque idægoidi wæætē pancadāniya inānite wænōnāni wæncædānimpa. Ayæ pancadāniya inānite togænte pānāni wæcædānimpa,’ ante Wængonguī do apænegacāimpa. ⁵⁰ Īninque ñōwo quēwēmīni iñōmīnite, Quīnante wænōmīnīi, ante Wængonguī edæ mīnitō imīnīte ancæcāimpa. Wængonguī beyæ nē apænegāināni inānite tōmengā nānō badongāiñedē dodāni mā pōnī wænōnāni beyæ ayæ iīncayæ ate ñōwo ganca wænōnāni beyæ ĩninque edæ nē wænāni tōmānāni wepæ nāni nāgāinō ante, Nōwo quēwēmīni mānīnāni tōmānāni wepæ nāate bai imīnīpa. ⁵¹ Edæ tōmānāni nāni wænongāinō ante edæ ñōwomīni mīni pante wæquinque impa. Edæ mā pōnī wænōninque docā Abedo wodi ingante adocanque wænongā wængacāimpa. ĩncayæ ate Wængonguī oncō ñænæncō boyæ nāni iya tāimpaa gāānē ongōñongante Tacadiya wodi ingante wænōnāni nānō wænganca wadāni nanguī ināni inānite wænōnāni wængadānimpa. Incæte Wængonguī, Mīnitō mæmæidi nānōmoidi ingāimīni inte tōmēnāni nāni wænongāi beyænque wepæ nāate bai wentamō entawēñōmīnite botō wæætē ñōwomīni imīnīte pāmo wæcæmīnīpa, ante Wængonguī angampa,” ante Itota apænegacāimpa.

⁵² Ayæ apænedinque, “Dodāni nāni wææ angāinō ante nē adīmīni iñōmō mīnitō nē ēñenguēnēmīni inte edæ mīni wæquinque nō pōnente ēñēnāmaī imīnīpa. Ayæ wadāni, Nō pōnente ēñengāimpa, ante odemō guīte bai tæcæ cædāni adinque mīnitō odemō tee mōnete yabæ wido cæte bai cædinque tōmēnāni inānite edæ wææ cæmīnīpa tōō,” ante Itota apænegacāimpa.

⁵³ Īninque apænete tao goyongā nē odōmōnāni tōnō Paditeoidi tōmengā ingante nanguī pīinte badinque, Āmōni ēñēninque apænebi ēñēmōnīi, apænebi ēñēmōnīi, ante ancaa ānānitapa. ⁵⁴ Ayæ, Tōmengā wabānō oda cæte tedecā ĩninque mōnō wæætē pāmo wæbaingampa, ante wææ wānonte bai cægadānimpa.

12

Wadö tedete wadö nāni cædönö ante

¹ Māniñedē nanguī ināni æpodō miido ganca ināni adoyömō pō bee tē bee tē cædinque goto gongæññōnāni Itota tōmengā miñæ nē godāni inānite tāno apænedinque, “Paditeoidi iñömō wadö tedete wadö cæyōnāni mīnitō wæætē wadö nāni cædō ante, Pāo yedæ æmpoquī bai wodō wodō cæpa, ante gomō adinque tōmēnāni nāni cæinō bai cædāmaī iedāni. ² Adāmaī incædānimpā, ante quiēmē wē wodonte i incæ iincayæ ate tōmāā wi ænete bayonte edonque pōni bacæimpā. Ayæ quiēmē awēmō cæte i incæ iincayæ ate edonque pōni acædānimpā. ³ Wēmō iñömō mīni tededō incæ edæ ñāō iñömō edonque pōni ēñengæimpā. Ayæ guicōnē mīnitō wæntæ apænedō incæ iincayæ ate oncōmanca inō æi edæ ogæ tedete edonque ēñengæimpā,” ante Itota apænecantapa.

*Æcānō ingante guiñente wæquīi, ante**(Māateo 10.26-31)*

⁴ Ayæ, “Botō æmigoidi āmo ēñeedāni. Waocā baonque wænōnāni ate tōmengā ingante ædō cæte godōmenque cæquīnāni. Ininque mīnitō iñömō, Baonque wænōnāni wæncæ wæ, āninque edæ guiñēnāmaī iedāni. ⁵ Wæætē edæ, Æcānō ingante guiñente wæquēnēmīni imīni, ante botō odōmonte apænebo ēñeedāni. Waomīni imīnite wænonte ate nē angā inongā inte tadōmengadænguipo nē wido cæcā ingante iñömō mīnitō tōmengā ingante edæ guiñeedāni. Ao. Māningā ingante guiñente wæedāni,” ante Itota apænecantapa.

⁶ Ayæ, “Waodāni ayamōidi onompo æmæmpoque mānimpodāni beyæ tigitamō mentamonga ante pædæ godonte ænāni amīnitawo. Incæte ayamō adocanque ingante edæ Wængonguī cōwē wææ aacampā. ⁷ Edæ, Ayamōidi bacoo pōni ināni incæte onōnānique inānīpa, ante nē āningā inte mōnō Mæmpo iñömō mīnitō imīnite wæætē godōmenque waa acampā. Inæmpā mōnō ocaguī incæ æpoguīnō encamōō, ante Wængonguī iñömō edæ do ēñente aacā apa guiñewēmīni,” ante Itota angantapa.

*Waodāni ēñēñōnāni mōnō Itota ingante Ao angæimpā, ante**(Māateo 10.32-33, 12.32; Māadoco 10.19-20)*

⁸ Ayæ apænedinque, “Nāwangā āmopa, angantapa. Æcānō waodāni ēñēñōnāni botō imote Ao āninque, Bitō botō Awēnē inōmi imīpa, ante āna botō Waobo nē ēñagaimo inte tōmengā ingante wæætē Ao āninque, Bitō iñömō botō miñæ nē gogaīmi inōmi imīpa, ante Wængonguī anquedoidi ēñēñōnāni ancæboimpā. ⁹ Wæætē edæ waodāni ēñēñōnāni botō imote nē Baa angaingā ingante botō wæætē Wængonguī anquedoidi ēñēñōnāni tōmengā ingante edæ Baa ancæboimpā,” angantapa.

¹⁰ Āninque, “Botō Waobo ēñagaimō iñōmote waocā babæ ante wīwa angā incæte Wængonguī wæætē edæ pōnō ñimpo cæcā quēwencæcāimpā. Wæætē Wængonguī Tæiyæ Waēmō Ōnōwoca ingante godō babæ ante nē ānewengā ingante Wængonguī wæætē edæ ñimpo cædāmaī inte cōwē pancæcāimpā,” ante Itota apænecantapa.

¹¹ Ayæ, “Mīnitō imīnite bæi ongonte tōmēnāni odōmōincōnē ænte godinque gö cædāni incæte mīnitō māniñedē, Æbānō ante apænequīmoo, ante wædāmaī iedāni. Awēnēidi weca incæ nē ānāni weca incæ mīnitō imīnite ænte māo goncædāni incæte mīnitō māniñedē, Pīināni ēñente wædinque æbānō ante nāmā wææ anguīmoo, ante ayæ, Æbānō ante apænequīmoo, ante guiñente wædāmaī iedāni. ¹² Inæmpā Wængonguī Tæiyæ Waēmō Ōnōwoca māniñedē incæ, Æbānō wææ anguīi, ante odōmonte angā ēñēninque mīnitō wæætē māniñō ante wææ ancæmīnimpā,” ante Itota apænecacāimpā.

Māincoo nāni æinēmāmo ante

¹³ Tæcæ apæneyongā godongāmæ ongōnāni ongōninque adocanque Itota ingante, —Awēnē, botō wæmpo wodi mangaincoo incæ mæmpo wodi omæ ingaīmæ incæ botō mēmō ingante tæcæguedē āmi pā cæcā æmōe.

¹⁴ Āñongante Itota,

—Botō nē apænte āmo imopa diyæ āmo pā cæquingāā.

¹⁵ Äninqe godongämæ ongönäni inänite apænedinque,

—Wii mäincoo nanguï ænte beyænque mönö quëwengäimpa cæminii. Mini mäincoo æinëmämo ante edæ ñimpo cædinque ee aedäni.

¹⁶ Äninqe Itota, Wængonguï Awënë æbänö cæquingää, ante ëñencæðanimpa, ante imæca quëwënäni nani cæinö ante odömöninque iïmaï apænecantapa.

—Adocanque në nanguï ëacä inte tömengä ömæ waingui-poga nanguï pönï pæ.

¹⁷ Adinque tömengä iñömö, “Æbänö cæquimoo. Botö cænguï da wenguincö ñænencö impa diyæ da wente manguimoo.” ¹⁸ Äninqe, “Iïmaï cæcæboimpa. Guiyancö oncö bæ tate ñænencö wæætë mänoncæboimpa. Mänöninque tömëmoncoo tönö mäincoo wæætë mänincönë tömancoo da wencæboimpa. ¹⁹ Ayæ nämanque apænedinque botö, Botö cænguï tönö mäincoo nanguï wadepo ba beyæ eyepæ mänimo inte botö guëmancæboimpa. Önonque cænguï nanguï cænte nanguï bete tocæboimpa,” ²⁰ Ante nämanque pönëñongä wæætë në mäningä ingante Wængonguï, “Eñënämaï cæbipa töö. Ñowo woyowotæ incæ edæ, Idæwaa quëwëmipa, ämo wæncæbiimpa. Wæmi adinque edæ bitö mäincoo iñi edæ æcänö mäincoo baquïi,” ante Wængonguï angampa, ante Itota, Mäninqe ante apænebopa, angacäimpa. ²¹ Ayæ tömënäni inänite wæætë, “Wængonguï mänömaï angä ëñente wædinque minitö wæætë iïmaï ante pönencæminimpa. Æcänö, Tömëmoque qui, ante da da wente mäna iñömö tömengä Wængonguï ayongä në ömæpocä bai inte ömæwocä ingampa. Në ëacä wodi nänö wænö bai tömengä adobai bate wæquinö angüënë,” ante Itota apænegacäimpa.

*Tömengä wëñænäni inänite Wængonguï aacampa, ante
(Mäateo 6.25-34)*

²² Itota mäniñedë tömengä miñæ në godäni inänite, “Iinque botö minitö iminute ämopa. Inguipoga mini quëwenguimämo ante wädämaï iedäni. Quimönö impa cænguimoo, ante, Quincodö impa wëñaquimoo, ante wädämaï iedäni. ²³ Cænguinque cæninqe dicæ quëwëmongaa. Weocooque wëñadinque dicæ quëwëmongaa. Mönö quëwenguimämo iñömö godömenque impa. ²⁴ Gapatai iñömö cænguï ante dicæ minte pæ ate tä pete mänäniyaa. Incæte Wængonguï eyepæ godongä cænäni aedäni. Minitö guiquënë öömä eadäni bai inämaï iñöminite Wængonguï minitö iminute godömenque waa adinque eyepæ pönongä cæminipa. ²⁵ Wængonguï nänö anganca quëwëninque minitö nanguï cædinque wantæ iñö incæ ædö cæte godömenque quëwenguimäni. ²⁶ Mäninö wæðenque cæqui incæte wii eyepæ cæmini ininque minitö, Botö quëwenguinö ante wadö wadö cæcæboimpa, ante quinante wæminii,” ante Itota angantapa.

²⁷ Ayæ, “Ongai guiquënë weocoo ante daque daque dadämaï inte wodonte tinämaï iñönänite Wængonguï weocoo waëmoncoo bai godongä waa pönï ënopa. Awënë Tadömö wodi waëmoncoo ëgaingä incæ wii ongai bai ëñagacäimpa. Ongai iñömö godömenque waëmö pönï ënopa. ²⁸ Gaguimæ iñömö iïmö ate edæ gongapamö në tanguinque ñowoönæ pæ incæte Wængonguï waëmö pönongä ënopa. Iinque, Waëmö ënodö në pönongä inte mönö imonte godömenque eyepæ pönï pönongä ænte ëñacäimpa, ante pönëmäniyaa. ²⁹ Minitö cænguï ante bequi ante æinente wädämaï iedäni. Edæ, Æbänö cæte ænguimö, ante wädämaï iedäni. ³⁰ Inguipoga wayömö nani ëñënämaï incabo wayömö nani ëñënämaï incabo mäninö ante wæyönäni minitö guiquënë, Mönö ænguënë ante mönö Mæmpo iñömö edæ do ëñengampa, ante pönëninque guiñente wädämaï iedäni. ³¹ Wæætë Awënë Odeye nempo quëwencæte ante nanguï cæyöminite tömengä wæætë minitö ænguënë ante do edæ eyepæ pönï pönongä æncæminimpa,” ante Itota apænecantapa.

*Mönö ëaquincoo öönædë do ëamompa, ante
(Mäateo 6.19-21)*

³² Godömenque apænedinque Itota, “Botö në aabo iñömöte minitö botö miñæ mini gocabo iñömö wæðenque pönï imini incæte edæ guiñente wädämaï iedäni. Iñæmpa minitö Mæmpo iñömö, Awënë Odeye nempo quëwencæminimpa, ante pönö cædinque

waa tocampa cæmīni. ³³ Mīnitō iñōmō, Ō ænāni dæ āñōmō cayæ cænāmaī iñōmō botō mǎincoo wodāmaī inguincoo inte edæ cōwē mæ ongongæimpa, ante cædinque öñnædē iñōmō wo ææntodonte bai cædāni. Wodāmāncadedē da wente bai cædinque mīnitō mǎincoo godonte æninque ömæpodāni wæwēnāni inānite wæætē godōmīni æncædān-impā. ³⁴ Mīni waocabo iñōmō mīnitō mǎincoo ongōñōmō māniñōmō quēwencæte ante wæmīni imīnīpā, ante adinque botō, Öñnædē iñōmō wo ææntodonte bai cæte mæedāni, antabopā,” ante Itota apænecantapā.

Tömää eyepæ cædinque wänö cöedāni, ante

³⁵ Ayæ apænedinque, “Wadāni, Awēnē beyæ ante cæcæimpa, ante weocoo eyepæ wēñadinque, Gongapæncade wæmō bæcocæimpa, ante eyepæ pōni cædāni bai mīnitō adobai eyepæ pōni cædinque, Awēnē poncæcæimpa, ante wänö cöedāni. ³⁶ Edæ wadāni tömēnāni awēnē wayōmō gote ææmæ bete ocæ emænte ponte aa pecā ēñēninque quingæ wi ænecæte ante wänö cōnāni bai cædinque mīnitō adobai, Awēnē poncæcæimpa, ante wänö cöedāni. ³⁷ Edæ awēnē ponte ayongā tömengā ingante nē cædāni wänö cōnāni adinque tömengā wæætē edæ pōnō waa cæcā æninque tömēnāni iñōmō tocædānimpā. Mīnitō imīnite nāwangā āmopā. Nē wänö cōnīnāni inānite awēnē pōnō angā ate tæ contadāni ate tömengā nē awēnē inongā incæ, Nanguī cæcæimpa, ante weocoo wēñadinque tömēnāni wecā pōninque edæ pōnō cæcā æncædānimpā. ³⁸ Edæ woyowotæ tæcæ bæcā incæ ayatadāa wæicā incæ pōninque tömengā nē wänö cōnīnāni inānite waa adinque pōnō waa cæcā adinque tömēnāni iñōmō watapæ edæ tocædānimpā. ³⁹ Wæætē oncō nē ēacā guiquēnē, Nē awēmō æncæ cædongā æyedēnō ponguingāā, ante ēñēninque do wææ cæcā bai nē awēmō æncæ cædongā wæætē edæ pō guīite ænāmaī incædongāimpā, ante apænebo ēñente pōnēedāni. ⁴⁰ Mīnitō adobai, Waocā nē ēñagāingā æyedēnō ponguingāā, ante ēñēnāmaī imīni inte edæ tömānō eyepæ cædinque edæ wänö cöedāni,” ante Itota angacæimpa.

Awēnē ingante nē cæda, ante

(Māateo 24.45-51)

⁴¹ Mānōmaī angā ēñēninque Pegodo,

—Mānīnō odōmonte bitō apænedō ante mōnitō adomōnique ēñencæmōnimpā, ante apænebitawo. Wæætē edæ, Wadāni tömānāni ēñencædānimpā, ante apænebitawo.

⁴² Åñongante mōnō Awēnē wæætē odōmoncæte ante apænedinque, “Inguipoga awēnē iñōmō, Æcānō nē ēñengā inongā inte botō quincoo ante ædæmō aacā inguingāā, āninque, Mānōmaī inte cæcā ingante adinque botō āmo ate tömengā nē angā badinque botō oncōnē nē cædāni inānite ædæmō aadinque cænguī eyepæ iñonte godongā cæncædānimpā, angampā. ⁴³ Īninque awēnē wayōmō gote ponte ayongā, Nē cæcā botō ānō ante ēñente cæcampa, ante adinque awēnē wæætē tömengā ingante godō waa cæcā ate nē waa cæcā iñōmō edæ waa tocæcæimpa. ⁴⁴ Mīnitō imīnite nāwangā ante apænebopā. Nē ēñente cædingā ingante awēnē, Bitō botō mǎincoo tömancoo edæ nē aabi bacæbiimpā, ancæcæimpa.”

⁴⁵ “Incæte nē cæcā wæætē, Botō awēnē æiquedō ponguingāā, ante pōnēninque tömengā tōnō awēnē ingante nāni godongāmæ cæcabo onguīñænāni incæ onquiyænāni incæ tömēnāni inānite tæi tæi pāninque cænguī nanguī cæninque tī nāmæ nanguī bete quidi quidi dowænte bacā. ⁴⁶ Īninque tömengā, Æöñædō ponguingāā, ante wædāmaī iñongante, Æyedēnō ponguingāā, ante ēñēnāmaī iñongante edæ awēnē iñontobæ pongā wæbaingampā. Ponte adinque awēnē wæætē māningā nē ēñēnāmaī cædingā ingante wido wido todinque nē pōnēnāmaī ināni wecā māo wido cæbaingampā,” ante Itota apænecantapā.

⁴⁷ Ayæ, “Awēnē ingante nē cæcā incæ awēnē nānō ānō ante önōmoncaque ēñēninque wīi eyepæ cædinque ēñēnāmaī cæcā ĩninque awēnē iñōmō tömengā ingante nanguī tæi tæi pancæcæimpa. ⁴⁸ Ayæ wæætē edæ, Awēnē æbānō angāā, ante ēñēnāmaī inte ēmoncāā guiquēnē tömengā nānō panguinque wēnæ wēnæ cæcā incæte tömengā

ingante wædænque tæi tæi pancæcäimpa, ante Itota apænecäimpa. Edæ awënë æcänö nempo nangui pönongä ænte næængä iñömö tömengä ingante Awënë wæætë, Bitö adodö nangui pönömi æmoe, ancæcäimpa. Ayæ, Botö mäincoo nangui ongoncoo iñonte bitö aacæbiimpa, ante æcänö ingante awënë angää tömengä ingante, Bitö godömenque nangui cæcæbiimpa, ante awënë ancæcäimpa,” ante odömöninque Itota apænecäimpa.

*Näwæ gocædänimpa, ante cæcæte ante pömopa, angampa
(Mäateo 10.34-36)*

⁴⁹ Äninqe Itota godömenque apænedinque, “Botö inguipoga gonga bai tänoncæte ante pongäimo inte edæ, Do tänoncæte bai edæ waa tocædömoimpa. ⁵⁰ Ayæ botö nantate wæwencæte ante pongäimo inte botö nantate wæganca nantate botö wæquënënte ante iinqe cæcæte ante wæbopa. ⁵¹ Minitö, Inguipoga quëwënëni piyænë cæte wæætëdö wæætë cædämaï inte quëwencædänimpa, ante cæcæte ante Itota pongaingä ingampa, ante pönëminitawo. Iñæmpa wadö ämo ëñëdäni. Botö inguipoga pömo beyænque wæætëdö wæætë piincædänimpa. ⁵² Iñcayæ ate önompo æmæmpoque näni owocabo mänimpodäni iñönänite mengäa go adocanque inäni iñömö botö beyænque mënaa inate näëmæ piinte bacædänimpa. Ayæ wæætë mënaa ina incæ mengäa go adocanque inäni inänite wæætë näëmæ piinte bacædaimpa. ⁵³ Botö ëmowo beyæ mæmpocä tömengä wengä onguiñængä ingante näëmæ piinte bacæcäimpa. Wëñængä wæætë mæmpocä ingante näëmæ piinte bacæcäimpa. Wäänä tömëna wengä onquiyængä ingante wæætë näëmæ piinte bacædäimpa. Wæætë wäänä ingante wëñængä incæ näëmæ piinte bacæcäimpa. Biyongä ingante nänö wæntedä incæ näëmæ piinte bacædäimpa. Nänö wæntedä inante biyongä ingante näëmæ wæætë piinte bacæcäimpa,” ante Itota tömengä miñæ në godäni inänite apænecäimpa.

*Æbänö oo baquimpa, ante ëñengäimpa, ante
(Mäateo 16.1-4, 8.11-13)*

⁵⁴ Ayæ godongämæ ongönäni inänite apænedinque, “Nænque guidö gämënë boguimä wentamö pö adinque minitö, Cöönæ wentamö wocæmpa, äñömini edæ do cæpa. ⁵⁵ Ayæ wæætë woboyæ betamonca inö pämmæ pö adinque, Ocoi näwanca cæpa, ante tedeyömini dobæ ocoi näwampa. ⁵⁶ Inguipoga gomö adinque öönädë æmö adinque minitö, Æbänö cæcæte ante ëmöö, ante edæ do ëñëminipa. Wæætë, Inguipoga wayömö wayömö æbänö cædäni, ante adinque minitö, Wængongui oo pöní cæquingänö angüënë, ante quinänte wii ëñëminii. Edæ wadö tedete wadö cæmini iminipa töö,” ante Itota tömënëni inänite piingacäimpa.

*Në piingä ingante waadete apænecäimpa, ante
(Mäateo 5.25-26)*

⁵⁷ Ayæ edæ, “Æbänö cæte nö cæquiï, ante minitö tömëminique apænte ante cæquënëmini iminipa. ⁵⁸ Në piinte angä iñömö bitö imite edæ, Wiwa cæbipa, ante awënë weca ænte mäocä idömæ godinque bitö guiquënë tömengä ingante waadete apænebi ëñëninque tömengä wæætë piyænë cædinque ee abaingampa. Wæætë edæ wii waadete apænebi ininque tömengä në apænte angä weca godömenque ænte gobaingampa. Në apænte angä wæætë bitö imite wææ wänongä ingante pædæ godongä æninqe wææ wänongä wæætë tee mönebaingampa. ⁵⁹ Tee mönecä ininque bitö quiëmë beyæ debe imi ininque edæ tömanta pöní di godonte ate tabaimipa, ante ämo ëñëmaimipa,” ante Itota apænecäimpa.

13

Ocæ ëmænte Wængongui gämënë ponguënëmini iminipa

¹ Mäniñedë wadäni Itota weca pöninque iimaï ante apænedäni ëñengantapa. Gadide-abæ quëwënëni, Wængongui qui, ante cæningä ingante tæcæ wænönönänite Pidato guiquënë tömënëni inänite iñontobæ wænöninque tömënëni wepæ cæningä wepæ

tönö dibæ cæcantapa. ² Ante tedeyönäni Itota wæætë, “Gadideabæ quëwënäni wadäni pönömenque wënæ wënæ cædäni iñönäni mänimpodänique godömenque wënæ wënæ cædäni inte mänömaï wänänipa, ante mīnitō pönēmīni awædō. Iñæmpa Gadideabæ quëwënäni tōmänäni adobaï wënæ wënæ cædäni iñönäni mäninänique edæ wänänipa. ³ Wīi mänömaï impa, ämo ëñëmaïmīnīpa. Tömēnāni wīi godömenque wënæ wënæ cædīnāni inte wänänitapa. Mīnitō guiquēnë wënæ wënæ mīni cædīnō ante wæwente pönēnīnque ñimpo cædāmaï imīni inīnque mīnitō tōmāmīni adobaï wæmaïmīnīpa,” ängantapa.

⁴ “Ayæ Eedotadëë iñömō tōmēnāni nāni gomō aquincō Tidoeë nāni änoncō tæ wææñonte waodäni dietiocho ganca ināni capo wänāni inīnque mīnitō, Tömēnāni godömenque wënæ wënæ cædäni inte wänänipa, ante pönēmīni awædō. Iñæmpa Eedotadëë quëwënäni tōmänäni adobaï wënæ wënæ cædäni iñönäni mänimpodänique edæ wänänipa. ⁵ Wīi mīnitō pönēnō baï impa, ämo ëñëmaïmīnīpa. Tömēnāni wīi godömenque wënæ wënæ cædīnāni inte wänänitapa. Mīnitō guiquēnë wënæ wënæ mīni cædīnō ante wæwente pönēnīnque ñimpo cædāmaï imīni inīnque mīnitō tōmāmīni adobaï wæmaïmīnīpa,” ante Itota apænecantapa.

Iigowæ ömæca ongompa, ante odömōnte apænecampa

⁶ Ayæ Itota, Wængonguï Awënë æbänō cæcää, ante ëñencædänīmpa, ante imæca quëwënäni nāni cæinō ante odömōnīnque iïmaï apænecantapa. “Waocä tōmencodë iigowæ minte pæ ate tōmenca ante ponte ayongä edæ dæ ömæcawæ ongompa. ⁷ Ate wædinque tōmengä ocä ëmænte godīnque tōmencawæncō nē aacä ingante apænedīnque, ‘Edæ mæa go adoque wadepo tōmenca ante gote ayōmo edæ mäniï iigowæ cōwë ömæcawæ önonque wææ ongompa cæbii. Ömæcawæ wææ ongōwæ adīnque wido tate æmæwo wido cæe.’ ⁸ Äñongä tōmencawæncō nē aacä wæætë, ‘Awënë, ee ongöe. Botō iigowæ önōwa gäänë ææ wodinque māmō wagada goi ænte wempo cædente tee moncabo ate wadepo ate bitō ongōñōmi edæ, ⁹ do incabaimpa. Wæætë wadepo ate ayōmite ömæcawæ ate wædinque edæ æmæwo wido tate wido cæbaimīpa,’ ante nē cæcä angampa.” Mänīnque ante odömōnte apænebopa, ante Itota apænecäimpa.

Itota bocæ bocæ wædingä ingante cæcä ate waa bacampa

¹⁰ Guëmanguïönæ iñonte Itota oodeoidi odömōincönë go guidīnque odömōnte apænecantapa. ¹¹ Onquiyængä mäniñömō ongongä iñömō tōmengä dietiocho wadepo iñonte wënæ guicä ate bocæ bocæ wæwëningä inte ædō cæte adiyæ ængæ gantiquingää. ¹² Tōmengä ingante adīnque Itota aa pecä pongä ate,

—Onquiyæmi, bitō bocæ bocæ wædō ante ñōwo botō ñīmæncæpote baï cæbo ate bitō waa babīpa.

¹³ Änīnque tōmengä ingante gampocä ate ñīmæncæpote baï badīnque onquiyængä iñömō adiyæ gantidīnque wæætë, Wængonguï bitō ñäö baï ëmōmi inte waa pōnī pönō cæbi æmopa, ante watapæ apænecantapa. ¹⁴ Guëmanguïönæ iñonte Itota mänömaï cæcä waa bacä adīnque tōmēnāni odömōincō awënë guiquēnë pīinte badīnque godongämæ ongönāni inānite,

—Quīmæ quëwēmīnīi. Önompo æmæmpoque go adoönæque mönō cæönæ iñonte mīnitō waa bacæte ante ponguënēmīni imīnīpa. Guëmanguïönæ iñonte edæ cædāmaï inguënë quëwēmīnīi.

¹⁵ Ante pīiñongante mönō Awënë wæætë,

—Mīnitō wadō tedete nē wadō cædōmīni inte ëñëedāni. Mīnitō cæningä iñömō wagada incæ bodo incæ gue ænente wæyongante mīnitō guëmanguïönæ i incæte cōwë ñī cæyænte æpæ wedeca ænte mäo gönōmīni gongænte becampa. ¹⁶ Wæætë mäningä onquiyængä iñömō Abadäö wodi pæingä iñongante Tatāna dietiocho wadepo iñonte goti winte baï cæcä wædingä iñongante mīnitō iñæmpa guëmanguïönæ i beyænque edæ, Tōmengä ñīmæncæpodāmaï incæcäimpa, ante quīnante wææ ämīnīi.

¹⁷ Angä eñente wædinqe nē pīinte änāni guingo imonte wæyönāni godongāmæ ongönāni guiquēnē, Bamönengæ pōnī Itota waa pōnī cæcampa, ante adinqe nanguī togadānimpa.

Möotatamö guidimö ante odömonte apænecampa
(Mäateo 13.31-32; Mäadoco 4.30-32)

¹⁸ İninqe Itota tömēnāni İnānite, “Wængonguī Awēnē Odeye nempo nāni quēwēncabo İñömö quīnō baī İnānī. Edæ, Æbānō nanguī yebænte badānī, ante botō inguipoga quīnō pæte yebænte baī İ adinqe, Mānīnāni adobaī yebænānīpa, ante eñenguī. ¹⁹ İmaī impa. Waocā möotatamö tömēmö ænte māo tömēmoncodē quiyacā bocate pæ İninqe ñænæñeque bayonte ayamōidi pōninqe awænēmæ ongönānīpa. Möotatamö guidimö incæ mānōmaī pæ baī Wængonguī Awēnē nempo quēwēnāni İñömö wædænque İnīnāni incæ nanguī yebænguīnāni İnānīpa,” ante Itota odömonte apænecāimpa.

Päo yedæ æmpoquī da wenguī ante odömonte apænecampa
(Mäateo 13.33)

²⁰ Itota ayæ angantapa. “Wængonguī Awēnē İñömö tömengä nempo quēwēnāni İnānite æbānō cæcāā, ante odömoncæte ante botō, İmaī cæcampa, ante odömonte apænebo eñenguīmīnī. ²¹ Edæ İmaī impa. Onquiyængä ñænængade tee manguincade ænte tee māninqe ædīna nāni ämō ænte mempoga go adopoque da wēninqe ayæ, Päo yedæ æmpocæimpa, ante adoyömö pōnō da wēninqe wempo wempo ædæmō cædengä ate päömo yedæ æmpote tömäo nāāmænta bapa. Yedæ æmpote ate päömo tömäo nāāmænta ba baī öönædē Awēnē nempo mīni quēwēncabo İñömö tömāmīni nō eñente bamīnīpa,” ante Itota odömonte apænecantapa.

Odemö guiyānemö, ante
(Mäateo 7.13-14, 21-23)

²² Itota māniñedē Eedotadē taadö godinqe nanguī nāni quēwēñömö wodo pænta godinqe wædænque nāni quēwēñömö wodo pænta godinqe wayömö wayömö gote odömonte apænecāimpa. ²³ Goyongante adocanque,

—Awēnē, bitō æmi beyænque nē quēwenguīnāni İñömö wædænque İnānīpa, ämitawo. Äñongante Itota,

²⁴ —Odemö guiyānemö guicæte ante edæ nanguī cæedāni. Edæ nanguī İnāni incæ guicæte ante cædinqe guidāmaī incædānimpa, ämo eñēmaīmīnīpa. ²⁵ İmaī impa. Oncö nē äcā ængæ gantidinqe odemö tee mönecā adinqe mīnitö İñömö tömengä oncö boyæ gote ongöninqe aa pedinqe, “Awēnē, wi ænebi guiquīmönī.” Ante wæyöminite tömengä, “Æmīnidö İmīnī, ante ayæ, Ædönö gāmænö quēwente pömīni İmīnī, ante botō adāmaī İmopa,” ancæcāimpa. ²⁶ Angä eñēninqe mīnitö wæætē, “İñæmpa mönitö bitö tönö godongāmæ cænte becongāmönīpa. Ayæ bitö mönitö taadö ponte cægöninqe odömonte apænebi eñengamöni ae,” ancæmīnīpa. ²⁷ Äñöminī tömengä İñömö, “Æmīnidö İmīnī, ante, Ædönö gāmænö pömīni İmīnī, ante botō eñēnāmaī İmopa. Edæ do antabopa. Nöwo nē wīwa cægāimīni inte edæ botö weca ongönāmaī. Edæ wadæ goedāni, ämopa,” ancæcāimpa, ante Itota apænecantapa.

²⁸ “İninqe mīnitö gomö ayöminī Wængonguī beyæ nē apænecānāni tönö dodāni Abadäo wodi Itæca wodi Aacobo wodi tönö tömānāni Wængonguī Awēnē Odeye ömæ godongāmæ ongöñönāni mīnitö İmīnīte edæ yabæque wido cæcā ate wædinqe mīnitö wæætē guingo imonte pīinte wædinqe edæ Ca ca wæcæmīnīpa. ²⁹ Wadāni wæætē edæ nænque tamönö pönāni tönö nænque guidö pönāni ayæ betamonca ämatæ ämatæ pönāni tönö Wængonguī Awēnē Odeye oncönē ponte tæ contadinqe ææmæ bete cængoncædānimpa. ³⁰ İninqe ayæ ate eñēnāni incæ pancadāniya yæcado ongönāni bate toyönāni mīnitö guiquēnē do eñēnimīni inte yæcado ongöminī incæte pancamīniya wæætē yæmīñæ gote ongonte wæcæmīnīpa,” ante Itota apænecāimpa.

Eedotadëë quëwënäni beyä ante Itota wæcampa
(Mäateo 23.37-39)

³¹ Mäniñedë Paditeoidi pancadäniya tömengä weca pöningue,
—Awënë Edode bitö imite wænoncæ angantaye. Bitö ongönämaï wayömö wadæ goe.

³² Änäni ëñëningue Itota,
—Edode congäñe bai babæ cædongä iñongante mïnitö tömengä weca godinque, Itota iïmaï angampa, ante apænemïni ëñengädäni. “Edode ëñëmi. Botö ñöwoönæque baönæque wënæidi inänite iinque wido cædinque iinque godö cæbo waa badäni ate iñabæ guingä iñonte botö edæ mäniñedë edæ idæwaa cægaïmo bacæboimpa, ante Itota apænecampa,” ante apænemïni ëñengädäni, ämopa. ³³ Incæte botö ñöwoönæ godinque baönæ godömenque godinque edæ waönæ godömenque botö goquënënö godinque Eedotadëë gocæboimpa. Edæ Wængonguï beyä nê apænegainäni incæ Eedotadëë iñömö tömënäni nani wængaiñömö iñonte botö Wængonguï beyä nê apænebo adobo inömo inte edæ ædö cæte wayömö ongonte wænguïmoo.

³⁴ Ante apænedinque Itota Eedotadëë iñömö quëwënäni beyä ante pönente wædinque, “Eedotadëë quëwëmïni ëñëedäni, angantapa. Wængonguï beyä nê apænedäni inänite mïni wængaincabo inte ayä Wængonguï nänö da pönönäni inänite dicaca tacamïni iñöminite botö iñömö mïnitö iminute waadete pönö cæinente nanguï wæbopa. Tawadiya wæmönä iñömö, Botö wënäni, ante gompodinque tæcæënëmæ wëä pönö ö änä bai botö adobai, Botö wënäni pöedäni, ante æpogadö äñömote mïnitö, Wïi pöinente awædö, ante Baa ämïni wætabopa. ³⁵ Nöwo iñömö mïnitö onconcoo edæ önonconcooque baconcoo tamëñedäni. Nöwo edæ botö dæ äñömo mïnitö, ‘Awënë Wængonguï ëmöwo beyænque pöningue bitö toquinque edæ waa cæcæbiimpa,’ ante mïni anguinganca mïnitö edæ botö imote adämaï incæmïnimpa ante ämo ëñëedäni,” ante Itota apænecacäimpa.

14

Æpæ ëñate nê wædongä ingante Itota cæcä waa bacä

¹ Itota guëmanguïönæ iñonte Paditeoidi awënë oncönë cæncæte ante go guiyongante godongämæ ponte ongönäni guiquënë, Itota æbänö cæquingää, ante waa agönänitapa. ² Tömengä weca adocanque æpæ ëñate nê wædongä inte a ongongä. ³ Adinque idægoidi nani wææ angainö ante nê ate ëñënäni tönö Paditeoidi inänite apænedinque Itota iïmaï angantapa.

—Wængonguï æbänö ante wææ angacäi. Waa bacädänimpa, ante guëmanguïönæ iñonte mönö waa cæquënëmö imöö, ante pönëmïni. Wæætë edæ, Guëmanguïönæ iñonte cædämaï inguënëmö imöö, ante pönëmïni.

⁴ Äñongä edæ pæ wëenedänitapa. Itota iñömö edæ nê æpæ ëñate wædongä ingante gampocä waa bacantapa. Ayä, Goe, angä gocantapa. ⁵ Angä gocä ate Itota wæætë tömënäni inänite iïmaï angantapa.

—Mïnitö waocabo iñöminite adocanque tömengä wëñængä onguïñængä incæ tömengä wagada onguïñængä incæ æpæ ante nani æä wodiñömö goyæ guicä iinque mæmpocä iñömö guëmanguïönæ iñonte edæ dicæ töö tadönämaï inguingää. Mänömaï goyæ guicä wædinque mïnitö tömämïni guëmanguïönæ i incæte do gote näwæ gongænique edæ quingæ töö tadömaïminipa.

⁶ Ante Itota äñongante tömënäni ædö cæte wæætë anguïnänii. Edæ pæ wëenedänitapa.

Monguïmäno ante awënë beyä gote nê wente cænäni, ante

⁷ Ayä Paditeo awënë nänö nê äñëdinäni pöningue nämanque ante pönëningue, Yæcado ongöñömote botö imote waa acädänimpa, ante cædinque waa pönï tæ contai iñömö tæ contadäni Itota acantapa. Iinque tömengä, Wængonguï Awënë nempo quëwëningue æbänö cæquiï, ante ëñencädänimpa, ante imæca quëwënäni nani cæinö ante odömöninque iïmaï apænecantapa.

⁸ —Bitö ïmite, Monguïmäno pö bee, ante në wente ængä ëñëninque bitö pöningue yæcado inö waëmö iñömö tæ contadämaï incæbiimpa. Ìñæmpa wacä tömengä nänö në waadecä pongä ïninque ⁹ minatö ïminate në wente ængä iñömö bitö weca pöningue, “Bitö gä goyömi botö në waadecä wæætë tæ contaquingä,” ante ämaingampa. Ìninque bitö gä godinque wii waëmö iñömö wæætë tæ contadinque guingo imonte wæbäïmpa. ¹⁰ Wæætë në wente ængä ëñëninque bitö monguïmäno pöningue yæmiñæ pöni wënæ wënæ iñömö tæ contae. Edæ në wente ængä ponte ayongä bitö wënæ wënæ iñömö tæ contabi adinque tömengä wæætë bitö ïmite, “Botö në waadebi inömi inte bitö ñöwo yæcado pöni pö tæ contae, ämopa,” ämaingampa. Mänömaï angä ëñëninque godongämæ cæ cönäni iñömö, Në ëacä nänö në waadebi bitö ïmi amönipa, ante bitö ïmite waa abaïnänipa. ¹¹ Edæ, Botö nämä në waa cæbo inömo inte edæ yæcado ongonguënemo ïmopa, ante në cæcä iñömö tömengä iñömö wææntodonte bai guingo imonte wæcæcäïmpa. Wæætë edæ, Botö önömoque ïmopa, ante yæmiñæ në ongongä iñömö tömengä guiquënë ængö cæte tocæcäïmpa, ante Itota apænecantapa.

¹² Tömënäni inänite iinque apænedinque në wente æningä ingante Itota godömenque angantapa.

—Bitö, Pö cæe, ante æämænoca wente æninque bitö æmigoidi inänite wente ænämaï ïe. Bitö tönïñadäni inänite wente ænämaï ïe. Bitö guidënanäni inänite wente ænämaï ïe. Eyequeï owote mäincoo në ëadäni inänite wente ænämaï ïe. Edæ bitö tömënäni inänite wente æmi ïninque tömënäni wæætë bitö ïmite wente æmäinänipa, ante wææ cædinque bitö iñömö, Botö godönö wæætë eyepæ pönönäni mäninque æninque öönädë wæætë ænämaï ïmaïmopa, ante wædinque edæ tömënäni inänite wente ænämaï ïe. ¹³ Wæætë æämænno ante wente æninque ömæpodäni inte wæwënäni inänite cömante wæwënäni inänite bee ñante wæwënäni inänite babetamönäni inänite wente æe. ¹⁴ Mäninäni inänite wente æninque edæ bitö toquinque ingæïmpa. Tömënäni wæætë ædö cæte adopo pönönäni ænguïmii. Edæ në nö cædäni nänä ñäni ömæmonguïönæ iinque bayonte edæ mönö Mæmpo Wængonguï incæ bitö ïmite adopo pönongä æncæbiimpa, ante Itota apænecäïmpa.

Æämæ ante Itota odömoncæte ante apænecampa
(Mäateo 22.1-10)

¹⁵ Angä ëñëninque Itota tönö në cængongä adocanque tömengä ingante apænecantapa.

—Wængonguï Awënë Odeye pongä ate tömengä tönö godongämæ në cængä iñömö edæ tömengä nänö watapæ toquinque cænguingä.

¹⁶ Apænecä ëñëninque Itota wæætë tömengä ingante odömoncæte ante apænecantapa.

—Waocä æämænno ante cædinque nanguï inäni inänite mäo apænedinque, Ìncayæ ate ämo ate pö bete cæedäni, ante cæcantapa. ¹⁷ Æämænno beyedë iinque bayonte tömengä ingante në cæcä ingante äninque, “Ïionæ æämænno iinque cætïmpa. Pöedäni,” ante bitö tæ tæ wente ænte pöe, ante da godongä. ¹⁸ Godinque wente ængä ëñëninque do nänö në äñedänäni wæætë, Ædö cæte ponguïmönii, ante tömänäni adoyömö wædänipa. Tānocä iñömö, “Botö ömæ ante tæcæ godonte æninque botö acæ goquïmo inte botö æämæ becæ godämaï ïmopa. Incæte në wente æningä weca adodö gote bitö botö beyæ apænebi ëñëninque tömengä wæætë botö ïmote pïinämaï incæcäïmpa,” angampa. ¹⁹ Wacä guiquënë, “Wagada onguïñæna nana goti wimencacaya nana goti wimencacaya önompo æmæmpoque ganca mänimpodäni inäni inänite godonte ænimo inte botö, Æbänö cædänii, ante acæ gocæ cæbopa. Ìninque botö æämæ becæ pönämaï ïmo incæte awënë ingante ämi botö ïmote pïinämaï incæcäïmpa,” angampa. ²⁰ Wacä guiquënë, “Botö tæcæ mönimo inte ædö cæte ponguïmo,” angä. ²¹ Æñëninque në cæcä iñömö awënë weca adodö pöningue tömënäni nänä cædönö ante tömäa apænecä ëñente wædinque në ëacä iñömö ænguï badinque tömengä ingante në cæcä ingante, “Bitö mönö quëwëñömö wacä taadö wacä taadö ñænænö incæ guiyänö incæ tömäo gote

adinque nē ömæpodäni inänite, nē cömäinäni inänite, nē biyaate inäni inänite, nē babetamönäni inänite adinque ænte pöe.”²² Angä ëñente cædinque nē cæcä wæætë awënë ingante, “Awënë, bitö äninö ante do cæbo incæte bitö oncö wii eyede impa.”²³ Ante apænecä ëñente wædinque awënë wæætë, “Önömæca iñömö ñænänö incæ guiyänö incæ gote diqui diqui minte wadäni inänite ate ämi pönäni ininque botö oncö eyede ponte cæncædänimpa.”²⁴ Edæ bitö imite ämopa, Wëenëñedë botö wente æninäni incæ bedämaï incædänimpa,” ante nē äcä angampa. Mäninque ante apænebopa, ante Itota apænegacäimpa.

*Itota miñä gocæte ante æbänö cæquiï, ante
(Mäateo 10.37-38)*

²⁵ Itota tönö nanguï inäni godongämæ godänitapa. Tömënäni inänite apænecæte ante tömengä dadi ëmænte adinque apænecantapa.

²⁶ “Minitö iñömö, Itota gämænö ponguïmo, ämïnitawo. Iñæmpa botö weca pöninque waocä mæmpo tönö wäänä inate ante wädämaï incæcäimpa. Tömengä nänöögängä ingante ante wädämaï inte tömengä wëñænäni tönö tömengä nänö tönïñadäni inänite ante wädämaï incæcäimpa. Mänimpodäni inänite pïinte bai pönëninque tömengä, Nāmanque ante quëwencæboimpa, ante wädämaï inte pïinte bai pönëninque botö imote wæætë godömenque nanguï waadete pönenguëngä ingampa. Mänömaï ante pönënäni iñömö tömënänique edæ botö miñä nē godäni badänipa.”²⁷ Ayæ botö miñä poncæ cædinque waocä, Awæ botö wænguïwæ, ante næænte ponte bai cædinque, Wænönäni wæmo incæte Itota miñä cöwë gocæboimpa, ante poncæcäimpa. Mänömaïnö ante wii cæcä iñömö tömengä iñömö edæ botö nē ëmiñängä ædö cæte baquingäa.”²⁸ Æi gomö aquincö mænoncæ cædinque bitö, Æpodö godonte æninque iinque mænonguïmo. Botö eyepæ mantawo, ante täno pönënämaï inte edæ ædö cæte mænonguïmii.”²⁹ Täno pönëë cönämaï imi ininque bitö ongonto ontowæ do näne ñongæninque godömenque ænguï ante ömæpobi badinque iinque edæ mænönämaï imaimipa. Ayæ edæ mænönämaï imi adinque godongämæ ongönäni wæætë,”³⁰ ‘Æ bitö mænoncæ cædïmi incæ iinque mænönämaï imipa töö,’ ante badete tobainäni,” angantapa.

³¹ Ayæ, “Imæca awënë wabæca awënë ingante guëadö guëa pïinte cæcæte ante cædinque ædö cæte täno pönënämaï inte cæquingäa. Iïmaï pönente cæquëngä ingampa. Botö tontadoidi guiquënë diete müido ganca iñönänite wabæca awënë tömengä tontadoidi guiquënë bæinte müido ganca inäni awædö. Tömengä tontadoidi nanguï inäni tönö pïincæte ante pönongante botö æbänö cæte edæ wææ cæquïmo, ante täno pönëë conguënë ingampa.”³² Ayæ, Botö iñömö täi pïñæmo imopa diyæ tömënäni inänite wido cæquïmo, ante pönengä ininque tömengä edæ wabæca awënë gobæ ongönongante mäo wææ anguëngä ingampa. Edæ, Botö æbänö cæbo ate bitö wæætë piyänë cæte ee ate gobi quëwëmo, ante wææ anguëngä ingampa.”³³ Mini cabo adobai iminipa. Mäincooque impa, ante godonte bai cædinque mïnitö tömancoo ëmö cædinque tömänäni inänite ëmö cædinque botö miñä poncæminipa. Iñæmpa ëmö cædämaï imïni ininque mïnitö botö nē ëmiñämïni ædö cæte baquïminii,” ante Itota angacäimpa.

*Cati incæ nongä bapa, ante
(Mäateo 5.13; Mäadoco 9.50)*

³⁴ Ayæ apænedinque Itota, “Cati quïmonte cæi iñömö waëme inte gæpæ ëmopa, angacäimpa. Incæte nongæmonte ba adinque mïnitö wæætë æbänö nö cæmïni wæætë gæpæ ëmonguïi.”³⁵ Iñæmpa gönea inguipoga cati wäne cædäni ininque tömëmö cati beyæ pædämaï ingäimpa. Ayæ wagada goi tönö wempodente wäne cædäni ininque tömëmö cati beyæ pædämaï ingäimpa. Ininque edæ cati nongæ ba ate wido cædänipa. Mänömaï apænebo ëñëninque ëamonca ongonte ëñëedäni,” ante Itota apænegacäimpa.

15

*Cæningā wē womōnimpa, ante odōmōninque apænenecampa
(Māateo 18.10-14)*

¹ Odōmāno awēnē beyæ nē ænāni tōnō Wængonguī ingante ēñēnāmaī inte nē cædāni tōnō tōmānāni Itota apænenecā ēñencæte ante godongāmæ pōnāni inōnānimpa.

² Adinque Paditeoidi tōnō nē odōmōnāni guiquēnē Itota ingante ante pīiniquē,
—īngā iñōmō, Pōedāni, āninque nē ēñēnāmaī cædāni tōnō cæ congā awædō.

³ Ante pīinte tededāni wædinque Itota, Wængonguī Awēnē nempo quēwēninque æbānō cæquīī, ante ēñencædānimpa, ante īmæca quēwēnāni nāni cæinō ante odōmōninque īmaī apænenecantapa. ⁴ “Mīnitō iñæmpa. Mīni waocabo iñōmīnite adobi iñōmō bitō obegaidi tiēē ganca ēabi iñōmi obega adocanque incæ wē womonte edæ dæ bacā īninque bitō iñōmō æbānō cæbaīmii. Edæ nōobenta i nōebe īnāni ayæ ongoncoo īnānite yabæque emō cæte godinque onōmæca gote wē womōningā ingante bitō ædō cæte diqui diqui mīnāmaī imii. Bitō aganca cōwē edæ diqui diqui mīmaīmipa. ⁵ Ayæ diqui diqui minte ēadente ate, Nōwo ēadēmopa, ante todinque onōnancapæ wo ææntodōninque, ⁶ oncōnē mongænte pōninque bitō guidēnāni tōnō bitō æmigoidi tōnō āñete pōnāni ate, ‘Badogaa, botō wē womō wædō dobæ ēadente ī abopa. Edæ mōnō watapæ toquinque impa,’ ante nē ēabi iñōmō āmaīmipa. ⁷ Ōōnædē quēwēnāni iñōmō adobaī cædānipa, ante apænebo ēñēdāni. Waodāni nōobenta i nōebe ganca īnāni nē nō cædōnāni inte wē womōnāmaī inte ayæ ongōnāni adinque ōōnædē quēwēnāni wædænque todānipa. Wæætē waocā adocanque incæ nē womōningā iñōmō tōmengā edæ wēnæ wēnæ nānō cædinō ante wæwente pōnēninque nīmpo cæte pongā adinque ōōnædē quēwēnāni iñōmō godōmenque watapæ todānipa,” ante Itota apænegacāimpa.

Onquiyængā tiguitamō nānō wē wodōnintamō ante

⁸ Godōmenque apænedinque Itota odōmongantapa. “Ayæ wæætē onquiyængā tiguitamō diete ganca māñongā adotamonque wē wodonte ba adinque, Nāō gongængæimpa, ante tica wodōnodinque tōmengā oncō tōmāo wadæ nēmæ wadæ nēmæ cæte diqui diqui minte ængampa. ⁹ Do æninque tōmengā guidēnāni tōnō tōmengā æmigoidi tōnō āñete pōñōnānite, ‘Botō wē womontamō wædō dobæ ēadente abopa. Mōnō edæ watapæ toquinque impa,’ angampa. ¹⁰ Īninque mīnitō īmīnite apænebopa. Adocanque incæ wēnæ wēnæ nānō cædinō wæwente pōnēninque nīmpo cædinque pongā adinque Wængonguī anquedoidi incæ watapæ todānipa,” ante Itota apænegacāimpa.

Māincoo nē ēwengā ingante mæmpocā waadete pōnō cæcā

¹¹ Ayæ godōmenque apænedinque Itota, “Mæmpocā tōmengā wēñæna mēnaa iñōnate, ¹² ayæmengā iñōmō wæmpocā ingante apænedinque, ‘Mæmpo, bitō ēacoo incæ æmæncōoque pā cæte botō ænguēnecōoque pōnōmi æmoe.’ Angā Ao āninque wæmpocā pā cædinque wacā ingā pædæ wacā ingā pædæ godongā æna. ¹³ Ate wantæ ate ayæmengā iñōmō ænte næænte wabæca godinque quingāmē bai ōnonque towente quēwēninque wæmpocā nānō pōnōnincoo incæ eye cæpote ba. ¹⁴ Ate māniōmæ cænguī dæ ba ate nāni gæwænte wæpāmo pō īninque tōmengā māincoo ænguēnengā inte wæwengā. ¹⁵ Īninque tōmengā māniñōmō quēwengā weca gote āninque, Bitō imi nē cæbo bacæboimpa, āñongante Ao āninque, Botō ōmæ odæ wængānāidi nāni cæmancadē gote nē aabi bacæbiimpa, ante da godongā. ¹⁶ Gote aadinque tōmengā gue ænente ōmædengā inte odæ wængānāidi nāni cæntapodē incæ cæinente wæyongante cænguī dicæ pōnōnāniyaa.”

¹⁷ “Ante wædinque tōmengā nāmanque pōnēē cōninque, ‘Iñæmpa botō wæmpo ingante nē cædāni iñōmō onōnāninque incæ eyepæ pōni cæñōnāni botō iñōmō edæ gæwænte wænguī wæ. ¹⁸ Botō mæmpo weca edæ wadæ gocæboimpa. Gote pōninque botō tōmengā ingante, Mæmpo ēñēmi. Ōōnædē quēwengā ingante botō godō ēñēnāmaī cædinque bitō ayōmite pōnō wēnæ wēnæ cæbo iñōmote, ¹⁹ bitō nōwo edæ, Botō

wëmi, ante ædö cæte anguimii. Wæætë edæ, Bitö botö imote, Në cæbi bae, ämi ate botö bitö imite në cæbo bacæboimpa, ancæboimpa.’ ²⁰ Ante pönëninge wadæ godingue wæmpocä weca gocantapa,” ante apænedingue Itota godömenque odömonte apænecantapa.

“Ayæmengä mänömaï gote gobæ pöni dibæ pöñongante wæmpocä iñömö gomö adingue iñontobæ pönö waadete wæcampa. Pogodo pöni godingue tömengä wengä ingante waa waadedingue bæi ongonte queë bemongampa. ²¹ Tömengä wengä iñömö, ‘Mæmpo ëñëmi. Öönædë në quëwengä ingante botö godö ëñënamäi cædinque bitö ayömite pönö wënæ wënæ cæbo iñömote bitö ñöwo edæ, Botö wëmi, ante ædö cæte anguimii.’ ²² Ante tæcæ apæneyongante mæmpocä iñömö në cædäni inänite äninge, ‘Weocoo wæmoncoo quingæ ö ænte mämö daga wëñaquimini. Önompö timpoi ænte pönninge godö da timpodingue awæncata ö ænte godö da wëwaedäni. ²³ Ayæ wagada wëñængä nanguï cænte oguïmo pöni inongä inte wænonte ænömïni ate mönö cænte tocæimpa. ²⁴ Edæ botö wengä iñömö do wænte bai inongä incæte ñöwo miingä pongä aedäni. Botö në wë womongä wædongä incæ edæ ñöwo dobæ ëadente tobopa.’ Ante wæmpocä angä ëñëninge ææmæ cædinque nanguï todänitapa,” ante Itota godömenque odömonte apænecantapa.

²⁵ “Ææmæ cæte toyönäni bamoncadengä guiquënë gönea ayæ cædongäimpa. Ìnque cæte ate obo ponte ëñëñongä ämotamini ante äwadäni. ²⁶ Ëñente wædinque në cæcä ingante äñecä pöñongante, Æbänö cædäni, ante wæcampa. ²⁷ Äñongante, ‘Bitö biwi incæ do pongä adingue bitö wæmpo, Botö wengä miingä ëñadente tobopa, ante adingue wagada wengä oguïmo pöni inongä ingante do angä wænonte ææmæ cæte todänipa.’ ²⁸ Ante apæneçä ëñëninge bamoncadengä iñömö edæ ænguï badingue oncönë guidämaï, Baa angä. Wædinque wæmpocä iñömö oncodo taodingue tömengä ingante waadete apænedingue, Oncönë pö guie, angampa. ²⁹ Bamoncadengä wæætë, ‘Ìñæmpa bitö beyæ ante wæpo iñö wæpo iñö botö anca cædinque bitö änö tömänö ante do cæbo iñömote bitö wæætë, Bitö æmigoidi tönö cænte tocæminimpa, ante dicæ ämiyaa. Caboda wengä incæ dicæ pönömi æmogaa. ³⁰ Wæætë mäningä bitö wengä guiquënë onquiyænäni mäincoo beyæ ante në towente quëwënäni tönö quëwëninge bitö ëadincöo incæ në ëwënegä inte pongä adingue bitö wæætë wagada wë oguïmo pöni inongä incæ mäningä beyæ do wænömipa, ante awædö,’ angantapa.”

³¹ “Ante piñongante wæmpocä, ‘Botö wëmi ëñëmi. Bitö iñömö cöwë edæ botö weca ongömi imipa. Botö mäincoo ini edæ bitö mäincoo cöwë impa. ³² Incæte mäningä bitö biwi, Do wæmaï ingampa, ante mönö në pönëninge inte ñöwo miingä ingä pongä ae. Në wë womöningä ingante do ëadente ate edæ ææmæ cæte toquënë inimpa,’ ante bamoncadengä ingante mæmpocä angampa.” Mäninge ante apænebopa, ante Itota apænegacäimpa.

16

Në aaquënegä incæ nö cædämaï ingampa, ante

¹ Itota tömengä miñæ në godäni inänite godömenque apænedingue, “Wacä adocanque mäincoo nanguï ëacä iñongante wadäni, Bitö mäincoo në aaquënegä incæ önonque pöni wido cæcä ae. ² Änäni ëñëninge në ëacä iñömö në aaquënegä ingante äñecä pongä ate iimaï angampa. ‘Bitö quimæ cæbii, ante adingue tededäni edæ ëñëmopa. Ñöwo idæwaa botö mäincoo inte në aadimi inte edæ abæ tawæ gocæbiimpa. Ämo ate ëñente wædinque bitö botö mäincoo ini ante edæ, Æbänö adingue cæboo,’ ante apænebi ëñëmoe.”

³ “Ante piinte angä ëñente wædinque në aadingä iñömö nämäneque tededingue, ‘Botö awënë, Gobæwe, angä ëñëninge botö abæ tawænte gote awædö. Botö cæte ænguënta ñöwo ænämaï iningue æbänö cæte ænte quëwenguïmo. Botö, Wadäni beyæ onguipoi ææ wobo ate pönönäni ænte quëwencæboimpa, ante pönëmo bai edæ tæi piñæmopa diyæ ææ woquïmo. Ayæ, Önonque pönömïni æmoedäni, ante ædö cæte anguïmo.

Guiñenete awædö. ⁴ Æ. Tæcæ pönemopa. Botö awënë angä botö abæ tawænte goyömote wadäni wæætë, Botö oncönë pö guiie, ancædänimpa, ante cædinque botö ñöwo iïmai cæcæboimpa, ante iïmai cæcampa,” ante apænedinque Itota godömenque apænecantapa.

⁵ “Wadäni iñömö iingä awënë pönongä æninque adodö pönönämaï inäni inte debe inönänimpa. Iñäni inänite adocanque adocanque tömänäni inänite angä pönönänite në aadingä iñömö täno pöningä ingante apænedinque, ‘Botö awënë ingante bitö ayæ æpodö pönönämaï imii.’ ⁶ Æñongante, ‘Oguingui pæ incæ botö tiëë ganca tanquebo encadedë awënë ingante pönönämaï inte debe imopa.’ Ante apænecä ëñëninque ‘Mänimpocadedë debe imipa,’ ante awënë nänö yewæmöninta pædæ godöninque në aadingä iñömö, ‘Bado, bitö iinta ænte pönömenque ante yewæmöninque edæ, Botö tincoenta ganca encadedë debe imopa, ante edæ quingæ tæ contate yewæmöe,’ angä ëñente cæcampa. ⁷ Ayæ pöningä ingante në aadingä angantapa. ‘Bitö guiquënë æpodö pönönämaï imii.’ Æñongante, ‘Todigo incæ tee manguincade ñænængade pöni tiëë ganca encadedë botö debe imopa.’ Ante apænecä ëñëninque awënë nänö yewæmöninta pædæ godinque në aadingä, ‘Bado bitö iinta ænte pönömenque ante yewæmöninque, Otenta ganca debe imopa, ante yewæmöe,’ angä cæcampa.”

⁸ “Iñinque në aaquënegä mänömaï önonque wiwa cæcä wædinque awënë tömengä ingante, Bitö ocai nanguï encabi inte nämanque ante pönëwëninque cæbitapa, angampa, ante Itota në aaquënegä ingante ante mäninque apænecantapa. Ayæ godongämæ ongönäni inänite godömenque apænedinque, Inguipogaque ante quëwënäni iñömö näni caboque nanguï ëñente cæyönäni botö ñäö iñömö në quëwënäni näni cabo guiquënë wi nanguï ëñente cædänipa,” ante Itota odömoncæte ante apænecantapa.

⁹ Ayæ, “Minitö iminite ñöwo ämo ëñeedäni. Mäningä në aacä ocai encate cæcä bai minitö iñömö adobai inguipogaque wiwa cæcæte ante näni godonte æinta mämïni ininque ocai encate töingä pönente cæedäni. Inguipoga iinque bayedë mäninta iñömö edæ dæ bacæimpa, ante pönente wædinque, wadäni beyænque ante godö waa cæedäni. Mänömaï cæmïni ininque minitö ömæpomïni inte öönædë näni cöwë wantæpiyæ quëwencönë æite godinque pönöminite, Oncönë pöedäni, ämaïnänipa,” ante Itota apænecantapa.

¹⁰ Ayæ, “Wacä mäincoo wædænque pöni æninque ædæmö aacä ininque tömengä wæætë nanguï mäincoo æninque adobai ædæmö aaquingä ingampa. Wæætë edæ mäincoo wædænque pöni aaquënegä incæ babæ cæcä ininque tömengä wæætë nanguï æninque cöwë babæ cæquingä imaingampa. ¹¹ Iñinque mäincooque ante mïni wædoncoo æninque minitö ædæmö aadämaï imïni adinque minitö iminite, Wo ëwënamaincoo aacæbiimpa, ante dicæ pönönäni ænguimïniyaa. ¹² Ayæ wacä minitö iminite, Botö quï ædæmö aadäni, ante pönongä ænimïni inte minitö ædæmö aadämaï imïni adinque, Tömëmïni quï, ante minitö iminite pönönämaï incædänimpa,” ante Itota apænegacäimpa.

¹³ Ante apænedinque Itota godömenque apænecantapa. “Mënaa awënëna ina beyæ wacä ædö cæte cæquingä. Adocanque awënë ingante piinque wacä ingante waadebaingampa. Wæætë adocanque miñæ godinque wacä ingante wi waa abaingampa. Minitö adobai imïni inte Wængongui ingante në cæmïni ininque mäincooque ante ædö cæte cæquimïni,” ante Itota angacäimpa.

¹⁴ Itota apænecä ëñëninque Paditeoidi guiquënë mäincooque ante në wæwënäni inönäni inte, Quimæ anewëë, ante badete togadänimpa. ¹⁵ Adinque Itota wæætë tömënäni inänite, “Minitö iñæmpa, Mönitö imönite adinque waodäni, Në nö cædäni inänipa, ante pönencædänimpa, ante në babæ cæmïni iminipa. Incæte Wængongui minitö mimönë mïni entawënö ante edæ do acampa. Waodäni näni waa adö ante Wængongui wæætë, Wentamö pöni i awædö, ante piingampa,” ante Itota apænecantapa.

Wængongui Awënë nänö wææ angainö cöwë ongompa

¹⁶ Äninqe Itota, “Wëenëñedë iñömö Wäö nänö ponganca dodäni Möitee wodi nänö wææ angainö ante ayæ Wængongui beyæ nê apænedäni nani angainö ante apænete quëwengadänimpa. Nöwo guiquënë, Wængongui Awënë Odeye nempo guite quëwengäimpa, ante watapæ apænete impa. Ìne ante ëñëninque tömänäni Awënë nempo guicæte ante edæ pæ pagænte cædinque da godö guiidänipa,” ante apænecantapa.

¹⁷ Ayæ apænedinque, “Incæte öönæ tönö inguipo æmäwo edæ dæ nani baganca edæ Wængongui nänö wææ angainö iñömö edæ cöwë mä ongongäimpa. Mänine ante yewæmöninque dodäni nani tænoncagai iñömö edæ guiyä pöni incæ cöwë wadæ cædämaï ingäimpa,” ante Itota apænegacäimpa.

*Näni pämwænte wædö ante Itota apænecampa
(Mäateo 19.1-12; Mäadoco 10.1-12)*

¹⁸ Ayæ godömenque apænedinque Itota, “Æcänö näwä nänöogængä ingante pämwæninque wacä onquiyængä ingante godö möna iñömö tömengä edæ wiwa towengä do bacampa. Adobai, tömengä nänöogængä iningä iñongante wacä möninque edæ do towente bacampa,” ante apænecantapa.

Tæcæ wodi tönö Datado, ante Itota odömonte apænecä

¹⁹ Godömenque odömonte apænecæte ante Itota iïmaï ante apænegacäimpa. “Onguïñængä adocanque nê äcä inte cæncadencoo wæmoncoo wëñadinque awënëidi nani opatawæ ëmoncoo bai yabæque wëñadongäimpa. Tömengä tæcæ wodi inongä inte wæme cænguincocooque æninqe iïmö iñö iïmö iñö ææmä cædinque nanguï todinque quëwëngäimpa. ²⁰ Tæcæ wodi yabædemö inö wacä tömengä ëmöwo Datado ingante ænte mämö ñö cædäni ñongængantapa. Ìngä iñömö, Pönömi æmoe, Pönömi æmoe, ante nê änewëngä inte quëmoncoo tömäo baate wædongäimpa. ²¹ Ayæ tæcæ wodi weca cæninque eyepodäni wæænte öñoncoo adinque tömengä ænte cæncæte ante wæwëngäimpa. Ayæ edæ tömengä nanguï baate ñömænte wæyongä guintaidi incæ pö yædæ yædæ beyadönänimpa. ²² Tömengä nê, Pönömi æmoe, Pönömi æmoe, ante änewëngä inte näne wængä adinque Wængongui anquedoidi tömengä önöwoca ingante Abadäo wodi weca ænte mäidäni æicantapa. Ayæ ate tæcæ wodi adobai näne wængä adinque tömengä baö inï daga wënänitapa.”

²³ Ante apænedinque Itota tæcæ wodi ingante ante godömenque apænecantapa. “Tömengä önöwoca guidömmö taadö wææ gote mä mämönte bai iñömö ongöninque nanguï ämogate wæwëngä inte gomö ayongä Abadäo wodi a ongongä acantapa. Datado wodi adobai Abadäo wodi weca a ongongä acantapa. ²⁴ Adinque tæcæ wodi iñömö Abadäo ingante aa pedinque, ‘Mæmpo Abadäo ëñëmi. Botö gonga bæcoyömö guite nanguï ämogate wæwëmo cæbii. Botö ämogate wædö ante pönö waadete waa cædinque bitö Datado ingante da pönömi pöninque tömengä æpæ ada ipomencacä botö cöñe bamencaboe.’ ²⁵ Äñongante Abadäo, ‘Botö wëmi, Datado imæcayedë wënæ wënæ ämogate wæwëngante bitö mäincoo wæmoncooque ænte todinque quëwënömiimpa. Nöwo diyæ bitö ämogate wæwëñömite Datado ingante wæætë ædæmö cæbo ate wampo pönëninque tömengä ñöwo iñömö watapæ quëwente tocampä. ²⁶ Ayæ godömenque ämo ëñë. Nänënë ï apa änewëë. Botö weca ongongä inte ædö cæte bitö weca goqingää. Wæætë bitö weca ongongä inte botö weca ædö cæte ponguingää. Guiib pöni iñömö taadö impa taquii. Edæ dæ ampa,’ ante Abadäo wodi angampa, angantapa.”

²⁷ “Angä ëñente wædinque tæcæ wodi wæætë, ‘Mæmpo Abadäo ëñëmi. Datado ingante ämi ëñente tömengä botö mæmpo oncönë adodö gocæcäimpa. ²⁸ Mänïñömö botö tönïñadäni önonpo æmæmpoque ganca mänimpodäni inänipa. Ìninqe bitö Datado ingante ämi tömënäni weca gote, Wænompadäni, ante wææ angä ëñëninque tömënäni wæætë iñömö nanguï pöni ämogate wæwëñömö pönämaï incædänimpa.’ ²⁹ Äñongante Abadäo wæætë, ‘Möitee wodi nänö wææ ante yewæmongainta Wængongui beyæ nê apænedäni nani yewæmongainta do mänäni inte edæ bitö tönïñadäni iñömö

mäninta adinque, Æbänö i, ante do eñenguënänäni inänipa.’ ³⁰ Ante apäneyongä tæcæ wodi wæætë, ‘Îñæmpa mæmpo Abadäo eñëmi. Wacä nê wængaingä inte ñäni ömæmonte tömënäni weca gote apäñecä eñëninque botö töninädäni tömënäni wënæ wënæ cædinö ante wæwente pönëninque do edæ ñimpo cæbaïnänipa.’ ³¹ Ante wæyongante, ‘Îñæmpa Möitee wodi nänö wææ angainö ante Wængongui beyæ nani apäñegainö ante eñëñämaï inäni inte tömënäni nê wænte ñäni ömæmönigä apäneyongante cöwë eñëñämaï imainänipa,’ ante Abadäo wodi angantapa.” Tæcæ wodi ingante ante apäñedinque Itota mäninque ante apäñegacäimpa.

17

*Wacä oda cæcæcäimpa, ante nani wæquinque cædänipa**(Mäateo 18.6-7; Mäadoco 9.42)*

¹ Ayæ tömengä miñä nê godäni inänite apäñedinque Itota, “Nê pönänäni incæ pancadäniya wii eñente do oda cædänipa. Cöwë mänömaï impa. Incæte, Oda cæcæcäimpa, ante nê cæcä iñömö edæ tömengä nanguï nänö caate wæquinque cæcampa. ² Ìninque edæ, Wëñængä adocanque guiyangä pönï incæ oda cæcæcäimpa, ante nê godö cæcæ cædingä iñömö edæ, Wii cæcæcäimpa, ante mönö edæ wææ cæcæimpa. Waodäni nani dacæ godö dacæ godö cæquinca ñænænca æninque nê godö cæcæ cæcä önömenca æ wëmencadinque tömengä ingante tæcætibæ wido cædäni ïninque tömengä edæ, Wënæ wënæ cædämaï inte wæmo beyænque Wængongui botö imote pänämaï ingampa, ante tömengä waa toquënegä imaingampa. ³ Mänömaï ämo eñëmini inte minitö, Oda cæcæcäimpa, ante nê cæcä bai cædämaï incæboimpa, ante edæ nämä wææ aedäni,” äninque Itota iïmaï apäñecantapa.

“Wacä wënæ wënæ cæcä adinque bitö wæætë tömengä ingante, Cædämaï incæbiimpa, ante wææ æ. Ämi eñëninque tömengä wënæ wënæ nänö cædinö beyæ guingo imonte wædinque, Wiwa cætabopa, ante apäñecä eñëninque bitö wæætë piyänë cædinque tömengä ingante ñimpo cæbi ee gocæcäimpa. ⁴ Tömengä wæætë adoönæque iñonte önompo æmæmpoque go mempoga mänimpoga bitö imite wiwa cædingä inte tömengä guingo imöninque, ‘Bitö imite wiwa cætabopa,’ ante adopoga apäñecä eñëninque bitö wæætë tömengä ingante adopoga ñimpo cæbi ee gocæcäimpa,” ante Itota angantapa.

Mönö tæi piñænte entawenguinque wede pönëmompa

⁵ Mönö Awënë tömengä nänö nê da godöninäni iñömö tömengä ingante äninque, –Wædænque pönëmöni iñömönite bitö pönö cæbi æninque mönitö ædæmö wede pönëmöni bacæmönimpa.

⁶ Änani eñëninque mönö Awënë wæætë,

–Möotatamö guiyämö pönï nänö inganca minitö pönönö mäninganca wædænque pönëminitawo. Mäningancaque pönëmini incæte minitö möodedawæ nani äwæ inte apäñedinque, “Awæ eñëmi. Bitö bæ wite godö gäwapæ minte pæbæwe,” ante ämini bai awæ incæ dobæ edæ eñente cæcædönimpa, ante Itota apäñecantapa.

Wacä ingante nê cæcä incæ iïmaï cæquënegä ingampa

⁷ Ayæ godömenque apäñedinque, “Mini waocabo iñömönite adobi nê äabi ïmi ïninque bitö imite nê cæcä ingante edæ æbänö cæbaimii. Tömengä gönea mangæ mangæ wodinque ayæ cäninäni inänite ïnque aadinque pö guicä adinque bitö iñömö edæ, ‘Pö tæ contate cæe,’ ante edæ dicæ ämiyaa. Edæ nê äcä ingampa diyæ täno cænguüngä. ⁸ Wæætë nê äabi inömi inte bitö, ‘Botö beyæ cænguï ænöninque bitö weocoo topo cædinque pönömi æninque botö cænte bebo ate bitö mäniñedë ate edæ cænte becæbiimpa,’ ante cöwë ämaïmipa. ⁹ Ayæ, Cæe, ante bitö äniñö ante tömengä eñente cæcä beyænque bitö, Waa cæbi æmopa, ante dicæ anguimii. ¹⁰ Ìninque mönö Awënë, Cædäni, ante nänö angainö ante eyepæ pönï cædinque minitö adobai ante pönenguënëmini iiminipa. ‘Mönitö nê cæmönique inte önömönique inömöni inte wënæ wënæ cæte awædö. Mönitö tömengä nänö änonque mäninque cæte ate tömengä beyæ

ante dicæ godömenque nanguï cæmöniyaa, ' ante pönente wæquëñëmini iminipa," ante Itota tömengä miñæ në godäni inänite apænecäimpa.

Itota angä ate diete ganca inäni waintai baadänipa

¹¹ Mänii Eedotadëë iñömö gocæte ante godinque Itota Tämadiabæ æmætæ Gadideabæ æmætæ tæcæguedë pönï godinque, ¹² waodäni näni quëwëñömö tæcæ pöñongä në baate wädäni önompo tipæmpoga inäni pö bee ténänitapa. Pö gobæ næ gongæninque pömö adinque, ¹³ aa pedänitapa.

—Itota në Awënë inömi inte ëñëmi. Mönitö wædö ante pönö waadete waa cæe, ämönipa.

¹⁴ Äñönänite gomö adinque Itota,

—Minitö guiquënë Wængonguï oncönë godinque, Wængonguï quï, ante në godönäni inänite minitö æmontai mäo odömömïni acädänimpa.

Angä ëñente tömënäni idömæ godinque iñontobæ waintai baagadänimpa. ¹⁵ Ininque adocanque watapæ todinque, Wængonguï bitö ñäö apäite bai inömi inte edæ waa cæbi æmopa, ante yedæ apænedinque adodö pongantapa. ¹⁶ Tömengä iñömö wabæca Tämadiabæ në quëwëningä incæ pö Itota önöwa inö guidömëmæ ñongæninque waa ate pönëninque, Bitö pönö cæbi ate waintai baabopa, ante apænecä. ¹⁷ Eñëninque Itota wæætë angantapa.

—Inämpa mini cabo önompo tipæmpoga mänimpomïni inömi inte edæ wii tömämïni waintai baaminitawo. Ininque wädäni önompo æmæmpoque go mënaa go mënaa inäni iñömö edæ ædönö gote dæ änänii. ¹⁸ Ingä iñömö wabæca quëwëningä incæ adocanque Wængonguï ingante waa pönï apænecæte ante ponte quëwëñongä wädäni guiquënë tömänäni pönämaï inänitawo.

¹⁹ Äninque Itota tömengä ingante,

—Bitö wede pönëñö beyænque waintai baadïmi inte ængæ gantite goe, angantapa.

Imai iinque bayonte Awënë Odeye poncæcäimpa, ante

(Mäateo 24.23-28, 36-41)

²⁰ Paditeoidi Itota ingante, Wængonguï Awënë æyedënö ponte Awënë Odeye baquingää, ante wæyönänite tömengä wæætë, Inämpa wii waomïni ayömïni Wængonguï Awënë Odeye pongä ingampa. ²¹ Ininque, "Tömengä iñömö ponte ongongampa," ante ayæ wæætë, "Tömengä wayömö gote ongongampa," ante edæ ædö cæte anguüi. Minitö weca në quëwengä incæ Awënë Odeye bayongante waodäni tömengä nempo do quëwëñäni apa änewëmïni, ante Paditeoidi inänite angacäimpa.

²² Ayæ tömënäni inänite iinque apænedinque Itota tömengä nänö në ëmiñænäni inänite wæætë apænecantapa.

—Inçayæ ate minitö, Waocä në ëñagaingä ingante adoönæque incæ äinëmönipa, ante wæcæminimpa. Wämïni incæte adämaï incæminimpa. ²³ Wädäni minitö iminite, "Inömö ongongä tamëñedäni," äninque ayæ, "Wayömö ongongä tamëñedäni," äñönäni minitö acæ godämaï iedäni. Tömënäni miñæ edæ godämaï imæwedäni. ²⁴ Botö ponguïönæ iinque bayonte botö iñömö edæ Waobo në ëñagaïmo inte edæ ñäö æmatæ æmatæ näinte bai ëmöninque edæ edonque pönï ponte a ongoncæboimpa. ²⁵ Incæte botö ñöwo guiquënë täno nanguï ämogate wæwencæboimpa. Ayæ ñöwodäni iñömö botö imote edæ Baa äninque wido cæcädänimpa, ante Itota apænecantapa.

²⁶ "Botö Waobo në ëñagaïmo inte botö ponguïönæ iinque bayedë guiquënë Nöwee wodi Docä näni angaingä nänö quëwëñedë dodäni näni quëwengäi bai adobai edæ quëwenguinäni inänipa. ²⁷ Docä Nöwee wodi ñænæ wipoboga oncö bai mänoninque tömengä nänö guiiganca tömënäni önonque cænte bete monte quëwengadänimpa. Monguina, ante ñänonte quëwengadänimpa. Mänïñedë edæ tömënäni näni capo bedö wænguinque edæ æpäe do angatimpa. ²⁸ Dooto wodi nänö quëwengäiñedë dodäni adobai cænte bete quëwengadänimpa. Në mänäni godongadänimpa. Äinënäni wæætë godonte

ængadänimpa. Minte pæcæimpa, ante cædinque onconcoo mænonte quëwengadän-
impa. ²⁹ Incæte Dooto wodi Todömä iñömö quëwente nänö tao gogaiönæ iñonte gonga
tönö atopodemö nanguï ocoi bæcomö cöönæ cæ bai wææninqe mæo bæco ininque
mäniñömö quëwënäni tömänäni gonte wængadänimpa. ³⁰ Botö Waobo ëñagaimo inte
edonque botö a ongöñedë mäninö nani bæco gonte wængaï bai adobaï bacæimpa, ante
ämo ëñëmaimäni, ante Itota angacäimpa.

³¹ Ayæ godömenque apænedinque, “Mäniönæ iñonte minitö oncömanca ongöninque,
Botö mäincoo, ante oncönë wæi guidinque ænämaï inte wodii winömæwedäni. Ayæ
gönea cædinque mäincoo ante oncönë ocæ ëmænte æncæ pönämaï imæwedäni.
³² Iñæmpa, Dooto nänöogængä wodi æbänö dadi ëmænte adinque edæ gonte wængacäi,
ante pönëminiyaa. ³³ Inguipogaque cöwë quëwencæboimpa, ante në pönengä iñömö
tömengä iñömö edæ quëwënämaï incæcäimpa. Wæætë edæ inguipoga mönö guëmante
quëwenguimämo ante në wädämaï ingä guiquënë tömengä iñömö edæ cöwë wänämaï
quëwencæcäimpa, ante ämo ëñëmaimäni, ante Itota apænegacäimpa.

³⁴ Ayæ, “Mäniñedë woyowotæ i ininque mënaa äñömonque öñöna adocanque ingante
bæi ongonte goyönäni adocanque ingante ëmö cæte godäni a ongoncæcäimpa. ³⁵ Ayæ
onquiyæna cænguï ante guëa dicaca dacæ dacæ cæte godö wëñöna adocanque ingante
bæi ongonte goyönäni adocanque ingante ëmö cæte godäni a ongoncæcäimpa.” ³⁶ “Ayæ
onguïñæna gönea guëa cæyöna adocanque ingante bæi ongonte goyönäni adocanque
ëmö cæte godäni a ongoncæcäimpa.”

³⁷ Ante apænecä ëñente wædinque tömënäni wæætë,

—Awënë, bitö änö æyömönö incæ mänömaï baquïi.

Äñönänite,

—Baö æyömömë wænte öñöñömonte abadæidi wë ongonte edæ do godongämæ
pönäni bai waodäni, Mönitö Awënë pongampa, ante do ëñëninque godongämæ pon-
cädänimpa, ante Itota apænegacäimpa.

18

Në apænte änogä tönö owæmpoingä æbänö cædaï, ante

¹ Ayæ tömengä miñæ në godäni cöwë Wængonguï ingante apænedinque wæntæte
badämaï incädänimpa, ante cædinque Itota inguipoga quëwënäni nani cæinö ante
odömonte apænegacäimpa. ² “Wayömö nani quëwëñömö adocanque waodäni nani
në apænte änogä inte quëwënogäimpa. Wængonguï ingante guïñänämaï inongä
inte tömengä iñömö, Waodäni æbänö änänii, ante wädämaï inongäimpa. ³ Adoyömö
tömënäni quëwëñömö onquiyængä adocanque owæmpoingä inte në wædongä inte
quëwënogäimpa. Tömengä guiquënë mäningä në apænte adongä weca wæætë wæætë
pöninque, Botö imote adocanque në piingä iñongante bitö ämi ëñente wæætë nö
cæcæcäimpa. ⁴ Ante ancaa pöninque änä ëñente wædinque në apænte änogä iñömö
edæ cöwë Baa Baa angä. Incæte ayæ ate nämäneque tededinque tömengä, ‘Onquiyængä
iñömö ancaa angä awædö, äninque, Wængonguï ingante guïñänämaï imo inte botö,
Waodäni æbänö änänii, ante wädämaï imo incæte, ⁵ mäningä owæmpoingä pö pö
cæcä wædinque botö, Ancaa ponte angä wæcæ wæ, ante wæætë tömengä ingante
waa cæcæboimpa. Tömengä ingante në piingä ingante botö, Nö cæe, ante wææ ämo
wæcæcäimpa.’ Äninque në Baa äningä incæte owæmpoingä beyæ do waa cæcampa.
Mäninque ante odöömöpa.”

⁶ Ante odömonte apænedinque mönö Awënë iñömö godömenque apænecantapa. “Në
apænte angä iñömö wiwa cæcä incæte, Tömengä æbänö apænecäa, ante minitö ëñente
pönëmaewedäni. ⁷ Wængonguï nänö në apænte ængaimäni inte minitö itædë woyowotæ
wæætë wæætë aa pe aa pe cæyömini Wængonguï edæ ædö cæte Baa anguingäa.
Wææ ämi ate nö cæcädänimpa, ante äñöminite tömengä iñömö edæ, Iincayæ ate
cæcæboimpa, ante ædö cæte anguingäa. ⁸ Wæætë quingæ edæ do cæcæcäimpa. Në
piinte cædinäni iñönänite Wængonguï wææ angä ate tömënäni minitö iminite wæætë

nō cæcædānīmpa, ante āmo ēñēmaīmīnīpa. Incæte Wao Wēmo ēñagāimo inte botō ponte ayōmo wede pōnēnāni wabānō inguīpoga mæ ongōnāni aquīmoo, ante wæbopa,” ante Itota angacāīmpa.

Paditeo tōnō awēnē beyæ nē ænongā æbānō cæda, ante

⁹ Ayæ pancadāniya, Wadāni ōnōnānique iñōnāni mōnonque nō cæmō īmōmpa, ante pōnēwēnīnque wadāni inānite pīinte adānīpa. Mānōmaīnō ante nē ānewēnāni inānite Itota, Wængonguī ingante æbānō apænequīi, ante ēñencædānīmpa, ante īmæca quēwēna nāna apæneinō ante odōmōnīnque apænecantapa. ¹⁰ “Woda mēnaa Paditeo tōnō odōmāno awēnē beyæ nē æwengā iñōmō Wængonguī ingante apænecæte ante Wængonguī oncō ñænæncō yabæcōnē æi guīdatapa. ¹¹ Paditeo iñōmō adiyæ gongænīnque nāmā incæ apænedīnque, ‘Wængonguī ēñēmi. Wadāni bai wīi īmōpa. Botō iñōmō godōmenque waēmō īmōpa, ante todīnque botō mānōmaī beyæ bitō īmite waa ate apænebopa, ānewengampa. Edæ wadāni guīquēnē wacā quī ō ænānīpa. Wadāni inānite wīwa cædānīpa. Tōmēnāni nānōogængā ināmaī iñongante godō guēa mōnānīpa. Botō iñōmō mānīnāni bai ināmaī inōmo inte botō māniñōmō ongongā odōmāno awēnē beyæ nē æwengā bai wīi īmōpa, ante adīnque botō Wængonguī bitō īmite waa ate pōnēnīnque apænebopa. ¹² Botō iñōmō, mēōnaa go mēōnaa iñonte, mēōnaa go mēōnaa iñonte bitō īmite apænecæte ante cænāmaī quēwēmōpa. Ayæ botō ænīncoo tōmancoo ate adīnque botō ōnōmpo tipæmpoga mānīmpocoo mæ ongōñoncoo adocooque ænīnque, Wængonguī quī, ante cōwē pædæ pōnōmo ae,’ ante apænewengampa.”

¹³ “Odōmāno awēnē beyæ nē ænongā guīquēnē guīngo imōnīnque nāmā tæi tæi yatawēnīnque, ‘Wængonguī ēñēmi, botō nē wīwa cæbo adīnque bitō waadete pōnō pīināmaī incæbiīmpa, āmōpa,’ angā. Mānīnque angampa. ¹⁴ Mānōmaīnō ante odōmoncæte ante apænedīnque Itota, Nōwo āmo ēñēedāni, angantapa. Īngā awēnē beyæ nē æwengā mānōmaī āñongante Wængonguī do, Botō ayōmo bitō nō cæbi babīpa, ante godō badongā ate tōmengā edæ nō pōnēnongā inte tōmengā oncōnē gocampa. Wæætē Paditeo, Nāmanque waēmō īmōpa, ante nē ānewēnīngā ingante Wængonguī, Nō cæbi bacæbiīmpa, ante godō badōnāmaī incæcāīmpa, ante āmo ēñēmaīmīnīpa. Edæ, Nāmanque waa cæbo īmōpa, ante nē ængō cæcā guīquēnē edæ wææntodonte bai inte wæcæcāīmpa. Wæætē, Nāmanque wēnæ wēnæ cæbo īmōpa, ante nē apænecā guīquēnē edæ ængō cæte bai inte tocæcāīmpa,” ante Itota apænegacāīmpa.

Wēñænāni inānite gampo cæcadinque Itota waa apænecā

(Māateo 19.13-15; Māadoco 10.13-16)

¹⁵ Ayæ ate wadāni, Wēñænāni inānite Itota pōnō gampo cæcadinque waa apænecæcāīmpa, ante cædinque tōmengā weca guīyānāni inānite ænte pō ænte pō cædāni adīnque tōmengā miñæ nē godāni guīquēnē, Ænte pōnāmaī iedāni, ante Baa ānāni. ¹⁶ Adīnque Itota wæætē wēñænāni inānite aa pecā pōñōnāni tōmengā miñæ nē godāni inānite apænecantapa.

—Wēñænāni inānite botō weca ee amīni poncædānīmpa. Īñæmpa mānīnāni nāni pōnēnō bai adobaī pōnēnāni inte edæ Wængonguī Awēnē Odeye nempo do quēwēnāni inānīpa. Īnīnque mīnītō iñōmō wēñænāni inānite Baa ānāmaī iedāni. ¹⁷ Edæ nāwangā apænebo ēñēedāni. Wēñængā do pōnengā inte Ao angā ingā bai Wængonguī Awēnē Odeye ingante do pōnēnīnque nē Ao ānāni iñōmō tōmēnānique tōmengā nempo guīdīnque quēwēnānīpa. Wadāni guīquēnē Wængonguī Awēnē Odeye ingante Baa ante pōnēnāmaī ināni guīquēnē tōmēnāni ædō cæte tōmengā nempo guīdīnque quēwēnguīnāni, ante Itota apænegacāīmpa.

Māincoo nanguī ēacā inte Itota weca ponte apænecampa

(Māateo 19.16-30; Māadoco 10.17-31)

¹⁸ Māniñedē Itota ingante wacā awēnē angantapa.

—Awēnē nē waa Odōmōmi apænebi ēñēmoe. Botō æbānō cædinque wænāmaī wantæpiyæ quēwēmaīmoo.

¹⁹ Äñongante Itota tömengä ingante,

—Wængongui adocanque në waa cæcä iñongante bitö botö imote, Në waa cæbi imipa, ämii. ²⁰ Äninqe Itota godömenque apæñecantapa. İmaï cæedäni, ante Wængongui nänö wææ angainö ante bitö tömëmi edæ do ëñëmipa. “Bitö nänöogængä inämaï iñongante bitö godö guëa mönämäi ie. Wacä ingante godö wænönämäi ie. Wacä qui adinque awëmö ænämäi ie. Wacä wënæ wënæ cæcä atabopa, ante godö babæ wapiticæ änämäi ie. Wæmpocä ingante wäänä inante waa adinque tömëna inate godö waadete cæe,” ante wææ yewæmongacäimpa, ante bitö edæ do ëñëmipa, angantapa.

²¹ Ante apæñecä ëñëninque mäningä awënë wæætë,

—Botö mäninö bitö änö bai tömänö ante ëñente cædinque pægaboï ae.

²² Ante apæñecä ëñëninque Itota wæætë,

—Adodeque ayæ ëñente cæquënëmi imipa, ante ämo ëñëe. Öönædë bitö waëmoncoo ænguinque edæ imæca bitö mänincoo tömancoo godonte æninqe bitö æninta wæætë ömæpodäni inte wädäni inänite tömanta godömi æncædänimpa. Ayæ edæ botö imote tee empote pöe.

²³ Angä ëñente wædinque tömengä mäincoo nanguï ëadongä inte mänincoo beyænque ante pönëninque mäningä awënë iñömö wæwente bacantapa. ²⁴ İninqe Itota tömengä ingante gomö adinque,

—Wængongui Awënë Odeye nempo guite quëwencæte ante cædinque waodäni ömæpodäni inte botö miñæ pönänpa. Mäincoo nanguï ëacä guiquënë æbänö cæte ömæpocä inte botö miñæ ponte guite quëwenguingää, angantapa. ²⁵ Cämeyo iñömö guiyangä ingampa diyæ daagö guiyampite pædæ tacää. İninqe cämeyo pædæ tadämaï ingä bai në ëacä iñömö adobai ingampa. Tömengä nämä ayongä ñænængä inongä inte edæ æbänö cæte Wængongui Awënë Odeye nempo do wäänë guite quëwenguingää.

²⁶ Mänömainö ante Itota apæñecä ëñëninque në ëñëñäni wæætë,

—İñæmpa mänömaï i ininqe æcänö wäänë guite quëwenguingää.

²⁷ Ante wæyönänite,

—Waomïni mïni, Ædö cæte cæquiï, ante mïni wädö incæ Wængongui iñömö do cæcampa, ante Itota apæñecä.

²⁸ Æñente wædinque Pegodo,

—Awënë ëñëmi. Mönitö ëadincoo owæ caate bitö miñæ tee empo pömöni abipa.

²⁹ Äñongante Itota tömëñäni inänite wæætë,

—Mïnitö näwangä oncodo tao godinque mïnitö nänöogængä ingante mïnitö tönïñadäni inänite wæmpoda inate wëñænäni inänite ëmö cæte botö miñæ pömïnitapa. İninqe iïmaï ante näwangä ämopa. Æcänö Wængongui Awënë Odeye beyænque botö miñæ mänömaï pöna iñömö, ³⁰ tömengä iñömö inguipoga quëwëninque nänö ëmö cædincoo adopocoo æninqe ayæ wæætë godömenque nanguï æncæcäimpa. Ayæ iincayæ ate öönædë godinque edæ tömengä cöwë wantæpiyæ wænämäi quëwencæcäimpa, ante ämo ëñëmaïmïnpa, angacäimpa.

Itota, Wæncæboimpa, ante wæætë adodö ante apæñecä

(Mäateo 20.17-19; Mäadoco 10.32-34)

³¹ Äninqe tömengä miñæ, Dote, ante näni gocabo inänite Itota nänënë ænte mäocä goyönäni iïmaï ante apæñecantapa. “Nöwo iñömö mönö edæ Eedotadëe iñömö æicæimpa. Wængongui beyæ në apænegainäni iïmainö ante yewæmöninqe, Në Waocä iincayæ ate ëñate pæcä adinque tömengä ingante æbänö cæquinäni, ante yewæmongadänimpa. Nöwo mönö Eedotadëe iñömö æi pö gongæmö ate edæ mäninö dodäni näni angainö bai edæ do iinqe bacäimpa. ³² Botö edæ mänimodö ëñagaïmo iñömote oodeoidi botö imote ö æninqe wädäni inänite pædæ mäo godönäni ö æninqe tömëñäni wæætë tawimæ botonga towæ tänongadinque botö imote badete todinque piininqe wiwa anguinäni inänipa. ³³ Ayæ æmontaimenca tæi tæi pänäni ämogate wæyömote botö imote godömenque wænönäni wæncæboimpa. Wæætë mëönaa go adoönæque iñonte edæ botö do wænimo inte edæ ñäni ömæmonte wæætë quëwencæboimpa,” angantapa.

³⁴ Tömengä miñæ nē godāni iñömö mäninö, Tömengä æbänö bate wæquingää, ante adodeque incæ edæ eñenāmaï ingadānimpa. Tömengä nänö apænedö edæ wē wodonte bai iñonte tömēnāni önömoncaque eñēninque, Æbänö ante apænecää, ante wii edonque eñēnānitapa.

*Itota angä ate babetamongä iningä incæ do waa acampa
(Mäateo 20.29-34; Mäadoco 10.46-52)*

³⁵ Itota mäninö godinque Eedicoo iñömö obo pöñongä onguñængä babetamö inte nē wædongä inte taadö wedeca, Pönömi æmoe, ante ānecönongäimpa. ³⁶ Nanguï ināni cægönāni eñēninque babetamongä iñömö, Quinante cægönāni, ante wæyongante, ³⁷ Itota Näatadeta quēwēningä inte edæ ñöwo wodo tebæ gocampa, ante apænedāni.

³⁸ Eñēninque tömengä iñömö aa pedinque,

—Itota eñēmi. Bitö Awēnē Dabii wodi pæimi iñömi inte botö wædö ante edæ ñöwo waadete pönö waa cæe.

³⁹ Äñongante täno godāni wæætē tömengä ingante, Apocænē inguēnē ānewēē, ante wææ äñönāni tömengä godömenque nanguï äninque,

—Awēnē Dabii pæimi iñömi inte edæ botö wædö ante pönö waadete waa cæe, ante wæcä.

⁴⁰ Wædinque Itota næ gongæninque, Tömengä ingante ænte mämömini pongædāni. Angä obo ænte mämönāni pöñongante Itota,

⁴¹ —Æbänö ante ämii. Bitö beyæ quino cæquimoo.

Äñongante,

—Awēnē, wēenē botö emongaï bai cæbi acæboimpa.

⁴² Angä eñēninque Itota wæætē,

—Wēenē bitö emongaï bai abāwe. Edæ wede pönēmi inte edæ waa bamömpa.

⁴³ Ante nänö ānedē nē babetamöningä do waa bamöninque Itota miñæ godinque Wængonguï ingante, Bitö ñäö apāite bai emömi inte edæ waa cæbi æmopa, ante togacäimpa. Mänömaï cæcä adinque tömānāni adobaï Wængonguï ingante waa adinque, Bitö ñäö bai emömi inte waa cæbipa, ante togadānimpa.

19

Itota tönö Taqueo

¹ Itota mänii Eedicoo pöninque tæcæ wodo tebæ gocä ingantapa. ² Mäniñömö adocanque Taqueo nāni ānongä iñömö tömengä odömāno awēnē beyæ nē ænāni awēnē inongä inte nanguï mäincoo éadongä inongäimpa. ³ Tömengä ñöwo, Itota æcänö ingää, ante acæte ante ponte ayongä wadāni nanguï ināni wææ ongönāni adinque, Botö ocäa pönii iñömo inte edæ Itota ingante ædö cæte aquimoo, ante wæcantapa. ⁴ Adāmaï inte wæyongante wadāni, Itota iñö gämænö pö wodo tebæ goquingä, ante tededāni eñēninque tömengä Itota ingante acæte ante pogodo täno gote awāa ticāmodōwāa nāni äwāa daēwa æi næ gongænte a ongongantapa. ⁵ Itota obo pöninque æmö ayongä Taqueo a ongongä adinque tömengä ingante,

—Taqueo, quingæ wææe. Ñöwoñæ edæ pö bitö oncönē eñaquēnēmo imopa.

⁶ Angä eñēninque Taqueo quingæ wææ ti wææninque, Ao, botö oncönē waa poncæbiimpa, ante watapæ todinque edæ tömengä oncönē mämongä pongacäimpa. ⁷ Itota mänömaï cæcä adinque wadāni, Æ nē wiwa cæcä weca Itota quimæ eñacæ gocää, ante tömānāni piinte tedegadānimpa. ⁸ Taqueo iñömö edæ tömēnāni ayönāni ængæ gantite adiyæ ongöninque mönö Awēnē ingante,

—Awēnē eñēmi. Botö mäincoo tæcæguedencoo pä cædinque omæpodāni inte wæwēnāni inānite ñöwo godömo ænāni ae. Ayæ botö wacä quï ante babæ äninque ö æmo wæcä ininque wēenēñedē botö ö ænincoo adopocoo bai incæ godömenque mempoga go mempoga godömo æncæcäimpa.

⁹ Ante apænecä eñēninque Itota wadāni inānite apænedinque,

—Taqueo adobaī Abadaō wodi pæingā iñongante botō nē æmo inōmo inte tōmengā oncōnē nāni owocabo quēwencædānimpa, ante ñōwoōnæ pontabopa. ¹⁰ Botō Waobo ēñagaimo iñōmō æmo beyænque quēwencædānimpa, ante cædinque wē womonte bai ināni inānite diqui diqui mincæ pontabopa, ante Itota apænegacāimpa.

*Mīnata nāni godonte æinta ante odōmongampa
(Māateo 25.14-30)*

¹¹ Mānōmaī apænecā ēñēnāni inte tōmēnāni, Itota Eedotadēē obo pongampa, ante adinque, Wængonguī Awēnē Odeye nempo mōnō oo pōnī quēwenguinque impa, ante pōnente edæ oda cædānitapa. Īninqe Itota, Wængonguī Awēnē æbānō cæquingāā, ante ēñencædānimpa, ante imæca quēwēnāni nāni cæinō ante odōmōninqe apænecantapa.

¹² Īmāinō ante apænecantapa. “Wacā adocanque awēnē odeye pæingā inongā inte, Botō gobæ wabæca gote imæca pancabaa awēnē odeye bate pōmoedāni. ¹³ Āninqe tōmengā ingante nē cædāni diete ganca ināni inānite āñete pōnāni ate tōmengā oodo mīnata nāni āinta wantæpiyæ cæte nāni æinta incæ æninqe adocanque ingante adotaque pædæ wacā ingante adotaque pædæ godōninqe tōmānāni inānite godongā adopota adopota ænānīpa. ‘Mīnitō māninta æninqe godonte æi godonte æi cædinque, Yebængæimpa, ante botō gote pompoga cædāni.’ ¹⁴ Ante wadæ gocā adinque tōmengā nempo quēwēnāni guiquēnē tōmengā ingante pīinte cædinque pancadāniya inānite āninqe, Mīnitō tōmengā mīñæ godinque awēnēidi inānite gode āninqe, Māningā iñōmō wīi mōnitō awēnē odeye bacæcāimpa, ante wææ āmīni ēñencædānimpa, ante da godōnāni godānitapa,” ante apænedinque Itota ayæ godōmenque apænecantapa.

¹⁵ “Incæte awēnēidi do ānāni ate awēnē odeye badinque tōmengā omæ pongantapa. Pōninqe tōmengā, Botō beyæ nē cædāni iñōmō godonte æi godonte æi cædinque æbānō godōmenque nanguī edæ ænte mānānīi, ante acæte ante cædinque, Botō oodo mīnata nē ænīnāni inānite āñete pōedāni, angā. ¹⁶ Āñete pōnāni ate tōmengā weca tāno pōningā iñōmō, ‘Awēnē ēñēmi. Bitō oodo mīnata adotaque incæ onompo tipæmpoga mānimpota edæ ñōwo yebænte bapa.’ ¹⁷ Ante apænecā ēñēninqe tōmengā ingante, ‘Botō imote nē cæbi imi waa cæbi æmopa. Wædænque incæ ænīmi inte bitō ædæmō aate cæbīpa, ante adinque botō onompo tipæmpoga nāni quēwēñōmō quēwēnāni iñōnānite bitō nempo pōnōmo æninqe nē āmi inte aabi æmoe.’ ¹⁸ Ante tōmēnāni awēnē angā ate ayængā pōninqe, ‘Awēnē ēñēmi. Bitō oodo mīnata adotaque incæ onompo æmæmpoque mānimpota ñōwo yebænte bapa.’ ¹⁹ Ante apænecā ēñēninqe tōmengā ingante adobaī apænedinque, ‘Onompo æmæmpoque nāni quēwēñōmō quēwēnāni iñōnānite botō bitō nempo godōmo ænte aabi æmoe,’ angantapa,” ante Itota apænecantapa.

²⁰ Ayæ godōmenque apænedinque Itota, “Awēnē angā ate tōmengā guiquēnē pōninqe, ‘Awēnē ēñēmi, tōmēmi mīnata æe. Botō weocodē ædæmō wīni caadinque wææ aate mantabopa. ²¹ Āninqe, Bitō wīi bitō ñōnōnī incæ wacā ñōnōnī incæ ò ænte māmi awædō. Ayæ wīi bitō mīmi pæ incæ wacā mingā pædi incæ tā pebi imīpa, ante pōnente wædinque cætabopa. Bitō tæēmō inōmi imīpa, ante guīñente wædinque botō oodo mīnata botō æninta wīni caapote weocodē ædæmō wææ aabo ae.’ ²² Āñongante tōmengā awēnē iñōmō, ‘Īñæmpa bitō nē wīwa cæbi imi nāmā bitō tededō beyænque bitō imite apænte ancæboimpa. Botō tæēmō imo inte wīi botō ñōnōnī incæ wacā ñōnōnī incæ ò æmopa. Wīi botō mīmo pædi incæ wacā mingā pædi incæ edæ do tā pebo imopa. Mānōmaī impa, ante bitō dicæ ēñēnāmaī imitawogaa. ²³ Do ēñēnīmi inte bitō ēñente edæ cæquēnēmi imitapa tōō. Botō oodo mīnata godonte æinta æninqe edæ nē godonte ænāni weca baanco weca quīnante wīi guidonte æmitawo. Mānōmaī cæbi bai botō ocæ emænte pōninqe edæ botō quī do æninqe wadāni nāni guidōninta tōnō edæ do æncædōmoimpa tōō,’ angampa.”

²⁴ “Āninqe godongāmæ ongōnāni inānite awēnē apænecantapa. ‘Mīnitō ñōwo iingā mīnata nānō nææninta ò æninqe edæ mīnata onompo tipæmpoga nē næængā ingante pædæ godōmīni æncæcāimpa.’ ²⁵ Angā ēñēninqe tōmēnāni, ‘Awēnē iñæmpa, iingā

diete ganca mīnata do mangä apa ämii.’ ²⁶ Ante wæyönāni awēnē wæætē, ‘Īñæmpa nē ēadāni ĩnānite tōmānāni ĩnānite godōmenque godonte ingæimpa. Wæætē edæ ēadāmaī inte ömæpocā ingä guiquēnē tōmengä nānō ēadincoo wædænque pōni ĩ incæte edæ ö ænte dæ ba wæcæcäimpa. Ante apænebo ēñēmaīmīnīpa. ²⁷ Ayæ botō ĩmote nē pīnāni guiquēnē botō ĩmotedō ante apænedinque, Bitō wīī mōnitō awēnē odeye bacæcäimpa, ante nē Baa ānāni guiquēnē, tōmēnāni ĩnānite botō weca ænte pōninque botō ayōmo wænōmīni wæncædānīpa, āmopa,’ awēnē angantapa. Māninque ante odōmonte apænebopa,” ante Itota apænegacäimpa.

Eedotadēē ĩñōmō Itota pongampa

(Māateo 21.1-11; Māadoco 11.1-11; Wäö 12.12-19)

²⁸ Māninganca apænedinque Itota Eedotadēē æicæte ante tāno gocantapa. ²⁹ Godinque Odibowænquidi nāni anquidi ontacamō goinō Betapaguee nāni quēwēñōmō obo pōninque Betānia ganca pōninque Itota tōmengä mīñæ nē goda mēnaa ĩnate da godōninque, ³⁰ ĩmaī angantapa.

—Mānīī nāni quēwēñōmō ongō amīna. Tōmēñōmō go guiite ayōmīna bodo wē picængä incæ waocā ingante mongænāmaī ĩningä inte ñāni ñæingä a ongongä acæmīnaimpa. Adinque ñī cæyænte ænte pōeda. ³¹ Ayæ wacā mīnatō ĩmīnate, Quīnante ñī cæyæmīnaa, ante wææ angä ĩninque mīnatō wæætē, Mōnō Awēnē nānō ænguēnēnō ante æmōnāpa, ante apæneeda, angantapa.

³² Tōmengä nānō nē da godōna wadæ gote ayōna Itota nānō āni baī bodo wē a ongō.

³³ Adinque ñī cæyæñōna bodo wē nē ēadāni tōmēna ĩnate,

—Bodo wē quīmæ ñī cæyæwēmīnaa.

³⁴ Wææ āñōnānite tōmēna wæætē,

—Mōnō Awēnē nānō ænguēnēnō ante æmōnāpa.

³⁵ Ante āna ēñēninque Ao ānāni ĩninque awæ ñā cæyæñōmō ñī cæyænte bodo ingante tōī tōī ænte pōnatapa. Ayæ ænte pōninque tōmēna weocoo yabæcooque æidāmæ wo cæyabædinque āna ate Itota wænōmēnæca ĩnō æi tæ contate gocantapa. ³⁶ Bodoga æi tæ contate taadonque goyongä tōmengä nānō goquīnō ante waodāni weocoo wæænō bee podōwadānitapa. ³⁷ Odibowænquidi wæænōmēmō ĩñōmō pōnōmenque pōñongante tōmengä mīñæ nē godāni godongāmæ nāni poncabo tōmānāni ĩñontobæ nanguī todinque ogæ tededānitapa. Itota bamōnengæ nanguī cæcā atamōnīpa, ante nāni adīnō ante pōñēninque Wængonguī ingante waa ate apænedānitapa.

³⁸ —Mōni quēwenguīnque ĩmpa, ante, Badogaa, ante tomōnīpa. Awēnē Wængonguī ēmōwo beyænque pōmi ĩninque bitō toquinque edæ Wængonguī bitō ĩmite waa cæcæcäimpa. Öönædē nē quēwengä pōnō piyænē cæcānō anguēnē. Æibæ pōni quēwēnongä ĩñōmō ñāö baī ēmongānō anguēnē. ³⁹ Ante nanguī ĩnāni godongāmæ godinque āmotamīni ante baī āñōnāni pancadāniya Paditeoidi ĩñōnāni inte Itota ingante,

—Nē Odōmōmi ēñēmi. Bitō mīñæ nē godāni ĩnānite wææ āmi apocænē ĩnānie.

⁴⁰ Āñōnānite tōmengä wæætē,

—Mīnitō ĩmīnate nāwangä āmopa. Waodāni pæ wēenedāni ĩninque dicacoo incæ botō ĩmote waa ate baī edæ yedæ āmaīnānīpa, ante Itota apænegacäimpa.

⁴¹ Ayæ pōnōmenque pōninque Eedotadēē gomō adinque Itota māññōmō quēwēnāni ĩnānite ante pōñēninque Ca ca wædinque, ⁴² ĩmaī angantapa. “Mīnitō ĩñōmō edæ ñōwoönæ mīni gānē pōnenguīnque botō ĩmote edonque pōni adinque Ao āmīni baī waa incædōnīpa. Incæte mīnitō, Æbānō cæte gānē pōnenguīmōö, ante edæ wē wodonte baī ĩ ĩninque mīnitō adāmaī ĩmīnīpa. ⁴³ ĩncayæ ate mīnitō ĩmīnate nē pīnāni incæ mīnitō wææ cæinca gānē pōnō tee mongate godāmæ wææ ongōnāni adinque mīnitō edæ ædō cæte tao wodīi wīnonguīmīnī. ⁴⁴ Botō mīnitō weca pōmo incæte mīnitō awincaque adinque, Wængonguī ñōwoönæ ponte æncæcäimpa, ante dicæ amīniyaa. Mānōmaī beyænque nē pīnāni ĩñōmō mīnitō ĩmīnate bæ tadāni tæ go wææñōmīnate wænōnāni wæncæmīnīpa. Ayæ wēñænāni wææ cæte ĩñōmō quēwēñōnānite tōmēnāni ĩnānite

edæ wænönäni wæncæðänimpa. Dica mīni mænongainca incæ bæ tadāni ate dica adocaque incæ wænömēnæca inō ongönāmaī ingæimpa,” ante Itota apænecäimpa.

*Wængonguī oncö tæiyæ waēmö bacæimpa, ante cæcampa
(Mäateo 21.12-17; Mäadoco 11.15-19; Wäö 2.13-22)*

⁴⁵ Ayæ Wængonguī oncö ñænæncönē yabæcönē go guidineque Itota māniñömö nē godonte æncæte ante nē mänāni inānite da tadongä tao goyönānite, ⁴⁶ Ayæ tōmēnāni inānite angantapa.

—Wængonguī beyæ iīmaīnō ante yewæmongatimpa. “Waadāni botö oncönē pö guidineque botö imote apænecæðänimpa,” ante Wængonguī angä incæte mīnitö wēnæ wēnæ cæmīni beyænque Wængonguī oncö incæ nē awēmö ö ænāni nāni womöincönē bai wentamö bapa töö.

⁴⁷ Ayæ iīmö iñö iīmö iñö Wængonguī oncö ñænæncönē yabæcönē go guidineque Itota odömönte apænecä eñēnānitapa. Māniñömö, Wængonguī quī, ante nē godönāni ñænænāni tönö nē odömönāni tönö tōmēnāni awēnēidi guiquēnē, Itota ingante wænönte wido cæcæimpa, ante anca cæyönāni, ⁴⁸ wadāni tōmānāni, Tōmengä æbänö odömongää, ante eñē cönāni adinque awēnēidi wæætē, Tōmengä ingante mönö ædö cæte wido cæquī, ante wædinque ñimpo cægadänimpa.

20

*Awēnē imipa, ante æcänö änaī, ante Itota ingante änānipa
(Mäateo 21.23-27; Mäadoco 11.27-33)*

¹ Iīncayæ ate Itota Wængonguī oncö ñænæncönē yabæcönē go guite waodāni inānite odömönte apænedinque Wængonguī Awēnē ingantedö ante watapæ apænecä eñēnānitapa. Apænecä eñēñönāni, Wængonguī quī, ante nē godönāni ñænænāni tönö nē odömönāni iñömö nē aadāni nāni Picæncabo tönö tōmengä weca ponte änānitapa.

² Ponte apænedinque,

—Æcänö nē angä inte bitö imite angä cæbii. Bitö imite æcänö, Nē ämi babipa, äna eñēninque cæbii.

³ Ante äñönānite Itota,

—Botö wæætē mīnitö imīnite ämo eñente apænemīni eñēmoedāni. ⁴ Wäö wodi iñömö quīnante æpænē guidongantawo, ante pönēmīni. Öönæde nē owocä angä eñente cæcantawoo. Waodānique änāni eñente cæcantawoo. Æbänö ante pönēmīni. Mīnitö wæætē apænemīni eñēmoedāni.

⁵ Äñongä tōmēnāni iñömö nāni caboque tededinque, “Iñæmpa mönö, Wængonguī öönæde inō angä Wäö eñente cæcampa, ämö bai Itota wæætē, ‘Quīnante tōmengä ingante pönēnāmaī imīni,’ ante mönö imonte piīncædongäimpa. ⁶ Ayæ wæætē, Waodānique änāni eñente cægacäimpa, ämo bai godongämæ ongönāni iñömö, Wængonguī beyæ nē apænecä Wäö wodi ingacäimpa, ante nē pönēnāni inte tōmānāni mönö imonte dicaca tacadāni wæncædömöimpa.”

⁷ Ante pönente wædinque tōmēnāni wæætē Itota ingante, Wa. Æcämē angä eñēninque Wäö wodi cægacäi, ante eñēnāmaī imönipa, änāni. ⁸ Wædinque Itota wæætē,

—Botö adobaī, Æcänö nē angä inte pönö äna eñēninque botö mänömaī cæboo, ante mīnitö imīnite apænedāmaī incæboimpa, angacäimpa.

*Nē aadāni inguēnēnāni incæ wiwa cæðänipa, ante
(Mäateo 21.33-44; Mäadoco 12.1-11)*

⁹ Ayæ godongämæ ongönāni inānite Itota, Wængonguī Awēnē æbänö cæcäa, ante eñencæðänimpa, ante imæca quēwēnāni nāni cæinö ante odömöninque iīmaī apænecantapa. “Onguīñängä adocanque yowementacodē minte pæyönte wadāni ömæ wite aate nē tä pedāni inānite, Botö yowementacodē incæ ömæ wite aedāni. Aayöminite botö, Mīnitö quī, ante pancamonga pönömo æncæminimpa, angä Ao änāni ate nē äcä iñömö edæ wantæpiyæ wabæca quēwencæ gocantapa. ¹⁰ Yowedepo iinque

bayedē nē cæcā ingante nē ēacā iñōmō, Bitō yowementacodē nē aadāni weca godinque pancamonga āmi æninqwe botō weca wæætē māmōmi æmoe, angā. Gote pongā adinque yowementacodē nē aadāni guiquēnē nē æncæ pōningā ingante bæi ongonte tæi tæi pāninqwe da tadōnāni ōmæpocā inte gocantapa. ¹¹ Ayæ wæætē nē ēacā iñōmō wacā tōmengā ingante nē cæcā ingante angā gote pongā adinque yowementacodē nē aadāni adobaī tæi tæi pānāni wæyongante, Guingo imonte wæcæcāimpa, ante godō wiwa cædāni wæyongante da tadōnāni ōmæpocā inte gocampa. ¹² Ayæ mēnaa inate da godongā ōmæpoda pōna adinque nē ēacā iñōmō wacā nē cæcā ingante angā gote pōñongante tōmēnāni godō mæ yete wido cædānitapa,” ante odōmōninque Itota godōmenque apænecantapa.

¹³ “Mānōmaī cædānīpa, ante ēñente wædinque yowementacodē nē ēacā iñōmō, ‘Botō iñōmō æbānō cæquēnēmo imoo, ante wædinque, Botō edæ iīmaī cæcæboimpa. Botō wengā onguīñængā botō nē waadecā iñongante da godōmo gocæcāimpa. Tōmēmo wengā da godōmo gocā adinque tōmēnāni wabānō guīñente wædinque ee abainānīpa,’ ante pōnēninqwe da godongā. ¹⁴ Gote dicæ pongā adinque yowementacodē nē aadāni guiquēnē, ‘Tōmengā ingampa. Wæmpocā māincoo iñī edæ iingā iñōmō nē ænguingā ingampa cæmōō. Mōnō edæ māo wænōmō wængā ate edæ mōnō quī babaimpa.’ ¹⁵ Ånewēninqwe tōmēnāni tōmengā ingante wæcæ cæte iñōmō yabæque wido cædinque godōmenque wænōnāni wængantapa.”

Ante Itota, Māninqwe ante apænebopa, ante tōmēnāni inānite angantapa. “Mānōmaī cædāni adinque yowementacodē nē ēacā iñōmō tōmēnāni inānite æbānō cæquingāā, ante pōnēmīni. ¹⁶ Tōmengā edæ do pōninqwe nē aaquēnēnāni inānite godō wænōninqwe wadāni inānite wæætē yowementacodē godongā æninqwe nē aadāni bacædānīpa.”

Itota mānōmaī angā ēñente wædinque godongāmæ ongōnāni iñōmō,

—Mānōmaī cædāmaī inguēnē ānewēē, ante wædānitapa.

¹⁷ Ininqwe Itota tōmēnāni inānite gomō adinque,

—Iñæmpa ēñēnāmaī cæmīni iñōmīnīte Wængonguī pānāmaī inguingāā, ante pōnēmīnitawo. Ininqwe mīnitō, Iīmaī ante quīnante yewæmongatimpa, ante pōnēmīni. “Dica ænte adinque, Wēnæ wēnæ inca, ante nē mænōnāni nāni wido cædinca incæ gomonga wæmonca inca ininqwe tāno nāni ñōnōnīca bæbængapa do bacapa,” ante yewæmongadānīpa. ¹⁸ Botō iñōmō mānīī dica wæmonca baī inōmo inte āmo ēñēninqwe nē wæcā iñōmō tōmengā iñōmō mānīncaā tæ go wææninqwe tobænte wæte baī botō ōnōwa gāānē ædæ wææncæcāimpa. Wæætē æcānō ingante Wængonguī pīinte mānīncaca tacacā inaa tōmengā guiquēnē quīēmē baī yaintai baī goquingānō anguēnē, ante pōnēmīniyaa, ante Itota apænægacāimpa.

¹⁹ Ante nē aaquēnēnāni nāni cæinō ante odōmōninque Itota apænecā ēñente wædinque nē odōmōnāni tōnō, Wængonguī quī, ante nē godōnāni ñænænāni iñōmō, Iñæmpa mōnō imonte pīinte angā awædō, ante pōnēnānitapa. Ininqwe tōmēnāni, Mōnō ñōwo pōnī tōmengā ingante bæi ongongæimpa, ante cædānitapa. Incæte tæcæ bæi ongongæ cædinque, Wadāni pīināni wæcæ wæ, ante wædinque ee adānitapa.

*Tæiyæ Awēnē nānō äintamō ante tededānīpa
(Māateo 22.15-22; Māadoco 12.13-17)*

²⁰ Ininqwe, Mōnō Itota ingante bæi ongōninqwe odōmāno gobedōnadodo awēnē nempo godōmō æninqwe tōmengā wæætē nē angā inte edæ Itota ingante apænte ancæcāimpa, ante ñænænāni incæ tōmengā ingante cōwā adānitapa. Ayæ wadāni inānite āninqwe, Mīnitō Itota mīñæ tee empote gote nōingā ante baī apænēdinqwe wæætē babæ cædāni. Babæ cæmīni beyæ tōmengā adodeque incæ wapiticæ tedecā ēñēninqwe mīnitō ocæ emænte ponte apænēmīni ēñencæmōnīpa, ānāni ēñente godinque ñænænāni nāni ānīnō baī babæ cædānitapa. ²¹ Ininqwe ñænænāni nāni nē da godōnīnāni iñōmō Itota weca pōninqwe,

—Awënë nē Odömömi ëñëmi. Bitö apænedö nö impa, ante do ëñëmönipa. Bitö ayömi mönö waocabo adoyömö pöni imönipa, ante adinque bitö tömämöni imönite adoyömö pöni cæbi æmönipa. Ayæ, Wængongui taadö ante bitö nö pöni odömömi imipa, ante ëñëmönipa. ²² Ìninqe apænebi ëñëmönii. Odömäno gobiedöno beyæ ante tæiyæ awënë Tetædo tiguitamö nänö änintamö ante æbänö wææ yewæmonte i, ante ëñencæte ante wæmönipa edæ. Godonte edæ waa cæte intawo. Wæætë wënæ wënæ cæte intawo.

²³ Äñönänite Itota iñömö, Tömënäni wënæ wënæ ancæte ante babæ cædänipa, ante do ëñente wædinque,

²⁴ —Deënadio tiguitamö odömömini aboedäni. Æcänö awinca bai yewæmonte badonte i. Æcänö ëmöwo ante yewæmonte ongö, ante edæ apænemini ëñëmoedäni.

Äñongante,

—Awënë Tetædo awinca bai yewæmonte badonte impa. Adocä ëmöwo ante yewæmonte ongö amönipa.

²⁵ Ante apænedäni ëñëninque,

—Awënë Tetædo qui i ininqe edæ Tetædo ingante godongäimpa. Wæætë Awënë Wængongui qui i ininqe Wængongui ingante godongui i apa anewëminii.

²⁶ Ante Itota tömänäni ayönänite nö apæneca ëñente wædinque ñænänäni nani da pönöninäni wæætë, Mönö ædö cæte piingui, ante guingo imonte wædinque pæ wëenegadänipa.

Ædö cæte ñäni ömæmonguii, ante wædänipa

(Mäateo 22.23-33; Mäadoco 12.18-27)

²⁷ Tadoteoidi nē, Waocä wæninque ñäni ömæmönämaï æmæwo wængampa, ante nē anewänäni inte Itota weca pöninque, Möni änö ante apænebi ëñëmaimönipa, änänitapa.

²⁸ —Awënë nē Odömömi ëñëmi. Mönö beyæ ante Möitee wodi iïmaï ante wææ yewæmongacäimpa. Onguiñægä monte ate wëñæ tapæidämaï inte wængä ininqe tömengä tönñacä incæ owæmpoingä ingante möninque, Botö tönñacä wodi wänäni wæætë pæcædänipa, ante tapæicæcäimpa, ante yewæmongacäimpa. ²⁹ Ìninqe wädäni iïmaï cædänitapa, ante apænemöni ëñëe. Edæ önompo æmæmpoque go mengäa nani caipæ iñönänite bamoncadengä möninque wëñæ tapæidämaï manguiwëninque edæ näñe wængä. ³⁰ Ate ayæmengä wææ adocä ingante möninque wëñæ tapæidämaï inte näñe wængä. ³¹ Ayæ wææ wacä möninque adobaï näñe wængä, ayæ wææ wacä möninque näñe wængä, ayæ wææ wacä möninque näñe, ayæ wææ wacä möninque näñe, ayæ wææ wacä möninque näñe wængampa. Önompo æmæmpoque go mënaa inäni owæmpoingä ingante möninque edæ wëñæ tapæidämaï inte edæ tömänäni näñe wänäni. ³² Ate onquiyægä tömengä näñe wængä. ³³ Ìninqe, Mönö ñäni ömæmonguiönæ, ante mini äönæ iñonte mäningä owæmpoingä iñömö æcänö nänöogægä baquingäa. Edæ tömengä ingante iñömö edæ tömänäni manguiwengadänipa.

³⁴ Äñönänite Itota,

—Inguipoga quëwëninque edæ mini waocabo iñömö do möminipa. Wacä ingante do godö ñänömini mongampa. ³⁵ Wæætë, Miinguiipoga bayonte iinänique eyepæ inte ñäni ömæmonte öönädë æite quëwencædänipa, ante Wængongui nänö nē angainäni iñömö tömënäni mönämaï ininqe wädäni inänite godö ñänönämaï incædänipa.

³⁶ Ayæ Wængongui anquedoidi bai inönäni inte tömënäni Wængongui nänö nē angainäni iñömö ædö cæte wæætë wænguinäni. Tömënäni nē ñäni ömæmongainäni inönäni inte edæ Wængongui wëñænäni inänipa. ³⁷ Wæætë Möitee wodi incæ ocäñeque bæcoñeque ante nänö yewæmongainta adotaa yewæmöninqe, Waodäni dobæ ñäni ömæmonte quëwencædänipa, ante edonque odömongacäimpa. Tömengä iïmaï ante yewæmongacäimpa. Mönö Awënë inongä iñömö Abadäo Wængongui ingaingä inte ayæ Itæca Wængongui ingaingä inte adocä Aacobo wodi Wængongui ingänö angüënë, ante yewæmongacäimpa. ³⁸ Ìñæmpa Wængongui iñömö nē quëwänäni Wængongui inongä inte tömengä nē wængainäni Wængongui inämaï ingampa. Wæætë tömengä ayongante do wængainäni incæ tömänäni mñänäni quëwänäni.

- ³⁹ Ante apæneyongante nē odömönāni pancadāniya,
—Awënë nē Odömömi ēñēmi. Bitö nöingä ante apænebi awædö, ante apænedānitapa.
⁴⁰ Ayæ wadāni tömänāni guiñente wædinque godömenque änāmaï ingadānimpa.

*Codito æcänö Pæingä inongä ingää, ante
(Mäateo 22.41-46; Mäadoco 12.35-37)*

- ⁴¹ Ayæ tömēnāni inānite Itota,
—Awënë Dabii wodi Pæingä inongä wææ Codito ingampa, ante quinante änānii, ante pönēmīni, angantapa. ⁴² Ìñæmpa Dabii wodi incæ tömengä nänö ämotamīni äintaa iïmaï ante yewæmongacäimpa.
“Botö Awënë ingante apænedinque Awënë Wængonguï incæ iïmaï ante apænegacäimpa. Bitö botö tömēmæ inö tæ contate a ongöe.
⁴³ Ongöñömite botö bitö imite nē piināni inānite bæ tate cæbo ate,
bitö önöwa gäänē ongönāni inānite pinä gæwacæbiimpa,” ante Awënë Wængonguï apænegacäimpa.
⁴⁴ Codito nē Awënë ingampa, ante awënë Dabii wodi nänö nē angaingä inongä inte edæ adocä Codito iñömö ædö cæte näemæ Awënë Dabii wodi Pæingä inguingää. ante pönenguēnē änewēmīni, ante Itota angacäimpa.

*Nē wææ odömönāni inānite Itota püingampa
(Mäateo 23.1-36; Mäadoco 12.38-40; Odoca 11.37-54)*

- ⁴⁵ Ayæ tömänāni ēñē cöñönānite tömengä miñæ nē godānique inānite Itota apænecantapa.
⁴⁶ “Cædāmaï, ante wææ ante nāni yewæmongainta nē ate odömönāni inānite mīnitö gomö aedāni. Tömēnāni iñömö doyæncoo waëmoncoo wēñate mongænte todānipa. Waodāni nāni godonte æiñömö cægöñönānite wadāni pö bee tēninque tömēnāni inānite, Nē odömömi, bitö imite waa amönipa, ante apænedāni ēñēninque edæ nē odömönāni iñömö nanguï todānipa. Ayæ tömēnāni odömöincönē go guidinque tömēnāni nāmanque ante pönēninque waëmompaa pönī tæ contate todānipa. Ayæ ææmæ becæ godinque tömēnāni, Botö täno bete tocäimpa, ante waëmompaa pönī tæ contate bete todānipa. ⁴⁷ Ayæ owæmpoināni oncö yo mongænte bai cædinque ö æwēnāni inte nē wææ odömönāni iñömö, Botö imote waa acædānimpa, ante cædinque Wængonguï ingante nöingä apænete bai cædinque babæ cædinque wantæpiyæ tededānipa. Tömēnāni edæ nāni nanguï pönī pante wæquinque mänömaï nämä beyænque ante cædānipa, ante adinque mīnitö iñömö ee gomö aedāni,” ante Itota wææ angacäimpa.

21

*Owæmpoingä incæ, Wængonguï qui, ante godongampa
(Mäadoco 12.41-44)*

- ¹ Itota Wængonguï oncönē ongonte gomö ayongä nē nanguï eadāni, Wængonguï qui, ante nāni wēnoncadedē pö daga daga wēnāni acantapa. ² Ayæ ayongä onquiyängä owæmpoingä ömæpocä inte önontamonque mentamonga pö daga wengä. ³ Adinque Itota iïmaï ante apænecantapa.

—Näwangä ante apænebo ēñēedāni. Wadāni tömänāni wædænque pönī godonte bai wīi eyepæ daga wēñönāni iingä owæmpoingä iñömö ömæpocä inte wædongä incæte godömenque nanguï godonte bai godongä abopa. ⁴ Tömēnāni nanguï eadāni inönāni inte, Quëwenguinta impa, ante cö cædinque tömēnāni nāni wīi æinentaque ayæ ongöintaque godönānipa. Ìingä ömæpocä ingä guiquēnē tömengä nänö quëwenguinta incæ, Wængonguï qui bacäimpa, ante tömanta edæ daga wengampa, ante Itota apænegacäimpa.

*Wængonguï oncö ñæncæncö bæ tate bacäimpa, ante
(Mäateo 24.1-2; Mäadoco 13.1-2)*

⁵ Wēēnēnedē Wængonguī oncō ñænencō mænōninque wadāni dicacoo waēmoncoo pōnī tee bādāni waa ongoncadompa. Ayæ wacoo waēmoncoo pōnī ænte pōninque, Wængonguī quī impa, ante pædæ godōnāni ongōnompa. Nōwo iñōmō Itota miñæ nē godāni pancadāniya gomō ayōnāni, Dicacoo tōnō wadāni waa pōnī nāni ænte pōnoncoo waēmoncoo pōnī ongō amōnīpa, ante tededānitapa. Tedyōnānite Itota,

⁶ —Mānīncoo miini acoo incæ iincayæ ate tōmanca bæ tadāni wæænca adinque panguimæ panguimæ godinque dica adocaque pōnī incæ wænōmēnæca ongōnāmaī ingæimpa, ante apænecacāimpa.

Oo iinque bacæimpa, ante æbānō ate eñenguī, ante (Māateo 24.3-28; Māadoco 13.3-23)

⁷ Mānōmaī apænecā eñēninque tōmēnāni wæætē,

—Awēnē nē Odōmōmi eñēmi. Mānī bitō ānīnō ante æyedēnō iinque baquī, ante eñencæte ante wāmōnīpa. Ayæ, Īimaī cæbo ate mīnitō, Oo pōnī impa, ante eñencāmīnīmpa, ante Wængonguī æbānō mā cæquingāā, ante apænēbi eñēmōnie.

⁸ Āñōnāni Itota, “Wapiticæ odōmōñōnāni mīnitō wæætē, Mōnō oda cædāmaī ingæimpa, ante nāmā wææ aedāni. Edæ iīmaī baquī ī ataqeedāni. Wadāni nanguī ināni ponte botō emōwo ante apænedinque, ‘Coditobo ĩmopa,’ ante babæ ante tedequināni inānīpa. Ayæ, ‘Oo pōnī impa,’ ante ponte nanguī ināni tedequināni inānīpa. Mānōmaīnō ante ponte tedyōnānite mīnitō wæætē tōmēnāni miñæ tee empote godāmaī ĩmæwedāni. ⁹ Ayæ, Wabæca awēnē tōnō pō bee tēninque wæætedō wæætē cædapa, ante tededāni eñencāmīnīmpa. Ayæ, Adobæca quēwēninque incæ awēnē ingante wido cæcæte ante ængæ gantidānīpa, ante tededāni eñēninque mīnitō iñōmō edæ guīñēnāmaī ĩedāni. Mānōmaī edæ tāno cōwē bacæimpa. Incæte iinque baōnæ botō āōnæ æiquedō ponguī.”

¹⁰ Ante apænedinque Itota godōmenque apænecantapa. “Adobæca quēwēnāni iñōnānite wabæca quēwēnāni ponte bee tēninque guēadō guēa cæquīnāni inānīpa. Adobæca awēnē odeye nempo quēwēñōnānite wabæca awēnē odeye nempo quēwēnāni māmō bee tēninque guēadō guēa cæte wænonte wænguīnāni inānīpa. ¹¹ Ayæ wayōmō wayōmō goinque nanguī pōnī ocæ ocæ cæcæimpa. Ayæ waodāni nāni cæīnente wænguinque cænguī incæ tōmāā capo wængæimpa. Ayæ quingæ nāni wodonte wēnæ wēnæ inte wæwenguīmāmo incæ edæ do pongæimpa. Edæ ancaī nāni guīñenguīmāmo edæ pongæimpa. Ōōnædē iñōmō nāni wo go wo go cæwēnenguīmāmo edæ ate baī bacæimpa.”

¹² Ayæ apænedinque Itota, “Mānīmāmo nāni guīñenguīmāmo tōmāmāmo ayæ pōnāmaī iñonte mīnitō ĩmīnite togænte yao ongonte tōmēnāni odōmōincōnē ænte go guīdinque apænte āninque mīnitō ĩmīnite māo tee mōnecædānīmpa. Ayæ botō emōwo beyæ mīnitō ĩmīnite tōmāmæ awēnēidi odeyēidi weca ayæ pancabaa awēnēidi gobedōnadodoidi weca ænte māodāni gote gongæncāmīnīmpa. ¹³ Mīnitō awēnēidi weca godinque gongænte apænemīni eñēninque awēnēidi incæ, Itota æcānō ingāā, ante eñencædānīmpa. ¹⁴ Īinque mīnitō ĩmīnite awēnēidi weca ayæ ænte godāmaī iñedē incæ mīnitō iīmaī ante nāmāneque pōnēedāni. Botō awēnē weca ongōninque æbānō ante wææ anguīmoo, ante edæ wædāmaī incæboimpa, ante piyænē cædāni. ¹⁵ Īñæmpa botō pōnō nō apænēbo eñēnīmīni inte mīnitō wæætē adodō ante apænecāmīnīmpa. Mānōmaīnō ante apænemīni eñēninque nē piñāni guīquēnē nō pōnī miini apænedō ante ædō cæte wido cæquīnānī. Wæætedō wæætē ædō cæte anguīnānī. ¹⁶ Mīnitō mæmpoidi incæ mīnitō tōñīñadāni incæ mīnitō guīdēnāni incæ mīnitō æmigoidi incæ, Īngā ingampa, ante godō odōmōninque mīnitō ĩmīnite wadāni nempo pædæ godōnāni ō æncædānīmpa. Æninque pancamīniya ĩmīnite godōmenque wænōnāni wænguīmīni ĩmīnīpa. ¹⁷ Ayæ, Coditoidi ĩmīnipææ, ante tōmānāni botō emōwo beyænque mīnitō ĩmīnite nanguī piñcædānīmpa. ¹⁸ Incæte mīnitō baō incæ ocaguī incæ adoguinque incæ

æmæwo ewēnāmaī ingæimpa. ¹⁹ Īninque mīnitō botō ĩmote pīināmaī inte wæntædāmaī inte ee cæmīni ĩninque botō æmo beyænque quēwencæmīnīmpa.”

²⁰ Ante apænedīnque Itota godōmenque apænegacāīmpa. “Wabæca tontadoidi pōnīnque Eedotadēē godongāmæ wææ ongōnāni adīnque mīnitō, Bæ tate nāni wido cæquīmāmo oo pompa, ante do edæ ēñencæmīnīmpa. ²¹ Mānōmaī cædāni adīnque Oodeabæ quēwēmīni ĩñōmō ānanquidi do wodii wīnonte æibæwedāni. Ayæ Eedotadēē quēwēmīni ĩñōmō edæ yabæque taobæwedāni. Ayæ yabæque quēwēmīni inte Eedotadēē ĩñōmō pō guīdāmaī ĩmæwedāni. ²² Māniñedē edæ Wængonguī nānō panguīōnæ incæ Wængonguī beyæ nāni yewæmonte angaiōnæ incæ ĩnque baquīnō anguēnē. ²³ Māniōnæ ĩnque bayedē edæ yædēmadā ĩnāni tōnō goōmæ nē gānōnāni tōnō tōmēnāni nāni wæquīmāmo baquīnō anguēnē. ĩmæca quēwēnāni edæ māniñedē nanguī pōnī caate wæquīnāni ĩnānīpa. Idægoidi ĩnānite edæ nanguī pōnī pīinte cæquīnō anguēnē. ²⁴ Pancadāniya ĩnānite yaēmenca wido tadāni wænguīnāni ĩnānīpa. Ayæ pancadāniya ĩnānite bæi ongonte māo wabæca ænte goquīnāni ĩnānīpa. Wængonguī doyedē apænedīnque, Oodeo ĩnāmaī ĩnāni ĩnque nāni cæpoga cæcædānīmpa, angacāīmpa. ĩninque tōmengā nānō angaimpoga ĩnque baganca oodeoidi ĩnāmaī ĩnāni incæ Eedotadēē ĩñōmō pōnīnque nanguī cægōnīnque pīnā gāwate baī bæ tadāni wæquīmīni ĩmīnīpa, ante apænebo ēñēmaīmīnīpa,” ante Itota apænegacāīmpa.

Waobo ēñagaīmo inte botō ĩmaī ponte cæcæboīmpa, ante (Māateo 24.29-35, 42-44; Māadoco 13.24-37)

²⁵ Ayæ, “Oo pōnī ĩmpa, ante edæ ēñencæmīnīmpa, ante cædīnque Wængonguī angā ate nænque tōnō apāicā nēmoncoo mā pōnī edæ wacoo baī bacæīmpa. Inguīpoga guīquēnē ñænængade pōnī gāwapæntibæ tadōmengadæ mængonta mængonta cædīnque nanguī ā ēñente wædīnque tōmāmæ quēwēnāni edæ, Æbānō cæquīmōō, ante edæ nanguī pōnī guīñente wæquīnāni ĩnānīpa. ²⁶ Ayæ waodāni æmō ayōnāni oōnædē tæī ongongaincoo incæ wancæ wancæ cæte baī wapiticæ go ate adīnque tōmēnāni ancaī guīñente wædīnque, Inguīpoga mōnō quēwēñōmō edæ quīēmē baī bacæīmpa, ante wædīnque ĩñontobæ nangæ bate wæcædānīmpa. ²⁷ Māniñedē edæ botō Waobo nē ēñagaīmo inte boguīmancodē pōnīnque tæī pōnī pīñæmo ĩninque edæ ñāō apāite baī wæmō ēmonte wææmo acædānīmpa. ²⁸ ĩninque mānōmaī tæcæ ba ate wædīnque mīnitō ocabo guīnī æmencadīnque, Badogaa, ānīnque edæ, Oo pōnī mōnō abæ tawænte goquīnque ĩmpa, ante āmæwedāni,” ante Itota apænegacāīmpa.

²⁹ Ayæ, Wængonguī Awēnē oo poncæcāīmpa, ante æbānō ēñenguīī, ante ēñencædānīmpa, ante Itota ĩmæca quēwēnāni nāni cæīnō ante odōmōnīnque ĩmaī apænecantapa. “Īgowæ aedāni. Ayæ quīwæmē incæ tōmāwæ aedāni. ³⁰ Ōñabo tānā nā boca adīnque mīnitō ĩñōmō, Ōñabo nānō bocaīnepo inte nænque nāwantedæ baquīnque bocapa, ante pōnēnīnque edæ do ēñēmīnīpa. ³¹ Ayæ adobaī mānīnō botō apænedō baī do edæ ba adīnque mīnitō, Wængonguī Awēnē Odeye do odemō pōnī ongōnīnque inguīpoga oo poncæcāīmpa, ante ēñencæmīnīmpa,” angacāīmpa.

³² Ayæ apænedīnque Itota, “Nāwangā āmopa. Ñōwomīni mīmīni quēwēnīnque wænte godāmaī ĩñōmīni edæ mānīnō botō ānīnō baī tōmānō edæ do ĩnque baquīnō anguēnē. ³³ Edæ oōnædē ongōñōmō inguīpoga tōnō wo ewente baī dæ ba incæte botō angaiñonque guīquēnē dæ badāmaī inte edæ cōwē tæī ongongæīmpa,” ante apænecantapa.

³⁴ Ayæ, “Mīnitō ĩñōmō edæ, Mōnō quīngāmē baī wīwa quēwēmō ĩninque mōnō mīmō ōmædēmō bate wæcæ wæ, ante nāmā wææ aedāni. Tī nāmæ bete quīdi quīdi dowānīnque mīmō ōmædēmō bacæ wæ, ante nāmā wææ aedāni. Ayæ, Inguīpoga quēwēmō inte quīēmē beyænque wædīnque mīmō ōmædēmō bacæ wæ, ante nāmā wææ cæedāni. Mīmō ōmædēmō inte wæyōmonte māniōnæ wīī ĩñontobæ pō wæcæīmpa, ante mīmō ōmædēmō badāmaī ingæīmpa, ante nāmā wææ cæedāni. ³⁵ ĩñæmpa waodāni tōmānāni inguīpoga tōmāmæ quēwēñōnānite edæ ĩñontobæ ba wæcædānīmpa.

³⁶ ĩninque woyowotæ itædē cōwē wānō cōnīnque mīnitō Wængonguī ingante cōwē

apæneedäni. Mīnitō, Mānīnō iinque ba adinque mōnō eyepæ inte aamō cæte wodi winongæimpa, ante Wængonguī ingante apæneedäni. Ayæ, Waocä nē ēñagaingä weca mōnō eyepæ gongængæimpa, ante adobaī edæ Wængonguī ingante apæneedäni,” ante Itota angacäimpa.

³⁷ Itota māniñedē Wængonguī oncō ñænæncōnē iimō iñō iimō iñō yabæcōnē go guite odōmonte apænecä ēñänäni ate tömengä wæætē gāwadecä iñō gāwadecä iñō tao godinque Odibowænquidi æite owodongäimpa. ³⁸ Ayæ tömengä Wængonguī oncō ñænæncōnē yabæcōnē ongonte apænecä ēñencæte ante tömänäni wæætē baänæ iñō pō baänæ iñō pō bee tēnōnānimpa.

22

Itota ingante bæi ongongæimpa, ante cædānīpa

(Māateo 26.1-5, 14-16; Māadoco 14.1-2, 10-11; Wäö 11.45-53)

¹ Pāö yedæ æmpoquī ömæmō ī nāni cænguīönæ ante oodeoidi, Patowa mōnō wodo pænta gogaïönæ ææmæ oo pōni bacæimpa, ante cædōnānimpa. ² Wængonguī quī, ante nē godōnāni ñænænāni tōnō nē odōmōnāni iñōmō, Itota ingante mōnō wido cæcæimpa, ante cōwē cædōnānimpa. Incæte, Wadāni pīnāni wæcæ wæ, ante guīñente wædinque tömēnāni māniñedē, Mōnō æbānō cæte awēmō bæi ongongæimpa, ante wægadānimpa.

³ Ayæ Itota mīñæ nāni, Dote, ante gocabo iñōnāni Codaa Icadote nāni ānongä adocä inongäimpa. Tatāna māniñedē tömengäa pō guicantapa. ⁴ Iinque nē godōnāni ñænænāni tōnō Wængonguī oncō nē wææ wānōnāni awēnēidi iñōmō godongāmæ ongōñōnāni Codaa tömēnāni weca godinque iimāi ante apænecantapa. Itota æyōmōnō ongongäa, ante botō æbānō odōmonte pædæ pōnōmo ate ænguīmīni. Angä ēñēninque tömēnāni tömengä tōnō mānīnō ante godongāmæ tedegadānimpa. ⁵ Tömengä, Odōmonte pædæ pōnōmo æncæmīnimpa, ante apæneyongante tömēnāni nanguī todinque wæætē, Tiguitamō padatamō pōnōmōni æncæbiimpa, ante apæneedäni. ⁶ Ēñēninque tömengä Ao ante wadæ godinque, Wadāni adāmaī iñōnānite botō æbānō cæte iināni inānite awēmō odōmonte godōmo ænguīnāni, ante cōwä adinque cægacäimpa.

Awēnē Itota pāö tōnō owæta godongä cænte bedānīpa

(Māateo 26.17-29; Māadoco 14.12-25; Wäö 13.21-30; 1 Coodintoidi 11.23-26)

⁷ Pāö yedæ æmpoquī ömæmō ī nāni cænguīönæ iñōnte wodo pænta gogaïönæ baī ī iinque Patowa ææmæ bete cænguīönæ do iinque batimpa. Māniönæ iñōnte oodeoidi cōwē cæningä codotedo ingante wænōninque, Wængonguī quī, ante godonguēnēnāni inōnānimpa. ⁸ Iinque Pegodo tōnō Wäö inate da godōninque Itota iimāi angantapa.

—Mīnatō inōnō gote, Patowa ææmæno impa, ante ænōmīna ate mōnō cængæimpa.

⁹ Angä ēñēninque tömēna,

—Æcōnēnō go guite æænonguīmōna, ämii.

¹⁰ Äñōnate tömengä wæætē,

—Waa aeda. Mīnatō māniī nāni quēwēñōmō go guiyōmīna onguīñængä incæ cadabodē æpæ iyænte næænte gocä adinque tömengä ingante edæ tee empote goeda. Tee empo goyōmīna tömengä oncōnē go guicä adinque, ¹¹ mīnatō wæætē oncō nē ēacä ingante iimāi ante äeda. “Mōnō Awēnē nē Odōmongä incæ bitō imite iimāi angampa. Bitō æcōnēnō ämi guidinque botō nē ēmiñænāni tōnō Patowa ææmæ ante cænguīmōni, angampa,” ante apæneedä. ¹² Mānōmainō ante apænemīna ēñēninque nē oncō ēacä iñōmō æmongapaa mæi goyōmīnate oncō ñænæncō awæmpaa do nānō cōnōincō odōmongä adinque mīnatō mānincōnē tömäa eyepæ cæcæmīnaimpa, ante Itota da godongä godatapa.

¹³ Mānōmaī angä godinque apæneyōna, Itota nānō änō baī adobaī tömäa batimpa, ante adinque tömengä nānō nē ēmiñæna, Patowa ææmæno impa, ante cædatapa.

¹⁴ Iinque ææmæno nāni cæñedē iinque bayonte Itota awæmpaa gäänē pō tæ contayongä tömengä nānō nē da godōnīnāni godongāmæ pō tæ contadāni. ¹⁵ Adinque Itota tömēnāni inānite apænecantapa.

—Botö iñömö caate wæte wænāmaï iñedē mīnitō tönō godongāmæ Patowa ante cænte tocæimpa, ante cæinente nanguï wætabopa. ¹⁶ Apænebo ëñeedāni. Botö Wængonguï Awënë inōmo inte Awënë Odeye badinque māniñedē ate waodāni inānite æmæwo pōni ata cæpocæboimpa. Māninganca botö ata cæpoganca botö ñōwo, Wængonguï Awënë dodāni inānite ata cæpodinque wodo pænta gogacæimpa, ante Patowa ææmæno ñōwo iinque cænca cæbopa. ¹⁷ Äninqe ayæ Itota bequimæ owætaca bæi ongonte æninqe Wængonguï ingante waa ate apænedinque tōmēnāni inānite angantapa.

—Mīnitō owæta iinta æninqe godongāmæ beedāni. ¹⁸ Ämo ëñeedāni. Yowepæ ñōwo bedinque botö Wængonguï Awënë inōmo inte Awënë Odeye botö baganca edæ ñōwo æmæwo bebopa.

¹⁹ Ante apænedinque Itota pāo æninqe Wængonguï ingante waa ate pōnente apænedinque pā æninqe pædæ godōninqe apænecantapa.

—Ïi pāo botö baö baï impa. Botö, Mīnitō quëwencæminimpa, ante botö baö godonte baï cædinque wæncæboimpa. Botö pā ænte pædæ pönōmo baï mīnitō iincayæ ate botö imote ante pönēninqe adobaï cæte wacā ingā wacā ingā pædæ godonte cæedāni, angantapa. ²⁰ Mänōmaï angā iinque cænāni ate owæta adobaï ænte apænedinque tōmengā,

—Botö wepæ iimæ baï impa. Wængonguï do apænedinque, Botö pönō cæbo ate mīnitō Ao ämīni ininque mōnō godongāmæ waa cæte quëwengæimpa, angacæimpa. Ñōwo adobaï botö wepæ mīnitō beyæ pædæ godōmo ate mīnitō Ao ante ämīni ininque mōnō godongāmæ waa cæte quëwengæimpa. ²¹ Incæte botö imote nē pönō odōmonte pædæ godonguingā iñömö botö önompo gäänē cænguimpaa adoyömö ongö aedāni. ²² Wængonguï do nänō angainō baï botö nē Waobo ëñagaimo inte wænte gocæboimpa. Nāwangā impa. Incæte botö imote nē pönō odōmonte pædæ godonguingā iñömö edæ tōmengā nänō nanguï wæwenguinge edæ mänōmaï cæcā ingampa tōö.

²³ Ante Itota apæneyongā tōmēnāni nāni caboque tededinque edæ, Æcänö ingante ante apænecää, ante wædānitapa.

Æcänö yæcado ongonguingää, ante tededänipa

²⁴ Ayæ adobaï, Mönö cabo iñōmonte æcänö ñænængä inte edæ yæcado ongonte baï nē angā baquingää, ante wædinque tōmēnāni wæætedö wææte äninqe nanguï tedewēnāni. ²⁵ Adinque Itota tōmēnāni inānite, “Idægoidi ināmaï ināni awënëidi iñömö tōmēnāni nempo quëwēnāni inānite, Botö ämo ëñente cæedāni, ante nanguï piinte änewēnānipa. Incæte nē piinte änewēnāni iñönānite tōmēnāni nempo quëwēnāni wææte, Mönitō awënëidi nē Pönö Cædāni inānipa, ante babæ ante pemöwēnānipa. ²⁶ Wææte mīnitō guiquēnē inguipoga awënëidi nāni cæi baï cædāmaï iedāni. Mīni cabo incæ nē yæcado ongongā inte yæmiñængä baï baquēnengä ingampa. Ayæ nē angā inongā inte wacā beyæ nē cæcā baï baquēnengä ingampa. ²⁷ Æbänö ante pönēmīni. Æcänö ingante, Awënë baï ingampa, ante nanguï waa adānii. Nē cænguimpaa gäänē tæ contate cængä ingante waa adānitawo. Wææte awënë beyæ ante ænte māmö pönongā ingante waa adānitawo. Ïñæmpa nē contacā ingante nāwangā waa adānipa. Incæte botö iñömö önömoque baï cædōmo inte mīnitō weca pōninqe nē ænte māmö pönongā baï inte nē pönö cædōmo imopa,” ante Itota apænecantapa.

²⁸ Ayæ apænedinque, “Botö caate wæwēñōmote mīnitō iñömö botö tönō godongāmæ iñacabo cædimīni imīnipa. ²⁹ Ininque botö Mæmpo botö imote, Awënë Odeye bacæbi-impā, ante nänö pönö cægaï baï botö wææte, Botö tönö iñacabo cædimīni inōmīni inte mīnitō awënë odeyeidi adobaï bacæminimpa, ante pönö cæcæboimpa. ³⁰ Ayæ, Botö nē Awënë Odeye bayōmote mīnitō botö awæmpaa gäänē tæ contadinque godongāmæ edæ cænte becæminimpa, ämopa. Ayæ idægoidi önompo tipæmpoga go mencabodāniya iñönānite mīnitō awënë tæ contaimpaa tæ contadinque tōmēnāni inānite nē apænte ämīni bacæminimpa,” ante tōmengā miñæ nē godāni inānite Itota apænegacæimpa.

*Pegodo incæ, Dicæ abogaa, ante anguingä ingampa, ante
(Mäateo 26.31-35; Mäadoco 14.27-31; Wäo 13.36-38)*

³¹ Itota ayä,

—Timönö, ëñëmi. Timönö, bitö imite ämopa. Waocä tömëmö ænte wanca wanca cæcä ontapo wææ bai minitö iminite Tatäna incæ bæi ongonte wænæ wænæ cæcæte ante angampa. ³² Wæætë, Bitö wede pönëninque nangæ badämaï incæbiimpa, ante botö do edæ Wængonguï ingante apænetabopa. Ìninqe bitö iñömö edæ iincayä ate botö gämænö ocæ ëmænte ponguïmi imipa. Pöninque, Bitö tönïñadäni wæætë tæï piñænäni bacædänimpa, ante tömënäni inänite godö töö æmænte bai cæe.

³³ Ante apænecä ëñëninque Timönö wæætë,

—Awënë ëñëmi. Bitö imite tee mönedäni ininqe botö do bitö tönö go guibaïmopa. Bitö imite wænönäni wæmi ininqe edæ botö bitö tönö do wæmaïmopa.

³⁴ Ante apænecä ëñëninque Itota angantapa.

—Pegodo, bitö imite ämo ëñëe. Tawadiya ñowoönæ ayä pedämaï iñonte bitö botö imotedö apænedinque, Dicæ abogaa, ante mempoga go adopoque anguïmi imipa, ante Itota apænegacäimpa.

Botö caate wæquimämo oo bacäimpa, angampa

³⁵ Ayä wæætë tömënäni inänite,

—Botö wëñëñedë minitö iminite da godöninque, Godonte äinta da wente ænguincadedë ænämaï inte goedäni, antabopa. Mäincoo da wente ænguï næænämaï inte awæncata næænämaï inte goedäni, ante botö da godömo godinque minitö ænguënëmïni inte wämïnitawo.

Äñongante,

—Ænguënente wædämaï intamönipa, änänitapa.

³⁶ Itota wæætë tömënäni inänite,

—Ñowo iñömö æcänö godonte äinta da wente ænguincade mäna tömengä mänincade næænte gocæcäimpa. Ayä mäincoo da wente ænguï adobaï næænte gocæcäimpa. Ayä yaëmë mänämaï ingä inte weocoo yacoo në mäningä wacä ingante godonte æninqe wæætë yaëmë godonte æncæcäimpa. ³⁷ Ìmaï ante dodäni näni yewæmongainö bai botö imote cæcædänimpa. “Në ëñënämaï näni cæcabo iñönänite tömengä adocä inongä ingampa, ante änänitapa,” ante yewæmongatimpa. Mänömaï impa, ante pönëninque botö iïmaï ämopa. Botö imote æbänö cæquïnänii, ante näni yewæmongainö bai botö imote tömänö iinqe cæquïnö ænguënë. Botö imote ante näni yewæmongainö bai cædinque ñowo iñömö edæ eyepæ ba aedäni.

³⁸ Ante apæneyongante tömënäni,

—Awënë, yaëmë mëa më ongö ae.

Änänitapa. Tömengä wæætë,

—Idæwaa, angacäimpa.

Guetëmänii iñömö Itota Wængonguï ingante apænecampa

(Mäateo 26.36-46; Mäadoco 14.32-42)

³⁹ Ìninqe apænedinque Itota wadæ godinque cöwë nänö æidö bai æidinqe Odibowænquidi go æiyongante tömengä miñæ në godäni tee empo æigadänimpa. ⁴⁰ Æi cöwë nänö æi ongöñömo pöninque tömënäni inänite,

—Minitö ñowo Wængonguï ingante nämä beyænque apænedinque, Mönitö wii wænæ wænæ cæinëmöni bacæmönimpa, ante apæneedäni.

⁴¹ Äninqe Itota wadæ godinque dica mönö wido cæganca mäninganca godinque da guicapodinque Wængonguï ingante apænecantapa. ⁴² Apænedinque, “Mæmpo ëñëmi. Bitö Ao äninqe edæ ti nä wænguïmæ bai ö ænte bai cædinque botö imote edæ, Wænämaï incæbiimpa, ämi ininqe botö edæ waa tobaimopa. Incæte botö änönö bai wii cædinque wæætë tömëmi änönö bai cæe, ämopa.”

⁴³ Ante apæneyongä Wængonguï öönädë nänö da pönöningä anquedo Itota weca ponte a ongöninque, Tæï piñænte entawencæbiimpa, ante cædinque pönö töö æmænte

baī cæcantapa. ⁴⁴ Incæte Itota iñömö edæ nanguī wæwente badinque Wængonguī ingante ancaa apæneacă iinque edæ tōmengä owæmä wepæ gowete baī tadinque onguipoiya petæ petæ wææntapa.

⁴⁵ Ayæ iinque apænedinque tōmengä ængæ gantite godinque tōmengä miñæ nē pōnināni weca ponte ayongä tōmēnāni nanguī wæwente wædinque mö ñōnāni.

⁴⁶ Adinque edæ tōmengä tōmēnāni inānite,

—Iñæmpa möwo mömīnii. Edæ ængæ gantidinque, Wēnæ wēnæ cæinente badāmaī incæmōnimpa, ante Wængonguī ingante apæneedāni, angacäimpa.

Itota ingante bæi ongonte ænte godänipa

(*Mäateo 26.47-56; Mäadoco 14.43-50; Wäö 18.2-11*)

⁴⁷ Ante tæcæ apæneyongä nanguī ināni iñontobæ ponte a ongōnānitapa. Itota miñæ nāni, Dote, ante gocabo iiningä incæ Codaa iñömö tāno beyænte pōninque Itota ingante waa cæte baī queë bemoncæte ante pongä. ⁴⁸ Adinque Itota tōmengä ingante,

—Codaa iñæmpa, botö Waobo ëñagaïmo iñōmote bitö, ðingä ingampa, ante queë bemōninque odōmonte pædæ godōmi ænguīnānii, angantapa.

⁴⁹ Mänōmaī cæcæ cædänipa, ante adinque tōmengä miñæ nē godāni guiquēnē,

—Awēnē, yaēmenca godö tao cæquīmōni ämii, änānitapa.

⁵⁰ Wængonguī quī, ante nē godongä ñænængä pōni inongä ingante nē cæcä iñömö māniñömö ponte a ongongä adinque Itota miñæ nē pōningä adocanque wæætē yaēmē æninque māningä önōmonca tōmēmonca inö wangö tamoncacä wæcantapa. ⁵¹ Adinque Itota wæætē,

—Idæwaa, äninque gampo cæmoncacä waa bamoncagacäimpa. ⁵² Ayæ, Wængonguī quī, ante nē godōnāni ñænänāni incæ Wængonguī oncö ñænæncö ante nē wææ wänōnāni incæ nē aadāni nāni Picæncabo incæ tōmengä ingante æncæte ante nē pōnināni iñōnānite Itota tōmēnāni inānite, Botö miñæ nē godāni tönö botö dicæ awēnē ingante wido cæcæte ante cæbogaa. Incæte mīnitö, Nē wido cæcä ingampa, ante baī cæmīni awædö. Edæ canta teēmenca mīni badōinca tönö yaēmē næænte botö weca pōmīnii. ⁵³ Iñæmpa botö æpogadö Wængonguī oncö ñænæncönē iimö iñö iimö iñö yabæcönē go guidinque mīnitö weca a ongōñōmote mīnitö wæætē bæi ongoncæte ante pædæ gopodāmaī imīnitapa. Edæ ñöwo wēmö mäë māmōnte baī iñōnte edæ mīni nē wēnæ wēnæ cæyedē impa, ante apænegacäimpa töö.

Pegodo incæ, Dicæ abogaa, angampa

(*Mäateo 26.57-58, 69-75; Mäadoco 14.53-54, 66-72; Wäö 18.12-18, 25-27*)

⁵⁴ Iinque Itota ingante bæi ongonte ænte mæo, Wængonguī quī, ante nē godongä ñænængä pōni inongä weca ænte godänitapa. Gobæ godāni iinque Pegodo iñömö ayæ ayæ gocantapa. ⁵⁵ Ñænæ oncö yacōmoyæ iñömö wææ wänōnāni gonga tānōnte godāmæ pö tæ contadāni adinque Pegodo tōmēnāni weca pö tæ contacä. ⁵⁶ Adinque nē cæcä onquiyængä tōmengä gongapamö ongongä adinque tōmengä ingante cōwä adinque,

—ðingä adobaī māningä miñæ tee empo gocä ingantapa.

⁵⁷ Äñongante Pegodo,

—Onquiyæmi ëñëmi. Botö māningä ingante dicæ abogaa, angantapa.

⁵⁸ Ayæ wantæ ate wacä pōninque Pegodo ingante waa adinque,

—Bitö adobaī tōmengä miñæ nē gobi imīnitapa töö.

Ante apæneacă ëñëninque,

—Onguñæmi ëñëmi. Botö dicæ tōmengä miñæ gobogaa. Edæ wabo imopa.

⁵⁹ Ayæ wacä adobaī wantæ wantæ adoque ooda go ate äninque,

ðingä iñömö Itota miñæ nē godingä ingampa. Nāwangä impa. Gadideabæ quēwëningä inte edæ pongä aedāni.

⁶⁰ Angä ëñëninque Pegodo,

—Onguñæmi, quīëmē baī apænebipa, ante botö ëñënämaī imopa.

Ante tæcæ mēnea āñongante tawadiya iñontobæ aa aa pecantapa. ⁶¹ Itota incæ tömengä gämænö dadi emænte pömö acä adinque Pegodo iñontobæ, Æ, āninqe, “Tawadiya ñowoönæ pedāmai iñonte bitö botö imotedö ante wadö ate apænedinque, Dicæ abogaa, ante tededinque mempoga go adopoque anguimi imipa,” ante Itota wēēñedē apæñecä ēñentabopa. ⁶² Ñowo nänö pequinque do pecampa, ante pönente wædinque Pegodo oncodo tao godinque Ca ca wægacäimpa.

Itota ingante badete todirque cædänipa
(*Mäateo 26.67-68; Mäadoco 14.65*)

⁶³ Itota ingante nē wææ wänönäni iñömö tömengä ingante māññedē badete todirque edæ tæi tæi pänänitapa. ⁶⁴ Ayæ tömengä awinca wini cæmöninque tömēnāni,
—Æcänö bitö imite tæi tæi pānaa, ante Wængonguī apæñecä ēñente ate apænebi ēñēmönie.

⁶⁵ Ante badete todirque quiēmē bai ante godö babæ ānewēnänitapa.

Nē apænte änāni weca Itota ongongampa
(*Mäateo 26.59-66; Mäadoco 14.55-64; Wäö 18.19-24*)

⁶⁶ Ñäö bayedē, Wængonguī quī, ante nē godönāni ñænænāni tönö nē odömönāni iñömö idægoidi inänite nē aadāni nāni Picæncabo inönāni inte edæ godongämæ go bee tēninque tömēnāni nāni apænte anguimpaa gäänē ongöñönāni Itota ingante tömēnāni weca töö æmænte ænte mǎo gönönāni gongængantapa.

⁶⁷ Tömengä ingante nē apænte änāni iñömö,

—Apænebi ēñēmönie, āninqe, Bitö mönitö Codito inömi imitawoo.

Äñönänite Itota wæætē,

—Botö apænebo ininque mīnitö wæætē ēñēnāmai imaīmīnīpa. ⁶⁸ Ayæ wæætē botö ēñencæte ante ämo ininque mīnitö wæætē botö imote apænedāmai imaīmīnīpa.

⁶⁹ Incæte ämo ēñēedāni. Botö iñömö nē Waobo ēñagaimo inte iincayæ ate Wængonguī nē tæi Piñængä tömēmæ inö tæ contate ongoncæboimpa.

⁷⁰ Ante apæñecä ēñēninque tömānāni,

—Iñæmpa, bitö Wængonguī Wēmi imitawoo.

Äñönänite,

—Botö māñimodö imopa. Tömēmīni edæ māñōmai āninqe edæ nö apænemīnīpa.

⁷¹ Ante apæñecä ēñēninque,

—Idæwaa. Tömengä nāmā incæ edæ, Wængonguī Wēmo imopa, ante wēnæ wēnæ apæñecä do ēñentamompa. Ininque möñö ñowo edæ, Wadāni, Itota wēnæ wēnæ cæcampa, ante apæñecædänīpa, ante quīnante godömenque diqui diqui minguii, ante wægadänīpa.

23

Pidato weca gote Itota ongongampa
(*Mäateo 27.1-2, 11-14; Mäadoco 15.1-5; Wäö 18.28-38*)

¹ Ininque māññömö ongönāni tömānāni godongämæ ængæ gantidinqe Itota ingante awēñē Pidato weca ænte gogadänīpa. ² Godinque tömēnāni, Itota iīmai nē wēnæ wēnæ cæcä ingampa, ante piñinque,

—Möñitö cöwä ayömöni iingä iñömö wapiticæ odömönte apæñecä ēñēninque möñitö ömæ quēwēnāni oda cæte ēñēnāmai cædāni wæmönīpa. Edæ odömāno awēñē Tetædo nänö āninta godönāmai iedāni, ante tömengä wææ angampa. Ayæ tömengä, Botö iñömö Awēñē Odeye Coditobo inömo imopa, ante nāmā ante angampa töö.

³ Ante godö piñāni ēñēninque Pidato iñömö Itota ingante,

—Bitö oodeoidi Awēñē Odeyebi imitawoo.

Äñongante Itota wæætē,

—Bitö tömēmi änö bai botö māñimodö imopa, angantapa. ⁴ Ininque nē godönāni ñænænāni tönö wadāni godongämæ ongöñönänite Pidato wæætē,

—Botö ayömote iingä dicæ ēñēnāmai cæte wentamö mongængä abogaa, angantapa.

⁵ Ante Pidato apæ necä incæte tömënäni godömenque äninque,
—İñæmpa tömengä Gadideabæ täno odömöningue ñöwo iñömö ganca pöningue
Oodeabæ tömäo godinque odömonte apæ necä eñëningue waodäni edæ piinte badäni
apa cæbii, änänitapa.

Edode weca Itota gote ongongampa

⁶ Mänömainö änäni eñente wædinque Pidato wæætë, İngä iñömö näwangä Gadide-
abæ quëwëningä inte pongantawoo. ⁷ Äñongante, Mäningänö ingampa, ante apænedäni
eñëningue tömengä, Gadideabæ nê quëwëningä inte tömengä awënë Edode nänö nê
ënempodongä ingampa, ante tæcæ eñengantapa. Ayæ, Edode ñöwo Eedotadëe ponte
quëwengampa, ante do eñëningä inte Itota ingante Edode weca Pidato da godongä
gocantapa. ⁸ Doyedë iñömö wadäni, Itota æbänö cæcää, ante tededäni eñëningue Edode,
Itota botö weca pöningue wabänö bamönengæ pönii cæcä abaimopa, ante pönëningue
tömengä ingante wantæpiyæ äinengä inongäimpa. İninque Itota ingante ñöwo adinque
Edode nangui togacäimpa. ⁹ İninque, Apænebi eñëmoe, ämi eñëmoe, ante Edode wæætë
wæætë äñongante Itota iñömö edæ pæ wënete apænedämaï ingacäimpa. ¹⁰ Edode
weca adoyömö ongöningue nê godönäni ñænænäni tönö nê odömönäni guiquënë ængui
badinque, Itota wënæ wënæ cæcä ingampa töö, ante nangui piinte angadänimpa. ¹¹ Ayæ
Edode tönö tömengä tontadoidi tönö Itota ingante piiniquine, Waa cæte bai cæcantedö
abi, ante badete todänitapa. Önonque badete tocæte ante tömënäni waëmö pönii
weocoo daga wëñadinque tömengä ingante adodö Pidato weca da godönäni gogacäimpa.
¹² İninque do nänä guëadö guëa piincaya iñiina inte edæ Edode tönö Pidato mäniönæ edæ
guëa piyënë cæte nänä æmigocaya bagadäimpa.

Itota wæncæcäimpa, änänipa

(Mäateo 27.15-26; Mäadoco 15.6-15; Wäö 18.39-19.16)

¹³ Pidato iñömö nê godönäni ñænænäni tönö awënëidi tönö önönäni inänite añecä
pönäni ate tömengä, ¹⁴ tömänäni inänite äninque,

—İngä ingante botö weca ænte pöningue minitö, Tömengä wapiticæ odömonte
apæ necä eñëningue wadäni oda cædinque eñënämaï cädänipa, ante piiminipa. Incæte
minitö edonque ayöminite botö, Itota æbänö cæcää, ante eñencæte ante cöwä ayömo
edæ tömengä wënæ wënæ nänö cädö ante mini änewënö ante edæ dæ ä abopa. ¹⁵ Ayæ
Edode adobai tömengä ingante apænte äninque wënæ wënæ nänö cædinö ante adämaï
inte wædinque adodö botö weca da pönongä ponte a ongongä aedäni. Edæ, Tömengä
nänö wænguinque, ante nänö cædinö edæ dæ ä apa änewëminii. ¹⁶ İninque botö
önonque tæi tæi päninque ñimpo cæbo gocæcäimpa, ante Pidato angantapa. ¹⁷ Wadepo
iñö wadepo iñö tömënäni ææmä nani cæyedë, Nê tee mönete ongongä adocanque
gocæcäimpa, ante cöwë godö ñimpo cæquënegä inongä inte awënë Pidato ñöwo
mänömainö ante cæcantapa. ¹⁸ Mänömainö angä eñëningue tömänäni adoyömö ogæ
tededinque,

—Itota ingante wido cædinque Badabato ingante wæætë pönö ñimpo cæbi æmönie,
änänitapa.

¹⁹ Badabato guiquënë tömënäni nani quëwëñömö awënë ingante wido cæcæte
ante cædinque godömenque waocä ingante wænöningä inte edæ ñöwo tee mönete
ongönongäimpa. ²⁰ Pidato iñömö, Itota ingante æbänö cæte ñimpo cæbo goquingäa,
ante wædinque tömënäni inänite wæætë aa aa peyongante, ²¹ Oodeoidi wæætë,

—Awæ ñænquedimæ ämi cæte gönonte wænönäni wængæe töö, ante wæætë wæætë
adodö äninque Yæ änänitapa.

²² Quimæ änewëminii, ante do mempoga äningä inte Pidato ñöwo mempoga go
adopoque änogä inte,

—Quinö wënæ wënæ cæcantawogaa, angantapa. İñæmpa, Quinö wënæ wënæ
cæcantawo, ante cöwä ayömo edæ dæ ampa. İninque botö ämo ate edæ tömengä ingante
tæi tæi päninque ñimpo cädäni gocæcäimpa, ämopa, angantapa.

²³ Incæte awënëidi tönö wadäni godömenque Yæ äninque, Awæ ñænquedimæ ämi cæte gönonte wænönäni wæncæcäimpa, ante, Cöwë wænongæimpa, ante ancaa aa pedänitapa. İninque tömënäni nani Yæ yæ änö beyænque Pidato ñimpo cæcantapa. ²⁴ İninque ancaa wææ änäni ëñente wædinque tömengä, Tömënäni nani änö bai godö cæcæboimpa, ante nämäneque pönengantapa. ²⁵ Mäniñedë Badabato nê, Awënë ingante wido cæcæimpa, ante cædinque nê wænöningä inte ayæ tee mönete ongönongäimpa. Pidato ñöwo, İngä guiquënë oodeoidi nani nê äningä ingampa, ante godö ñimpo cæcantapa. Itota ingante wæætë, Oodeoidi nani änö bai cæcæimpa, ante cædinque Itota ingante wæætë tontadoidi nempo pædæ godongä ænte godänitapa.

*Itota ingante awäa timpodäni wængampa
(Mäateo 27.32-44; Mäadoco 15.21-32; Wäö 19.17-27)*

²⁶ Itota ingante ænte goyönäni Tidënebæ nê quëwengä Timönö wayömö gote pöninque eyepæ pönï mämö bee tengantapa. Tömengä ingante adinque bæi ongöninque tömënäni, Ñænquedimæ möni cædiwæ Itota miñæ ænte goe, äninque ñö cædan-capænäni næænte gocantapa.

²⁷ Goyongante Itota miñæ nangui inäni godänitapa. Onquiyænäni incæ Yæ yæ ante wo ca wo ca wædinque tee empote godänitapa. ²⁸ İninque Itota dadi ëmænte adinque tömënäni inänite,

—Onquiyæmini, Eedotadëë quëwëmini inte minitö botö beyæ ante wædämaï iedäni. Wæætë tömëmini nämä beyænque ante wæedäni. Ayæ minitö wëñænäni beyæ ante pönente wæedäni, ämopa. ²⁹ İncayæ ate minitö caate wædinque iïmaï ante wæquimïni iminipa. “Wëñæ nê mänämaï ingä iñömö edæ tömengä nänö waa toquinque. Goömæ nê gänönämaï ingä iñömö edæ tömengä nänö toquinque impa,” ante wæquimïni iminipa. ³⁰ Mäniñedë edæ, “Waodäni iïmaï ante wæcædänimpa. Onquiyabo onguipo æmæwo cabæñö goyæ guimönie. Änanquidi wææ mönitonga capo ñongæñö wë womonte bamönie, ante wæcædänimpa,” ante dodäni nani yewæmongainö bai edæ bacæimpa. ³¹ Edæ awæ miïwæ iñonte gonga wædænque wo cædäni bai ñöwo iñömö waodäni wiï nangui wënæ wënæ cædänipa. Wæætë awæ amimö bayonte ti wodönoyönäni dobæ wo bæco bai waodäni iïncayæ ate quingämë bai cæquinäni inänipa, ante Itota mäninö godinque apænegacäimpa.

³² Ayæ, Mäo wænongæimpa, ante nê ænte godäni iñömö mënaa nê wënæ wënæ cædina inate tömengä tönö godongämæ ænte gogadänimpa. ³³ Ocatainö, nani äñömö ænte pöninque awæ ñænquedimæ nani badöniwäa Itota ingante töö godonte timpodinque wææ tiwadinque ængæ gantidënanitapa. Ængæ gantidënanäni ate wægöñongä tömënäni nê wënæ wënæ cædina inate adobai Itota tömëmæ inö adocanque tömengä dipæmæ inö adocanque timpote gönönäni gongænatapa. ³⁴ Mänömaï cædäni adinque Itota,

—Mæmpo ëñëmi. Tömënäni ëñënämaï inäni inte iïmaï cædänipa cæbii. Wënæ wënæ nani cæinö ante bitö wæætë edæ ñimpo cæbi quëwencædänimpa ämopa, angacäimpa.

Mäniñedë tömengä weocoo ini ante, Æcänö quınca nö ta adinque tömengä badincoo æncæcäimpa, ante tömënäni wæntodönninque adocooque adocooque ænänitapa. ³⁵ Wadäni, Æbänö cæquingää, ante acæte ante godongämæ a ongönänitapa. Awënëidi incæ tömengä ingante ante badete todinque,

—Tömengä, Quëwencædänimpa, ante wadäni inänite ængä quëwënanitawo. Ayæ Wængongui iñömö, Codito ingampa, äninque tömengä ingante ængantawo. İninque tömengä Wængongui nänö nê ængaingä inongä inte edæ nämä aamö cæte quëwencæcäimpa, ante badete togadänimpa.

³⁶ Tontadoidi guiquënë obo pöninque tömengä ingante badete tote bai cædinque edæ, Yowepæ ti nämæ becæcäimpa, ante pædæ æænönninque, ³⁷ tömengä ingante,

—Oodeoidi Awënë Odeyebi imi ininque bitö nämä aamö cædinque quëwëmäwe, ante towengadänimpa.

³⁸ Ayæ, “İngä oodeoidi Awënë Odeye İngä ingampa,” ante yewæmöninge tömënanı tömengä dæca İno wo cædäni owotapa.

³⁹ Nê wënæ wënæ cædına guiquënë tömengä tönö ongönöna adocanque tömengä ingante godö wënæ wënæ ante badete tocantapa.

—Bitö İñæmpa, Codito İnömo İmopa, ämitawo. Mänimi İnömi İnıneque bitö tömëmi aamö cæte gote quëwëninge mönatö İmönate adobaı İımpo cæbi aamö cæte gomönae.

⁴⁰ Äñongante wacä wææ äninge,

—İñæmpa tömëmi adobaı bitö wænguinge ongömi inte Wængongui ingante guñënamai inte ämi awädö. ⁴¹ Mönatö wënæ wënæ cæmöna İñömönate nê apænte änanı edæ nöngä cæte pänanı wæmönapa. Mönatö wënæ wënæ cædinö beyæ eyepæ tente wæmönapa. Tömengä guiquënë wënæ wënæ cædamai İngä inte wængä apa änewëë.

⁴² Äninge adocä wæætë Itota ingante apænedınque,

Awënë ëñëmi. Bitö Awënë Odeye badınque botö İmote pönente cæbi ämopa.

⁴³ Äñongante Itota,

—Nawangä ämopa. Bitö ñöwoönæ incæ wænte godınque do wænte gogainanı nanı watapæ quëwëñömö botö tönö guëa ongoncæbiımpa, angacäımpa.

Itota wængampa

(Mäateo 27.45-56; Mäadoco 15.33-41; Wäö 19.28-30)

⁴⁴ Mänıñedë edæ tæcæbæcä İñedë mä mämönte bai tæcæ badınque ayaönäa wæiganca tömämæ İñömö edæ wëmö ingatımpa. ⁴⁵ Edæ nænque näwänamai İ İnıneque wëmö ingatımpa. Ayæ Wængongui tæiyæ wæmoncönë odemö nanı wææ wodöıncoo adoyedë edæ önönæca İno tæcæguedë pönı tænguımæ wæantapa. ⁴⁶ Mänıñedë Itota ogæ tededınque,

—Mæmpo ëñëmi. Ñöwo edæ botö önöwoca bitö önönempo pædæ pönömo æe.

Äninge edæ ämæwo guëmänınque wængacäımpa.

⁴⁷ Mänömai cæte wængä adınque odömäno tontado capitäo incæ,

—Nawangä İmpa. İngä İñömö edæ nö pönı cæcä İngä inte edæ wængä abopa, äninge, Wængongui ñäo apæite bai ëmönongä inte mänömai cæcä abopa, ante apænegacäımpa.

⁴⁸ Ayæ, Æbänö cæquıı, ante godongämæ ponte a ongönanı İñömö tömänanı, Itota mänömai wængä awädö, ante wædıneque edæ nämä önontawë tæi tæi tompotawëninge wadæ gogadänımpa. ⁴⁹ Wæætë Itota ingante nê do adınanıneque İñömö gobæ ongönte pömö agönänıtapa. Wëenëñedë tömengä Gadideabæ quëwente pönongante onquiyænanı tömengä mıñæ nê pönınanı inte tömënanı ñöwo adobaı gobæ ongönte pömö agönänıtapa.

Itota wodi baö İni mäo daga wënanıpa

(Mäateo 27.57-61; Mäadoco 15.42-47; Wäö 19.38-42)

⁵⁰ Oodeoidi nanı Apænte Äincabo İñönänıte adocanque tömengä ëmöwo Ootee İngäımpa. Tömengä cöwë waa cædıneque nê nö cædongä İngäımpa. ⁵¹ Do İñömö, Itota ingante wænongäımpa, ante oodeoidi nanı Apænte Äincabo godongämæ pönente cæyönänıte adocä Ootee İñömö edæ Baa ante tömënanı tönö godongämæ cædamai İngäımpa. Tömengä, Wængongui Awënë Odeye nempo mönö æyedëno quëwëngäımpa, ante wänö conte bai quëwëngä İngäımpa. Tömengä Oodeabæ Adımatea İñömö nê quëwëngä inte ñöwo pönıngä İngantapa. ⁵² Mänıngä Ootee İñömö awënë Pidato weca do gote apænedınque, Itota wodi baö İni pönömi ænte daga wëmoe. ⁵³ Angä ëñëninge awënë Ao angä ëñente gocantapa. Godınque tömengä Itota wodi baö İni wi æmpote wææ wi æwadıneque pædæ wæænönte ænte godınque wæmö weocoo nıno nanı änoncöo wını wını caate dicamontaa wointatodë önontatoque İñömö daga wengantapa. Do nanı wënamai İntacä İñönte daga wengantapa. ⁵⁴ Oodeoidi nanı, Gäwadecæ ba ate guëmanguıönæ İngımpa, ante täno nanı cæönæ İ İnıneque Ootee mänömai täno cægacäımpa.

⁵⁵ Do iñömö Gadideabæ quëwente Itota tönö godongämæ në pöninäni inte onquiyänäni ñöwo Ootee miñæ tee empote pöninque Itota wodido adinque, Tömengä baö æbänö ñö cædänii, ante do adänitapa. ⁵⁶ Adinque tömënäni oncönë godinque ogui wapæ ogui wayabo tönö ænte ponte öni pæcæte ante cædänitapa. Incæte, Guëmanguiönæ impa, ante wædinque waönæ ate näni goquinque tömënäni Wængongui nänö wææ angainö bai cædinque täno guëmangadänimpa.

24

Itota do wëningä inte ñäni ömæmonte quëwengampa (Mäateo 28.1-10; Mäadoco 16.1-8; Wäö 20.1-10)

¹ Ayæ guëmanguiönæ iinque go ate baänæ ate ooque pönente bayonte mäninäni onquiyänäni ogui waqui näni cædincoo ñöwo ænte nææninque Itota wodido pönänitapa. ² Ponte ayönäni dicabo ñænængade pöni do da täñæi a öñö adänitapa. ³ Ayæ ontatodë guiite ayönäni edæ mönö Awënë Itota wodi baö edæ dæ antapa. ⁴ Önantatoque i awædö, ante adinque guiñente wæyönäni edëniina bai ina iñömö weocoo näämænta pöni näinte bai ëmoncoo mongæna inte edæ iñontobæ tömëna weca a ongöna. ⁵ Ate wædinque onquiyänäni iñömö ancai guiñente wædinque ædæ wæænte onguipoga bigui tëmönänitapa. Edëniina bai ina iñömö onquiyänäni inänite,

—Iñæmpa minitö do wëninäni weca ponte në quëwengä ingante ante quinante diqui diqui mimini. ⁶ Tömengä iñömö edæ dobæ ñäni ömæmonte godingä inte edæ iintatodë iñömö dæ angä aedäni. Tömengä wëñëñedë Gadideabæ minitö weca nänö ayæ quëwëñedë minitö iminite iimaï ante apæñecä ëñëmini inte ñöwo adodö ante pönëedäni. ⁷ Tömengä iñömö, Botö Waobo ëñagaïmo iñömote në wënæ wënæ cædäni nempo odömonte mäo pædæ godönäni æninque tömënäni wæætë wænönäni wængüenëmo imopa, ante apæñecä ëñëminitapa. Ayæ mëönaa go adoönæque iñonte botö ñäni ömæmonte quëwenguënëmo imopa, ante apæñecä ëñëmini inte pönenguënë quëwëedäni.

⁸ Ante edëniina bai ina äna ëñente wædinque onquiyänäni iñömö, Itota æbänö angacäi, ante tæcæ pönente wædänitapa. ⁹ Iinque ontatodë tao wadæ godinque onquiyänäni iñömö Itota tömengä miñæ në godinäni önonpo tipæmpoga go adocanque inäni inänite mäo apænedinque wadäni tömänäni inänite apænedäni ëñënanitapa. ¹⁰ Mänömainö ante Itota nänö në da godongainäni inänite në gote apænedäni iñömö Mäadiya Mäagadadëna näni änogä tönö Wäönä, Tantiago wäänä Mäadiya ayæ wadäni onquiyänänique tönö godinque tömënäni inänite apænedäni ëñënonänimpa. ¹¹ Incæte, Mänömaï impa, ante mäo apænedäni ëñëninque, Onquiyänäni iñömö önonquedö ante tededäni awædö, ante Itota nänö në da godöninäni iñömö edæ pönënamäi ingadänimpa. ¹² Pegodo guiquënë quingæ ængæ gantidinque pogodo godinque Itota wodido pongantapa. Ponte ædæ wææninque guimö ayongä wini wini cædincooque öñö adinque tömengä nämæneque pönëninque, Æbämë cætimpä, ante wædinque wadæ gogacäimpa.

Ëmaodö taadö godänipa (Mäadoco 16.12-13)

¹³ Eedotadë ongöninque wædænque inäni näni quëwëñömö Ëmao goinö iñömö onte quidömetodo ganca mäninganca taadö impa. Mänöönæ adoönæque iñonte Ëmao iñömö gocæte ante waoda mënaa idömæ godatapa. ¹⁴ Æbänö cætimpä, ante tömänö ante tedegodatapa. ¹⁵ Tedegoyöna Itota incæ mämö bee tëninque godongämæ gocä. ¹⁶ Incæte, Tömengä æcänö ingää, ante wë wodonte bai i beyæ tömëna adämaï ëmöna inte ëñënamäi inatapa. ¹⁷ Itota iñömö,

—Æbänö ante wæætedö wæætë tede gominatawoo.

Angä ëñente wædinque tömëna wæwente bai ëmöna inte edæ næ gongænatapa.

¹⁸ Adocanque tömengä ëmöwo Codeopato iñömö tömengä ingante apænedinque,

—Eedotadëë quëwënanî tòmânânî, Æbânö ñöwo mänîñömö cætîmpa, ante ëñëñönanî bitö adobique adoyömö quëwëninque edæ ëñëñämäi ïmitawoo.

¹⁹ Äñongante Itota,

—Ædö ämîna.

Äñongä tømëna wæætë,

—Itota Näatadeta quëwëningä ingante ante tedemönapa. Wængonguî beyä nê apænecä inongä inte mäningä onguîñængä ïñömö Wængonguî ayongä ayä waodäni ayönäni adobai tæi pîñænongä inte waa pönî apænedînque nangui cæcä inongäîmpa.

²⁰ Mänömaî ïñongante nê godönäni ñænænänî tönö mönö ömæ awëñëidi guiquënë wadäni nempo pædæ godöningue, Itota ingante apænte äninque mäo wænömîni wængæedäni, änäni ëñëninque ïñäni wæætë tømengä ingante ñænquedîmæ cæte timpote wææ tiwadinque edæ gönönäni wængantapa. ²¹ Mönatö guiquënë, Tømengä mönö idægocabo Awënë badînque pönö ængä beyænque mönö abæ tawænte quëwenguîmö imompa, ante pönënimöna inte edæ ñöwo wæmönapa. Ayä, Tømënanî mänömaî nänî cædîönæ edæ ñöwo mëönaa go adoönæque impa, ante edæ mönatö godömenque wæmöna ae. ²² Mänömaî î incæte möni cabo incæ onquiyænänî pancadäniya tømengä wodido gote pönînque, ïmaî atamönîpa, ante apænedäni ëñente wædinque mönatö wæætë ancaî guîñente wæmönapa. ²³ Tømënanî ïñömö tømengä baö îni adämaî inäni inte edæ wadæ pönînque ïmaî ante apænedäni wætämönapa. Mönitö wiîmonte bai Wængonguî anquedoda inate mä pönî atamönîpa, änänitapa. Ayömönite anquedoda ïñömö, Itota ñäni ömæmonte edæ miingä quëwengampa, ante apænedä ëñëninque edæ wadæ pömönîpa, ante onquiyænänî apænedäni ëñentämönapa. ²⁴ Mänömaînö ante apænedäni ëñëninque möni cabo incæ pancadäniya Itota wodido gote adînque, Onquiyænänî nänî äninö bai edæ näwangä impa, ante adäni incæte Itota ingante adämaî inäni wæmönapa.

²⁵ Ante apænedä ëñëninque Itota wæætë tømëna inate,

—Mînatö pönëgade î apa änewëmînaa. Mîmö ömædëmîna îmîna inte mînatö Wængonguî beyä nê apæneganîni nänî apænedö ante tömänö ante edæ ëñëñämäi îmîna awædö. ²⁶ Codito ïñömö edæ cöwë caate wæquënegä ingacäîmpa. Ayä wænte ñäni ömæmönînque tømengä nämä nänö ñäö ïñömö æiquënegä ingacäîmpa, ante pönëmînaa.

²⁷ Ayä, Codito æbânö cæquingäa, ante Möitee wodi æbânö apænete yewæmongacäi, ante täno apænedînque Itota mîmönoque pönëninque, Wængonguî beyä nê apænedäni tömänäni æbânö apænëgadänî, ante, Codito æbânö cæquënegä ingacäi, ante edonque odömonte apænecä ëñënatapa.

²⁸ Mänîi tømëna nänä quëwëñömö tømëna nänä gocæ cæyömö pönönäni Itota wodo tebæ gocæ cæte bai cæcä. ²⁹ Adînque tømëna nangui äninque tømengä ingante edæ,

—Ñöwo gawadecæ pönî inte wëmö ba apa. Mönatö oncönë go guîite cænte monte baänæ ate goe.

Ante ancaa äñöna tømëna oncönë pö ëñacæ guicantapa. ³⁰ Ayä tømëna tönö cæncæte ante tæ contadînque tømengä päö pä äninque Wængonguî ingante waa ate pönente apænedînque tømëna inate tæcæ pædæ godoncæ cæyongä. ³¹ Tømëna awîncä wi ænete bai bayö, Tømengä ingampa, ante edæ tæcæ adatapa. Tømengä ïñömö edæ adoyedë tømëna ayöna edæ dæ gocä. ³² Adînque tømëna guëa tededînque,

—Näwangä intawo. Wængonguî mönö Codito ingantedö ante apænecä ëñëninque æbânö yewæmongadänîmpa, ante tømengä ponte odömongä ëñëninque mönö mîmö edæ gonga bæco bai totamompa. Wiî edæ mänömaî intawo.

³³ Ante tededînque tømëna adodö taadö quingæ godînque Eedotadëë ponte ayönote edæ Itota mîñæ nê godînäni ïñömö onte ganca mänîmpodäni ïñönäni tømënanî tönö wadäni godongämæ pö bee tente a ongönäni adatapa. ³⁴ ïñäni guiquënë,

—Mönö Awënë ïñömö ñäni ömæmonte miingä quëwengampa. Näwangä edæ impa. Tømengä ingante Timönö Pegodo do acantapa, ante godongämæ tededäni adatapa.

³⁵ Mänömainö ante tededäni eñëninque tömöna wæætë, Mönatö taadö goyömönote wacä pö bee tëninque iimaï cæcantapa, äninque, Æbänö cæcantapa, ante adodö adodö ante apænedatapa. Ayæ godömenque apænedinque, Oncönë go guiyömöni tömengä päö pä ængä adinque mönatö, Itota ingampa, ante do eñentamönapa, ante tömänö ante apæneda eñengadänimpa.

*Tömengä miñæ në godinäni weca Itota pongampa
(Mäateo 28.16-20; Mäadoco 16.14-18; Wäö 20.19-23)*

³⁶ Mäninö ante ayæ tæcæ tedeyönäni Itota incæ edæ tömënäni weca tæcæguedänäni do pö guiite a ongöninque,

—Guiñenämaï gänë pönëedäni.

³⁷ Angä eñëninque tömënäni, Önöwoca badï iimaï, ante ancai guiñente wædinque, Yæ änäni. ³⁸ Adinque Itota,

—Quinante guiñewëminii. Mimöno quinante æmæ æmæ pönente wæminii. ³⁹ Bado botö önompo empobo edæ aedäni. Botö önöwa ewabo aedäni. Botö baö edæ gampo caate aedäni. Ìñæmpa önöwoca badï imo baï ædö cæte baö tönö bamë ëaquënëmöö. Baö tönö bamë ëadömo inte botö imo apa guiñewëminii.

⁴⁰ Äninque Itota önompo tönö önöwa tömënäni inänite odömongä. ⁴¹ Adäni incæte tömënäni guiñente todinque wede pönenämaï iñönänite tömengä,

—Minitö weca cængui æbänö mämminii.

⁴² Äñongante gæyæ baö do awëniï ëadäni inte pædæ godönäni ⁴³ äninque tömënäni ayönäni edæ ade cængantapa. ⁴⁴ Ayæ tömënäni inänite apænedinque Itota,

—Botö imotedö ante Möitee wodi wææ äninque æbänö yewæmongacäi, ante botö minitö weca ayæ quëwëninque do apænetabopa. Botö imotedö ante Wængongui beyæ në apænegaïnäni æbänö yewæmongadänii, ayæ ämotamini äninque æbänö yewæmongadänii, ante apænetabopa. Mänine botö apænedö ante tömänö edæ iinque baquinö angüënë.

⁴⁵ Ante apænedinque Itota, Ocai encate eñencädänimpa, ante pönö cædinque tömënäni inänite Wængongui angä eñëninque näni yewæmongainö ante odömonte apænecä eñëninque tömënäni edonque edæ eñänänitapa. ⁴⁶ Ayæ godömenque apænedinque,

—Mönö Codito cöwë nantate wæninque mëönaa go adoönæque iñonte ñäni ömæmonguënegä incæcäimpa, ante edæ edonque yewæmongatimpa. ⁴⁷ Ayæ, Codito ëmöwo ante Eedotadëe iñömö täno apænete ate tömämæ quëwënäni inänite iimaï ante apænecäimpa. Tömënäni inänite apænedinque, Wënæ wënæ mini cædinö ante ñimpo cædinque Wængongui gämænö pödäni. Pömini adinque tömengä wæætë pänämaï inte pönö ñimpo cæcäcäimpa, ante apænequinäni incädänimpa, ante yewæmongatimpa. ⁴⁸ Minitö iñömö, Æbänö cætimpa, ante në adimini inte edæ në apænequimini iminipa. ⁴⁹ Ayæ edæ Wængongui, Botö Tæiyæ Waëmö Önöwoca ingante da pönömo æncæminimpa, angacäimpa. Ìninque botö Mæmpo nänö në angaingä ingante botö oo da pönömo æncæminimpa. Mänömaï i ininque Wængongui nänö tæi piñænö æncæte ante minitö, Wængongui Önöwoca ingante ewocacäimpa, ante Eedotadëe iñömö wänö cödäni, angacäimpa.

*Öönædë Itota æicampa
(Mäateo 16.19-20)*

⁵⁰ Itota ayæ tao godinque Betänia obo pöninque tipæmpoga pædæ æmpodinque, Minitö iminute Wængongui waa cæcäcäimpa, ante waa apænecä eñengadänimpa.

⁵¹ Tæcæ apænecä eñëñönäni edæ tömengä iñontobæ inque ingä edæ öönædë æigacäimpa. ⁵² Adinque tömengä miñæ në godinäni iñömö ædæ wæænte apænedinque, Näwangä Wængongui Wengä inongä inte æicampa, ante watapæ apænedinque Eedotadëe wadæ godinque nanguï togadänimpa. ⁵³ Wængongui oncö ñænæncönë yabæcönë

ĩĩmō ĩĩō ĩĩmō ĩĩō pō pō cædinqe Wængonguĩ ingante, Bitō ñäō bai ěmōmi inte waa pōnĩ
cæbipa, ante cōwě waa apænegadānimpa.

Itota Codito ingantedö ante Wäö nänö watapæ ante yewæmongainta

Wængongui nänö Angainö ante nê ëmongaingä Waocä bagacäimpa

¹ Wëenëñedë pönî Wængongui nänö mä badöñedë Wængongui nänö Angainö ante nê ëmongaingä iñömö do ingacäimpa. Tömengä Wængongui weca quëwengacäimpa. Ayæ adocä adobai nê Wængongui inongä ingacäimpa. ² Wëenëñedë pönî tömancoo badönämaï iñedë mäningä do Wængongui weca quëwengacäimpa. ³ Wængongui angä ëñëninque adocä tömancoo badongacäimpa. Tömengä wii badongä bai Wængongui nänö badongaincoo tömancoo edæ dæ ancædonimpa. ⁴ Mäningä iñömö mönö quëwenguinö entawengacäimpa. Ayæ mönö quëwenguinö edæ entawëninque tömengä waodäni beyæ nê ñäö bai inongä ingacäimpa. ⁵ Tömengä nê ñäö bai ingaingä inte mönö wëmö iñömö ta tamongä ate adoyömö ñäö bai bayonte edæ mönö wëmö iñömö edæ mäniï ñäö ædö cæte mönæ ëmonguii.

⁶ Onguiñængä adocanque ingante Wængongui da pönongä pöningä ingampa. Tömengä ëmöwo, Wäö, ante pëmonte ingacäimpa. ⁷ Tömengä iñömö Wængongui nänö ñäö ëmömämo ante edonque pönî bacäimpa, ante nê ñäö bai ingaingä ingantedö ante apænecæte ante pongacäimpa. Adocä apænecä beyænque waodäni tömänäni tömengä nänö nê apænedongä ingante pönencædanimpa, ante pongacäimpa. ⁸ Incæte mäningä wii ñäö bai ingaingä ingampa. Wæætë tömengä, Wacä waodäni beyæ nê ñäö bai ingaingä ingampa, ante apænecæte ante pongacäimpa. ⁹ Nê nö ñäö bai nê ingaingä iñömö waodäni tömänäni inänite tömengä nänö ñäö ëmömämo pönoncæte ante inguipoga wææ pongacäimpa.

¹⁰ Tömengä inguipoga iñömö quëwengacäimpa. Ayæ tömengä inguipoga nê badongaingä iñongante inguipogaque quëwënäni wæætë Baa äninque tömengä ingante ædö cæte ate bai pönenguinänii. ¹¹ Tömengä edæ tömengä qui weca pongacäimpa. Pongä ate tömengä guidënanî incæ tömengä ingante ænämaï ingadänimpa. ¹² Incæte tömengä ingante nê ængainäni iñömö tömengä ëmöwo, Codito, ante nê wede pönënanî iñönänite tömengä tömënanî inänite Ao äninque edæ, Wængongui wënäni bacædanimpa, ante pönö cægacäimpa. ¹³ Ayæ Wængongui wënäni iñömö wii waocä ëñate bai inänipa. Waocä, Botö wë manguinque, ante änämaï iñongante ëñadänipa. Wii nänöogængä angä beyænque inänipa. Wæætë Wængongui tömenganque cæcä ate tömënanî tömengä wënäni badänipa.

¹⁴ Tömengä iñömö edæ, Wængongui nänö Angainö, ante nê ëmongaingä iñinque Waocä ëñate bagacäimpa. Waocä ëñate badinque tömengä mönö weca quëwengacäimpa. Mæmpo Wængongui Wengä adocanque inte adocä godömenque ñænængä inte nê cædongä ingä atamönipa. Adocä Mæmpo weca quëwente nê pongä iñömö tömengä nanguï waadete pönö cædongä inte nöingä änonngä ingampa. ¹⁵ Wäö iñömö, Mäningä æbänö ingää, ante apænecäimpa. “Mäningä botö nê apænedongä ingantedö ante iïmaï apænëtabopa. Botö täno pömo imopa. Tömengä nê ayæ Ponguingä iñömö godömenque ñænængä inte cædongä ingampa. Edæ botö ëñadämaï iñedë tömengä do ingacäimpa,” ante nanguï pönî yedæ äninque Wäö apænëgacäimpa.

¹⁶ Mäningä nê ayæ Ponguingä iñömö nanguï pönî waadete pönö cædinque tömengä wæætë wæætë nänö entawënö ante pönongä äninque tomopa. ¹⁷ Edæ Wængongui tömengä nänö wææ angainö ante apænecä ëñëninque Möitee wodi wæætë adodö ante yewëmöninque waodäni inänite godongacäimpa. Wængongui nänö waadete pönö cægainö ante nöingä nänö angainö ante guiquënë Itota Codito beyænque ëñëmompa. Itota Codito iñömö mönö nê Ponguingä ingaingä ingampa. ¹⁸ Mönö waocabo tömämö incæ Wængongui ingante cöwë adämaï imopa. Incæte tömengä adocanque Wengä

Wængongui weca nē quēwēnongā inte, Mæmpo æbänö ingaingā ingää, ante tömengä odömongä ate pönēmompa.

*Wäö æpænē guidönongä, Botö wii Codito imopa, angä
(Mäateo 3.11-12; Mäadoco 1.7-8; Odoca 3.15-17)*

¹⁹ Oodeoidi awēnēidi Eedotadēē quēwēnāni iñömö Wængongui quī, ante nē godönāni tönö Debii wodi pæināni inānite da godönāni Wäö weca godānipa. Gote pöninge adodāni, Æbidö inömi imii, ante apænebi ēñēmönie, āñönāni Wäö iīmaī āninque ²⁰ nāmā wææ änāmaī inte wæætē, Botö wii Codito inömo imopa, ante edonque pönī angantapa.

—Botö wii Codito inömo imopa.

²¹ Äñongante tömēnāni wæætē tömengä ingante,

—Æbidö inömi imii, Ediya wodi inömi imii. Apænebi ēñēmönie.

Ante änāni ēñēninque tömengä,

—Wabo imopa.

Ante äñongä tömēnāni wæætē,

—Wængongui beyæ nē apænebi ayæ Ponguimi inömi imitawo.

Änāni ēñēninque tömengä,

—Wabo imopa.

Ante angantapa.

²² Tömēnāni iinque āninque,

—Æbidö inömi imii, ante apænebi ēñēmönie töö. Mönitö imönite nē da pönönināni weca godinque mönitö tömēnāni inānite, Æbidö imii, ante ancæmönimpa. İninque bitö nāmā incæ æbänö ämii.

²³ Äñönāni Wäö wæætē tömēnāni inānite, Itaiya wodi nē Wængongui beyæ nē apænecä nänö angainö bai ante iīmaī ante apænebo ēñencæminimpa.

—Önömæca incæ nē aa pebo inömo inte botö tömēmo pepämo iīmaī nāni ēñēnö impa. “Awēnē nänö ponguīnö ante töinö pinonte bai tee möedāni,” ante aa pebopa, angantapa.

²⁴ Paditeoidi nē wadö tedete wadö cædāni nāni cabo inönāni inte tömēnāni pancadāniya inānite da godönāni Wäö weca nē godānipa. ²⁵ Gote pöninge mänināni guiquēnē,

—Bitö wii Codito inömi inte wii Ediya wodi inömi inte ayæ wii Wængongui beyæ nē apænebi ayæ Ponguimi inömi imipa. Bitö ædö cæte waodāni inānite æpænē guidömi imii.

²⁶ Ante äñönāni Wäö wæætē,

—Botö önonque æpænē guidönömo imopa. Wæætē mīnitö weca adocanque a ongongä iñongante, Tömengä æcänö ingää, ante mīnitö ēñēnāmaī iminipa. ²⁷ Botö tāno pömo imopa. Tömengä nē ayæ Ponguingä ingampa. Botö önonque wædænque cæbo inte ædö cæte tömengä awæncata incæ ñii cæte cæbo imoo.

²⁸ Betānia nāni quēwēñömö Oododänö æmæmäa Wäö æpænē nänö guidöñömö mänömaī bagatimpa.

Itota Wængongui Codotedo

²⁹ Baänæ ate Itota bee tente pongä adinque Wäö apænecantapa. “Aedāni, iingä Wængongui da pönongä pöningä ingampa. Ayæ tömengä waodāni inguipoga quēwēnāni nāni wēnæ wēnæ cægāinö ante äninque teēmē mongænte wænguingä ingampa, ante Wængongui tömengä ingante, Codotedo, ante pönö pemongacäimpa. ³⁰ Mäningä iñömö botö nē apænedongä iñongante botö iīmaī apænetabopa. ‘Botö tāno pömo imopa. Onguiñængä nē ayæ Ponguingä iñömö godömenque ñænængä inte cædongä ingampa. Edæ botö ēñadāmaī iñedē tömengä do ingacäimpa.’ ³¹ Botö incæ adobaī, Tömengä æcänö ingää, ante ēñēnāmaī intabopa. Mönö idægocabo iñömönte, Mīnitö tömengä ingante ēñencæminimpa, ante botö æpænē guidöninque pömo intabopa.”

³² Ayæ Wäö, Tömengä ingampa, ante āninque, “Botö æmö ayömote Wængongui Önöwoca incæ öönædē owote equemö bai wææ tömengäa næ gongængä atabopa.

³³ Wængongui, Waodāni inānite æpænē guidöe, ante botö imote nē da pönöningä wii

botö imo angä bai botö, Itota æcänö ingää, ante ëñënamaimo incædömoimpa. Incæte tömengä botö imote iimaï angantapa. ‘Wængongui Önöwoca incæ æcänö onguiñængä wææ næ gongængä ayömi mäningä iñömö në æpænë guidönäni bai Wængongui Tæiyæ Waëmö Önöwoca ingante da pönongä waodäni mímönoque pö guiquingä, ante cæcä ingampa.’ ³⁴ Mäninö botö adinö impa. Mänömaï beyæ iimaï ämopa, Mäningä iñömö Wængongui Wengä inongä ingampa,” ante Wäö apænegacäimpa.

Itota miñæ në täno godäni

³⁵ Baänæ ate Wäö tönö tömengä ëmiñæna mënaa adoyömö ongöñönäni ³⁶ Itota wodo tebæ cægongä adinque Wäö angantapa.

—Aeda, tömengä iñömö Wængongui Codotedo inongä ingampa.

³⁷ Mäninö angä ëñëninque Wäö nänö në ëmiñæna inina incæ Itota ingante tee empo godaimpa. ³⁸ Itota dadi ëmænte ayongä tee empo pöna adinque angantapa.

—Quinante pöminaa.

Ante äñongä tömëna wæætë,

—Mäetodo, æyömönö owobi. Apænebi ëñëmönae.

Änatapa. Mänine, Mäetodo, ante mönö tededö, Në Odömongä, ante impa.

³⁹ Äna ëñëninque tömengä,

—Ægodöeda go aeda.

Äñongä tömengä miñæ godatapa. Goyöna ædæ wææicä intapa. Ayæ nänö owocönë gote adinque tömëna adoönæ tömengä weca a ongönapa.

⁴⁰ Wäö nänö äninö ëñëninque Itota ingante tee empo goda mënaa iñönate adocanque Æntade iñömö Timönö Pegodo töniiñacä ingantapa. ⁴¹ Tömengä nänö töniiñacä Timönö ingante ancæte ante diqui diqui minte gote adinque angantapa.

—Mëetiyä mönö änonngä ingante atamönäpa, angantapa. Tömengä iñömö Wængongui nänö në Pönongaingä Codito inongä ingampa.

⁴² Ayæ Timönö ingante Itota weca ænte mämongä pongä adinque Itota angampa.

—Bitö Wäö wë Timönömi imi abopa. Botö wæætë, Bitö tæimö dicabo bai imipa, ante bitö imite mönö tededö, Quepata, pönö pemömopa. Önonque adowo ëmöwo incæ guidiego tededö, Pegodo, änänipa.

Pedipe tönö Näatänaedo inate Itota angä tee empo goda

⁴³ Baänæ ate Itota, Gadideabæ ante gocæboimpa, ante pönengäimpa. Pedipe ingante adinque Itota tömengä ingante,

—Botö miñæ pöe, ämo, angacäimpa.

⁴⁴ Pedipe iñömö Æntade tönö Pegodo bai Betaida nana quëwëñömö adoyömö quëwëningä inongaimpa. ⁴⁵ Pedipe Näatänaedo weca gocä adinque tömengä ingante iimaï äninque,

—Wængongui nänö wææ angainö ante yewæmöninque Möitee wodi nänö në yewæmongaingä ingante mönitö atamönäpa. Wængongui beyæ në apænegainäni adobai mäningä ingantedö ante yewæmongadänimpa. Tömengä iñömö Itota Näatadeta quëwënonngä inte Ootee wengä ingampa, ante angantapa.

⁴⁶ Ante äñongä Näatänaedo wæætë,

—Näatadeta quëwëñömö adocanque waa quëwente pongä, ante mönitö dicæ ëñëmöniyaa.

Angä ëñëninque Pedipe iñömö,

—Pö ae, angantapa.

⁴⁷ Itota ayongä Näatänaedo pongä adinque tömengä,

—Iingä iñömö näwä idægocä inongä inte tömengä në nö entawënonngä inte babæ cädämaï inongä ingampa, ämopa.

⁴⁸ Angä ëñëninque Näatänaedo,

—Æbänö imoo, ante bitö æbänö cæte do ëñëmii,

Ante äñongä Itota wæætë tömengä ingante,

—Pedipe iñömö bitö imite ayä aa pedämaï iñedë bitö iigowæncawa tæ contabi iñömite botö bitö imite do atabopa, angacäimpa.

⁴⁹ Ayä Näatänaedo,

—Awënë në Odömömi imi, bitö Wængongui Wëmi inömi imipa. Idægoidi mönö cabo iñömonte bitö mönitö Awënë Odeyebi inömi imipa, ämopa.

⁵⁰ Äñongä Itota wæætë,

—Bitö iigowæncawa tæ contabi iñömite botö bitö imite atabopa, ämo beyænque pönëmi imipa. Mäninö ante adinque bitö godömenque botö bamönengä cæbo acæbi-
impa, ämopa.

⁵¹ Tömengä godömenque angantapa.

—Bitö imite näwangä ämopa. Öönädë wi änete bayö Wængongui anquedoidi Waocä ëñagangä weca wæäninque æiyönäni bitö acæbiimpa.

2

Cänaa quëwëñömö näni monguimäno cæte bedäni

¹ Mëönaa go adoönæque iñönte Cänaa quëwëñömö Gadideabæ iñömö monguimäno ante bedänipa. Itota wäänä adoyömö ponte ongongacäimpa. ² Itota tömengä ëmiñänäni tönö tömënäni inänite adobai, Monguimäno mini bequinque, ante tē tē wente ænte pongadänipa. ³ Ayä yowepæ wædænque ti nämæ biinömæ näni ämæ dæ bedäni adinque Itota wäänä tömengä Wengä ingante,

—Tömënäni biinömæ dæ ämæmpa.

⁴ Äñongä Itota wæætë,

—Badä ëñëmi. Botö cæquënëno tömëmoque cæquinö impa. Botö cæyedë wii eyepæ impa, ämopa.

⁵ Tömengä wäänä iñömö në cädäni inänite,

—Minitö iminite æbänö angä ëñente cädäni, angantapa.

⁶ Ayä önonpo æmæmpoque go adocadeque æpæncade dica inte badöincade iñömö cö cädäni ongoncadepa. Wængongui weca guicæte ante waëmö bacæmöimpa, ante äate cädänipa, ante oodeoidi näni äagaincade incadepa. Ìncade pancacadea otenta ditodo näe ongoncadepa. Ayä pancacadea tië ditodo näe ongoncadepa. ⁷ Në cädäni inänite Itota,

—Æpæncadecoo iñömö æpæ eyede pönï pe ñiñæedäni.

Angä ëñëninque pe ñiñængadänipa. ⁸ Ayä tömënäni inänite,

—Owæta ænte wædænque mä iyænte monguimäno ante në cædongä ingante godömïni æncæcäimpa, ämopa.

Angä ëñëninque mänömaï cægadänipa. ⁹ Ayä monguimäno ante në cædongä æpæ inïmæ incæ biinömæ badimæ æninque, Æbänö imæ, ante bedinque tömengä, Itota nänö badönimæ impa, ante ëñënamäi inongäimpa. Në cædönäni Itota weca æpæ pe ñiñänäni que ëñëñänäni. Ayä monguimäno ante në cædongä iñömö në monguingä ingante, Nänënë pöe, aa pecä pongä ate, ¹⁰ iïmaï angantapa.

—Wädäni tömänäni waimæ biinömæ täno godönäni bedänipa. Ayä ate æämæ becæ pönäni tömo pönï bedäni adinque tömënäni biinömæ wædænque godonte näni ænimæ wæætë godönäni bedänipa. Bitö guiquënë ñowoyedë waimæ biinömæ bitö nänënë concædimæ ænte pömipa.

¹¹ Itota, Acädänipa, ante mänömaï cædinque tömengä Cänaa quëwëñömö Gadideabæ iñömö mänïi mä nänö bamönengä cægacäimpa. Mänïi tæi piñænte bamönengä cæcä adinque woadäni, Tömengä waëmö pönï inte cæcampa, ante edonque agadän-
impa. Ayä tömengä ëmiñänäni iñömö tömengä ingante godömenque wede pönänäni bagadänipa.

¹² Ayä ate Capënaömö quëwëñömö Itota tömengä wäänä tönö tömengä biwiidi tönö tömengä ëmiñänäni tönö wææ gogadänipa. Mänïñömö godinque wædænque ëönæ quëwengadänipa.

Wængongui oncö tæiyæ waëmö bacæimpa, ante cæcä
(Mäateo 21.12-13; Mäadoco 11.15-18; Odoca 19.45-46)

¹³ Wodo pænta gogaïönæ, ante oodeoidi Patowa nani ææmæ cænguïönæ oo pöni bayedë Itota Eedotadëë iñömö æigacäimpa. ¹⁴ Tömengä iñömö Wængongui oncö ñænæncönë yabæcönë pö guiddinque ayongä wagadaidi obegaidi tönö equemöidi inänite godonte æncæte ante nê mänäni inänite acantapa. Ayæ wadäni campio nææante nê godonte ænönäni iñömö nani godonte æimpaa tæ contayönänite tömengä acantapa. ¹⁵ Yæguincamë ñænæmömo nää wënëninque que cæte ate æninque tömengä Wængongui oncö ñænæncönë yabæcönë nê ongönäni inänite tatodongä tao godänitapa. Adobaï obegaidi tönö wagadaidi inänite, Tao gobæwedäni, angä tao godänitapa. Ayæ campio nææante nê godonte ænönäni tömënäni tigitamö æninque tömengä wido cæcä gueogæ gotimpa. Ayæ adodäni nani æimpaa bæ tacä guidömëmæ go wææntapa. ¹⁶ Ayæ equemöidi godonte æncæte ante nê mänäni inänite Itota,

—Minitö equemöidi ænte tao gobæwedäni. Botö Mæmpo oncönë incæ minitö ædö cæte, Mönö godonte æiñömö bai impa, ante cæminitapa töö, angacäimpa.

¹⁷ Mäninö angä ëñëninque tömengä ëmiñænäni Awënë Dabii nänö yewæmongainö ante iimaï ante pönente wädänipa. “Bitö oncö ante waodäni waa acädänimpa, ante cæcæboimpa, ante botö nanguï cæinente wænguï wæ,” ante yewæmongatimpa.

¹⁸ Ayæ oodeoidi awënëidi pancadäniya tömengä ingante,

—Bitö mänii tömää awënë bai cæbi incæ æbänö bitö bamönengæ cæte odömömi adinque mönitö, Mäningä nê angä ingampa, ante ëñencæmönimpa, ämönipa.

¹⁹ Äñönäni Itota wæætë tömënäni inänite,

—Wængongui tæiyæ waëmö oncö incæ minitö iincö bæ tate ewëmini ininque botö meönaa go adoönæque iñö miincö mänoncæboimpa, ämopa.

²⁰ Angä ëñëninque oodeoidi awënëidi pancadäniya,

—Wængongui tæiyæ waëmö oncö coadenta i tei wadepo ganca mänongadänimpa. Bitö iñömö ædö cæte, Botö meönaa go adoönæque iñö miincö mänoncæboimpa, ämii, änänitapa.

²¹ Itota iñömö nämä baö incæ ante, Wængongui tæiyæ waëmö oncö bai impa, ante apænecä inongäimpa. ²² Tömengä iincayæ wængä ate Wængongui, Näni ömæmöe, angä ñäni ömæmongä ate, Æbänö angacäi, ante tömengä ëmiñænäni pönënanitapa. Ayæ, Wængongui angä ëñente nani yewæmongainö nö impa, ante pönënanii inte ayæ Itota tömënäni inänite nänö äninö ante adobaï pönengadänimpa.

Itota, Mönö waocabo æbänö imöö, ante ëñengampa

²³ Patowa nani ææmæ cæyedë Itota Eedotadëë iñömö ponte quëwëninque, Acädänimpa, ante bamönengæ nanguï cæcä adinque waodäni tæiyænäni iñömö, Mäningä mönö Codito ingampa, ante pönengadänimpa. ²⁴ Itota edæ, Waodäni tömänäni æbänö entawënäni inänii, ante do ëñëngä inte tömengä, Wabänö pönënanii, ante tömënäni inänite gomö adongä ingantapa. ²⁵ Edæ tömengä waodäni nani entawënö ante do ëñëngä ingantapa. Ininque waocä iñömö, Waodäni æbänö cädänii, ante apænecæcäimpa, ante Itota tömengä ingante, Bitö botö imo adodö ancæbiimpa, ante änämaï ingacäimpa.

3

Itota tönö Niiicodemö

¹ Paditeocä adocanque tömengä ëmöwo Niiicodemö tömengä iñömö oodeoidi awënëidi tönö nê godongämæ cæcä ingacäimpa. ² Adocä woyowotæ Itota weca pöninque,

—Awënë nê Odömömi ëñëmi. Wængongui, Odömoncæbiimpa, ante bitö imite da pönongä pönimi imipa, do ëñëmönipa. Edæ Wængongui waocä tönö godongämæ cädämaï ingä ininque mäningä ædö cæte bitö bai bamönengæ cæcä aquimönii.

³ Angä ëñëninque Itota wæætë,

—Bitö ìmite näwangä ämopa. Nē mempoga ēñadinganque Wængonguī Awënë Odeye nempo guuite aquingä ingampa.

⁴ Äñongä Niicodemö,

—Waocä picængä ba ate ædö cæte mempoga ēñaquingää. Tömengä nänö wäänä cæncadē ædö cæte mempoga guui æidinue ēñaquingää.

⁵ Angä ēñëninque Itota angantapa.

—Bitö ìmite näwangä ämopa. Waocä æpænē guiidengä iñongante Wængonguī Önöwoca cæcä beyænque mempoga ēñadinganque Wængonguī Awënë Odeye nempo guuite quëwenguingä ingampa. ⁶ Baonga beyænque nē ēñadäni iñömö edæ baonque ēñate quëwënänipa. Wæætē Wængonguī Önöwoca cæcä beyænque nē ēñadäni iñömö Wængonguī Önöwoca ingante ewocate quëwënänipa. ⁷ Botö, Bitö mempoga ēñaquënēmi ìmipa, ante botö änö ēñëninque, Æbämē impa, ante änämaī incæbiimpa. ⁸ Woboyæ nänö cægäi bai wayömö wayömö pæmænte gopa. Woboyæ nänö pæmæmämö ēñëmö incæ, Ædonö pæmænte pö, ædonö pæmænte go, ante ēñënämaī ìmompä. Wængonguī Önöwoca cæcä beyænque nē ēñadäni tömänäni inänite tömengä æbänö cæcää, ante adobaī ēñënämaī ìmompä, ämopa, ante Itota apænecantapa.

⁹ Apænecä ēñëninque Niicodemö,

—Æbänö inguīi.

¹⁰ Äñongä Itota wæætē,

—Idægoidi inänite nē odömömi ìmi incæte mäninö ante ædö cæte ēñënämaī ìmii. ¹¹ Bitö ìmite näwangä ämopa. Mönitö quiëmē ante ēñënimöni inte mäninö ante apænemönipa. Mönitö quiëmē ante adimöni ìninue, Mänömaī impa, ante apænemönipa. Minitö guiquënë möni änö ante apænemöni ēñëninque ayæ Baa ämini inte pönänämaī ìminipa. ¹² Botö minitö ìminite, Inguipoga quëwënäni weca æbänö ì, ante apænedimo ìmo incæte minitö ēñënämaī ìminipa. Ìninue Wængonguī cæcä beyænque öönædē mini quëwenguinö ante æbänö ì, ante apænebo bai ædö cæte pönenguimīni, ante apænecantapa.

¹³ Ayæ apænedinque, “Woadäni tömänäni öönædē æidämaī ingadänimpa. Waobo nē ēñagaïmo inte öönædē quëwente nē wææ pömo iñömö botö adoboque öönædē æibo ìmopa. ¹⁴ Möitee wodi önömæca tæntæ nani badöninto æninque awäa ñä cædinque gö cæcä a ongongatimpa. Waobo ēñagaïmo ìmote adobaī awäa timpodinque tiwadinque gö cædäni wægonguënemo ìmopa. ¹⁵ Mänömaī botö ìmote cædäni adinque botö ìmote nē wede pönänäni iñömö tömänäni cöwē wænämaī quëwencædänimpa,” ante Itota apænecäimpa.

Wængonguī nänö waadete pönëno

¹⁶ “Edæ Wængonguī incæ inguipoga quëwënäni inänite nē waadete pönengä inte tömengä Wengä adocanque onguīñængä iñongante pönongä pongacäimpa. Ìninue æcänö tömengä ingante nē wede pönëna iñömö tömengä wē womönämaī inte cöwē wænämaī quëwencæcäimpa. ¹⁷ Edæ Wængonguī incæ tömengä Wengä ingante inguipoga iñömö da pönongä pongacäimpa. Incæte, Inguipoga quëwënäni nani pante wæquinque, ante apænte ancæte ante wii pongacäimpa. Wæætē inguipoga quëwënäni inänite tömengä ængä beyænque quëwencædänimpa, ante tömengä ingante da pönongä pongacäimpa.”

¹⁸ “Æcänö tömengä ingante nē wede pönëna iñömö Wængonguī tömengä ingante, Bitö pante wæquinque cæbipa, ante apænte änämaī incæcäimpa. Æcänö guiquënë wede pönänämaī ina iñömö Wængonguī tömengä ingante, Botö Wengä adocanque iñongante bitö tömengä ëmowo ante pönänämaī inömi inte wæcæbiimpa, ante do apænte angä ingampa. ¹⁹ Wængonguī nänö apænte änö iñömö iimaī impa. Nē ñäö bai inongä iñömö, Wængonguī æbänö ingää, ante inguipoga iñömö ancæte ante pongacäimpa. Incæte woadäni tömënäni nani cædimämö wænæ wænæ ì beyænque wëmö iñömö ante waadete pönänäni inänipa. Wæætē nē ñäö bai inongä ingante waadedämaī inänipa. ²⁰ Nē wænæ wænæ cædönäni inte ñäö iñömö ante piñinque Baa äninque, Mönö cædinö edonque

pöni badāmaī ingäimpa, ante ñäo iñömö pönāmaī inānīpa. ²¹ Waodāni Wængonguī nāwangä nänö āmaī nē cædönāni guiquēnē, Mönö cædinö ante Wængonguī mönö tönö godongāmæ cæcä beyænque cætamompa, ante edonque pöni acædānimpa, ante cædinque ñäo iñömö pöningue cædānīpa.”

Wäo nē guidönongä Itota ingantedö ante apænecä

²² Ayæ ate Itota tömengä ëmiñænāni tönö Oodeabæ wædænque nāni quëwëñömö godānitapa. Gote pöningue mǎniñömö tömēnāni tönö wædænque quëwëningue Itota angä beyænque tömēnāni waodāni inānite æpænē guidönāni guiigadānimpa. ²³ Ënöö quëwëñömö æpæ nanguī mæ adinque Wäo mǎniñömö guidongä guiigadānimpa. Ayæ waodāni, Wäo mönitö imönite æpænē guidonguingä, ante cöwë tömengä weca pönāni inānite guidongä guidānimpa. Ënöö quëwëñömö Tadii quëwëñömö eyequei inimpa. ²⁴ Mǎniñedē Wäo ingante ayæ tee mönedāmaī ingadānimpa.

²⁵ Wäo ëmiñænāni pancadāniya oodeocä adocanque tönö apænedinque, Mönö oodeocabo æbānö cæte Wængonguī weca guicæte ante waëmö bacæmöimpa, ante tömēnāni nāni pönēnö ante guëadö guëa ante tedewēnānīpa. ²⁶ Adodāni Wäo weca ponte apænedinque,

—Nē odömömi ëñēmi. Oododānö æmæmāa bitö weca nē pöningä ingantedö ante bitö, Mǎningä ingampa, ante apænebitawo. Edæ mǎningä onguiñængä iñömö adobaī æpænē guidongä guidānīpa töö. Waodāni tömānāni tömengä weca godānīpa, ante wædānitapa.

²⁷ Ante wædāni ëñēningue Wäo,

—Wængonguī öönædē quëwëningä pönö angä æninque waocä mǎnōmaī beyæ cæcampa. ²⁸ Botö wii Codito inömo imopa. Iñæmpa Wængonguī botö imote täno da pönongä pönimo imopa. Tömengä ayæ Ponguingä, ante apænetabopa. Mǎnōmainö ante apænebo ëñēnimini inte mīnitö tömēmīni mǎninö ante nē apænequēnēmīni iminīpa. ²⁹ Monguingä iñömö mongä ate tömengä onquiyængä nänöogængä bacampa. Tömengä guidengä iñömö nē monguingä ante wānö cöningue ëñēñongä monguingä apænecä ëñēningue, Monguingä apænecä ëñēmopa, ante watapæ tocampa. Botö adobaī Codito apænecä ëñēmopa, ante mǎningä baī nanguī watapæ tobo imopa. ³⁰ Tömengä iñömö godömenque ñænængä inte cædongä baquēnengä ingampa. Botö guiquēnē pönömenque wædāmo inte cædömo baquēnēmo imopa, ante Wäo apænegacäimpa.

Öönædē nē quëwente wææ pongä

³¹ Ayæ Wäo godömenque apænecantapa. Öönædē nē quëwente wææ pongä iñömö tömengä iñömö wii wadāni baī wædangä inte wæætē ñænængä inte cædongä ingampa. Öönædē nē quëwente wææ pongä iñömö tömengä godömenque ñænængä inte cædongä ingampa. Inguipoga iñömö nē ëñacä guiquēnē waodāni baī quëwëningä inte inguipogaque ante apænecampa. ³² Tömengä Wængonguī weca quiēmē adingä inte quiēmē ëñēningä inte mǎninö ante apænecä ëñēningue wadāni wæætē, Nāwangä impa, ante änāmaī inānīpa töö. ³³ Mǎninö ante nē Ao angä guiquēnē tömengä, Wængonguī nāwangä angä ingampa, ante edonque pöni angä inongä ingampa. ³⁴ Edæ Wængonguī nänö da pönöningä iñömö Wængonguī nänö änö ante apænecampa. Tömengä ingante Wængonguī iñömö tömengä Öönöwoca ingante godongä æninque tömengä ædæmö ewocate quëwengampa. ³⁵ Mæmpo Wængonguī iñömö tömengä Wengä ingante nē waadete pönengä ingampa. Wængonguī tömengä ingante, Bitö nempo quīnö inincoo tömancoo pönömo æninque bitö awēnē bacæbiimpa, ante pönö cægacäimpa. ³⁶ Æcānö Wængonguī Wengä ingante nē wede pönēna iñömö tömengä cöwë wænāmaī quëwencæcäimpa. Æcānö Wængonguī Wengä ingante nē Baa ante pönēnāmaī ina guiquēnē tömengä wii cöwë wænāmaī quëwencæcäimpa. Edæ Wængonguī tömengä ingante ænguī nänö panguimāmo cöwë cædongä ingampa, ante Wäo mǎniñedē iinque apænegacäimpa.

¹ Paditeoidi inänite iimaï ante tededäni eññänitapa. Itota pönö cædinque æpænë guidongä guidinque tömengä nänö emiññänäni iñömö wiï Wäö emiññänäni bai wædænque badäni inte nanguï inäni badänipa, ante tededänitapa. ² Mänömaï änäni incæte wiï Itota në guidongä inongäimpa. Wæætë tömengä emiññänäni waodäni inänite guidönäni guiigadänimpa. ³ Mäninö ante Paditeoidi do eññänäni, ante änäni eññinque Awënë Itota Oodeabæ quëwëninque wadæ go Gadideabæ iñömö ocæ emænte gogacäimpa.

⁴ Gadideabæ taadö Tämadiabæ iñömö tæcæguedë inö godö tömengä goquënegä inongäimpa. ⁵ Tämadiabæ iñömö godinque tömengä Ticada näni aññömö pongantapa. Mänii Ticada quëwëñömö eyequei docä Aacobo wodi tömengä wengä Ootee wodi ingante, Pancabaa bitö ömæ baquiñömö, ante tömengä ingante nänö godongaimæ inimpa. ⁶ Ayæ æpäamönicæ Aacobo wodi nänö ææ wogaïmönicæ adoyömö inimpa. Itota taadö gobæ inö godinque nangæ badinque æpäamönicæ iñömö pö tæ contayongä mäniñedë tæcæ bæcä bagatimpa. ⁷ Tæ contate ongöñongä Tämadiabæ quëwengä onquiyængä æpæ iyænte tadonte æncæte ante pongä adinque Itota tömengä ingante,

—Æpæ pönömi beboe, angantapa. ⁸ Edæ tömengä miñæ në godäni mäninäni quëwëñömö cænguï godonte æncæ godäni inönänimpa.

⁹ Tämadiaidi inänite oodeoidi cöwë gomö adäni inänipa, ante eñngä inte Tämadiabæ quëwengä onquiyængä iñömö Itota ingante,

—Bitö oodeobi imi incæte botö Tämadiabæ quëwëmo iñömote bitö ædö cæte botö imote, Æpæ pönömi beboe, ämii, ämopa.

¹⁰ Añongä Itota wæætë,

—Bitö, Wængonguï quinö nänö pönöni i, ante eñente bai ayæ, Æbodö inömo inte bitö imite, Æpæ pönömi beboe, ante apæneboo, ante eñente bai bitö wæætë botö imote, Æpæ pönömi beboe, ancædömiimpa. Ayæ botö bitö imite æpæ quëwenguimæ pönömo becædömiimpa, ämopa.

¹¹ Angä eññinque onquiyængä,

—Awënë, bitö æpæ mä iyæncade dæ ampa. Ayæ æpäamönicæ guiibæ impa. Mänimæ æpæ quëwenguimæ bitö në apænedimæ ædönö mä iyænte ænguimii. ¹² Mönö docä mæmpo Aacobo wodi iñömö, Botö æmæwo wæmo adinque botö æpäamönicæ minitö quï bacäimpa, ante iimönicæ mönö imonte godongacäimpa. Tömengä adomönicæ æpæ begacäimpa. Tömengä wänäni tönö tömengä cæningäidi adobaï adopæ begadänimpa. Adocä mönö docä wædangä iñongante bitö godömenque ñænæmi inte në cædömi imitawogaa, ämopa.

¹³ Añongä Itota wæætë,

—Æcämenque iñömö mänimæ bedinque wæætë gæwænte bacæcäimpa. ¹⁴ Æcämenque botö godonguimæ në becä quiquënë tömengä gæwænämaï cöwë quëwencæcäimpa. Wæætë botö tömengä ingante tömëmo godonguimæ godömo bedinque tömengä botö quëwënö entawente quëwencæcäimpa. Æpäamönicæ cöwë cægö bai botö tömengä mimöno godonguimæ beyænque tömengä wänämaï nänö quëwenguinö do æninque quëwencæcäimpa, ämopa.

¹⁵ Onquiyængä tömengä ingante,

—Awënë, äninque, Botö gæwænämaï bacæboimpa, ante mänimæ botö imote pönömi beboe, ämopa. Ayæ mäniñömö cöwë æpæ iyæncæ pönämaï incæboimpa.

¹⁶ Ante añongä tömengä wæætë,

—Goe, bitö nänöogængä ingante aa pedinque ænte mämömi pongæ, angantapa.

¹⁷ Añongä tömengä wæætë,

—Botö nänöogængä dæ ampa.

Angä eññinque Itota tömengä ingante,

—Bitö, Botö nänöogængä dæ angampa, äninque nö ante ämipa. ¹⁸ Iñæmpa bitö nänöogæidi önompo æmæmpoque iñönänite bitö tömënäni inänite mönimi imipa töö.

Ayæ ñöwoyedë onguiñængä bitö weca në quëwengä iñömö wii bitö näwä nänöogængä ingampa. Ìninqe ñöwo bitö änö iñömö edæ näwangä impa, ämopa.

¹⁹ Angä ëñëninque onquiyængä,

—Awënë, Bitö Wængongui beyæ në apænebi ìmi adinque ëñëmopa. ²⁰ Mönitö dodäni mëmpoidi wodi, Ìi onquiyabo iñö gote Wængongui ingante, Bitö Awënë Wængongui ìmidö anguënë, ante ædæ wæëninque angadänimpa. Minitö në oodeoidi ìmini guiquënë, Wængongui ingante waa ate apænecæte ante Eedotadëë quëwëñömö mäniñömonque godinque ædæ wæænte apænecäimpa, äminipa töö.

²¹ Åñongä Itota wæætë,

—Onquiyæmi ëñëmi. Botö änö ëñëninque pönëe. Minitö iñömö ædæ wæëninque botö Mæmpo ingante, Bitö Awënë Wængongui ìmidö anguënë, ante ìi onquiyabo iñö incæ Eedotadëë mäniñömö incæ minitö mäninö ante änämaï anguiönæ oo pönï impa. ²² Minitö tämadiaidi iñömö në Wængongui ingante, Bitö Awënë Wængongui ìmidö anguënë, ante ædæ wæëninque apænemini incæte adocä ingante, Æbänö ingää, ante ëñënämaï ìminipa töö. Mönitö guiquënë në ædæ wæëninque Wængongui ingante waa ate apænemöni inte adocä, Æbänö ingää, ante do ëñëmöni ìmönipa. Edæ, Në wënæ wënæ cædäni wæncæ cædinäni incæ quëwencædänimpa, ante në Ængä iñömö oodeocä ìnongä ingä apa änewëë. ²³ Botö Mæmpo ingante, Bitö Awënë Wængongui ìmidö anguënë, ante ædæ wæëninque näwangä ante apænedönäni inte apænecædänimpa. Adodäni, Näwangä impa, ante nö pönente ëwocadäni inte ædæ wæëninque Wængongui ingante mäninö ante watapæ apænecædänimpa. Mäninö ante näni apænequiönæ iñömö edæ oo pönï impa. Edæ do iinque batimpa. Wængongui, Mänömaï entawente nö pönënäni bai ìnäni ìnänite diqui diqui mininque, Mäninäni que botö ìmote, Bitö Awënë Wængongui ìmidö anguënë, ante ædæ wæëninque watapæ apænecædänimpa, angampa. ²⁴ Wængongui Önöwocaque ëwocate quëwengä ingampa. Ìninqe në ædæ wæænte tömengä ingante watapæ apænedäni iñömö tömënäni, Näwangä impa, ante nö pönente ëwocadäni inte ædæ wæëninque tömengä ingante watapæ apænequënënäni ìnänipa, ämopa.

²⁵ Angä ëñëninque onquiyængä,

—Botö, Mëetiya näni Codito änongä poncæcäimpa, ante do ëñëmopa. Tömengä pongä ate, Æbänö inguii, ante mönö ìmonte tömänö odömonte apænecä ëñencæmönimpa.

²⁶ Åñongä Itota wæætë,

—Botö në apænebo iñömö Codito ìnömo ìmo apa cæbii, ämopa.

²⁷ Tæcæ apæneyongante tömengä miñæ në godäni ocæ ëmænte ponte ayönäni tömengä iñömö onquiyængä ingante apænecä adinque, Æbänö cæ wæmönii, ante guiñente wædänitapa. Incæte, Æbänö ämii, ante, Quinante tömengä ingante tedebii, ante adocanque incæ änämaï ingantapa. ²⁸ Ayæ onquiyængä tömengä iyæncade ëmö cæte näni quëwëñömö ocæ ëmænte gote pöninque waodäni ìnänite apænedinque,

²⁹ —Ægodöedäni, onguiñængä iñömö botö ìmote tæcæ adinque, Botö æbänö cæboo, ante tömänö ante botö ìmo në apænecä ingante pö aedäni. Mäningä wabänö mönö Codito ìnongä ingantawo, ante ämopa.

³⁰ Angä ëñëninque tömënäni näni quëwëñömö tao godinque tömengä weca gogadänimpa. ³¹ Onquiyængä näni quëwëñömö tæcæ goyongä Itota nänö në ëmiñænäni iñömö tömengä ingante,

—Awënë në Odömömi ìmi wædænque cæe, ämönipa.

³² Ante åñönäni tömengä wæætë tömënäni ìnänite,

—Botö cængui botö ëadö ante quinö ì, ante minitö guiquënë tömäë ëñënämaï ìminipa töö.

³³ Angä ëñëninque tömengä ëmiñænäni godongämæ nämanque apænedinque,

—Wabänö wacä tömengä ingante cængui ænte pongantawo.

³⁴ Åñönäni Itota,

—Botö ìmote në da pönongä nänö änö bai botö cædö iñömö mäni tömö cængui bai impa. Ayæ, Tömengä nänö cædö ante tömänö iinque cæbopa, ante botö cædö

iñömö botö cænguī bai adobaī impa. ³⁵ Mīnitö iñömö, Mēa go mēa apāicā bayonte amiñayedē tōmēmoncodē gæcæmōnimpa, ante wīi āmīnitawo. Botö guiquēnē mīnitö imīnite āmopa. Waodāni inānite wi æmōnte aedāni. Edæ mānīnāni tōmēmoncoo gæyedē bai inānipa. ³⁶ Itota, Botö beyæ ante waodāni inānite nē gædongā ingante botö, Bitö cæbipa, ante paga cædinque ñōwoyedē incæ do pōnōmo ængampa. Wænāmaī wantæpiyæ quēwencædānimpa, ante cædinque ñōwoyedē incæ tōmengā tōmēnāni inānite do gædongā ingampa. Īnīnque botö ānō ante waodāni mīmōno nē quiyadingā tōnō nē gædingā tōnō guēa tocædaimpa. ³⁷ Mānōmaī wēēñēdē nāni angainō ante, Waocā adocanque tōmēmō quiyacā ate wacā guiquēnē nē gædongā ingampa, ante nāwangā ante impa. ³⁸ Tōmēmoncodē iñömö cædāni bai cædāmaī imīni incæte mīnitö tōmēmoncoo gæquīnāni bai bacæmīnimpa, ante botö, Waodāni botö quīnāni inānite gæcæmīnimpa, ante mīnitö imīnite da godōmo gomīnitapa. Wadāni iñömö do mānīncodē nanguī pōni quiyate cædinque botö ānō ante waodāni inānite apænecadānimpa. Mīnitö guiquēnē mīni cædāmaī iñömö incæ ōnonque gædimīni imīnipa, ante Itota apænecāimpa.

³⁹ Onquiyängā guiquēnē tāmadiaidi māññömö nāni quēwēñömö quēwēnāni inānite, “Tōmengā iñömö botö imote tæcæ adinque, Botö æbānō cæboo, ante tōmānō ante botö imote apænecantapa,” ante apænecā ēñēnīnque tōmēnāni nanguī ināni Itota ingante pōnengadānimpa. ⁴⁰ Tāmadiaidi tōmengā weca godinque, Bitö mōnitö weca a ongōe, ānāni ēñēnīnque tōmengā mēōnaa iñōnte tōmēnāni weca owocantapa. ⁴¹ Tōmengā nānō owoyedē tōmengā nānō ānō beyænque godōmenque tæiyænāni iñömö tōmengā ingante wede pōnente badānitapa. ⁴² Adodāni onquiyängā ingante,

—Wīi bitö apænete ānonque ante ēñēnīnque pōnēmōni inte mōnitö tōmengā apænecā adobaī ēñēnīmōni imōnipa. Ayæ, Māningā iñömö inguipoga mōnō quēwencabo iñōmōnte tōmengā nāwangā mōnō imōnte nē Ænongā ingampa, ante do ēñēmōnipa, apænecadānimpa.

Itota cæcā beyænque awēnē tōnō cæcā wengā waa bacāi

⁴³ Mēōnaa go ate tōmengā māññömö quēwēnīnque wadæ godinque, Gadideabæ gocæboimpa, ante gocantapa. ⁴⁴ Itota incæ wēēñēdē, Īmaī impa, ante ānongāimpa. Wængonguī beyæ nē apænecā inte tōmengā nānō pægaiimæ incæ māññömö apæneyongā tōmengā tōnō pægaiināni guiquēnē tōmengā ingante wīi waa adānipa tōo, ante ānongāimpa. ⁴⁵ Tōmengā māññi Gadideabæ nānō ponque pongā adinque gadideaidi edæ Eedotadēē iñömö Patowa nāni ææmæ cæyedē Itota bai māññömö gote ongōñōnāni, Tōmengā æbānō cæcāā, ante tōmāā adīnāni inte, Bitö pōmi waa amōnipa, ante tōmengā ingante apænecadānimpa.

⁴⁶ Ayæ Gadideabæ godinque Itota wæætē Cānaa nāni quēwēñömö, Æpæ incæ biinōmæ bacæimpa, ante wēēñēdē nānō cædiñömö adoyōmō gocantapa. Capēnaōmō nāni āñōmō quēwēnīnque adocanque pancabaa awēnē tōnō godongāmæ cæcā iñömö tōmengā wēñängā onguīñängā wēnæ wēnæ inongāimpa. ⁴⁷ Adocā onguīñängā iñömö, Itota Oodeabæ quēwente Gadideabæ pongā, ānāni ēñēnīnque tōmengā Itota weca gote angantapa. Botö wēñängā onguīñängā wæncæ cæcā iñōngante bitö tōmengā ingante cæbi waa bacæ. Ægodōe. ⁴⁸ Itota tōmengā ingante,

—Botö, Acæmīnimpa, ante bamōnengæ cæbo ate wæmīni inte mīnitö māññō beyænque botö imo pōnēmīni awædō.

⁴⁹ Ante apænecā ēñēnīnque pancabaa awēnē tōnō godongāmæ cæcā,

—Awēnē, botö wēñängā ayæ wænāmaī iñēdē ægodōe gocæimpa.

⁵⁰ Ante āñōngā Itota wæætē,

—Ñōwo wadæ goe. Bitö wēñängā iñömö quēwencæcāimpa, āmopa. Angā ēñēnīnque onguīñängā, Itota nānō ānō nō impa, ante pōnēnīnque wadæ gogacāimpa. ⁵¹ Tōmengā, Botö oncō, ante taadonque goyongante tōmengā beyæ nē cædōnāni tōmengā ingante apænecæte ante pō bee tēnānitapa. Pō bee tēnīnque,

—Bitö wēñängā waa bacāi.

⁵² Ante apænedäni ëñëninque tòmengä tòmënanï inänite, Botö wëñængä æyedëno waa bacäi, ante añongä tòmënanï wæætë tòmengä ingante,

—Ïmō ædæ gowayedë mänïñedë tòmengä gancaë bacantapa, ante apænedänitapa.

⁵³ Ayæ wëñængä mæmpo, Bitö wëñængä quëwencæcäimpa, ante Itota botö ïmote nänö äniñedë adoyedë botö wëñængä do waa bacantapa, ante wædinque tòmengä tönö tòmengä nani quëwencabo tòmancabo Itota ingante wede pönënanï bagadänimpa.

⁵⁴ Itota oodeoidi weca quëwente Gadideabæ ocæ ëmænte pöninque tòmengä mänïñömö ïi bamönengæ cædinque mempoga nänö cædo bamönengæ bagatimpa.

5

Itota cæcä beyænque pæ opa pæ opa gocä waa bacäi

¹ Ayæ ate oodeoidi, Mönö Wængonguï beyæ, ante nani ææmæ cæyedë Itota Eedotadëë ïñömö æidinque ado ante gogacäimpa. ² Eedotadëë wææ cæte ïñömö obegaidi nani pö guidemö gäänë gäwapæ impa. Mänimæ gäwapæ ebedeo tededö Betadapæ nani ämæ yæwedeca önompō æmæmpoque ñoncæcate ïnoncöimpa. ³ Mänincönë wënæ wënæ ïnani tæiyænänï cöwë öñönönänimpa. Pancadäniya babetamönänï inte pancadäniya pæ opa pæ opa godönänï inte pancadäniya cömante ïnönänï ïnänipa. ⁴ Adodäni, Æpæ incæ gopæ, ante wänö cönönänï ïnönänimpa. Edæ Wængonguï anquedo wæætë wæætë, Mänimæ incæ incæ gopængæimpa, ante wææ pöninque cædongäimpa. Gäwapæ incæ incæ go cæpæ adinque æcänö täno mänimænenë guida inte adocä quiëmë wënæ wënæ ï waa badongäimpa. ⁵ Mänïñömö öñönänï weca adocanque në öñönongä ïñömö todëinta ï ocho wadepo ganca wënæ wënæ inte wægaingä ïnongäimpa. ⁶ Adocä mänïñömö öñongä ingante Itota ponte ayongä wadäni, Mäningä wantæpiyæ mänömaï wënæ wënæ inte wægaingä ingampa, ante apænedäni ëñëninque Itota tòmengä ingante,

—Bitö, Waa bainëmo, ämitawo.

⁷ Ante añongä në wënæ wënæ ingä wæætë,

—Awënë, gäwapæ incæ incæ gopæñedë æcänö botö ïmote ænte guiiquinaa edæ daë angampa. Ayæ botö, Æpænë guiicæboimpa, ante goyömo wacä pöninque do täno guiicä.

⁸ Ante wæyongante Itota,

—Ængæ gantie, bitö bee podonte möïmo ænte goe. ⁹ Añongä onguïñængä ïñömö ïñontobæ waa badingä inte tòmengä bee podonte möïmo ænte cægonde gocantapa. Oodeoidi nani guëmanguïönæ ïñonte Itota mänömaï cæcantapa. ¹⁰ Mänömaï beyæ oodeoidi awënëidi ïñömö onguïñængä në waa badingä ingante,

—Ñowoönæ guëmanguïönæ ïñonte mönö æbänö cæquiï, ante do wææ yewæmonte impa cæbii. Bitö bee podonte möïmo næænämaï incæbiimpa.

¹¹ Ante püñönänï tòmengä wæætë,

—Botö ïmote, Waa bae, ante në cædingä ïñömö adocä incæ, Bitö bee podonte möïmo ænte goe, angä cætabopa.

¹² Angä ëñëninque tòmënanï tòmengä ingante,

—Mäningä ïñömö bitö ïmite, Bitö bee podonte möïmo ænte goe, ante në angä ïñömö æcänö ingä. Apænebi ëñëmönïe, änänitapa.

¹³ Itota guiquënë do waodäni nanguï ïnani ongönänï tæcæguedë go wadæ godongäimpa. Mänömaï beyæ onguïñængä në waa badingä ïñömö, Në cædingä æcänö ingä, ante ëñënämaï ingantapa. ¹⁴ Ayæ ate Itota Wængonguï oncö ñænæncö yabæcönë go guidinque tòmengä ingante bee tëninque,

—Ëñëmi, bitö wæætë waa babi ïmipa. Ïninqe godömenque wënæ wënæ cædämaï incæbiimpa. Bitö mäninö wënæ wënæ bitö cægainö ante ñimpo cædämaï ïmi ïninqe wabänö bitö wæwenguinque godömenque babäimipa, ämopa.

¹⁵ Angä ëñëninque onguïñængä wadæ gote oodeoidi awënëidi weca pöninque angantapa. Botö ïmote, Waa bae, ante në cædingä ïñömö Itota ingampa, ante apænecantapa.

¹⁶ Mänömaï beyæ Itota mäninö nänö cædinö ante guëmanguïönæ ïñonte cæcä adinque

oodeoidi awënëidi iñömö tömengä ingante togænte wënæ wënæ cædänitapa. ¹⁷ Itota tömënäni inänite,

—Botö Mæmpo ñöwoönæ ganca tömengä nänö cædö ayæ cæcä ingampa. Ayæ botö adobaï cæbo imopa, ante apænecantapa.

¹⁸ Mäninö angä ëñëninque tömënäni godömenque pïininque, Mönö tömengä ingante æbänö cæte wænömö wænguingää, ante godömenque nanguï cægadänimpa. Tömënäni, Tömengä guëmanguïönæ iñonte do cæcä ingampa. Ayæ godömenque, Wængongui botö Mæmpo inongäimpa, ante tededinque tömengä, Botö Wængongui bai imopa, ante bai cæcampa töö, ante tömënäni godömenque piingadänimpa.

Tömengä Wengä ingante Wængongui pönö cæcä ate Awënë bacampa

¹⁹ Itota adodäni inänite iïmai äninque, “Botö mïnitö imïnite näwangä ämopa. Botö Wængongui Wëmo inömo incæ ædö cæte adoboque nämanque cæbo imoo. Botö Mæmpo æbänö cæcää adinque botö adodonque cæbopa. Edæ botö Mæmpo nänö cædö bai botö Wængongui Wëmo inte adobaï cæbopa. ²⁰ Edæ Mæmpocä Wëmo iñömote tömengä botö imote waadete pönëninque tömengä nänö cædö tömänö ante botö imote odömongä abo imopa. Ayæ mïnitö, Æbänö cæcä wæmöö, ante wæcæminimpa, ante cædinque tömengä godömenque bamönengæ nänö cædö ante botö imote odömongä ate botö wæætë cæbo acæminimpa. ²¹ Edæ botö Mæmpo iñömö æmæwo wængainäni inänite, Ñäni ömæmöninque mïnitö miïmini quëwencæminimpa, ante pönö cæcä bai botö tömengä Wëmo iñömö adobaï cæbo imopa. Æcänö ingante, Bitö mii quëwencæbiimpa, ante äinëmo inte botö tömengä ingante pönö cæbo ate miingä quëwencæcäimpa. ²² Adobaï botö Mæmpo iñömö waodäni inänite adinque, Æcänö waa cæcantawo, ante, Æcänö wënæ wënæ cæcantawo, ante apænte änämai ingampa. Wæætë edæ botö tömengä Wëmo iñömote tömengä, Bitö mäninö ante waodäni tömänäni inänite apænte ancæbiimpa, ante cægacäimpa. ²³ Mänömai cædinque botö Mæmpo, Waodäni botö imo nani waa abaï adobaï botö Wengä ingante tömänäni waa acædänimpa, ante cægacäimpa. Botö tömengä Wëmo iñömote në waa adämai ingä iñömö tömengä botö Wæmpocä botö imote da pönongä ingante adobaï waa adämai ingampa töö,” ante Itota apænecantapa.

²⁴ Ayæ apænedinque, “Mïnitö imïnite näwangä ämopa. Waocä botö änö ëñëninque botö imote në da pönongaingä ingante në wede pönengä iñömö tömengä nänö apænte pante wæwenguinö godämai incæcäimpa. Wæætë tömengä nänö wænämai quëwenguinö gocæcäimpa. Edæ tömengä mönö æmæwo wænguinö ñimpo cædinque wænämai mönö quëwenguinö do gocäimpa. ²⁵ Mïnitö imïnite näwangä ämopa. Waodäni në quëwënäni incæ tömënäni æmæwo wængainäni bai inönäni inte tömënäni iñömö Wængongui Wëmo botö tedepämo oo ëñencædänimpa. Ñöwoönæ tömënäni nani ëñenguïönæ do batimpa. Në ëñënäni iñömö tömënäni nani wænämai quëwenguinö gocædänimpa. ²⁶ Wængongui nämä në quëwënongå inte tömänäni nani quëwëmämo ante në godongä ingampa. Mänömai beyænque botö tömengä Wëmo adobaï nämä në quëwënömo inte tömänäni nani quëwëmämo ante në godömo imopa. ²⁷ Ayæ Waobo ëñagaimo iñömote tömengä pönö cæcä beyænque botö në ämo badinque nämä tæi piñante cædinque edæ, Æcänö waa cæcantawo, ante, Æcänö wënæ wënæ cæcantawo, ante në apænte anguiïmo imopa. ²⁸ Botö mänömainö ante apænebo ëñëninque mïnitö, Æbänö angä wæmöö, ante änämai incæminimpa. Edæ æmæwo wængainäni tömänäni tömënäni nani wodido në öñongainäni iñönänite edæ botö tedepämo incæ tömënäni nani ëñenguïönæ oo pönï impa. ²⁹ Botö tedepämo ëñëninque tömënäni tömänäni ta poncædänimpa. Në waa cægainäni iñömö wænämai nani quëwenguinö nani goquinque ñäni ömæmoncædänimpa. Në wënæ wënæ cægainäni guiquënë nani apænte pante æmæwo wæwenguinö nani goquinque ömæmoncædänimpa cæminii,” ante Itota apænegacäimpa.

Æcänö äna ëñente cæbii, ante Itota ingante änänipa

³⁰ Ayä godömenque apäenedinque Itota iümai apäenecantapa. “Botö ædö cæte nämanque adoboque cæbo imoo. Wæætë Wængongui botö imote æbänö angä ëñëninque botö mäninö ante, Æcänö waa cæcantawo, ante, Æcänö wënæ wënæ cæcantawo, ante apænte ämopa. Ayä botö apænte änö iñömö cöwë nöinö ante impa. Edæ botö tömëmo ämai cädämai imopa. Wæætë botö Mæmpo botö imote nê da pönongaingä nänö ämai cæbo imopa. ³¹ Botö nämanque äninque, Æbänö cæboo, ante apænebo bai minitö, Önonquedö ante impa, ancädöminimpa. ³² Botö æbänö cæboo, ante wacä botö beyä ante nê apäneca ingampa. Tömengä botö imotedö ante nänö apänedö iñömö edæ nö impa, ante ëñëmopa. ³³ Minitö botö imotedö ante, Æbänö cæcää, ante ëñencæte ante Wäö nê æpænë guidönongä weca wadäni inänite da godöminitapa. Ayä Wäö mäninäni inänite botö imotedö ante nö apäneca ëñënanitapa. ³⁴ Botö æbänö cæboo, ante waodäni botö beyä apänecaädänimpa, ante botö änämai imopa. Wæætë, Minitö botö ämo beyænque quëwencämminimpa, ante cædinque botö mänömainö ante apänetabopa. ³⁵ Wäö nê æpænë guidönongä tömengä iñömö ti wodönoincade bæco bai ingacäimpa. Ayä, Tömengä nänö angainö nää bai impa, ante adinque minitö wantäyö iñonte, Waa impa, ante watapæ tominitapa. ³⁶ Botö æbänö cæboo, ante Wäö nê æpænë guidönongä nänö angainö beyä waodäni mäninö ante do ëwocadäni ingadänimpa. Ayä botö Mæmpo, Bitö iümai cæe, ante, Tömää iinque cæcæbiimpa, ante botö imote nänö angainö bai ante do cädömo imopa. Botö Mæmpo botö imote da pönongaingä ingampa, ante wadäni botö cædinö beyä do ëñënanimpa. ³⁷ Ayä botö Mæmpo botö imote nê da pönongaingä iñömö adobai, Botö æbänö cæboo, ante apäneca ëñengadänimpa. Minitö guiquënë tömengä ingante adämai imini inte tömengä nänö tedepämo incæ cöwë ëñënämai iminipa töö. ³⁸ Ayä botö Mæmpo botö imote da pönongä pönimo imopa, ante minitö pönënämai imini inte edæ tömengä nänö angainö ante entawënämai quëwëminii iminipa. ³⁹ Wængongui angä ëñëninque näni yewæmongainta ædämö adöminii inte edæ minitö, Mäninö näni yewæmongainta amöni beyænque mönitö wänämai möni quëwenguinö gocæmönimpa, ante pönëminii iminipa. Iñæmpa mänintaa yewæmöninque botö imotedö ante apäenedinque yewæmongadäni apa quëwëminii. ⁴⁰ Botö, Minitö wänämai mini quëwenguinö ante pö æedäni, äñömote minitö wæætë Baa äninque botö weca pönämai iminipa,” ante Itota apäenecantapa.

⁴¹ Ayä apäenedinque tömengä, “Waodäni botö imote waa adinque apänecaädänimpa, ante änämai imopa, angantapa. ⁴² Iñæmpa, Minitö æbänö cæminii, ante botö do ëñëmopa. Wængongui nänö waadete pönente entawëno minitö entawënämai quëwëminii, ante do ëñëmopa. ⁴³ Wængongui angä ëñëninque botö wææ pönimo adinque minitö Baa ante botö imote pönënämai iminipa. Wacä guiquënë nämä äninque pongä iinque minitö mäningä ingante Ao ante pönëmaiminipa, ante awädö. ⁴⁴ Minitö wacä ingä wacä ingä, Botö imote waa adinque waa apänecaädänimpa, ante cæminii awädö. Incæte minitö, Mönö Wængongui nê adocanque ingaingä ingampa, ante, Tömengä mönö imonte waa adinque apänecaäcäimpa, ante cädämai iminipa. Mänömai beyä minitö botö imote ædö cæte pönëminii iminii. ⁴⁵ Botö Mæmpo weca ongöninque minitö iminitedö ante botö, Iinäni wënæ wënæ cädäni inänitapa, ante ancæboimpa, ante minitö pönëminitawo. Mänömainö ante edæ pönënämai iedäni. Wæætë Möitee wodi nänö angainö ëñente beyænque mönö quëwengäimpa, ante pönëminii. Iñæmpa adocä Möitee wodi mini nê pönëngö iñömö, Nê wënæ wënæ cæminii iminipa, ante ancæcäimpa cæminii. ⁴⁶ Minitö Möitee wodi ingante pönente bai adobai botö imote pönëcaädöminimpa. Edæ tömengä botö imotedö ante yewæmongacäimpa. ⁴⁷ Möitee wodi nänö yewæmongainö ante pönënämai imini iinque minitö ædö cæte botö apänedö ante ëñëninque pönenguiminii,” ante Itota mäniñedë iinque apänegacäimpa.

¹ Mäninö iinque apænete ate wantæyö iñonte Itota wadæ godinque gäwapæ Gadideapæ nani ämæ æmæmäa tao gogacäimpa. Mänimæ Tibediapæ nani ämæ impa. ² Tömengä wogaa tao gocä adinque waodäni täiyænäni pö tee empo godänitapa. Tömengä, Acädänimpa, ante cædinque wænæ wænæ inäni inänite bamönengæ cæte odömongä do adinäni inte godänitapa. ³ Ayæ Itota tömengä nänö emiñænäni inänite änanquidi ænte mäicä ædinque tömënäni tömengä tönö tæ contadänitapa. ⁴ Wodo pænta gogaiönæ, ante oodeoidi Patowa nani ææmæ cæönæ oo pönï ingatimpa. ⁵ Itota gomö ayongä waodäni täiyænäni tömengä weca pönäni adinque tömengä Pedipe ingante,

—Mäninäni waodäni beyæ ædönö gote pöö godonte æninque godömöni cænguïnänii, angantapa.

⁶ Edæ Itota iñömö, Æbänö cæbaïmoo, ante do ëñëningä inte mäninö ante, Pedipe æbänö cæquiringä, ante acæte ante angantapa. ⁷ Pedipe wæætë tömengä ingante,

—Iñæmpa pöö ante tömänäni wædænque cæncädänimpa, ante ocho apäicä cæte beyæ paga æinta æninque mänimpota godonte æninque edæ wïi eyepæ imaimpa, angantapa. ⁸ Ayæ tömengä emiñængä Timönö Pegodo biwï Æntade iñömö Itota ingante,

⁹ —Mönitö weca nê ongongä edëningä iñömö tebada nani awënënimö guiyä pöö önompo æmæmpoque tönö guiyä gæyæ mäa pönï næængä ingampa. Incæte mänii cænguï täiyænäni beyæ ædö cæte eyepæ i, ante wæbopa.

¹⁰ Angä ëñëninque Itota,

—Minitö täiyænäni godongämæ ongönäni inänite ämini tæ contaedäni, angantapa. Tömengä nänö ämaï änäni ëñëninque waodäni önömæcaque inö nanguï gaguïmä pæyömö do tæ contadänitapa. Onguiñænäni incæ önompo æmæmpoque müido ganca inäni inte tæ contadäni ingadänimpa. ¹¹ Itota pöö æninque, Wængonguï, Bitö waa pönï pönömi ænte cænguïmöni, ante apænedinque tömengä nänö emiñænäni inänite godongä æninque tömënäni wæætë tæ contadäni inänite di mäñænäni cænänitapa. Ayæ tömengä gæyæ æninque adobaï cæcantapa. Tömänäni iñömö nani cæinënö ante eyepæ cængadänimpa.

¹² Tömënäni tömo pönï cænäni ate tömengä emiñænäni inänite tömengä,

—Cænguï nani ao mäe ao mäe ñönönï ee öñoncoo wote badämaï ingäimpa, ante pædæ wææmpo ö æedäni.

¹³ Angä ëñente cædinque nê cænäni pöö önompo æmæmpoque tebada nani awënënimö nani ao mäe ao mäe ñönönï ee öñoncoo ö ænte da wënäni ate edæ otodë tipæmpoga go mentodëa cænguï eyede da wënäni contagatimpa. ¹⁴ Waodäni iñömö Itota bamönengæ nänö cædi adinque,

—Nawangä iingä iñömö Wængonguï beyæ nê apænecä ingampa. Tömengä inguipoga Ponguingä, ante nani angaingä inongäimpa, ante tæcæ änänitapa.

¹⁵ Tömënäni, Bitö mönitö Awënë Odeye bacæbiimpa, ante botö imote bæi ongoncæte ante poncæ cædänipa, ante wædinque Itota wadæ godinque adocanque änanquidi wæætë æigacäimpa.

Itota æpæ yædopæ dao dao gocä

(Mäateo 14.22-27; Mäadoco 6.45-52)

¹⁶ Gäwadecæ pönï bayö tömengä emiñænäni iñömö gäwapæ yæwedeca wæi gogadänimpa. ¹⁷ Itota angä ëñëninque mäniñömö wæi wipodë guidinque tömënäni, Gäwapæ æmæmäa Capënaömö nani quëwëñömö mönö taocäimpa, ante tæcæ wogaa tao goyönäni dobæ wëmö bayö Itota ayæ tömënäni weca pönämaï inongäimpa. ¹⁸ Ayæ woboyæ nanguï pæmænte pönö æpæ mäe conta mäe conta cæyonte, ¹⁹ tömënäni wodo tinco quidömetodo wiyate cæyönäni Itota iñömö wipo gämænö pöninque æpæ yædopæ wænömënæcapæ dao dao pongä adinque ancai guinënänitapa. ²⁰ Ancai guinënänite Itota iñömö tömënäni inänite,

—Botö imopa. Guinënämaï iedäni, angantapa.

²¹ Ante äñongä tömënäni Ao ante tömengä ingante wipodë æninque tömënäni nani goinënömö emönaiya do tao gogadänimpa.

Waadäni Itota ante diqui diqui minte pönäni

²² İimö ate täiyänäni gäwapæ imæ wedeca a ongönönänimpa. İnıneque tømänäni, Wıpo adoque pönı mäniñömö wäi wocæ incæte Itota iñömö mänımpodë guıdämaı iñongante tømengä miñæ godäni adodäni que guıi wadæ tao godänıtapa, ante adınque wädänıtapa. ²³ Awënë Itota do Wængonguı ingante, Bitö waa pönı pönömi cænguımöni, ante apænecä ate waodäni näni päö cäniñömö pancadäniya ayæ ongönänimpa. Nöwo iñömö wapocoo Tibedia näni quëwëñömö wo cæwodınque mäniñömö tømänäni näni cäniñömö eyequeı pönäni adänıtapa. ²⁴ İnıneque Itota tönö tømengä nänö emiñænäni edæ dæ änäni wædıneque täiyänäni iñömö wıpodë guıite Capënaömö godınque Itota ante diqui diqui mıncæte ante wogaa gogadänimpa.

Itota, Mönö quëwenguınque, ante cænguı baı ingampa

²⁵ Adodäni gäwapæ æmæmäa tao godınque tømengä ingä adınque,
—Awënë në Odömömi imı æyedënö iñömö pömitawo, änänıtapa.

²⁶ Äñönäni Itota wæætë,

—Mınitö imınite näwangä ämopa. Mınitö tömo pönı päö cänımıni inte botö imote ante diqui diqui mıncæ pömınitapa töö. Wæætë edæ botö, Acämınimpa, ante bamönengæ cæbo beyæ mınitö wıi pömıni awædö. ²⁷ Mınitö, Mönö cænguı, ante æncæte ante cämıni incæte inguıpogaque mıni woquınonque ante æncæ cädämaı quëwëedäni. Wæætë edæ, Mönö cænguı iınque bayedë cænguı mä öñongæimpa, ante cædıneque mınitö, Mönö wänämaı quëwenguınque gocæmöimpa, ante pönente quëwëedäni. Botö në Waobo ëñagaımo imo mäniı cænguı mınitö imınite pönömo æncämınimpa. Botö Mæmpo botö imotedö ante, İingä nö cæcä ingampa, ante odömongacäimpa.

²⁸ Angä ëñëınque tømänäni tømengä ingante,

—Mönıtö, Wængonguı nänö cæquımämo ante cæcæte ante quınö cæquënëmöni imönıi, ante wæmönıpa.

²⁹ Äñönäni Itota wæætë,

—Botö Wængonguı nänö në da pönongaımo iñömote mınitö botö imote mıni wede pönënë iñömö edæ mänınö Wængonguı nänö cædö impa, angantapa.

³⁰ Mänömaı beyæ tømänäni godömenque tømengä ingante,

—Bitö, Eñencädänimpa, ante bamönengæ bitö cædö ante æbänö cæte odömömi adınque pönëmaımönıpa. Æbänö cæquımıi, ante änewënänıtapa. ³¹ Mönö wæmæıdi önömæca näni quëwëñedë cænguı mänää näni angaı cængadänimpa. İımaınö ante yewæmongatımpa. “Tømengä, Mınitö cænguı, ante tømänäni inänıte öönædë inö mäwææ godongacäimpa,” ante näni yewæmongainö baı impa, ante apænedänıtapa.

³² Itota wæætë tømänäni inänıte,

—Näwangä ämopa. Mınitö imınite öönædë mäwææ cænguı në pönongaingä iñömö tømengä wıi Möıtee wodi ingacäimpa. Wæætë botö Mæmpo iñömö tømengä mınitö imınite öönædë näni näwä cænguı baı pönongä cæncämınimpa. ³³ Öönædë quëwente wææ pongaingä iñömö tømengä iñömö, Cænguı baı ingampa, ante Wængonguı nänö në angaingä ingampa. Adocä inguıpoga quëwënäni inänıte, Mıni wantæpiyæ wänämaı quëwenguınö ante pönongä ænıneque quëwënänıpa.

³⁴ Ante Itota apænecä ëñëınque tømänäni,

—Awënë, nöwo mäniı cænguı iımö iñö iımö iñö pönömi cæmönıe.

³⁵ Äñönäni Itota godömenque apænedınque,

—Botö iñömö, Mıni quëwenguınque, ante mıni cænguı baı inömo imopa. Botö weca në pongä iñömö cöwë cænguı gue æñenämaı baı quëwencæcäimpa. Ayæ botö imote në wede pönengä iñömö cöwë tepæ gæwænämaı baı quëwenguıngä ingampa, ante apænecantapa. ³⁶ Ayæ wæætë, Mınitö imınite do botö änö baı impa. Botö imote do adımıni incæte mınitö ayæ wede pönenämaı imıniıpa. ³⁷ Botö Mæmpo, Bitö quınäni bacädänımpa, ante cædıneque botö imote pönongä ämo inıneque botö quınäni në badäni inte tømänäni tömänäni iñömö botö weca edæ do pönänıpa. Ayæ æcämenque botö weca pöna inate, Botö weca pönämaı imıpa, ante cöwë änämaı incæboımpa. ³⁸ Edæ öönædë

quëwëninque botö wii tömömo ämai cæcæboimpa, ante wææ pontabopa. Wæætë botö imote në da pönongaingä nänö ämai cæcæboimpa, ante wææ pontabopa. ³⁹ Ayæ botö imote në da pönongaingä botö imo nänö angainö iñömö iimai impa. Waodäni bitö quinäni bacædänimpa, ante pönömo äninque bitö quinäni badinque adocanque incæ wë womonte wænämai incæcäimpa. Wæætë iinque baquiönæ iñonte bitö, Ñäni ömæmöedäni, ämi ëñëninque bitö quinäni tömänäni edæ ñäni ömæmoncædänimpa. ⁴⁰ Edæ botö Mæmpo nänö angainö iñömö iimai impa. Botö Wængongui Wëmo iñömote botö imote ædæmö adinäni inte edæ botö imote në pönëni tömänäni cöwë wænämai wantæpiyæ quëwencædänimpa. Mänömainö ante impa. Ayæ iinque baquiönæ iñonte botö mäninäni inänite, Minitö ñäni ömæmöedäni, ämo ate ömæmoncædänimpa. Itota mänömai apænecantapa.

⁴¹ Apænecä ëñëninque oodeoidi iñömö, Tömengä, “Botö cængui bai imopa, ante öönædë iñö wææ pontabopa,” angampa, ante tömengä ingantedö ante tæcæ piinte tedewënanitapa. ⁴² Tömëni,

—İngä iñömö wii Ootee wengä Itota ingantawo. Tömengä mæmpo tönö wäänä wii mönö adöna inatawo. Tömengä ædö cæte, Botö öönædë quëwente wææ pontabopa, angä änewë.

⁴³ Ante piñönäni Itota wæætë,

—Minitö nämanque godongämæ piinte tededämai iedäni. ⁴⁴ Botö Mæmpo botö imote në da pönongaingä wii pönö cæcä bai æcämenque incæ botö weca pönämai incædongäimpa. Ayæ iinque baquiönæ iñonte botö weca në pongä ingante, Ñäni ömæmöe, ämo ñäni ömæmoncæcäimpa. ⁴⁵ Wængongui beyæ në apænegainäni nani yewæmongaintaa iimai ante yewæmongadänimpa. “Wængongui waodäni tömänäni inänite odömonte apænecä ëñencædänimpa.” Botö Mæmpo apænecä në ëñëni iñömö tömengä nänö odömonte apænedö ante në ëñëni inönäni iinque tömëni tömänäni botö weca pönäni, ante Itota apænecantapa.

⁴⁶ Ayæ apænedinque, “Mini waocabo tömämini incæ botö Mæmpo ingante cöwë adämai iminitapa. Botonque iñömö Wængongui weca në quëwente pömo inte botö Mæmpo ingante në adimo iñömö adoboque pönä imopa. ⁴⁷ Minitö iminite näwangä ämopa. Botö imote në wede pönengä iñömö tömengä cöwë wantæpiyæ nänö quëwenguimämo do entawente quëwengä ingampa. ⁴⁸ Botö iñömö, Mini quëwenguinque, ante mini cængui bai imopa. ⁴⁹ Mini wæmäidi önömæca quëwënedë cængui mänää nani angai cængainäni incæte edæ do wængadänimpa. ⁵⁰ Botö iñömö cængui bai inömo inte öönædë quëwente wææ pömo imopa. İinque waocä, Cængui cænte bai quëwengäimpa, ante botö imote pönengä iinque tömengä cöwë wænämai quëwëmaingampa. ⁵¹ Botö cængui bai imo inte öönædë quëwengaimo incæ wææ pontabopa. Æcänö cængui cænte bai botö imote pönëni tömengä iñömö cöwë wænämai quëwencæcäimpa. İi cængui botö godongui botö nämä baö impa. Inguipoga quëwëni inänite, Minitö quëwenguimini, ante botö nämä baö incæ godoncæboimpa,” ante Itota mänömai apænecantapa.

⁵² Mäninö angä ëñente wædinque oodeoidi nani cabo iñömö godongämæ nämanque tedinque wæætë godö wæætë godö änewënanitapa.

—Mäningä iñömö mönö imö tömengä nämä baö ædö cæte pönongä cænguimönii.

⁵³ Ante tedewëñönäni Itota wæætë tömëni inänite,

—Minitö iminite näwangä ämopa. Botö Waobo ëñagaimo iñömote minitö botö baö cænämai inte botö wepæ bedämai imini iinque ædö cæte Wængongui wantæpiyæ nänö quëwenguimämo entawëmini inguimini. ⁵⁴ Botö baö në cængä ayæ botö wepæ në becä tömengä iñömö Wængongui wantæpiyæ nänö cöwë quëwenguimämo do entawente quëwengä ingampa. Ayæ iinque baquiönæ iñonte botö mäningä ingante, Bitö ñäni ömæmöe, ämo ñäni ömæmoncæcäimpa. ⁵⁵ Edæ botö baö näwä cængui bai impa. Ayæ botö wepæ näwä bequi bai impa. ⁵⁶ Botö baö në cængä inte ayæ botö wepæ në becä iñömö tömengä botö nempo ee quëwëngä ingampa. Ayæ adobai tömengä botö imote entawëngä ingampa. ⁵⁷ Botö Mæmpo në Quëwëngä inte botö imote da pönongä

pönimo imopa. Tömengä pönö cæcä ate quëwëmo imopa. Botö imote në cængä iñömö adobaï botö cæbo beyænque quëwencæcäimpa. ⁵⁸ Botö cængui bai imo inte öönædë wæë pönimo iñömö mänii cængui bai imopa. Mönö wæmäidi cængui mänää nani angai cængainäni incæ edæ do wængadänimpa. Wæætë ñowo wæë põmo iñömote, Cængui impa, ante në cænongä iñömö tömengä cöwë wænämaï quëwencæcäimpa, ante Itota apænecäimpa.

⁵⁹ Tömengä mäninö ante Capënaömö nani quëwëñömö nani odömöincönë ongöninque tömënäni inänite odömote apænecäimpa.

Itota nänö änö beyænque mönö wænämaï quëwengäimpa

⁶⁰ Mäninö odömote apænecä ëñëninque tömengä ëmiñänäni nanguï inäni, —Tömengä nänö odömote apænedinö iñömö waadedämainö impa. Edæ æcänö ëñëmaïnaa, ante änänitapa.

⁶¹ Mäninö nänö odömote apænedinö ante tæcæ piinte tedewënäni wædinque Itota tömënäni inänite,

—Minitö botö äninö ante oda cæmini inte piimini iminitawo, angantapa. ⁶² Ayæ godömenque apænedinque, Botö Waobo ëñagaïmo imo öönædë quëwente wæë pongaïmo inte adodö adoyömö æibo adinque minitö æbänö ante ämaïminii. ⁶³ Wængongui Önowoca pönö cæcä beyænque waocä quëwengä ininque tömengä baonque nänö ëñayö beyænque ædö cæte quëwëmaingää. Botö Wængongui Önowoca tönö apænedinque minitö iminite botö apænedinö beyæ minitö önowoca ewocate quëwencæminimpa.

⁶⁴ Incæte minitö weca pancadäniya iñömö botö imo pönënämaï inänipa töö, ante Itota apænecantapa.

Edæ tömënäni weca æcänö tömengä ingante pönënämaï ingää, ante Itota do ëñëngäimpa. Ayæ tömengä ingante në godö odömonguingä æcänö imaingää, ante tömengä adobaï do ëñëngäimpa. ⁶⁵ Itota godömenque apænedinque,

—Botö mänii beyæ minitö iminite do antabopa. Botö Mæmpo wii pönö cæcä bai æcämenque incæ botö weca pönämaï incædongäimpa, ante apænecäimpa.

⁶⁶ Mänionæ ganca tömengä miñæ në godäni incæ nanguï inäni wadæ godinque tömengä miñæ ayæ tee empo godämaï ingadänimpa. ⁶⁷ Tömënäni wadæ godäni adinque Itota önompo tipæmpoga go mëa ganca inäni inänite,

—Minitö diyæ æbänö cæquïminii. Minitö tömënäni bai adobaï botö imote ëmö cæte, Wadæ goinëmönipa, äminitawo.

⁶⁸ Äñongä Timönö Pegodo wæætë,

—Awënë, æcänö miñæ gobaimönii. Wacä mönitö imönite në ëmiñængä iñömö edæ dæ angampa. Wantæpiyæ wænämaï möni quëwenguinö ante æbänö gocæmönimpa, ante wæyömöni bitö iñömö në apænëbi imipa. ⁶⁹ Bitö iñömö Wængongui nänö da pönönömi inte tömengä nänö Tæiyæ Waëmö inömi imipa, ante pönëmöni inte ëñëmönipa.

⁷⁰ Ante apænecä ëñëninque Itota,

—Minitö önompo tipæmpoga go mëa ganca imini inte wii botö apænte ænömöni iminitawo. Incæte mini cabo incæ adocanque iñömö wænæ qui ingampa, ante apænecäimpa.

⁷¹ Timönö Icadote wengä Codaa ingantedö ante Itota mänömaï angacäimpa. Tömengä önompo tipæmpoga go mënaa nani cabo adocanque inongä incæte ayæ ate Itota ingante odömote në godonguingä inongäimpa.

7

Itota biwüidi tömengä ingante pönënämaï inäni

¹ Ayæ ate Itota Gadideabæ tömämæ wayömö wayömö gocä ingacäimpa. Oodeabæ iñömö oodeoidi awënëidi botö imote wænönæcæ cædänipa, ante wædinque Itota, Oodeabæ wii goinëmopa, ante mänionæ godämaï inongäimpa. ² Oodeoidi, Mönö wæmäidi oncontaicoo mænöninque quëwengadänimpa, ante pönëninque tömënäni ææmæ oo pönü ingatimpa. ³ Itota biwüidi tömengä ingante,

—Bitö emiñænäni bitö bamönengä cæbi acæðänimpa, ante cæcæte ante bitö iñömö ongönämaï inte wæætë Oodeabæ goquënemi imipa. ⁴ Waodäni tömänäni ayönäni cæbo edonque acæðänimpa, ante cæinengä iñömö tömengä wii awëmö cæcampa. Bitö mänii cæðinö do cæbi inte waodäni tömänäni bitö imite edonque pönii acæðänimpa, ante odömonte cæe, ämönipa.

⁵ Edæ tömengä biwiidi incæ tömengä ingante pönenämaï inäni inönänimpa.

⁶ Mänömaï beyä Itota tömënäni inänite,

—Botö wii ñöwo goquënemo imopa. Minitö guiquënë æyedëmë gomini incæ cöwë waa impa. ⁷ Inguipogaque quëwënäni minitö iminite ædö cæte piinte badänii. Wæætë botö tömënäni inänite, Minitö wënæ wënæ cæmini iminipa, ante apænebo beyä tömënäni botö imo piinänipa. ⁸ Minitö ææmæ cæðäni weca æite goedäni. Botö goquiönæ wii eyepæ impa, ante pönëninque botö ayä mänimæ cæðäni weca godämaï imopa.

⁹ Mäninö äninque tömengä godömenque Gadideabæ ongonte quëwengacäimpa.

Itota näni ææmæ cæyömö gote pongacäimpa

¹⁰ Incæte tömengä biwiidi ææmæ ante godäni ate tömengä adobaï godinque wii waodäni näni ayömö gocampa. Wæætë awëmö gocantapa. ¹¹ Ayä näni ææmæ cæyömö oodeoidi awënëidi iñömö,

—Mäningä onguiñængä æyömönö ingää, ante tömengä ingante ante diqui diqui minte wææ wänönänitapa.

¹² Tæiyænäni ponte a ongönäni godongämæ nämä tededinque tömengä ingantedö ante wæntæ wæntæ tededänitapa. Pancadäniya, “Tömengä waa cæcä ingampa.” Äñönäni wadäni iñömö, “Baa, mäningä waodäni inänite wapiticæ mäodinique, Oda cæquiänänimpa, ante cæcä ingampa,” ante apænedönänimpa.

¹³ Oodeoidi awënëidi inäni adinque guiñente wædinque wadäni tömänäni tömengä ingantedö ante waodäni eñëñönäni apænedämaï inönänimpa.

¹⁴ Tömënäni ææmæ do cæyedë Itota iñömö Wængongui oncö ñænæncönë yabæcönë æite pö guidinque waodäni inänite mä odömonte apænecä eñengadänimpa. ¹⁵ Tömengä odömonte apænecä eñëninque oodeoidi ancai guiñëninque,

—Æbänö cæte nanguï eñengä ingää. Edæ tömengä ecoeda adämaï inongä ingampa.

¹⁶ Äñönäni Itota wæætë,

—Botö odömonte apænedö ante wii nämä pönëninque odömonte apænebo imopa. Wæætë Wængongui botö imote në da pönongaingä nänö angainö ante odömonte apænebopa. ¹⁷ Minitö, Wængongui nänö angainö ante Itota odömonte apænecampa, ante pönëminitawo. Wæætë, Nämä pönëninque Itota odömonte apænecampa, ante pönëminitawo. Ìñæmpa waocä, Wængongui nänö ämaï cæcæboimpa, ante æcänö änaa tömengä iñömö, Æcänö angä eñëninque Itota odömonte apænecää, ante do eñencæcäimpa. ¹⁸ Në nämä pönëninque apænecä iñömö tömengä nämä ante, Botö imo waa acæðänimpa, ante äinente apænecä ingampa. Wæætë edæ, Botö imo në da pönongainganque ingante waa acæðänimpa, ante në äinente cæcä iñömö tömengä edæ në nö cæte quëwënongå ingampa. Adocä, Waodäni oda cæquiänänimpa, ante tömënäni inänite wii wapiticæ mäocä ingampa, ante Itota apænecantapa. ¹⁹ Ayä apænedinque, “Wængongui nänö wææ angainö ante Möitee wodi wii minitö beyä ante yewæmongacäi. Incæte minitö tömämini Wængongui nänö wææ angainö adinque eñente cæðämaï iminipa töö. Minitö quinante botö imote, Wænöinëmönimpa, ante pönëninque cæminii.”

²⁰ Ante awënëidi inänite äñongante nanguï inäni adoyömö ongönäni wæætë,

—Bitö wënæ tönö cæbi imipææ, ante tömengä ingante äninque, Bitö imite æcänö wænöinente cæcää.

²¹ Ante änäni eñëninque Itota godömenque tömënäni inänite,

—Guëmanguiönæ iñonte botö adopoque bamönengä cæbo adinque minitö tömämini ancai guiñente wæminipa edæ. ²² Möitee wodi iñömö, Minitö wëñængä eñacä ate önompo æmæmpoque go mëönaa go adoönæque iñonte mäniönæ tömengä yabæque

ëö togæncæminimpa, ante mīnitō īminite odōmonte apænecāimpa. Wīi Mōitee wodi mǎnōmaī mā cæcā ingacāimpa. Wæætē wēēnēñedē incæ mīnitō wæmæidi do adodō cægadānimpā. Incæte Mōitee wodi, Māniōnæ īñonte ëö togæncæminimpā, ante pōnō angā beyænque mīnitō guēmanguiōnæ ī incæte mīnitō wēñængā onguiñængā ingante ëö togæmīni īminipā tōö. ²³ Mōitee wodi nānō wææ yewæmongainō wido cædāmaī ingæimpā, ante cædinque mīnitō guēmanguiōnæ īñonte edæ wēñængā onguiñængā ingante do ëö togæmīnipā. Incæte edæ guēmanguiōnæ īñonte botō wēnæ wēnæ īningā ingante āmo ate tōmengā baō tōmāñō waa bacā beyænque quīnante botō īmote pīimīni īminīi. ²⁴ Waocā wabānō nānō cædi wēnæ wēnæ ī, ante pōnēninque ædæmō ēñēnāmaī īmīni inte mīnitō tōmengā ingā, Bitō wēnæ wēnæ cæbi īmipā, ante apænte ānāmaī īedāni. Wæætē, Æbānō ī, ante ædæmō ēñēninque nōingā ante ancæmīnimpā, ante Itota mǎnōmaī apænecāimpa.

Itota īñōmō Codito mōnō nē Ponguingā ingampa

²⁵ Mǎnōmaī beyæ Eedotadēē quēwēnāni pancadāniya,

—Māningā ingante wænōmōni wæncæcāimpā, ante awēñēidi wīi ānānitawo, ante māniñedē tæcæ tedewēnānitapā. ²⁶ Aedāni, tōmengā īñōmō edonque pōni a ongōninque woadāni inānite apæneyongā incæ mōnō awēñēidi tōmengā ingante ānāmaī pæ wēēnete inānipā tōö. Tōmēnāni wabānō, Māningā īñōmō nāwangā Codito mōnō ānongā ingampa, ante pōnēnānitawo. ²⁷ Īñæmpā, Māningā onguiñængā æyōmōnō quēwente pongā ingāā, ante do ēñēmōpā. Mōnō Codito, Nē Ponguingā, ante nāni angaingā īñōmō æyōmōnō quēwente pongāā, ante mōnō waocabo tōmāmō incæ ēñēnāmaī inguīmō īmompā, ānānitapā.

²⁸ Ayæ Itota Wængonguī oncō ñænæcōnē yabæcōnē odōmonte apænedinque aa pecantapā.

—Ao, Botō æbodō īmoo, ante mīnitō ēñēmīniyā. Ayæ botō, Æyōmōnō quēwente pōmoo, ante mīnitō adobāi ēñēmīniyā. Botō wīi nāmā pōnēninque pontabopā. Botō īmote nē da pōnongaingā nāwangā īnongā ingampa. Mīnitō, Tōmengā æbānō ingāā, ante ēñēnāmaī īminipā tōö. ²⁹ Botō wæætē edæ tōmengā weca quēwēmo īñōmote tōmengā botō īmote da pōnongā pōnimo inte edæ botō īñōmō edæ tōmengā ingante do agāimo inōmo īmopā, angacāimpā.

³⁰ Māniñō angā ēñēninque tōmēnāni, Quīnō cæte tōmengā ingante bæi ongonguīmōnimpā, ante pōnengadānimpā. Incæte tōmengā nānō wænguiōnæ wīi eyepæ ī beyæ tōmengā ingante ō ænāmaī ingadānimpā. ³¹ Tæiyænāni adoyōmō pō ongōnāni weca ongōninque nangui īnāni tōmengā ingante wede pōnēnānitapā. Tōmēnāni,

—Māningā onguiñængā īñōmō nangui bamōnengæ cæcā īnongāimpā. Mōnō Codito īñōmō tōmengā pongā ate godōmenque bamōnengæ cæquingā ingantawogā.

Itota ingante bæi ongoncæte ante cædāni

³² Tæiyænāni māniñōmō ongōnāni īñōmō Itota ingantedō ante mǎnōmainō ante wæntæ wæntæ tedeyōnāni Paditeoidi ēñēnānitapā. Ayæ, Wængonguī quī, ante nē godōnāni ñænænāni tōnō Paditeoidi īñōmō Wængonguī oncō ñænæcō wææ wānōnāni inānite, Mīnitō goedāni. Tōmengā weca godinque tōmengā ingante bæi ongonte ænte pōedāni, ānānitapā. ³³ Itota godōmenque apænedinque,

—Mīnitō weca wantæyō quēwēninque botō ayæ ate botō īmote nē da pōnongaingā weca ocæ ēmænte gocæboimpā. ³⁴ Botō ocæ ēmænte gobo ate mīnitō botō īmote ante diqui diqui mīmīni incæte adāmaī inguīmīni īminipā. Ayæ botō go quēwēñōmō mīnitō adoyōmō ædō cæte ponguīmīni īminīi.

³⁵ Angā ēñēninque oodeoidi awēñēidi nāmanque tededānitapā.

—Māningā, Gocæboimpā, ante ædōnō goyongante mōnitō diqui diqui mīninque adāmaī inguīmōni īmōni. Tōmengā, Edæ mōnō guidēnāni do panguiñmæ godinque guidiegoidi weca wayōmō wayōmō nāni quēwēñōmō tōmengā wabānō goquingāā. Ayæ guidiegoidi māniñōmō quēwēnāni inānite odōmonte apænebo ēñēncædānimpā, ante apænequingāā. ³⁶ Tōmengā īñæmpā, “Botō īmote ante diqui diqui mīmīni incæte

mīnitō botō īmote adāmaī inguīmīni īmīnīpa, angampa tōō. Ayæ, Botō go quēwēñōmō mīnitō adoyōmō dicæ ponguīmīniyaa,” ante mānīnō ante æbānō ante apæñecantawo, angadānīmpa.

Waēmō æpæ tayōmō ta gopæ mōnō quēwenguīmæ impa

³⁷ Ayæ tōmēnāni nāni æāmæ iīnque cæōnæ iīnonte, Ñænæ æāmæ impa, ante godōmenque nanguī cæyōnāni Itota iīñōmō ængæ gantidīnque yedæ yedæ tedecantapa.

—Nē gæwænte wæcā iīñōmō tōmengā botō weca poncæcāīmpa. Ayæ botō tōnō godongāmæ becæcāīmpa. ³⁸ Æcāmenque botō īmote nē wede pōnengā iīñōmō tōmengā quēwenguīmæ ænte entawencæcāīmpa. Ayæ waēmō æpæ tayōmō ta gote cægōmæ bai tōmengā adobai tōmengā nānō entawēnō godonte bai cædīnque, Wadāni betē bai quēwencædānīmpa, ante godō cæcæcāīmpa. Wængonguī angā ēñente nāni yewæmongainō bai ante mānōmaīnō ante impa.

³⁹ Mānōmaīnō ante Itota iīñōmō, Botō īmote nē wede pōnēnāni inte ayæ ate Wængonguī Ōnōwoca ingante ænte entawenguīnāni inānīpa, ante pōnēnīnque māningā Wængonguī Ōnōwoca ingantedō ante apænegacāīmpa. Edæ Itota ayæ wænāmaī inte oōnædē ocæ emænte æidāmaī nānō iīnedē Wængonguī iīñōmō Tæiyæ Waēmō Ōnōwoca ingante ayæ da pōnōnāmaī iīnongāīmpa.

Waadāni wæætē godō wæætē godō nāni ānewēnō

⁴⁰ Mānīnō nānō ānō ēñēnīnque waodāni pancadāniya,

—Nāwangā impa. Māningā iīñōmō, Wængonguī beyæ nē apæñecā nē Ponguingā, ante nāni angaingā adocā iīnongā ingampa.

⁴¹ Ante āñōnāni wadāni guiquēnē,

—Mōnō Codito nē Ponguingā, ante nāni angaingā māningā ingampa.

Ānāni ēñēnīnque wæætē wadāni,

—Mōnō Codito ædō cæte Gadideabæ quēwente pongā ingāā, ānānitapa. ⁴² Iīñampa mōnō Codito iīñōmō Awēnē Dabii pæingā inguingāīmpa. Ayæ Bedēē Dabii nānō quēwengāiīñōmō adoyōmō ēñaqingā ingampa, ante Wængonguī angā ēñente nāni yewæmongainō ongō adāmaī imīnitawo.

⁴³ Angā ēñēnīnque waodāni, Itota æcānō ingāā, ante mānōmaī wadō wadō ante pōnente tedewengadānīmpa. ⁴⁴ Pancadāniya, Tōmengā ingante bæi ongōinēmōnīpa, ānāni incæte tōmengā ingante bæi ongonte ænāmaī ingadānīmpa.

Awēnēidi Itota ingante pōnēnāmaī iīñōnāni

⁴⁵ Wængonguī oncō tæiyæ waēmō oncōnē wææ wānōnāni iīñōmō, Wængonguī quī, ante nē godōnāni ñænænāni tōnō Paditeoidi weca ocæ emænte pōnānīpa. Ocæ emænte pōnāni adīnque tōmēnāni,

—Quīnantē tōmengā ingante ænte pōnāmaī imīnīi.

⁴⁶ Ante āñōnāni wææ wānōnāni wæætē,

—Māningā onguīñængā waa apæñecā bai æcānō adobai tedecā iīñōmō edæ dæ angampa.

⁴⁷ Ānāni ēñēnīnque Paditeoidi guiquēnē,

—Tōmengā mīnitō imīnite adobai wapiticæ māocā oda cæte gobāimīni bamīnitawo.

⁴⁸ Ānīnque tōmēnāni godōmenque, Awēnēidi incæ Paditeoidi incæ adocanque tōmengā ingante pōnengā ingantawogaa. ⁴⁹ Nanguī ināni iīñōmō ongōnāni guiquēnē tōmēnāni nē ōnōnānīnque inte Wængonguī nānō wææ angainō ante ēñēnāmaī ināni inte tōmengā ingante pōnēnāni inānīpa. Mānōmaī beyæ tōmēnāni Wængonguī nānō pangāimāmo ante wæquināni inānīpa.

⁵⁰ Niicodemō iīñōmō wēēnēñedē Itota weca nē godingā adobai tōmēnāni bai Paditeocā iīnongā inte apæñecantapa.

⁵¹ —Waoçā, Æbānō cæboo, ante nāmā beyæ wææ ānāmaī iīnongante mōnō, Tōmengā ingante pangāīmpa, ante ædō cæte apæñte anguīi. Edæ, Wææ ānāmaī iīnongante pangāīmpa, ante dicæ wææ yewæmongadāniīnaa.

⁵² Ante āñongā tōmēnāni,

—Bitö adobaï Gadideabæ quëwente ponte baï tede bipæä. Wængongui beyä näni yewæmongainta ae. Adinque bitö, Wængongui beyä në apæ necä wii Gadideabæ quëwente pongä ingampa, ante do ëñencæbiimpa, ante angadänimpa.

Onquiyængä nänö towëno

⁵³ Mäninö änanï ate tömänäni oncönë ocæ ëmænte gogadänimpa.

8

¹ Itota guiquënë Odibowænquidi näni anquidi gocantapa. ² Ìimö ate ñäö bayedë tömengä Wængongui oncö ñænæncönë yabæcönë wæætë pö guicä adinque waodäni tömänäni tömengä nänö ongöñömö goto pönäni adinque Itota tömënäni ñänite odömonte apæ necæte ante tæ contacantapa.

³ Mäninödë onquiyængä adocanque tömengä nänöogængä ñnämaï ññongante wacä onguinængä tönö tæcæ godö guëa mongä adäni ate në odömönäni tönö Paditeoidi ññömö mäningä onquiyængä ingante ænte pönänitapa. Tömengä ingante tæcæguedë gö cädäni ongöñongä ⁴ tömënäni Itota ingante,

—Awënë në Odömömi ñmi, ñngä onquiyængä ññömö wacä ingante tæcæ godö guëa mongä adäni wæmönipa. ⁵ Wængongui nänö angainö ante Möitee wodi ñmaï ante wææ yewæmongacäimpa. Onquiyænäni mäningä onquiyængä baï cädäni ññönänite minitö tömënäni ñänite dicaca tacamini wæncædänimpa. Bitö guiquënë quinö ämii.

⁶ Mäninö ante tömënäni ññömö, Æbänö apæ necä, äninque, Wabänö pancadea wapiticæ tedecæcäimpa, ante cädänitapa. Edæ wapiticæ tedecä ñninque mönitö, Adocä wënæ wënæ cæcä ingampa, ante ancæmönimpa, ante cädänitapa. Itota guiquënë ædæ wææninqe onguipoga tömengä öngompoga yewæmongacäimpa. ⁷ Tömënäni godömenque tömengä ingante ëñencæte ante äñönäni Itota ængæ gantite tömënäni ñänite,

—Minitö weca adocanque ongöninqe në wënæ wënæ cädämaï ingä ñninque mäningä täno onquiyængä ingante, Wænguimi, ante dicaca tacacæcäimpa, ante angantapa.

⁸ Äninque wæætë ædæ wææninqe onguipoga yewæmongacäimpa. ⁹ Mäninö angä në ëñänäni ññömö adocanque wadæ go wacä wadæ go wacä wadæ go tömänäni wadæ godänipa. Picänäni täno wadæ godäni ayæ wadäni wadæ godänitapa. Tömänäni dæ godäni adinque Itota adocanque ee ongöñongä onquiyængä ayæ adoyömö næ gongængantapa. ¹⁰ Itota ængæ gantidinqe onquiyængä ingante,

—Æyömönö ñänii. Bitö ñmite apænte äninque tacadämaï ñänitawo.

¹¹ Äñongä tömengä wæætë,

—Awënë, tömänäni mänömaï cädämaï ñänitapa.

Angä ëñëninque Itota,

—Botö adobaï bitö ñmite apænte äninque tacadämaï incæboimpa. Ñöwo goe ämopa. Bitö wënæ wënæ cæte quëwënimämo ñimpo cæte waa quëwë, angacäimpa.

Inguipoga quëwënäni beyä Itota ñäö baï ññongäimpa

¹² Ayæ Itota wæætë waodäni ñänite apænedinqe,

—Botö ññömö inguipoga quëwënäni beyä ñäö baï ñmodö angüënë. Æcänö botö mññæ tee empo goda tömengä wëmö ññömö cöwë cægönämaï ingampa. Wæætë tömengä nänö quëwënö taadö edonque acæcäimpa, ante botö tömengä beyä ñäö baï ñmopa, ante apæ necantapa.

¹³ Paditeoidi guiquënë tömengä ingante,

—Bitö ññömö nämä äninque, Æbänö ñmoo, ante apænebi ñmipa töö. Mänömaï nämanque ante apænebi beyä bitö äninö önonquedö ante ñmipa, ämönipa, pññänitapa.

¹⁴ Itota wæætë,

—Botö ññömö nämä äninque, Æbänö ñmoo, ante apænebo incæ botö apænedö näwangä ñmipa. Edæ, Botö æyömönö quëwente pömo ñmoo, ante ayæ, Ædönö gobo ñmoo, ante do ëñëmopa. Minitö guiquënë, Botö æyömönö quëwente pömoo ñmoo, ante ayæ, Ædönö gobo ñmoo, ante wii ëñëminipa töö. ¹⁵ Waodäninqe, ñmaï cädäni, ante näni

wææ ante cægai bai mīnitō wacā ingante apænte ämīni imīnīpa. Botō guiquēnē waodāni tōmānāni inānite adīnque, Æcānō waa cæcantawo, ante, Æcānō wēnæ wēnæ cæcantawo, ante apænte änāmaī imopa. ¹⁶ Incæte botō mānōmaī apænte ämo bai, Æbānō apænte ämoo, ante pōnēnīnque tōmēmō nō ante apænte ämopa. Edæ wīi botonque apænte ämopa. Wæætē botō Mæmpo botō imote nē da pōnongaingā iñōmō tōmengā iñōmō botō tōnō godongāmæ cæcā ate apænte ämopa. ¹⁷ Mīnitō mīni wææ yewæmongaintaa iīmaī ante wææ yewæmongatīmpa. Mēnaa onguīñāna nē adīna inte tōmēna nāna adīnō ante apæneda ēñēnīnque mīnitō wæætē, Nō impa, ante ēñencæmīnīmpa. ¹⁸ Botō iñōmō nāmā ānīnque, Æbānō imoo, ante apænēbo imopa. Ayæ botō Mæmpo botō imote nē da pōnongaingā iñōmō tōmengā botō imotedō ante, Æbānō ingāā, ante adobai apænecā ēñencæmīnīmpa.

¹⁹ Angā ēñēnīnque tōmēnāni tōmengā ingante,
—Bitō Mæmpo æyōmōnō quēwengāā.

Äñōnāni Itota wæætē,
—Mīnitō iñōmō, Botō incæ æbānō imoo, ante, Botō Mæmpo incæ æbānō ingaingā ingāā, ante ēñēmīni imīnitawogaa. Botō æbodō imoo, ante ēñēmīni inte bai mīnitō, Botō Mæmpo æbānō ingaingā ingāā, ante adobai ēñēmīni incædōmīnīmpa, ante apænecāimpa.

²⁰ Itota Wængonguī oncō ñānæncōnē yabæcōnē go guīdīnque, Wængonguī quī, ante nāni da wencade gāānē ongonte apænēdīnque mānīnō ante apænecāimpa. Incæte tōmengā nānō wænguīōnæ wīi oo pōni ī beyænque tōmengā ingante bæi ongonte ænāmaī ingadānīmpa.

Itota, Botō goquīñōmō mīnitō ædō cæte goquīmīnīi, angā

²¹ Itota wæætē tōmēnāni inānite ānīnque,
—Botō wadæ goquīmo imopa. Gobo ate mīnitō botō imote ante diqui diqui mīnguīmīni imīnīpa. Mīnitō wēnæ wēnæ cædōmīni inte wæncæmīnīmpa. Botō goquīñōmō mīnitō ædō cæte ponguīmīnīi, angantapa.

²² Mānīnō beyæ oodeoidi awēnēidi, Tōmengā iñōmō, Botō goquīñōmō ante mīnitō ædō cæte ponguīmīnīi, ante quīnante angāā. Tōmengā nāmā incæ, Wænonguīmo, ante pōnēnīnque iīmaī angantawo, ante änānītapa.

²³ Itota godōmenque,
—Mīnitō iñōmō inguīpoga quēwēmīni imīnīpa. Botō guiquēnē oōnædē quēwente pōmo imopa. Mīnitō iñōmō īi inguīpogaque nāni quēwencabo tōnō adomīni imīnīpa. Botō guiquēnē īi inguīpogaque nāni quēwencabo tōnō adobo ināmaī imopa. ²⁴ Mānōmaī beyæ botō, Mīnitō wēnæ wēnæ cædōmīni inte wæncæmīnīmpa, ante mīnitō imīnite apænētabopa. Botō, Æbānō imoo, ante ämo ēñēnīnque pōnēnāmaī imīni inīnque mīnitō wēnæ wēnæ cædōmīni inte nō wæmaīmīnīpa.

²⁵ Ante apænecā ēñēnīnque tōmēnāni,
—Æbidō imitawo.
Ante äñōnāni Itota wæætē,
—Botō do mīnitō imīnite, Æbodō imoo, ante nē ānīmo imopa. ²⁶ Botō mīnitō imīnitedō ante nanguī anguēnēmō imopa. Mīnitō imīnitedō ante ämo bai mānīi botō änō mīni apænte angūnque imāimpa. Incæte botō imote nē da pōnongaingā iñōmō tōmengā nōingā inte tōmengā, Quīnō botō imote angāā, ante botō ēñēnīnō ante botō adodō ante inguīpoga quēwēnāni inānite apænēbo imopa, angantapa. ²⁷ Incæte tōmēnāni, Itota tōmengā Mæmpo ingantedō ante mōnitō imōnīte apænecampa, ante ēñēnāmaī ingadānīmpa. ²⁸ Mānōmaī beyæ Itota,

—Botō Waobo ēñagāimo iñōmote mīnitō botō imote awāa timpodīnque tīwadinque gō cæmīni wægōñōmo mīnitō mānīñedē edæ, Botō æbodō imoo, ante ēñencæmīnīmpa. Ayæ botō nāmā pōnēnīnque cædāmaī imopa. Wæætē Wæmpo nānō odōmonte apænēdō ante botō imote apænecā botō ēñēnīnō ante adodō ante apænēbopa, ante mīnitō adobai mānīñedē ēñencæmīnīmpa. ²⁹ Botō imote nē da pōnongaingā botō imote emō cædāmaī

inte cöwë botö tönö godongämä ongongä ingampa. Edæ botö cöwë, Æbänö cæbo ate tömengä waa aquingää, ante cæbopa, ante Itota apænegacäimpa.

³⁰ Mäninö añongä nangui inäni iñömö tömengä ingante pönengadänimpa.

Wënæ beyænque në cædäni

³¹ Oodeoidi pancadäniya në pönänäni iñönänite Itota iñömö,

—Minitö cöwë botö odömönte apænedinö bai cæmini ininque botö miñæ nö gomini imaiminipa. ³² Ayæ botö änö nöinö impa, ante eñencæminimpa. Mäninö nö botö änö beyænque minitö ñimpo cæte quëwencæminimpa.

³³ Ante añongä tömënäni wæætë,

—Mönitö iñömö Abadäö nänö pæimöni imöni inte mönitö cöwë waocä æcämenque beyænque në cæmöni inämaï intamönipa töö. Bitö iñömö, Wacä beyænque minitö godömenque cædämaï inte ñimpo cæte quëwencæminimpa, ante ædö cæte ämii.

³⁴ Äñönäni Itota wæætë,

Minitö iminite näwangä ämopa. Në wënæ wënæ cæcä iñömö tömengä wacä beyænque cæte në quëwengä bai wædongä inte edæ tömengä nänö wënæ wënæ cægäinonque ante cædinque ædö cæte aamö cæte goqingää. ³⁵ Wacä beyænque cæte në quëwengä iñömö tömengä awënë nani wencabo tönö wii cöwë godongämä quëwengä ingampa. Awënë wengä guiquënë tömengä mæmpo tönö nana wencaya ina beyænque tömengä awënë tönö cöwë guëa quëwengä ingampa. ³⁶ Mänömaï beyæ Wængongui Wengä minitö iminite ñimpo cæcä ininque minitö nö ñimpo cæte quëwëninque wacä beyænque në cæcä bai inämaï inte quëwenguimäni imaiminipa. ³⁷ Minitö iñömö Abadäö nänö pæimäni iminipa, ante do eñëmopa. Incæte botö änö ante mimmönë entawënämaï quëwëmini beyæ minitö botö imote, Wänömöni wæncæcäimpa, ante pönëmäni iminipa. ³⁸ Botö iñömö botö Mæmpo weca tömëmö adinö ante minitö iminite apænebo imopa. Minitö guiquënë mimi mæmpo nänö angainö mimi eñëninö ante cæmini iminipa.

³⁹ Ante apæneyongä tömënäni wæætë,

—Abadäö mönö docä mæmpo ingaingä ingampa.

Änäni eñëninque Itota,

—Minitö nö Abadäö wëmini inte bai minitö tömengä nänö cægäinö bai adobai cæcædöminimpa töö. ⁴⁰ Ñöwo iñæmpa botö, Wængongui näwangä nänö angainö ante botö eñëninö ante minitö iminite në apænebo iñömote minitö, Mönitö æbänö cæte wänömöni wænguingää, ante pönëmäni iminipa. Abadäö mänii mimi cægäi bai cædämaï ingacäimpa. ⁴¹ Minitö iñömö tömëmäni mæmpo nänö cægäi bai adobai cædöminäni imini awædö.

Äñongante tömënäni,

—Mönitö wii wegöwæ wëmöni imönipa töö. Wængongui incæ tömengä adocanque mönitö Mæmpo inongäimpa.

⁴² Änäni eñëninque Itota tömënäni inänite,

—Wængongui näwangä minitö Wæmpocä ingä bai minitö botö imote waadete pönencædöminimpa. Edæ botö Wængongui weca quëwente minitö weca ñöwo wææ pontabopa. Botö wii nämä pönëninque pontabopa. Wæætë tömengä botö imote da pönongä pongäimo imopa. ⁴³ Minitö iminite botö quinö apæneboo, ante minitö quinante eñënämaï iminii. Edæ botö änö ante, Quinö apæneboo, ante minitö babetamö inäni bai inömäni inte ædö cæte eñënguimäni. ⁴⁴ Wënæ iñömö minitö mæmpo inongäimpa. Ayæ minitö mæmpo nänö cæinëwënö ante minitö adodö ante, Mönitö cæinëmönipa, ante cæminipa. Wëenënedë inguipoga mä badönedë tömengä, Botö wänonguimo, ante do entawengä ingacäimpa. Tömengä, Quinö näwangä impa, ante cöwë änämaï ingampa. Ayæ edæ, Quinö änö nöinö impa, ante tömengä entawënämaï inongäimpa. Adocä babæ tedinque tömengä babæ nänö entawënonque ante tedewengä ingampa. Edæ tömengä në babæ añongä ingampa. Ayæ tömengä iñömö mä babæ angaingä ingampa. ⁴⁵ Incæte botö näwangä ämo beyænque minitö botö änö ante pönënämaï iminipa töö. ⁴⁶ Minitö weca ongongä iñömö æcämenque incæ botö imote apænte äninque, Bitö wënæ wënæ

cæbi ïmipa, ante, Nāwangä ïmpa, ante odömönatawogaa. Botö nāwangä ämo bai mīnitö quīnante botö angainö ante pönēnāmaï ïmīnīpa. ⁴⁷ Wængonguī wēnāni nē ïnönāni ïñömö Wængonguī nānö angainö ante ēñēnāni ïnānīpa. Mīnitö guiquēnē tōmengä wēmīni ïnāmaï ïmīni beyä, Tōmengä quīnö angää, ante ēñēnāmaï ïmīnīpa, ante Itota apānegacäïmpa.

Abadäö ayä ēñadāmaï ïñedē mönö Codito do ingaingä

⁴⁸ Oodeoidi wæætē tōmengä ingante,

—Bitö Tāmadiabæ quēwēmi ïmīpæä. Ayä wēnæ tönö cæbi ïmīpæä, ante wīi nāwangä ämōni intamōnīi.

⁴⁹ Ante pīināni ēñēnīnque Itota wæætē apānedīnque,

—Botö wīi wēnæ tönö cædōmo ïmopa. Wæætē botö ïñömö, Botö Mæmpo ingante waa acæboïmpa, ante cæbo ïmopa. Mīnitö guiquēnē botö ïmote waa adāmaï ïmīnīpa tōö. ⁵⁰ Waodāni, Bitö waēmö ïmīpa, ante botö ïmote apānecädānīmpa, ante botö cädāmaï ïmopa. Wæætē wacä ïñömö, Waodāni bitö ïmīte apānedīnque, Waēmö ïmīpa, ante apānecädānīmpa, ante nē cæcä ingampa. Māningä nē apænte ānongä ingampa. ⁵¹ Mīnitö ïmīnīte nāwangä ämopa. Botö angainö ante nē ēñēnte cæcä tōmengä ïñömö wantæpiyæ wēnāmaï quēwencæcäïmpa, angantapa.

⁵² Ante apānecä ēñēnīnque oodeoidi,

—Bitö wēnæ tönö cæbi ïmīpa, ante ñōwo ædæmō ēñēmōnīpa. Abadäö wodi ïñæmpa do wængacäïmpa. Ayä Wængonguī beyä nē apānedāni adobaï do wængadānīmpa. Incæte bitö, “Botö angainö ante nē ēñēnte cæcä tōmengä ïñömö wantæpiyæ wēnāmaï quēwencæcäïmpa, ante apānebi tōö.” ⁵³ Mönö docä mæmpo Abadäö wodi ñænængä inte cægaingä incæte bitö ïñömö edæ, Abadäö wædangä ïñongante botö ïñömö godōmenque ñænæmo inte cædōmo ïmopa, ämitawo. Tōmengä ïñömö edæ do wængacäïmpa. Ayä Wængonguī beyä nē apānedāni adobaï do wængadāni apa ānewēē. Bitö nāmā ānīnque, Æcāmē bai ïmoo, ante ämi.

⁵⁴ Äñönāni Itota wæætē,

—Botö nāmā ānīnque, Waodāni, Bitö waēmö ïmīpa, ante botö ïmote apānecädānīmpa, ante ēñēnīnque wæbo bai waodāni botö ïmote nāni waa apānedö wæætē önonquedö ante incädönīmpa. Botö Mæmpo incæ mīnitö, Mönö Wængonguī ingampa, ante mīni ānongä guiquēnē tōmengä ïñömö, Bitö waēmö ïmīpa, ante botö ïmote pönö apānecä apa quēwēmīnīi. ⁵⁵ Mīnitö tōmengä ingante wīi adīnque pönēnāmaï ïmīnīpa tōö. Botö guiquēnē tōmengä ingante do agaïmo inte pönēmo ïmopa. Botö tōmengä ingante adāmaï ïmopa, ante bai botö mīnitö bai babæ ante ancädōmoïmpa. Wæætē tōmengä ingante do adīnque nē pönengäïmo inte botö ïñömö edæ tōmengä nānö angainö bai nē cæbo ïmopa. ⁵⁶ Inguipoga botö ponguïönæ ante mīnitö docä mæmpo Abadäö wodi incæ, Codito ponguïönæ pongä acæboïmpa, ante pönēnīnque do edæ watapæ togacäïmpa. ïnīnque tōmengä māniönæ Codito nānö ponguïönæ adīnque godōmenque togacäïmpa, ante Itota apānecantapa.

⁵⁷ Oodeoidi tōmengä ingante,

—Bitö ēñagai ïñömö tincoenta wadepo ïnāmaï ï incæte bitö ædö cæte, Botö Abadäö ingante atabopa, ante ämīi.

⁵⁸ Ante pīññönāni Itota wæætē,

—Mīnitö ïmīnīte nāwangä ämopa. Abadäö wodi ayä ēñadāmaï ïñedē botö ïñömö edæ do quēwēmo ingaïmo ïmopa, ante apānecantapa.

⁵⁹ Mānīnö ante apānecä ēñēnīnque tōmēnāni ïñömö tōmengä ingante dicaca tacacæte ante cædīnque dicacoo wææmpo äñānītapa. Incæte Itota wē womōnīnque Wængonguī oncö ñænæncodo tao wadæ gogacäïmpa.

¹ Itota gomonga godinque onguiñængä babetamö ëñagaingä ingante acantapa.
² Tömengä ëmiñænäni iñömö tömengä ingante,

—Awënë në Odömömi imi, mäningä onguiñængä incæ tömengä mëmpoda incæ æcänö wënæ wënæ cæda beyæ tömengä babetamö ëñacantawo, ante ëñencæte ante änänitapa.

³ Itota tömënäni inänite,

—Íingä onguiñængä incæ tömengä mëmpoda incæ tömänäni wënæ wënæ cædämaï inänitapa. Wæætë tömengä babetamö ëñagaingä inte quëwëñongante Wængonguï nänö cædö iñömö edonque pönï acäïmpa, ante mäningä mänömaï ingacäïmpa. ⁴ Íñänäni ëñeedäni. Botö imote në da pönongaingä tömengä nänö cædö ante mönö mii quëwenganca mönö cæquënëmö imompa. Mönö wænguiönæ iñonte mönö ædö cæte ayæ cæquimöö. ⁵ Botö inguipoga quëwëñedë botö inguipoga quëwënäni beyæ ñäö bai inömo imopa.

⁶ Mäninö ante äninque Itota onguipoga towæ tänöninge wëä wëä gopodinque aquimæ bayonte äninque babetamongä awinca öni öni pæmongantapa. ⁷ Ayæ tömengä ingante,

—Goe. Gäwapæ Tidoee näni ämæ godinque bitö awinca ñäö mëmöe, ämopa, angantapa. Tidoepæ näni ämæ iñömö mönö tededö, Da godömæ, ante impa.

Angä ëñente godinque onguiñængä ñä mëmöninge tömengä oncönë ocæ ëmænte pöninque do acä ingacäïmpa. ⁸ Tömengä mänömaï do acä inte pongä adinque godongämæ quëwënäni tönö wëenëñedë tömengä, Pönömi æmoe, äñongante në adinäni tönö,

—Æ, Íingä onguiñængä diyæ, Pönömïni æmoedäni, ante në äncöningä wii adocä ingantawo.

⁹ Änäni ëñëninque pancadäniya,

—Mäningä ingampa, änänitapa.

Wadäni guiquënë,

—Wii tömengä ingä, önonque tömengä nänö ëmö bai ëmönongä ingampa.

Ante tedeyönäni onguiñængä tömenganque,

—Botö mänimodö inömo imopa, angantapa.

¹⁰ Ayæ tömënäni,

—Æbänö cæte bitö waa bamonte abii.

¹¹ Äñönäni tömengä wæætë,

—Onguiñængä iñömö tömengä ëmöwo Itota iñömö onguipoga towæ tänöninge wëä wëä gopodinque aquimæ bayonte äninque botö awinca öni öni pæmongantapa. Ayæ botö imote, “Goe. Gäwapæ Tidoepæ näni ämæ godinque bitö awinca ñä mëmöe” angantapa. Angä ëñëninque botö wadæ gote ñä mëmöninge do waa bamonte abopa, angantapa.

¹² Tömënäni tömengä ingante,

—Íingä onguiñængä bitö änongä iñömö æyömönö ingää.

Ante äñönäni tömengä wæætë,

—Botö ëñënämaï imopa, angacäïmpa.

Babetamö íingä ingante Paditeoidi ancaa änäni

¹³ Ayæ Paditeoidi weca onguiñængä në babetamö ëñagaingä ingante ænte mëmönäni pongantapa. ¹⁴ Itota mänii aquimæ badöninge babetamö íingä awinca wi æmonte bai nänö cæönæ iñömö oodeoidi guëmanguïönæ inönimpa. ¹⁵ Mänömaï beyæ Paditeoidi iñömö adobai ëñencæte ante babetamö íingä ingante edæ, Æbänö cæte bitö waa bamonte abii, ante äñönäni tömengä wæætë,

—Mäningä iñömö aquimæ äninque botö awinca öni öni pæmongantapa. Ayæ botö tömömo awinca ñä mëmöninge ñöwo waa bamömo inte abopa, angantapa.

¹⁶ Paditeoidi pancadäniya,

—Íingä onguiñængä iñömö wii Wængonguï weca quëwente pongä ingampa. Edæ tömengä mönö guëmanguïönæ iñonte guëmänämaï inte do cæcampa, änänitapa.

Wadäni guiquënë,

—İñæmpa waocä nê wënæ wënæ cæcä ïnongä inte ædö cæte mänömaï, Acæminimpa, ante mä cæquingää, änänitapa.

İninqe tömënäni wadö wadö ante pönente tedewengadänimpa. ¹⁷ Ayæ tömënäni wæætë babetamö ïningä ingante,

—Tömengä cæcä ate bitö waa abi inte bitö edæ tömengä ingantedö ante quinä ämii.

Ante äñönäni onguïñængä wæætë,

—Tömengä Wængonguï beyæ nê apænecä ingampa, angantapa.

¹⁸ Babetamö ïningä ïñömö, Waa bamömo ïmopa, ante apænecä ëñëninque oodeoidi awënëidi ayæ pönënämaï ïnänitapa töö. Tömengä mæmpoda ïnate aa pedäni ponte apæneda ate mänïñedë pönënänitapa. ¹⁹ Tömënäni tömëna ïnate,

—İngä onguïñængä edæ minatö wengä ingantawo. Mäningä nê babetamö ëñagaingä minatö änongä adocä ingantawo. Æbänö cæte tömengä ñöwo waa bamonte acäi.

²⁰ Ante äñönäni tömengä mæmpoda wæætë, Nê babetamö ëñagaingä ïñömö tömengä mönatö wengä ingampa, ante ëñëmönäpa. ²¹ Incæte mönatö, Æbänö cæte tömengä ñöwo waa bamonte acää, ante, Æcänö tömengä awinca wi æmante bai cæcää, ante ëñënämaï ïmönäpa. Minitö tömengä ingante ëñencæte ante äedäni. Tömengä do picængä ingampa. Tömenganque apænecä ëñencæminimpa, änatapa.

²² Tömengä mæmpoda oodeoidi awënëidi ïnänite guïñëninque mäninö ante apænedatapa. Edæ oodeoidi awënëidi iïmaï ante do apænedönänimpa. Æcänö Itota ingante Ao ante, Mönö Codito ingampa, äna ëñëninque edæ, Mönitö odömöincönë ongönämaï incæbiimpa, ante tömengä ingante da tadömöni tao gocæcäimpa, ante godongämæ pönente apænedönänimpa. ²³ Mänömaï beyæ tömengä mæmpoda, “Tömengä do picængä ingampa. Minitö tömengä ingante ëñencæte ante äedäni,” angadaimpa.

²⁴ Onguïñængä nê babetamö ïningä ingante wæætë aa pedäni pongä ate tömengä ingante,

—Bitö Wængonguï ëñëñongä näwangä ante apænee, ämönipa. Edæ ïngä onguïñængä mäninö nê cædingä wënæ wënæ cæcä ingampa, ante edæ do amönipa.

²⁵ Ante püñönäni tömengä wæætë,

—Mäningä wënæ wënæ cæcä incæ wïi wënæ wënæ cæcä incæ botö ëñënämaï ïmopa. Botö babetamömo ïnimo incæ ñöwo waa bamonte abopa. Mäninque ëñëmo ïmopa.

²⁶ Ante apænecä ëñëninque tömënäni tömengä ingante,

—Tömengä ïñömö bitö ïmite æbänö cæcantawo. Æbänö cæte bitö waa bamonte abii, änänitapa.

²⁷ Tömengä wæætë,

—Minitö iminite do antabopa. Botö äñömote minitö ëñënämaï iminipa töö. Quinante wæætë adodö ante ëñëñëminii. Minitö adobai, Mönitö tömengä emiñämöni baquimöni, ante äminitawo, ante angantapa.

²⁸ Ayæ tömënäni tömengä ingante piinte wënæ wënæ badete todinque,

—Bitö mäningä emiñämi imipa töö. Mönitö guiquënë Möitee emiñämöni imöni apa quëwëmii, änänitapa. ²⁹ Wængonguï Möitee ingante apænecäimpa, ante do ëñëmönipa. İngä guiquënë æyömönö quëwente pongää, ante ëñënämaï imönipa.

³⁰ Äñönäni onguïñængä wæætë,

—Mäninö minitö äninö wïwa impa äminii. Tömengä pönö cæcä waa bamonte abo incæte tömengä æyömönö quëwente pongää, ante minitö ëñënämaï iminipa. ³¹ Nê wënæ wënæ cædäni ïñömö Wængonguï ingante apæneyönäni tömengä tömënäni ïnänite ëñënämaï ingampa, ante do ëñëmompä. Wæætë Wængonguï ingante, Bitö adobique mönö Wængonguï imidö anguënë, ante nê apænecä ïñömö tömengä Wængonguï nänö angainö nê ëñente cædongä inte apæneyongante Wængonguï tömengä ingante ëñencæcäimpa. ³² Waocä nê babetamö ëñagaingä ïñongante wacä tömengä awinca wi

æmonte bai cæcä ante æyedëmenque incæ inguipoga quëwënäni dicæ änäni ëñëänita-wogaa. ³³ Ìngä onguïñængä ïñömö wii Wængonguï nänö da pönongä pongaingä inte bai tömengä tömänö cædämaï incædongäimpa, angantapa.

³⁴ Mäninö angä ëñëninque tömënäni wæætë,

Bitö ëñagaïñedë do wënæ wënæ cæte ëñagaïmi ïmipa. Incæte bitö mönitö ïmönite ædö cæte, Ëñencæmïnimpa, ante odömonte apænebi ïmipa töö.

Änäni ïninque tömënäni, Bitö mönitö odömöincönë ongönämaï tao gobäwe, ante tömengä ingante da tadönäni tao gogacäimpa.

Në babetamö bai ïnäni ïnänite ante Itota apænecampa

³⁵ Tömënäni tömengä ingante da tadönänipa, ante tededäni ëñëninque Itota tömengä ingante ante diqui diqui minte gote adinque.

—Bitö Waocä në ëñagaingä ingante pönëmitawo.

³⁶ Angä ëñëninque onguïñængä,

—Awënë, mäningä æcänö inaa. Botö tömengä ingante pönencæboimpa, ante apænebi ëñëmoe.

³⁷ Ante äñongä Itota wæætë,

Bitö tömengä ingante do abitapa. Ayæ bitö ïmite në apænebo ïñömö tömëmo ïmopa.

³⁸ Angä ëñëninque onguïñængä,

—Awënë, botö wede pönëmo ïmopa. Ayæ, Bitö Wængonguï Wëmi ïmidö anguënë, ante tömengä Itota weca ædæ wææninqe apænecantapa.

³⁹ Itota ïñömö edæ,

—Botö, Inguipoga quëwënäni æbänö cædänii, ante apænte ancæte ante pöninque ïïmaï cæbopa. Botö në babetamönäni bai ïnäni waa bacædänimpa, ante cædinque pontabopa. Ayæ wæætë, Mönitö waa amönipa, ante në änäni ïnänite, botö, Babetamömïni bai ïmïnipa, ante edonque odömoncæte ante pontabopa.

⁴⁰ Mäninö angä ëñëninque Paditeoidi pancadäniya tömengä weca në ongönäni guiquënë tömengä ingante,

—Æbänö ämii. Ìñæmpa mönitö adobaï babetamömöni bai ïmönitawogaa.

⁴¹ Ante äñönäni Itota wæætë,

—Mïnitö babetamömïni bai inte bai wënæ wënæ cædämaï incædöminimpa. Wæætë mïnitö, Mönitö waa amönipa, ante në änömïni inte mïni wentamö mongæncoo ee mongæmïni inguïminidö anguënë, ante apænecäimpa.

10

Në aacä tönö tömengä obegaidi

¹ Itota ayæ ïïmaï apænecantapa. “Mïnitö ïmïnite näwangä ämopa. Onguïñængä obegaidi näni wææ cæyömö guidemö në guidämaï inte wæætë wayömö da ëwa æi guicä ïñömö tömengä ïñömö në awëmö ö ængä ïnongä inte adobaï wadäni ayönäni në pö ö ænte gocä ingampa. ² Odemö në guicä guiquënë tömengä obegaidi ïnänite në aacä ingampa. ³ Në aacä beyæ odemö në wææ cæcä wi ænecampa. Wi ænecä ate në aacä pö guite tedeyongä obegaidi tömengä nänö tedepämo ëñente ïnänipa. Tömengä obegaidi ïnänite näni ëmöwo näni ëmöwo ante aa pecä pöñönänite tömengä tömënäni ïnänite ænte taocampa. ⁴ Tömengä obegaidi tömänäni ïnänite ænte taodinqe tömengä önömæca ïñömö täno beyænte gocä ate tömengä obegaidi tömengä nänö tedepämo ëñëninque tömengä ingante tee empo godänipa. ⁵ Wacä ingante guiquënë tömënäni tee empote godämaï ïnänipa. Wæætë wacä nänö tedepämo ëñënämaï ïnäni inte tömënäni tömengä weca ongönämaï wodii gocædänimpa,” ante Itota apænecantapa.

⁶ Tömengä mänömaï tömënäni ïnänite odömoncæte ante, Në aacä æbänö cæcää, ante odömonte apænecä incæte tömënäni tömengä nänö äninö ante ëñënämaï ingadänimpa.

Itota mönö ïmonte në Aacä ingä

⁷ Mänömaï beyæ Itota wæætë äninque, “Botö mïnitö ïmïnite näwangä ämopa. Botö ïñömö në obegaidi bai ïnäni näni wææ cæyömö, Guicædänimpa, ante odemö bai ïmopa.

⁸ Wëenënedë botö ayæ pönämaï iñedë wadäni odömönte apænecæ pongadänimpa. Tömënanï tömänäni waodäni inänite nê awëmö ö ænäni bai inönäni inte adobai wadäni ayönäni nê pö ö ænte gogainäni bai ingadänimpa. Incæte waodäni iñömö nê botö obegaidi bai inönäni inte nê ö æinënäni inänite wæætë ëñënämaï ingadänimpa. ⁹ Botö nê odemö bai imopa. Odemö nê guicä bai iñömö tömengä botö imote pönengä iñongante botö æmo beyenque quëwencæcäimpa. Adocä nê obega bai inte tömënanï nani wææ cæyömö guidemö nê guicä bai ininque tömengä piyænë cæte quëwencæcäimpa. Ayæ tömengä wæætë nê taocä bai ininque tömengä nänö cænguï mäë öñö adinque eyepæ cæncæcäimpa,” ante Itota apænecantapa.

¹⁰ Ayæ apænedinque, “Nê awëmö ængä guiquënë tömengä iñömö awëmö æncæte ante pongä inongä inte adobai wænoncæte ante wo ëwencæte ante mäninganca cæcæte ante pongä ingampa. Botö iñömö, Waodäni quëwencædänimpa, ante ayæ, Tömënanï nani quëwenguinque ante watapæ pönï quëwencædänimpa, ante pontabopa. ¹¹ Botö obegaidi bai inäni inänite nê waa aacä bai imopa. Nê waa Aacä iñömö nämä incæ obegaidi beyenque wæncæcäimpa. ¹² Godonte æinta ante wacä ingante nê cæcä iñömö tömengä iñömö obegaidi nê ëacä inämaï inongä inte nê aacä inämaï ingampa. Mänömaï beyæ adocä iñömö mëne bai ingä pongä adinque tömengä obegaidi inänite ëmö cæte wodii winongampa. Tömengä wodii winongä adinque mëne bai ingä wæætë obegaidi weca pogodo ponte obega ingante yao ongöninque, Obegaidi pangocæ goquinäni, ante cæcampa. ¹³ Godonte æintaque ante nê cæcä iñömö, Æbänö cæte obegaidi waa quëwenguinäni, ante änämaï inongä inte edæ wodii winongampa,” ante Itota apænecantapa. ¹⁴⁻¹⁵ Ayæ apænedinque, “Obegaidi inänite waa aacä bai edæ botö iñömö nê waa Aabo imopa. Botö Mæmpo edæ botö imote do ate pönengä bai botö adobai tömengä ingante do adinque pönëmopa. Ayæ tömëmö obegaidi bai inäni inänite do adinque tömënanï inänite pönëmopa. Ayæ tömënanï guiquënë botö imote do adäni inte botö imote pönënanipa. Botö nämä incæ obegaidi bai inäni beyenque wæncæboimpa. ¹⁶ Ayæ wadäni iñömö botö obegaidi bai nê inäni incæ wii mänïñömö wææ cæyömö quëwënäni inänipa. Botö mäninäni inänite adobai ænte mämö ponguënëmö imopa. Adodäni adobai botö tedepämo, Æbänö ämoo, ante ëñenguinäni inänipa. Mänömaï beyæ mäninäni iñömö do botö quinäni tönö tömänäni adocabodänique baquinäni inänipa. Ayæ nê Aabo adoboque iñömö tömänäni beyæ cæcæboimpa.” ante Itota apænecantapa.

¹⁷ Ayæ apænedinque, “Botö nämä incæ Ao ante wæninque ñäni ömæmoncæboimpa, ante cædinque wæætë tömëmö mii quëwenguïmo incæboimpa. Mänömaï beyæ botö Mæmpo botö imote waadete pönengä ingampa. ¹⁸ Waodäni iñömö ædö cæte botö imote wænonguinänii. Botö nämä incæ Ao äninque wæncæboimpa. Botö nämä tæï piñæmo iñömö, Wænguïmo, ante nê ämo inömo imopa. Ayæ adobai botö nämä tæï piñænte nê ämo inte botö, Ñäni ömæmoncæboimpa, ante cædinque wæætë tömëmö mii quëwenguïmo incæboimpa. Botö Mæmpo iñömö botö imote nänö wææ angainö botö ëñëninö ante ëñente cæbopa,” ante apænecantapa.

¹⁹ Mäninö apænecä ëñëninque oodeoidi wæætë wadö wadö ante pönente tedewengadänimpa. ²⁰ Oodeoidi nanguï inäni iñömö,

—Tömengä wënæ tönö cæcä inte edæ ömæcacä inongä ingampa. Ædö cæte tömengä ingante ëñëmïni imïni.

²¹ Äñönäni oodeoidi incæ wadäni guiquënë,

—Tömengä wënæ tönö cæcä inte bai tömengä iïmaï nänö äninö ante wii angä incædongäimpa. Nê wënæ inte quëwente cæcä iñömö babetamönäni awinca wi æmante bai cæcä waa bamönäniyaa.

Oodeoidi Itota ingante Baa änäni

²² Yoguite tedæ iñonte waodäni Eedotadëë quëwënäni, Wængonguï oncö tæiyæ waëmö oncö ante dodäni mäenongadänimpa, ante pönente ææmæ cæyönäni. ²³ Itota Wængonguï oncö ñænæncönë yabæcönë Tadömöo nani änoncönë iñömö cægongan-tapa. ²⁴ Oodeoidi tömengä weca pö godongämæ gongænte änäni,

—Bitö æbänö imii, ante æpoönædö ayæ äinënämaï imii. Bitö mönitö Codito imi inique mönitö imönite edonque pönī apænebi eñēmōnii.

²⁵ Ante äñönäni Itota wæætē,

—Minitö iminite do antabopa. Incæte minitö pönënämaï iminipa töö. Botö edæ botö Mæmpo emöwo ante bamönengæ cæbo adinque minitö, Botö æbänö imoo, ante eñenguënēmīni iminipa. ²⁶ Minitö wīi botö obegaidi bai inōmīni inte botö imote pönënämaï iminipa töö. ²⁷ Waodāni botö obegaidi bai nē ināni inte botö tedepāmo, Æbänö āmo, ante do eñēnāni. Ayæ botö tömēnāni inānite adinque pönēmo iñōmote tömēnāni wæætē botö imote tee empote godānipa. ²⁸ Botö adodāni inānite wantæpiyæ nāni quēwenguinō godōmo ænīnque quēwencædānīpa. Ayæ cōwē wænāmaï incædānīpa. Tömēnāni tömēmo önōnempo ongōñönānite æcānō tömēnāni inānite gā pe æmpoda iñōmō edæ dæ angampa. ²⁹ Botö Mæmpo edæ adodāni inānite botö imote nē pōnongaingā inongā ingampa. Tömānāni wædānāni iñönāni tömengā iñōmō godōmenque ñænængā inte nanguī cædongā ingampa. Inique tömengā önōnempo ongōñönānite æcānō tömēnāni inānite gā pe æmpoda iñōmō edæ dæ angampa. ³⁰ Botö iñōmō botö Mæmpo tönō äawocaque bai ewocamōna imōnāpa, ante Itota apænegacāimpa.

³¹ Mānīnō angā eñēnīnque oodeoidi wæætē tömengā ingante dicaca tacacæte ante cædinque dicacoo wææmpo ænānīpa. ³² Tömēnāni dicacoo wææmpo æñönānite Itota tömēnāni inānite,

—Botö minitö weca botö Mæmpo nānō angāi bai nanguī bamönengæ odōmonte cætabopa. Edö botö bamönengæ cædinō ante adinque minitö botö imote dicaca tacacæ cæmīnīi.

³³ Ante äñongā oodeoidi wæætē,

—Mānīnō bitö waa cædinō beyæ ante mönitö wīi bitö imite dicaca tacacæ cæmōnīpa. Wæætē bitö babæ ante Wængonguī ingante godö wēnæ wēnæ āmīpa, ante bitö imite tacacæ cæmōnīpa. Edæ mönitö waomōni bai inte bitö adobāi waobi imi incæte bitö, Botö Wængonguīmo inōmo imopa, ante āmīpa töö.

³⁴ Ante wæyönāni Itota wæætē tömēnāni inānite,

—Minitö mīni wæe yewæmongainō wīi iīmaï ante yewæmongatīi. “Minitö iñōmō wængonguīdi iminipa, ante do antabopa,” ante yewæmongadānīpa. ³⁵ Wængonguī angā eñēnte nāni yewæmongainō ante waodāni ædö cæte Baa ānīnque wido cæquīnānīi. Wængonguī nānō angāinō ante apæneca nē eñēnāni iñönānite tömengā, Minitö wængonguīdi iminipa, angantapa. ³⁶ Ayæ botö Mæmpo botö imote inguipoga da pōnoncæte ante, Botö adoboque quīmi imīpa, ante botö imote apænte ængacāimpa. Inique edæ botö tömengā quīmo inōmo inte tömengā nānō nē da pōnongaīmo iñōmote edæ botö imote edæ æbänō anguīi. Iñæmpa botö iñōmō Wængonguī Wēmo inōmo imopa, äñōmote edæ mīnitö wæætē, Bitö babæ ante Wængonguī ingante godö wēnæ wēnæ āmīpa, ante quīnante āmīnitawo. ³⁷ Botö edæ Mæmpo nānō cædō bai cædāmaï imo bai mīnitö mānīñedē botö imote pönënämaï imīni bai waa incædōnīpa. ³⁸ Minitö botö imote pönënämaï imīni incæte botö guiquēnē botö Mæmpo nānō cædō bai adobāi cæbo inique mīnitö, Botö æbänō cæboo, ante adinque pōnencæmīnīpa. Mānōmaï cædinque, Botö Mæmpo ingante botö ewocabo imopa, ante ayæ, Botö adobāi botö Mæmpo nempo quēwēmopa, ante eñenguīmīni inte ayæ eñēnīnque pōnencæmīnīpa, ante Itota angacāimpa.

³⁹ Mānīnō angā eñēnīnque tömēnāni wæætē tömengā ingante bæi ongoncæ cæyönāni tömengā do aamō cæte gocantapa.

⁴⁰ Ayæ Eedotadēē wadæ godinque Oododānō æmæmäa ocæ emænte taodīnque tömengā Wäo wēnēñedē waodāni inānite æpænē nānō guidōnīñōmō adoyōmō gote ongongā ingantapa. ⁴¹ Ayæ tömengā mānīñōmō ongōñedē waodāni nanguī ināni tömengā weca goto pōnīnque ānānitapa.

—Ate eñencæmīnīpa, ante Wäo wodi cōwē bamönengæ cædāmaï ingā incæte tömengā māningā Itota ingantedö ante nānō angāinō tömānō nāwangā ante angantapa, ante apænedānitapa.

⁴² Ayä mäniñömö ongöningue waodäni nangui inäni Itota ingante wede pönänäni bagadänimpa.

11

Datado wængäimpa

¹ Mäniñedē wacā onguiñængä tömengä emöwo Datado wënæ wënæ badinque öñönongäimpa. Mäadiya tönö Mäadota tömengä tönināda nāna quēwēñömö tömengä adoyömö Betānia iñömö quēwēnongäimpa. ² Īngä Mäadiya guiquēnē ayä ate ogui wapæ ænte Awēnē Itota ingante öni pædinque nāmā ocagui inte tömengä önöwa amimö cæquingä adocā Mäadiya iñongä tömengä töninācā Datado ñöwo wënæ wënæ bacā inongäimpa. ³ Īnque Datado tönināda iñömö, Itota ingante aa pebi pongæ, äna eñente wacā gote,

—Awēnē eñēmi, Bitö nē waadecā iñömö wënæ wënæ ingampa cæbii, ante änapa, ante apænecantapa.

⁴ Mäniñö nāna änö ante apænecā eñēnque Itota,

—Mäniñö wënæ wënæ inte nänö wädö iñömö wii wængui impa. Wæätē waodäni, Wængongui ñäö apäite emönongä ingampa, ante acädänimpa. Ayä botö imote, Bitö Wængongui Wēmi adobaī ñäö apäite emönömi imipa, ante apænecädänimpa, ante mäningä wënæ wënæ ingampa, angantapa.

⁵ Mäadota tönö tömengä töninācā Mäadiya nāna caya inate ayä Datado ingante Itota tömēnāni inänite waadete pönēnongäimpa. ⁶ Datado wënæ wënæ ingampa, ante apænecā eñengä incæte Itota nänö ongöñömö adoyömö meönaa ayä ongongantapa.

⁷ Tömengä ayä ate tömengä emiñænāni inänite,

—Ægodödäni, wæätē Oodeabæ mönö gocäimpa.

⁸ Äñongä tömēnāni wæätē tömengä ingante,

—Awēnē nē Odömömi imi, wantæyö intapa oodeoidi bitö imite dicaca tacacæ cädäni incæte bitö ñöwo wæätē, Mäniñömö goquimo, ämitawo.

⁹ Ante änäni Itota wæätē,

—Īñæmpa nænque wii tömäā itädē apäitawo. Itädē nē gocā mönö nænque ingui-poga apäicā ate beyä tēwadāmaī gocampa. Botö iñömö itädē gocā baī adobaī miimo botö quēwenganca botö cæquēnēnö iñque cæquinque gobopa. ¹⁰ Woyowotæ nē gocā baī guiquēnē tömengä wæätē ñäö dæ ä beyä tēwate baī gocampa, angacäimpa.

¹¹ Mäniñö angä ate tömengä godömenque tömēnāni inänite,

—Mönö æmigo Datado iñömö mö ñongä. Botö ñöwo tömengä weca gote, Ñäni ömämöe, ämo ñäni ömæmonguingä, ante apænecantapa.

¹² Tömengä emiñænāni wæätē tömengä ingante,

—Awēnē Itota, tömengä mö ñongä Īnque edæ ganca baquingä, apænedänitapa.

¹³ Itota Datado nänö æmäwo wænīmāmo ante apænecā incæte tömengä emiñænāni guiquēnē, Datado önonque mö ñongampa, ante Itota apænecampa, ante pönēnönän-impä. ¹⁴ Mänömaī beyä Itota tömēnāni inänite,

—Datado æmäwo wængäimpa, ante edonque pönī apænecantapa. ¹⁵ Minitö pönencæminimpa, ante botö, Tömengä wæncæ cæyongä botö tömengä weca ongönāmaī intabopa, ante minitö beyä ante tobopa. Ægodödäni, tömengä weca mönö gocäimpa, angantapa.

¹⁶ Ayä Tömato Äancadēnaque nāni äñongä iñömö Itota emiñænāni wädäni inänite,

—Ægodödäni, änque, Tömengä tönö godongämæ wæncæte ante tömengä miñæ gocäimpa, angacäimpa.

Itota mönö ömæmonguimämo mönö mi quēwenguimämo ante nē pönongä ingampa

¹⁷ Ayä Itota ponte eñēñongä, Datado baö tömēnāni nāni wodintatodē meönaa go meönaa do daga wēnänitapa, ante apænedäni eñengacäimpa. ¹⁸ Betānia iñömö nāni taadö godö Eedotadēe nāni quēwēñömö godö eyequei inönimpa. Mäniñ taadö wodo tedete quidömetodo ganca inönimpa. ¹⁹ Oodeoidi nangui inäni iñömö Mäadota tönö

Mäadiya weca pöninque, Mínatö tönĩñacä wængä ate wæwemina incæte piyænë cæte quëwencæminaimpa, ante waadete apænecæte ante pönänitapa. ²⁰ Itota oo pönĩ pongampa, ante änäni ëñëninque Mäadota tömengä ingante bee tencæte ante gocantapa. Mäadiya guiquënë oncönë ee ongongantapa. ²¹ Mäadota Itota weca pöninque tömengä ingante,

—Awënë Itota, bitö mönitö weca ongömi bai botö tönĩñacä wii wæncædongäimpa. ²² Tömengä æmæwo wængä incæte bitö ñöwo Wængonguĩ ingante quiëmë ante apænëbi tömengä pönö cæcä ænguimi imipa, ante botö ëñëmopa, ante apænecantapa.

²³ Angä ëñëninque Itota tömengä ingante,

—Bitö tönĩñacä wodi ñäni ömæmonguingä.

²⁴ Ante apænecä ëñëninque Mäadota wæætë,

—Ao, inguipoga iinque bayedë mönö ñäni ömæmöñedë tömengä do wængaingä incæte ñäni ömæmoncæcäimpa, ante botö do ëñëmopa, angantapa.

²⁵ Itota tömengä ingante äninque,

—Botö në ñäni ömæmonguimo inömo inte cæbo beyænque mīnitö ñäni ömæmoncæminimpa. Mīni wantæpiyæ quëwenguinque ante në Quëwëmo inömo imopa. Botö imote në wede pönengä iñömö do wængä incæte ayæ ate wantæpiyæ quëwencæcäimpa.

²⁶ Ayæ në mii quëwengä inte botö imote wede pönengä iñömö tömengä cöwë wænāmaĩ quëwencæcäimpa. Bitö mäninö ante pönëmitawo.

²⁷ Angä ëñëninque Mäadota tömengä ingante,

—Awënë Itota Ao ämopa, ante apænecantapa. Bitö mönitö Codito inömi imipa, ante pönëmopa. Wængonguĩ Wëmi inömi inte bitö iñömö edæ, Inguipoga në Ponguingä, ante nāni angaimi imipa, ante pönëmopa, ante apænecantapa.

Itota Datado wodintatodë gote wæcä

²⁸ Mänömaĩ ante apænedinque Mäadota ocæ emænte gote Mäadiya ingante aa pecä pongä ate Mäadota tömengä ingante awëmö äninque,

—Mönö në Odömongä do pöninque bitö imite aa pecampa.

²⁹ Angä ëñëninque Mäadiya quingæ ængæ gantite tömengä weca gocantapa. ³⁰ Itota Betānia iñömö ayæ guidāmaĩ inongäimpa. Mäadota tömengä ingante nänö bee tēññömö tömengä adoyömö ayæ a ongönongäimpa. ³¹ Oodeoidi Mäadiya tönö oncönë godongämæ ongöninque, Tömengä piyænë cæcæcäimpa, ante tæcæ waadete apæneyönäni tömengä quingæ ængæ gantidinque taocä adinque tömēnāni, Tömengä Datado wodi nänö wodintatodë wæcæte ante gocampa, ante pönente tömengä ingante tee empote godänitapa.

³² Itota nänö ongöñömö pöninque Mäadiya tömengä ingante adinque tömengä önöwa ædæ wæante apænedinque,

—Awënë Itota, bitö mönitö weca ongömi bai botö tönĩñacä wii wæncædongäimpa, ante wæcantapa.

³³ Mäadiya mänömaĩ wæyongä oodeoidi tömengä tönö godongämæ në pönināni adobai wädäni adinque Itota wæwente entawëninque wæcantapa. ³⁴ Ayæ,

—Datado wodi baö æyömönö da wëmīnitawo,

Angä ëñëninque tömēnāni,

—Awënë Itota, pö ae.

³⁵ Ante äññönāni Itota Ca wæcantapa. ³⁶ Tömengä mänömaĩ wæcä adinque oodeoidi,

—Aedāni, tömengä Datado wodi ingante nö waadete pönengä ingantapa.

³⁷ Ante tedeyönāni pancadāniya,

—Tömengä iñæmpa në babetamongä awinca wi æmonte bai cædingä inte adocä Datado wodi ingante cæcä bai tömengä wii wæncædongäimpa, ante wægadänimpa.

Datado nänö ñäni ömæmömāmo

³⁸ Itota wæætë wæwente entawëninque Datado wodintatodë pongacäimpa. Tömengä wodido ontatodë i iñönte dicabo ñænængade da pænæ pönö tee mönodāni. ³⁹ Adinque Itota,

—Dicabo da tæ ñæedāni, äñongä Datado wodi tönĩñacä Mäadota wæætë,

—Awënë Itota, ëñëmi. Mëönaa go mëönaa tömengä wodido öñöningue tömengä wodi do öö wadingä ingampa.

⁴⁰ Ante wææ angä ëñëningue Itota,

—Bitö wede pönëmi ïinque edæ Wængonguï æbänö ñäö apäite ëmönongä inte cæcää, ante bitö acæbiimpa, ante bitö ïmite wïi antawo, angacäimpa.

⁴¹ ïinque tömënäni dicabo tæ ñænänitapa. Ayæ Itota æmö adinque,

—Mæmpo botö apænedinö ante do ëñëmitapa, ante adinque botö bitö ïmite waa ate pönëningue apænebopa. ⁴² Botö apænedö ante æyedëmë apænebo incæ bitö cöwë ëñëmipa, ante botö do ëñëmopa. Wæætë edæ waodäni botö weca godongämæ gongænäni beyæ ante botö mäninö ante apænetabopa. Bitö botö ïmote da pönömi pontabopa, ante tömënäni pönencädänimpa, ante apænetabopa.

⁴³ Mänömainö ante Wængonguï ingante apænedinque Itota,

—Datado ta pöe, ante yedæ aa pecantapa.

⁴⁴ Në wæningä ïñömö edæ do ta pongantapa. Tömengä önompo weocoo inte näni wïni wïni cædincoo ayæ empodinque önöwa näni wïni wïni cædincoo ayæ ëwadinque tömengä awinca weocoo näni ñäne cæmönincoo ayæ ëmongä inte ta pongä adinque Itota tömënäni ïñänite,

—Mänincoo ñi cæmïni gocæe, angacäimpa.

Itota ingante bæi ongonte ængæimpa, ante tedewënäni

(Mäateo 26.1-5; Mäadoco 14.1-2; Odoca 22.1-2)

⁴⁵ Mänömaï beyæ oodeoidi nanguï ïñäni Mäadiya weca ëñacæ në pöninäni inte ïñäni ïñömö Itota mänömaï cæcä adinque tömengä ingante wede pönënäni bagadänimpa.

⁴⁶ Pancadäniya guiquënë Paditeoidi weca godinque, Itota quïnö cæcää, ante adodö angadänimpa. ⁴⁷ ïinque Wængonguï quï, ante në godönäni ñænænäni tönö Padi-teoidi ïñömö wæætë tömënäni ömæ näni Apænte Äincabo tömänäni ïñänite, Mönö godongämæ apænegäimpa, ante adoyömö pöedäni, ante äñönäni pönäni adinque tömënäni,

—Ïngä ïñömö, Acædänimpa, ante nanguï bamönengæ cæcä ingä. Mönö quïnö cæquïmöö. ⁴⁸ Ante wædinque mönö tömengä ingante, Bitö mänömaï godömenque cædämaï incæbiimpa, ante wïi wææ ämö ïinque waodäni tömänäni tömengä ingante pönëmainänipa. Tömengä ingante pönënäni ïinque, Itota oodeoidi Awënë bacæte ante cæcampa, ante pönente wædinque odömänoidi incæ edæ wææ cæbainänipa. ïinque tömënäni pöninque mönö tæiyæ waëmö oncö wo ëwëmainänipa. Ayæ mönö ömæ ïñömö mönö quëwencabo incæ nämä në ämö ïñömö tömënäni pö ö ænte bai cædinque tömënäningue në äñäni babainänipa, äñänitapa.

⁴⁹ Tömënäni weca adocanque Caiapato mäniï wadepo, Wængonguï quï, ante në godongä ñænængä pönï ïongä inte tömengä ïñömö,

—Minitö tömänö ante ëñënämaï ïminipa töö, apænegantapa. ⁵⁰ Mönö ömæ quëwencabo wïi tömämö wængæimpa, ante wæætë tömëmö beyæ ante adocanque onguïñængä wængä ïinque godömenque waa ïmaimpa, ante minitö ëñënämaï ïmïni inte tedewëmïni awädö.

⁵¹ Mänömainö ante apænedinque Caiapato mä nänö pönënonque ante wïi angacäimpa. Wæætë tömengä mäniï wadepo ïñonte, Wængonguï quï, ante në godongä ñænængä pönï ïongä inte Wængonguï beyæ apænedinque, Itota ïñömö oodeoidi beyæ ante wæncæcäimpa, ante apænegacäimpa. ⁵² Ayæ wïi Oodeabæ quëwënäningue beyæ ante wænguingä. Wæætë, Wængonguï wënäni wayömö wayömö pangote godinäni inte adodänique badinque adoyömö godongämæ poncädänimpa, ante tömengä wæncæcäimpa. ⁵³ Caiapato mäniïnö ante nänö äniönæ ïñonte täno godongämæ pönëningue oodeoidi ömæ näni Apænte Äincabo ïñömö, Æbänö cæte Itota ingante wænömö wænguingää, ante cöwë tedewënonänimpa.

⁵⁴ Mänömaï beyæ Itota ayæ oodeoidi weca wii edonque gocä inongäimpa. Wæætë wadæ godinque tömengä önömæca eyequei Epadaïmë nani äñömö godinque mäniñömö tömengä ëmiñænäni tönö ongönongäimpa.

⁵⁵ Wodo pänta gogaïönæ, ante Patowa nani cæönæ oo pöni inönimpa. Mäniñedë Oodeabæ wayömö wayömö quëwënäni nanguï inäni Eedotadëë quëwëñömö pö æidinque tömënäni Patowa nani ææmæ ayæ cædämaï iñedë dodäni angäi bai cædinque, Mönö wënæ wënæ cægäinö ante mönö mënongate bai waëmö bacäimpa, ante nämä incæ äacæte ante cædinque æi gogadänimpa. ⁵⁶ Adodäni Wængonguï oncö ñænæncönë yabæcönë pö guidinque adiyæ gongæninque, Itota æyömönö ingää, ante pönente gomö adinque nämæneque godongämæ apænedinque,

—Mäningä iñömö ææmæ beyæ ante edæ pönämaï ingantawo. Æbänö ante pönëminii, ante apænedönänimpa.

⁵⁷ Wængonguï qui, ante godönäni ñænænäni tönö Paditeoidi wæætë waodäni inänite wææ änönänimpa. Æcänö Itota nänö a ongöñömö ante në ëñengä iñömö tömengä mönitö imönite angä ëñëninque mönitö wæætë Itota ingante yao ongonde æmaïmönipa, ante do wææ änönänimpa.

12

*Awënë Itota önöwa oguï wapæ gao cæwacampa
(Mäateo 26.6-13; Mäadoco 14.3-9)*

¹ Önompo æmæmpoque go adoönæque ate Patowa nani ämæ bacæ cæyedë Itota Betänia iñömö pongantapa. Itota do angä ate në ñäni ömæmönigä Datado iñömö tömengä adoyömö Betänia quëwënonngäimpa. ² Itota pongä adinque waodäni mäniñömö quëwënäni, Itota ingante waa amönipa, ante tömengä beyæ ææmæ cægadänimpa. Wadäni tönö Datado adobai Itota tönö godongämæ tæ contate cæñönänite Mäadota iñömö tömënäni inänite cænguï godongä cænänitapa. ³ Ayæ Mäadiya iñömö mëedio ditodo ganca nani oguï wapæ öni pæquimæ näadodopæ nänö nanguï godonte ænimæ incæ ænte mämö Itota önöwa gao cæwadinque tömengä ocaguï inte amimö cæcä ininque oncönë tömancönë oguï waacönë ingatimpa. ⁴ Itota miñæ në gocä adocanque Codaa Icadote nani änongä iñömö edæ, Itota ingante æncædänimpa, ante odömonte në godonguingä inte ñöwo wææ apænecantapa.

⁵ —Iimæ nänö oguï wapæ quinante ömæpodäni beyæ ante godonte ænämaï ingantawo. Iñæmpa waocä adoque wadepo cæte beyæ paga æninque todetiento deëna-diota nänö ænimpota beyæ mänimæ godonte ænimæ imæmpa, ante wæcantapa.

⁶ Tömengä dicæ ömæpodäni beyæ ante pönëninque mänömaïnö ante apænecantawogaa. Wæætë tömengä në awëmö ænongä inte mäninö ante apænecantapa. Tömënäni da wente æintaa næænongä inte tömengä iñömö, Tömënäni da wëninta incæ pancataa botö qui bacäimpa, ante awëmö ænongä inte mänömaï apænecantapa. ⁷ Itota wæætë tömengä ingante,

—Onquiyängä ingante piinte anewënämaï incæbiimpa. Mänimæ botö daga wenguïönæ ante manguënegä inte tömengä botö baö nani daga wenguinque ante eyepæ iñonte öni paacantapa. ⁸ Ömæpodäni cöwë minitö weca quëwënäni inänipa. Botö guiquënë wii cöwë minitö weca quëwëmo imopa, ante apænegacäimpa.

Datado ingante wænongäimpa, ante tedewënäni

⁹ Itota Betänia ponte ongongampa, ante apænedäni ëñëninque oodeoidi nanguï inäni tömengä weca pönäni incæte wii tömengä beyænque pönänitapa. Wæætë adobai Datado ingante angä në ñäni ömæmönigä ingante acæte ante pongadänimpa. ¹⁰ Mänömaï beyæ Wængonguï qui, ante në godönäni ñænænäni iñömö, Æbänö cæte Datado ingante adobai wænömö wænguingää, ante godongämæ tedewënanitapa. ¹¹ Iñæmpa oodeoidi nanguï inäni, Datado beyæ mönitö imönite ëmö cæte Itota ingante pönëninque tömengä gämænö godänipa, ante wægadänimpa.

*Itota Eedotadëe iñömö pongä**(Mäateo 21.1-11; Mäadoco 11.1-11; Odoca 19.28-40)*

¹² Iimö ate, Eedotadëe iñömö poncæte ante Itota idömæ pongampa, ante apænedäni ëñëninque ææmæ beyæ ante tæiyænäni pöninäni iñömö, ¹³ yædëmæmäa wangö tate mäo bee tente taodisque yedæ aa pedisque,

—Möni quëwenguinque ante, Badogaa, ante tomönipa. Bitö Awënë Wængongui ëmöwo beyænque pömi iinque bitö toquinque edæ Wængongui bitö imite waa cæcæcäimpa. Bitö idægoidi Awënë inömi inte bitö toquinque ingæimpa.

¹⁴ Ante yedæ äñönäni Itota iñömö bodo wengä ate æninque tömengäa æi contate pongantapa. Wëenëñedë Wængongui beyæ iimaï ante näni yewæmonte angainö bai iinque cædisque pongantapa.

¹⁵ “Tiöno iñömö quëwëmini iñömö edæ guiñënamai iedäni.

Minitö Awënë Odeye ñöwo minitö weca pongä aedäni. Edæ bodo wengäa æi contate pongampa,”

ante yewæmongadänimpa. ¹⁶ Tömënanäni dodäni näni angai bai cædisque Itota ingante bee tencæ taodäni adisque Itota nänö në ëmiñænäni iñömö, Æbänö cædäni, ante mäniñedë ëñënamai inte wædönänimpa. Wæätë edæ Itota Wængongui ñäö ëmöñömö ocæ ëmænte gocä adisque tömengä ëmiñænäni mäniñedë ate edæ, Itota ingante woadäni ñöwo näni cædönö ante dodäni wëenëñedë yewæmongadänimpa, ante pönente wædönänimpa.

¹⁷ Datado wodi ontatodë ongöñongante Itota, Ta pöe, ante aa pecä ëñëninque në wæningä incæ ñäni ömæmöninque ta pongä adisque Itota weca godongämæ ongöninäni nanguï inäni iñömö, Itota mänömai cæcä atamönipa, ante gode ä gode ä cædönänimpa.

¹⁸ Iinque edæ, Itota mänömai bamönengæ cæcampa, ante apænedäni ëñente beyænque woadäni tæiyænäni Itota weca bee tencæ pönänitapa. ¹⁹ Mänömai beyæ Paditeoidi iñömö nämanque godongämæ tedewënanitapa.

—Woadäni tömänäni æbänö tömengä miñæ tee empo godäni ante aedäni. Mänii beyæ ante, Mönö cædinö wiï eyepæ impa, ante adisque, Mönö æbänö cæte godömenque cæquimö, ante wægadänimpa.

Guidiegoidi pancadäniya Itota ingante diqui minäni

²⁰ Eedotadëe iñömö tömënanäni ææmæ cæyedë Wængongui ingante waa ate apænecæte ante në pönäni pancadäniya iñömö guidiegoidi inönänimpa. ²¹ Mäninäni iñömö Pedipe weca pöninque edæ,

—Awënë, ëñëmi. Mönitö Itota ingante ainëmönipa, ante änänitapa. Mäningä Pedipe iñömö Betaida quëwëñömö Gadideabæ quëwente pongä inongäimpa.

²² Tömengä iñömö Æntade weca gote tömengä ingante guidiegoidi näni äninö ante apænecä ate tömëna wæätë Itota weca guëa godinque tömengä ingante äñöna, ²³ Itota wæätë,

—Wængongui nänö cæönæ do ba iinque tömengä pönö cæcä beyænque botö Waobo ëñagaimo iñömö ñäö apäite ëmoncæboimpa. ²⁴ Minitö iminite näwangä ämopa. Tömëmö onguipo quiyadimö incæ yabæque ñömäadämai i bai ædö cæte tä bocate pædisque tömëmö nanguï pöni imonguii. Wæätë tömëmö yabæque ñömäate ate tä bocate pædisque nanguï pöni imompa. Botö adobai wængüenëmo imopa. Botö wiï wæmo bai ædö cæte woadäni tæiyænäni botö quinäni baquinäni. ²⁵ Në, Nämanque pönente quëwëmote, ante pönengä iñömö edæ tömengä nänö quëwenguimämo incæ wo ëwente bacæcäimpa. Inguipoga quëwëñedë në, Wiï nämanque pönente quëwëmote, ante pönengä quiquënë tömengä nänö wantæpiyæ quëwenguinö ante do ëadingä inte tömengä nänö wänämai quëwenguinque gocæcäimpa. ²⁶ Æcänö botö imote në cæda ina tömengä iñömö edæ botö imote tee empo goquënenngä ingampa. Ayæ æyömönö botö quëwëmo botö imote në cædongä adoyömö quëwencæcäimpa. Botö Mæmpo iñömö botö imote në cædongä ingante waa acæcäimpa, ante Itota apænegacäimpa.

Itota, Botö wæncæboimpa, ante apænenecä

²⁷ Ayæ godömenque apænedinque Itota iïmaï apænenecantapa. “Botö guiñëmämo entawëninque wæbo inte quinö anguiïmo. ‘Botö Mæmpo ëñëmi, äninque, Botö nantate wæwenguïönæ oo pönï ba incæte bitö pönö ö æmi ate wæwënämaï bacæboimpa,’ ante botö wïi mänömainö ante ancæboimpa. Edæ botö wæwenguïnö beyæ ante pontabopa. ²⁸ Mæmpo, Bitö æbänö ñäö apäite ëmömi iïmi, ante odömömi acæðänimpa,” angantapa.

Äñongä öönæde inö tedepämo apænedinque, “Botö æbänö ñäö apäite ëmömo iïmopa, ante do odömontabopa. Ayæ wæætë adodö cæcæboimpa,” ante apænenecä ëñënanitapa.

²⁹ Mänïñömö godongämæ ongönäni nanguï inäni iñömö mänïmämö ëñëninque edæ, Detæbo tæi tëmämö baï impa, ante wæðänitapa. Wadäni guiquënë,

—Anquedo iñömö tömengä ingante apænenecantapa, ante änänitapa.

³⁰ Itota iñömö wæætë,

—Mänïmämö wïi botö beyæ ante apænenecampa. Wæætë mïnitö beyæ ante apænenecampa. ³¹ Nöwoyedë Wængonguï inguipoga quëwënäni inänite apænte nänö panguïnö iñömö edæ oo baquinö anguënë. Inguipogaque quëwënäni awënë iñongante wënæ ingante Wængonguï ñöwoyedë, Gobäwe, angä gocæcäimpa. ³² Botö iïmote awäa timpodinque ængæ gantidënäni wægömo ate botö waodäni tömänäni inänite, Mïnitö botö weca poncæmïnimpa, ante aa pecæboimpa, ante Itota apænenecantapa.

³³ Mänömainö ante apænedinque tömengä, Æbänö wænguïïmo, ante ëñencæðänimpa, ante apænenecantapa. ³⁴ Eñëninque mänïñömö ongönäni nanguï inäni,

—Mönitö iñæmpa, Mönö Codito cöwë ee ongoncæcäimpa, ante dodäni näni wææ angainö ante yewæmante ongompä, ante ëñentamönipa. Incæte bitö iñömö nämanque äninque, Botö Waobo ëñagäïmo iñömote botö iïmote awäa timpodinque gö cæðäni wægonguïmo iïmopa, ante ædö cæte ämii. Äninque, Iingä Waocä në ëñagängä iñæmpa ee ongönämaï wænte goquingäa.

³⁵ Ante wæyönäni Itota tömënäni inänite,

—Botö, Waodäni mïmönë ñäö baï entawëninque quëwencæðänimpa, ante pontabopa. Wæðænque ayæ iñö botö mïnitö weca quëwëninque mïnitö iïmïnite odömote apænebopa. Mönitö taadö wëmö badämaï ingæimpa, ante mïnitö taadö ayæ ñäö iñedë goedäni. Edæ wëmö iñömö në gocä iñömö tömengä edæ, Ædönö goboo, ante ëñënämaï ingampa. ³⁶ Botö ñäö baï ëmönömo iïmopa. Näö iñömö në cægömöni incæmönimpa, ante bacæte ante cæðinque mïnitö iñömö botö mïnitö weca ayæ ongöñömote botö iïmote pönëedäni ämopa, angantapa.

Tömengä iinque apænete ate wæðæ godinque wë womonte ongongacäimpa.

Oodeoidi Itota ingante iïmaï cæte pönënämaï inänipa

³⁷ Itota oodeoidi weca nanguï bamönengæ cæte odömongä incæte tömënäni ayæ tömengä ingante pönënämaï inänitapa. ³⁸ Wængonguï beyæ në apænenecä Itaiya wodi iïmaï ante do nänö angainö baï iinque baquinque tömënäni mänömaï cæðönänimpa.

“Awënë Wængonguï ëñëmi. Mönitö apænemöni tömënäni näni ëñënö ante edæ æcänö ëñente pönengäa. Iñæmpa në pönengä iñömö edæ dæ angä awædö. Ayæ Awënë Wængonguï nänö tæi piñænte cægainö ante æcänö ada iñömö edæ dæ angampa.”

³⁹ Iinque tömënäni ædö cæte pönenguïänäni, ante Itaiya wodi edæ wayömö yewæmöninque, Wængonguï iïmaïnö ante cæcä beyæ pönënäni inänipa, ante yewæmongacäimpa.

⁴⁰ “Tömënäni botö gämænö ocæ ëmænte pönäni baï botö wæætë, Waa bacæmïnimpa, ante godö cæcæðömoimpa.

Incæte mänömaï cæðämaï incæboimpa, ante Wængonguï iïmaï cægacäimpa.

Tömengä godö cæcä beyænque waodäni babetamönäni baï adämaï bagadänimpa.

Adobaï mïmönë näni pönënö ömæde badinque ëñënämaï bagadänimpa.

Edæ, Tömënäni näni adinö ante ëñënämaï incæðänimpa, ante cæðinque

ayæ edæ, Tömënäni näni ëñënö ante ëñënämaï incæðänimpa,” ante wææ cægacäimpa.

ante Itaiya wodi yewæmongacäimpa. ⁴¹ Itaiya wodi Itota nänö ñäö emömämo æbänö ingui, ante do ate bai ingaingä inte edæ Itota ingantedö ante mäninö ante doyedë angacäimpa.

⁴² Ñöwo guiquënë oodeoidi awënëidi tæiyænäni Itota ingante pönänanimpa. Incæte Paditeoidi beyæ guifñänäni inte, Mönö odömöincönë go guiyömönite tömönäni mönitö imönite wii tatodoncädänimpa, ante wææ cædinque tömönäni në pönänäni incæ waodäni eññönäni pæ wëenete tededämaï inänimpa. ⁴³ Edæ mäninäni, Waodäni mönitö imönite waa ate apænecädänimpa, ante nanguï aïnente wädäni inönänimpa. Adodäni, Wængongui mönitö imönite waa ate apænecæcäimpa, ante pönömenque aïnente wädäni inönänimpa.

Itota nänö äno beyænque waodäni apænte wæcädänimpa

⁴⁴ Itota yedæ äninque aa pecantapa. “Botö imote në pönengä iñömö wii botö adoboque imote pönönongä ingampa. Wæætë edæ botö imote në da pönongaingä ingante tömengä adobai pönengä inongäimpa. ⁴⁵ Adocä botö imote në acä iñömö tömengä botö imote në da pönongaingä ingante adobai acä ingampa. ⁴⁶ Botö imote në wede pönänäni iñönäni adocanque incæ wëmö iñömö wii godömenque ee ongoncæcäimpa, ante cædinque botö iñömö inguipoga quëwänäni weca ñäö bai inömo inte pontabopa.”

⁴⁷ “Wacä botö äno eññinque wii eññente cæcä ingä incæte botö tömengä ingante apænte änämaï imopa. Edæ botö wii inguipoga quëwänäni inänite apænecæte ante pontabopa. Wæætë inguipoga quëwänäni inänite æmo beyænque quëwencæminimpa, ante pontabopa cæminii. ⁴⁸ Botö imote në Baa angä iñömö tömengä botö änonö ante, Dicæ pönëmogaa, angä iñongante tömengä ingante në apænte äno incæ edæ mä ongompa. Inguipoga iinque baquïönæ iñonte botö äninö incæ në apænte anguingä bai ba ininque mäningä ingante, Bitö pante wæquinque Baa angabiimpa, ante bai apænete ingäimpa. ⁴⁹ Edæ botö wii nämanque pönëninque apænetabopa. Wæætë, Botö quïnö apænequimoo, ante, Æbänö ante apænequimoo, ante botö Mæmpo botö imote në da pönongaingä iñömö tömengä botö imote wææ angä eññinque apænetabopa. ⁵⁰ Tömengä nänö wææ angainö eññente cæbo beyænque mïnitö wantæpiyæ cöwë quëwencæminimpa, ante do eññemopa. Ininque botö Mæmpo botö imote nänö angainö ante botö adodö ante apænebopa,” ante Itota mäniñedë iinque apænecäcäimpa.

13

Itota incæ tömengä emiñænäni önöwa mënöwacä

¹ Patowa näni ämä wantæyö bacäimpa, ante näni cæyedë Itota iñömö, Botö inguipoga quëwente emö cæte botö Mæmpo weca ocæ emænte æi goquïönæ do bacäimpa, ante do eññongäimpa. Itota ingante pönänäni në inguipoga quëwänäni iñönänite tömengä tömönäni inänite waadete pönëninque ñöwoyedë, Botö æbänö nanguï waadete pönëmo imoo, ante odömongäimpa.

² Gäwadecæ bayö Itota tömengä emiñænäni tönö godongämæ cæñönäni wënæ awënë cæcä beyænque Timönö wengä Codaa Icadote iñömö, Itota ingante odömönte godoncæboimpa, ante pönengä inongäimpa. ³ Itota iñömö, Quincoomë ongoncoo incæ Wængongui pönö cæcä beyænque botö tömancoo awënë badinque nämä tæi piñante në ämo imopa, ante eññongäimpa. Ayæ edæ Wængongui weca quëwente wææ pönimo inte botö Wængongui weca ocæ emænte goquïmo imopa, ante do eññongäimpa. ⁴ Mäninö ante eññongä incæ tömengä iinque cænte ate ængæ gantidique yabæcoo gä tadongadinque wadæ caaincoo æninque önoncadeyæ inö goti padengantapa. ⁵ Ayæ ate æpæ mënongaquintadë pe ñiñæninque tömengä emiñænäni tömänäni önöwa mënöwadinque wadæ caaincoo goti padëincoo inte wadæ cæwacæ tæcæ cæcantapa.

⁶ Mänömaï cædinque tömengä Timönö Pegodo weca pongä adinque adocä iñömö tömengä ingante,

—Bitö botö Awënë imi incæte botö önöwa mënöwacæ pömitawo.

⁷ Ante äñongä Itota wæætë,

—Ñöwoque botö æbänö cæboo, ante ëñënamai ïmipa. Incæte ayæ ate ëñencæbiimpa.

⁸ Angä ëñëninque Pegodo,

—Botö önöwa cöwë mënöwadāmai incæbiimpa, ante Baa ämopa cæbii.

Ante äñongä Itota godömenque,

—Botö bitö önöwa mënöwadāmai ïmo bai bitö wii botö quimi ïmaimipa, ante angantapa.

⁹ Mäninö angä ëñëninque Timönö Pegodo wæætë,

—Awënë, Mänömai ï ïninque bitö wii botö önöwaque mënöwaquimi. Wæætë botö önompo adobai mënompodique botö ocabo mënöncae.

¹⁰ Ante äñongä Itota wæætë,

—Æpæ në äadingä ïñömö tömengä baö ëñayö tömäñö waëmö impa. ïninque tömengä önöwaque nämanque mënöwacä inte eyepæ impa. Minitö do mimö mënongate waëmö entawënomini ïminipa. Incæte wii tömämini waëmö entawëmini ïminipa, angantapa.

¹¹ Edæ, Æcänö botö ïmote në odömönte godongingä ingää, ante tömengä do ëñëngäimpa. Mänömai beyæ tömengä, “Minitö wii tömämini do mënongate waëmö entawënomini ïminipa,” angantapa.

¹² Ayæ tömënanï önöwa ïnque mënöwadinque tömengä yabæcoo wëñadinque tömengä adodö gote tæ contadinque tömënanï ïnänite,

—Botö mänömai cædinque minitö beyæ ante quinö cæboo, ante ëñëminitawo, ante äninque Itota godömenque, ¹³ Minitö botö ïmote, Në Odömömi ïmipa, äninque ayæ adobai, Awënë ïmipa, ämini ïminipa. Edæ botö minitö Awënë ïnomo ïninque minitö mänömainö ante näwangä ante äminipa. ¹⁴ Botö ïñömö minitö Awënë ïnomo inte në minitö ïminite Odömömo ïmo incæ minitö önöwa do mënöwabo aminipa. ïninque botö mänömai mënöwabo bai minitö adobai wacä önöwa wacä önöwa mënöwaquënemini ïminipa. ¹⁵ Botö cæbo bai minitö adobai cæcæminipa, ante cædinque botö minitö beyæ ante cæbo aedäni. ¹⁶ Minitö ïminite näwangä ämopa. Awënë ñænængä ïnongä ïnongante tömengä ingante në cæcä ïñömö wii godömenque ñænængä ingampa. Awënë në da godongä ñænængä ïnongä tömengä nänö në da godöningä wæætë wii godömenque ñænængä ingampa. ¹⁷ Minitö ñöwo mäninö ante ëñënimini inte edæ ado ante cæmini ïninque mini toquinque bacæimpa, ante Itota apænecantapa.

¹⁸ Ayæ apænedinque, “Botö wii tömämini beyæ antabopa. Botö apænte æninäni ædänidö ïnänii, ante botö në ëñëmo ïmopa. Wængongui angä ëñente nani yewæ-mongainö bai ïnque bacæimpa, ante iimai bacæ cæpa. ‘Botö tönö godongämæ në cængongä ïñömö botö ïmote në piinte cæcä bacantapa.’ ¹⁹ Mänömai ba adinque edæ minitö botö ïmotedö ante apænedinque, Tömengä mönö Codito ïnongä ingampa, ante pönencæminipa, ante cædinque botö ñöwo ayæ badāmai ïnedë minitö ïminite ämopa. ²⁰ Minitö ïminite näwangä ämopa. Æcämenque botö në da godongaingä ingante äna tömengä ïñömö edæ botö ïmote adobai ængä ingampa. Ayæ æcämenque botö ïmote äna tömengä ïñömö botö ïmote në da pönongaingä ingante ængä ingampa cæminii,” ante Itota apænegacäimpa.

Itota ingante Codaa në godongingä ingampa, ante

(Mäateo 26.20-25; Mäadoco 14.17-21; Odoca 22.21-23)

²¹ Mäninö angä ate Itota ïñömö tömengä nänö wæwëmämo entawëninque wæcä inte, Näwangä ante apænebo ëñëedäni. Mini cabo incæ adocanque, ÆEncädänimpa, ante botö ïmote odömönte pædæ godongingä ingampa.

²² Ante apænecä wædinque tömengä ëmiñænäni, Æcänö ingante apænecää, ante ëñënamai inte godongämæ wacä ingä wacä ingä adänitapa. ²³ Itota ëmiñænäni adocanque ïñömö Itota nänö në waadete pönongaingä ïnongäimpa. Tömengä ïñömö Itota tönö äänömonque tæ contate ongönaimpa. ²⁴ Timönö Pegodo ïñömö ïngä ingante ömö ömö cædinque angampa. Bitö Itota ingante, Æcänö ingää, ante ämi angä ëñente ate apænebi ëñëmönie. ²⁵ Angä ëñëninque mäningä Itota tönö äänömonque në tæ contacä ïñömö,

—Awënë, æcänö ingää, ante apænebi ëñëmönïe, ante tömengä ingante äñongä.

²⁶ Itota wæætë,

—Botö ii päö owætaca miï cæte godömo në ænguingä iñömö tömengä në cæquingä ingampa.

Ayæ päö owætaca miï cædinque Timönö wë Codaa Icadiote ingante godongantapa.

²⁷ Codaa päö ængä ate Tatäna iñömö tömengä do guiigacäimpa. Ìnïnque tömengä ingante,

—Bitö quïnö cæcæ cæbii edæ quingæ cæe, ante Itota angantapa.

²⁸ Wadäni adoyömö në cænäni iñömö, Itota quïnante mäninö ante tömengä ingante angää, ante ëñënämaï inönänïmpa. ²⁹ Edæ Codaa tömënäni da wente æinta næængongä ingä beyæ tömënäni pancadäniya, Ææmæ beyæ ante mönö cænguï wii eyepæ ëamöni ïnïnque, Bitö godonte æncæbiïmpa, ante Itota angampa, ante pönënönänïmpa. Adobaï ömæpodäni inänite, Godömi ænguïnänïmpa, ante Itota angampa, ante pönënönänïmpa.

³⁰ Codaa päö ænte ate tao gogacäimpa. Do woyowotæ inönïmpa.

Itota nänö wææ änönö ante ñöwo angampa

³¹ Codaa dæ gocä adïnque Itota,

—Botö Waobo ëñagaïmo inte æbänö ñäö apäite ëmönömo ïmoö, ante ñöwo edonque bacäïmpa. Botö cæquïnö beyæ Wængonguï æbänö ñäö apäite ëmongä ingää, ante edonque bacäïmpa. ³² Ayæ botö cæquïnö beyæ Wængonguï ñäö apäite nänö ëmönö edonque ba ïnïnque Wængonguï cæcä ate botö ñäö apäite botö ëmönö adobaï edonque bacäïmpa. Ayæ mänömaï Wængonguï wantæyö cæcæcäïmpa. ³³ Botö wëmïni botö mïnitö weca wantæyö quëwëniñque gobopa. Mïnitö botö ïmote ante diqui diqui mingüimïni ïmïnïpa. Ayæ oodeoidi inänite botö angainö baï ñöwo mïnitö ïmïnite adodö ämopa. Botö goquïñömö ante mïnitö ædö cæte ponguïmïni ïmïni. ³⁴ Botö wææ änönö ante ñöwo mïnitö ïmïnite ämopa. Wacä ingä wacä ingä waadete pönencæmïnïmpa. Botö mïnitö ïmïnite waadete pönënömo baï mïnitö adobaï wacä ingä wacä ingä waadete pönenguënëmïni ïmïnïpa. ³⁵ Mïnitö wacä ingä wacä ingä waadete pönëmïni adïnque wadäni tömänäni, Mïnitö Itota nänö në ëmïñæmïni ïmïnïpa, ante ëñencædänïmpa, ante Itota apænegacäïmpa.

Pegodo incæ, Dicæ abogaa, angingä ingampa, ante (Mäateo 26.31-35; Mäadoco 14.27-31; Odoca 22.31-34)

³⁶ Timönö Pegodo tömengä ingante,

—Awënë, ædömë gobii.

Ante äñongä Itota wæætë,

—Botö goquïñömö ante bitö ædö cæte botö ïmote ñöwo tee empo ponguïmi ïmii. Ayæ ate guiquënë bitö botö ïmote tee empo ponguïmi incæbiïmpa, angantapa.

³⁷ Pegodo godömenque,

—Awënë, äniñque, Botö quïnante bitö ïmite ñöwo tee empo godämaï ïmoö, ante wæcampa. Botö Ao äniñque bitö beyæ ante nämä wænguïmo ïmopa.

³⁸ Ante äñongä Itota wæætë,

—Bitö Ao äniñque botö beyæ ante näwangä wænguïmi ïmiyaa. Bitö ïmite näwangä ante apænebo ëñëe. Tawadiya pedämaï iñonte bitö iñömö botö ïmotedö, Dicæ abogaa, ante mempoga go adopoque anguïmi ïmïpa, ante apænegacäïmpa.

14

Mæmpo weca mönö godö ante Itota taadö baï ingampa

¹ Itota tömengä ëmïñænäni inänite, “Mïmönë guïñente wædämaï ïedäni. Wæætë Wængonguï ingante wede pönëedäni, angantapa. Ayæ adobaï botö ïmote wede pönëedäni. ² Botö Mæmpo nänö quëwëñömö onconcoo bacoo pönï mä ongompa. Mänömaï ïmpa, ante wii näwangä i baï botö mïnitö ïmïnite ancædömoïmpa. Mïnitö beyæ ante botö, Mïni ponte quëwenguï onconcoo ante tömää ædæmö badoncæte ante mäniñömö gocæboïmpa. ³ Ayæ mïnitö quëwenguï onconcoo tömää ædæmö mänoncæte

ante gobo ïninqe botö ocæ emænte poncæboimpa. Pöninge mïnitö botö quëwëñömö adoyömö botö tönö godongämæ quëwencæmïnimpa, ante botö mïnitö ïmïnite ænte mæibo æicæmïnimpa. ⁴ Botö goquiñömö æyömönö ï, ante ayæ mäniñömö gocæte ante taadö godö ante mïnitö do ëñëmïnipa,” ante Itota apænecantapa.

⁵ Apænecä ëñëninque Tömato ïñömö tömengä ingante,

—Awënë, Ædömë goquïmii, ante mönitö ëñënämaï ïmöni inte mönitö mäninö bitö goquiñö ædönö ï, ante taadö ædö cæte ëñenguïmönii.

⁶ Äñongä Itota wæætë,

—Botö ïñömö tömëmo në taadömo bai ïnömo ïmopa. Ayæ botö adobo në näwangä änö bai ïnömo bai ïñömote mïnitö æbänö näwangä impa, ante ëñenguïmïni ïmïnipa. Botö edæ në Quëwëmo inte pönö cæbo beyænque mïnitö quëwenguïmïni ïmïnipa. Botö wïi pönö cæbo bai waocä æcämenque incæ botö Mæmpocä weca godämaï incædongäimpa.

⁷ Botö ïmote do ate pönëmïni ïninqe mïnitö botö Mæmpo ingante adobaï ate pönëmïni ïmaïmïnipa. Nöwo tömengä ingante tæcæ ate bai pönëmïni inte mïnitö tömengä ingante cöwë në agaimïni incæmïnimpa, ante apænecantapa.

⁸ Mäninö apænecä ëñëninque Pedipe ïñömö,

—Awënë, Mæmpocä ingante odömömi amönie. Mäninque adinque idæwaa. Eyepæ impa.

⁹ Äñongä Itota wæætë,

—Pedipe ëñëmi. Botö mïnitö weca wantæpiyæ quëwëmo incæ bitö ayæ botö ïmote adämaï inte bai pönënämaï ïmitawo. Në botö ïmote acä ïñömö tömengä adobaï Mæmpocä ingante në acä ingampa. ïninqe bitö ïñömö, Mæmpocä ingante odömömi amönie, ante ædö cæte botö ïmote ämii. ¹⁰ Wæmpocä nempo botö në quëwëmo ïmopa, ante ayæ, Wæmpocä ingante botö entawëmo ïmopa, ante bitö pönënämaï ïmitawo. Botö mïnitö ïmïnite, Æbänö apæneboo, ante wïi nämanque pönëninque apænebopa. Wæætë botö Wæmpocä incæ botö tönö në äawocaque bai quëwëngä inte edæ tömengä nänö cædö ante në cæcä ingampa. ¹¹ Tömengä nempo quëwëmo ïmopa, ante ayæ, Tömengä ingante botö entawëmo ïmopa, ante mïnitö ïmïnite apænebo ëñëninque pönëedäni. Wæætë edæ mïnitö botö änö beyænque ayæ pönënämaï ïmïni incæte botö bamönengæ nanguï cædinö adinque mäninö beyænque pönëedäni. ¹² Mïnitö ïmïnite näwangä ämopa. Botö ïmote në wede pönengä ïñömö tömengä botö cæbaï adobaï cæcæcäimpa. Ayæ botö Mæmpocä weca ocæ emænte gobo beyæ në wede pönengä ïñömö edæ wïi önonque botö cæbaï cædinque godömenque cæquingä ingampa. ¹³ Mïnitö botö emöwo ante apænedinque quiëmë æncæte ante apænemïni ëñëninque botö Wængonguï Wëmo ïnömo inte edæ, Mæmpocä nänö nãö emömämo edonque pönï acædänimpa, ante cædinque mïnitö änö bai edæ do cæcæboimpa. ¹⁴ Mïnitö, Ænguïmöni, ante quiëmë beyæ ante botö emöwo ante botö ïmo apænemïni ëñëninque do cæcæboimpa, ante Itota apænecäcäimpa.

Wængonguï Tæiyæ Waëmö Önöwoca poncæcäimpa, ante

¹⁵ Ayæ godömenque apænedinque Itota ïïmaï ante apænecantapa. “Mïnitö botö ïmote waadete pönëmïni ïninqe botö wææ angainö ante ëñente cæquïmïni ïmaïmïnipa.

¹⁶ Ayæ, Wacä botö beyæ ante mïnitö tönö godongämæ cæquingä, ante botö ïñömö botö Mæmpocä ingante, Da godömi gocæ, ante apænecæboimpa. Ayæ tömengä botö änö ante do ëñente cædinque edæ, Tömengä mïnitö tönö cöwë ongonte godongämæ cæcæcäimpa, ante cædinque adocä ingante mïnitö weca da pönongä ponguingä ingampa. ¹⁷ Wængonguï në nö cæcä ingampa, ante näwangä impa, ante Wængonguï Tæiyæ Waëmö Önöwoca incæ në odömongä ïnongä ingampa. Incæte waodäni në inguipogaque quëwënanï ïñömö tömengä ingante adämaï ïnani inte pönënämaï ïnönäni inte edæ ædö cæte tömengä ingante Ao ante ænguïnänii. Wæætë edæ tömengä mïnitö weca quëwëngä ïñongante mïnitö tömengä ingante në entawenguïmïni inte tömengä ingante do ate bai pönëmïni ïmïnipa,” ante Itota apænecantapa.

¹⁸ Ayä apänedinque, “Botö wii mīnitö nōwamini bai mīni baquinque ante edæ emö cæte goquimo imopa. Wæætē mīnitö weca ocæ emænte poncæboimpa. ¹⁹ Wantæ ate waodāni nē inguipogaque quēwēnāni iñömö edæ botö imote adāmaī inguināni inānipa. Mīnitö guiquēnē botö imote aquimīni iminipa. Edæ botö quēwēmo beyænque mīnitö adobaī quēwencæmīnimpa. ²⁰ Ayä Wængonguī Tæiyä Waēmö Önōwoca nānō ponguionæ iñonte mīnitö iñömö edæ, Mönö æbānō āanque bai quēwēmö imoo, ante eñencæmīnimpa. Edæ, Botö Mæmpocā nempo quēwēmo imopa, ante ayä edæ, Mīnitö botö nempo quēwēmīni iminipa, ante ayä, Mīnitö iminite adobaī botö entawēmo quēwēnōmīni iminipa, ante mīnitö eñencæmīnimpa. ²¹ Æcānō botö wæ angainō ö ænīnque eñente cæda tōmengä iñömö botö imote nē waadete pōnengä ingampa. Botö imote nē waadete pōnengä ingante botö Mæmpo nāēmæ waadete pōnencæcāimpa. Ayä botö adobaī māningä ingante waadete pōnencæboimpa. Ayä, Botö æbānō imoo, ante tōmengä ingante odömömo acæcāimpa,” ante Itota apä necantapa.

²² Codaa iñömö edæ wii Codaa Icadote wacā Codaa iñömö edæ Itota ingante apä necantapa.

—Awēnē iñæmpa bitö mōnitö imōnite apänedinque, Botö æbānō imoo, ante odömömo acæmīnimpa, ānīnque quīnante wæætē, Inguipogaque quēwēnāni inānite odömōnāmaī incæboimpa, ante pōnēnīnque cæbitawo, angantapa.

²³ Itota wæætē,

—Waacā botö imote nē waadete pōnengä inīnque tōmengä iñömö botö odōmonte apänedö ante eñente cædongä imaingampa. Botö Mæmpo adocā ingante waadete pōnengūngä ingampa. Ayä mōnatö tōmengä tōnō cōwē godongāmæ quēwencæte ante tōmengä weca ponguimōna imōnapa. ²⁴ Botö imote nē waadete pōnēnāmaī ingä guiquēnē tōmengä iñömö botö odōmonte apänedönö ante eñēnāmaī cædongä ingampa. Mānīnō botö odōmonte apänebo mīni eñēnīnō iñömö wii botö nāmā pōnēnīnque apänedinö impa. Wæætē botö imote nē da pōnongaingä nānō angainō impa, ante Itota apä necantapa.

²⁵ Ayä apänedinque, “Mīnitö weca botö quēwēñedē botö mānīnō ante mīnitö iminite apänetabopa. ²⁶ Botö Mæmpocā botö emōwo beyä ante tōmengä Tæiyä Waēmö Önōwoca ingante da pōnongä ponguīngä inte tōmengä mīnitö tōnō godongāmæ nē cædongä ingampa. Adocā mīnitö iminite tōmānō ante odōmonte apä necä eñencæmīnimpa. Ayä botö apänedö mīni eñēnīnō tōmānō ante tōmengä adodö apä necä wæætē pōnencæmīnimpa,” ante Itota apä necantapa.

²⁷ Ayä apänedinque, “Botö pōnō cæbo beyænque mīnitö gānē entawente quēwēdāni, ante pōnō cædinque gobopa. Botö gānē entawēmāmo incæ mīnitö iminite pōnōmo ænīnque mīnitö gānē pōnente quēwencæmīnimpa. Botö inguipogaque quēwēnāni nāni godōnō bai wii pōnōmo imopa. Nō cæte pōnōmo imopa. Mīnitö mīmōnē guīñente wädāmaī inte piyänē cæte quēwencæmīnimpa. ²⁸ Botö mīnitö iminite emö cæte godinque mīnitö weca ocæ emænte poncæboimpa, ante botö apänebo eñēmīnitapa. Botö edæ, Botö Mæmpocā weca gocæboimpa, ante apänebo eñēnimīni inte mīnitö botö imote waadete pōnēmīni inīnque botö beyä ante watapæ tobaiminipa. Edæ botö wii botö Mæmpo bai inōmo inte wädāmo inōmo imopa. ²⁹ Mānōmaī iinque ba adīnque mīnitö, Nāwangä impa, ante pōnencæmīnimpa, ante botö ñōwoque ayä badāmaī iñedē mīnitö iminite apänetabopa,” ante Itota apä necantapa.

³⁰ Ayä apänedinque, “Ii inguipogaque quēwēnāni awēnē iñömö wēnæ inongä inte oo poncæ cæcampa. Inīnque botö mīnitö iminite wii wantæpiyä ayä apänebopa. Edæ tōmengä ædö cæte botö imote nāmā tæi pīñante nē angä inguīgää. ³¹ Incæte botö, Waodāni inguipogaque quēwēnāni iñömö iīmaī ante eñencædānimpa, ante cæbopa. Botö Mæmpo ingante botö waadete pōnēmopa, ante ayä, Botö Mæmpo botö imo wæ angä bai botö adodö cæbo imopa, ante tōmēnāni eñenguēnēnāni inānipa,” ante Itota iinque apä negacāimpa.

Ayä, “Ñōwo edæ ængæ gantidinque mōnō gocæimpa,” angacāimpa.

15

Itota näwä yowementa bai ingampa

¹ Ayä godömenque apänedinque Itota iimaï apäñecantapa. “Botö näwä yowementa bai imopa. Ayä botö Mæmpo yowementa në aacä bai ingampa. ² Botö imote pönänäni tömänäni ii yowementa gädëmænto bai inänipa. Æcänö wii botö ëmiñængä bai cæda tömengä iñömö gädëmænto ömæcato bai ingampa. Botö Mæmpo gädëmænto ömæcato bai iñongante wangö topænte bai cædinque tömengä ingante wido cæcampa. Æcänö botö ëmiñængä bai cæda guiquënë tömengä gädëmænto tömenca incato bai ingampa. Gädëmænto tömenca incato incæ godömenque waa pædinque nanguï incacæimpa, ante wææ topæ wææ topæ cædäni bai botö Mæmpo iñömö adobaï cæcampa. Botö në ëmiñængä wii eyepæ cæcä adinque tömengä ingante wadæ cæcampa. ³ Botö änö ante mïnitö imïnite botö apänedinö beyæ mïnitö mïmönë do mënongate quëwëmini imïnipa. ⁴ Mïnitö botö nempo ee quëwënömini incämïnipa. Ayä adobaï mïnitö botö imote cöwë entawente quëwënömini imïnipa. Gädëmænto yowementa adoyömö ibænte odæ yate bai pæte incate bapa. Edæ gädëmænto adotoque iñonte ædö cæte nämä cædinque incaquintoo. Mïnitö iñömö, Tömenca incate bai mönö nanguï cæcæimpa, ante cædinque botö nempo ee quëwenguënëmini imïnipa,” ante Itota apäñecantapa.

⁵ Ayä apänedinque, “Botö yowementa bai imopa. Mïnitö guiquënë gädëmænto bai imïnipa. Waocä botö nempo ee quëwënongå inte ayä botö imote cöwë entawënongå ingä ininque tömengä tömenca incate bai nanguï cæbaingampa. Wæætë edæ botö nempo quëwënämaï imïni ininque mïnitö tömää cædämaï imaïmïnipa töö. ⁶ Në botö nempo ee quëwënämaï ingä iñömö tömengä gädëmænto näni wido cædinto bai ingampa. Mäninto amïmö bayonte gæte mämö gongapamö ñö cædäni wo bæco bai cædinque tömengä ingante botö Mæmpo adobaï wido cæcä ingampa,” ante Itota apäñecantapa.

⁷ Ayä apänedinque, “Mïnitö guiquënë botö nempo ee quëwëninque botö angainö ante ee entawente quëwëmini ininque mïnitö quiëmë æncæte ante äinëmini incæ Wængonguï ingante apäñemïni inte tömengä wæætë pönongä äëmaïmïnipa. ⁸ Mïnitö nanguï pönï tömenca incate bai imïni inte, Mïnitö botö ëmiñæmïni imïnipa, ante edonque pönï ingæimpa. Mänömaï cæmïni ininque, Botö Mæmpo ñäö apäite ëmönongä ingampa, ante odömonte ingæimpa. ⁹ Botö Mæmpo iñömö botö imo waadete pönengä ingaingä bai botö adobaï mïnitö imïnite waadete pönëmo intabopa. Botö në waadete pönëmo iñömote mïnitö iñömö botö nempo ee ongödäni. ¹⁰ Botö Mæmpo në waadecä iñongante botö tömengä nänö wææ angainö ante ëñente cædimo inte tömengä nempo ee ongömopa. Mïnitö adobaï botö në waadete pönëmo iñömote mïnitö botö wææ angainö ante ëñente cæmïni ininque edæ botö nempo ee ongömïni imaïmïnipa,” ante Itota apäñecantapa.

¹¹ Ayä apänedinque, “Botö watapæ topämo ante mïnitö mïmönë entawëninque watapæ tocämïnipa, ante ayä, Mïni watapæ topämo eyepæ ingæimpa, ante botö mïnitö imïnite mäninö ante apäñetabopa. ¹² Botö wææ änö iñömö iimaï ante impa. Mïnitö imïnite botö waadete pönëninö bai mïnitö adobaï wacä ingä wacä ingä waadete pönëedäni. ¹³ Æcänö nänö æmigoidi beyæ ante, Botö Ao äninque nämä incæ tömënäni beyæ ante wænguïmo, ante cæcä iñömö tömengä nänö waadete pönëmämo wii waodäni tömänäni waadete pönëmämo bai impa. Tömengä iñömö edæ godömenque nanguï waadete pönengä ingampa. ¹⁴ Mïnitö botö wææ angainö ëñente cæmïni ininque botö guidëmïni imaïmïnipa. ¹⁵ Mïnitö botö imo në cædömini imïnipa, ante botö mïnitö imïnite godömenque apänedämaï imopa. Edæ awënë ingante në cæcä iñömö, Awënë æbänö cæcäa, ante ëñënämaingä ingampa. Wæætë edæ botö Mæmpo nänö angainö ante botö ëñëninö tömänö ante mïnitö imïnite apäñebo ëñëmïni beyæ botö, Mïnitö botö guidëmïni imïnipa, ante apäñedimo imopa. ¹⁶ Mïnitö wii botö imote apænte ænimïni imïnipa. Wæætë botö iñömö, Mïnitö botö ëmiñæmïni inömini inte tömenca nanguï incate bai nanguï cæcämïnipa, ante mïnitö imïnite apænte ænimö imopa. Mïnitö

botö emiñämīni inōmīni inte cōwē cāmīni īinque mīnitō quiēmē ante botö emōwo beyenque apānemīni ēñēnque Mæmpocā iñōmō do pōnongā æncæminimpa. ¹⁷ Botö wææ änō iñōmō iīmaī ante impa. Mīnitō wacā ingā wacā ingā waadete pōnēdāni,” ante Itota apānegacāimpa.

Inguipogaque nē quēwēnāni Itotaidi inānite nāni pīimāmo

¹⁸ Mānōmainō ante apānedinque Itota godōmenque iīmaī ante apānecantapa. “Inguipogaque nē quēwēnāni iñōmō mīnitō imīnite pīināni adinque mīnitō guiñēnāmaī inte edæ, Itota ingante do pīingadānimpa, ante pōnēmīni imīnipa. ¹⁹ Waodāni nē inguipogaque quēwēnāni nāni cabo wacā ingā wacā ingā waadete pōnēnāni inānipa. Mīnitō inguipogaque nāni quēwēncabo tōnō adomīni imīni baī tōmēnāni mīnitō imīnite adobaī waadete pōnencādōnānimpa. Wæætē mīnitō inguipoga nāni quēwēncabo tōnō adomīni ināmaī imīnipa. Iñæmpa wēēñēdē mīnitō inguipoga quēwēñōmīnite botö do mīnitō imīnite apænte æntabopa. Mānōmaī beyæ nē inguipogaque quēwēnāni iñōmō mīnitō imīnite pīināni inānipa. ²⁰ Botö änō ante mīnitō imīnite, Æbānō apāneboo, ante ñōwo wæætē pōnēdāni. ‘Awēñē ñænængā inongā iñongante tōmengā ingante nē cæcā iñōmō wīi godōmenque ñænængā ingampa.’ Waodāni botö imote pīināni wæwēmo baī mīnitō imīnite adobaī pīināni wæwēmīni incæminimpa. Botö odōmonte apānegainō ante ēñente cædāni baī mīnitō odōmonte apānedō ante adobaī ēñente cæcādānimpa. ²¹ Mīnitō botö quimīni iñōmīnite edæ botö emōwo beyenque iīnāni, Botö imote nē da pōnongaingā, Æbānō ingāā, ante ēñēnāmaī ināni inte mānōmaī edæ cæquināni inānipa,” ante Itota apānecantapa.

²² Ayæ apānedinque, “Botö tōmēnāni inānite wīi ponte apānebo baī tōmēnāni nāni wentamō mongænguimāmo mongænāmaī incādōnānimpa. Ñōwo iñōmō, Botö apānebo nē ēñēnāni inte tōmēnāni nāni wentamō mongæmāmo do mongænānipa. Iñæmpa Itota apānecā ēñēnāmaī imōnipa, ante ædō cæte anguīnāni. ²³ Botö imote nē pīingā iñōmō tōmengā adobaī botö Mæmpocā ingante pīingā ingampa. ²⁴ Wacā, Botö bamōnengæ botö cæbaī adobaī cæcā iñōmō cōwē dæ angampa. Inique botö wīi tōmēnāni weca bamōnengæ cæbo baī tōmēnāni nāni wentamō mongænguimāmo mongænāmaī incādōnānimpa. Incæte, Botö æbānō cæboo, ante do adāni incæ tōmēnāni botö imote pīinique botö Mæmpo ingante adobaī pīinānitapa. ²⁵ Dodāni nāni wææ yewæmongainta yewæmōninque iīmaī ante nāni apānegainō baī ñōwodāni nāni cædō beyæ edæ iīnque batimpa. ‘Botö imote oñonque pīinānitapa,’ ante yewæmongadānimpa,” ante Itota apānecantapa.

²⁶ Ayæ apānedinque, “Botö edæ botö Mæmpo weca ocæ emænte gote ate mīnitō beyæ ante mīnitō tōnō godongāmæ cæquingā ingante da pōnoncæboimpa. Māningā iñōmō Wængonguī Tæiyæ Waēmō Öñowoca inongā inte edæ, Æbānō nāwangā i, ante apānecā ēñencæminimpa. Tōmengā botö Mæmpo weca quēwente ponguingā ingampa. Pōninque tōmengā, Botö æbānō cæboo, ante apānecā ēñencæminimpa. ²⁷ Mīnitō adobaī wēēñēdē botö mā cæyedē do botö miñæ godimīni imīni inte edæ, Botö æbānō cæboo, ante apānequēñēmīni imīnipa,” ante Itota tōmengā nānō nē emiñænāni inānite apānegacāimpa.

16

¹ Godōmenque apānedinque Itota iīmaī apānecantapa. “Mīnitō oda cædāmaī tæi gongænte ongoncæminimpa, ante cædinque botö mīnitō imīnite māninō ante tōmānō apānetabopa. ² Mīnitō odōmōincōnē go guiyōmīnite wadāni, Mōnitō tōnō godongāmæ ongōnāmaī iedāni, ante mīnitō imīnite tatodōnāni gocæminimpa. Wīi māninonque cæquinānimpa. Wæætē iīncayæ ate æcāmenque mīnitō imīnite nē wænonguīna ina iñōmō tōmengā, Botö Wængonguī nānō cædō ante cæbopa, ante pōnencæcāimpa. ³ Botö Mæmpo ingante wīi adinque pōnēnāmaī ināni inte ayæ botö imote adāmaī inte baī pōnēnāmaī ināni iñōmō tōmēnāni iñōmō mīnitō imīnite māninō cæquināni inānipa. ⁴ Edæ māniōnæ bayonte mīnitō, Botö wææ angainō ante æbānō āmoo, ante wæætē

pönencæminimpa, ante botö mīnitö imīnite mäninö ante do apænetabopa,” ante Itota apænegacäimpa.

Wængongui Tæiyæ Waëmö Önöwoca nänö cædö

Ayæ godömenque apænedinque Itota iimaï apænecantapa. “Mīnitö tönö wëenënedë godongämæ ongömo beyæ botö mäninö ante mäninëdë apænedämaï intabopa. ⁵ Botö imo në da pönongaingä weca botö ñöwo pönï ocæ emænte goquimo incæte, Bitö æyömönö goquimi, ante mīnitö tömämīni botö imote änämaï imīnīpa. ⁶ Botö mäninö ämo beyæ mīnitö nanguï pönï wæwëmīni imīnīpa. ⁷ Incæte botö mīnitö imīnite näwangä ämopa. Mīnitö beyæ waa ingæimpa, ante botö goquimo imopa. Botö wadæ godämaï imo bai mīnitö tönö godongämæ në cæquingä iñömö mīnitö weca pönämaï incædongäimpa. Wæætë edæ cöwë goquimo inte godinque botö tömengä ingante mīnitö weca da pönömo ponguingä ingampa. ⁸ Pöninque Wængongui Tæiyæ Waëmö Önöwoca cæcä beyænque inguipogaque quëwënäni, Mönö wënæ wënæ cædömö inte wentamö mongæmö awædö, ante wæcædänimpa. Ayæ tömengä cæcä beyænque, Wængongui weca æcänö nö cæte quëwëna ina, ante ëñencædänimpa. Ayæ Wængongui apænte ante pancæcäimpa, ante adobai ëñencædänimpa. ⁹ Edæ botö imote nani pönënämaï inö beyænque inguipogaque quëwënäni iñömö edæ, Mönö wënæ wënæ cædonque ante cædinque pönënämaï imompa, ante wæcædänimpa, ante adocä cæcæcäimpa. ¹⁰ Ayæ edæ, Botö iñömö botö Mæmpo weca gote quëwëñömote mīnitö botö imote adämaï inguimīni imīnīpa. Ininque botö Mæmpo weca gote quëwëmo beyæ Wængongui Tæiyæ Waëmö Önöwoca incæ, Æbänö nö cæte quëwënguï, ante inguipogaque quëwënäni inänite odömonte apænecä ëñencædänimpa. ¹¹ Ayæ inguipogaque quëwënäni awënë iñongante wënæ ingante Wængongui, Botö pancæboimpa, ante do apænte angacäimpa, ante Wængongui Tæiyæ Waëmö Önöwoca godö odömonte apænecä beyænque ëñencædänimpa,” ante Itota apænecantapa.

¹² Ayæ apænedinque, “Botö mīnitö imīnite nanguï ayæ apæneinente wæbo incæte mīnitö ñöwo ganca ædö cæte ëñenguimīni. ¹³ Wængongui Tæiyæ Waëmö Önöwoca pongä ate tömengä iñömö, Æbänö näwangä impa, ante tömänö ante mīnitö imīnite odömonte apænecä ëñencæminimpa. Adocä, Æbänö apænequimoo, ante wīi nämä pönëninque apænecæcäimpa. Wæætë Wængongui tömengä ingante angä nänö ëñëninö ante Wængongui Önöwoca iñömö mäninonque ante mīnitö imīnite odömonte apænecä ëñencæminimpa. Ayæ, İincayæ ate æbänö baquï, ante tömengä mīnitö imīnite apænecä ëñencæminimpa. ¹⁴ Botö æbänö ñäö apäite emönömo imopa, ante edonque pönï bacæimpa, ante cædinque tömengä iñömö botö entawënö ante mīnitö imīnite odömonte apænecä ëñencæminimpa. ¹⁵ Botö Mæmpo nänö ëadoncoo iñömö edæ tömancoo botö quincöo impa. Mänömaï beyæ iimaï apænetabopa. Tömëmo entawencöo ante Wængongui Önöwoca iñömö mīnitö imīnite odömonte apænecä ëñencæminimpa, ante apænetabopa,” angantapa.

¹⁶ “Ayæ wantæ ate mīnitö botö imote adämaï inguimīni imīnīpa. Ayæ ate wantæyö iñonte botö imote wæætë acæminimpa,” ante Itota apænegacäimpa.

Mīni wæwëmämö incæ wæætë mīni toquinque bacæimpa

¹⁷ Tömengä emiñænäni pancädäniya nämanque godongämæ apænedinque, —Mäninö äninque tömengä, Mīnitö wantæ ate botö imote adämaï inguimīni imīnīpa, ante æbänö ancæte ante apænecää, ante wædänitapa. Ayæ, Wantæ iñonte mīnitö botö imote wæætë acæminimpa, ante ayæ, Botö Mæmpo weca gote quëwëmo beyæ impa, ante Itota apænecä awædö, ante apænedänitapa. ¹⁸ Tömënäni wæætë wæætë, Mäninö tömengä, Wantæyö, ante nänö änö iñömö edæ æbänö ante apænecää, ante wædänitapa. Tömengä æbänö ancæte ante apænecää, ante ëñënämaï imönīpa, ante wædänitapa.

¹⁹ Tömënäni mäninö ante pönëninque botö imote ëñencæte ante äinënäni inänīpa, ante wædinque Itota tömënäni inänite,

—Wantæ ate mīnitō botō imote adāmaī inguimīni imīnīpa, ante botō änō ante ayæ, Wantæyō iñonte mīnitō botō imote wæætē acæmīnīmpa, ante botō æbänō ämoō, ante mīnitō nāmanque godongāmæ tedemīnitawo. ²⁰ Mīnitō imīnite nāwangä ämopa. Inguipogaque quëwënāni iñömō watapæ toyönāni mīnitō caate wæquimīni inte Ca ca wæcæmīnīmpa. Mīnitō wæwenguimīni imīnīpa. Incæte mīni wæwëmāmo incæ mīni toquinque bacæimpa. ²¹ Onquiyængä iñömō tömengä wëñæ ëñacæ cæyedē nangui nantate wæcä inte wæwengä bacä incæte tömengä wëñæ ëñacä adinque tömengä, Botō wë ëñacä ingampa, ante watapæ tote beyæ tömengä nänō wædīnō ante edæ pönēnāmaī ingampa. ²² Mīnitō tömengä bai adobai imīnīpa. Nöwoyedē mīni caate wæyedē impa. Incæte botō wæætē mīnitō imīnite aquīmo imopa. Mänömaī beyæ mīnitō watapæ tocæmīnīmpa. Mäniñedē, Mīnitō todāmaī incæmīnīmpa, ante æcāmenque incæ wææ cædāmaī incæcāimpa.

²³ Godömenque apænedinque Itota, “Mäniñedē mīnitō botō imote, Æbänō i, ante ëñencæte ante godömenque änāmaī incæmīnīmpa. Mīnitō imīnite nāwangä ämopa. Botō Mæmpo ingante mīnitō quiëmē æncæte ante botō ëmöwo ante apæneyöminī tömengä iñömō do pönongä æncæmīnīmpa. ²⁴ Nöwo ganca mīnitō quiëmē æncæte ante botō ëmöwo ante apænedāmaī inīmīni imīnīpa. Nöwo iñömō edæ, Pönömi æmönīe, ante Wængonguī ingante apæneedāni. Apænemīni ëñëninque tömengä pönongä æninque mīnitō eyepæ pönī mīni watapæ toquinque ænguimīni incæmīnīmpa,” ante Itota apænegacāimpa.

Itota nē tæi ëmönongä ingampa

²⁵ Mänömainō ante apænedinque Itota iīmaī apænecantapa. “Mīnitō imīnite inguipoga quëwënāni nāni cæbainō ante odömonte apænedīmo incæte botō wantæyō baquionæ iñque bayonte mänömainō ante godömenque odömonte apænedāmaī incæboimpa. Wæætē botō tömëmo Mæmpo ingantedō ante apænedinque mīnitō imīnite edonque pönī apæneceboimpa. ²⁶ Mäniönæ mīnitō botō Mæmpo ingante botō ëmöwo beyænque apænequimīni imīnīpa. Inñque botō, Mīnitō beyæ ante botō Mæmpo ingante apænequīmo imopa, ante mänömaī beyæ botō änāmaī imopa. ²⁷ Edæ botō Mæmpo incæ mīnitō imīnite waadete pönengä ingampa. Botō imo waadete pönëninque mīnitō iñömō edæ, Wængonguī weca quëwëninque Itota pongaingä ingampa, ante pönënimīni beyæ botō Mæmpo adobai mīnitō imīnite waadete pönengä ingampa. ²⁸ Botō edæ Mæmpocä weca quëwente inguipoga iñömō pönīmo inte nōwo pönī inguipoga quëwëninque wadæ godinque Mæmpocä weca ocæ ëmænte goquīmo imopa,” ante Itota apænecantapa.

²⁹ Tömengä ëmiñænāni,

—Nöwo inguipoga quëwënāni nāni cæbainō ante odömonte apænedāmaī inte bitō edonque pönī apænebi ëñëmönīpa. ³⁰ Bitō tömänō ante ëñëmi imīpa, ante nōwo ëñëmönīpa. Inñque mönitō, Æbänō i, ante ëñencæte ante bitō imite änāmaī iñömönī bitō iñömō do nē ëñëmi imīpa. Mänömaī beyæ mönitō, Bitō Wængonguī weca quëwente pönīmi inte nē ëñëmi imīpa, ante do pönëmönī imönīpa.

³¹ Ante äñönāni Itota wæætē,

—Nöwo tæcæ pönëminī imīnitawo. ³² Wantæyō bayedē iñömō edæ nōwo pönī batimpa. Mäniñedē mīnitō botō imote ëmö cæte panguimæ panguimæ wodii winöninque tömëmīni oncönë go guiquimīni imīnīpa. Botō imo adoboque ëmö cæte gomīni incæte botō iñæmpa wīi adoboque ongömopa. Edæ botō Mæmpo botō tönō godongāmæ ongongampa. ³³ Mīnitō iñömō botō nempo quëwëmīni inte gänë pönente quëwencæmīnīmpa, ante cædinque botō mäninō ante mīnitō imīnite apænetabopa. Ii inguipoga quëwëninque mīnitō caate wæcæmīnīmpa. Incæte mīni wæwenguimāmo ante guñënāmaī iedāni. Edæ inguipogaque ante nāni wënæ wënæ cædönō ante Baa äninque botō godömenque tæi ëmönömo inte nē gänä cægaimo imopa. Mänömainō ante Itota tömengä nänō ëmiñænāni inānite iñque apænecä ëñengadānīmpa.

17

Itota Mæmpo ingante mönö beyæ ante apænecampa

¹ Itota mänömainö ante iinque apænedinque öönæde æmö adinque iimaï apænecantapa. “Mæmpo ëñëmi. Bitö, Æbänö baquïi, ante bitö angainö bai do batimpa. Botö edæ, Bitö Wëmo inömo inömete bitö pönö cæbi ate botö ñäö apäite bai botö ëmönö inömö edonque pönï bacæimpa, ante apænebopa. Mänömaï cæbi adinque botö wæætë bitö beyæ pönö cæbo ate bitö ñäö ëmömämo edonque pönï bacæimpa. ² Bitö pædæ pönömi botö në ængainäni inänite botö cöwë wantæpiyæ nani quëwenguinö ante godömo æncædänimpa, ante bitö botö tönö godongämæ cæbi beyænque botö waodäni tömänäni inänite në ämo batabopa. ³ Waodäni cöwë wantæpiyæ nani wænämaï quëwenguinö ante iimaï impa. Mæmpo, bitö adobique näwä Wængongui inömi inömete tömänäni bitö imite ate bai pönencædänimpa. Ayæ botö Itota Coditobo bitö në da pönongaïmo inömete do adinque tömänäni pönencædänimpa. Tömänäni mänömaï nani pönëhö beyænque edæ cöwë wantæpiyæ nani wænämaï quëwenguimämo edæ do ëadänipa,” ante Itota apænecantapa.

⁴ Ayæ Mæmpo ingante godömenque apænedinque, “Bitö, Iimaï cæe, ante bitö angainö ante botö inguipoga quëwëninque do iinque cæbo beyæ bitö ñäö ëmömämo edonque pönï bagatimpa. ⁵ Wëëñëhedë pönï inguipoga badönämaï inhedë bitö weca ongöninque botö ñäö ëmongaïmo inte ñöwo bitö weca ocæ ëmænte pömo adinque bitö pönö cæbi ate botö adobo ñäö apäite bai ëmömo ate edæ edonque pönï acæimpa,” Mæmpo ingante apænecantapa.

⁶ Ayæ, “Inguipoga quëwënanäni bitö quinäni inänipa, ante bitö pædæ pönömi æninque botö wæætë, Wængongui æcänö ingäa, ante tömänäni inänite odömömo ëñënanitapa. Adodäni bitö quinäni inönänite bitö tömänäni inänite pædæ pönömi æntabopa. Tömänäni bitö angainö ante ëñente cædinäni inänipa. ⁷ Bitö pönömi æninque botö ëwocagaincoo ante inänäni inömö edæ, Mänincoo tömancoo edæ Mæmpocä pönongä æninque Itota ëwocacampa, ante ñöwo do ëñënanäni. ⁸ Edæ Mæmpo bitö pönö apænebi botö ëñente ængainö ante botö adodö ante edæ tömänäni inänite godö apænebo ëñëninque tömänäni do ænanitapa. Botö bitö weca quëwente pongaïmo imopa, ante ëñëninque tömänäni ædämö ëñënanitapa. Ayæ, Bitö botö imote da pönömi në pongaïmo imopa, ante pönënanitapa,” ante Itota Mæmpocä ingante apænecantapa.

⁹ Ayæ, “Mæmpo, botö tömänäni beyæ ante bitö imite apænebopa. Botö wii inguipogaquë quëwënanäni beyæ ante apænebopa. Wæætë edæ, Bitö në pædæ pönömi botö ængainäni inömö edæ bitö quinäni inänipa, ante botö tömänäni beyæ ante bitö imite apænebopa. ¹⁰ Botö quinäni tömänäni bitö quinäni inänipa. Ayæ bitö quinäni tömänäni botö quinäni adobai inänipa. Tömänäni cædäni beyænque botö ñäö ëmömämo edonque pönï batimpa.”

¹¹ Ante apænedinque Itota godömenque apænecantapa. “Botö inguipoga inömö godömenque ongönämaï incæboimpa. Wæætë bitö weca ocæ ëmænte ponguïmo imopa. Botö ëmiñänäni guiquënë inguipoga inömö ayæ ongönäni inänipa. Mæmpo bitö në Tæiyæ Waëmö inömi inte ëñëmi. Bitö ëmöwo bitö pönö pemongaïwo beyænque botö tæi piñænte në ämo imopa. Ininque mönatö äawocaque bai ëwocate quëwëmöna bai mäninäni adobai äawocaque bai ëwocate quëwencædänimpa, ante cædinque bitö tæi piñæmi inte tömänäni inänite wææ aacæbiimpa, ante bitö imite apænebopa. ¹² Mäninäni weca botö quëwëhedë botö inömö bitö ëmöwo bitö pönö pemongaïwo beyænque botö tömänäni inänite wææ aatabopa. Ayæ, Wë womönämaï incædänimpa, ante adodäni inänite wææ gampotabopa. Ininque tömänäni tömänäni wë womönämaï inänipa. Önonque adocanique inömö æmäwo wë womonguëngä incæ tömengä inömö edæ Wængongui angä ëñente nani yewæmongainö bai ñöwo iinque baquinque ante edæ æmäwo wë womongantapa,” ante Itota Mæmpocä ingante apænecantapa.

¹³ Ayæ, “Botö ñöwo bitö weca ocæ ëmænte ponguïmo imopa. Tömänäni botö watapæ topämo tömämämo entawëninque quëwencædänimpa, ante botö mäninö ante

ingui-poga ayæ quëwëñedë apænebo ïmopa. ¹⁴ Mæmpo, bitö angainö ante botö tömënäni inänite godö apænebo ëñëñänitapa. Botö ingui-pogaque näni quëwencabo tönö adobo inämaï ïmo bai tömënäni edæ adobai ingui-pogaque näni quëwencabo tönö adodäni inämaï inäni adinque ingui-pogaque quëwënäni wæætë tömënäni inänite pïñänitapa. ¹⁵ Mæmpo ëñëmi. Bitö botö ëmiñænäni inänite, Minitö ingui-poga iñömö ayæ quëwënämaï incæminimpa, ante ænte mäobi gocädänimpa, ante botö bitö ïmite apænedämaï ïmopa. Wæætë, Wënæ awënë në wiwa cædongä iñömö tömënäni inänite, Oda cæcädänimpa, ante cæyongante bitö wææ aabi ate tömënäni wæætë oda cædämaï incädänimpa, ante bitö ïmite apænebopa. ¹⁶ Botö ingui-pogaque näni quëwencabo tönö adobo inämaï ïmo bai tömënäni edæ adobai ingui-pogaque näni quëwencabo tönö adodäni inämaï inänipa. ¹⁷ Bitö änö iñömö edæ näwangä ante impa. Ìninqe bitö godö cæbi ate näwangä bitö änö beyænque tömënäni iñömö tömëmi cædonque ante cædinque tæiyæ waëmö ëwocate quëwënäni incädänimpa, ante bitö ïmite apænebopa. ¹⁸ Bitö botö ïmote ingui-poga iñömö bitö da pönömi pömo bai botö adobai tömënäni inänite ingui-poga quëwënäni weca da godömo godänitapa. ¹⁹ Tömënäni iñömö bitö cædonque ante cædinque tæiyæ waëmö ëwocate quëwënäni incädänimpa, ante botö iñömö edæ bitö cædonque ante Ao äninque, Botö nämä incæ tömënäni beyæ ante wænguïmo ïmopa,” ante Itota apænecantapa.

²⁰ “Mæmpo ëñëmi. Botö wii botö ëmiñænänique beyæ ante bitö ïmite apænebopa. Wæætë tömënäni botö angainö ante apænedäni ëñente pönëninque wadäni në wede pönenguinäni iñönänite botö iinäni beyæ ante adobai bitö ïmite apænebopa. ²¹ Mæmpo, Bitö ïmite botö entawëmo ïmo bai ayæ botö bitö nempo quëwëmo ïmo bai mäninäni tömänäni adobai äawocaque bai ëwocate quëwëmaïnänipa, ante cæcæbiimpa, ante bitö ïmite apænebopa. Ayæ ingui-poga quëwënäni iñömö, Bitö botö ïmote da pönömi pongaïmo ïmopa, ante pönencädänimpa, ante cædinque bitö godö cæbi ate tömënäni mönatö nempo quëwencädänimpa, ante bitö ïmite apænebopa. ²² Bitö pönö cæbi beyænque botö ñäö bai entawëninque, Mönatö äawocaque bai ëwocate quëwëmöna bai tömënäni adobai äawocaque bai ëwocate quëwencädänimpa, ante botö iñömö bitö pönönimämo botö ñäö entawëmämo tömënäni inänite adopämo godömo ænte entawënänipa. ²³ Tömënäni äawocaque bai ëwocate quëwencädänimpa, ante tömënäni botö ïmote entawënänipa. Ayæ botö bitö ïmite entawëmo ïmopa. Tömënäni mänömaï äawocaque bai ëwocädäni adinque ingui-poga quëwënäni iñömö, Bitö botö ïmote në da pönömi pongaïmo ïmopa, ante ëñencädänimpa, ante apænebopa. Ayæ botö ïmote waadete pönengaïmi ïmi bai bitö tömënäni inänite adobai waadete pönengaïmi ïmipa, ante ëñencädänimpa, ante apænebopa,” ante Mæmpocä ingante Itota apænecantapa.

²⁴ Ayæ, “Mæmpo, Bitö pædæ pönömi botö në ængainäni iñömö botö ñäö ëmömämo acädänimpa, ante botö, Tömënäni botö quëwëñömö adoyömö quëwencädänimpa, ante aïnente wæbopa. Wëenëñedë pönï ingui-poga badönämaï iñedë bitö iñömö edæ botö ïmote waadete pönëninque botö ñäö ëmömämo pönömi botö ængaïmämo tömënäni adopämo acädänimpa, ante aïnente wæbopa. ²⁵ Mæmpo në nö cædömi ïmi ëñëmi. Ingui-pogaque quëwënäni bitö ïmite wii adinque pönënämaï inäni incæte botö iñömö edæ bitö ïmite do ate pönëmo ïmopa. Botö ëmiñænäni iñömö, Bitö botö ïmote da pönömi në pongaïmo ïmopa, ante do ëñëñänitapa. ²⁶ Botö cæbo beyænque mäninäni iñömö, Bitö ïmite ate bai pönëñänitapa. Botö ïmote bitö waadete pönënö ante adodö waadete pönënö tömënäni mimönë entawente quëwencädänimpa, ante ayæ, Tömënäni botö ïmote entawencädänimpa, ante botö ayæ cæbo beyænque tömënäni iñömö, Bitö ïmite ate bai pönencädänimpa,” ante Itota Mæmpo ingante iinque apænegacäimpa.

¹ Wængonguï ingante iinque apænedinque Itota tömengä ëmiñænäni tönö wadæ godinque Quedodöo biyönæ æmæ wedeca godänitapa. Æmæ wedeca odibowæncodë nãni ancodë iinque Itota tömengä ëmiñænäni tönö mänincodë pö guiidänitapa. ² Itota ingante nê odömonguingä Codaa iñömö Itota tömengä ëmiñænäni tönö mänincodë wantæ iñö wantæ iñö gote ongönäni iinque Itota ingante nê odömonguingä Codaa iñömö mänincodë do adingä inongäimpa. ³ Iinque tontadoidi adocaboque inänite æninque Codaa iñömö edæ täno beyænte adocodë pongantapa. Ayæ, Wængonguï qui, ante nê godönäni ñænænäni tönö Paditeoidi nãni wææ wänönäni inänite Codaa nempo godönäni æningä inte tömengä tömënäni inänite tontadoidi tönö ænte mä-mongä pönänitapa. Pöninque tömënäni gonga ticaïnë næænte gongapæncade ticaïnë nææninque yaëmë næænte Codaa miñæ pönänitapa. ⁴ Itota nämä ante, Æbänö bate wæquimoo, ante tömää ëñëongä inte awænë tao godinque tömënäni inänite,

—Æcänö ingante ante diqui diqui minte pöminii.

⁵ Ante ãñongä tömënäni wæætë,

—Itota Näatadeta nê quëwëningä ingante ämönipa.

Änäni ëñëninque,

—Botö tömëmo imopa, ante Itota apænecantapa.

Ayæ nê odömonguingä Codaa iñömö tömënäni weca a ongönongäimpa. ⁶ Itota iñömö, “Botö tömëmo imopa,” ante ãñongä tömënäni gä godinque onguipoga tæ go wæænänitapa. ⁷ Tæ go wæænäni adinque tömengä adodö,

—Æcänö ingante ante diqui diqui minte pöminii.

Ante ãñongä tömënäni wæætë,

—Itota Näatadeta quëwëningä ingante ämönipa.

⁸ Änäni ëñëninque Itota wæætë,

—Botö tömëmo imopa, ante do antabopa. Minitö iñömö botö imote ante diqui diqui minte pömini bai mäninäni inänite bæi ongönämaï iedäni.

⁹ Itota Mæmpocä ingante do apænedinque, “Bitö edæ pönömi botö ængainäni inänite wææ aabo beyæ adocanque incæ wë womönämaï inänitapa,” ante nänö angainö bai ñöwo iinque bacäimpa, ante mänömaï angantapa. ¹⁰ Timönö Pegodo iñömö nê yaëmë næængä inte pædæ guipote yaëmë æninque, Wængonguï qui, ante nê godongä ñænængä pönä inongä ingante nê cæcä ingante tæi päninque tömëmonca inö wangö tamoncacantapa. Pegodo nänö nê wangö tamoncadingä ëmowo Mäadoco ëmongä inongäimpa. ¹¹ Itota wæætë Pegodo ingante,

—Bitö yaëmë adodö da wëe, äninque, Botö wæwenguimämo ante botö Mæmpo pönongä ænimö inte wæwenguënëmo imopa, angacäimpa.

Itota ingante bæi ongöninque Änato weca ænte godäni

(Mäateo 26.57-58; Mäadoco 14.53-54; Odoca 22.54)

¹² Ayæ odömäno tontadoidi tönö tömënäni awënë ayæ oodeoidi awënëidi tönö Itota ingante bæi ongöninque ænänitapa. Æninque tömengä ingante goto wimpote cädänitapa. ¹³ Ayæ adodäni Änato nänöwäa Caiapato weca Itota ingante ænte mäo godänitapa. Edæ Caiapato iñömö, Wængonguï qui, ante nê godongä ñænængä pönä inongä mäniï wadepo iñonte inongäimpa. ¹⁴ Caiapato wëenënedë oodeoidi awënëidi inänite iimaï ante nê äñongä inongäimpa. Mönö waocabo beyæ ante adocanque onguñængä wængä iinque waa imaimpa.

Pegodo incæ, Dicæ abogaa, angampa

(Mäateo 26.69-70; Mäadoco 14.66-68; Odoca 22.55-57)

¹⁵ Itota nänö ëmiñængä wacä tönö Timönö Pegodo iñömö tömëna iñömö Itota ingante tee empo godatapa. Mäningä iñömö Itota nänö ëmiñængä iñömö, Wængonguï qui, ante nê godongä ñænængä pönä nänö nê adingä inongäimpa. Iinque Itota tönö pöninque tömengä Wængonguï ingante nê godongä ñænængä pönä inongä oncö yacömöñäa iñömö pö guicantapa. ¹⁶ Pegodo guiquënë odemö yabæ inö a ongönongäimpa. Wacä

Itota miñäe në gocä iñömö, Wængongui qui, ante në godongä ñænængä pönï inongä nänö në adingä iñömö tömengä ocä emænte pöninque baquecä odemö në wææ aacä ingante apænecantapa. Pegodo ingante ämi guicæe, angä eñëninque baquecä wi ænecä ate tömengä Pegodo ingante ænte manguicä guicantapa. ¹⁷ Manguicä guiyongä baquecä odemö në wææ aacä iñömö Pegodo ingante,

—Bitö adobaï mäningä onguiñængä nänö në emiñænömi imipa töö.

Äñongä tömengä wæætë,

—Botö wabo imopa, angantapa.

¹⁸ Yogueite ingatimpa. Ayæ në cædönäni tönö oodeoidi awënëidi wææ wänönäni gongapamö ootoqui, ante nani tadöni gäänë adiyæ ongonte ootodönänimpa. Pegodo adobaï tömënäni tönö godongämæ adiyæ ongonte ootocantapa.

Në godongä ñænængä Itota ingante angampa

(Mäateo 26.59-66; Mäadoco 14.55-64; Odoca 22.66-71)

¹⁹ Mäniñedë Änato iñömö, Wængongui qui, ante në godongä ñænængä pönï iñömö Itota ingante, Bitö në emiñænäni diyæ, ängongäimpa. Ayæ Itota nänö odömonte apænegaïnö ante, Æbänö i, ante tömengä ingante adobaï angantapa. ²⁰ Itota wæætë,

—Wodäni eñëñönänite botö edonque pönï apænebo eñëñänitapa. Botö cöwë mïnitö odömöincönë incæ Wængongui oncö ñænæncönë incæ oodeoidi tömänäni nani pöincönë pö guidinque odömonte apænebo eñëñänitapa. Botö cöwë awëmö apænedämaï intabopa. ²¹ Bitö botö imote, Æbänö i, ante quïnante ämii. Botö imote në eñëñänäni inänite ämi eñente apænedäni eñencæbiimpa. Edæ mäninäni ædæmö eñëñäni inänipa.

²² Mänömainö angä eñëninque wææ wänongä adocanque iñömö Itota gäänë ongöninque tömengä ingante tæi tamöninque apænecä,

—Wængongui qui, ante në godongä ñænængä pönï inongä ingante ædö cæte mänömaï ante wæætë anewëë töö.

²³ Ante äñongä Itota wæætë,

—Botö wænæ wænæ änimo imo baï bitö botö wænæ wænæ äninö ante, Æbänö i, ante apænebi eñëmoe. Wæætë edæ näwangä ante apænebo ininque bitö quïnante botö imote tæi tamömipææ, angantapa.

²⁴ Ayæ, Wængongui qui, ante në godongä ñænængä pönï Caiapato weca gocæcäimpa, ante Änato iñömö Itota ingante ayæ goto wimpoingä iñongante angä eñëninque tömengä ingante ænte gogadänimpa.

Pegodo incæ, Dicæ abogaa, wæætë angampa

(Mäateo 26.71-75; Mäadoco 14.69-72; Odoca 22.58-62)

²⁵ Timönö Pegodo ayæ adiyæ ootoyongante wadäni,

—Bitö tömengä emiñænömi adobaï imipa töö.

Änäni eñëninque tömengä,

—Wabo imopa, angantapa.

²⁶ Wængongui qui, ante në godongä ñænængä pönï inongä ingante në cædäni iñönänite adocanque iñömö Pegodo nänö në wangö tamoncadingä guidengä inongäimpa. Tömengä iñömö Pegodo ingante,

—Bitö tömengä miñäe odibowæncodë ongöñedë bitö imi atabopa. Bitö wiï imitawo.

²⁷ Ante äñongä Pegodo wæætë, Wabo imopa, ante tæcæ anewëñongä tawadiya dobæ pegatimpa.

Pidato weca Itota ongongä

(Mäateo 27.1-2; Mäadoco 15.1-5; Odoca 23.1-5)

²⁸ Tæcæ ñäö bayonte Itota ayæ Caiapato weca ongöñongante oodeoidi iñömö, Mönö tömengä ingante odömäno gobedönadodo awënë Pidato weca ænte gocæimpa, ante cædinque awënë oncö boyæ mäodäni gocantapa. Incæte tömënäni dodäni nani wææ angainö beyæ ante guiñente wædinque, Pidato oncönë guite baï mönitö mimö wentamö ewocamöni incædömönimpa. Iñæmpa mänömaï cæmöni ininque mönitö Patowa mönö

ææmæ cæyedē cænguī ædō cæte cænguīmōnii, ante wædinque guidāmaī inānitapa.

²⁹ Īninqe Pidato tōmēnāni weca oncō boyæ taodinqe tōmēnāni inānite,

—Īngā onguīñængā ĩñōmō quīnō wēnæ wēnæ cæcantawo.

³⁰ Āñongā tōmēnāni wæætē,

—Māningā wīi wēnæ wēnæ cæcā inte baī mōnitō tōmengā ingante wīi ænte māmō pædæ godōmōni æncædōmiimpa.

³¹ Ānāni ēñēninqe Pidato,

—Mīnitō tōmēmīni tōmengā ingante ænte godinqe mīni wææ yewæmongainō baī ante cædinque, Tōmengā ingante pangæimpa, ante apænte ædāni.

Āñongā oodeoidi awēnēidi,

—Īñæmpa mīnitō wææ āmīni ĩñōmīni mōnitō cōwē tacamōni wænāni mōni cægainō baī ædō cæte æcāmenque ingante wænōmōni wænguingāā, ante wædānitapa.

³² Odōmānoidi māniñedē wēnæ wēnæ cædāni inānite awāa tōō godōmænte timpodinqe wææ tīwadinque godō wænōnāni ĩnōnānimpa. Īninqe odōmānoidi inānite pædæ godōninqe oodeoidi wæætē Itota, Æbānō cædāni wænguīmoo, ante do nānō angainō baī ñōwo ĩninqe baquinque cædānitapa. ³³ Māñinō ānāni ēñēninqe Pidato wæætē oncōnē ñænæncōnē guidinqe Itota ingante āñecā pongā adinqe, Pidato,

—Bitō oodeoidi Awēnē Odeyebi ĩmitawo.

³⁴ Angā ēñente Itota wæætē,

—Bitō nāmā pōnēninqe apænebitawo. Wabānō wacā botō ĩmotedō ante bitō ĩmite apænecā ēñēmitawo.

³⁵ Ante āñongā Pidato,

—Botō dicæ oodeobo ĩmogaa. Tōmēmi guidēnāni tōnō Wængonguī quī, ante nē godōnāni ñænænāni ĩñōmō bitō ĩmite māmō pædæ pōnōnāni æntabopa tōō. Bitō quīnō wēnæ wēnæ cæbitawo.

³⁶ Āñongante Itota wæætē apænedinqe,

—Wīi inguipoga quēwēnāni ānāni beyæ botō Awēnē Odeyebō nē ingaīmo ĩmopa. Botō inguipoga quēwēnāni Awēnē Odeyebō inte nē āmo ĩmo baī botō nempo quēwēnāni ĩñōmō botō ĩmote, Bæi ongonte ænte godāmaī incædānimpa, ante wææ cædinque oodeoidi tōnō guēa wæætedō wæætē cæcædōnānimpa. Incæte wīi inguipoga quēwēnāni ānāni beyæ wæætē edæ wayōmō quēwengaīmo inte botō tōmēmo nāmā incæ Awēnē Odeyebō nē ingaīmo ĩmopa.

³⁷ Māñōmaīnō ante Itota apænecā ĩninqe Pidato,

—Īñæmpa Awēnē Odeyebi bitō ĩmitawo.

Āñongante Itota wæætē,

—Bitō tōmēmi ānō baī botō Awēnē Odeyebō ĩnōmoimpa. Nāwangā āmīpa. Botō ĩñōmō Wængonguī nānō angainō ante, Nāwangā ĩmpa, ante inguipoga quēwēnāni inānite apænecæte ante edæ māñī beyænque ante inguipoga ĩñōmō pō ēñagaīmo ĩmopa. Wængonguī nāwangā ante nānō angainō ante Ao ante ēñente nē cædāni ĩñōmō edæ tōmēnāni tōmānāni botō ĩmote nē ēñēnāni inānipa, angantapa.

³⁸ Āñongante Pidato,

—Æcāmē nāwangā angāā, angacāimpa.

Itota wæncæcāimpa, ānānipa

(Māateo 27.15-31; Māadoco 15.6-20; Odoca 23.13-25)

Pidato māñōmaī apænedinqe wæætē oodeoidi weca oncō boyæ taodinqe apænecantapa.

—Īngā quīnō wēnæ wēnæ cæcā ingampa, ante ēñēnāmaī ĩmopa. Īninqe botō dicæ tōmengā ingante apænte anguīmo ĩmogaa. ³⁹ Wadepo ĩñō wadepo ĩñō Patowa mīni ææmæ cæōnæ mīnitō, Ædānidō tee mōnete ongōnānīi, ante pōnēninqe adocanque ĩmōwo ante botō ĩmote apænedinqe, Īngā ingante ñimpo cæbi goqingā, ante cōwē āmīnipa. Īninqe adocanque ingante, Īngā ĩñōmō mīni apænedongā ingampa, ante botō

tömengä ingante ñimpo cæbo ate ænte gomini inöminimpa. Ìninqe ñöwo diyæ. Minitö, Oodeomöni Odeye ñhongante pönö ñimpo cæbi abæ tawænte goguinga, äminitawo.

⁴⁰ Äñongante tömënäni yedæ tededinque,

—Mäningä ingante dicæ ämöniyaa. Wæætë Badabato ingante ñimpo cæbi gocæe, ante tedewengadänimpa.

Badabato wëenëhedë wadäni tönö, Odömäno tæiyæ awënë ingante wido cæcæimpa, ante cædingä inongäimpa.

19

¹ Ayæ Pidato angä ate Itota ingante bæi ongonte mäo ämontaiya tæi tæi pänänitapa.

² Tontadoidi daa mongäemencä äninque que que cædinque, Awënë poganta, ante pönö da wencadänitapa. Awënë weocoo wëñacæbiimpa, ante badete tote bai cædinque Itota ingante opatawæ ëmoncoo pönö daga wëñadänitapa. ³ Daga wëñadinque tömënäni wæætë wæætë tömengä weca ponte äninque,

—Badogaa, bitö oodeo awënë odeyebi imipææ.

Ante badete todinque tömengä ingante tæi tamönänitapa.

⁴ Pidato tömënäni weca oncö boyæ adopoque ayæ tadinque oodeoidi inänite apænedinque,

—Ïngä ññömö æbänö cæcantawo, ante ëñencæte ante cæbo ate tömengä wënæ wënæ nänö cædö ante dicæ abogaa. Minitö mänömainö ante ëñencämimimpa, ante botö tömengä ingante minitö weca ænte mantabo tacä aedäni, angantapa.

⁵ Itota daa mongäemencä poganta encadinque opatawæ ëmoncoo mongænte tayongä Pidato tömënäni inänite,

—Ïngä onguïñængä ongongä aedäni.

⁶ Tömengä ingante adinque, Wængonguï quï, ante në godönäni ñænänäni tönö adodäni inänite në wææ wänönäni ññömö yedæ tedewëninque,

—Awæ ñænquedimæ cæte ämi wänönäni wængæe. Ämi wänönäni wængæe.

Ante ancaa änewënäni ëñëninque Pidato wæætë,

—Minitö ññæmpa tömengä ingante äninque awæ ñænquedimæ cæte wänömini wængæe. Botö guiquënë ñngä wënæ wënæ nänö cædö ante dicæ abogaa.

⁷ Pidato äñongä oodeoidi wæætë iimaï tedewënanitapa.

—Mönitö wææ yewæmongainö ante ëñente quëwëmöni imönipa. Ïngä ññömö edæ nämä ante edæ, Wængonguï Wëmo inömo imopa, ante cædinque edæ mäninö möni wææ yewæmongainö ante ëñënämaï cæcampa. Mänömaï ëñënämaï inte cæcä beyæ tömengä në wængüenengä ingampa.

⁸ Mänömainö änäni ëñëninque Pidato godömenque guïñente wædinque, ⁹ oncönë ñænæncönë adodö pö guidinque Itota ingante,

—Bitö ædönö quëwente pömi imii.

Ante äñongä Itota guiquënë pæ wëenecä. ¹⁰ Adinque Pidato tömengä ingante,

—Bitö quinante botö imo tededämaï imii. Botö nämä në tæi piñænte ämo inömo inte ämo ininque ñimpo cædäni gobaïmipa. Botö wadö ante ämo ininque bitö imite do awæ ñænquedimæ cæte wänönäni wëmaïmipa, ante ëñënämaï imitawo.

¹¹ Äñongante Itota wæætë,

—Wængonguï bitö tæi piñænte ämämo ante godönämaï ingä bai bitö tömëmi tæi ämi imi diyæ botö imote anguïmiyaa. Mänömaï beyæ bitö imite, Wänömi wæncæcäimpa, ante botö imote në pædæ pönöningä ññömö edæ godömenque wënæ wënæ cæcä ingampa, ante apænecantapa.

¹² Mänömainö angä ëñëninque Pidato, Æbänö ñimpo cæbo goquingäa, ante cædongäimpa. Cæyongä oodeoidi wæætë godömenque yedæ änönänimpa,

—Bitö mäningä ingante ñimpo cæbi bai bitö odömäno tæiyæ awënë Tetædo ämigo dicæ imiyaa. Æcämenque ññömö edæ, Botö awënë inömoimpa, ante në angä inte tömengä ññömö Tetædo ingante në piñongä ingampa.

¹³ Mäniñö äñäni eñëninge Pidato iñömö, Itota ingante ænte tao godingue awënë nänö apænte äimpaa gote tæ contacantapa. Pidato nänö tæ contayömö iñömö, Dicacoo ayadi bai näni caayömö impa, ante näni äñömö iningue ebedeo tededö, Gabata, näni äñömö inönimpa. ¹⁴ Patowa näni ææmæ cæyedë iingue bayö oodeoidi, ðimö ate guëmanguionæ inguimpa, ante mönö ðwoönæque cæcæimpa, ante näni cæönæ inönimpa. ðionæ wodo tæcæ bæcä bayonte Pidato oodeoidi inänite,

—ðingä iñömö minitö Odeye inongä ingampa.

¹⁵ Äñongante yedæ äninque tömënäni,

—Tömengä ingante wænömi wængæe. Tömengä ingante wænömi wængæe. Awäa timpote ämi wænönäni wængæe.

Ante ancaa änewëñönäni Pidato wæætë,

—Botö iñömö minitö Odeye iñongante awäa timpote ämo wænönäni wængæe, ante änewëminitawo.

Angä eñëninge Wængonguï quï, ante godönäni ðænænäni iñömö,

—Tetædoque incæ mönitö awënë odeye inongä apa cæbii, änewëñönänimpa.

¹⁶ Ancaa änewëñönäni Pidato, Awäa ämo timpote wænömöni wængæedäni, ante Itota ingante tontadoidi inänite pædæ godongä ængadänimpa. Ayæ tömënäni Itota ingante ænte gogadänimpa.

Itota ingante awäa timpodäni wængäimpa

(Mäateo 27.32-44; Mäadoco 15.21-32; Odoco 23.26-43)

¹⁷ Itota incæ tömengä timpoquiwæ äninque mongænte taodique “Ocatainö” mönö äñömö pongantapa. Mäniñömö ante ebedeo tededö, Godogota, näni äñömö impa.

¹⁸ Mäniñömö pöñongante tömënäni awæ ðænquedimæ cædinque tömengä ingante töö godonte timpodinque wææ tiwadinque ængæ gantidënäni ongongantapa. Ayæ wada inate tömengä weca æmatæ inö æmatæ inö mämö adobai cæte ængæ gantidënäni wægöñöna Itota tæcæguedë wægongä ingantapa. ¹⁹ Pidato angä yewæmöinta, Näni eñenguinta, ante yewæmonte äninque ðænquedimæ iwäa wo cædänitapa. “Itota Näatadeta quëwëningä oodeoidi Awënë Odeye inongä ingampa,” ante yewæmonte wo cæte ongongatimpa. ²⁰ Itota ingante näni timpodinö mö eyequei i iningue oodeoidi nanguï inäni tömënäni näni quëwëñömö ta pöninge Pidatoidi näni yewæmöninta adänitapa. Mäninta iñömö ebedeo tededö datii tededö guidiego tededö ante yewæmonte ingatimpa. ²¹ Oodeoidi beyæ ante, Wængonguï quï, ante në godönäni ðænænäni iñömö Pidato weca godingue tömengä ingante,

—Bitö, “Oodeoidi Awënë Odeye inongampa,” ante yewæmönämaï inguënë quëwëe. Wæætë tömengä nämä nänö angainö bai, “Botö oodeoidi Awënë Odeyebo inömoimpa, ante në änewëningä ingampa,” ante yewæmöe.

²² Ante änewëñönäni Pidato wæætë,

—Botö yewæmöninö ante yewæmönimo inte botö wæætë wadö ante yewæmönämaï incæboimpa.

²³ Tontadoidi iñömö tömengä ingante awäa timpote ængæ gantidënäni wægöñongä tömënäni tömengä wecoo ini äninque mencooga go mencooga cönöninge adocanque adocooque adocanque adocooque äninque tömänäni äñönänimpa. Täno mongæincoo guiquënë ayæ öñoncoopa. Mänincoo iñömö bæbængapaa badönämaï incoo tömancoo adocooque da wëñaque badöi inimpa. ²⁴ Adocooque wänä ðænämaï ingäimpa, ante adodäni godongämæ tededinque,

—Æcänö quınca nö ta adinque tömengä mänincoo æncæcäimpa, ante wææntodönänitapa.

Edæ Wængonguï angä eñente dodäni iimaï ante näni yewæmongainö bai ðwo iningue baquinque tontadoidi mänömaï cædänitapa. “Edæ botö wecoo ini ö äninque tömënäni näni caboque wacä ingä wacä ingä nënempodänitapa. Ayæ, Æcänö quınca nö ta adinque tömengä mänincoo æncæcäimpa, ante wææntodöninque äñänitapa,” ante näni yewæmongainö bai tontadoidi ðwo cædänitapa.

²⁵ Itota ingä nāni ængæ gantidēñömö tömengä wäänä tönö wäänä tönñācā nāna caya ayæ Codeopato nānōogængä Māadiya tönö wacā Māadiya Māagadadēnā māniññömö pōninque eyequei a ongōnānitapa. ²⁶ Itota iññömö tömengä wäänä inante acantapa. Ayæ botö tömengä miññæ nē godimo iññömö tömengä nānō nē waadebo inōmo inte tömēnā weca ongōmo adinque Itota tömengä wäänä inante,

—Badä ēñēmi. Māningä iññömö minō wengä bacæcäimpa.

²⁷ Äninqe tömengä ēmiññänimo iññomote,

—Botö ēmiññänimi ēñēmi, Māninā iññömö botö badä incæ bitö badä bacædäimpa, angacäimpa.

İninqe botö Itota nānō nē ēmiññänimo inte tömengä nānō änōñedē tāno ænte māmōmo pōninque tömengä wäänä iññömö botö oncōnē cōwē owodōnāimpa.

Itota incæ wængäimpa

(*Māateo 27.45-56; Māadoco 15.33-41; Odoca 23.44-49*)

²⁸ Quinō bacæimpa, ante ñōwo iinque batimpa, ante nē ēñēnongä inte Itota iññömö edæ, Wængonguī angä ēñente nāni yewæmongainō bai ñōwo iinque bacæimpa, ante cædinque,

—Botö gæwænte awædö, ante apænecantapa.

²⁹ Adoyömö biinōmæ nāni ämæ bai wædænque godonte nāni æñimæ owætadē engate ongö adinque tömēnāni dayömö bai æninqe mānimænē pædæ guidonte aa beyonte wēā tadonte æninqe iitopowænca nāni äwænca ongontoca goto wencadodinque Itota önōne pædæ æænō pæ mǎnānitapa. ³⁰ Pæ mǎññōnāni Itota oo guēmante bedinque,

—Ñōwo iinque batimpa.

Ante apænedinque tömengä ocabo ædæ wææncadinque tömengä önōwoca wadæ goyōwoca do wængäimpa.

Itota betagonta inō tontado boo tæñongä

³¹ İimö ate, Mönö guēmanguiönæ iññömö Patowa inguiönæ beyæ godömenque waa eönæpa, ante oodeoidi, Nōwoönæque cæcäimpa, ante nāni cæönæ inimpa. Oodeoidi awēñēidi, Awāa nē ongōnāni baö māniwāa guēmanguiönæ ongōnāmaī incædānimpā, ante Pidato weca godinque tömengä ingante, İināni nāni timpodiwāa nē ongōnāni quingæ wæncædānimpā, ante cædinque bitö tömēnāni önömēñē bamē ämi wadāni taa mǎññāni do wæncædānimpā. Ayæ tömēnāni baö o togænte pædæ wæænonte ämi æñānie, änānitapa. ³² Māniī beyæ tontadoidi pōninque Itota weca tāno nāni nē ængæ gantidēningä önömēñē bamē taa mǎninqe edæ ayæ nāni nē timpodinğä wængongä önömēñē bamē taa mǎññānitapa. ³³ Taa mǎninqe Itota weca pōninque tömengä do wængäi adinque tömengä önömēñē taa mǎññāmaī inōñānimpā.

³⁴ Wætēt tontado adocanque Itota betagonta inō boo tæññongä wepæ tönö æpæ guī gotimpa. ³⁵ Botö mǎññō bayonte nē adimo inte, Æbānō nāwangä batimpa, ante nō apænebopa. Ayæ, Botö änō ante nāwangä impa, ante do ēñēmopa. Minitö adobai ēñente pōnencæminimpā, ante apænebopa. ³⁶ Edæ, “Tömengä bamē adomenque incæ taa mænte wædāmaī incæcäimpa,” ante Wængonguī angä ēñente nāni yewæmongainō bai bacæimpa, ante mǎññōmaī batimpa. ³⁷ Ayæ edæ, “Wadāni nāni nē boo tæññongä ingante aquināni inānipa,” ante Wængonguī angä ēñente wataa nāni yewæmongainō bai iinque bacæimpa, ante mǎññōmaī batimpa.

Itota wodi baö inī māo daga wēñānipa

(*Māateo 27.57-61; Māadoco 15.42-47; Odoca 23.50-56*)

³⁸ Ayæ ate Adimatea quēwengä Ootee iññömö oodeoidi awēñēidi inānite guññente awædö, ante awēmö Itota ēmiññæningä inongäimpa. Tömengä iññömö Pidato Awēñē ingante, Itota wodi baö pōññomi ænte wēmoe, angantapa. Pidato Ao angä ēñēninqe Ootee do pōninque Itota wodi baö timpodiwāa ongōñongante o togænte pædæ wæænonte ængantapa. ³⁹ Ayæ Niicodemö wēñēñedē Itota weca woyowotæ ēñacæ nē pōningä iññömö Ootee miññæ pongantapa. Tömengä miidamö nāni änōmō nangui ti nāmō tönö

aadoemö nāni ānömö nanguī oguī wamö tönö adoyömö nāni wempo cædimö todëinta quido ganca ænte pongantapa. ⁴⁰ Ootee tönö Niicodemö iñömö Itota wodi baö æninque ninocoo nāni ancoo guiancoo incæ doyæncoo mänincoo oguī wamö nāna ænte pönimö ænte wāne cædedatapa. Ayæ oodeoidi daga wencæte ante nāni cægai bai adobai cædinque tömēna nāna wāne cædincoo inte tömengä baö wīni wīni cægadaimpa. ⁴¹ Itota ingante nāni timpodīñömö eyequei gönea inimpa. Adodea iñömö miintatodē nāni ææ wodiñömö önantatoque inimpa. ⁴² Iimö ate guëmanguionæ inguimpa, ante oodeoidi, Ñöwoönæque cæcäimpa, ante nāni cæönæ impa, ante beyæ, Ontato eyequei impa, ante tömēnāni Itota wodi baö māniñömö daga wengadānimpā.

20

Itota nē wæningä incæ ñāni ömæmonte quëwengä
(Mäateo 28.1-10; Mäadoco 16.1-8; Odoca 24.1-12)

¹ Oodeoidi guëmanguionæ Tabado go ate mönö Dominco tæcæ ooque pönente bayedē Mäadiya Mäagadadēnā Itota wodido ponte ayongä dicabo ontato tee mönocæte ante nāni da pæñæninca incæ do wëä godö concæi intapa. ² Botö Itota nānö nē waadedimo tönö Timönö Pegodo iñömö Itota miñæ möna nē godincaya iñömönate Mäadiya Mäagadadēnā wæætē, Mänömaï impa, ante adinque mönatö weca pogodo ponte apænecantapa,

—Awënë Itota wodi baö ontatodē öñöñongante ænte taodique ædönö mao ñö cædānii, ante ëñēnāmaï imönipa.

³ Ante apæneyongä Pegodo tönö botö Itota miñæ möna nē godincaya iñömö tömengä wodido quingæ gote pogodo pontamönapa. ⁴ Guëa pogodo gomöna incæte tömengä ëmiñænimo botonque quingæ tömengä wodido täno pontabopa. Pegodo ayæ pongantapa. ⁵ Mäniñömö täno pöninque ædæ wæænte guiite ayömo iñāna nāna wīni caadincooque öñö abo incæte guiidāmaï intabopa. ⁶ Timönö Pegodo botö miñæ ayæ nē pöningä Itota wodido ontatodē ponte wäänē guicantapa. Wäänē guiyongante doyæncooque iñāna nāna wīni caadincooque māniñömö öñö acantapa. ⁷ Ayæ Itota wodi ocabo nāna ñāni cæcadincoo adobai öñö acantapa. Mänincoo doyæncoo tönö wīi adoyömö ñönonte intapa. Wæætē iincoo nāa wēnente nānēnē ñö cæte öñö acantapa. ⁸ Ininque botö tömengä wodido ontatodē täno nē pönimo incæte ñöwo tæcæ adobai wäänē guitabopa. Guiite ayömo, Itota nānö öñöniñömö æbänö i, ante adinque, Tömengä ñāni ömæmonte quëwengä ingampa, ante pönentabopa. ⁹ Edæ Wængonguī angä ëñente yewæmöninque dodāni, Mönö Codito iñömö do wæningä incæ ñāni ömæmonte quëwenguënegä incæcäimpa, ante mönatö māniñedē ayæ ëñēnāmaï inömönaimpa. ¹⁰ Ayæ mönatö tömengä miñæ nē godimöna iñömö wadæ godinque tömëmöna oncönē ocæ ëmænte gotamönapa.

Itota iñömö Mäadiya Mäagadadēnā weca pongä
(Mäadoco 16.9-11)

¹¹ Mäadiya guiquënë Itota wodido ontatodē yabæ inö a ongonde wædongäimpa. Mänömaï wædinque tömengä, Abote, ante ædæ wæænte guiite ¹² adinque Wængonguī anquedoda näämæntacoo mongæna inte Itota wodi baö öñöniñömö tæ contada ina acantapa. Adocanque Itota wodi ocabo öñöniñömö tæ contayongä wacä Itota wodi önöwa öñöniñömö tæ contate ongongä acantapa. ¹³ Tömēna iñömö tömengä ingante,

—Onquiyæmi, minö quinante wæmintawo.

Äna ëñēninque tömengä wæætē,

—Botö Awënë wodi baö ini ö ænte godāni awædö. Ædönö mao ñö cædānii, ante ëñēnāmaï wæbopa.

¹⁴ Mäninö äninque Mäadiya dadi ëmænte ayongä Itota māniñömö a ongongä adinque Itota incæcä tömengä ëñēnāmaï ingantapa. ¹⁵ Itota iñömö,

Minö quinante wæmintawo. Æcänö ingante ante diqui diqui mimintawo.

Ante angä eñëninque Mäadiya, ðingä iñömö wabänö gönea ömæ wite në aacä ingampa, ante önöwënenque pönëninque,

—Eñëmi, bitö tömengä wodi baö ini wayömö ænte mäobi inte bai ædönö gote ñö cæbitapa, ante apænebi eñëmoe. Apænebi eñëninque botö tömengä wodi baö do gote æmaimopa.

¹⁶ Äñongante Itota tömengä ingante,

—Mäadiya, angantapa.

Angä eñëninque tömengä weca dadi ëmænte ebedeo tededö äninque,

—Adaböni, angantapa. Mäniñö mönö tededö, “Awënë në Odömömi imi,” ante impa.

¹⁷ Itota iñömö,

—Edæ botö ayæ botö Mæmpo weca ocæ ëmænte godämaï imopa, ante adinque minö botö imo pæ mänämaï iedä, angantapa. Wæætë minö botö tönñadäni weca godinque tömënäni inänite iïmaï apænebi eñencädänimpa. Botö ñöwo botö Mæmpo weca ocæ ëmænte goquïmo imopa. Tömengä iñömö mïnitö Mæmpo adobaï inongampa. Botö ñöwo botö Wængonguï weca ocæ ëmænte goquïmo imopa. Tömengä iñömö mïnitö Wængonguï adobaï inongampa, angantapa.

¹⁸ Itota angä ate Mäadiya Mäagadadënë iñömö Itota nänö në ëmiñænïnäni weca pöninque, Awënë Itota ingante atabopa, äninque, Tömengä iïmaï ante apænecä eñentabopa, ante tömënäni inänite mäo apænecäimpa.

Itota iñömö tömengä ëmiñænïnäni weca pongä

(Mäateo 28.16-20; Mäadoco 16.14-18; Odoca 24.36-49)

¹⁹ Guëmanguïönæ go ate iïmö ate wëmö bayö tömengä ëmiñænïnäni adoyömö pöninque, Oodeoidi awënëidi inänite ancaï guïñente awædö, ante odemö tee mönete ongönänitapa. Itota tömënäni weca pö guïte tæcæguedë a ongöninque,

—Guïñänämaï inte gänë pönencæmïnimpa, angantapa.

²⁰ Mäniñö angä ate tömengä önompö odömöninque tömengä betagonta odömongä adänitapa. Ininque mönö Awënë ingante adinque tömengä ëmiñænïnäni nanguï watapæ todänitapa. ²¹ Itota wæætë adodö,

—Guïñänämaï inte gänë pönencæmïnimpa, angantapa. Botö Mæmpo iñömö botö imote nänö da pönongaimo imo bai botö adobaï mïnitö iminute da godömo goquïmïni imïnipa.

²² Ante apænedinque tömënäni baonga woo öongate apænecä,

—Botö ñöwo pönï mïnitonga Wængonguï Tæiyæ Waëmö Önöwoca ingante pönö pönömo æedäni. ²³ Në wënæ wënæ cæcä ingante adinque mïnitö tömengä ingante godö ñimpo cæmïni ininque Wængonguï adobaï tömengä ingante godö ñimpo cæcä quëwëmaingampa. Mïnitö wæætë në wënæ wënæ cæcä ingante godö ñimpo cædämaï imïni ininque Wængonguï adobaï cædämaï inte tömengä ingante pönö ñimpo cædämaï imaingampa.

Itota ñäni ömæmonte në quëwengä ingante Tömato acä

²⁴ Itota ëmiñænïnäni adoyömö a ongöñönäni tömengä pö guïte tömënäni weca tæcæguedë a ongöñongä tömengä ëmiñænïngä adocanque Tömato mëwoga ëmongä Äancadënaque iñömö dæ angampa. ²⁵ Ayæ ate Itota nänö në ëmiñænïnäni wadäni iñömö,

—Mönö Awënë ingante atamönipa, ante Tömato ingante apænedäni eñëninque tömengä wæætë,

Botö iñömö tömengä önönempö nani daagö timpodinömmö, Æyömönö empocä, ante adinque önongompoca gampodique ayæ tömengä betagonta inö nani tapa tænonte codinömmö botö tömëmö önongompoca gampote ate pönëmaï wædö, angantapa.

²⁶ Wacä tëmäna go ate Itota ëmiñænïnäni wæætë oncönë adoyömö pö guïte a ongöñönäni Tömato tömënäni tönö godongämæ pö guïte a ongongantapa. Odemö tee mönete ongö incæte Itota iñontobæ pö guïte tömënäni weca tæcæguedë a ongöninque,

—Guïñänämaï inte gänë pönencæmïnimpa, angantapa.

²⁷ Ayæ Tömato ingante,

—Bitö tömömi öngompoca pædæ pompodinque botö önompo ae. Pædæ guipote botö betagonta inö gampoe. Ayæ, Wabänö incædö, ante änämaï incæbiimpa. Wæætë pönëe.

²⁸ Ante äñongä Tömato,

—Botö Awënë inömi imipa. Ayæ adobai botö Wængongui inömi imipa, angantapa.

²⁹ Ayæ Itota tömengä ingante,

—Botö imote ate pönëmi imipa. Wæætë në adämaï inäni incæ botö imote pönëni inique tömëni nani toquinque ingäimpa, angacäimpa.

Wäo nänö yewæmongainta quinate yewæmongacäi

³⁰ Tömengä emiñäninäni weca Itota, Eñencædänimpa, ante wadö wadö cædinque tömengä nänö bamönengæ ayæ godömenque nanguï pönï cægacäimpa. Botö iñömö iintaa yewæmöninque mäninö tömengä nänö cægainö ante wii tömäa yewæmontabopa.

³¹ Wæætë mäninö ante yewæmöninque botö, Itota mönö Codito inongäimpa, ante ayæ, Tömengä Wængongui Wengä inongä ingampa, ante minitö pönencæminimpa, ante yewæmontabopa. Edæ tömengä emöwo beyenque minitö mänömainö ante pönëninque cöwë wänämaï quëwencæminimpa, ante botö iinta yewæmömopa.

21

Itota tömengä emiñäninäni 7 ganca inäni weca pongä

¹ Ayæ ate tömengä emiñäninäni Tibediapæ nani ämä yæwedeca emönai boga ongöñönäni Itota iñömö tömëni weca pöninque a ongongä adänitapa. Edæ iimaï batimpa. ² Timönö Pegodo adocanque, Tömato Äancadënaque nani äñongä tönö Gadideabæ Cänaa në quëwengä Näatänaedo mënaa, Tebedeo wëna nana caya mënaa, ayæ Itota nänö në emiñänina wada mënaa mänimpodäni adoyömö ongönönänimpa.

³ Timönö Pegodo iñömö tömengä tönö ongönäni inänite,

—Botö ñöwo gæyæ dadoncæ tao gobopa.

Angä eñëninque tömëni iñömö,

—Bitö miñæ gocæmönimpa.

Äninqe, Ægodödäni gomompa, ante tao godinque wipodë godongämæ guidinque tömäa woyowotæ gæyæ dadoncæ cædäni incæte gæyæ dæ änämaï inönänimpa. ⁴ Näö bayonte Itota iñömö emönaiya yæwedeca a ongongä adinque, Itota ingampa, ante tömengä emiñäninäni incæ eñänämaï inänitapa. ⁵ Ayæ tömengä tömëni inänite yedæ aa pedinque,

—Iñänäni, gæyæ æminitawo.

Äñongante,

—Ænämaï imönipa.

⁶ Änani eñëninque tömengä wæætë,

—Minitö dicamonca wipo tömëmæ inö æpäne wo guitodonte gæyæ dadonte æedäni.

Tömengä nänö ämaï cædinque tömëni nanguï pönï gæyæ dicamonca date owo adinque ædö cæte dicamonca wëa pönonte ænguänäni. ⁷ Itota emiñänimo tömengä nänö në waadebo inömo inte botö Pegodo ingante apænedinque,

—Iingä iñömö mönö Awënë Itota ingampa.

Ämo eñëninque Timönö Pegodo iñömö tömengä yabæcoo nänö gä tadongate cönönincoo æninqe daga wëñate æpäne to go ti wææninqe ömaa taocantapa. ⁸ Wädäni Itota nänö në emiñäninäni iñömö yæwedeca obo pönï tiëe mëetodo ganca bai iñömö wäi wocædäni inique wipodë ayæ owodäni iñömö Pegodo miñæ wogaa godinque dicamö gæyæ eyede pönï wëa pönö pönänitapa. ⁹ Tömëni wipodë inte pædæ æænncado ponte ayönäni, Æænongui, ante gonga emöñömö gæyæ öñö adinque adoyömö wædænque päö cö cæte öñö adänitapa. ¹⁰ Itota tömëni inänite,

—Gæyæ mini ñöwo æni wædænque ænte pödäni.

¹¹ Angä eñëninque Timönö Pegodo wipodë pö guidinque dicamö ænte emönaiya wëa tadongantapa. Edæ tiento tincoenta i todee ganca inäni mänimpodäni gæyæ

ñænængade dicamö iñömö eyede owodäni incæte dicamö wangö tēmönämaï iñimpa.

¹² Itota iñömö tömënäni inänite,

—Pö cæedäni,

Äñongante tömengä ëmiñæninäni tömänäni, Mönö Awënë Itota ingampa, ante ëñëninque, Æbidö imii, ante tömengä ingante ædö cæte anguinäni. ¹³ Itota gongapamö iñömö pöninque päo ænte tömënäni inänite pædæ godongä ænäni iñinque tömengä ayæ gæyæ öñö æninque tömënäni inänite pædæ godongä cænänitapa.

¹⁴ Mänömaï cædinque Itota do wæningä incæ ñäni ömæmonte quëwente mempoga do ponte a ongöningä inte ñöwo tömengä ëmiñæninäni weca mempoga go adopoque pongacäimpa.

Timönö Pegodo ingante Itota apænecä

¹⁵ Tömënäni iñinque cænäni ate Itota iñömö Timönö Pegodo ingante,

—Timönö Wäo wëmi ëñëmi. Botö imo mäninäni pönömenque waadete pönëñönäni bitö iñömö näwangä botö imote godömenque waadete pönëmitawo.

Äñongä,

—Awënë, Ao ämopa. Bitö imite botö waadedö ante bitö do ëñëmipa.

Angä ëñëninque Itota,

—Woadäni iñömö botö obegaidi wënäni bai iñönänite bitö tömënäni inänite botö angainö ante odömonte apænebi ëñencædänimpa, angantapa.

¹⁶ Ayæ wæætë,

—Timönö Wäo wëmi ëñëmi. Bitö näwangä botö imote waadete pönëmitawo.

Äñongä,

—Awënë, Ao ämopa. Bitö imite botö waadedö ante bitö do ëñëmipa.

Angä ëñëninque Itota,

—Woadäni botö obegaidi bai iñönänite bitö tömënäni inänite aacæbiimpa, angantapa.

¹⁷ Itota mempoga go adopoque tömengä ingante,

—Timönö Wäo wëmi ëñëmi. Bitö botö imote waadete pönëmitawo, ante angantapa.

Itota mempoga go adopoque tömengä ingante, Bitö botö imote waadete pönëmitawo, ante angä ëñëninque Pegodo wæwente inongäimpa. Incæte Itota ingante,

—Awënë bitö tömää ëñëmi imipa. Bitö imite botö waadedö ante bitö do ëñëmipa.

Ante wæyongä Itota wæætë,

—Woadäni iñömö në botö obegaidi bai iñönänite bitö tömënäni inänite botö angainö ante odömonte apænebi ëñencædänimpa. ¹⁸ Bitö imite näwangä ämopa. Bitö wëñæmiyedë tömëmi nämä daga wëñadinque, Ædönö goinëmo, ante bitö goinënonque do gobi imitapa. Nöwo iñömö bitö picæmi bayedë bitö pædæ gopoyömi wacä incæ bitö imite godö daga wëñadinque bitö goinënämaï iñömö mänñömö bitö imite mäocä gocæbiimpa.

¹⁹ Pegodo ingante mänömainö ante apænedinque Itota iñömö, Tömengä ingante æbänö wænönäni wëñongä Wængongui ñäö apäite bai nänö ëmönö edonque bacæimpa, ante odömoncæte ante apænegacäimpa. Ayæ godömenque tömengä ingante,

Botö miñæ tee empo pöe, angacäimpa.

Itota ëmiñæningä nänö në waadecä

²⁰ Pegodo guiquënë dadi ëmænte botö Itota ëmiñænimo nänö në waadebo iñömö tömëna miñæ tee empo pömo acantapa. Mänimo iñömö do möni cæñedë Itota tönö äññömonque tæ contadinque, “Awënë bitö imi æcänö godö odömonguinaa, apænebi ëñëmönie,” ante në apænedimo inömoimpa. ²¹ Pegodo botö imo adinque Itota ingante,

—Iñgä iñömö në tee empo pongä diyæ æbänö tömengä beyæ bacæimpa.

²² Äñongä Itota wæætë,

—Botö ocæ ëmænte ponguinganca tömengä ayæ quëwencæcäimpa, ämo bai bitö wæætë ædö cæte në ämi inguimii. Botö iñömö në angüimo imopa. Bitö guiquënë botö miñæ tee empo ponguënëmi imipa, angantapa.

²³ Mänömaï beyä pancadäniya möni tönïñadäni weca godinque gode ä gode ä cædinque botö imotedö ante apänedinque, Ìingä ïñömö cöwë wänämaï quëwengüingä ingampa, ante tedewengadänimpa. Itota ïñämpa, Ìingä ïñömö wänämaï quëwencæcäimpa, ante änämaï ingacäimpa. Wæætë, “Botö ocæ ëmænte ponguinganca tömengä ayä quëwencæcäimpa, ante ämo bai bitö ædö cæte angüimii. Botö angüimo imopa,” ante mäninque angacäimpa.

²⁴ Tömënäni, Ìingä wänämaï quëwengä ingampa, ante näni në apänedimo ïñömö edæ botö tömengä nänö në ëmiñænimo adobo imopa. Tömëmo, Æbänö batimpa, ante botö apänedö ïñömö näwangä ante në apänedimo inte botö adodö ante tömänö ante në yewämönimo imopa. Mäninö ante botö angainö ïñömö näwangä impa, ante mönitö ëñëmönipa.

²⁵ Itota ïñömö nanguï pönï godömenque wadö wadö cægacäimpa. Æbänö cæcää, ante tömää nänö cægainö ante adinque yewämömöni bai mänintacoo möni yewämönintacoo ñönongüi ante edæ inguipoga tömäo incæ wii eyepä incædönimpa, ante pönëmopa. Mäninque ante yewämömopa.

Itota nänö da godongainäni Näni Cægainö

Wængongui Tæiyæ Waëmö Önöwoca poncæcäimpa, ante

¹ Teopido bitö acæbiimpa, ante botö do yewæmöninque, Itota æbänö mä cægacäi, ante, Itota æbänö mä odömonte apænegacäi, ante yewæmontabopa. Mänömainö ante do yewæmönimo inte botö adobo Odoca inömo inte ñöwo godömenque yewæmömo ae.

² Itota do iñömö, Iñäni botö imotedö ante nê apænequinäni inänipa, ante cædinque tömënäni inänite apænte æninque da godongacäimpa. Ininque tömengä nänö æite goquiönæ iñonte tömënäni tönö godongämæ ongöninque Itota iñömö Wængongui Tæiyæ Waëmö Önöwoca tönö cædinque tömënäni inänite, Botö dæ gobo ate minitö iimaï cæcæminimpa, ante apænegacäimpa. Ininque apænegä ate tömengä ingante Wængongui do ænte mäicä inque ingä æigacäimpa. Ininque mäninganca tömengä nänö cægainö ante do yewæmönimo inte botö iñömö, Bitö Teopidobi godömenque acæbiimpa, ante ñöwo wæætê yewæmömopa.

³ Itota adocä incæ nantate wægaingä inte ñäni ömæmonte ate coadenta eönæ manimpoönæ inguipoga quëwëninque tömënäni weca miingä inte wæætê pö wæætê pö cædinque mä pönï cædongäimpa. Ininque, Tömengä näwangä miingä inte mänömaï cæcampa, ante adinque tömënäni ædö cæte wadö ante pönenguinänii. Ayæ tömënäni weca a ongöninque tömengä tömënäni inänite, Wængongui Awënë Odeye nempo quëwencæminimpa, ante tömänö ante adodö adodö ante apænegä eñengadänimpa.

⁴ Tömënäni tönö godongämæ ongöninque Itota iimaï angantapa.

—Wii wayömo goedäni, Eedotadëe iñömö ee quëwëedäni, angantapa. Botö Mæmpo iñömö, Wacä ingante da pönömo æninque ewocacæminimpa, ante do apænebo eñëminitawo. Tömengä, Da pönonguimo, ante nänö nê angaingä ingante ante ænte ewocacæte ante minitö ñöwo wänö cöedäni. ⁵ Edæ Wäö wodi iñömö æpænê guidongacäimpa. Wængongui Tæiyæ Waëmö Önöwoca guiquënë minitö baonga wantæ iñö pö guicæcäimpa, ante Itota apænegacäimpa.

Itota öönædê æicampa

⁶ Ayæ Itota tönö godongämæ ponte ongönäni iñömö tömengä ingante änänitapa.

—Itota eñëmi. Mönö idægocabo mönö quëwengaimæ iñonte wadäni do ö ænäni incæte bitö ñöwo wæætê adobæ æninque mönitö Awënë Odeyebi oo bacæ cæbitawo. Edæ, Bitö nempo oo pönï godongämæ quëwencæmönimpa, ante cæbitawo, ante eñencæte ante wæmönipa.

⁷ Ancaä äñönäni,

—Iñæmpa minitö ante wæinö bai, Æyedënö baquii, ante, Æpogadö baquii, ante minitö wii eñenguënimini iminipa. Mæmpoque nê angaingä inte mäninö ante eñengampa.

⁸ Wæætê Wængongui Tæiyæ Waëmö Önöwoca pö guidinque pönö cæcä ate minitö wæætê täi piñænte ewocamini edæ bacæminimpa. Ininque, Botö æbänö cægaboï, ante nê adimini inte mäninö botö cægainö ante minitö täno Eedotadëe iñömö quëwente apænedinque ayæ Oodeabæ mäo apænedinque ayæ Tämadiabæ mäo apænedinque godömenque tömämæ mäo apænemini eñencädänimpa, ante Itota angacäimpa.

⁹ Mänömainö ante apænegä eñente a ongöñönäni Itota mäniñömö ongonte æi boguimancodê ingæ æicä æmö agadänimpa. ¹⁰ Öönædê æite ingæ gocä æmö ayönäni edæ onguinæna näämænta weocoo mongæna tömënäni weca a ongöninque edæ, ¹¹ tömënäni inänite apænedinque,

—Gadideabæ quëwëmini inte onguinæmini eñëedäni. Quinante æmonga a cöminii. Edæ Itota minitö tönö ongöninque öönædê æicä aminitawo. Edæ öönædê æicä mini adi bai adocä Itota iincayæ ate ocæ emænte poncæcäimpa, ante apænedatapa.

Codaa nänö cæquēnēnō wacā cæcæcäimpa, ante cædäni

¹² Oodeoidi näni guēmanguiönæ cōwē näni goganca mäningancaque i inique wii gobæ i inique tömēnāni Odibowænquidi näni anquidi ongōninque ocæ ēmænte wææ Eedotadēē pōnānitapa. ¹³ Tömēnāni ēmōwo Pegodo tōnō Wäö, Tantiago tōnō Æntade, Pedipe tōnō Tōmato, Batodōmēē tōnō Mäateo, Adepeo wengä Tantiago, wacā, Mönö ömæ ingæimpa, ante nē ānongä Timönö, Tantiago wengä Codaa. Mänömaī ēmönāni inte pō guidinque tömēnāni näni wānoncōnē æmongapaa æi guidānitapa. ¹⁴ Ayæ iināni tōnō wadāni Wængonguī ingante godongāmæ apænecæte ante cōwē pō pō cægadānimpa. Onquiyænāni adobaī Itota badä Mäadiya tōnō ayæ Itota biwīdi tōnō cōwē ponte apænedōnānimpa.

¹⁵ Mäniñedē Itota ingante näni tee empote quēwēnāni tiento bæinte ganca ināni inte ongōñōnāni Pegodo tæcæguedē ængæ gantite apænecantapa. ¹⁶ “Iñānāni ēñeedāni. Nōwocā Codaa wodi Itota wodi ingante nē æncædāni iñānite nē godö odōmongä ingantawo. Edæ tömengä ingante ante Wængonguī Tæiyæ Waēmö Önōwoca wēēñēdē apænecä ēñēninque awēnē Dabii wodi nänö yewæmongainö baī cōwē iinque baquinö anguēnē. ¹⁷ Edæ Itota mönitö imönite apænte æninque Codaa ingante adobaī apænte ængacäimpa. Iinque mönö cabo mönö nē cæquēnēnō ante Codaa wodi adocā incæ mönö tōnō godongāmæ cæcä ingacäimpa. ¹⁸ Tömengä wīwa cæte tigitamö nänö ænintamö incæ adodö godongä ænānitapa. Tömēnāni wæætē tigitamö æninque, Waodānido bacæimpa, ante ömæ godonte ænānitapa. Tömengä iñömö guidömēmæ wæante ömengö tæi æbæ godente æmæwo wængantapa. ¹⁹ Mänömaī wengä ēñēninque Eedotadēē quēwēnāni tömānāni, ‘Wepæ onguipo ba awædö,’ ante tömēnāni näni tededö Atedāmæ pemönānitapa. ²⁰ Edæ Ämotamīni näni Angaintaa iimaī ante dobæyedē yewæmongatimpa.

‘Tömengä oncö æmæwo önonconque bacæimpa.

Wacā mänincōnē cōwē quēwēnāmaī incæcäimpa.’

Ante näni Ämotamīni Angainta baī do batimpa. Ayæ,

‘Tömengä nē aacā bate nänö cæquēnēnō incæ wacā badinque cæcæcäimpa,’
ante yewæmonte ongompa,”

²¹ Ante apænedinque Pegodo godömenque iimaī ante apænecantapa. “Mänömaī iī inique Codaa wodi nē nänö cæquēnēnō incæ edæ wacā cæcæcäimpa, ante ñöwo mönö apænte angæimpa. Awēnē Itota imæca mönö tōnō guēa cægongāñedē wadāni godongāmæ nē cægōnināni inānite adinque mönö iimaīnō ante apænte ængæimpa.

²² Wäö wodi nänö guidōñedē cægōninque ñöwoönæ Itota nänö æite goönæ ganca æcänö æcänö mönö tōnō godongāmæ cægōnināni ināni, ante adinque mönö adocanque ingante apænte ængæimpa. Apænte æmō ate tömengä, Itota dobæ ñāni ömæmongantapa, ante nē againgä inte wæætē mönö tōnō godongāmæ apænecä incæcäimpa.”

²³ Ante Pegodo angä ēñente cædinque tömēnāni wæætē, Æcänö æcänö nē agāināni ināni, ante adinque mēnaa inate apænte ænānitapa. Adocanque Ootee, Badatabato näni ānongä inte tömengä mæmæ beyæ, Yoto, ante näni pemongaingä iñongante tömēnāni tömengä ingante apænte æninque edæ wacā ingante Mäatiya ingante apænte ænte gönōnānitapa.

²⁴ Mänömaī apænte æninque Wængonguī ingante apænedānitapa. “Awēnē ēñēmi. Mönitö æbänö pönēmōnii, ante tömää ēñēmi inte bitö iina inate adinque æcänö ingante do apænte ængabii, ante odömōmi amōnii. ²⁵ Edæ Codaa wodi tömengä nänö pante wænguinque oda cæcantapa. Iinque bitö ñöwo wacā ingante da godömi godinque Codaa wodi nänö cæquēnēnō ante cæcæcäimpa, ante ämii, ante wæmōnipa.”

²⁶ Ante Wængonguī ingante apænedinque tömēnāni, Æcänö inaa, ante ēñencæte ante cædinque dicamö æninque, Wo godö wo godö cæyömö to ta wææ acæi, ante cæte ayönāni Mäatiya nänö cæ to ta wæænca adinque, Mönö imonte Itota da godongä nē godimö önompo tipæmpoga go adocanque iñömōnte tömengä mönö cabo badinque godongāmæ cæcæcäimpa, ante cægadānimpa.

2

Wængongui Tæiyæ Waëmö Önöwoca pongampa

¹ Tömëmö incadepo ba ate Pentecotee ææmænoca näni äönæ iñonte tömënäni näni cabo adoyömö ponte godongämæ ongönänitapa. ² Ongonte ëñëñönäni woboyæ nangui pæmænte ä bai iñontobæ öönædë pö ëñëñönäni oncönë näni ongoncönë tömancönë wææ guite bai woboyæ nangui pæmænte ä bai ëñënänitapa. ³ Ayæ waodäniya incæ gonga bai onguënë onguënë bæco adänitapa. ⁴ Ayönäni Wængongui Tæiyæ Waëmö Önöwoca incæ tömänäniya pö guicä ewocadänitapa. Pö guidine Wængongui Önöwoca pönö cæcä beyænque tömënäni wadäni näni tededö bai wadäni näni tededö bai mä apænedänitapa.

⁵ Mäniñedë oodeoidi Wængongui ingante guñente quëwënäni inte edæ wabæca wabæca tömämæ quëwëninque ñowo Eedotadëe ponte quëwënönänimpa. ⁶ İñäni iñömö woboyæ nangui pæmænte bai ä ëñente wædinqe ponte ëñëñönäni Itota ingante në pönänäni iñömö ñowo pönäni näni tededö bai tededäni ëñënänitapa. Adocanque nänö tededö bai wacä nänö tededö bai tededäni ëñëninque tömënäni, Æbänö cæte tömämö tededö bai tededäni ëñëmönii, ante wædänitapa. ⁷ Tömënäni nämæneque apænedinqe,

—İñæmpa Gadideabæ quëwëniñänique inte iñäni mänömaï tededäni awædö. ⁸ İninqe ædö cæte mönö ëñagäiömæ mönö tededö bai tededäni ëñëmöö, ante ancai guñente wædänitapa. ⁹ Edæ iñömö në ongömö iñomonte pancadäniya Padatiabæ quëwente pönömö wadäni guiquënë Mëediabæ, Edämæ, Mëetopotämiabæ, Oodeabæ, Capadotiabæ, Pontobæ, Atiabæ quëwente pönäni iñänipa. ¹⁰ Wadäni guiquënë Pidiguiabæ, Pampidiabæ, Equitobæ quëwente pönäni iñänipa. Wadäni guiquënë dibiabæidi iñäni inte Tidëne iñömö quëwente pönänipa. Wadäni guiquënë Odömä iñömö quëwëninque ëñacæ ante ponte owodänipa. ¹¹ Odömä iñömö në quëwëniñäni iñömö pancadäniya oodeoidi ëñagäinäni iñönäni pancadäniya wæætë wadäni incæ oodeoidi pönänäni bai adodö pönente oodeoidi bai bagäinäni iñänipa. Ayæ wadäni guiquënë codetenteidi tönö adabeidi inte pönäni iñänipa. İninqe mönö wabæca wabæca quëwëninque wadäni näni tededö bai wadäni näni tededö bai në tedemö imompa. Incæte iñäni guiquënë, Wængongui waa pönï cæcä ingampa, ante mönö tededö bai mä pönï tededinqe apænedäni ëñëmompa töö.

¹² Ante wædinqe tömënäni näni cabo nämæneque apænedinqe,

—Æbänö ëñëmöö, ante wæmönipa töö.

¹³ Ante wæyönäni pancadäniya babæ apænedinqe,

—Biinömmæ miimæ tömo pönï bedinqe dowænäni inte tededänipa, ante badete togadänimpa.

Pegodo tömënäni inänite apænecampa

¹⁴ Mänömaï tedeyönäni Pegodo iñömö önompo tipæmpoga go adocanque iñäni tönö ængæ gantidine nangui tedecä ëñengadänimpa. “Oodeoidi ëñëedäni. Ayæ wamiñi guiquënë Eedotadëe iñömö ñowo ponte owomiñi inte minitö oodeoidi tönö tömämäni ëamonca ongonte ëñëedäni. Botö, Æbänö i, ante edonque apænebo ëñencämänimpa,” angantapa.

¹⁵ “Gäwadecæ impa diyæ ti nämæ bete dowænte baquänänii. İñæmpa nænque ayaönäa ææñongä ædö cæte miñi änö bai bete dowænte baquänänii. ¹⁶ Wæætë Wængongui beyæ në apænegaingä Oedo wodi do nänö angainö bai ñowo cædänipa, ante apænebo ëñëedäni. Oedo wodi iñömö iimainö ante yewæmongacäimpa.

¹⁷ ‘Wængongui iimaï angampa, angacäimpa.

İninqe bayedë botö Önöwoca ingante tömänäniya ämo pö guicä ewocacædänimpa.

Mäniñedë onquiyænäni incæ onguiñænäni incæ minitö wënäni iñönäni inte botö beyæ apænecædänimpa.

Edëniñäni iñömö ate bai mä pönï acædänimpa.

Picänäni guiquënë nö wüimonte bai acädänimpa.

¹⁸ Ayä botö Önöwoca ingante ämo pö guicä ewocadinque onguiñänäni incæ onquiyänäni incæ

botö beyänque në cädäni inönäni inte botö beyä apäncädänimpa.

¹⁹ Edæ mîni äämö ate pönenguinque ante botö öönädë mä cæbo acæmînimpa.

Ayä imæca adobai pönö cæbo ate wepæ gonga täämä nangui mongæ adinque ëñencæmînimpa.

²⁰ Edæ nænque täno wentamö bayö apäicä wepæ ëmö ba acäimpa.

Ayä ate tömengä nänö ponguiönæ iñonte

Wængongui Awënë incæ tæi piñängä inongä inte

ñäö apäite bai ëmöninque poncäcäimpa.

²¹ Ininque botö ëmöwo ante në aa pedäni iñömö

tömänäni botö ämo beyänque quëwencädänimpa.'

Ante Wængongui Awënë cæcäcäimpa, ante Ooedo wodi yewæmongacäimpa."

²² Ante apänedinque Pegodo godömenque iimaï ante apäncantapa. "Idægoidi, apänebo ëñeedäni. Itota Näatadeta në quëwengängä näwangä botö në da pönongä ingampa, ante pönencæmînimpa, ante mä cædinque Wængongui Itota tönö godongämä tæi piñænte nangui cæcä ate Itota mînitö weca bamönengæ cædinque nangui cægacäimpa. Ininque mänömaï cæcä në agaimîni inte mînitö, Näwangä Itota ingante Wængongui da pönongä ponte cæcampa, ante do ëñëminipa. ²³ Wængongui nämä pönëninque, Codito ingante tömënäni nempo pædæ godoncæboimpa, ante do angängä inte, Mînitö tömengä ingante æninque mänömaï cæcæmînimpa, ante do ëñengacäimpa. Ininque mînitö iñömö Itota ingante bæi ongonte æninque ëñente cädämaï inäni nempo pædæ godöninque, Mînitö tömengä ingante awäa timpodinique wææ tiwate wænödäni, ante ämîni wænönänitapa. Mänömaï önönecaque tedete beyä mînitö tömëmîni edæ në wænömîni bai bamînipa töö. ²⁴ Mînitö mänömaï wadäni tönö cædinque wænömîni beyä Itota iñömö mönö wængüenëmämo teëmë mongænte caate wædinque wængacäimpa. Ayä pæ opate öñöñongante Wængongui wæætë, Idæwaa, ante wi ænote bai cædinque angä ate Itota ñäni ömæmante ta pongantapa. ²⁵ Adocä Codito beyä ante apänedinque awënë Dabii wodi iimaï ante yewæmongacäimpa.

'Botö, Mönö Awënë cöwë botö weca mä ongongampa, ante atabopa.

Ininque tömengä botö tömëmæ inö töö æmænte ongongä ininque botö imote ædö cæte bæ tadäni wæquimoo.

²⁶ Mänömaï beyä botö, Watapæ bacäimpa, ante mîmönë pönëmo inte botö önöneca ämotamîni ante bai nangui tobopa.

Botö ñäni ömæmonguinque në wæwocabo imopa, ante pönëmo inte botö guñëñate wädämaï inte baö ëñate quëwencæboimpa.

²⁷ Wængongui ëñëmi. Botö waodäni näni wænte ongöñömö öñöñömote bitö ëmö cæte godämaï incæbiimpa.

Bitö imite në cæbo inte botö tömëmi cædö ante cöwë cæbo iñömote bitö ædæmö wææ aabi ate botö baö ñömädämaï incæboimpa, ante edæ botö do ëñëmopa.

²⁸ Taadö botö quëwenguinö ante bitö do odömömi agaboimpa.

Bitö weca ædinque bitö awinca adinque watapæ tocæboimpa,'

ante awënë Dabii wodi ämotamîni ante bai apänegacäimpa."

²⁹ Ante apänedinque Pegodo godömenque apäncantapa. "Inänäni ñöwo edonque apänebo ëñenguënë quëwëmîni. Mönö mæmæ Dabii wodi do wængacäimpa. Tömengä mäo do daga wengadänimpa. Edæ tömengä wodido näni wengaiñömö ñöwo ganca a ongö aminipa. ³⁰ Incæte tömengä ingante Wængongui, Dabii ëñëmi, angacäimpa. Bitö pæinäni wææ pæyönäni adocanque ingante botö bitö awënë containpaa pönö cönömo contadinque tömengä iñömö në Awënë bacäcäimpa, ante apäncä ëñëninque awënë Dabii wodi Wængongui beyä në apänegängä inongä inte edæ, Wængongui tömengä nänö änö bai cöwë cæcäcäimpa, ante do ëñengacäimpa. ³¹ Ayä, Æbänö cæquingä,

ante do eñengaingä inte tömengä, Mönö Codito iñömö waodäni nāni wænte ongöñömö öñöñongante Wængongui emö cæte godämaï inte wææ aacä beyænque tömengä baö incæ ñömädämaï ingäïmpa, ante apænegacäïmpa. Mänömainö ante apænedinque awënë Dabii wodi, Mönö Codito ñāni ömæmoncæcäïmpa, ante do apænegacäïmpa. ³² Itota ingante Wængongui, Nāni ömæmoe, angä ñāni ömæmongantapa. Ìinque māniñö tömengä nāñö ñāni ömæmongainö ante nē adimöni inte mönitö tömämöni edæ, Nāwangä ïmpa, ante nē apænemöni ïmönipa.”

³³ “Ìinque Wængongui angä beyænque Itota inque ingä öönæde æidinque Wængongui tömëmæ inö tæ contate ongongampa. Ayæ Mæmpo Wængongui, Botö Önöwoca ingante æncædänïmpa, ante nāñö nē angaingä ingante do godongä æninque Itota wæætë mönitö ïmönite ñöwo da pönongä ænte ewocamönipa. Ìinque mīnitö guiquënë gonga bæco ate wæmīnitawo. Wadāni nāni tede bai tedemöni eñente wæmīnitawo. Edæ Wængongui Önöwoca pönö cæcä beyænque gonga bæco aminipa. Wængongui Önöwoca pönö cæcä beyænque wadāni nāni tede bai tedemöni eñemīnipa. ³⁴ Itota öönæde inque ingä æicä bai awënë Dabii wodi wī adobai æigacäïmpa. Incæte tömengä godömenque apænedinque ïmaï ante yewæmongacäïmpa.

‘Awënë Wængongui incæ botö Awënë ingante apænedinque,
Nē Awënë ïmi eñemi. Botö tömëmæ inö tæ contayömi,

³⁵ botö bitö ïmite nē piinte cædāni inānite bæ tabo ate bitö tömēnāni inānite pīnā gāwate bai cæcæbiïmpa,’ ante Awënë Wængongui angacäïmpa,” ante Dabii wodi yewæmongacäïmpa.

³⁶ Ante apænedinque Pegodo godömenque ïmaï angantapa. “Mänömaï beyæ mīni idægocabo tömämīni, Ìimañö ante nāwangä pönī ïmpa, ante eñencæmīnïmpa. Māningä Itota ingante mīnitö ñænquedimæ gönonte wænömīni nē wæningä ingante ante apænedinque Wængongui incæ, Itota nē Awënë inongä ingampa, ante ayæ, Nē Codito inongä ingampa, ante edæ do cægacäïmpa.”

³⁷ Ante Pegodo apænecä eñëninque tömēnāni, Æ, wænæ wænæ cæte awædo, ante ancaï guñente wædinque Pegodoidi inānite,

—Ìñānāni, æbāñö cæquënëmöni ïmönii.

³⁸ Äñönānite Pegodo wæætë,

—Ìmaï cædāni. Mīnitö wænæ wænæ mīni cædinö ante Wængongui pönö ñimpo cæcæcäïmpa, ante cædinque, Æmæwo wænæ wænæ cætabopa, ante Itota Codito emöwo ante apænedinque æpænë guiedāni. Mänömaï cæmīni adinque Wængongui tömengä Önöwoca ingante da pönongä ænte ewocacæmīnïmpa. ³⁹ Edæ mīnitö ïmīnite aa pecä incæ mīni wēnāni inānite aa pecä incæ gobæ quēwēnāni inānite aa pecä incæ ayæ ate quēwēnāni inānite aa pecä incæ möñö Awënë Wængongui nāñö nē aa pedāni inānite apænedinque, Botö āñö bai cōwē cæcæboïmpa, angampa.

⁴⁰ Ante apænedinque Pegodo godömenque nanguï āninque, Eñenguënë quēwēnāni, ante wantæpiyæ apænecantapa.

—Ñöwodāni iñömö nāmanque nāni cæinēñö ante idiquibæ nāni cæi bai mīnitö adobai cædāmaï inte nöingä cæte waa quēwēedāni.

⁴¹ Ante Pegodo ancaā angä eñëninque pancadāniya Ao āninque æpænë do guidāni-tapa. Ìinque edæ māniönæ todee mīido ganca ināni mānimpodāni wede pönëninque do pönengaināni tönö adocabodāni bagadāniïmpa. ⁴² Ìināni iñömö adocabodāni badināni inte cōwē ñimpo cædāmaï ïinque godongämæ pö pö cæyönānite Itota nāñö da godongaināni apænedāni eñëñönāniïmpa. Ayæ nāni pönencabo inönāni inte wacä ingä wacä ingä watapæ apænedinque päö pä ænte godongämæ cæninque Wængongui ingante cōwē apænete quēwēñönāniïmpa.

Nāni pönencabo godongämæ waa cæte quēwēñänipa

⁴³ Ìinque edæ tömānāni guñente wædinque ee quēwēñönāniïmpa. Ayæ Itota nāñö da godongaināni iñömö, Tömānāni pönencædāniïmpa, ante cædinque Wængongui

Tæiyæ Waemö Önöwoca tönö cædinque tömënäni näni pönëninque ante mä cædinque bamönengæ nanguï cædönänimpa. ⁴⁴ Nê pönënäni tömänäni adoyömö pö pö cædinque tömënäni näni mänincoo incæ, Tömämö qui impa, ante nê pönëninque, Wacä ingä wacä ingä mönö godongämæ godonguinque mämompa, ante cædönänimpa. ⁴⁵ Mäincoo tönö ömæ näni éadincoo incæ godonte æ godonte æ cædinque wadäni nê ömaadäni inte wädäni inänite pancæ pancæ godönänimpa. ⁴⁶ Ī ininque ĩimö ĩñö ĩimö ĩñö adoyömö pöninque Wængonguï oncö ñænæncönê yabæcönê nê guii guii cædäni inte mīmōno nō pönëninque tömënäni oncönê adobaï päö pä ænte watapæ todinque godongämæ cænönänimpa. ⁴⁷ Tömënäni edæ Wængonguï ingante, Waa pönï nê cæbi ĩmipa, ante ancaa añönäni wadäni edæ tömënäni inänite waa adönänimpa. Ayæ mönö Awënë pönö cæcä ate tömënäni edæ, Itota Codito ængä beyænque mönö quëwengæimpa, ante pönëninque ĩimö ĩñö wacabomö ĩimö ĩñö wacabomö nê pönënäni badinque edæ tæiyæänäni bagadänimpa.

3

Cömäwaingä ingante äna waa bawacampa

¹ ĩncayæ ate nænque ædæ wæicä ate oodeoidi näni cöwê Wængonguï ingante apænedöñedê Pegodo tönö Wäö ĩñömö Wængonguï oncönê ñænæncö yabæcönê guicæte ante æidatapa. ² Æite ayöna wadäni pöninque cömäwaingä ëñate nê pædingä ingante næænte mämönäni pongä adatapa. ĩngä cömäwaingä ĩñömö nê pö guidäni inänite, Pönömi æmoe pönömi æmoe, ancæcäimpa, ante cædinque tömënäni tömengä ingante ĩimö ĩñö ĩimö ĩñö næænte pö næænte pö cædinque edæ Wængonguï oncö ñænæncö boyæ yabædemö, Waïnemö, näni änemö yabæque cö cædönänimpa. ³ ĩninque ñöwo Pegodo tönö Wäö Wængonguï oncö ñænæncönê yabæcönê pö guicæ cæda adinque tömengä tömëna inate, Pönömiäna æmoeda, angantapa. ⁴ Angä ëñëninque Wäö tönö tömengä ingante cöwä adinque Pegodoque apæñecantapa.

—Mönatö ĩmönate ææmö æ.

⁵ Angä ëñëninque cömäwaingä, Botö ĩmote wabänö pönöna ænguïmo, ante pönëninque ææmö ayongä ⁶ Pegodo ĩñömö,

—Quinö mämopa pönömo ænguïmii. Edæ oodo incæ tigitamö incæ ömæpobo ĩmopa. Wæætê tæiyæ waemö botö ëwocadö ante bitö ĩmite pönö apænebo ate bitö æe. Näatadeta quëwengaingä Itota Codito ëmöwo beyænque bitö dao dao goe, angacäimpa.

⁷ Äninque Pegodo cömäwaingä tömëmæ ĩnö pædæ wææmpo bæi ongonte töö æmængä ate cömäwadingä önöwa tönö önoncaiwa tæi pñæwacä. ⁸ Ate ĩñontobæ ængæ gantite dao dao gocantapa. Ayæ Wäö tönö Pegodo miñæ Wængonguï oncö ñænæncönê yabæcönê godongämæ go guidinque dao dao go togæi togæi godinque Wængonguï ingante waa ate apænedinque, Wængonguï, bitö cöwê waa pönï ĩnömi inte pönö cæbi æmopa, ante nanguï apæñecantapa. ⁹ Wængonguï mänömaï waa cæcampa, ante nanguï pönï tededinque dao dao gocä adinque edæ tömänäni, ¹⁰ Æ, ĩngä ĩñömö, Pönömi æmoe pönömi æmoe, ante Wængonguï oncö ñænæncö boyæ yabædemö, Waïnemö, mönö änemö gäänê mönö nê änecöningä adocä ingampa. Ante adinque, Quinö bai cæte waa bacäi, ante ancai guñente wægadänimpa.

Tadömöö yabætaa ongonte Pegodo apæñecampa

¹¹ Mänii cömäwaingä ĩningä incæ Pegodo tönö Wäö inate winimä winimä cæcä adinque wadäni tömänäni guñente wædinque Tadömöö yabætaa näni añömö pogodo ponte tömënäni weca guidänitapa. ¹² Guidäni adinque Pegodo, “Mīni idægocabo ëñëedäni. Mönatö ĩmönate quñante waa aminii. Mänömaï waa bawacä adinque edæ quñante guñente wæminii. Mönatö edæ, Tömengä dao dao gocæcäimpa, ante cædinque tæiyæ waëmöna ĩmönapa diyæ tæi pñænte cæquimönaa. ¹³ Abadäö wodi Itæca wodi Aacobo wodi tömënäni, Mönö Wængonguï ĩnogä ingampa, ante näni nê angaingä inte Wængonguinque cæcä ate waa bawacampa. Mönö wæmæidi Wængonguï incæ, Itota botö ĩmote nê cædongä ñäö bai ëmönongante tömengä ingante waa acædänimpa,

ante mänömaï cæcampa. Adocä Itota ingante mīnitō iñōmō, Wængongäimpa, äningue pædæ godömīnitapa. Ayæ Pidato, Ñimpo cæbo gocæcäimpa, ante apænte angä ate mīnitō wæætē Pidato weca ongōningue adocä ingante ante Baa äningue wæætē nē wænōningä ingante ante äningue, Ìngä ingante ñimpo cæbi pongæ, ämīnitapa tōö. ¹⁴ Ìningue mōnō quëwenguimāmo nē pōnongä ingante Baa äningue mīnitō nē wænōnimini iminipa. Incæte Wængonguï tōmengä ingante, Ñāni ömæmōe, angä ñāni ömæmongantapa. Ìningue tōmengä ñāni ömæmongä nē adimōni inte mōnitō, Æbānō cægacäimpa, ante adodō ante nē apænemōni imōnipa. ¹⁶ Adocä Itota emōwo ante apænemōna eñente pōnëningue mäningä cōmāwadingä mīni nē adingä iñōmō ñōwo tæi piñæwacampa. Edæ Itota pōnō cæcä beyæ māni onguñængä nē pōnengä badinque Itota emōwo beyænque ædæmō waa bawate tæi piñængä bacä aminipa,” ante Pegodo apænecantapa.

¹⁷ Ayæ godōmenque apænedinque Pegodo, “Ñōwo botō tōniñamīni eñeedāni. Mīnitō awënëidi eñënāmaï nāni cæi bai cædinque mīnitō iñōmō adobai, Æbānō nō cæquiï, ante eñënāmaï inte cæmīnitapa, ante awædō. ¹⁸ Incæte mīnitō mänömaï eñënāmaï cædinque Wængonguï beyæ nē apænegaināni tōmānāni nāni apænegaï bai do iinque cæmīnipa. Tömēnāni, Mōnō Codito caate wæte wæncæcäimpa, ante nāni angainō bai mīnitō cædi beyæ ñōwo iinque batimpa. ¹⁹ Ìningue mīnitō wænæ wænæ mīni cædinō ante wæwente pōnente ñimpo cædinque wentamō mīni mongænō mīni ñā mēnongaquinque Wængonguï gämænō pōedāni. ²⁰ Mōnō Awënë weca mīni wampo pōnenguinque pōedāni. Ayæ Wængonguï, Mīnitō Codito poncæcäimpa, ante do nānō angaingä inongä inte Itota mīnitō weca poncæcäimpa, ante tōmengä gämænō pōedāni.”

²¹ “Incæte edæ, Tōmancoo do ingai bai adobai bacoocäimpa, ante Wængonguï badoncæcäimpa, ante tæiyæ waemō ingaināni Wængonguï beyæ doyedē apænegadān-impā. Wængonguï mänömaï nānō badompoga Itota iñōmō mānimpoga öönædē quëwencæcäimpa angüenē. ²² Edæ Mōitee wodi, ‘Botō wænte gobo ate mīnitō Awënë Wængonguï wæætē mīnitō beyæ cædinque mīni cabo iñōmīnite adocanque ingante apænte Ao ante æncæcäimpa. Tōmengä ingante äningue, Mōitee wodi botō beyæ nē apænecä ingaingä bai bitō adobai edæ botō beyæ nē apænebi bacæbiimpa, ancæcäimpa. Wængonguï mōnō Codito ingante mänömaï angä iinque tōmengä wæætē nē apænecä bagacäimpa. Ìningue mīnitō iñōmō tōmengä quiēmē ante apæneyongä eamonca ongonte tōmānō ante eñencæmīnimpā. ²³ Ìningue edæ mäningä Wængonguï beyæ nē apænecä ingante æcānō eñënāmaï ina iñōmō, tōmengä guidēnāni weca quëwënāmaï edæ wæncæcäimpa,’ ante Mōitee wodi apænegacäimpa,” ante Pegodo apænecantapa.

²⁴ Ayæ apænedinque Pegodo, “Æpodānidō Wængonguï beyæ nē apænegaināni ināni. Edæ tōmēnāni Tāmoedo tōnō ayæ pōnāni tōnō tōmānāni adoyōmō apænedinque Codito ñōwoönæ nānō cædō ante apænegadānimpā. ²⁵ Ìningue mīnitō guiquēnē Wængonguï beyæ nē apænegaināni wēmīni inōmīni inte tōmēnāni nāni angainō ante nē ænguimīni iminipa. Ayæ edæ Wængonguï, Botō pōnō cæbo ate Ao ämīni iinque mōnō godongāmæ waa cæcäimpa, ante nānō angainō ante mīnitō edæ mīni quëwenguinque eñente quëwencæmīnimpā. Abadäo wodi ingante apænedinque Wængonguï, ‘Abadäo eñēmi. Mīnitō mīni quëwencabo tōnō wadāni tōmāmæ quëwēnāni nāni cabo nāni cabo tōnō tōmāmīni iñōmīnite bitō Pæingä pōnō waadete cæcä beyænque waa quëwëningue tocæmīnimpā,’ ante apænegacäimpa. ²⁶ Wængonguï, Botō Wengä pōnō aa pecä eñëningue mīnitō wæætē wænæ wænæ cæte mīni gogainō ocæ emænte wadæ pōningue wæætē waa quëwenguinō cægōningue waa tocæmīnimpā. Ante cædinque tōmengä tāno mīnitō beyæ ante tōmengä ingante nē cædongä mōnō Codito ingante da pōnongä pongacäimpa,” Ante Pegodo iinque apænegacäimpa.

¹ Pegodo tönö Wäö tömänāni inānite tæcæ apæneyöna wadāni tömēna weca mǎo godongāmæ pönānitapa. Īnāni ĩñömö nē, Wængonguī quī, ante godönāni tönö Tado-teoidi tönö Wængonguī oncö ñænæncö ante nē wææ wānönāni awēnē tönö mānināni pongadānimpa. ² Itota ñāni ömæmongā bai mönö adobai ñāni ömæmongæimpa, ante Pegodo tönö Wäö apænedapa, ante do wædönāni inte tömēnāni ñöwo piinte māmö pönānitapa.

³ Pöninque tömēnāni ĩñāna ĩnate bæi ongönānitapa. Ayæ wēmö ba ĩninqe baānæ ate nāna taquinque tömēna ĩnate tee mönedāni guīdatapa. ⁴ Incæte tömēna āna nē ēñēnīnāni guīquēnē pancadāniya nanguī ĩnāni incæ nē pönēnāni bagadānimpa. ĩninqe onguīñænāni nāni nē pönencabo ĩñömö wodo tinco mūido ganca ĩnāni mānimpodāni bai bagadānimpa.

⁵ Baānæ ate oodeoidi awēnēidi tönö tömēnāni inānite nē aadāni nāni Picæncabo tönö nē odömönāni tönö Eedotadēē ĩñömö godongāmæ ponte ongönānitapa. ⁶ Wængonguī quī, ante nē godongā ñænængā pönī Ānato ponte a ongōñongā tömengā guīdēnāni Caia-pato Wäö Adecantodo tönö wadāni tömengā guīdēnāni incæ tömengā weca godongāmæ pö guīdānitapa. ⁷ Pö guīdinqe edæ Wäö tönö Pegodo ĩnate tæcæguedē māmö gönönāni gongæñöna ānānitapa.

—Mīnatö æcānö tönö tæi piñænte cæmīna ate cömāwadingā waa bawacantawo. Edæ æcānö emöwo apænete cæmīnai.

⁸ Ante āñönāni Pegodo ĩñömö Wængonguī Tæiyæ Waēmö Önöwoca tönö apænedinque,

—Awēnēidi ĩmīni ēñēedāni, nē aamīni mīni Picæncabo ēñēedāni. ⁹ Cömāwaingā æbānö cæte waa bawacāi, āmīnitawo. Edæ cömāwaingā ingante möna waa cædi beyænque mīnitö ñöwoönæ pönö apænte āmīni awædö. ¹⁰ ĩninqe mīnitö tönö idægoidi wadāni tönö botö tömāmīni ĩmīnite adoyömö apænebo ēñencæmīnimpa. Itota Codito Nāatadeta quēwēningā ingante awæ ñænquedīmæ cæte mīni nē wænöningā ingante Wængonguī angā do ñāni ömæmongacāimpa. Tömengā adocā Itota emöwo beyænque cömāwaingā ĩningā tæi piñængā badinque mīnitö weca a ongongā apa ānewēmīni. ¹¹ Edæ wainca nē mænönāni nāni wido cædinca incæ wacā, Tæcæ manca pönī tæi manguimpa, ante cönongampa. Itota ĩñömö māninca bai ææmonga pönī ongongampa.

¹² ĩninqe Itota, Quēwencæmīnimpa, ante mönö ĩmonte ængā bai wacā ædö cæte adobai ænguingā. Itota emöwo beyænque quēwencæmīnimpa, ante pönö cægaingā inte Wængonguī wæætē, Wawo adobai ĩ, ante dicæ pönö cæcantawogaa. Īñæmpa inguipoga tömāmæ ĩñömö edæ æcāmenque incæ adobai nē tæi piñænte emönongā ĩñömö edæ dæ angampa, ante apænedatapa.

¹³ Ayæ Pegodo tönö Wäö önönaque ĩna inte nanguī adāmai ĩna incæte edæ guīñēnāmai edonque apænedapa, ante adinque tömēnāni, Æbānö cæte edæ do ēñēnatawoo, ante wædinqe, Itota mīñæ nē godīna inte do ēñēnāpa. Nāwangā impa, ante wædānitapa. ¹⁴ Edæ cömāwadingā ĩningā tömēnāni weca a ongongā adinque tömēnāni ædö cæte wadö ante tedequīnāni. ¹⁵ ĩninqe tömēna ĩnate, Mönitö godongāmæ Apænte Āincabo weca ongönāmai godömenque goeda, ānāni goda ĩninqe, Tömēna ĩnate æbānö cæquīi, ante pönēninqe godongāmæ tedecönānitapa. ¹⁶ ĩmai ante apænedānitapa.

—Mānīna ĩnate quīnö cæquīmöö. Īñæmpa tömēna tæi piñænte bamönengæ cædatapa, ante Eedotadēē quēwēnāni, Nāwangā impa, ante tömänāni do ēñēnānīpa. ĩninqe, Waa cædāmai ĩnatapa, ante mönö ædö cæte anguīi. ¹⁷ Incæte mānīnö nāni apænedö ante wadāni wīi godömenque ēñencædānimpa, ante wææ cædinqe mönö tömēna ĩnate wææ angæimpa. Māniī emöwo ante mīnatö mīna wæquinque apænēmīnāpa. Wacā æcāmenque ingante apænedāmai ĩmæweda, ante mönö wææ angæimpa, ante nāmāneque tededānitapa.

¹⁸ Ayæ ĩninqe tededinqe Wäö tönö Pegodo ĩnate āñete māmönāni pöna adinque tömēna ĩnate wæætē, Ĕñenguēnē quēwēmīnaa, ānānitapa. Edæ mīna panguinque ante

Itota ëmöwo ante apænemīna. Īncayæ ate tömengä ëmöwo ante apænedinque edæ adopoque incæ odömönāmaï imæeweda. ¹⁹ Ante añönānite Pegodo tönö Wäö wæætë,

–Īñæmpa æcänö ingante ëñente cæquīmōna, ante pönēmīnii. Mīnitö änö ëñëninque wæætë Wængonguï nänö änö ëñënāmaï inte cæmōna adinque Wængonguï edæ, Nö cæmīna abopa, anguingää. ²⁰ Edæ möna adinö ante möna ëñënö ante ædö cæte apænedāmaï inguīmōnaa.

²¹ Ante apæneda ëñente wædinque awënëidi wæætë, Mīni panguinque, ante ancaa apænedānitapa. Incæte wadāni, Cömāiningä ingante Wængonguï waa pōnī cæcantapa, ante watapæ apænedāni ate wædinque awënëidi wæætë Wäö tönö Pegodo ĩnate pancæte ante cædināni inte, Īñæmpa waodāni pīināni ĩninqe mönö æbänö cæte panguīmöö, ante guñente wædinque pänāmaï inte ñimpo cædāni godatapa. ²² Edæ waa nē bawadingä ĩñömö do coadenta wadepo ayæ godömenque tömengä nänö ëñadi ĩñonte Wængonguï bamönengæ cæcä waa bacä adinque tömānāni ædö cæte wadö ante pönenguīnāni.

Wede pönente tæi piñænte cæcæmönimpa, ante Wængonguï ingante apænedānīpa

²³ Mānīi ñimpo cædāni godinque Pegodo tönö Wäö ĩñömö tömēna tönö godongāmæ pönēnāni weca ponte apænedinque, Wængonguï quī, ante nē godōnāni ñænænāni tönö nē aadāni nāni Picæncabo ĩñömö mönatö ĩmōnate ĩmaï änāni wætāmōnāpa, ante tömānö ante adodö ante apæneda. ²⁴ Eñëninque tömēnāni nāni pönencabo adoyömö pönëninque Wængonguï ingante adotedæ tedete apænegadānīpa. “Awënë Wængonguï ëñëmi. Tæiyæ Awënë ĩnōmi inte bitö öönæ owocoo tömancoo inguipoga tömāmæ gāwapæntibæ tömāmæ badöninque öönæde owodāni yæipodë quëwēnāni gāwapāa owodāni æyömömë quëwēnāni tömānāni ĩnānite bitö adobique badongabi-impā. ²⁵ ĩninqe mönitö mæmæ Dabii wodi ingante apænedinque bitö, Dabii ëñëmi, Bitö botö ĩmote nē cædōmi ĩñömite botö Tæiyæ Waëmö Önöwoca apænecä ëñëninque bitö wæætë ĩmaï ante apænecæbiimpā.

‘Wadāni nē ëñënāmaï ĩnāni incæ quīnante ænguī badinque wido cæcæte ante cædānii. Waodāni nāni cabo waodāni nāni cabo incæ idiquibæ ante quīnante pönēnānitawo.

²⁶ Inguipoga awënë odayeidi, Wido cæcæimpā, ante tæi gongænte ongönānīpa.

Pancabaa awënëidi adobai, Æbänö cæquīmöö, ante godongāmæ pönëninque mönö Awënë ingante ayæ tömengä nänö nē öni pæcadongä Codito ingante pīinte änewēnānīpa töö,’ ante apænēbi ëñëninque mæmæ Dabii wodi wæætë bitö beyæ apænecäimpā.”

²⁷ Ante Wængonguï ingante apænedinque ñöwodāni nāni pönencabo godömenque apænedānitapa. “Wængonguï ëñëmi. Tömëmi Wengä bitö Tæiyæ Waëmö ĩnongä ĩñongante bitö, Botö ĩmote nē cæbi bacæbiimpā, ante öni pæcagabiimpā. Nāwangä impā. Incæte bitö ĩmite nē cædongä ĩñongante Itota bitö nē öni pæcadongä ingante edæ Edode tönö Pontio Pidato tönö idægoidi tönö wadāni tönö pīinte adoyömö ponte möni quëwëñömö incæ ongöninque bitö ĩmite nē cædongä ingante, Æbänö cæte wido cæquīi, ante do cædānitapa. ²⁸ Edæ bitö tæi piñæmi ĩnōmi inte nāmā pönëninque edæ, ĩmaï baquīnö angüenë, ante do angabiimpā. Tömēnāni guiquenë bitö angāinö bai wæætë cædinque pīinte pö gongænte cædānitapa. ²⁹ Nöwo ĩñömö bitö ĩmite nē cæmōni ĩñömönite ñöwodāni pönö pīinte änāni ate wædinque bitö wæætë pönö cæbi ate mönitö tæi piñæninqe bitö änö ante guñënāmaï apænecæmönimpa. ³⁰ Ayæ nē wënæ wënæ ĩnāni ĩnānite bitö önompoca pönö gampobi ate waa bacædānīpa, ämönīpa. Ayæ bitö Wengä Itota Tæiyæ Waëmö ĩñongante mönitö tömengä ëmöwo apænedinque, Wadāni pönecædānīpa, ante mä cædinque bamönengæ cæmōni adinque tömēnāni guñente wæcædānīpa ämönīpa,” ante Wængonguï ingante apænedānitapa.

³¹ ĩninqe apænedāni ate tömēnāni nāni godāmæ ongöñömö incæ ĩñontobæ ocæ ocæ cætapā. Cæyö tömānāni ĩnānite Wængonguï Tæiyæ Waëmö Önöwoca pö guicä æninque

ædæmō ēwocadinque tōmēnāni Wængonguī nānō ānō ante guīñēnedāmaī inte edonque apænēgadānimpa.

Tōmāmō mōnō quincōo impa, ante cædānīpa

³² Ayæ tōmānāni nāni pōnencabo incæ tōmēnāni nāni ēwocadō adodō ēwocate bai īnāni inte mīmōnē adodō ante pōnēninque tōmēnāni ēadincoo incæ, Botō quī impa, ante ānāmaī īnāni inte, Tōmāmō mōnō quī impa, ante pæ gompodāmaī īnōnānimpa. ³³ Ayæ Itota nānō da godongāināni īñōmō tæī pīñænte apænedinque, Itota Codito ñāni ōmæmongantapa, ante cōwē nāni apænedī bai apænedōnānimpa. Edæ Wængonguī tōmēnāni īnānite waadete pōnō cæcā ate watapæ quēwēnōnānimpa. ³⁴ Ayæ tōmēnāni nāni cabo incæ æcāmenque ōmæpocā ī īñōmō edæ dæ angantapa. Edæ ōmæ nāni ēadī incæ godonte æninque oncō mænonte nāni ēadī incæ godonte æninque tōmēnāni nāni godonte æninta ænte pōninque ³⁵ Itota nānō da godongāināni weca ænte māmō ñō cædāni æninque tōmēnāni wæætē ōmæpodāni īnānite godōnāni eyepæ eyepæ ænōnānimpa. ³⁶ Īninque Itota nānō da godongāināni īñōnāni adocanque Debii wodi pæingā Ootee ingacāimpa. Tōmengā īñōmō, Wadāni wampo pōnente quēwencædānimpa, ante nē ædæmō apænedongā īñongante wadāni tōmengā ingante Bedēnabee ante pōnō pemongadānimpa. Īingā Ootee Bedēnabee nāni pemōningā īñōmō Tipidebæ quēwente pōningā inte edæ, ³⁷ tōmengā ōmæ ēadī godonte æninque tōmengā nānō godonte æninta Itota nānō da godongāināni weca māmō ñō cægacāimpa.

5

Ānāniya tōnō Tapidæ

¹ Māniñedē Ānāniya nāni ānongā tōmengā nānōogængā Tapidæ tōnō tōmēnāni nāni cæī bai cædinque ōmæ nāna ēadīmæ godonte ænatapa. ² Ayæ nānōogængā ēñēñongā tōmēna godonte nāna æninta incæ Ānāniya īñōmō pancataa pæ gompote æninque wæætē pancataa ænte māmō Itota nānō da godongāināni weca ñō cæcantapa. ³ Ñō cæcā adinque Pegodo,

—Ānāniya ēñēmi. Tatāna ingante ædæmō entawēmi inte ōmæ beyæ bitō æninta pancataa, Botō quī, ante awēmō ñō cædinque edæ pancataa ænte māmō ñō cædinque bitō, Tōmanta impa, ante quīmæ ānewē. Īñæmpa, babæ cædimi inte bitō Wængonguī Tæiyæ Waēmō Ōnōwoca ingante babæ āmīpa tōō. ⁴ Edæ bitō ōmæ īnī incæ bitō quī cōwē intapa. Ayæ ñōwo māninta æninque, Æbānō cæquī, ante tōmēmi nē āmi īmitapa. Īninque edæ mīmōno pōnēninque quīmæ wapiticæ cæbitawo. Bitō mānōmaī cædinque woadāni īnānite wīi babæ apænedinque Wængonguī ingante babæ apænebitapa tōō.

⁵ Angā ēñente wædinque Ānāniya īñōmō tæ wæænte æmæwo wængantapa. Wængā adinque tededāni ēñēninque tōmānāni guīñente wædānitapa. ⁶ Wængā Īninque edēnīnāni ponte wīni caate næænte māo daga wēnānitapa. ⁷ Dobæ wængā ate todee ooda go ate tōmengā æbānō wængā ante ēñēnāmaī Īningā inte tōmengā nānōogængā incæ pō guicā. ⁸ Adinque Pegodo tōmengā ingante,

—Apænebi ēñēmoe. Mīnatō ōmæ godōninque mānimpota æmīnatawoo. Āñongā, Ao, mānimpota.

⁹ Angā ēñēninque Pegodo wæætē,

Mīnatō īñæmpa edæ guēa pōnēninque, Mōnō Awēnē Ōnōwoca æbānō panguingāā, ante quīmæ cæmīnatawo. Edæ bitō nānōogængā baō īnī nē daga wēnīnāni incæ do dao pōnāni ēñēmī. Edæ bitō baō adobaī ænte gocædānimpa tōō.

¹⁰ Tæcæ ante āñongā onquiyængā īñōmō tōmengā ōnōwa gāānē tæ wææninque nāñe wængantapa. Wængā ate māniī edēnīnāni pō guīte ayōnāni dobæ wænte a ōñongā adinque tōmengā baō īnī æninque tōmengā nānōogængā wodido gāānē māo daga wēnānitapa. ¹¹ Mānōmaī nāñe wænāpa, ante tededāni ēñēninque Codito ingante nāni nē godongāmæ pōnencabo tōnō wadāni tōmānāni ancaī guīñente wægadānimpa.

Ate ēñencædānimpa, ante bamōnengæ nangū cædānīpa

¹² Māniñedē Itota nānō da godongaināni iñōmō Wængonguī Ōnōwoca tōnō cædinque, Ate pōnencædānimpa, ante wadāni ayōnāni mā cædinque bamōnengæ nangui cædōnānimpa. Ayæ adoyōmō pōnēninque tōmānāni Wængonguī oncō Tadōmōō yabæcōnē nāni ānōncōnē pō guīi pō guīi cædōnānimpa. ¹³ Wadāni tōmēnāni inānite adinque, Nē pōnēnāni waa quēwēnāni inānīpa, ante pōnēnāni incæte guīñente wædinque godongāmæ pō guīidāmaī gomō adōnānimpa. ¹⁴ Pancadāniya guīquēnē onguīñānāni tōnō onquiyānāni tōnō nangui ināni mōnō Awēnē ingante ñōwo pōnēnānitapa. Īināni iñōmō do pōnēnāni tōnō adocabodāni bacoo ināni bagadānimpa. ¹⁵ Īinque māniī bamōnengæ cædāni adinque wadāni wēnæ wēnæ ināni inānite ænte pōninque mōimoga mōincodē ñō cædānitapa. Edæ, Pegodo nænque pāmo wodo pænta goyongā tōmengā gānēñōmō ōñōninque adocanque adocanque waa bacædānimpa, ante cædinque Pegodo nānō goquīnō ante ænte māmō ñō cædāni ōñōnānitapa. ¹⁶ Ayæ adobaī Eedotadēē eyequeī wayōmō nāni quēwēñōmō wayōmō nāni quēwēñōmō quēwēninque wadāni wēnæ wēnæ ināni inānite næænte māmō næænte māmō cōnōnāni ate tōmānāni waa badānitapa. Ayæ wēnæ nē wentamō ēwocadāni inte yewænte wæwēnāni inānite adobaī ænte māmō pōninque waa badānitapa.

Itota nānō da godongaināni inānite piinte tee mōnedānīpa

¹⁷ Wængonguī quī, ante nē godongā ñænængā pōnī inongā tōnō wadāni tōmengā tōnō godongāmæ cædāni incæ Tadoteoidi inōnāni inte, Nāni ōmāmōnāmaī ingæimpa, ante nē pōnēnāni inōnānimpa. Īinque Itota nānō da godongaināni mānōmaī waa cædāni ate wædinque awēnē tōnō Tadoteoidi iñōmō tōmēnāni inānite piinte agadānimpa. ¹⁸ Īinque Itota nānō da godongaināni inānite yao ongonte æninque tōmānāni ayōnāni tee mōnedānitapa. ¹⁹ Tee mōnedāni wæcōñōnānite Wængonguī anquedo woyowotæ ponte odemō wi ænete mantacā tayōnānite apænecantapa. ²⁰ “Goedāni. Wængonguī oncō ñænæncō yabæcōnē go guīite næ gongæninque mīnitō māniñōmō pōnāni inānite apænedinque, Wængonguī pōnō cæcā beyænque mōnō quēwengæimpa, ante ædæmō apænemini ēñencædānimpa.” ²¹ Angā ēñente cædinque tōmēnāni baōnæ ñāō bayonte Wængonguī oncō ñænæncō yabæcōnē do go guīidinque odōmonte apænedāni ēñēnānitapa.

Mānōmaī do go guīite apænedānīpa, ante ēñēnāmaī ināni inte edæ, Wængonguī quī, ante nē godongā ñænængā pōnī inongā guīquēnē tōmengā tōnō godongāmæ cædāni tōnō adoyōmō pō guīidānitapa. Pōninque tōmēnāni idægoidi inānite nē aadāni Picænāni godongāmæ nāni Apænte Ānōncabo tōmānāni inānite āñete pōnānitapa. Īināni wæætē tontadoidi awēnēidi inānite āninque, Mīnitō tee mōneincōnē gote Itota nānō da godongaināni inānite āñete māmōmīni poncædānimpa. ²² Ānāni tee mōneincōnē gote ayōnāni edæ dæ ānāni ante wædinque wææ wānōnāni awēnēidi gode ancæ pōninque, ²³ Īīmaī ante apænedānitapa.

—Gote ayōmōni oncō ædæmō tee mōnete intapa. Ayæ tontadoidi odemō pōnī a ongōnāni adinque mōnitō go wi ænete guīiyōmōni edæ dæ ānāni ate wædinque wadæ pōmōnīpa. ²⁴ Ante tededāni ēñēninque, Wængonguī quī, ante nē godōnāni ñænānāni tōnō Wængonguī oncō ñænæncō ante nē wææ wānōnāni tæiyæ awēnē tōnō guīñente wædinque, Ñōwo quīēmē baī bacæimpa. ²⁵ Ante wæyōnāni wacā do pō guīidinque tōmēnāni inānite,

—Aquēnē quēwēmīni. Mānināni mīni tee mōnedīnāni incæ Wængonguī oncō ñænæncō yabæcōnē go guīite a ongōninque māniñōmō pōnāni inānite odōmonte apænedāni ēñēnāni ataquēdāni.

²⁶ Ante apænecā ēñente wædinque wææ wānōnāni awēnē tōmengā nānō wææ wānōncabo tōnō Itota nānō da godongaināni inānite æncæ godinque, Godongāmæ ongōnāni incæ piinte tacadāni wæcæ wæ, āninque pānāmaī inte ee ænte pōnānitapa. ²⁷ Ænte pōninque nē aadāni Picænāni godongāmæ nāni Apænte Ānōncabo weca ænte māmō gōnōnāni gongæñōnānite, Wængonguī quī, ante nē godongā ñænængā pōnī inongā iñōmō tōmēnāni inānite angantapa.

²⁸ —Mäningä Itota emöwo apænedinque wadäni inänite odömönämaï imæwedäni, ante ancaa antamönipa töö. Incæte minitö mänine mini odömonte anewenö ante Eedotadëe tömäo odömonte apæneminipa. Ayæ godömenque tedewëninque minitö, Mäningä në wængaingä ingante awënëidi në wænæ wænæ cædinäni inänipa, ante mönitö imönitedö ante anewëminipa töö.

²⁹ Ante në ñænængä piiñongä Pegodoidi wæætë,

—Mönitö quiquënë waomini iminite ëñënämaï inte Wængongui ingante ëñente cæquënëmöni imönipa. ³⁰ Minitö Itota ingante ñænquedimæ timpote wænömöni wængä ate mönö wæmäidi Wængongui incæ angä ñäni ömæmongantapa. ³¹ Ayæ në ñäni ömæmönigä ingante apænedinque Wængongui, Bitö, Quëwencædänimpa, ante në Æmi bacæbiimpa, angacäimpa. Në Æmi inömite idægoidi tömänäni, Idæwaa wænæ wænæ cæte quëwente awädö, ante botö gämænö poncædänimpa, ante cæcæbiimpa. Bitö æmi beyænque botö tömënäni inänite pönö waadete ñimpo cæcæboimpa. Ante cædinque edæ Itota nänö Awënë baquinque Wængongui æmonga ænte mäicä ædinque Wængongui tömëmæ inö tæ contate ongongampa. ³² Itota ingante Wængongui ænte mäicä ægacäimpa, ante në adimöni inte mönitö mäninö ante në apænemöni imönipa. Ayæ në ëñëmö cämö inömonte Wængongui tömengä Tæiyæ Waëmö Önöwoca ingante da pönongä ænte ewocamompa. Tömengä Önöwoca adobaï mönitö tönö godongämæ në apænecä ingampa, ante Pegodoidi apænedänitapa.

³³ Mänömaï apænedäni ëñëninque awënëidi ængui badinque tömënäni inänite edæ wænönæ cædänitapa. ³⁴ Mäniñedë adocanque Paditeocä incæ tömengä emöwo Gämadiedo tömënäni näni wææ angainö ante në ëñengä inongante tömänäni tömengä ingante waa adönänimpa. Ininque tömënäni näni Apænte Äincabo wænönæ cæyönäni mäningä inömö tömënäni näni në waadecä inongä inte ængæ gantidique, Itota nänö da godongainäni inänite oncodo mantamini wantæ ongoncædänimpa. ³⁵ Angä dæ godäni ininque Gämadiedo wæætë awënëidi inänite apænecantapa.

—Idægoidi ëñeedäni. Mäninäni inänite æbänö cæquiï, ante ædæmö pönente ate edæ ee cæedäni. ³⁶ Edæ doyedë wacä Teodo adobaingä ængæ gantidique, Botö në nangui cæbo imopa, ante añongante edæ tömengä miñæ coatodo tiento ganca inäni godänitapa, ante pönëedäni. Tömengä ingante wadäni mäo wænönäni wængä ate tömengä emiñæninäni wæætë näwæ godäni ate edæ dæ batimpa. ³⁷ Ayæ ate edæ awënë, Minitö emöwo ponte yewæmoncæminimpa, ante nänö äniñedë wacä Gadideabæ quëwëningä Oodaa adobaï awënë ingante wido cæcæte ante ængæ gantiyongä nangui inäni tömengä miñæ goyönäni tömengä ingante wænönäni wængä ate näwæ adobaï gogadänimpa. ³⁸ Ininque, Mänömaï batimpa, ante pönente cæedäni. Nöwo inömö inäni adobaï ængæ gantidäni adinque minitö tömënäni inänite ee ate gomö aedäni ämopa. Tömënäni waodänique inte cædäni baï ædö cæte cæquinänii. Edæ dæ bacæimpa. ³⁹ Wæætë Wængongui angä ëñente cædäni baï minitö ædö cæte Baa ante wido cæquimini. Edæ minitö mänömaï cædinque Wængongui ingante piimäni inte wæbäiminipa.

Ante wææ angä ëñente wædinque Ao ante tömengä nänö änö baï cædänitapa. ⁴⁰ Itota nänö da godongainäni inänite aa pedäni pönäni ate awënëidi, Pæedäni, änäni ëñëninque në wææ wänönäni æmontaimenca tæi tæi pänänitapa. Ayæ awënëidi godömenque, Itota emöwo ante apænedämaï imæwedäni, ante äninque Itota nänö da godongainäni inänite ñimpo cædäni godänitapa. ⁴¹ Në Apænte näni Äincabo weca ongonte tao godinque tömënäni wæætë, Wængongui mönö imonte adinque, Botö Wëñængä emöwo beyæ wadäni wænæ wænæ änäni ate minitö eyepæ inte caate wæcæminimpa, ante do cæcampa, ante pönëninque edæ nangui togadänimpa. ⁴² Ininque Wængongui oncö ñænencö yabæcönë incæ waodäni oncönë incæ tömënäni ñimpo cædämaï inte cöwë go guii go guii cædinque cöwë odömonte apænedinque, Itota tömengä näwangä mönö Codito ingampa, ante watapæ apænedäni ëñengadänimpa.

6

Tiæte ganca inäni në nënempodäni badänipa

¹ Itota ingante në tee empote quëwënäni mänñedë nanguï inäni badäni ate pancadäniya guidiego tededö në tededäni iñömö ebedeo tededö në tededäni inänite piinte äinique, Minitö mini cabo owæmpoinäni inänite iimö iñö iimö iñö cænguï eyepæ godöningue möni cabo owæmpoinäni inänite pönönämaï iminipa töö, ante änäni. ² Itota nänö në da godongaïnäni iñömö dote ganca inäni iñönänite wadäni, Dote inänipa, ante pemonte bai apænedönänimpa. Iinäni iñömö guidiegoidi mänömainö ante wädänipa, ante ëñente wædinque wadäni Itota ingante në tee empote quëwënäni inänite äñete godongämæ pönäni ate tömënäni inänite,

—Wængonguï nänö apænedö ante në apænequënëmöni inte mönitö ædö cæte möni cæquënënö ante ñimpo cædinque cænguinque ante godonguïmönii. ³ Iinique botö tönñamini ëñeedäni. Mini pönencabo nämä cöwä adinque, Æcänö æcänö Wængonguï Önöwoca tönö ääwocaque bai ewocate nö cædäni inänii, ante adinque minitö tiæte ganca inäni mänimpodäni inänite apænte æedäni. Apænte æmini adinque mönitö tömënäni inänite, Cænguï në godömini bacæminimpa, ämöni ëñente cæcædänimpa. ⁴ Mönitö wæætë Wængonguï ingante cöwë apænedinque Wængonguï nänö apænedö ante godömenque odömonte apænedinque mäninonque cæte quëwencæmönimpa.

⁵ Mänömainö ante ëñëninque tömënäni nanguï inäni inönäni inte tömänäni Ao ante edæ, Iinäni mänömaï inänipa, ante adinque iimaï ëmönäni inänite apænte ængadänimpa. Adocanque Etebä në wede pönengä inte Wængonguï Tæiyæ Waëmö Önöwoca tönö ääwocaque bai ewocacä inongäimpa. Tömengä tönö Pedipe, Podocodo tönö Nñicänodo, Timönö tönö Padömëna, ayæ Antioquiya iñömö në quëwëningä Nñicodato. Iingä iñömö oodeoidi näni pönënö bai pönengä inte do oodeo bai bacä inongäimpa. Mänimpodäni inänite apænte æänanitapa. ⁶ Apænte æinique Itota nänö në da godongaïnäni weca æente mämö gönönäni ongöñönänite iinäni iñömö, Minitö në godömini bacæminimpa, ante cædinque tömënäni inänite gampodinque Wængonguï ingante apænedänitapa.

⁷ Iinique Wængonguï nänö apænedö ante gode ä gode ä cædinque mäo apænedäni ëñënönänimpa. Iinique Eedotadëë iñömö Codito miñæ näni tee empote quëwencabo tæiyænäni yebænte bagadänimpa. Wængonguï qui, ante në godönäni incæ adobai nanguï inäni wede pönëninque ëñente bagadänimpa.

Etebä ingante bæi ongönänipa

⁸ Etebä iñömö Wængonguï waadete pönö cæcä ate tæi piñænte ewocadongä inte bamönengæ nanguï cædongäimpa. Ayæ, Cæbo ate pönencædänimpa, ante mä cæcä adinque godongämæ ongönäni pancadäniya, Æbänö cæcää, ante wädänitapa. ⁹ Wadäni guiquënë Etebä tönö guëa wæætedö wæætë ancæte ante cædänitapa. Iinäni iñömö oodeoidi inönäni incæ pancadäniya Tidënebæ quëwëninäni iñönäni pancadäniya Adécantodia iñömö quëwëninäni iñönäni pancadäniya Tiditiabæ quëwëninäni iñönäni pancadäniya Atiabæ quëwëninäni inönänimpa. Tömënäni doyedë wadäni inänite në cægainäni inönäni inte ñöwo abæ tawænte godinäni inönäni inte godongämæ pöninque adocabodäni bai badinäni inönänimpa. Tömënäni odömöincö ante, Möni në Abæ Tawænte Gocabo Odömöincö impa, ante pemönönänimpa. Iinique tömënäni pancadäniya Etebä ingante wæætedö wæætë ante cæyönäni, ¹⁰ tömengä në nö ëñënongå inte Wængonguï Önöwoca tönö godongämæ apænecä ëñëninque tömënäni, Æ mönö wæætë ædö cæte wææ anguiï, ante wädänitapa.

¹¹ Iinique në wæætedö wæætë änäni adodäni incæ wadäni inänite godö awëmö änänitapa. Minitö babæ ante i incæte, Mõitee wodi ingante ante Etebä godö wënæ wënæ apænecä ëñentamönipa, ante önonque æedäni. Ayæ Wængonguï ingante adobai tömengä godö wënæ wënæ ante babæ apænecä ëñentamönipa töö, ante incæ æedäni, ante në abæ tawænte godinäni änänitapa. Mänömainö änäni Ao ante tömënäni näni angainö bai cædinque Etebä ingante ante babæ ante piinänitapa. ¹² Mänömainö ante

babæ ante piinani eñëninque wadäni önönäni incae në aadäni näni Picæncabo incae në odömönäni incae tömänäni ænguï badänitapa. Mänömaï ænguï badinque tömënäni Etebä wodi ingante bæi ongonte në Apænte näni Äincabo weca ænte mao gönönäni ongongantapa. ¹³ Pancadäniya Etebä ingante ante babæ apænedinque iïmaï änänitapa. Iingä iñömö ñimpo cædämaï inte cöwë Wængonguï oncö tæiyæ waëmö oncö iñonte wiwa tedewëninque tömengä godömenque Möitee wodi nänö wææ angainö ante godö wiwa ante babæ apænecä eñentamönipa. ¹⁴ Iñömö oncö ante apænedinque adocä Etebä iñömö, Itota Näatadeta në quëwëningä ii oncö bæ tadete wido cæcæcäimpa, ante änewengampa. Ayæ adocä Itota iñömö, Iïmaï cæedäni, ante Möitee wodi nänö wææ angainö ante Ao änämaï inte edæ, Wadö ante cæquënëmini iminipa, ante odö-mongampa, ante iingä Etebä iñömö adobaï änewengä eñentamönipa töö, ante babæ apænegadänimpa.

¹⁵ Mänömaï babæ apænedäni eñëninque në Apænte näni Äincabo incae Etebä ingante cöwä ayönäni tömengä awinca Wængonguï anquedo nänö emönö bai emongä agadänimpa.

7

Etebä nämä wææ apænecampa

¹ Iinque, Wængonguï quï, ante në godongä ñænængä pönï inongä iñömö Etebä ingante äninque, Bitö imitedö näni äninö näwangä intawoo. ² Äñongante Etebä wæätë iïmaï ante nämä wææ apænecantapa. “Botö wæmpoidi eñëedäni. Botö tönïñamini eñëedäni. Mönö wæmäë Abadäö wodi Mëetopotämiabæ ayæ quëwëninque Cadäna iñömö ayæ quëwencæ godämaï iñongante Wængonguï në ñäö apäite bai emönongä inte Abadäö weca ponte a ongongä agacäimpa. ³ Ayæ Abadäö ingante apænedinque Wængonguï, ‘Bitö guidënäni inänite emö cæte bitö ömæ emö cæte godinque wabæca botö odömonguimæca æmäwo wadæ goe,’ angacäimpa. ⁴ Angä eñente cædinque Abadäö wodi mänïömæ Cadeabæ emö cæte wadæ godinque Cadäna näni quëwëñömö ganca pöninque quëwengacäimpa. Ayæ tömengä wæmpo wodi wængä ate Wængonguï tömengä ingante angä eñëninque Abadäö iimæca mönö ñowo quëwëmæ ponte quëwengacäimpa.”

⁵ “Incæte Wængonguï, Tömëmi ömæ, ante Abadäö wodi ingante cabo incae ömæ pönönämaï ingacäimpa. Wæätë Abadäö wodi wëñængä mæmpo inämaï iñongante Wængonguï, Iimæ incae bitö ænguimæ iñonte bitö pæinäni adobæ tömäo quëwencædänimpa, ante odömongacäimpa. ⁶ Ayæ godömenque apænedinque Wængonguï, Bitö pæinäni iñömö wabæca gote mänimæ quëwëñäni weca quëwëñönänite iinäni wæätë bitö pæinäni inänite edæ ö ænte bai cædinque, Mönitö beyænque cæedäni, ante nanguï änäni wæcædänimpa. Ayæ tömënäni nempo wantæpiyæ coatodo tiento wadepo ganca mänimpoga quëwëñönänite adodäni wënæ wënæ cædäni beyæ caate wæcædänimpa. ⁷ Ante Wængonguï godömenque apænedinque, ‘Bitö pæinäni inänite në ö ænte wënæ wënæ cædäni inänite botö wæätë apænte äninque pancæboimpa. Ayæ iincayæ ate bitö pæinäni mänïömæ tömënäni näni caate wædïömæ emö cæte wadæ pöninque iimæca wæätë pöninque botö Wængonguïmö iñömote botö beyæ cæquïnäni inänipa.’ ⁸ Äninque Wængonguï, Mönö godongämæ cæcäimpa, ante pönö cæbo ate minitö wæätë Ao ante eñente cæcæminimpa. Mänömaï ante cædinque minitö onguïñæminique eö togænte caate wædinque eñencæminimpa. Angä eñëninque Abadäö wodi wëñængä Itæca eñacä ate tömengä nänö eñadï adoque Wængonguï itädë go ate tömengä ingante eö togængacäimpa. Itæca wodi pæte wææ Aacobo wæmpo bagacäimpa. Aacobo wodi pæte wææ dote ganca inäni tapæicä wææ mönö wæmäëidi wodi baquinque pægadänimpa.”

⁹ Ante apænedinque Etebä godömenque, “Mäninäni mönö wæmäëidi ingainäni iñömö tömënäni biwï Ootee ingante ante adinque piinte wædinque tigitamö beyænque pædæ godönäni ö æninque Equitobæ ænte mäodäni gogacäimpa. Equitobæ pöninque tömënäni godonte æncæte ante cædinque Ootee wodi ingante mänïñömö quëwengä

nempo pædæ godönäni awënë beyænque cæte quëwengantapa. Mänömaï quëwengä incæte tömengä tönö godongämæ Wængonguï cöwë cægacäimpa. ¹⁰ Ìninqe Ootee wodi ingante nanguï wïwa cædäni wæyongante Wængonguï cöwë wææ aacä quëwengacäimpa. Ayæ Wængonguï pönö apænecä ëñëninque nê ëñente bayongante Equitobæ tæiyæ awënë Padaönö incæ tömengä ingante waa adinque, Botö tæiyæ awënë ïmo baï bitö wodo adobaï badinque Equitobæ wædænque awënë bacæbiimpa. Ayæ adobaï botö awënë onconcoo bitö aacæbiimpa, angacäimpa.”

¹¹ Ante apænecä ëñëñönäni Etebä godömenque, “Mäniñedë Equitobæ tömäo Cänaämæ tömäo to aminte bayonte tepæmpo gæwænte wædönänimpa. Mönö wæmæidi cænguï æncæte ante cædinque ænämaï ïnönänimpa. ¹² Ìninqe, Equitobæ cænguï ayæ mä öñompa, ante tededäni ëñëninque wæmpocä Aacobo wodi mönö mämmæidi nê baquinäni ïnänite äninque, Botö wëmïni, Equitobæ godinque cænguï ænte pöedäni, angä mä gogadänimpa. ¹³ Gote pöninque ayæ wæætë mempoga gote a ongönäni adinque Ootee wodi incæ tömengä mëmöidi ïnänite, Botö mïnitö biwïmo ëñagaimö ïmopa, angä wægadänimpa. Ayæ, Ootee guidënäni do pönänipa, ante tededäni ëñëninque awënë Padaönö ingante gode änäni edonque ëñengacäimpa. ¹⁴ Ayæ ate Ootee wodi tömengä wæmpo Aacobo wodi näni pæincabo tetenta i tinco ganca mänimpodäni äñecä gogadänimpa. ¹⁵ Aacobo wodi mänömaï Equitobæ gote quëwëninque wængacäimpa. Ayæ tömengä pæinänï wææ mönö wæmæidi ingainäni inte adobaï mäniñömö gote quëwente wængadänimpa. ¹⁶ Abadäo wodi wëenëñedë, Mönitö wodido, ante Caämodo wënäni näni änimputa mänimputa godonte äninque Tiquemö ïñömö ömæ godonte ænongäimpa. Ante do againäni inte mönö wæmæidi ñöwo Aacobo wodi bayetoca ingaï Cänaämæ ænte pöninque, ayæ ïincayæ ate wææ tömengä wënäni bayetoca ingaï Abadäo wodi nänö ængaimæ tömënäni wodido ingaïñömö mämö daga wængadänimpa.”

¹⁷ Ante apænedinque Etebä godömenque apænecantapa. “Abadäo wodi ingante Wængonguï wëenëñedë nänö, Botö wantæpiyæ ate bitö pæinänï ïnänite adodö ænte mämömo poncædänimpa, ante nänö angaïñedë wodo ïninqe bayonte tömënäni Equitobæ quëwëninque nanguï bacoo yebænte bagadänimpa. ¹⁸ Mäniñedë wacä onguïñängä ñöwocä incæ, Ootee wodi æcänö ingacäi, ante ëñëñämaï ïnongä inte Equitobæ awënë bagacäimpa. ¹⁹ Tömengä ïñömö mönö guidënäni wodi ïnänite wapiticæ ante wënæ wënæ cægacäimpa. Tömengä, Mïnitö wëñænäni tæcæ ëñadäni ïnänite wido cæedäni, ante pïingä ëñente wædinque mönö wæmæidi wodi incæ tæcæ ëñadäni ïnänite yabæque wido yabæque wido cædäni wængadänimpa.”

²⁰ “Tömënäni mänömaï näni cægaiñedë incæ Möitee wodi ëñate pægacäimpa. Tömengä waëmö wëñæ ïñongante Wængonguï waa acampa, ante pönëninque mëa go adoque apäicä go ate tömengä ingante mæmpo oncönë pæ gompote pæpogada pæcantapa. ²¹ Ayæ, Wænönäni wæncæ wæ, ante guiñente cædinque tömëna tömengä ingante yabæque gäwapæ yædopæ wo cæda ongöñongante awënë Padaönö wengä onquiyängä adinque, Botö wë, ante cædinque Möitee ingante ænte pæpogacä pægacäimpa. ²² Mänömaï cæcä beyæ equitoidi näni ëñengainö ante tömänö ante odömönäni ëñente pædinque Möitee wodi nê angä baquinque nanguï cæcä baquinque tæi pïñænongä inte pægacäimpa.”

²³ Ante Etebä godömenque apænedinque, “Ayæ æmæwo pædinque coadenta wadepo nänö ëñagaiñedë Möitee wodi, Idægoidi botö tönïñadäni ïnänite ëñacæ gobote, ante ëñacæ gocantapa. ²⁴ Gote ëñayongä, Equito onguïñängä incæ botö guidengä ingante wïwa cæcä caate wæcampa, ante adinque Möitee wodi tömengä guidengä ingante wææ cæcæte ante cædinque tiyænö tiyæ cædinque Equito onguïñängä ingante wænongä wængacäimpa. ²⁵ Edæ, Wængonguï botö ïmote äninque, Bitö idægoidi ïnänite ö ænte mäobi wadæ gocædänimpa, ante do angä ëñentabopa, ante do ëñëningä inte Möitee wodi, Idægoidi adobaï ante ëñente pönencædänimpa, ante pönente cæyongä tömënäni wæætë mäninö ante ëñëñämaï ingadänimpa. ²⁶ Mänömaï ï ïninqe Möitee wodi ïimö ate ponte ayongä idægoda wæætedö wæætë cæda adinque, ‘Ïñäna, mïna guidencaya

incæ wacä ingante quimæ wænæ wænæ cæte quëwëmīnaa.’ ²⁷ Ante, Guëa waa waadete quëwencædaimpa, ante cæyongä adocanque tömengä guidengä ingante nê wænæ wænæ cædingä guiquënë Möitee wodi ingante bæ tadinque angantapa. ‘Înæmpa, Bitö mönitö awënë inömi imipa, ante, Nê apænte ämi imipa, ante æcänö bitö imite nê änaï. ²⁸ Edæ Equito ingante iimö bitö wænömi bai ñowoönæ adobai botö imote wænoncæte ante pönëmi awædö.’ ²⁹ Angä ëñente wædinque Möitee wæætë wodii winongacäimpa. Wodii winonte wabæca Mäadiämæ gote wadäni ömæ quëwëninque wëñæna mënaa wæmpocä bagacäimpa.”

³⁰ Ante apænedinque Etebä godömenque awënëidi inänite iimaï ante apænecantapa.

“Ayæ wæætë coadenta wadepo go ate Möitee wodi önömæca cægöninque onquiyabo Tinaiquidi gämænö gote dadi ëmænte ayongä ocãñequiwæ gonga bæcoyömö Wængonguï anquedo ponte a ongongä agacäimpa. ³¹ Ate wædinque Möitee wodi, Quinö bai inte bæco ante botö wiimonte bai aboo, ante acæte ante pönömenque pönongante mönö Awënë tömengä ingante iimaï ante apænegacäimpa. ³² ‘Bitö wæmæidi Wængonguïmo inömo inte botö Abadäo wodi Itæca wodi Aacobo wodi Wængonguïmo inömo imopa.’ Ante apæncä ëñente wædinque Möitee wodi do do wæte guñente wædinque, Wii aïnente awædö, ante cægacäimpa. ³³ Mänömaï cæyongante mönö Awënë wæætë, ‘Bitö næ gongænte ongöñömö botö adoyömö ongömo beyænque onguipoi tæiyæ wæmö impa, ante pönëninque bitö awæncata gä tadöwæe ämopa. ³⁴ Botö edæ cöwä adinque, Botö quinäni inänite equitoidi æbänö wænæ wænæ cædänii, ante do abopa. Tömënanï caate ö ö wädäni do ëñente wædinque botö, Ñimpo cæbo ate abæ tawænte gocædänimpa, ante wææ pömo imopa. Ñöwo iñömö edæ ægodöe. Botö, Equitobæ gocæbiimpa, ante bitö imite adodö da godömo gocæbiimpa,’ ante Wængonguï Möitee wodi ingante angacäimpa.”

³⁵ Ante apænedinque Etebä iimaï ante godömenque apænecantapa. “Adocä Möitee ingante piiniquine idægoidi doyedë, ‘Înæmpa, Bitö mönitö awënë inömi imipa, Nê apænte änömi imipa, ante æcänö bitö imite nê änaï,’ ante änönänimpa. Ñöwo iñömö Wængonguï anquedo ocãñequi iñömö pöninque tömënanï nänï nê piingaingä adocä Möitee ingante, Bitö idægoidi awënë bacæbiimpa, angacäimpa. Bitö tömënanï inänite ö æninque ænte mäobi abæ tawænte gocædänimpa, ante cædinque Wængonguï bitö imite da godongä gocæbiimpa, ante Wængonguï beyæ apænedinque Wængonguï anquedo angacäimpa. ³⁶ Möitee iñömö, Ate pönencædänimpa, ante mä cædinque ayæ Wængonguï tönö bamönengæ nanguï cædinque idægoidi inänite ænte mäocä gogadänimpa. Equitobæ ëmö cæte wadæ pöninque gäwapæntibæ Opatawæmæ yæwedecapæ pö ongöninque adocä Möitee mantacä imæmæa pongadänimpa. Önömæca ta pöninque coadenta wadepo ganca cægöñönäni tömengä, Ate pönencædänimpa, ante mä cædinque bamönengæ nanguï cægacäimpa,” ante Etebä wodi apænecantapa.

³⁷ Ayæ, “Adocä Möitee, Idægoidi ëñëedäni. Botö Wængonguï beyæ nê apænebo imo bai wacä edæ mīnitö tönīnacä incæ adobai edæ Wængonguï beyæ nê apæncä bacæcäimpa. Tömengä ponte apæncä ëñëninque mīnitö tömengä ingante ædæmö ëñente cæcæmīnimpa, ante Möitee wodi apænegacäimpa. ³⁸ Godongämæ nänï Wængonguï ingante apæneincabo tönö Möitee wodi önömæca cægöngäimpa. Mönö mæmæidi tönö cægöñönäni Wængonguï anquedo wëñëñedë Tinaiquidi nê ponte äningä incæ adocä tönö Möitee wodi önömæca cægöngäimpa. Mänīñedë mönö imonte ante pönö cædinque Wængonguï, Möitee ëñëmi, angacäimpa. Ìncayæ quëwenguinänï ëñente quëwencædänimpa, ante cædinque botö, Mīnitö cæte quëwenguimīni, ante apænebo ëñëninque bitö adodö ante yewæmoncæbiimpa, ante apænegacäimpa,” ante Etebä apænecantapa.

³⁹ Ayæ, “Möitee wodi mänömaï cæyongante mönö wæmæidi guiquënë ëñënamäi inänï inte tömengä ingante Baa äninque Equitobæ mönö adodö gocäimpa, ante önöwënenque pönente wægadänimpa. ⁴⁰ Mänömaï nê wædönäni inte tömënanï wæætë Aadöo wodi ingante apænedinque, ‘Aadöo ëñëmi. Mäningä, Equitobæ nê ëmö cæte mönö

imonte mämöningä Möitee wodi ædönö gote dæ angää, ante adämaï imönipa cæbii. Wængonguïidi inänipa, ante mönö imonte në töö æmænte ænte goquinäni ante bitö badömi æmönie.’ ⁴¹ Äninqe mäniñedë, Mönö wængonguï ingampa, ante cædinque tömënäni wagada wë bai badongadänimpa. Ayæ, Mönö wængonguï quï impa, ante cædinque cæninäni wænöninge baö tömënäni näni badöinca gäänë ænte mämö ñö cædinque önompoca näni badöinca adinque ææmæ bai cæte togadänimpa. ⁴² Mänömaï cædäni ate wædinque Wængonguï näëmæ, Pönë cæmïniyaa, ante piingacäimpa. Ayæ, ñinäni öönädë owocooque ante, Wængonguïidi inänipa, ante oda cæcædänimpa, ante cædinque idægoidi inänite ñimpo cædinque dadi ëmæninque aadämaï ingacäimpa. Edæ mäninö tömënäni näni cægainö bai ante pönente yewæmöninque wacä wantæpiyæ ate Wængonguï beyæ iïmaï ante yewæmongacäimpa.

‘Idægoidi ëñeedäni. Önomæca gote coadenta wadepo ganca cægöninge mïnitö, Wængonguï qui, ante pönoncæte ante cædinque cæninäni wænöninge baö tönö mäincoo ænte pö ænte pö cæmïni incæte dicæ botö imote ante pönëninge pönömini æntawogaa.

⁴³ Ñæmpa, Mönö wængonguïidi inönänite ædæ wæænte apænecäimpa, ante cædinque mïnitö mïni badöinca adoca Mönoco mïni änonca beyæ æmontaicö oncö næænte godinque wocæ wocæ cædömini awædö.

Ayæ waca, Möni wængonguï Adempaö nëmö bai owocäimpa, ante mïni badöinca næænte æmonga cö cæ cö cæ cædöminimpa töö.

Ante adinque Wængonguï, Mänömaï cæmïni beyæ botö mïnitö imïnite Babidönia ganca da godöninge godömenque gobæ da godömo gocæminimpa,’ angampa, ante yewæmongatimpa.” Ante apænedinque Etebä, Mönö wæmæidi iïmaï cægadänimpa, ante godömenque apænecantapa.

⁴⁴ “Wængonguï doyedë Möitee wodi ingante apænedinque, Mïnitö æmontaicö mænonte ate botö wææ ante yewæmöninca cö cæte mancæminimpa. Iïmaï mænoncæminimpa, ante odömongä adinque Möitee wodi wæætë mönö wæmæidi inänite odömongä ate ëñëninge tömënäni wæætë Wængonguï nänö odömönö bai mänömaïnonque æmontaicö mænongadänimpa. Mänömaï mænonte ate dica wææ ante Wængonguï nänö yewæmongainca incæ mänincönë cö cægadänimpa. Ayæ önomæca wayömö wayömö gocæte ante æmontaicö capote mongænte mao wocæ wocæ cægadänimpa. ⁴⁵ Ayæ wadäni mäniömæ në quëwënäni inönänite Wængonguï wido cæcä ate mönö wæmæidi Ootowee wodi miñæ ponte ömæ æninque Wængonguï oncö æmontaicö näni ænte mongængaincö mämö wodongadänimpa. Wodönäni ate Awënë Dabii wodi nänö ëñate quëwenguimpoga mänincö æmontaicö incæ ayæ a owogatimpa. ⁴⁶ Awënë Dabii ingante Wængonguï pönö waa agacäimpa. Ininqe Dabii wæætë Wængonguï ingante apænedinque, Bitö Aacobo wodi Wængonguï inömi imipa, ante adinque botö, Bitö quëwenguïñömö, ante oncö ämi mænonguïmo, añongante Wængonguï Baa angacäimpa.

⁴⁷ Wæætë Tadömöö wodi Wængonguï beyæ në oncö mænongä ingacäimpa. ⁴⁸ Mänömaï cægainäni incæte Wængonguï inömmö edæ æmonga pönï në ongongä inte waocä nänö önompoca mænönincönë ædö cæte pönö Ao ante guite quëwenguingää. Mänömainö ante pönente wædinque Wængonguï beyæ në apænegaingä iïmaï ante apænecäimpa.

⁴⁹ ‘Botö në Tæiyæ Awënë inömo inömmote öönæ incæ botö Awënë tæ contaqui bai impa, inguipoga wæætë botö önöwa podöwate qui bai impa.

Mänömaï në ongömo beyæ mïnitö botö oncö ante ædö cæte mænonguïmïni.

Inguipoga æcönënë guidinque guëmanguïmo, ante Wængonguï angampa.

⁵⁰ Botö inæmpa tömëmö önompoca tömää në badongaimo inömo imopa,’ ante Wængonguï Awënë angampa, ante wacä yewæmongacäimpa.”

⁵¹ Ante apænedinque Etebä godömenque iïmaï ante apænecantapa. “Ñöwo ëñeedäni. Mïnitö mïmö ömæde imïni inte wïi pönencædö. Önömoncaque ëñëninge wïi ædæmö ëñëmïni imïni awædö. Mïnitö wæmæidi näni cægainö ante ëñëmïnitawo. Inæmpa tömënäni näni cægai bai adobai cædinque mïnitö Wængonguï Tæiyæ Waëmö Önöwoca

ingante Baa äninque cöwë wææ äminipa töö. ⁵² Minitö wæmæidi doyedë Wængongui beyæ nê apænegainäni inänite togænte päninque adocanque ingante ata cæpodämaï inte tömänäni inänite togænte pangadänimpa. Edæ nê apænedäni, Nê nö entawëongä inte ponguingä ingampa, ante apæneyönänite tömënäni inänite do wænönäni wængadänimpa. Nöwo iñömö tömënäni näni, Ponguingä, angaingä incæ do pongä adinque minitö godö wænöminitapa töö. ⁵³ Edæ, İmaï cædäni, ante Wængongui wææ angampa, ante Wængongui anquedoidi änäni ëñëninque yewæmönäni ate minitö nê adömini incæ Baa äninque ëñënämaï cöwë cæminipa töö,” ante Etebä iinque apænecantapa.

Etebä ingante wænönäni wængampa

⁵⁴ Mänii awëneidi guiquënë Etebä nänö apænedö ante ëñente wædinque äinäni badinque бага wentoquënë wentoquënë angate piinänitapa. ⁵⁵ Etebä iñömö Wængongui Tæiyæ Waëmö Önöwoca ingante ædæmö ewocadinque öönæde inö æmö adinque Wængongui ñäö apäite bai nänö emönö acantapa. Ayæ nê Waocä ëñagaingä inte Itota incæ Wængongui tömëmæ inö adiyæ ongongä acantapa. ⁵⁶ Adinque,

—Badogaa, öönæde wi ænete bai ba abopa. Waocä nê ëñagaingä incæ Wængongui tömëmæ inö adiyæ ongongä abopa.

⁵⁷ Ante apænecä ëñente wædinque tömënäni piinte Yæ yæ äninque ëñënämaï cæcæte ante önömonca ñi mämoncate cædänitapa. Godongämæ piinte quingæ tömengä weca pogodo pöninque, ⁵⁸ tömengä ingante bæi ongöninque tömënäni näni quëwëñömö yabæque ænte mäo dicaca tæi tacacæ cædänitapa. Tömengä æbänö angää, ante ëñëninäni inte nê apænedäni iñömö edæ tacacæ cædinque tömënäni wecoo yabæcooque gä tadongate tæcæ æmæwo pædingä Taodo näni änogä önöwaca inö ñö cædönänimpa. ⁵⁹ Dicaca tacayönäni Etebä iñömö Wængongui ingante apænedinque, “Awënë Itota, bitö botö önöwoca æncæbiimpa.” ⁶⁰ Ante da guicapodique yedæ äninque, “Awënë, tömënäni näni wënæ wënæ cædönö ante ee ae,” äninque edæ mö ñonte bai wængacäimpa.

8

¹ Etebä wodi ingante wænoncæte ante dicaca tacadäni adinque Taodo guiquënë, Waa wænömüni wængampa, ante Ao ante ongongacäimpa.

Nê godongämæ pönëinäni inänite Taodo togænte pangä

Mäniiönæ incæ mä togænte päninque Eedotadëe iñömö Codito ingante näni nê godongämæ pönencabo inänite godömenque nanguï togænte piinte pangadänimpa. Ate wædinque Itota nänö nê da godongainäni que godämaï ongöñönäni wadäni iñömö näwæ wodii winöninque Oodeabæ Tämadiabæ æmænö æmænö gogadänimpa. ² Mänii Etebä wodi ingante æmæwo wænönäni wængä ate Wængongui ingante nê waa adäni incæ Ca ca wædinque mäo daga wenänitapa. ³ Taodo guiquënë, Itota ingante nê pönëinäni inänite wido cæcäimpa, ante nanguï wënæ wënæ cædinque wacönë pö guii wacönë pö guii cædinque onguiñänäni tönö onquiyänäni inänite bæi ongonte wëä mäo tee mönegadänimpa.

Tämadiabæ godinque Pedipe apænecä ëñënäni

⁴ Mänii nê wodii winönäni iñömö ædömë godinque Codito ingantedö ante cöwë watapæ apænedäni ëñëñönänimpa. ⁵ İninque Pedipe iñömö Tämadia näni nanguï quëwëñömö gote apænedinque, Mönö Codito æbänö do ponte cægacäi, ante apænecä ëñëñänitapa. ⁶ Mänömainö ante apænedinque tömengä, Ate pönencædänimpa, ante mä cæcä adinque nanguï inäni adoyömö pönëninque, Mönö ëñengäimpa, ante cædänitapa. ⁷ Waodäni nanguï inäni wënæidi wentamö ewocadäni tönö quëwënäni adinque Pedipe angä ëñëninque wënæidi incæ Yæ äninque dæ tao godäni ate önönäni que badänitapa. Ayæ cömäinäni incæ cabäinäni incæ tæiyänäni inänite Pedipe cæcä ate waa badänitapa. ⁸ Ante adinque mäniñömö quëwënäni wæætë watapæ togadänimpa.

⁹ Wacä idö tömengä emöwo Timönö iñömö tömengä adoyömö quëwëninque wënæ tönö wantæpiyæ cæcä inongäimpa. Ìnque Tämadiabæ quëwënäni tömänäni, Æbänö nangui cæcää, ante guñente wæyönänite tömengä, Në idömo inömo inte botö iñömö edæ nangui cæte beyæ ñæñæmo pöni imo aedäni. ¹⁰ Angä ëñëninque awënëidi incæ önönänique incæ tömänäni adoyömö pönëninque, “Wængongui nänö tæi piñænö bai entawëninque ingä idö iñömö në Tæi Piñænongä ingampa,” ante pönëwëninque, Në Ñænængä pöni inongä ingampa, ante pemongadinque tömengä apænecä ate ædæmö ëñënonänimpa.

¹¹ Ayæ tömengä wantæpiyæ wënæ tönö wæætë wæætë mä cæcä adinque tömënäni, Tömengä ingante mönö ëñengäimpa, ante tee empo tee empo godönänimpa. ¹² Mänömaï cæyönänite Pedipe guiquënë, Wængongui Awënë Odeye nempo mönö quëwengäimpa, ante watapæ apænecä ëñënanitapa. Ayæ, Mönö Codito iñömö tömengä emöwo Itota emongampa, ante apænebo ëñëedäni. Ante apænecä ëñëninque onguiñænäni incæ onquiyænäni incæ wede pönëninque æpænë guidänitapa. ¹³ Ìnque Timönö incæ adobai pönëninque æpænë guidinque Pedipe miñæ tee empo tee empo gocantapa. Pedipe, Ate pönencädänimpa, ante mä cædinque tæi piñænte nangui cæcä ate wædinque Timönö adocä cöwë guñente wægacäimpa.

¹⁴ Ìnque, Tämadiabæ quëwënäni Wængongui nänö apænedö ante ëñëninque do Ao änänipa, ante Eedotadëe ponte tedeyönänite Itota tömengä nänö da godongainäni incæ do ëñënanitapa. Æñëninque Pegodo tönö Wäö inate Tämadiabæ da godönäni godatapa. ¹⁵ Godinque Tämadiabæ pöninque tæcæ mä pönënäni beyæ ante tömëna Wængongui ingante iïmaï ante apænedatapa. Wængongui ëñëmi. Bitö Tæiyæ Waëmö Önöwoca ingante tömënäniya da pönömi pö guicä ate ewocacädänimpa, ämönapa. ¹⁶ Edæ Awënë Itota emöwo apænedinque tömënäni mä æpænë guiyönänite bitö Tæiyæ Waëmö Önöwoca tömënäniya wææ guidämaï ingantapa cæbii. Nöwo ämi pö guicæcäimpa. ¹⁷ Ante apænedinque Pegodo tönö Wäö tömënäniya pönö gampote apæneyöna Wængongui Tæiyæ Waëmö Önöwoca pö tömënäni baonga guicantapa.

¹⁸ Mänömaï pönö gampoyöna Wængongui Tæiyæ Waëmö Önöwoca tömënäniya pö guicä ate wædinque Timönö guiquënë tömënäni godonte äinta pædæ pönöninque, ¹⁹ tömëna inate,

—Mīnatö bai botö adobai në cæbo bacæboimpa ämopa. Pönö cæmīna ate botö në cæbo badinque wadäniya pönö gampobo ate Wængongui Önöwoca adobai pö guicæcäimpa, ämopa.

²⁰ Äñongante Pegodo,

—Bitö mīni godonte äintaque pædæ godöninque, Wængongui Önöwoca nänö da pönönongä ingante æncæboimpa, ante pönëwëmi. Edæ tömëmi tigitamonque nææninque edæ bitö ömæe ewenguinque gobäwe. ²¹ Ìñæmpa, Wængongui Önöwoca nänö da pönönongä ingante æninque godongämæ cæcæboimpa, ämitawoo. Wængongui ayongä nö pönente cæbipa ænguimii. Edæ mönatö tönö ædö cæte cæquimii. ²² Nöwo edæ mäninö bitö wiwa cædinö ante wæwente pönëninque ñimpo cæe. Ayæ mönitö Awënë ingante apænebi ëñëninque tömengä wabänö pönö waadete cædinque mīmōno bitö pönëwënö ante wadæ cædinque ñimpo cæbaingampa. ²³ Bitö nämä beyænque ante në äinëmi inte bitö mīmōnë guinämæ entawente bai quëwëmipa. Ayæ bitö tömëmi wiwa cædö beyænque ñä cæyænte bai quëwëmipa, ante awædö.

²⁴ Angä ëñëninque Timönö wæætë,

—Æ ämi awædö, äninque Pegodo ingante, Botö mīnatö änö bai wiï bacæboimpa, ante cædinque mīnatö botö beyæ Wængongui ingante apæneeda, angantapa.

²⁵ Ayæ Wäö tönö Pegodo iñömö, Itota incæ mönö Codito ingaingä ingampa, ante mäninö quëwënäni inänite mönö Awënë nänö änö ante apænedä ëñënanitapa. Ìnque apænedinque adodö Eedotadëe gocæte ante wadæ gote Tämadiabæ godinque tömëna wayömö wayömö mäo wædænque quëwënäni weca pö pö cædinque nangui inäni inänite apænedinque Codito ingantedö ante watapæ apæneda ëñënanitapa.

Etiopæbæ awënë ingante Pedipe bee tengampa

²⁶ Māningä Pedipe ingante anquedo ayæ ate ponte äninque, “Bitö ægodöe, Eedotadëe wæi Gata goquïnö pædæ taoquinque betamonca gocæbiimpa,” angantapa. Māninö önömæcaque wæidö inompa. ²⁷ Mānōmaïnö angä ëñëninque Pedipe ængæ gantidique wadæ godinque anquedo nänö äninonque cægonte ayongä onguïñængä Etiopæbæ quëwëningä pö eyepæ bee tengä acantapa. Ìingä ïñömö Etiopæbæ tæiyæ awënë onquiyængä Cantate beyæ tömënäni godonte æinta në aacä ïnongä inte ñænæ awënë ïnongäimpa. Tömengä ñowo Wængonguï weca ædæ wæäninque watapæ apænecæte ante Eedotadëe æidingä inte ocæ ëmænte pöninque Pedipe ingante eyepæ mämö bee tengantapa. ²⁸ Ìingä ïñömö cabayo nänö wëä pönoncadea æi tæ contate ocæ ëmænte pöninque Itaiya wodi Wængonguï beyæ në apænegaingä nänö yewæmongainta næænte a congantapa.

²⁹ Mānōmaï a conte pöñongante Pedipe ingante Wængonguï Öñowoca, “Goe, Ìi cabayo nänö wëä pönoncade eyepæ godinque guëa goe,” angantapa. ³⁰ Angä ëñëninque Pedipe pogodo godinque obo ponte ëñëñongä Etiopæbæ awënë ïñömö Itaiya wodi nänö Wængonguï beyæ yewæmongainta adinque apænecä ëñëninque,

—Bitö ate apænedö ante ædæmö ëñëmitawo.

³¹ Äñongante,

—Ïñæmpa ëñëmogaa. Botö ïmote apænedänipa ëñënguïmoo.

Ante apænedinque Pedipe ingante, Bitö botö weca ææ guiite tæ contae, angä ææ gui tæ contacantapa.

³² Māninta Wængonguï angä ëñente nāni yewæmongainta Etiopæbæ awënë nänö aintaa ïmaï ante yewæmonte ongönönimpa.

“Codotedo ingante wænongæimpa, ante bæi ongonte æninque töö godonte bai cædinque

tömengä ingante adobaï wænnoncæte ante bæi ongonte ænte godänitapa.

Obegaidi ocaguincoo ëö toyönäni wædämaï pæ wëenecä bai

tömengä adobaï wædämaï inte pæ wëenecantapa.

³³ Piiinte änäni wæyongante në apænte angüenänäni incæ, Pangæimpa, ante cædinque nöingä ante änämaï ïnänitapa.

Tömengä ingante æmæwo wænönäni wængaingä ïñongante,

Tömengä nänö pæinäni, ante ædö cæte apænequiï.”

³⁴ Ante nāni yewæmongainö adingä inte Etiopæbæ awënë ñowo Pedipe ingante,

—Apænebi ëñëmoe. Në Wængonguï beyæ apænegaingä ïñömö æcänö ingante ante në apænecäi. Tömengä nämä ingante ante yewæmongantawo. Edæ wacä ingante ante yewæmongantawo, ante ëñencæte ante wæbopa.

³⁵ Ante äñongante Pedipe ïñömö Etiopæbæ awënë nänö adinta adotaa ate apænedinque ayæ wataa wataa adinque Itota ingantedö ante watapæ apænecä ëñengantapa.

³⁶ Apæneyongä taadö godinque wapæ ganca pönatapa. Equitobæ awënë mänimæ adinque Pedipe ingante, Waa ae. Ìñömö gäwapæ impa. Æpænë guidämaï inguïmo, ämitawoo.

³⁷ Angä ëñëninque,

—Bitö mïmöno wede pönëmi ate botö Ao ämäimopa, angantapa. Äñongante,

—Ao botö, Itota Codito näwangä Wængonguï Wengä ïnongä ingampa, ante wede pönëmopa.

³⁸ Äninque Etiopæbæ awënë angä cabayo næ gongæ ate Pedipe tönö guëa æpænë ti wæænna ate Pedipe tömengä ingante æpænë guidongä guiicantapa. ³⁹ Ayæ æpænë guiite ate tömengä tao gongæñongä Wængonguï Awënë Öñowoca Pedipe ingante ïñæ æænonte ö ængä. Ate æmæwo adinque Etiopæbæ awënë watapæ todinque oncönë goinö gocantapa. ⁴⁰ Pedipe guiquënë Atota ïñömö ïñontobæ a ongöninque godömenque wadäni nāni quëwëñömö go apænedinque wayömö nāni quëwëñömö go apænedinque Tetadea ganca godinque Codito ingantedö ante watapæ apænecä ëñengadänimpa.

9

*Awënë Itota ingante Taodo acampa
(Nāni Cægainö 22.6-16, 26.12-18)*

¹ Taodo guiquënë mönō Awënë ingante nē tee empote quēwēnāni inānite pūinque, Wænongæimpa, ante bæi ongō bæi ongō cædinque cōwē nīmpo cædāmaī ingacāimpa. Nōwo godōmenque cæcæte ante Wængonguī oncōnē gote nē godongā nænængā pōnī inongā ingante apænedinque, ² Awënë ēñēmi, angantapa. Bitō Ao āmi ininque botō Daāmaco nāni quēwēñōmō gote ayōmo, Onguīñænāni incæ onquiyænāni incæ æcāmenque Itota Taadō ante nē godāni inānī, ante adinque tōmēnāni inānite bæi ongote goti winte Eedotadē ænte pōmaīmopa. Ininque bitō, Taodo mænōmaī cæcæcāimpa, ante botō beyæ cadota ante yewæmōninque pædæ pōnōmi æninque botō wæætē Daāmaco iñōmō māo oodeoidi odōmōincōnē awēñēidi weca gote pædæ godōmo ænte adinque tōmēnāni Ao āñōnāni mænōmaī cæbaimopa. ³ Åñongā awënë Ao ante yewæmōninque pædæ pōnongā æninque Taodo Daāmaco obo gote ayongante iñontobæ öönædē inō nāinte baī cædinque tōmengā nānō ongōñōmō tōmāo guīnæ gongæ. ⁴ Adinque Taodo guidōmēmæ tæ go wæængantapa. Ayæ wæænte öñōñongante tōmengā ingante, “Taodo. Taodo. Quīnante botō imote togænte pāmīi.”

⁵ Angā ēñente wædinque Taodo wæætē, “Awënë, æmōmidō inōmi imīi.” Ante ēñēñongā, “Botō Itotabo inōmo inte bitō nē togænte pānīmo mānīmotō imopa cæbīi. Iñæmpa wagada päintoca baī bitō nāmā iñæ æwate baī cædinque cowate baī edæ caate baī wæbipa tōō.” ⁶ Mænōmaī apænecā ēñēninque Taodo ancaī guīñente do do wæadinque, “Awënë, æbānō cæquīmo āmīi.” Åñongante mönō Awënë wæætē apænecantapa. “Bitō ængæ gantidinque iñāni nāni quēwēñōmō goe. Botō, Taodo iīmaī cæcæcāimpa, ante wacā ingante Daāmaco iñōmō nē quēwengā ingante do apænebo ēñengampa cæbīi. Bitō Daāmaco iñōmō gote ongōñōmi tōmengā wæætē bitō imite apænecā ēñente cæcæbiimpa.”

⁷ Taodo tōnō godongāmæ godāni guiquënë waocā ingante adāmaī ināni incæte, Önonque tempa, ante pōnēninque ancaī guīñente wædānitapa. ⁸ Taodo iñōmō onguipoga ayæ a öñongā inte ængæ gantidinque awinca adāmaī ingā adinque wadāni tōmengā ingante önonpo bæi ongōninque Daāmaco ganca ænte mæodāni gocantapa. ⁹ Māniñōmō gote ongōninque tōmengā adāmaī inongā inte cænāmaī bedāmaī mēōnaa go adoönæque iñonte wæwengacāimpa.

¹⁰ Ayæ wacā nē pōnengā Änāniya Daāmaco iñōmō quēwengā inte mā pōnī wīimonte baī ayongā mönō Awënë, “Änāniya,” angā ēñēninque, “Awënë, botō ēñē cōmopa.”

¹¹ Åñongā mönō Awënë wæætē, “Taodo nōwo Wængonguī ingante apænecampa cæbīi. Bitō ængæ gantidinque taadō nāni Tōinō änōnō godinque Codaa oncōnē gote āninque, Tadoto nē quēwēningā Taodo iñōmō owocantawo, ante acæbiimpa. ¹² Wængonguī ingante nōwo apænedinque ate baī ayongā wacā Änāniya pō guīdinque, Nōwo edonque acæbiimpa, ante gampocampa, ante ate baī Taodo wæcantapa cæbīi. Tōmengā wīimonte baī adinque nānō wædō baī cædinque bitō nōwo gote cæcæbiimpa.”

¹³ Angā ēñente wædinque Änāniya wæætē, “Awënë iñæmpa botō, Māningā Taodo iñōmō quīnō baī onguīñængā ingāā, ante nanguī tededāni do ēñēmopa. Ayæ, Eedotadē iñōmō tōmengā bitō quīnāni inānite wēnæ wēnæ cæcampa, ante tededāni ēñente wæbopa. ¹⁴ Ayæ nē godōnāni nænænāni Ao ante yewæmōnāni æninque tōmengā iñæmpa nē angā badinque bitō emōwo ante nē apænemōni iñōmōnite bæi ongote tee mönecæte ante pongampa cæbīi.”

¹⁵ Ante wæyongante mönō Awënë wæætē Änāniya ingante, “Iñgā ingante do apænte æmo apa ānewēē. Tōmengā ingante, Bitō wabæca gote wadāni inānite botō emōwo ante apænedinque ayæ tōmēnāni awēñēidi inānite botō emōwo ante apænedinque idægoidi inānite adobaī botō emōwo apænebi ēñencædānimpa, ante tōmengā ingante do antabopa cæbīi. Nōwo tōmengā weca gobāwe. ¹⁶ Ayæ botō nē æningā inte

tömengä æbänö botö emöwo beyæ nangui caate wæquënegä ingää, ante odömömo ate ëñencæcäimpa.”

¹⁷ Angä ëñëninque Taodo nänö owoyömo go guiidinque Änäniya tömengä ingante gampomöninque,

—Taodo botö töninäbi ëñëmi. Bitö taadö pöninque Itota ingante abitawo. Tömengä iñömö në Awënë inongä inte botö imote apænecantapa. Bitö Taodo weca godinque cæbi ate tömengä wëñëñedë nänö emönö bai adinque Wængongui Tæiyæ Waëmö Önöwoca ingante da pönömo æninque ewocacæcäimpa, ante mönö Awënë angä ëñëninque botö bitö weca pontabopa.

¹⁸ Ante Änäniya tæcæ apæneyongä Taodo tömentagæ nänö emönintagæ tæ wæante iñontobæ edonque acantapa. Ayæ ængæ gantiyongante Änäniya tömengä ingante æpænë guidongä guicantapa. ¹⁹ Ayæ cængui cæninque tömengä baö wæætë tæi piñængä bacantapa. Ayæ Daämaco iñömö Itota ingante në tee empote quëwënäni weca godömenque tæönæ quëwengantapa.

Daämaco iñömö Taodo apænecä ëñënanipa

²⁰ Mäninäni quëwëninque Taodo do oodeoidi odömöincönë go gui go guii cædinque, Itota Codito näwangä Wængongui Wengä ingampa, ante apænecä ëñënanitapa.

²¹ Mänömaï apænecä ëñëninque tömengä ingante në ëñënanäni iñömö ancai guinëninque, “Æ. Ìngä adocä Eedotadëe iñömö Itota emöwo ante në apænedäni inänite në wido cæcä imaingampa. Tömengä adocä në wido cæcä incæ adodäni inänite bæi ongonte æninque, Wængongui qui, ante në godönäni nænänäni weca mäo pædæ godoncæte ante ñöwo iñömö pöninque cæcä awædö. Edæ adocä ingänö angüenë.”

²² Ante wædäni incæte Taodo godömenque tæi piñænte entawëninque iïmaï ante apænecantapa. Awënë bacæcäimpa, ante Wængongui nänö në gao cæcadongä iñömö mönö Codito iñömö edæ Itota adocä inongä ingampa, ante, Näwangä impa, ante nöingä pönä apænecä. Adinque Oodeoidi Daämaco iñömö quëwënäni guiquënë, Ædö cæte wadö angüi, ante wægadänimpa.

Oodeoidi wænnoncæ cæyönäni Taodo aamö cæte gocampa

²³ Ìninque tæönæ go ate oodeoidi godongämæ pönente Ao äninque, Taodo ingante wænongæimpa, ante cædänitapa. ²⁴ Mänömaï ante cæyönäni Taodo mäninö näni äninö do ëñengantapa. Tömënäni guiquënë, Mönö quëwëñömö wææ cæinemö tacä ate wænömö wæncæcäimpa, ante itædë woyowotæ wææ wänönänitapa. ²⁵ Wææ wänöñönäni tömengä ingante në tee empote quëwënäni wæætë yabæ wææ cæte iñömö Taodo ingante woyowotæ mäi ayacömoyäa inö otodë pædæ wæænönäni ti wæante gocantapa.

Taodo Eedotadëe ponte apænecampa

²⁶ Mänömaï godinque Taodo Eedotadëe pöninque, Itota ingante në tee empote quëwënäni weca gobote, ante pongä. Adinque tömänäni, Näwangä Itota ingante në pönengä ingantawogaa, ante guinente awædö, ante pönëninque wææ adänitapa.

²⁷ Bedënabee guiquënë Taodo ingante bæi ongömænte æninque Itota nänö në da godongänäni weca ænte mämongä pongantapa. Ayæ tömënäni inänite Bedënabee apænecantapa. Taodo ñöwo taadö godinque mönö Awënë ingante dobæ acäimpa. Mönö Awënë tömengä ingante do apænecantapa. Daämaco gote quëwëninque Itota emöwo ante tömengä guinënamäi apæningä inte ñöwo iñömö pongä apa quëwëminii.

²⁸ Bedënabee mänömaï angä ëñëninque Ao äñönäni Taodo Eedotadëe iñömö quëwëninque tao guite ta tao guite ta cædinque tömënäni tönö godongämæ cædinque mönö Awënë emöwo ante guinënedämaï apænecantapa. ²⁹ Ayæ wädäni oodeoidi incæ guidiego tededö në tededäni mäninäni quëwënönänimpa. Ìnänäni inänite Pabodo mönö Awënë emöwo ante nangui apænedinque wæætedö wæætë äñongante tömënäni wæætë wænnoncæte ante cædänitapa. ³⁰ Mänömaï cædänipa, ante ëñente wædinque tömengä nänö töninäpäni bai badinäni inte pancadäniya Taodo ingante Tetadea ganca

māo ēmōninque, Godōmenque Tadoto iñōmō wodii winonte goe, ante da godōnāni gogacāimpa.

³¹ Īninqe Codito ingante nāni godongāmæ pōnencabo incæ Oodeabæ Gadideabæ Tāmadiabæ tōmāo quēwēninque māniñedē wādāmaī inte guēmānānitapa. Ayæ tæi pīñante entawēnāni badānitapa. Ayæ Wængonguī Tæiyæ Waēmō Önōwoca ædæmō apænecā ate tōmēnāni wampo pōnēnāni badinque yebænte nanguī ināni bagadānimpa. Ayæ mōnō Awēnē ingante ædō cæte ēñēnāmaī cæquīi, ante guīñente wægadānimpa.

Ēnea ingante Pegodo angā waa bacampa

³² Mānōmaī tōmēnāni nāni pōnencabo nanguī yebænte bayōnāni Pegodo guiquēnē wayōmō wayōmō wodo tebæ wodo tebæ godinque Dida iñōmō pōninque mōnō Awēnē quīnāni weca ēñacæ pongantapa. ³³ Māniñōmō ponte apæneyongā wacā tōmengā ēmōwo Ēnea do ocho wadepo ganca mōimoga cōmāingā inte nē ongōningā ingā.

³⁴ Adinque Pegodo tōmengā ingante,

—Ēnea ēñēmi. Itota Codito cæcā ate waa babipa cæbii. Ængæ gantidinque tōmēmi mōiimo nī capoe.

Åñongā Ēnea iñōmō do edæ ængæ ganticā. ³⁵ Adinque Dida quēwēnāni tōnō Tadōo quēwēnāni tōnō wēnē nāni pōnēwengainō ante ēmō cædinque Wængonguī Awēnē gāmænō pōnānitapa.

Dodoca wodi ingante Pegodo angā nāni òmæmongampa

³⁶ Māniñedē wacā onquiyængā nē pōnengā Tabita iñōmō Cope nāni quēwēñōmō quēwēnongāimpa. Tōmengā ēmōwo guidiego tededō Dodoca incæ mōnō tededō Cowāne ēmongā inongāimpa. Tōmengā iñōmō nē waa cædongā inte òmæpodāni wæwēnāni inānite nanguī waa cædongā inte Cope iñōmō quēwēnongāimpa. ³⁷ Tōmengā māniñedē nangæ badinque æmæwo wængā. Ate tōmengā baō inī æpæ āadēninque wænōmēnæcapaa mæi nō cædānitapa. ³⁸ Cope iñōmō quēwēninque Dida wīi gobæ impa, eyequeī impa. Mānōmaī beyæ, Pegodo Dida iñōmō ongongampa, ante tededāni ēñente wædinque Itota ingante do tee empote quēwēnāni iñōmō onguīñæna mēnaa inate da godōninque, Cope iñōmō gote Pegodo ingante, “Quingæ pōe, ante æeda.”

³⁹ Ānāni gote āñete pōñōnate Pegodo godongāmæ pongā adinque tōmengā ingante wænōmēnæcapaa mæidāni guite acantapa. Owæmpoīnāni godongāmæ pōninque doyæncōo tōnō yabæcōo Dodoca mīingā quēwengāñedē nānō badongaincōo odōmōninque Ca ca wædāni. ⁴⁰ Adinque Pegodo tōmānāni inānite angā tao godāni adinque da guicapote Wængonguī ingante apænecantapa. Ayæ dobæ wænte onguite a õñongā gāmænō dadi ēmænte adinque,

—Tabita, ængæ gantibi āmo.

Åñongā Tabita wodi awinca wi æmōninque Pegodo ingante adinque ængæ gantite contacantapa. ⁴¹ Ængæ ganti contayongante tōmengā ònōmpo bæi ongōninque Pegodo tōo æmængā ate ædæmō ængæ gantite adiyæ gongægantapa. Ayæ owæmpoīnāni tōnō mōnō Awēnē quīnāni inānite Pegodo aa pecā pō guidāni ate mīingā ingā odōmongā adānitapa. ⁴² Īninqe, Mōnō Awēnē mānōmaī cæcantapa, ante Cope iñōmō nāni quēwēñōmō tōmāo gote tededāni ēñēninque nanguī ināni mōnō Awēnē ingante nē pōnēnāni badānitapa. ⁴³ Pegodo māniñedē æmontai nē amīnengā Timōnō weca owodinque Cope iñōmō tæōnæ quēwengacāimpa.

10

Pegodo tōnō Codōnedio

¹ Tetadea nāni quēwēñōmō odōmāno tontadoidi Itadiaidi nāni ānoncabo inte quēwen-gadānimpa. Īninqe tontadoidi tiēe ganca nāni cabo tiēe ganca nāni cabo iñōnānite adocabodāni capitāo tōmengā ēmōwo Codōnedio ēmongacāimpa. ² Tōmengā nāni wencabo nāni owocabo owodinque, Mōnō wadō pōnēñōmonte Wængonguī pangā wæcæ wæ, āninque Wængonguī nānō ānō ante ēñente quēwēnōnānimpa. Ayæ pæ

gompodämaï inte Codönedio, Ömæpodäni wæwënäni qui, ante pædæ godö pædæ godö cæcä ännönänimpa. Ayæ Wængongui ingante ñimpo cædämaï cöwë apænedongäimpa.

³ Tömengä iñömö ædæ wæicä ate mä pönï wiimonte bai acantapa.

Edonque wiimonte bai ayongante Wængongui anquedo tömengä weca pö guiidinque, “Codönedio bitö ïmi.” ⁴ Angä wædinque Codönedio tömengä ingante cöwä adinque ancai guiñente wædinque, “Awënë, æbänö ante ämii. Ämi ëñëmoe.” Äñongante, “Bitö Wængongui ingante nê apænebi imitawo, ömæpodäni wæwënäni inänite nê godömi imitawo. Mäninö bitö apænedö ante mäninö bitö godönö ante adinque bitö imite waa abopa, Wængongui angampa, angantapa. ⁵ Nöwo wadäni inänite ämi Cope iñömö gote Timönö Pegodo näni änongä ingante äñete poncædänimpa. ⁶ Adowo ëmönongä Timönö weca Timönö Pegodo gäwapæntibæ wedeca owocampa. Mäningä Timönö æmontai nê aminënongä ingampa.”

⁷ Ante apænedingä inte Wængongui anquedo ingæ gocä adinque Codönedio wæætë tömengä ingante nê cæda mënaa inate aa pecä pönatapa. Ayæ tontadoidi incæ pancadäniya tömengä ingante nê cædäni inönänimpa. Ìniquè adocanque tontado incæ Codönedio ingante nê cæcä incæ Wængongui ingante nê ëñengä inongäimpa. Tömengä ingante Codönedio adobaï aa pecä pongantapa. ⁸ Mänömaï aa pecä ate tömënäni godongämæ pönäni ate Codönedio, Wængongui æbänö angantawoo, ante tömänö ante adodö apænedinque, Nöwo Cope iñömö goedäni, angantapa.

⁹ Angä godinque iimö wæænö taadö godinque Cope iñömö obo pöñönäni mäniñedë incæ tæcæbæcä incæ Pegodo guiquënë Wængongui ingante apænecæte ante oncömanca æicantapa. ¹⁰ Ayæ ate gue ænente wædinque wadäni inänite, Cæinente awædö, äñongante cænguï iinque æænönämaï inte cönönämaï iñönänite tömengä wiimonte ate bai cæwënegantapa. ¹¹ Ate bai æmö ayongante öönædë wi ænete bai bayö möincoo bai ñænæncoo pönï iñonte æmænecoo bæi æmænecoo bæi ongönete bai inguipoga pædæ wæænonte bai wææ wäi wocæ acantapa. ¹² Wäi wocænö nê ocaguï mongænäni incæ, nê ocaguï ömaadäni incæ, nê öömä ëmænte æidämæ godäni incæ babæidi tömänäni weocoo cæncadencoo inö ongönäni acantapa. ¹³ Ayongante wacä äninque, “Pegodo, ængæ gantidinque wænonte cæe.”

¹⁴ Angä ëñëninque Pegodo, “Awënë, ëñëmi. Önnäniquè iñönänite botö, Baacä awædö, äninque cöwë cænämaï imo apa änewëe.” ¹⁵ Äninque wæætë ëñëñongä, “Wængongui nänö ædæmö mënongadongä incæ bitö ædö cæte baacä ämii.”

¹⁶ Äninque nê apænedingä iñömö wæætë adodö adodö angä ëñëninque Pegodo wæætë, Baacä awædö, ante Baa angantapa. Ayæ mempoga go adopoque wæatedö wæætë adodö äna ate ñænæncoo pönï weocoo incæ öönædë inö wëä æænongä bai acantapa. ¹⁷ Ìniquè, Mänömainö ante wiimonte bai adimo inte botö quinö bai cæquimoo, ante Timönö Pegodo pönëe congantapa. Pönëe cönongä Codönedio nê nänö da pönöninäni guiquënë, Timönö oncö æyömönö i, ante diqui diqui minte adinque yabædemö inö næ gongæniquè, ¹⁸ Timönö Pegodo näni änongä iñömö owocää, ante ëñencæte ante aa pedänitapa.

¹⁹ Pegodo wiimonte bai nänö adinö ante ayæ pönëe cönongante Wængongui Önöwoca, “Timönö ëñëmi, bitö imite ante onguïñænäni mengäa go adocanque diqui diqui minänipa quëwëmi. ²⁰ Tömëmö ämo pönänipa cæbii. Bitö ængæ gantidinque yæipodë wæidinque tömënäni tönö ee goe,” angantapa.

²¹ Angä ëñëninque Pegodo yæipodë wæidinque tömënäni inänite, Botö minitö nê diqui diqui minömo adobo imopa. Minitö quinante pöminii.

²² Äñongante,

—Mönitö awënë capitäo Codönedio incæ angä pömönipa. Tömengä iñömö Wængongui ayongante nö cæcä inongä inte Wængongui ingante guiñente quëwengampa. Nê nö cæcä ingampa, ante pönëninque oodeoidi tömänäni tömengä ingante waa adänipa. Ìniquè Wængongui anquedo tæiyæ wæmö inongä inte wæætë Codönedio ingante, Bitö wadäni inänite ämi gote Pegodo ingante äñete poncædänimpa. Tömengä iñömö

bitö weca pöninque apäncä eñencäbiimpa, angä eñente wædinque Codönedio wæætë mönitö imönite da pönongä pömöni ae.

²³ Ante apänedäni eñëninque Pegodo angä pö guite tömengä weca owodänitapa. İmö ate Pegodo tömënäni tönö tao goyongante Cope iñömö quëwente nê pönënäni incæ pancadäniya godongämæ tao wadæ godänitapa.

²⁴ Mänömaï godinque Pegodo iñabæ wæängä Tetadea pongantapa. Codönedio guiquënë, Oo ponguingä, ante pönëninque tömengä guidënäni tönö tömengä æmigoidi inänite do añecä ponte godongämæ ongönänitapa. ²⁵ İninque Pegodo iñömö oncönë pö guicæ cæyongä Codönedio wæætë oncodo tao bee tëninque, Æ, bitö Wængonguï anquedo inömi imipa, ante bai cædinque ædæ wæante Pegodo önöwa gäänë guidömëmæ ñongængä. ²⁶ Adinque Pegodo wææ äninque,

—İñæmpa bitö waobi imi bai botö adobai waobo inömo imopa. Ængæ gantibi, äninque Pegodo angä ængæ ganticantapa.

²⁷ Ayæ Codönedio tönö guëa tededinque Pegodo oncönë guite ayongante nanguï inäni godongämæ mä ongönäni. ²⁸ Adinque tömënäni inänite,

—Minitö do eñëmünipa. Oodeoidi inömöni inte mönitö Möitee wodi nänö wææ angainö ante Ao ante eñente cæmönipa. İninque, Oodeo inämaï inäni tönö godongämæ cädämaï incæminimpa, ante ayæ, Tömënäni weca go guidämaï incæminimpa, ante mönitö eñengainö ante cæmönipa, ante minitö do eñëmünitawoo. Incæte Wængonguï wæætë botö imote iimaï ante odömongantapa. Bitö, Baacä awädö, ante tedete bai waocä ingantedö ante tededinque, Wentamö mongængampa, ante änämaï incæbiimpa. Ayæ, Önonganque ingampa, ante änämaï incæbiimpa, ante Wængonguï botö imote do odömongä atabopa. ²⁹ Äñete pönäni ate botö, Wængonguï mänömainö ante odömongä atabopa, ante pönëninque ee pontabopa. İninque quınante botö imote aa pemünii, ante eñencæte ante wæbopa.

³⁰ Äñongante Codönedio wæætë,

—Do mëönaa go mëönaa iñonte botö tömömo oncönë cænämaï inte Wængonguï ingante apänetabopa. Botö mänömaï ñöwo bai ædæ wæicä apäneyömo onguïñängä weocoo näämänta pönı mongængä ponte botö weca a ongongä atabopa. ³¹ Ayæ botö imote apänedinque, “Codönedio, bitö Wængonguï ingante apänebitawo, angantapa. Mänünö bitö apänedö ante Wængonguï do eñengantapa. Ömæpodäni wæwënäni quı, ante bitö godömitawo. Mänünö bitö godönö ante adinque Wængonguï cöwë pönengampa cæbii. ³² Ñöwo ämi Cope gote Timönö Pegodo nāni ängongä ingante äñete poncädänimpa. Tömengä wacä Timönö æmontai nê aminengä weca gäwapæntibæ wedeca owocampa.” ³³ Angä eñëninque botö wæætë bitö imite ante, Äñete pödäni, antabopa. Ñöwo bitö do pömi waa abopa. İninque ñöwo iñömö Wængonguï ayongä tömämöni godongämæ a ongöñömöni bitö, Wængonguï Awënë mönitö beyæ ante bitö imite æbänö angäa, ante apänebi eñencæte ante ongömönipa, angantapa.

Codönedio oncönë ongöninque Pegodo apäncäcampa

³⁴ Codönedio mänömaï apäncä eñëninque Pegodo iimaï ante apäncantapa.

—Wængonguï, Adoyömö pönı imünipa, ante tömämö imonte pönö adoyömö pönı cæcampa, ante botö, Näwangä impa, ante ñöwo tæcæ eñëmopa. ³⁵ İninque iimæca quëwënäni incæ wayömö wabæca wabæca quëwënäni incæ æcänö Wængonguï ingante guıñente wædinque nö cæte quëwëna ante adinque Wængonguï mäningä ingante Ao ante do ængampa. ³⁶ Mänömaï cæbopa, ante idægoidi inänite apänemüni eñencädänimpa, ante Wængonguï mönitö imönite da godongä gote iimaï ante apänemöni eñënänipa. Tömämæ quëwëmö iñömönte mönö Tæiyæ Awënë iñömö Itota Codito ingampa. Tömengä waa pönı pönö cæcä beyænque Wængonguï piyænë nänö cægainö ante watapæ möni apänedö impa. ³⁷ Wäö wodi, Æpäne mönö guidongæimpa, ante apäncä eñënäni ate Itota Codito iñömö Gadideabæ iñömö mä cædinque Oodeabæ tömäo cægonde æbänö cægacäi, ante do eñëmünipa. ³⁸ İimaï ingatimpa. Wængonguï

tömengä Önöwoca ingante angä Itota Näatadeta nē quēwengaingä baonga wææ guigacäimpa. Wææ guicä ate Itota tæi piñante entawēninque wayömö wayömö gote tömäo cægōninque waa cægacäimpa. Edæ Wængonguī tömengä tönö godongämæ quēwente cæcä beyæ Itota iñömö, Wadäni wēnæ angä ēñēninque goti winte bai wæwēnänipa, ante adinque wēnæidi inänite angä tao godänitapa. Ayæ wadäni wēnæ wēnæ inte wæyönänite tömengä godö cæcä ate edæ waa inäni bagadänimpa.

³⁹ Pabodo mänömainö ante godōmenque apænecantapa. “Oodeoidi ömæ cægōninque ayæ Eedotadēē iñömö quēwēninque, Itota Codito æbänö cægacäi, ante nē adimōni inte mönitö iñömö mäninö tömänö ante nē apænemōni imōnipa. Tömengä ingante awæ ñænquedimæ cæte godö wænönäni wængacäimpa. ⁴⁰ Incæte Itota do wæningä inte meönaa go adoönæque õngante Wængonguī angä ñäni ömæmonte miingä inte edonque pōni a ongongä agadänimpa. ⁴¹ Wii tömänäni adänitapa. Pancamōniya atamōnipa. Itota ñäni ömæmongä ate tömengä tönö nē godongämæ cæte bedimōni iñömōnite Wængonguī, Mänimpodänique Itota miingä ongongä ingampa, ante nē adinäni inte nē apænedäni incädänimpa, ante mönitö imōnite apænte ængacäimpa. Mönitö adomōnique tömengä ingante atamōnipa. ⁴² Ayæ mönitö imōnite äninque Wængonguī, Minitö iñömö do ēñēnimini inte nē apænemini badinque waodäni inänite mänömainö ante apænedinque iimaï ante apænecæminimpa. Mii quēwēnäni inänite do wæninäni inänite Itota Codito iñömö edæ tömänäni inänite edæ nē apænte anguingänö angüenē, ante apænemini ēñencädänimpa, ante Wængonguī mönitö imōnite angacäimpa. ⁴³ Ayæ, Mönö Codito poncæcäimpa, ante do ēñengäinäni inte tömänäni Wængonguī beyæ adoyömö apænecadänimpa. Tömēnāni, Codito ingante nē pönēnāni wēnæ wēnæ näni cædö ante adocä Codito emöwo beyænque Wængonguī pönö waadedinque ñimpo cæcä quēwencädänimpa, ante doyedē apænecadänimpa,” ante Pegodo Codōnedioidi inänite apænecä ēñēnänitapa.

Oodeoidi inämaï inäni Wængonguī Önöwoca ingante ænāni

⁴⁴ Pegodo mäninö ante tæcæ apænecä ēñē cōñönänite Wængonguī Tæiyæ Waëmö Önöwoca tömēnāni tömänäni baonga wææ guicantapa. ⁴⁵ Pegodo tönö godongämæ pönināni guiquēnē nē pönēnāni inäni incæte, Mönö eö togænte quēwengæimpa, ante nē änönäni ingadänimpa. Ñinque tömēnāni, Oodeoidi inämaï inäni inänite Wængonguī Tæiyæ Waëmö Önöwoca do wææ guicampa, ante adinque edæ guiñente wädänitapa. ⁴⁶ Edæ Codōnedioidi Wængonguī Önöwoca ingante ewocadinque wadäni näni tede bai wadäni näni tede bai iñontobæ apænedinque Wængonguī ingante waa adinque waa todäni ēñente wædinque oodeoidi mänömaï guiñente wädänitapa. ⁴⁷ Adinque Pegodo tömengä tönö nē pönināni inänite,

—Tömēnāni mönö bai Wængonguī Tæiyæ Waëmö Önöwoca do æninäni inänite adinque tömēnāni, Æpænē guidōmi guiboē, äñönänite mönö ædö cæte wææ angüi. ⁴⁸ Äninque Pegodo angä ēñēninque tömēnāni Itota Codito emöwo apænedinque æpænē guidönäni guiidänitapa. Æpænē nē guidēnāni iñömö ayæ Pegodo ingante, Tæönæ mönitö weca quēwencæbiimpa, änäni Ao ante quēwengacäimpa.

11

Eedotadēē iñömö nē pönēnāni inänite Pegodo apænecä

¹ Oodeoidi inämaï inäni incæ Wængonguī nänö änö ante do Ao ante ēñēnänipa, ante wadäni Oodeabæ tömäo cægonte tededänitapa. Ñinque Itota nänö da gogainäni tönö wadäni nē pönēnāni tönö mäninö ante do ēñēnänitapa. ² Ñinque Pegodo Eedotadēē iñömö æite quēwēñongante nē pönēnāni incæ pancadäniya, Mönö eö togængæimpa, ante nē änönäni inte tömengä ingante piñinque, ³ iimaï ante änänitapa.

—Quimæ bitö togænāmaï inäni weca incæ go guidinque cæmitapa töö.

⁴ Äñönänite Pegodo, Æbänö cæte i, ante adodö adodö ante apænecä ēñēnänitapa.

⁵ —Botö Cope näni quēwēñömö gote quēwēninque Wængonguī ingante apænedinque cæwēnente ongōninque wiimonte bai atabopa. Wiimonte bai ayömote weocoo

ñænæncoo möincoo bai ämænecoo yao ämænecoo yao oncönete bai öönädë inö pædæ wæænonte bai ayömote botö weca wææ wäi wocæ atabopa. ⁶ Wäi wocæñö botö acæte ante guimö ayömo babæidi bai inäni inte ocagui mongænäni, ämontaique mongænäni, öömä emænäni yæmiñæncoo inö ongönäni bai atabopa. ⁷ Ayæ wacä botimote, “Pegodo, ængæ gantidique wænonte cæe.” ⁸ Angä eñëninque botö, “Awënë eñëmi. Baacä ingä änewëë. Näwaaqingä inämaï iñongante cöwë cænämaï imoi ae.” ⁹ Ante wæyömote öönädë apænecä botö në eñëningä godömenque äninque, “Wængongui nänö ædæmö mënongadongä ædö cæte baacä ämii.” ¹⁰ Äninque tömengä wæætë wæætë mempoga go adopoque adodö angä ate ñænæncoo bai adodö öönädë ingæ æi atabopa. ¹¹ Mäniñedë Tetadea në quëwengä da pönongä pöninque onguiñænäni mengäa go adocanque botö imote ante diqui mincæte ante botö owocö boyæ tæcæ pöninque næ gongænänitapa. ¹² Ayæ Wængongui Önöwoca incæ botö imote angä eñëninque botö, Wadäni inänipa, ante piinämaï imo inte guiñänämaï tömënäni tönö ee gotabopa. Ayæ botö tönö iinäni iñömö tei ganca inäni mänimpodäni godongämæ godänitapa. Gote ayömöni, Codönedio oncö impa, ante adinque go guitamönipa, ante Pegodo apænecantapa. ¹³ Ayæ, Go guite eñëñömönite Codönedio iñömö, Æbänö cætimpa, ante apænedinque mönitö imönite iimaï ante apænecantapa. Botö oncönë Wængongui anquedo a ongongä atabopa. Ayæ botö imote äninque anquedo iñömö, “Bitö Cope iñömö ämi wadäni gote Timönö Pegodo näni änogä ingante äñete poncädänimpa. ¹⁴ Tömengä pöninque, Mïni quëwencabo æbänö cæte wænämaï quëwenguimïni, ante bitö imite apænecä eñencæbiimpa.” Mänömainö ante Wængongui anquedo apænecä eñente cætabopa, ante Codönedio mönitö imönite apænecä eñentamönipa.

¹⁵ Mäninganca apænedinque Pegodo iimaï angantapa. “Wængongui Tæiyæ Waëmö Önöwoca mä pöninque mönitö imönite nänö guidö bai ñöwo iñömö botö tæcæ apænecæ cæyömo adocä edæ tömënäniya adobaï wææ guicantapa. ¹⁶ İninque botö, Mönö Awënë Itota æbänö angacäi, ante adodö ante pönentabopa. ‘Wäö wodi iñömö æpænë guidongacäimpa. Wængongui Tæiyæ Waëmö Önöwoca guiquënë mïnitö baonga pö guicæcäimpa,’ ante Itota do apænecäimpa, ante botö önöwënenque pönentabopa. ¹⁷ Ayæ, Mönö Awënë Itota Codito ingante wede pönëmöni ate Wængongui tömengä Tæiyæ Waëmö Önöwoca ingante da pönongä æntamönipa. Ñöwo tömënäni adobaï wede pönënäni ate Wængongui mönitö imönite nänö da pönongaingä ingante tömënäniya adobaï da pönongä ænänipa, ante pönentabopa. Mänömaï cæcampa, ante pönëninque botö, Ædö cæte Wængongui ingante Baa anguimoo.”

¹⁸ Ante Pegodo, Æbänö cætimpa, ante tömänö ante edonque apænecä eñëninque tömënäni wæætë, Mönö ædö cæte godömenque piinte anguii, ante piyænë cæte apænedänitapa.

—Ñöwo idæwaa ämönipa. Wadäni oodeoidi inämaï inäni incæ mönö bai, Idæwaa wænæ wænæ cæte awædö, ante guingo imonte wædäni ate Wængongui pönö waadete cæcä ate quëwënänipa, ante ñöwo tæcæ mä eñëmönipa, ante todinque Wængongui ingante edæ watapæ apænecadänimpa.

Antioquiya iñömö Itota ingante näni pönencabo

¹⁹ Mäningä Etebä wodi ingante wænöninque oodeoidi godömenque wadäni në pönënäni inänite wænæ wænæ togænte pänäni wædinque në pönënäni iñömö wodii winöninque näwæ gote Pënitia ganca Tipidebæ ganca Antioquiya ganca godänitapa. Godinque tömënäni, Itota Codito æbänö cægacäi, ante oodeoidique inänite apænedinque wadäni inänite apænedämaï ingadänimpa. ²⁰ Incæte Tipidebæ iñömö quëwënäni tönö Tidënebæ iñömö quëwënäni pancadäniya Antioquiya iñömö godinque guidiegoidi inänite adobaï Itota Codito ingantedö ante watapæ apænedäni eñënänitapa. ²¹ İninque mönö Awënë tömënäni tönö godongämæ cæcä beyænque nanguï inäni tæcæ pönëninque tömengä gämænö pönänitapa.

²² Mänömaï pönänänpa, ante tededäni ëñëninque Eedotadëë iñömö Codito ingante näni godongämä pönencabo incæ Bedënabee ingante, Bitö Antioquiya iñömö godinque ate pöe, änäni. ²³ Mäniñömö gote pöninque Bedënabee iñömö, Antioquiya iñömö quëwënäni inänite Wængonguï waadete pönö cæcampa, ante adinque nanguï todinque tömänäni inänite, Minitö mimöno wede pönëninque mönö Awënë miñæ cöwë quëwëedäni, ante nanguï angantapa. ²⁴ Bedënabee iñömö Wængonguï Tæiyæ Waëmö Önöwoca ingante ëwocadinque në wede pönengä inongä inte në waa cæcä inongäimpa. Ininque tömengä apænecä ëñëninque tömënäni nanguï inäni mönö Awënë gämænö pongadänimpa.

²⁵ Bedënabee wæætë Taodo ingante diqui mincæte ante Tadoto iñömö gote, ²⁶ adinque tömengä ingante Antioquiya iñömö ænte pongantapa. Pöninque adoque wadepo quëwëninque tömënäni Codito ingante në tee empote quëwencabo tönö cöwë godongämä ponte apænedinque nanguï inäni inänite odömonte apæneda ëñënanitapa. Ayæ Antioquiya iñömö quëwënäni Codito ingante në tee empote quëwënäni inänitedö ante apænedinque, Coditoidi inänipa, ante mä pemöninque apænedönänimpa.

²⁷ Ayæ Wængonguï beyæ në apænedäni pancadäniya mäniñedë Eedotadëë quëwëninque Antioquiya pönänitapa. ²⁸ Tömënäni näni Wængonguï beyæ apæneincabo incæ adocanque Agabo näni änongä iñömö Wængonguï Önöwoca ingante ëwocate apænedinque, Mönö waocabo quëwëñömö tömämæ cænguï oo dæ ba adinque mönö gæwænte wæquimämo baquinö anguënë, ante angacäimpa. Ininque iincayæ ate Codaodio Awënë ingäñedë Agabo nö nänö äninö bai do batimpa. ²⁹ Ba adinque Antioquiya näni pönencabo godongämä pönëninque, Mönö tönïñadäni iñömö Oodeabæ quëwëninque edæ tepæmpo gæwænte wädänipa cæmöö. Tömënäni beyæ mönö godonte äinta pædæ godöninque adocanque eyepæ inte nänö godonganca wacä eyepæ inte nänö godonganca godongäimpa, ante godongämä Ao änänitapa. ³⁰ Äninque eyepæ pædæ pönöninque Bedënabee tönö Taodo inate, Ænte mäo godinque në pönänäni inänite në aadäni në Picänäni nempo pædæ godöminä æncädänimpa, ante da pönönäni ænte gote godöna ængadänimpa.

12

Tantiago wængä ate Pegodo ingante tee mönedänipa

¹ Mäniñedë Codito ingante näni godongämä pönencabo iñönänite awënë odeye Edode iñömö pancadäniya inänite wënæ wënæ cæcæte ante angä bæi ongonte ængadänimpa. ² Mänömaï cædinque tömengä angä ëñëninque Wäö tönïñacä Santiago ingante yaëmenca wänönäni wængacäimpa. ³ Santiago wodi mänömaï wængä adinque oodeoidi todäni ate wædinque Edode, Godömenque cæbo ate nanguï todinque botö imote waa acädänimpa, ante cædinque Pegodo ingante adobai bæi ongongantapa. Edæ pöö yedæ æmpoqui ömæmö i näni æämæ cæyedë mäniñedë tömengä ingante bæi ongonte ængantapa. ⁴ Mänömaï æninque Edode iñömö, Oodeoidi Patowa æämæ iinque bedäni ate botö Pegodo ingante ænte tadonte tömänäni ayönänite apænte ancæboimpa, ante pönëninque tömengä ingante tee mönecantapa. Tee mönedinque Edode godömenque angä ëñëninque tontadoidi mengäa go mengäa näni cabo pö wææ wänonte goyönäni wacabo adopodäni pö wææ wänonte godönänimpa. Mänömaï wacabo pö wacabo pö cædinque mencabodäniya go mencabodäniya wæætë wæætë ponte wææ wänonte godönänimpa. ⁵ Ininque Pegodo ayæ tee mönete ongönongäimpa. Incæte tömënäni Codito ingante godongämä näni pönencabo Wængonguï ingante tömengä beyæ cöwë nanguï apænecadänimpa.

Pegodo ingante Wængonguï incæ ñimpo cæcä gocampa

⁶ Pegodo ingante tontadoda mënaa tönö æmæncaipo æmæncaipo yaëmengö täi goti wincapodäni wæyongante wada odemö cöwë wänö cönönainpa. Ininque Edode tömengä nänö apænte anguiönæ ado woyowotæ Pegodo mänömaï goti winte wædongä

inte mö ñongantapa. ⁷ Ìñontobæ Wængonguī Awēnē nānō da pönöningä anquedo a ongongantapa. Tee mönete oncönē ñāō gongæntapa. Pegodo mö ñöñongante Wængonguī nānō da pönöningä ìñömō æmætæ inō tao cædinque, “Pegodo, ñāni ömæmonte quingæ ængæ gantibi.” Äñongä daagömē nāni tæi wini incæ tömenque ñimæncæ tæ wæængatimpa. ⁸ Ayæ, “Bitö weocooga pacadeyænta pacadeyænte awæncata wëwabi.” Angä ëñente cæcä adinque Wængonguī anquedo godömenque, “Yacoo wini caadinque botö miñæ pöe.”

⁹ Angä ëñëninque Pegodo, Awii cæmonte awædö. Anquedo dicæ ponte cæcää. Mänömaī ponte cæcampa, ante botö wiimonte bai aboimpa, ante wawique pönengä incæte anquedo miñæ tee empote tao gocantapa. ¹⁰ Mänömaī tao godinque guiicönē nē wänöna ongöñöna wodo tebæ tao godinque yabæcönē tamongademö nē wänöna ongöñöna wodo tebæ tao godinque yaëmewæ odemö tömënäni quëwëñömö ante nāni tao goquinemö ganca pönatapa. Mäniinemö ganca ponte ongöñöna yaëmewæ odemö incæ tömenque æ ænete bayö tao godinque taadö adodonque cægöna ate anquedo ìñömö ingæ gocä ate Pegodo guiquënë adocanque a ongongantapa.

¹¹ Adoque a ongömopa, ante wædinque tömengä wæætē nāmā pönengä badinque, “Æ. Nāwangä incæ do tate ëñëmopa. Edode nempo wæwëninque botö oodeoidi nāni piinö wæquënëmo imo adinque Wængonguī angä ëñëninque tömengä anquedo ponte botö imote gä pe æmpote ö ængä ate aamö cæbopa, ante tæcæ pönëmopa.”

¹² Ante pönente wædinque Pegodo wadæ godinque Wäö Mäadoco nāni äñongä tömengä badä Mäadiya oncö boyæ ponte næ gongængantapa. Mänincönē wadäni nē pönënäni incæ do pöninque Wængonguī ingante godongämæ apænee cönönänimpa. ¹³ Pegodo ìñömö yabædemö ongonte aa peyongä baquécä nē ëacä ingante nē cæcä inte tömengä ëmowo Adoda ìñömö ëñencæte ante pongantapa. ¹⁴ Ponte ëñëñongä Pegodo incæ aa pecä ëñëninque watapæ tote wædinque tömengä wi pönëninque odemö wi ænedämaī pogodo gote edæ wadæ guidinque, Pegodo incæ oncodo a ongongä tamëñedäni. ¹⁵ Ante apæneccä ëñëninque tömënäni wæætē,

—Adoque antedö amini.

Ante wæyönäni tömengä, Nāwangä impa, ante ancaa angä ëñëninque tömënäni,

—Wa. Pegodo ingante nē aacä anquedo imaingampa.

¹⁶ Ante tedeyönäni Pegodo ìñömö ayæ aa pete ongönongäimpa. Ayæ ponte wi ænete ayönäni Pegodo ingante adinque ancai guifiente wædänitapa. ¹⁷ Tömengä wæætē, Apocænē iedäni, ante önompocaque compo cæcä adinque pæ wëëneyönäni tömënäni inänite apæneccantapa. Botö tee mönete wæyömote Wængonguī æbänö pönö cæcä ate tate pömoo, ante tömänö ante adodö ante apænedinque,

—Botö apænebo mini ëñënö ante minitö wæætē wacä Tantiago ingante apænedinque wadäni mönö tönïñadäni inänite apænemini ëñencädänimpa.

Äninque Pegodo wayömo wadæ gocantapa.

¹⁸ Ìimö wæñö ñāō bayonte tontadoidi guiquënë, Pegodo ædönö gote dæ angää, ante nangui Yæ yæ ante cædänitapa. ¹⁹ Mänömaī cætimpä, ante apænedäni ëñente wædinque Edode angä diqui diqui miñönäni Pegodo ayæ dæ angantapa. Ìinque nē wææ wänöninäni inänite Edode, Æbänö cætii, ante ancaa angä wædinque tömënäni, Mönö ædö cæte anguii, ante wæyönänite tömengä wadäni inänite angä capo wänönäni wængadänimpa. Edode tömē Oodeabæ wadæ tao godinque Tetadea gote quëwengacäimpa.

Edode wængampa

²⁰ Tido ìñömö quëwënäni tönö Tidöo ìñömö quëwënäni inänite awënë Edode wodi mäniñedē ënogate ængui bacä adinque tömënäni wæætē godongämæ pönente Ao äninque Edode weca apæneccæ pönänitapa. Tömënäni, Mönö ìñömö awënë odeye Edode ömæ quëwënäni pönönäni äninque mäniinonque cænte quëwëmompä, ante wædönäni inte tömengä ingante, Bitö piinämaī inte piyænē cæbi quëwëmönie, ante ancæte ante pönänitapa. Pöninque tömënäni Edode oncönē owodäni inänite nē aacä Bodato ingante

waa cædinque tömengä ingante änāni Ao ante tömengä wæætē Awēnē Edode ingante tömēnāni beyæ apæneçä ēñengacäimpa. ²¹ Edode iñömö, İionæ ba ate botö ponte apæneçæboimpa, ante tömengä nānō āniönæ iinque ba ate tömengä awēnē weocoo waëmoncoo wēñate pōninque awēnē nānō apænte ante contaïmpaa tæ contadinque tömānāni ayōnāni tömēnāni inānite apæneçantapa. ²² Apæneçä ēñēninque tömānāni Yæ yæ āninque, “Wii waocanque tedecä ēñēmompa. Wængonguūidi nāni tedepāmo bai tedecä ēñēmompa.” ²³ Ante Yæ āñōnāni Edode wodi wæætē, Nāwä Wængonguinque nē waa cæcampa, ante anguēnengä incæte änāmaï pæ wēneçä adinque tömengä ingante Wængonguūi anquedo wæætē godö cæçä ate ayago cæ æmæwo wængacäimpa.

²⁴ Incæte Wængonguūi nānō angainö ante māniñedē wayōmō māo wayōmō māo apænedāni ēñēninque nanguūi ināni mönō Awēnē ingante nē wede pōnēnāni badānitapa.

²⁵ Bedēnabee tönö Taodo iñömö Eedotadēē iñömö godinque tömēna nāna cæquēnēnō tömānō iinque cædinque wadæ godinque Wäö Mäadoco nāni ānongä ingante tömēna tönö æninque adodö godānitapa.

13

Wængonguūi angä ēñente Bedēnabee tönö Taodo godapa

¹ Antioquiya iñömö Itota Codito ingante nāni godongāmæ pōnencabo inōnāni iñömö pancadāniya Wængonguūi beyæ nē apænedāni iñōnāni pancadāniya guiquēnē nē odōmonte apænedāni inōnānimpa. Bedēnabee tönö wacä Timönö Nēegodo nāni ānongä inōnaimpa. Tidēnebæ nē quēwēningä Dotio inongäimpa. Pancabaa awēnē Edode tönö godongāmæ nē pædingä Mänāēnē tönö Taodo inōnaimpa. Mānimpodāni ingadānimpa.

² İinque tömānāni godongāmæ mönō Awēnē ingante, Tæiyæ Waēmö İmipa, ante watapæ apæneçæte ante cænāmaï apæneyōnānite Wængonguūi Tæiyæ Waēmö Önōwoca incæ İimaï angacäimpa. “Bedēnabee tönö Taodo mīnitö tönö nē cæda iñōnate āmīni botö beyænque cædinque nānēnē godinque botö āniñö ante cæcædaimpa,” angacäimpa.

³ İinque iinque cænāmaï inte apænedinque tömēnāni Bedēnabee tönö Taodo inate gampocadinque Wængonguūi ingante apænedinque änāni ate wadæ gogadaimpa.

Wäö tēiwænē Tipidebæ gote apænedä ēñēnāni

⁴ Bedēnabee tönö Taodo iñömö Wængonguūi Tæiyæ Waēmö Önōwoca mänōmaï angä godina inte Tedeotia iñömö wæi wipodē ñænæmpodē go guiidinque wogaa godinque wäa tēiwænē Tipidebæ nāni āmæ godatapa. ⁵ Tadamina nāni quēwēñömö pōninque oodeoidi odömöincōnē wacōnē go guui wacōnē go guui cædinque Wængonguūi nānō apænedö ante nōingä apænedä ēñengadānimpa. Ayæ Wäö tömēna miñæ godinque tömēna beyæ nē cæçä inongäimpa.

⁶ Mänōmaï wäa tēiwænē tæcæguedē wodo tebæ cægōninque yæcado godinque Papo nāni quēwēñömö ganca pōnānitapa. Pōninque tömēnāni wacä idö tömengä emōwo Baditota ingante māmō beē tēnānitapa. Tömengä iñömö oodeocä inongä inte, Wængonguūi beyæ nē apænebo İmopa, āninque nē babæ ānongä inongäimpa. ⁷ Tömengä wäa tēimæ awēnē Tedeguio Pabodo nāni ānongä tönö godongāmæ nē cædongä inongäimpa. Awēnē Tedeguio guiquēnē nē ocai encadongä inte Wængonguūi nānō ānō ante ēñēinente wædinque Bedēnabee tönö Taodo inate āñete māmongä pōnatapa. ⁸ Tömēna ponte apæneyōnate idö Baditota guiquēnē guidiego tededö Edima nāni ānongä inongä inte edæ, Awēnē nē pōnengä badāmaï incæcäimpa, ante wææ cæcæte ante piinte cæcantapa. ⁹ İinque Taodo Pabodo nāni ānongä iñömö Wængonguūi Tæiyæ Waēmö Önōwocaque ewocadinque idö ingante gomö adinque, ¹⁰ tömengä ingante angantapa.

—Bitö iñömö wēnæ awēnē nānōmōmi bai İimidö anguēnē. İñæmpa, Wadāni quiēmē nō İimpa, ante oda cæcædānimpa, ante bitö piinte pōnēwēnonque entawēninque bitö nē babæ cædōmi İmipa töö. Wængonguūi nānō tōinö ponguūinö ante idiquibæ bacäimpa, ante bitö æpogamē incæ cæbii. ¹¹ Nōwo iñömö Wængonguūi Awēnē nē piñængä inongä

inte bitö imite pancæcäimpa. Tömengä pönö gampomongä ate bitö babetamömi badinque nænque ñäö tamönö wantæpiyæ tömengä nänö änimpoga adämaï incæbiimpa.

Äñongä boguimä bai do wææ ininque wëmö emöninque Edima Baditota näni änongå gampo gampo cædinque, Æcänö botö imote töö æmænte mäoda goquimoo, ante diqui diqui mingantapa. ¹² Mänömaï bacä adinque wää tēimæ awënë wæætē Wængonguï Awënë ingantedö ante iñäna nänä odömonte apænedö ante pönente guñente wædinque nē pönengä bagacäimpa.

Pitidiabæ Antioquiya godinque cædapa

¹³ Pabodoidi iñömö Papo iñömö wadæ godinque wipodē ñænæmpodē wogaa taodinque Pampidiabæ pöninque Pedegue iñömö ti wææñönäni Wäö wæætē adodö Eedotadē gocæte ante tömëna inate emö cæte wadæ gogacäimpa. ¹⁴ Tömëna wæætē Pedegue wadæ godinque Pitidiabæ pöninque Antioquiya näni quëwëñömö pönatapa. Ayæ tömënäni guëmanguïönæ iinque bayö oodeoidi odömöincönē pö guite tæ contadatapa. ¹⁵ Tæ contate a cöñöna Möitee wodi nänö yewæmongainta adinque Wængonguï beyæ nē apæneganäni näni yewæmongainta ate apænedänitapa. Ayæ mäniñömö awënëidi iñömö tömënäni weca ongongä adocanque ingante apænedinque,

—Bitö ñöwo pöna inate mäo äninque iimaï apænecæbiimpa, Iñäna, möni töniiñamïna eñemïna. Iñömö ongönäni wampo pönëninque tæi gongænte ongoncædänimpa, ante cædinque minatö ædæmö apænemïna eñenguïñanii, ante ämi apænebainapa.

¹⁶ Änäni eñente mäo angä eñëninque Pabodo iñömö ængæ gantidinque önompoca compo compo cædinque tömënäni inänite apænecantapa.

—Minitö, pancamïniya idægoidi iñömïnite pancamïniya wamïni incæ, Näwä Wængonguï inongä ingampa, ante nē guñente wämïni iñömïnite botö tömämïni imïnite apænebo eñëedäni. ¹⁷ Idægoidi, minitö imïnite täno apænebo eñëedäni. Mönö idægocabo Wængonguï incæ mönö mæmæidi inänite apænte ængä ate wadäni nëmæ Equitobæ iñömö quëwëñönänite tömengä pönö cæcä ate tömënäni tæiyänäni yebængadänimpa. Ayæ Wængonguï tæi piñænongä inte ingæ æmæninque töö æmænte mäocä wadæ gogadänimpa. ¹⁸ Godinque tömënäni coadenta wadepo mänimpoga önomæca cægöninque æbämë wënæ wënæ cæte quëwënäni ate wæcä incæte tömengä pänämaï inte ata cæpote ænte mäocä gogadänimpa. ¹⁹ Ayæ wadäni Cänaämæ quëwënäni önompo æmæmpoque go mencabodäniya iñönänite wido cædinque Wængonguï, Tömënäni ömæ ini minitö ömæ wæætē bacæimpa, ante mönö wæmæidi inänite pönongä ængadänimpa. ²⁰ Edæ coatodo tiento tincoenta wadepo mänimpoga wabæca quëwënäni ate mäniñedē ate Wængonguï, Minitö ömæ, äninque mönö wæmæidi inänite pönongä æninque quëwengadänimpa.

Ante apænedinque Pabodo, Idægoidi dodäni æbänö cægadänii, ante godömenque apænecantapa. “Mänimæca ponte wantæpiyæ quëwënäni ate pancadäniya nē apænte änäni iñönänite Wængonguï angä ate adodäni awënëidi bai badinque wayedē wacä adocanque wayedē wacä adocanque wayedē wacä adocanque aagadänimpa. Tämoedo Wængonguï beyæ nē apænecä nänö ponte apæneganca mäninänique aagadänimpa. ²¹ Iincayæ ate mönitö dodäni iñömö Wængonguï ingante apænedinque, Bitö adocanque ingante ämi ate tömengä tæiyæ awënë bacæcäimpa, ante ancaa änäni eñente wædinque tömengä wæætē Beencamïnö wodi päingä incæ Titæ wengä Taodo ingante angä bagacäimpa. Tæiyæ awënë badinque tömengä coadenta wadepo mänimpoga iñonte aagacäimpa. ²² Ayæ ate Wængonguï wæætē, Idæwaa, ante Taodo wodi ingante wido cædinque Dabii wodi ingante wæætē angä tæiyæ awënë bagacäimpa. Adocä Dabii ingantedö ante apænedinque Wængonguï, Botö waa pönï entawëmo bai Yæte wengä Dabii iñömö adobai entawengä abopa. Tömengä iñömö botö änö bai edæ tömänö cæquingä ingampa, ante apæneganäcäimpa.”

²³ “Wængonguï doyedē, Codito ængä beyænque idægoidi quëwencædänimpa, ante do nänö angainö bai ñöwo cædinque adocä Dabii päingä Itota Codito ingante da pönongä

pongacäimpa. ²⁴ Itota ayæ pönāmaï iñongä Wäo wodi idægoidi tömänāni inānite apænedinque, Minitö, Idæwaa wænæ wænæ cæte awædö, ante Wængonguï gämænö wadæ pöningue æpænë guiedāni, ante apæneçä eñengadānimpa. ²⁵ Ayæ adocä Wäo incæ, 'Botö æbodö imoo, ante pönemini. Minitö pönënö bai wii imopa. Botö do pönimo iñömote mini nē pönëngä iñömö ayæ poncæcäimpa. Tömengä ingante adinque botö waëmö imopa diyæ tömengä awæncata godö ñi cæquimoo.' Ante Wäo tömengä nänö cæquënönö wodo iinque cæyedë apænegacäimpa."

²⁶ Ante apænedinque Pabodo godömenque apænecantapa. "Iñänāni, pancaminiya Abadäo wodi pæimini iñömöni pancaminiya wamini incæ Wængonguï ingante guiñemini iñömöni edæ botö tömämöni iminite apænebo eñeedāni. Mäninö, Codito ængä beyenque quëwencæminimpa, ante Wængonguï tömämö beyæ pönö apænegacäimpa. ²⁷ Eedotadëe quëwënāni tönö tömënāni awënëidi iñömö, Itota æcänö ingää, ante pönënamāi ingadānimpa. Iinque guëmanguïönæ iñö guëmanguïönæ iñö Wængonguï beyæ nē apænegaināni nāni yewæmongainta cöwë adāni incæte tömënāni, Itota nänö wænguinque wænæ wænæ cæcä ingampa töö, ante babæ ante apænte änewëninque edæ dodāni nāni yewæmonte angainö bai iinque cædānitapa. ²⁸ Tömënāni, Itota nänö wænguinque æbänö wentamö mongængää, ante cöwä ayönāni edæ dæ ampa. Ante wædinque awënë Pidato ingante apænedinque tömënāni, Itota ingante ämi wænönāni wængæe, ante anca änanäni eñëninque Pidato Ao angä wænönāni wængacäimpa. ²⁹ Iinque Itota ingante awāa timpote wænöninque tömënāni dodāni tömengä ingante ante nāni yewæmonte angainö bai tömänö ante iinque cædānitapa. Mänömaï cædāni ate wængä ate tömënāni änanäni ate tömengä miñæ godināni wæætë tömengä nänö ongöwāa pædæ æmpodinque önompo o togæmpote wæi önöwa o togæwadinque pædæ wæænöninque edæ ænte mäo daga wengadānimpa."

³⁰ "Incæte Wængonguï guiquënë do wæningä ingante, Ñāni ömæmöe, angä ñāni ömæmonte quëwengampa. ³¹ Ñāni ömæmöninque tömengä täönæ iñonte pö pö cædinque a ongöñongante edæ tömengä tönö wëenënedë Gadideabæ quëwëninque Eedotadëe iñömö nē pongaināni iñömö edæ tömengä ingante wæætë adānitapa. Iinque tömënāni iñömö nē adināni inte waodāni inānite, Itota näwangä ñāni ömæmonte miingä quëwengampa, ante nē apænedāni inānipa."

³² Ante apænedinque Pabodo, "Dodāni inānite Wængonguï, Minitö beyæ botö cöwë pönö cæcæboimpa, ante apænegacäimpa, ante eñëminitawo. Mäninö ante watapæ nänö apænegainö ante mönitö ñöwo iimaï ante apænemönipa. ³³ Mäninö tömengä dodāni inānite nänö angainö bai ñöwo tömënāni mömoidi beyæ iinque cædinque Wængonguï Itota ingante, Ñāni ömæmöe, angä ñāni ömæmongacäimpa. Tömengä ñöwo iinque cæcampa, ante Ämotamini nāni Angainta tänota gao wæintaa Wængonguï beyæ iimaï ante yewæmongatimpa. 'Botö Wëmi inömi imipa. Ñöwoönæ bitö Mæmpobo babopa.' ³⁴ Ayæ mäninö, Tömengä Wengä do wæningä iñongante Wængonguï angä ñāni ömæmöninque baö ñömäadāmaï incæcäimpa, ante pönëninque Itaiya wodi iimaï ante Wængonguï beyæ ante yewæmongacäimpa. 'Awënë Dabii wodi ingante apænedinque botö, Tæiyæ waëmö botö cædö bai cædinque cöwë ædæmö aate cæcæboimpa, ante nö botö angainö bai cædinque minitö iminite pönö adobaï cæcæboimpa,' ante Wængonguï angampa, ante yewæmongacäimpa. ³⁵ Ayæ mäninö ante wataa adobaï Wængonguï ingante apænete bai Dabii wodi yewæmongacäimpa. 'Bitö imite nē Cæcä iñömö bitö cædö ante cöwë cædongä inte wængä adinque bitö ædö cæte tömengä ingante ænāmaï inte ee abi baö ñömäaquiringää,' ante yewæmongacäimpa."

³⁶ "Awënë Dabii wodi guiquënë Wængonguï nänö änönö ante eñëninque adoyedë quëwënāni beyæ waa cædingä inte edæ nāne wæninque tömengä mæmæidi weca æiyongä tömengä baö ini ñömænte bagatimpa. ³⁷ Wæætë Wængonguï, Ñāni ömæmöe, angä eñente nē ömæmongaingä iñömö tömengä baö ñömäadāmaï ingatimpa. ³⁸ Iinque onguïñämöni botö tönināmini eñeedāni. Itota pönö cæcä beyenque mönitö minitö

iminite apænedinque, Wënæ wënæ mönö cædö ante adinque Wængongui pönö ñimpo cæcä ate quëwëmompä, ante apænemöni ëñëmïnipä. Möitee wodi nänö wææ angainö ante ëñente beyænque mönö iñömö dicæ nö cæte quëwëmö imongaa. ³⁹ Wæætë mäningä onguiñængä iñömö Itota iñömö tömengä nö pöni nänö entawënö ante pönongä ænte entawëmö beyænque mönö në pönëmö tömämö wæætë Wængongui ayongä edæ nö cæte quëwëmö iñömö imompä. ⁴⁰ Ìnïnque Wængongui beyæ në apænegaïnäni iïmaï ante nāni apænegaïnö ante pönëninque mïnitö iñömö, Mönitö imönite wïi bacæïmpä, ante nāmā wææ aquënë quëwëedäni. Iïmaï ante edæ ämotamïni ante bai yewæmongadänïmpä.

⁴¹ ‘Mïnitö në badete towëmïni inte cöwä aquënë quëwëedäni.

Botö cæbo adinque mïnitö ancaï guiñente wæcæmïnimpä.

Mïnitö ayæ mïmïni quëwëñömïni edæ botö mä pöni cæcæboïmpä, ante pönëmïniyaa.

Wængongui mänömaï cæcæcäïmpä, ante edonque pöni apænedäni bai

mïnitö wæætë, Babæ ancædö, ante wæcædömïnimpä.’

Ante nāni yewæmongainö ante adinque edæ badete todāmaï iedäni,” ante Pabodo apænecantapä.

⁴² Mänömainö ante iïnque apænedinque Pabodo tönö Bedënabee tömënäni odömöincönë ongonde oncodo tao goyönate Antioquiya iñömö quëwënäni iñömö, Wacä guëmanguïönæ bayonte mïnatö ñöwoönæ mïna apænedö bai godömenque apænemïna ëñencæmönïmpä, änänitapä. ⁴³ Ayæ godongämæ nāni ponte ongönincabo tao goyönäni oodeoidi pancadäniya ayæ oodeoidi bai në bagainäni adobaï Wængongui ingante guiñente quëwënäni nanguï inäni iñömö Pabodo tönö Bedënabee ïnate edæ tee empote godäni. Adinque iñäna wæætë tömënäni inänite apænedinque, Wængongui waadete nänö pönö cædönö ante pönëninque mïnitö cöwë ñimpo cædāmaï tæi ongöninque edæ waa quëwëedäni, ante nanguï apænedatapä.

⁴⁴ Ayæ adoque Wængongui itædë go ate tömënäni nāni guëmanguïönæ bayonte mäniñömö quëwënäni wodo tömänäni Wængongui Awënë nänö änö ëñencæte ante godongämæ pönänitapä. ⁴⁵ Nanguï inäni mänömaï pönäni ate wædinque oodeoidi guiquënë piïnte badinque, Babæ ante änewengampa, ante Pabodo ingante godö piïnte tedewënänitapä. ⁴⁶ Mänömaï tedewëñönänite Pabodo tönö Bedënabee wæætë guiñenedāmaï inte apænedatapä.

–Mïnitö oodeoidi imïni inte edæ täno ëñencæmïnimpä, ante cædinque mönatö Wængongui nänö änö ante edæ mä apænedinque mïnitö iminite täno apænequënëmöna intamönapä. Mïnitö iñæmpä mïni cöwë wänāmaï quëwenguïnö ante apæneyömmöna mïni apænte pangä wæquinque edæ Baa ämïnipä. Ante wæmöna inte mönatö ñöwo ëmö cæte godinque edæ oodeoidi ināmaï inäni weca edæ apænecæ gomöna tamëñedäni. ⁴⁷ Mönitö Awënë iïmaï ante mönatö imönate angacäïmpä.

“Quëwencæmïnimpä, ante botö cægainö ante bitö inguipoga tömämæ mäo apænedinque

Oodeoidi ināmaï inäni beyæ tica ënente bai cæcæbiïmpä,

ante cædinque botö bitö imite da godömo apænecæ gocæbiïmpä.”

Ante në apænegaingä inte Wængongui mönatö imönate angä ëñente apænemönapä.

⁴⁸ Mänömainö ante apæneda ëñëninque oodeoidi ināmaï inäni iñömö, Awënë nänö apænedö waa ëñëmönïpā, ante watapæ apænedänitapä. Ayæ mönö Awënë doyedë apænedinque, Mänimpodänique wede pönëninque cöwë wædāmaï quëwenguïnäni incædänïmpä, ante tömengä nänö në angainänique ñöwo pönënanitapä. ⁴⁹ Ìnïnque mönö Awënë tömengä nänö apænedö ante mäo apæneyönäni mäniömæ tömäo quëwënäni ëñënanitapä.

⁵⁰ Oodeoidi guiquënë, Pabodo tönö Bedënabee ïnate mönö wido cæcæïmpä, ante cædinque iïmaï cædänitapä. Onquiyænäni nāni në waa adäni inte Wængongui ingante guiñente quëwënäni iñönänite tömënäni tönö onguiñænäni mäniñömö quëwënäni

awēnēidi bai inte ñænænāni iñōnānite oodeoidi, Badogaa, ante nanguī ānāni ēñēnāni-tapa. Oodeoidi nanguī ānāni ēñēnte cædinque mānīnāni wæætē Pabodo tōnō Bedēnabee inate togænte pānīnque, Mōnitō ōmæ quēwēnāmai, ante wido cædāni godatapa. ⁵¹ Mānōmai cædāni godinque tōmēna iñōmō, Mānimæ nāwate awædō, ante bai cædinque piwacæ piwacæ cædinque Icōnio iñōmō gocæte ante wadæ godatapa. ⁵² Itota ingante nē tee empote quēwēnāni guiquēnē watapæ todāni badinque Wængonguī Tæiyæ Waēmō Ōnōwoca ingante ænte ēwocadinque edæ waa quēwengadānimpa.

14

Pabodo tōnō Bedēnabee Icōnio iñōmō godapa

¹ Māniī godinque Icōnio nāni quēwēñōmō pōnīnque Pabodo tōnō Bedēnabee cōwē nāna cæi bai cædinque oodeoidi odōmōincōnē go guidatapa. Go guiite apæneyōna, Nō apæneda, ante pōnēnīnque oodeoidi tōnō oodeoidi iñāmai iñāni tōnō nanguī iñāni nāni wede pōnenguīnque ēñēnānitapa. ² Wæætē oodeoidi incæ pancadāniya nē Baa ānāni inte babæ wapiticæ apænedinque, Iñāna nē wēnæ wēnæ apæneda inate wii ēñēngæimpa. Ante tedewēnāni ēñēnte wædinque wadāni oodeoidi iñāmai iñāni wæætē piinte badinque mōnō tōniñada inate ante wiwa adānitapa. ³ Incæte iñāna wantæpiyæ māniñōmō quēwēnīnque guīñēnedāmai inte mōnō Awēnē beyæ apænedatapa. Apæneyōna mōnō Awēnē incæ, Pabodo tōnō Bedēnabee iñōmō botō pōnō waadete cægainō ante nē nō apæneda iñōnāpa, ante wadāni pōnencædānimpa, ante cædinque tōmēna tōnō godongāmæ cæcā ate tōmēna, Ate pōnencædānimpa, ante mā cædinque bamōnengæ cædatapa.

⁴ Mānōmai cæda incæte māniñōmō quēwēnāni pancadāniya, Oodeoidi bai pōnēmōnīpa, āñōnānite wadāni guiquēnē, Itota da godongā nē pōna bai pōnēmōnīpa, ante pancadāniya wadō pancadāniya wadō cædānitapa. ⁵ Iñinque oodeoidi tōnō oodeoidi iñāmai iñāni tōnō tōmēnāni awēnēidi tōnō godongāmæ pōnēnīnque, Pabodo tōnō Bedēnabee inate mōnō piinte cædinque dicaca tacamō wæncædaimpa. ⁶ Ante Ao ante cæyōnāni Pabodo tōnō Bedēnabee iñōmō, Mānōmai ante cædānīpa, ante ēñēnte wædinque wodii winōnatapa. Wodii winōnte godinque Dicaōniabæ pōnīnque tōmēna Ditada nāni quēwēñōmō Dedebe nāni quēwēñōmō wayōmō wayōmō godinque, ⁷ mōnō Awēnē ingantedō ante watapæ māo godōmenque apæneda ēñēnōnānimpa.

Ditada iñōmō Pabodo ingante tacadānīpa

⁸ Māniñōmō Ditada iñōmō edæ wacā cabæwaingā tōmengā ōnōwa tipæwaa wēnæ wēnæ ēwacā ēñagaingā inte dao dao godāmaingā pægaingā inte tæ contate a ongongan-tapa. ⁹ A ongōñongā Pabodo ponte apænecā ēñēe congantapa. Pabodo wææmō adinque ōnōwēnenque pōnēnīnque, Iñgā nānō waa bawāquinque nē pōnengā ingampa, ante do pōnente wædinque, ¹⁰ tōmengā ingante ogæ tedete,

—Ængæ gantidinque adiyæ gongæmi āmopa.

Angā ēñēnīnque nē cabæwaīningā incæ quingæ ængæ gantidinque dao dao gocantapa. ¹¹ Māniñōmō ongōnāni guiquēnē Pabodo mānōmai cæcā ate wædinque dicaōniaidi tōmēnāni tededō yedæ ānīnque,

—Iñāna iñōmō wængonguīna incæ waoda bai bate mōnō weca wæænte ongōna abaimpa.

¹² Ante pōnente wædinque Bedēnabee ingantedō ante apænedinque, Mōnō wængonguī Deoto ingānō anguēnē, ante Deoto pōnō pemōnīnque, Iñgā wæætē nē apænecā ingampa, ante pōnēnīnque Pabodo ingante, Mōnō wængonguī Edēme ingānō anguēnē, ante pemōnānitapa. ¹³ Ayæ tōmēnāni quēwēñōmō yæcado tōmēnāni wængonguī Deoto oncō mænonte ongōnīmpa. Deoto quī, ante nē godongā iñōmō edæ, Pabodo tōnō Bedēnabee nē wængonguīna ināpa, ante wapiticæ pōnēnīnque, Mōnō wængonguīna quī, ante tōmānāni tōnō godoncæ cæcantapa. Mānōmainō ante cædinque tōmengā nāni que cædi ongai ænte pōnīnque wagadaidi onguīñænāni iñānite yabædemō ænte ponte

wænoncæ cæcantapa. ¹⁴ Mänömaï cæcä ate wædinque nê ponte apæneda Bedënabee tönö Pabodo iñömö, Wiwa cæminipa, ante bai cædinque nämä weocoo wänä ñæninqe pogodo mämö nanguï ongönäni weca tæcæguedê næ gongæninque,

¹⁵ —Iñänäni, quimæ quëwëminii. Minitö waomini iminipa, mönatö minitö bai adobai waomöna imöna apa quëwëminii. Mönatö iñæmpa watapæ möna ëñenö ante apænecæte ante pönimöna inte minitö iminite iïmaï ante ämönapa. Iincoo mïni waa adincoo incæ edæ, Önoncooque impa, ante adinque minitö mänincooque wido cædinque Wængongui nê Quëwengä gämænö pödäni. Tömengä iñömö öönæ inguipoga gäwapæntibæ nê badongaingä inte öönædê quëwënäni tömänäni inguipoga quëwënäni tömänäni gäwapäa quëwënäni tömänäni inänite nê badongaingä Wængongui inongä ingampa. ¹⁶ Tömengä wëenënedê tömämaë quëwënäni nämä pönëninque näni goquïnonque ee acä gogadänimpa. ¹⁷ Incæte tömënäni inänite wii æmäwo emö cæte gogacäimpa. Wæætê edæ, Wængongui æbänö ingää, ante ëñencädänimpa, ante cædinque tömengä ñimpo cædämaï cöwê odömongacäimpa. Edæ minitö iminite pönö waadete cædinque Wængongui cöönæ angä inguipoga wææ ininque incadepo incadepo cænguï eyepæ pönongä cæninque minitö watapæ todinque quëwëminipa.

¹⁸ Mänömaïnö ante Pabodo tönö Bedënabee wææ cæcæte ante apæneda ëñenäni incæte godongämæ ongönäni guiquënë, Mïnatö wængonguimïna qui, ante cöwê pönoncæmönimpa, ante wawique pönëninque cædänitapa. Wodo edæ pönöñönänite iñäna godömenque wææ äna ëñëninque ñimpo cæte wii pönönänitapa.

¹⁹ Ayæ ate oodeoidi Antioquiya iñömö quëwëninque Icönio iñömö quëwëninque pö Ditada iñömö pöninque mäniñömö godongämæ ongönäni inänite, Iïna onguïñäna inate mönö wii ëñengäimpa, ante änäni. Eñëninque godongämæ Ao äninque Pabodo ingante dicaca tacadäni wæyongä, Æmäwo wængampa, ante pönëninque tömënäni näni quëwëñömö yabæ inö wëä mäo wido cædänitapa. ²⁰ Incæte Itota ingante tee empote quëwënäni godongämæ ponte æänimæ gongænte ayönäni Pabodo yabæque æmäwo wænte bai öñöningä inte ængæ gantidinque adodö tömënäni quëwëñömö pongantapa. Ayæ iïmö ate tömengä Bedënabee tönö wæætê Dedebe näni quëwëñömö adodö gocæte ante wadæ godatapa.

²¹ Godinque Dedebe iñömö pöninque Codito ingantedö ante watapæ apæneda ëñëninque tömënäni nanguï inäni Itota miñæ quëwënäni bagadänimpa. Ininque tömëna mäniñömö idæwaa apænete wadæ godinque Ditada iñömö adodö pö godinque Icönio iñömö adodö pö godinque Antioquiya näni quëwëñömö wæætê pönatapa. ²² Mänömaï wayömö wayömö godinque Itota ingante nê tee empote quëwënäni inänite bee téninque Pabodo tönö Bedënabee nanguï apæneda ëñëninque iñäni godömenque tæi piñænte entawënäni badänitapa. Ayæ tömënäni inänite, Mïni pönënö ante ñimpo cædämaï inte godömenque wede pönëninque tæi ongoncæminimpa, ante ædæmö apæneda ëñënanitapa. Ayæ waadete apænedinque, Mönö nanguï nantate wædinque Wængongui Awënë Odeye nempo guicäimpa, ante apænedatapa. ²³ Ayæ wayömö wayömö tömäo godinque Itota ingante godongämæ näni pönencabo weca go guite ongöninque Pabodo tönö Bedënabee iñömö iïmaï cædatapa. Nê nö cædäni inänite adinque tömëna, Itota Codito ingante mïni godongämæ pönencabo iñöminite iñäninque edæ nê aadäni bacädänimpa, ante äna ate mäninäninque nê Picænäni näni änönäni badänitapa. Ayæ cænämaï inte Wængongui ingante apænete ate tömënäni inänite iñäna, Minitö mönö Awënë ingante wede pönëminitawoo. Tömengä mïni nê pönëngöngä incæ minitö iminite wææ aacæcäimpa, ante apænedatapa.

Tidiabæ Antioquiya iñömö ocæ ëmænte godapa

²⁴ Pabodo tönö Bedënabee ayæ Pitidiabæ wodo tebæ godinque Pampidiabæ pönatapa. ²⁵ Mäniñömö ponte Pedegue näni quëwëñömö mönö Awënë nänö angainö ante apænedinque Ataya näni quëwëñömö wææ pönatapa. ²⁶ Mäniñömö pöninque tömëna imämäa Antioquiya iñömö adodö tacæte ante ñænæ wipodê guidatapa. Doyedê iñömö

tömëna nāna māniñömö quëwente tao goyedë wadāni nē pönënanī inte tömëna īnate, Wængonguī pönö waadete godongāmæ cæcā ate minatö eyepæ cæcæminaimpa, ante da godongaināni īnönānimpā. Nōwo īñömö tömënanī nāni āninö do īnque eyepæ cædīna inte tömëna adoyömö nāni da godiñömö ocæ ēmænte pönatapa. ²⁷ Māniñömö pöninque tömënä Itota ingante godongāmæ nāni pönencabo īnānite āñete pönāni ate tömënanī īnānite apænedinque Wængonguī tömëna tönö nānö cædinö ante adodö adodö tömänö ante apænedatapa. Oodeoidi īnāmaī īnāni wede pönëninque guicædānimpā, ante Wængonguī odemö wi ænete bai cæcā ate do pönente badānīpa, ante apænedā ēñënanītapa. ²⁸ Ayæ māniñömö Itota ingate nē tee empote quëwënanī tönö wantæpiyæ quëwengadaimpa.

15

Eedotadëe īñömö pöninque wæætedö wæætë ānāni

¹ Māniñedë onguīñænāni Oodeabæ quëwënanī pancadāniya Antioquiya īñömö wææ pöninque nē pönënanī īnānite īmaī ante odömonte wææ angadānimpā. Mīnitö bagāamīni inte Mōitee wodi nānö wææ angainö bai wīi cæmīni adinque Wængonguī dicæ ængampa quëwenguīmīni. ² Ante wææ ānewënanī ēñente wædinque Pabodo tönö Bedënabee īñömö, Quīmæ ānewëmīni, ante nāëmæ wææ ānatapa. Īnque Antioquiya īñömö quëwënanī guiquënë Pabodo tönö Bedënabee tönö wadāni nē pönënanī īnānite, Mīnitö Eedotadëe godinque Itota nānö da godongaināni tönö nē aadāni Picænāni īnānite bee tēninque, Oodeabæ quëwënanī nāni wææ ānönö ante æbānö cæquiī, ante ēñencæte ante æedāni.

³ Āninque Itota Codito ingante godongāmæ nāni pönencabo incæ Pabodoidi īnānite da godönāni wadæ godānitapa. Ayæ godinque Pēnitiabæ wodo tebæ godinque mānimæ quëwënanī īnānite apænedinque godömenque Tāmadiabæ adobai wodo tebæ gote apænedinque, Wængonguī pönö cæcā ate oodeoidi īnāmaī īnāni incæ mönö Awënë gāmænö do pönānīpa, ante Pabodoidi apænedāni. Ēñëninque mönö tönīñadāni mānimæ quëwënanī incæ watapæ todānitapa.

⁴ Pabodoidi Eedotadëe īñömö pönāni adinque Codito ingante nāni godongāmæ pönencabo tönö Itota nānö da godongaināni tönö nē pönënanī īnānite nē aadāni nē Picænāni tönö godongāmæ ponte ongöninque Pabodoidi īnānite, Waa pömīni amönīpa. Ante āñönānite Pabodo tönö Bedënabee īñömö, Wængonguī īmaī mönatö tönö godongāmæ cæcampa, ante tömänö ante adodö adodö apænedā ēñënanītapa. ⁵ Māniñedë Paditeoidi incæ pancadāniya nē pönënanī badīnāni inte ængæ gantidinque īmaī ante apænedānitapa.

—Īñæmpa oodeoidi īnāmaī īnāni īnānite, Cöwë ëö togænguënēmīni imīnīpa, ante mönö wææ angæimpa. Ayæ Mōitee wodi, Īmaī cæedāni, ante nānö angainö ante ēñenguënēmīni imīnīpa, ante mönö cöwë angæimpa.

⁶ Ānāni ate Itota nānö da godongaināni tönö nē pönënanī īnānite nē aadāni Picænāni tönö godongāmæ pöninque, Oodeoidi īnāmaī īnāni īnānite mönö æbānö anguiī, ante tedecönānitapa. ⁷ Māniñö ante wæætedö wæætë apænedāni adinque Pegodo guiquënë ængæ gantidinque godongāmæ ongönāni īnānite īmaī ante apænecantapa.

—Botö mēmōidi, mīnitö īmaīnö ante do ēñëmīnīpa. Wængonguī do īñöñedë, Oodeoidi īnāmaī īnāni incæ Codito ingantedö ante watapæ ēñëninque edæ nē pönënanī bacædānimpā, ante cædinque mönö imonte apænte æninque botö imote angä gote māniñö ante apænebo ēñënanītapa. ⁸ Da godongä gote apæneyömo Wængonguī, Waocä æbānö mīmōno pönengä ingää, ante nē ēñëngongä inte edæ tömengä Tæiyæ Waëmö Ōnōwoca ingante oodeoidi īnāmaī īnāni īnānite da pönongä ænte ewocadānīpa. Īnque mönö imonte pönö cæcā bai tömënanī īnānite adobai cædinque tömengä edæ, Oodeoidi īnāmaī īnāni īnānite botö Ao ante do æmopa, ante odömongä abaimpa. ⁹ Tömënanī wede nāni pönëno beyænque Wængonguī tömënanī mīmö ñā mēnongadinque, Oodeoidi īnāmaī īnāni incæ mīnitö bai adobai īnāni apa ānewëmīni, angampa. ¹⁰ Mönö īñömö

mönö mäemæidi tönö teemē mongænte bai wædinque edæ, Möitee wodi nānō wææ angainö ante mönö ædō cæte eñente cæquii, ante godongämæ wægamoimpa. Nōwo guiquenē Oodeoidi ināmaï ināni incæ tæcæ pönēñōnānite mīnitō iñōmō teemē cōnō-nancapænte bai cædinque tōmēnāni inānite, Cæedāni, ante wææ äminipa tōö. Mänōmaï cædinque mīnitō, Wængongui önonque cæcampa, ante bai cæminipa tōö. ¹¹ Iñæmpa mönö Awēnē Itota pönō waadete ængā beyænque tōmēnāni wænāmaï inte quēwēnāni bai mönö adobai māninō beyænque wænāmaï inte quēwēmōmpa, ante pönēmōnīpa. Mänōmainö ante Pegodo iinque apænecā eñēnānitapa.

¹² Ayæ Bedēnabee tönö Pabodo wæætē tōmēnāni inānite apæneda eñēninque godongämæ ongōnāni tōmānāni edæ tededāmaï inte eñēē cōnānitapa. Tōmēna iñōmō, Wængongui mönatō tönö godongämæ cædinque edæ, Mīnatō mā cæmīna adinque Oodeoidi ināmaï ināni incæ pōnencædānimpa, ante cædinque bamōnengæ wæætē wæætē cæcantapa, ante adodō adodō ante apænedatapa. ¹³ Iinque apæneda ate Tantiago wæætē tōmangā apænecantapa.

—Botō biwīidi, botō nōwo apænebo eñēedāni. ¹⁴ Wængongui tāno waadete pönō cædinque oodeoidi ināmaï ināni pancadāniya inānite apænte æninque, Botō quimīni bacæminīpa, ante cæcantapa, ante Timönō do apænecā eñentamōmpa. ¹⁵ Ayæ Wængongui beyæ nē apænegaïnāni incæ, Iincayæ ate Wængongui mānōmaï cæcæcāimpa, ante pönēninque adoyōmō ante iimāinō ante do yewæmongadānimpa.

¹⁶ “Awēnē Dabii nempo nē quēwengāināni nāwæ godāni adinque botō iñōmō oncō wodintai wæætē tæi mænonte bai cædinque, iincayæ ate adodō pōninque pönō cæbo ate nāwæ gogāināni iñōmō Awēnē nempo adodō pōninque quēwencædānimpa.

¹⁷ Mänōmaï cæbo ate edæ wadāni tōmāmæ quēwēninque oodeoidi ināmaï ināni incæ botō emōwo ante nē ewocadāni inte nāwā Awēnē ingante ante diqui diqui minte acædānimpa,

¹⁸ ante mönö Awēnē iñōmō edæ māninō ante nē cægāingā inongā inte, do cæcā nāni eñengāinō ante apænecampa.”

¹⁹ Ante yewæmongatimpa, ante Tantiago godōmenque apænecantapa. “Botō Wængongui nānō apænegaïnō ante pōnente wædinque, Iimāi cæcæimpa, ante pönēmōpa. Oodeoidi ināmaï ināni, Idæwaa wapiticæ pōnente awædō, ante wædinque ocæ emænte nāwā Wængongui gāmænō pōñōnānite mönö edæ ee cædinque tōmēnāni taadō ganta cædedāmaï ingæimpa. ²⁰ Önonque, Tōmēnāni acædānimpa, ante iimāi ante yewæmongæimpa, Wadāni, Wængonguiidi quī, ante cængui nāni cōnōnī cænāmaï incæmīnīmpa. Ayæ nānōogængā ināmaï iñongante godō mönāmaï incæmīnīmpa. Ööingā nē wēmencate wæningā ate cænāmaï incæmīnīmpa. Baö wepæ owemōingā i adinque cænāmaï incæmīnīmpa, ante mönö yewæmongæimpa, ämōpa. ²¹ Edæ doyedē pōnī oodeoidi nāni quēwēñōmō nāni quēwēñōmō tōmāā iñōmō māo Möitee wodi nānō wææ angainö ante apænedāni eñengadānimpa. Ayæ nōwo ganca adobāinō ante guēmanguiönæ iñō guēmanguiönæ iñō mönö odömōincōnē go guite apænedāni eñente mānōmainö ante eñente cæquēnēnāni inānīpa. Māninonque ante mönö yewæmongæimpa, ämōpa,” ante Tantiago iinque apænecantapa.

Oodeoidi ināmaï ināni acædānimpa, ante yewæmōnānīpa

²² Mänōmainö ante apænecā eñēninque Itota nānō da godongāināni tönö nē aadāni Picænāni tönö Itota Codito ingante godongämæ nāni pōnencabo tōmancabo tönö godongämæ pōnēninque, Mönö cabo incæ mēnaa inate apænte æninque tōmēna inate, Mīnatō Pabodo tönö Bedēnabee miñæ Antioquiya goeda, ämō gocædaimpa. Ante Ao äninque tōmēnāni, Mönö pōnencabo iñōmonte Codaa Badatabato mönö ämongā tönö Tidato iñōmō nē äna inapa, ante adinque tōmēna inate apænte ænānitapa. ²³ Ayæ, Cadota ante ænte gocædānimpa, ante iimāi ante yewæmongadānimpa.

Mönitö pancamöniya Itota nānō da godongaimöni iñömöni pancamöniya nē pönēnāni inānite nē aamöni Picämöni imönipa. Mänömaï imöni inte mönitö mīnitö tōniñamöni imönipa. Mīnitö oodeoidi ināmaï imīni inte Antioquiya iñömö Tidiabæ iñömö Tiditiabæ iñömö quēwēninque mīni pōnencabo mīni pōnencabo iñömīnite mönitö, Waa quēwencämīnimpā, ämönipa.

²⁴ İmaï ante tededāni ēñentamönipa. Mönitö, Goedāni, ānāmaï iñömöni wadāni möni cabo incæ pancadāniya wadæ gote mīnitö weca pōninque mīnitö imīnite, Eö togæedāni, ante wææ ānāni. Eñēninque mīnitö tōmēnāni nāni wææ ānīnō beyænque teēmē mongæante baï, Æbānō cæquiï, ante wämīnimpā, ante tededāni ēñēmönipa.

²⁵ Mänömaïnō ante tededāni ēñente wædinque mönitö godongāmæ pōnēninque onguñæna mēnaa inate apænte æninque tōmēna inate iïmaï antamönipa. Mīnatö Bedēnabee tönö Pabodo mönō nē waadeda tönö godongāmæ godinque oodeoidi ināmaï ināni weca goeda, ante cætāmönipa.

²⁶ Bedēnabee tönö Pabodo iñömö mönō Awēnē Itota Codito emōwo beyænque cædinque nāna nāmā wodo wænguinque cædatapa. ²⁷ İninque, İi cadota möni yewämönö nāwangā impā, ante adodö ante apænecædaimpā, ante cædinque mönitö Codaa tönö Tidato inate da godömöni godinque mīnitö weca pōna aedāni. ²⁸ Edæ, mönitö Wængongui Tæiyæ Waemö Önōwoca tönö godongāmæ pōnēninque, Mīnitö godömenque teēmē mongænāmaï incämīnimpā, antamönipa. İninque, Mīnitö iïmaï cædinque idæwaa, ante pōnēmönipa.

²⁹ Wadāni, Wængonguiïdi qui, ante cængui nāni cōnōnīncoo ante cænāmaï gomö aedāni. Wepæ owemöingā adinque ööingā ñē wēmencate wæningā adinque cænāmaï iedāni. Ayæ nānōogængā ināmaï iñongante godö mönāmaï iedāni. Mīnitö mäninque ante ee ate cædāmaï imīni ininque waa quēwēmaimīnimpā. Mäninque ante yewämömönipa.

³⁰ Ante yewæmonte pædæ pōnōnāni ænte wadæ godinque Antioquiya iñömö wæidinque nē pönēnāni inānite āñete godongāmæ pōnāni ate Eedotadēē quēwente pōnāni tōmēnāni nāni yewämönīnta pædæ pōnōnāni ænte adānitapa. ³¹ Eedotadēē quēwēnāni, Mīnitö godömenque teēmē mongænāmaï incämīnimpā, ante nāni yewæmonte ānīnō adinque oodeoidi ināmaï ināni iñömö wampo pōninque todānitapa. ³² Codaa tönö Tidato iñömö Wængongui beyæ nē apæneda inte adobāi, Tæi piñænte entawencämīnimpā, ante cædinque ædæmō apæneda ēñēninque tōmēnāni nāni pōnencabo mīmōnē gancæ batawente wede pönēnānitapa. ³³ İninque tæönæ quēwēna ate māniñömö quēwēnāni nāni pōnencabo wæætē tōmēna inate waa apænedinque, Ñowo gānē pōnēninque waa goeda, ante tōmēna inate nē da pōnōnāni weca wæætē adodö da godōnāni godatapa. ³⁴ Tidato guiquēnē, İñömö ongoncæboimpā, ante ayæ ongongantapa. ³⁵ Pabodo tönö Bedēnabee guiquēnē Antioquiya iñömö ayæ quēwēninque wadāni nangui ināni tönö godongāmæ odömōninque Wængongui nānō ānō ante watapæ apæneda ēñengadānimpā.

Pabodo ingante wæætē da godōnāni gocampa

³⁶ İncayæ ate Bedēnabee ingante Pabodo,

—Wēēnēñedē Wængongui nānō ānō ante möna gote apænediñömö wæætē adoyömö gote mönatö tōniñadāni weca gote ēñadinque, Æbānō quēwēnāni, ante acämōnaimpā.

³⁷ Äñongā Bedēnabee Ao angantapa. Ayæ tōmengā, Wäö Mäadoco nāni ānongā ingante mönatö tönö godongāmæ gocæcäimpā, ante cæcantapa. ³⁸ Pabodo guiquēnē, İñæmpa wēēnēñedē Pampidiabæ iñömö pōñömōnate iingā Mäadoco iñömö mönatö tönö godömenque cædāmaï inte edæ wadæ gocantapa, āninque, Ñowo wīi ænte gocæimpā, ante Baa angantapa. ³⁹ İninque tōmēna wæætedö wæætē āninque tōmēna wadö wadö gote panguimæ godatapa. Bedēnabee guiquēnē Mäadoco ingante ænte ñænæ gāwapāa gote wipodē ñænæmpodē guite wogaa godinque wää tēiwænē Tipidebæ tao gocantapa. ⁴⁰ Pabodo guiquēnē Tidato ingante apænte ænte gocæ cæyongante tōmēnāni nāni pōnencabo iñömö tōmēna inate apænedinque, Wængongui mīnatö

beyä pönö waadete cæcæcäimpa, änäni eñëninque wadæ godatapa. ⁴¹ Ayä Tidiabæ tömäo godinque Tiditiabæ tömäo godinque Pabodo iñömö Codito ingante näni godongämæ pönencabo inänite apæneçä eñëninque tömënäni wede pönëninque tæi piñænte batawengadänimpa.

16

Pabodo tönö Tidato miñæ Timoteo gocampa

¹ Mänii godinque Pabodo Dedebe iñömö ponganque go Ditada iñömö pongantapa. Itota ingante tee empote nê gocä Timoteo mäniñömö quëwengacäimpa. Tömengä wäänä oodea inöna incæ nê ædæmö cæte pönënä inönäimpa. Timoteo mæmpo wæætë guidiego inongäimpa. ² Timoteo iñömö Itota ingante pönente quëwengä adinque nê pönënäni Ditada iñömö quëwënäni incæ Icönio iñömö quëwënäni incæ, Timoteo nê waa quëwëngä ingampa, ante adoyömö apænedänitapa. ³ Ìninque Pabodo, Botö tönö Timoteo guëa gocæcäimpa, angantapa. Wæætë, Oodeoidi mänimæ quëwënäni tömänäni, Timoteo mæmpo guidiego ingampa, ante do eñënäni inte piñäni wæcæ wæ. Äninque Pabodo angä yæcadogæ ëö togænäni ate Timoteo ingante ænte gocantapa. ⁴ Godinque Pabodoidi wayömö näni quëwëñömö wayömö näni quëwëñömö godinque iimaï ante apænedänitapa. Minitö oodeoidi inämaï imini inte æbänö eñente cæte quëwenguimini, ante Eedotadëe iñömö nê aadäni Picænäni tönö Itota nänö da godongainäni tönö godongämæ pönëninque do änänipa. Ante apænedinque Pabodoidi wæætë tömënäni näni äninö ante adodö ante apænedäni eñënänitapa. ⁵ Mänömaï apænedäni eñente wædinque Codito ingante näni godongämæ pönencabo iñömö wayömö näni cabo wayömö näni cabo tömänäni wede pönëninque edæ tæi piñænte badinque iimö iñö godömenque iimö iñö godömenque nanguï yebænte bagadänimpa.

Mäatedöniabæ quëwengä ingante Pabodo wiimonte acä

⁶ Pabodoidi Atiabæ gocæ cæyönänite Wængonguï Tæiyæ Waëmö Önöwoca iimaï ante apæneçantapa. Minitö botö änö ante mänimæ apæneçæ godämaï incæminimpa, ante wæcæ angä eñente wædinque tömënäni wæætë Gadatiabæ incæ pancabaa Pidiquiabæ tömäo cægöninque godänitapa. ⁷ Mänimæ cægönaque go Miitiyabæ ganca pöninque Bitiniabæ gocæ cæyönänite Itota Tæiyæ Waëmö Önöwoca incæ, Godämaï, Baa angä wædinque tömënäni mäniñömö ñimpo cæte godömenque godämaï inänitapa. ⁸ Mänömaï beyä tömënäni Miitiyabæ wodo pænta go Todoa iñömö wæi godänitapa.

⁹ Mäniñömö wæi gote ongöninque woyowotæ ba ate Pabodo wiimonte baï ayongä Mäatedöniabæ onguïñængä a ongöninque tömengä ingante iimaï ante apæneçantapa. “Mäatedöniabæ pöninque bitö mönitö imönite pönö cæquimi ämönipa,” ante Pabodo ingante angä eñengantapa. ¹⁰ Ìninque Pabodo, Mänömaï wiimonte baï atabopa, ante apæneçä eñente wædinque mönitö wæætë, Minitö Mäatedöniabæ gote mäo apænemini eñencädänimpa, ante Wængonguï incæ cæbaingampa. Ante pönente wædinque botö Odocabo tönö wadäni Pabodo tönö nê godongämæ cädäni tönö wæætë, Mönö mäniñömö gote Codito ingantedö ante watapæ apæneçäimpa, ante pönëninque gocæte ante cætamönipa.

Pabodo tönö Tidato Pidipoto iñömö ponte cædapa

¹¹ Mänömainö ante pönëmöni inte mönitö Todoa iñömö gäwapæ wedeca quëwëninque ñænæ wipodë guite wogaa tao godinque wää tëiwænë Tämotadate töingä gote möninque iimö ate tao Næapodi pontamönipa. ¹² Mäniñömö pö ti wæëninque taadonque godinque mönitö Pidipoto odömänoidi näni ponte quëwëñömö adoyömö pöninque tæönæ quëwentamönipa. Mäatedöniabæ incæ pancabaa quëwënäni näni yæcado quëwëñömö Pidipoto impa. ¹³ Mönitö mäniñömö ponte quëwëninque guëmanguïönæ iinque bayonte tömënäni näni quëwëñömö yabædemö tao godinque, Önö wedeca Wængonguï ingante godongämæ apænebainänipa, ante önöwënenque pönëninque mäniñömö gotamönipa. Mäniñömö ponte ayömöni onquiyænäni do

godongämä ponte a ongönäni adinque mönitö tæ contadinque tömënäni inänite apænetamönipa. ¹⁴ Mäniñömö nê ëñënäni tönö adodanque tömënä emöwo Didia iñömö Tiatida quëwënönä inte weocoo awënëidi näni opatawæ ëmoncoo godonte ænte quëwënönäimpa. Tömënä Wængonguï ingante nê waa ate pönënä inonäimpa. Ìninqe Pabodo apæneca ëamonca ongonte ëñëñönante mönö Awënë tömënä mimö wi ænete bai cæcä ate tömënä wede pönënantapa. ¹⁵ Ìninqe tömënä näni owocabo pönëninque godongämä æpænë guidäni ate tömënä iñömö mönitö imönite apænedantapa.

—Botö imote ante adinque minitö, Mönö Awënë ingante Didia ædæmö cæte pönengä ingampa, ante pönëminitawoo. Mänömainö ante pönëmini inte minitö botö oncönë ponte owoedäni, ämopa.

Ante ancaa apænedä ëñente wædinque mönitö Ao ante gote owotamönipa.

¹⁶ Mäniñedë wacä onquiyängä obe badä inongä inte wadäni nempo quëwëninque tömënäni beyænque nê cæte quëwengä inongäimpa. Tömengä iñömö nê cæwënegä inte wadäni inänite, Ìncayæ ate æbänö baquii, ante yewænte tedecä inongäimpa. Tedecä ëñëninque nê ëñënäni wæætë tömënäni näni godonte æinta bacoo pædæ pönö pædæ pönö cædäni incæte tömengä awënëidi wæætë ö æ ö æ cædönäimpa. Ìninqe mäniñömö quëwëninque mönitö ayæ ate Wængonguï ingante näni apæneñömö adodö gocæ cæyömönite mäningä onquiyängä mämö bee tengantapa. ¹⁷ Mänömaï bee tëninque tömengä mönitö Pabodo tönö möni gocabo iñömönite tee empo tee empo pöninque yedæ angantapa.

—Ïñäni Wængonguï Æibæ pönï Quëwengä ingante nê cædäni inte minitö imönite apænedinque, Æcänö ængä beyænque quëwenguïi, ante apænedänipa.

¹⁸ Äninque tæönæ iñonte tömengä tömënäni inänite tee empote godinque Yæ yæ änewengä ëñente wædinque Pabodo, Ancaa ëñente awædö, ante dadi ëmænte wënæ ingante äninque,

—Bitö imite botö Itota Codito emöwo apænedinque, Tao gobäwe, ämopa.

Ante tæcæ apæneyongä wënæ incæ baquécä ingante emö cæte tao gocantapa.

¹⁹ Pabodo mänömaï angä ate tao go ate wædinque onquiyängä awënëidi guiquënë, Æ tömengä yewängä beyæ mönö æincædö incæ dæ gotimpa. Nöwo æbänö cæte nanguï ænguimöö. Ante piinte wædinque tömënäni, Mönö tömëna inate odömäno awënëidi weca ænte gocäimpa, ante Pabodo tönö Tidato inate bæi ongonte wëä mæo tömënäni näni godonte æiñömö ænte godänitapa. ²⁰ Ayæ odömäno awënëna tömënäni quëwëñömö nê apænte äna iñönate nê piinte cædäni mänina awënëna weca Pabododa inate ænte mämö gö cædinque,

—Ïna iñömö edæ oodeoda inöna inte mönitö quëwëñömö ponte wënæ wënæ apænedä ëñëninque tömänäni ænguï badinque Yæ yæ änänipa. ²¹ Mönö odömäno-cabo mönö wii cæquënëno ante odömönte apænedinque tömëna iñömö, Mäniñonque cæedäni, ante ancaa änewënapa.

²² Ante tæcæ apæneyönäni godongämä ongönäni iñacabo cædinque Pabodo tönö Tidato inate piinte cædänitapa. Ayæ odömäno awënëna iñömö, Tömëna weocoo gä tadongate tæi tæi päedäni. ²³ Äna ëñente tæi tæi pänäni wæyönate awënëna godömenque äna ëñente cædinque tömëna inate bæi ongonte mæo tee mönedinque tee möneincö nê aacä ingante, Ìina inate bitö ædæmö wææ ae, änatapa. ²⁴ Ìninqe mänömaï äñäni ëñente wædinque nê wææ wänongä wæætë Pabodo tönö Tidato inate guimongacönë manguicä guidatapa. Ayæ godömenque tömëna önöwa awæmpaa goti guidöwate tæi tee mönecä ongöñöna wadæ taocantapa.

²⁵ Ayaönænëña bayö Pabodo tönö Tidato mänömaï goti guidöwate wægöninque Wængonguï ingante apænedinque ämotamini änecoñönate wadäni nê tee mönete ongönäni ëñë cönänitapa. ²⁶ Ìñontobæ goinque nanguï ocæ ocæ pöninque tee möneincö tæñöninca incæ wancæ wancæ cæyö odemö tömänemö wi æmænete gotapa. Ayæ tömänäni inänite näni tæi pönï yaëmengö näni ñäni ñænime incæ ñimæncæ ñimæncæ wææntapa. ²⁷ Tee möneincö nê aacä guiquënë iñontobæ ñäni ömæmonte ayongä,

Odemö dobæ wi æmænete gotimpa, ante wædinque tömengä, Æ tee mönete ongöninäni dobæ tao wodii winönänipa, ante pönente wædinque, Botö awënëidi püinte pänäni wængui wæ, ante pönëninque nämä wænonte wæncæte ante yaëmë o togænte ængä.

²⁸ Ate wædinque Pabodo iñontobæ ogæ tedinque,

—Nämä wænæ wænæ cædämaï. Ee ae. Tömämöni ayæ ongömöni apa quëwëë.

²⁹ Angä ëñëninque në wææ wänongä iñömö edæ, Tica wodönoï ænte pödäni, angä ænte pönäni æninque tömengä pogodo pöninque ancai guiñente wædinque do do wæate wædinque Pabodo tönö Tidato önöwa inö wæængantapa. ³⁰ Ayæ ængæ gantidique edæ tömëna inate oncodo ænte mäocä tayönte,

—Mīnatö në ämīna inte apænemīna ëñëmoeda. Botö æbänö cæte quëwënguimoo, ante wæcä.

³¹ Ëñëninque tömëna wæætë,

—Awënë Itota ingante edæ wede pönëmi ate tömengä ængä beyænque quëwëncæbi-impä. Mīni owocabo tömämīni adobai wede pönente quëwëncæmīnimpä, änatapa.

³² Äninque tömëna në wææ wänongä ingante godömenque Wængongui Awënë nänö apænegaïnö ante apænedinque tömengä oncönë näni owocabo tömänäni inänite apæneda ëñënanitapa. ³³ Ayæ woyowotæ incæ tömëna inate æninque në wææ wänongä iñömö tömëna inate tæi tæi pänäni näna æbæate wædiñömö ñä mënongacantapa. Ayæ tömengä näni wencabo do æpænë guidänitapa. ³⁴ Ayæ tömengä oncönë ænte mængä ææ guiyöna tömëna inate cængui godongä cænatapa. Ayæ tömengä näni wencabo në Wængongui ingante pönënanäni badänäni inte watapæ todänitapa.

³⁵ Baänæ ate odömäno awënëna guiquënë poditiyaidi inänite në wææ wänongä weca da godöninque, Pabodo tönö Tidato inate ñimpo cæbi gocædaimpa, ämīni ëñëngæda, angä ëñëninque godänitapa. ³⁶ Ponte odömäno awënëna ëmöwo ante apænedäni ëñëninque në wææ wänongä wæætë Pabodo ingante apænedinque,

—Poditiyaidi ñöwo ponte apænedinque, Pabodo tönö Tidato inate ñimpo cæbi gocædaimpa, ante odömäno awënëna änapa, ante apænedänipa. Inique mīnatö ñöwo taote godinque piyænë cæte ee goeda.

³⁷ Angä ëñëninque Pabodo wæætë poditiyaidi inänite apænedinque,

—Mönatö odömänömöna imöna incæte në apænte äna weca apænedämaï iñömönate tömëna äna tömänäni ayönäni edæ mönatö imönate tæi tæi päninque tee mönedänitapa töö. Tee mönedäni wæyömöna ñöwo wæætë mönatö imönate awëmö wido cæcæte ante cædänipa töö. Mönatö iñæmpa edæ Baa ämönapa. Awënëna incæ iñömö pöninque mönatö imönate ænte mäoda gocæmönaimpa.

³⁸ Mänömainö ante apænecä ëñente wædinque poditiyaidi tömënanäni awënëna weca adodö godinque Pabodo nänö apænedö ante adodö ante apænedänitapa. Ayæ, Pabodo tönö Tidato odömänöda inapa, ante apænedäni ëñëninque odömäno awënëna guiquënë guiñente wædatapa. ³⁹ Ayæ guiñente wædinque awënëna incæ Pabodo tönö Tidato weca ponte waadete apænedinque, Mönatö oda cædīnö ante mīnatö odömänömīna imīna inte püinte änämaï ieda, ante äninque Pabodo tönö Tidato inate ænte mäoda taoda adinque tömëna inate, Ñöwo mönitö quëwëñömö ëmö cæte wadæ goeda, ämönapa.

⁴⁰ Äna ëñente taodique onquiyänä Didia oncönë go guidinque Pabodo tönö Tidato iñömö, Në pönënanäni wampo pönëninque tæi ongoncædänimpä, ante cædinque ædæmö apænedinque wadæ gogadaimpa.

17

Tetadönica iñömö quëwënanäni Yæ yæ änänipa

¹ Mänii godinque Pabodo tönö Tidato Ampipodi näni quëwëñömö wodo tebæ godaque go Apodönia näni quëwëñömö wodo tebæ godaque go Tetadönica näni quëwëñömö pönatapa. Mäniiñömö oodeoidi Wængongui apænecä näni ëñente yewæmongainta ate odömöincö näni mænongaincö mä ongö. ² Adinque Pabodo cöwë nänö cæi bai cædinque guëmanguionæ bayö guëmanguionæ bayö mëönaa go adoönæque iñonte tömënanäni

odömöincönë go guidine edæ Wængonguī angä ëñente nāni yewæmongaintaa ate adinque tömënāni inānite, ĩmaī impa quëwëmini, ante nō apænecantapa. ³ Tömënāni inānite edonque apænedinque Pabodo, Wængonguī beyæ nē apænegināni ĩmaī ante do yewæmongadānimpā, angantapa. Mönö Codito ĩncayæ ate pöninque cōwë caate wæquënegä ingampa. Ayæ adocä wænte ate cōwë ñāni ömæmonte quëwenguënegä ingampa, ante yewæmongadānimpā, ante Pabodo apænecantapa. Ayæ godömenque apænedinque,

—Itota botö nē änongä incæ adocä mönö Codito inongä ingampa, ante apænecantapa.

⁴ Mänömaī apænecä ëñëninque oodeoidi pancadāniya, Nö impa, ante pönëninque Pabodo tönö Tidato miñæ godānitapa. Ayæ guidiegoidi nanguī ināni Wængonguī ingante nē guññëñāni inte adobaī pönëninque tömëna miñæ godānitapa. Ayæ awëñëidi bai ināni onquiyænāni incæ nanguī ināni adobaī pönëninque tömëna miñæ godānitapa. ⁵ Mänömaī pönëñānīpa, ante wædinque oodeoidi guiquëñë pīinte wædinque ĩmaī cædānitapa. Tömënāni nāni godonte äññömö gote ayönāni nē wiwa cædāni ongönāni adinque tömënāni inānite äñāni Ao ante godongämæ pöninque oodeoidi tönö ĩñacabo cædinque Yæ yæ ante pīñānitapa. Mänömaī yedæ äñāni ëñente wædinque mäññömö quëwënāni tömāñāni godongämæ pīinte badinque Yæ yæ äñānitapa. Oodeoidi ĩñömö, Mönö Yatönö oncönë guidine Pabodo tönö Tidato inate da tadöninque nē pīinte cædāni inānite da godömö æncædānimpā, ante cædinque diqui diqui mincæte ante tee gäwade guidānitapa. ⁶ Wäänë guidine tömëna inate adāmaī ināni inte oodeoidi wæætë oncö nē ëacä Yatönö ingante yao ongöninque wadāni nē pönëñāni inānite yao ongonte wëä tadö mäo tömënāni nāni quëwëñömö awëñëidi weca ænte godānitapa. Ayæ, ogæ tedinque,

—ĩña onguññæna ĩñömö tömämæ quëwënāni inānite wapiticæ nē apænedina inte ñöwo wæætë ĩñömö pöna tamëñedāni. ⁷ Ayæ Yatönö guiquëñë, Botö oncönë pöeda, ante manguicä guidatapa. ĩñāni tömāñāni edæ odömāno tæiyæ awëñë Tetædo nāñö äñinö ante Baa äninque wacä Itota nāni änongä ingantedö ante, Tömengä nē Awëñë Odeye ingampa, ante änewënānīpa cæminii.

⁸ Ante pīñāni ëñente wædinque godongämæ ongönāni tönö awëñëidi adobaī pīin-
inque, Quinö cæquiī, ante wædinque Yæ yæ äñānitapa. ⁹ ĩninque Yatönöidi inānite
äñinque awëñëidi, Minitö ñöwo mänimpota pönömīni ænte mäñömöni minitö wënæ
wënæ cædāmaī ĩmīni adinque mönitö ĩncayæ ate wæætë adodö pönömöni æmaimīnīpa,
ante tömënāni godonte äñinta äñāni pædæ godönāni æninque ñimpo cædāni abæ
tawænte gogadānimpā.

Bedea ĩñömö quëwënāni ëñente pönëñānīpa

¹⁰ Ayæ tæcæ wëmö bayonte nē pönëñāni wæætë Pabodo tönö Tidato inate, Bedea
ĩñömö goeda, ante da godönāni godatapa. Mäññömö gote pöninque tömëna oodeoidi
odömöincönë go guidatapa. ¹¹ Mänii Tetadönica ĩñömö quëwënāni nē pīinte cædāni
ĩñönānite bedeaīdi guiquëñë pīñāmaī ināni inte mönö Awëñë nāñö apænedö ante do
ëñëñānitapa. Ayæ ëñëninque, Wængonguī angä ëñente nāni yewæmongainö bai Pabodo
nō apænecantawo, ante pönente wædinque bedeaīdi ĩñömö, Wængonguī æbänö angä
ëñente yewæmongadāni, ante ëñencæte ante ĩimö ĩñö ĩimö ĩñö mäninta æninque cōwä
adānitapa. ¹² Mänömaī cædinque oodeoidi tæiyænāni wede pönëñāni badānitapa. Ayæ
guidiegoidi awëñëidi bai ināni onquiyænāni incæ nanguī ināni pönëññönāni guidiegoidi
onguññænāni adobaī tæiyænāni nē wede pönëñāni badānitapa.

¹³ Incæte wadāni Tetadönica ĩñömö godinque oodeoidi inānite apænedinque, Pabodo
ñöwo Bedea godinque mäññömö quëwënāni inānite apænecä ëñëñānīpa, ante tedināni.
Ëñëninque oodeoidi wæætë Bedea ĩñömö pöninque, Pabodo wiwa apænecä apa ëñencæ
quëwëminii, äñinque wapiticæ tedināni ëñëninque godongämæ ongönāni guiquëñë
ænguī badānitapa. ¹⁴ Mänömaī ænguī badāni adinque nē nāni pönencabo ĩñömö Pabodo
ingante æpæ yæwedeca do ænte mäodāni godinque tömengä wipodë ñænæmpodë go

guidinque godömenque wogaa goyongante Tidato tönö Timoteo wæætē Bedea iñömö ayæ ongönatapa. ¹⁵ Pabodo tönö godongämæ godäni iñömö Atëna ganca mäodäni gocä ate tömengä wæætē, Minitö adodö Bedea iñömö godinque Tidato tönö Timoteo inate apænedinque tömëna eyepæ inte ate botö weca quingæ ämïni pönae, angä ëñëninque tömënäni adodö Bedea iñömö godinque Pabodo nänö äninö bai iñäna inate apænedänitapa.

Atëna iñömö Pabodo apænecä ëñënanipa

¹⁶ Mänömaïnö ante äningä inte Pabodo tömëna näna ponguïnö ante ee ongongantapa. Ee ongöninque ayongä mäniñömö quëwënäni, Wængonguïdi inänipa, ante badonte näni cö cægainca bacoo mä ongö ate wædinque Pabodo wæwëwocate quëwengantapa. ¹⁷ Mänömaï beyæ oodeoidi odömöincönë go guidinque oodeoidi inänite apænedinque ayæ guidiegoidi incæ Wængonguï ingante në guiñënäni inänite apænedinque Pabodo, Mänömaï impa. Apænebo ëñëmaïminipa, ante apænecantapa. Ayæ tömënäni näni godonte äiñömö adobaï iimö iñö iimö iñö godinque mäniñömö ponte ongönäni inänite adobaï nö apænecä ëñënanitapa. ¹⁸ Mänömaï cæyongä wadäni Epicodeoidi, Mönö tote quëwengäimpa, ante në änewënäni näni cabo tönö wadäni Etoicoidi, Waa imö incæ caate wæmö incæ mönö piyænë cæte quëwengäimpa, ante në quëwënäni näni cabo tönö tömänäni adoyömö ponte bee téninque Pabodo ingante wæætedö wæætē änanitapa.

Pabodo iñömö Itota ëmowo ante apænecä beyæ ayæ Itota nänö ñäni ömæmongainö ante apænecä beyæ Epicodeoidi näni cabo tönö Etoicoidi näni cabo tönö pancadäniya guiquënë,

—Iingä iñömö önonque ante tedewënongä inte æbämë ante tedewengä.

Ante wæyönäni adodäni incæ pancadäniya guiquënë,

—Tömengä wabänö, Wabæca wængonguïdi inänite pönencæminimpa, ante cæcä imaingampa, ante wædänitapa.

¹⁹ Iinque Pabodo ingante bæi ongonte töö æmænte ænte godinque tömënäni Adeopagoidi näni änonäni näni godongämæ ëñente pönencöñömö mäodäni gocantapa. Go guiite ongöñongante,

—Mä bitö odömönte apænedö æbänö ii. Edæ apænebi ëñëmönie. ²⁰ Edæ bitö odömönte apænedö ante tæcæ ëñëmönï inte mönitö, Æbänö ante apænebi, ante ëñencæte ante wæmönipa, änanitapa.

²¹ Edæ atënaïdi tönö wadäni Atëna iñömö ñowo ponte quëwënäni tönö tömänäni wadö cædämaï inte önonque, Wadäni æbänö mä apænete pönënänii, ante wædinque mäninonque ante tedete quëwënonänimpa.

²² Pabodo iñömö Adeopagoidi godongämæ näni ëñente pönenconcabo tæcæguedë ængæ gantidinque tömënäni inänite apænedinque,

“Atënaïdi, ëñëedäni. Wængonguïdi, mïni änonäni inänite waa ate bai mïnitö nanguï pönï cæmïni abopa. ²³ Botö mïnitö quëwëñömö tömäo cægonte ayömo, Wængonguïdi inänipa, ante mïni waa adoncaco nanguï ongö atabopa. Ayæ mïni waa adonca adocaque iñömö mïni pönö yewæmönimpaa iïmaï ante yewæmönte ongö atabopa. ‘Wacä wængonguï æcämë ingää, ante mönö ëñënämaï në inongä beyæ mönö waa adonca impa,’ ante mänimpaa yewæmöi ongö atabopa. Mänimpaa yewæmöi ongö adimo inte botö mïni, Æcämë ingää, ante ëñënämaï inte mïni waa adongä ingante ante ñowo, Æcänö ingää, ante ñowo apænebo ëñëedäni.”

²⁴ Ante apænedinque Pabodo godömenque, “Wængonguï inguipoga në badongaingä inongä inte tömää iñömö ongoncoo në badongaingä inongä inte tömengä inguipoga tömäma Awënë inongä ingampa. Tömengä adocä iñömö öönæde Awënë ingampa. Iinque Tæiyæ Awënë inongä inte tömengä waomö önompoca mänonincönë ædö cæte guiite quëwengüingää. ²⁵ Ayæ waomö iñömönte tömengä mönö quëwenguimämo pönongä æmompaa. Ayæ mönö guëmanguimämo adocä pönongä guëmämompaa. Ayæ tömengä adocä nänö pönönonque tömänö æninque quëwëmompaa. Mänömaï në

pönöngä inte tömengä mönö waocabo iñömönte, Pönömi æmoe, ante ædö cæte anguingää. Inique tömengä beyæ ante mönö waomö önompoca ædö cæte cæquimöö.”

²⁶ Ante apænedinque Pabodo godömenque apænecantapa. “Wængongui waocä adocanque ingante badöninque, Tömengä nänö pæināni nanguī ināni yebæninque nāni cabo nāni cabo tömancabodāni bacædānimpa, angacäimpa. Ayæ edæ, Adocanque pæināni inönāni inte mänincabodāni iñömö nänēneto nänēnē godinque adocaboque wabæca wacabo wabæca godinque inguipoga tömäo go go cædinque wayömö wayömö quëwencædānimpa, ante cægacäimpa. Mänömainö ante badöninque tömengä tömancabodāni inānite ante pönëninque, Æyömönö quëwenguināni, ante cædinque, Iñāni iimæca mänimpoga quëwencædānimpa, äninque, Wadāni wabæca mänimpoga quëwencædānimpa, ante doyedë angacäimpa. ²⁷ Edæ tömämæ quëwënāni botö imote ante diqui diqui mincædānimpa. Ayæ botö imote ante pædæ æmpo cædinque wabänö bee tenguināni, ante cædinque Wængongui mänömaī badöninque angacäimpa. Incæte Wængongui mönö tömämö weca ongöninque wii gobæque quëwengampa. ²⁸ Wængongui tömäo quëwengä iñongante mönö waomö inömö inte wayömö wayömö gomö incæte tömengä nempo edæ cöwë quëwëmompä. Mīni cabo incæ ämotamīni ante bai nē tededāni pancadāniya, ‘Wængongui pæimö adomö imompä,’ ante do nāni änö bai edæ mänömaī impä,” ante Pabodo apænecantapa.

²⁹ Ayæ, “Mänömaī beyæ mönö Wængongui pæimö inömö inte edæ iimainö ante wii pönenguënemö imompä. Mönö, Waocä nanguī pönëninque dicaa yewæmöninque waa pönī nänö badöinca bai Wængongui adobai ingampa, ante ædö cæte änewenguii. Oodo tönö padata waocä nänö badöi bai Wængongui ingampa, ante mönö wii mänömainö ante pönenguënemö imompä. ³⁰ Incæte wëñëñedë mäninö nāni ëñëñämaī ingainö ante adinque Wængongui pönö waadete ata cæpogacäimpa. Nöwo guiquënë tömämæ quëwënāni inānite, Mīnitö ëñëñämaī cædö ante, Ancaa wæwente awædö, ante ñimpo cæedāni. ³¹ Ante Wængongui nē apænte anguingä inongä inte iimaī angampa. Iñönæ iinque bayonte botö inguipoga tömämæ quëwënāni inānite apænte ancæboimpa, ante mäniönæ æönædö i, ante do angacäimpa. Ayæ, Waocä adocanque tönö botö godongämæ cæyömo tömengä nöingä ante apænte ancæcäimpa, ante Wængongui mäningä onguiñængä ingante do apænte ængacäimpa. Ayæ tömänāni, Wængongui nänö angainö bai cöwë bacäimpa, ante pönencædānimpa, ante cædinque Wængongui mäningä Onguiñængä dobæ wængä ate, Nāni ömæmoe, angä ininque mäningä iñömö edæ do ñāni ömæmonte quëwengampa.”

³² Ante Pabodo mäninö Itota nänö ñāni ömæmongainö ante apæneca ëñëninque pancadāniya, Babæ ancædö, ante badete todānitapa. Wadāni guiquënë,

—Iñcayæ ate mäninö ante adodö apænebi ëñëmönie, änānitapa.

³³ Mänömainö ante cædāni adinque Pabodo iñömö tömënāni inānite emö cæte godinque tao gogacäimpa. ³⁴ Incæte pancadāniya tömengä miñæ godinque nē pönënāni badānitapa. Adeopagoidi nāni ëñente pönëë concabo iñönānite adocanque Diönitio adobai nē pönengä bacantapa. Ayæ onquiyængä tömengä emöwo Daämadi tönö wadāni adobai nē pönënāni bagadānimpa.

18

Coodinto iñömö pöninque Pabodo apænecampä

¹ Atëna iñömö ongönte apæneca ëñëninque mänömaī cædāni ate Pabodo wadæ godinque Coodinto nāni quëwëñömö pongantapa. ² Doyedë iñömö odömānoidi tæiyæ awënë Codaodio oodeoidi inānite pünte äninque, Mönitö quëwëñömö Odömā iñömö ñöwo quëwënāmaī inte tömämīni wadæ goedāni, angä ëñente wædinque tömänāni näwæ wadæ godönānimpa. Adocanque tömengä emöwo Aquidæ Pontobæ ëñagaingä inte Itadiabæ gote mäniñedë quëwëñongäimpa. Tömengä adocä oodeocä inongä inte awënë nänö änö ante ëñente wadæ godinque tömengä nänöogængä Pidotida tönö ñöwo Coodinto iñömö wadæ ponte quëwëñönaimpa. Inique Pabodo ñöwo Aquidæ ingante

tæcæ adinque tömëna weca ëñacæ pongantapa. ³ Tömëna weca ponte ayongä tömëna tömengä nänö tadömönö bai adobai æmontai cadopa tadömonte godonte ænte quëwëna adinque Pabodo tömëna weca ee owodisque tömëna tönö godongämæ tadömönäni-tapa. ⁴ Mänömai cæte quëwëninque Pabodo guëmanguïönæ iñö guëmanguïönæ iñö oodeoidi odömöincönë go guïidinque, Oodeoidi incæ oodeoidi inämai inäni incæ ëñente pönencädänimpa, ante cædinque, iñmai impa ante apænebo ëñëmaïminipa, ante nanguï apænecantapa.

⁵ Ayæ Tidato tönö Timoteo Mäatedöniabæ quëwente wadæ pöninque Coodinto iñömö näna wææ pöñedë Pabodo mäniñedë æmontaicö nänö badöninö ñimpo cædinque wæætë, Wængonguï nänö apænedö ante ëñencädänimpa, ante nanguï cæinente wædinque nanguï apænedinque mäninque cæte quëwengantapa. Mänömai cædinque tömengä, Codito mönö në äongä incæ Itota adocä inongä ingampa, ante botö në agaimo inte apænebo ëñëmaïminipa, ante oodeoidi inänite apænecantapa. ⁶ Mänömai apæneyongante oodeoidi wæatedö wæætë godö wënæ wënæ ante piinäni wædinque Pabodo wæætë, Wïi ëñëinë wädö, ante bai cædinque nämä weocoo wancæ wancæ cæcantapa. Ayæ tömënäni inänite,

—Wængonguï weca mïni goquënënö ante apænebo ëñëninque mïnitö pönö wææ äninque tömëmïni wænguinque wentamö mongæminipa. Botö wæætë mïnitö imïnite edonque pöni apænedimo inte mïni cædö wentamö mongænämai imopa töö. Ininque botö Wængonguï taadö mïnitö imïnite idæwaa odömöninque edæ oodeoidi inämai inäni weca ñöwo wadæ gobo tamëñedäni.

⁷ Äninque Pabodo wadæ tao godinque oodeoidi odömöincö gäänë wacä oncönë go guï go guï cædinque cöwë apænecantapa. Mänincö në ëacä Titio Yoto näni äongä iñömö Wængonguï ingante në waa ate pönengä inongäimpa. ⁸ Oodeoidi odömöincönë në aacä Codipo guiquënë mönö Awënë ingante në pönengä bayongä tömengä oncönë në owodäni tömänäni pönënanitapa. Ayæ coodintoidi nanguï inäni pö ëñëë pö ëñëë cædinque adobai wede pönëninque æpäne guigadänimpa. ⁹ Mäniñedë woyowotæ iñö Pabodo wiimonte bai ayongante mönö Awënë tömengä ingante apænecantapa. “Bitö guïñenedämai inte apænebi ëñencädänimpa. Pæ wëñedämai incæbiimpa. ¹⁰ Coodinto iñömö botö quïnäni nanguï inäni inäni, ante cædinque botö iñömö edæ bitö tönö godongämæ cöwë cæcæboimpa. Ininque wadäni bitö imite mämö piinque wënæ wënæ cædämai incädänimpa.” ¹¹ Ante mönö Awënë tömengä ingante apæneca ëñëninque Pabodo adoque wadepo go tæcæ iñonte Coodinto iñömö ongöninque Wængonguï nänö apænedö ante tömënäni inänite odömönte apæneca ëñëñönänimpa.

¹² Mäniñedë odömänoidi änäni ate Acayabæ awënë Gadiöno inongäimpa. Tömengä awënë nänö inöñedë oodeoidi godongämæ pönëninque Ao äninque Pabodo ingante quingæ mämö bæi ongonte äninque awënë Gadiöno nänö cöwë apænte änöñömö ænte mäodäni gocantapa. ¹³ Awënë weca pöninque Pabodo ingantedö ante piinte äninque,

—Iingä iñömö, Mönö wadö bai cædinque Wængonguï ingante waa ate apænecäimpa, ante odömöninque mönitö awënëidi näni wææ äñönö ante wido cæcampa. Mänömai wapiticæ cædinque ancaa änewengä ëñëninque tömänäni adobai wapiticæ cædänipa cæbii.

¹⁴ Änäni ate Pabodo tæcæ apænecæ cæyongante Gadiöno oodeoidi inänite iñmai ante wææ apænecantapa.

—Oodeoidi ëñëedäni. Mïnitö botö weca ponte apænedinque, Odömäno awënë nänö wææ äñö bai iingä ëñëñämai cæcampa, ämïni bai, Waocä ingante ædæmö wiwa cæcampa, ante ämïni bai botö mïni äñö do ëñëninque apænte ancædömoimpa. ¹⁵ Mïnitö iñæmpa, Tömengä tededonque ante oda cæcampa, ämïnipa. Mïnitö ëmöwo ante oda cæcampa, ämïni. Mïnitö wææ angainö ante oda cæcampa, ante piimïnipa. Mäninonque ante oda cæcampa, ante ancaa tedewëmïni wædinque botö wæætë tömengä ingante apænte äñämai incæboimpa. Tömëmïninque tömengä ingante apænte äedäni.

¹⁶ Ante piinte äninque awënë tömënäni inänite, Botö apænte äñömö ongönämaï gobæwedäni. ¹⁷ Ante wido cæcä tao godinque tömänäni oodeoidi odömöincönë në aacä Totënë ingante wæætë bæi ongonte tæi tæi pänäni incæte në apænte angüenengä inca Gadiöno iñömö önonque adämaï inte bai ee acä pangadänimpa.

Pabodo Antioquiya ponte gocampa

¹⁸ İninque tæönæ quëwente ate Pabodo Coodinto iñömö näni pönencabo inänite, Gobopa, äninque wadæ godinque Tidiabæ gocæte ante Tencodea ganca pongantapa. Tömengä do apænedinque, Botö mänimpoga ocagui tocadämaï inte Wængongui beyænque cædinque botö tömëmo äninö ante cöwë cæcæboimpa, ante doyedë änogäimpa. Nöwo iñömö tömengä nänö äninö bai iinque cædingä inte Tencodea iñömö pöninque ocagui ëö tocantapa. Ayæ ëö tocacä ate tömengä Piditida tönö Aquidæ näna gæncaya tönö godongämæ ñænæ wipodë go guidinque tömënäni Tidiabæ gocæte ante wogaa godänitapa. ¹⁹ Mänömaï godinque Epeto iñömö go ti wæänänitapa. Tömëna näna gæncaya mäniñömö ti wæäninque tæe contayöna Pabodo iñömö oodeoidi näni odömöincönë go guidinque oodeoidi inänite, İmaï impa apænebo ëñencæminimpa, ante apænecä. ²⁰ Eñëninque tömënäni, Bitö mönitö weca wantæpiyæ quëwenguimi, äñönäni tömengä Baa äninque, ²¹ wæætë, Gobopa, angantapa. Ayæ, “Nöwo Eedotadëe iñömö äëämæ bequinque goquënëmo imo incæte Wængongui Ao angä ate botö minitö weca ayæ ate wæætë ocæ ëmænte poncæboimpa. Nöwo gobo tamëñedäni.”

Äninque Epeto iñömö ñænæ wipodë go guii tæe contadinque Pabodo wogaa gocantapa. ²² Godinque Tetadea pö ti wæäninque Eedotadëe iñömö Itota Codito ingante godongämæ näni pönencabo weca ëñacæte ante æicantapa. Ayæ ate Antioquiya wæicantapa. ²³ Ayæ ate mäniñömö tæönæ quëwëninque wadæ godinque Gadatiabæ adodö godinque Pidiquiabæ tömäo wayömö wayömö cægonte godinque Itota miñæ në tee empote quëwënäni tömänäni inänite mäo apænedinque, Mönö ñimpo cædämaï inte tæi piñænte cæcæimpa, ante apænecä ëñëninque tömënäni tæi piñænte entawëninque quëwengadänimpa.

Epeto iñömö Apodo apænecä ëñënanipa

²⁴ Mäniñedë wacä oodeo tömengä ëmöwo Apodo iñömö Equitobæ Adecantodia näni quëwëñömö ëñate pægaingä inte ñöwo Epeto näni quëwëñömö pongantapa. Tömengä iñömö nangui adinque në ëñëngä inte Wængongui angä ëñente näni yewæmongainö ante do ëñëninque waa pöni apænecä inongäimpa. ²⁵ Mönö Awënë taadö ante apæneyönäni do ëñëningä inte mäniñö ante ædæmö ewocadinque tömengä, Eñencädänimpa, ante nangui apænecantapa. Ayæ Itota nänö cægainö ante nö ante odömönte apænecä incæte Apodo iñömö Wäo æpænë nänö guidongainonque ante mäningancaque ëñëningä inte mäningancaque ante töingä odömongä ëñënonänimpa. ²⁶ Tömengä ñöwo oodeoidi odömöincönë go guii go guii cædinque guiñenedämaï inte apænecantapa. Piditida tönö Aquidæ näna gæncaya guiquënë tömengä mänömaï apænecä tæcæ ëñëninque edæ Apodo ingante, Mönatö weca pöe, äna pöñongante, Wængongui taadö iimaï inompa, ante töingä apæneda tæcæ mä ëñengantapa.

²⁷ Mänömaï cæda ate Apodo wæætë Acayabæ gocæte ante cæyongante tömënäni näni pönencabo tömengä ingante, Waa goe, änänitapa. Ayæ, Acayabæ iñömö Itota ingante në tee empote quëwënäni acädänimpa, ante iimaï ante cadota ante yewæmönänitapa. Minitö, Apodo pongä adinque tömengä ingante waa cædäni, ante yewæmöninque tömengä ingante pædæ pönönäni ænte godinque mäo Acayabæ quëwënäni inänite pædæ godongä adänitapa. Tömënäni Wængongui waadete pönö cæcä ate në pönënanäni iñönänite Apodo në waa pöni apænedongä inte mäniñömö ponte apænedinque tömënäni tönö godongämæ cægacäimpa. ²⁸ Edæ tömänäni ayönäni Apodo oodeoidi inänite nangui wæatedö wæætë apænedinque gomonga apænecä wädänitapa. Tömengä, Mönö Codito æbänö cæquingää, ante Wængongui angä ëñente näni yewæmongainta adinque mönö ëñengäimpa, angantapa. Ayæ, Itota mäniñö näni

yewæmongainö bai në cædongä inte näwangä mönö Codito inongä ingampa, ante nö apæneacă êñëinque tömënäni ædö cæte wadö ante apænequinäni.

19

Epeto iñömö Pabodo ponte apæneacămpa

¹ Apodo ayæ Coodinto iñömö ee ongöñongä Pabodo nänö cægönimæ tæcæguedë änanquidi owëñaque pö Epeto iñömö wæængantapa. Ponte ayongä Itota ingante në tee empote quëwënäni pancadäniya a ongönäni. ² Adinque tömengä tömënäni inänite,

—Minitö pönente bayömiäni Wængonguï tömengä Tæiyæ Waëmö Önöwoca ingante da pönongä æmïnitawo.

Äñongä tömënäni wæætë,

—Iñæmpa mäningä Tæiyæ Waëmö Önöwoca ingantedö ante apænedänipa êñen-guimönii.

³ Ante apænedäni êñëinque Pabodo wæætë,

—Iñinque æcänö ëmöwo ante æpænë guimïnitawo.

Äñongante,

—Wäö wodi nänö æpænë guidongainö ante guitamönipa.

⁴ Mänömainö ante apænedäni êñëinque Pabodo wæætë,

—Wäö wodi nänö guidongainö ante guigaïmiäni inte mïnitö, Idæwaa wënæ wënæ cæte awædö, ante Wængonguï Awënë gämænö ocæ ëmænte pongaïmiäni imïnipa. Incæte Wäö wodi, Iñcayæ ate në Ponguingä ingante pönencæminimpa, äninque tömënäni inänite æpænë guidongacäimpa. Mäningä iñömö Wäö nänö, Nö Ponguingä, änonngä iñömö Itota inongä ingampa.

⁵ Ante apæneacă êñente wæyönäni Pabodo wæætë mönö Awënë Itota ëmöwo apænedinque æpænë guidongä guidänitapa. ⁶ Ayæ tömengä gampocä ongöñönäni Wængonguï Tæiyæ Waëmö Önöwoca wææ tömënäni baonga guicantapa. Guicä ate tömënäni wadäni näni tede bai mä tededinque Wængonguï beyæ apænedänitapa. ⁷ Mäninäni onguïñænäni æpænë në guidënäni iñömö önompo tipæmpoga go mengäa inönänimpa.

⁸ Pabodo apäicä mengäa go adocanque pämonque adoyömö quëwëinque oodeoidi odömöincönë go guii go guii cædinque guïñenedämaï apænedinque, Wængonguï Awënë Odeye do pongäimpa, ante apænebo êñëedäni, ante nöingä ante apæneacă êñëänitapa. ⁹ Apæneacă êñëñönäni pancadäniya guiquënë, Wïi pönëinente awædö, ante Baa äninque Wængonguï Awënë taadö ante wïwa tedewënänitapa. Mänömaï tedewënäni êñente wædinque Pabodo iñömö ëmö cæte godinque Itota ingante në tee empote quëwënäni inänite ænte wadæ gocantapa. Ayæ iimö iñö iimö iñö Tidänö nänö apæneincönë go guii go guii cæte apænedinque Pabodo mäniñömö pö guidäni tönö guëadö guëa apænedänitapa. ¹⁰ Ayæ mënepoga wadepo ganca Pabodo mänömaï cæyongä oodeoidi incæ guidiegoidi incæ Atiabæ quëwënäni tömänäni mönö Awënë nänö apænedö ante êñëänitapa.

¹¹ Ayæ Pabodo tönö godongämæ cædinque Wængonguï tæi pïñænongä inte nanguï cæcantapa. ¹² Iñinque tömënäni Pabodo weocoo wadæ cæcadoquincoo incæ padëincoo incæ æninque wënæ wënæ inäni inänite ænte mämö wo caayönäni waa badänitapa. Ayæ mänömaï cæyönäni wënæidi në wïwa ëwocadäni tömënäni näni në ëwënëninäni tao godänitapa.

¹³ Mänïñedë oodeoidi Itota ingante pönënämaï inäni incæ pancadäniya wayömö wayömö godinque wënæidi në wïwa ëwocadäni inänite në wido cædäni inönänimpa. Tömënäni nämä mä pönëwëinque, Nöwo Awënë Itota ëmöwo apænedinque mönö wënæ ingante wido cæcäimpa, ante cædinque wënæidi inänite iimäi änonänimpa. Pabodo nänö në apænedongä Itota ëmöwo apænedinque botö, Wënæbi tao gobäwe ämopa, änewënönänimpa.

¹⁴ Mänïñedë oodeoidi beyæ, Wængonguï qui, ante në godongä ñænængä adocanque Etequeba iñongä tömengä wënäni tiæte ganca inänitapa. Iñäni iñömö Itota ingante

pönenämaï ināni incæte adobaï cæcæ cædānitapa. ¹⁵ Tæcæ cæcæ cæyönānite wænæ nē wiwa ewocadongä incæ tömēnāni inānite nāemæ tededinque, “Itota ingante do abopa. Ayæ Pabodo æcānō ingää, ante do ēñēmopa. Wæætē mīnitō guiquēnē æmīnidō imīnii.”

¹⁶ Åñongä wænæ wiwa inongä ingante nē ewēnengä inte wiyaēmæ tömēnāni inānite to mǎo yao ongōninque bæ tacantapa. Mänōmaï cædinque tömēnāni weocoo gǎ tadongadinque tæi tæi pangä ate tömēnāni weocoo ömaadāni inte wepæ taate wædinque oncodo tao wodii wīnōnānitapa. ¹⁷ Mänōmaï batimpa, ante tedeyönāni Epeto iñōmō quēwēnāni oodeoidi incæ guidiegoidi incæ tömānāni ēñēninque ancaï guīñente wædānitapa. Ininque mönō Awēnē Itota emōwo wīi önonque ante tededāni inte tömengä emōwo æwocæte baï cædinque, Tæi pīñængä inte emongampa, ante wædānitapa.

¹⁸ Ayæ nanguï ināni ñōwo wede pönente badinque adoyömō pōninque tömānāni ēñēñōnāni tömēnāni nāni wænæ wænæ cædinō ante tömānō ante edonque apænedinque, Idæwaa wænæ wænæ cæte awædō, ante wido cædānitapa. ¹⁹ Ayæ idō inte nē yewæñināni incæ pancadāniya adobaï pönente badinque tömēnāni nāni, Æbānō cæte yewænguïi, ante yewæmōninta incæ adoyömō ænte pōninque tömānāni åñōnāni nē tånānitapa. Mānintacoo æpodō itædē cædinque padata nāni æinta beyæ godonte ænānii, ante cōwā ayōnāni tincoenta mīido ganca mānimpota nāni godonte æninta incæ nē tånāni agadānimpa. ²⁰ Mänōmaï nē pönēnāni badinque waa cædāni ininque mönō Awēnē nānō änō ante godōmenque wayömō wayömō mǎo gode änāni ēñēninque tömengä ingante nāni pōnencabo incæ yebæninque tæi pīñænāni bagadānimpa.

²¹ Mänōmaï cædāni ate Pabodo önōwēnenque pönēninque, Mäatedōniabæ ēñacæ godinque botō Acayabæ ēñacæ godinque Eedotadēē gocæboimpa, ante pönēninque, ayæ, Māññōmō gote ate Odömā nāni quēwēñōmō cōwē goquēnēmo imopa, angantapa. ²² Åninque tömengä beyæ nē cædāni iñōnānite mēnaa inate Tīmoteo tōnō Edaato inate apænedinque, Mäatedōniabæ gote ongōñōmīna botō Atiabæ wantæ quēwente pōmoeda, ante da godongä godatapa.

Epetoidi nanguï Yæ yæ änānipa

²³ Māññedē Epeto iñōmō quēwēnāni iñōmō, Itota Taadō mönō wido cæcæimpa, ante nanguï Yæ yæ änānitapa. ²⁴ Tömēnāni, Mōnitō wængonguīnā Diānā inampa, ante onquiyænā emōnō baï badōninque mānınca weca ædæ wæænte nē apænedāni inōnānimpa. Tömēnāni quēwēñōmō adocanque Deēmetedio nāni ånongä iñōmō padata aca podonte nē badongä inongäimpa. Tömengä iñōmō padatagæ æninque aca podonte badōninque, Mīni wængonguīnā Diānā inante mīni tæiyæ waēmō apæneincō baï impa, ante guīyanconque badonte quēwēnongäimpa. Mänōmaï badōñongä tömengä tōnō godongāmæ cædāni wæætē wadāni inānite godonte æninque mānincō beyæ tömēnāni godonte æinta nanguï æninque quēwēnōnānimpa. ²⁵ Ininque tömengä tōnō nē cædāni inānite ayæ wadāni adobaï cædāni inānite åñete pōnāni ate Deēmetedio iñōmō tömēnāni inānite apænecantapa.

“Iñānāni, do ēñēmīnipa. Mönō badonte godōninque wadāni nāni pōnōninta nanguï æmōmpa. ²⁶ Ayæ nanguï ināni Epeto inōmō quēwēnāni incæ Atiabæ wodo tömāmæ quēwēnāni incæ iingä Pabodo guiquēnē wapiticæ apænecä ēñēninque edæ oda cædinque tömengä mīñæ godānipa, ante do ēñēmīnipa. Tömengä iñōmō, Önompoca badōnınca wīi wængonguīidi inānipa, ante tedecä apa quēwēmīnii. ²⁷ Mänōmaï tedecä beyæ mönō badōnō ante wadāni nanguï ināni pīinte anguīnāni awædō. Ayæ Diānā ñænænā wængonguīnā iñōnante tömengä ingante mönō apæneincō incæ, Önonconque impa, anguīnāni awædō. Ayæ godōmenque, Mönō wængonguīnā Diānā waa pōni wængonguīnā inampa, ante Atiabæ tömāo quēwēnāni tōnō inguipoga tömāo quēwēnāni nāni waa adōnā iñōnante wabānō wapiticæ tededinque godō pīinguīnāni badānipa, ante awædō.”

²⁸ Ante Deēmetedio mānōmainō ante apænecä ēñēninque tömēnāni ænguï badinque ogæ tededinque, “Epetoidi wængonguīnā Diānā ñænænā inampa,” ante wæætē wæætē ancaā änānitapa.

²⁹ Mänömaï padata nē badönāni Yæ yæ änāni ēñente wædinque mǎniñömö quēwēnāni tōmānāni, Quiēmē bai cædānīpa, ante acæte ante wadö pö wadö pö pogodo pönānitapa. Ponte ayönāni Mäatedöniabæ quēwente Pabodo tönö godongāmæ nē pönina Gayo tönö Aditadoco a ongöna adinque tōmēnāni tōmēna inate bæi ongonte quingæ mǎo tōmēnāni nāni aincönē ñænæncönē go guidānitapa. ³⁰ Pabodo guiquēnē mǎnōmaï cædāni ate wædinque, Godongāmæ ongönāni weca go guidinque apænecæboimpa, ante cæyongante Itota ingante nē tee empote quēwēnāni wæætē, Wænompa, ante, Go guidāmaï incæbiimpa, ante wææ cædānitapa. ³¹ Ayæ mǎnimæ awēnēidi pancadāniya Pabodo æmigoidi ināni inte adobaï mǎmō tōmengā ingante gode äninque, Bitö ædö cæte mǎniñömö go guiquimii, ante wææ änānitapa.

³² Ìñonte godongāmæ ongönāni guiquēnē, Quinante pömoï, ante wodo tōmānāni ēñēnāmaï inānitapa. Pancadāniya, Ìimaï cæcæimpa, äñönānite wadāni guiquēnē, Wadö bai cæcæimpa, ante wæætedö wæætē ante ogæ tededinque nanguï pönī Yæ yæ änānitapa. ³³ Yæ yæ äñönāni oodeoidi guiquēnē Adecantodo ingante yæcado gö cædāni ongongā adinque godongāmæ ongönāni pancadāniya tōmengā ingante, Ìimaï cæcæimpa, änānitapa. Tōmengā guiquēnē tōmēnāni inānite wææ apænecæte ante, Apocænē iedāni, ante bai cædinque pipo pipo cæcantapa. ³⁴ Oodeo inongā inte mǎnōmaï cæcampa, ante wædinque tōmengā ingante ēñēnāmaï inte tōmānāni adoyömö ogæ tededinque, “Epetoidi wængonguinā Diänā ñænænā inampa,” ante mēa ooda ganca adodö adodö adodö ante nanguï änānitapa.

³⁵ Ayæ ate tōmēnāni awēnē Tequedetadio incæ ancaa tōmēnāni inānite angā ēñente apocænē cæyönāni tōmengā, “Epetoidi ēñēmīni. Tömāo quēwēnāni mǎnōmaïno ante do ēñēnānīpa. Mönö Epeto iñömö quēwencabo mönö wængonguinā Diänā apæneincö nē aamö imompa. Ayæ tōmengā awinca bai yewæmoinca öönædē mönö wæængainca adobaï nē wææ cæmō imompa, ante adinque tōmāmæ quēwēnāni do ēñēnānīpa cæmīnii. ³⁶ Mǎniñö ante nāwangā pönī impa, ante adinque, Babæ impa, ante ædö cæte anguinānii. Ìinque mīnitö ēñēnāmaï mīni Yæ yæ änewēnō ñimpo cædinque piyænē cæquēnēmīni imīnīpa. ³⁷ Ìina mīni bæi ongonte ænte pönönina iñömö mönö wængonguinā Diänā apæneincönē guidāmaï ina inte wēnæ wēnæ cædāmaï inapa. Ayæ mönö wængonguinā Diänā inantedö ante wīi wēnæ wēnæ ante piina apa quēwēnānii.”

³⁸ “Deëmetedio padatagæ nāni badoncabo incæ wacā ingante, Wiwa cæbitapa, piinte wædānitawo. Edæ nē apænte nāni äincö cōwē wi ænete ongompa. Mānincönē nē apænte änāni cōwē ongönānīpa. Ìinque Deëmetedioidi nē nāni piinongā ingante mǎniñömö ænte gote änāni ēñēninque nē apænte änāni wæætē tōmengā ingante do apænte anguēnēnāni inānīpa. ³⁹ Ayæ apænte änāni, Ìionæ tōmāmīni godongāmæ pödāni, nāni äniönæ bayonte mīnitö godömenque piinte äinēmīni inte mǎniönæ ponte ämīni ēñente apænte änāni ate mīnitö piyænē cæquēnēmīni imīnīpa. ⁴⁰ Edæ ñöwoönæ mīni Yæ yæ änewēniñö ante awēnēidi pöninque, Quinante mǎnōmaï cæmīnii, ante äñönāni wæætē, Quiēmē beyæ cætimpa, ante mönö angæimpa. Tōmēnāni wæætē mönö imonte äninque, Mīnitö awēnē ingante wido cæcæte ante cæmīnīpa, ante piināni wæcæ wæ.” ⁴¹ Äninque godongāmæ ponte ongönāni inānite tōmengā angā gogadānīmpa.

20

Mäatedöniabæ godinque Pabodo Guidetiabæ gocampa

¹ Mǎniñi Yæ yæ ante nāni änewēnō iinque cædāni ate Itota ingante nē tee empote quēwēnāni inānite wæætē äñete pönönānite Pabodo, Mīnitö ganca pönente godömenque cæcæmīnīmpa, ante godö ædæmō apænecantapa. Ayæ, Ñöwo gobopa, ante Mäatedöniabæ gocantapa. ² Godinque tōmengā mǎniñömö quēwēnāni inānite, Mīnitö ganca pönente godömenque cæcæmīnīmpa, ante godö ædæmō apænecä ēñēnānitapa. Mǎnōmaï nanguï apænedinque tōmengā mǎnimæ tōmāo cægöninque wayömö mǎo wayömö mǎo apænecä ēñēnāni ate Guidetiabæ gote pongantapa. ³ Mǎniñömö pöninque mēa go adoque apäicä quēwengantapa.

Ayæ, Tidiabæ goquïmo, ante tæcæ ñænæ wipodë guicæ cæyongante wadäni, Oodeidi bitö ïmite wænoncæte ante cædänipa атаке. Ante wææ änäni wædinque tömengä, Botö wæætë adodö godinque Mäatedöniabæ wodo tebæ gocæboimpa, äninque taadonque gocantapa. ⁴ Goyongä tömengä tönö godongämæ godäni ïñömö, adocanque Bedea quëwëningä inte Pidido wengä Topatede, ayæ wææ Tetadönica quëwëniä Aditadoco tönö Tegonto mënaa, ayæ wææ Dedebe quëwëningä Gayo tönö Tïmoteo mënaa, ayæ wææ Atiabæ quëwëniä Tiquico tönö Todopïmo mënaa, mänimpodäni inänitapa. ⁵ Tömënäni täno godinque Todoa näni quëwëñömö pöninque mönitö wipodë ponguïmöni ante ee ongönänitapa. ⁶ Mönitö guiquënë oodeidi päö yedæ æmpoqui ömæmö ï näni cænguïönæ ïinque baganca Pidipo ïñömö quëwëninque wipodë ñænæmpodë go guidinque wogaa godinque önompo æmæmpoque ëönæ gote ate tömënäni weca Todoa pöninque önompo æmæmpoque go mëönaa quëwentamönipa.

Todoa ïñömö Pabodo ponte apænecampa

⁷ Tömënäni näni guëmanguïönæ go ate mönitö, Ñöwo gäwadedcæ bayö Wængonguï itädë impa, ante päö godongämæ cæncæte ante æmongapaa æi wænömënæcapaa æi guidinque tæ contatamönipa. Pabodo ïñömö baänæ ate gocæ cædingä inte æi guï tæ contadinque wantæpiyæ ayaönænëña pönï ayæ apænecä ëñentamönipa. ⁸ Wænömënæcapaa möni godongämæ ëñengoncönë gongapæncade bacoo ti wodönote mä ongönimpa. ⁹ Adocanque edëningä tömengä ëmöwo Eotico ayamönecaä tæ contate ongongantapa. ïninque Pabodo wantæpiyæ apæneyongä edëningä ïñömö möwocodë nanguï möinente ayæ wangæ monte wænömënæcapaa ongöninque yæipodë tæ go wæængantapa. Go wæænte do wængä adinque tömengä ingante yao ongonte mänänitapa. ¹⁰ Näñe wænte öñöñongä Pabodo yæipodë wææninque, Quëwencæcäimpa, ante cædinque wïni ænte pæ mangantapa. Ayæ në pönëmöni möni caipæ ïmönite apænedinque,

—Mïi quëwengä ingampa. Guïñente wædämaï ïedäni, angantapa.

¹¹ Äninque Pabodo wæætë adodö æmongapaa æidinque päö ænte pä ænte mönitö tönö godongämæ cæninque wantæpiyæ godömenque apænecöñongä edæ ñäö batimpa. Ñäö ba ate Pabodo ñimpo cæte wadæ gocantapa. ¹² Ayæ, Edëningä müingä quëwengampa, ante ænte wadæ godinque tömënäni wampo pönëninque nanguï togadänimpa.

Ömaaque godinque Pabodo Müideto ganca pongampa

¹³ Pabodo guiquënë taadonque gocæ cædinque mönitö ïmönite apænecantapa. Mïnitö wipodë ñænæmpodë go guidinque mäodämæ wipodenque godämæ goyömini, botö ömaaque näñe tebæ pömoedäni. Atönö ïñömö pö wäi wocænte owoyömini botö ïñömö ömaaque pö adopodë guïbo ate gocæimpa, angä Ao ante mönitö täno go guï tæ contadinque öme tagamönimpa. ¹⁴ Mänömaï godinque Atönö ïñömö pö wäi wocænte owoyömöni tömengä ömaaque pö bee téninque ñænæ wipodë adopodë pö guite tæ contacä ate mönitö godongämæ wogaa godinque Müitidëne näni quëwëñömö pontamönipa. ¹⁵ Mänïñömö wäi wocænte monte ate ñäö ba wogaa godinque mönitö Quiyo ganca pöninque waönæ ate wodo pænta godinque wæætë Tämo ïñömö pömönique go Todoguidio ïñömö pömönique go ïñabæ guingä ate Müideto pontamönipa. ¹⁶ Edæ, Ææmä Pentecotee näni änomæ botö bequinque Eedotadë eyepæ poncæte ante quingæ goquënëmo ïmopa, ante do äningä inte Pabodo ñöwo, Atiabæ wantæpiyæ ongöninque ædö cæte Eedotadë eyepæ pömaïmo. Ante pönente wædinque, Epeto ïñömö ti wæänämaï yaatænque gocæboimpa. Äñongä mönitö tömengä tönö Epeto wodo tebæ godinque Müideto ïñömö pontamönipa.

Epeto ïñömö në Picænäni inänite Pabodo apænecampa

¹⁷ Mänïi wipo ñænæmpo Müideto ïñömö wogaa pö wäi wocæ ate ti wææninque Pabodo wadäni inänite da godöninque, Mïnitö Epeto ïñömö tömæwæ æidinque Itota Codito ingante në godongämæ pönënäni weca godinque tömënäni inänite në aadäni

Picænāni inānite āñete pöedāni. ¹⁸ Angä āñete pönönānite tömengä, “Botö Atiabæ mä ponte quëwëninque botö goganca æbänö mīnitö weca waa cæte quëwënömoï, ante do ëñëminipa. ¹⁹ Edæ oodeoidi, Wænoncæ, änāni ëñëninque nangui guiñente wæbo incæte botö, Önömoque bai ïmopa, ante pönëninque Wængongui beyænque nangui cædinque Ca ca wædinque ee cætabopa. ²⁰ Ìninque botö, Mīnitö beyænque quīnō waa inguii, ante pönëninque pæ wëenedāmaï inte do apænebo ëñëmīnitapa. Ayæ edæ tömänāni ayönāni odömonte apænedinque botö wacönë mǎo wacönë mǎo go guidinque apænebo ëñëmīnitapa. ²¹ Ayæ pancamīniya oodeoidi ïñömīnite pancamīniya guidiegoidi ïñömīnite botö tömāmīni ïmīnite apænedinque ïmaï ante apænetabopa. Mīnitö, Idæwaa wënæ wënæ cæte awædö, ante pönente wædinque Wængongui gāmænö pöninque mönō Awënë Itota Codito ingante pönencæmīnimpa, ante ämo ëñëmīnitapa. Mänömaï tömäa cætabopa, ante do ëñëminipa.”

²² “Ñöwo guiquënë Wængongui Önöwoca angä ëñëninque Eedotadëe gocæboimpa. Māniñömö pönömote quiëmë bai bacæimpa, ante pönente wædimo incæte ee gocæboimpa. ²³ Önonque botö ñöwo wayömö wayömö nāni quëwëñömö pönömote wadāni Wængongui Tæiyæ Waëmö Önöwoca tönö apæneca ëñëñāni inte do botö ïmote ïmaï ante wææ änānipa. Bitö tee mönete nangui caate wæquinque Eedotadëe gobipa, änāni ëñëninque mäninque ante ëñëmopa. ²⁴ Incæte, Wængongui waadete pönö cædinque nänö cægainö ante watapæ apænedinque bitö, Nö pönī impa, ante apænebi ëñencædānimpa, ante mönō Awënë Itota doyedë botö ïmote angacæimpa. Ìninque tömengä nänö anganca ïinque cæcæte ante cæyömote wænönāni wæmo incæte botö, Godömenque inguipoga quëwenguënëmo intabopa, ante wædāmaï incæboimpa. Ayæ pogodo gote bai botö goquīnō tömänö gocæte ante nangui cæcæboimpa, ämopa,” ante Pabodo apænecantapa.

²⁵ Ante apænedinque tömengä ayæ godömenque apænecantapa. “Botö, Mönō Awënë Odeye do pongæimpa, ante apænedinque wayömö mǎo wayömö mǎo apænebo ëñëmīnitapa. Idæwaa apænebo ëñëñimīni inte mīnitö ñöwo æmæwo botö awinca amīnipa. ²⁶ Mänömaï beyæ botö ñöwoönæ apænedinque mīnitö ïmīnite ïmaï ämopa. Botö, Quëwencæmīnimpa, ante cædinque anca apænebo incæte pancadāniya tömënāni nāni wii ëñëñö beyænque wentamö mongænte nāni wænguinque goyönāni botö wæætë mäninö beyæ wentamö mongænāmaï ïmopa. ²⁷ Wængongui, Ìmaï cæbo bacæimpa, ante nänö änö ante botö ïñömö edæ pæ wëenedāmaï inte mīnitö ïmīnite tömänö edonque pönī apænebo ëñëmīnitapa.”

²⁸ “Mīnitö ïñömö edæ nämä wææ aadinque waa cæte quëwëedāni. Wængongui Önöwoca mīnitö ïmīnite äninque, Ìñāni cæningäidi bai ïñānipa, ante nänö në angāināni ïñönānite mīnitö wæætë në aamīni ïñömīni inte tömënāni inānite ædæmö wææ aedāni. Mönō Awënë Codito ingante nāni godongämæ pönencabo inānite æncæte ante tömengä nämä wepæ godonte ængä ate Wængongui quīnāni bagadānimpa cæmīni. Mīnitö tömënāni inānite në aamīni inte waa aedāni. ²⁹ Edæ botö do ëñëmopa. Babæidi gäwæï ecate ade cænāni amīnipa. Edæ botö ëmö cæte gobo ate waodāni incæ babæidi cædāni mīni abaï adobaï wënæ wënæ cædinque mīni pönencabo ïñömīnite ata cæpodāmaï incædānimpa. Tömënāni babæ wapiticæ änāni ëñëninque mīni cabo incæ pancadāniya ëñëñāmaï badinque wadæ godāni wæcæmīnimpa. ³⁰ Ayæ tömëmīni mīni pönencabo incæ pancadāniya, Mönitö miñæ poncæmīnimpa, ante cædinque babæ wapiticæ odömoncædānimpa cæmīni. ³¹ Edæ wææ cæedāni. Botö, Mänömaï bacæimpa, ante wadepo mënepoga go adodepoque ïñonte itædë incæ woyowotæ incæ ñimpo cædāmaï inte Ca ca wædinque mīnitö tömāmīni ïmīnite apænebo ëñëñömīnimpa. Mänömainö ante pönëedāni,” ante Pabodo apæneca ëñëñānitapa.

³² Äninque tömengä, “Ìñāñāni, botö mīnitö ïmīnite Wængongui nempo ñöwo ëmö cæte gobo tamëñedāni. Tömengä waadete nänö pönö cædinö ante möni apænedö ante ëñente ëwocamīni ïñömīnite tömengä mīnitö ïmīnite godongämæ cæcä ate tæi piñænte bacæmīnimpa. Ayæ Wængongui quimöni tömämöni tönö mīnitö adocabomīni

bayöminite tömengä eyepæ da pönongä ate mīnitō mōnitō tōnō godongāmæ æncæmīn-
 impa. ³³ Botō iñōmō æbānō quēwēmoī aedāni. Edæ wacā qui tigitamō incæ oodo
 incæ weocoo incæ, Botō qui bacæimpa, ante cōwē æinēnāmaī inōmoimpa. ³⁴ Edæ
 tömēmo önompoca botō cædinō beyænque quīēmē ænguēnēmo ante eyepæ æninque
 quēwēnōmoimpa. Ayæ botō tōnō godongāmæ cædāni nāni ænguēnēnō ante adinque
 adobaī botō tömēmo önompoca cædinō beyænque æninque tömēnāni inānite da godō
 da godō cæbo æninque quēwēnōnānimpā. Mänōmaī botō cædinō ante do ēñēmīnīpa.
³⁵ Mönō Awēnē Itota incæ iīmaī ante apænecāimpa. ‘Māincoo æninque mönō
 wædænque tomompa. Wæætē wacā ingante pædæ godōninque mönō nanguī toquinque
 impa.’ Ante Itota nānō apænecainō ante pōnēninque botō, Mänōmaī mönō önompoca
 nanguī cædinque æninque wadāni nē ænguēnēnāni inānite mönō pædæ godongæimpa,
 ante mīnitō imīnite cōwē odōmonte apænebo ēñēmīnitapa.”

³⁶ Mänōmaīnō ante iīnque apænedinque Pabodo tömēnāni tōnō da guicapodinque
 Wængonguī ingante apænecantapa. ³⁷ Ayæ tömēnāni Ca ca wædinque, Waa goe, ancæte
 ante godongāmæ goto pōninque tömengä ingante yaagō yaagō cædānitapa. ³⁸ Tömengä
 nānō, Botō imote æmæwo aminīpa, nānō āninō beyæ godōmenque nanguī wædānitapa.
 Ayæ tömengä ingante ñænæ wipo ganca ænte mäodāni gogacāimpa.

21

Pabodo Eedotadē gocampa

¹ Mōnitō tōniñadāni tōnō godongāmæ wægōninque Pabodo tōnō möni goquincabo
 iñōmō, Wipo ñænæmpo do wogaa gocæ cæpa, ante adinque edæ, Nōwo gomōnīpa, ante
 tömēnāni inānite emō cæte godinque mānimpodē go guītamōnīpa. Guīdinque mōnitō
 tōingä wogaa godinque Coto nāni quēwēñōmō ponte tömæwæ æite monte ate iīmō ate
 Ododata gomōnique go Patada nāni quēwēñōmō pontamōnīpa. ² Patada iñōmō pō ti
 wæante ayōmōni, Wipo ñænæmpo Pēnitīa goquimpo impopa, ante adinque mānimpodē
 go guīdinque wogaa gotamōnīpa. ³ Wogaa godinque dipæmæ inō gomō ayōmōni wā
 tēiwænē Tipidebæ a ongō adinque tæcæpæ inō wodo tebæ wogaa gomōnique go Tidiabæ
 pontamōnīpa. Ayæ ñænæmpo möni goimpo Tido iñōmō māincoo öwaaquī impa, ante
 ēñēninque mōnitō māniñōmō adobaī ti wæantamōnīpa.

⁴ Ti wæænīnque mōnitō tömēnāni quēwēñōmō ponte ayōmōni Itota ingante nē tee
 empote quēwēnāni a ongōnāni adinque mōnitō önompo æmæmpoque go mēōnaa iñonte
 tömēnāni tōnō godongāmæ quēwentamōnīpa. Tömēnāni guīquēnē, Wængonguī Tæiyæ
 Waēmō Önōwoca apænecā ēñēnīnāni inte Pabodo ingante, Bitō wæquinque Eedotadē
 iñōmō gocæ cæbīpa, ante wææ ānānitapa. ⁵ Mänōmaī ante wææ ānāni ēñēmōni
 incæte mōnitō, Mānimpoönæque quēwēnguēnēmōni intamōnīpa, ante adinque wadæ
 gotamōnīpa. Inīnque tömēnāni nāni quēwēñōmō yabæ inō tömēnāni nāni wencabo
 tömānāni ænte mäodāni godinque mōnitō emōnaiya pōninque godongāmæ da gu-
 icapodinque Wængonguī ingante apænetamōnīpa. ⁶ Apænete ate mōnitō, Gomōnīpa,
 āninque go ñænæ wipodē adopodē guīdinque wogaa gocæ cæyōmōnite tömēnāni
 wæætē, Waa goedāni, āninque ocæ emænte tömēnāni oncō godānitapa.

⁷ Mōnitō iñōmō Tido iñōmō wadæ tao wogaa godinque Todēmaida iñōmō pō tömæwæ
 æidinque māniñōmō nāni pōnencabo inānite adinque mōnitō, Pömōnīpa, āninque
 tömēnāni tōnō adoönæque quēwentamōnīpa. ⁸ Iīmō ate wadæ godinque Tetadea
 nāni quēwēñōmō pōninque Pedipe oncōnē pō guīte quēwentamōnīpa. Wēenēnedē
 Itota nānō nē emīñænāni, Mönō pōnencabo beyæ ante nē cædāni tiæte ganca ināni
 incædānīmpa, ante nāni Tiæte ānōnāni iñōnāni adocā Pedipe tömēnāni nāni pōnencabo
 beyæ ante nē cæcā inongä inte Codito waa pōni nānō pōnō cægāinō ante nē apænecā
 inongāimpa. ⁹ Tömengä wēnāni baquedānique mengāa go mengāa iñōnānite Wæn-
 gonguī Önōwoca pōnō cæcā ate tömēnāni Wængonguī beyæ nē apænedāni inōnānīmpa.
¹⁰ Mōnitō Pedipe weca tæönæ quēwēmōni ate wacā onguīñængä tömengä emōwo Agabo
 Wængonguī beyæ nē apænedongä inte Oodeabæ quēwente wææ pongantapa. ¹¹ Mōnitō

weca pöninge tömengä Pabodo pacadeyænta æninque nämä önompo goti wimpote wæi önöwa goti wëwadinque iïmaï ante apænecantapa.

—Wængonguï Tæiyæ Waëmö Önöwoca botö imote æbänö ante apænecää, ante apænebo ëñeedäni. Oodeoidi Eedotadëë në quëwënäni iñömö iï pacadeyænta në ëadingä ingante mänömaï goti wïninge oodeoidi inämaï inäni nempo pædæ godönäni æncædänimpa, ante do apænecä ëñëmopa, ante Agabo apænecantapa.

¹² Mänömaï apænecä ëñëninge mönitö Tetadea quëwënäni tönö Pabodo ingante wææ wææ apænedinque, Eedotadëë godämaï imäwe. ¹³ Ante wææ äñömönite Pabodo wæætë,

—Minitö iñæmpa Ca ca wæmini ëñente wædinque wætawente awædö. Edæ Eedotadëë goyömote bæi ongonte goti winäni incæte wænönäni wæmo incæte botö iñömö ñimpo cædämaï inte mönö Awënë Itota ëmowo beyænque cöwë gocæboimpa.

¹⁴ Ante mänömaï apænecä ëñëninge mönitö ancaa wææ äñömönite Pabodo, Cöwë gocæboimpa, ante ñimpo cædämaï inte angä wædinque mönitö wæætë edæ, Wængonguï nänö änö bai bacæimpa, ante adinque mönitö ee ate pæ wëenetamönipa.

¹⁵ Ininque mänimpoönæ mänïñömö quëwëninge, Nöwo mönö Eedotadëë gocæimpa, ante cædinque Pabodo tönö godongämæ ee gotamönipa. ¹⁶ Goyömöni Tetadea iñömö quëwënäni inte Itota ingante në tee empote quëwënäni pancadäniya mönitö tönö godongämæ godinque, Näatöo oncönë owocæminimpa, ante mäninganca ænte mämönäni pö guitamönipa. Tömengä iñömö wää tëiwænë Tipidebæ në quëwëningä inte dobæyedë Itota nänö në ëmiñængä badingä inte quëwëningäimpa.

Tantiago weca Pabodo ëñacæ gocampa

¹⁷ Tömengä oncönë pö guï mömönique go Eedotadëë pöñömöni mänïñömö quëwente në pönëni iñömö, Waa pömini amönipa, ante todänitapa. ¹⁸ Ayæ iïmö ate Pabodo tönö godongämæ möni poncabo Santiago weca ëñacæ gotamönipa. Tömengä weca pöñömönite në pönëni inänite në aadäni në Picænäni tömänäni adoyömö pönänitapa. ¹⁹ Adinque Pabodo, Waa quëwëmini, äninque godömenque iïmaï ante apænecantapa. Mëmöidi ëñeedäni, äninque, Botö oodeoidi inämaï inäni weca gote cæyömote Wængonguï iïmaï godongämæ waa cæcantapa, ante Wængonguï nänö cædinö ante tömengä adodö adodö ante apænecä ëñënanitapa. ²⁰ Eñëninge në aadäni Picænäni guiquënë, Wængonguï, Bitö waa pöni cæbitapa, ante godongämæ watapæ apænedänitapa. Ayæ Pabodo ingante wæætë apænedinque,

—Biwï ëñëmi. Oodeoidi æpodö miido ganca inäni ñowo do pönente badäni abitapa. Tömëni iñömö Wængonguï nänö wææ angainö ante tömänäni ëñente cöwë cædäni abitawo. ²¹ Ayæ edæ bitö Pabodobi wënæ wënæ cædämaï iñömite wadäni bitö imitedö ante babæ wapiticæ godö oodeoidi inänite iïmaï ante tedewënäni ëñënanipa. Tömëni, Pabodo wayömö wayömö godinque oodeoidi wabæca quëwënäni inänite bee tente odömöninque iïmaï ante apænecampa, ante tedewënänipa. Pabodo, Minitö wënäni inänite ëo togænämaï iedäni, äninque, Dodäni nani angainö mini ëñënö ante ñimpo cædäni, ante anewengampa, ante tedewënänipa. Ayæ godömenque äninque, Möitee wodi nänö wææ angainö ante wido cædäni, ante Pabodo anewengampa töö. Ante tömëni bitö imitedö ante babæ ante tedewënänipa. Iñæmpa bitö mänömainö ante änämaï iñömite tömëni oodeoidi inänite babæ ante apænedäni ëñënanipa cæbi. ²² Ininque, Pabodo do pongäimpa, ante oodeoidi do ëñenguinäni inänipa, ante pönente wædinque mönitö ñowo, Æbänö cæte wææ cæquïi, ante wæmönipa. ²³ Ininque, Pabodo nö cæcä iñongante wadäni babæ wapiticæ tededänipa, ante oodeoidi ëñencædänimpa, ante wææ cædinque bitö iïmaï cæcæbiimpa ämönipa.

“Pabodo ëñëmi, änänitapa. Mönitö weca onguïñænäni mengäa go mengäa inäni ñowo ongöninque, Wængonguï beyænque ante cöwë cæcæmönimpa, ante në äninäni inte tömëni nani äninö bai iinque cæquinäni inänipa. ²⁴ Tömëni, Mönitö äninö ante do iinque cædimöni inte wentamö mongænämaï imöni acædänimpa, ante cædinque,

Wængongui qui, ante godoncæ cædänipa. İninqe bitö iñömö mäninäni inänite ænte godinque tömənäni tönö godongämæ, Wængongui qui, ante godöe. Ayæ bitö eyepæ pædæ godömi æninqe tömənäni näni godonguënecoo godonte æninqe, Wængongui qui, ante godöninqe tömənäni ocagui tömanguï ocäa pöni ëö tocate incædänimpa. Bitö mänömaï tömənäni tönö iñacabo cædinque Möitee wodi nänö angäinö bai cæbi adinque oodeoidi wæætë, Æ, Pabodo nö cæcä iñongante wadäni iñömö babæ wapiticæ tededänipa, ante ëñencædänimpa,” ante nê Picænäni änänitapa.

²⁵ “Ayæ oodeoidi inämaï inäni guiquënë nê pönənäni badinque æbänö cæquënënenäni inänipa, ante pönente wædinque mönitö do godongämæ pönëninque tömənäni inänite iïmaï ante yewæmontamönipa. Wadäni, Wængonguïdi qui, ante cænguï näni cönönincoo ante mïnitö cænämaï gomö aedäni. Wepæ owemöingä adinque cæningä ñê wimencate wæningä adinque cænämaï iedäni. Ayæ nänöogængä inämaï iñongante mïnitö godö guëa mönämaï iedäni, ante do yewæmontamönipa,” ante nê aadäni Picænäni Pabodo ingante apænecadänimpa.

Wængongui oncönë Pabodo ingante bæi ongönäni

²⁶ İimö ate ñäö bayonte nê aadäni Picænäni näni äninö bai ëñente cædinque Pabodo mengäa go mengäa inäni inänite ænte mäocä gote cæyönäni tömengä nänö tæiyæ waëmö baquinque ante tömənäni tönö Möitee wodi nänö wææ angäinö ante ëñente cæcantapa. Mänömaï cædingä inte tömengä Wængongui oncö ñænæncö yabæcönë go guidinque mäniñömö cædäni inänite apænedinque, Mönitö adoque Wængongui itæde go ate Möitee wodi nänö angäinö iinqe cæmöni ate iïnäni iñömö, Wængongui qui, ante baö pædæ pönönäni æninqe tancæminimpa, ante Pabodo tömənäni beyæ ante apænecantapa.

²⁷ Ayæ önonpo æmæmpoque go mëönaa nänö änimpoönæ wodo iinqe ba ate oodeoidi Atiabæ quëwente nê pöninäni guiquënë Wængongui oncö ñænæncö yabæcönë ponte ayönäni Pabodo a ongongä. Adinque mäniñömö önonque ongönäni inänite, Mönö pïinte cæcæimpa, ante änäni ëñëninque iïnäni wæætë ænguï badänitapa. Ayæ Pabodo ingante bæi ongonte, ²⁸ aa pedinque tömengä ingante nê pïinte änäni iñömö, “Idægoidi cöwä aedäni” ante, “İingä ingampa cæminii. Pö godongämæ cædäni. Tömengä inguipoga tömäo godinque tömämæ quëwënëni inänite mäo apænedinque iïmainö ante tedewengampa. Idægoidi wënæ wënæ cædäni inänipa, ante cöwë änewengampa. Wængongui oncö ñænæncö incæ önonconque impa, angampa. Ayæ Wængongui nänö wææ angäinö ante mönö ëñënëmaï ingæimpa, ante tömengä änewengampa töö. Ayæ iñömö oncö tæiyæ waëmö oncö iñonte tömengä wæætë guidiegoidi inänite ænte mämö iincönë guidinque otænë öñö bai cæcantapa cæminii,” ante pïinänitapa.

²⁹ Do edæ wacä Todopimo iñömö Epeto iñömö quëwëningä inte Eedotadëe pöninque Pabodo tönö cægöna inönäimpa. Mänömaï guëa cægöna adinque oodeoidi, Æ, iingä oodeocä inämaï iñongante Pabodo do Wængongui oncö ñænæncö yabæcönë ænte mämongä wäänë guiibaingampa, ante wawique pönëninque mäninö ante wapiticæ apænedänitapa.

³⁰ Mänömaï ante änewënëni ëñëninque Eedotadëe quëwënëni tömäo iñömö Yæ yæ äninqe pogodo pönänitapa. Ponte Wængongui oncö ñænæncö yabæcönë mäo pö guidinque Pabodo ingante bæi ongonte æninqe oncodo wëä mantao godinque odemö do tee mönedänitapa. ³¹ Ayæ godömenque, Wænongæimpa, ante tæcæ cæyönäni adocanque mäi odömäno tontadoidi awënë cömantante ingante apænecantapa. Eedotadëe tömäo Yæ yæ äninqe pogodo pönänipa cæbii. ³² Ante mäi angä ëñente wædinque awënë cömantante iñömö tontado capitäoidi tontadoidi inänite, Pöedäni, äninqe nê Yæ änäni weca pogodo wææ do pönänitapa. İninqe awënë cömantante tönö tontadoidi do wæænte pönänipa, ante adinque wadäni wæætë Pabodo ingante nê tæi tæi päninäni inte ñöwo ñimpo cædinque ee adänitapa. ³³ Pabodo weca pöninque awënë cömantante angä ëñëninque tontadoidi wæætë Pabodo ingante bæi ongöninque yaëmengö mëmëña goti winänitapa.

Awënë cömantante iñömö, Æcänö ingäi, ante ayæ, Quinö wënæ wënæ cæcäi.
³⁴ Æñongante pancadaniya, iimaï cæcantapa, Æñönäni wadäni wæætë, Wii iimaï wadö
 cæcantapa, äninque wææ wææ Æñönänite tontadoidi awënë cömantante iñömö, Nöingä
 ante æbänö cæte ëñenguimoo, ante wædinque tontadoidi inänite angä ëñëninque
 Pabodo ingante tömënäni wææ cæte iñömö ænte mäicæte ante cædänitapa. ³⁵ Ænte
 godinque tēwaimpa ganca tæcæ pöñongante godongämæ ongönäni godömenque ængui
 badinque wiwa cæcæ cædäni wædinque tontadoidi wæætë Pabodo ingante wææ cæd-
 inque önönancapæ ængö cædinque adimongä næænte mäidäni tēwaimpaa æicantapa.
³⁶ Ayæ tömänäni edæ tee empote pönäni iñömö Yæ yæ äninque, “Cöwë wido cæcæimpa,”
 ante ancaa äñänitapa.

Pabodo nämä wææ apænecampa

³⁷ Wææ cætiñömö tæcæ mangui guicæte ante cæyönäni Pabodo iñömö tontadoidi
 awënë cömantante ingante apænedinque,

—Bitö Ao ämi ëñente ate botö adodeque bitö imite apænecæboimpa.

Æñongante,

—Iñæmpa bitö guidiego tededö tedebi imitawo. ³⁸ Bitö iñæmpa equitobi inömi inte
 edæ doyedë, Wido cæcæimpa, ante cædinque në, Wæñongæimpa, ante näni äñincabo
 iñönänite coatodo miido ganca inäni inänite önömæca ænte mäobi godänitapa. Botö
 ayömo bitö adobi imitapa töö.

³⁹ Æñongante Pabodo wæætë,

—Iñæmpa botö waobo ëñagaïmo inte oodeobo inömo imopa. Botö wii önöñomonque
 ëñagaïmo imopa. Tiditiabæ Tadoto näni nanguï quëwëñömö ëñagaïmo imopa cæbii. Ao
 ämi ate botö iñänäni inänite apænebo ëñëmaïnänipa.

⁴⁰ Æñongante Ao angä ate tēwaimpaa adiyæ gongæninque godongämæ ongönäni
 inänite Pabodo, Apocænë iedäni, ante bai cædinque compo compo cæcä. Adinque
 tededämaï ongönäni ate tömengä ebedeoidi näni tededö tededinque iimaï ante apænecä
 ëñëñänitapa.

22

¹ “Botö töniñamini imini ëñëedäni. Botö wæmpomini imini botö nämä wææ apænebo
 ëñëedäni.”

² Ante Pabodo ebedeo tededö apænecä ëñëninque tömënäni, Æ mönö tededö
 apænecampa, ante wædinque godömenque ëamonca nöwæ ongöñönäni tömengä iimaï
 ante apænecantapa.

³ “Botö iñömö oodeobo ingaïmo imopa. Tiditiabæ Tadoto iñömö ëñagaïmö inte botö
 Eedotadëe ponte pægaboï aedäni. Iñömö pædinque Gämadedo në odömongä weca
 adimo inte botö mönö mäemäëidi näni wææ angainö ante ædæmö ëñëninque adodö ante
 ëñente cæte pægaboimpa. Minitö, Wængongui beyæ ante mönö cöwë cæcæimpa, ante
 ñöwoönæ cæminipa. Minitö cæmini bai botö adobai Wængongui beyæ ante cæcæte
 ante cöwë nanguï cædinque quëwengaboimpa. ⁴ Ininque, Itota öönädë godö Taadö
 bai ingampa, ante në pönänäni inänite botö, Pämo wæncædänimpa, ante togænte
 pangaboimpa. Onguiñænäni incæ onquiyænäni incæ tömänäni inänite bæi ongöninque
 botö wadäni nempo pædæ godömo æninque tömënäni wæætë në pönänäni inänite mäo
 tee mönedäni wægadänimpa.”

⁵ “Mänömaï cædinque botö, Godömenque Daämaco iñömö godinque botö, Taadö,
 ante në pönänäni inänite bæi ongonte goti winte adodö Eedotadëe iñömö ænte mämö
 pædæ godömo æninque awënëidi wæætë tömënäni inänite pänäni wæcædänimpa, ante
 cætabopa. Mänömaï cæcæte ante cæbo adinque, Wængongui qui, ante në godongä
 ñænængä pönä inongä tönö në aadäni näni Picæncabo tönö Ao äninque, Mönitö
 töniñadäni Daämaco iñömö quëwënäni acædänimpa, ante cadota ante yewæmönäni
 ænte gotabopa. Ininque, Botö æbänö cæboo, ante në againäni inte awënëidi incæ

edæ, Pabodo näwangä angampa, ante ñowo në apænequënänäni inänipa,” ante Pabodo angantapa.

Botö wëënë pönëwengainö ante ñimpo cædinque wadö ante pönëmopa, ante Pabodo apænecampa

(Näni Cægainö 9.1-19, 26.12-18)

⁶ Äninqe Pabodo, ñimai cægaboimpa, ante godömenque apænecantapa, “Botö taadö godinque tæcæbæcä ññonte Daämaco obo ponte ayömote öönæde ññontobæ ñäo botö weca pö godongämæ guinë gongæ ate wædinque, ⁷ botö guidömëmæ tæ go wææntabopa. Ayæ ëñëñömote, ‘Taodo, Taodo. Botö ñmote quïnante togænte pämi.’ ⁸ Äñongante, ‘Awënë, æbidö ñnömi ñmii.’ Ante wæyömote tömengä, ‘Itota Näatadeta quëwëniimo inte mänimodö bitö në togænte pänömo ñmopa,’ ante apænecantapa. ⁹ Mänömaï apæneyongä botö tönö godongämæ godäni guiquënë ñäo gongænque adinque botö ñmote në apænecä nänö tededö ante ëñëñämaï inänitapa. ¹⁰ Botö ññömö, ‘Awënë, quïnö cæquënëmo ñmoo, ante ämi ëñëmoe.’ Äñömote mönitö Awënë wæætë, ‘Bitö ængæ gantidinqe Daämaco ññömö goe. Botö, Taodo ñimai cæcæcäimpa, ante wacä ingante Daämaco ññömö në quëwengä ingante do apænebo ëñengampa cæbii. Bitö Daämaco ññömö gote ongöñömi tömengä wæætë bitö ñmite apænecä ëñente cæcæbiimpa,’ angantapa. ¹¹ Ayæ ñäo gongæ adinque botö bee wodömonte bai bayömote botö tönö godongämæ godinäni wæætë töö æmænte Daämaco ññömö mäodäni gotabopa,” ante Pabodo apænecantapa.

¹² Mänömainö ante apænedinque Pabodo godömenque apænecantapa. “Mänññömö gote ongöñömo wacä tömengä ëmöwo Änäniya botö weca pongantapa. Tömengä ññömö Wængongui ingante guñente wædongä inte dodäni näni wææ angainö ante cöwë ëñente cæcä inongäimpa. ñninqe oodeoidi mänññömö quëwënäni tömänäni tömengä ingante waa adönänimpa. ¹³ Tömengä ññömö botö weca pö næ gongæninque, ‘Taodo, bitö botö biwï ñmi, ñowo waa bamonte ae.’ Tæcæ äñongante botö æmö adinque tömengä ingante waa atabopa. ¹⁴ Tömengä ayæ apænedinque, ‘Mönö mæmäëidi Wængongui incæ, Botö æbänö cæquïmo ñmoo, ante botö pönente angainö ante bitö ëñencæbiimpa, ante cædinque bitö ñmite apænte ængampa. Ayæ, Mönö nö cædongä ingante tömëmi acæbiimpa. Adocä apænecä ëñencæbiimpa, ante cædinque Wængongui bitö ñmite do apænte ængampa. ¹⁵ ñninqe në adimi inte në ëñëmi inte bitö ññömö edæ bitö adinö ante bitö ëñëñinö ante, Näwangä impa, ante tömämæ quëwënäni inänite mäo apænebi ëñencædänimpa. ¹⁶ Nöwo ññömö quïnante a ongömi. Ængæ gantidinqe Itota ëmöwo apænedinque, Wënæ wënæ botö cædö pönö ñä mënongabi quëwëmoe, äninqe æpænë guie.’ Ante Änäniya angä ëñëñinqe botö æpænë guitabopa,” ante Pabodo apænecantapa.

Oodeoidi weca gotabopa, ante Pabodo apænecampa

¹⁷ “Ayæ ate adodö Eedotadëe pontabopa. Ayæ Wængongui oncö ñænæncö yabæcönë go guidinque Wængongui ingante apænedinque botö ate bai cæwëmente ayömö, ¹⁸ mönö Awënë botö ñmote ñimai ante apænecantapa. ‘Bitö botö ñmote ante nö apænebi incæte ñnäni ëñëñämaï inäni inte Baa anguñnäni inänipa cæbii. Nöwo Eedotadëe quingæ wodii tao gobæwe.’ ¹⁹ Äñongante botö, ‘Awënë ëñëmi, antabopa. Oodeoidi odömo incönë wacönë wacönë go guidinque botö bitö ñmite në pönëñäni inänite mäo tee mönedinque tæi tæi pänimo ñmopa. Mänömaï impa, ante ñnäni do ëñëñänipa. ²⁰ Ayæ, Itota incæ näwä Awënë ñongä ingampa, ante në apænecä ññongante Etebä wodi ingante wænönäni wæñongä botö edæ Ao äninqe në wænönäni weocoo aate a ongontabopa, ante tömëñäni do agäñäni inte botö ñmote waa aquñnäni inänipa.’ ²¹ Ante wææ apænebo incæte Wængongui Awënë wæætë, ‘Nöwo goe, ämopa, angantapa. Gobæ oodeoidi inämaï inäni weca bitö ñmite da godömo gocæbiimpa,’ ante da godongä gotabopa,” ante Pabodo apænecantapa.

Pabodo tontadoidi awënë cömantante weca ongongampa

²² Pabodo, Oodeoidi inämaï inäni weca angä gotabopa, ante nänö apænedi ganca godongämæ ongönäni ëñëë gönänitapa. Wæætë mänine apænecä ëñente wædinque tömänäni yedæ äninque, “Oodeoidi inämaï inäni weca godingä inömö edæ quëwënämaï inguënegä awædö. Tömengä ingante mönö wo ëwengæimpa.” ²³ Äninque tömënäni godömenque ænguï badinque Yæ yæ äninque nämä wecoo yabæcooquë gäni tadongadinque wancæ wancæ cædinque onguipo guidimö ö æninque wo ææntodö wo ææntodö ancaa cædänitapa. ²⁴ Mänömaï ænguï bate wënæ wënæ cædäni adinque tontadoidi awënë cömantante angä ëñëninque Pabodo ingante wææ cæte inömö manguidäni guicantapa. Ayæ, Quinö wënæ wënæ cæcäi ante piinte änänii, ante ëñencæte ante tontadoidi inänite apænedinque, Minitö cöwë cædinö bai cædinque tæi tæi pämini caate wædinque Pabodo tömää tömengä cædinö edonque pönï apænecä ëñencæboimpa, angantapa. ²⁵ Eñëninque tömengä ingante pancæte ante æmontaimenca tæcæ goti wininque ñö cæyönäni Pabodo inömö tontado awënë capitäo mäninömö ongongä ingante apænedinque,

—Inæmpa apænte änämaï inönäni botö odömäno onguinæmo inömote quimæ päwëminii. Mänömainö cædinque minitö awënëidi näni wææ angainö ante dicæ ëñente cæminiyaa.

²⁶ Äñongä capitäo wæætë awënë cömantante weca godinque,

—Ingä inömö odömäno onguinængä inongä ingä ataque. Nöwo æbänö cæquimii.

²⁷ Angä ëñente wædinque cömantante inömö Pabodo weca pöninque tömengä ingante, —Bitö näwangä odömäno onguinæmi imitawo.

Äñongante Pabodo,

—Ao, bitö ä bai botö mänimodö imopa, angantapa.

²⁸ Pabodo apænecä ëñëninque cömantante wæætë,

—Botö guiquënë odömäno inämaï ëñagaïmo inte mäninö bacæte ante cædinque nanguï godömo æninque odömänoidi wæætë botö imote, Odömänobi imipa, ante yewämönäni bagaboimpa.

Apænecä ëñëninque Pabodo wæætë,

—Botö guiquënë odömänobo ëñagaïmo inte edæ odömänobo inömo imopa, ante apænecantapa.

²⁹ Mänömaï apæneyongä në pancæ cædinäni guiquënë do tömengä ingante emö cæte wadæ godänitapa. Ayæ cömantante inömö, Pabodo odömäno onguinængä inongante botö ämo yaëmengonca goti winänipa töö, ante guinente wædinque, Botö awënëidi piinäni wæcæ wæ, ante wægacäimpa.

Oodeoidi näni Apænte Äincabo weca Pabodo ongongä

³⁰ Inömö ate cömantante inömö, Quinö Pabodo wënæ wënæ cæcäi ante oodeoidi piinte änänii, ante ëñencæte ante Pabodo ingante añecä ta pongantapa. Ayæ, Wængonguï qui, ante në godönäni ñænænäni tönö oodeoidi tömënäni näni në Apænte Äincabo inänite äñete godongämæ ponte ongönönäni Pabodo ingante ænte mäwæ tömënäni weca gö cæcä gongængantapa.

23

¹ Pabodo inömö oodeoidi näni në Apænte Äincabo inänite gomö adinque,

—Botö mëmöidi ëñëedäni. Botö mimö entawente nämä apænte cædinque Wængonguï beyæ botö cæquënëno ante wëñëñedë iinque cædinque cöwë ñöwo ganca adobai cædinque quëwëmopa.

² Ante mänömaï apænecä ëñente wædinque, Wængonguï qui, ante në godongä ñænængä pönï inongä Änäniya guiquënë Pabodo gäänë ongönäni inänite apænedinque, Önöneca tæi tæi tadeedäni, angantapa. ³ Äñongä Pabodo wæætë,

—Bitö inæmpa botö imote apænte ancæte ante Möitee wodi nänö wææ angainö ante cæbitawo. Incæte adode nänö wææ angainö ante ëñënämaï inte bitö edæ, Tæi

tadeedäni, ante pönö ämi awædö. Bitö weocoo waëmoncoo ëñabi incæte mïmö wentamö entawëninque cæyömite Wængonguï bitö ïmite näëmæ tæi tadeçæcäimpa töö.

⁴ Ante apæ necä ëñëninque Pabodo gäänë ongönäni wæætë,

—Bitö iñæmpa, Wængonguï quï, ante nê godongä ñænængä pönï iñongante quïmä tedewëmii.

⁵ Äñönänite Pabodo wæætë,

—Botö tönïñadäni ëñëedäni. Botö, “Waadäni awënë iñongante tömengä ingante wënæ wënæ tededämaï incæbiimpa,” ante do wææ yewæmongatimpa, ante do ëñë-mopa. Ìninqe botö, Ìñömö ongongä, Wængonguï quï, ante nê godongä ñænængä pönï inongä ingampa, ante ëñëñämaï inte botö mänömainö ante apænetabopa.

⁶ Ante apænedinque Pabodo, Ìinäni pancadäniya Tadoteoidi iñönänite pancadäniya Paditeoidi inänipa, ante adinque tömënäni näni nê Apænte Äincabo inänite aa pedinque,

—Botö mëmöidi ëñëedäni. Botö Paditeo wëmo nê ëñagäimo inte botö mëmpo Paditeo nänö ingäi bai botö adobaï Paditeobo inömo imopa. Mänimodö inömo inte botö, Mönö ñäni ömæmonte watapæ quëwengäimpa, ante pönëmopa. Ìninqe mänine botö pönënö beyænque botö imote apænte äninque mïnitö pancæ cæmïni awædö, angantapa.

⁷ Pabodo mänömainö ante apæ necä ëñente wædinque Paditeoidi tönö Tadoteoidi dodäni näni pönengainö ante wæætedö wæætë änewëninque Paditeoidi nänënë Tadoteoidi nänënë näni cabo näni cabo badänitapa. ⁸ Ìimaï impa. Tadoteoidi guiquënë, Mëwoga waomö ëwocamö inte mönö ñäni ömæmongäimpa, ante, Babæ ancædö, ante Baa äninque, Önöwocaidi tönö anquedoidi Wængonguï weca owodänipa, ante adobaï edæ Baa änäni inönänimpa. Paditeoidi guiquënë mënea ante pönëninque Ao änäni inönänimpa. ⁹ Ìninqe wadö wadö tedete ogæ tedeyönänite Paditeoidi tömënäni nê odömönäni pancadäniya ængæ gantidinque,

—Ìngä iñömö mönitö ayömöni wënæ wënæ cædämaï ingampa töö. Wæætë edæ anquedo incæ wacä önöwoca incæ Wængonguï weca owocä inongä inte tömengä ingante apæ necä imaingampa änewëmïni.

¹⁰ Ante nanguï ogæ tedeyönäni tömänäni godömenque Yæ yæ änäni ate wædinque tontadoidi awënë cömantante iñömö, Pabodo ingante æmæmæ inö töö godö æmæmæ inö töö godö cædinque æi guïñænäni wæmaingampa. Ante pönente guïñente wædinque tontadoidi inänite angä wæænäni ate, Pabodo ingante bæi ongonte ö æninque wææ cæte iñömö ænte mëi tee möneedäni, angä ëñente tee mönedänitapa.

¹¹ Ìimö ate woyowotæ mönö Awënë iñömö Pabodo weca ponte apæ necantapa. “Pabodo, Guïñente wædämaï incæbiimpa. Bitö doyedë Eedotadëë iñömö botö imotedö ante apænedinque, Näwä Awënë inongä ingampa, ante apænebitawo. Nöwo iñömö do bitö apænedö bai Odömä iñömö godinque adobaï apæ necæbiimpa,” angantapa.

Pabodo ingante wænongäimpa, ante cædänipa

¹² Nñö bayonte Oodeoidi pancadäniya guiquënë godongämæ pönëninque iïmainö ante Ao änanitapa. Cænämaï bedämaï inimo inte mönö Pabodo ingante wænongäimpa, ante cædinque, Pabodo mïi quëwëñongante mönö cabo incæ æcänö cæna æcänö beda mäningä nänö wænguinque cæcampa. ¹³ Onguïñænäni nê änäni iñömö coadenta ganca inäni ayæ godömenque nanguï inäni godongämæ pönëninque mänömaï änewëninque cædäni inänitapa. ¹⁴ Ìinäni iñömö, Wængonguï quï, ante nê godönäni ñænænäni tönö nê aadäni näni Picæncabo weca godinque iïmaï ante apænedänitapa.

—Mönitö godongämæ Ao äninque, Pabodo ingante wænongäimpa. Edæ mïi quëwëñongante æcänö cæna æcänö beda nänö wænguinque, ante ämönipa cæmïni.

¹⁵ Mïnitö tönö wadäni mïni Apænte Äincabo inömöni inte mïnitö iñömö, Pabodo æbänö cæcäi, ante ædæmö ëñencæte ante wæte bai apænedinque tontado awënë cömantante ingante babæ ante ämïni ëñëninque tömengä wæætë Pabodo ingante mïnitö weca ænte poncæ cæcæcäimpa, ämönipa. Mänömaï babæ ämïni ëñente cædinque cömantante

wæætē Pabodo ingante māwængä tæcæ wææñongante mönitö guiquënë taadö wææ wänöninge bæi ongonte edæ wænömöni wæncæcäimpa ämönipa.

¹⁶ Äñönāni Pabodo nānōwāa iñömö edæ do ēñengantapa. Ēñëninge tōmengä tontadoidi nāni wææ cæte iñömö do go guiidique Pabodo ingante apæncä. ¹⁷ Ēñëninge Pabodo wæætē tontadoidi awënë capitäo ingante apænedingue,

—Īngä edëningä ingante mīnitö awënë cōmantante weca ænte manguibi guicæe. Tōmengä cōmantante ingante adodeque apæncæcäimpa.

¹⁸ Angä Ao äninge capitäo wæætē mäningä edëningä ingante ænte guiidique cōmantante ingante apæncantapa.

—Pabodo mönō nē tee mönedongä iñömö botö imote aa pedingue iimaï angantapa. Īngä edëningä ingante awënë cōmantante weca ænte mäobi guiidique tōmengä awënë ingante adodeque apæncæcäimpa, angantapa.

¹⁹ Ante apæncä ēñëninge cōmantante iñömö edëningä ingante tōö æmænte nānēnē mäocä goyongante,

—Botö imote æbänö apæncæte ante pōmii.

²⁰ Äñongante,

—Awënë ēñëmi. Oodeoidi godongämæ pönëninge iimaï babæ cæcæte ante cædänipa. Tömënāni, Pabodo æbänö cæcäi, ante ædæmō ēñencæte ante bai apænedingue bitö imite babæ ante apæncæ cædänipa. Bitö iimö ate Pabodo ingante tōmënāni nāni nē Apænte Äincabo weca ænte poncæbiimpa, ante cædique babæ cæcæte ante cædänipa. ²¹ Tömënāni iñömö, Pabodo miingä quëwëñongante æcänö cæna æcänö beda nānō wænguinge, ante nē äñönāni inte edæ, Wænongæimpa, äninge cædänipa. Adodäni nāni cabo incæ coadenta ganca onguñænāni wænoncæte ante taadö do wææ wänöninge edæ, Wænömö wæncæcäimpa, ante edæ a ongönänipa cæbii. Tömënāni, Bitö æbänö Ao anguimi, ante ēñencæte ante ponte änewëñönāni bitö iñömö wæætē tōmënāni nāni änö bai cædämaï incæbiimpa ämopa.

²² Ante edëningä apæncä ēñëninge cōmantante iñömö, Bitö, Awënë ingante ante mänömaï apænetabopa, ante wacä ingante apænedämaï pæ wëncæbiimpa. Nöwo edæ goe, angantapa.

Pedique weca Pabodo ingante ænte mäodäni gocampa

²³ Edëningä ingante mänömaï angä gocä ate cōmantante wæætē awënëna capitäona mënaa inate aa pecä pōñönte tōmëna inate iimaï angantapa. Mīnatö ñöwo tontadoidi önöwa nē godäni dotiento ganca ināni tönö cabayo mongænte nē godäni tetenta ganca ināni ayæ tapa nē næænāni dotiento ganca ināni tönö mänimpodäni inänite iimaï ancæminaimpa. Mīnitö ñöwoönæ eyepæ cædique wantæ wantæ guiñongä wadæ godingue Tetadea ganca goedäni, ante da godömiina tao gocædänimpa. ²⁴ Ayæ Pabodo beyæ cabayoidi ämi ænte gocædänimpa. Tōmengä ingante wææ aadique pancabaa awënë gobedönadodo Pedique weca ämiina ænte mäodäni cabayo mongænte adimongä gocæcäimpa. ²⁵ Äninge awënë cōmantante iñömö cadota ante iimaï ante yewæmongantapa.

²⁶ Pedique ēñëmi.

Bitö acæbiimpa, ante botö Codaodio Ditia inömo inte ñöwo yewæmömopa. Bitö nē gobedönadodo awënë inömi inte waëmö pōni imipa, ämopa. Waa quëwencæbiimpa, ämopa.

²⁷ Īngä ingante oodeoidi bæi ongonte wænoncæ cæyönänite botö wæætē, Īñæmpa iingä iñömö odömāno onguñængä ingampa, ante do ēñente wædimo inte tontadoidi tönö godingue tōmengä ingante gä pe æmpote ö ænte wææ aatabopa. ²⁸ Ayæ oodeoidi, Pabodo wënæ wënæ cæcäi, ante quīnante piinte änānii. Ante ēñencæte ante cædique botö tōmengä ingante tōmënāni nāni nē Apænte Äincabo weca ænte gotabopa. ²⁹ Ænte gote ēñëñömo tōmënāni dodänique nāni angäinonque ante, Pabodo ēñënamäi cæcampa, ante piinte änāni wætabopa. Īninge botö ayömute tōmënāni, Pabodo nānō wænguinge nānō tee mönequingue wënæ wënæ cæcampa,

ante piinque önonquedö ante cædanipa, ante awædö. ³⁰ Nöwo iñömö, ðingä onguinængä ingante wænoncæte ante oodeoidi awëmö cædanipa, ante tededäni eñenimo inte botö tömengä ingante bitö weca do da godömo gocampa. Tömengä ingante në piinte äninäni inänite bitö weca adobaï da godömo godänipa. Mäniñque ante yewämömopa.

Ante cadota ante yewämöniñque, Awënë gobedönadodo Pedique acæcäimpa, ante tontado awënë cömantante da godongä ænte godänitapa.

³¹ ðinque cömantante nänö äninö eñente cædinque tontadoidi woyowotæ tao godinque Pabodo ingante Antipati ganca adimongä mäodäni gocantapa. ³² ðimö ate, Cabayo mongænte në godäni tönö Pabodo adimongä gocæcäimpa, äniñque tömënäni nempo emö cæte godinque önöwa në godäniñque tömënäni näni cæte quëwencönë ocæ emænte godänitapa. ³³ Cabayo mongænte në godäni wæætë Pabodo ingante godömenque ænte godinque Tetadea iñömö pöniñque awënë gobedönadodo ingante cadota pædæ godöniñque Pabodo ingante awënë nempo pædæ godönäni ængantapa. ³⁴ Awënë gobedönadodo iñömö cadota ænte adinque, Bitö æbædö eñagabiimpa. Äñongä Pabodo, Tiditiabæ eñagaboimpa. ³⁵ Ante apænecä eñeniñque gobedönadodo wæætë,

—Bitö imite në piinte äninäni pönäni ate mäniñedë ate botö, Bitö æbänö apænequimi, ante eñencæboimpa.

Äniñque wæ wänönäni inänite apænedinque, Minitö Awënë Edode wodi nänö apænte angaincönë Pabodo ingante ænte gote wæ wänöedäni, ante gobedönadodo angä ænte godänitapa.

24

Pedique weca ongöniñque Pabodo nämä wæ apænecä

¹ Önompo æmæmpoque iñönæ go ate, Wængongui qui, ante në godongä nænængä pönï inongä Änäniya iñömö Eedotadëë quëwëniñque wææ Tetadea gocantapa. Ayæ wacä tömengä emöwo Tedetodo tömënäni näni wææ angainö ante ædæmö adingä inte wadäni beyæ ante në wææ apænecä inongä inte në abogado näni äñongä inongäimpa. Tömengä tönö oodeoidi në aadäni näni Picæncabo pancadäniya adobaï Änäniya tönö godongämæ godänitapa. Godinque pancabaa awënë gobedönadodo weca ponte apænedinque, Pabodo në wænæ wænæ cædongä ingampa töö, änanitapa. ² Pabodo ingante äñete mämönäni pongä ate në abogado Tedetodo iñömö gobedönadodo Pedique weca ongöniñque apænecantapa.

—Awënë gobedönadodo eñëmi. Bitö nempo quëwëniñque mönitö wantæpiyæ wææt-edö wæætë cædämaï inte godongämæ piyænë cæte waa quëwëmönipa. Ayæ bitö në aabi inömi inte, Æbänö cæcæimpa, ante do eñeniñque mönitö ömæ iñömö waa cæbi ate mönitö godömenque waa pönï quëwëmönipa. ³ Awënë Pedique, bitö waëmö pönï inömi inte imæca tömäo waa cæbi æniñque mönitö bitö imite cöwë waa ate pönëniñque waa apænemönipa. ⁴ Incæte, Botö wantæpiyæ apænebo bai bitö wæcædömiimpa, ante pönente wædinque botö, Ao ämi ate wantæ iñö apænebo pönö eñëe, ante abogado Tedetodo angantapa.

⁵ Ayæ, “Mönitö ayömöni iñömö ongongä iñömö në wænæ wænæ cædongä inte tömäo godinque wapiticæ apænecä eñeniñque oodeoidi ængui badinque Yæ yæ änäni wämönipa. Edæ Näatadënöidi wapiticæ näni cæcabo iñönänite iingä iñömö adocä inongä inte në angä ingampa töö. ⁶ Ayæ Wængongui oncö nænæncö incæ önonconque bai baquinque tömengä wænæ wænæ cæcä adinque mönitö tömengä ingante bæi ongontamönipa. Ayæ mönitö mæmæidi näni wææ angainö ante Pabodo æbänö eñente cæcäi, ante mönitö apænte ancæte ante cætamönipa. ⁷ Mänömaï ante tæcæ cæyömöni tömengä mönitö nempo ongöñongante cömantante Ditia iñömö mämö gä pe æmpote ö ængantapa. ⁸ Ayæ mönitö adocä Pabodo ingantedö ante në piinte ämöni iñömönite adocä cömantante Ditia angä eñeniñque bitö weca ponte ongömöni æ. Bitö Pabodo ingante ämi eñeniñque tömengä, Æbänö cæboï, ante nämä wææ apænecæcäimpa.

Tömengä mänömaï wææ apæneca ëñëninque bitö, Mönitö æbänö näwangä ämönipa, ante do ëñencæbiimpa.”

⁹ Ante Tedetodo mänömainö ante apæneyongante oodeoidi godongämæ apænedinque, Tedetodo näwangä angampa. Pabodo wënæ wënæ cæcä ingampa töö, ante adoyömö ante apænedänitapa. ¹⁰ Gobedönadodo Pedique guiquënë Pabodo gämænö opo cæpoyongante Pabodo wæætë iïmaï apænecantapa.

—Awënë Pedique ëñëmi. Tæiyæ wadepo iñonte bitö iïmæca nê apænte angaïmi inte möni oodeocabo æbänö cæmöni iïmönii, ante do ëñëmipa, ante adinque botö, Bitö weca ponte nämä beyæ wææ apænecaæboimpa, ante tobopa. ¹¹ Bitö iñömö ëñencæte ante cæbi iïninque iïmainö ante do ëñenguïmi iïmaïmipa. Botö önompo tipæmpoga go mëönaa mänimpoönæque iñonte Wængonguï weca ædæ wææninque tömengä ingante waa apænecaæte ante Eedotadëë æitabopa. ¹² Mäniñömö æi pöninque botö tömënäni ayönäni quïnö wënæ wënæ cæboï ae. Botö Wængonguï oncönë ñænæncö yabæcönë go guibo incæ, oodeoidi odömöincönë go guibo incæ taadö gobo incæ wadäni tönö guädö guëa piïnte ämo dicæ adäniyaa. Botö ædöme godinque Yæ yæ ämo dicæ ëñëniyaa. ¹³ Iïninque tömënäni näni, Pabodo wënæ wënæ cæcampa, ante näni piïnte änewënö ante edæ, Näwangä impa, ante quïnö impa odömonguïnänii. Edæ dæ ampa, ante Pabodo nämä wææ apænecantapa.

¹⁴ “Incæte mönitö, Quëwenguïnö Taadö impa, ante möni pönënönö ante oodeoidi wæætë, Wapiticæ goquïnö impa, ante piïnäni. Iïninque, Pabodo mäninönö ante pönengampa, ante iïnäni nö ante apænedänitapa. Näwangä impa, ante bitö iïmite ämopa. Botö mäninönö ante pönëninque mönitö mëmæidi Wængonguï ingante waa ate cædinque quëwëmopa. Ayæ Möitee wodi nänö wææ angainö ante botö Ao äninque Wængonguï beyæ nê apænedäni näni yewæmongainö ante adobaï Ao äninque quëwëmopa. ¹⁵ Wængonguï angä ate mönö waocabo edæ nö cæmö incæ wïwa cæmö incæ tömämö wænte ate ñäni ömæmöninque mönö quëwengæimpa, ante iïnäni pönënanipa. Botö tömënäni näni pönënö baï adobaï ante pönente tobopa. ¹⁶ Mänömaï beyæ botö, Wængonguï ayongä incæ wadäni ayönäni incæ botö nämä apænte botö pönënö tæiyæ wæmö entwencæboimpa, ante cöwë nanguï cæbopa.”

¹⁷ Äninque Pabodo godömenque apænecantapa. “Botö wayömö gote tæiyæ wadepo quëwente ate tömëmo ömæ adodö pöninque, Ömæpodäni wæwënäni quï, ante ænte pöninque botö guidënanï oodeoidi iïnänite wæætë pædæ godömo ænänitapa. Ayæ, Wængonguï quï, ante baö pædæ godontabopa. ¹⁸ Mänömaï cæyömo ayönäni botö iñömö tæiyæ wæmö bacæte ante Möitee wodi nänö angainö baï do eyepæ cædimö inte Wængonguï oncö ñænæncö yabæcönë pö guidinque, botö, Wængonguï quï, ante godömo adänitapa. Wïi nanguï iïnäni tönö cædinque botö Yæ yæ änämaï inte cæbo adänitapa. ¹⁹ Incæte botö iïmotedö ante näni piïnte äninö näwangä i baï wadäni guiquënë oodeoidi incæ Atiabæ quëwente pönäni iñömö, tömënäni wæætë bitö weca do ponte angüenënanï iïnanipa. ²⁰ Botö oodeoidi näni nê Apænte Äincabo weca ongöñömote, Pabodo æbänö nö cædämaï ingää, ante apænte äñönänite bitö weca ñöwo ongönäni guiquënë mäninö ante nê ëñënanï iïnanipa. Iïninque wadäni dæ änäni adinque iïnäni wæætë edæ tömënäni näni ëñëninö ante nê angüenënanï iïnanipa. ²¹ Botö awënëidi weca ongöninque yedæ äninque, ‘Mönö wænte ate ñäni ömæmongæimpa, ante botö apænedö beyænque mïnitö ñöwoönæ botö iïmote apænte äninque piïmïnipa,’ ante apænetabopa. Iïninque iñömö ongönäni wabänö adobaï adode botö äninö beyænque piïnte änänipa,” ante Pabodo nämä wææ ante iïnque apænecantapa.

²² Pabodo mäninganca apæneca ëñëninque Pedique, Taadö ante nê quëwënäni æbänö ante pönënanii, ante do ëñëningä inte, Idæwaa, äninque tömënäni iïnänite,

—Cömantante Ditia pongä ate wæætedö wæætë mïni äninö ante apænte ancæboimpa.

²³ Äninque tontadoidi capitäo ingante apænedinque, Pabodo ingante tee mönedämaï inte wææ wänödäni. Ayæ tömengä quïëmë ante ænguënegä ingä adinque tömengä æmigoidi ponte pædæ pönönäni ængä iïninque mïnitö ee amïni æncæcäimpa, angantapa.

²⁴ Tæönæ go ate Awënë Pedique tömengä nänöogängä Dodotida tönö näna gæncaya pönatapa. Tömengä nänöogängä oodea onquiyängä inongäimpa. Pedique iñömö Pabodo ingante äñete mämönäni pöninque Pabodo wæætë, Codito Itota ingante mönö wede pönente quëwengäimpa, ante apæ necä ëñëë cönatapa. ²⁵ Ayæ Pabodo godömenque apænedinque, Mönö nö cæte quëwengäimpa, äninque, Mönö nämä wææ aate waa cæte quëwengäimpa, angantapa. Ayæ, Wængonguï Awënë nänö apænte anguiönæ oo baquïnö anguënë, ante apæ necä ëñëninque Pedique wæætë guïñente wædinque, Idæwaa, äninque,

—Nöwo gobæwe, angantapa. Waönæ ate botö eyepæ imo inte ämo bitö imite äñete mämönäni ponte apænebi ëñëmaïmpa, angantapa.

²⁶ Mänömaï äninque tömengä, Pabodo wabänö, Nïmpo cæbi gocæboimpa, ante cædinque godonte äinta pönömaingampa, ante pönengantapa. Ininque tömengä wantæ wantæ iñö Pabodo ingante angä pönongä guëa tededatapa. ²⁷ Mänömaï ancaa cæyongä wadepo mënepoga ba ate Pedique gobedönadodo awënë iinque bayongante wacä Pontio Peto näni änogä pöninque wæætë awënë gobedönadodo bacantapa. Ininque Pedique iinque awënë bayedë, Botö iïmaï cæbo ate oodeoidi botö imote waa acædänimpa, ante pönente cædinque Pabodo ingante tee möneincönë oncodo tadönämaï ee adinque wadæ gogacäimpa.

25

Gobedönadodo Peto weca Pabodo ongonde apæ necampa

¹ Peto iñömö pancabaa awënë gobedönadodo tæcæ badingä inte mäniimæ pöninque Tetadea näni quëwëñömö mëönaa go adoönæque quëwëninque Eedotadëë go æicantapa. ² Eedotadëë iñömö ponte ongöñongante, Wængonguï qui, ante në godönäni ñænænäni tönö oodeoidi awënëidi tömengä weca pöninque, Pabodo iïmaï wënæ wënæ cæcantapa töö, ante apænedäni ëñengantapa. ³ Tömënäni doyedë adoyömö pönëninque, Gobedönadodo Peto ingante ämö ate tömengä wæætë Pabodo ingante Eedotadëë iñömö da pönongä pönongante mönö taadö wææ wänonte ö ænte wænongäimpa. Ante në pönëwënäni inte tömënäni ñöwo Peto weca pöninque iïmaï änanitapa. Gobedönadodo Peto ëñëmi, Bitö Ao ante möni ämaï pönö cæquïmi. Bitö Pabodo ingante ämi Eedotadëë iñömö ænte mämönäni pongæ, ante ancaa änanäni. ⁴ Eñëninque Peto wæætë tömënäni inänite edæ, Pabodo iñæmpa Tetadea iñömö tee mönete ongongantawo. Botö tömëmo edæ oo adoyömö wæi gocæboimpa. ⁵ Äninque,

—Mänömaï beyæ munitö mini cabo iñöminite në änanäni pancadäniya inänite da godömiini botö tönö godongämæ Tetadea wæi gocædänimpa. Pabodo wënæ wënæ cæcä ingä ininque tömënäni mäniñömö pöninque ancædänimpa.

⁶ Äninque tömënäni tönö wodo önompo tipæmpoga iïönæ godömenque quëwëninque Peto wadæ godinque Tetadea wæi gocantapa. Pöninque tömengä iïmö ate awënëidi apæncæte ante näni containpaa tæ contadinque angä ate Pabodo ingante ænte mämönäni pongä. ⁷ Ate oodeoidi Eedotadëë quëwente ñöwo wææ pöninäni inte pö godongämæ gongæninque, Pabodo mänömainö wiwa cæcampa, wadö wiwa cæcampa, iïmaïnö wiwa cæcampa, ante ancaa änewënanitapa. Incæte Petoidi inänite, Näwangä ante apænemönipa, ante odömoncæte ante tömënäni quïnö impa ante odömönäni aquinänii. ⁸ Pabodo iñömö nämä wææ apænedinque,

—Oodeoidi näni wææ angainö ante Baa änämaï inömo inte botö ëñente cæte quëwëniimo imopa. Wængonguï oncö ñænæncö waa adinque botö mänincönë yabæcönë guite wënæ wënæ cædämaï intabopa. Odömänoidi tæiyæ awënë Tetædo nänö äno ante ëñente cædinque wadö ante cöwë cædämaï intabopa.

⁹ Äñongante Peto, Oodeoidi tömënäni näni äninö bai cæbo ate botö imote waa acædänimpa, ante babæ cædinque Pabodo ingante,

—Botö Eedotadëë go æibo ate adinque bitö botö weca pönömi iinäni piinte näni äninö ante apænte ancæboimpa. Bitö Ao ante, Gocæboimpa, ämitawo.

¹⁰ Äñongante Pabodo wæætë,

—Botö iñæmpa odömāno tæiyæ awënë Tetædo nānō Apænte ante Contaimpaa gäänë ñōwo incæ ongōmo ae. Mīnitō iñōmō Tetædo beyæ ante nē apænte ämīni iñōmīni inte edæ botö imote nē apænte anguënēmīni imīnitapa tōö. Bitö tōmēmi iñōmō edæ, Pabodo oodeoidi inānite wēnæ wēnæ cædāmaī iñingā ingampa, ante edæ do ēñēmīpa. ¹¹ İñinque wēnæ wēnæ cædinque botö tente wænguënēmo imo baī botö edæ Baa änāmaī inte edæ dobæ wæncædōmoimpa. Wæætë edæ, Wēnæ wēnæ cæbīpa, ante iñāni oodeoidi nāni änewēnō guiquēnē önonquedō ante i iñinque waocä æcāmenque incæ ædō cæte tōmēnāni nempo pædæ godonguēnengā ingää. İñinque botö, Odömāno tæiyæ awënë Tetædo ingante ämo botö imote pōnō apænte ancæcäimpa, angantapa.

¹² Pabodo mänōmaī angä ēñente wædinque Peto tōmengä tönō godongāmæ nē apænte änāni tönō, Æbānō cæquīmōö, ante adoyōmō pōnēnāni ate tōmengä Pabodo ingante,

—Ao ämōnīpa. Tæiyæ awënë Tetædo incæ apænte ancæcäimpa, ante do änīmi inte bitö Tetædo weca edæ gocæbiimpa, angacäimpa.

Awënë odeye Agodīpa ingante Peto apænecampa

¹³ Tæönæ go ate wacä awënë odeye Agodīpa tönō onquiyängä Bedēnite iñōmō gobedōnadodo awënë Peto ingante, Bitö iimæca waa pōmi amōnāpa, ante apænecæte ante Tetadea iñōmō pōninque Peto weca ēñacæ pōnatapa. ¹⁴ Pōninque tæönæ quēwēna ate awënë Peto guiquēnē awënë odeye Agodīpa ingante, Pabodo ingante iimaī cætāmōnīpa, ante apænedinque,

—Gobedōnadodo awënë Pedique wodi nānō nē tee mōnete emō cæte godingä iñōmō onguīñängä adocanque ayæ a ongongampa. ¹⁵ İñinque botö Eedotadēē æite quēwēñōmote, Wængonguī quī, ante nē godōnāni ñænænāni tönō oodeoidi inānite nē aadāni nāni Picæncabo guiquēnē botö imote äninque, Māningä iñōmō wīwa cæcä ingä adinque bitö tōmengä ingante apænte äninque ämi wænōnāni wæncæcäimpa, änānitapa. ¹⁶ Èñēninque tōmēnāni inānite botö wæætë iimaī antabopa. Waocä nāmā beyæ apænedāmaī iñongante mōnitō mōni odömānocabo iñōmō nē pānāni inānite pædæ godōnāmaī imōnīpa. Wæætë wadāni, İngä iimaī cæte wēnæ wēnæ cæcampa, ante pīinte änāni ēñente wædinque mōnitō māningä tönō nē pīināni inānite ämōni godongāmæ pōnānīpa. Ponte awincadō awīnca adinque wæatedō wæætë äñōnānite mōnitō iñōmō, Tōmēnāni nāni pīinte änīnō ante tōmengä æbānō nāmā wææ apænecää, ante ædämō ēñente ate nöingä ante apænte ämōnīpa. Mänōmaīnō ante botö tōmēnāni inānite apænetabopa, ante awënë Peto apænecantapa.

¹⁷ Ayæ, “Mänōmaī ante apænebo ēñēninque nē pīinte änāni botö tönō wææ Tetadea iñōmō godongāmæ pōnānitapa. İñinque botö a ongōnāmaī do mōni apænte äimpaa iimō ate go tæ contadinque, Māningä ingante ænte pōedāni, ämo ænte pōnānitapa. ¹⁸ Botö iñōmō, Pabodo wadāni inānite wīwa cæcampa, ante pīinguīnāni imāinānīpa, ante pōnentabopa. Incæte nē pīinte änāni ængæ gantite apænedinque edæ botö ante pōnēnīnō baī wīi pīinānitapa. ¹⁹ Wæætë edæ wadō ante pīināni ēñente wætabopa. Wængonguī ingante æbānō cæte waa aquīi, ante tōmēnāni Pabodo tönō wæatedō wæætë pīinānitapa. Ayæ tōmēnāni mæmæidi nāni wææ angainō ante tōmēnāni, Pabodo ēñēnāmaī ingampa tōö, ante pīinānitapa. Ayæ adocanque Itota wodi do wængaingä incæte Pabodo, Mīingä quēwengampa, ante tedecampa tōö, ante pīinānitapa. ²⁰ İñinque botö, Quēmē baī änewēnāni, Æbānō cæte nō ēñente apænte anguīmoo, ante wædinque botö Pabodo ingante iimaī antabopa. Tōmēnāni nāni pīinte änīnō ante bitö Ao äninque Eedotadēē gote ongōñōmite botö apænte ancæboimpa, antabopa.”

²¹ “Äñōmō tōmengä wæætë, Botö imote ee wææ wänōñōmīni, Botö æbānō cætawoo, ante tæiyæ awënë Empedadodo mōnō änongä apænte ancæcäimpa, ämopa. Angä ēñēninque botö, Æyedēmē eyepæ i ate Pabodo ingante tæiyæ awënë Tetædo weca da

godömo gocæcäimpa, ante pönëninque, Tömengä ingante mänimpoga wææ wänöedäni, antabopa,” ante Peto apænecantapa.

²² Mänömai apænecä ëñëninque awënë Agodipa wæætë,

—Īngä onguĩñængä æbänö apænecää, ante tömömo ëñëinente wætabopa.

Äñongante Peto,

—Īmō ate tömengä apænecä ëñencæbiimpa, angantapa.

²³ Īmō ate awënë odeye Agodipa tönö Bedänite ĩñömō waëmō pönī weocoo wëñate mongæninque tömënanī nāni ëñëincönë ñænæncönë pöninque, Mönatö awënëmōna ĩñömönate waa aedäni, ante bai cædinque wæñee da da pö guidatapa. Ayæ tontadoidi tæiyæ awënëidi tönö mänĩñömō quëwënanī awënëidi ñænænāni tönö tömöna miñæ dao dao pönänitapa. Ayæ Peto angä ëñëninque nē wææ wänönāni wæætë Pabodo ingante ænte mämönāni pö guiite ongöñongante, ²⁴ Peto ĩñömō,

—Awënë odeye Agodipa ëñëmi, angantapa. ĩñömō ongömīni tömämīni edæ ëñeedäni. Īngä ingante amīni. Tömengä ingante äninque Eedotadëë quëwënanī incæ ĩñömō quëwënanī incæ oodeoidi tömänāni botö ĩmote yedæ äninque, Īngä nē wënæ wënæ cæcä inte godömenque wī quëwenguëngä ingampa cæbii, äninque, Bitö apænte ancæbiimpa, ante wädänipa. ²⁵ ĩninque, Adocä Pabodo nänö wænguinque wënæ wënæ cæcantawoo, ante botö cöwä ayömo edæ dæ antapa. Ante wæyömo tömengä guiquënë, Tæiyæ awënë empedadodo incæ botö ĩmote apænte ancæcäimpa, angä ëñente pönëninque botö, Ao, tæiyæ awënë Tetædo weca da godömo gocæbiimpa, antabopa. ²⁶ Incæte, Īngä nänö cædinö ante tæiyæ awënë aquinö ante botö ædö cæte yewæmonguimoo, ante wæbopa. Mänömai beyæ botö, Minitö tömämīni apænte ämīni ëñencæboimpa, antabopa. Ayæ, odeye Agodipa bitö tömömi apænte ämi nō ëñente ate yewæmoncæboimpa, ante cædinque botö ñöwo Pabodo ingante ænte mämömo ponte a ongongä aedäni. ²⁷ ĩñæmpa botö, Mönö nē tee mönete ongongä wënæ wënæ nänö cædinö ante yewæmönāmai inte mönö ædö cæte da godonguī, ante awædö, ante Peto apænecäimpa.

26

Agodipa weca ongonte Pabodo nämä wææ apænecampa

¹ Awënë odeye Agodipa wæætë Pabodo ingante,

—Bitö ñöwo nämä beyænque wææ apænecæbiimpa, ämopa.

Angä ëñëninque Pabodo compo compo cædinque nämä beyænque ante wææ apænecæ cæcantapa. ² “Awënë odeye Agodipa, ëñëmi. Oodeoidi nāni pīinte äninö tömänö ante nämä beyænque wææ apænedinque botö bitö awënë ĩmi weca ongonte apænecampa, ante adinque botö waa edæ tobopa. ³ Möni oodeocabo dodäni nāni cægäi bai möni cæinö ante bitö ĩñömō edæ do ëñëmipa, ante tobopa. Ayæ adobai, Oodeoidi ñöwodäni æbänö ante wæætedö wæætë ante tededänii, ante do ëñëmi ĩnömi inte bitö botö wææ apænecä ante edonque ëñenguīmi ĩmipa, ante pönëninque botö godömenque tobopa. ĩninque bitö Ao ante ee ongöninque ëñencæbiimpa, ämopa.”

Īmai quëwengaboimpa, ante Pabodo apænecampa

⁴ Ante apænedinque, “Botö ñöwo ganca æbänö quëwëmoī, ante oodeoidi tömänāni do ëñënanīpa. Edæ do wëñæmoyedë botö ëñagaimæ quëwente pædinque botö edëni-moyedë ñöwo ganca æbänö Eedotadëë ĩñömō quëwengaboī, ante do ëñënanīpa. ⁵ Möni oodeocabo incæ pancadäniya Wængonguī ingante wædænque ëñente quëwëñönāni möni Paditeocaboque wæætë, Dodäni nāni wææ angainö ante mönö ëñente cæcäimpa, ante ëñente quëwëmönīpa. Botö ĩñömō Paditeobo ĩnömo inte mäninö ante cöwë Ao ante godömenque nangū cæte quëwentabopa. ĩninque oodeoidi do againāni ĩnönāni inte Ao ante bai, Nawangä Pabodo ëñente quëwengampa, ante apænecædönänīpa. ⁶ Mönitö mæmæidi ĩnänite apænedinque Wængonguī, Minitö beyæ cöwë pönö waa cæcæboimpa, ante nänö angainö bai cæcä beyænque mönö watapæ bacæimpa, ante botö pönëmopa.”

“Nöwo iñömö mänine botö pönönö beyænque iinäni, Pabodo ingante apænte an-cæminimpa, ante ænte mämönäni pöninque botö minitö weca a ongömo aedäni. ⁷ Wængongui, Minitö beyæ pönö waa cæcæboimpa, ante nänö angainö ante iinque bacæimpa, ante möni pönönö beyænque möni oodeo pægaincabo önonpo tipæmpoga go mencaboga mänimpomöni imöni iñömö woyowotæ itæde, Wængongui ingampa, ante tömengä beyæ cæte quëwëmönipa. Incæte awënë odayebi, ëñëmi. Wængongui, Cöwë cæcæboimpa, ante nänö angainö ante möni pönönö beyænque oodeoidi incæ botö imote, Wiwa cæbipa töö, ante piinänipa. ⁸ Minitö iminite ämo apænemini ëñëmoedäni. Do wäninäni iñönänite Wængongui, Botö pönö cæbo ate ñäni ömæmoncædänimpa, angacäimpa. Minitö iñæmpa, Wængongui ædö cæte mänömaï cæquingää, ante pönente wædinque quinante Baa änewëminii,” ante Pabodo angacäimpa.

Pabodo, Coditoidi inänite togænte pantabopa, angampa

⁹ Äninque Pabodo godömenque apænecantapa. “Botö wëñëñedë edæ oodeoidi näni pönëwönö bai pönengaboimpa. Mäniñedë botö Itota wodi Näatadeta quëwengaingä ëmowo ante näni pönönö ante piinte cædinque nanguï wido cæquënëmo imopa, ante pönëwentabopa. ¹⁰ İninque botö Eedotadëë iñömö quëwëninque mäninonque ante cægaboimpa. Mäniñedë edæ, Wængongui qui, ante në godönäni ñænænäni inänite antabopa. Ämo Ao ante tömënäni në änäni inte yewæmonte pædæ pönönäni äninque botö Wængongui Awënë quinäni nanguï inäni inänite bæi ongonte äninque në tee mönebo ingaboimpa. Ayæ tömënäni inänite wænoncæ cæyönäni botö cöwë godö Ao angaboimpa. ¹¹ Botö wayömö wayömö godinque oodeoidi odömöincönë wantæ wantæ iñö go guidinque, Wængongui Awënë quinäni tömengä ingante godö wënæ wënæ ante piincædänimpa, ante cædinque pædäni, ante nanguï ämo pangadänimpa. Ayæ tömënäni inänite nanguï piinque godömenque ænguï badinque botö tömënäni inänite pancæte ante wabæca näni quëwëñömö wabæca näni quëwëñömö incæ togænte gogaboimpa,” ante Pabodo wææ apænecantapa.

*Wadö ante pönente babopa, ante Pabodo adodö angampa
(Näni Cægäinö 9.1-19, 22.6-16)*

¹² Ante apænedinque Pabodo godömenque, “Mänömaï wabæca go wabæca go cædömo inte Daämaco iñömö gocæte ante cætabopa. Cæyömö, Pabodo iimaï cæcæcäimpa, ante Ao ämönipa, ante, Wængongui qui, ante në godönäni ñænænäni në änäni inönäni inte botö beyæ cadota ante yewæmöninque pædæ pönönäni ænte gotabopa. ¹³ Awënë odayebi, ëñëmi. Mänömaï gote idömæ goyömo tæcæ bæcä pönö bayonte nænque nänö näwä bai godömenque näwä öönæde inö botonga möni godongämæ gocaboga pö tömäo guinä gongæ. ¹⁴ Ate wædinque tömämöni guidömëmæ go go wæëñömöni adocanque möni ebeteo tetedö tetedö öönæde apænecä botö adoboque ëñentabopa. ‘Taodo. Taodo ämo. Botö imote quinante togænte pämi. İñæmpa wagada päintoca bai bitö nämä iñä æwate cowate bai bitö caate wæquinque cæbipa,’ angacäimpa.”

¹⁵ “Angä ëñente wædinque botö, ‘Awënë, æbidö inömi imii.’ Ante ëñente wæyömete, ‘Botö Itota inömo inte bitö në togænte pänimo mänimodö imopa cæbii. ¹⁶ Nöwo edæ ængæ gantidique adiyæ næ gongæmi ämopa. Botö beyæ në pönö cæbi ämo edæ bacæbiimpa. Ayæ, Botö imote æbänö abii, ante bitö adinö ante në apænebi ämo bayömite botö iincayæ ate godömenque odömömo ate bitö aquinö ante bitö në apænebi ämo bacæbiimpa. Mänömainö ante ämo bacæbiimpa, ante apænecæte ante botö bitö weca ponte a ongömopa. ¹⁷ Ayæ bitö guidänäni oodeoidi incæ wadäni wabæca quëwënäni incæ bitö imite wënæ wënæ cæcæ cæyönäni ate botö bitö imite gä pe æmpote wææ gompobo beyænque bitö wæætë quëwencæbiimpa. Tömënäni weca botö bitö imite da godömo gocæbiimpa. ¹⁸ Tömënäni botö imote wede pönänäni ate botö wënæ wënæ näni cædinö ante godö ñimpo cæbo ate tömënäni do botö tæiyæ wæmö badongainäni tönö adocabodäni bai badömo badinque quëwencædänimpa, ante cæbopa. Mänömainö cæcæte ante botö, Bitö Taodobi iñömö tömënäni awinca wi

æmonte bai cædinque apænebi eñëninque tømënanï wæætë edonque adinque ñäö inö gämænö poncædänimpa, ante cæbopa. Tatāna nempo quëwëñönänite bitö wæætë gä pe æmpote bai cædinque odömonte apænebi eñëninque tømënanï wæætë edæ ocæ ëmænte pönninque Wængonguï nempo quëwencædänimpa, ante bitö imite da godömo gocæbiimpa.’ Ante Awënë Itota botö imote angä eñente gotabopa,” ante Pabodo apænecantapa.

Pabodo, Öönædë apænecä eñente cætabopa, angampa

¹⁹ Mänömaï apænedinque Pabodo godömenque, “Awënë odeyebi Agodipa, eñëmi. Botö wiimonte bai ayömo öönædë inö në angä nänö angainö ante botö ædö cæte eñënamäi cæquimoo. Edæ do cætabopa. ²⁰ Tāno Daāmaco iñömö quëwënäni inänite apænedinque botö ayæ Eedotadëe iñömö godinque mანიñömö quëwënäni inänite apænedinque Oodeabæ quëwënäni inänite go apæneboque go wayömö oodeo ināmaï ināni inänite māo apænedinque iïmaïnö ante apænebo eñënanitapa. Minitö wënæ wënæ mīni cædö ante, Ancaa wæwente awædö, ante ñimpo cædinque Wængonguï gämænö edæ pödäni. Ayæ pönninque mīnitö, Mäninö wënæ wënæ botö cædinö edæ æmæwo ñimpo cæbopa, ante edonque acæimpa, ante cædinque waa cæte quëwëedäni, ante ämo eñënanitapa.”

²¹ “Ininque botö mänömaï cæbo beyænque Wængonguï oncö ñænæncö boyæ ongöñö-mote oodeoidi botö imote bæi ongönninque edæ wænönæ cædänitapa. ²² Mänömaï wënæ wënæ cædäni incæte Wængonguï ñöwoönæ ganca botö tönö cöwë godongämæ cæcampa. Ininque botö, Wængonguï Awënë æbänö cæcää, ante guïñënamäi inte næ gongænninque awënëidi inänite önönänique inänite apænedinque apæneboï aedäni. Möitee wodi tönö wadäni Wængonguï beyæ në apænegaïnäni tönö, Æbänö baquïi, ante apænegaðänimpa, ante apænebopa. Mänine tømënanï nāni apænegaïneque adodö ante apænedinque botö godömenque apænedämaï imo inte edæ iïmaïnö ante apænebopa. ²³ Möiteeidi iñömö, Mönö Codito cöwë caate wæquingä ingampa, ante apænegaðänimpa. Ayæ, Wænte ate tømengä tänocä në ñäni ömæmönigä inongä inte, Acædänimpa, ante cædinque ñäö tica ënente bai tømengä guïdënäni inänite wadäni inänite edæ odömoncæcäimpa, ante yewæmongadänimpa. Botö iñömö, Möiteeidi nāni angainö do edæ iinque batimpa, ante apænedinque wadö ante apænedämaï imopa,” ante Pabodo apænegaðäimpa.

Agodipa, bitö Codito ingante pönenguëñëmi imipa, angä

²⁴ Pabodo mänömaï nämä beyænque tæcæ wææ apæneyongante awënë Peto do ogæ tededinque,

—Iñæmpa Pabodo ocai ömæcabi inte tedebe awædö. Nanguï wantæpiyæ dibodo adimi inte idiquibæ pönente babiimpa töö.

²⁵ Ante wææ tedecä eñëninque Pabodo,

—Awënë Peto bitö waa pönï awënë gobedönadodo imi incæte botö wii bitö änö bai imopa. Botö wii idiquibæ pönëmo inte töingä pönënninque näwangä ante apænebopa.

²⁶ Awënë odeye Agodipa guiquënë tømengä mäninö botö apænedö ante tömää eñengä iñongante tømengä ingante edonque apænebo eñengampa. Edæ mäninö botö äninö wii awëmö cætimpa, ante pönënninque botö, Awënë odeye incæ do adingä inte ædö cæte eñënamäi inguigää, ante awædö. ²⁷ Awënë odeyebi Agodipa, ñöwo bitö imite apænebo eñëe. Wængonguï beyæ nāni apænegaïnö ante bitö pönëmitawo. Do pönëmi imitapa, ante eñëmopa.

²⁸ Äñongante Agodipa wæætë,

—Iñæmpa bitö botö imote wantæ iñö tededinque, Agodipa bitö Codito ingante do pönencæbiimpa, ante cæcæte ante cæbitawo.

²⁹ Äñongä Pabodo wæætë,

—Wantæ iñö apænebo incæ wantæpiyæ apænebo incæ bitö botö bai pönëmi waa tobaimopa. Edæ bitö tönö godongämæ eñëe cönäni tönö mīnitö tömämīni botö bai

entawencæminimpa, ante botö Wængongui ingante apænebopa. Incæte, Botö bai baedäni, äninque botö, Yaëmengoncoo empocæminimpa, ante apænedämaï intabopa.

³⁰ Ante Pabodo mänömaï apæneca ëñëninque awënë odeye Agodipa ængæ ganticantapa. Ayæ pancabaa awënë Peto, Bedänite, godongämæ ongönäni adobaï tömengä tönö ængæ gantidique, ³¹ mänincönë tao godinque iïmaï ante tededänitapa.

—İngä Pabodo wænæ wænæ cædämaï iïngante quïnante wææ wänonguiï. Quïnante apænte wänonguiï. Edæ wænæ wænæ nänö cædinö dæ ampa.

³² Ante tedeyönäni Peto ingante Agodipa apænecantapa.

—Tetædo incæ botö imote apænte ancæcäimpa, ante Pabodo wïi angä bai botö edæ tömengä ingante do ñimpo cæcædömoimpa, angacäimpa.

27

Pabodo ingante Odömä iïñömö da godönäni gocampa

¹ Mänömainö ante wædinque mänimæ awënëidi, Pabodoidi inänite ñöwo Itadiabæ ämö wogaa gocædänimpa, ante godongämæ Ao änänitapa. Mäniñömö tontadoidi iïñömö tæiyæ awënë empedadodo beyænque näni wææ wänoncabo inönäni inte Empedadodoidi näni änoncabo inönänimpa. Tömënanäni capitäo Codio nempo Pabodo tönö wadäni në tee mönete ongöninäni inänite pædæ godönäni ö æninque ænte gocantapa. Ayæ botö Odocabo në yewæmömo tönö wadäni adobaï Pabodo tönö godongämæ gotamönipa. ² Gäwapæntibæ wedeca gote ayömöni wipo ñænæmpo Adadämio wäi wocænte näni ænte pönimpo inte ñöwo Atiabæ godinque wayömö go ti wææ wayömö go ti wææ näni goquimpo adinque mönitö mänimpodë go guite gäwapæntibæ wogaa gotamönipa. Ayæ wacä Aditadoco Mäatedöniabæ Tetadönica iïñömö quëwëningä inte mönitö tönö pö äampodenque gocantapa. ³ İimö ate Tidöo näni quëwëñömö pö wäi wocæñömöni Pabodo ingante capitäo Codio waa cædinque pönö apænecantapa. Bitö æmigoidi weca quiëmë bitö ænguënëno ante gote ænte pöe, äninque ee acä tömæwæ gote ëñadinque ænte pongantapa. ⁴ Ayæ mäniï Tidöo iïñömö ëñate wogaa goyömönite möni në gocæ cædö woboyæ betamonca pæmä ate wædinque mönitö wää tæiwænë Tipidebæ näni äniwænë wææ cæteinö wogaa gotamönipa. ⁵ Wää tæiwænë go wodo tebæ gomönique go tæcæpæ pönï wogaa godinque Tiditiabæ wodo tebæ pömönique go Pampidiabæ wodo tebæ pömönique go Ditiabæ godinque Mïida näni quëwëñömö pö wäi wocæntamönipa.

⁶ Mäniñömö wacä wipo ñænæmpo Adecantodia näni ænte pönimpo adinque capitäo Codio, Itadiabæ goquimpo impa, äninque mönitö imönite angä godongämæ guite wogaa gotamönipa. ⁷ Tæönæ iïñonte wæñee godinque mönitö, Æiquedö goquimönii, ante ancaa cæmönique go Gönido näni quëwëñömö go wodo tebæ gotamönipa. Ayæ woboyæ cöwë mönitö gocæ cædö inö nanguï pönï pö ate wæmönique go wää tæiwænë Tadamöne wodo tebæ godinque wawænë Cædeta näni änöwænë yaatænque gotamönipa. ⁸ Mäniwænë wææ cæteinö yæwedecaque ancaa cædinque wæñee godinque mönitö Datea wëmonca wodöiñömö näni Waa Wodöiñömö näni äniñömö pontamönipa. Mäniñömö pömöni ate wipodë në cædäni iïñömö, Wipo ñænæmpo wäi wocæñompo nämä godämaï ingäimpa, ante cædinque teëmenca gæguincamë inte näni ñä cæcadodince guitodönäni näne ñongæ ate wipo godämaï wäi wocæntapa.

⁹ Mäniñömö wäi wocænte owodinque mönitö, Quingæ pongamö incæ wæñee pö-mompa, ante wædinque mönitö, Woboyæ nanguï pæmä tedæ baquinque mönitö Wængongui beyæ ante mönö cænämaï ëönæ do iinque batimpa, ante pönentamönipa. İninque mönitö, Ñöwo mönö wænguinque wipodë godömenque gomompa, ante wæyömöni wipo ñænæmpo në ænte godäni inänite Pabodo nö pönëninque wææ angantapa.

¹⁰ —İñänäni, botö ayömo mönö ewente wæquinque godömenque gomompa. Mäincoo mïni ænte gocoo wido cæquinque wipo nä tobæ go ate mönö becadote wænguinque impa cæminii.

¹¹ Äñongä wipo ñænæmpo në äacä tönö wipo capitäo wadö ante apænedä ëñëninque tontado capitäo Codio iñömö Pabodo nänö äninö ante ëñënämaï cæcantapa. ¹² Wæætë edæ, Iñömö ponte mönö wodöiñömö woboyæ pämmæ tedæ iñonte wii owoinente wæmompä. Ante wædinque wodo tömänäni, Pënite nāni wëmonca wodöiñömö nænque tamönö imætæ inö ongöninque woboyæ ante wææ cæte impa cæmöö. Nöwo wadæ godinque Pënique nāni wëmonca wodöiñömö go ti wæænte quëwëninque woboyæ pämmæ tedæ iinque pämmænte go ate mönö gomonga gocæimpa, ante adoyömö änanitapa.

Wini cai pompa

¹³ Mänömainö, Gocæimpa, äñönäni ñænæ wipo goquinque woboyæ dipæmmæ inö betamonca wædenque pämmæ ate wædinque, Mönö äninö bai ñöwo mönö waa goquinque impa, ante todänitapa. Ayæ wipo ñænæmpo wäi wocænö teëmenca nāni guitodöninca ñöwo gæguincamenca quingæ iñæ æænö ñænæ wipodë cö cædäni ate mönitö wogaa go Cædeta nāni änowænë yæwedecaque gotamönipa.

¹⁴ Mäninö tæcæ gocæ cæyömöni do woboyæ wini cai Yodocodöno nāni änö wää tëiwænë ayaënëmää inö mämö pämmæ pöninque, ¹⁵ wipo ñænæmpo mämö ö ænimpa. Mönitö, Mönö wodöiñömö adodö gocæimpa, ante cædinque woboyæ pönö gämænö ædö cæte wiya wënenente goquii. Ante wædinque mönitö ee amöni woboyæ betamonca inö quingæ mämö dadi wënenente da godö mäo gotamönipa. ¹⁶ Wää tëiwænë guiyawænë Caoda nāni änowænë dipæmmæ inö yæwedeca woboyæ wææ cæteinö godinque mönitö guiyampo möni wëä wëä ænte pönimpo ante, Tobænämaï impacæimpa, ante pæ pagænte ancaa cædinque wëä pönonte pæ mantamönipa. ¹⁷ Ayæ në cædäni guiyæmpo gæguincamenca wëä æænonte ñænæmpodë da wënanitapa. Guiyæmpo da wënenente ate tömënäni, Ñænæmpo awæmpacoo wii bede wænecæimpa, ante cædinque ñænæ wipo incæ gæguincamenca wini wini cæte goto winänitapa. Ayæ, Önætämö Tidite nāni änantamö impa, ante adinque tömënäni, Æ quingæ gomö bai mönö wænguinque Tidite ëmönaiboga go nāñe ñongæncædönimpa. Ante pönente guiñente wædinque wæñee gocæte ante cædinque weocoo ñænæmpodë pämmænte mäo nāni gocoo incæ wëä wænonte ñö cædinque ee adäni woboyænque wæñee mäo gotamönipa.

¹⁸ Wini cai iñömö godömenque woboyæ pämmæninque æpæ mængonta mængonta ante cæ wædinque wipo ñænæmpo incæ æmætæ dadiimæ æmætæ dadiimæ go wætamönipa. Iinque iimö ate tömënäni, Wipo ömæde bate wodæi bacæimpa, ante cædinque mäincoo ñænæmpodë ongönincoo incæ æpænë edæ wido wido cædäni gotapa. ¹⁹ Waönæ bayonte tömënäni, Ñænæ wipo quincoo, ante nāni cæincoo incæ nämä önompoca pancacooga æpænë wido cædäni gotapa. ²⁰ Ayæ tæönæ iñonte nænque edæ tamönämaï nëmö tamönämaï i ate mönö, Ædömë gomompä, ante ëñënämaï inte edæ wætamönipa. Ayæ woboyæ godömenque mämö pämmænö æpæ nangui mængonta mængonta cæ wædinque mönitö, Nöwo quëwënguinaï imompä, ante edæ pönëninque wætamönipa.

²¹ Mäninäni wantæpiyæ cænämaï inäni adinque Pabodo tæcæguedë ængæ gantid- inque tömämöni ayömöni tömënäni inänite iimaï apænecantapa.

—Iñänäni, botö ämo ëñëninque Cædeta nāni änowænë ëmö cæte pönämaï inte ee owoquënëmini iminitapa. Edæ mänömaï ee ongömöni bai wipo tobænämaï iñonte minitö mäincoo ëwënämaï inte wädämaï incædöminimpa. ²² Nöwo guiquënë guiñënämaï piyænë cæte quëwëedäni. Ñænæ wipo mönö goimpo incæ tobænte bacæimpa. Näwangä impa. Incæte waomö iñömö wænämaï tömämö miimö quëwënguimö imompä. ²³ Botö iñömö edæ Wængongui quimo inömo inte botö, Wængongui ingampa, ante tömengä beyæ cæbopa. Nöwoönæ woyowotæ tömengä anquedo botö weca pöninque, ²⁴ botö imote apænecä ëñëntabopa. “Pabodo, guiñënämaï ie. Tæiyæ awënë Tetædo weca bitö cöwë gote gongæncæbiimpa. Ayæ bitö beyæ waadete pönö cædinque Wængongui bitö tönö adopodë godongämæ godäni inänite do angä quëwëncædänimpa.” ²⁵ Ante mänömaï pönö apænecä ëñënimö inte botö wæætë minitö iminite, Guiñënämaï imini inte pönencæminimpa, ämopa. Tömengä nänö apænedö baquinö angüenë, ante botö

Wængongui ingante nē wede pönemo inte ämopa. ²⁶ Incæte wipo ñænæmpoque wää teiwänē wawänē godinque tobænte ba wæcæimpa, ante Pabodo angantapa.

²⁷ Ìninqe mēa Wængongui itæde ññonte woboyæ ayæ pämmæ mào godinque mōnitō Adodiaticopæ näni änömāa wadō wadō wogaa gotamōnipa. Mānimpōñæ ñninqe go ate woyowotæ ayaönänēña ññonte wipo ñænæmpodē nē cædāni ññömō, Onguipoiya obo pōmōmpa, ante pōnēñanitapa. ²⁸ Tömēñāni, Ægancadō ñi, ante acæte ante cædinque pædæ guidonte adinque todēinta i tei mēetodo impa, ante adinque ayæ godōmenque godinque pædæ guidonte adinque tōmēñāni, Ñōwo edæ pōnōmenque bæintitiæte mēetodo impa, ante wædānitapa. ²⁹ Dicaboga pōni edæ gomō tamēñedāni, ante guiñente wædinque, Ñænæ wipo wāi wocængæimpa, ante teēmenca näni guitodōninca menca go mencaa yæmiñæmpo ñnō edæ guitodōñanitapa. Ayæ, Ñäo ba waa tobaimpa, ante Wængongui ingante apænedinque edæ wāi wocænte a owotamōnipa. ³⁰ Wipo ñænæmpo nē cædāni guiquēñē, Mōnō wodii winongæimpa, ante awēmō cædinque waca näni guitodōninca yæcadopo ñnō guitodoncæte ante cæte bai babæ cædinque, Mōnō awēmō goquimpo, ante guiyä wipo incæ pædæ wæænoncæ cædānitapa. ³¹ Guiyæmpo tæcæ pædæ wæænōññāni Pabodo ññömō tontado capitäo tōnō tontadoidi ññānite angantapa.

— Ìñāni wipo ñænæmpo nē cædāni inte ñænæ wipodē ongōñāmaï ññāni bai mīnitō ædō cæte nāmā cæte quēwenguimīni.

³² Angä ēñente wædinque tontadoidi guiquēñē ñænæ wipo nē cædāni näni awēmō gocæ cædimpo gæguincamē aa wiyænāni ñninqe guiyæmpo tæi guiite æmæwo gotimpa.

³³ Tæcæ oque pōnente ññonte Pabodo ññömō, Tömāmīni cængui cæedāni, ante nanguï äninque,

— Ñōwo mēa Wængongui itæde ññonte mīnitō ancai guiñente wædinque ee ate cænāmaï quēwēmīni abopa. ³⁴ Ñōwo ññömō mīnitō ññānite, Cæedāni, ämopa. Cænte quēwenguēñē cämīni, ämopa. Mīnitō æcāmenque incæ tōmāmīni wænāmaï incämīn-impā.

³⁵ Äninque tōmāñāni waa ayōñāni Pabodo päo äninque Wængongui ingante, Waa pōnōmi cämōnipa. Ante apænedinque ao mænte cængä. ³⁶ Adinque tōmēñāni, Mōnō quēwengæimpa, ante gancæ pōnente wædinque tōmāñāni cænānitapa. ³⁷ Wipodē mōni adopodē gocabo ññömō dotiento tetenta i tei mānimpomōni intamōnipa. ³⁸ Māñōmaï cædinque tōmēñāni eyepæ cænāni ate edæ, Wipo teēmē ēmiñænte ññætāmō ññömō gobaimpa, ante guiñente wædinque, Wodæi bacæimpa, ante cædinque mōnitō cængui tōmēmō incæ æpænē gāwapænē wido cægadānimpa.

Wipo ñænæmpo incæ goyæ guipā

³⁹ Māñi ñäo bayō ömæ adinque ñænæ wipo nē cædāni ññömō, Ìimæ quimæmē impa, ante ēñēñāmaï ññāni ññānitapa. Wæætē cōwä ayōñāni, Æpæ wedeca toгаа paodāmæ ññömō emōnai impa, ante adinque, Eyepæ imō ñninqe mōnō emōnaiboga wipo nāñe ñongæimpa. ⁴⁰ Ante cædinque teēmenca näni guitodōnincacoo emō cæte gocæte ante gæguincamē aa wiyæninqe ñimpo cædāni tadōmengadæ ee ongontapa. Ayæ wiyaimpa mempaa tōmēñāni wāi wocæñedē yæmiñæmpoya ñnō näni goti winimpa incæ ñōwo wæætē edæ, Wipo tōo gocæimpa, ante ñi cædinque æpænē wæætē pædæ guidōñānitapa. Ayæ, Woboyæ pämmænte mào gocæimpa, ante ñænæ wipo wecoo adocooque yæcadopo pædæ æænonte wo cædāni ate emōnaiboga toгаа paodāmæ ññömō tōingä mào gotamōnipa. ⁴¹ Incæte tæcæ goyōmōni ññætāmō ññömō nāñe ñongæntapa. Wipo yæcado nāñe ñongæ adinque mōnitō, Mōnō ædō cæte goquii, ante wæyōmōni æpæ nanguï mængonta mængonta cæ beyænque yæmiñæmpo nā tobæninqe panguimæ panguimæ æmæwo gopotapa.

⁴² Tæcæ tobæññō tontadoidi guiquēñē, Nē tee mōnete ongōñāni wii tæi tæi pante wodii winonguñāni, ante wææ cædinque tōmēñāni ññānite wænoncæ cædānitapa. ⁴³ Adinque tontado capitäo ññömō, Pabodo cōwē quēwencæcæimpa, ante cædinque tōmēñāni näni cæcæ cædñō ante wææ angä ēñente ñimpo cædānitapa. Ayæ mōnitō ññānite, Nē ipo

cæmini iñömö täno æpænē tæi guidineque önopoca compo compo go tömæwæ ömaa goedäni, angä eñente gotamönipa. ⁴⁴ Wadäni ipo cædämaï inäni inänite tömengä, Minitö guiquenē awæmpaa incæ wipopa tobænimpaa incæ näne ñongæninque wiyacæ wiyacæ goedäni, angä eñente godänitapa. Mänömaï eñente cædinqe mönitö edæ tömämöni æpæmpo becadote wænämaï inte ömaa edæ tömæwæ pongamönimpa.

28

Wää tēiwænē Mänatabæ Pabodo ponte quēwengampa

¹Æpæmpo becadote wænämaï inte tömämöni ömaa taote eñeñömönite, Wää tēiwænē iiwænē Mänatabæ impa, ante apænedäni eñentamönipa. ²Mäniömæ quēwänäni iñömö wii wadäni bai cædinqe mönitö imönite waadete cædänitapa. Cöönæ ayæ nanguï cæ ate yoguite wæyömönite tömënäni gonga tänöninge, Pö ootoedäni, änäni gonga tömämöni bæcoyömö oototamönipa. ³Pabodo iñömö önopoca gæte tēnewæ bacoo ænte mämö ñö cæyongä gonga ocoi ä wædinqe tæntæ gongapamö manta Pabodo önopmo æo pocænte ñinga cædämaï ee engate owo wæcä. ⁴Adinqe iñömö quēwänäni wæætē näni cabo nämæneque tededinqe, “iingä iñömö waocä ingante nē wæningä ingä awædö. Tömengä æpæmpo becadote wænämaï iñongante edæ mönö nö cæte pänongä incæ tömengä ingante ata cæpodämaï inte angä ate ñöwo quēwenguinämaï incæcäimpa.”

⁵Ante wapiticæ ante pönente tedeyönänite Pabodo iñömö pongadämaï ingä inte pipo cæcä tæntæ ñingacæ gongapamö togodo guiite gonga gonte wængantapa. ⁶Adinqe tömënäni, Tincadö pæncæ pæncæ mempoquingä, ante ayæ, Tincadö iñontobæ tæi go wæænte wænguingä, ante acæte ante wantæpiyæ cöwä ayönäni, Ayæ dæ pongadämaï i inque ingampa, ante adinqe tömënäni wæætē edæ, Æ iingä wacä wængonguï inongä inte ponte a ongongampa, ante wapiticæ ante pönänitapa.

⁷Ayæ mäniwænē awenē Pobidio iñömö tömengä quincodē möni ömaa pönömö eyequei intapa. Tömengä, Oncönē pö guiite quēwæedäni, angä pö guiite mönitö meönaa go adoönæque quēwëñömöni tömengä waadete pönö cæcä ate waa quēwentamönipa. ⁸Pobidio mänömaï waa cæcä quēwëñömöni, Tömengä mæmpo wepæ tönö gömæ cæte daicawo gawænte möimoga a öñongampa. Ante apænedäni wædinqe Pabodo tömengä weca guidineque Wængonguï ingante apænedinqe gampocä ate waa bacantapa. ⁹Pabodo mänömaï cæcä adinqe mäniwænē tömæo gode änäni eñente wædinqe nē wænæ wænæ inäni inänite Pabodo weca ænte mämö ænte mämö cæyönäni tömänäni Wængonguï cæcä waa badänitapa. ¹⁰Mäniñömö quēwänäni mönitö imönite wæætē pönö waa apænedinqe cöwë waa cædänitapa. Ayæ wogaa tæcæ gocæ cæmöni adinqe quiëmē möni ænguënönö ante adinqe tömënäni, Minitö ænte goquï, ante eyepæ pöni ænte mämö da wänäni ænte gotamönipa.

Odömä iñömö Pabodo pongampa

¹¹Ayæ mönitö Mänatabæ iñömö mengäa go adocanque mämonque quēwëninque gocæte ante cædinqe, Äancadënaquepo, Adecantodia iñömö quēwänäni näni pemonte änimpodē go guitamönipa. Tömënäni wængonguina Catodo tönö Podoco awinca bai ante badöninge tömënäni ñænæ wipocado gö cædinqe wipo ñænæmpo emöwo, Äancadënaquepo impopa, ante pemönönänimpa. Mänimpo Mänatabæ wëmonca wodöiñömö do pöninqe pæmæ tedæ wäi wocæ adinqe mönitö iñömö mänimpodē go guidineque wogaa gotamönipa. ¹²Godinqe Tidacota iñömö näni wëmonca wodöiñömö pö wäi wocæninqe mönitö meönaa go adoönæque quēwentamönipa. ¹³Ayæ wadæ godinqe Odeguio näni quēwëñömö pontamönipa. Iimö ate dipæmæ gämænö woboyæ betamonca wædænque pæmæ wædinqe mönitö wadæ godinqe waönæ ate Poteodi quēwänäni näni wëmonca wodöiñömö æmæwo pö ti wææninqe tömæwæ gotamönipa.

¹⁴Tömæwæ godinqe Poteodi näni quēwëñömö ponte ayömöni nē pönänäni näni cabo ongönäni atamönipa. Tömënäni, Adoque Wængonguï itædē mönitö tönö ee owoedäni, änäni Ao ante mönitö tömënäni näni änimpoga mäniñömö quēwentamönipa.

Ayæ ate Odömä taadonque gotamönipa. ¹⁵ Odömä iñömö quëwente në pönënanī iñömö, Pabodoidi oo pönänipa, ante do ëñënanī inte doönæ tadinque mönitö imönite bee tencæte ante pönänitapa. Pancadāniya iñömö Apio nāni godonte æiñömö ganca pöninque mönitö imönite māmö bee tēnāni ate godongāmæ gotamönipa. Godinque, Cæincö, ante Menconga go Adoconque, nāni añömö māniñömö pōñömōni wadāni māmö bee tēnānitapa. Mānināni inānite adinque Pabodo iñömö, Nōwo iñömö wampo pönēmopa, āninqe Wængonguī ingante waa ate pönëninque apænecantapa. ¹⁶ Ayæ odömānoidi nāni nanguī quëwëñömö Odömä nāni añömö pōñömōni tontado capitāö iñömö në tee mönedināni wadāni inānite tömengä awënë nempo pædæ godöninque Pabodo ingante tee mönedāmaī ingantapa. Wæætē wacōnē nānēnē ænte māodāni quëwëñongante tontado adocanque tömengä ingante wææ wānōnongāimpa.

Odömä iñömö Pabodo quëwengampa

¹⁷ Māniñömö ponte ate Pabodo mēōnaa go adoönæque ate oodeoidi në ānāni inānite āñecä godongāmæ pönāni ate tömēnāni inānite,

—Botö tōniñamīni, ëñëedāni. Mönö guidēnāni inānite wēnæ wēnæ cædāmaī inte botö dodāni nāni angainö ante wido cædāmaī iñömote oodeoidi incæ Eedotadēë iñömö botö imote bæi ongöninque æninque odömānoidi nempo pædæ godönāni gotabopa.

¹⁸ Odömānoidi guiquēnē botö imote apænte āninqe, Æbānō cæcantawo, ante ancaa ante adinque, Pabodo dicæ tömengä nānō wænguinque wēnæ wēnæ cæcāa, ante adinque botö imote ñimpo cæcæte ante cædānitapa. ¹⁹ Odömānoidi botö imote ñimpo cæcæte ante cæyönāni oodeoidi wæætē ancaa Baa ānāni ëñente wædinque botö iñömö edæ, Odömānoidi tæiyæ awënë Tetædo incæ botö imote apænte angüenengä ingampa, antabopa. Mānōmaī ānimo incæte botö awënë Tetædo weca ongöninque, Botö guidēnāni wēnæ wēnæ cædānitapa, ante wæætē piinte ānāmaī incæboimpa.

²⁰ Mānōmaī beyæ mīnitö imīnite apænecæte ante botö, Pöedāni, antabopa. Nōwo apænebo ëñëedāni. Mönö idægocabo iñömö, Mönö në ponguingä Codito pönö cæcä beyænque watapæ bacæimpa, ante mönō pönēmompā. Māninö mönō pönengainö beyænque botö daagömē ñānoncapoīmo a ongōmo aedāni.

²¹ Ante apæneyongante tömēnāni wæætē Pabodo ingante apænedinque,

—Oodeabæ quëwēnāni bitö imite ante yewämöninque cadota pædæ pönönāni dicæ æmōniyaa. Mönitö tōniñadāni Oodeabæ quëwente pöninque bitö imitedö ante dicæ wīwa ānāniyaa. Bitö wīwa cædinö ante yewämöninque odömönāmaī inönānimpa.

²² Mānōmaī i incæte wayömö wayömö tömāmæ quëwēnāni, Mānināni Coditoidi iñömö wēnæ wēnæ cædāni inānipa, ante piinte tededāni do ëñēmōni ininque mönitö, Bitö ayömi Coditoidi æbānō cædāni ināni. Æbānō pönēmīi, ante ëñencæte ante wämönipa.

²³ Äninqe tömēnāni, Iñönæ godongāmæ bee tēninque ëñengäimpa, āninqe wadæ godānitapa. Ayæ wæætē māniönæ nāni āniönæ iinque ba ate ocæ ëmænte pōñönāni tæiyænāni bee tēninque Pabodo weca godongāmæ pönänitapa. Pönāni adinque Pabodo iñömö baänæ contadingä gawadecæ pōni apænedinque, Wængonguī Awënë Odeye nempo mönō quëwengäimpa, ante apænecantapa. Ayæ, Möitee wodi tönö Wængonguī beyæ në apænegaināni, Mönö Codito ponte cæcæcäimpa, ante nāni angainö baī Itota iñömö ñōwo ponte tömānō ante do iinque cægacäimpa. Nāwangä impa, ante botö apænebo ëñëmaimīnipa, ante Pabodo oodeoidi inānite apænecantapa. ²⁴ Angä ëñëninque pancadāniya, Pabodo nāwangä angampa, ānānitapa. Pancadāniya guiquēnē, Wīi pönëinente awædö, ānānitapa. ²⁵ Nāni cabo incæ mānōmaī wæætēdö wæætē apænete wadæ gocæ cæyönānite Pabodo wæætē æmæwo apænecantapa.

—Wængonguī Tæiyæ Waëmö Önōwoca apænecä ëñëninque Itaiya wodi doyedē mīnitö mæmæidi inānite nāwangä ante apænegacäimpa.

²⁶ “Itaiya ëñëmi, bitö oodeoidi weca godinque iimāi ante apænebi ëñencædānimpa.

Mīnitö önömoncaque ëñëninque ëñënāmaī incæmīnimpa.

Awıncaque adinque cōwē adāmaī incæmīnimpa, ante apænebi ëñencædānimpa.

²⁷ İināni edæ mīmō ömædēnāni inte wīi ēñēinente wæwædō, āninqe ædō cæte ēñenguīnānii.

Awinca wīi aīnente awædō, ānāni inte ædō cæte aquīnānii.

Edæ mīmō ēnēnāni inte bai tōmēnāni awinca wi æmōnte adinque önōmonca wi æmoncate ēñencædōnānimpa.

Edæ mīmō nō pōnēninqe dadi ēmænte botō gāmænō pōnāni bai botō do godō cæbo waa bacædōnānimpa.”

Ante Itaiya wodi mīnitō mæmæidi beyæ āmotamīni ante bai yewæmongacāimpa.

²⁸ İininqe mīnitō oodeoidi inōmīni inte ēñēnāmaī imīni adinque Wængonguī ñōwo wæætē, Botō pōnō æmo beyænque quēwencæminimpa, ante oodeo ināmaī ināni inānite do apænecæ cæcampa. Tōmēnāni guiquēnē ædæmō waa ēñenguīnāni inānīpa, ante apænebo ēñēmaīmīnīpa, ante Pabodo apænecantapa.

²⁹ Mānōmaī apænecā ēñente wædinque oodeoidi nāni cabo nanguī pōnī wæætedō wæætē āninqe wædæ godānitapa. ³⁰ Pabodo iñōmō oncō ænte quēwencæte ante tōmēnāni nāni godonte æinta pædæ godōninqe wacā oncō incæ tōmengā oncō bai bayō mānincōnē wædepo mēnepoga quēwengantapa. Ayæ, Æcānō ēñacæ pōinēna cōwē botō weca waa ponguīmīni, ante quēwēninqe tōmengā nē pōnāni inānite apænecā ēñēnōnānimpa. ³¹ Ayæ nē wææ wānōnāni cōwē Baa ānāmaī iñōnāni tōmengā guīñēnāmaī apænedinque, Wængonguī Awēnē Odeye nempo mōnō quēwengæimpa, ante apænedinque, Mōnō Awēnē Itota Codito æbānō cægacāi, ante edonque odōmōnte apænecā ēñengadānimpa.

Odömänoidi inänite Pabodo nänö cadota ante yewæmongainta

Waa quëwencæminimpa, ante

¹ Itota Codito ingante në cædömo inte botö Pabodobo inömo inte ii cadota ante në yewæmömo imopa. Wængonguï botö imote apænte æninque iimainö ante aa pegacäimpa. Bitö Pabodobi gote botö pönö cædö ante watapæ apænebi ëñencædänimpa, ante angacäimpa.

² Mäninö, Wængonguï æbänö pönö cæquingä, ante watapæ apænedinque tömengä beyæ në apænegainäni wëenënedë pönï nänï tæiyæ waëmö yewæmongainö ante botö mäninö ante në apænebo imopa. ³ Mäninö waa pönï nänö cæquïnö ante iinque cæcæte ante cædinque Wængonguï tömengä Wengä ingante da pönongä pongacäimpa. Tömengä iñömö waocä onguiñængä nänö baquinque Awënë Dabii wodi Pæingä inte ëñagacäimpa. ⁴ Adocä Itota iñömö botö Wengä inongä ingampa, ante tömänäni edonque acædänimpa, ante odömoncæte ante cædinque Wængonguï tæi piñænogä inte iimai cægacäimpa. Iingä Itota Codito mönö Awënë iñömö Tæiyæ Waëmö ewocacä inte do wæningä iñongante Mæmpo Wængonguï wæætë nanguï angä ate nänï ömæmongacäimpa.

⁵ Ayæ adocä tönö godongämæ cædinque tömengä emöwo beyæ mönitö imönite Wængonguï pönö waadete cægacäimpa. Ayæ, Minitö wabæca wabæca gote apænemini ëñëninque tömämæ quëwënäni Itota Codito emöwo ante wede pönëninque në ëñente cæte quëwënäni bacædänimpa, ante cædinque Wængonguï adobaï Itota önonpo inte mönitö imönite da godongä gotamönipa. ⁶ Iinque tömämæ quëwënäni inänite Itota Codito, Botö gämænö pöedäni, ante aa pedinque minitö iminute adobaï aa pecampa. ⁷ Minitö botö quimini badinque botö ayömö tæiyæ waëmö ewocate quëwëmini bacæminimpa, ante Wængonguï cægacäimpa. Iinque minitö Odömä iñömö quëwëninque Wængonguï quimini inöminite botö, Acæminimpa, ante iimai ante yewæmömopa. Mönö Mæmpo Wængonguï tönö Awënë Itota Codito waadete pönö cæyönate minitö wæætë gänë pönente bacæminimpa, äninque yewæmömopa.

Odömä iñömö ëñacæ pöinëmopa, ante

⁸ Minitö æbänö wede pönëminii, ante tömämæ quëwënäni tededäni ëñënanipa. Iinque botö iñömö Itota Codito emöwo apænedinque Wængonguï ingante waa ate apænebopa. Wængonguï bitö adobique pönö cæbi ate odömänoidi wede pönënanipa, ante apænebopa. ⁹ Wængonguï Wengä ingantedö ante watapæ apænedinque botö Wængonguï ingante në cædömo inte tömengä nänö änö ante ædæmö ewocadinque apænebo ëñënanipa. Botö mänömaï cæbopa, ante në adingä inte Wængonguï iñömö edæ, Odömänoidi beyæ ante Pabodo botö imote woyowotæ incæ itædë incæ apænecampa, ante në ëñengä ingampa. ¹⁰ Edæ, Wængonguï, bitö Ao ämi ate botö nïwo odömänoidi weca ëñacæ gobaïmopa, ante Wængonguï ingante minitö beyæ ante botö cöwë apænebopa. ¹¹ Wængonguï Önowoca beyæ apænebo ëñëninque minitö tæi piñænte ewocacæminimpa, ante cæcæte ante botö minitö weca ëñacæboimpa, ante wæbopa. ¹² Edæ minitö botö wede pönëno beyæ wampo pönente bayömini botö wæætë, Minitö wede pönëminipa, ante adinque adobaï wampo pönëmo iinque mönö pönencabo godongämæ wampo pönëninque godömenque tæi piñænte entawengæimpa, ante pönëninque botö minitö iminute ainente wæbopa.

¹³ Botö wabæca quëwënäni weca gote apænebo ëñëninque pancadäniya wede pönënanäni badänitapa. Iinque, Botö minitö weca gote apæneyömo wadäni pancadäniya adobaï wede pönencædänimpa, ante cædinque botö æpogamë incæ poncæ cæyömo edæ wææ cæte intapa. Iinque botö, Tæmpo poncæ cætabopa, ante yewæmömo

ate eñencæminimpa, ante yewæmömopa. ¹⁴ Edæ guidiegoidi incæ wadäni incæ, ocai encadäni incæ ocai ömæcadäni incæ ædänimë iñönänite botö debe inte bai edæ tömänäni inänite odömönte apænequënemo inömo imopa. ¹⁵ Mänömaï beyæ minitö Odömä iñömö quëwëmini iñömönte botö minitö iminite adobaï mönö Codito ingantedö ante watapæ apæneçæte ante nanguï çæinente wæbopa.

Mönö tæi piñænte ewocadö Codito beyænque impa, ante

¹⁶ Mönitö oodeomöni iñömönte täno apænedinque Wængonguï iñömö minitö oodeoidi inämaï iñömönte ayæ adobaï apænedinque, Minitö wede pönëmini adinque Codito waa pöni pönö ængä beyænque quëwencæminimpa, ante tæi piñænte çægacäimpa. Ininque mäninö Codito ingantedö ante botö iñömö watapæ apænedinque, Wængonguï tæi piñænte nänö çægaïnö impa, ante pönente wædinque edæ guiñënedämaï inte do apænebopa. ¹⁷ Mönö wede pönëmö iñömönte Wængonguï mänine ante odömönte watapæ apæneçä beyænque mönö nö çæte quëwëmö bagamöimpa. Mänine beyænque godömenque wede pönente badinque mönö wede pönënö beyænque quëwëmopa. Ininque docä iñömö Wængonguï beyæ yewæmöninque, “Në nö çæte quëwëngä incæ tömengä nänö wede pönënö beyænque quëwencæcäimpa,” ante nänö yewæmongainö bai edæ do batimpa.

Mönö waocabo wentamö mongænte wæmompä, ante

¹⁸ Në wiwa çädäni guiquënë wiwa nani çädö beyænque wadäni edæ Wængonguï nö pöni nänö apænegainö ante ædö çæte eñenguinänii. Ininque Wængonguï ingante në wiwa çädäni nani eñënämaï ininö ante godö piñinque tömengä öönæde ongöinque wiwa nani çädinö beyænque do pangä wädäni edonque amopa. ¹⁹ Wængonguï, Botö æbodö imoo, ante tömämüni edonque pöni eñencæminimpa, ante çædinque tömämö imönte odömöninque tömënäni inänite adobaï edonque pöni odömongä wægadänimpa. ²⁰ Wëenënedë pöni në quëwengainäni tönö ñowo ganca quëwëmö adobaï, Wængonguï mönö në adämaï inongä inte æbänö quëwengä, ante eñencæte ante wægaimö inömö inte mönö tömengä nänö badongaincooque adinque edæ edonque pöni acäimpa. Edæ, Tömengä ñimpo çädämaï inte cöwë në tæi piñængä ingampa, ante ayæ, Në Wængonguï inongä ingampa, ante wædinque mönö waocabo edonque aquënëmö imopa. Inämpa eñënämaï intabopa, ante ædö çæte anguii.

²¹ Wængonguï ingante do ate bai ingainäni incæte waodäni tömengä ingante edæ, Bitö Wængonguï ñäö emönömi imipa, ante edæ änämaï inönänimpa. Wængonguï ingante waa ate pönente apænedämaï inönänimpa. Mänömaï ocai ömæcadäni bai mïmö ömædänäni bai badinque tömënäni wentamö entawänäni bagadänimpa. ²² Ocai encamöni imönipa, ante änäni incæte tömënäni wæætë mänömaï çædinque ocai ömæcadäni bagadänimpa. ²³ Edæ Wængonguï wænämaï në Quëwengaingä iñongante tömënäni wæætë godö Baa angadänimpa. Tömengä nänö ñäö emönö ante piinte çædinque tömënäni wæætë waomö në wæwocamö mönö emönö bai badöinque, öömä eñädäni nani emönö bai badöinque, ocaguï eñädäni nani emönö bai badöinque, ocaguï ömaadäni nani emönö bai badöinque tömënäni, Mönitö wængonguï ingampa, ante çädönänimpa.

²⁴ Mänömaï çädäni ate wædinque Wængonguï, Minitö mïni çæinente wædö ante ee abo çæcæminimpa, ante da godongä wædæ godinque tömënäni baonga nani ñömæi mongænte quëwenguinque çädönänimpa. Ininque nana gæncaya nana gæncaya nani monguënönö ante Baa ante guiñënadämaï inte çædinque wacä ingä wacä ingä godö wiwa çädönänimpa. ²⁵ Wængonguï näwangä pöni nänö apænegainö ante tömënäni Baa äninque mä pönëninque nani babæ apænegainonque ante Ao änönänimpa. Mänömaï çädönäni inte tömënäni wæætë Wængonguï nänö në badongaincoo weca ædæ wææninque, Mönitö wængonguï impa, ante çædinque në Badongaingä ingante edæ emö çæte wædæ gogadänimpa. Incæte tömengä në Badongaingä iñongante mönö waocabo inguipoga mönö quëwënedë ayæ ate münguipo bayonte wantæpiyæ mönö quëwënedë

Wængonguī ingante, Bitō tōmēmi toquinque pōnō waa cæbi æmōnīpa, ante mōnō apænecæīmpa. Mänōmaī impa, ante Amēē, āmopa.

²⁶ Mänōmaī cæyōnānite Wængonguī, Minitō guīñēñadāmaī mīni toīnente wædonque gobæwedāni, ante da godongā gogadānīmpa. Īnīnque onquiyænāni incæ, Nē onquiyæmo inōmo inte botō onguīñængā tōnō monguēnēmo īmopa, ante ānāmaī ināni inte godō wacā onquiyængā tōnō towente mōwēnōnānīmpa. ²⁷ Ayæ onguīñænāni incæ adobaī cædinque, Botō onguīñæmo inōmo inte onquiyængā tōnō monguēnēmo īmopa, ānāmaī ināni inte godō wacā onguīñængā tōnō mōīnente gonga bæco baī toīnente wædāni bagadānīmpa. Īnīnque cōwē nāni waa quēwenguēnēnō ante Baa ānīnque nāni onguīñæncabo inōnāni inte wīwa cædōnānīmpa. Mänōmaī cæyōnānite Wængonguī eyepæ pōnī godō pangā wædinque tōmēnāni wīwa nāni cædō beyænque nāmā baonga caate wæwengadānīmpa.

²⁸ Wængonguī ingante mōnō pōnente ēñengæīmpa, ante tōmēnāni, Ōnonquedō ante impa, ante tedeyōnānite Wængonguī wæætē, Ocaidē wentamō encadōmīni inte edæ waomīni mīni wīi cæquēnēnō incæ ee abo cæbæwedāni, ante da godongā gogadānīmpa.

²⁹ Tōmēnāni īñōmō nō cæquīnāmaī ināni inte do wīwa cædānique badīnque īmaī cædānīpa. Wacā ingā godō towēnīnque tōmēnāni wadāni inānite nē wēnæ wēnæ cædānique inānīpa. Māincoo ante æīnente wæwēnāni inte tōmēnāni, Wacā gomonga ængā ingante godō pīinte adānīpa. Ayæ edæ, Mōnō godō wænongæīmpa, ante cædinque do cædānīpa. Guēadō guēa pīinte cædānīpa. Wacā oda cæcæcāīmpa, ante ancaa cædinque tōmēnāni godō babæ cædānīpa. Ayæ nē wīwa pōnēwēnāni inte tōmēnāni, Wadāni wæcædānīmpa, ante godō pīinte cædānīpa. Godō wæntaa godō wæntaa tedewēnāni inānīpa. ³⁰ Ayæ wadāni inānite pīīnīnque īnāni īñōmō godō babæ ante tedewēnāni inānīpa. Wængonguī ingante pīinte cædāni inānīpa. Ayæ, Tōmēmoque waēmō īmopa, ante nāmā ængō cæte baī cædinque wadāni inānite wææntodonte baī ānīnque, Ōnonquedō cæcantedō abīi, ante godō pīinte todāni inānīpa. Edæ, Æbānō godōmenque wēnæ wēnæ cæte toquīmoo, ante edæ pōnēē cōnīnque edæ nanguī cædānīpa. Mæmpocā tōnō badā, Cæedāni, āñōnate tōmēnāni ēñēnāmaī cædānīpa. ³¹ Mīmō ōmædēnāni inte tōmēnāni ocai ōmæcadāni bagadānīmpa. Cæcæboīmpa, ānīnque edæ īīnque cædāmaī inōnānīmpa. Wacā caate wæcā adīnque godō waadedāmaī inōnāni inte tōmēnāni edæ godōmenque pīīnāni inte cædōnānīmpa.

³² Mänōmaī cædāni īñōmō nāni wængūinque cædānīpa, ante Wængonguī nō pōnī nānō angāinō ante tōmēnāni ōnōmoncaque nē ēñēnāni inte tōmēnāni nāni wēnæ wēnæ cæīnēnonque ante cædānīpa. Ayæ tōmēnāni wīwa nāni cædō baī wadāni adobaī cædāni adīnque tōmēnāni, Waa cæmīnīpa, ānīnque nē cædāni inānite waa adānīpa.

2

Nōīngā ante Wængonguī apænte angampa, ante

¹ Tōmēnāni mänōmaī cædānīpa. Incæte bitō adobaī wīwa cædōmi inte tōmēmi pante wæquinque tōmēnāni inānite apænte āmīpa. Īnīnque bitō wacā ingante, Bitō pante wæquinque wīwa cæbīpa, ante apænte āmi inte bitō īñæmpa adobaī wīwa cædōmi inte edæ æbānō cæte nāmā ante wææ angūīmīi. ² Wīwa cædāni inānite apænte ānīnque Wængonguī cōwē nōīngā ante apænte angampa, ante edæ do ēñēmōmpa. ³ Īnīnque waobi ōnōmīque inōmi inte bitō īñæmpa tōmēnāni inānite apænte āmi incæte tōmēnāni nāni cædō baī adobaī cædōmi inte edæ, Wængonguī botō īmote pānāmaī inte ata cæpocæcāīmpa, ante pōnēmitawo. ⁴ Bitō wīwa cæbi inte Ca ca wæquēnēmi īñōmīte Wængonguī wæætē ee pānāmaī inte nanguī waadete pōnō cæyongante bitō wæætē edæ pīīnīnque Baa āmitawo. Īñæmpa tōmengā, Bitō, Æmæwo wēnæ wēnæ cætabopa, ante wædinque botō gāmænō poncæbīīmpa, ante Wængonguī pōnō waadete cæcampa, ante pōnēmiyaa.

⁵ Incæte bitō mīmō ōmædēmi inte ancaa Baa ānīnque edæ wēnæ wēnæ bitō cædō ante nīmpo cædāmaī īñōmīte Wængonguī nānō ænguī baquīōnæ īīnque bayonte tōmengā

ænguī pōni badinque godōmenque pangā wæcæbiimpa. Tömengā æbänö nö apænte angää, ante mǎniñedē ate edæ edonque acæimpa. ⁶ Edæ, Tömämö mönō cægāi ganca ante Wængonguī eyepæ pōni pædæ pōnongā æncæmōimpa, ante dodāni nāni yewæmongainö bai edæ iinque bacæimpa.

⁷ Iinque, Mönō ñäö bai entawengæimpa, ante cædinque ayæ, Wængonguī mönō imonte waa adinque pōnō cæcā ate mönō wæwocadāmai ewocacæimpa, ante cædinque mönō wæntædāmai inte ee waa cæte quëwëmō iinque Wængonguī pōnō cæcā ate mönō cōwë wænāmai quëwëmaimompa. ⁸ Wæætë, Wængonguī nāwangā nänö apænedö ante Baa äninque, Tömëmo beyænque quëwencæboimpa, ante nē äñāni inänite ayæ wadāni wīwa nāni cæquīnonque ante nē tee empote godāni inänite Wængonguī ænguī badinque godō pīinte cæcæcäimpa. ⁹ Edæ mönō waocabo wënæ wënæ cæmō adinque Wængonguī oodeomōni iñömōnite tāno pāninque oodeomīni ināmai imīni imīnite adobai pāñongā nē wënæ wënæ cæmō tömämö iñömö edæ caate wæwencæmōimpa. ¹⁰ Wæætë waa cæmō adinque Wængonguī oodeomōni imōnite tāno pōnō waadete cædinque oodeomīni ināmai imīni imīnite adobai pōnō waadete cæyongā nē waa cæmō wæætë gänë entawëninque ñäö apāite bai entawëñömönte edæ Wængonguī tömämö imonte waa acæcäimpa.

¹¹ Edæ mönitö oodeomōni imōni incæ mīnitö oodeomīni ināmai imīni incæ Wængonguī tömämö imonte adoyömö pōni adinque wadö wadö ate pōnente cædāmai ingampa. ¹² Möitee wodi, Iīmai cædāni, ante nänö wææ angainö ante ömæmoncadāni inte wīwa cædāni iinque tömengā nänö wææ angainö dæ ante bai mǎniñāni wæncædānimpa. Wæætë Möitee wodi nänö wææ angainö ante do ëñente ëmoncadāni incæte wīwa cædāni adinque Wængonguī mǎniñe ante ëñëñāmai cædāni beyænque apænte äninque pangā wæcædānimpa. ¹³ Edæ Möitee wodi nänö wææ angainö ante önömoncaque ëñëñāni inte tömënāni nāni önömoncaque ëñëñö beyænque Wængonguī ayongā dicæ nö cædāni badāniyaa.

Wæætë edæ mǎniñe ante ëñente cædāni inänite guiquënë Wængonguī pōnō angā ate tömënāni iñömö nö cædāni bacædānimpa. ¹⁴ Edæ Möitee wodi nänö wææ angainö ante ömæmoncadāni inte oodeoidi ināmai ināni incæ pancadāniya tömënāni dodāni nāni wææ angainonque ante Ao ante cædinque Wængonguī nänö wææ angainö bai edæ do cædānipa. Mǎnōmai ëñente bai cædinque tömënāni mīmō entawënāni inte mǎniñe ante ömæmoncadāni ināni incæte nāmā nāni wææ änonque ëñente cædānipa. ¹⁵ Edæ, Tömënāni dodāni nāni wææ angainö ëñëninque waa cædāni inte tömënāni Wængonguī nänö wææ angainö bai do entawënānipa, ante edonque acæimpa. Mīmō entawënāni inte tömënāni nāni caboque godongāmæ pōnëninque wënæ wënæ nāni cædönö ante nǎëmæ apænte wææ äñānipa. Ayæ wæætë waa cædāni ate tömënāni nǎëmæ apænte ñimpo cædānipa.

¹⁶ Codito ingantedö ante watapæ ëñengaimo inte botö iīmai ante apænebopa. Wængonguī angā ëñente cædinque Itota Codito wæætë waomö mönō awëmö entawënö ante edonque pōni adinque apænte ancæcäimpa. Tömengā nänö apænte anguiönæ iinque bayedë edæ mǎniñö ante botö yewæmōnte apænedö bai edæ iinque bacæimpa.

Möitee nänö wææ angainta adinque oodeoidi wīi ëñëñāni

¹⁷ Bitö iñömö edæ, Oodeobo inōmo imopa, ante ämipa. Ayæ, Möitee wodi nänö wææ angainta nē ëñëmo inte botö Wængonguī ayongante waa quëwëmō imopa, ante edæ nāmā ængö cædinque ämipa. ¹⁸ Wængonguī æbänö angää, ante do ëñëmipa. Ayæ tömengā nänö wææ angainö ante do ëñëmi inte bitö, Quñö waa i, ante do ëñëninque Ao ante ämipa. ¹⁹ Bitö, Wadāni babetamö bai ewocayönānite botö töö æmænte mäobo godānipa. Wëmō iñömö quëwente bai adāmai iñönānite botö iñömö, Acæmīnimpa, ante tica ënente bai odömōnte apænebopa, ante edæ, Nāwangā ämopa, ante bitö apænebitawo. ²⁰ Ayæ adobai, Mönō Möitee wodi nänö wææ angainö ante ëñente beyænque mönō ëñenguënënö ante entawëninque mönō nö cæquënënö ante adobai tömännö ante entawengæimpa, ante bitö pōnëmitawo. Ayæ mǎnōmainö ante bitö pōnënö

beyæ bitö, Nē oda cædāni inānite botö nē töingä odömömo imopa, ante pönēmitawo. Wēñænāni bai wædænque ēñēnāni iñōnānite botö nē odömōnte apænebo imopa, ante pönēmitawo.

²¹ Iñæmpa mänōmaï inōmi inte bitö edæ dicæ nämä odömōnte apænete ēñēmitawogaa. Wadāni inānite odömōnte apænedinque, Awēmō ænāmaï iedāni, ante odömōnte apænedōmi inte tömēmi awēmō æmitawo. ²² Bitö wadāni inānite odömōnte apænedinque, Nänōogængä ināmaï iñongante godö guëa mönāmaï ië, ante nē wææ ämi inte bitö adobaï wacä tönö guëa mömitawoo. Ayæ, Wængonguï ingampa, ante nāni badōinca ante nē püimi inte bitö edæ tömēnāni nāni apæneincōnē go guidinque edæ ö æmitawoo. ²³ Iñæmpa bitö, Möitee wodi nänö wææ angainö ante botö ēñente cæbo imopa, ante tedinque nämä ængö cædōmi inte edæ mänine ante ēñēnāmaï cæbi adinque wadāni wæætē Wængonguï ingante waa adāmaï inānīpa tōö. ²⁴ Edæ, “Minitö cædinö beyæ oodeoidi ināmaï ināni incæ Wængonguï emōwo ante godö babæ ante wēnæ wēnæ anewēnānīpa,” ante tömengä beyæ dodāni nāni yewæmongainö bai do batimpa.

²⁵ Edæ Wængonguï nänö wææ angainö ante ēñente cæbi ininque bitö, Nāwä oodeobo imopa, ante nē eö togæimi badinque waa imaimpa. Wæætē edæ ēñēnāmaï cæbi ininque oodeo ināmaï ingä bagäacä ingä bai bitö iñömö edæ do babaïmīpa. ²⁶ Oodeoidi ināmaï ināni guiquēnē bagäadāni ināni incæte tömēnāni Wængonguï nänö wææ angainö ante ēñente cædāni ininque Wængonguï ayongä tömēnāni do eö togæināni bai inōnāni inte oodeoidi bai inānīpa. ²⁷ Bitö iñömö Möitee wodi nänö wææ yewæmongainta mänimi inte nē eö togæimi imitawo. Bitö mänōmaï imi incæte ēñēnāmaï cæbi iñōmi wacä wæætē bagäacä inongä inte ēñente cæcä ininque tömengä ēñente nänö cædö beyænque Wængonguï wæætē bitö imite apænte äninque pancæcäimpa.

²⁸ Iñæmpa oodeo ēñagaingä inte baö beyænque oodeocä ingä incæte tömengä wii mänōmaï ingä beyænque nāwä oodeocä ingampa. Adobaï nē eö togæingä iñömö baonque nänö eö togæinö beyænque tömengä Wængonguï ayongä ædæmō eö togæingä bai wii ingampa. ²⁹ Wængonguï Önōwoca ingante nē ewocacä guiquēnē tömengä iñömö edæ nāwä oodeo bai badinque Wængonguï wēñængä ingampa. Edæ Möitee wodi nänö wææ yewæmongainö ante ēñente eö togæinque waocä tömengä wentamö nänö entawēnō dicæ wido cæquingä. Wængonguï Önōwoca guiquēnē pönö wido cæcä beyænque waocä wæætē waemö entawengampa. Mänōmaï entawengä ingante wadāni waa adāmaï ināni incæte Wængonguï wæætē, Bitö waa entawēmi abopa, äninque tömengä ingante waa apænecampa.

3

¹ Ininque oodeocä iñömö edæ, Oodeobo imopa, ante toquēnengä ingantawo. Ayæ adobaï, Botö eö togæimo imopa, ante toquēnengä ingantawo. ² Ao ämopa. Nē oodeoidi inōnāni inte tömēnāni cōwē nanguï toquēnēnāni inānīpa. Edæ Wængonguï apænecä ēñengaināni inte edæ oodeoidi tömengä nänö apænedö ante nē mangaināni inte nē toquēnēnāni inānīpa. ³ Mänōmaï i incæte pancadāniya iñömö edæ wede pönēnāmaï inānīpa. Ininque mönō æbānō anguii. Tömēnāni nāni pönēnāmaï inö beyænque Wængonguï tömēnāni inānite dicæ ñimpo cædinque ædæmō aadāmaï ingantawogaa. ⁴ Ædö cæte mänōmaï inguii. Mönō waocabo tömāmō nē babæ apænemō iñömōnte Wængonguï iñömö nö pōni cæcä ingainö anguēnē. Edæ tömengä beyæ iimāi ante yewæmongatimpa.

“Wængonguï bitö æbānō apænebii, ante apænte ancæ cædāni incæte tömēnāni, Wængonguï nö pōni ante apænecampa, ante edonque acædānīpa.

Bitö nē tæi emōmi inte edæ bitö imite nē apænte ancæ cædāni inānite nāēmæ edæ wææntodonte bai cædinque edæ gānā cæcæbiimpa.”

Ante nāni yewæmongainö bai edæ bacæimpa.

⁵ Waodāni mä pönēninque iimāi ante tedewēnānīpa. Mōnitö wiwa cæyömōnīte Wængonguï nö cæcä adinque wadāni, Wængonguinque nē nö cædongä ingampa, ante

godömenque edonque acädänimpa. Īninqe wīwa cæyömönite Wængonguī quīnante pīinte pangää, ante tedewänänipa. Mänömaī tedewänäni adinqe mönō wæætē æbänō anguënēmō ĩmōō. Īñæmpa waodänique nāni ānewenō baī dicæ anguënēmō ĩmongaa. ⁶ Ædō cæte mänömaī ānewenguīī. Mäninō nāni tedewenō nāwangā ĩ baī inguipoga quēwēmō ĩmonte Wængonguī apænte ānāmaī inguēnengā.

⁷ Wadāni guiquēnē ĩmaī ante tedewänänipa. Wængonguī cōwē nāwangā ante apæneyongante botō babæ apænebo adinqe wadāni, Wængonguinque nāwangā ante apænecampa, ante tōmengā ingante godömenque waa acädänimpa. Īninqe babæ botō apænedō beyænque Wængonguī godömenque nāō apāite baī ĩmongā ingampa. Īninqe, Bitō nē wænæ wænæ cæbi ĩmipa, ante Wængonguī quīnante botō ĩmote apænte angää, ante tedewänänipa. ⁸ Tömēnāni, Wængonguī ingante godömenque waa acädänimpa, ante mönō godömenque wænæ wænæ cæcæimpa, ante tedewänänipa. Tömēnāni nāni tedewenō nāwangā ĩ baī mönitō adobaī ante ancädömönimpa. Edæ, Tömēnāni nāni tedewenō baī edæ Pabodoidi adobaī ante apænedänipa, ante pancadāniya pönō wænæ wænæ ante babæ apænedänipa. Mänömaī ante nē apænewenāni ĩnānite pāninqe Wængonguī nō cæte pangampa.

Tömämō mönō pante wæquinqe wentamō mongæmompā

⁹ Īninqe æbänō ante anguīī. Mīnitō oodeoidi ĩnāmaī önömīnique ĩñömīnite mönitō möni oodeocabo dicæ godömenque waa pönī ĩmöniyaa. Īñæmpa mönitō oodeomōni incæ mīnitō oodeomīni ĩnāmaī ĩmīni incæ tōmämō nē wænæ wænæ cædömō ĩmompā, ante do odömōnte yewæmömōni abāimīnipa. ¹⁰ Edæ ĩmaī ante Wængonguī beyæ ante ämotamīni ante baī yewæmongatimpa.

“Nē nō cædongā ĩñömō edæ dæ angampa.

Adocanque incæ edæ dæ angampa.

¹¹ Nē ĩñente pönengā ĩñömō edæ dæ angampa.

Wængonguī ingante ante nē diqui diqui mīnongā ĩñömō edæ dæ angampa.

¹² Tömänāni edæ oda cæte wapiticæ godinque,

nāni waa cædāmaī incaboque badānitapa.

Nē waa cædongā ĩñömō edæ dæ angampa.

Adocanque incæ edæ dæ angampa.

¹³ Waodāni ĩnānite wænōncæte ante ææ ænete baī ĩmencadinque,

tömänāni babæ ante enguēnēwate tedewänänipa.

Edæ tæntæ tōmēmæ ĩnete baī, Wænongæimpa, ante ĩnedänipa.

¹⁴ Tömēnāni pīinte nāni tedewenō beyænque moncapæ tī nā baī enguēnēwadänipa.

¹⁵ Tömēnāni wænonguīwaque pogodo goquīwaque ĩwadänipa.

¹⁶ Tömēnāni nē godō wænönāni ĩnte māincoo wido cæte wodii godāni ate edæ mīī quēwänāni ponte adinqe caate baī wæwänänipa.

¹⁷ Nē pīinte cædönāni ĩnte tōmēnāni Wængonguī taadō tōmengā gänē entawente nänō godönō ante adāmaī ĩnte cædänipa.

¹⁸ Tömēnāni, Wængonguī ingante mönō guīñente ĩñengæimpa, ante pönēnāmaī ĩnānipa.”

Ante dodāni nāni yewæmongainō baī ĩmpā.

¹⁹ Æcänō Möitee wodi nänō wææ angainō ante nē ĩñente quēwenguēnēna ĩnaa tōmengā beyænque ante wææ yewæmongatimpa. Mänömaī ĩ beyæ, Botō eyepæ cæbo ĩmopa, ante mönō ædō cæte anguīī. Edæ guīñēnete mönō pæ wēnecæimpa. Ayæ inguipoga tōmāo quēwēmō tōmämō Wængonguī nē apænte angā weca ongöninqe edæ, Æbänō cætaboo, ante Wængonguī ingante mönō edonque apænequēnēmō ĩmompā. Mänömaīnō ante edæ do ĩñēmompā. ²⁰ Mänömaī beyæ Wængonguī, Möitee wodi nänō wææ angainō ædämō ĩñente cæbi beyæ bitō botō ayōmo nē nō cæbi babipa, ante adocanque ingante edæ ānāmaī incæcäimpa. Wæætē mānīne nänō wææ angainō ĩñente beyæ mönō, Nē wænæ wænæ cæmō ĩmompā, ante edonque amompā.

Mönö wede pönönö beyænque nö cæte quëwëmompä, ante

²¹ Wïi Möïtee wodi nänö wææ angainö ante ëñëmini beyæ wæætë edæ Wængongui incæ pönö badongä beyænque mönö tömengä ayongä nö cæmö bamompä, ante ñöwo pönï odömongatimpä. Dodäni Möïtee wodi tönö Wængongui beyæ në apænegaïnäni iñömö, Ìncayæ ate mänömaï bacæimpä, ante do yewæmongadänimpä. ²² Wængongui pönö badongä ate mönö në wede pönëmö iñömö Itota Codito ingante mönö wede pönönö beyænque edæ tömämö tömengä ayongä nö cæmö bamompä. Edæ mönö adoyömö ingaimö inte önömonque imompä. ²³ Ìninqe mönö tömämö wënæ wënæ cæmö inte Wængongui nänö ñäö bai quëwëñömö guiicæte ante cædinque wïi eyepæ cæmö inte wïi guiimompä. ²⁴ Incæte Itota Codito ængä beyænque abæ tawænte gote bai quëwëmö iñömönte Wængongui önonque änämaï inte waadete pönö badongä ate mönö tömengä ayongä nö cæmö bamompä. ²⁵ Wængongui iñömö Itota Codito ingante da pönöninge, Tömengä mïnitö wënæ wënæ cædü ante teëmente wængä beyænque botö wæætë piyænë cædinque mïnitö iminite pänämaï incæboimpä, ante cægacäimpä. Ìninqe tömengä, Mänömaï pönö cæbo ate mïnitö, Itota wepæ mönö beyæ pe tæ pe tæ wæænimpä, ante wede pönëninge wede mïni pönönö beyænque quëwencæmïnimpä, ante pönö cægacäimpä.

Mänömaï cædinque Wængongui wëenëñedë mönö waocabo mönö wënæ wënæ cægäinö ante ee adinqe në pänämaï ingaingä incæte edæ, Botö cöwë nöingä ante apænte änömo imopa, ante ëñencæmïnimpä, ante odömongacäimpä. ²⁶ Ìninqe, Wængongui në nö cæcä inongä ingampa, ante mönö acæimpä. Ayæ adobaï, Itota ingante në pönëmö iñömönte Wængongui në panguënegä ingä incæ mönö imonte ata cæpodinqe pönö badongä ate mönö wæætë tömengä ayongä edæ në nö cæmö bamompä, ante mönö acæimpä. Ìninqe tömengä mänömaï cædinque tömengä nö nänö cædü ante odömoncæte ante ñöwo cægacäimpä.

²⁷ Ìninqe mönö waocabo iñömö nämä ængö cæte bai cædinque mönö, Nämä cædinque nö cæmö bamompä, ante ædü cæte anguimöö. Ìñæmpä mänömaï äninque cædümaï ingæimpä. Quinante nämä wïi ængö cæquiï, ante wæmïnitawo. Möïtee wodi nänö wææ angainö ædæmö ëñente cæmö inte bai mönö, Tömëmö cætamompä, ancædömöimpä. Incæte ædæmö ëñente dicæ cæmongaa. Wæætë tömengä ingante wede mönö pönönö beyænque tömengä ayongä nö cædümö bamompä, ante adinqe mönö, Tömëmö cætamompä, ante ædü cæte anguïi. ²⁸ Ìñæmpä waocä Wængongui nänö wææ angainö ante ëñente cæcä incæ wïi tömengä nänö ëñente cædü beyæ në nö cæcä bacampa. Wæætë wede nänö pönönö beyænque Wængongui ayongä edæ në nö cæcä bacampa, ante do edæ apænebo ëñëmaïmïnimpä.

²⁹ Oodeomöni iñömönite Wængongui mönitö Wængongui inongä ingampa. Oodeomïni inämaï imïni guiquënë, Wïi mönitö Wængongui ingampa, ante pönëmïnitawo. Ìñæmpä oodeomïni inämaï iñömïnite adocä Wængongui mïnitö Wængongui ingampa.

³⁰ Edæ adocanque Wængongui inongä ingampa. Ìninqe në ëö togäimöni imöni möni wede pönönö beyænque tömengä pönö badongä ate tömengä ayongä edæ nö cæmöni bamönipa. Adobaï bagäamïni mïni wede pönönö beyænque Wængongui adocanque inongä inte pönö badongä ate mïnitö adobaï tömengä ayongä nö cæmïni bamïnipa.

³¹ Mönö pönönö beyænque impä, ante apænëdinque mönitö Wængongui nänö wææ angainö ante dicæ wëä godonte bai cæmöniyaa. Wïi mänömaï cæmöni. Wæætë mänömaïnö ante apænëdinque tömengä nänö wææ angainö ante Ao äninque mönitö, Ëñëedäni, ante odömonte apænëmönipa.

4

Abadäo wodi æbänö cægacäi, ante pönengæimpä

¹ Mäninö ante mönitö mämmæ Abadäo wodi iñömö æbänö ante ëñengacäi, ante mönö ñöwo pönente apænecæimpä. ² Abadäo wodi në ëñente cæcä ingaingä incæte tömengä nänö ëñente cædü beyænque dicæ nö pönï entawengä bacantawogaa. Mänömaï

cædinqwe nõ cæcä bagacäimpa, ante näwangä i bai tömengä waodäni eññönänite, Waa cæbo imopa, ante do ancægacäimpa. Incæte tömengä Wængongui eññongante mäninö ante cöwë änämaï inguënegä ingacäimpa. ³ Wængongui æbänö ante apænegä eññente yewæmongadäni, ante aminii. Edæ iïmaï ante apænegä eññente yewæmongadänimpa. “Wængongui nöingä ante apænegacampa, ante Abadäo wede pönengacäimpa. Ininque tömengä wede nänö pönëno beyænque Wængongui wæætë edæ, Botö ayömo Abadäo në nõ entawengä ingä abopa, angacäimpa,” ante yewæmongadänimpa.

⁴ Edæ wadäni beyæ waocä nanguï cæcä ate tömënanï debe badänï inte edæ, Önonque pönömöni æe, ante ædö cæte anguïnänii. Iñæmpa wiï önonque godonte impa. Wæætë tömengä nänö nanguï cædinö beyænque paga ante në godonguënenäni inte awëneidi, Bitö nanguï cæbitapa, ante godönäni ængampa. ⁵ Wængongui guiquënë önonque pönö cæcä æmöimpa. Waocä wiwa cæcä incæ wede pönengä adinqwe Wængongui pönö badongä ate tömengä Wængongui ayongante wæætë nõ cæcä bacampa. Ininque waocä waa cædämaï incæ edæ wede pönengä adinqwe Wængongui wæætë tömengä ingante pönö badöninque, Nö pönï bitö entawenguinque bitö wede pönëmi abopa, angampa. ⁶ Waocä waa cædämaï iñongante Wængongui pönö badongä ate tömengä Wængongui ayongä nõ pönï entawengä ininque tömengä watapæ quëwencæcäimpa, ante apænedinque Dabii wodi adobaï ämotamini ante bai yewæmongacäimpa.

⁷ Adocä yewæmöninque,

“Waadäni eññänämaï cædäni inänite Wængongui pönö ñimpo cæcä ate tömënanï wæætë watapæ quëwencædänimpa.

Edæ tömënanï eññänämaï nänï cædö ante ö ænte mäo tee moncate bai cæcä adinqwe nanguï tocædänimpa.

⁸ Æcänö ingante Wængongui, Bitö pante wæquinque wënæ wënæ cæbipa, ante cöwë püinte änämaï ingä ininque mäningä waocä wæætë nanguï tocæcäimpa.”

⁹ Ante Awënë Dabii wodi, Eö togæninänique tocædänimpa, ante dicæ yewæmongantawogaa. Bagäadäni adobaï tocædänimpa, ante ancæte ante yewæmongacäimpa. Abadäo wodi Wængongui ingante wede nänö pönëno beyænque Wængongui, Botö ayömo Abadäo në nõ entawengä ingä abopa, angacäimpa. Mänömainö ante edæ botö do yewæmömo abaiminipa. ¹⁰ Abadäo wodi æbänö engæñongante Wængongui mänömaï angacäi. Dicæ eö togæningä iñongante angantawogaa. Wæætë bagäacä iñongante angacäimpa. ¹¹ Ininque, Abadäo bagäacä inte wede pönengä beyænque botö pönö badömo ate nõ cæcä bacampa, ante eññencædänimpa, ante cædinqwe Wængongui angä eö togænte bagacäimpa.

Mänömaï cæcä beyæ mïnitö bagäamini inte wede pönëmini iñömïni Abadäo wodi mïnitö wæmængä bai bagacäimpa. Abadäo wodi päimïni bai wede pönëmini adinqwe Wængongui adobaï, Nö entawëmini bamini acæboimpa, ante pönö badongacäimpa. ¹² Mönitö wæmæ Abadäo wodi doyedë bagäacä ingäñedë incæ wede pönengä ingacäimpa. Möni idægocabo iñömö në eö togæimöni inte edæ tömengä wede pönente nänö cægongainö adodö tee empote gomönipa. Ininque mäninönö möni wede pönente godönö gomöni beyænque möni eö togæncabo wæmængä adocä Abadäo wodi ingacäimpa.

Mönö wede pönëno beyænque Wængongui nänö angainö ante cæcampa, ante

¹³ Wængongui, Inguipoga incæ bitö në ænguimi incæbiimpa, äninque Abadäo wodi tönö tömengä nänömoidi inänite pönö angä ængadänimpa. Mänömainö äninque Wængongui dicæ, Botö wææ angainö ante eññente cædänique æncædänimpa, ante angantawogaa. Wæætë edæ wede pönente tömengä ayongä nõ entawënanï badäni beyænque Wængongui, Inguipoga incæ pönömo æncæminimpa, ante apænegacäimpa.

¹⁴ Wængongui dicæ, Botö wææ angainö eññente në cædänique në ænguïnäni inänipa, ante angantawogaa. Edæ mänömainö angä bai mönö wede pönëno ante önonque pönencædömöimpa. Tömengä nänö angainö incæ wo ewente bai bacædönimpa. ¹⁵ Edæ

mäninö tömengä nänö wææ angainö ante ëñënamai cædäni beyænque Wængongui ængui badinque pangampa. Wæætë wææ änämai inte bai Wængongui, Botö wææ angainö ante ëñënamai cæbipa, ante ædö cæte anguingää. Edæ dæ ancædönimpa.

¹⁶ Mänömai beyæ Wængongui, Botö waadete pönö cædö beyænque æminipa, ante edonque acæimpa, ante cædinque Abadäo wodi wede nänö pönëno beyænque ante, Pönömo æncæminimpa, angacäimpa. Mönitö Möitee wodi nänö wææ angainö ante në ëñëmöni iñömönite wii adomönique imönite angacäimpa. Wæætë Abadäo wodi nänö wede pönengai bai adobai wede pönëmö iñömönte mönö tömämö imonte Wængongui, Cöwë pönömo æncæminimpa, angacäimpa. Edæ mönö wede pönencabo iñömönte Abadäo wodi tömämö wæmængä bai ingacäimpa. ¹⁷ Wængongui edæ do wængainäni inänite pönö cæcä ate tömënäni iñömö nïäni ömæmönte edæ miinäni quëwënanipa. Dæ angaincoo incæ tömengä do badongä ate edæ a ongoncoopa. Wængongui mänömai në badongä iñongante Abadäo wodi tömengä ingante në wede pönengä ingacäimpa. İninqe Wængongui, “Abadäo ëñëmi. Botö pönö badömo ate bitö päinäni yebëninque wacabodäni nani cabo wacabodäni nani cabo nangui inäni iñönänite edæ bitö adobique tömënäni wæmæmi incæbiimpa.” Ante Wængongui beyæ ante yewæmongatimpa. İninqe Wængongui ayongante mönö wede pönëmö iñömönte Abadäo wodi mönö wæmængä bagacäimpa.

¹⁸ Tömengä ingante, “Bitö päinäni edæ mänimpodäni bacædänimpa,” ante Wængongui do angacäimpa. Mänömainö angä ëñëninque, Ædö cæte baquii, ante wædongä incæ Abadäo wodi, Wængongui cöwë cæcä beyæ watapæ bacæimpa, ante wede pönengä ingacäimpa. İninqe tömengä wede nänö pönëno beyænque “wacabodäni nani cabo wacabodäni nani cabo nangui inäni bayönänite tömënäni wæmængä” Abadäo bagacäimpa.

¹⁹ Tömengä, Botö picængadebo wodo tiëë wadepo quëwengaimo inte edæ botö baö wænte bai ëñabo inte edæ ædö cæte wëñæ tapæiquimoo, ante ëñengacäimpa. Ayæ, Tada adobai wëñæ cöwë mänämai ingaingä inte picængadecä badinque ædö cæte wëñæ manguingää, ante pönengacäimpa. Incæte mäninö nänö wædö beyænque guiñënadämai inte Abadäo wodi Wængongui nänö äninö ante godömenque pönengacäimpa. ²⁰ Tömengä, Wængongui wabänö cæbaingää, ante wædämai inte wæætë Wængongui nänö, Cöwë pönö cæcæboimpa, äninö ante wede pönengacäimpa. Ayæ, Wængongui bitö nïäo entawëmi inte tæi ëmönte waa cæcæbiimpa, ante godömenque tæi piñænte entawëninque Abadäo wodi wede pönengacäimpa. ²¹ Edæ, Wængongui në tæi piñængongä inte, Cöwë cæcæboimpa, ante në angaingä inte edæ cöwë cæcæcäimpa, ante Abadäo do ëñëninque edæ wede pönengacäimpa. ²² Tömengä mänömai wede pönengä beyænque Wængongui, Abadäo bitö nö entawëmi imi abopa, angacäimpa.

²³ Mänine, Bitö nö cæbi imi abopa, ante nänö angaine iñömö wii tömengä beyænque yewæmongatimpa. ²⁴ Wæætë mönö beyæ adobai yewæmongatimpa. Edæ, Mönö Awënë Itota ingante Wængongui angä nïäni ömæmongacäimpa, ante në angaingä ingante wede pönëmö iñömönte Wængongui, Botö ayömo minitö nö cæmiini imini abopa, ante badongampa. ²⁵ Wënæ wënæ mönö cædö beyænque mönö Awënë Itota ingante Wængongui pædæ godongä wængacäimpa. Ayæ mönö beyæ ante cædinque tömengä mönö Awënë Itota ingante, Bitö në nö cædömi inte nïäni ömæmömi beyænque tömënäni botö ayömo nö entawënanäni bacædänimpa, ante cædinque angä nïäni ömæmongacäimpa.

5

Wængongui badongä ate mönö nö cæmö bamompa

¹ Mönö wede pönëno beyænque Wængongui pönö badongä ate mönö tömengä ayongante edæ nö cæmö bamompa. İninqe mönö Awënë Itota Codito nänö cægainö beyænque Wængongui piyænë cæcä ate mönö tömengä tönö godongämæ gänë entawente quëwëmompa. ² Mönö wede pönëno beyæ adocä Codito mönö imonte pönö ænte mämongä ate Wængongui waadete pönö cædinque mönö imonte ængampa.

Ayæ Wængonguï nē ñäö ëmongä weca ongöñömö tömengä pönö badongä ate mönö godongämæ ñäö ëmonte mönö watapæ bacæimpa, ante wede pönëninque tomompa.

³ Ayæ wii mäninque beyæ tomompa. Ìñæmpa, Waocä nänö wæntædämaï inte ee cæquinque caate wæcampa, ante ëñëmö ìninque mönö caate wæmö incæte caate mönö wædö beyæ adobaï tomompa. ⁴ Ayæ nē wæntædämaï inte ee cæmö adinque mönö Wængonguï ayongä nē waa cæmö edæ bamompa. Mänömaï bamö ìninque mönö, Watapæ bacæimpa, ante pönente tomompa. ⁵ Mänömainö ante nē pönente tomö ìñömö edæ mönö ænguënönö ante do æninque mönö guingo imonte wædämaï imompa. Edæ Wængonguï tömengä Tæiyæ Waëmö Önöwoca ingante da pönöninque tömengä nänö waadete pönönö adobaï do pönongä æninque mímönë entawëmompa.

⁶ Edæ iïmaï impa. Mönö aquiimö pönï ìnömö inte, Ædö cæte cæmöö, ante wæyömönte mönö Codito ìñömö eyepæ pönï pöninque, Minitö Wængonguï ayongante wiwa cæmïni iminipa, ante adinque wiwa mönö cædö ante teëmente wæætë wængacäimpa. ⁷ Waocä guiquënë wacä nē nö cædongä ingä adinque tömengä beyæ wæætë dicæ wænguingäa. Incæte, Nē waa cædongä wæætë quëwencæcäimpa, ante cædinque adocanque adocanque wabänö Ao ante tömengä beyæ wæætë wæmainänipa. ⁸ Incæte, Wængonguï mïnitö iminite nanguï waadete pönengampa, ante odömoncæte ante cædinque mönö Codito ìñömö nē wënæ wënæ cæmö ìñömönte mönö beyænque wæætë wængacäimpa. ⁹ Codito wepæ mönö beyæ pe tæ pe tæ wææ beyænque mönö Wængonguï ayongante nö entawëmö do batamompa. Codito mönö beyæ mänömaï wængaingä inte cöwë godömenque cæcæcäimpa.

Ämo ëñeedäni. Wængonguï nē piïnte panguënegä ìñongante adocä Codito gä pe æmpote ængä beyænque Wængonguï wæætë mönö imonte edæ ata cæpocä quëwencæmöimpa. ¹⁰ Mönö edæ Wængonguï tönö mönö godongämæ piïncabo ìñömönte tömengä Wengä mönö beyæ wæætë wængä beyænque mönö Wængonguï tönö godongämæ piyænë cæmö bagamöimpa. Mönö Wængonguï tönö godongämæ piyænë cæmö ìninque tömengä Wengä ìñömö cöwë godömenque cæcæcäimpa. Ämo ëñeedäni. Tömengä adocä do wængaingä inte ñäni ömæmonte mïingä quëwëninque mönö imonte ængä beyænque mönö wænämaï inte cöwë quëwencæmöimpa. ¹¹ Ayæ mönö godömenque iïmainö ante ëñengæimpa. Mönö Awënë Itota Codito ængä beyænque Wængonguï piyænë cæcä ìninque mönö ñöwo Wængonguï nempo quëwëninque edæ Itota Codito beyæ ante watapæ tomompa.

Tänocä Adäö wodi baï Codito adobaï Tänocä ingampa

¹² Docä mämmæ adocanque tänocä incæ ëñënämaï cæcä ìninque mönö wënæ wënæ cæpämö inguipoga do pongatimpa. Ayæ tömengä nänö ëñënämaï cægäinö beyænque nē wæwocacä bagacäimpa. Tömengä wënæ wënæ cæcä ingaingä baï mönö tömämö adobaï nē wënæ wënæ cæmö imö ìninque edæ mönö waocabo tömämö nē wæwocamö edæ do bagamöimpa. ¹³ Edæ wëenënedë Möitee wodi nänö wææ änämaï ìnedë incæ waodäni do wënæ wënæ cædäni ingadänimpa. Wënæ wënæ cædäni incæte Wængonguï, Botö wææ änö ante ëñënämaï cæmïnipa, ante ædö cæte apænte anguingäa. Ìñæmpa mänïñedë ayæ wææ änämaï ingacäimpa. ¹⁴ Nē Ponguingä, ante dodäni nänö nē angaingä ìñömö Tänocä nänö ingaï baï docä Adäö wodi adobaï tänocä ingacäimpa. Incæte Adäö wodi Wængonguï nänö wææ änö ante ëñënämaï cædinque wënæ wënæ cægacäimpa. Wæætë Wængonguï edæ Möitee wodi nänö quëwenganca wææ änämaï ìñongante Adäö wodi päinäni guiquënë wënæ wënæ cædäni incæte tömengä nänö ëñënämaï cægäi baï wii adobaï ëñënämaï cægadänimpa. Incæte tömënäni nē wæwocadäni inte wægadänimpa.

¹⁵ Incæte Wængonguï nänö wææ angäinö ante adocanque nänö ëñënämaï cægäi baï Wængonguï nänö pönongäi ìñömö wii adobaï impa. Edæ adocanque nänö ëñënämaï cægäi beyænque nanguï ìnäni inte wængadänimpa. Incæte Wængonguï guiquënë nanguï pönï waadete pönö cædinque Itota Codito ingante da pönongä pöninque tömengä adocanque ìnongä waadete eyepæ pönï pönö cæcä ate mönö nanguï pönï

imö inte quëwëmompä. ¹⁶ Onguiñängä adocanque wënæ wënæ nänö cægäi beyæ nê wæwocadäni bagadänimpa. Wængongui nänö pönongäi iñömö edæ wii adobai impa. Adocanque nänö adopoque ëñënämaï cægäinö ante adinque Wængongui tömengä ingante apænte äninque edæ, Bitö tente wæquinque impa, angacäimpa. Wæætë Wængongui nänö wææ angäinö ante ëñënämaï wæætë wæætë cämö incæte tömengä, Botö ayömo miini nö entawenguinque impa, ante önonque pönongä ænte entawëmompä.

¹⁷ Waocä adocanque incæ Wængongui nänö wææ angäinö ante ëñënämaï cæcä iñinque tömengä adocanque nänö ëñënämaï cægäi beyænque mönö wæwocamö do bagamöimpa. Wængongui guiquënë godömenque eyepæ pönö waadete pönö badongä ate tömengä ayongä mönö nö entawëmö bagamöimpa. Iñinque Itota Codito adobai Adocanque iñongante mönö tömengä nempo wæwocadämaï inte quëwëninque awëneidi bai badinque quëwëmompä.

¹⁸ Mänömaï beyæ adocanque adopoque ëñënämaï cæcä beyænque Wængongui mönö tömämö imonte apænte äninque, Miini wænguinque wënæ wënæ cämïnipä, angampa. Ayæ adobai Adocanque adopoque nänö nö cægäinö beyænque mönö Wængongui ayongä nö cämö bamö iñinque Wængongui apænte äninque mönö tömämö imonte, Miini quëwenguinque mïnitö botö ayömo nö entawëmiini bamïnipä, angampa. ¹⁹ Edæ adocanque nänö adopoque ëñënämaï cægäi beyænque mönö nanguï imö incæ edæ nê wënæ wënæ cämö bagamöimpa. Adobai Adocanque nänö adopoque ëñente cægäi beyænque mönö nanguï imö incæ edæ Wængongui ayongä nö cämö bagamöimpa.

²⁰ Mönö waocabo wënæ wënæ cæyömonte Wængongui, Botö wææ änö ëñënämaï inte cämïnipä, ante edonque acämïnipä, ante wææ angacäimpa. Wææ angä ate edonque adinque mönö waocabo wæætë, Nanguï ëñënämaï inte cæte awädö, ante wæyömonte Adocä incæ godömenque nanguï waadete pönö cæcä æmompä. ²¹ Iñinque mönö ëñënämaï cægäi beyæ mönö nê wæwocamö bagamöimpa. Wæætë mönö Awënë Itota Codito waadete pönö nö cæte badongä ate mönö cöwë wænämaï quëwenguinque Wængongui ayongä nö entawëmö bagamöimpa.

6

Codito nempo quëwëninque mönö nê wiwa cædongä nempo wii quëwëmompä

¹ Iñinque mönö æbänö anguii. Pancadäniya iïmaï änewënanïpä. Wængongui godömenque waadete pönö cæcæcäimpa, ante cædinque mönö godömenque wënæ wënæ cæcäimpa, ante tedewënanïpä. Mönö iñömö dicæ mänömainö ante tedewenguënëmö imongaa. ² Iñæmpä ædö cæte mänömainö ante tedewenguui. Wënæ wënæ mönö cæte quëwëmämo pædæ godömo æninque Codito teëmë mongæninque wæñongante mönö tömengä tönö godongämæ wænte bai inömo inte ædö cæte godömenque wënæ wënæ cæte quëwenguui. ³ Mönö Itota Codito nempo quëwengäimpa, ante æpænë guidinque mönö tömengä tönö godongämæ wængaimö bai batamompä, ante mïnitö iñömö ëñënämaï imïnitawo. ⁴ Tömengä wænte öñöñongante Mæmpo Wængongui nê ñäö entawënongå inte tæi ëmönongä inte, Ñäni ömæmöe, angä ñäni ömæmongacäimpa. Iñinque mönö iñömö edæ, Codito tönö ñäni ömæmonte bai mönö miiimö quëwengäimpa, ante cædinque æpænë guidinque tömengä wodido godongämæ guite bai wænte bai öñontamompä.

⁵ Edæ tömengä wængä ate godongämæ wænte bai bagaimö iñinque mönö tömengä ñäni ömæmongä ate tömengä tönö äawocaque bai ewocate ñäni ömæmonte bai quëwëmaïmompä. ⁶ Waocä nänö nê ö æninäni inte tömengä beyænque cæte nê quëwënanï bai mönö adobai wënæ wënæ mönö cædö beyænque wægämöimpa. Mänömaï inte wæyömonte mönö Codito iñömö, Aamö cæte gocämïnipä, ante cædinque wënæ wënæ cæte mönö wentamö mongæñö ö ænte teëmë mongængantapa. Ee mongæñongante tömengä ingante awäa timpodäni wængä adinque baonque ante mönö wënæ wënæ cæpämö iñömö ewente bai ba iñinque mönö do aamö cæte bai mäninö ante ëmö cæte

gomompa. ⁷ Waocä ämæwo wængaingä inte edæ ædö cæte wænæ wænæ cæquingää. Edæ tömengä nänö wænæ wænæ cægainö ante ëmö cæte aamö cæte bai gogaingä ingampa.

⁸ Mönö Codito tönö äwocaque bai ewocadinque adopoque wængaimö inte mönö tömengä tönö godongämæ quëwengäimpa, ante wede pönëmompä. ⁹ Edæ do wænte ñäni ömæmonte miingä quëwëningä inte Codito wæätë mempoga wænguingä inämaï ingampa. Tömengä ñöwo wæwocadämaï iñongante tömengä ingante, Wæmäwe, ante ædö cæte anguiï. Iñæmpä, wænämaï incæcäimpa, ante do ëñëmompä. ¹⁰ Tömengä adopoque wæninqe mönö wænæ wænæ cægainö ante ämæwo wido cæcæte ante teëmë mongænte wængacäimpa. Wæätë ñäni ömæmonte miingä quëwëninge tömengä, Wængongui beyænque cæte quëwencæboimpa, ante quëwengampa. ¹¹ Minitö adobai Codito nempo quëwënomini inte wiwa mini cægainö ante ämæwo wido cæcæte ante cædinque, Itota Codito tönö adopoque wængaimö imompa, ante wæätë, Mönö Wængongui beyænque cæte quëwengäimpa, ante pönëninge quëwëdäni.

¹² Mänömaï beyæ minitö, Baonga mönö ñömænguiñö quëwëninge mönö wænæ wænæ cæinënö ante mönö ëñente cædämaï ingäimpa, ante nämä wææ aadinque edæ wænæ wænæ mini cæinëwënö ante edæ ëñënämaï inte quëwëdäni. ¹³ Ayæ minitö, Bado, ante edæ, Botö baonca wiwa cæcäimpa, ante edæ minitö baö quiömë i incæ wænæ wænæ cæquinque ante edæ godö cædämaï iedäni. Wæätë do wæwocagaimini inte ñäni ömæmonte miimini quëwëninge minitö wæätë Wængongui ingante nämä godömini æncæcäimpa. Edæ, Botö baö ini edæ tömäo Wængongui qui impä, ante pædæ godöninge miimini quëwëñöminite tömengä wæätë minitö tönö godongämæ cædinque nö pönï cæcæcäimpa. ¹⁴ Edæ Möitee wodi nänö wææ angainö ante ëñëmini incæte wiï mäninö beyænque quëwëminipa. Wæätë Wængongui waadete pönö cæcä beyænque quëwëmini inte minitö wænæ wænæ mini cæinëwënö ante ëñente cædämaï inte quëwencæminimpa.

Wiwa mönö cæinëwënö ante mönö ëñënämaï ingäimpa

¹⁵ Möitee wodi nänö wææ angainö ante ëñente beyænque wiï quëwëmö inte mönö Wængongui waadete pönö cæcä beyænque quëwëmompä. Näwangä impä. Ininque mönö æbänö cæquiï. Wadäni iñömö idiquibæ ante pönëninge, Wængongui pönö cæcä beyænque në quëwënomö inte mönö wæätë wænæ wænæ cæcäimpa, ante tedewënanipa. Mönö iñömö ædö cæte mänömainö ante cæquiimö.

¹⁶ Wacä ingante në cæte quëwëmini bacæte ante cædinque minitö, Bado, bitö botö awënë badinque edæ ämi ëñente në cæbo baboe, ämini ininque edæ mäningä minitö iminute ö ængä ate tömengä beyænque cæte quëwëmaiminipa. Mäninö ante pönëminiyaa. Ayæ adobai minitö wænæ wænæ cæinente mini wædö ante Ao ante cæmini ininque mini wænguinque edæ mäninö beyænque cæte në quëwëmini inte wæbaiminipa. Wæätë Wængongui ingante, Bado, bitö botö Awënë inömi inte edæ ämi ëñente në cæbo baboe, äninque minitö nö cæte mini quëwëninge tömengä beyænque në cæmini babaiminipa. ¹⁷ Minitö doyedë mini wænæ wænæ cæinëwënonque ante cædinque minitö awënë beyænque cæte në quëwëmini bai ingaminimpa. Nöwo guiquënë Wængongui nö nänö änö ante odömömöni ëñëninge minitö iñonque ante edæ në ëñente cæmini baminitapa. Mänömaï baminipa, ante adinque botö Wængongui ingante waa ate pönëninge apænebopa. ¹⁸ Ayæ wænæ wænæ mini cædö beyænque cæte në quëwëmini inte wæyöminite Wængongui ñimpo cæcä ate minitö abæ tawænte ee gote bai quëwëminipa. Nöwo wæätë tömengä nänö nö cædonque ante ëñente cæmini ininque minitö edæ në nö cædongä nempo quëwëninge tömengä beyænque cæte në quëwëmini baminipa.

¹⁹ Minitö önöminique inte æiquedö ædæmö ëñënguimiiii, ante wædinque botö, Waocä nänö cæi bai impä, ante tædëdinque odömömo aedäni. Wëenëñedë wænæ wænæ cædinque godömenque quingämë bai quëwencæte ante minitö, Bado, ante quiömë incæ mini baonga wiwa cæquinque pædæ godö cæminitapa. Mänömaï beyænque ëñënämaï mini cæinëwënö ante ëñente cædinque edæ minitö mäninonque ante në cæte

quëwëmini ingaminiimpa. Ñowo guiquënë tæiyæ waëmö mini ëwocate quëwenguinque ante minitö baö ini edæ, Wængongui qui impa, ante tömäo pædæ godöedäni. Ayæ mini nö cæquinque ante edæ tömengä beyænque në cæmini inte quëwëedäni. ²⁰ Wëenënedë iñömö minitö wënæ wënæ mini cæinënö beyænque cæte në quëwëmini bai inte wægaminimpa. Mäniñedë minitö në nö cædongä nempo quëwënämaï ingaimini inte tömengä nänö angainö ante edæ ëñenämaï ingaminiimpa. ²¹ Mäniñedë quingämë bai mini cægainö ante pönente wædinque minitö ñowo iñömö guingo imonte baminiipa. Edæ mäninö mini wiwa cægainö beyæ ante dicæ watapæ tote baminiyaa. Iñampa edæ mini wæguinque mänömaï cægaminimpa.

²² Ñowo guiquënë, Wënæ wënæ mini cæinëwënö ante idæwaa ëñencæminimpa, ante cædinque Wængongui Gä pe æmpote ængä ate minitö abæ tawænte bai Wængongui nempo wæätë ee pongaminimpa. Inique në Gä pe æmpocä nempo quëwëninque minitö tömengä ingante cæte në quëwëmini inte mini cöwë wänämaï quëwenguinque tæiyæ waëmö ëwocamini baminiipa. ²³ Mönö waocabo mönö wënæ wënæ cædö beyæ ante paga cæte bai cædinque Wængongui mönö imonte pönö pangä wænguënëmö imompa. Wæätë, Wantæpiyæ quëwencæminimpa, ante adocä incæ mönö Awënë Itota Codito tönö godongämæ cædinque mönö imonte önonque pönö ængä beyænque mönö cöwë wänämaï quëwëmompä.

7

Ëñente cæquënëmö inte ñä cæyænte bai ingamöimpa

¹ Iñänäni ëñeedäni. Möitee wodi nänö wææ ante yewæmongainö ante do adimini imini incæte minitö iïmaï ante ëñëminiyaa. Edæ, Ëñente cæedäni, ante tömengä miinäni quëwënanique inänite wææ ante yewæmongacäimpa. Inique waocä do wæningä iñongante, Cæe, äñömö tömengä miingä ingampa diyæ cæquingää. Edæ dobæ wængäimpa.

² Iïmainö ante pönëedäni. Onquiyængä ingante ñänönäni mongä ate tömengä nänöogængä miingä nänö quëwenganca onquiyængä iñömö tömengä nänöogængä ingante ëñente quëwencæcäimpa, ante wææ ante yewæmongatimpa. Wæätë edæ tömengä nänöogængä wængä ate onquiyængä owæmpoingä inte adocanque quëwëñongante mänömainö ante edæ ædö cæte wææ anguii. ³ Inique nänöogængä ayæ miingä quëwëñongante onquiyængä wacä ingante godö guëa mongä adinque, Bitö nänöogængä miingä iñongante bitö wacä ingante guëa godö mömipa töö, ante piinänipa. Incæte tömengä nänöogængä wængä ate abæ tawænte gote bai tömengä adocanque quëwëñongante, Wacä ingante mönämaï incæbiimpa, ante ædö cæte wææ anguinänii. Do owæmpodingä inte wacä ingante mongä adinque tänocä quëwengampa diyæ wææ anguinänii. Edæ owæmpodingä inte tömengä do mongampa.

⁴ Mänömaï beyæ botö töninamini, Mönö adobai imompa, ante ämo ëñeedäni. Ñänönäni në möningä iñömö ëñente cæquënengä ingä bai minitö wëenënedë adobai Möitee wodi nänö wææ angainö ante ëñente cæquënëmini inte ñä cæyænte bai ingaminiimpa. Mänömaï inte wæyöminite Codito iñömö, Minitö botö nempo quëwëninque waincate bai cæmini badinque Wængongui beyænque ante ëñente cæcæminimpa, ante pönö cægacäimpa. Tömengä baonga ponte ëñadinque mönö beyæ wëninque ñäni ömæmongacäimpa. Inique mönö tömengä tönö adobai wænte bai ingaimö inte mönö wëenënedë mönö ëñinguënengainö ante edæ ædö cæte wæätë ëñinguënëmö inguimöö. Wæätë edæ në ñäni ömæmongaingä nempo quëwënömo inte mönö tömengä quimö iñömö imompa.

⁵ Doyedë iñömö mönö në wæwocamö iñömö inte baonque ante pönente mönö quëwënedë Möitee wodi nänö wææ angainö ante ëñente wædinque godömenque wiwa cæinëwente wæmö batamompa. Inique mönö baaca incate bai cædinque mönö wænguinque wënæ wënæ cætamompa. ⁶ Wëenënedë wææ änäni ate mönö, Ædö cæte ëñente cæquii, ante ñä cæyænte bai wægaimö inte mönö edæ Codito tönö adopoque

wænte bai ñi cæyænte bai bagamöimpa. Ñowo guiquënë adopoque wængaimö inte mönö Möitee wodi pedæne ante nänö wææ ante yewæmongainö ante wii ëñente cæquënmö inte abæ tawænte bai gomompa. Wæætë edæ Wængongui Tæiyæ Waëmö Öñowoca beyæ quëwëmö inömö inte mönö tömengä mīine nänö änonque ante ëñente cæmö imompa.

Wënæ wënæ botö cædö beyæ ante wæbopa, ante

⁷ Ìniquë æbänö ante angui moo. Möitee wodi, Wënæ wënæ cæqui, ante yewæmongacäimpa, ante botö dicæ antawogaa. Ædö cæte edæ mänömaï angui. Ìñæmpa tömengä wææ änämaï ingä bai botö, Quinö wënæ wënæ cæte i, ante ëñänämaï incædömoimpa. Botö edæ, Wacä qui äñinente wæbo incæte botö äñämaï inte ee abo inte waa cæbopa, ante pönengaboimpa. Möitee wæætë, “Wacä qui ante äñinente wædämaï ie,” ante wææ angä beyænque botö, Æ äñinente botö wædö incæ wënæ wënæ impa, ante tæcæ ëñentabopa. Mäninö ante änämaï ingä bai botö, Wënæ wënæ impa, ante ëñänämaï incædömoimpa. ⁸ Ìniquë nē wënæ wënæ cædömo inte botö Möitee nänö wææ angainö ante öñomoncaque ëñente ate botö quingämē bai tömancoo ante godömenque äñinente wætabopa. Edæ tömengä wææ änämaï ingä bai mönö wënæ wënæ cædö iñömö edonque inämaï inte edæ dæ ante bai incædönimpa.

⁹ Möitee wodi wææ ante nänö yewæmongainö ante botö adämaï imoyedë botö önonque wædämaï quëwengaboimpa. Wæætë, Ìimaï wææ ante yewæmonte ongompa, ante adinque botö, Æ, wënæ wënæ cæbo imopa, ante tæcæ ëñëninque, ¹⁰ edæ nänne wænte bai botö, Wæwocabo imopa, ante wætabopa. Edæ, Ìimaï cædinque quëwencæminimpa, ante wææ ante nänö yewæmongainta adinque botö edæ, Botö wænguinque wii ëñente cæbopa, ante tæcæ ëñëninque wætabopa. ¹¹ Edæ Möitee wodi wææ ante nänö yewæmongainta do adimo inte mäninö ante ëñänämaï cædinque botö pante wænguinque wënæ wënæ cætabopa. Edæ, Önonque wënæ wënæ cæte tocäi, ante wapiticæ pönente cæyömote tömengä nänö wææ angainö ante odömönäni ëñemo beyænque botö, Æ, botö wænguinque wënæ wënæ cæbopa, ante wægaboimpa.

¹² Wængongui nänö wææ angainö iñömö tæiyæ waëmö inepa. Ayæ Möitee wodi adobai mänine tæiyæ waëmö inedö ante apænedinque, Ìimaï cædäni, ante wææ äninque, Mini waa cæte quëwenguinque ëñente cæcæminimpa, ante nöingä pöni angacäimpa.

¹³ Ìniquë tömengä, Mini waa quëwenguinque impa, ante nänö wææ angainö incæ botö imote ædö cæte wænongui. Wængongui wæætë, Quinö wënæ wënæ cæte i, ante edonque acæminimpa, ante pönö waa cædinque, Minitö ëñänämaï imini beyænque mini wænguinque impa, ante wææ angacäimpa. Ìniquë Wængongui nänö wææ angainö beyænque botö iñömö, Wënæ wënæ cægaboimpa, ante edonque atabopa.

¹⁴ Minitö tæiyæ waëmö ewocæminimpa, ante Wængongui mönö öñowoca beyænque ante wææ angacäimpa, ante do ëñëmompa. Incæte botö wiwa cædönö beyænque cæte nē quëwëmo inte botö edæ ömæwocate bai inte wæbopa. ¹⁵ Edæ botö waa cæinente wædö ante cædämaï inte botö wæætë edæ, Wii cæinente awædö, ante botö piinte adö incæ edæ do cæte wæbopa. Ìniquë botö, Æbänö cæboo, ante ëñänämaï imopa. ¹⁶ Wængongui nänö wææ angainö ante ëñänämaï cæbo incæte botö ëñänämaï botö cædö ante wii cæinëmopa. Mänömaï botö wii cæinënö beyænque botö, Wængongui waa cædinque wææ angacäimpa, ante bai cædinque tömengä nänö wææ angainö ante edæ Ao ante bai cæbopa. ¹⁷ Incæte botö wodi wii tömëmo änö ante cæbopa. Wæætë edæ botö wiwa entawënö beyæ wii cæinente botö wædö ante do ëñente cædinque wæbopa. ¹⁸ Edæ ancaa waa cæinente wæbo incæte botö dicæ waa cæbogaa. Mänömaï beyæ botö, Botö baonga quëwëninque botö waa cæquinö iñömö edæ dæ ampa, ante do ëñëmopa. ¹⁹ Waa pöni botö cæinënö incæ cædämaï inte wæbopa. Wæætë edæ wënæ wënæ cæte botö wii cæinente wædö ante ancaa cæte wæbopa. ²⁰ Ìniquë botö wii cæinëmo inte do cæbo iniquë wii tömëmo cæbopa. Wæætë wiwa cæquinque botö entawënö beyænque edæ wënæ wënæ cæte wæbopa.

²¹ Waa cæinente wæbo incæte botö wënæ wënæ cæquinö edæ do entawente wæbopa. Ìninqe botö ñä cæyænte bai ìmopa, ante do abopa. ²² Edæ botö Wængongui nänö wææ angainö ante mímönë pönëninque watapæ tobopa. ²³ Incæte, Wængongui nänö wææ angainö ante botö pönëno incæ ëñënamai ingæimpa, ante botö edæ wade wææ ante entawente bai inte wæbopa. Ìninqe nämä wææ ante bai mímönë botö pönëno tönö wade, Ëñënamai ingæimpa, ante wææ ante botö entawënö tönö näëmæ guädö guëa cæ bai inte wæbopa. Edæ mänine beyæ wiwa botö cæquinö entawëninque botö yæguincamenca ñä cæyænte bai inte wæwëmopa.

²⁴ Edæ cætawente wængui wæ. Botö wiwa cæquinö entawente beyæ botö wænguiñö ëñate wæyömote æcänö edæ æna beyænque quëwëmaïmoo, ante wæbopa. ²⁵ Edæ, Itota Codito beyænque quëwenguïmo ìmopa, ante botö Wængongui ingante waa ate pönente apænebopa. Ìninqe Wængongui nänö wææ angainö ante ëñëninque botö tömëmo mímönö tömengä beyænque cæte në quëwëmo ìnömö ìmopa. Incæte botö ëñayö beyæ botö wiwa cæinënö beyænque cæte në quëwëmo inte wæbopa.

8

Wængongui Ònówoca ingante ewocate quëwengæimpa

¹ Ìninqe mönö Itota Codito nempo quëwëninque mönö wiwa cæinente wæwënö ante cædämaï ìnömö inte wæætë tömengä Ònówoca pönö angä ëñëninque cæte quëwëmö adinque Wængongui ìñömö, Mïni wænguinque, ante apænte änamai ingampa. ² Edæ wiwa cæinente mönö wæwënö ante mönö wænguinque ëñente cæyömönte Itota Codito ìñömö pönö gä peyæmpote bai ö ængä beyænque mönö abæ tawænte ee gote bai quëwëmompä. Ayæ tömengä Ònówoca në quëwënogä nänö wææ änö ante wæætë mönö ëñente cæinente quëwëmompä.

³ Edæ Möitee wodi, Ìimai cædäni, ante wææ äñongä mönö ìñömö wiwa cæinente mönö wæwënö beyænque aquïi pïñënamai ëñadömö inte, Mönö ædö cæte ëñente cæquiï, ante wægämöimpa. Mönö waocabo mänömai wënæ wënæ cædömö inte wæyömö Wængongui wæætë, Waocä bacæcäimpa, ante tömengä Wengä ingante da pönongä pöninque mönö wiwa cæinentai bai adotai bai ëñate pægacäimpa. Ëñate pædinque tömengä nämä baö nänö ëñayö ante edæ, Wængongui qui ìmpä, ante pædæ godonte bai cædinque wënæ wënæ mönö cædö beyænque ante wængacäimpa. Mänömai cædinque Wængongui mönitö ìmönite apænedinque, Mïni wænguinque mïnitö baonga ëñadinque wënæ wënæ cæmïni awædö, ante apænte angacäimpa. ⁴ Mänömai pönö cædinque tömengä, Wiwa cæinente mïni wæwënö ante ëñente cædämaï inte mïnitö ñöwo wæætë botö Ònówoca ingante ewocadinque tömengä beyænque quëwëminipa. Ìninqe nö pönö botö wææ angainö ante tömänö ante ëñëninque nö cæte quëwëncæminipa, ante cægacäimpa.

⁵ Adopoque ëñadinque baonque në ëñadäni guiquënë wiwa cæinente nani wæwënö ante pönente cædänipa. Mempoga ëñadinque Wængongui Ònówoca ingante në ewocadäni guiquënë tömengä nänö änonque ante pönente cædänipa. ⁶ Wiwa cæinente nani wæwënö ante cæcæte ante në pönëwënanäni guiquënë tömënanäni nani wænguinque mäninö ante pönëwënanäni. Wæætë Wængongui Ònówoca angä ëñente në pönënanäni guiquënë tömënanäni nani gänë entawente quëwënguinque edæ mänömai pönënanäni. ⁷ Waodäni wiwa nani cæinente wæwënö ante cæcæte ante në pönëwënanäni ìñömö edæ Wængongui ingante piinte cædänipa. Wængongui nänö wææ änö ante tömënanäni önömoncaque ëñënanäni inte edæ wii ëñente cædänipa. Ìñæmpä tömengä Ònówoca ingante ewocadänipa diyæ ëñente cæquinänii. ⁸ Wiwa cæinente nani wæwënö ante cæcæte ante në cædäni ìñömö, Wængongui waa acæcäimpa, ante anca cædäni incæte Wængongui wæætë edæ waa todämai incæcäimpa.

⁹ Mïnitö guiquënë Wængongui Ònówoca ingante ewocamïni ìninqe edæ wiwa cæinente mïni wæwëninö ante cædämaï inte quëwëminäni imäiminäni. Wæætë edæ tömengä Ònówoca angä ëñente cæte quëwëmaïminäni. Incæte waocä æcämenque incæ Codito

Önōwoca ingante ewocadāmaī ingā iñinque tōmengā wæætē Codito nempo quēwēnāmaī imaingampa. ¹⁰ Mīnitō guiquēnē Codito ingante entawēmīni iñinque wēnæ wēnæ mīni cægāinō beyænque mīnitō baō incæ tōmengā tōnō adopoque wænte baī ēñaminipa. Incæte Codito nānō nō cædōnō entawēmīni inte mīnitō önōwoca mempoga ēñate baī mīiwoca ewocamīnipa. ¹¹ Itota ingante Wæmpocā, Ñāni ömæmōe, angā ēñēinque ñāni ömæmongacāimpa. Ayæ mīni baō ñōmæintai ēñayōmīnite tōmengā Önōwoca pō guidinque quēwengā iñinque Wæmpocā wæætē mīnitō imīnite, Ñāni ömæmōe, ante adobaī angā ñāni ömæmoncæmīnipa. Edæ tōmengā Önōwoca mīni nē ewocadongā tōnō tōmengā pōnō cæcā ate mīnitō baō incæ ñōmænāmaī intai bacæimpa.

¹² Iñinque botō tōñīnamīni ēñēedāni. Wængonguī Önōwoca angā ate mōnō ēñente cæquēnēmō imōmpa. Wæætē wīwa cæinente mōnō wæwēnō ante wīi ēñente cæte quēwenguēnēmō inōmō imōmpa. ¹³ Iñæmpa wīwa cæinente mīni wæwēnō ante ēñente cæmīni iñinque mīni æmæwo wænguinque cæbaīmīnipa. Wæætē Wængonguī Önōwoca ingante ewocadinque mīnitō wīwa mīni cædīnō ante wido cæmīni iñinque mīni quēwenguinque imaimpa.

¹⁴ Ædānidō inānite Wængonguī Önōwoca tōō æmænte angā ate ēñente goda iñōmō tōmēnāni iñōmō edæ Wængonguī wēnāni inānipa. ¹⁵ Mīnitō guīñente mīni wægāinō beyænque ñā cæyænte baī nē quēwengāimīni inte ñōwo wæætē Wængonguī Önōwoca ingante æninque wīi adobaī guīñente wæmīni imīnipa. Wæætē Wængonguī Önōwoca pōnō cæcā beyænque mīnitō nāwā wēmīni bamīnipa. Ayæ tōmengā Önōwoca pōnō cæcā ænte ewocadinque mōnō guīñēnedāmaī inte edæ, Mæmpo, botō Wæmpo, ante apænemōmpa. ¹⁶ Edæ mōnō mīmōnē ponte apænedinque Wængonguī Önōwoca incæ, Bitō Wængonguī nāwā wēmi inōmi imīpa, ante apænecampa. ¹⁷ Iñinque mōnō Wængonguī wēmō inōmō inte tōmengā nānō pōnonguincoo nē ænguīmō imōmpa. Edæ Codito tōnō āanque baī caate wæmō iñinque mōnō tōmengā ñāō baī nānō emō baī ñāō adobaī emōninque tōmengā tōnō edæ godongāmæ ænguīmō imaīmōmpa.

Ñāō baī mōnō entawenguīmāmo

¹⁸ Botō iīmaī ante pōnēmōpa. Ñōwo caate mōnō wæpāmo iñōmō pōnōmenque iñonte iīncayæ ate ñāō baī mōnō emonguīmāmo guiquēnē wīi adobaī wædænque inte godōmenque nanguī pōñi ingæimpa. ¹⁹ Æyedēnō Wængonguī wēnāni tæi emonte badinque edonque a ongonguīnāñi, ante acæte ante edæ Wængonguī nānō badongaincoo incæ nanguī aīnente wædinque wānō conte baī ongoncoopa. ²⁰ Edæ wēnæ wēnæ cædāmaī incoo iñonte mōnō waocabo mōnō ēñēnāmaī cægāinō beyæ Wængonguī nānō badongaincoo önoncooque baī bagatimpa. Wīi nāmā ānō beyæ mānōmaī bagatimpa. Wæætē Wængonguī nē, iīncayæ ate watapæ bacæimpa, ante angaingā inte adocā angā beyænque önoncooque baī bagatimpa. ²¹ Edæ Wængonguī nānō badongaincoo ñōmænguīncooque inte yæguīncamenca ñā cæyænte baī wæyoncoote Wængonguī gā pe æmpote baī godō cæcā beyænque ñōmænāmaī inguincooque bacæcoimpa. Mōnō Wængonguī wēñæmō iñōmonte tōmengā pōnō ñimpo cæcā ate mōnō abæ tawænte baī tæi emonte bamō baī tōmengā nānō badongaincoo adobaī abæ tawænte baī mīincooque bacæcoimpa. ²² Wēñæ nantate, Æiquedō ēñaqingää, ante nāni wæ baī Wængonguī nānō badongaincoo incæ ñōwo ganca godongāmæ nantate baī, Æiquedō waa baquīi, ante ö ö wæconcoopa.

²³ Ayæ Wængonguī mōnō imonte mā pōnōninque tōmengā Önōwoca ingante pōnongā ænte do ewocamō inōmō inte mōnō adobaī, Mōnō baō mīñō ēñaquinque æiquedō Wængonguī wēñæmō ædæmō baquīi, ante nanguī æinente wānō conte ö ö wæmōmpa. ²⁴ Edæ Codito, Botō iīncayæ ate badōmo ate watapæ bacæimpa, ante pōñēedāni, āninque mōnō imonte edæ ængā beyænque quēwēmōmpa. Iñinque māñinō edæ, Watapæ bacæimpa, ante nānō angāinō iñōmō iñinque ba acæte ante mōnō ayæ wānō cōmōmpa. Māñinō watapæ do ba amō baī mōnō, Ayæ ate watapæ ba acæimpa, ante ānāmaī incædōmōimpa. Waocā do æningā inte, Æinente wæbopa, ante quīnante anguingää.

Īñæmpa edæ dobæ ængantapa. ²⁵ Īninqe mōnō æinente wædō ante mōnō cōwē ængæimpa, ante wede pōnēmō ĩninqe mōnō wæntædāmaī inte ee wānō cōmōmpa.

²⁶ Ayæ adobaī mōnō aquīimō pōnī ĩñōmonte Wængonguī Ōnōwoca mōnō beyæ cæcampa. Æbānō cæte Wængonguī ingante apænequīī, ante ēñēnāmaī inte wæyōmonte tōmengā wīī waomō tededō ante apænedinque tōmengā ōnōwēnenque mōnō beyæ apænecampa. Mānīnō tōmengā nānō tededōnō ante mōnō guiquēnēnō inte ōnōneca ædō cæte tedequīī. ²⁷ Mōnō Wængonguī quimō tæiyæ waēmō ēwocamō ĩñōmonte Wængonguī Ōnōwoca ĩñōmō mōnō beyæ apænedinque, Mæmpo Wængonguī nānō angāinō baī bacæimpa, ante pōnēninqe apænecampa. Īninqe mōnō mīmōno do adongā inte Mæmpo Wængonguī ĩñōmō edæ, Botō Ōnōwoca æbānō pōnēninqe apænecāā, ante do ēñengampa.

Nē tæī ēmōninqe mōnō gānā cæmō ĩmōmpa, ante

²⁸ Wængonguī, Botō ānō baī ĩninqe bacæimpa ante cæcæmīnīmpa, ante mōnō ĩmonte aa pegacāimpa. Īninqe tōmengā nānō ānō baī nē cæmō inte mōnō tōmengā ingante waadete pōnēmō ĩñōmonte Wængonguī wæætē mōnō beyænque cōwē waa pōnō cæcā ate mōnō edæ, Inguipoga æbāmē ba incæte mōnō waa pōnī quēwenguinque ĩmpa, ante edæ do ēñēmōmpa. ²⁹ Doyedē badōninqe Wængonguī ĩñōmō, Botō Wengā Bamoncadengā ĩñongante ĩnānī tōmengā biwīidi badinque nanguī ĩnānī yebænte bacædānīmpa, angacāimpa. Īninqe tōmengā mānōmaī cæcæte ante cædinque, Do botō nē agāinānī ĩñōmō tōmēnānīque botō Wengā nānō entawēnō baī adobaī entawencædānīmpa, ante badongacāimpa. ³⁰ Ayæ, Botō Wengā nānō entawēnō baī entawencæmīnīmpa, ante nānō nē angāinānī ĩñōnānīte do aa pegacāimpa. Ayæ tōmengā nānō aa pegāinānī adodānī ĩnānīte, Botō ayōmo mīnitō nō cæmīnī bacæmīnīmpa, ante badongacāimpa. Tōmengā ayongā nō cædānī nē bagāinānī ĩnānīte tōmengā, Mīnitō tæī ēmonte badinque ñāō baī ēmonte bacæmīnīmpa, ante do badongacāimpa.

³¹ Īninqe æbānō ante anguīmoo. Edæ Wængonguī mōnō tōnō godongāmæ cæcā ĩñongante æcānō mōnō ĩmonte bæ taquingāā. Edæ dæ angampa. ³² Tōmengā Wengā adocanque ĩñongante Wængonguī pæ gompodāmaī inte da pōnongā pōninqe tōmengā wæætē mōnō tōmāmō beyæ teēmente wæætē wængacāimpa. Māningā ingante da pōnōninqe Wængonguī tōmengā nānō ēgaincoo ante ædō cæte pōnōnāmaī inguingāā. Edæ, Botō Wengā tōnō godongāmæ entawencæmīnīmpa, ante Wængonguī tōmancoo do pōnongā æmōmpa. ³³ Wængonguī mōnō ĩmonte apænte ængā ongōñōmonte æcānō, Wīwa cæbīpa tōō, ante apænte anguingāā. Īñæmpa Wængonguī incæ, Botō ayōmo mīnitō edæ nō cæmīnī ĩmīnīpa, ante badongā bamōimpa. ³⁴ Itota Codito nē wængaingā inte godōmenque ñānī ōmæmongaingā inte Wængonguī tōmēmæ ĩnō do tæ contate a ongongampa. Ayæ mōnō beyæ Wængonguī ingante cōwē apænecampa. Tōmengā mānōmaī cæcā adinque mōnō ĩmonte æcānō, Bitō wænguinque, ante apænte anguingāā. Īñæmpa wīī eyepæ ĩnānīpa.

³⁵ Codito mōnō ĩmonte waadete pōnente aayongā æcānō gā pe æmpote ō ænguingāā. Edæ, Ædō cæte cæquīmōō, ante wæmō incæ caate wæwēmō incæ mōnō ĩmonte togænte pānānī wæmō incæ mānōmaī wæyōmonte mōnō Codito dicæ māñīñedē edæ waadedāmaī inguingāā. Mōnō wænguinque gue ænente wæmō incæ weocoo ōmaamō inte wæmō incæ tōmengā mōnō ĩmonte dicæ waadedāmaī inguingāā. Quiēmē beyæ, Mīnī wænguinque, ante wææ ānānī wæyōmonte yaēmenca tacadānī wæyōmonte Codito māñīñedē dicæ waadedāmaī inguingāā. ³⁶ Edæ Wængonguī ingante āmotamīnī ante baī yewæmongatīmpa.

“Bitō beyænque wænōnānī wænguī wæ, ante
mōnitō tōmāā itædē wæmōnīpa.

Obegaidi ĩnānīte, Wænongæimpa, ante ānānī baī,

mōnitō ĩmōnīte adobaī, Wænongæimpa, ante pīinānī wæmōnīpa,”
ante yewæmonte ongō aedānī.

³⁷ Edæ mānimāmo mōnō wæpāmo tōmāmāmo pō ate wædōmō incæte mōnō imonte nē waadete pōnengā nempo ongōninqe mōnō tæi emonte godōmenque gānā cæte ongōmōmpa. ³⁸ Botō do ēñente pōnēmōpa. Mōnō nē waadete pōnengā nempo ongōñōmōte mōnō wænguimāmo incæ mōnō quēwenguimāmo incæ anquedoidi incæ wēnæidi incæ ñōwōpāmo incæ iincayæ pōnguimāmo incæ tæi nāni pīñāmāmo incæ mānimāmo tōmāmāmo ædō cæte mōnō imonte gā pe æmpote ò ænguīi. ³⁹ Ayæ edæ æibæ mōnō æite wæquimāmo incæ guibæ mōnō wæænte wæquimāmo incæ quiēmē Wængonguī nānō badongaimāmo incæ mānimāmo tōmāmāmo iñōmō mōnō Codito nempo ongōñōmōte ædō cæte gā pe æmpote ò ænguīi. Edæ Wængonguī nānō waadete pōnēnō entawēninqe mōnō Awēnē Itota Codito iñōmō mōnō imonte waadete pōnēninqe pæ gompoyongante mānimāmo tōmāmāmo incæ gā pe æmpote ò ænāmāi ingæimpa. Amo ēñēmaimīnīpa.

9

Idægoidi inānite Wængonguī apænte angacāimpa, ante

¹ Botō iñōmō edæ mīmō entawēmo inte nāmā apænte pōnēñōmōte Wængonguī Tæiyæ Waēmō Önōwoca adoyōmō ante apæncā ininque botō ædō cæte babæ wapiticæ anguimoo. Edæ Codito nempo quēwēnōmo inte botō nō pōni apænedinque iīmaī āmōpa.

² Mīmōno cōwē cæwēnente wæwēmo inte botō iīmaī ante pōnēninqe nanguī wæbōpa.

³ Botō guidēnāni botō tōnō adodāni inōnāni iñōnānite Wængonguī ængā beyænque quēwencædānīmpa, ante botō nanguī āninqe wæbōpa. Ininque Wængonguī tōmēnāni inānite, Quēwencæminīmpa, ante æninqe wæætē botō Codito nempo quēwēñōmōte botō imote pīininqe tatodonte wido cæcā bai botō Ao ante piyænē cæcædōmōimpa.

⁴ Tōmēnāni iñōmō idægoidi inānīpa. Wængonguī pæpogacā pædāni ininque tōmēnānique tōmengā wēnāni ingadānīmpa. Tōmēnāni inānite Wængonguī ñāo entawente nānō tæi emōnō ante odōmongā adinque tōmēnānique nē agāināni inānīpa. Tōmēnāni inānite apænedinque Wængonguī, Botō pōnō cæbo ate mīnitō Ao āmīni ininque mōnō godongāmæ waa cæcæimpa, ante cægacāimpa. Iīmaī cædāni, ante tōmengā tōmēnāni inānite tāno wææ angā ēñente mānīnō nānō wææ angāinō ante tōmēnānique nē mangāināni inānīpa. Wængonguī oncōnē ñænæncōnē wadāni guidāmaī iñōnānite idægoidique guite tōmengā ingante waa ate ædæ wæænte apænedānīpa. Tōmēnānique inānite Wængonguī, Cōwē waa cæcæboimpa, ante mā apænegacāimpa. ⁵ Mōnitō, Mæmæidi, ante mōni nē angāināni incæ idægoidi mæmæidi adodāni inānīpa. Ininque tōmēnāni Pæingā badinque mōnō Codito inguipoga ēñagacāimpa. Tōmengā iñōmō tōmāmō Wængonguī inongā ingampa, ante adinque mōnō tōmengā ingante apænedinque, Tōmēmi toquinque pōnō waa cæbi æmōnīpa, ante mōnō cōwē ñimpo cædāmaī apæncæimpa. Mānōmaī impa, ante botō, Amēē, āmōpa.

⁶ Idægoidi quēwencædānīmpa, ante nānō angāinō bai Wængonguī cædāmaī ingacāimpa, ante botō dicæ āmogaa. Wæætē edæ iīmaī impa. Nāwā idægoidi nāni wede pōnēnō bai pancadāniya pōnēnāmaī ināni iñōnānite botō tōmēnāni inānite, Nāwā idægoidi inānīpa, ante apænedāmaī imōpa. ⁷ Edæ Abadāo wodi pæināni incæ pancadāniya iñōmō, Abadāo wodi wēnāni, mōnō ānōnāni wīi inānīpa. Wæætē, “Botō ayōmo Itæca wēnānique bitō pæināni inguīnāni inānīpa,” ante mæmæ Abadāo ingante Wængonguī angampa, ante yewæmongatīmpa. ⁸ Mānōmaī i ininque Abadāo tapæicā nē ēñate pædāni inānite Wængonguī, Abadāo wēnāni, ante angantawogaa. Wæætē Abadāo wodi ingante apænedinque, Bitō wēnāni bacædānīmpa, ante Wængonguī nānō nē angāināni guiquēnē tōmēnānique tōmengā wēnāni inānīpa. ⁹ Edæ, “Iīñedē impa, ante botō ānōñedē botō adodō pōmo ate māniñedē ate edæ Tada incæ wēñængā onguīñængā ingante mancæcāimpa,” āninqe Wængonguī, Mānīnō botō ānō bai cōwē cæcæboimpa, angacāimpa.

¹⁰ Wīi māninqe impa, ante ēñengäimpa. Godömenque iīmaī ante mönō pönengäimpa. Wæmpocä adocanque tapæicä ate Adebeka wodi wēna āancadēnaque ēñagadaiṃpa. Mānina wæmpocä iñömō mönō wæmæ Itæca wodi ingacäimpa. ¹¹ Tömēnā wēna ayæ ēñadāmaī iñedē ædō cæte wēnæ wēnæ cæquīnaa, ædō cæte waa cæquīnaa. Incæte edæ Wængonguī, ĩngā ingante apænte æncæboimpa, ante nānō angainō ante cōwē bacæimpa, ante cædinque, ¹² tōmēna ayæ cædāmaī iñōnate Wængonguī nē aa pedongā inte, “Bamoncadengā incæ ayæmengā ingante nē cæcā incæcäimpa,” ante Adebeka wodi ingante apænegacäimpa. ¹³ Adobainō ante Wængonguī beyæ yewæmongadānimpā. “Aacobo ingante waadete pönengaboimpa. Etawoo ingante guiquēnē piinte agaboimpa,” ante yewæmongatimpā.

¹⁴ ĩninqe mönō æbānō anguīi. Wængonguī dicæ nō cædāmaī ingantawogaa. ¹⁵ Wæætē Möitee wodi ingante apænedinque Wængonguī iīmaī angacäimpa. “Waocä adocanque ingante botō, Wīi pānēwædō, āninqe tōmengā ingante do godō ñimpo cædinque pānāmaī incæboimpa. Adocanque ingante nē waadete cæinēmo inte botō tōmengā ingante do godō waadete waa cæcæboimpa,” angacäimpa, ante yewæmongatimpā. ¹⁶ ĩninqe waocä nanguī cæinengā incæte waocä nanguī cæcā incæte Wængonguī wīi waocä nānō cædō beyænque apænte ængampa. Wæætē nāmā nānō waadete waa cæinēnō beyænque Wængonguī waocä ingante godō apænte ængampa. ¹⁷ Edæ awēnē Padaönō wodi ingante apænedinque Wængonguī, “Botō iīmaī ante cæcæte ante bitō ĩmite ængō cætabopa. Edæ bitō ĩmite ængō cædinque tæi pīñænte pōnō cæbo adinque waodāni, Wængonguī tæi pīñængā inte mǎnōmaī cæcampa, ante botō emōwo ante inguipoga tōmāo apænedāni do ēñencædānimpā, ante cætabopa.” Wængonguī mǎnōmainō ante Padaönō ingante apænecantapa, ante yewæmongatimpā. ¹⁸ ĩninqe Wængonguī, Adocanque ingante godō waadete ñimpo cæcæboimpa, āninqe tōmengā ingante do godō waadete ñimpo cæcampa. Wæætē wacā ingante guiquēnē, Godō cæbo ate mīmō omædengā bacæcäimpa, āninqe Wængonguī tōmengā ingante do cæcā ate edæ mīmō omædengā bate wæcampa.

¹⁹ Mǎnōmainō ante yewæmōmo adinque bitō wabānō iīmaī anguīmi, ante awædō. “ĩñæmpa mönitō Wængonguī nānō ānō ante Baa ānāmaī iñömōnite tōmengā, Mīnitō beyænque impa, ante quīnante piinte angāā.” Mǎnōmainō ante āmitawoo. ²⁰ Bitō iñæmpa önōmique ĩnōmi inte Wængonguī ingante wæætēdō wæætē āmii. Nē badongā ingante tōmengā nānō nē badōninca incæ dicæ, “Botō ĩmote quīnante mǎnōmaī badōwēmii,” ante dicæ anguīi. ²¹ Nē bædongā iñömō daibo pancaiya æninqe waa pōni wamoncade bædinque ado daibo pancaiya æninqe önonque ewenguincade bæyongante æcānō nē bædingā ingante Baa anguingāā. Nē bædongā iñömō nē ānongā inte bæcampa. Edæ Baa anguīmii.

²² Wængonguī nānō nē piināni iñömō tōmēnāni nāni omæe ewente wæquinque wiwa cæyōnānite tōmengā piyænē cædinque wantæpiyæ pānāmaī inte ee ongongantawo. ĩñæmpa tōmengā nānō piimāmo ante adinque do wæcædānimpā, ante cædinque ayæ tōmengā nānō tæi pīñæmāmo ante edonque acædānimpā, ante cædinque Wængonguī mǎnōmaī ee ongongā apa ānewēē. ²³ Ayæ wæætē, Botō waadete godō waa cæbo ænāni inte edæ tōmēnāni iñömō botō ñāo bai botō emōnō ante acædānimpā, ante cædinque Wængonguī mǎnōmaī pānāmaī inte edæ ee cæcampa. Wæætē, Tōmēnāni ñāo iñömō quēwencædānimpā, ante tōmengā godō badongā ate tōmēnāni ñāo bai emōnānīpa. ²⁴ Edæ möni oodeocabo iñömōnite mīnitō oodeomīni ĩnāmaī iñōmīnite Wængonguī mönō tōmāmō ĩmonte mǎnōmaī cæcæte ante aa pegacäimpa. ²⁵ Wængonguī iīmaī angampa, ante Ootea wodi yewæmongacäimpa.

“Botō guidēnāni ĩnāmaī iñōnānite botō wæætē,

Botō guidēmīni, ante apænecæboimpa.

Onquiyængā botō nē waadedāmaī ingaingā iñongante botō wæætē,

Botō nē waadebi ĩmīpa, ancæboimpa.

²⁶ Ayæ, ‘Botö guidëmini inämaï iminipa,’ ante botö ongonte äñömö adoyömö ongön-
inque

botö wæætë edæ, ‘Botö Wængonguimo në Quëwëmo wëmini iminipa,’ ancæboimpa.”
Ante adocä Wængonguï nänö äñö ante yewæmongacäimpa. ²⁷ Idægoidi inänitedö
ante yedæ äninque Itaiya wodi iïmaï apænægacäimpa. “Gäwapæ wedeca ëmönaicoo
nanguï pönï öñö bai idægoidi adopodäni nanguï pönï inäni incæte pancadäniya guiyä
wææntodönï bai mänimpodänique quëwencädänimpa. ²⁸ Edæ Wængonguï, Inguipoga
quëwënäni inänite apænte äninque botö angainö bai do edæ cæcæboimpa, ante në
apænegaingä inte tömengä adocä, Idæwaa, ante quingæ pönï edæ iinque cæcæcäimpa,”
ante Itaiya wodi yewæmongacäimpa. ²⁹ Adocä Itaiya wëënë iïmainö ante nänö apæne-
gainö bai impa.

“Mönö Awënë në Tæiyæ Awënë tæï piñænongå inte dodäni inänite, Minitö pæinäni
yebænte nanguï inäni bacädänimpa, ante cædinque pancadäniya inänite ata
cæpocä quëwengadänimpa. Mänömaï ante cædämaï ingä bai,
mönö wæætë Todömä quëwengainäni bai dæ badinque Gömoda näni quëwëñömö dæ ba
bai mönö adobai edæ dæ bacädömöimpa,” ante nänö angainö bai impa.

Idægoidi adobai pönëninque quëwenguëñänäni inänipa

³⁰ İninque æbänö ante anguiï. Oodeo inämaï inäni guiquënë, Nö entawëmöni
bacæmönimpa, ante änämaï ingadänimpa. Incæte Wængonguï godö cæcä beyænque
tömënanï wede pönëninque wede näni pönëno beyænque Wængonguï ayongä nö
entawënanï do badänipa. ³¹ Idægoidi guiquënë, Nö cædäni, ante möni wææ angainö
beyænque nö entawëmöni bacæminimpa, ante në angainäni inte eyepæ cædämaï
inänipa. ³² Quinante eyepæ cædämaï inänii. Tömënanï wede pönënamäi inäni inte
wæætë edæ, Mönö nanguï cædinque nö cæmöni bacæmönimpa, äninque oda cæte näni
pönëno beyænque dicaboga tee tëwate bai cædinque eyepæ cædämaï ingadänimpa.
³³ Edæ do Wængonguï beyæ yewæmongatimpa.

“Aquënë quëwënanii. Botö Codito ingante Tiöno näni quëwëñömö dica bai gö cæbo
gongængä adinque edæ
waodäni dicaboga tee tëwate bai pönënamäi inäni inte tæ go wææncädänimpa.
Tömengä adocä ingante në pönengä guiquënë cöwë edæ guingo imönämaï inte
quëwencæcäimpa,”
ante yewæmongatimpa.

10

¹ Botö töninamini ëñeedäni. Idægoidi quëwencädänimpa, ante botö mimönë nan-
guï äinente wædinque Wængonguï ingante apænedinque botö, Bitö æmi beyænque
quëwencädänimpa, ante cöwë apænebopa. ² Wængonguï beyæ nö cæcæimpa, ante
cæinente wædänipa, ante näwangä impa. Incæte tömënanï, Wængonguï beyæ nö
cæcæte ante æbänö cæquiï, ante ëñënamäi inäni inte önonque cæte wædänipa. Botö,
Mänömaï impa, ante në apænebo inömo imopa. ³ Edæ Wængonguï pönö badongä ate
mönö tömengä ayongä nö entawëmö bamompa, ante ëñënamäi inäni inte idægoidi
iñömö, Nämä mönö cædö beyænque nö cæmö bacæimpa, ante cædinque edæ oda
cægadänimpa. Mänömaï cædinque tömënanï Wængonguï nänö nö cægainö ante edæ
Baa angadänimpa. ⁴ Nö cæmö bacæte ante Wængonguï nänö wææ angainö ante
ëñente cæquëñëmö inte mönö tömämö wiï eyepæ inte wægamöimpa. Mänömaï
inte wæyömonte Codito iñömö, Mini pönencabo Wængonguï ayongä nö entawëmini
bacæminimpa, ante cædinque mäninö Wængonguï nänö wææ angainö ante tömänö
ante iinque cægacäimpa. İninque tömengä mänömaï iinque cæcä adinque Wængonguï
mönö imonte wæætë wææ änämaï ingampa.

⁵ İïmaï cædäni, ante botö wææ angainö ëñente cædinque nö cædäni badänipa,
ante Möitee wodi iïmaï ante yewæmongacäimpa. “Në ëñente cæcä iñömö tömengä
nänö ëñente cædö beyænque quëwencæcäimpa,” ante yewæmongacäimpa. ⁶ Wæætë,

Mönö wede pönencabo æbänö cæte Wængonguī ayongä nö entawëmö imöö, ante iīmaī ante adocä yewæmongacäimpa. “Bitö, ‘Æcänö öönædë æi äñete wæænguingää,’ ante nämäneque änämaī ie.” Mänömaī ante tömengä, Codito ingante æi äñete wæencæte ante mönö pönänämaī ingäimpa, ante ancæte ante yewæmongacäimpa. Iñæmpa Codito pönämaī ingampa diyæ æite mäwæmi wæænguingää. Dobæ edæ inguipoga pongacäimpa. ⁷ “Ayæ, ‘Æcänö tadömengadæ wæi äñete ænguingää,’ ante änämaī ie.” Iñæmpa Codito ayæ öñongampa diyæ wæite mämi æænguingää. Edæ Codito dobæ ñäni ömæmonte quëwengampa.

⁸ Iñinque, Mönö wede pönencabo æbänö nö cæmö bamöö, ante æbänö ante yewæmongacäi. Edæ, Wede pönengäimpa, ante mönitö apænemöni mini ëñëniñe ante adode ante iīmaī ante yewæmongacäimpa. “Wængonguī nänö nö änöne iñömö edæ bitö weca eyequei pönī ënepa. Edæ bitö önöne tedeyömi bitö mīmöno pönëñömi tömengä nänö nö änöne edæ adoyömo pönī ënepa.” ⁹ Æbänö cæte quëwenguī, ante iīmaī ante ënepa. Itota Codito Tæiyæ Awënë inongä ingampa, ante bitö önöneca apænedinque, Itota Codito wænte öñöñongante Wængonguī angä ñäni ömæmongacäimpa, ante bitö mīmöno pönëmi adinque tömengä ængä beyænque quëwencæbiimpa, ante adode incæ ënepa. ¹⁰ Mīmöno edæ wede pönëniñe mönö Wængonguī ayongä nö entawëmö bamompa. Mänömainö ante wede pönëmopa, ante önöneca apæneyömonte tömengä ængä beyænque mönö quëwëmompa.

¹¹ Codito ingantedö ante apænedinque, “Tömengä ingante në wede pönengä iñömö tömengä edæ guingo imönämaī incæcäimpa,” ante Wængonguī angä ëñente yewæmongadänimpa. ¹² Edæ mönitö oodeomöni iñömönite minitö wæætë oodeomini inämaī iñöminite mönö tömämö imonte adinque mönö Awënë iñömö edæ, Adoyömo pönī iminipa, ante acampa. Iñinque tömengä adocä tömämö Awënë inongä ingampa. Ayæ tömengä ingante aa pemö ëñëniñe tömengä iñömö edæ tömämö imonte nanguī pönī pönö cæcä æmompä.

¹³ Iīmaī ante Wængonguī beyæ ante yewæmongatimpa. “Mönö Awënë ëmowo ante apænedinque aa pedäni ëñëniñe mönö Awënë iñömö edæ tömënäni tömänäni inänite ængä beyænque quëwencædänimpa.” ¹⁴ Iñinque tömengä ingante në pönänämaī inäni iñömö ædö cæte tömengä ingante aa pequänäni. Ayæ tömengä ëmowo ante ëñänämaī inäni iñömö tömengä ingante ædö cæte pönenguänäni. Ayæ tömengä ëmowo ante wadäni gote apænedämaī iñönäni tömënäni ædö cæte ëñenguänäni. ¹⁵ Ayæ edæ wadäni da godönämaī iñönäni në apænequënänäni wæætë ædö cæte gote apænequänäni. Iīmainö ante edæ Wængonguī beyæ ante yewæmongatimpa. “Tömengä waa pönī nänö cægäinö ante në watapæ apænedäni iñömö tömënäni nani apænece gote cægönüwa iñömö edæ waa pönī ëwadänipa,” ante nani yewæmonte angäinö bai impa. Edæ në apænece godäni inänite Wængonguī waa acampa.

¹⁶ Mönö Awënë ingantedö ante watapæ apænedäni ëñëniñe idægoidi pancadäniya Ao angadänimpa. Pancadäniya guiquënë Baa angadänimpa. Tömënäni mänömainö nani cædinö ante Itaiya wodi iīmaī ante yewæmongacäimpa. “Awënë Wængonguī ëñëmi. Mönitö apænemöni tömënäni nani ëñënö ante edæ æcänö ëñente pönengää. Iñæmpa në pönengä iñömö edæ dæ angä awædö,” ante yewæmongacäimpa. ¹⁷ Iñinque gode änäni ate në ëñëniñe wede pönänäni badänipa. Ayæ Codito nänö änönö ante gode ante apænedäni beyænque në ëñëniñe badänipa. ¹⁸ Iñinque botö, Mänünö ante idægoidi gobæ ongönänipa diyæ ëñänämaī inguänäni, ämopa. Do ëñëniñitapa, ante edæ iīmaī ante Wængonguī beyæ yewæmongatimpa.

“Në apænedäni inguipoga tömäo gote tededäni ëñëniñe.

Wadäni inguipoga nani quëwenganca quëwëñönänite mänünö tömënäni nani apænedö ante do ëñëniñe,” ante yewæmongatimpa.

¹⁹ Ayæ wæætë, Idægoidi önömonca ëñëniñe ömæcadäni inänipa diyæ ëñänämaī inguänäni. Do ëñëniñitapa. Edæ Möitee wodi incæ iīmaī ante yewæmongacäimpa.

“Wadäni önönäniñe iñönänite botö godö waa cæbo adinque

mīni idægocabo wæætē, Mōnitō īmōnite wīi pōnō cæbii, ante piinte wæcæminimpa. Ayæ wadāni ocai ōmæcadāni īñōnānite botō godō waa cæbo adinque mīnitō wæætē nē piinte amīni bacæminimpa,” Ante cæcæte ante Wængonguī pōnō cægacāimpa. ²⁰ Itaiya wodi guiquēnē Wængonguī beyæ ante guīñēnāmaī inte apænægacāimpa. “Wadāni īñōmō botō īmote ante diqui diqui mīnāmaī īnāni incæte do adānitapa. Ayæ, Wængonguī ingante aīnēmōnīpa, ante ānāmaī īñōnānite, Botō īmote aedāni, ante botō odōmōmo adānitapa.”

²¹ Ānīnque Itaiya wodi idægoidi īnānitedō ante apænedinque, “Ēñēnāmaī inte Baa ānōnāni īñōnānite botō, Pōedāni, ante tōmāā itædē ōnompo compo compo cæbo incæte pōnāmaī īnānitapa.”

11

Idægoidi pancadāniya īnānite Wængonguī apænte ængā

¹ Īnīnque botō īīmaī ante apænebopa. Tōmengā quīnāni īñōnānite Wængonguī dicæ idægoidi īnānite Baa angantawogaa. Īñæmpa botō adobo nāwā idægobo īmopa. Abadō wodi pæīmo īnōmo inte botō edæ Beencaminō wodi pæīmo īnōmo inte tōmengā pæīnāni tōnō adocabobo tōmēmo īnōmo īmopa. ² Idægoidi botō quīnāni incādānīpa, ānīnque Wængonguī wēēnēñedē pōnī mōnitō īmōnite adinque do apænte ængacāimpa. Īnīnque mōnitō tōmengā nānō nē agaīmōni īñōmōnite tōmengā cōwē Baa ānāmaī ingacāimpa. Idægoidi īnānite piinte ānīnque Ediya wodi Wængonguī ingante apænægacāimpa, ante æbānō yewæmonte ongompa, ante mīnitō adāmaī īmīnitawo.

³ “Awēnē ēñēmi. Bitō beyæ nē apænedāni īnānite wænōnīnque idægoidi godōmenque cædinque, Wængonguī quī, ante nāni iya tāinca bæ tadinque edæ wido cædānitapa. Ayæ botō adoboque inte edæ ayæ quēwēñōmote botō īmote wænōncæte ante cædāni wæbo abi.” ⁴ Āñongante Wængonguī, “Īñæmpa botō tiæte mīido ganca mānimpodāni īnānite, Botō quīnāni īnānīpa, ante wææ gompobo quēwēnāni apa quēwēe. Wadāni nāni, Mōnitō wængonguī Baado ingampa, nāni ānongā weca botō quīnāni īñōmō edæ da guicapodāmaī īnānīpa cæbii,” angacāimpa, ante nāni yewæmongainta adāmaī imīnitawoo.

⁵ Nōwo īñōmō edæ adobaī impa. Idægomōni mōni cabo incæ mēa pōnī īmōni inte Wængonguī ingante Baa ānāmaī īñōmōnite tōmengā mōnitō īmōnite waadete pōnō cædinque, Botō quīmīni imīnīpa, ante apænte ængampa. ⁶ Īnīnque, Wængonguī waadete pōnō cædinque apænte ængampa, ante adinque tōmēmonque waa cæmō beyæ ædō cæte Wængonguī apænte ænguingāā. Īñæmpa tōmēmonque waa cæmō beyæ Wængonguī mōnō imonte apænte ængā baī, Wængonguī waadete pōnō cæcampa, ante ædō cæte anguēnē ī. Wæætē edæ tōmēmonque waa cæmō beyæ Wængonguī apænte ængā baī tōmengā adocā ædō cæte nānō waadete pōnō cædō beyænque mōnō imonte apænte ænguēnengāā. Īñæmpa Wængonguī waadete pōnō cædinque apænte ængā īnīnque, Tōmēmonque waa cæmōmpa, ante ædō cæte anguīī.

⁷ Mānōmaī ī īnīnque æbānō ante anguīī. Edæ idægoidi tōmēnāni nāni nanguī æīnēnō ante diqui diqui mīnte ænāmaī īñōnāni mōnō īñōmō Wængonguī nānō nē apænte ængāimō īmō īñōmō edæ do æntamōmpa. Nē ænāmaī īnāni īnānite Wængonguī ee ayongante mīmō ōmædēnāni bagadānīpa. ⁸ Īīmaī ante Wængonguī beyæ nāni yewæmongāinō baī ingatīpa. “Tōmēnāni īnānite Wængonguī godō cæcā ate mōwo mōīnente baī wædāni inte tōmēnāni awīnca ēmōnāni incæ nōwo ganca adāmaī inte wædānīpa. Ōnōmonca ēmoncadāni incæ edæ ēñēnāmaī inte wædānīpa,” ante yewæmongatīpa. ⁹ Ayæ awēnē odeye Dabii wodi Wængonguī ingante apænedinque īīmaīnō ante apænægacāimpa.

“Wængonguī ēñēmi. Waodāni nāni wænguinque gote ææmæ bedāni baī cædinque īīnāni īñōmō edæ wapiticæ nāni towēnōnō ante gote towēnānīpa. Incæte bitō godō cæbi ate tōmēnāni nāni towēnō beyæ edæ wæncādānīpa, āmopa.

Tömənäni tee tēwate bai oda cæte wæyönäni bitö godö pämi wæcædänimpa, ämopa.

¹⁰ Bitö godö cæbi ate tömənäni awinca edæ mæ mämönte bai bamöningue adämaï incædänimpa.

Ayæ teëmë mongæningue bocæ ñongænte cöwë wæcædänimpa, ämopa,”
ante awënë Dabii wodi Wængonguï ingante apænecacäimpa.

Idægoidi inämaï inäni quëwänäni, ante

¹¹ Ñöwo wæætë iïmaï ämopa. Do oda cædäni incæ idægoidi iñömö dicæ æmæwo tæ go wæænguïnäni inänitawogaa. Iñæmpa ayæ ate ængæ gantidique tömənäni në quëwenguïnäni inänipa. Incæte Wængonguï, Tömənäni ëñänämaï cædäni beyæ wadäni quëwänäni adingue idægoidi wæætë, Mönö quëwengade impa, ante piïnte wæcædänimpa, ante godö cæcä ate idægoidi edæ oda cægadänimpa. ¹² Iningue idægoidi ëñänämaï cædinque ænämäi inäni beyæ mönö inguipoga tömämæ mönö quëwencabo wæætë edæ nanguï pönï æmompä. Tömənäni ænämäi inte ömæpodäni wädäni beyænque mïnitö idægomïni inämaï imïni wæætë nanguï pönï æmïnipa. Iningue idægoidi nänï quëwenguïmämo iïncayæ ate eyepæ pönï ænänï ate edæ æbänö baquïï. Edæ idægoidi iïncayæ ate eyepæ pönï ænte entawänäni beyænque mönö waocabo tömämö godömenque nanguï pönï ænte entawengæimpa.

¹³ Idægomïni inämaï imïni imïnite apænebo ëñeedäni. Botö imote Codito, Idægoidi inämaï inäni inänite apænecæbiimpa, ante da godongä gotabopa. Iningue botö, Mïnitö imïnite në apænebo inte tobopa, ante nanguï tede bopa. ¹⁴ Edæ, Idægoidi inämaï inäni incæ do quëwänäni, ante botö tedebo ëñente wædinque botö guidänäni idægoidi wæætë, Mönitö adobaï quëwencæmönimpa, ante piïnte wæcædänimpa, ante tede bopa. Ayæ adodäni pancadäniya godömenque pönëningue quëwencædänimpa, ante cædinque botö edæ nanguï tede bopa.

¹⁵ Idægoidi inänite Baa ante wido cædinque Wængonguï wæætë inguipoga tömämæ quëwëmö iñömönte piyänë cædinque edæ waadete pönö cægacäimpa. Iningue tömengä iïncayæ ate idægoidi inänite Ao ante ængä ate edæ æbänö baquïï. Mänïñedë ate edæ mönö wænte öñonte bai inömö inte edæ mönö ñäni ömæmönte quëwengæimpa.

¹⁶ Iïmaï ante pönengæimpa. Päö pancaboga pancæte bai wædænque inäni inte täno nänï pönente quëwencabo iñömö tæiyæ waëmö inäni iningue iïncayæ nänï pönente quëwencabo guiquënë päö babo bai adobaï inäni inte tömənäni adobaï tæiyæ waëmö inänipa, ante pönengæimpa. Täno pönengäinänï guiquënë tæcæguinto bai inönänï inte tæiyæ waëmö inäni iningue edæ iïncayæ pönänäni guiquënë yæpænto bai inönänï inte adobaï tæiyæ waëmö inänipa.

¹⁷ Odibowæ önonque pæwæ incæ wainca incacæimpa, ante cædinque waocä tömengä nänö mingaiwæ waa pönï incawæ adingue yæpængö nämænte godö önonque pæwæ yæpæntoga mine timongä aminipa. Idægoidi iñömö waocä nänö minte pæwæ bai iñönänite Wængonguï pancadäniya inänite yæpængö wæi ñæmænte bai wido cæcä wädänipa. Tömənäni mänömaï wæyönäni bitö guiquënë önonque pæwæ yæpængö bai imitapa. Incæte Wængonguï, Odibowæ yæpængoncoo bai tæcæguinto beyænque odæ yate bai pæte incacæimpa, ante odibowæ yæpæntoga godö mïni tinte bai cædinque bitö imite waadete pönö cæcä ate bitö idægoidi beyænque mïimi inte ongömipa. ¹⁸ Mänömaï i iningue bitö wæætë edæ, Wængonguï botö imote pönö cæcæte ante tömənäni inänite wido cæcampa, ante bitö nämä ængö cæcæte ante cædinque idægoidi inänite ante wïi piïnte ancæbiimpa. Iñæmpa tæcæguinto ëwa bai inäni inte idægoidi iñömö edæ bitö beyæ dicæ quëwänäniyaa. Wæætë edæ tæcæguinto ëwa bai inäni beyænque bitö quëwëmipa, ante apænebo ëñëningue bitö piïmi iningue, Mänömaï impa, ante täno pönë.

¹⁹ Iningue bitö, “Odæ yacæimpa, ante cædinque godö mine timönäni bai Wængonguï botö imote pönö cæcæte ante cædinque idægoidi inänite wæætë wido cæcampa,” ante

pönemitawoo. ²⁰ Bitö pönönö edæ nāwangä impa. Incæte edæ tömënäni nāni pönënāmaï inö beyænque Wængonguï tömënäni inänite wido cægacäimpa. Bitö guiquënë wede bitö pönönö beyænque miimi inte ongömipa. Inique bitö guñente wædinque edæ nāmā ængö cædāmaï inte edæ, Botö waëmö imo beyæ cæcantapa, ante pönënāmaï imāwe. ²¹ Inæmpa nāwā yæpængö bai inäni inänite Wængonguï tapodāmaï inongä inte bitö önömique inömite dicæ ata cæpoquingä.

²² Inique, Wængonguï nē waadete cædongä incæ cōwē nē apænte pangä ingampa, ante pönē. Tömengä inömö nē oda cædāni inänite pangampa. Wæætē bitö nē waadete cædongä nempo quëwēmi inique tömengä bitö imite waadete cæbaingampa. Incæte tömengä nempo wii quëwēmi inique tömengä wæætē bitö imite edæ wæi ñæmænte bai wido cæbaingampa. ²³ Idægoidi guiquënë, Idæwaa pönënāmaï inte awädö, ante ocæ emænte pönäni adinque Wængonguï nē tæi piñænongä inte tömënäni inänite wæætē ado awæ yæpæntoga godö mini timonte bai pönö cæcä ate miināni edæ ongömaïnānipa. ²⁴ Waodāni waa incawæ yæpængö nāmænte ononque pæwæ yæpæntoga godö nāni mine timönö bai Wængonguï wii adobai cæcampa. Wæætē edæ bitö ononque pædiwæ yæpængö bai inömite tömengä waadete pönö nāmænte bai cædinque, Nāwā idægobi babipa, ante waa pæwæ yæpæntoga godö mini timonte bai cæcampa. Bitö imite mänömaï waa cæcä inongä inte tömengä idægoidi inänite æbänö godömenque waa cæbaingä. Tömënäni inömö waa pöni pæwæ yæpængoncoo tömengä nänö wæi ñæmæncoo bai inte wæyönänite adowænē yæpæntoga godö mine timonte bai cædinque tömengä tömënäni inänite, Nāwā idægomini inte minitö wæætē miimini ongoncæminimpa, ante do cæcæcäimpa.

Idægoidi iinque bayonte quëwencædänimpa, ante

²⁵ Inänäni ëñëedäni. Minitö nāmā ængö cædāmaï incæminimpa, ante cædinque botö wëñëñedē mini ëñënāmaï ingainö ante edæ wææ amopa. Minitö idægomini ināmaï imini mini pönencabo eyepæ pöni mini yebænganca idægoidi inömö ñöwo mimö ömædënäni inte wædönäni inte edæ mäninganca cōwē mimö ömædënäni inte wæcædänimpa. ²⁶ Incayæ ate guiquënë idægoidi tömänäni quëwenguināni inänipa. Edæ iimaï ante yewæmonte ongompa.

“Mönö ñä cæyænte bai tee mönete bai wæwëñömonte nē Ñimpo Cæcä inömö Tiöno inömö quëwente poncæcäimpa.

Aacobo wodi pæināni Wængonguï ingante ëñënāmaï cæte quëwënäni adinque nē Ñimpo Cæcä inömö tömënäni nāni ëñënāmaï entawönö wadæ cæcä ate tömënäni wæætē ëñente cæte quëwencædänimpa.

²⁷ Inique wënæ wënæ nāni cægainö ante wadæ cæte wido cædinque Wængonguï tömënäni inänite iimaï angampa.

Botö pönö cæbo ate minitö Ao amini inique edæ mönö godongämæ waa cæte quëwengäimpa, ante Wængonguï angampa,” ante yewæmongadänimpa.

²⁸ Codito ingantedö ante watapæ ëñente pönëninque minitö idægomini ināmaï imini do quëwëmini beyæ idægoidi wæætē Wængonguï ingante piinte adänipa. Incæte tömënäni mæmæidi inänite nē apænte ængaingä inte Wængonguï wæætē mæmæidi beyænque ante pönëninque ñöwodäni inänite waadete pönengampa. ²⁹ Edæ waomö imonte quincömë pönongä æñömonte Wængonguï adodö ö ænāmaï ingampa. Ayæ adobai waomö imonte aa pedinque tömengä wadö ante änāmaï inte edæ adodö ante edæ cōwē aa pecampa. ³⁰ Minitö wëñëñedē ëñënāmaï cæmini incæte Wængonguï inömö idægoidi ëñënāmaï cædāni beyæ minitö iminite wæætē waadete cædinque pönö ata cæpocä quëwëminipa. ³¹ Ayæ adobai minitö iminite pönö waadete ata cæpocä quëwëmini beyæ idægoidi ëñënāmaï cædāni inönänite Wængonguï ñöwo tömënäni inänite adobai waadete cædinque godö ata cæpocä quëwënanimpa. ³² Inique tömengä, Mini waocabo tömämini iminite botö waadete cædinque pönö ata cæpocæboimpa, ante

cædinque, Mîni êñênâmaï cæcabo inöminî inte mînitö nämä eö toyænte aamö cædâmaï incæminîmpa, ante tömämö ïmonte ñä cæyænte baï cæcä wæcongamöïmpa.

³³ Ìnînce Wængonguï nanguï pönî waadete entawênongä ïñongante tömengä nänö pönö cædönö ante mönö ædö cæte tee mante aquïi. Tömengä tömancoo do adongä inte nanguï pönî êñênongä inte cæcä ingänö anguënë. Tömengä edæ, Æbänö ï, ante do againgä inte edæ, Æbänö cæquïi, ante do apænte ãñongante mönö waocabo wæætë tömengä nänö cædö ante ædö cæte êñenguïi. Tömengä ædönö ponte ædönö gocää, ante pönente wædinque mönö tömengä önöwa amompa diyæ taadö aquïi. ³⁴ Edæ ïmaï ante nâni yewæmongainö baï impa. “Mönö Awënë æbänö pönengää, ante pönente wædinque æcänö êñengää. Ayæ, Ìmaï cæquï impa, ante mönö tömengä ingante edæ ædö cæte odömonte apænequïi. ³⁵ Wængonguï ingante æcänö do godongä inte wæætë, Bitö debe ïmipa, ante anguingää. Ìñæmpa tömengä ingante godömompa diyæ debe inguingää,” ante Itaiya wodi nänö yewæmongainö baï impa. ³⁶ Edæ tömengä nänö pönongaincooque inte edæ tömancoo ongompa. Mönö waocabo ïñömö tömengä badongä beyænque tömengä quimö baquinque ongömompa. Ayæ adobaï edæ tömengä badongä beyænque tömancoo tömengä quincocooque edæ baquinque ongoncoopa. Edæ tömengä adocanque pönî ñäö entawente edæ cöwë tæï ëmoncæcäïmpa. Mänömaï impa, ante mönö, Amëë, ante apænecäïmpa.

12

Wængonguï quimö ïmompä, ante cæte quëwengäïmpä

¹ Botö tönîñamîni êñëedâni. Wængonguï waadete pönö waa cæcä ængaïmîni inte mînitö ïmaï cæedâni, ante botö nanguï ämopa. Wængonguï quï, ante baö pædæ godönâni waa ængä baï mînitö adobaï edæ, Wængonguï quimöni ïmönîpa, ante mïimîni inte edæ tömengä ingante nämä pædæ godömîni ængäedâni. Mänömaï cædinque mînitö tömengä önöwa inö mîni ædæ wæante nanguï cæquënënö ante edæ do cæmîni incæminîmpa. Mänömaï godömîni ænînce tömengä wæætë edæ, Botö ayömo tæiyæ waëmö pönömîni æmopa, ante tocæcäïmpa. ² Inguipogaque ante pönente mîni cægäinö ante ñöwo ñimpo cædinque mînitö mïimîni mîni quëwenguinque ante edæ ocai mïinque encate baï nöingä ante pönëedâni. Mänömaï cædinque mînitö, Wængonguï waa pönî nänö änönö ante, Æbänö ï, ante ædæmö êñênînce, Tömengä nänö änö ïñömö eyepæ pönî impa, ante êñencæminîmpa. Mänînö ante êñente cæte quëwëmö inte mönö tömengä tönö godongämæ waa tocäïmpa.

³ Wængonguï waadete pönö cæcä ate botö në apænebo badîmo inte ïmaï ante apænebopa. Mînitö nämä pönëninque, Ñænæmo ïmopa, ante pönênâmaï ïedâni. Wængonguï pönö badongä ate mînitö wede pönëmîni badîmîni inte mîni wede pönenganca mäningancaque pönëninque ïmaïnö ante pönëedâni. Botö önömoque baï inömo ïmopa, ante ocai encamîni inte töö pönî pönëedâni. ⁴ Mönö baö adoyonque pönî êñamö incæte wïi adodonque mönö cæquënënö ante êñamompa. Ìnînce mönö aquinö ante awinca ëmönînce mönö dao dao goquinö ante önöwa ëwamompa. Ayæ wadö mönö cæquïnö ante wayö êñadinque mönö wæætë wadö mönö cæquïnö ante wayö êñadinque wayö wayö mönö êñacoo êñamompa. ⁵ Ìnînce wayö wayö êñamö incæ mönö baö pæ pagænguincocoo adoyonque ï baï mönö adobaï Codito nempo mönö quëwencabo nanguï pönî ïmö incæte adocabomö ïñömö ïmompä.

⁶ Ìnînce mönö adocabomö ïñömönte Wængonguï waadete pönö cædinque mönö ïmonte wadö wadö mönö cæquïnö ante tömänö pönongä æmompä. Ìnînce mönö tömengä da pönongä mönö ænganca edæ adoganca wadö wadö cæmompä. Mänömaï ænte cædömö ïñömönte pancamîniya ïmînite Wængonguï pönö apænecä êñëninque mînitö tömengä beyæ në apænemîni do badînce wede mîni pönenganca apænëedâni.

⁷ Wæætë wamîni ïmînite Wængonguï pönö cæcä ænînce mînitö wadâni inänite në cæmîni do badînce wadâni beyæ cæcæminîmpa. Wæætë wamîni ïmînite tömengä pönö cædinque odömonte apænecä êñëninque mînitö në odömonte apænemîni do

badinque odömōnte apænecæmīnīmpa. ⁸ Ayæ wæætē wamīni īmīnite Wængonguī pōnō waadete apænecā ēñēnīnque nē waadete apænemīni badinque mīnitō īñōmō wæntæye inte wædāni īnānite ædæmō apænemīni ēñēnīnque tōmēnāni wæætē edæ wampo pōnēnīnque tæi pīñænte cæcædānīmpa. Wamīni īmīnite Wængonguī pōnongā ænīnque nē nēnempomīni badinque mīnitō, Tōmēmōni quī, ante wædāmaī inte wæætē wadāni nāni ænguēnēnō ante eyepæ godōmīni æncædānīmpa. Wamīni īmīnite Wængonguī pōnō angā ēñēnīnque mīnitō wæætē awēnēidi baī nē āmīni badinque wadāni īnānite nōingā cæte awēnēidi baī ancæmīnīmpa. Wamīni īmīnite Wængonguī ædæmō waadete pōnō waa cæcā ænīnque mīnitō wæætē ædæmō waadete cæmīni do badinque wadāni īnānite ædæmō waadete godō waa cædinque edæ wædāmaī inte tocæmīnīmpa.

Codito nempo quēwēnīnque īīmaī cæcæīmpa, ante

⁹ Botō waadete pōnēmōpa, ante tēdemīni īnīnque mīnitō nōinō cæte waadete pōnencæmīnīmpa. Wīwa mīni cædōnō ante pīīnīnque wido cædāni. Wæætē, Quīnō waa cæquīī, ante adīnque mānīnō ante ænte mīnitō mīmōnē ædæmō entawēnīnque cōwē waa cæte quēwēdāni. ¹⁰ Mōnō waadete pōnencabo īmōpa, ante pōnēnīnque wacā ingā wacā ingā waadete pōnente cædāni. Wadāni ñænænāni īnānīpa, ante mīnitō tōmēnāni īnānite ængō cæte baī cædinque wæætē, Botō wædāmo īmōpa, ante nāmā ængō cædāmaī īedāni.

¹¹ Tæi pīñænte ēwocadinque mōnō Awēnē beyæ ante wæntædāmaī inte cædāni.

¹² Watapæ bacæīmpa, ante pōnēnīnque tocæmīnīmpa. Caate wæwēmīni incæte wæntæye badāmaī inte ee cædāni. Nīmpo cædāmaī inte Wængonguī ingante cōwē apæneedāni.

¹³ Wængonguī quīnāni ænguēnēnāni inte wædāni adīnque mīnitō māincoo wæætē nēnempomīni æncædānīmpa. Ayæ, Botō oncōnē pō guīte cænte mōedāni, ante wadāni īnānite waadete cædāni.

¹⁴ Mīnitō īmīnite nē pīīnte cædāni īñōnānite mīnitō tōmēnāni īnānite waadete godō apæneedāni. Edæ tōmēnāni īnānite waadete apænedīnque, Wængonguī mīnitō īmīnite waa cæcæcāīmpa, ante apænedīnque wæætē pīīnte ānāmaī īedāni.

¹⁵ Nē watapæ todāni tōnō godongāmæ watapæ toedāni. Nē Ca wædāni tōnō mīnitō godongāmæ Ca ca wæedāni.

¹⁶ Mōnō pōnencabo īmōpa, ante adoyōmō pōnente quēwēdāni. Ōnōnānīque nāni nē ānōnāni tōnō godongāmæ cædinque, Botō ñænæmo īmōpa, ante pōnēnāmaī īedāni. Mīnitō, Wadāni pōnōmenque ocai encayōnāni botō godōmenque nanguī pōnī encabo īmōpa, ante nāmā ante pōnēnāmaī īedāni.

¹⁷ Wadāni mīnitō īmīnite pōnō wēnæ wēnæ cædāni adīnque mīnitō wæætē godō wēnæ wēnæ cædāmaī īedāni. Ayæ, Quīnō waa cæquīī, ante tōmānāni nāni waa adōnō ante adīnque mīnitō mānīnonque ante cædāni. ¹⁸ Eyepæ īmīni inte mīnitō cæganca cædinque tōmānāni tōnō godongāmæ piyænē cæte quēwēdāni. ¹⁹ Botō nē waademīni ēñēdāni. Mōnō Awēnē beyæ īīmaī ante yewæmongatīmpa. “Wēnæ wēnæ cædāni adīnque botō wēnæ wēnæ nāni cædinō beyæ ante nē apænte panguēnēmo inte tōmēmō eyepæ wæætē godō cæbo wæcædānīmpa, ante Awēnē angampa,” ante yewæmōnte ongōmpa cæmīnī. Mīnitō īmīnite pōnō wēnæ wēnæ cædāni wæmīni īnīnque edæ wæætē godō cædāmaī ee aedāni. Edæ nē āingā bate pānongā inte Wængonguī incæ pancæcāīmpa. ²⁰ Wæætē, “Bitō īmite nē pīīnte cædongā incæ gæwænte wæcā adīnque godōmi cængæ. Gue ænente wæcā adīnque godōmi becæ. Edæ mānōmaī waa cædinque edæ tōmēngā guingo imōnte nānō wæwēngūnque bitō tōmēngā ingante waa cæcæbiīmpa,” ante Wængonguī beyæ yewæmōnte ongō apa cæbī. ²¹ Tōmēnāni wēnæ wēnæ nāni cædō beyæ oda cædāmaī inte wæætē mānīnō ante wido cæte baī cædinque bitō waa cædinque edæ tæi ēmōnte gānā cæe.

13

¹ Gobiedöno awënë nempo waodäni ëñente cæte quëwencædänimpa, ante Wængongui incæ godö gö cæcä beyænque gobiedöno awënëidi badänipa. Edæ Wængongui mänömaï ante gö cædämaï ingä baï quingänö awënë inguëngä. Edæ dæ ancædönimpa. Ìninqe gobiedöno awënëidi ìnänite mönö tömämö Ao äninque ëñente cæcäimpa. ² Ìninqe awënë ingante æcänö Baa änaa tömengä nänö apænte pante wæquinque Wængongui nänö goncægäinö ante ëñänämaï inte edæ Baa angampa. ³ Nè waa cædäni guiquënë awënëidi ìnänite waa ate todinque guïñänämaï ìnänipa. Wæætë wënæ wënæ cædäni guiquënë awënëidi ìnänite guïñente wædänipa. Gobiedöno awënë ingante guïñänämaï inte quëwencæboimpa, ante bitö ämitawoo. Ìninqe bitö guïñänämaï inte quëwencæte ante waa cæcæbiimpa. Waa cæbi adinque tömengä, Bitö waa cæbi abopa, ante pönö waa cæcä ìninqe bitö guïñänämaï ìmaïmipa.

⁴ Botö ìmote nè cædongä inte mïnitö beyæ waa cæcæcäimpa, ante Wængongui gobiedöno awënë ingante godö gö cæcä ongongampa. Edæ Wængongui ingante nè cæcä ìnongä inte tömengä nè wënæ wënæ cæcä ingante nö cæte nè panguëngä ingampa. Ìninqe awënë yaëmë nè næængä inte wïi önonque næængampa cæbii. Wënæ wënæ cæbi ìninqe edæ guïñente wæcæbiimpa. ⁵ Ìninqe mönö, Pangä wæcæ wæ, äninque awënë ingante ëñente cæcäimpa. Ayæ pangä wæmö incæ wïi pangä wæmö incæ mönö mïmö nè entawente nämä apænte änomö inte mönö awënë ingante Ao ante ëñente edæ nöingä cæcäimpa. ⁶ Wængongui beyæ nè cædönäni inte awënëidi ìñömö tömënäni nempo quëwänäni ìnänite cöwë aadinque mäninqe cæte quëwänäni. Mänömaï ì ìninqe mïnitö, Awënëidi eyepæ æninque mönitö beyæ cæcædänimpa, ante tömënäni nani äinta pædæ godömïni ænänipa.

⁷ Æcämenque ingante cæquënëmïni ìmïni inte mïnitö tömänäni ìnänite mïni cæquënganca do godö cæmïni æncædänimpa. Awënë nempo quëwëñömonte tömengä eyepæ æninque mönö beyæ cæcæcäimpa, ante mïnitö awënë nänö äinta godonguënëmïni inte do godömïni ængædäni. Waocä ingante mïnitö guïñente ëñenguënëmïni ìmïni ìninqe tömengä ingante guïñente ëñeedäni. Waocä ingante mïnitö waa aquënëmïni ìmïni ìninqe edæ tömengä ingante waa aedäni.

⁸ Wacä ingante mïni cæquënönö ante edæ ee ongönämaï inte godö cæmïni ængä ate abæ tawænte gocæbiimpa. Wæætë wacä ingä wacä ingä waadete mïni pönenguënönö ante edæ godongämæ cöwë waadete pönenguënëmïni ìmïnipa. Wadäni ìnänite nè waadete pönengä ìñömö tömengä ìñömö Wængongui nänö, ìmaï cædäni, ante nänö wææ angäinö ante do ëñente cæcä ingampa. ⁹ Tömëmi nämä bitö waadete pönönö ganca wacä ingante adoganca waadete pönencæbiimpa, ante Möitee wodi yewæmongacäimpa. Mänine adodeque ante ëñente cædinque waocä Wængongui nänö wææ angäinö ante tömänö do ìninqe cæcampa. Edæ, “Bitö nänöogængä ìnämaï ìñongante godö guëa mönämaï ìe. Wacä ingante godö wänönämaï ìe. Wacä nänö ëadincoo adinque godö ænämaï ìe. Wacä wënæ wënæ cæcä atabopa, ante godö babæ wapiticæ apænedämaï ìe. Wacä qui ante æinente wædämaï ìe.” Mäninecoo Wængongui nänö wææ angäinecoo ante bitö waadete pönëmi beyænque tömäne do ìninqe cætimpa. Ayæ quïnemë godömenque wææ ante ì mänine adobaï bitö waadete pönëmi beyænque tömäne do ìninqe cætimpa. ¹⁰ Nè waadete pönengä ìñömö edæ wacä ingante cöwë wïwa cædämaï ingampa. Mänömaï beyæ nè ædæmö waadete pönänäni Wængongui nänö wææ angäinö ante ìninqe cædänipa.

¹¹ Ìninqe, Nöwoyedë æbänö oo baquïi, ante do ëñëninque mïnitö waadete pönente quëwëedäni. Edæ wëenëñedë mä mönö wede pönëñedë mïinguipo mönö quëwëguimämo ìñömö edæ mänïñedë edæ oo bacæ cædämaï ingatimpa. Nöwo guiquënë, Oo pönï bacäimpa, ante pönente wædinque mïnitö möwocodë öñömïni inte edæ ñäni ömæmöninqe mïmïni quëwëedäni. ¹² Wëmö ìñömö mönö wæwëmämo idæwaa edæ bapa. Mïinguipoga ñäö baï baquinque edæ oque pönente impa cæmöö. Wëmö ìñonte

mönö wënæ wënæ cædö æmæwo wido cædinque, mönö wæætë ñäö iñömö quëwën-
 inque edæ wææ cæquincoo wëñate bai cædinque nämä wææ gompotawengæimpa.
¹³ Mänömaï cædinque mönö itæde quëwënömö inte nö pönï cæcæimpa. Baonque
 ante mönö cæinëwënö ante towënämaï inte mönö ti nämæ nanguï bete quidi quidi
 dowënämaï ingæimpa. Mönö wacä tönö godö guëa mönämaï, cænguï eyepæ cæninque
 godömenque nanguï cænämaï ingæimpa. Wæætedö wæætë piïnte cædämaï inte mönö,
 Wacä bai bacæboimpa, ante piïnte adämaï ingæimpa. ¹⁴ Wæætë wææ cæquincoo
 entawente bai cædinque mïnitö nämä wææ gompotawencæte ante cædinque mönö
 Awënë Itota Codito ingante entawente quëwëedäni. Ayæ baonque ante mini cæinëwënö
 ante wido cædinque, Æbänö cæte wënæ wënæ cæquïmoo, ante cæcæte ante wædämaï
 iedäni.

14

Mïnitö tönïñadäni inänite piïnte änämaï iedäni, ante

¹ Wacä wïi ædæmö pönengä incæte mïnitö, Mönö pönencabo imompa, ante pönën-
 inque tömengä adocabocä nänö baquinque ämïni pongæedäni. Tömengä nänö pönënö
 ante wæætedö wæætë änämaï iedäni. ² Pancadäniya wede pönënanï inte cænguï
 adinque, Näwä cænguï impa, ante guiñënämaï inte quiëmë cænguï incæ edæ dobæ
 ade cænänipa. Wadäni guiquënë æmæ pönente beyæ, Tömää baö baacä impa, ante
 awente bai cædinque quingämenque baö incæ cænämaï inte onguipoiya pæcooque edæ
 cænänipa. ³ Incæte tömää cænguï në cænongä iñömö onguipoiya pæcooque në cænongä
 ingante piïnte adämaï incæcäimpa. Wacä ingante, Bitö önömique bai inömi inte edæ
 awente cænämaï imipa, ante änämaï incæcäimpa. Ayæ wæætë onguipoiya pæcooque
 në cænongä guiquënë baö në cænongä ingante, Baacä apa cæwëe, ante apænte ante
 piïnämaï incæcäimpa. Edæ në cænongä ingante Wængonguï Ao äninque, Botö quïmi
 imipa, ante do ængampa. ⁴ Iñæmpa tömengä wacä awënë ingante në cæcä iñongante
 bitö ædö cæte apænte ämii. Edæ tömengä awënë incæ, Waa cæbipa, angä wædinque
 edæ tömengä adiyæ täi ongömaingampa. Wæætë adocä tömengä awënë, Wënæ wënæ
 cæbipa, angä wædinque edæ tæ go wææmaingampa. Incæte edæ tömengä mönö
 Awënë ingante në cæcä iñongante mönö Awënë adocä incæ täi piñænongä inte eyepæ
 cædinque edæ æænö gö cæcä täi ongoncæcäimpa.

⁵ Ayæ wacä guiquënë, Pancaönaa godömenque waa ëönæpa, ante cæcæimpa, ante
 pönëñongante wacä guiquënë, Tömää itæde önönæque impa, ante pönengampa. In-
 inque mönö pönencabo wacä wadö wacä wadö pönëmö incæte mönö tömämö iñömö
 edæ, Nämä botö pönënonque ante botö nö pönente cæcæboimpa, ante edæ mäniinonque
 ante cæcæcäimpa. ⁶ Edæ, Pancaönaa godömenque waa ëönæpa, ante në pönengä
 guiquënë tömengä mönö Awënë ingante waa adinque mänömainö ante cæcampa.
 Pancaönaa wïi godömenque waa ëönæpa, ante në pönengä guiquënë tömengä adobai
 mönö Awënë ingante waa adinque mänömainö ante cæcampa. Baö në cænongä
 guiquënë Wængonguï ingante, Waa pönömi cæmopa, ante adobai mönö Awënë ingante
 waa adinque cængampa. Baö ate në awente cænämaï inongä guiquënë tömengä adobai
 Wængonguï ingante, Waa pönömi cæmopa, ante onguipoiya pæcooque cæninque mönö
 Awënë ingante waa adinque baö cænämaï ingampa.

⁷ Mönö pönencabo iñömonte æcämenque incæ nämä beyænque dicæ quëwengää.
 Dicæ nämä beyænque wængää. ⁸ Wæætë edæ quëwëmö ininque mönö Awënë beyænque
 quëwëmompa. Wæætë edæ wæmö ininque mönö Awënë beyænque wæmompa. Ininque
 quëwëmö incæ wæmö incæ mönö Awënë quïmö inömö inte quëwëninque tömengä
 quïmö inte edæ wæmompa. ⁹ Edæ do wængainäni beyæ ante miïmö quëwëmö beyæ
 ante Codito tömämö Awënë nänö baquinque edæ wænte ñäni ömæmongacäimpa.

¹⁰ Bitö guiquënë bitö tönïñacä ingante ædö cæte apænte ämii. Ayæ bitö tönïñacä
 ingante, Önömique bai imipa, ante quïnante ämii. Edæ Wængonguï nänö apænte

anguimpaa gäänë ongöñomonte tömengä tömämö imonte apænte ancæcäimpa cæbii.

¹¹ Edæ Wængongui beyæ ante iimaï ante yewæmonte ongompa.

“Mönö Awënë incæ, ‘Në Quëwëmo inömö inte edæ ämo ëñeedäni,’ angampa.

Ayæ, ‘Minitö tömämïni botö önöwa inö da guicapodique,

Bitö Wængongui inömi imipa, ante adoyömö apænecæminimpa,’ angampa.”

¹² Ante nani yewæmongainö bai iinque cædinqe mönö tömämö Wængongui weca ponte ongöninque mönö pönengainö ante mönö apænegainö ante mönö cægainö ante tömengä ingante edonque pönï apænecäimpa.

Wacä oda cæcæcäimpa, ante cædämaï incæbiimpa, ante

¹³ Mänömaï beyæ mönö wacä ingante apænte änämaï ingäimpa. Wæætë minitö, Waa cæcæboimpa, ante nämä wææ cædinqe, Botö tönïñacä taadö nänö goquinö ante ee acæboimpa, ante pönëedäni. Tömengä tee tëwate bai oda cædämaï incæcäimpa, ante nöingä cæquinque ante pönencæminimpa. ¹⁴ Botö inömö Itota Codito nempo quëwëmo inte edæ nöingä pönëninque, Tömää cængui nämä incæ näwäaquiringä impa, ante do ëñëmopa. Incæte wacä, Pancaa cængui baacä impa, ante në pönengä inte tömengä beyæ baacä inönte tömengä nänö, Baacä impa, änö cænämaï inguëngä ingampa.

¹⁵ Bitö quingämë cæmi adinque bitö tönïñacä, Baacä apa cæwëe, ante wæwente bacä ininque bitö waadedämaï inte godömenque cæmaïmipa. Edæ bitö tönïñacä beyæ Codito wængacäï apa quëwëe. Bitö tönïñacä nänö pönënämaï bate wænguinque baö cæmipa, ante wædinqe bitö tömengä ingante näwangä waadete pönëmi inte tömengä beyænque ante cöwë baö cænämaï incæbiimpa. ¹⁶ Botö mänömaï cædinqe waa pönï cæbopa, ante pönëmi incæte wadäni bitö waa cædö ante, Wiwa cæbipa, ante pönö babæ ante tedewënäni ate wædinqe bitö wæætë waadete pönëninque wææ ämi tedewënämaï incædänimpa. ¹⁷ Wïi cænguinque ante wïi bequinque ante Wængongui nempo quëwëmompaa. Wæætë Wængongui Tæiyæ Waëmö Önöwoca nempo quëwëñö-monte tömengä pönö cæcä æninque mönö nö entawenguinque impa. Ayæ mönö gänë pönenguinque ante mönö watapæ tote quëwenguinque ante tömengä nempo quëwëmompaa. ¹⁸ Edæ Codito nempo quëwëninque waocä mänömaï cæcä adinque Wængongui tömengä ingante waa ate tocampa. Waodäni adobaï, Waa cæbipa, ante waa adänipa.

¹⁹ Mänömaï impa, ante adinque, Mönö pönencabo godongämæ piyænë cæte quëwengäimpa, ante, Ayæ mönö godongämæ wede pönëninque tæï mænönte bai ongongäimpa, ante mönö nanguï cæcäimpa. ²⁰ Ininque cængui cæinente beyænque bitö Wængongui nänö në badongainäni inänite bæ tadämaï incæbiimpa. Tömää cængui edæ näwäaquiringä impa. Incæte bitö cænïñö beyænque wacä ëñënämaï inte tee tëwate bai oda cæbaingampa, ante do ëñëmi inte bitö godömenque cæmi ininque wïwa cæbaïmipa töö. ²¹ Waa cæcæte ante bitö iimaï cæcæbiimpa. Bitö baö cæmi beyæ, biinömmæ nani wædænque ti nämæ bebi beyæ, quïëmë cæbi beyæ bitö tönïñacä oda cæte wæcantawo. Ininque bitö inömö, Botö tönïñacä oda cædämaï incæcäimpa, ante wææ cædinqe ee cædämaï imi ininque waa imaimpa.

²² Mänïñö, Æbänö cæte waa inguiï, ante bitö pönëñö beyænque wadäni inänite apænte änämaï inte bitö adobique inte Wængongui ayongante cæcæbiimpa. Waa cæqui impa, ante mïmöno bitö pönënonque ante mänïnonque cædinqe bitö tente wæquinque cædämaï inte waa tobaimipa. ²³ Wæætë në æmæ pönengä guiquënë, Cæmo beyæ Wængongui pangä wæcæ wæ, ante wædingä inte tömengä nämä nänö apænte pante wæquinque ade cængampa. Edæ æcänö wede pönënämaï inte cæda tömengä nänö cædönö tömännö edæ wïwa cætimpaa. Ininque bitö cædö tömännö wede pönente cæcæbiimpa.

¹ Mönö nē wede pönēmō iñömō tæi piñante entawēmō iñömō inte nāmanque ante mönō cæinēnō ante edæ wædāmaī ingæimpa. Wæætē edæ nē æmæ pönēnāni guiquēnē tōmēnāni aquīi pōni ināni inte, Ædō cæte cæquimoo, ante wædāni adinque mönō tōmēnāni wædō ante ænte mongænte bai cædinque tōmēnāni tōnō iñacabo cæcæimpa. ² Godongāmæ godō cæmō æninque waa todinque tōmēnāni wæætē wede pönēninque oncō tæi mænonte bai tæi ongoncædānimpa, ante mönō ædæmō cæcæimpa. ³ Edæ mönō Codito incæ nāmanque ante nānō cæinēnō ante cæcæte ante edæ wædāmaī inte piyænē cægacäimpa. Wængongui ingante do nāni apænegainō bai tōmengä wadāni beyænque ante cægacäimpa. “Wængongui ēñēmi. Wadāni bitō imite piinte badete tocæte ante cædinque botō imote wæætē piinte badete todānipa,” ante apænete bai Codito ee cægacäimpa. ⁴ Edæ mönō imonte odōmonte apænecæte ante Wængongui angä ēñēninque dodāni tōmantaa yewæmongadānimpa. Ininque mäninta ædæmō adinque wampo pönēninque wæntædāmaī inte ee cæmō ininque edæ mönō, Watapæ bacäimpa, ante pönente tocäimpa.

⁵ Ininque Codito Itota miñæ tee empote goyōmonte Wængongui iñömō edæ, Minitō wampo pönēninque wæntædāmaī inte ee cæcæminimpa, ante nē ædæmō cæcä ingampa. Tōmengä mänōmaī pönō cæcä ate minitō iñömō adoyōmō ante mini pönencabo bacæminimpa, ämopa. ⁶ Mänōmaī bamīni ininque minitō aanque bai adodō ante pönēninque iīmaī ante Wængongui ingante apænecæminimpa. Mōnitō Awēnē Itota Codito Mæmpobi inōmi inte bitō tōmengä Wængongui adobi imi iñömō bitō tæi emōmi inte ñäō apāite bai imi amōnipa, ante adoyōmō ante apænecæminimpa, ante botō mänōmainō ante yewæmōmopa.

Oodeoidi ināmaī ināni ēñencædānimpa, ante

⁷ Codito mīnitō imīnite Ao ante ængacäimpa. Ininque tōmengä mīnitō imīnite nānō ængai bai mīnitō adobai wacä ingä wacä ingä godongāmæ Ao ante æedāni. Mänōmaī cæmīni adinque wadāni Wængongui ingante apænedinque, Bitō waa pōni cæbi amōnipa, ante watapæ pōni apænecædānimpa. ⁸ Edæ apænebo ēñeedāni. Mōnitō mæmæidi inānite Wængongui, Minitō beyæ pönō waa cæcæboimpa, angacäimpa. Ininque, Wængongui tōmengä nānō angainō ante cōwē cæcæcäimpa, ante oodeoidi ēñencædānimpa, ante cædinque mönō Codito tōmēnāni beyæ nē cæcä bagacäimpa. ⁹ Tōmengä iñömō, Idægoidi ināmaī ināni incæ Wængongui ingante, Bitō ñäō bai emōmi inte pönō waadete waa cæbi æmōnipa, ante apænecædānimpa, ante mänōmaī cægacäimpa. Iīmaī ante Wængongui beyæ nāni yewæmongainō bai impa.

“Botō mänōmaī beyæ, Bitō æbānō nē waa cæbi imi, ante idægo ināmaī ināni weca gote apænecæboimpa.

Bitō emōwo ante ämotamīni watapæ pōni ancæboimpa,” ante nāni yewæmongainō bai Codito cægacäimpa.

¹⁰ Ayæ wataa iñömō iīmaī ante yewæmongatimpa.

“Idægoidi ināmaī imīni incæ mīnitō Wængongui quīnāni tōnō godongāmæ watapæ toedāni.”

¹¹ Ayæ wæætē,

“Idægoidi ināmaī imīni mönō Awēnē ingante apænedinque, Bitō waa pōni cæbi amōnipa, ante watapæ pōni apæneedāni.

Wamīni mīni cabo mīni cabo tōmāmīni ämotamīni ante bai apænedinque, Waa pōni cæbi amōnipa, ante watapæ pōni apæneedāni.”

¹² Itaiya wodi adobainō ante yewæmongacäimpa.

“Inguipoga quēwēnāni tōmānāni Awēnē baquinque

Awænguinto tā bocate bai cædinque Yæte Pæingä iñömō ængæ ganticæcäimpa.

Tōmengä cæcä beyænque watapæ bacäimpa, ante idægoidi ināmaī ināni incæ pōnencædānimpa,” ante Itaiya wodi yewæmongacäimpa.

¹³ Wængongui iñömō, Watapæ bacäimpa, ante nē badongaingä inongä inte iīmaī cæcæcäimpa, ämopa. Tōmengä Tæiyæ Wæmō Önōwoca tæi piñante cæcä ate mīnitō,

Watapæ bacæimpa, ante godömenque wede pönencæminimpa. Mänömaï cæcæte ante cædinque Wængongui pönö apæneca ëñenique mīnitö tömengä ingante wede pönëninque edæ gänë entawëninque watapæ tocæminimpa, ämopa.

¹⁴ Botö tönīñamīni ëñëedāni. Botö tömömo ayömote mīnitö nē waa cæmīni imīni abopa. Ayæ, Æbänö waa cæquiī, ante do ëñëmīni imīnīpa. Ayæ adobaï mīnitö eyepæ imīni inte wacä ingä wacä ingä do odömonte apænemīni imīnīpa, ante pönëmopa.

¹⁵ İninque botö, Mīnitö ëñëninö ante mīnitö ocai encadömīni inte edæ adodö ante pönencæminimpa, ante baï cædinque pancadea ante yewæmontabopa. Botö iñömö Wængongui waadete pönö cæcä ænte nē entawëmo inte mänömainö ante yewæmöninque edæ guiñënāmaï inte nanguï ante yewæmömopa. ¹⁶ Edæ tömengä waadete pönö cæcä ænte entawëninque botö Itota Codito beyænque ante idægoidi ināmaï ināni inānite nē cæbo badinque Wængongui ingantedö ante watapæ apænebo ëñënānīpa. Mänömainö ante apænebo ëñëñömīnite Wængongui Tæiyæ Waëmö Önöwoca pönö badongä ate idægoidi ināmaï ināni incæ tæiyæ waëmö ewocate quëwënāni badānīpa. Mänömaï bayönānite botö iñömö, Wængongui qui, ante pædæ godönāni baï cædinque tömënāni inānite ante edæ, Wængongui quimīni bacæminimpa, ante pædæ godömo æninque Wængongui wæætë waa tocampa.

¹⁷ Mänömaï beyæ botö Itota Codito nempo quëwëninque Wængongui beyæ cædinque edæ nanguï tobopa. ¹⁸ Codito botö tönö guëa cæcä beyænque botö nanguï apænedinque nanguï cæbo ate tömengä iñömö töö æmængä pöninque edæ idægoidi ināmaï ināni incæ edæ Wængongui ingante ëñente cædāni badānitapa. Botö Codito mänömaï botö tönö nänö cædinö ante apænedinque edæ mäninque ante apænedinque guiñënete wædinque godömenque apænedāmaï incæboimpa. ¹⁹ Wængongui Tæiyæ Waëmö Önöwoca tæi piñænongä inte botö tönö godongämæ cæcä ate botö, Æñencædānimpa, ante bamönengæ cæbo ate nē pönënāni badānitapa. Mänömaï Eedotadëe iñömö mä cæte godinque Ididiabæ ganca tömäo godämæ godinque botö Codito ingantedö ante watapæ apænedinque adodö adodö ante tömänö ante apænebo ëñënānitapa.

²⁰ Botö, Codito ëmöwo ante wadāni nāni apænedāmaï iñömö gote tömengä ingantedö ante watapæ apænebo ëñencædānimpa, ante cöwë goinente wætabopa. Wacä onguitanca nänö tæñönincönë æmonga mænönāmaï incæboimpa, ante baï cædinque botö, Wacä do nänö apænediñömö botö wæætë apænedāmaï incæboimpa, ante cætabopa.

²¹ Wæætë iïmaï ante Itaiya wodi nänö yewæmongainö baï cætabopa.

“Tömengä ingante ante ëñënāmaï inināni incæ edæ do ate baï ewocacædānimpa.

Önömonca ëñënāmaï inināni incæ edæ, ‘Æbänö i,’ ante do ëñencædānimpa.”

Ante nänö yewæmongainö baï botö, Æñencædānimpa, ante cætabopa.

Odömā iñömö pöinëmopa, Pabodo angampa

²² Mänömaï beyæ botö mīnitö weca poncæ cæyömote edæ, Wææ cæte i, ate wædinque pönāmaï intabopa. ²³ İñömö ömæ idæwaa cæbo inte botö æpomë wadepo iñonte mīnitö imīnite ainente wædömopa. ²⁴ İninque botö, İincayæ ate Epāñabæ gocæ cædinque wodo tebæ godinque mīnitö weca ëñate aboque gocæboimpa, ämopa. Edæ botö wantæpiyæ ëñate tote quëwente ate godömenque Epāñabæ gote cæyömo mīnitö botö beyæ cædinque da godömīni gocæboimpa.

²⁵ Nöwo guiquënë botö täno Eedotadëe iñömö Wængongui quīnāni beyæ godö cæcæte ante gobopa. ²⁶ Wængongui quīnāni incæ Eedotadëe quëwënāni pancadāniya ömæpodāni inte wædānīpa, ante pönente wædinque wabæca Mäatedöniabæ quëwënāni tönö Acayabæ quëwënāni tönö, Mönö da godö da godö cæcæimpa, ante pönëninque watapæ todinque tömënāni, Wængongui quīnāni qui, ante do godönānitapa. ²⁷ Mänömainö ante watapæ pönente cædāni incæte tömënāni Eedotadëe iñömö quëwënāni inānite nē godonguënënāni inte da godönānimpa. Edæ Wængongui Önöwoca nänö pönongaincoo ante idægoidi pönö apænedāni ëñente ænte ewocadināni inte wabæca quëwënāni iñömö tömënāni nāni ëadaincoo incæ idægoidi beyæ ante wæætë godonguënënāni badānāni

inänipa. ²⁸ Ìninqe botö ìñömö mänincoo tõmënäni nāni da godönincoo idægoidi weca ænte gocæboimpa. Godinqe botö cōwā adinqe, Nē òmæpodāni inte nē wædānique æncædānimpa, ante wææ cæcæboimpa. Ædæmō cæbo ænāni ate botö māniñedē ate Epāñabæ gocæte ante cædinque mīnitō òmæ wodo tebæ godinqe mīnitō weca ēñacæ poncæboimpa. ²⁹ Codito pōnō waa cædinque da pōnongā pōninqe botö cōwē tõmengā tōnō waa pōnī botö cæquinque mīnitō weca poncæboimpa, ante do ēñēdāni.

³⁰ Botö tōniñamīni ēñēdāni. Botö pæ pagænte bai nanguī cæyōmote mīnitō ìñacabo cædinque botö beyæ Wængonguī ingante nanguī apæneedāni, ante botö mōnō Awēnē Itota Codito beyænque āninqe ayæ Wængonguī Ònōwoca nē waadete pōnengā beyænque āninqe mīnitō ìmīnite nanguī āmopa. ³¹ Oodeabæ pōnēnāmaī ìnāni ìñömö Pabodo ingante wēnæ wēnæ cædāmaī incædānimpa, ante botö beyæ ante apæneedāni. Ayæ, Eedotadēē ìñömö botö gote cæbo adinqe Wængonguī quīnāni incæ botö cædō ate Ao ancædānimpa, ante apæneedāni. ³² Mānōmaī ì adinqe botö, Awēnē Wængonguī angā ate botö watapæ todinqe mīnitō weca pōmo ate mōnō godongāmæ guēmāninqe wampo pōnengāimpa, āmopa. ³³ Wængonguī nē gānē pōnengā inte mīnitō tōnō godongāmæ ongōninqe pōnō cæcā ate gānē pōnencæmīnimpa, āmopa. Mānōmaī impa diyæ, ante botö, Amēē, āmopa.

16

Waa quēwencæmīnimpa, ante

¹ Botö ìmaī āmopa. Mōnō tōniñacā tõmengā èmōwo Pebe mīnitō weca ñōwo poncæ cæcampa. Tencodea ìñömö Codito ingante nāni godongāmæ pōnencabo ìñōnānite tõmënāni beyæ nē waa cæcā inte ìingā onquiyængā ìñömö waingā pōnī ingampa. ² Tõmengā nanguī ìnāni beyæ wææ gompodinqe waa cædongā inte botö beyæ adobaī nanguī cæcantapa. Ìninqe edæ botö mīnitō ìmīnite ìmaī āmopa. Wængonguī quīmō ìnömö inte mōnō Awēnē nempo quēwēñōmonte Pebe adocā inte adobaī ingampa, ante adinqe mīnitō tõmengā ingante waa adinqe Ao ante æedāni. Ayæ tõmengā quiēmē æinente wæcā ìñongante mīnitō wæætē edæ godō cæedāni āmopa.

³ Ayæ wada Piditida tōnō Aquidæ nāna gæncaya ìñömö Itota Codito nempo quēwēninqe edæ botö tōnō godongāmæ cæda ìnapa. Ìninqe mīnitō tõmēna ìnate, Waa quēwencæmīnaimpa, ante botö beyæ ante apænemīni ēñēcædaimpa. ⁴ Wadāni botö ìmote wænoncæ cædāni wæyōmote tõmēna nāna wodo wænguinque edæ botö ìmote wææ cædatapa. Mānōmaī cædapa, ante botö tõmēna ìnate waa ate pōnente apænebopa. Ayæ idægoidi ìnāmaī ìnāni Codito ingante nāni wayōmō pōnencabo wayōmō nāni pōnencabo adobaī tõmānāni Aquidæda nāna cædinō ante ēñēninqe tõmēna ìnate waa ate pōnēninqe apænedānipa.

⁵ Ayæ Itota Codito ingante nē pōnēnāni Aquidæda oncōnē godongāmæ pō guidāni ìnānite, Waa quēwēedāni, ante apænemīni ēñencædānimpa. Botö æmigo Epēneto botö nē waadecā ìñongante mīnitō botö beyæ apænedinqe, Waa quēwencæbiimpa, ante apæneedāni. Atiabæ ìñömö Codito ingante wadāni pōnēnāmaī ìñōnāni tõmengā ìñömö tāno pōnengantapa. ⁶ Ayæ Māadiya mīnitō beyæ nanguī cædingā ìñongante mīnitō wæætē tõmengā ingante Waa quēwencæbiimpa, ante apæneedāni. ⁷ Botö guidēna Antodōnico tōnō Ñōniato ìñömö botö tōnō godongāmæ tee mōnete wædīna ìnapa. Tõmēna ìñömö botö pōnēnāmaī ìñōmote wēenēñedē Itota Codito nempo quēwēna ìñōnate Codito incæ tõmēna ìnate da godongacāimpa. Ìninqe, Itota Codito nānō nē da godongaīna tånoda ìna adinqe mīnitō botö beyæ ante tõmēna ìnate waa apæneedāni.

⁸ Ayæ wacā mōnō Awēnē nempo quēwēninqe Ampidiato ingante waadete pōnēmo inte edæ botö, Waa quēwencæbiimpa, āmopa. ⁹ Ayæ adobaī Odömāno mōnitō tōnō godongāmæ Codito nempo quēwente nē cæcā ìñongante, Waa quēwencæbiimpa, ante botö beyæ ante apæneedāni. Botö nē waadecā Etaquito ingante adobaī ante apæneedāni.

¹⁰ Ayæ Apede ìñömö Codito nempo quēwēñongante tõmengā æbānō cæcāā, ante adinqe Codito tõmengā ingante wæætē, Waa cæbi abopa, angampa. Tõmengā ingante botö

beyä ante waa apäneedäni. Ayä Aditobodo näni quëwencabo inänite adobaï waa apäneedäni. ¹¹ Botö guidengä Edodiyaönö ingante waa apäneedäni. Ayä Näadotito guidënnäni incæ æcänö mönö Awënë nempo quëwëna tömënnäni inänite adobaï, Waa quëwencæminimpa, äedäni.

¹² Ayä wada mönö Awënë nempo quëwëna onquiyäna Tidipina tönö Tidipota iñömö në nanguï cæda inapa. Tömëna inate botö beyä ante waa apäneedäni. Ayä wacä onquiyängä mönö në waadecä Pedetida iñömö tömengä mönö Awënë nempo quëwëninque nanguï cæcantapa. Tömengä ingante adobaï, Waa quëwencæbiimpa, äedäni. ¹³ Ayä mönö Awënë nänö në apænte ængaingä Odopo ingante waa apäneedäni. Tömengä badä incæ adobaï botö badä bai iñönante tömënnä inante botö beyä ante waa apäneedäni. ¹⁴ Ayä adobaï Atincodito, Pedegonte, Edëme, Patodobato, Edëma tömënnäni näni pönencabo tömännäni inänite, Waa quëwencæminimpa, ante apäneedäni. ¹⁵ Ayä wadäni Pidodogo tönö Oodia, Nèedeo tömengä mængä tönö, Odimpa tönö Wængonguï quinäni tömännäni inänite, Waa quëwencæminimpa, ante apäneedäni.

¹⁶ Edæ, Waa quëwencæminimpa, ante minicabo incæ tömämäni godongämæ waa waadete apænecæminimpa. Codito ingante wayömö näni pönencabo wayömö näni pönencabo tömännäni minitö iminite wæætë, Waa quëwencæminimpa, ante ännäni.

¹⁷ Botö töninämäni ëñeedäni. Minitö adocabomäni iñöminite wadäni æmæmoncadö æmæmonca pä cædäni inänite cöwä adinque edæ Baa äedäni. Doyedë minitö ëñënö ante ëñënnäni inäni inte tömënnäni, Minitö tee tëwate bai oda cæcæminimpa, ante cædinque wadö ante edæ odömönänipa cæminii. Tömënnäni inänite gomö aquënë cæminii. ¹⁸ Mänömaï cædäni iñömö mönö Awënë Codito ingante cædämaï inte nämä näni cæinënönque ante cædänipa. Tömënnäni ante, Minitö iminite waa amönipa, ante waa tedete bai tededäni ëñëninque pancadäniya guiquënë, Babæ wapiticæ impa, ante cöwä adämaï inäni inte, Nö impa, ante do pönënnäni. ¹⁹ Minitö cöwë ëñente cæminii iminipa, ante tömännäni do ëñënnäni. Mänömaï beyä botö iñömö nanguï tobopa. Incæte, Quinö waa cæquii, ante minitö ædæmö ëñencæminimpa, ante ainëmopa. Quinö wënæ wënæ cæquii, ante edæ ædæmö ëñënnämaï inte edæ gomö acæminimpa, ante ainëmopa. ²⁰ Wængonguï, Gänë pönente quëwencæminimpa, ante në pönö cæcä iñömö edæ Tatäna ingante minitö önöwa gäänë wæantodongä ate minitö wæætë do pinä gäwate bai cæcæminimpa. Nöwo iñömö mönö Awënë Codito nänö waadete pönö cædö incæ entawencæminimpa, ämopa.

²¹ Botö tönö guëa cædongä Timoteo iñömö minitö iminite, Waa quëwencæminimpa, angampa. Ayä botö guidënnäni Dotio tönö Yatönö adobaï Totipatedo adobaï minitö iminite, Waa quëwencæminimpa, ännäni.

²² Nöwo botö Tedetiyobo iñömö Pabodo önöneque tedecä ëñëninque ii cadota ante në yewämönimo inte botö adobaï, Waa quëwencæminimpa, ämopa.

²³ Gayo adobaï minitö iminite, Waa quëwencæminimpa, angampa. Tömengä oncönë Codito ingante näni pönencabo cöwë godongämæ ponte apänedänipa. Ayä tömengä botö imote adobaï, Pöe, angä ëñëninque edæ botö nöwo tömengä oncönë owobopa. Ayä iñömö quëwënnäni awënë nänö äinta æninque adocanque Edaato näni äongä iñömö tömengä, Tömännäni beyä æbänö cæquii, ante në angä iñömö tömengä tönö mönö töninacä Coadoto adobaï, Waa quëwënnäni, änapa.

²⁴ Mönö Awënë Itota Codito minitö iminite pönö waadete cæcæcäimpa. Mänömaï impa, ante botö, Amëë, ante ämopa.

Wængonguï ingante waa ate apænecæimpa, ante

²⁵ Nöwo iñömö Wængonguï ingantedö ante watapæ botö apänedö ante ayä Itota Codito ingantedö ante mönö apänedö ante në pönëmäni inte minitö tæi piñænte ongoncæminimpa. Wængonguï eyepæ inte mänömaï pönö cæcæcäimpa. Tömengä mäninö ante nöwo tæcæ nänö odömönö ante wënnënnedë pedæmämö iñonte cöwë wantæpiyæ wë wodonte bai cægacäimpa. ²⁶ Nöwo guiquënë, Codito æbänö cægacäi, ante inguipoga tömämæ quëwënnäni ëñente wede pönëninque botö imote ëñente cæcædänipa, ante

cædinque Wængongui cöwë nê Quëwëngä inte do odömongä acæimpa. Tömengä angä ëñëninque tömengä beyä nê apænëgainäni wæætë edonque pönï yewämönäni acæimpa.

²⁷ Ìninqe Wængongui nö pönï ëñëngä inte adocanque Wængongui ingampa, ante adinque mönö, Bitö adobique ñäö bai ëmömi inte edæ waa cæbi amönipa, ante mönö Itota Codito ëmöwo apænedinque Wængongui ingante edæ cöwë apænecæimpa. Mänömaï impa diyä, ante botö, Amëë, ämopa.

1 Coodintoidi inänite Pabodo cadota ante tänota nänö yewæmongainta

Coodinto iñömö Codito ingante nani pönencabo

¹ Wængonguï angä eñëninque Itota Codito botö imote aa pedinque da godongä godömo inte botö Pabodobo yewæmömopa. Mönö töninäcä Totënë tönö guëa apänete ate yewæmömo aedäni. ² Coodinto iñömö mīnitö Codito ingante mīni godongämæ pönencabo inömīni inte eñëedäni. Wængonguï, Botö quīmīni badinque mīnitö Itota Codito nempo quëwëninque tæiyæ waëmö ewocate quëwencæmīnimpa, ante cædinque añecä pönīmīni inte mīnitö acæmīnimpa, ante yewæmömopa. Ayæ adobaï, Mönö Awënë Itota Codito emöwo ante nē aa pedäni tōmāmæ quëwënäni incæ acædānimpa, ante yewæmömopa. Itota Codito iñömö mönö Awënë ingä incæ tōmënäni Awënë adocä ingampa. ³ Mönö Mæmpo Wængonguï tönö mönö Awënë Itota Codito godongämæ waadete pönö cæda ate mīnitö gänë pönente quëwencæmīnimpa, ante botö Totënë tönö ämönapa.

Codito nänö entawënö bai nanguï entawëmompā, ante

⁴ Wængonguï waadete pönö cæcä ate mīnitö Codito Itota nempo quëwëninque tōmengä nänö entawënö bai nanguï entawëmīnipa, ante adinque botö mīnitö beyæ ante Wængonguï ingante waa ate pönëninque cōwë apänebopa. ⁵ Edæ Codito nempo quëwëñöminite tōmengä nänö ate eñengainö ante pönö apänecä eñëninque mīnitö do entawëmīnipa. İninque mäninö nänö ate eñengainö ante eyepæ entawëmīni ininque mīnitö nö apänemīni bamīnipa. ⁶ Edæ mönitö, Itota iñömö adocä mönö Codito inongä ingampa, ante apänemöni eñëninque mīnitö Ao äninque, Näwangä impa, ante wede pönëninque waa cæte quëwëmīni acæimpa.

⁷ Mäninö beyæ, Mönö Awënë Itota Codito æyedënö pöninque edonque pönī a ongonguingä, ante wänö cöninque mīnitö wæntæye badāmaï incæmīnimpa, ante cædinque Wængonguï Önöwoca pönö apänecä eñëninque mīnitö eyepæ inte waa cæquīmīni imīnipa. ⁸ Mīnitö cōwë iinque baganca tæi ongonde oda cædāmaï incæmīnimpa, ante Wængonguï pönö cæcä ate mönö Awënë Itota Codito pönedë mანიñedë ate mīnitö wentamö ædö cæte entawenguīmīni. Edæ dæ ampa. ⁹ Wængonguï, Botö Wengä Itota Codito iñömö mīnitö Awënë inongä ingampa. İninque mīnitö tōmengä nempo quëwëninque tōmengä tönö godongämæ cæte quëwencæmīnimpa, ante mīnitö imīnīte añete aa pecantapa. Mänömaï ante nē aa pecä iñömö tōmengä nänö angainö bai edæ cōwë nē ædæmö cæcä ingampa cæmīni.

Wæætë godö wæætë godö cædāmaï iedäni, ante

¹⁰ Botö tönīnamīni, botö mönö Awënë Itota Codito emöwo apänedninque iīmaï ante ämo eñëmaimīnipa. Mönö pönencabo imompā, ante adodö pönëninque mīnitö tōmāmīni godongämæ Ao ante adodonque cædinque näwæ godāmaï iedäni. ¹¹ Botö tönīnamīni apänëbo eñëedäni. Codoeidi mīnitö imīnitedö ante apänedninque, Coodintoidi nani pönencabo incæ wæætë godö wæætë godö tedewënanipa. ¹² Ante apänedäni eñëninque botö, İīmaï impa, ante apänëbo eñëedäni. Pancamīniya, “Mönitö Pabodo nänö nē emīñæmöni imönipa,” ante cæmīnipa. Pancamīniya guiquënë, “Apodo nänö nē emīñæmöni imönipa,” ante cæmīnipa. Pancamīniya guiquënë, “Pegodo nänö nē emīñæmöni imönipa,” ante cæmīnipa. Ayæ wæætë pancamīniya guiquënë, “Codito nänö nē emīñæmöni imönipa,” ante cæmīnipa. Mänömainö ante mīnitö wadö wadö ante tedewëmīni awædö.

¹³ İñæmpa Codito nämä incæ ante dicæ wadö wadö ante apänecantawogaa. Incæte Codito nempo quëwëmīni inte mīnitö, Pabodo emīñæmöni imönipa, ämīni. Apodo emīñæmöni imönipa, ämīni. Pegodo emīñæmöni imönipa, ämīni. Ayæ botö Pabodobo

iñömote wadäni awæ ñænquedimæ gönöningue mīnitö beyæ wænönäni dicæ wæntawogaa. Ayæ botö Pabodobo emöwo apænedinque mīnitö dicæ æpænë guiminitawogaa.

¹⁴ Botö minicabo weca quëwëningue Codipo tönö Gayo inate mäninaque inate æpænë guidömo guidatapa, ante pönëningue waa tobopa. ¹⁵ Mänömaï i adinque mīnitö, Pabodo emöwo apænedinque æpænë guitamönipa, ante ædö cæte anguimīnii, ante tobopa.

¹⁶ Æ, tæcæ pönëmopa. Etepänäidi inänite adobaï guidömo guidänitapa. Wadäni inänite wabänö guidömoï, ante wīi pönëmopa. ¹⁷ Edæ Codito, Bitö æpænë guidömi guicædänimpa, ante botö imote änämaï ingacäimpa. Wæætë, Tæi piñænongä inte Codito mönö wædö ante teëmë mongænte ñænquedimæ wængä beyænque mönö quëwëngäimpa, ante apænebi ëñencædänimpa. Ayæ, Mänine ante wadäni, Önonque impa, ante änämaï incædänimpa, ante wææ cædinque bitö waodänique nāni nanguï ëñente apænedö ante apænedämaï incæbiimpa. Wæætë, Codito ingantedö ante watapæ apænebi ëñencædänimpa, äningue Codito botö imote da godongä gobo imopa.

Codito Wængonguï nänö ëñënö entawëningue tæi nänö piñænö entawengampa

¹⁸ Itota ingante nāni timpogaiwæ ante apænemöni adinque në wænguināni guiquënë, Mäniwæ ante apænete wædänitedö abi, ante badete todänipa. Codito ængä beyænque në quëwëmöni guiquënë, Codito mäniwäa wængä beyænque Wængonguï tæi piñænte pönö cæcampa, ante wede pönente apænemönipa. ¹⁹ Edæ Wængonguï, İmaï cæcæboimpa, angampa, ante yewæmonte ongompa.

“Në adäni önonquedö ante ëñënänipa,

ante botö nanguï nāni ëñënö ante wido cæcæboimpa.

Në nämä mä pönente ëñënäni guiquënë önonque ëñënänipa, ante botö nämä nāni ëñënö ante Baa ancæboimpa,”

ante Wængonguï cæcampa, ante yewæmongatimpa.

²⁰ Mänömaï cædinque Wængonguï, Inguipogaque quëwënäni nāni nanguï ëñënö incæ önonque impa, ante ëñenguënë quëwëmīni, ante do odömongampa. İningue adocanque ingante, Nanguï ëñëmipa, ante Wængonguï dicæ anguingäa. Dodäni nāni wææ angainö ante në nö odömömi imipa, ante Wængonguï dicæ anguingäa. Nämä mä pönëningue në nö apænebi imipa, ante Wængonguï dicæ anguingäa. Edæ dæ ampa. ²¹ Edæ, Inguipogaque quëwënäni ocaidë nanguï ëñënäni incæ önonque nāni ëñënö beyænque botö imote ædö cæte ate baï pönenguinānii, ante Wængonguï në nö ëñænongä inte cæcampa. Codito nänö cægainö ante apænemöni adinque iināni iñömö, Önonque tedewënanitedö abi, ante badete todänipa. İñæmpa Codito nänö cægainö ante badete nāni todö beyænque mīnitö wæætë në wede pönëmīni inte quëwencæminimpa, ante Wængonguï nöingä pönëningue pönö cæcampa.

²² Oodeoidi, Öönædë nāni mä cæi baï bamönengæ cæmīni ate ëñëmaimönipa, ante änewënänipa. Guidiegoidi guiquënë, Nämä mä pönëningue ëñëmaimönipa, ante cædänipa. ²³ Mönitö guiquënë, Codito ingante awænëmæ timpote wænönäni wængacäimpa, ante mäninonque ante apænemöni ëñëmīnipa. Mänömainö ante apænemöni ëñëningue oodeoidi guiquënë Baa ante tee tëwate baï oda cædänipa. Guidiegoidi guiquënë mänine ante ëñëningue badete todänipa. ²⁴ Mönitö oodeomöni iñömönite mīnitö guidiegomīni iñöminite ædänimë inänite Wængonguï apænte ængä ingaimö inte mönö iñömö edæ iimaï ante pönëmompä. Wængonguï nänö nö ëñënö incæ Codito encacampa, Wængonguï nänö tæi piñænö incæ Codito entawengampa, ante do edæ ëñente pönëmompä.

²⁵ Wængonguï önonque ante cæcampa, ante pönëwëmīnitawoo. Mönö waocabo nanguï ëñëmö imompä, ante pönëmīnitawoo. İñæmpa, Nanguï ëñëmö, ante tedewëmö incæ önonque wædämö inte cæmompä. Wæætë Wængonguï guiquënë önonque cæte baï cæcä incæ godömenque gomonga nanguï ëñengä inte cæcampa. Ayæ, Wængonguï aquüingä inte cæcampa, ante pönëmīnitawoo. İñæmpa mönö waocabo tæi piñæmö imompä, ante tedewëmö incæ mönö önonque aquüimö inte cæmompä. Wæætë Wængonguï guiquënë në önonque cæte baï cæcä incæ godömenque gomonga tæi piñænongä inte cæcampa.

²⁶ Iñänäni, æbänö iñöminite Wængongui aa pecantapa, ante pönëdäni. Tömämïni dicæ nanguï ëñëmini ingamïniyaa. Inguipogaque quëwënäni nanguï näni encadö bai mïnitö tömämïni dicæ adobai nanguï encamïni ingamïniyaa. Tömämïni dicæ nanguï tæi piñænïni ingamïniyaa. Awënëidi päingä nänö awënë baquinque ëñacä bai mïnitö tömämïni dicæ adobai awënë baquinque ëñamïniyaa. Mänömai iñöminite Wængongui dicæ aa pecantawogaa. Incæte adocanque adocanque mänömai iñöminite Wængongui aa pegacäimpa.

²⁷ Wæætë, Në nanguï ëñënäni incæ guiñente wæcädänimpa, ante cædinque Wængongui iïmai cægacäimpa. Inguipoga quëwënäni inänite cöwä adinque në önonque cæi bai cädäni inänite apænte ængacäimpa. Ayæ, Në tæi piñænäni incæ guiñente wæcädänimpa, ante cædinque Wængongui inguipoga në wæntæte cädäni inänite apænte ængacäimpa. Ininque tömengä mänömai cæcä ate waa cädänipa, ante adinque në tæi piñænäni wæætë guiñente wädänipa. ²⁸ Wængongui inguipoga quëwënäni näni waa pönï mäincoo ewente bai bacäimpa, ante cædinque, Inguipoga pancacooga wiwa incoo impa, ante adinque mänincooque æninque waa cægacäimpa. Ayæ, Önoncooque impa, ante mönö änoncoo adinque tömengä ingante do æninque nö cægacäimpa. Ayæ, Dæ ampa, mönö änoncoo incæ do adinque Wængongui mänincoo æninque nanguï cægacäimpa. ²⁹ Ininque Wængongui weca ongöninque waocä adocanque incæ, Waëmö imopa, ante ædö cæte anguingää.

³⁰ Wængongui pönö ængä beyænque mïnitö Codito Itota nempo quëwëminipa. Wængongui Codito Itota ingante da pönongä æninque mönö Codito nänö ëñënö bai ænte entawëmompä. Tömengä nempo quëwëninque mönö tömengä nänö nö cæte quëwënö bai adobai ænte entawëmompä. Ayæ tömengä tæiyæ waëmö nänö ewocadö adobai pönongä æninque tæiyæ waëmö ewocate quëwëmompä. Ayæ Codito ængä beyænque mönö abæ tawænte gote bai quëwëmompä. ³¹ Ininque Wængongui beyæ näni yewæmongainö bai iïmai ante bacäimpa. “Waocä, botö nanguï waëmö pönï imopa, ante nämä waa ate apæneinente wædongä iñömö tömengä wæætë, Mönö Awënë adocanque waëmö pönï ingampa, ante apænecä ininque waa cæbaingampa.”

2

Itota Codito ingante awäa timpodäni wængacäimpa, ante

¹ Iñänäni botö mïnitö weca apænecæte ante mä pöninque në nanguï ëñënäni näni waa ëñënö bai ëñënämai imo inte bai pontabopa. Waodäni näni waa tede bai tededämai imo incæ pontabopa. Wæætë, Wængongui näwangä waa pönï cægacäimpa, ante mäninonque ante apænecæte ante pontabopa. ² Itota Codito ingante do adïmo inte botö, Tömenganque nänö cægäinonque ante ëñente bai cædinque botö coodintoidi weca gote apænebote, ante godämai iñedë do änömoimpa. Ininque, Wadö näni nanguï ëñënö ante ëñënämai inte bai cædinque botö, Itota Codito ingante awäa timpodäni wængacäimpa, ante mäninonque ante ëñente bai gote apænebote, ante pönëninque mïnitö weca pontabopa. ³ Ayæ botö aquiïmo pönï inömo inte mïnitö weca pöninque, Ædö cæte apænequïmo, ante guiñenete wædinque nanguï do do wäate pömo aminitapa. ⁴ Pöninque botö, Mänömai impa, ante dicæ tömëmo nanguï ëñënö ante tedetabogaa. Wængongui beyæ apænebo ëñëedäni, ante änïmo incæ botö dicæ waa pönï tedete bai apænetabogaa. Wæætë Wængongui Önöwoca tönö äawocaque bai ewocadinque botö tömengä nänö tæi piñænö beyænque apænebo aminitapa. ⁵ Mänömai cædinque botö, Waomö mönö nanguï ëñënö beyænque ante wïi pönencæminimpa. Wæætë Wængongui nänö tæi piñænö beyænque wede pönëmini bacæminimpa, ante cæcæte ante mänömai ponte apænetabopa.

Wængongui æbänö ëmongää, ante tömengä Önöwoca odömongä ëñëmompä, ante

⁶ Wæætë ædæmö pönënäni æmæwo pæte bai iñönänite mönitö tömënäni weca ongöninque möni nanguï ëñëninö ante apænemönipa. Incæte nöwodäni nämä näni

ēñēnō ante apænedāmaī īmōnīpa. Ayæ īmæca awēnēidi nāni dæ goquincabo tōmēnāni nāni ēñēnō ante apænedāmaī īmōnīpa.

⁷ Wæætē Wængonguī awēmō īñonte nānō ēñengainō ante apænemōnīpa. Tōmengā īñōmō, Botō nanguī ēñēnōmo inte pōnō cæbo beyænque botō nē apænte ænānique ñāō apāite baī entawencædānīmpa, ante inguipoga dæ āñedē wēēñēñedē pōnī incæ mōnō īmonte ante pōnō cægacāīmpa. Incæte, Mānōmaī cæcæboīmpa, ante tōmengā nānō ēñēnō ante wadāni ēñēnāmaī incædānīmpa, ante wææ cædinque wē wodonte baī cædinque tōmengā nānō ēñengainō ante ñōwo ganca awēmō īñōmō entawēnongāīmpa. Ñōwo īñōmō tōmengā awēmō nānō ēñengainō ante tæcæ apæncæ ēñēnīmōni inte mōnitō wæætē mānīnō ante ñōwo apænemōnīpa. ⁸ Inguipoga awēnēidi guiquēnē Wængonguī nānō wē wodonte ēñengainō ante dicæ ēñēnāniyaa. Edæ mānīnō ante ēñēnte baī tōmēnāni mōnō Awēnē ñāō baī entawēnongā īñongante awāa timpote wænōnāmaī incædōnānīmpa. ⁹ Wæætē īmaī ante yewæmongatīmpa.

“Botō īmote nē waadete pōnēnāni īñōmō watapæ quēwencædānīmpa,
ante Wængonguī do pōnō badongacāīmpa.

Mānīnō nānō pōnō cægāīnō ante waocā dicæ acāa.

Mānīnō ante dicæ ēñengāa.

Edæ waocā nāmanque mā pōnēninque dicæ ēñengāa,”

ante nāni yewæmongaī baī īinque bacæīmpa, ante mōnitō apænemōnīpa. ¹⁰ Wængonguī Ōnōwoca guiquēnē tōmāā cōwā adīnque Wængonguī awēmō nānō pōnō badongāīnō ante edonque adīnque do ēñengampa. Īnīnque mōnonga pō guīdīnque tōmengā mōnō īmonte edonque odōmongā ēñēmōmpa.

¹¹ Edæ mōnō waocabo incæ, Adocanque ōnōwēnenque pōnēē cōñongante wacā, Æbānō ante pōnēē congāā, ante ædō cæte ēñenguingāā. Edæ nē pōnēē congā guiquēnē, Botō æbānō ante pōnēē cōmoo, ante tōmengā adocanque ōnōwēnenque pōnente ēñengampa. Wængonguī adobaī ingampa. Wængonguī æbānō ante awēmō pōnēē congāā, ante waocā ædō cæte ēñenguingāā. Wængonguī æbānō ante pōnēē congāā, ante tōmengā Ōnōwoca adocanque ēñēñongā wadāni ēñēnāmaī īnānīpa. ¹² Wængonguī īñōmō, Botō æbānō pōnōmo æmīnī, ante edonque acæmīnīmpa, ante cædinque tōmengā Ōnōwoca ingante da pōnongā ænte ēwocate amōmpa. Īnīnque inguipogaque quēwēnāni nāni pōnēnō baī entawēnāmaī īñōmō inte mōnō Wængonguī tōmengā Ōnōwoca tōnō āāwocaque baī ēwocāmō inte do ēñēmōmpa.

¹³ Mōnitō īñōmō, Wængonguī mānōmaī pōnō cæcampa, ante odōmoncæte ante mā pōnente mōni ēñēnō ante apænedāmaī īmōnīpa. Wæætē Wængonguī Ōnōwoca pōnō odōmonte apæncæ ēñēnte ēwocadīnque tōmengā nānō odōmōnō mōni ēñēnō ante apænemōnīpa. Edæ Wængonguī Ōnōwoca nānō pōnēnō ante ēñencæte ante Wængonguī Ōnōwocaque nānō apæne de ante apænete ēñēnte ēwocacæīmpa, ante pōnēninque mōnitō mānīneque ante apænemōnīpa.

¹⁴ Edæ, Wængonguī Ōnōwoca nānō pōnēnō æbānō ī, ante tōmengā Ōnōwoca tōnō āāwocaque baī nē ēwocadānique pōnente ēñēnānīpa. Īnīnque nē ōmæwocacā baī ingā guiquēnē tōmengā ædō cæte edonque ēñenguingāā. Edæ oda cæcampa. Mānīnō ante apænemōni ēñēninque tōmengā, Ōnonquedō ante apænete wæcantedō abi, ante badete todīnque edæ, Baa angampa. ¹⁵ Wængonguī Ōnōwoca tōnō āāwocaque baī nē ēwocacā guiquēnē, Tōmāā æbānō ī, ante cōwā adīnque edonque pōnī ēñengampa. Wæætē edæ, Tōmengā æbānō ēwocacāā, ante wadāni cōwā adāni incæte ædō cæte apænte anguīnānī. ¹⁶ Ayæ, “Wængonguī Awēnē æbānō nanguī ēñēnte pōnengāā, ante æcānō ēñenguingāā. Edæ Wængonguī ingante godōmenque odōmōnānīpa diyæ ēñēnte baquingāā,” ante yewæmongatīmpa. Mōnō guiquēnē Codito ēñēnte nānō pōnēnō ante entawēmōmpa.

¹ Iñānāni ēñēdāni. Codito Ōnōwoca tōnō nē ædæmō ewocadāni inānite botō Wængonguī Ōnōwoca nānō apænedō ante do apænebopa. Mīnitō guiquēnē mempoga ēñamīni inte Codito nempo quēwēmīni incæ tæcæ ēñadāni bai pædāmai inōmīni inte mīnitō inguipogaque ante pōnēmīni awædō. Mānōmai beyæ botō adobainō ante ædō cæte mīnitō imīnite apænequimoo. ² Edæ tæcæ ēñadāni iñōmō tæēmō mōnō cænguī capo capo cænāmai inānīpa. Mīnitō iñōmō tōmēnāni bai adobai imīni inte Wængonguī Ōnōwoca nānō apænedō ante ædō cæte ēñenguīmīni. Inique tæcæ ēñadingā ingante goōmæ di godōnete bai cædinque botō mīnitō imīnite apænedinque adodeque adodeque apænebo ēñēmīnitapa. Iñæmpa ñōwo ganca tæcæ ēñadāni bai inōmīni inte mīnitō æiquedō ēñenguīmīni. ³ Edæ cōwē inguipogaque ante pōnēmīni inte pancamīniya, Wacā gomonga cæcampa, ante piinte wæmīnīpa. Pancamīniya guiquēnē wæætē godō wæætē godō piinte ānewēmīnīpa. Mānōmai cæte quēwēninque mīnitō ōmæwocadāni bai imīni inte inguipogaque ante pōnente quēwēmīni abopa. ⁴ Edæ iīmai ante tedewēmīnīpa. Adocanque, “Botō Pabodo nānō nē ēmiñæmo imopa,” ante cæcampa. Wacā, “Botō guiquēnē Apodo nānō nē ēmiñæmo imopa,” ante cæcampa. Mānōmaiñō ante mīnitō ōmæwocamīni inte bai cæmīni awædō.

⁵ Iñæmpa, Apodo æcānō ingāā, ante pōnēmīni. Pabodo æcānō ingāā, ante pōnēmīni. Edæ botō mōnō Awēnē nānō pōnō anganca tōmengā ingante nē cæbo bagaboimpa. Apodo adobai mōnō Awēnē nānō pōnō anganca Awēnē ingante nē cæcā bagacāimpa. Inique tōmengā beyæ nē cæmōnaque imōna inte mōnatō mīnitō imīnite apænemōna ēñente pōnēmīnitapa. ⁶ Tōmēmō minte bai cædinque botō mā apænebo ate mīnitō tæcæ ēñēmīnitapa. Apodo guiquēnē, Cōñe bate pæcāimpa, ante æpæ gao caadāni bai cædinque mīnitō imīnite godōmenque nanguī odōmonte apænecā ēñēmīnitapa. Incæte mōnatō apænemōna beyænque ædō cæte tā bocate bai pæwocaquīmīni. Wængonguī adocanque nē apænecā beyænque mīnitō tā bocate bai pæwocate ewocamīnīpa. ⁷ Inique minte bai nē apænebo inte botō tōnō Apodo æpæ gao cæte bai nē odōmonte apænecā tōnō mōnatō iñōmō ōnōmōnaque imōnāpa. Wængonguī tōmenganque, Pæe, ante nē ānongā ingampa. Tōmengā adocanque angā beyænque pæmīnitapa.

⁸ Botō nē apænebo tōnō Apodo nē odōmonte apænecā tōnō mōnatō, Pæcāimpa, ante āanque bai Wængonguī beyænque cæmōnāpa. Inique botō nē apænebo iñōmote tōmengā nē odōmonte apænecā iñongante Wængonguī iñōmō, Mīnatō apænegainō beyæ æeda, ante eyepæ pōnī pōnongā æncæmōnaimpa. ⁹ Mōnatō iñōmō Wængonguī tōnō godongāmæ cæmōni inte mōni nē cæcabo imōnīpa. Mīnitō guiquēnē Wængonguī quīmīni inōmīni inte tōmengā gönea bai pæwocamīni imīnīpa.

Ayæ adobai tōmengā nānō mænōincō bai imīnīpa. ¹⁰ Nē ēñente mænongā iñōmō, Wænōmēnæca inō mænongæimpa, ante cædinque dicacoo cō cō cæcampa. Botō iñōmō Wængonguī waadete pōnō cæcā ate nē ēñente mænongā bai adobai bagaimo inte botō mīnitō weca mā ponte apænebo ēñēmīnitapa. Ñōwo guiquēnē botō mānōmai cō cæte bai mā apænebo ēñēmīni ate wadāni ponte botō cō cædinca wænōmēnæca mænonte bai cædinque godōmenque odōmonte apænedāni ēñēmīnīpa. Inique edæ æcānō māninca mænonte bai odōmōna tōmengā tōingā mænonte bai nō ēñente odōmonte apænequēnengā ingampa. ¹¹ Waodāni, Dica adocaa wænōmēnæca inō mænongæimpa, ante tāno nāni cō cædinca bai Itota Codito adocanque Tānocā ingampa. Inique, Wacā tānocā ingampa, ante bai cædinque mīnitō ædō cæte wacā miñæ gomīni. Iñæmpa, Dica wacaa wænōmēnæca inō mænonte bai babaimpa.

¹² Ayæ tānoca nāni gö cædinca bai Itota Codito Tānocā iñongante mōnitō, Māninca adocaa wænōmēnæca mænongæimpa, ante bai cædinque odōmonte apænemōnīpa. Nē mænōnāni iñōmō oodo æninque padata æninque dica nāni waa pōnī adinca æninque, Quincamē ewēnāmai inguīnca, ante æninque tōmēnāni nāni mænōnō bai cædinque pancamōniya nō pōnī odōmonte apænemōni ate mōnitō apænedō wido cædāmai ingæimpa. Wadāni guiquēnē awæ æninque gaguīmæ amīmō i æninque ayawāa amīwæ æninque quincoomē ewenguīncoo æninque godō mænōnāni bai cædinque tōmēnāni

önonque odömonte bai apænedänipa. ¹³ Edæ Wængongui nänö apænte anguiönæ iinque ba ate gonga nani angä nangui bæcocæimpa. Mäniñedë ate edæ, Mönitö æbänö ñöwo odömonte apænemönii, ante ñäö gongæ edonque acæimpa. Wængongui mäniñedë mönitö apænedö apænte ancæte ante cædinque në tante bai cæcä ate pancadea æmæwo montæ göne ate pancadea ongö æncæcäimpa.

¹⁴ İinque, Æcänö mænongaincö montæ gönämai i, ante adinque Wængongui eye-pæ pönongä æninque në mænongaingä wæætë watapæ quëwencæcäimpa. ¹⁵ Wacä guiquënë tömengä nänö mænongaincö do montæ gö adinque Wængongui mänincö në mænongaingä ingante pönönämai incæcäimpa. Incæte mäningä waocä gonga bæcoyömö wodii tao winongä bai ömæpocä wæyongante Wængongui ængä beyænque tömenganque quëwencæcäimpa.

¹⁶ Minitö iñömö, Wængongui Önöwoca ingante do æninque tömengä ingante ewocamompa, ante ëñänämai iminitawo. Wængongui tæiyæ waëmö oncö bai mönö baö ëñamompa, ante ëñänämai inte bai cæmini awædö. ¹⁷ Wængongui oncö tæiyæ waëmö oncö i iñonte waocä bæ tate wido cæcä adinque Wængongui näëmæ tömengä ingante edæ ömæe ewencæcäimpa. Ayæ adobai Wængongui tæiyæ waëmö oncö bai baö ëñayöminite waocä wapiticæ odömonte apæneçä beyæ mini godongämæ apænedincabo incæ oda cæte näwæ gomini adinque në wapiticæ apæneçä ingante Wængongui adobai wido cæcæcäimpa.

¹⁸ Minitö, Ñöwodäni nani ëñänö ante do nangui ëñëmönipa, ante pönëminitawoo. İñæmpa mänömainö ante minitö nämä babæ pönëwëninque apænemini awædö. Në nö ëñëmini bacæte ante minitö ñöwodäni nani nangui ëñëwënö ante wido cædinque ömæcamini badinque në ëñëmini bacæminimpa. ¹⁹ Inguipogaque quëwënanı nangui ëñänäni incæte Wængongui, Önonquedö ante ëñëmini awædö, angampa. Edæ Wængongui beyæ apænedinque iımai ante yewæmongadänipa. “Ömé nämä nänö ñönömë incæ waocä näëmæ wini wini dawacä bai në nangui ëñänäni adobai nämä nani ëñänö beyænque näëmæ oda cædänipa, ante cæbopa,” Wængongui angampa. ²⁰ Ayæ adobai, “Në ëñänäni iñömö tömënanı nani nangui ëñente pönënö incæ idiquibæ impa, ante edæ mönö Awënë do ëñengampa,” ante yewæmonte ongompa.

²¹ İinque, Botö waocä adocanque nänö në emiñæmo inte tobopa, ante änämai incæminimpa. İñæmpa mönitö waomini inte tömämöni minitö beyæ ante cæte quëwëmönipa. ²² Botö Pabodobo inömo incæ Apodo ingä incæ Pegodo ingä incæ minitö beyæ ante cæte tömämöni quëwëmönipa. Inguipo incæ inguipoga ongoncoo incæ minitö beyæ ongompa. Mönö quëwëmämo incæ mönö wænguımämo incæ minitö beyæ ongompa. Ñöwopämo incæ miımämo iıncayæ ponguımämo incæ quincoomë incæ edæ minitö beyæ tömancoo ongompa. ²³ Ayæ minitö wæætë Codito beyænque quëwëmini iminipa. Codito wæætë Wængongui beyænque quëwengä ingampa, ante ämo ëñëmaımınipa.

4

Itota nänö në da godongaimöni inte iımai cæmönipa

¹ İinque mönatö Pabodobo tönö Apodo iñömönate minitö iımai ante ëñenguënëmini iminipa. Codito tönö godongämæ cædinque tömengä beyæ ante Pabodo tönö Apodo në cæda inapa. Ayæ godömenque, Wængongui tömengä nänö awëmö ëñengainö ante pönö apæneçä ëñäna inte tömëna mäninö ante në apæneda inapa, ante ëñenguënëmini iminipa. ² İinque Awënë Wængongui iımai angampa. Botö waocä ingante quiëmë pönö cæbo æninque tömengä botö pönönonque entawëninque nö pönente ædæmö aaquënegä ingampa, ante Wængongui cöwä adinque, Æbänö botö beyæ wæe aabii, ante apænte angampa. ³ İinque minitö, Pabodo æbänö cæcää, ante apænte ancæte ante cöwä amini incæte botö wædämai iımaımopa. Në apænte nani änoncabo incæ botö imote adobai cöwä adinque apænte änäni ëñëninque botö wædämai iımaımopa. Tömëmo incæ, Æbänö botö cöwë wede pönente cæbo imoo, ante ædö cæte nämä anguımoo.

⁴ Botö, Tömëmo wënæ wënæ cædämaï iñömo ïmopa, ante pönëmopa. Incæte, Wentamö mongænämaï ïmopa, ante ædö cæte botö nämä anguïmoo. Mönö Awënë adocanque botö ïmote nê apænte angä ingampa.

⁵ Mäninö beyæ mïnitö, ïnque bayedë tömäa apænte angæïmpa, ante mönö Awënë ponganca ee adinque apænte änämaï ïedäni. Tömengä iñömö waomö mönö awëmö cægaïnö ante, Edonque pönï acæïmpa, ante ñäö iñömö mäo odömoncæcäïmpa. Ayæ, Æbänö cæcæboïmpa, ante mönö önöwënenque pönengäïnö incæ edonque odömongä gongæ näwæ acæïmpa. Ayæ, Adocanque æbänö waa cægacäi, ante, Wacä æbänö waa cægacäi, ante watapæ apænedinque tömämö mönö cægaïnö ante Wængonguï pönö apæneca ëñente mönö tocæïmpa.

⁶ Iñänäni ëñeedäni. Waocä adocanque ingante, Waingä ingampa, äninque wacä ingante wïi pïncæmïnimpa, ante yewæmongatïmpa. ïnque botö mïnitö beyæ ante, Mönatö æbänö cæmöna, ante yewæmontabopa. Mïnitö, Apodo tönö Pabodo æbänö cæda inaa, ante pönëninque Wængonguï beyæ näni yewæmongäïnonque ante mäninonque ëñente cædinque godömenque cædämaï incæmïnimpa, ante cætabopa.

⁷ Iñæmpa tömämö önömonque iñömonte Wængonguï, Bitö gomonga waëmömi pönï ïmipa, ante dicæ apænte angantawogaa. Bitö entawënö iñömö tömëmi ocaidë mä bitö pönënö beyænque dicæ entawëmitawogaa. Mönö Codito adocanque edæ pönö apæneca ëñente nê ænte entawëmi iñömi inte bitö, Tömëmoque nämä beyænque entawëmopa, ante ædö cæte änewëmi.

⁸ Mïnitö, Eyepæ pönï do entawëmönipa, ante bai cæmïni awædö. Mïnitö waa quëwënginque ante do eyepæ ænte bai cæmïni awædö. Edæ Pabodoidi mönitö beyæ cædämaï iñönänite tömëmöni nämä beyænque awënë odehyemöni bamönipa, ante cæte bai cæmïni awædö. Iñæmpa mïnitö näwangä awënë odehyemïni bamïni bai mönitö adobai awënë odehyemöni badinque nanguï tocædömönipa. ⁹ Wæætë Itota nänö nê da godongaincabo iñömonite Wængonguï incæ, Yæmiñæ pönï gote näni wænginque godänitedö amïni, ante badete tote bai odömongä awædö. Mänömaï cæcä adinque waodäni incæ anquedoidi incæ Wængonguï nänö nê badongainäni tömänäni mönitö ïmönite adinque badete todänipa, ante awædö.

¹⁰ Edæ mïnitö adobai cædinque iïmaï pïimïni wæmönipa. Mönitö Codito beyæ cæyömönite mïnitö, Ocai ömæcamïni inte cæmïnipa, ante pönëmïnitawoo. Wæætë nämanque ante pönëninque, Codito nempo quëwëninque mönitö ocai encamöni inte nanguï ëñëmönipa, ante tedewëmïni awædö. Ayæ, Pabodoidi aquïi pönï iñönänite mönitö wæætë tæëmö pïñæmöni ïmönipa, ante pönëmïni awædö. Wadäni adobai mïnitö ïmïnite ante apænedinque, Waïmïni pönï ïmïnipa, äninque mönitö ïmönite ante wæætë, Önömïnique ïmïnipa, ante pïinänipa.

¹¹ Ayæ mönitö ñöwo ganca cænguï cænämaï inte gue ænente awædö. Tepæ bedämaï inte gæwænte awædö. Weocoo wää tæincoo mongænte awædö. Ayæ tæi tæi pänäni caate wæmönipa. Ayæ oncö ömaamöni inte ¹² mönitö önompoca nanguï cædinque ænte quëwëmönipa. Wënæ wënæ ïmïnipa, ante pïinäni wædinque mönitö wæætë, Mïnitö ïmïnite Wængonguï pönö waadete cæcæcäïmpa, ante cæmönipa. Ayæ togænte pänäni ate wædinque mönitö wæætë pïinämaï piyænë cæmönipa. ¹³ Mönitö ïmönite ante apænedinque, Wiwa cædänipa töö, ante babæ änäni ëñente wædinque mönitö wæætë waadete apænëmönipa. Edæ, Æwëmöimæ gadonguimæ bai ïmïnipa. Ömæpocoo wido cæquincoo bai ïmïnipa töö, ante pïininque inguipogaque quëwënäni iñömö mönitö ïmönite ñöwo ganca cöwë wido cædäni wædömöni ïmönipa.

¹⁴ Mönitö beyæ cædinque Pabodoidi wæwente quëwënänipa, ante adinque mïnitö wæætë guingo imonte wæcæmïnimpa, ante botö dicæ mänömaïnö ante yewæmömogaa. Wæætë botö wëmïni bai iñöminite botö, Mänömaï cædinque mïni wæquinque ïmpa, ante wææ yewæmömopa. ¹⁵ Mïnitö ïmïnite nê aadäni iñömö diete miïdo ganca mänimpodäni iñönänite mönitö mïnitö mæmpoidi bai ïmöni guiquënë mëmönïya pönï ïmönipa. Edæ, Itota Codito nempo quëwëninque botö, Itota Codito pönö cæcä

beyænque mōnō watapæ quēwengæimpa, ante apænebo ēñēmīnitapa. Mānōmainō ante apænebo ēñēninque mīnitō mempoga ēñamīni ate botō mīnitō mæmpo bai bagaboimpa. ¹⁶ Mānōmai beyæ botō mīnitō imīnite waadete apænedinque, Botō mæmpobo cædō bai mīnitō adobai cæcæmīnimpa, ante nanguī āmopa.

¹⁷ Botō tōmāmæ godinque wayōmō Codito ingante nāni godongāmæ pōnencabo weca wayōmō nāni pōnencabo weca go guīdinque iīmai ante apænebopa. Mōnō Itota nempo quēwēninque nō ēñēninque waa cæte quēwengæimpa, ante odōmonte apænebopa. Mānōmainō ante botō odōmonte apænedō bai botō tōmēmo adodō ēñente quēwēmo abaimpa. Īninque mīnitō, Pabodo mānōmai quēwengampa, ante ēñencæmīnimpa, ante botō nē waadecā Tīmoteo ingante da godōmo mīnitō weca ponte apænecæcāimpa. Tōmengā iñōmō botō wengā bai ĩnongā inte Codito nempo quēwēninque cōwē nō pōnente cæcā ingampa. Tōmengā mīnitō weca ponte apænedinque, Pabodo nānō odōmonte apænedō bai tōmengā nāmā adodōnte ante cōwē ēñente quēwengampa, ante apænecā ēñēninque adodō ante pōnencæmīnimpa.

¹⁸ Pancamīniya, Pabodo wīi pongā awædō, ante, Tōmēmōnique wæætē nē āmōni incæmōnimpa, ante botō imote piīnte tedewēmīnīpa. ¹⁹ Incæte mōnō Awēnē Ao angā ate botō oo poncæboimpa. Ponte adinque botō, Tōmēmōnique nē āmōni incæmōnimpa, ante nē tedewēmīni æbānō tedewēmīnīi, ante ānāmai incæboimpa. Wæætē adomīni mīni tæi piñænō ante cōwā adinque apænte ancæboimpa. ²⁰ Wængonguī Awēnē Odeye nempo nē quēwēmō iñōmō wīi ōnonque mōnō tedequīnō beyænque quēwēmompa. Wæætē edæ tæi piñænte mōnō quēwenguīnō ante mōnō tōmengā nempo quēwēmompa. ²¹ Mīnitō æbānō cæmīni ate mīnitō weca ponguīmo. Edæ mīni cædinō adinque botō panguēnēmo inguīmo, āmīnitawo. Wæætē waadete pōnēninque ædæmō cæquēnēmo inguīmo, āmīnitawo.

5

Nē wīwa towengā ingante apænte angæimpa, ante

¹ Edæ, Nē wīwa towengā incæ coodintoidi nāni pōnencabo tōnō godongāmæ ongongampa, ante tededāni ēñentamōnīpa. Mīnitō weca ongongā adocanque tōmengā wæmpo nānōogængā incæ manguīwengampa tōō. Īñæmpa Wængonguī ingante nē ēñēnāmai ĩnāni incæ mānōmai wēnæ wēnæ cædāmai iñōnāni mīnitō weca ongonganque do cæcā apa cæmīnīi. ² Nē wīwa towengā tōnō godongāmæ ongōmīni incæte mīnitō, Tōmēmōnique waa cæmōni imōnīpa, ante tedewēmīni awædō. Incæte Ca ca wæmīni bai waa incædōnimpa. Nē wīwa cæcā ingante, Mōnitō weca ongōnāmai gobāwe, ante da godōmīni gocā bai waa incædōnimpa. ³ Botō guīquēnē nānēnē quēwēmo incæte mīnitō weca owote bai ōnōwēnenque pōnēmo imopa. Īninque mīnitō weca owote bai botō nē wīwa cæcā ingante do apænte āmopa. ⁴ Mīnitō Awēnē Itota ēmōwo apænedinque godongāmæ pōñōmīni botō nānēnē quēwēmo incæte adoyōmō owote bai pōnencæboimpa. Ayæ Awēnē Itota tæi piñænongā inte mīnitō tōnō adoyōmō ongōncæcāimpa. Īninque mīnitō iīmai cæedāni. ⁵ Awēnē nānō ponguīōnæ iñedē nē wīwa cædongā tōmengā ōnōwoca quēwēncæcāimpa, ante iīmai cæedāni. Tōmengā nānō wīwa ēñayō ēwente bacæimpa, ante cædinque mīnitō tōmengā ingante Tatāna nempo pædæ godōmīni æncæcāimpa.

⁶ Mīnitō, Waa imōni imōnīpa, ante tededinque wīwa tedewēmīnīpa tōō. Edæ dodāni nāni yewæmongainō ante adāmai inte bai tedewēmīnīpa. “Pāō tōmāo yedæ æmpoquinque wædænque da wēnāni” bai mīnitō adobai adocanque wīwa cæcā ingante mīni oda cæquinque ee amīni ongongampa. ⁷ Mīni pōnencabo wæmō pōnī mīni entawenguinque pāō yedæ æmpoquī wido cæte bai cædinque nē wīwa cædongā ingante da tadōmīni gocæcāimpa. Edæ mōnō Codito iñōmō wīwa mōnō cædinō ante nā mēnon-gacæte ante nāmā wepæ godongacāimpa. Edæ dodāni, Nē wænonguēnengā wænōnāmai inte wodo pænta gocæcāimpa, ante, Patowa, ante codotedo nāni nē wænongaingā bai mōnō Codito iñōmō adobai ĩnongā inte wængacāimpa. ⁸ Īninque mōnō pāō yedæ

æmpoqui ömæmö i cænte bai cædinqe wiwa mönö cædö ante wido cædinqe mönö piinte cædämaï inte waa cæte quëwengæimpa. Ayæ ææmæ watapæ bete bai cædinqe, Quinö näwangä pöni i, ante Ao ante æninqe mönö nö pönente quëwengæimpa.

⁹ Nê wiwa towënäni tönö godongämæ cædämaï iedäni, ante botö cadota ante do yewæmömo aminitawo. ¹⁰ Mänömainö ante yewæmöninque botö, Inguipogaque quëwënäni tönö godongämæ cædämaï iedäni, ante dicæ antabogaa. Ìñæmpa wiwa towënänique, wacä qui nê æinente wædänique, wacä qui nê ö ænänique inguipoga quëwënänipa. Ayæ, Wængongui impa, ante badöninque nê ædæ wæænte quëwënänique mänimpodänique inguipoga quëwënänipa. Ìninqe ædö cæte tömënäni weca cædämaï inguii. Edæ inguipo ëmö cæte gote bai tömënäni weca ongönämaï inguii.

¹¹ Wæætë mäninö ante yewæmöninque botö, Mïni pönencabo incæ adocanque wiwa cæcä adinqe mïnitö tömengä tönö godongämæ cædämaï iedäni, ante wææ ämopa. Edæ, Nê pönengä incæ wiwa towengantawo. Nê pönengä incæ wacä qui æinente wæcantawo. Wængongui impa, ante badonte nê pönengä ædæ wæængantawo. Wacä ingante, Wënæ wënæ imipa, ante angantawo. Ti nämæ bete nê pönengä incæ quidi quidi dowængantawo. Wacä qui æncæte ante babæ cædinqe ö ængantawo. Ìninqe tömengä, Nê pönëmo imopa, ängongä incæ mänömaï wiwa cæcä adinqe mïnitö tömengä tönö godongämæ cædämaï inte godömenque tömengä tönö godongämæ contate cænämaï iedäni, ante botö wææ ancæte ante ämopa.

¹² Mïnitö Codito nempo mïni quëwencabo incæ näëmæ apænte änämaï imïni inte oda cæminipa. Wadäni inänite Codito nempo quëwënämaï iñönänite botö, Tömënäni æbänö wënæ wënæ cædänii, ante ædö cæte apænte anguimoo. ¹³ Wængonguinque tömënäni inänite apænte ancæcäimpa. Incæte mïni cabo incæ adocanque wiwa cæcä adinqe mïnitö tömëmïni, Mönitö weca ongönämaï gobæwe, ante da tadömïni tao gocæcäimpa.

6

Nê pönënämaï ingä apænte ancæcäimpa, ante änämaï ie

¹ Mïni pönencabo iñöminite adocanque bitö imite wënæ wënæ cæcantawo. Ìninqe bitö, Tömengä ingante apænte ancædänimpa, ante cædinqe ëñënämaï inäni weca ædö cæte ænte gobii. Wæætë Wængongui quinäni inänite angä ëñëninque tömënäni wæætë, Tömengä æbänö wënæ wënæ cæcää, ante apænte adinqe nö ancædänimpa. ² Edæ mönö Wængongui quimö iñömö edæ, Inguipoga tömämæ quëwënäni æbänö wënæ wënæ cædänii, ante nê apænte anguimö imopa. Incæte mïnitö, Mänömaï cæcæmönimpa, ante ëñënämaï inte bai cæmïni awædö. Tömämæ quëwënäni inänite nê apænte anguimïni inte mïnitö ñöwo wædænque mïni apænte anguënënö incæ quinante änämaï imïni. ³ Mönö iñömö Wængongui anquedoidi inänite nê apænte anguimö inömöimpa, ante ëñënämaï iminitawo. Mäninäni inänite nê apænte anguimö inömö inte mönö pönencabo ñöwo mönö wædö ante mönö godömenque apænte angæimpa, ante pönëmïniyaa.

⁴ Codito ingante mïni godongämæ pönencabo incæ mïni wædö ante apænte ancædänimpa, ante mïnitö ædänidö inänite ämïni apænte änänii. Ìñæmpa, Önönänique inänipa, ante mïni änönäni incæ mäninö ante nê apænte änäni badänitawo. ⁵ Mïnitö guingo imonte mïni wæquinque cæminipa, ämo ëñëmaïmïnipa. Nänä pönencaya incæ näëmæ wæætedö wæætë äna wædinqe mïnitö, Mönö pönencabo incæ æcänö nê nö ëñëngongä inte apænte anguingää, ante adinqe tömengä ingante anguënëmïni iminipa. Ìñæmpa mïnitö weca nê nö ëñengä adocanque dæ angantawogaa. ⁶ Wæætë nänä pönencaya incæ näëmæ pïininqe adocanque, Botö beyæ apænte äninque iingä ingante pancædänimpa, angampa. Ayæ godömenque wënæ wënæ cædinqe tömengä nänö töninacä ingante nê pönënämaï inäni weca ænte godinqe, Apænte äninque pancæminimpa, angä pänänipa.

⁷ Ìñæmpa mïni pönencabo incæ näëmæ pïininqe, Apænte ante pangæimpa, ante dobæ oda cæminipa töö. Edæ wacä wiwa cæcä ate wædinqe bitö wæætë piyænë cæbi waa imaimpa. Tömengä babæ wapiticæ äninque ö ængä wædinqe bitö piyænë cæbi waa

imaimpa. ⁸ Incæte piyænē cæquēnēmīni incæ mīnitō wæætē babæ cædinque ö æmīni awædō. Wacā ingante wīwa cæmīni awædō. Mänōmaī cædinque mīnitō mīni pōnencabo incæ wæætē godō wæætē godō wīwa cæmīnīpa tōö.

⁹ Wīī ēñente cædāni iñōmō Wængonguī Awēnē Odeye nempo cōwē guīdāmaī inguīnāni inānīpa, ante mīnitō iñōmō ēñēnāmaī inte baī cæmīnīpa tōö. Mänōmainō ante pōnēnīnque mīni oda cæquinque ī apa cæmīni. Nōwo godōmenque āmo ēñēedāni. Pancadāniya towente cædānīpa. Pancadāniya guīquēnē, Wængonguī impa, ante nāni badōniñōmō gāānē ædæ wæænānīpa. Pancadāniya guīquēnē nānōogæ ināmaī iñongante godō guēa mōwēnānīpa. Pancadāniya guīquēnē nāna onguīñæncaya incæ nāna gæncaya inte baī cædinque guēa monte quēwēnāpa. ¹⁰ Pancadāniya guīquēnē awēmō ænānīpa. Pancadāniya guīquēnē wacā māincoo ante æīnente wædānīpa. Pancadāniya guīquēnē tī nāmæ bete quīdī quīdī dowænānīpa. Pancadāniya guīquēnē wacā ingante, Bitō wēnæ wēnæ īmīpa tōö, ante pīīnīnque babæ ānānīpa. Pancadāniya guīquēnē babæ apænedīnque ö ænānīpa. Mänōmaī wīwa cædōnāni inte tōmēnāni Wængonguī Awēnē Odeye nempo cōwē guīdāmaī inguīnāni inānīpa, āmo ēñēmaīmīnīpa. ¹¹ Mīni pōnencabo incæ pancamīniya mänōmaī ingaīmīni inte nōwo iñōmō æbānō īmīnīi. Edæ mōnō Awēnē Itota Codito emōwo beyænque Wængonguī Ōnōwoca pōnō nā mēnongacā ate mīnitō tæiyæ waēmō ewocate quēwēmīni adīnque Wængonguī, Botō ayōmo mīnitō waa cæmīni īmīnīpa, angampa.

Baonga quēwēnīnque mōnō tæiyæ waēmō entawente quēwengæīmpa

¹² “Botō cæīnēnonque ante cæbo incæ Wængonguī wææ ānāmaī ingampa,” ante apænedānīpa. Incæte botō cæīnēnonque ante quēwēmō baī wīī botō waa quēwengūnque incædōmoīmpa. Botō cæīnēnonque ante cæbo incæ Wængonguī wææ ānāmaī ingampa, ante nāni ānō iñōmō edæ nāwangā impa. Incæte botō cæīnēnonque ante cæbo baī botō nā cæyænte baī wæwenguēnēmō inte awædō. ¹³ Ayæ cænguī iñōmō. “Mōnō cæncadē guīquinque cænguī æmōmpa. Ayæ adobaī mōnō cæncadē cæī cænguī beyænque ēnēmōmpa,” āmīnitawo. Īñæmpa cænguī incæ cæīnca incæ, Idæwaa impa, ante Wængonguī wo ewencæcāīmpa. Ayæ adobaī mōnō baö iñōmō wīī towengūnque beyæ ēñamōmpa. Wæætē mōnō Awēnē beyænque mōnō baö ēñate quēwēmōmpa. Ayæ mōnō baö beyæ ante mōnō Awēnē pō guīicā ate tōmēngā tōnō āawocaque baī ewocamōmpa. ¹⁴ Īnīnque edæ mōnō Awēnē ingante Wængonguī tæēmō pīñænīnque angā nāni omæmongā baī mōnō īmonte adobaī tæēmō pīñænīnque angā nāni omæmōnguīmō īmōmpa.

¹⁵ Edæ, Codito quī, ante mōnō baö incæ godōmō ængā ate mōnō tōmēngā baö baī ēñamōmpa, ante ēñēnāmaī īmīnitawo. Īnīnque Codito baö baī ēñabo inte botō iñōmō edæ onquiyængā māincoo beyæ ante nē towente quēwēngā tōnō edæ ædō cæte godō monguīmoo. ¹⁶ Edæ, Æcānō mänōmaī godō mōna tōmēngā nē tote quēwēngā tōnō adocanque baī bacampa, ante ēñēnāmaī īmīnitawo. Edæ, “Mēnaa īnīna incæ tōmēna wæætē nāna gæncaya mōnīnque adocanque baī bacædaīmpa,” ante apænete yewæmonte ongōmpa. ¹⁷ Ayæ mōnō Awēnē nempo quēwēngā tōmēngā iñōmō mōnō Awēnē tōnō āawocaque baī ewocacampa cæmīnīi.

¹⁸ Æcānō godō towēna tōmēngā nāmā baö cædingā inte nāmā baö nānō wæwengūnque wēnæ wēnæ cæcampa. Wæætē yabæque mōnō wēnæ wēnæ cædō beyæ mōnō baö ædō cæte wæwenguīī. Mänōmaī ī īnīnque mīnitō iñōmō wodīī wīnonte towēnāmaī quēwēedāni. ¹⁹ Edæ Wængonguī tōmēngā Tæiyæ Waēmō Ōnōwoca ingante mīnitonga da pōnongā pō guīite owocampa. Īnīnque mīnitō, Botō baö tōmēmō quī ēñabopa, ante ædō cæte āmīnīi. Īñæmpa Wængonguī Ōnōwoca tæiyæ waēmō oncō baī ēñate apa ānewēmīnīi. ²⁰ Wængonguī nanguī pōnī godonte ængā beyænque mīnitō baö tōmēngā quī ēñāpa. Mänōmaī beyæ mīnitō, Tōmānāni Wængonguī ingante waa ate ēñencædānīmpa, ante cædinque mīnitō baonga quēwēnīnque edæ waa cæedāni.

7

Nāna gæncaya inōna inte iīmaī cæbainapa

¹ Nōwo iñōmō mīni wædō ante yewæmōmīni ænte adinque botō iīmaī āmopa. Onguiñængā iñōmō onquiyængā ingante mōnāmaī ingā waa tobaimpa. ² Incæte, Wīi towēinente wæcæcāimpa, ante cædinque onguiñænāni tōmānāni, Botō nānōogængā incæcāimpa, ante mōnāni waa iīmaī. Ayæ onquiyænāni adobaī tōmānāni, Botō nānōogængā incæcāimpa, ante mōnāni waa iīmaī. ³ Onguiñængā iñōmō tōmengā nānōogængā āñongante, Botō nānōogæmi iīmipa, ante Ao ānīnque āāodenque moncæcāimpa. Ayæ onquiyængā adobaī, Botō nānōogæmi iīmipa, ante ānīnque tōmengā nānōogængā āñongante āāodenque moncæcāimpa. ⁴ Monte ate nānōogængā tōnō adocanque baī ba adinque onquiyængā wæætē, Onguiñængā quī, ante ēñadinque, Tōmēmo baonque ēñabopa, ante ædō cæte anguingāā. Ayæ adobaī onguiñængā wæætē, Onquiyængā quī, ante ēñadinque, Tōmēmo baonque ēñabopa, ante ædō cæte anguingāā. ⁵ Nānōogængā angā ēñente edæ Baa ānāmaī. Pancaguēnēa Wængonguī ingante nangui apænecæte ante guēa Ao ānīnque nānēneto nānēnē wantæ iñō mōnīnque idæwaa. Edæ, Tatāna angā wacā ingante towēinente wæcæ wæ, ante wæcæ cædinque adodē iñōmō wæætē moncædaīmpa.

⁶ Incæte mānōmaī ānīnque botō, Mīnitō botō ānō baī cōwē cæcæmīnīmpa, ante wæcæ ānāmaī iīmopa. Wæætē, Mīnitō mānōmaī cæmīni waa iīmaīmpa, ante mānīnonque ante apænebopa. ⁷ Onguiñænāni tōmānāni botō baī wēmō cædāni quēwēnāni baī waa incædōnīmpa, ante pōnēmopa. Incæte Wængonguī pancadāniya iñānīte pōnō apænedīnque, Bitō mōnāmaī inte adobīque wēmō cæte botō beyæ cæcæbiīmpa, ānīnque wadāni iñānīte, Bitō mōmi ate mīna gæncaya botō beyæ cæcæmīnīmpa, angampa.

⁸ Botō, edēningā ingante apænedīnque ayæ owæmpoingā ingante apænedīnque, Botō baī wēmō cæbi waa iīmaīmpa, āmopa. ⁹ Incæte adocanque, Onquiyængā ingante cōwē moncæboīmpa, ante wæcā adinque botō, Bitō cōwē moncæbiīmpa, āmopa. Edæ tōmengā towēinente wædāmaī incæcāimpa, ante wæcæ ānīnque botō, Tōmengā godōmenque waa quēwencæcāimpa, ante ee abo moncæcāimpa.

¹⁰ Do mōningā ingante edæ botō iīmaī āmopa. Æ, wadō āmopa. Wīi botō āmopa. Mōnō Awēnē incæ iīmaī angampa. Onquiyængā incæ tōmengā nānōogængā ingante ēmō cæte godāmaī incæcāimpa, angampa. ¹¹ Incæte ēmō cæte gocā iīnīnque wæætē adodō pōnīnque adocā ingante mongā waa iīmaīmpa. Wæætē adodō pōnāmaī ingā iīnīnque tōmengā ee quēwēnīnque wacā ingante cōwē mōnāmaī incæcāimpa. Ayæ onguiñængā incæ nānōogængā ingante pāmænte godāmaī incæcāimpa, ante mōnō Awēnē angampa.

¹² Wamīni iīmīnīte guīquēnē mōnō Awēnē ānāmaī iñongā botō wæætē iīmaī āmopa. Onguiñænganque nē pōnengā inte, Botō nānōogængā pōnēnāmaī ingā incæ botō tōnō ee quēwengampa, ante adinque tōmengā nānōogængā ingante pāmænāmaī incæcāimpa.

¹³ Onquiyænganque nē pōnengā inte, Botō nānōogængā pōnēnāmaī incæ botō tōnō ee quēwengampa, ante adinque tōmengā nānōogængā ingante pāmænāmaī incæcāimpa.

¹⁴ Onquiyænganque nē pōnengā iñongante tōmengā adocanque nānō pōnēnō beyænque Wængonguī, Mīna gæncaya botō quīmīna iīmīnāpa, ante onguiñængā ingante edæ do ængampa. Ayæ adobaī onguiñænganque nē pōnengā iñongante tōmengā nānō pōnēnō beyænque Wængonguī, Mīna gæncaya botō quīmīna iīmīnāpa, ante onquiyængā ingante adobaī do ængampa. Wængonguī mānōmaī cæcā beyænque mīnatō wēnāni nāni waa quēwengūnque Wængonguī quīnāni badānīpa. Wængonguī wīi mānōmaī cæcā baī mīnatō wēnāni iñōmō Wængonguī quīnāni iñāmaī inte nōwadāni baī nānēnē pæcædōnānīmpa.

¹⁵ Bitō adobīque nē pōnēmi iñōmīte bitō nānōogængā pāmænte gocā wædinque ee abi gocæ. Mānōmaī ēmō cæte gocā adinque bitō tōmengā ingante nānōnāmaī inte baī badīnque ee quēwencæbiīmpa. Edæ, Piyænē cæte quēwēedāni, ante Wængonguī tōmāmō iīmonte aa pegacāimpa. ¹⁶ Bitō onquiyæmi tōmēmi waa cæbi adinque bitō nānōogængā wabānō waa pōnente quēwēmaingā, ante ædō cæte ēñēmīi. Edæ onguiñæmi adobaī

tömëmi waa cæbi adinque bitö nänöogängä wabänö waa pönente quëwëmaingä, ante ædö cæte ëñëmi.

¹⁷ Incæte mönö Awënë, İımaı cæe, angä ate ëñente wædinque bitö tömengä nänö änönonque ante cæte quëwencæbiimpa. Ayæ, Æbänö botö nänöogängä ëayömo mönö Awënë aa pecantapa, ante pönëninque bitö mänıñedë bitö nänöogängä ëagai bai adobi inte quëwencæbiimpa. Botö İñömö Codito ingante nani pönencabo wayömö nani godongämæ poncabo wayömö nani godongämæ poncabo weca gote apænedinque, Mänömaı cæedäni, ante tömänäni İñänite ante apænebopa.

¹⁸ Ongüñämi İmi do ëö togænımi İñömite Wængongüı aa pecantawo. İninque bitö, Bagäacä bai babote, ante cædämaı incæbiimpa. Eö togæmi inte ee quëwëe. Wæætë ëö togænämaı İñömite Wængongüı aa pecantawo. İninque bagäabi inte ee quëwëe. ¹⁹ Edæ ëö togæmö incæ bagäamö incæ waomö önömonque İmompä. Wıı mänınö beyænque waa quëwëmö İmompä. Wæætë Wængongüı nänö wææ angainö ëñente beyænque waa quëwëmompä. ²⁰ İninque, Æbänö engænömo Wængongüı aa pecantawoo, ante pönëninque bitö adobi inte cöwë quëwëe. ²¹ Bitö wacä beyænque cæte në quëwëmi İñömite Wængongüı bitö İmite aa pecantawo. İninque bitö në cæbi inte piyænë cæte wædämaı incæbiimpa. Incæte bitö İmite İmpo cædinque, Abæ tawænte goe, angä ëñëninque ee goe.

²² Waocä beyænque cæte në quëwëmi İñömite mönö Awënë aa pecantawo. İninque mönö Awënë incæ pönö İmpo cædinque, Abæ tawænte goe, angä ëñëninque ee gote bai ewocabipa. Wæætë bitö waocä beyænque në cæbi İñämaı İñömite mönö Awënë aa pecantawo. İninque Codito në aa pete ængä beyænque bitö cæte në quëwëmi babipa. ²³ Edæ Wængongüı tömengä nänö Tæiyæ Waëmö Wengä ingante godongä beyænque mönö wæætë tömengä quımö bagamöimpa, ante pönëninque mİnitö wæætë waocä beyænque në cæte quëwëmi badämaı İedäni. ²⁴ İñänäni İımaı ante cæedäni. Botö Wængongüı Awënë nempo quëwëninque tömengä nänö änönonque ëñente cæcæboimpa, ante cædinque mİnitö Wængongüı nänö aa peyedë mİni ëagai bai adomİni inte quëwëedäni.

²⁵ Ayæ, Mönämaı İñäni æbänö quëwenguënänäni İñäni, ante mönö Awënë angampa diyæ ëñinguımo. Incæte Wængongüı waadete pönö apæncä ëñëninque botö në ëñënömo bagaimo inte mä pönëninque ämo ëñëmaımİnİpa. ²⁶ Mönö wæwenguımämo oo pönİ İmpä, ante pönëninque bitö, Nöwo botö nänöogängä ingante æbänö ëate quëwëmoo, ante pönëninque ñöwo bitö ëadö bai adobi inte cöwë quëwenguënëmi İmİpa, ante pönëmopa. ²⁷ Ongüñämi ëñëmi, Bitö nänöogängä ingante do mömitawo. İninque, Pämæncæboİmpä, ante änämaı İe. Wæætë wacä ingante ämopa. Bitö wëmö cæbitawo. İninque, Botö nänöogängä, ante diqui diqui mİñämaı İmi waa İmaİmpä. ²⁸ Incæte ñöwo mömi incæ wænæ wænæ cædämaı inte mömİpa. Ayæ baquécä adobaı do mongä incæ wænæ wænæ cædämaı inte mongampa. Incæte æcänö möna tömengä Inguİpoga quëwente nänö caate wæquinque mongampa. Mänömainö ante yewämöninque botö, Mİnitö caate wædämaı incæmİnİmpä, ante wææ ämopa.

²⁹ İñänäni, Nöwopämo wıı wantæpiyæ İngäİmpä, ante wædinque ämopa. Edëningä nänö pönëno bai në mangüiwengä incæ adobaı pönengä bai waa İmaİmpä. ³⁰ Æcänö Ca ca wæda tömengä İñömö wıı wæcä bai bacä İninque waa İmaİmpä. Æcänö Ca ca toda tömengä wıı tocä bai bacä İninque waa İmaİmpä. Æcänö godonte æna tömengä ömæpocä bai bacä İninque waa İmaİmpä. ³¹ Inguİpoga mönö cædö ante æcänö cæda tömengä mänınö ante änämaı inte bai cæcä İninque waa İmaİmpä. Edæ Inguİpoga quëwëninque mönö cædö oo pönİ ewente baquİnö angüënë.

³² Edæ mİnitö, Æbänö cæquımoo, ante wædämaı incæmİnİmpä, ante botö İımaı ante wææ ämopa. Në wëmö cæcä guİquënë, Æbänö cæbo ate mönö Awënë waa toquİngä, ante pönëninque tömengä mönö Awënë beyænque ante quëwengampa. ³³ Do möİngä guİquënë Inguİpoga nänö quëwenguİnö ante pönëninque, Æbänö cæbo ate botö nänöogängä waa toquİngä, ante wæcampa. ³⁴ İninque tæcæ tæcæ pönente cæcampa.

Onquiyængä guiquënë owæmpoingä ingä incæ baquecä ingä incæ mönö Awënë beyä ante pönëninque, Æbänö botö baö tæiyä waëmö ëñaquimoo, ayä, Æbänö botö önöwoca tæiyä waëmö ëwocaquimoo, ante cæcampa. Do möingä guiquënë, Æbänö cæbo ate botö nänöogængä waa toqingä, ante inguipogaque nänö quëwenguinö ante wæcampa.

³⁵ Mäninö ante botö wii minitö iminite wææ cæcæte ante ämopa. Wæætë minitö mini watapæ quëwenguinque ante botö, Mönö Awënë ingante æmæ pönënämaï inte nöingä cæte quëwencæminimpa, ante ämopa.

³⁶ Onguiñængä adocanque guiquënë, Botö wengä baquecä do picængä bacampa, ante adinque botö tömengä ingante godonguënëmo imopa, angä ïninque tömengä nänö änö bai cædinque ee godongä moncæcäimpa. Edæ mänömaï godöninque tömengä wii wënæ wënæ cæcä ingampa. ³⁷ Wacä guiquënë mimöno ædæmö nö pönëninque, Botö wengä baquecä picængä bacä incæte botö piyänë cæte godönämaï incæboimpa, angampa. ïninque wadäni tömengä ingante wææ änämaï ïñönäni tömengä, Tömëmoque botö äninö bai cæcæboimpa, ante në ëñente pönëninque godönämaï ingampa. Tömengä adobai waa cæcampa. ³⁸ ïninque tömengä wengä baquecä ïñongante edæ, Moncæcäimpa, ante në godongä guiquënë waa cæcampa. Wæætë wacä, Mönämaï incæcäimpa, ante wii godongä guiquënë tömengä godömenque waa cæcampa.

³⁹ Nänöogængä ayä miingä quëwëñongante onquiyængä ïñömö tömengä tönö cöwë quëwenguënëngä ingampa. Wæætë nänöogængä wængä owæmpote ate tömengä abæ tawænte bai adocanque quëwengampa. Do owæmpoingä inte, Wacä ingante möinëmopa, angä ëñëninque minitö, Tömëna mönö Awënë nempo nana quëwencaya ïnapa, ante adinque möinente nänö wædö ante ee godömini moncædaimpa. ⁴⁰ Incæte botö, Owæmpoingä ee wëmö cædinque godömenque watapæ quëwëmaingampa, ante pönëmopa. Edæ Pabodo imo Wængongui Önöwoca tönö äawocaque bai ëwocabo inte mänömainö ante pönëmopa.

8

Mönitö wængongui cængui, ante wadäni nani cönöni ante

¹ Wadäni, Mönitö wængongui cængui impa, ante nani cönönincoo ante adinque minitö, Önonque cængui impa, ante abaimpa, äminitawo. Näwangä tömämö mini änö bai do ëñëmopa. Incæte, Tömëmoque do ëñëmopa, ante në angä ïñömö tömengä nämä ængö cæte bai cædinque wadäni ïnänite piinte bai cæcampa. Wæætë në waadecä guiquënë wadäni ïnänite ængö cæte bai cædinque tömënäni ïnänite waadete cæcampa. ² Waocä, Tömëmo do ëñëmopa, ante në änewengä guiquënë tömengä nö nänö ëñenguënëntö ante ayä ëñënämaï inte cæcampa. ³ Wæætë Wængongui ingante në waadedäni ïnänite do againgä inte tömengä tömënäni ïnänite pönengampa.

⁴ ïninque, Mönitö wængongui cængui impa, ante wadäni nani cönönincoo ante ñöwo apänebo ëñëedäni. Tömënäni nani, Mönitö wængongui impa, ante nani cönöninca önoncaque impa, ante mönö do ëñëmopa. Ayä adobai, Näwä Wængongui adocanque pöni ingampa, ante do ëñëmopa. ⁵ Wængonguiidi nani äñönäni incæ awënëidi nani äñönäni incæ nanguï pöni ïnänipa. Näwangä impa. Incæte tömënäni, Wængonguiidi ïnänipa, ante nani äñönäni inguipoga incæ öönædë incæ ongönäni incæte, ⁶ Wængongui mönö Wæmpocä ïñömö adocanque pöni ingampa. Öönæ incæ inguipo incæ öönædë ongoncoo incæ inguipoga ongoncoo incæ tömancoo incæ tömengä adocanque badonte aacä beyænque edæ ongoncoopa. Ayä adobai mönö tömengä nempoque quëwëmopa. Ayä Itota Codito mönö Awënë adocanque pöni ingampa. Tömengä tönö godongämæ cædinque Wængongui tömancoo badongacäimpa. Adocä Codito tönö godongämæ cædinque Wængongui pönö cæcä ate mönö quëwëmopa.

⁷ Mäninö ante pancamonga guiquënë ëñëmopa. Pancadäniya guiquënë në pönënäni incæ mäninö ante ëñënämaï ïnänipa. ïñäni Codito ingante tæcæ pönënäni ïñömö tömënäni wëënëñedë, Mönitö wængongui impa, ante badonte cönonte ædæ wæænte cægäinäni ïnänipa. Ñöwo ïñömö tömënäni Codito ingante tæcæ pönente ate, Wadäni

wængonguī cænguī incæ cæninque wentamō mongænte wæcæ wæ, ante guīñente wædāni incæte do edæ cænānīpa. Mānōmaī Codito ingante æmæ pōnēnāni inte tōmēnāni wadāni nāni wængonguī cænguī cæninque nāmanque nāni æmæ pōnēnō beyænque nāmā apænte do wentamō entawēnāni inānīpa. ⁸ Incæte cænguī ōnonque iñonte mōnō cænāmaī imō beyænque ædō cæte wīwa entawenguiī. Wæætē mōnō cæmō beyænque ædō cæte waa entawenguiī. Edæ mōnō imonte cænguī beyænque Wængonguī dicæ waa aqingāa.

⁹ Wængonguī wææ ānāmaī ingā adinque mīnitō do cæmīnitawoo. Iñæmpa mānōmaī cæmīni adinque wadāni nē æmæ pōnēnāni adobaī cænāni ininque tōmēnāni tee tēwate baī oda cæbaīnānīpa. Mānōmaī impa, ante pōnēninque mīnitō, Oda cædāmaī incædānīmpa, ante cædinque ee cænāmaī imæwedāni āmopa. ¹⁰ Edæ, Mōnitō wængonguīidi oncō impa, ante tōmēnāni nāni ānincōnē bitō nē ēñēmi inte go guīdinque cængōmitawo. Iñæmpa bitō mānōmaī go guī cængōmi adinque wacā nē æmæ pōnēngā guīquēnē bitō cæbaī adobaī do cædinque nāmā apænte ānāmaī inte tōmēngā nānō oda cæquinque do go guīte cæmaingampa. ¹¹ Codito tōmāmō beyæ wæninque nē æmæ pōnēngā beyæ adobaī wængacāimpā cæbii. Bitō tōmēnāni nāni wængonguī oncō ante, Ōnonconque impa, ante nē ēñēmi inte do guīte cæmi beyænque bitō tōniñacā nē æmæ pōnēngā iñongante wapiticæ māobi oda cæte wæwente bacampa tōō. ¹² Mānōmaī cædinque mīnitō tōniñadāni inānite mīnitō waadedāmaī inte wēnæ wēnæ cæmīnīpa. Tōmēnāni nāni nāmā apænte æmæ pōnēnō ante wido cæte baī cædinque mīnitō mōnō Codito ingante do wīwa cæmīni imīnīpa. ¹³ Ininque botō cæmo beyænque botō tōniñacā oda cæcā adinque botō, Tōmēngā oda cædāmaī incæcāimpā, ante cædinque baō incæ cōwē cænāmaī incæboimpā.

9

Codito nānō da godongaināni iūmaī cæquēnēnāni inānīpa

¹ Botō Pabodobo æbānō imoo, ante mīnitō æbānō ante pōnēmīni. Edæ, Botō Itota nānō nē da godongaīmo imopa. Tōmēngā botō imote pōnō ñimpo cæcā beyænque quēwēmopa. Mōnō Awēnē Itota ingante do agaīmo imopa. Mīnitō guīquēnē, Pabodo mānōmaī ingampa, ante pōnēmīniyaa. Ayæ mōnō Awēnē nempo quēwēninque botō Pabodobo tōmēngā beyæ apænebo ēñēmīni inte mīnitō wæætē, Pabodo apænecā beyænque mōnitō nē pōnēmōni imōnīpa, ante pōnēmīniyaa. ² Wadāni guīquēnē, Pabodo ingante Awēnē Itota da godōnāmaī ingacāimpā, ānānitawo. Tōmēnāni mānōmainō ante tedewēnāni incæte mīnitō guīquēnē, Pabodo ingante mōnō Awēnē Itota nāwangā da godongacāimpā, ante apænequēnēmīni imīnīpa. Edæ botō pōnō apænebo beyænque mīnitō wede pōnēninque mōnō Awēnē nempo quēwēmīnīpa, ante edonque abaimpa.

³ Pancamīniya botō imote apænte ancæte ante cæyōmīni botō nāmā wææ cæcæte ante iūmaī āmopa. ⁴ Mōnatō apænemōna ēñēmīni incæte mīnitō iñōmō, Mīnatō eyepæ cæmīnāpa diyæ cænguī tōnō bequī ænguīmīnaa, ante wææ ante baī tedemīni awædō. ⁵ Wadāni mōnō Awēnē Itota nānō nē da godongaināni iñōmō nāna gæncaya nāna gæncaya godānīpa. Mōnō Awēnē tōniñadāni adobaī Pegodo adobaī tōmēnāni nāna gæncaya nāna gæncaya godānīpa. Mōnatō imōnate guīquēnē mīnitō, Mīnatō godinque nānōogængā ænāmaī inte goeda, ante wææ ante baī tedemīni awædō. ⁶ Wadāni ōnompoca cædāmaī inte quēwēñōnāni botō tōnō Bedēnabee adomōnaque ōnompoca mōna cædō beyænque ænte quēwēngūnēmōna imōnatawo.

⁷ Tontadoidi guīquēnē dicæ tōmēnāni nāmā nāni godonte æinta beyæ quēwēnāniyaa. Ayæ æcānō yowementacoo mingā pæ inca ate nē mīningā iñōmō ædō cæte yowepæ ænte bedāmaī inguingāa. Edæ dobæ ade becampa. Cænīnāni nē aacā guīquēnē dicæ goōmæ yopænte ænāmaī inguingāa. Edæ do yopænte ænte becā apa ānewēmīni.

⁸ Mānōmainō ante apænedinque botō woadānique nāni ānōnō ante wīi āmopa. Wæætē Wængonguī nānō wææ angainō ante mānīnonque ante āmopa. ⁹ “Wagada onguīñængā nē cæcā inte tōmentapo æ yacāimpā, ante āmi pīnā pīnā gāwate

cægöñongä bitö tömengä önöne wææ wodönedämaï inte ee abi cæncæcäimpa,” ante Möitee wodi wææ yewæmongacäimpa. Ìninqe Wængonguï dicæ wagada beyænque ante pönëninque mänömainö ante angantawogaa. ¹⁰ Wæætë mönö beyænque ante Wængonguï angampa, ante pönengäimpa. Näwangä mönö beyænque yewæmongatimpa. Waocä dicæ, Wadäniqwe cæncædänimpa, ante onguipoi mangæ mangæ täñongäa. Wæætë, Mönitö godongämæ cæncæmönimpa, ante mangæ mangæ täñongampa. Ayæ tömëmö në æ yeyacä guiquënë dicæ, Wadäniqwe cæncædänimpa, ante æ yeyacäa. Wæætë edæ, Mönitö godongämæ cæncæmönimpa, ante pönengä inte æ yeyacampa. ¹¹ Ìninqe, Minitö mimöno cænte bai ewocacæminimpa, ante cædinque mönatö tömëmö minte pæ bai pönö apænemöna do ëñente ewocaminitapa. Incæte mönatö ïmönate wæætë mäincooque pönömïni wënæ wënæ ænguënëmöna äminitawo. ¹² Ìñampa wadäni ïñänite mäincoo ee godömïni æñänipa. Mönatö ïñömö godömenque apænedinque godömenque ænguënëmöna ïñömönate minitö Baa äminitawoo.

Mönatö në ænguënëmöna incæte cöwë æñämaï ïmönapa. Edæ, Mönö Codito ingantedö ante watapæ apænedinque mönatö mäincoo æmöna bai wadäni, Pabodoidi mäincoo æncæte ante apænedapa, ante pïñinque wææ ancædönänimpa. Ìninqe, Wææ äñämaï incædänimpa, ante cædinque mönatö, Cöwë æñämaï incæmönaimpa, ante piyænë cæte ee apænemönapa. ¹³ Näwä Wængonguï cænguï, ante ænte mämö cönönäni ongö adinque Wængonguï oncönë ñænæncönë në cædäni incæ pancaa ænte ade cænte quëwënänipa. Ayæ, Wængonguï quï, ante baö näni iya täimpaa në cædäni adobaï iya täimpaa näni cönöningä incæ pancacäa ænte cænte quëwënänipa, ante pönëmïniyaa. ¹⁴ Mönö Awënë adobaï, Botö ïmotedö ante watapæ apænedäni ate në ëñänäni wæætë në apænedäni ïñänite cænguï pædæ godönäni ænte cænte quëwencædänimpa, angampa. ¹⁵ Botö guiquënë në ænguënëmö incæte cænguï ante äñämaï inte cöwë apænebo ïnömoimpa. Ñöwo minitö ïminite yewæmöninque botö dicæ, Pönömïni æncæboimpa, ante yewæmömogaa. Cænguï ante äñämaï inte botö Wængonguï beyænque apænebo ëñëmïnipa, ante pönëninque mäninö beyænque tobopa. Mänömainö ante todömo inte botö, Gäwænte wædinque näñe wæmo incæ wacä mäincoo edæ æñämaï incæboimpa.

¹⁶ Itota Codito ingantedö ante apænebi ëñencædänimpa, angä ëñente botö në apænebo bagaïmo inte edæ ædö cæte wadö cæquïmoo. Ìninqe botö mänömainö ante në apænedömo inte edæ, Tömëmö waa cædinque apænebopa, ante ædö cæte tedequïmoo. Edæ botö Itota ingantedö ante möni watapæ apænedö ante wïi apænebo bai edæ botö wæquinque incædönimpa. ¹⁷ Edæ Itota Codito, Apænebi ëñencædänimpa, angä ëñëninque botö Ao ante watapæ todinque apænebo adinque tömengä, Waa cæbi ïmipa, ante eyepæ pönongä æmaïmopa. Wæætë, Wïi apæneinente wæbo incæte botö cöwë apænebo ïninqe edæ tömengä nänö angaïnonque cæte apænebopa. Edæ botö në apænequënëmö inte ædö cæte apænedämaï inguïmoo. ¹⁸ Ìninqe botö ëñente cæbo beyænque quïnö ænguïmoo. Botö Itota Codito ingantedö ante watapæ apænebo beyænque Wængonguï ïimaï pönö cæcä æninque tocæboimpa. Botö apænebo beyæ minitö në pönonguënëmïni incæte pönönämaï ïmïni ïninqe botö wæætë æñämaï inte tocæboimpa.

¹⁹ Ayæ waodäni wïi botö awënëidi ïñänipa. Ayæ botö wacä ingante në cæbo ïñämaï inte abæ tawænte bai quëwëmopa. Incæte botö, Waodäni godömenque nanguï ïñäni Codito gämænö poncædänimpa, ante cædinque tömänäni ïñänite në cæte quëwëmö bai botö baquinque nämä pædæ godonte bai quëwëmopa. ²⁰ Godongämæ cæbo ate oodeoidi incæ Itota gämænö poncædänimpa, ante cædinque botö oodeoidi näni pönënö bai pönëninque tömënäni näni quëwënö bai quëwëmopa. Pancadäniya, Möitee wodi nänö wææ angaïnö ëñëmö beyænque mönö quëwengäimpa, ante pönëninque mäñinonque ante ëñente cædänipa. Botö guiquënë, Wïi Möitee wodi nänö wææ angaïnö ëñëmö beyænque mönö quëwengäimpa, ante pönëmopa. Incæte, Godongämæ cæbo ate mäñinonque ante në ëñente cædäni adobaï Itota Codito gämænö poncædänimpa, ante cædinque botö tömënäni ëñënö bai adobaï ëñente bai cæbopa.

²¹ Wadäni guiquënë Möitee wodi wææ ante nänö yewæmongainta adämaï inänipa. Botö guiquënë, Wængongui, İimaï cædäni, ante nänö wææ angainö ante cöwë ëñenguënëmo inte botö mönö Awënë Codito nempo quëwëninque tömengä nänö angainö ante cöwë ëñente quëwëmopa. Incæte godongämæ cæbo ate nē adämaï inäni adobaï Itota Codito gämænö poncædänimpa, ante cædinque botö wadö pönëmo incæ tömënäni adämaï inte nani quëwënö bai adobaï inte bai quëwëmopa. ²² Ayæ, Godongämæ cæbo ate æmæ pönënäni adobaï Codito gämænö poncædänimpa, ante cædinque botö tömënäni æmæ pönente quëwënäni bai æmæ pönëmo inte bai quëwëmopa. İninque, Godongämæ cæbo ate pancadäniya Codito gämænö ponte quëwencædänimpa, ante cæcæte ante botö æbänö cæquïmo, ante wædinque İimaï cæbopa. Wadäni nani quëwënö bai wadäni nani quëwënö bai wadäni nani quëwënö bai adobaï cædinque botö tömänäni nani quëwënö bai adodö ante pönëmo inte bai quëwëmopa. ²³ Edæ, Itota Codito watapæ pönö cæcä beyenque tömämö tömengä nempo quëwëninque godongämæ watapæ tocæimpa, ante cædinque mäninö wadäni nani quëwënö bai wadäni nani quëwënö adodö ante pönëmo inte bai quëwëmopa.

²⁴ Edæ nē quingæ pogodo godäni İñömö tömënäni nani pogodo goïmancadë tömänäni pogodo godänipa. Incæte adocanique quingæ pogodo gocä inte täno gote nä gongængä adinque edæ, Bitö adobique quingæ pogodo gote gänä cæbipa, ante pædæ pönönäni ængampa, aminitawoo. Minitö guiquënë quingæ pogodo gote bai gänä cæte æncæte ante tæï piñænte cædäni. ²⁵ Gänä cæcæimpa, ante cædinque tömënäni wadö nani cæinënö ante cædämaï inte wæntæye inämaï inte mäninonque ante cædänipa. Tömënäni guiquënë gänä cædinque poganta aquïi guïñë wænguiñabo nani que cædintaque ænte wencacæte ante mänömaï cædänipa. Mönö guiquënë poganta guïñë wænämaï inta mönö cöwë encaquinta æncæte ante mänömaï cæmompä. ²⁶ Mänömaï impa, ante pönëninque edæ wiñatæ wiñatæ guidämaï inte pogodo godäni bai botö töingä gobopa. Ayæ, Æcänö gänä cæcää, ante tiyæmäa tamonte guëa cæda bai cædinque botö, Gänä cæcæboimpa, ante tæïmö piñænte nö cæbopa. ²⁷ İninque godömenque godömenque apænebo ëñënäni ate tömëmö oda cædämaï incæboimpa, ante cædinque botö, Tæï piñænte quingæ gobæwe, ante bai cædinque botö nämä incæ da godö da godö godoncæte ante nämä tæi tæi pante bai cæbopa.

10

Wængongui impa, ante nani cönöinca

¹ Botö tönïñamini İimaï ante apænebo ëñëedäni. Mönö wæmäidi wodi tömänäni boguïmä gänëñömö quëwente cægongadänimpa. Ayæ tömänäni gäwapæntibädë tæcæguedëmæ ti wææ tao gogadänimpa. ² İninque æpænë guite bai cædinque tömënäni Möitee wodi nempo tömänäni nani quëwenguinque edæ boguïmämodë godinque gäwapæntibæ tæcægüidëmæ gogadänimpa. ³ Ayæ cængui Wængongui öönädë da pönongä wææ nani cæ bai tömengä Önöwoca nänö apænedö adobaï ëñente ëwocate quëwengadänimpa. ⁴ Wængongui Önöwoca apænecä ëñëninque tömänäni godongämæ bete bai ëwocate quëwengadänimpa. Edæ dicabo tæëmonca İñonte Möitee wodi ongonto tæi tæi äayongä æpæ ompade ba begadänimpa. İincayæ Ponguingä mönö Codito adobaï tæï piñængö inte tömënäni tönö godongämæ godinque tömengä Önöwoca ingante pönongä æninque tömënäni ompade bete bai äawocaque bai ëwocagadänimpa. ⁵ Incæte wodo tömänäni ëñënämaï cædäni adinque Wængongui wii togacäimpa. Edæ piïninque wænöninque önomæca yabæque wido cæcä ñömængadänimpa.

⁶ İninque, Tömënäni wænæ wænæ cæcæte ante nani toïnente wädö bai minitö wii adobaï toïnente wæcæminimpa, ante mönö imonte wææ odömoncæte ante Wængongui tömënäni nani toïnënö beyæ ante pangä wængadänimpa, ante abaimpa. ⁷ Pancadäniya nani badonte cönöinca weca ædæ wæænte, Wængongui impa, ante babæ apænente towengadänimpa. Edæ, “Cæncæte ante becæte ante tæë contadinque tömënäni Yæ

yæ owempocæte ante ængæ gantidänitapa,” ante yewæmongatimpa cæminii. Minitö iñömö edæ, Wængongui impa, ante nani babæ towengai bai wii adobai cædäni. ⁸ Pancadäniya guiquënë nänöogængä inämaï iñongante wiwa towengadänimpa. Edæ bæintitodee miido ganca inäni mänimpodäni edæ mänömaï towänäni inte adoönæque iñonte näne wængadänimpa, ante adinque pönente wædinque mönö wæætë towänämaï ingæimpa. ⁹ Pancadäniya guiquënë, Quiëmë cæmö iñömönte Awënë dicæ pangäa, ante ancaa wænæ wænæ cædäni adinque Wængongui tæntæ angä pocæ wængadänimpa. Iñinque tömënäni nani wænæ wænæ cægäinö ante mönö Baa ante wænæ wænæ cædämaï ingæimpa. ¹⁰ Pancadäniya guiquënë Wængongui nänö pönönincoo adinque, Wængongui wii waëmö pönongä awædö, ante piinte tededäni ate Wængongui anquedo në wido cædongä inongä inte tömënäni inänite wænonte edæ wido cægacäimpa. Mänömaï cæcä ante adinque minitö, Pangä wæncæ wæ, ante wædinque tömënäni nani piinte tedewengai bai adobai piinte tededämaï imæwedäni.

¹¹ Iñinque, Wamini mini adobai panguinque cæminipa, ante wææ odömoncæte ante pancadäniya inänite Wængongui mänömaï pangacäimpa. Ayæ iimämo wodo iñinque bayonte quëwëmö iñömönte dodäni mönö imonte wææ ancæte ante yewæmöninque, Wænæ wænæ cædäni ate Wængongui æbänö pangacäi, ante aedäni, ante wææ yewæmongadänimpa. ¹² Mänömaï impa, ante adimini incæte minitö, Mönitö nämä ongönte cöwë oda cædämaï incæmönimpa, ante pönëminitawo. Edæ mini ædocæ tæ go wæænguinque mänömaï änewëminipa töö. ¹³ Minitö wænæ wænæ cæinente wæminitawo. Edæ wii minitö adominique mänömaï wænæ wænæ cæinente wæminipa. Mönö waocabo mönö wænæ wænæ cæinente wæcabo tömämö imompa. Incæte minitö mini oda cæquinque wænæ wænæ cæinente wæmini adinque Wængongui mönö imonte cöwë në pönengä inongä inte, Oda cædämaï incæminimpa, ante wææ äninque edæ, Idæwaa, angampa. Ayæ wænæ wænæ cæinente wæmini incæte tömengä töö æmænte ængä beyænque minitö eyepæ inte ate adiyæ næ gongæinque oda cædämaï inguimini iminipa.

¹⁴ Mäninö beyænque botö në waademini, ämo ëñëedäni. Wængongui impa, ante nani babæ ante gönöinca gomö adinque ocæmæ wodii winöedäni ämopa. ¹⁵ Minitö ocai encadömini iminipa, ante adinque botö mänömainö ante yewæmömopa. Iñinque botö änö ante, Nö intawo, babæ intawo, ante minitö në encadömini inte apænte ante bai ëñencæminimpa. ¹⁶ Mönö pönencabo owæta æninque Wængongui ingante waa ate pönente apænedinque, Mönö Codito wepæ tömämö beyæ godönte impa, ante pönëninque mönö pönencabo iñömö godongämæ bemompa. Ayæ päö mönö pä ænö æninque, Mönö Codito tönö godongämæ caate wængaimö bai imompa, ante pönëninque mönö godongämæ cæmompä. ¹⁷ Mönö päö adocaque æninque pä ænte godongämæ cæninque mönö, Päö adocaque i bai mönö tæiyæmö pöni imö incæte adocabomö imompa, ante pönengæimpa.

¹⁸ Idægoidi ëñagäinäni iñömö, Wængongui qui, ante baö ænte mämö ñönöninge iya tänänipa. Mänii baö tömënäni nani iya täimpaa ñönöningä pancacäa æninque tömënäni, Baö Wængongui qui i bai mönö adobai Wængongui quimö imompa, ante bai cædinque godongämæ cænänipa, ante do ëñëminipa. ¹⁹ Mänömaï äninque botö æbänö ämo, ante pönëmini. Në ëñënämaï inäni nani babæ cönöinca iñömö edæ näwä Wængongui ingampa diyæ tömënäni tömengä quinäni inäniyaa. Ayæ, Wængongui cænguï impa, ante babæ nani änogä iñömö näwä Wængongui cænguï impa diyæ tömënäni Wængongui tönö godongämæ cænäniyaa. Botö iñömö edæ mänömainö ante dicæ ämogaa.

²⁰ Mänömaï änämaï imo inte botö iimaï ämopa. Tömënäni, Wængongui qui, ante babæ cönöninge dicæ näwä Wængongui ingante godönäniyaa. Iñæmpa wænæidi inänite godönänipa cæminii. Wænæ tönö cædäni awædö, ante minitö gomö adinque godongämæ cænämaï imæwedäni, ämopa. ²¹ Edæ mönö Awënë bepæ godongämæ bemini inte minitö wænæidi bepæ ædö cæte godongämæ bequimini. Mönö Awënë cæimpaa tæ contate godongämæ cæmini inte minitö wænæidi cæimpaa ædö cæte godongämæ tæ contate cænguimini.

²² Æmæ pönente bai wënæidi nāni bepæ bemö adinque mönö Awënë piinte badinque pämaingampa, ante ëñënimö inte mönö ædö cæte wënæidi bepæ bequimöö. Tæi piñante wææ cæmompä mönö Awënë pänāmaï inguingää.

Ñi cæyænte gote bai quëwente waadete pönengäimpa

²³ Minitö iïmaï apænedinque, “Mönö quiëmë bai cæinëmo incæ Wængongui wææ änāmaï ingampa,” äminitawo. Iñæmpa mönö cæinënonque cæte quëwëmö bai wii mönö waa quëwenguinque incædönimpa. Ayæ adobaï, “Mönö cæinonque cæmö incæ Wængongui wææ änāmaï ingampa,” äminitawo. Iñæmpa mönö cæinënonque cæte quëwëmö bai wacä, Botö adobaï cæbote, ante oda cæcædongäimpa cæmöö. Oda cædāmaï incæcäimpa, ante wææ cædinque mönö Wængongui nänö änönonque ante ëñente cæcäimpa. ²⁴ Edæ, Mönö æbänö cæte eyepæ æninque quëwenguimöö, ante nāmā beyænque wædāmaï inte wæætë wadāni beyæ ante pönëninque, Tömënanī nöingä ante ëñente waa quëwencædänimpa, ante mönö nanguï cæcäimpa.

²⁵ Iñinque baö godonte æncæte ante nē mänāni nāni æi pancadë gote æninque mīnitö mīmö entawëmīni incæte, Baacä bai intawo, nāwāaquiringä intawo, ante apænte änāmaï inte guiñënedāmaï ade cæedāni. ²⁶ Edæ, Inguipo Wængongui qui impa. Iñinque inguipoga ongoncoo tömancoo adobaï Wængongui qui inte nāwāaquincoo impa, ante yewæmongatīi apa guiñëwëminii.

²⁷ Ayæ nē pönënanāmaï ingä mīnitö imīnite, Pö cæedāni, angä ëñëninque mīnitö goinëmīni inte godinque tæ contayöminī cænguï pædæ pönongä adinque ee ö ænte cæedāni. Baacä intawo, Nāwāaquiringä intawo, ante nāmanque apænte änāmaï inte ade cæedāni. ²⁸ Wæætë wacä tömengä nänö mīmö pönëno beyænque ante wææ äninque, “Wadāni tömënanī, Mönitö wængongui cænguï impa, ante do nāni godöni impa iñæmpa cæminii,” angantawo. Mänömainö wææ angä ëñente wædinque mīnitö nē wææ äningä beyæ ante ayæ tömengä nänö nāmā apænte æmæ pönëno beyæ ante edæ cænāmaï iedāni. Iñæmpa inguipo incæ inguipoga ongoncoo tömancoo incæ mönö Awënë qui impa cæminii. ²⁹ Wii tömëmīni mīmö entawënö beyæ ante nāmā apænte äninque wæætë nē wææ äningä beyæ ante tömengä nänö nāmā apænte æmæ pönëno beyænque ante mīnitö cænāmaï incæminimpa.

Incæte bitö wabi iïmaï ante wæbitawo. “Möitee wodi nänö wææ angainö beyæ ñä cæyænte wægäimo bai inte botö ñöwo ñi cæyænte gote bai imo adinque wacä tömengä nänö nāmā apænte æmæ pönëno beyænque ædö cæte botö imote apænte anguingää,” ante wæbitawoo. ³⁰ Ayæ, “Wængongui önonque pönongä æninque botö tömengä ingante waa ate pönente apænedinque ade cæmo adinque wadāni iñömö edæ, Baacä incæ iñæmpa cæmii, ante quīnante pönö babæ ante tedewënanīi,” ante bitö wæbitawoo. ³¹ Incæte mīnitö cæminī incæ bemīni incæ quiëmë bai cæminī incæ mīnitö cædinö adinque wadāni, Wængongui ñäö apäite bai ëmönongä ingampa, ante acædänimpa, ante cædinque waa cæedāni. ³² Edæ mīnitö iñömö, Waa cæmöni adinque wadāni oodeoidi incæ guidiegoidi incæ Codito ingante nē godongämæ pönëināni incæ tömänāni tee tēwadāmaï inte oda cædāmaï incædänimpa, ante pönëninque edæ waa cæedāni. ³³ Botö adobaï, Botö tömëmo ænguīnö ante wædāmaï imopa. Wæætë, Botö waa cæbo adinque wadāni Itota gämænö pöninque tömengä ængä beyænque quëwencædänimpa, ante pönëninque botö quiëmë cæbo incæ cöwë waa cæbopa.

11

¹ Mönö Codito tömengä nänö cæi bai botö adobaï cæbo adinque mīnitö botö cæi bai adobaï cæbaiminipa.

Iïmaï cæte Wængongui ingante apænecäimpa

² Minitö botö imote cöwë pönëminī adinque botö mīnitö imīnite waa adinque apænëbopa. Ayæ do pönëngaināni nāni apænëgainö ante botö adodö ante apænëbo

ēñēninqe mīnitō, Nāwangā impa, ante ēñente cæminipa, ante adinqe botō mīnitō imīnite waa ate pōnēninqe apænebopa.

³ Nōwo iñōmō iīmaī āmo ēñēedāni. Mōnō Codito ñænængā inongā inte onguiñængā ingante nē angā ingampa. Waoda nāna gæncaya adinqe onguiñængā ñænængā bai inongā inte onquiængā ingante nē angā ingampa. Mæmpō Wængongui guiquēnē ñænængā pōni inongā inte mōnō Codito ingante nē angā ingampa. ⁴ Ininqe onguiñængā iñōmō Wængongui ingante apænedinqe ayæ, Wængongui æbānō angāā, ante apænedinqe wencadāmaī apænecæcāimpa. Edæ bee ocadinque tōmengā nāmā ocabo ante guiñencate bai apænebaingampa.

⁵ Onquiængā guiquēnē bee ocadinque Wængongui beyæ apænecæcāimpa. Bee ocadinque tōmengā, Wængongui æbānō angāā, ante apænecæcāimpa. Edæ bee ocadāmaī inte nāmā ocamō ante guiñencate bai onquiængā apænebaingampa. Mānōmaī cædinque tōmengā nē ēñēnāmaī cædingā ingante nāni ēō tocadīngā bai inongā inte encabaingampa. ⁶ Edæ onquiængā bee ocadāmaī ingā inte godōmenque ēō tocacā bai waa incædōnimpā. Wæætē, Eō tocate wæcæ wæ, ante wæcā ininqe tōmengā iñōmō edæ bee ocabaingampa. ⁷ Edæ onguiñængā ingante badōninqe Wængongui tōmengā nānō emōnō bai adobai badongā emongacāimpa. Ininqe Wængongui nānō ñāō apāidō bai adobai emōnongā inte onguiñængā bee ocadāmaī incæcāimpa. Onquiængā guiquēnē onguiñængā nānō emōnō māninqe emōnongā ingampa. ⁸ Onguiñængā ingante tāno badōninqe Wængongui ayæ onquiængā ingante badoncæte ante onguiñængā iyapa ænte badongacāimpa. ⁹ Edæ wīi onquiængā beyæ ante onguiñængā ingante Wængongui badongacāimpa. Wæætē, Bitō onguiñængā beyæ quēwencæbiimpā, ante onquiængā ingante badongacāimpa. ¹⁰ Ininqe onquiængā iñōmō, Botō nānōogængā beyæ Wængongui botō imote badongacāimpa, ante pōnente wædinque bee ocacæcāimpa. Ayæ, Bee ocabo adinqe Wængongui anquedoidi incæ, Botō nānōogængā nē angā ingampa, ante ēñencædānimpā, ante cædinque onquiængā waa cædinque bee ocacæcāimpa.

¹¹ Incæte mōnō Awēnē nempo quēwēninqe onguiñængā dæ angā bai onquiængā ōnonganque baquēnengāinō anguēnē. Wæætē onquiængā dæ angā bai onguiñængā wæætē ōnonganque baquēnengāinō anguēnē. ¹² Edæ onquiængā ayæ dæ āñongante tōmengā ingante badoncæte ante Wængongui onguiñængā iyapa æninqe badongacāimpa. Wæætē wēñængā onguiñængā ingante onquiængā mangā beyænque ēñacampa. Incæte Wængongui beyænque tōmāmō quēwēmompā.

¹³ Onquiængā bee ocadāmaī inte Wængongui ingante apænecā ininqe waa intawoo, ante mīnitō tōmēmīni godongāmæ pōnēē cōninqe æedāni. ¹⁴ Edæ dodāni nāni cægaī bai cæquēnēmō inte mōnō iīmaī ante pōnengæimpā. Onguiñængā doyəngui encadinque guiñencate wæquēnengā ingampa, ante edonque ate pōnēmāimpā. ¹⁵ Onquiængā guiquēnē tōmengā doyəngui pæ ininqe edæ waa impā. Edæ, Doyəngui bee ocacæbiimpā, ante onquiængā ingante Wængongui badongā encacampa. ¹⁶ Botō mānōmāinō ante apænebo ēñēninqe mīnitō pancamīniya wæætēdō wæætē āinēmīnitawo. Ināmpā botō āninō bai mōnitō cōwē cæmōnipa. Ayæ Codito ingante godongāmæ nāni pōnencabo adobai Wængongui quīnāni inōnāni inte edæ cōwē mānōmaī cædānipa cæmīni.

Awēnē ææmæ ante bedinqe pancamīniya wīwa cæmīni

¹⁷ Mīnitō mīni waa quēwēninqe ante godongāmæ ponguēnēmīni incæte mīni godōmenque wīwa quēwēninqe godongāmæ pōmīni awædō. Ininqe botō, Waa cæminipa, ante ædō cæte anguimoo. ¹⁸ Iīmāinō ante nōwo tāno apænebo ēñēedāni. Codito ingante mīni pōnencabo godongāmæ pōninqe mīnitō iñōmō mīni caipæ incæ wæætē godō wæætē godō tedewēninqe wacabo nānēnē wacabo nānēnē bamīnipa. Ante apænedāni ēñēninqe botō, Wabānō nōingā ante apænedānipa, ante pōnēmopa. ¹⁹ Nāwangā impa, ante pōnēmopa. Edæ, Ædānidō inānite Wængongui waa acāā, ante

edonque acæimpa, ante tömengä angä ate mīnitō mīni cabo wadō ante mīni cabo wadō ante tedemīnīpa, ante awædō.

²⁰ Īnīnque, Awēnē ææmæ impa, ante godongāmæ pōnīnque mīnitō wīi mōnō Awēnē ææmæ bete baī cæmīni awædō. ²¹ Edæ mīni godongāmæ cæñedē incæ mīnitō, Wadāni adobaī cæncædānīpa, ante ee ongōnāmaī ĩmīni inte tömāmīni cænguī ade cæmīnīpa. Pancadāniya ayæ gæwænte ongōñōnāni edæ pancamīniya do tömo bete dowænte wæmīni awædō. ²² Īñæmpa oncō ömaamīni baī inte mīnitō tömēmīni oncōnē cænte wīi bemīnīi. Edæ Codito ingante mōnō godongāmæ pōnencabo Wængonguī quimō imō incæte mīnitō nāemæ pūinte cæmīni awædō. Ömæpodāni incæ tömēnāni nāni guingo imonte wæquinque ante mīnitō pæ gompote ade cæmīnīpa töö. Mänōmaī cæmīni adīnque botō dicæ, Waa cæmīnīpa, ämogaa.

Mönö Awēnē ææmæ

(Māateo 26.26-29; Māadoco 14.22-25; Odoca 22.14-20)

²³ Edæ mōnō Awēnē botō ĩmote pōnō apæñecā ēñēnīnque botō wæætē ĩmaī ante mīnitō ĩmīnīte pōnō apæñetabopa. Mönö Awēnē Itota ingante Codaa nānō odōmonte godongāiönæ woyowotæ ĩñonte Itota pāo ænīnque, ²⁴ Wængonguī ingante waa ate pōnente apæñedinque pāo pā ænīnque angacāimpa. “Īi pāo botō baō baī impa. Botō, Mīnitō quēwencæmīnīpa, ante botō baō godonte baī cædinque wæncæboimpa. Botō pā ænte pædæ pōnōmo baī mīnitō adobaī ĩncayæ ate botō ĩmote ante pōnēnīnque godongāmæ cæedāni,” angantapa.

²⁵ Mänōmaī angä ĩnīnque cænāni ate owæta adobaī ænīnque tömengä, “Botō wepæ ĩimæ baī impa. Wængonguī do apæñedinque, Botō pōnō cæbo ate mīnitō Ao ämīni ĩnīnque mōnō godongāmæ waa cæte quēwengæimpa, angacāimpa. Nōwo adobaī mīine änīnque apæñebopa. Botō wepæ ante Ao ante æmīni inte mōnō godongāmæ waa cæte quēwengæimpa. Īnīnque mīnitō wantæ wantæ ĩñō bedīnque botō ĩmote ante pōnente becæmīnīpa.” Ante Itota angä begadānīpa. ²⁶ Īnīnque Itota nānō ponguīönæ ganca mīnitō mänōmaī pāo wæætē wæætē cænīnque mänīmæ baī wæætē wæætē bedīnque, Mönö Awēnē tömāmō beyæ wængacāimpa, ante odōmonte baī cæmīni adīnque wadāni ēñēncædānīpa.

Nöingä ante pōnēnīnque mönō Awēnē ææmæ becæimpa

²⁷ Mänōmaī ĩ ĩnīnque waocā pōnēnāmaī inte mōnō Awēnē pāo önonque cænīnque Awēnē nānō bequīmæ önonque bedīnque tömengä nānō wentamō mongænguīnque mōnō Awēnē baō ante, Önonque impa, ante pūinte baī cædinque tömengä wepæ önonque wido cæte baī cæcampa. ²⁸ Īnīnque, Æbänō entawēmōö, ante mīnitō nāmā nāemænte cōwā adīnque nöingä ante pōnēnīnque pāo cænīnque mänīmæ bequēñēmīni ĩmīnīpa. ²⁹ Edæ, Mönö Awēnē baō baī impa, ante æcänō pōnēnāmaī inte cænte beda ĩñömō tömengä nāmā nānō apænte pante wæquinque mänōmaī cænte becampa. ³⁰ Edæ mänōmaī cæmīni beyænque pancamīniya aquīmīni badīnque wæntæye bamīnīpa. Pancamīniya wīi pōnente wæmīnīpa. Ayæ wadāni æpodānimē mänīnō beyænque do æmæwo wænānīpa.

³¹ Incæte mōnō cōwā adīnque nāmanque apænte änīnque nöingä cæmō ĩnīnque mōnō Awēnē wæætē mōnō ĩmonte apænte ante pūināmaī ĩmaingampa. ³² Mönö Awēnē mīnitō ĩmīnīte apænte ante pūingantawo. Edæ mōnō Awēnē, Inguipogaque quēwēnāni ĩnānīte apænte änīnque botō pāñedē mīnitō wīi adobaī pante wæquīmīni, ante wææ cædinque ñōwo ĩñömō edæ, Ĕñēnguēñē quēwēedāni, ante wædænque pangä wæmōmpa.

³³ Botō tōñīñamīni ēñēedāni. Mänōmaī ĩ, ante pōnēnīnque mīnitō cæncæte ante pōnīnque ee ongōñōmīni tömānāni adoyōmō pōnāni ate godongāmæ cæedāni. ³⁴ Godongāmæ pōnīnque mōnō wīi apænte panguēñēmō bacæimpa, ante wææ cædinque mīnitō nē gæwænte wæcā ingante ämīni oncōnē tāno cæncæcāimpa. Nōwo mänīnque ante yewæmōnīnque botō mīnitō weca ĩncayæ ate pōnīnque wadō mīni äñinō ante godōmenque apænebo ēñēncæmīnīpa.

12

Wængonguī Ōnōwoca pōnō cæcā æninqe cæcæimpa

¹ Īñānāni ēñēedāni. Wængonguī Ōnōwoca mōnō ĩmonte pōnō cæcā ate tōmengā nānō pōnōnoncoo eyepæ ænte ēwocadinque mōnō æbānō cæquīī, ante ēñēninqe mīnitō oda cædāmaī incæmīnimpa, ante ñōwo yewæmōmo aedāni.

² Doyedē ĩñōmō mīnitō ēñēnāmaī ĩñōmīnite wadāni, Mōnitō miñæ pōedāni, ante æbāmē cæte ænte māodāni gogamīnimpa. Tōmēnāni miñæ mānōmaī go go cædinque mīnitō do oda cædinque babetade nāni badōninca weca ædæ wææninqe, Mōnitō wængonguī impa, ante cædinque quēwengamīnimpa. ³ ĩninqe mīnitō ĩmīnite botō ñōwo, Ēñenguēnē quēwēmīnīi, ante ĩmaī ante apænebopa. Æcānō Wængonguī Ōnōwoca tōnō āawocaque baī ēwocacā guiquēnē tōmengā, Itota nānō panguinqe nē wentamō mongængā ingampa, ante ædō cæte tedewenguingā. Ayæ wæætē Wængonguī Tæiyæ Waēmō Ōnōwoca tōnō ēwocadāmaī ingā guiquēnē tōmengā, Itota Tæiyæ Awēnē ingampa, ante ædō cæte apænequingā.

⁴ Adocanque ingante wadō pōnō cædinque Wængonguī Ōnōwoca wacā ingante wadō pōnō cædinque tōmengā nānō pōnōnincoo nēnempote baī cæcā æninqe mōnō wadō wadō nē cæmō ĩmompā. Wængonguī Ōnōwoca adocanque pōnī ĩnongā incæ mānōmaī wadō wadō pōnō cæcampa. ⁵ Ayæ mōnō Awēnē adocanque pōnī ĩnongā inte waocā adocanque ingante, ĩmaī cæe, āninqe wacā ingante, Wadō baī cæe, angā ēñēninqe mōnō tōmāmō wadō wadō nē cæmō ĩmompā. ⁶ Ayæ Wængonguī adobaī adocanque pōnī incæ tæī piñængā ĩnongā inte waocā adocanque ingante pōnō cæcā æninqe tōmengā tæī piñængā badinque inte wadō cæcampa. Wacā ingante wadō pōnō cæcā æninqe tōmengā tæī piñængā badinque wadō wadō cæcampa. ĩninqe Wængonguī mānōmaī wadō wadō pōnō cæcā æninqe mōnō tōmāmō eyepæ badinque cæmompā.

⁷ Wængonguī Ōnōwoca, Tōmānāni waa quēwencædānimpa, ante cæedāni, ante tōmāmō ĩmonte wadō wadō pōnō odōmonte apænecā ēñēninqe tōmāmō mōnō waa quēwenguinge ante godongāmæ cæmompā.

⁸ ĩninqe Wængonguī Ōnōwoca pancadāniya ĩnānite, Wængonguī nō nānō ēñēnō ante apænecā ēñēninqe tōmēnāni nē nō ante apænedāni badānipa. Ayæ adocā Ōnōwoca ĩñōmō Wængonguī nānō cædō ante edonque odōmongā adinque pancadāniya nē adināni badinque, Wængonguī mānōmaī cæcampa, ante nō apænedānipa. ⁹ Adocā Wængonguī Ōnōwoca apænecā ēñēninqe pancadāniya, Wængonguī eyepæ pōnō cæcampa, ante wede pōnēnāni inte tōmēnāni wede nāni pōnēnō beyænque nanguī cædānipa. Ayæ Wængonguī Ōnōwoca adocanque ĩnongā inte pōnō cæcā æninqe pancadāniya wēnæ wēnæ ĩnāni ĩnānite gampote apænedāni ate waa badānipa. ¹⁰ Pancadāniya ĩnānite guiquēnē Wængonguī Ōnōwoca godō cæcā æninqe tōmēnāni tæī piñænāni badinque nanguī pōnī cædānipa. Wængonguī Ōnōwoca apænecā ēñēninqe wadāni Wængonguī beyæ nē apænedāni ĩnānipa. Ayæ wacā yewænte baī tedecā adinque, Wængonguī Ōnōwoca tedecantawo, wēnæ tedecantawo, ante wæyōnāni Wængonguī Ōnōwoca pancadāniya ĩnānite edonque odōmongā adinque tōmēnāni, Æcānō ōnōwoca nē tedecā, ante do ēñēnānipa. Pancadāniya guiquēnē Wængonguī Ōnōwoca tōnō apænedinque wadāni nāni tede baī nē tededāni ĩnānipa. Ayæ ĩñāni wadāni nāni tede baī tededāni ēñēninqe pancadāniya Wængonguī Ōnōwoca apænecā ēñēninqe, Nē tededāni æbānō ante tededānīi, ante do ēñēnāni inte wadāni ĩnānite edonque pōnī apænedāni ēñēnānipa.

¹¹ ĩninqe adocā Ōnōwoca adocanque ĩnongā inte tōmengā nānō nō angā baī cædinque mōnō ĩmonte apænte æninqe, Pancamīniya ĩmaī cæcæmīnimpa, wamīni ĩmaī cæcæmīnimpa, ante pōnō cæcā æninqe adocanque nānō cæquēnēnō ante wacā nānō cæquēnēnō ante edæ tōmāmō mōnō cæquēnēnō ante cæmompā.

Adocabomō baī ĩmompā

¹² Mönö baö adoyonque pöní eñamö incæ mönö wii adodonque cæquinö ante eñamö inte mönö pæ pagænguincōo watai watai eñamompa. Edæ wadö mönö cæquinö ante watai eñadinque mönö wæætë wadö cæquinö ante watai watai eñamompa. Ìnínque watai watai nanguí mönö eñacōo ìñömö adoyonque pöní impa. Ayæ Codito nempo quëwëninque mönö adobaí adocabomö ìmompa. ¹³ Mönö adocabomö mönö tömämö baquinque Wængonguí Ònöwoca mönonga pö guíte owocampa. Ìnínque oodeocä incæ guidiegocä incæ wacä ingante nè cæcä incæ abæ tawænte ee gote baí nämä beyænque nè cæcä incæ mönö tömämö adotaca bete baí Wængonguí Ònöwoca tönö ääwocaque baí tömämö ëwocamompa.

¹⁴ Mönö baö adoyonque pöní eñamö incæ mönö wii adodonque cæquinö ante eñamö inte mönö eñacōo watai watai nanguí eñamompa. ¹⁵ Ìnínque mönö önöwa incæ, “Ònompo ömæpobo inte botö waocä baö ömaabo ìmopa,” ante ædö cæte anguingää. Ìñæmpa mänömaí wæte tedecä incæ önöwa cöwë waocä baö eñate ëwacampa. ¹⁶ Ayæ mönö önömonca incæ, “Awinca ömæmömo inte botö waocä baö ömaabo ìmopa,” ante ædö cæte anguingää. Ìñæmpa mänömaí ante tedecä incæ önömonca cöwë waocä baö eñate ëmoncacampa. ¹⁷ Ìñæmpa mönö baö tömäñö awincaque ëmömö baí edæ qui-moncadö eñenguëñë. Eñëñämaí incædömöimpa. Ayæ mönö baö tömäñö önömoncaque ëmoncamö baí quincadodö ongoncadoquëñë.

¹⁸ Incæte Wængonguí ìñömö edæ, Waomini mini cæquëñënö ante eyepæ cæcæmin-impä, ante badoncæboimpa, ante Wængonguí angacäimpa. Ìnínque tömengä nämä nänö angainö baí badöninque mönö pæ pagænguincōo adoyonque baquinque ante wadö cæquinö ante wadö cæquinö ante tömäñö badongacäimpa. ¹⁹ Edæ adodonque pöní mönö cæquëñënö ante Wængonguí badongä baí mönö wadö mönö cæquëñënö ante quiodö pæ pagænte cæquëñë. ²⁰ Wængonguí nänö nè badongaimö ìñömö inte wadö mönö cæquinö ante watai wadö mönö cæquinö ante watai nanguí mönö eñacōo eñamö incæ mönö baö adoyonque pöní eñamompa.

²¹ Mänömaí eñamö ìñömönte edæ mönö awinca incæ önömpo inte apænedinque, “Bitö dæ ämi baí botö tömömo eyepæ cæcædömoimpa,” ante ædö cæte anguií. Ayæ wæætë mönö ocamö incæ önöwa inte apænedinque, “Bitö dæ ämi baí botö tömömo eyepæ cæcædömoimpa,” ante ædö cæte anguií. ²² Wæætë mönö baö pancayonga pæ pagænämaí ì incæte mäniñö ante mönö godömenque waa adinque, Mönö quëwenguiñö impa, ante angäimpa. ²³ Wayö guiquëñë, Wii waëmongä awædö, ante mönö äñö ante, Waa acædänimpa, ante cædinque waëmoncōo pönö dadi ompogate mäniñö beyæ godömenque waa ate baí cæmompa. Wayö guiquëñë mönö guñëñate wædö ante, Wii edonque acäimpa, ante pönö bee ogate cædinque mönö guñëñayö beyæ godömenque waa cæmompa. ²⁴ Waëmö mönö ayö guiquëñë, Edonque acäimpa, ante bee ogadämaí cæmompa.

Incæte, Adoyonque bacäimpa, ante mönö baö wayö wayö badöninque Wængonguí, Wii waëmongä, ante mönö wæyö ante pönëninque, Mäniñö botö godömenque waa abopa, ante badongacäimpa. ²⁵ Ìnínque, Minitö baoncoo näëmæ piñämaí incæminimpa, ante cædinque Wængonguí mönö baö adoyonque badongacäimpa. Wæætë minitö nämä baoncoo incæ näëmæ waadete waa cæcæminimpa, äninque Wængonguí tömäñö waa acampa. ²⁶ Ìnínque mönö baö adoyömonque nantate wæyömö tömäo wootæ wootæ nantate wæmompa. Ayæ wæætë adoyömonque adinque, Waëmö impa, äñäni eñente wædinque tömäo watapæ tomompa.

²⁷ Minitö ìñömö, Wayö wayö eñamö incæ adoyonque eñamompa, ante do pönëninque, Mönö adobaí nänëñë nänëñë ingaimö inte ñöwo wæætë Codito nempo quëwëninque adocabomö ìmompa, ante pönencæminimpa. ²⁸ Ìnínque Codito ingante godongämæ mönö pönencabo ìmö adinque Wængonguí angä eñëninque iimaí cæmompa. Yæ-cadomöni ìmöni ìñömö Codito nänö da godongaimöni ìmöni. Gao wæi inäni ìñömö Wængonguí beyæ nè apænedäni inäni. Ayæ tæcæguedëñäni inäni ìñömö nè odö-mönte apænedäni inäni. Wæænömenque inäni ìñömö tæi piñænte entawente nè

nangui cædani inänipa. Yæmiñæ gao æidique inäni iñömö Wængongui Önöwoca tönö äawocaque bai ewocadique iimaï cædänipa. Pancadaniya, Wænæ wænæ inäni waa bacædänimpa, ante në waa cædani inänipa. Pancadaniya wadani beyæ në waa cædani inänipa. Pancadaniya në änäni inönäni inte awenëidi inänipa. Ayæ yæmiñæ pönï inäni iñömö wadani nani tede bai në tededäni inänipa.

²⁹ Mänömaï imö incæte edæ Codito nänö në da godongaïmö dicæ tömämö imongaa. Ayæ Wængongui beyæ në apæneïmö dicæ tömämö imongaa. Në odömönömö dicæ tömämö imongaa. Në tæï piñænte entawente nangui cædömö dicæ tömämö imongaa. ³⁰ Ayæ Wængongui Awënë pönö cæcä incæte wænæ wænæ inäni nani waa baquinque ante dicæ tömämö në waa cæmongaa. Edæ wadani nani tede bai dicæ tömämö tedemongaa. Wacä mänömaï wadani nani tede bai tedecä ëñëninque tömämö dicæ mönö tededö adodö edonque apænemongaa. ³¹ Incæte mïnitö Wængongui ingante, Bitö Önöwoca pönö cæcä ate mönitö eyepæ inte ate yæcado ongönäni nani cæï bai adobai cæcæte ante nangui wæmönipa, ante apænedinque nangui cæedäni.

Mönö waadete pönente cæcæïmpa, ante

Ñöwo iñömö botö, Æbänö godömenque waa pönï cæquiï, ante yewæmonte odömömo aedäni.

13

¹ Botö waodäni nani tede bai tede bopa, ämïnitawo. Wængongui anquedoidi nani tede bai tede bopa, ante tomïnitawo. Iñæmpa mönö wadani inänite waadedämaï inte tedemö ininque ampoincade önonque ampoi bai imaimpa. Waadedämaï inte tedemö ininque adoyömö pönö wo pönö wo pönö wæcainta bai mönö adobai önonque tedewëmö imaimompa.

² Wængongui Önöwoca pönongä æninque botö tömengä beyæ në apænebo imopa, ante tomïnitawo. Waodäni nani wë wodonte ëñengainö tömänö ante edonque pönï ate ëñëmopa, ante tomïnitawo. Waodäni nani nangui ëñënö ante adinque tömänö ante ëñëmopa, ante tomïnitawo. Edæ në wede pönëmini inte mïnitö änanquidi incæ ämïni ëñente cabænte gotawo. Iñæmpa mäninö tömänö waa pönï cæmö incæ mönö wadani inänite waadedämaï inte cæmö ininque wæætë önömonque edæ mönö babaimpa.

³ Ömæpodäni inänite botö mäincoo tömäa nënempote godömopa, ante tomïnitawo. Wængongui beyæ ante cæyömote wadani botö baö botö ëñayö incæ iya tanca cædäni ate wædinque botö piyænë cæbaimopa, ante mïnitö, Waa cæbopa, ante tomïnitawo. Iñæmpa mänii tömäa waa cædinque mönö waadedämaï inte cæmö ininque mönö waa cædö beyæ ænämaï imaimompa.

⁴ Në waadete pönengä iñömö tömengä piinämaï inte edæ piyænë cædinque godö waadete cæcampa. Wadani gomonga cædinque godömenque nangui ænäni adinque në waadecä wæætë waadete pönëninque piïnte wædämaï inte piyænë cæcampa. Nämä nänö cædinö ante pönëninque në waadete pönengä iñömö, Botö gomonga cæbopa, ante tededämaï ingampa. Tömëmoque wæmö imopa, ante nämä waa adämaï ingampa. ⁵ Wacä tæcæ cæyongante në waadete pönengä iñömö, Täno cæbote, ante wææ cædämaï ingampa. Nämä nänö æinënö ante cædämaï inte tömengä wadani beyænque cæcampa. Wæætë wiï iñontobæ ængui bacampa. Wadani wænæ wænæ cædäni ate wædinque tömengä në waadecä inongä inte wæætë piyænë cæcampa.

⁶ Ininque, Wacä wænæ wænæ cæcampa, ante tededäni ëñente wædinque në waadete pönengä iñömö mäninö ante todämaï ingampa. Wæætë, Wacä nöingä cæcampa, ante tededäni ëñëninque tömengä watapæ pönï tocampa. ⁷ Æbämë cædäni incæ në waadete pönengä iñömö piyænë cædinque tömänäni inänite wææ gompocampa. Wæætë, Waa cædänipa, änäni ëñëninque tömengä, Näwangä impa, ante do ëñengampa. Æbämë ba incæte tömengä, Ayæ ate watapæ bacæïmpa, ante cöwë pönëninque wæntædämaï inte ee cæcampa.

⁸ Mönö waadete pönemämo iñömö cōwē dæ badāmaī ingæimpa. Wæætē Wængonguī iincayæ ate, Idæwaa, angä iñinque inguipoga tömengä beyæ mönö apænedö guiquënë edæ dæ angæimpa. Wadäni nāni tede bai mönö tededö incæ pæ wëenecæimpa. Inguipoga nanguī adinque mönö ëñënö ante Wængonguī, Idæwaa, ancæcäimpa. ⁹ Ñöwo mönö ëñënö iñömö pancaa ëñëninque pancaa wæætē oda cæmompa. Wængonguī beyæ mönö apænedö iñömö pancaa apænedinque mäninque apænemompa. ¹⁰ Ìinque bayedë guiquënë Wængonguī nänö apænedö ædæmö ëñëninque mönö nöingä pöni odömönte apænecæmöimpa. Oda cæte mönö ëñënö ante, Idæwaa, äninque Wængonguī mäniñedë edæ mönö wii eyepæ apænete wædö ante, Idæwaa, ancæcäimpa.

¹¹ Botö iñömö wëñæmoyedë wëñængä nänö tede bai tedinque wëñængä nänö ocai ëñënö bai ëñengaïmo inte wëñængä, Ìimaï impa, ante nänö pönënö bai botö mäniñedë adobai pönengaboimpa. Ñöwo guiquënë picæmo badinque wëñæmoyedë botö cægäinö ante ñimpo cæbopa. ¹² Awocawænta wëmö ate bai cædinque mönö ñöwo Wængonguī Önöwoca nänö odömönö ante edæ wii edonque amompa. Ayæ ate guiquënë mönö awincadö awinca edonque pöni acæimpa. Botö ñöwo pancaa adinque oda cæte ëñëmö imopa. Ayæ ate guiquënë Wængonguī pönö odömongä adinque tömengä botö imote edonque pöni acä bai botö adobai tömäa eyepæ pöni acæboimpa.

¹³ Ìinque mönö entawënoncoo ante adinque mënonque go adodonque mänimpodonque ayæ ongompa. Mönö wede pönënö ante ædæmö entawengæimpa. Watapæ bacæimpa, ante mönö pönënö ante ædæmö entawengæimpa. Mönö waadete pönënö ante ædæmö entawengæimpa. Ìinque mänimpodonque ayæ ongö incæte mönö waadete pönënö iñömö edæ ñænænö pöni i ñinque mönö mäninö ante täno ædæmö entawengæimpa.

14

Wadäni nāni tede bai æbänö tedequii, ante

¹ Ìinque mīnitö, Nē waadete pönëmö bacæimpa, ante mäninonque ante pogodo gote bai nanguī cædäni. Ayæ adobai, Wængonguī Önöwoca mönö imonte nänö pönönö bai mönö eyepæ ewocadinque cæcæimpa, ante nanguī æinente wædäni. Mäninö Wængonguī Önöwoca nänö pönönoncoo ate adinque mīnitö, Wængonguī beyæ nē apænemö mönö täno adodonque ante bacæimpa, ante godömenque æinente wædinque cædäni. ² Edæ wadäni nāni tede bai æcänö tededä tömengä wii waodäni inänite apænecampa. Wængonguinque ingante apænecampa. Edæ tömengä önöwocaque tedecä ñinque tömengä ingante Wængonguī æbänö awëmö apænecäa, ante ædö cæte ëñenguinänii. ³ Wængonguī beyæ nē apænecä guiquënë waodäni inänite waadete pönëninque iimaï cæcæte ante apænecä ëñënanipa. Mīnitö täi piñæmīni mīni entawenguinque wede pönencæmīnimpa, ante apænecampa. Ayæ, Wæwente quëwëmīni incæ mīnitö wampo bawënente täi piñænte cōwë cæcæmīnimpa, ante tömengä Wængonguī beyæ ante pönö apænecampa. ⁴ Wadäni nāni tede bai nē tedecä guiquënë, Tömëmo täi piñæmo botö entawenguinque ante nanguī ëñencæboimpa, ante nāmä beyænque ante tedecampa. Wængonguī beyæ nē apænecä guiquënë Codito ingante nāni godongämæ pönencabo beyæ ante apænedinque, Mīnitö täi piñænte mīni entawenguinque ëñencæmīnimpa, ante apænecampa.

⁵ Ìinque mīnitö tömämīni wadäni nāni tede bai apænemīni adinque botö wædænque tobaimopa. Wæætē tömämīni Wængonguī beyæ apænemīni adinque botö godömenque watapæ tobaimopa. Wængonguī beyæ nē apænecä iñömö ñænængä iñongä wacä tededö nē tedecä guiquënë wædangä ingampa. Incæte, Codito ingante mīni godongämæ pönencabo täi piñænte entawencæmīnimpa, ante cædinque tömengä wacä tededö tedete ate, Ìimaï ante tedetabopa, ante mīnitö tededö adodö ante edonque apænecä ñinque tömengä adobai ñænængä inongä imaingampa. ⁶ Ìñänäni ëñëdäni. Wængonguī nänö wë wodönö incæ tömengä nänö nö ëñënö incæ tömengä nänö nö odömönö incæ ante botö mīnitö weca pöninque odömönte apænebo ëñëninque mīnitö godömenque

pönëmaimīnīpa. Wængonguī īīmaī cæcæcæīmpa, ante apænebo ēñēnīnque mīnitō guīñēte wædīnque waa cæbaīmīnīpa. Wæætē mīnitō weca pōnīnque botō wadāni nāni tedebaī tedete apænebo baī mīnitō ædō cæte godōmenque nē pönēmīni baquēnēmīni.

⁷ Edæ gobæ ongonte aa pedīnque ōnonque ante pedāni ēñēnīnque mōnō wæætē, Ædemē ante pedānīpa, ante ædō cæte ēñēnguīī. Nē ampoinca ampodāni adobaī āmotamīni īnāmaī ōnonquedō ante ampodāni ēñēnīnque mōnō, Ædemē ante ampodānīpa, ante ædō cæte ēñēnguīī. ⁸ Ayæ tontado adobaī, Wæætedō wæætē cæcæīmpa, ante todompeta nāni ancadeca we ōnīnque idīquibæ we ōngā īnīnque wadāni, Æbāmē cæcæte ante we ōngāā, ante wædīnque oda cæte ee ongonte wæætedō wæætē cædāmaī īmaīnānīpa. ⁹ Ayæ mīni cabo adobaī wīī edonque apænēmīni ēñēnīnque wadāni, Æbāmē ante tedecāā, ante wædīnque oda cæte wæbaīnānīpa. Woboyæ māmoque īñæmpa tedewēmaīmīnīpa.

¹⁰ Waodāni inguīpoga tōmāo quēwēnīnque nanguī nāni tededoncoo tededānīpa. Nāwangā impa. Incæte wadāni nāni tededō wadāni nāni tededō tōmāā tedequīnō ī īnīnque adodeque incæ ōnonque tedete īnāmaī impa. ¹¹ Īnīnque wacā apænecā ēñēnīnque botō, Æbānō ante tedecāā, ante ēñēnāmaī īmo adīnque tōmengā wæætē, Wabi inte wīī ēñēmīpa, ancædongāīmpa. Tōmengā ingante botō adobaī, Wabi inte botō tededō wīī tedebīpa, ante ancædōmoīmpa. ¹² Īnīnque mīnitō, Wængonguī Ōnōwoca pōnō cæcā ænīnque mōnō eyepæ ēwocadīnque cæcæīmpa, āmīnitawo. Mānōmaīnō ānīnque mīnitō, Wængonguī Ōnōwoca pōnō cæcā ænte ēwocadīnque cædōmō inte mōnō Codito ingante mōnō godongāmæ pōnencabo godōmenque tæī pīñænte entawengæīmpa, ante pōnēnīnque mīnitō, Mānīnonque ante botō ēwocate cæquīnō ante pōnongā æncæboīmpa, ante tāno æīnente cæedāni.

¹³ Mānōmaī beyæ wadāni nāni tede baī nē tedemīni īñōmō mīnitō tōnīñadāni adobaī ēñēncædānīpa, ante cædīnque Wængonguī ingante īīmaī ante ædāni. Wængonguī ēñēmī. Wadāni nāni tede baī do tededīnque botō æbānō ante tedetawoo, ante bitō odōmonte apænebi ēñēmoe. Mānōmaīnō ante apænebi ēñēnīnque botō wæætē mōnitō tededō adodō ante edonque apænebo ēñēnīnque mīnitō Wængonguī ingante apænēte cæedāni. ¹⁴ Wadāni nāni tede baī tededīnque Wængonguī ingante apænebo inte botō ōnōwocaque pōnente apænedīnque ocai ōmædæcabo baī inte apænebaīmōpa.

¹⁵ Mānōmaī impa, ante adīnque æbānō cæquīmoo. Edæ ōnōwoca pōnente apænedīnque botō ocai adobaī ēñēte pōnēnīnque Wængonguī ingante apænecæboīmpa. Ayæ Wængonguī ingante waa pōnī apænecæte ante ōnōwoca pōnente āmotamīni ānīnque adobaī ocai ēñēte pōnēnīnque āmotamīni ancæboīmpa. ¹⁶ Bitō, Wængonguī ingante waa pōnī cæcampa, ante ōnōwocaque pōnēnīnque apænebitawoo. Īñæmpa Wængonguī ingante waa ate pōnēnīnque ōnōwocaque pōnente apænebi ēñēnīnque wacā nē ōnonganque ingā guīquēnē, Bitō æbānō apænebīī, ante ēñēnāmaī inte, Ædō cæte Ao anguīmoo, ante wæbaīngampa. ¹⁷ Bitō waa ate pōnēnīnque ōnōwocaque waa apænebi ēñēnīnque tōmengā wæætē, Bitō æbānō ancæte ante tedebīī, ante ēñēnāmaī inte ædō cæte godōmenque tæī pīñænte entawengūngāā. ¹⁸ Botō īñōmō, Mīnitō wadāni nāni tede baī wædænque tedeyōmīni botō godōmenque nanguī tedebōpa, ante Wængonguī ingante waa ate pōnēnīnque apænebōpa. ¹⁹ Incæte Codito ingante mōnō pōnencabo tōnō godongāmæ pōnīnque botō wadāni nāni tede baī tæne tīnco mīīdo ganca tedequī incæ wīī tededīnque wæætē, Wadāni ēñēncædānīpa, ante mēnea pōnī edonque apænedīnque waa tobāīmōpa.

²⁰ Īñānāni ēñēedāni. Tæcæ ēñadāni īñōmō wēnæ wēnæ mōnō cæpāmo ante ēñēnāmaī īnānīpa. Mīnitō adobaī mānīnō wēnæ wēnæ mōnō cæpāmo ante ēñēnāmaī inte baī pōnēedāni. Wæætē ocai mōnō pōnēnō guīquēnē mīnitō mānīnō ante wēñænānīque wædænque nāni encadō baī wīī pōnēnīnque wæætē picænāni nāni nanguī encadō baī adobaī nanguī encate pōnēedāni. ²¹ Dodāni mōnō Awēnē beyæ ante wææ ānīnque īīmaī ante yewæmongadānīpa. “Wadāni nāni tede baī nē tededāni īnānīte botō āmo ēñēnīnque tōmēnāni wæætē botō quīnāni īnānīte apænecædānīpa. Incæte īīnāni

guiquënë botō ïmote cōwē ēñēnāmaï inguināni awædō, ante mōnō Awēnē angampa,” ante yewæmongatimpa.

²² Ìninqe, Wadāni nāni tede baï tedomīni ēñēninqe nē pōnēnāni wædāmaï ïñōnāni nē pōnēnāmaï ïnāni guiquënë mǎnōmaï tedomīni ēñēninqe guiñente wæcædānimpa, ante cædinque Wængonguï Ònōwoca pōnō cægacāimpa. Wæætē Wængonguï beyæ ante edonque apænemīni ēñēninqe nē pōnēnāmaï ïnāni wædāmaï ïñōnāni nē pōnēnāni guiquënë do ēñencædānimpa, ante cædinque Wængonguï Ònōwoca pōnō cægacāimpa.

²³ Codito ingante mīni pōnencabo godongāmæ pōninqe tōmāmīni wadāni nāni tede baï wadāni nāni tede baï tedomīni adinque ayæ pōnāni guiquënë nē ēñēnāmaï ïnāni incæ nē pōnēnāmaï ïnāni incæ æbānō anguināni. Mǎnōmainonque tedomīni ēñēninqe tōmēnāni wæætē, Mīnitō òmædæcamīni inte ònonque tedewēmīnīpa, ante wæbaïnānīpa.

²⁴ Tōmāmīni wæætē Wængonguï beyæ edonque apæneyōmīni nē pōnēnāmaï ingā incæ nē ēñēnāmaï ingā incæ ponte ēñēninqe tōmāmīni mīni apænedō beyæ tōmengā, Botō wēnæ wēnæ cætābopa, ante wæbaingampa. Ayæ Wængonguï beyæ āmīni ēñente wædinque tōmengā, Botō nāwangā wēnæ wēnæ cædōmo inte wentamō mongænte awædō, ante nāmā apænte āmaingampa. ²⁵ Ayæ tōmengā mīmōno nānō wentamō wē wodōnincoo da tadonte ate baï edonque ate wædinque tōmengā ædæ wæante guidōmēmæ ñongæninque Wængonguï ingante, Bitō adobique nē waa cæbi ïmīpa, ante waa apænebaingampa. Ayæ mīnitō ïmīnite, Nāwangā Wængonguï Ònōwoca tōnō āawocaque baï ewocāmīnīpa, ante apænebaingampa.

Quiēmē cæmīni incæ nōingā pōnente ædæmō cæedāni

²⁶ Mǎnōmaï ï ïninqe ïñānāni, mōnō æbānō cæquī. Wængonguï Ònōwoca pōnō cæcā æninque eyepæ inte mīnitō tōmāmīni godongāmæ pōninqe ïmaï cæmīni incæmīnīpa. Adocanque āmotāmīni adodeque angā ingampa. Wacā odōmoncæte ante adodeque apænecā ingampa. Wacā ingante Wængonguï edonque odōmonte apænecā ēñēningā inte tōmengā adodō ante adodeque ante odōmonte apænecā ingampa. Wacā guiquënë wadāni nāni tede baï adodeque tedecā ingampa. Tōmengā æbānō ante tedecā, ante wacā do ēñēninqe mīnitō tededō wæætē edonque apænecā ingampa. Mǎnōmaï wade wade ante nē apænemīni inte mīnitō tōmāmīni, Godongāmæ tæï pīñænte entawengæimpa, ante ïmaï cæte tedecæmīnīpa. ²⁷ Wadāni nāni tede baï tedeyongā wacā adotedæ wææ tededāmaï incæcāimpa. Māningā ïninqe tedecā ate wacā tedecæcāimpa. Ayæ wæætē wacā, Tedecæboimpa, angā Ao āmīni tedecā ate idæwaa. Mānimpodānique tedete ñīne cædāni adinque wacā ēñēninqe, Æbānō ante tededāni, ante mīnitō tededō edonque apænecā ēñencæmīnīpa. ²⁸ Codito ingante mīni pōnencabo weca nē ēñente adodō apænequēnengā dæ angā ïninqe edæ wadāni nāni tede baï nē tedeñente wæcā ïñōmō wæætē ee adinque tededāmaï inte pæ wēenecæcāimpa. Tōmengā nāmā incæ ònōwēnenque tedete Wængonguï ingante tedecæcāimpa.

²⁹ Wængonguï beyæ nē apænedāni adobaï mengāa pōnī apænedāni ate idæwaa. Mānimpodānique apænedāni ēñēninqe mīnitō, Nō ante apænedāni, idiquibæ ante apænedāni, ante apænte ante ēñencæmīnīpa. ³⁰ Ayæ adocanque tæcæ apænee gōñongā wacā nē ēñēē congā ingante Wængonguï Ònōwoca ïñontobæ apænecā ēñēninqe tōmengā, Botō apænecæboimpa, angā ēñēninqe nē apænedingā wæætē apocænē edæ ēamonca ēñēē concæcāimpa. ³¹ Edæ Wængonguï beyæ apænedinque adocanque tāno apænete ñīne cæcā ate wæætē wacā wæætē wacā apænete ñīne cæcæcāimpa. Mǎnōmaï cædinque mīnitō godongāmæ ēñente badinque wampo bawēnente ongoncæmīnīpa. ³² Wængonguï beyæ nē apænedāni ïñōmō tōmēnāni nāmā ònōwoca wææ āninqe ònōwēnenque wædāmaï inte ocai pōnente apænedānīpa. ³³ Edæ Wængonguï incæ nē gānē pōnēnongā inte Yæ yæ wapiticæ godō tededāmaï ingampa cæmīni.

Wængonguï quināni Codito ingante nāni pōnencabo tōmānāni wayōmō nāni cabo wayōmō nāni cabo godongāmæ pōninqe nāni cæï baï cædinque, ³⁴ mīnitō adobaï Codito

ingante mīni pōnencabo godongāmæ pōñōmīni onquiyænāni inānite āmīni tededāmaī incædānimpa. Edæ, Apocænē ēñēmæwedāni, ante Mōitee wodi nānō wææ angāi bai cædinque onquiyænāni wæatedō wæætē ānāmaī inte onguīñænāni nāni ānonque ēñēninque edæ ēñēē concædānimpa. ³⁵ Æbānō ante apænedāni, ante ēñencæte ante wædinque onquiyængā oncōnē gote ate angā ēñēninque tōmengā nānōgængā wæætē adodō apæneca ēñencæcāimpa. Edæ Codito ingante mīni pōnencabo godongāmæ pōñōmīni onquiyængā iñōmō, Guiñēnete awædō, āninque ee tededāmaī incæcāimpa.

³⁶ Iñæmpa, Wængonguī nānō angāinō ante mīnitō adomīnique dicæ mā pōnēninque odōmōmīnitawogaa. Wadāni ēñēnāmaī iñōnānite mīnitō dicæ adomīnique Wængonguī nānō apænedō ante ēñēmīnitawogaa. ³⁷ Bitō, Wængonguī beyæ nē apænebo imopa, āmitawo. Wængonguī Ōnōwoca pōnō cæcā æninque botō eyepæ ewocadinque nē nanguī cæbo imopa, āmitawo. Mānōmaī ewocabi inte do ēñēmi iñinque bitō, Mōnō Awēnē nānō wææ angāinō ante Pabodo māninonque ante yewæmongampa, ante, Nāwangā impa, ante apænebaīmipa. ³⁸ Wæætē māninō ante æcānō ēñēnāmaī ina tōmengā ingante wæætē mōnō ēñēnāmaī ingæimpa.

³⁹ Iñānāni, Mānōmaī impa, ante pōnēninque mīnitō, Wængonguī beyæ apænecaīmipa, ante cæcæte ante cōwē nanguī cædāni. Ayæ, Pancadāniya wadāni nāni tede bai apænedānīpa, ante adinque mīnitō Baa ānāmaī iedāni. ⁴⁰ Incæte quiēmē cæmīni incæ mīni pōnencabo mīni godongāmæ watapæ quēwenguinque ante nōingā pōnente ædæmō cædāni.

15

Codito ñāni ōmæmongacāimpa, ante

¹ Ñōwo botō tōniñamīni ēñēedāni. Codito ingantedō ante botō do watapæ apænebo ēñēninque mīnitō mānīneque ante Ao ante wede pōnēninque edæ tæi ongōmīnitapa. Ñōwo guiquēnē mīnitō, Mānīne ante æbānō intawoo, ante oda cædāmaī incæmīnimpa, ante botō adodō ante ædæmō odōmonte yewæmōmōi aedāni. ² Mānīne ante watapæ apænebo ēñēninque edæ mīnitō adode ante wede pōnēninque tæi ongōmīni inte edæ mānīne beyænque quēwēmaīmīnīpa. Wæætē mānīne botō watapæ apænedō ante æmæ pōnēmīni iñinque mīni pōnēnimāmo incæ ōnōmāmoque pōni babaimpa.

³ Edæ mōnō Codito tōmengā nānō pōnō cægāinō ante botō ēñēnō ante botō doyedē, Mānīne ante mōnō tāno pōnengæimpa, ante pōnō apænebo ēñēmīnitapa. Ñōwo wæætē, Ēñencæmīnimpa, ante botō adode ante yewæmōmō acæmīnimpa. Wængonguī angā ēñēnte nāni yewæmongāinō bai iñinque cædinque mōnō Codito iñōmō wēnæ wēnæ mōnō cægāinō ante teēmē mongænte wæætē wængacāimpa, ante impa.

⁴ Ayæ, Wængā ate tōmengā baō iñi ō ænte māo daga wengadānimpa. Ayæ Wængonguī angā ēñēnte nāni yewæmongāinō bai cædinque Codito mēōnaa go adoōnæque iñonte do ñāni ōmæmonte mīingā quēwengacāimpa, ante mānīne ante impa. ⁵ Ayæ ñāni ōmæmonte quēwēnongā inte tōmengā dobæ Pegodo weca ponte a ongongā acantapa. Ayæ ate tōmengā nānō nē emīñængāināni, Dote, nāni ānōnāni weca dobæ ponte a ongongā adānitapa. ⁶ Ayæ ate mōnō tōniñadāni quīniento ganca ayæ godōmenque nanguī ināni godongāmæ ongōñōnāni tōmengā tōmēnāni weca do ponte edæ a ongongā adotedæ agadānimpa. Iñāni iñōmō pancadāniya ñōwo do wængadānimpa. Pancadāniya nanguī ināni nē agāināni incæ ayæ mīināni quēwēnānīpa. ⁷ Mānīnāni adāni ate Itota wæætē Tantiago weca a ongongā agacāimpa. Ayæ ate tōmengā nānō nē da godongāināni weca adocā Itota ponte a ongongā agadānimpa. Itota mānōmaī cægacāimpa, ante botō, Mānīne tāno pōnengæimpa, ante yewæmōmopa.

⁸ Botō guiquēnē nē wæmpodingā bai inte wæyōmote tōmengā ñōwo pōni botō weca a ongongā atabopa. ⁹ Edæ Codito tōmengā nānō nē da godongāimo imo incæ botō wadāni tōmengā nānō nē da godongāināni bai wīi adobai imopa. Edæ Itota ingante godongāmæ nāni pōnencabo inānite nē togænte pangāimo inte botō wædāmo pōni imopa. ¹⁰ Edæ æbāmē imo incæte Wængonguī waadete pōnō cæcā beyænque botō

mänömaï imopa. Edæ tömengä nänö pönö cædö ante botö wii önonque cæcæte ante æmoimpa. Wæætë wadäni wædænque cæyönäni tömengä waadete pönö cæcä æninque botö godömenque nanguï cætabopa. Incæte botö dicæ tömömoque adoboque cæbogaa. Wæætë Wængongui nänö waadete pönö cædö ænimö inte botö tömengä tönö cædinque nanguï cæbo imopa. ¹¹ Æninque botö apænebo incæ tömënäni apænedäni incæ mönö Codito tömengä nänö pönö cægaiñonque ante tömämöni apænemönipa. Mäniñeque ante apænemöni ëñëninque minitö mäniñeque ante pönëmïnitapa.

Do wængainäni incæ ñäni ömæmoncædänimpa, ante

¹² Æninque, Codito do ñäni ömæmongacäimpa, ante apænemöni ëñëmïni incæte pancamïniya, Në wængainäni dicæ ñäni ömæmönäniyaa, ante ædö cæte änewëmïni. ¹³ Æñæmpa, Cöwë ñäni ömæmönämaï inäni bai mönö Codito incæ adobai ñäni ömæmönämaï incædongäimpa. ¹⁴ Ayæ Codito ñäni ömæmönämaï ingä bai tömengä waa pönï nänö pönö cægainö ante quïñante apænequënëmïni. Edæ önonque pönï bacædönimpa. Ayæ önonquedö ante apænemöni bai minitö mäniñe ante pönëmïni incæ ædö cæte quëwenguënëmïni. ¹⁵ Mönitö godömenque Wængongui ingante ante apænedinque, Codito ingante Wængongui incæ angä ñäni ömæmongacäimpa, ante apænetamönipa. Æninque, Në wængainäni cöwë ñäni ömæmönämaï inänipa, ante mïni änewënö iñömö näwangä i bai mönitö Wængongui nänö cægainö ante babæ wapiticæ ante edæ apæneædömönimpa. Edæ, Cöwë ñäni ömæmönämaï inänipa, ante mïni änewënö näwangä i bai Wængongui, Ñäni ömæmoe, ante ædö cæte anguënengä.

¹⁶ Æñæmpa, Ñäni ömæmönämaï inänipa, ante mïni änewënö näwangä i bai Codito incæ adobai ñäni ömæmönämaï incægacäimpa. ¹⁷ Ayæ Codito ñäni ömæmönämaï ingä bai minitö mïni wede pönënö incæ önonque pönï pönente incædönimpa. Æninque wentamö mïni mongænö ædö cæte ñä mënongaquënëmïni. Mïni wënæ wënæ cædinö beyæ wentamö mongænte wæcædöminimpa. ¹⁸ Mäniñö ante mïni änewënö näwangä i bai Codito nempo quëwëninque do wængainäni incæ do mempoga wæninque ædö cæte quëwenguënänäni. Quëwënämaï incædönänimpa. ¹⁹ Codito pönö ængä beyænque mönö adopoque wæninque wæætë wænämaï quëwengäimpa, ante mönö inguipogaque pönëninque wæmo bai wadäni wædænque wæwëñönäni mönö godömenque nanguï wæwenguënë incædönimpa.

²⁰ Incæte Codito dobæ ñäni ömæmongacäi apa änewëmïni. Edæ waodäni tänomö amiñayonte tä pedäni bai cædinque Wængongui adobai, Do wængainäni inänite ämo ñäni ömæmoncædänimpa, ante cæcæte ante cædinque Codito Tänocä ingante do angä ëñëninque ñäni ömæmongacäimpa. Näwangä impa, ante ämo ëñëmaimïni. ²¹ Edæ waocä incæ adocanque ëñëñämaï cæcä beyænque mönö wænguïmämo pongatimpa. Ayæ në wænguënëmö inte wæyömönte Nöwocä Waocä ëñagaingä inte wæninque ñäni ömæmongä beyænque mönö ñäni ömæmonte quëwenguïmämo adobai pongatimpa. ²² Edæ mämmæ Adäö wodi tömengä tönö tömämö godongämæ në wænguënëmö bagaimö inte mönö tömämö adobai Codito tönö godongämæ në ñäni ömæmonguïmö bagamöimpa. ²³ Incæte to amiñayedë tänomö nani tä pedömö bai inongä inte mönö Codito adobai Tänocä inongä inte edæ täno ñäni ömæmongacäimpa. Codito nempo në quëwënömö guiquënë mönö ayæmö inömö inte edæ tömengä nänö ponguïönæ iinque ba ate mönö mäniñedë ate në ñäni ömæmonguïmö imompa.

²⁴ Mäniñedë ate inguipoga awënë odayeidi nempo ongoncoo incæ Codito tömancoo ö ænte ömæe ewencæcäimpa. Ñænænäni nani änömämö adobai tömämämö ömæe ewencæcäimpa. Tæi piñænäni nani nanguï cædoncoo incæ Codito adocä incæ tömancoo wido cæcæcäimpa. Ayæ adocä në Awënë Odeye inongä inte tömengä nempo ongoncoo wæætë edæ Mæmpo Wængongui nempo edæ pædæ godongä æninque Mæmpo Wængonguinque tömenganque adocanque Awënë Odeye inongä incæcäimpa. Mäniñedë ate edæ ñöwo mönö quëwëmämö iñömö edæ iinque baquinö anguënë. ²⁵ Incæte Wængongui Codito ingante, Bitö imite në piinte cægainäni tömänäni inänite mö

gongæncæbiimpa, ante cædinque tõmengä önöwa gäänë nänö wææntodonganca edæ adocä Codito incæ mäninö nänö iinque cæganca nē Awënë inongä ingampa.

²⁶ Ayæ tõmengä ingante nē pünte cædäni inänite æmæwo bæ tacä adinque adoque pönö mönö wænguimämo incæ ayæ ongö adinque Wængonguü, Mänimämo dæ bacæimpa, ante mäo ömæe ewencæcäimpa. ²⁷ Tõmengä nempo Wængonguü tõmancoo pædæ godongä æninque tõmengä nē Awënë bacæcäimpa, ante do yewæmon-gatimpa. Mänömainö ante yewæmonte ongö incæte Wængonguü nē pædæ godönongä inte ædö cæte, Nämä pædæ godömopa, anguingäa, ante edonque acæimpa. ²⁸ Ayæ ate Wængonguü Wengä incæ, Mæmpo Wængonguü botö nempo tõmancoo nē pædæ pönongä inte tõmengä adocanque pönö Tæiyæ Awënë badinque tõmenganque tõmancoo ênempocæcäimpa, ante cæcæcäimpa. Mänömaï cæte ate tõmengä adobaï Mæmpo Wængonguü nempo quëwëninque Mæmpo nänö änonque ante ëñente cæcæcäimpa.

²⁹ Pancadäniya edæ, Do wængainäni beyænque cæmönipa, ante cædinque tõmënäni beyæ æpænë guidäniya. Ininque, Näni ömæmönämaï ingæimpa, ante mïni änewënö näwangä i bai tõmënäni æbänö cæquënänäni inänii. Edæ, Näni ömæmönämaï ingæimpa, ante näwangä i bai edæ tõmënäni nē wængainäni beyæ quinate æpænë guiquënänäni. ³⁰ Ayæ mïni änewënö näwangä i bai mönitö iñömö quinate möni wantæ iñö wantæ iñö wodo wænguinö ante wæquënëmönii. ³¹ Botö iimö iñö iimö iñö do wæwocabo inömo imopa, ante näwangä ämopa. Botö mönö Awënë Itota Codito nempo quëwëninque mïnitö iminite ante pönëninque watapæ tobopa, ante näwangä antawoo. Edæ botö töninamini iñöminite botö mäninö ante näwangä änimö inte, Wæwocabo imopa, ante adobaï, Näwangä impa, ante ämo ëñëmaïminipa. ³² Waomö mönö æinënö æncæte ante botö epetoidi babæidi bai inäni tönö guëa wæætedö wææte cæbo bai önonque cæte incædönimpa. Edæ, Do wængainäni nänö ömæmönämaï incædänimpa, ante näwangä i bai botö, “Iimö ate mönö æmæwo wænguinque ante cæte bete tocæimpa,” ante nänö änewënö bai ante ee quëwencædömoimpa.

³³ Iñæmpa mänömainö ante tedewënäni ëñëninque mïnitö wææte oda cædämaï imæwedäni. Edæ do yewæmöninque, “Wiwa cædäni tönö guëa cædinque bitö adobaï wapiticæ quëwënguinque godongämæ cæbipa.” ³⁴ Ante wææ änäni ëñëdäni. Edæ, mïnitö wënæ wënæ cæmïni adinque Wængonguü ingante ante ëñënämaï inäni iñömö oda cæbainäniya. Mänömaï beyæ mïnitö guingo imonte wæquënëmini inömini inte nö cæte quëwëninque edæ wënæ wënæ cædämaï iedäni.

Do wængainäni iimäi nänö ömæmoncædänimpa, ante

³⁵ Bitö, Do wængainäni æbänö cæte nänö ömæmonguinänii, ante ämitawo. Ayæ, Näni ömæmöninque mönö baö quinä bai ëñate ponguimöö, ante ëñencæte ante wæbitawo. ³⁶ Iñæmpa önonquedö ante wæbi awædö. Edæ waocä tõmëmö quiyacä ate yabæque nömæate ate tä bocate pædimö bai mönö baö adobaï inte nömængæimpa. ³⁷ Iñæmpa todigo incæ wawæ incæ bitö, Tä bocate pæcæimpa, ante cædinque do pædiwæ tõmëwæ ænämaï inte tõmëmonque ænte godö quiyabi ate tä bocate pæpa. ³⁸ Incæte, Tõmëwæ æbänö iwæ pæquiwæ, ante nämä nänö angainö bai cædinque Wængonguinque pönö badongä ate tä bocate pæpa. Wamö tä bocate pædinque æbänö incaquü, wamö æbänö incaquü, ante do ëñengaingä inte Wængonguü pönö badongä ate wainca wainca incapa.

³⁹ Tõmäno baö wii adoyö bai ëñompa. Mönö waomö baö wayö ëñamompa. Ööngäidi baö wayö ëñadäniya. Ayamöidi baö wayö ëñadäniya. Gäyæidi baö wayö ëñadäniya. ⁴⁰ Ayæ öönæde quëwënäni wayö mongëñönäni inguipoga quëwëmö iñömö wayö ëñamompa. Ininque öönæde quëwënäni waa nänö ëñadö wayö iñonte inguipoga quëwëmö waa pönö mönö ëñayö guiquënë wii adobaï ëñamö imompa. ⁴¹ Woyowotæ apäicä iñömö itæde nænque nänö apäi bai wii apäicampa. Pönömenque pönö apäicampa. Nëmöidi guiquënë wadö bai apäidäniya. Edæ nëmöidi incæ pancadäniya nämöinäni inte wædænque apäiyönäni pancadäniya waa pönö emönäni inte guinä nanguü apäidäniya.

⁴² Mänii quiyadimö yabæque ñömäate ate tä bocate pædimö bai mönö adopoque wæmö ate mönö baö adobai aquiñö inte ñömæmpa. Wæætë iincayæ ate mönö baö ñömäadamaï inguinque wæætë ñäni ömæmonguimö imöimpa. ⁴³ Ayæ mönö guiñëñate wægañö wido cæte ate mönö waa pöni ëñaquinque ñäni ömæmongæimpa. Edæ mönö aquiñö wido cædinque mönö täi piñäñö baaquinque ñäni ömæmongæimpa. ⁴⁴ Edæ inguipogaque quëwëninque mönö ëñayö wido cæte ate mönö öönædë pöniwoca ëñate ëwocadinque mönö waiñö pöni ëñate ñäni ömæmongæimpa.

⁴⁵ “Adäo wodi tänocä ïnongä inte nê ëwocacä badinque quëwengacäimpa,” ante yewæ-mongatimpa. Ayæ adobai Adäo wodi bai Ñöwocä mönö Codito incæ nê ëwocacä inte quëwëninque mönö imote pönongä æninque ëwocate quëwëmompä. ⁴⁶ Inguipogaque nê quëwengä guiquënë tano pongacäimpa. Mempoga nê Quëwënongä guiquënë ñöwoque ayæ pönongä inte nê Quëwengä ingampa. ⁴⁷ Tänäcä ingante badoncæte ante Wængonguï onguipoi guidimöi æninque badongacäimpa. Ñöwocä guiquënë öönædë quëwengaingä inte pongacäimpa. ⁴⁸ Inguipogaque ante quëwëñäni guiquënë inguipoga tano quëwengaingä bai adobai ïñanipa. Öönædë mönö goquincabo guiquënë öönædë quëwente Pongaingä bai adobai imompä.

⁴⁹ Inguipogaque quëwengä nänö ëñayö bai mönö adobai ñöwo ëñamompä. Iincayæ ate guiquënë öönædë quëwente nê Pongaingä nänö ëñayö bai mönö adobai ëñaquimö imompä.

⁵⁰ Botö töninamini apænebo ëñeedäni. Adopoque ëñagaingä inte Wængonguï Awënë Odeye nempo ædö cæte guiite quëwenguingä. Nê aquiñö ñömænguñö ëñadongä incæ tömengä mempoga ëñadamaï inte ædö cæte baö ñömäadamaï iñö ëñaqingä. ⁵¹ Mönö waocabo wëñëñedë mönö ëñëñamaï ingainö ante botö tæcæ ëñëñimo inte ñöwo edonque apænebo ëñeedäni.

Wii tömämö wænguimö imompä. Incæte tömämö iñontobæ wayonque ëñaquimö imompä. ⁵² Edæ todompeta mönö ancadeca æmæwo pöni nanguï öönäni ate mönö awinca adopoque bomö cæyömonte iñontobæ bacäimpa. Edæ todompeta tæcæ we öönönäni do wængainäni incæ ñömænämaï nani inguinque ñäni ömæmoncædänimpa. Mänincedë edæ wayonque pöni mönö tömämö ëñacæmöimpa. ⁵³ Edæ mönö baö mönö aquiñö ñömænguñonque wido cæte ate mönö ñömænämaï inguñonque ëñaquinque impä. Ayæ mönö aquiñö wænguñö ewente ate waiñonque mönö wænämaï inguñö ëñacäimpa. ⁵⁴ Mönö ñömænguñö ëñamö adinque Codito waiñö pönongä ænte ëñadinque mönö baö ñömænämaï ingäimpa. Ayæ mönö wænguñö ëñamö adinque tömengä mönö wænämaï inguñö ante waiñö pöni pönongä ëñacäimpa. Mänömaï cæcä ate dodäni nani yewæmonte angainö tömää iinque cæte ingäimpa. Edæ iimaï ante yewæmongadänimpa. “Mönö Codito nê täi piñænongä inte mönö wænguimämo godö ömæe ewëninque gänä cæcæcäimpa. ⁵⁵ ïninque önonque bagai inte mönö wænguimämo iñömö dicæ täi piñænte cæpa æmæwo wænguimöö. Mönö wænguimämo incæ dicæ daapa ëmiñæmpä gui wænguimöö.”

⁵⁶ Mönö wënæ wënæ cægainö beyænque mönö daapa guiite bai pante wæquinque nê wænguënemö ingamöimpa. Ayæ ëñëñämaï cæyömonte Wængonguï wææ angä beyænque mönö nê pante wæquinque nê wænguënemö bagamöimpa. ⁵⁷ Wæætë mönö Awënë Itota Codito gänä cædinque mönö wænguënemämo ante godö ömæe ewengä beyænque Wængonguï mönö imonte pönö cæcä ate gänä cæmöimpa. ïninque, Mänömaï waa pöni cæcampa, ante pönëninque mönö Wængonguï ingante waa ate pönëninque apænecäimpa.

⁵⁸ Mänömaï beyæ botö nê waadete töninamini ëñeedäni. Minitö, Mönö imonte bæ tadämaï incædänimpa, ante adiyæ täi ongonte wææ cædäni. Edæ, Mönö Awënë nempo quëwëninque nanguï cæmö ïninque mönö cædinö iñömö edæ cöwë ewëñämaï ingäimpa, ante pönëninque minitö mönö Awënë beyæ ante cöwë godömenque gomonga cæcæminimpa, ämopa.

16

Wængongui quïnāni beyæ iïmai cæte godongæimpa, ante

¹ Ñowo iñömö mīnitö godonte æinta ante, Wængongui quïnāni beyæ impa, ante mīni godonguēnēnō ante apænebo ēñēedāni. Gadatiabæ iñömö Itota ingante godongāmæ nāni pōnencabo inānite do ānimo inte botö mīnitö imīnite adobaï ante iïmai āmo cæedāni. ² Mīnitö tömāmīni, Botö ænincoo æpodö i, ante adinque, Pancaa Wængongui quïnāni qui baquimpa, ante cædinque Wængongui itæde iñö pancacooga nānēnē cö cædinque wacā Wængongui itæde iñö pancacooga nānēnē cö cædinque ee mæedāni. Ìnīnque wæætē wæætē cö cæte eyepæ māmīni adinque botö mīnitö weca ponte adinque, Godömenque cöo cæedāni, ante ānāmaï inguēnēmo imopa. ³ Edæ botö mīnitö weca ponte āñōmo mīnitö, Ìināni nō cædōnāni inte mönitö godōnīcoo ænte māo godoncædānimpa, ante odömōmīni adinque botö wæætē tömēnāni beyæ cadota ante yewæmoncæboimpa. Ayæ cadota tönö mīnitö pōnōnoncoo tönö botö iināni inānite pædæ godōnīnque da godōmo ænte māo Eedotadēē gote nēnempocædānimpa. ⁴ Ayæ Wængongui Ao angā ate botö tömēnāni baï adobaï gobo adinque tömēnāni botö tönö godongāmæ edæ gobainānīpa.

Ìïmai gocæboimpa, ante

⁵ Cöwē Mæatedōniabæ wodo pænta gocæboimpa. Ìnīnque mænīmæ tāno wodo pænta gote ate botö ayæ wæætē mīnitö weca poncæboimpa. ⁶ Ayæ mīnitö weca pōnīnque wabānō wantæ iñö quēwente goquimo. Æbāmē cæcæboimpa. Edæ, Quēwente ate ædōmē gomonga gocæ cæyōmo mīnitö botö tönö godongāmæ waa cæmīni ate waa gocæboimpa, ante pōnēnīnque botö wabānō godömenque quēwēnīnque tömāā mönō yoguiintedæ incæ mīnitö weca quēwencæboimpa. ⁷ Edæ, Botö wodo pænta gocæ cædinque mīnitö weca ñowo pōmo baï wantæ iñö ēñaquinque incædōnimpa, ante pōnente wædinque botö wīi ñowo pōinēmo imopa. Wæætē, Wængongui Ao angā ate botö iincayæ ate mīnitö weca ponte wantæpiyæ quēwēnīnque tocæboimpa, ante pōnēmopa. ⁸ Wæætē möni oodeocabo ææmæ Pentecotee möni ānōmæ iinque beganca botö Epeto adoyōmō quēwencæboimpa. ⁹ Edæ Epeto iñömö quēwēnāni wede pōnente bacædānimpa, ante botö guite apænequinque odemö baï wi ænete baï ongö abopa. Ayæ adobaï, Nē piinte cædāni nanguï ināni mæ ongōnānīpa, ante adinque botö adoyōmō quēwēnīnque nanguï wææ apænecæboimpa.

¹⁰ Tīmoteo mīnitö weca wabānō ponguīgä. Pongä inīnque mīnitö wæætē, Mönitö weca guññēnāmaï inte quēwencæbiimpa, ānīnque tömengä ingante waa cæedāni. Edæ botö nē cæbo imo baï tömengä adobaï Wængongui beyænque nē cæcā ingampa. ¹¹ Ìnīnque, Tīmoteo ònonque cæcampa, ante tedewēnāmaï inte mīnitö tömengä ingante Baa ānāmaï incæmīnimpa. Wæætē waadete cædinque da pōnōmīni ate tömengä piyænē cæte botö weca adodö poncæcäimpa, ämopa. Edæ, Mönō tōññadāni tönö Tīmoteo godongāmæ poncæcäimpa, ante pōnēnīnque botö wānō cōmopa.

¹² Botö mönō tōññacä Apodo ingante guiquēnē, Mönō tōññadāni tönö bitö coodintoidi weca ēñate pōe, ante ancaa āmo incæte tömengä wæætē, Ñowo wīi goquimo, ante Baa angantapa. Incæte Wængongui Ao angā ate tömengä iincayæ ate mīnitö weca cöwē poncæcäimpa.

Waa quēwencæmīnimpa, ante

¹³ Mīnitö guiquēnē cōwā ate nāmā wææ aedāni. Wede pōnēmīni inte tæi gongænte ongödāni. Æmæwo pægaimīni inte tæi piñænte entawēnīnque guññēnāmaï inte ee cæedāni. ¹⁴ Ayæ tömāā quīēmē cæmīni inte waadete pōnēnīnque cæedāni ämopa.

¹⁵ Botö tōññamīni mīnitö iïmai ante do ēñēmīnīpa. Acayabæ iñömö tāno pōnēngaināni inte Etepānā nāni quēwencabo iñömö, Wængongui quïnāni inānite nē cæmōni bacæmōnimpa, ante ñowo cædānīpa cæmīnīi. ¹⁶ Ìnīnque mīnitö Wængongui quïnāni beyæ nē cædīnāni inānite Ao ānīnque piyænē cædinque tömēnāni nāni ānō baï do ēñente

cæedāni. Ayæ, Wadāni adobaï, Mönö tönö godongämæ nanguï cædānipa, ante adinque mīnitö tōmēnāni nāni änö baï do ēñente cæedāni.

¹⁷ Etepānā tönö Podotōnato ayæ Acaico botö weca pōninqe mīnitö botö beyæ mīni cæinēnō ante do cædāni ate nanguï totabopa. ¹⁸ Edæ tōmēnāni pönö apænedāni ēñēninque mīnitö wampo pōnente tæï piñænte ewocamīnitawo. Ayæ adobaï pönö apænedāni ēñēninque mōnitö wampo pōnente tæï piñænte ewocamōnipa. Mänōmaï nē pönö cædīnāni inānite mīnitö wæætē waa ate pōnēninque cæquēnēmīni imīnipa.

¹⁹ Atiabæ iñōmō Codito ingante godongämæ nāni pōnencabo nāni cabo nāni cabo tōmānāni mīnitö imīnite ante pōnēninque, Waa quēwencæmīnimpa, ante apænedānipa. Aquidæ tönö Pidica nāna gæncaya adobaï ayæ tōmēna oncōnē Codito ingante pōnente godongämæ pōninqe nāni pōnencabo adobaï mīnitö imīnite waadete pōnēninque, Mönö Awēnē nempo waa quēwencæmīnimpa, änānipa. ²⁰ Mönö tōniñadāni tōmānāni, Waa quēwencæmīnimpa, ante apænedānipa. Mīnitö guiquēnē mīni cabo godongämæ pō bee tēninque waadete pōnente waa apæneedāni, āmopa.

²¹ Botö Pabodobo iñōmō tæcæ tōmēmo önompoca yewæmōninque, Waa quēwencæmīnimpa, ante tōmēmo yewæmōmopa.

²² Æcānō mönö Awēnē ingante waadete pōnēnāmaï ina iñōmō tōmengä nānō wænguinque mänōmaï cæcampa tōö. Botö iñōmō wæætē, Mōnitö Awēnē imi pōe, ante wæbopa.

²³ Mönö Awēnē Itota waadete pönö cæcä æninque mīnitö tōmengä nānō waadete pönö cædö entawēninque waa quēwencæmīnimpa. ²⁴ Codito Itota nempo mönö quēwencabo imompa, ante pōnēninque botö mīnitö imīnite waadete pōnēmopa. Mäninque ante yewæmōmopa.

2 Coodintoidi

inänite Pabodo cadota ante ayänta nänö yewæmongainta

Waa quëwencæminimpa, ante

¹ Wængongui pönö angä beyä Itota Codito botö Pabodobo imote da godongä godongaimo inte botö mönö töninäcä Tímoteo tönö guëa apænemöna ate botö iimäi ante yewæmömopa. Coodinto iñömö quëwëmini inte minitö iñömö Codito ingante mïni godongämæ pönencabo incæ acæminimpa, ante yewæmömopa. Ayä Acayabæ tömäo iñömö quëwente Wængongui quinäni inte tömënäni adobäi adota acædänimpa, ante yewæmömopa. ² Mönö Awënë Itota Codito tönö Mæmpo Wængongui tönö guëa waadete pönö cæda adinque minitö gänë pönente waa quëwencæminimpa, ämönapa, ante yewæmömopa.

Codito iimäi waadete pönö cæcampa, ante

³ Mönö Awënë Itota Codito Wæmpocä iñongante Itota iñömö adocä ingante, Botö Wængongui inongä ingampa. Ayä Itota Wængongui adocä inongä inte tömengä mönö wæwënö ante adinque godongämæ wæte bäi pönö waadete apænecä ëñëninque mönö wampo pönëmö imopa. Mänömaï beyä, Itota Mæmpo Wængongui cöwë waa cæcampa, ante mönö watapæ apænecæimpa. ⁴ Adocä Wængongui mönö imonte äninque, Wënæ wënæ wæwëmini adinque botö waadete pönö apænebo ëñëninque minitö wampo pönëminitapa. Ìninque wadäni wënæ wënæ wæwënäni adinque minitö botö apænedö ante waadete godö apænemini ëñëninque tömënäni wæætë wampo pönencædänimpa, ante botö minitö iminite pönö cætabopa, Wængongui angampa.

⁵ Edæ iimäi beyä mänömaï angampa. Codito në nantate wægaingä beyä nantate wæwëninque mönö tömengä tönö äanque bäi nantate wæwëmompä. Ayä adobäi nantate wæwëmö adinque adocä Codito waadete pönö apænecä ëñëninque mönö tömengä tönö äanque bäi ewocadinque wampo pönëmompä. ⁶ Mönitö nantate wæwëmöni aminitawo. Edæ mönitö nantate wæwente apænemöni beyä Wængongui minitö iminite wæætë pönö waadete apænecampa. Apænecä ëñëninque minitö wæætë wampo pönëninque wænämaï quëwencæminimpa, ante Wængongui cæcampa. Ayä mönitö wæwëñömönite tömengä pönö waadete apænecä ëñente wampo pönëmöni aminitawo. Edæ minitö nantate wæwëmini inte wampo pönencæminimpa, ante Wængongui mänömaï cæcampa. Ayä wampo pönëmini badinque minitö iincayæ ate mönitö nantate wæwënö bäi adobäi nantate wæwëmini incæte piyænë cæte ee cæte quëwencæminimpa, ante Wængongui pönö cæcampa. ⁷ Ayä mönitö tönö äanque bäi minitö nantate wæwëminitawo. Edæ tömengä waadete pönö apænecä ëñëmini ate minitö adobäi mönitö tönö äanque bäi wampo pönenguimini iminipa. Ante do ëñëninque mönitö, Näwangä minitö watapæ quëwencæminimpa, ante do pönëmönipa.

⁸ Ìñänäni, mönitö Atiabæ quëwëninque æbänö wënæ wënæ bate wætämönii, ante ñöwo yewæmömo aedäni. Täi piñämöni inämaï inte mönitö godömenque teëmë mongænte bäi nanguï wënæ wënæ bate wædinque, Nangæ bate wænguï wæ, ante wætämönipa. ⁹ Wængongui do angä wænguënëmöni imönipa, ante nämäneque pönente wætämönipa. Incæte mönitö, Tömëmöni nämä täi piñænö beyænque quëwencæmönimpa, ante pönënämaï incæmönimpa, ante odömoncæte ante Wængongui pönö cæcä wætämönipa. Wæætë tömengä, Do wængäinäni quëwencædänimpa, ante botö në ämo iñömote minitö wæætë botö imote wede pönente quëwencæminimpa, ante cæcæte ante Wængongui mänömaï pönö cæcä wætämönipa. ¹⁰ Mönitö mäninö möni oo wænguinqu ante wæyömönite tömengä do bæi ongonte ængä beyænque quëwentämönipa. Ayä ate wæyömönite tömengä ængä beyænque quëwencæmönimpa. Ayä, Adocä wæætë wæætë ængä beyænque quëwencæmönimpa, ante pönëninque mönitö tömengä ingante wede pönente tomönipa. ¹¹ Ìninque minitö iñacabo gongænte bäi mönitö beyä

Wængonguī ingante apænemīni ēñēninque tōmengä cōwē bæi ongonte ængä beyænque quēwencæmōnīmpa. Mänōmaī cæcä adinque nanguī ināni wæætē Wængonguī ingante waa ate pōnente īīmaī ante apænecædānīmpa. Wængonguī ēñēmi. Nanguī ināni apænedāni ēñēninque bitō Pabodoidi beyæ pōnō waa cæbi amōnīpa, ante apænequīnāni inānīpa.

Coodinto iñōmō quīnante pōnāmaī īmoī, Pabodo angampa

¹² Mōnitō īīmaī ante nāmā waa ate pōnēninque apænemōnīpa. Wængonguī quīmōni inōmōni inte mōnitō tōmengä, Tæiyæ waēmō ēwocacæmīnīmpa, ante ænte entawēmōnīpa. Mänōmaī beyæ Wængonguī nō cæcä bai mōnitō adobai inguipoga quēwēninque nō cæte quēwēmōnīpa. Ayæ mīnitō weca pōninque mōnitō godōmenque waa cætāmōnīpa. Mänōmaī cædinque mōnitō inguipoga quēwēnānique nāni ēñēnō beyænque dicæ cætāmōniyaa. Wæætē mīmō entawēmōni inte nāmā apænte āninque mōnitō Wængonguī waadete pōnō apænecä ēñēninque eyepæ cætāmōnīpa, ante tomōnīpa. ¹³ Mīnitō acæmīnīmpa, ante yewæmōninque mōnitō dicæ idiquibæ ante yewæmōmōniyaa. Wæætē, Edonque adinque do ēñencæmīnīmpa, ante edonque yewæmōmōni abaimīnīpa. Ayæ botō, Mīnitō nāwangä godōmenque ēñencæmīnīmpa, ante īīmaī ante pōnēmopa. ¹⁴ Mōnitō æbānō īmōnīi, ante mīnitō pancaa ante do ēñēmīnīpa. Ayæ, Mōnō Awēnē Itota tōmengä nānō ponguīōnæ īinque bayonte mōnitō mīnitō īmīnite adinque, Mīnitō nē wede pōnengaimīni īmīnīpa, ante adinque tocæmōnīmpa, ante do ēñēmīnitawo. Ayæ māniōnæ bayonte mōnitō īmōnite adinque mīnitō adobai, Waa nē cægaimīni īmīnīpa, ante tocæmīnīmpa, ante āmo ēñēmaimīnīpa.

¹⁵ Mänōmaī impa, ante pōnēninque botō, īīmaī cæcæboīmpa, ante pōnentabopa. Wayōmō ayæ godāmaī inte botō tāno mīnitō weca ponte waadete apænecæboīmpa. Apænebo ēñēninque mīnitō wæætē mēmpoga tocæmīnīmpa, ante īīmaī cædīmo intabopa. ¹⁶ Mīnitō weca tāno ponte ēñadinque godōmenque godinque botō Māatedōniabæ gote pōninque wæætē mīnitō weca adodō ocæ emænte poncæ cædīmo intabopa. Ayæ pōmo ate mīnitō botō imote godongāmæ cædinque da godōmīni godōmenque Oodeabæ gocæ cædīmo intabopa. ¹⁷ Incæte botō, Mänōmaī cæquīmo īmopa, ante pōnēninque dicæ ōnonque ante pōnentawogaa. Mänōmaī pōinēmo inte botō nīmpo cæte pōnāmaī īmo adinque mīnitō, Pabodo æmæ pōnente, Wīī pōinente wabānō wīī pongä, ante pōnēmīnitawo. Īñæmpa inguipogaque quēwēnāni mānōmainō ante nāni æmæ pōnēnō bai botō iñōmō edæ dicæ adobai pōnentawogaa.

¹⁸ Wængonguī nāwangä mōnō īmonte cōwē pōnēninque nē aacä ingampa, ante nō pōnī impa. Mänōmainō ante nō pōnī ī bai mīnitō īmīnite mōnitō apænedō iñōmō adobai nō pōnī impa. Īninque mōnitō ædō cæte wadō ante apænequīmōnīi. ¹⁹ Tidibānō tōnō Tīmoteo botō tōnō mīnitō weca pōninque, Wængonguī Wengä Itota Codito ingampa, ante nō impa, ante apænemōni ēñēmīnitawo. Īninque mōnitō Itota Codito nempo quēwēninque nē Ao amōni inte ædō cæte æmæ pōnente bai wadō ante apænequīmōnīi. ²⁰ Īīmaī impa. Wængonguī, Cōwē cæcæboīmpa, ante æpogamē wæætē wæætē angacāīmpa. Wæætē wæætē angä incæte Codito iñōmō edæ cōwē Ao āninque, Wængonguī nānō angāinō tōmānō īinque cæcæīmpa, ante cæcampa. Īninque mōnitō tōmengä tōnō cædinque, Wængonguī nāō apāite bai emōñongante tōmānāni tōmengä ingante waa acædānīmpa, ante cædinque, Ao, mānōmaī impa, ante, Amēē, ante watapæ apænemōnīpa. ²¹ Wængonguī incæ mōnitō īmōnite apænte æninque ayæ mīnitō īmīnite apænte æninque, Mīnitō Codito nempo quēwēninque nē tæī piñæmīni bacæmīnīmpa, ante mōnō tōmāmō īmonte pōnō ōni pæte bai cædinque īīmaī cæcampa. ²² Tōmengä emōwo yewæmonte bai cædinque, Botō quīmīni īmīnīpa, ante pōnō cæcampa. Ayæ, Īincayæ ate mīni godōmenque nanguī ænguinque mīnitō nōwo botō Ōnōwoca ingante ænte ēwocædāni, ante tōmengä Ōnōwoca ingante nōwo da pōnongä ænte ēwocāmīnīpa.

²³ Īninque Coodinto iñōmō botō quīnante wæætē pōnāmaī ingaboī. Edæ wēnæ wēnæ cæmīni adinque mīnitō īmīnite nē panguēnēmo incæ botō, Wīī pāinente awædō, ante wīī pontabopa. Wængonguī ayongante botō, Mänōmaī impa, ante nō apænebo

ēñemaiminipa. ²⁴ Īimai ante wede pōnencæminimpa, ante mōnitō dicæ nē wææ ämöni imōniyaa. Wæætē edæ, Minitō mini wede pōnēnō beyænque tæi ongōnque edæ nanguī cæminipa, ante adinque mōnitō wæætē, Minitō watapæ tocæminimpa, ante cædinque minitō tōnō godongämæ cæmōnipa.

2

¹ Botō wēenēñedē minitō weca ēñacæ pōnque nanguī ämo wæminitapa. Īn-
 inque, Wīi wæætē ämo wæcæminimpa, ante ñōwo ēñacæ pōnāmai incæboimpa, ante
 nāmāneque pōnēnque antabopa. ² Edæ pīmo wæwēmīni bai æcānō wæætē, Tocæbi-
 impa, ante botō imote waadete pōnente apænequēngā. Īñæmpa botō pīmo beyæ nē
 wæwēmīnque ongōmīni bai botō imote nē waadete pōnente apænequēngā ĩñōmō
 edæ dæ ancædongäimpa. ³ Botō quiēmē beyæ tobo adinque minitō godongämæ watapæ
 toquēnēmīni iminipa, ante pōnentabopa. Minitō botō beyæ änque, Pabodo mōnō weca
 pongä adinque mōnō cæmō tocæcäimpa, ante nē cæquēnēmīni iminipa, ante awædō.
 Īnque, Minitō weca pōnque botō minitō wæwēnō ante wædāmai incæboimpa, ante
 cædinque botō, Botō cadota ante yewämōmo adinque minitō ēñente cæcæminimpa,
 ante wæbopa. ⁴ Botō nanguī caate wædōmo inte mimōnoque pōnente wæwēnque
 yabæque adobai Ca ca nanguī pōnente wædinque mänōmainō ante wæbopa. Incæte
 botō, Minitō wæwencæminimpa, ante dicæ ämogaa. Wæætē, Botō æbānō minitō
 iminite nanguī waadete pōnēmpa, ante ēñencæminimpa, ante odōmoncæte ante
 yewämōmpa.

Nē wīwa cæcä ingante æbānō godō waadete ñimpo cæquiī

⁵ Adocanque wīwa cæcä adinque botō tōmengä nānō wīwa cædō beyæ wæwēmo
 incæte minitō tōmāmīni wædænque incæ nanguī incæ wæwēmīni adobai iminipa. Botō,
 Tōmengä ingante pīnāmai incæboimpa, ante pōnēnque, Wædænque wæwēmīnipa,
 ante apænebopa. ⁶ Nē ēñēnāmai cædingä ingante minitō pancamīniya wodo tōmāmīni
 do pāmīnitapa. Īnque botō, Idæwaa pāmīnipa, ämpa. ⁷ Tōmengä, Ancaa pāmīni
 awædō, ante godōmenque wæwente bacantawo. Īnque minitō pōnō ñimpo cæd-
 inque tōmengä ingante, Idæwaa pāmōni wæbipa, ante ædæmō waadete apænemīni
 ēñēnque tōmengä ĩnque wædinque wampo pōnencæcäimpa. ⁸ Minitō wæætē, Bitō
 imite nāwangä waadete pōnēmōnipa, ante adodō apænemīni ēñencæcäimpa, ante botō
 minitō iminite nanguī ämpa. ⁹ Botō äno ante æbānō tōmānō ante ēñente cæmīni,
 ante ēñencæte ante botō wēenēñedē yewæmontabopa. Eyepæ cæmīni ate wædinque
 botō, Eyepæ cæminipa, ämpa. ¹⁰ Nē ēñēnāmai cæcä ingante minitō ñimpo cæmīni
 ee gocantawo. Mänōmai cæmīni ĩnque botō ñōwo adobai ñimpo cæbopa. Waocä
 æcāmenque ēñēnāmai cæcä adinque godō pōnō ñimpo cæbo ĩnque botō Codito
 ayongante minitō beyænque ante mänōmai godō ñimpo cæbo intabopa. ¹¹ Īñæmpa
 Tatāna incæ angä ēñente beyænque mōnō oda cæte wæquinque edæ godōmenque
 pīmaimompa, ante aquēnē quēwēedāni. Tatāna æbānō, Oda cæte wæcædānimpā, ante
 cæcampa, ante edæ do ēñēmōmpa.

Tito beyæ ante Pabodo wæcampa

¹² Botō Todoa nāni quēwēñōmō tāno pōnque, Mōnō Codito ingantedō ante watapæ
 apænecæte ante cæyōmo mōnō Awēnē, Botō beyæ guiite apænee, ante odemō wi ænete
 bai do cæcä atabopa. ¹³ Incæte botō tōññacä Tito dæ angä wædinque botō, Ædō cæte
 ĩñōmō a ongonte apænequimoo, ante tōmēnāni inānite, Gobopa, ante Mäatedōniabæ
 gocæte ante wadæ gotabopa.

Codito nempo quēwēnque tæi emōmōnipa, ante

¹⁴ Nē tæi emongä inte mōnō Codito ĩñōmō nē piinte cædāni inānite gänä cæcampa.
 Īnque mōnitō Codito nempo quēwēñōmōnite Wængongui, Nē tæi emongä ingante
 waa acædānimpā, ante cædinque mōnitō imōnite nē tæi emongä miñæ ænte mäocä
 dao dao godinque mōnitō tōmengä nānō emōnō bai adobai tæi emōmōnipa. Ayæ

ogui wa woboyæ wodo wodo cædinque tõmäo mäo ogui wa bai Wængongui adobai cædinque mõnitö imõnite angä eñëninque mõnitö wæætë, Mönö Codito æbänö ingää, ante wayömö wayömö mäo apænemöni eñënanipa. Wængongui mänömaï cæcä beyæ mõnö Wængongui ingante waa ate pönëninque apænecæimpa.

¹⁵ Iïmaï edæ impa. Codito ængä beyænque nê quëwenguinani weca quëwëmöni incæ nê wænguinani weca quëwëmöni incæ mõnitö Codito nempo quëwëninque tõmengä nänö ogui wamönedö bai mõnitö adobai, Wængongui wë ongonte bai tocæcæimpa, ante ogui wamönete bai apænemöni. ¹⁶ Mönitö öö wa wamönete bai cædinque nê wænguinani inänite tõmënäni nani wænguimämo ante apænemöni eñëninque tõmënäni nani wænguinque wë ongonte ocado cæte bai eñënanipa. Wæætë ogui wamönete bai mõnitö nê quëwenguinani inänite guiquënë tõmënäni nani quëwenguimämo ante apænemöni eñëninque tõmënäni wæætë nani quëwënguine wë ongonte ocado cæte bai eñënanipa.

Iinque mäninö mõnitö cæquënëno ante æcänö eyepæ cæquiringää. ¹⁷ Edæ nanguï inäni nämä beyænque ante æncæte ante cædinque Wængongui nänö apænedö ante apænewënanai bai mõnitö wiï adobai wënæ wënæ cæcæte ante apænemöni imõnipa. Wæætë Wængongui mõnitö imõnite da godongä godinque mäo nê apænemöni inte mõnitö Wængongui ayongä mõnö Codito nempo quëwëninque nõ pönente apænemöni.

3

Wængongui miine pönö angä beyænque quëwëmompä

¹ Mönitö imõnitedö ante pönëninque minitö, Pabodoidi, Waa cæmöni aedäni, ante tedewënanipa, ante wëenënedë äminitawo. Ayæ, Nöwo wæætë adodö ante tedewënanipa, ante piiminitawo. Mönitö iñæmpa nämanque ante, Waa cæmöni aedäni, ante dicæ ämöniyaa. Wadäni mõnitö imõnite waa acædänimpa, ante cædinque pancadäniya guiquënë minitö imõnite äninque, Cadota ante pönö yewæmöedäni, änäni eñëninque yewæmömïni ate tõmënäni ænte mäo odömönäni adänipa. Ayæ wadäni inänite adobai, Cadota, änäni eñente yewæmönäni æninque minitö imõnite odömönäni. Mönitö guiquënë, Cadota ante pönö yewæmöedäni, ante dicæ ämöniyaa. ² Wæætë minitö guiquënë waa quëwëmïni adinque wadäni, Pabodoidi tõmënäni inänite apænedäni beyænque coodintoidi wede pönënanai inte waa quëwënanai amönipa, ante pönëninque cadota ate bai do eñënanipa. Mänömaï pönö cæmïni æninque mõnitö cadota næænte odömönte bai cædinque, Coodintoidi æbänö waa cædänii, ante tõmänäni inänite odömömöni adinque eñënanipa. ³ Iinque, Pabodoidi apænedäni beyænque waa cædänipa, ante edonque acædänimpa, ante cædinque Codito iñömö Wængongui nê Quëwengä Önöwoca ingante da pönongä ænte ëwocaminipa. Mänömaï cædinque Codito cadota ante yewæmonte bai pönö cædinque wiï tõmengonca yewæmongampa. Wiï dicaboga yewæmöninque tõmengä Önöwoca ingante minitö baonga da pönongä ænte ëwocaminipa.

⁴ Codito godongämæ cæcä beyænque mõnitö Wængongui ayongä nöingä ante apænemöni, ante pönëninque mõnitö guinënedämaï inte do edæ apænemöni. ⁵ Mönitö nämanque ante, Æbänö waa cæmönii, ante eyepæ imõnipa diyæ apænte anguimönii. Wæætë Wængonguinque pönö godongämæ cæcä ate mõnitö eyepæ badinque cæmönipa. ⁶ Wængongui, Botö pönö cæbo ate minitö Ao ämïni ininque mõnö godongämæ waa cæte quëwengæimpa, ante cöwë angampa. Tõmengä doyedë iñömö, Botö wææ angainö ante eñente cædinque quëwencæminimpa, ante nänö wææ angaine ante nõwo wæætë änämaï ingampa. Mänine ante nõwo ganca wææ angä bai mõnö wænguinque incædönimpa. Nöwo guiquënë Wængongui wæætë, Botö Önöwoca ingante ænte ëwocadinque quëwencæminimpa, ante miine ante apænecä eñëninque mõnö quëwënguine Wængongui Önöwoca ingante ænte ëwocamompä edæ. Mönitö iñömö

tömengä Önöwoca ingante në ewocamöni inte eyepæ badinque müine Wængongui ñöwo nänö pönö apænede ante në apänemöni imönipa.

⁷ Wængongui, İmaı cædäni, ante dicaboga wææ yewæmongä ate mönö eñenämaı imö beyænque mänine tömengä nänö wææ yewæmongaine beyænque mönö wænguımämo bagatimpa. Incæte mänine beyæ edæ ñäö nanguı apäigatimpa. İnıne mänine ænte godömenque wææ änıne Möıtee wodi awınca ñäö apäıte bai emongacäimpa. Mänıı ñäö wodemämö emongä incæte idægoidi tömengä awınca adınque, Ædö cæte Möıtee awınca cöwä aquımönıı, ante wægadänimpa.

⁸ Mönitö guiquenë, Wængongui Önöwoca ingante ænte mönö quëwengäimpa, ante möni apænedö beyænque quıemë bai godömenque nanguı apäıte bai apäicäimpa. ⁹ Mönö apænte tente wænguinque edæ mänine pedæne ante eñenämaı cægamöimpa. Incæte mänine ante nänö wææ angainö beyænque Möıtee wodi awınca ñäö apäıte bai emongacäimpa. İnıne ñöwo inömö, Mönö nö cæte quëwenguinque ante Wængongui Önöwoca ingante ængäimpa, ante möni apænedö guiquenë ñäö quıemë bai godömenque nanguı näwante bai enepa. ¹⁰ Wængongui Tæiyæ Waemö Önöwoca ingante ante möni apænedö inömö godömenque ñäö nänö apäidö beyænque Möıtee wodi nänö wææ angainö guiquenë pönömenque apäidinque edæ wodemäa badinque edæ dæ bapa. ¹¹ Edæ mänine mönö wodemäa baquenëmämo incæ ñäö apäıte bai inönte Möıtee wodi ænte apænegacäimpa. Wængongui ñöwo nänö pönö äne guiquenë cöwë wodemäa badämaı ene inte godömenque nanguı guınæ näwante bai enepa.

¹² İnıne, Wængongui Tæiyæ Waemö Önöwoca pönö cæcä beyænque mönö nö cæte watapæ quëwengäimpa, ante pönente quëwemöni inte mönitö guinenedämaı inte do apänemönipa. ¹³ Möıtee wodi guiquenë, Ñäö apäı bai botö emönö incæ wodemäa bamönömote idægoidi adämaı incädänimpa, ante cædinque weocoo ñäne cæmongacäimpa. Mönitö guiquenë Möıtee wodi nänö ñäne cæmongai bai cædämaı imöni inte edonque apänemönipa. ¹⁴ Mäninta, Botö wææ angainö ante eñente cædinque quëwencæminimpa, ante Wængongui nänö pedænta ante adınque idægoidi do nani ñäne cæmongaincoo ñöwo ganca edæ ñäne cæmonte bai emönänipa. İnıne tömënäni ocai ömæcadäni bai bagadänimpa. Edæ Codito nempo quëwënänıque mänincoo wi cæmonte bai emönäni inte tömënänıque edonque adäni inänipa. İnıne idægoidi wæætë Codito nempo quëwënämaı inäni inte ayæ edæ wi cæmönämaı inte wædänipa. ¹⁵ İnıne idægoidi ñöwo ganca mimö bee otawente bai inönäni inte Möıtee wodi nänö yewæmongainta adınque eñenämaı inänipa.

¹⁶ Incæte Awënë gämænö æcänö pöna tömengä Möıtee wodi nänö wi cæmönö bai badinque do wi cætawente bai bacampa. ¹⁷ Mönö Awënë incæ Wængongui Önöwoca ingampa. Ayæ waocä mönö Awënë Önöwoca ingante ewocacä inıne tömengä wi cætawente bai entawente quëwëngä inte wıı tee mönete wæcä bai ingampa. ¹⁸ Mönö tömämö inömö awınca wi cæmonte bai emönömö inte mönö awocawænta bai bamompa. İnıne wadäni mönö imonte adınque, Mönö Awënë æbänö ñäö apäıte bai emongää, ante awocawænta ate bai edonque acädänimpa. Ayæ godömenque ayæ godömenque mönö ñäö apäidö mönö ewoquinque mönö Awënë nänö ewocadö bai mönö ayæ godömenque ayæ godömenque ewocamö imompa. Mönö Awënë incæ Wængongui Önöwoca inongä inte mänömaı pönö cæcä entawëmompa.

4

¹ Wængongui, Botö pönö cægainö ante munitö në apänemini incæminimpa, ante waadete pönö angä beyænque mönitö mäninö ante në apänemöni bagaimöni inte ñöwo wæ guemönämaı inte cöwë apänemönipa. ² Wadäni guiquenë tömënäni nani guingo imonte wæquinque awemö cædänipa. Mönitö inömö tömënäni nani cæwënö bai cædämaı incæmönimpa, ante do änimöni inte babæ cædämaı imönipa. Wængongui nänö apænedö ante idiquibæ apænedämaı imönipa. Wæætë Wængongui ayongä mönitö tömengä nö nänö apænegainö ante edonque pönı odömonte apänemöni

ēñēninqe tōmānāni mīmō entawēnāni īninqe edæ, Pabodoidi nō ante cædānīpa, ante apænebainānīpa. ³ Incæte mōnō Codito ingantedō ante watapæ mōni apænedō īñōmō ñāne cædete bai intawo. Īñæmpa ñāne cædete bai ī ininqe nē wē womonte wænguīnāni beyænque ñāne cædete bai impa. ⁴ Wængonguī nānō ěmōnō nē ěmōnongā inte mōnō Codito īñōmō mōnō beyæ ñāō apāite bai cæcampa, ante watapæ mōnō ěñente pōnēnō ante apænemōnīpa. Nōwoguiyogaque quēwēnāni beyæ guiquēnē tōmēnāni awēnē wængonguī bai Tatāna nē cæcā ingampa. Tōmengā īñōmō mānīne watapæ mōni apænedō ante pīininqe, Nē pōnēnāmaī īnāni adāmaī incædānīpa, ante tōmēnāni awinca ñāne cæmonte bai wææ cæcampa.

⁵ Mōnitō īñōmō, Nāmā incæ waa cæmōnīpa, ante tededāmaī ĩmōnīpa. Wæætē, Itota Codito incæ mōnō Awēnē ingampa, ante mōnitō, Tōmengā beyænque mōnitō mīnitō ĩmīnite nē cæmōni ĩmōnīpa, ante māninqe ante apænemōnīpa. ⁶ Wēmō īñōmō ñāō apāicæimpā, ante Wængonguī incæ badongacāimpā. Adocā ñāō ante nē angaingā inte ñōwo wæætē mōnitō mīmōno tica ěnente bai cædinque ĩmaī ante odōmongā amōnīpa. Tōmengā īñōmō, Botō æbānō guīnæ nāwante bai ěmōmoo, ante mīnitō Codito awinca adinqe edonque pōnī acæmīnīpa, ante pōnō tica ěnente bai odōmongā amōnīpa.

Itota ingante mōnō wede pōnēnō beyænque quēwēmō

⁷ Nanguī ñāō apāite bai ěwocamōni incæ ōnoncadedē mante bai edæ ěwocamōnīpa. Edæ daigænē cængæmoncadenque bai mōnitō baō mongæñōmōnite Wængonguī, Wīi mīnitō nāmā tæi pīñænō beyænque ěwocaminīpa, wæætē botō tæi pīñænō beyænque ěwocaminīpa, ante acædānīpa, ante badongampa. Īninqe tōmengā tæi pīñænte pōnō badongā æninqe mōnitō ñāō apāidō mōni mānō īñōmō ōnoncadedē mante bai ěwocamōnīpa. ⁸ Mōnitō ĩmōnite tōmānō māmō mō ongonte bai cædāni wæmōni incæ gueogæ godāmaī ĩmōnīpa. Æbānō cæte quēwēmō ĩmōō, ante wæmōni incæ mōnitō guīñente wædāmaī ĩmōnīpa. ⁹ Ancaa togænte pānāni wæyōmōni Wængonguī mōnitō ĩmōnite cōwē ěmō cæte godāmaī ingampa. Ayæ wænoncæte ante bæ tadāni incæte æmæwo wænāmaī ĩmōnīpa.

¹⁰ Itota tōmengā nānō quēwēnō pōnongā æmōni beyænque mōnitō, Baō ayæ mongænte quēwēmōni acædānīpa, ante cæmōnīpa. Tōmengā nānō wængainō bai mōnitō adobai wæætē wæætē wænte bai baō mongæmōnīpa. ¹¹ Mōnitō nē quēwēmōni īñōmōnite wadāni wæætē mōnitō ĩmōnite bæi ongonte æninqe, Itota beyænque wæncæmīnīpa, ante nanguī cædānīpa. Īninqe mōnitō baō ñōmænguīñō ěñayōmōnite wadāni, Itota tōmengā nānō quēwēnō ěñate beyænque ayæ quēwēnānīpa, ante edonque acædānīpa, ante mōnitō wæncæ cæte bai ěñate wæmōnīpa. ¹² Īninqe mōnitō mōni wænguīmāmo beyæ ante wæyōmōni mīnitō wæætē mīni quēwenguīmāmo ěñate quēwēmīnīpa.

¹³ Docā do apænedinqe, Botō nē wede pōnēmo inte apænetabopa, ante yewæmon-gacāimpā. Tōmengā wede nānō pōnengainō bai adobai ěwocadinque mōnitō nē wede pōnēmōni inte adobai apænemōnīpa. ¹⁴ Īmāinō ante ěñēninqe wede pōnēmōni inte mōnitō apænemōnīpa. Itota ingante, Nāni ōmæmōe, ante nē cægaingā adocā mōnitō ĩmōnite angā ate mōnitō Itota tōnō godongāmæ ñāni ōmæmoncæmōnīpa, ante do ěñēmōnīpa. Ayæ mīnitō tōnō mōnitō tōmāmō īñōmonte Wængonguī ænte māmō gōnongā ate mōnō tōmengā weca godongāmæ gongænguīmō ĩmōmpā. Mānōmāinō ante do ěñēmōni inte mōnitō nē wede pōnēmōni inte apænemōni ĩmōnīpa. ¹⁵ Wængonguī godōmenque nanguī īnāni īnānite waadete pōnō cæcā ate tōmēnāni wæætē Wængonguī ingante waa ate pōnēninqe apænecædānīpa. Ayæ mānōmaī pōnō cæcā adinqe, Wængonguī ñāō apāite bai ěmōnongā inte mānōmaī cæcampa, ante mōnō tōmāmō watapæ apænecæimpā. Īninqe, Mānōmaī bacæimpā, ante mīnitō beyæ ante mōnitō tōmāā edæ cæmōnīpa.

¹⁶ Mānōmaī beyæ mōnitō, Æbānō cæquīmōnīi, ante wædāmaī ĩmōnīpa. Edæ ĩimō ĩñō ĩimō ĩñō mōnō baō godōmenque wænguīñō bai mongæñōmō mōnō ōnōwoca

wæætē iimō iñō godōmenque iimō iñō godōmenque miiwoca badonte bai ewocamompa. ¹⁷ Iñæmpa wænæ wænæ mōnō wæwēnō incæ wantæ iñō wodēmāa pōnī badinque wodæi bai bapa. Incæte māniī mōnō wæwēnō beyæ mōnō godōmenque ñāō apāite bai ewocacæimpa. Ininque mōnō wæwēnō wodæi pōnī inte dæ bayō mōnō ñāō apāidō mōnō ewocadō wæætē cōwē wodēmāa badāmaī ingæimpa. Wæætē mōnō watapæ quēwenguinque godōmenque nanguī apāite bai bacæimpa. ¹⁸ Inguipogaque mōnō quēwēnō guiquēnē wantæ iñō dæ gocoopa. Öönædē ñōwo mōnō adāmaī incoo guiquēnē cōwē dæ badāmaī inte ongongæimpa. Ininque inguipogaque mōnō quēwēnō ante mōnō adāmaī inte bai pōnengæimpa. Wæætē öönædē mōnō adāmaī incoo ante mōnō cōwē ate bai pōnengæimpa.

5

¹ Oncontai wido cæquintai bai mōnō æmontai mongænte quēwēmompa. Ininque mānintai wido cæmō incæte Wængonguī wæætē, Öönædē miintai mini cōwē owoquintai, ante do mænongacæimpa. Mānintai iñōmō waocā önompoca mænōnāmaī intai iñonte mōnō öönædē æite owoquimō imompa, ante do ēñēmompa. ² Ñōwo iñōmō mōnō wido cæquintai mongæninque ö ö ante nantate wæwēmompa. Mānōmaī beyæ mōnō öönædē æidinqe mōnō owoquintai ēñacæte ante wæmompa. ³ Edæ, Baö ömaamō inte wæcæ wæ, ante guiñewocate wædinque mōnō, Miintai ēñacæimpa, ante wæmompa. ⁴ Mōnō iintaique ēñadinque, Baö ömaamō inte wædāmaī incæmōnimpā, ante guiñewocate wæmompa. Mōnō wænguintai mongænte nantate wæmō inte ö ö ante wæmompa. Wængonguī, Minitō ēñate quēwenguintaique, ante yabæque wini caate bai pōnongā ēñayōmō mōnō wænguēnēñō edæ dæ bacæimpa, ante æncæte ante wæmompa.

⁵ Ñōwo ämo ēñeedāni. Wængonguī incæ edæ, Mini miintai wēñate mongænguinqe, ante mōnō imonte badongacæimpa. Ayæ, Minitō miintai cōwē pōnōmo æncæminimpā, ante, Nāwangā impā, ante odōmoncæte ante Wængonguī tōmengā Önōwoca ingante ñōwo da pōnongā æmompā. Ininque tōmengā Önōwoca ingante ænte ewocadinque mōnō, Miintai ēñate mongænguinqe ewocamompa, ante do ēñēmompa.

⁶ Mānōmaī beyæ mōnitō cōwē, Wængonguī cæcæcæimpa, ante wede pōnente tomōnipā. Oncōnē owote bai iintaidē mōnō quēwenganca mōnō Awēnē oncōnē owodāmaī imompā, ante do ēñente wædinque, ⁷ mōnitō māninō ante ayæ adāmaī emōmōni inte wīi mōni adinō beyæ quēwēmōnipā. Wæætē mōni wede pōnēnō beyænque quēwēmōnipā. ⁸ Ininque edæ, Wængonguī cōwē cæcæcæimpa, ante wede pōnēmōni inte mōnitō, Iintaidē owodāmaī inte wæætē mōnō Awēnē oncōnē gote owote waa tobaimpā, ante pōnēmōnipā. ⁹ Ininque oncōnē owote bai tomōni incæ oncōnē owodāmaī inte bai wæmōni incæ mōnitō, Mōnō Awēnē waa tocæcæimpa, ante cædinque cōwē nō cæte quēwēmōnipā. ¹⁰ Codito tōmengā nānō apænte anguimpā gāänē mōnō tōmāmō ponte edæ a ongonguēnēmō imompā. Mōnō edæ inguipoga iintai ēñate quēwēninque mōnō cædō ante do againgā inte tōmengā iñōmō apænte ancæcæimpa. Edæ waa cægaimō imō adinque tōmengā mōnō imonte edæ eyepæ pōnī pædæ pōnongā ænguimō imaïmompā. Wæætē edæ wænæ wænæ cægaimō imō adinque tōmengā wæætē eyepæ pōnī pangā wæbaimompā.

Wængonguī piyænē cædinque, Pöedāni, angampa

¹¹ Ininque mōnō Awēnē ingante guiñente wæmōni inte mōnitō waodāni inānite godō waadete apænemōnipā. Codito gāmænō pōninque watapæ quēwengæimpa, ante pōnencædānimpā, ante mōnitō godō waadete apænemōnipā. Edæ, Mōnitō æbānō ewocamōnii, ante Wængonguī do edonque acampa. Ayæ adobai mīnitō mīmō entawēmīni inte mōnitō ewocadō ante edonque amīni ininque botō waa tobaimpā. ¹² Mānōmainō ante apænedinque mōnitō, Wæmō pōnī imōnipā, ante nāmā ante dicæ ämōniyāa. Wæætē iīmaī ante apænemōnipā. Pancadāniya iñōmō mōnitō awincaque adinque, Pabodoidi æbānō ewocadānii, ante adāmaī ināni inte tōmēnāni nāni adōnonque

ante pönëninque nämä ængö cæte bai todänipa. Minitö guiquënë, Mönitö æbänö ewocamönii, ante do aminitapa. Ìnque tømënäni mönitö imönite ante piinte änäni ëñëninque minitö wæætë edæ, Pabodoidi nö ewocadäni inte waa cædäni amönipa, ante wææ apænecæminimpa, ante cæbopa. ¹³ Edæ ömæcamöni bai cæmöni incæte Wængonguï beyænque ante mänömaï cæmönipa. Wæætë nö pönente cæmöni incæ minitö beyæ ante cæmönipa.

¹⁴ Ìimainö ante pönente wædinque edæ mänömaï cæmönipa. Tömämö beyæ adocanque wængacäimpa, ante adinque mönitö, Mönö tømämö do wængamöimpa, ante edonque ëñëmönipa. Ìnque, Mönö Codito nanguï waadete pönengä inte pönö cæcampa, ante pönëninque mönitö ædö cæte wapiticæ cæquimönii. ¹⁵ Mönö Codito iñömö tømämö beyæ wæninqe, Minitö idæwaa nämä beyænque quëwëminipa, ante wængacäimpa. Ayæ, Botö në wænte ñäni ömæmongaïmo iñömote minitö botö beyæ ante quëwencæminimpa, ante cædinque tømengä tømämö beyæ wængacäimpa. ¹⁶ Mänömaï impa, ante pönëninque mönitö ñöwo iincayæ ate waodäni inänite adinque, Inguipogaque ëñate quëwënanipa, ante pönënamäi imönipa. Edæ mönö Codito incæ inguipoga ëñate quëwëngante mönitö mänömainö ante pönengaimöni incæte mönitö ñöwo wæætë mänömainö ante wii pönëmönipa. ¹⁷ Ìnque Codito nempo æcänö quëwënaa tømengä ingante Wængonguï miingä badongä ate miingä bate quëwengampa. Tømengä nänö inguipogaque nänö quëwënimämo edæ dæ gotimpa. Ñöwo wæætë edæ miimämoque ewocacampa.

¹⁸ Mäninö botö änö ante tømänö në pönö badongä iñömö edæ Wængonguï adocanque ingampa. Tømengä iñömö, Minitö ëñënamäi cæmini incæte Codito pönö cæcä beyænque botö piyænë cæcæboimpa, angampa. Ìnque botö piyænë cæbo adinque minitö botö gämænö pödäni, angampa. Ayæ mönitö imönite pönö angä ëñëninque mönitö wæætë edæ wadäni inänite, Wængonguï piyænë cædinque, Pödäni, angampa, ante në cæmöni batamönipa. ¹⁹ Ìnque iïmaï ante apænemönipa. Codito tönö godongämæ cædinque Wængonguï iñömö piyænë cædinque, Inguipoga quëwëmini tømämini botö gämænö pödäni, angampa. Pömini adinque botö, Æpogadö wënæ wënæ cæminitawo, ante tee mante adämaï inte pïinämaï incæboimpa, angampa.

Tømengä mänömaï angä ëñëninque mönitö wæætë mänine ante në waadete apænemöni badinque edæ, Wængonguï piyænë cæcä adinque pödäni, ante apænemönipa. ²⁰ Ìnque Wængonguï mönitö imönite äninque, Minitö wæætë botö beyæ wadäni inänite waadete apænemini ëñëninque poncædänimpa, angä ëñëninque mönitö wæætë Codito beyænque në waadete apænemöni bamönipa. Ìnque minitö iminite waadete pönö apænëdinque mönitö, Wængonguï gämænö pödäni, ante Codito beyænque ante apænemönipa. ²¹ Wængonguï, Minitö Codito nö nänö ewocadö ænte ewocacæminimpa, ante pönö cædinque Codito ingante angä ëñëninque tømengä iñömö edæ wënæ wënæ ewocadämaï inte wæætë edæ mönö beyæ ante në wënæ wënæ cæcä bai badinque mönö wentamö ewocadö incæ mongængacäimpa. Ìnque mönitö tømengä nempo quëwëninque nö pönö tømengä nänö ewocadö wæætë ænte ewocamompa.

6

¹ Tømengä tönö godongämæ në cæmöni inte mönitö minitö iminite iïmaï ante waadete apænemönipa. Wængonguï waadete pönö cæcä æmini inte minitö wii önonque oda cæcæte ante æncæminimpa, ante nanguï ämöni ëñëmaimänipa. ² Edæ Wængonguï do angacäimpa,

“Minitö iminite botö waadete pönö cæyedë mäninödë minitö apænemini ëñentabopa. Ayæ, Mini quëwënguïönæ impa, ante Codito nänö bæi ongonte æñedë botö mäninödë minitö beyæ pönö cægaboimpa.”

Ante yewæmongatimpa. Ìnque botö iïmaï ämo ëñëdäni. Wængonguï tømengä nänö waadete pönö cæyedë do ba apa quëwëminii. Codito edæ ængä beyænque mini quëwënguïönæ iñömö edæ do batimpa cæminii.

³ Mönö quëwenguinö ante adocanque incæ Wængongui beyæ möni apænedö ante pïinämaï incæcäimpa, ante wææ cædinque mönitö iñömö idiquibæ cædämaï imönipa.

⁴ Wæætë minitö, Pabodoidi Wængongui beyæ nê cædäni inänipa, ante acæminimpa, ante odömoncæte ante mönitö cöwë iïmaï cæmönipa. Cöwë nantate wæmöni incæ wënæ wënæ cædäni wæmöni incæ mö ongonte wææ cædäni wæmöni incæ æbämenque wæmöni incæte mönitö cöwë wæntæye badämaï inte ee cæmönipa. Ædö cæte quëwenguï, ante wæmöni incæ Wængongui beyæ nê cæmöni inte mönitö godömenque cæmöni aedäni. ⁵ Ayæ tæi tæi pänäni wæmöni incæ tee mönedäni wæmöni incæ Yæ yæ ante mönitö imönite wido cædäni incæte mönitö wæætë Wængongui ingante nê cæmöni inte edæ nanguï cæmönipa. Ayæ woyowotæ nanguï cædinque mönitö möwo mönämaï inte cæmöni incæ cænguï cænämaï inte gæwænte wædinque cæmöni incæ mönitö godömenque cæmöni aedäni.

⁶ Mänömaï cædinque mönitö wentamö mongænämaï inte cæmönipa. Ayæ wadäni æbämenque cædäni incæ mönitö nö ëñëmöni inte edæ piyænë cæte pïinte änämaï imönipa. Wæætë waadete cæmönipa. Edæ Wængongui Tæiyæ Waëmö Önöwoca nempo quëwëninque näwangä waadete pönëmönipa. ⁷ Wængongui nänö tæi pïñænö ëwocadinque mönitö Wængongui nö nänö angainö ante apænemönipa. Ayæ tontadoidi guëadö guëa wænoncæte ante tipæmäa næænäni bai cædinque mönitö nö pönï cæcæte ante Wængongui nänö tæi pïñænö ante eyepæ næænte bai cæmönipa.

⁸ Mönitö imönite waa adäni incæ wiwa adäni incæte mönitö Wængongui beyænque ante cæmönipa. Pabodoidi waa pönï cædänipa, ante nö apænedäni incæ wæætë, Pabodoidi wënæ wënæ cædänipa, ante tedewënäni incæ mönitö cöwë godömenque cæmönipa. Pabodoidi babæ cædänipa, ante pïnäni incæte mönitö nöingä pönente Wængongui beyænque ante cæmöni aedäni. ⁹ Edæ tömänäni mönitö imönite do edonque pönï adäni incæ adämaï inte bai cædinque, Önömïnique imïnipa, ante tededänipa. Wæncæ cæmöni incæte ee quëwëmönipa. Pänäni wæmöni incæte mönitö imönite wænönämaï inänipa. ¹⁰ Wæwëmöni incæte mönitö cöwë mimöno watapæ towocamönipa. Mönitö maincoo ömæpomöni incæ wadäni inänite godö cæmöni æninque tömënäni maincoo nanguï pönï ænte bai eyepæ pönï entawënanipa. Edæ nê ömæpomöni inte wæmöni incæte mönitö tömancoo pönï entawëmöni inte Wængongui ingante nê cæmöni imöni aedäni.

¹¹ Coodintoidi ëñeedäni. Minitö imönite mönitö edonque pönï apænetamönipa. Minitö imönite nanguï pönï waadete pönëmönipa. ¹² Mönitö dicæ pæ gompote minitö imönite waadedämaï imöniyaa. Wæætë edæ tömëmïni pæ gompodinque edæ mönitö imönite waadedämaï imöni inte wæwëmïnipa. ¹³ Ìnïnque botö wëñæmïni bai iñömïnite iïmaï ämopa. Minitö imönite waadete pönëmöni adinque minitö næëmæ waadete pönëedäni.

Wængongui nê Quëwengä nänö owocö bai imompa, ante

¹⁴ Guëa mangæ mangæ woquïna, ante wagada tönö bodo guëa goti wëmencadämaï iedäni, ante do yewæmongatimpa cæmïni. Pönënämaï inäni tönö godongämæ cædämaï iedäni. Iñæmpa nê nö cæcä tönö guëa äantawente bai nê ëñënämaï cæcä guiquënë dicæ adobai entawengä. Ayæ ñäö entawengä tönö guëa gocæte ante cædinque nê wëmö entawengä iñömö mimö ñäö entawengampa diyæ guëa goquingä. ¹⁵ Codito nänö pönënö ante edæ wënæ awënë Bediado iñömö edæ adodö ante pönengampa diyæ guëa cæquingä. Nê wede pönengä nänö pönënö ante nê pönënämaï ingä iñömö edæ adobai pönengampa diyæ adobai quëwënguingä. ¹⁶ Ayæ, Wængongui impa, ante waodäni nani badöninca æninque edæ näwä Wængongui tæiyæ waëmö oncönë ædö cæte mangui cö cæquïi. Mönö guiquënë Wængongui nê Quëwengä nänö tæiyæ waëmö owoquincö bai iñömönte tömengä Önöwoca mönonga pö guite owocampa. Ìnïnque tömënäni tönö mönö ædö cæte godongämæ cæquïi. Wængongui incæ, Mänömaï impa, ante ancæte ante iïmaï angacäimpa.

“Wadäni weca owodique botö tömënäni tönö godongämæ cægoncæboimpa.

Botö tömënäni Wængonguī iñömote
tömënäni wæætē botö quinäni incædänimpa,” angacäimpa.

¹⁷ Mänömainö ante apænedinque mönö Awënē adobaī ante,
“Wadäni inänite taayænte pöninque nänënë ponte quëwëedäni, angampa.
Wentamö i adinque gampodämaī iedäni.

Mänömaī cæmīni adinque botö mīnitö imīnite, Pöedäni, ante ee æncæboimpa.

¹⁸ Ænīnque, Mīnitö Wæmpobo iñömo inte botö,
onguīñämīni incæ onquiyämīni incæ, Botö wëmīni imīnīpa, ante æncæboimpa,
ante nē Tæi Pīñængä inte Awënē Wængonguī angampa.”
Ante Wængonguī beyæ yewæmongatimpa.

7

¹ İnīnque botö nē waademīni ëñëedäni. Mönö iñömö, Wængonguī, Cöwë cæcæboimpa, ante nänö angainö ante do ëñengamöimpa. İnīnque baonga wentamö mönö ëñädö tönö mīmö mönö wentamö entawënö adobaī ñä mënongate bai cædinque edæ mönö tæiyæ waemö ewocate quëwengäimpa. Ayæ, Wængonguī ingampa, ante guīñente wædinque mönö, Cöwë nö cæte waa quëwengäimpa, ante nanguī cæcæimpa.

Coodintoidi Codito gämænö pönänīpa

² Mönitö dicæ wacä ingante wënæ wënæ cæmöniyaa. Wacä wentamö nänö mongænguinque mönitö dicæ wënæ wënæ cæmöniyaa. Dicæ wapiticæ apænedinque wacä quī ö æmöniyaa. İnīnque, Pabodoidi mänömaī cædämaī inänīpa, ante adinque mīnitö wæætē mönitö imönite waadete pönëninque ëñëedäni, ämopa. ³ Mänömainö ante ämo incæte botö, Mīni pante wæquinque, ante dicæ apænte ämogaa. Edæ botö do antabopa. Mīnitö tönö möni quëwenguinque incæ mīnitö tönö möni wænguinque incæ mönitö mīnitö tönö äanque bai entawente mīnitö imīnite cöwë waadete pönëmönīpa, antabopa. ⁴ Edæ, Mīnitö nö pönente cæmīni imīnīpa, ante pönëmopa. Mönitö apænemöni ëñëninque mīnitö nē waa cæmīni bamīnitapa, ante adinque botö mönitö apænedö ante nanguī tobopa. Mīnitö mänömaī cæmīni imīnīpa, ante ëñente wædinque botö gancæ pönëmopa. İnīnque mönitö wënæ wënæ inte wæwëmöni incæte botö wæætē godömenque watapæ tobopa.

⁵ İmaī edæ Mäatedöniabæ pöninque cætämönīpa. Æmætæ æmætæ gote apænecæte ante cæyömönite wadäni bæ ta bæ ta cædäni wædinque mönitö ædö cæte guëmanquīmönī. Edæ nanguī pīinte cædäni wædinque mönitö baonga nantate wædinque önöwoca adobaī guīñente wæwocatämönīpa. ⁶ Incæte mönitö wæwëñömönite, Nē wæwënäni gancæ bacædänimpa, ante nē pönö cæcä inongä Wængonguī iñömö Tito ingante da pönongä pongä adinque mönitö wæætē gancæ pönentämönīpa. ⁷ Tömengä ponte a ongongä beyæ gancæ pönëñömönite tömengä, Coodintoidi botö imote waa cædäni adinque botö wæætē gancæ pönentabopa, ante apænecä ëñente mönitö godömenque totämönīpa. Ayæ botö imote ante apænedinque tömengä, Bitö imite ante nanguī aīnente wædinque coodintoidi Ca ca wædänīpa. Tömënäni iñömö, Mönö ñöwo Pabodo beyæ ante nanguī cæcæimpa, ante wædänīpa, ante Tito tedecä ëñëninque botö godömenque nanguī totabopa.

⁸ Botö doyedë cadota ante yewæmöninque da godömo æninque mīnitö wæwente bamīnitawo. Näwangä botö cadota beyæ wæwente bamīnitapa, ante wædinque botö, Quīnante mänömaī yewæmömoi, ante wætabopa. Incæte ayæ ate, Coodintoidi wantæ iñö wæwëninque ñöwo iñömö edæ wæwënämaī inänīpa, ante adinque botö ñöwo edæ, Nö cædinque yewæmömoimpa, ante piyænë cæbopa. ⁹ Edæ mīnitö wæwëmīni beyæ todämaī inimo inte botö wæætē, Mīni wënæ wënæ cædinö ñimpo cædinque mīnitö Codito gämænö mīni ponguinque wæwente bamīnitapa, ante adinque mänömaī beyænque totabopa. Edæ Wængonguī nänö änönö mīni ëñenguinque wæwente bamīni inīnque mönitö cædö beyæ dicæ wæmīniyaa.

¹⁰ Edæ Wængongui nänö änönö ante wæwëmö bai mönö ocæ emænte ponte quëwenguinque impa. Ìniquè, Quinante mänömaï wæwëmoï, ante wädämaï imompa. Wæætë inguipoga mönö quëwenguimämo ante wæwëmö bai mönö wænguinque impa. ¹¹ Edæ Wængongui nänö änönö ante do wæwënimini inte minitö ñowo, Mäninö möni wæwënö beyæ æbänö entawëmönii, ante nämä aedäni. Edæ mänömaï wæwëmini inte minitö, Mönö ee ongönämaï inte cæcæimpa, ante do cæminitapa. Cædinque, Mönö pönencabo wentamö mongænämaï ingæimpa, ante nanguï cædinque minitö nê wënæ wënæ cædingä ingante edæ do püiminitapa. Ayæ, Pabodo æbänö anguingää, ante guiñente wæmini incæte botö imote ante aïmente wæminitapa. Ayæ, Nê wënæ wënæ cædingä ingante mönö nö ante pangæimpa, ante do cæminitapa. Mänömaï eyepæ cædimini inte minitö wentamö mongænämaï iminipa, ante edonque abaimpa.

¹² Ìniquè minitö iminite yewæmöninque botö nê wënæ wënæ cædingä beyæ ante wii yewæmontabopa. Tömengä wënæ wënæ cæcä wædingä beyæ ante adobai yewæmönämaï intabopa. Wæætë minitö Wængongui ayongä nämä adinque, Mönitö Pabodoidi inänite waadete amönipa, ante, Nawangä impa, ante edonque acæminimpa, ante botö minitö beyænque ante yewæmontabopa. ¹³ Minitö mänömaï cæmini adinque mönitö wëenënedë nê wæwëmoni inte ñowo iñömö ganca pönëmönipa.

Minitö waa cæmini beyæ wëenënedë wæwëningä inte Tito adobai ganca pönente ñowo watapæ pönengampa, ante adinque mönitö do ganca pönëmöni inte ñowo godömenque nanguï tomöni imönipa. ¹⁴ Botö do inönedë Tito ingante apænedinque, Coodintoidi waa cædäni abopa, antabopa. Ñowo minitö waa cæmini adinque botö, Tito ingante botö apænedinö nö impa, ante adinque botö guingo imönämaï imopa. Edæ botö minitö iminite nöinö ante apænetawo. Edæ minitö iminite nöinö ante apænebo bai botö Tito ingante, Coodintoidi waa cædänipa, ante apænedinque adobai nöinö ante apænetabopa. ¹⁵ Ayæ Tito iñömö, Coodintoidi tömänäni botö imote waa adinque guiñente wædänitapa. Ayæ, Pöe, äninque tömënäni botö apænebo ëñëninque Ao ante ëñente cædänitapa, ante pönëninque tömengä minitö iminite godömenque waadete pönengampa. ¹⁶ Ayæ, Minitö cöwë waa cæmini iminipa, ante pönëninque edæ botö adobai watapæ tobopa.

8

Mönö godömenque nanguï godongæimpa, ante

¹ Ñowo botö töninädäni apænebo ëñëedäni. Mäatedöniabæ iñömö Codito ingante godongämæ nani pönencabo wayömö nani cabo wayömö nani cabo ongöñönänite Wængongui Önöwoca pönö apænecä ëñëninque tömënäni wæætë waadete cædinque iïmaï cædänipa. ² Nanguï wënæ wënæ nantate wæwënäni incæ tömënäni cöwë piyänë cæte watapæ todänipa. Ìniquè ömæpodäni incæte tömënäni nanguï mänäni bai cædinque, Wængongui quinäni qui, ante godömenque todinque nanguï gomonga godönänitapa. ³ Tömënäni edæ nani godonguënënö ganca do godöninque ayæ godömenque nanguï godönäni adimo inte botö, Nawangä impa, ante apænebopa. Ayæ edæ tömënäni nani nämä pönënö bai cædinque, ⁴ Wængongui quinäni beyæ impa, ante mönitö wädäni tönö godongämæ godoncæmönimpa, ante tömënäni mönitö imönite nanguï äninque ancaa änänitapa. ⁵ Mönitö guiquënë, Mäatedöniabæ quëwënäni tömënäni nani godonte äintaque godonguinäni inänipa, ante edæ pönentamönipa. Incæte tömënäni, Wængongui quimöni imönipa, ante edæ Wængongui ingante nämä godöninque ayæ, Minitö iminite nê cæmöni bacæmönimpa, äninque mönitö imönite edæ adobai nämä pönönänitapa. Ayæ mönitö pönënö ganca adobai godöninque tömënäni nani godonte äinta ayæ godömenque godönänitapa.

⁶ Mäatedöniabæ quëwënäni mänömaï cædäni adinque mönitö Tito ingante iïmaï antamönipa. Bitö doyedë ämi ëñëninque coodintoidi waadete pönëninque tæcæ godonca

cædānitapa cæbii. Nōwo wæætē āmi ēñēnīnque tōmēnāni nē waadete godōnāni bad-
inque eyepæ godoncædānimpa, ante mōnitō Tito ingante nanguī antamōnīpa. ⁷ Mīnitō
iñōmō wede pōnēmīni inte edæ nē waa pōnī apænēmīni īmīnīpa. Ayæ godōmenque
gomonga ēñēmīni inte mīnitō, Mōnō cōwē cæcæīmpa, ante nanguī cædōmīni īmīnīpa.
Ayæ mōnitō īmōnite nē waadete pōnēmīni īmīnīpa. Mānōmaī tōmānō ante do cædōmīni
inte mīnitō nōwo adobaī, Wængonguī quī, ante mōnō nē waadete godōmō bacæīmpa,
ante edæ nanguī cæedāni, āmopa.

⁸ Mānōmaīnō ānīnque botō, Cæedāni, ante wææ ānāmaī īmopa. Wæætē, Mīnitō
æbānō cæmīnīi, ante ēñencæte ante cædinque botō wadāni nāni nanguī cædinō ante
apænētabopa. Mānōmaīnō ante apænēdinque botō, Mīnitō adobaī tōmēnāni nāni cæbaī
nanguī waadete pōnente cæmīnitawo, ante acæte ante cædinque, Nē godōmīni baedāni,
antabopa. ⁹ Mīnitō do ēñēmīnīpa. Mōnō Awēnē Itota Codito oōnædē quēwēnīnque
nanguī gomonga ēnempogaingā inte mōnō īmonte waadete pōnēnīnque īīmaī ante pōnō
cægacāīmpa. Botō omæpobo babo beyænque mīnitō nanguī wæætē entawencæmīn-
īmpa, ante cædinque tōmengā edæ mīnitō beyænque ante inguīpoga pōnīnque edæ
omæpocā bagacāīmpa.

¹⁰ Ayæ, Mānīnō mīni godonguīnō ante æbānō cæquēnēmīni īmīnīi, ante botō nāmā
pōnēnīnque īīmaī āmopa. Wadepo īnōñedē wadāni godōnāmaī iñōnāni mīnitō iñōmō
edæ do tāno godōmīnitawo. Mōnō godongæīmpa, ante edæ mīnitō cōwē tāno cæinēmīni
īmīnitawo. ¹¹ Īnīnque, Mōnō godongæīmpa, ante quingæ ānīmīni inte nōwo edæ īinque
cæedāni. Mīni ēadincoo adīnque mīnitō, Eyepæ inte botō pancacooga godoncæboīmpa,
ante mīni ānīncoo edæ godōmīni adīnque, Eyepæ godōmīnīpa, ante acæīmpa. ¹² Edæ
æcānō godōinengā tōmengā nānō godonte æinta tōmanta adīnque, Æpotadō botō
godonguēnēmo īmoo, ante adīnque mānīmpotaque godōnīnque idæwaa. Godōmenque
nanguī mangampa diyæ nanguī godonguingāā.

¹³ Mānōmaī ānīnque botō, Wadāni pōnōmenque godōnīnque guēmāñōnāni mīnitō
wæætē mīni eyepote wæquinque godōmenque nanguī godoncæmīnīmpa, ante dicæ
āmogaa. ¹⁴ Wæætē, Cōwē eyepæ bacæīmpa, ante āmopa. Edæ māincoo nōwo eyepæ
mānīnque mīnitō nē ænguēnente wadāni īnānite godōmīni ænānīpa. Īnīnque īincayæ
ate mīnitō wæætē nē ænguēnēmīni bamīni ate tōmēnāni wæætē eyepæ mante ate mīnitō
īmīnite pōnōnāni æñōmīni adopo adopo edæ eyepæ babāīmpa. Mānōmaīnō ancæte
ante āmopa. ¹⁵ Edæ do yewæmongatīmpa. “Cænguī gomonga wææmpo æningā incæ
tōmengā nānō ænguēnenganca ænte baī mānīnque godōmenque mānāmaī ingantapa.
Wæætē edæ wædænque wææmpo æningā guiquēnē tōmengā nānō ænguēnenganca
eyepæ ænte baī eyepæ mangantapa.” Ante nāni yewæmongāinō baī īinque bacæīmpa,
ante mīnitō īmīnite āmopa.

Mīnitō weca Titoidi poncædānīmpa, ante

¹⁶ Botō cōwē, Coodintoidi beyæ cæcæīmpa, ante mīnitō īmīnite waadete pōnēmopa.
Ayæ, Wængonguī pōnō apænecā ēñēnīnque Tito iñōmō botō pōnēmo baī adobaī
pōnente cæcampa, ante adīnque botō wæætē Wængonguī ingante waa ate pōnēnīnque
apænēbopa. ¹⁷ Edæ mōnitō, Coodintoidi weca goe, āmōni ēñēnīnque edæ Tito do Ao
ante pongā aedāni. Incæte wīi mōnitō ānīnō beyænque pongampa. Wæætē nāmanque
pōinente wædinque tōmengā nanguī todīnque mīnitō weca pongampa.

¹⁸ Ayæ Tito tōnō wacā mōnō tōniñacā ingante da pōnōmōni pongampa. Īingā Tito
tōnō nē pongā iñōmō tōmengā Codito ingantedō ante watapæ mōni apænēdō ante nē
apænecā ingampa. Īnīnque Codito ingante godongāmæ nāni pōnencabo wayōmō nāni
cabo wayōmō nāni cabo tōmānāni tōmengā ingante waa ate waa apænēdānīpa. ¹⁹ Codito
ingante nāni pōnencabo incæ adocā ingante apænte ænīnque, Pabodoidi tōnō gocæbi-
īmpa, ante da godōnāni ate tōmengā mōnitō tōnō godongāmæ goquingā ingampa. Edæ
mōnitō, Mōnō Awēnē nāo apāite baī emongā ingampa, ante acædānīmpa, ante cædinque
ayæ, Mōnitō wadāni beyæ cæinēmōnīpa, ante acædānīmpa, ante cædinque mīnitō da

godonguincoo ænte goquīmōni īmōnīpa. Mānōmaī cæcæte ante goyōmōni, Tōmengā godongāmæ gote cæcæcāimpa, ante da godōnāni gocæcāimpa. ²⁰Edæ wadāni, Pabodoidi babæ cædānīpa, ante ānāmaī incædānīpa, ante wææ cædinque mōnitō nō pōnī cædinque nanguī pōnī mīnitō godonguincoo ænte godinque pædæ godoncæmōnīpa. ²¹Edæ, Mōnitō Wængonguī ayongā nō cæmōni inte waodāni ayōnāni adobaī edonque pōnī cædinque nō pōnī cæcæimpa, ante cæmōnīpa.

²²Ayæ wacā mōnō tōniñacā īñongante mōnitō æpogamē cōwā ayōmōni tōmengā cōwē tōmāā nō cæcā īnongampa. Ayæ ñōwo tōmengā, Coodintoidi nō cædānīpa, ante pōnengā inte godōmenque waa cædongā ingampa. Mānōmaī ingampa, ante adinque mōnitō ñōwo tōmengā ingante da godōmōni godinque tōmengā īñāna tōnō mīnitō weca poncæcāimpa. ²³Tito īñōmō botō tōnō godongāmæ cōwē cæcampa. Īnīnque mīnitō beyæ guēa nē cæmōna īmōnāpa. Codito ingante nāni godongāmæ pōnencabo incæ mōnitō tōniñada Tito tōnō wada īnate da godōnāni godinque tōmēnāni, Mōnō Codito ingante waa acædānīpa, ante nanguī cæda īnāpa. ²⁴Īnāni īnānite apænedinque mōnitō, Coodintoidi nē waa cædāni īnānīpa, ante do apænetamōnīpa. Īnīnque mīnitō eyepæ godōmīni adinque tōmēnāni, Nāwangā impa, ante edonque acædānīpa. Ayæ adobaī, Mīnitō waadete pōnō cæmīni adinque Pabodoidi wæætē mīnitō īmīnite waa adānīpa, ante acædānīpa, ante cædāni. Mānōmaī cæmīni adinque Codito ingante godongāmæ nāni pōnencabo wayōmō nāni cabo wayōmō nāni cabo tōmānāni adobaīnō ante edonque acædānīpa.

9

Mōnō wædāmaī eyepæ pōnī godongæimpa, ante

¹Ñōwo mānīnō, Wængonguī quīnāni beyæ mīnitō godoncæmīnīpa, ante botō idæwaa yewæmōmopa. ²Edæ, Mīnitō wædāmaī inte do cæmīnīpa, ante ēñēnīnque botō Māatedōniabæ quēwēnāni īnānite apænedinque, Acayabæ quēwēnāni īñōmō wadepo īnōñedē do godoncæte ante cædōnānīpa, ante do apænetabopa. Apænebo ēñēnīnque tōmēnāni wodo tōmānāni, Æ Acayabæ quēwēnāni nāni quingæ cæbaī mōnō adobaī cæcæimpa, ante cædānīpa.

³Incæte botō ñōwo mōnō tōniñadāni īnānite da godōmo pōnīnque tōmēnāni mīnitō īmīnite apænedāni ēñēnīnque mīnitō wæætē eyepæ godoncæmīnīpa. Mānōmaī cæmīni ate botō babæ apænedāmaī īmoī, ante edonque ēñengæimpa. ⁴Īñæmpa Māatedōniabæ quēwēnāni botō tōnō godongāmæ ponte ayōnāni mīnitō wīī eyepæ cæmīni adinque tōmēnāni wæætē, Mīnitō dicæ cæmīniyaa, ante badete tobaīnānīpa. Ayæ mōnitō guiquēnē, Coodintoidi īnīnque cæcædānīpa, ante nē ānīmōni inte odadete guingo imonte wæbaīmōnīpa. Mīnitō adobaī, Mōni cæquēnēnō cædāmaī īmōnīpa, ante guingo imonte wæbaīmīnīpa. ⁵Īnīnque mīnitō, Godoncæmōnīpa, ante mīni ānīnō baī eyepæ godoncæmīnīpa. Ante cædinque botō mōnō tōniñadāni īnānite ānīnque, Mīnitō gote apænemīni ēñēnīnque coodintoidi ædæmō pōnente cæcædānīpa, ante da pōnōmo pōnāni aedāni. Īnīnque mīnitō tōnō godongāmæ cædāni ate mīnitō ædæmō pōnēnīnque, Botō wææ gompodāmaī inte waa todinque godōmopa, ante godoncæmīnīpa.

⁶Īmaī ante pōnēdāni. Wædænque quiyadingā īñōmō amīñāimō wædænque pete æncæcāimpa. Nanguī quiyadingā guiquēnē amīñāimō nanguī pete æncæcāimpa. ⁷Wadāni quī, ante æcānō watapæ todinque godōnaa, ante adinque Wængonguī tōmengā ingante waadete pōnengampa. Īnīnque wadāni wææ ānāmaī īñōnāni mīnitō, Botō æpotadō godonguīmoo, ante pōnēnīnque tōmāmīni wædāmaī inte mīni ānīmpota adopota godōnīnque do godonguēnēmīni īmīnīpa. ⁸Ayæ, Eyepæ pōnī ēamīni inte mīnitō quīēmē cæmīni incæ tōmānāni beyæ ante cōwē godō waa cæcæmīnīpa, ante Wængonguī cæcampa. Īnīnque, Mīnitō eyepæ ænte ēadinque mānōmaī cæcæmīnīpa, ante tōmengā nanguī cædongā inte cōwē eyede tate baī waadete pōnō cæcā ingampa. ⁹Edæ docā ingante ante īmaī ante yewæmongatīpa.

“Yepanca quiyacā bai inongā inte tömengä, Ömæpodāni qui, ante wayömö wayömö godongantapa.

Īninqe tömengä nō nānō cædinō ĩñömō edæ cōwē ēwēnāmaī ongongæimpa.”

¹⁰ Ante yewæmongatimpa. Nē quiyacā ingante Wængonguī, Tömēmō quiyaquīmō, ante eyepæ pönöninge adobaī, Cænguī, ante tömāmō ĩmonte eyepæ pönongā ænte cæmompā. Mīnitō ĩñömō eyepæ ēamīni inte wacā ingā wacā ingā quiyate bai nēnempocæmīnimpā, ante cædinque Wængonguī mīni godonganca da pönöninge godömenque gomonga da pönongā æncæmīnimpā. Mänömaī eyepæ da pönongā æninqe mīnitō wæætē nō cædinque wadāni nanguī ināni inānite nēnempomīni æninqe tömēnāni wæætē amiñaimō tā pete bai watapæ quēwencædānimpā. ¹¹ Mīnitō pæ gompodāmaī inte wadāni inānite cōwē pædæ godoncæmīnimpā, ante cædinque mīnitō ĩmīnite Wængonguī nanguī pōnī pönongā æncæmīnimpā. Æninqe mīnitō pæ gompodāmaī inte pædæ godō pædæ godō cæmīni adinqe mönitō wæætē, Coodintoidi mänömaī cædānimpā, ante tedemōni ēñēninqe wadāni wæætē Wængonguī ingante waa ate pönēninqe apænecædānimpā.

¹² Wadāni qui, ante do godömīni æninqe Wængonguī quīnāni tömēnāni nāni ænguēnēnō ante eyepæ pōnī æncædānimpā. Ayæ mīni godōnō æninqe tömēnāni mīmōno eyede tate bai Wængonguī ingante waa ate pönēninqe nanguī apænecædānimpā.

¹³ Mönō Codito ingantedō ante watapæ ēñēninqe mīnitō Ao ante do pönēmīnitapa. Īninqe Wængonguī nānō änönō ante do ēñente cædinque mīnitō, Ömæpodāni qui, ante pædæ godömīni æninqe nē ænāni wæætē Wængonguī ingante, Bitō ñāō bai nō pōnī cæbi ate coodintoidi bitō änönō ante ēñente cædānimpā, ante watapæ apænecædānimpā. Ayæ nē ænīnāni inte adodāni godömenque apænedinqe, Nē ömæpodāni tömānāni inānite da godöninge coodintoidi ĩñömō mönitō ĩmönite adobaī eyepæ pönönāni æmönimpā, ante Wængonguī ingante godömenque waa ate apænecædānimpā. ¹⁴ Ayæ, Coodintoidi inānite Wængonguī godömenque nanguī waadete pönō cæcā beyænque tömēnāni waa cædāni inānimpā, ante pönēninqe nē ænīnāni ĩñömō edæ mīnitō ĩmīnite waadete pönēninqe mīnitō beyæ ante Wængonguī ingante apænecædānimpā.

¹⁵ Wængonguī ĩñömō godömenque waa cædinque mönō Codito ingante da pönongā ængamöimpa. Īninqe mönō, Wængonguī, bitō waa pōnī pönō cægabiimpa, ante mönitō ædō cæte eyepæ inte waa ate pönente apænequīmōnii, ante mönō Wængonguī ingante apænecæimpa.

10

Pabodo, Itota nānō nē da godönimo imopa, angampa

¹ Mīnitō, Wayömonque quēwēninqe Pabodo nanguī pīinte angampa, ante pönēmīnitawo. Wæætē mönitō weca pöninqe awincadō awinca adinqe tömengä guñēnete wædinque pæ wēēnecampa, ante pönēmīnitawo. Īñampa mīni änōmo mānīmōtō inte ĩmaī ämopa. Codito ĩñömō edæ gānē pönengā inongā inte pönō piyænē cæcantawo. Botō adobaī ñōwo piyænē cædinque mīnitō ĩmīnite pönō waadete apænebopa. ² Pabodoidi ĩñömō inguipogaque ante pönente cædānimpā, ante pancadāniya odadete ānewēnānimpā. Tömēnāni inānite botō guñēnedāmaī inte nanguī ancæboimpa. Mīnitō quiquēnē adobaī odadete ämīni ininqe botō mīnitō weca pöninqe pīinte anguēnēmo ĩmaimopa. Īninqe, Wīi pīinte anguimo bacæboimpa, ante wææ cæcæte ante botō ñōwo mīnitō ĩmīnite, Ee aquēnē quēwēmīnii, ante waadete pönente yewæmōmopa.

³ Edæ inguipoga quēwēmōni incæte mönitō Wængonguī beyæ ante wæætedō wæætē cæcæte ante cædinque inguipogaque quēwēnāni nāni wæætedō wæætē cæi bai cædāmaī ĩmönimpā. ⁴ Wæætē edæ mönitō Wængonguī beyæ ante wæætedō wæætē cæcæte ante cædinque inguipogaque quēwēnāni nāni wænoncaquincoo næænāmaī inte cæmönimpā. Wæætē Wængonguī tömengä nānō tæi pīñæmämo ænte mīmōno entawēninqe eyepæ næænte bai badinqe mönitō tömēnāni nāni tæi mænöincō bæ tate bai cædinque

wæatedö wæätë nāni godö ānewēnō ante wido cæte bai cæmōnipa. ⁵ Wængonguī ingante pōnēnāmaī ingæimpa, ante nē pōnēwēnāni inte ængæ gantidique tōmēnāni iñōmō, Wadāni tōmānāni adobāi Wængonguī ingante pōnēnāmaī incædānimpa, ante cædinque babæ wapiticæ cædānipa. Māniī babæ wapiticæ nāni cædōnō ante mōnitō wæätë bæ tate wido cæmōnipa. Edæ, Codito ingante mōnō ēñengæimpa, ante nō apānemōni ēñēnīnque wadāni idiquibæ pōnēwēnāni iñōnāni mōnitō wæätë māniñō nāni pōnēwēnō tōmānō ö ænte bai wido cæmōnipa. ⁶ Ayæ mīnitō ædæmō nē ēñente cæmīni bamīni ate adocanque incæ ēñēnāmaī cæcā adinque mōnitō wæätë tōmengā ingante do panguiñmōni imōnipa.

⁷ Æbānō ī, ante edonque ongō abāimīnipa. Pancamīniya, Botō nāwangā Codito nempo quēwēmo imopa, ante pōnēmīnitawo. Mīnitō mānōmaī pōnēmīni inte godōmenque iīmaī ante pōnenguēnēmīni imīnipa. Botō Codito nempo quēwēmo imo bai Pabodoidi adobāi Codito nempo quēwēnāni inānipa, ante nāwangā impa, ante pōnenguēnēmīni imīnipa. ⁸ Iñæmpa Wængonguī mōnitō imōnite ānīnque, Mīnitō nē āmīni badinque coodintoidi inānite bæ tate wido cædāmaī incæmīnimpa. Wæätë ædæmō āmīni ēñēnīnque coodintoidi wæätë oncō tæi mānonte bai gongæncædānimpa, ante cæedāni, ante Wængonguī pōnō angā ēñēnīnque mōnitō nē āmōni batamōnipa. Inīnque botō, Nē āmo inte nāmā tocæboimpa, ante tedebo incæte guiñēnedāmaī tedecæboimpa.

⁹ Botō, Cadota ante botō yewæmōinta adinque mīnitō guiñente wæcæmīnimpa, ante dicæ āmogaa. ¹⁰ Pancamīniya, Pabodo tæi piñængōngā bai inte cadota ante yewæmōnīnque nanguī angā awædō, ante wæmīnipa. Wæätë edæ adocā incæ mōnitō weca ponte ongōnīnque edæ aquiī ingā amōnipa. Tōmengā nānō tedepāmo önōmāmoque bai impa, ante pōnēmīni awædō. ¹¹ Iñæmpa, Tæi piñæmōni inte cadota ante nē yewæmōmōni incæ mōnitō adomōni inte mīnitō weca ponte ongōnīnque adobāi tæi piñænte cæcæmōnimpa, āmo ēñēmaimīnipa.

¹² Pancadāniya nāmā incæ, Waēmō pōni imopa, ante tededāni incæte tōmēnāni nāmā nāni tede bai mōnitō ædō cæte adobāinō ante tedequimōnii. Tōmēnāni iñōmō, Ægancadō waa cæbo eyepæ inguiī, ante nāmā nāni cægancaque ante adinque edæ, Eyepæ cætābopa, ante pōnēwēnānipa. Tōmēnāni nāni cædō ante, Waa cætawo, ante tee mancæte ante, Do botō cædinō bai adobāi cæbopa, ante adinque, Eyepæ impa, ante pōnēwēnānipa. Mānōmaī nāmā nāni pōnēwēnonque ante cædinque tōmēnāni ēñēnāmaī inte oda cæte cædānipa.

¹³ Mōnitō quiquēnē, Iingancaque goedāni, ante Wængonguī nānō angancaque cōwē gomōnipa. Inīnque tōmengā, Coodintoidi ganca godinque apæneedāni, angā ēñēnīnque mōnitō do gote apænedinque, Māningancaque waa cæmōnipa, ante nāmā waa ate tedemōnipa. Godōmenque ante tededāmaī imōnipa. ¹⁴ Mīnitō ganca pōnāmaī inte bai mōnitō, Coodintoidi weca gote do cætāmōnipa, ante tedemōni bai babæ wapiticæ incædōnimpa. Incæte mīnitō ganca do pōnīnque Codito ingantedō ante mōnitō watapæ mōni ēñēnō ante apænetāmōnipa. Inīnque edæ, Māninganca cætāmōnipa, ante mānīnque ante tedemōnipa. ¹⁵ Ayæ wadāni nāni cædinō ante adinque mōnitō, Tōmēmōni cædinō impa, ante ānāmaī imōnipa. Wæätë mīnitō godōmenque godōmenque wede pōnēñōmīni mōnitō wæätë adodō mīnitō weca ponte quēwēnīnque godōmenque gomonga cæyōmōni mōnō watapæ bacæimpa, ante pōnēmōnipa. ¹⁶ Ayæ mīnitō weca iīnque cædinque mōnitō godōmenque gomonga godinque mōnō Codito ingantedō ante watapæ mōni ēñēnō ante apænecæmōnimpa, ante pōnēmōnipa. Mānōmaī cædinque mōnitō wacā nānō cædiñōmō ante, Mōnitō māniñōmō cætāmōnipa, ante tededāmaī incæmōnimpa.

¹⁷ Æcānō, Botō waēmō pōni inōmo inte waa cæbopa, ante toinēna tōmengā wæätë, Mōnō Awēnē waēmō pōni inongā inte pōnō waa cæcampa, ante toquēnengā ingampa. ¹⁸ Edæ, Waēmō inōmo imopa, ante nāmā ānongā ingante Wængonguī waa adāmaī ingampa. Wæätë, Iingā waēmō inongā ingampa, ante mōnō Awēnē nānō ānongā ingante ante Wængonguī wæätë waa acampa.

11

Wængongui beyæ, ante pancadāniya babæ apænedāniya

¹ Nōwo botō adodeque ōnonque tedete bai yewæmōmo adinque mīnitō ee amīni īinque botō waa tobaiṃopa. Wadō āmo, Mīnitō ee ayōmīni edæ botō ōnonque tedete bai do yewæmōmopa. Īinque īīmaī ante odōmoncæte ante yewæmōmoī aedāni. ² Wængongui wææ gompoçā bai botō adobaī mīnitō beyæ ante wææ gompote āmopa. Mīnitō baqueçā mōnāmaingā bai īñōmīnite Codito ængā beyænque mīni pōnencabo tōmengā nempo nō cæte quēwencæmīnimpa, ante pædæ godoncæte ante cædinque botō tōmengā adocanque ingante, Bitō quīnāni īnānite æe, antabopa. ³ Mīnitō nōingā cædinque wacā mīñæ godāmaī inte Codito ingante waadete pōnēmīni incæte botō, Mīnitō oda cæmīni wæcæ wæ, ante guīñente wæbopa. Eba wodi ingante Tæntæbo nanguī ēñengā inte babæ cædinque apænecā ēñēninque tōmengā nānō oda cægaī bai mīnitō wīī adobaī oda cæcæmīnimpa, ante botō wææ ante apænebopa.

⁴ Mōnitō, Itota ingante pōnengæimpa, ante do apænemōni ēñēmīnitapa. Incæte wacā mīnitō weca pōninque nāwā Itota ingante apænedāmaī inte, Wacā Itota ingante pōnēedāni, ante babæ apæneyongante mīnitō edæ ēñēē cōmīni awædō. Adobaī Wængongui Ōnōwoca do ængaīmīni īñōmīnite wacā ōnōwoca pō guīyongante mīnitō ee æmīni guicā awædō. Ayæ wadāni mōnō Codito ingante ante apænedāmaī īnāni inte, Wacā ængā beyæ quēwengæimpa, ante babæ apæneyōnāni mīnitō edæ ēñēē cōmīni awædō. ⁵ Mānōmaīnō ante nē tededāni īñōmō nāmā ante pōnēninque, Nē gode āmōni inte mōnitō ñænæmōni pōni īmōnīpa, ante edæ babæ ānewēnāniya. Tōmēnāni nāwangā ñænænāni īnāni bai botō dicæ wædāmo inguēnēmogaa, ante pōnēmopa. ⁶ Botō æbānō tedeboo, ante ēñēninque mīnitō īñōmō, Ōnōnepāmoque tedecampa, ante pīimīnitawo. Incæte botō ædæmō adīmo inte nē ēñēnīmo inte apænebopa. Pabodo mānōmaī īnongā inte apænecampa, ante acæmīnimpa, ante mōnitō cōwē mīnitō īmīnite edonque odōmōmōni amīnitapa.

⁷ Mīnitō īmīnite ængō cæte bai cæcæte ante botō Wængongui ingantedō ante watapæ apænebo beyæ ænāmaī intabopa. Mānōmaī ænāmaī inte botō nāmā edæ pīinte bai cædinque dicæ wīwa cætabogaa. ⁸ Codito ingante godongāmæ nāni pōnencabo wayōmō nāni cabo wayōmō nāni cabo da pōnōnāni ō æninque botō mānīntaque godonte ænte quēwēninque mīnitō beyæ cætabopa. ⁹ Ayæ mīnitō weca ongōninque botō quīēmē æīnente wæbo incæ edæ waa atabopa. Wadāni edæ mōnō tōniñadāni incæ Māatedōniabæ quēwente pōninque tōmēnāni botō ænguēnēnō ante eyepæ pōnōnāni æntabopa. Īinque coodintoidi botō ānō beyæ wædāmaī incædānimpa, ante wææ cædinque botō īñōmō edæ, Pōnōmīni æmoedāni, ante cōwē ānāmaī intabopa. Ayæ īincayæ ate cōwē ānāmaī incæboimpa. ¹⁰ Mōnō Codito nō nānō apænedō ante ēñēnte entawēmo inte āmopa. Botō, Mānōmaī cædinque waa cæbopa, ante cōwē edæ tedeyōmote mīnitō Acayabæ quēwēmīni inte edæ wææ cædāmaī incæmīnimpa. ¹¹ Quīnante mānōmaī ante tedeboī. Mīnitō īmīnite waadedāmaī inte mānōmaī ante tedeboī. Īñæmpa botō æbānō mīnitō īmīnite waadete pōnēmoo, ante do againgā inte Wængongui tōmengā ancæcāimpa.

¹² Wadāni guīquēnē, Mōnitō Codito nānō nē godongaīmōni īmōnīpa, ante nē ānāni guīquēnē, Æbānō cæte odōmōmōni adinque wadāni Pabodoidi īnānite waa adō bai mōnitō īmōnite adobaī waa acædānimpa, ante wædāniya. Īinque botō īñōmō, Īīnāni mānōmaīnō ante odōmōnāmaī incædānimpa, ante mānōmaī tedete wææ cæbo inte edæ cōwē godōmenque wææ cæcæboimpa. ¹³ Tōmēnāni īñōmō edæ, Wadāni oda cæcædānimpa, ante awēmō cædāni īnāniya. Mōnō Codito tōmēnāni īnānite da godōnāmaī ingā incæte tōmēnāni īñōmō edæ, Codito nānō da godongaīmōni īmōnīpa, ante babæ apænedāniya. Ayæ edæ mōnitō Codito nānō da godongaīmōni mōni ēmōnō bai ōnōmoque ēmōninque babæ cædāniya. ¹⁴ Mīnitō, Tōmēnāni quīnante wacā bai ēmōnāni, ante wæmīnitawo. Īñæmpa tōmēnāni awēnē Tatāna incæ babæ cædinque Wængongui anquedoidi ñāō nāni ēmōnō bai ñāō ēmonte bai ēmongampa. ¹⁵ Īinque

Tatāna beyæ nē cædāni iñōmō tōmēnāni awēnē Tatāna nānō babæ cædō bai adobaï babæ cædinque, Nē nō Cædongā ingante nē cæmōni imōnipa, ante ōnōmoque ēmōnānipa. Iñinque tōmēnāni nē ōnōmoque ēmōnāni inte ōnonque ēwente baquīnānidō angūēnē.

Æbānō caate wæboo, ante Pabodo yewæmongampa

¹⁶ Botō ñōwo adodō ante yewæmōmopa. Mīnitō, Pabodo ocai ōmædæcacā iñongā inte ōnonque tedecampa, āmīnitawo. Mānōmāinō ante ānāmaï imæwedāni. Incæte wacā ocai ōmædæcacā tedeyongante mīnitō ee amīni tedecā bai botō adobaï ocai ōmædæcabo inte bai, Nāmā waa cæbo imopa, ante adodeque tedebo iñinque ee amīni tedeboedāni. ¹⁷ Botō ñōwo mānōmaï nāmā waa ate bai tedete yewæmōinque mōnō Awēnē nānō āmaï wīi yewæmōmopa. Wæætē ocai ōmædæcacā mā nānō pōnente tede bai adobaï ōnonque tedete bai yewæmōmopa. ¹⁸ Pancadāniya nanguï iñāni incæ, Mōnitō nāmā waa cæmōnipa, ante edæ inguipogaque quēwēnāni tededāni bai adobaï tededānipa. Tōmēnāni mānōmaï tededāni iñinque botō adobaï, Nāmā waa cæbopa, ante tedecæboimpa. ¹⁹ Nē ēñēmōni imōnipa, ante nē amīni inte mīnitō iñōmō ocai ōmædæcadāni ōnonque tedeyōnānite ee ēñēē cōmīnipa tōō. ²⁰ Wacā edæ mīnitō imīnite bæi ongongā wædinque mīnitō tōmengā ingante ee nē cæmīni bawēmīni awædō. Wacā babæ wapiticæ cædinque mīnitō quī inguēnē incæ ō ængā incæte mīnitō edæ ee amīnipa. Wacā mīnitō awēnē bai nāmā ængō cæte angā incæ ee ēñēmīnipa. Wacā mīnitō imīnite pōnō tamongā incæte mīnitō ee ate wæmīni awædō. ²¹ Botō wæætē aquīimo inte, Tōmēnāni nāni nanguï cædō bai ædō cæte cæquīmoo, ante botō guingo imonguinque ōnonque tedeboipa tōō.

Tōmēnāni nāmanque waa adinque edæ guīñēnāmaï inte tededānitawo. Botō adobaï nāmanque waa adinque edæ guīñēnāmaï inte tedecæboimpa. Incæte mānōmaï tededinque botō ōnonque badete tote bai tedeboipa. ²² Tōmēnāni guiquēnē ebedeoidi iñānitawo, ante pōnēmīni. Botō iñōmō edæ tōmēnāni nāni imāï adobo imopa. Tōmēnāni idægoidi iñānitawo. Edæ botō tōmēnāni nāni imāï adobo imopa. Tōmēnāni Abadāo wodi pæināni iñānitawo. Edæ botō tōmēnāni nāni iñō bai adobo Abadāo wodi pæimo imopa. ²³ Mōnō Codito beyæ nē cædōnāni iñānipa, ante pōnēmīni. Botō edæ tōmēnāni nāni imāï inte edæ gomonga imopa. Incæte mānōmāinō ante tededinque botō ocai ōmædæcacā bai inte ōnonque tedeboipa. Tōmēnāni iñānite adopoque adopoque wædænque cæyōnāni botō godōmenque nanguï cægaboimpa. Tōmēnāni iñānite wædænque tee mōnedāni wæyōnāni botō imote godōmenque wæætē wæætē tee mōnedāni wægaboimpa. Tōmēnāni iñānite wædænque tæi pānāni wæyōnāni botō imote godōmenque nanguï tæi pānāni wægaboimpa. Ayæ botō wæætē wæætē wodo wængaboimpa.

²⁴ Oodeoidi æmontaimenca wodo coadenta ganca adoyedē nāni cōwē tæi pāimpoga botō imote adoyedē mānimpoga tæi tæi pāninque ōnonpo æmæmpogoncaque wæætē adopoga adopoga tæi tæi pānāni wægaboimpa. ²⁵ Ayæ cantaca mempoga go adopoque botō imote tæi tæi pānāni wægaboimpa. Ayæ adopoque botō imote dicaca tacadāni wangæ wængaboimpa. Ayæ wipodē wogaa godinque mempoga go adopoque wipo tente tobæmpo wægaboimpa. Edæ wīi eyepæ gote botō tōmāā itædē tōmāā woyowotæ tæcæpæno pōni wæwogaboimpa. ²⁶ Wayōmō wayōmō botō ancaa godinque wætabopa. Ōnō æpæmpo wodo bete wæntabopa. Nē ō ænāni incæ botō guidēnāni incæ wadāni incæ wodo wænōnāni wæmo adinque botō wænguinque ante wægaboimpa. Ayæ tōmēnāni nāni quēwēñōmō quēwēinque, Ōnōmæca quēwēinque, gāwapæno owodique botō wænguinque ante wægaboimpa. Ayæ wadāni incæ, Mōnō pōnencabo imopa, ante babæ ānāni adinque botō iñōmō edæ, Babæ cædāni wæncæ wæ, ante wægaboï aedāni. ²⁷ Botō pancaōnaa tōmāā woyowotæ mīimo inte nanguï cædinque wægaboimpa. Tepæ pancaōnaa gæwænte wægaboimpa. Pancaōnaa cænguï dæ ä ate gue ænente wægaboimpa. Edæ æpogamē pōni cænāmaï inte wægaboimpa. Pancayedēna botō weocoo ōmaabo inte yoguite wægaboimpa.

²⁸ Mänömaï wædömo inte botö, Codito ingante godongämæ nāni pönencabo töman-cabodāniya nāni wædö ante æbänö cæquimoo, ante wædinque iimö iñö iimö iñö nanguï cæbopa. ²⁹ Edæ wacä aquiingä inte wacä ininque botö adobai aquiimo inte bai wæbopa. Ayæ, Wënæ wënæ cæe, änāni ëñëninque adocanque oda cæcä ëñente wædinque botö ædö cæte wæwënāmaï inguimoo.

³⁰ Ininque, Nämä täëmö inte cæbopa, ante tededāmaï incæboimpa. Wæætë, Æbänö aquiimo inte cæbopa, ante acædānimpā, ante botö māniinonque ante tedecæboimpa. ³¹ Wængongui iñömö mönö Awënë Itota Wæmpocä inongä inte edæ tömengä adocä iñömö Itota Wængongui ingampa. Tömengä wæmö pōni inongä inte cōwë waa pōni cæcampa, ante mönö tömengä ingante cōwë apænecæimpa. Tömengä iñömö edæ, Pabodo nö angampa, ante do ëñengampa. ³² Ayæ iimaï cædāni wægaboimpa. Adeto Tidiabæ awënë nānō inōñedë māniñedë botö imote bæi ongoncæte ante cædinque tömengä nānō ëmiñængä wædænque awënë iñömö iimaï cæcantapa. Tömengä wadāni inānite angä ëñëninque tömënāni wæætë Daāmaco iñömö tömënāni nāni wīni wææ cæincō boyæ yabædemö gäänë wānō cōñōnāni, ³³ botö tōnō cædāni guiquënë Daāmaco nāni wīni wææ cæincō boyæ cæimpiticæ inō otodë ñā cædete botö imote pædæ wæænōnāni ti wææ aamö cæte wodii wīnongaboimpa.

12

Pabodo, iimaï wīimonte bai atabopa, angampa

¹ Önonque tedebo incæte botö, Waa cætabopa, ante cōwë tedequënëmo imopa. Ininque botö ñōwo edæ, Wīimonte bai ayōmo mönō awënë mā pōni odōmongä atabopa, ante yewæmoncæboimpa. Ayæ tömengä, Æbänö i, ante edonque pōni nānō odōmōnōnō ante godōmenque yewæmoncæ cæbopa. ² Codito nempo nē quëwëmo iñömote Wængongui do catodote wadepo iñonte botö imote öönædë wænömënæcaönæ mæicä æigaboimpa. Incæte wacä æicä ate bai nāmā incæ agaboimpa. Wabänö önōwoaque inte æigaboï. Iñtai ëñate wabänö inque inte æigaboï, ante botö adāmaï imopa. Wængonguinque nē ænte mæigaingä inte tömengānque ëñengampa. ³ Edæ baö ëñate æibo incæ baö ömaabo inte æibo incæ Wængonguinque ëñëñongä botö, iimaï ingatimpa, ante māninque ëñëmopa. ⁴ Wæmōnædë tömengä ömæ iñömö Wængongui ænte mæicä æigaboimpa. Māniñömö waa pōni apænedāni ëñëmo incæte tömengä, iñömö möni apænedö ante mīni waocabo apænedāmaï incæminimpa, ante wææ angä ëñëninque botö waobo inte ædö cæte apænequimoo.

⁵ Ininque wacä mänömaï öönædë æite ëñængä ininque botö, Tömengä waa pōni cæcampa, ante do apænebaïmopa. Wæætë nāmā botö waa cædōnō ante apænedāmaï incæboimpa. Incæte, Tömëmo aquiimo inte önonque cætabopa, ante māniinonque ante botö nāmā waa ate bai apænecæboimpa. ⁶ Waa cægaboimpa, ante tedebo ininque botö wīi ocai ömæcabo inte edæ tedebaïmopa. Iñæmpa nāwangä waa cægaiimo inömo inte botö nö ante edæ tedebaïmopa. Incæte botö wædænque apænete pönömenque cæyömote æcāmenque incæ, Pabodo godōmenque waa pōni cæcampa, ante änāmaï incæcäimpa, ante wææ cædinque botö waa cægāinō ante tededāmaï inte edæ pæ wëënebopa.

⁷ Wængongui mā nānō odōmongāinō æbänö waa pōni ingateï, ante wadāni adāmaï iñōnāni botö adoboque atabopa. Ininque, Pabodo, Botö adoboque nē agaiimo imopa, ante nāmā waa adāmaï incæcäimpa, ante wææ cædinque Wængongui angä ate Tatāna botö imote pōnō da boo codongate ocæ ocæ coingä bai cæcä wætabopa. ⁸ Mänömaï cæcä wædinque botö mempoga go adopoque Wængongui Awënë ingante apænedinque, Botö daa cogate bai wæyömote o tongaate bai cæbi quëwëmoe, ante nanguï ante wætabopa. ⁹ Ca wæyömote mönō Awënë wæætë, “Në aquiï pōni ināni iñōnānite botö täi piñæmāmo eyepæ pōni pönömo æninque tömënānique wæætë täi piñænte entawencædānimpā. Ininque bitö nē aquiïmi imi beyænque botö waadete pönō cædö iñömö edæ eyepæ pōni impa.”

Īninqe mōnō Codito nānō tǣi pīñænte cǣpāmo ænte entawencæte ante cǣdinque botō ĩñōmō edæ, Nāmā aquīimo inte botō wædinō beyæ ante botō nāmā waa ate tobopa, ante tēdedinque godōmenque tocæboimpa. ¹⁰ Æyedēnō aquīimo ĩmoī māniñedē edæ tǣi ēwocaboimpa. Mānōmaī beyæ aquīimo inte botō Codito beyænque nanguī tobopa. Badete tote pīinte cǣdāni wæbo incæte botō piyǣnē cǣdinque tobopa. Ancaa nanguī caate wædinque nangǣ babo incæ, togænte pānāni wæbo incæ, Ædō cæte quēwenguimoo, ante wæbo incæ māninō tōmāā beyæ wædōmo inte botō Codito beyænque ante piyǣnē cæte nanguī tobopa.

Coodintoidi æbāmē cǣdānii, ante wæbopa, Pabodo angā

¹¹ Ocai ōmædæcacā ingā baī Pabodo ōnonque tedete yewæmongampa, ante pōnēmīnitawo. Īñæmpa tōmēmīni botō beyæ wææ apǣnedāmaī ĩmīni beyænque botō tōmēmō nāmā wææ cæcæte ante cǣdinque mānōmaī tedete yewæmōmopa. Wadāni nē gode ānāni guiquēnē nāmā nāni waa acabo ĩnānīpa. Incæte tōmēnāni nāwangā ñænænāni ĩnāni ĩninqe botō ĩñōmō dicæ wædāmo ĩmogaa. Īninqe mīnitō tōmēmīni, Pabodo waa cæcā ingampa, ante tēdequēnēmīni ĩmīnīpa tōō.

¹² Wacā mīnitō weca pōninqe æbānō cæcā ate mīnitō, Īngā ĩñōmō mōnō Codito nānō nē da godongaingā ingampa, ante ēñēmīnīi. Īmaī impa. Tōmengā, Ēñencāmīnīmpa, ante mā pōnī cæcā ate do ēñēmīnīpa. Tōmengā bamōnengǣ nanguī odōmongā ate ēñēmīnīpa. Wadāni cǣdāmaī ĩñōnāni tōmengā tǣi pīñænte cæcā ate wædinque mīnitō wæætē edæ, Codito nānō nē da godongaingā ingampa, ante do ēñēmīnīpa. Īninqe botō mīnitō weca quēwēninqe edæ Codito nānō nē da godongaingā mā cæte nāni odōmōnī baī adobaī odōmōninqe edæ wæntædāmaī inte ee cæbo abaīmīnīpa. ¹³ Īninqe wadāni Codito ingante nāni godongāmæ pōnencabo ĩnānite waa cǣdinque botō mīnitō ĩmīnite dicæ pōnōmenque cætabogaa. Wabānō mīnitō ĩmīnite, Pōnōmīni æmoedāni, ante ānāmaī inte botō mīnitō ĩmīnite wīwa cæbopǣæ.

¹⁴ Botō do mīnitō weca mempoga pōnīmo inte ñōwo wæætē poncæ cæbopa. Pōninqe botō mīnitō māincoo ante ānāmaī incæboimpa. Wæætē, Mīnitō botō wēmīni bacāmīnīmpa, ante cæbopa. Wēñænāni tōmēnāni mæmpoidi beyæ ante dicæ godonguēnēnāni ĩnāniyaa. Wæætē edæ mæmpoidi ĩñōmō wēñænāni beyæ ante nē godonguēnēnāni ĩnānīpa. ¹⁵ Īninqe, Mīnitō quēwencāmīnīmpa, ante botō māincoo tōmancoo godōninqe waa tocæboimpa. Ayæ, Mīnitō quēwencāmīnīmpa, ante cæte wæmo ĩninqe waa tobāimōpa. Botō mānōmaī mīnitō ĩmīnite gomonga waadete pōnēmō ĩninqe mīnitō wæætē botō ĩmote pōnōmenque waadete pōnēmīni ĩmīnitawo.

¹⁶ Incæte edæ idæwaa āmopa. Mīnitō māincoo ante botō ānāmaī intabopa. Incæte mīnitō, Pabodo nē wēnæ wēnæ pōnengā inte awēmō æncæte ante babæ cæcampa, ante pōnēwēmīni awædō. ¹⁷ Wadāni ĩnānite mīnitō weca da godōninqe botō awēmō æntawo, ante pōnēmīnitawo. ¹⁸ Tito ingante, Coodintoidi weca ate pōe, nanguī āninqe botō wacā mōnō tōniñacā tōnō tōmengā tōnō da godōmo guēa godatapa. Īninqe Tito mīnitō weca pōninqe dicæ wīwa cǣdinque māincoo ō ængantawogaa. Īñæmpa tōmengā tōnō botō guēa āawocaque baī ēwocamōna inte mōnatō guēa cægōmōna adinqe mīnitō adāmaī inte baī tedewēmīni awædō.

¹⁹ Mīnitō, Pabodoidi nāmā wææ cæcæte ante apǣnedānīpa, ante pōnēmīni awædō. Īñæmpa mōnō Codito nempo quēwēnōmo inte mōnitō Wængonguī ayongante apǣnetamōnīpa. Edæ, Botō nē waademīni ĩmīni inte mīnitō tǣi pīñænte bacāmīnīmpa, ante cǣdinque mōnitō mānōmānō ante apǣnetamōnīpa. ²⁰ Botō ĩñōmō edæ mīnitō waa cāmīni acæte ante ponte ayōmo mīnitō wadō cāmīni baī botō nanguī wæcædōmoimpa, ante guīñente wæbopa. Ayæ mīnitō wæætē, Pabodo waa cæcæte ante pongampa, ante pōnēñōmīni botō wadō cæbo baī mīnitō nanguī wæcædōmīnīmpa, ante pōnente wædinque botō, Mōnō mānōmaī wædāmaī ingēimpa, ante wææ cæcæte ante cæbopa. Edæ mīnitō wæætēdō wæætē pīinte amīnitawo. Wacā ingante waa cǣdāni wædinque mīnitō godō pīinte amīnitawo. Īñontobæ ænguī bamīnitawo. Nāmanque pōnente

cæmīnitawo. Wacā ingante pūinque godō babæ ante tedewēmīnitawo. Godō wæntaa wæntaa ämīnitawo. Nämä waa adinque cæmīnitawo. Wīi ēñente cædinque mīnitō Yæ yæ tedemīnitawo. Māninō tōmānō wabānō cæmīnii, ante guīñente wædinque botō mānōmāinō ante edæ yewæmontabopa.

²¹ Īinque botō ponte ayōmo pancamīniya wēēnēñedē mīni cægaī baī ñōwo adobaī cæmīni adinque botō guingo imonte wæconguēnēmo ante awædō. Edæ pancamīniya wēēnēñedē wentamō mīni mongænō ee mongæmīni adinque botō Ca ca wæbaimopa. Wēēnēñedē mīni godō towengainō ayæ towēmīni intawo. Wēēnēñedē ēñēnāmaī inte mīni wīwa cædinō ayæ cæmīni intawo. Edæ wentamō mongæmīni inte guingo imōnāmaī imīni inte pancamīniya Wængonguī gāmænō ocæ emænte pōnāmaī imīnīpa, ante guīñente wæbopa.

13

Idæwaa māninque yewæmōmopa, ante

¹ Botō mīnitō weca mempoga do pongaīmo inte ñōwo wæætē poncæ cæbopa. Īīmaī ante do yewæmongatimpa. Nō nō æbānō cætimpā, ante ēñencæte ante waoda mēnaa incæ mengāa go adocanque incæ nē adināni inte adodō ante apænedāni ēñēn-
² inque do apænte angæimpā, ante nāni yewæmongainō ante ēñēninque cæcæboimpā. Wēēnēñedē wēnæ wēnæ cædināni tōnō wadāni tōmānāni ĩnānite botō mīnitō weca doyedē pōninque, Amo ēñēedāni, ante wææ āninque ñōwo wæætē wayōmō ongōninque adodō ante wææ ante yewæmōmopa. Ayæ ate wæætē mīnitō weca ponte ongōninque tōmanga apænte āninque adodāni ĩnānite ata cæpodāmaī incæboimpā.

³ Pabodo wabānō mōnō Codito tōnō godongāmæ cæte apænecāā, ante wæmīnitawo. Māninō ante mīni wædō ante edæ, Nāwangā impā, ante odōmoncæte ante botō mānōmaī apænte ancæboimpā. Mōnō Codito incæ botō tōnō godongāmæ nē cædongā ĩñōmō tōmengā ĩñōmō aquīngā ĩnāmaī inte mīnitō imīnite apænte angā abaimīnīpa. Tōmengā ĩñōmō nanguī tæī pīñænongā inte mīnitō weca cæcā apa ānewēmīnīi. ⁴ Nāwangā impā. Mōnō Codito adocā incæ aquīngā baī inte cæyongante waodāni wæætē ñæn-
⁵ quedīmæ cæte mǎo timpodāni wængacāimpā. Incæte Wængonguī nānō tæī pīñænō beyænque adocā ñāni omæmonte quēwengampa. Mōnitō adobaī tōmengā nempo quēwēninque aquīimōni inte edæ Wængonguī nānō tæī pīñænō beyænque mōnō Codito tōnō godongāmæ quēwēninque mīnitō beyæ ante cæquīmōni imōnīpa.

⁵ Mīnitō tōmēmīni ĩñōmō, Æbānō wede pōnēmo imoo, ante nāmā waa aedāni. Mīni cædinō adinque, Æbānō nōingā cæbo imoo, ante aedāni. Īñæmpā, Itota Codito ingante entawēmompā, ante ēñēnāmaī imīnitawo. Wabānō mīnitō pancamīniya nāmā adinque, Botō nōingā cædāmaīmo inte edæ wede pōnēnāmaīmo inte awædō, ante ēñencæte ante aquēnēmīni imīnīpa. ⁶ Ayæ nāmā mīni a baī mōnitō imōnite adobaī apænte adinque mīnitō, Pabodoidi guiquēnē nōingā cædōnāni inte nē wede pōnēnāni ĩnānīpa, ante edonque amīni waa tobaīmopa. ⁷ Mīnitō beyæ ante mōnitō Wængonguī ingante apænedinque, Coodintoidi cōwē wēnæ wēnæ cædāmaī incædānīmpā, ante apænemōnīpa. Incæte mōnitō, Mīnitō wēnæ wēnæ cædāmaī imīni ate wadāni, Pabodoidi ædæmō cædāni beyænque impā, ante mōnitō imōnite waa acædānīmpā, ante wīi cæmōnīpa. Wæætē wadāni, Pabodoidi wīi eyepæ cædānīpa, ante pūinte ānāni incæte mīnitō wæætē nōingā cæcæmīnīmpā, ante mōnitō mānīnonque ante cōwē cæmōnīpa.

⁸ Edæ Wængonguī nōingā nānō ānō ante nē cæmōni inte mōnitō adode ante ædō cæte wido cæquīmōnīi. ⁹ Īinque mōnitō æyedēmē aquīimōni ĩñōmōni mīnitō wæætē tæī pīñænte cæmīni adinque mōnitō nanguī tomōnīpa. Mīnitō beyæ edæ Wængonguī ingante apænedinque mōnitō, Coodintoidi eyepæ entawēninque picænāni baī nō cæcædānīmpā, ante apænemōnīpa. ¹⁰ Botō imote apænedinque Wængonguī, Bitō wadāni ĩnānite bæ tadāmaī inte tæī mænonte baī pōnō cæcæbiimpā, ante pōnō cæcā ate botō tæī pīñæmo badinque nē āmo batabopa. Nē āmo imo incæte botō mīnitō weca ponte ayōmo wīwa cæmīni adinque pūinte panguēnēmo ĩnāmaī incæboimpā, ante

wææ cædinque botö ñöwo wayömö quëwëninque, Nämä apænte äedäni, ante wææ yewæmömopa.

¹¹ Ìñänäni, mäninque ante ñöwo yewæmömopa. Minitö eyepæ entawëninque, Mönö picænäni bai badinque nö cæcäimpa, ante nangui cæedäni, ämopa. Wæntædämai inte tæi piñænte cæedäni. Mini cabo incæ adoyömö pönëninque gänë pönente quëwëedäni. Wængongui incæ në Waadecä inte në gänë entawengä inte minitö tönö cöwë quëwencæcäimpa, ämopa. ¹² Mini cabo incæ godongämæ pö bee tëninque waadete pönente waa apæneedäni. ¹³ Wængongui quinäni eyequei quëwënäni ññömö, Minitö waa quëwencæminimpa, ante apænedäni ëñente yewæmömopa.

¹⁴ Minitö tömämïni mönö Awënë Itota Codito waadete nänö pönö cægäinö ante entawencæminimpa, ämopa. Mæmpo Wængongui tömengä nänö waadete pönënö ante entawencæminimpa, ämopa. Wængongui Tæiyæ Waëmö Önöwoca tönö ääwocaque bai ëwocadinque tömämïni godongämæ waa quëwencæminimpa, ante botö Pabodobo mäninque ante yewæmömopa.

Gadataidi inänite Pabodo nänö cadota ante yewæmongainta

Gadataidi inänite Pabodo, Waa quëwëedäni, angampa

¹ Botö Pabodobo inömo inte, Minitö acæminimpa, ante yewæmömopa. Mæmpo Wængongui incæ Itota Codito ingante, Nñani ömæmöe, angä nñani ömæmongacäimpa. Mæmpocä inömo Itota Codito tönö guëa cædinque botö imote da godonga gotabopa. In-
inque botö dicæ waodänique änäni ëñente gotabogaa. Botö imote edæ dicæ waocanque da godongä gotabogaa. ² Minitö Gadatiabæ wayömö wacabo wayömö wacabo quëwëmini inte Codito ingante mïni godongämæ pönencabo inömini inte edæ ëñencæminimpa, ante mönitö möni pönencabo tömämöni iimaï ante apænemönipa.

³ Wængongui mönö Mæmpo tönö mönö Awënë Itota Codito godongämæ pönö waadete cæda ate minitö gänë pönente waa quëwencæminimpa, ämönipa. ⁴ Adocä mönö Mæmpo Wængongui inömo, Minitö pedænguipogaque wiwa cæte mini wæwëñömö edæ abæ tawænte ponte bai botö gämænö ponte quëwëedäni, angampa. Ininque, Wængongui nänö angainö bai cæcæminimpa, ante cædinque mönö Awënë Itota Codito mönö imonte ö æncæte ante cægacäimpa. Mïni wænæ wænæ cæpämö mongæncæboimpa, ante tömengä nämä wepæ pædæ godonte bai cædinque pönö ængä beyænque mönö wæætë quëwëmompä. ⁵ Edæ pedænguipoga inönte miinguipoga bayonte edæ, Mänömaï bacäimpa, ante në angaingä inongä inte mönö Mæmpo Wængongui inömo edæ cöwë nñäo apäite bai wæmö pönö emönongä ingänö angüënë. Mänömaï impa, ante botö, Amëë, ämopa.

Codito ingantedö ante watapæ ëñengäimpa

⁶ Minitö inömo æbämë pönö cæmini awædö. Mönö Codito waadete pönö cæcä beyænque mïnitö Wængongui añecä pöminitawo. Nöwo guiquënë në añecä inöngante quimæ panguimæ gomïni. Wadäni, Quëwengui taadö wadö inömpa, ante tededäni ëñëninque mïnitö do Ao änewëmini awædö. ⁷ Inämpa wadö incæ wii quëwenguinö inömpa. Wæætë edæ, Minitö oda cæcæminimpa, ante cædinque wadäni pancadäniya, Codito ingantedö ante watapæ möni apænedö ante edæ, Idiquibæ bacäimpa, ante cædäni apa ëñëwëminii.

⁸ Mönitö Codito ingantedö ante watapæ apænemöni ëñëmïnitapa. Incæte mönitö adomöni incæ wadö ante apænemöni bai Wængongui wæætë pönö piinte apænte angä wæquimönidö angüënë. Ayæ adobai Wængongui anquedo incæ öönædë owodinique wææ pöninique wadö ante apænecä bai Wængongui tömengä ingante wæætë godö piinte apænte angä wæquingänö angüënë. ⁹ Edæ doyedë möni äninö bai botö nñowo wæætë adodö ante ämopa. Codito ingantedö ante watapæ apænemöni ëñëninque mïnitö Ao ämïnitawo. Ininque mäninö ante æcämenque pönënamäi inte wadö ante apænecä ëñëninque Wængongui tömengä ingante wæætë godö piinte apænte angä wæquingänö angüënë.

¹⁰ Botö dicæ, Minitö waomïnique botö imote Ao ancæminimpa, ante apænebogaa. Wængonguinque, Ao ancæcäimpa, ante apænebo aedäni. Ayæ, Waomïnique tocæminimpa, ante dicæ cæbogaa. Waomïnique tocæminimpa, ante cæbo inte bai edæ Codito ingante në cædömo inämaï incædömoimpa.

Pabodo Wængonguinque da godongä gotabopa, angampa

¹¹ Botö töninamïni ëñëedäni. Codito ingantedö ante watapæ botö apænedö inömo edæ wii waodänique nani mä pönengainö impa, ante ämo ëñëedäni. ¹² Mäninö ante waocanque dicæ pönö apænecä ëñente æntabogaa. Waocanque dicæ odömonte apænecä ëñëninque apænëtabogaa. Wæætë Itota Codito edonque odömonte apænecä ëñëninque botö në æmo inte adodö ante apænebopa.

¹³ Oodeobo inömö inte botö inömö edæ möni oodeocabo pönengainö ante wëenënedë mäninonque ante ëñëninque quëwengaboï aedäni. Botö mäninënedë edæ Codito ingante nani godongämæ pönencabo inänite wido cæcæte ante cædinque ancaa togænte edæ nanguï pöni pämo wægadänimpa, ante do ëñëminipa. ¹⁴ Ayæ botö tönö guëa pægäinani incæ nanguï inäni guiquënë möni oodeocabo möni ëñengainö ante wædænque ëñente cæyönäni botö inömö godömenque nanguï pöni ëñente cægaboimpa. Edæ mönitö mæmæidi nani odömonte angainö ante botö, Mönö Ao ante adodö ëñente cæte quëwengæimpa, ante nanguï cæbo ingaboimpa.

¹⁵ Incæte botö badä cæncadë ongöñömote Wængongui, Botö beyæ cæcæbiimpa, äninque edæ mäninënedë botö imote apænte ængaingä inte ñowo botö imote pönö waadedinque añecantapa. Ayæ ñowo pöni tömengä nämä nänö pönönö ante cæte todinque edæ, ¹⁶ botö imote pönö angantapa. Bitö oodeoidi inämaï inäni inänite apænebi ëñëninque tömënäni botö Wengä ingante edonque ate bai ewocacädänimpa, ante täno botö imote edonque odömongä adinque botö tömengä Wengä ingante do ewocabo inte apænebo ëñënanitapa. Ininque botö waocä ingante, Æbänö cæquimoo, ante edæ änämaï intabopa. ¹⁷ Botö imote da godongä ate botö Codito täno nänö në da godongainäni inänite apænecæte ante Eedotadëe inömö æidämaï intabopa. Wæætë edæ wadæ godinque botö wayömö Adabiabæ do godinque ayæ ate Daämaco inömö ocæ emænte gotabopa.

¹⁸ Ayæ wadepo mënepoga go adodepoque iinque go ate botö Pegodo weca mä ëñacæte ante Eedotadëe æidinque mäa Wængongui itädë tömengä weca quëwentabopa. ¹⁹ Ayæ wadäni Itota nänö në da godongainäni inönänite botö adocanque ingante mönö Awënë Itota biwï Tantiago ingante adinque wadäni inänite adämaï intabopa. ²⁰ Mänömainö ante botö Wængongui ayongä babæ änämaï inte näwangä ante yewämömo aedäni.

²¹ Mänii gote ëñate ate botö Tidiabæ godinque godömenque Tiditiabæ gotabopa. ²² Ininque Oodeabæ quëwente Codito ingante nani godongämæ pönencabo mönö Codito nempo në quëwënäni inömö botö awinca cöwë adämaï inäni inte önöwënenque pönengadänimpa. ²³ Tömënäni inömö iimaïnö ante önömoncaque ëñengadänimpa. “Wëenënedë mönö imonte në togænte pangaingä inömö mönö pönente quëwenguine ante, Mänine ante wido cæcæimpa, angantawo. Ñowo guiquënë tömengä, Wido cæquine, ante nänö angäine incæ adode ante edæ watapæ apænecä ëñënanipa,” ante tededäni ëñengadänimpa. ²⁴ Ininque, Pabodo ñowo waa cæcampa, ante adinque tömënäni Wængongui ingante apænedinque, Bitö waëmö pöni emönömi inte në waa cæbi imipa, ante watapæ apænengadänimpa.

2

Itota nänö në da godongainäni Pabodo ingante Ao änäni

¹ Ayæ mänii pö godinque iincayæ ate catodote wadepo go ate botö Bedënabee tönö Eedotadëe inömö adodö æidinque Tito ingante mäomöna gocantapa. ² Wængongui do botö imote apænete bai edonque odömongä adinque botö Eedotadëe inömö æidinque iimaï ante apæneta bopa. Botö inömö oodeoidi inämaï inäni weca godinque, Codito ingantedö ante cöwë watapæ apænebopa, ante botö ñænænänique inänite awëmö apænebo ëñënanitapa. Mänömaï cædinque botö, Æbänö cæboï, ante adodö adodö ante apænebo ëñëninque tömënäni piinämaï incädänimpa, ante cætabopa.

³ Ayæ, Botö tönö guëa pöningä Tito ingante adinque pancadäniya, Iingä inömö Guidiego inongä inongante ämini ëö togæncädänimpa, ante piinte änäni incæte në änäni guiquënë, Eö togæedäni, ante änämaï inänitapa. ⁴ Eö togængæimpa, ante në piinte änäni nani wææ angainö ante mönitö inömö Codito Itota gä pe æmpote æængä beyænque abæ tawænte ee gote bai quëwëmönipa. Mänömaï inömonte pancadäniya, Æbänö quëwënanii, ante edæ awëmö acæte ante cædinque edæ, Mönö caipæ imoppa, ante bai babæ cædinque mönitö weca pönäni wætamönipa. Ayæ edæ mönitö tömënäni nani wææ änö beyænque në cæte quëwëmöni bacæmönimpa, ante cædinque tömënäni

godömenque, Cædäni cædäni, ante wææ änewënäni wætamönipa. ⁵ Incæte edæ, Mönö Codito ingantedö ante watapæ möni apænedö näwangä ante impa, ante minitö oda cædämaï incæminimpa, ante wææ cædinque mönitö wantæ iñö incæ nê wææ änewënäni inänite ëñente cædämaï intamönipa.

⁶ Ñænænäni inänipa, ante wadäni nani nê waa adönäni iñömö æbämë ëmönänii, ante botö iñömö edæ wädämaï imopa. Edæ Wængongui incæ waocä ingante apænte acæte ante cædinque adämaï ingampa. Mimönoque acampa. Ìninqe botö idæwaa apænebo ate iinäni incæ ædö cæte godömenque apænequinäni. ⁷ Ìñæmpa iinäni incæ edæ do ëñänänitapa. Pegodo ingante mönö Awënë incæ pönö angä ate tömengä oodeoidi inänite mönö Awënë ingantedö ante nê watapæ apænecä ingampa. Botö imote adobaï mönö Awënë incæ pönö angä ate botö wæætë oodeoidi inämaï inäni inänite nê apænebo imopa. Ìninqe botö mänömainö ante apænebo ate nê änäni iñömö, Pegodo cæcä baï Pabodo adobaï cæcampa, ante do ëñänänitapa. ⁸ Pegodo oodeoidi weca gote cæyongante Wængongui tömengä tönö godongämæ cæcä baï botö guiquënë oodeoidi inämaï inäni weca edæ gote cæyömote adocä incæ botö tönö adobaï edæ godongämæ cæcampa, ante do ëñänänitapa.

⁹ Tantiago, Pegodo, Wäö iñömö nê täi ëmönäni inänipa, ante adinqe wadäni, Gönöniwæ onguitanca baï inänipa, ante apænedänipa. Ìninqe botö apænebo ëñäninqe mäninäni, Onguitancaidi, nani änäni iñömö edæ, Pabodo ingante Wængongui mänömaï pönö waadete cæcampa, ante adinqe botö imote ayæ Bedënabee ingante, Mönitö töninämäna iminapa, ante tömëmæ inö pædæ pompote bæi ongompodänitapa. Ayæ, Mönitö oodeoidi weca gote apæneyömöni minitö wæætë oodeoidi inämaï inäni weca gote apænecæminimpa, ante godongämæ Ao änänitapa. ¹⁰ Ayæ, Minitö nê ömaadäni inte wädäni inänite ante cöwë pönëninque waa cæcæminimpa, äninque mäninqe ante wææ änänitapa. Mäninö nani äninö incæ botö cöwë pönëninque edæ nanguï cæinente wæbo intabopa.

Pegodo ingante Pabodo angä wæcampa

¹¹ Ayæ Pegodo Antioquiya iñömö pöninqe wii nö cæcä adinqe botö tömengä awinca waa adinqe, Bitö pante wæquinque wënæ wënæ cæbi imipa, ämo wæcantapa. ¹² Ìmaï edæ Pegodo cæcä inongäimpa. Tæcæ Antioquiya pöninqe tömengä oodeoidi inämaï inäni weca wæætë wæætë pö guï pö guï ongöninqe godongämæ cænongäimpa. Incæte Tantiago nänö da pönöninäni pönäni ate Pegodo iñömö edæ, Mönö ëö togængäimpa, ante nê änönäni pïinäni wæcæ wæ, ante guïñëngä inte edæ oodeoidi inämaï inäni weca ñöwo cænämaï inte edæ gomonga gote cænongäimpa. ¹³ Mänömaï wadonque cædingä inte ñöwo wadonque cæyongante tömengä tönö oodeoidi tömänäni wadonque cædinäni inte edæ ñöwo wæætë wadonque cædänipa, ante adinqe Bedënabee incæ oda cæte wapiticæ cæcantapa.

¹⁴ Ìninqe edæ Codito ingantedö ante watapæ mönö ëñënë nö pönï i incæte tömënäni nö cædämaï inte wapiticæ cædänipa, ante adinqe botö tömänäni ayönäni edæ Pegodo ingante Ìmaï ante ämo wæcantapa. “Bitö iñömö oodeobi inömi inte edæ oodeo inämaï inäni baï ñimpo cæte quëwëninque edæ wii oodeoidi nani wææ angainö ante ëñente quëwëmipa. Incæte bitö, Oodeo inämaï inäni incæ oodeoidi nani wææ angainö ante ëñente quëwëncædänimpa, ante quïmæ wææ änewëmii,” ämo wæcantapa.

Mönö pönënë beyænque mönö tömämö quëwëmompä

¹⁵ Oodeoidi inämaï inäni nani ëñänämaï quëwëncabo baï inämaï imöni inte mönitö iñömö edæ oodeomöni nê ëñagaïmöni imönipa. ¹⁶ Incæte edæ Ìmaï ante do ëñëmönipa. Ìmaï cædäni, ante Möitee wodi nänö wææ angainö ante ëñente cæcä beyænque waocä dicæ Wængongui ayongä edæ nö cæcä baquingä. Wæætë Itota Codito ingante wede nänö pönënë beyænque waocä nö cæcä bacampa, ante mönitö do ëñëmönipa. Ìninqe, Waocä æcämenque incæ mäninö Möitee wodi nänö wææ angainö ante tömengä nänö ëñente cædö beyænque edæ nö cæcä badämaï incæcäimpa, ante do ëñëmöni inte mönitö

adobai, Ædö cæte mäninö beyænque nö cæmöni baquimönii, ante ëñëmönipa. Wæætë, Codito ingante möni wede pönënö beyænque nö cæmöni bacæte ante mönitö adobai tömengä ingante wede pönëmönipa.

¹⁷ Ìninqe mönitö oodeoidi ìmöni ìñömö, Mönö Codito nempo quëwëninque Wængonguï ayongä mönö nö cæmö bacæimpa, ante cæmönipa. Mänömainö ante cædinque mönitö në wënæ wënæ cæmöni inte wämöni incæte dicæ Codito angä beyæ wënæ wënæ cætamöniyaa. ¹⁸ Mäninö Möitee wodi nänö wææ angainö ante ëñente cæte quëwengæimpa, ante botö pönengainö ante do wido cægaboimpa. Mänömainö ante botö pönengainö ante në wido cægaimo inte botö ædö cæte wæætë adodö ænte bai cædinque, Mäninö ante ëñente mönö quëwengæimpa, ante anguïmoo. Mänömainö ante ämo inte bai botö Wængonguï nänö wææ angainö ante edæ në ëñënämaï ìmo bacædömoimpa. ¹⁹ Edæ, Wængonguï nänö wææ angainö ante ædö cæte tömänö ante ëñente cæquïmoo, ante botö wædö beyænque në wæwocaimo bagaboimpa. Ìninqe botö në wæwocagaimo ìnömo inte mänine ante ëñente cæcæte ante quinante wæquïmoo. Wæætë edæ Wængonguï beyænque ante botö quëwenguinque ìmopa.

²⁰ Mönö Codito ingante awäa timpodäni wæñongante botö tömengä tönö godongämæ wænte bai bagaboimpa. Ìninqe botö baonga ëñate quëwëmo incæte botö wii tömëmo quëwenguïmämo ëwocate quëwëmopa. Wæætë Codito nänö quëwenguïmämo ëwocate quëwëmopa. Ìninqe adocä Codito Wængonguï Wengä botö ìmote waadete pönëninque nämä tömengä wepæ ante, Wængonguï quï, ante botö beyæ pædæ godongä adinque botö baö ëñate quëwëninque tömengä ingante wede pönëninque quëwëmopa. ²¹ Ìninqe, Ìimaï cæedäni, ante Möitee wodi nänö wææ angainö ante ëñente cædinque mänömainö cæmö beyænque ñä mënongate nö entawëmö bamö bai mönö Codito önonque pönï wæncægacäimpa. Mänömaï beyæ Wængonguï nänö pönö waadete cægainö ante botö Ao ante ö æninque cöwë wido cædämaï ìmopa.

3

Mönö pönënö beyænque mönö quëwengæimpa, ante

¹ Gadataidi önonque pönï mini cæcabo ìnömini inte ëñëedäni. Æcänö wadö ante apænecä ëñëninque mïnitö dowænte bai önonque tedewëminipa. Ìñæmpa botö doyedë, Itota ingante æbänö awäa timpodäni wængacäi, ante botö edonque pönï odömönte apænebo ëñëninque mïnitö önöwënenque ante bai do pönëmïnitapa. ² Adodeque ämo ate apænemïni ëñëmoedäni. Mïnitö Wængonguï Önöwoca ingante æbänö cæte æminii. Möitee wodi wææ nänö angainö ante ëñente mïni cædö beyæ mïnitö tömengä ingante æmïnitawogaa. Wæætë edæ mönitö apænemöni ëñëninque wede pönëmïni inte æmïnitawo.

³ Ìñæmpa mïmö ömæde ìmïni inte ëñënämaï incædö. Mïnitö wëenëñedë mä pönï pönëninque Wængonguï Önöwoca tönö në cægaimini inte ñöwo wæætë edæ ömæwocamïni inte bai edæ baonga ëñadinque nämanque cædinque ìninqe cæminii.

⁴ Wængonguï nanguï pönï pönö cæcä caate wædinque mïnitö önonque beyæ caate wämïnitawo. Tömengä dicæ önonquedö ante cæcæte ante pönö cæcä wämïniyaa.

⁵ Wængonguï tömengä Önöwoca ingante da pönöninque mïnitö weca bamönengæ pönï cæcampa. Quinante mänömaï cæcää. Edæ, Möitee wodi nänö wææ angainö ante ëñente mïni cædö beyæ ante dicæ cæcäa. Wæætë mönitö apænemöni mïni ëñente pönënö beyæ Wængonguï tömengä Önöwoca ingante da pönöninque mïnitö weca bamönengæ pönï pönö cæcä æminipa.

⁶ Wængonguï apænecä ëñëninque Abadäo wodi, Nöingä ante apænecampa, ante wede pönengacäimpa. Ìninqe tömengä wede nänö pönënö beyænque Wængonguï, Botö ayömo Abadäo ìñömö në nö cæte quëwëngä ingampa, angacäimpa, ante yewæmongatimpa. ⁷ Mänömainö ante adinque mïnitö ìimaï ante ëñëedäni. Mönö në wede pönëmö ìñömö Abadäo wodi pæimö bai adomö ìmopa, ante ëñente pönëedäni. ⁸ Wængonguï, Oodeoidi ìnämaï ìnäni incæ wede nani pönënö beyænque botö ayömo edæ në nö

cæte quëwënäni bacädänimpa, ante badoncæcäimpa, ante dodäni edonque adinque Wængonguï beyæ yewæmongadänimpa. Ayæ Abadäo wodi ingante apænedinque tömengä, “Botö bitö ïmite pönö waa pönï cæbo æmi ïninque bitö beyænque wadäni näni cabo wadäni näni cabo tömancabodäniya edæ watapæ quëwenguïnänidö angüenë,” ante apænegacäimpa. Mänömaï impa, ante yewæmöninque dodäni wëenënedë pönï Wængonguï waa pönï nänö cæquïnö ante yewæmongadänimpa. ⁹ Abadäo wodi cöwë ædæmö cæte pönengaingä ïñongante Wængonguï pönö waa pönï cægacäimpa. Mönö në wede pönëmö ïñömönte tömengä adobaï pönö waa pönï cæcä æninque mönö ïñömö edæ Abadäo wodi tönö godongämæ watapæ quëwëmö ïmönö angüenë.

¹⁰ Wæætë edæ, “Wææ ante botö yewæmongainta adinque æcänö tömänö ante dicæ cæcää tömengä ïñömö Wængonguï piïnte angä wæwocaingä ingänö angüenë,” ante Möitee wodi incæ do yewæmongacäimpa. ïninque Wængonguï edæ nänö wææ angainö ante waodäni, Botö ëñente cædö beyænque quëwencæboimpa, ante në änewënäni incæ wïi eyepæ ëñente cædäni inönäni inte tömënäni tömänäni inänite Wængonguï piïnte angä wæwocainäni inänidö angüenë. ¹¹ Ayæ wacä Wængonguï beyæ yewæmöninque, “Në nö cæte quëwënongä incæ tömengä nänö wede pönënö beyænque quëwencæcäimpa,” angacäimpa. ïninque ïïmaï ante mönö edonque ëñengäimpa. Möitee wodi nänö wææ angainö ante ëñente cæte beyænque waocä dicæ Wængonguï ayongä në nö cæcä badinque quëwenguingää. ¹² Wængonguï nänö wææ angainö ante ëñente quëwengäimpa, ante në cædönäni ïñömö tömënäni dicæ näni wede pönënö beyæ quëwënäniyaa. Wæætë, “Mäninö ante në ëñente cæcä ïñömö tömengä nänö ëñente cædö beyænque quëwencæcäimpa,” ante Möitee wodi nänö yewæmönö angainö baï impa.

¹³ Ayæ adobaï, “Æcänö ingante awäa wodoncædäni a ongöna tömengä ingante Wængonguï piingä wæwocaingä ingänö angüenë,” ante Möitee wodi yewæmongacäimpa. ïninque Wængonguï nänö wææ angainö ante wïi eyepæ ëñente cæmö beyæ mönö wæwocaimö inte wæyömönte mönö Codito ïñömö, Abæ tawænte gote baï quëwencæminimpa, ante cædinque mönö beyæ wæætë wæwocaingä badinque edæ awäa wæninque a ongongacäimpa. ¹⁴ Abadäo wodi ingante Wængonguï waa pönï pönö cægacäimpa. Ayæ, mïnitö oodeoidi inämaï ïñömïnite Itota Codito pönö cæcä beyænque Abadäo tönö godongämæ watapæ quëwencæminimpa, ante Wængonguï adobaï pönö waa cæcampa. Mänömaï bacäimpa, ante cædinque Codito tömämö ïmönö, Mïnitö wede pönëninque botö Önöwoca ingante ænte ëwocacæminimpa, ante cædinque mönö ïmönö æncæte ante nämä wepæ godonte ængä beyænque quëwëmompa.

Wængonguï täno, Cæquïmo, aninque ayæ ate wææ angacäimpa

¹⁵ Botö tönïñamïni ëñeedäni. Botö, Waomö mönö cæï baï Wængonguï mönö beyæ wodo adobaï cæcampa, ante odömoncæte ante ïïmaï ante yewæmömö aedäni. Waoda, Möna guëa cæcaya ïmönäpa, ante Ao äna ate adocanque inte ædö cæte wadö ante cæquënegää. Ayæ, Mönö godömenque cæcäimpa, ante waocä adocanque inte ædö cæte edæ ante cæquënegää. Nöwo edæ ämo ëñeedäni. Wængonguï, Mönö godongämæ cæcabo bacäimpa, ante botö pönö cæcæboimpa, angä ëñëninque mönö Ao ante cæquënenö ïñömö edæ wodo adobaï impa. ¹⁶ Mæmæ Abadäo wodi ingante apænedinque Wængonguï, Bitö Pæingä ingante botö cöwë pönö waa cæcæboimpa, angacäimpa. Mänömaï äninque tömengä Abadäo wodi ingante, “Bitö pæinäni,” ante änämaï ingacäimpa. Wæætë, “Bitö Pæingä ingante pönö cæcæboimpa,” äninque Abadäo wodi Pæingä adocanque Codito ingante ante pönëninque angacäimpa.

¹⁷ Mänömainö ante apænedinque botö ïïmainö ante odömoncæte ante apænetabopa. Abadäo wodi ingante Wængonguï, Botö pönö cæbo ate mïnitö Ao ämïni ïninque mönö godongämæ waa cæcäimpa, ante wëenënedë cægacäimpa. Ayæ wantæpiyæ coatodo tiento todëinta wadepo go ate Möitee wodi ingante apænedinque adocä, ïïmaï cædäni, ante pönö wææ ängöngäimpa. ïninque Wængonguï wantæpiyæ ate wææ äninque do nänö angäine ante wëä godönämaï ingacäimpa. Edæ, Cöwë pönö

cæcæboimpa, ante doyedē nē angaingā inte tōmengā ñōwo wææ āninqe māniine ante dicæ wæä godongantawogaa. ¹⁸ Mōitee wodi nānō wææ angainō ēñente cæmō beyænque mōnō ænguēnecoo do æmō bai Wængongui, Cōwē pōnō cæcæboimpa, ante ōnonque ancægacāimpa. Incæte Wængongui pōnō waadete cædinque mæmæ Abadäo wodi ingante apænedinque, Cōwē pōnōmo æncæminimpa, ante nānō angainō bai cædinque do cægacāimpa.

¹⁹ Īninqe, Cōwē pōnōmo æedāni, ante nē angaingā inte Wængongui quīnante ñōwo wæætē, Īmaī cæedāni, ante wææ angacāi. Īñæmpa tōmengā, Minitō botō ānō ante ēñēnāmaī cædinque wēnæ wēnæ mīni cædinō edonque bacæimpa, ante odōmoncæte ante wææ angacāimpa. Mānōmaī cædinque tōmengā, Abadäo wodi Pæingā botō nē angaingā incæ tōmengā nānō ponganca mīnitō ēñente cædinque quēwencæminimpa, ante wææ angacāimpa. Māniine nānō wææ angaine ēñente cæcædānimpā, ante Wængongui tōmengā anquedoidi inānite da pōnongā pōninqe tōmēnāni Mōitee wodi ingante māmō odōmōnāni agacāimpa. Tōmengā iñōmō tæcæguedē ongonte bai nē anguingā badinque Wængongui nānō angaine ante idægoidi inānite wæætē angā ēñengadānimpā. ²⁰ Ñōwo apænebo ēñēedāni. Adocanque eyepæ cæcā adinque tōmengā beyæ ancæte ante wacā tæcæguedē ongōnāmaī ĩmaingampa. Wængongui iñōmō, Cōwē pōnō cæcæboimpa, nē angaingā inte adocanque incæ eyepæ cædongā ingampa.

Īmaī cæedāni, ante quīnante angacāi, ante

²¹ Īninqe Wængongui, Cōwē pōnō cæcæboimpa, ante nē angaingā inte wantæpiyæ ate, Īmaī cæedāni, ante wææ āninqe tōmengā doyedē nānō angaine dicæ wæä godongantawogaa. Edæ tōmengā mōnō ĩmonte apænedinque, Botō wææ angainō beyæ quēwencæminimpa, ante māniine pōnongā ænte quēwēmō bai māniine beyænque edæ nē nō quēwēmō bacædōmōimpa. Wæætē edæ wīi mānōmaī impā. Wængongui, Cōwē pōnō cæcæboimpa, angā ēñēninque mōnō quēwenguinque edæ nē nō cæmō bamompā. ²² Īninqe Wængongui, Cōwē pōnōmo æncædānimpā, ante nē angaingā inte ĩmaī ante cæcampa. Botō angaincoo ante Itota Codito ingante nē pōnēnāni inānite da pōnōmo ate tōmēnāni wede nāni pōnēnō beyænque ænte ēwocacædānimpā, ante ĩmaī cæcampa. Tōmengā mōnō inguipoga tōmāo quēwēmō mōnō wēnæ wēnæ cædimāmo adinque mōnō ĩmonte pōnō tee mōnete bai cæcā ongōmompā. Mānōmaī pōnō cæcā ongongāimō iñōmonte Wængongui mōnō wede pōnencabo adomonque iñōmonte tōmengā nānō angaincoo ante pōnongā ænte ēwocamompā. Wængongui, Mānōmaī cæbopa, ante apænecā ēñēninque yewæmongadānimpā.

²³ Doyedē iñōmō mōnō, Mōitee wodi nānō wææ angainō tōmānō ante mōnō ædō cæte eyepæ cæquīi, ante tee mōnete bai wægāmōimpā. Edæ Itota Codito mōnō nē wede pōnēnongā edonque pōni nānō ponte a ongonganca mōnō tee mōnete bai wægāmōimpā.

²⁴ Īninqe, Minitō Codito ingante wede pōnēninque nē nō cæmīni bacæminimpā, ante cædinque Wængongui Codito gāmænō tōō æmænte bai cædinque wææ angacāimpa. Mānōmaī ĩ ĩninqe tōmengā nānō wææ angainō beyænque mōnō wapiticæ godāmaī inte Codito gāmænō pongāmōimpā. ²⁵ Ayæ ñōwo iñōmō, Mōnō nē wede pōnēnongā do pongāimpā, ante adinque Wængongui ñōwo wæætē wææ ānāmaī ingampa.

²⁶ Minitō Itota Codito ingante wede pōnēmīni inte tōmāmīni Wængongui wēñæmīni ĩmīnīpā. ²⁷ Edæ tōmāmīni mōnō Codito tōnō godongāmæ guite bai æpænē guidinque tōmengā nānō ēwocadō adodō ēwocadinque tōmengā nempo quēwēmīnīpā. ²⁸ Tōmengā nempo adocabomō ĩnōmō inte mōnō adocanque ingantedō ante apænedinque, Oodeocā ingampa, ante ānāmaī ingæimpā. Ayæ wacā ingantedō ante adobāi, Guidiego ingampa, ante ānāmaī ingæimpā. Ayæ, Waocā nānō nē ō æningā inte awēnē beyænque cæte nē quēwengā ingampa, ante mōnō ānāmaī ingæimpā. Wacā ingantedō ante, Abæ tawænte gocā ingampa, ante mōnō ānāmaī ingæimpā. Ayæ adocanque ingantedō ante, Onguīñængā ingampa, ante mōnō ānāmaī inte wacā ingantedō ante adobāi edæ, Onquiyængā ingampa, ante ānāmaī ingæimpā. Īñæmpa Codito Itota nempo

quëwëninque adocabomö imompa. ²⁹ Ayä minitö iñömö Codito nempo quëwëmini inte mëmä Abadäo wodi päimini bai iminipa. İninque Wængongui nänö, Cöwë pönömo æncæminimpa, ante nänö angaincoo ante minitö nê ænguimini iminipa.

4

¹ Mäninö ante yewämöninque botö, Waodäni æbänö cädänii, ante odömöninque iimaï ante apænecæte ante yewämömopa. Wæmpocä wængä ate tömengä wengä iñömö wæmpocä nänö ëadincoo nê ænguingä ingampa. İninque wæmpocä ayä miingä quëwengäñedë mänincoo tömancoo do ænte bai tömengä wengä nê ëacä ingampa. Incæte tömengä wengä tömancoo nê ëacä incæ edæ tömengä wëñængäñedë guiquënë wæmpocä beyænque cæte nê quëwengä bai inongä ingampa. ² İninque wæmpocä do äninque, İionæ iinque bayonte botö wengä do picængä badinque nämä nê angä bacæcäimpa, ante nänö angaiönæ iinque baganca nê aadäni inänite wæmpocä angä ëñëninque tömënäni wæætë wëñængä ingante wææ aadänipa. Ayä, Wëñængä nänö manguincoo ante æbänö cæquii, ante nê aadänique änäni ëñente wëñængä incæ cæcampa.

³ Mönö iñömö doyedë mäningä wëñængä bai adobaï picæmö inämaï mönö ingaiñedë inguipogaque nani wææ angainonque ante ëñente cægamöimpa. Waocä beyænque cæte nê quëwengä bai mönö adobaï inguipogaque nani wææ angainonque ante ëñencæte ante cædinque mäninö beyænque cæte nê quëwëmö bai inte wægamöimpa.

⁴ Incæte Mæmpo Wængongui iñömö, İionæ da pönömo poncæcäimpa, ante doyedë nänö angaiönæ iinque bayonte tömengä Wengä ingante da pönongä pongacäimpa. İingä Wëñængä ingante onquiyængä mangä ëñadinque tömengä Wængongui nänö wææ angainö ante nê ëñente cæquënegä nänö baquinque pægacäimpa. ⁵ İninque mönö Möitee wodi nänö wææ angainö beyä tee mönete bai wæyömonte adocä Wængongui Wengä incæ, Minitö abæ tawænte bai picæmini badinque näwä wëmini bate quëwencæminimpa, ante mönö imonte ængä beyænque mönö abæ tawænte bai quëwëmopa. ⁶ Mæmpo Wængongui iñömö, Minitö näwä wëmini imini beyä, ante tömengä Wengä Önöwoca ingante mönonga da pönongantapa. İninque tömengä Önöwoca iñömö, “Mæmpo, botö Wæmpo,” ante nê apænecä inongä inte mönö mimönë owodinique adodö ante mönö beyä apænecampa. ⁷ İninque bitö iñömö bitö imite nê wææ angaingä beyænque idæwaa cæte quëwengäimi inte ñöwo abæ tawænte bai æmäwo pædimi inte näwä wëmi inömi imipa. Ayä näwä wëmi iñömite Wængongui pönö cæcä ate bitö tömengä nänö ëgaincoo ante nê ænguimi babipa.

Nê pönëmini æbämë cæte quëwëmini, ante wæcampa

⁸ Wængonguüidi inämaï iñönänite wadäni iñömö, Wængonguüidi inänipa, ante babæ apænedänipa. Minitö wëñëñedë Wængongui ingante mini adämaï iñedë, Wængonguüidi, ante tömënäni babæ ante nani nê änönäni beyænque cæte nê quëwëmini inte ñæ cæyænte bai wægamimipa. ⁹ Ñöwo iñömö minitö Wængongui ingante ate bai nê pönëmini imini inte ædö cæte wapiticæ ante ëñëminii. Æ wadö ante godömenque ämo. Wængongui incæ minitö iminite do ate pönengaingä ingä incæte minitö ædö cæte inguipogaque quëwënäni nani önonquedö ante wææ angainö ante ëñente quëwëminii. İñæmpa, Mänine nani wææ angainö ante wæætë ëñengäimpa, äninque mini ñä cæpote wæquinque ämini awædö. ¹⁰ Edæ Wængongui änämaï iñongante minitö mä pönëninque, Wængongui beyä, ante mönö iionæ cädämaï inte ongöninque ææmä cæte becäimpa, änewëminipa. Ayä, İi apäicä iñonte adobaï, iintedä iñonte adobaï, iinpo iñonte adobaï, Wængongui beyä, ante mönö cädämaï inte ææmä cæte becäimpa, ante önonque pönü ante cæminipa töö. ¹¹ İninque, Minitö ëñëñämaï inte mini wæquinque cæminipa, ante adinque botö minitö beyä ante guñente wæbopa. Botö pönö nangui cæbo incæte edæ önonque wabänö cægaboimpa, ante wæbopa.

¹² Botö töninamini ëñëedäni. Botö wëñëñedë minitö bai Möitee wodi nänö wææ angainö nê cæbo bai inte wæbo aminitawo. Wæætë botö nê wææ angaingä ingante

idæwaa ëñente cædinque abæ tawænte gobo bai mînitö adobai cæmîni waa tobaïmopa. Mînitö dicæ botö ïmote wënæ wënæ cæmînitawogaa. ¹³ Wëenëñedë wënæ wënæ mänimo inte botö mänömaï beyæ mînitö weca pöningue mönö Codito ingantedö ante watapæ apænedinque mä apænebo ëñëmînitapa. ¹⁴ Ìnîningue mänömaï wënæ wënæ bate pömo ate wæðimîni incæte mînitö guiñëñate wæðämaï inte towæ tänongadämaï ïmînitapa. Wæætë edæ botö ïmote adinque mînitö, Wængonguï anquedo ingampa, ante pörente bai cædinque watapæ todinque, Pöe, ämînitapa. Ayæ edæ, Itota Codito ingampa, ante pörente bai cædinque, Pöe, ämînitapa. ¹⁵ Mînitö mäniñedë watapæ mîni todinö bai ñowo guiquënë quïmæ todämaï ïmîni. Mînitö mäniñedë edæ eyepæ inte bai nämä awinca o togæmöninque botö ïmo pönö mine tïmoncæðöminimpa, ante pönëninque apænebopa.

¹⁶ Ìñæmpa mînitö ïmînite näwangä apænebo beyænque mînitö ñowo wæætë botö ïmote püinte bamînitawo. ¹⁷ Wadäni ïñömö, Mönitö gämænö ponte ëñëedäni, ante nanguï cæðäni ïñömö mînitö ïmînite wënæ wënæ cæcæte ante änewënänpa. Tömënäni ïñömö, Pabodoidi ïnänite ëñënämaï inte mînitö wæætë mönitö tönö godongämæ cædinque mönitö cæinënouque ante ämöni ëñëninque cæcæmînimpa, ante babæ cæðänipa.

¹⁸ Wacä nänö cæinënö ante godongämæ cæmîni cöwë waa ïmaïmpa. Näwangä ïmpa. Incæte tömengä nänö waa cæquënënonque ante cæcä adinque mînitö, Mäniñonque edæ cæcæïmpa, ante nanguï cæquënëmîni ïmînipa. Ayæ edæ botö mînitö weca quëwëmoyedë cæmîni bai mînitö botö dæ ämo ïñedë cöwë adobai cæmîni waa ïmaïmpa. ¹⁹ Botö wëmîni ëñëedäni. Yæðemadä inte nantate wæðä bai botö ïñömö wæætë nantate wædinque edæ, Mînitö mïmönë Codito ingante æðämö entawencæmînimpa, ante nanguï pönï cædinque wæbopa. ²⁰ Edæ, Mînitö æbämë cæmîni, ante ëñënämaï ïmo inte botö mînitö weca pöningue wïi gobæ tedete botö änö bai tededinque wæætë wadö bai tedecæte ante pöinente nanguï wæbopa.

Tada wodi tönö tömënä ïnante në cægaingä Agada

²¹ Mînitö, Möitee wodi nänö wææ angainö ante mönö ëñengæïmpa, ante në ämîni inte apænemîni ëñëmoedäni. Mînitö wææ ante tömengä nänö yewæmongainta incæ adämaï inte ëñënämaï ïmînitawo. ²² Ìïmaï ante yewæmongatimpa. Abadäo wodi ïñömö wëñænä onguïñænä mënaa ïnate tapæigacäïmpa. Adocanque guiquënë nänöogængä beyænque në cæte quëwengä wëñængä ïñongä wacä guiquënë näwä nänöogængä wëñængä ingacäïmpa. ²³ Në cæte quëwengä wëñængä guiquënë cöwë mönö ëñädö bai adobai önonque ëñagacäïmpa. Näwä nänöogængä wëñængä guiquënë Wængonguï, Cöwë pönömo æncæbiïmpa, ante nänö äninö beyænque ëñagacäïmpa.

²⁴ Wængonguï ïñömö, Botö pönö cæbo ate mînitö Ao ämîni ïnîningue mönö godongämæ waa cæcæïmpa, ante mempoga apænecacäïmpa. Ìnîningue, Wængonguï mëna nänö apænecainö æbänö ïneï, ante ëñencæte ante mönö mänîna onquiyænä ïnate adinque pönengæïmpa. Wængonguï ïñömö adopoque apænecæte ante Tïnaiquidi wæænte ongöninque wææ angacäïmpa. Mänîneque tömengä nänö wææ angainëque ante në ëñente cæðäni ïñömö Agada wodi wënäni mäniñe beyænque në cæte quëwënäni bai nänï baquinque ëñädänipa. ²⁵ Mänîngä Agada tömengä nänï wencabo ïñömö wacä ingante në cæðönäni inte cæningä ñä cæyænte bai inte wægadänipa. Ìnîningue Adabiabæ ongonquidi Tïnaiquidi ongöninque Wængonguï wææ angä ate mönö ïñömö Agada bai wacä ingante në cæmö bagamöïmpa. Edæ Agada wodi nänï wencabo wacä beyænque në cæte quëwënäni inte nänï wægainö bai ñowo Eedotadëë quëwënäni adobai wacä beyænque në cæte quëwënäni bai ïnönäni inte wæwente quëwënänipa. ²⁶ Eedotadëë inguipoga ongönömö bai mönö öönæðë æite Eedotadëë bai ïñömö ongongæïmpa. Mänïñömö Eedotadëë nänï äñömö mönö badä Tada wodi bai ïmpa. Tada ïñömö wïi wacä ingante në cæcä bai ïñönante mönö tömënä wëmö bai ïmompä. ²⁷ Edæ ïïmaï ante Wængonguï beyæ yewæmongatimpa,

“Bitö owəntabi ēñēmi. Wēñæ mǎnāmaī īnīmi inte bitö, Īncayæ ate mancæboimpa, ante watapæ tocæbiimpa.

Bitö wēñæ nantadāmaī īnīmi inte, Botö iincayæ ate toquinque impa, ante yedæ ancæbiimpa.

Edæ nǎnōgəngā ēmō cæte gocā ate adocanque inte wēñæ mǎnāmaī īñongante, Wəngonguī, Botö pönōmo æncæbiimpa, angā ēñengā inte owəmpocā īñōmō godōmenque nanguī wēñænāni īnānite māñongā nǎnōgəngā ēacā guiquēnē wēñænāni wədænque mancæcāimpa,” ante yewəmongatimpa.

²⁸ Botö tōniñamīni, ēñēdāni. Wəngonguī, Bitö wēñəngā cōwē pönōmo æncæbiimpa, ante nǎnō angainō beyənque Itæca wodi ēñagacāimpa. Wəngonguī, Cōwē cæcæboimpa, ante mīnitō imīnite adobai angā beyənque mīnitō mempoga ēñadinque tōmengā wēmīni bagamīnimpa. ²⁹ Māniñedē īñōmō Wəngonguī Ōnōwoca beyənque ēñacā īñongante Itæca ingante ōnonque nē ēñagaingā Itīmāedo guiquēnē pīinte cægacāimpa. Mǎnōmaī nǎnō pīinte cəgāi bai inguipogaque quēwēnāni Wəngonguī wēnāni īnānite nōwo adobai cədānīpa. ³⁰ Īnīnque Wəngonguī æbānō angā ēñente yewəmongadānīi. Īmaī impa. “Nāwā nǎnōgəngā wēñəngā mæmpocā ēadincoo æñongā nǎnōgəngā beyənque cæte nē quēwəngā wēñəngā wæætē ænāmaī incæcāimpa. Īnīnque nē cæte quēwəngā nāna wəncaya īnate mōnō wido cæcāimpa.” Ante yewəmongatimpa. ³¹ Īnīnque botö tōniñamīni ēñēdāni. Mōnō īñōmō nāwā nǎnōgəñā wēñæmō bai īnōmō inte mōnō nǎnōgəñā beyənque nē cæte quēwəngā wēñæmō bai wīi īnōmō imōmpa, ante āmo ēñēdāni.

5

Abæ tawænte bai mōnō quēwēnō ante

¹ Mōnō īine Mōitee wodi nǎnō wææ angainō ante ēñente nē cæmō inte ñā cæyænte bai wəyōmonte Codito, Abæ tawænte bai inte quēwəncæmīnimpa, ante pōnō ō ænte ñimpo cæcā beyənque mōnō abæ tawænte gote bai ee quēwēmō imōmpa. Īnīnque mīnitō īñōmō nē abæ tawænte gogaīmīni inte tæi ongōnīnque edæ wæætē mǎnīne beyənque ñā cæyænte bai badāmaī īedāni.

² Īñānāni, botö Pabodobo apænebo ēñenguēnē quēwēmīnīi. Mīnitō, Mōnō ēō togæīmō inte quēwəngæimpa, ante cæmīni īnīnque ædō cæte Codito ængā beyənque quēwənguēnēmīnīi. Īñæmpa mǎnōmaī cæmīni īnīnque Codito mīnitō beyæ ædō cæte pōnō cæquingāā. ³ Bitö, Botö ēō togæīmō inte quēwəncæboimpa, ante cæbitawo. Edæ botö bitö imite īmaī ante apænebo ēñēe. Bitö quēwəncæte ante cædinque ēō togæīmi babi īnīnque Mōitee wodi nǎnō wææ angainō tōmānō ante bitö ēñente cæte quēwənguēnēmi babaimīpa tōō. ⁴ Pancamīniya, Nō cæmō mōnō baquinque Mōitee wodi nǎnō wææ angainō ante ēñente cæcæimpa, ante āmīnitawo. Īñæmpa mǎnōmaī ante nē āmīni inte mīnitō mōnō Codito ingante do pango cæte bai cæmīnīpa tōō. Edæ pango cæte nǎnēnē goyōmīnite tōmengā ædō cæte pōnō waadete cæquingāā. ⁵ Mōnitō guiquēnē, Wəngonguī ayongā mōnō nē nō entawēmō bacæmōimpa, ante nanguī pōnī æīnente wānō cōñōmōnite Wəngonguī Ōnōwoca pōnō apænecā ēñēnīnque mōnitō, Mōnō nē nō entawēmō badīnque watapæ bacæimpa, ante wede pōnēmōnīpa. ⁶ Edæ Codito Itota nempo quēwēnīnque ēō togæīmō imō incæ bagæmō imō incæ tōmāmō adobai ōnōmonque īnōmō imōmpa. Wæætē edæ Codito ingante wede pōnēnīnque nē waadete pōnēmō īñōmō mǎnīnō mōnō pōnēnō beyənque waa pōnī entawēmōmpa.

⁷ Mīnitō guiquēnē wēēñēdē godongāmæ pogodo gote bai nanguī cædinque waa cæmīnitapa. Edæ ñōwo guiquēnē mīnitō waa pōnī pogodo gote bai cæyōmīni æcāmē wææ āna ēñēnīmīni inte wæætē Wəngonguī nō ante nǎnō apænēgainō ante ēñēnāmaī cæmīnitawo. ⁸ Wəngonguī mīnitō imīnite nē aa pegaingā inte tōmengā īñōmō edæ, Ēñēnāmaī cæedāni, ante dicæ wææ angantawogaa. ⁹ Edæ, “Yedæ æmpocæimpa, ante cædinque guiyā pōnī da wente ate pāō cæquimo tōmāo guipæñō pāō yedæ æmpopa,” ante pōnēnīnque īmaī ante ēñengæimpa. Adocanque wapiticæ wææ angā ēñēnīnque

nangui inäni wæætē oda cæte wæcædänimpa. ¹⁰ Mönö Awënë nempo mönö quëwencabo imompa, ante pönëninque botö, Minitö botö pönënö bai pönëmini inte wii wapiticæ ante pönenguimini iminipa, ante pönëmopa. Wæætē edæ æcämenque minitö iminite wapiticæ ante wææ angää, ante adinque Wængongui në apænte angä ingante cöwë godö pangä wæcæcäimpa.

¹¹ Botö töninamini ëñeedäni. Botö Itota awäa wængacäimpa, ante apænebo ëñëninque, Eö togëimini baedäni, ante në änäni iñömö botö imote cöwë piinque pänäni wæbo aedäni. Incæte botö tömënäni näni änö bai, Eö togëimini baedäni, ante ämo bai tömënäni botö imote wii bai ongöninque pancædönänimpa. Edæ mänömainö ämo bai tömënäni wæætē piinämaï inäni inte, Pabodo Itota nänö wængaiwæ ante apænecä awædö, ante tee tēwate bai oda cædämaï incædönänimpa. ¹² Minitö iminite në wapiticæ ante wææ änäni iñömö nämä wido togænte bai cædinque nämä ta ñænte Codito ingante në pönëmini weca pönämaï inäni inte waa imaimpa, ante awædö.

¹³ Minitö botö töninamini abæ tawænte gote quëwencæminimpa, ante mönö Awënë minitö iminite apænte aa pegacäimpa. Incæte minitö, Abæ tawænte godimöni inte inguipogaque möni cæinënö ante godömenque cæcæminimpa, ante cædämaï iedäni. Wæætē edæ wadäni inänite godö waadete pönëninque tömënäni beyæ ante cæedäni. ¹⁴ Edæ Itota, “Nämä bitö waadete pönënö bai pönëninque bitö wacä ingante adobai edæ waadete pönencæbiimpa,” angacäimpa. Iine adodeque ëñente cæmö ininque Wængongui nänö wææ angainö incæ tömänö ante do në cæmö edæ babaimompa. ¹⁵ Edæ babæidi bai näëmæ pocænte bai cædinque näëmæ gäwæi cænte bai cæmini bai minitö näëmæ wido cædinque wantæ biquënëminidö angüënë, ante apa quëwëminii.

Mönö Wængongui Önöwoca nempo quëwengäimpa, ante

¹⁶ Nöwo ämo ëñeedäni. Wængongui Önöwoca ewocadinque quëwëedäni. Mänömaï quëwëninque minitö inguipogaque mini cæinëwënö ante wii ëñëninque nämä beyænque ante cædämaï inguimini iminipa. ¹⁷ Edæ inguipogaque mönö cæinëwënö ante adinque Wængongui Önöwoca iñömö edæ Baa angampa. Ayæ wæætē æcänö inguipogaque mönö cæinëwënö ante cæte quëwëna tömengä Wængongui Önöwoca ingante näëmæ Baa angampa. Ininque mönö inguipogaque cæinëwënö ante wæyömö Wængongui Önöwoca guiquënë, Wadö cæedäni, angampa. Mänömaï beyæ minitö mimönë wæætedö wæætē ante bai entawëmini inte minitö nämä mini änö ante ædö cæte cæquimiiii. ¹⁸ Incæte minitö iminite Wængongui Önöwoca nöinö töö æmænte mäocä gomini inte minitö Möitee wodi nänö wææ angainö ante do abæ tawænte gomini iminipa.

¹⁹ Inguipogaque mönö cæinëwënö ante ëñëninque në cædäni iñömö æbänö cædänii, ante edonque abaimpa. Edæ iimaï impa. Tömënäni nänöogängä inämaï iñongante do godö guëa towënänipa. Wentamö pönëwëninque cædänipa. Önonque guinëñadämaï inte nämä baonque pönëwëninque towënänipa. ²⁰ Wængonguüidi inänipa, ante badöninque ædæ wæænte waa adänipa. Idö bai yewëninque önonque tedewënänipa. Piinte quëwënänipa. Tiyænö tiyæ tedewënänipa. Wacä godömenque ængä ate wædinque piinte awënänipa. Ænguï bawënänipa. Nämä waa tobote, ante anewënänipa. Wæætedö wæætē äninque näwæ godänipa. Wadö ante näni cabo wadö ante näni cabo badinque wæætedö wæætē cædänipa. ²¹ Wacä gomonga ængä ingante godö piinte adänipa. Ti nämæ nanguï bedinque dowænte badänipa. Ayæ nanguï pöni godömenque bedinque nanguï pöni cæninque guinëñadämaï inte towënänipa. Ayæ godömenque quiëmë bai në cæinäni inänipa. Mänömaï cæte quëwënäni iñömö Wængongui Awënë Odeye nempo ædö cæte edæ guiquinänii, ante do botö äninö bai nöwo wæætē ämo ëñeedäni.

²² Wængongui Önöwoca ingante ëñente në cæmö guiquënë mönö waincawæ incate bai iimaï cæmompä. Waadete pönëmompä. Watapæ tomompä. Gänë entawente pönëmompä. Ee cæte piinämaï imompä. Waadete cæmompä. Wadäni beyæ ante waa pöni cæmompä. Wæntædämaï inte cöwë cæmompä. ²³ Gänë pönëninque ædæmö cæmompä.

Nämä wææ äninque nö cæmō ïmōmpa. Wængonguï Õnōwoca ingante ëñëninque mänōmaï cæmō adinque Wængonguï mönō cædönō ante wææ änāmaï ingampa. ²⁴ Mönō Codito quimō ïnömō inte mönō baō tōmengä tönō awænëmæ timpote baï wængaimō ïninque inguipogaque mönō cæinëwengainō adobaï awæ timpote baï ïñonte mönō abæ tawænte baï godïmo inte baonque ante mönō cæinëwënō ante ëñënāmaï inte cæmōmpa. ²⁵ Edæ Wængonguï Õnōwoca ængä beyænque quëwëmō inte mönō tōmengä Õnōwoca tönō guëa godongämæ cægonte baï quëwengæïmpa. ²⁶ Mänōmaï quëwëninque mönō nämä waa adāmaï ingæïmpa. Edæ wacä tönō guëa wæætedō wææte änāmaï ingæïmpa. Wacä gomonga ængä ingante mönō godō piinte adāmaï ingæïmpa.

6

Mönō wacä ingä wacä ingä ïñacabo cæcæïmpa, ante

¹ Botō tönïñamïni ëñëedäni. Wacä ëñënāmaï cædinque oda cæte wæcantawo. ïninque mïnitō Wængonguï Õnōwoca ingante mïni ëwocacabo ïñömō, Mäningä nē oda cædingä inte Wængonguï taadonque adodō pō gocæcäïmpa, ante cædinque tōmengä ingante ædæmō cæedäni. Mänōmaï cædinque nē apænecä guiquënë, Botō adobaï ëñënāmaï cæinente wïi bacæboïmpa, ante pönente wædinque nämä wææ cæedäni. ² Wacä teëmente mongænte baï entawengä ate wædinque mïnitō mönō Codito nänō, ïmaï cæedäni, angainō ëñente cædinque tōmengä nänō mongæncoo ïñacabo mongænte baï cædinque waa cæedäni.

³ Æcänō önonganque ïna inte, Botō ñænæmo ïnōmo ïmōpa, ante pönëna, tōmengä ïñömō nämä babæ apænete baï oda cæte pönengampa. ⁴ ïninque adocanque nämä nänō cæinō cōwä adinque adocanque nämä nänō cæinō cōwä adinque tōmämïni, Tömëmo æbänō cæboo, ante nämä apænte anguënëmïni ïmïnipa. Mänōmaï cædinque wacä nänō cæinō adāmaï inte waocä nämä nänō cæinonque cōwä adinque apænte äninque, Tömëmo nö cæbo ïmōpa, ante adinque tobaingampa. ⁵ Edæ adocanque nämä nänō cæquënëntō ante teëmente mongænte baï cædinque adocanque nämä nänō cæquënëntō ante teëmente mongænte baï cædinque tōmämïni eyepæ cæbaimïnipa.

⁶ Ayæ Wængonguï nänō apænëdō ante wacä apænecä ëñëninque nē ëñengä ïñömō tōmengä mäincoo pancacooga waincooga æninque nē apænecä ingante eyepæ pædæ godongä æncæcäïmpa.

⁷ Tömëmō tä bocate pæte incayō waocä wäänä adomō baï tä pete ængampa. Mänōmaï ingæïmpa, ante nē angaingä inte Wængonguï ïñæmpa oda cæcampa diyæ waocä wamō ænguingää. ïninque, Waocä æbänō cæcää, ante adinque Wængonguï pönō cæcä ate waocä nänō cægaï baï adobaï ænte wæcæcäïmpa. Ämo ëñëninque mïnitō wïi wacä wapiticæ nänō apænëdō beyæ oda cæquënëntō anguënë. ⁸ Edæ minte pædïmō baï tä pete ængä baï cædinque ïmæcaque ante nämä pönente nē cæcä guiquënë adobaï ïmæcaque nänō ñömænguinque æncæcäïmpa. Wææte Wængonguï Õnōwocaque ante pönëninque nē cæcä guiquënë Wængonguï Õnōwoca pönō cæcä beyænque tōmengä nänō cōwë wænāmaï quëwenguinque æncæcäïmpa. ⁹ ïninque mönō wæntæye badāmaï inte wadäni beyæ godōmenque waa cæcæïmpa. Ñimpo cædāmaï ïmō ïninque edæ Wængonguï, ïñedë æncæmïnimpa, ante nänō angäñedë ïinque bayonte mäniñedë mönō edæ tä pete baï eyepæ pönï æmaïmōmpa. ¹⁰ Mänōmaï beyæ mönō eyepæ ïmō ïñedë tōmänäni ïnänite mönō waa cæcæïmpa. Ayæ wadäni nē wede pönënanï ïñönänite mönō, Adomō ïmōmpa, ante pönëninque tōmënäni ïnänite godōmenque nangui cædinque waa cæcæïmpa.

Waa quëwencæmïnimpa, ante

¹¹ Botō önompoca yewæmöninque tōmëmo ñænæmōmo yewæmōmoï aedäni. ¹² Codito mönō beyæ awäa wængacäïmpa, ante nē pönënanï incæ pancadäniya, Mänine ante ëñëninque oodeoidi piināni wæcæ wæ, ante nämä wææ cæcæte ante cædänipa. ïninque tōmënäni, Eö togænte cæmöni ïninque oodeoidi wææte mönitō ïmönite waa

acædānimpa, ante cædinque mīnitō imīnite, Eö togæimīni bacæmīnimpa, änānipa. ¹³ Nē eö togæināni incæ edæ Wængonguī nānō wææ angainō ante dicæ ēñente cædāniyaa. Incæte tömēnāni, Mōnitō änō bai mīnitō do eö togæimīni bamīni ate wadāni mōnitō imōnite waa acædānimpa, ante cædinque mīnitō imīnite, Eö togæimīni baedāni, ante cædānipa.

¹⁴ Botō guiquēnē quiēmenque ante, Waa aedāni, ante dicæ ämogaa. Īñæmpa imæcaque ante botō cæinēmāmo ante botō, Codito nānō wængaiwāa tente bai wæinēmāmo impa, ante bai cædinque edæ mānimāmo ante æmæwo wido cætabopa. Ayæ tömēmo adobai Codito tōnō āanque bai awāa wænte bai ingaimo inte edæ imæcaque botō cæinēnō ante cædāmai ĩnōmo imopa. Īninque, Mōnō Awēnē Itota Codito awāa wæninque mōnō beyæ waa pōnī pōnō cægacāimpa, ante pōnente wædinque botō māniwænque tömengā nānō wængaiwænque ante waa ate apænedinque edæ wade ante cōwē waa ate tededāmai incæboimpa, ämopa. ¹⁵ Īninque eö togæimō incæ bagāamō incæ önonque pōnī edæ impa. Edæ Itota Codito badongā beyænque mōnō miimō quēwē-mompa. ¹⁶ Mānōmainō ante pōnente cæmīni ĩñōmīnite Wængonguī pōnō waadete piyænē cæcā adinque mīnitō gānē pōnente waa cæcæmīnimpa. Idægoidi imīnipa, ante Wængonguī nē nānō angaimīni incæ mīnitō mānōmai cæte quēwencæmīnimpa.

¹⁷ Botō Itota beyæ ante cæyōmō wadāni pānāni wædīmo inte botō do baonga ämogate ee ēñabo ĩñōmote ñōwo ĩncayæ ate mīnitō tömāmīni edæ ee amīni quēwēmoedāni.

¹⁸ Botō tōññamīni waa quēwencæmīnimpa, ämopa. Mōnō Awēnē Itota Codito pōnō waadete apænecā ēñēninque mīnitō mīmōnē adobai waadete entawencæmīnimpa. Māninque ante yewämōmopa, ante Amēē ämopa.

Epetoidi inänite Pabodo nänö cadota ante yewæmongainta

Waa quëwencæminimpa, ante

¹ Wængonguī angä ëñëninque Itota Codito botö ïmote da godongä gogaïmo inte botö Pabodobo inömö inte yewæmömopa. Epeto inömö quëwëmïni incæ mïnitö Wængonguī quïmïni inte Itota Codito nempo quëwëninque nê ædæmö cæte pönëmïni inömïnite botö, Mïnitö acæminimpa, ante yewæmömopa. ² Mönö Mæmpo Wængonguī tönö mönö Awënë Itota Codito piyænë cæte waadete pönö cæda ate mïnitö gänë pönëninque waa quëwencæminimpa, ante yewæmömopa.

Codito nempo quëwëninque mönö eyepæ ewocamompa

³ Mönö Awënë Itota Codito Wæmpocä inongante Itota inömö adocä ingantedö ante, Botö Wængonguī inongä ingampa, ante apænecäimpa. Ininque mönö inömö Codito tönö do öönädë æite bai tömengä nempo quëwëñömönte adocä Itota Wængonguī incæ tæiyæ waëmoncoo nê ewocagaingä inte pönö cæcä æninque mönö tömengä nänö ewocadoncoo tömancoo bai adobai eyepæ pönï ænte ewocamompa. Mänömaï cæcä adinque mönö tömengä ingante apænedinque, Bitö waa pönï cæbi æmönipa, ante watapæ apænecäimpa. ⁴ Tömengä inömö edæ, Codito nempo quëwëninque mïnitö botö ayömo edæ tæiyæ waëmö ewocamïni inte edæ wentamö mongænämaï incæminimpa, ante tömengä inguipoga nänö badönämaï inëdë incæ mönö imonte pönö apænte ængacäimpa. Ayæ mönö imonte waadete pönëninque tömengä, ⁵ Botö pæpogate bai æmo beyænque mïnitö inömö Itota Codito nempo quëwëninque botö wëmïni baquïmïni incæminimpa, ante cædinque tocæboimpa, angacäimpa. Ininque tömengä doyedë nänö angainö bai cædinque pönö angä ate mönö Wængonguī wëmö cöwë baquënëmö ingamöimpa.

⁶ Edæ nanguī waadete pönö cædinque tömengä nänö nê Waadecä ingante da pönongä æmompä. Mänömaï beyæ mönö inömö tömengä ingante, Bitö ñäö apæite bai ëmönömi inte mänömaï waadete pönö cæbi æmönipa, ante watapæ apænecäimpa. ⁷ Edæ tömengä nänö nê Waadecä inömö mönö imonte æncæte ante nämä wepæ godonte ængä beyænque mönö abæ tawænte quëwëmompä. Ayæ adobai tömengä wepæ inte ñä mënongacä beyænque ëñënämaï mönö cædö ante Wængonguī nanguī waadete pönö cædinque ñimpo cæcä quëwëmöimpa. ⁸ Tömengä inömö edæ, Æbänö ï, ante tömänö ante nê ëñëngä inte, Æbänö cæquiï, ante edæ nöingä ëñëninque mönö beyæ ante godömenque nanguī pönö cæcä æmöimpa. ⁹ Ayæ edæ, Codito tönö guëa cædinque nämä botö änö bai cæte tocæboimpa, ante Wængonguī angacäimpa. Tömengä mänömainö ante nänö wëmö inömö angainö ante mönitö imönite ñöwo edonque pönï odömönte apænecä ëñëmönipa. ¹⁰ Tömengä, Iñnedë cæcæboimpa, äninque tömengä nänö angaiñedë iinque ba ate tömengä nänö angainö bai edæ iinque cæcæcäimpa. Edæ öönädë ongoncoo tönö inguipoga ongoncoo tömancoo tē gæte mämö adocanque nempo Codito Awënë nempo godömo æncæcäimpa, ante cæcampa.

¹¹ Nämä pönente nänö angainö bai tömänö ante adobai pönï nê cædongä inte Wængonguī, Imaï cæcæboimpa, ante pönente ate cöwë cæcampa. Ininque tömengä, Codito nempo quëwënanï inänite æncæboimpa, ante nänö pönente angainö bai cædinque, Mïnitö Codito nempo quëwënguïmïni incæminimpa, ante pönëninque mönitö imönite apænte ængacäimpa. ¹² Mönitö, Codito beyæ watapæ bacæimpa, ante täno pönëmöni inömönite tömengä, Botö ñäö ëmönö ante watapæ apænemïni bacæminimpa, ante mönitö imönite pönö apænte ængacäimpa.

¹³ Ayæ, Codito pönö ængä beyænque mïnitö quëwencæminimpa, ante Wængonguī watapæ nänö apæneganö ante ëñente pönëninque mïnitö epeteomïni adobai Codito

nempo quëwëmini iminipa. Wede pönëmini adinque Wængonguï, Botö wëmini iminipa, ante edonque acäimpa, ante odömoncæte ante tömengä ëmowo ante minitonga yewëmonte bai cædinque tömengä Tæiyä Waëmö Önöwoca ingante da pönongä ænte ëwocaminipa. ¹⁴ Edæ Wængonguï, Botö quimini inömini inte minitö abæ tawænte mïni goyedë minitö ænguincoo mänïñedë ate eyepä pönï æncæminipa, angampa. Äninqe tömengä, Nö pönï impa, ante ëñencæminipa, ante cædinque tömengä Önöwoca ingante ñowo da pönongä ænte ëwocamompa. Ininqe pancacooga do ænte bai ëwocamö inte mönö, Ìncayä ate mönö tömancoo ænguinque impa, ante edonque ëñengäimpa. Tömengä mänömaï cæcä adinque mönö, Wængonguï bitö godömenque ñäö apäite bai bitö ëmonguinque mänömaï cæbipa, ante watapä apænecäimpa.

Nö ëñänäni bacæðänimpa, ante Pabodo apænecampa

¹⁵ Botö iñömö, Epeteoidi mönö Awënë Itota ingante wede pönänäni inänpa, ante tededäni ëñentabopa. Ayä adobai, Wængonguï quinäni tömänäni inänite epeteoidi iñömö waadete pönänäni inänpa, ante ëñëniimo inte, ¹⁶ botö ñimpo cæðamaï inte Wængonguï ingante cöwë waa ate pönëninque apänebopa. Ayä minitö beyä ante cöwë apänebopa. ¹⁷ Itota Codito mönö Awënë iñongante Wængonguï iñömö adocä Codito Wængonguï inongä ingampa. Ayä në Mæmpocä inongä inte tömengä ñäö ëmönongä ingampa. Tömengä ingante apænedinque botö, Bitö Önöwoca ingante da pönömi æninqe epeteoidi iñömö në ëñänäni bacæðänimpa, ante apänebopa. Ayä, Bitö Önöwoca pönö odömongä adinque epeteoidi wæätë Itota Codito ingante do ate bai æðämö pönencæðänimpa, ante botö minitö beyä ante Wængonguï ingante cöwë apänebopa.

¹⁸ Wængonguï pönö cæcä beyænque watapä bacäimpa, ante minitö pönente tocæminipa, ante cædinque Wængonguï minitö iminipa aa pegacäimpa. Ayä adobai, Mönö tömengä quimö inte tæiyä waëmö bayömonte tömengä nänö godömenque ñäö ëmonguinque mönö imonte ængacäimpa. Mänine mënea edæ näwangä inepa, ante minitö ëñencæminipa, ante botö, Wængonguï bitö tömënanäni mimönë tica ënente bai odömonte apänebi ate do ëñencæðänimpa, ante Wængonguï ingante apänebopa. ¹⁹ Mönö në pönëmö iñömonte Wængonguï nänö pönö cæquinö ante tömengä nänö tæi pïñämämo æpodö i, ante mönö ædö cæte tee mante aquï. Incæte minitö, Mänimämo ante æpodö i, ante epeteoidi ëñencæðänimpa, ante botö Wængonguï ingante apänebopa. Edæ, Tömengä nänö tæi pïñämämo iñömö æbänö i, ante ëñencæte ante mönö, Tömengä gomonga tæi pïñænongä inte iïmaï cægacäimpa, ante ëñengäimpa.

²⁰ Në tæi pïñænongä inte Wængonguï angä ate mönö Codito iñömö do wæningä inte edæ do ñäni ömæmongacäimpa. Ayä godömenque tæi pïñæninqe Codito ingante öönädë ænte mäëdinque Wængonguï tömëmæ inö angä Codito tæ contagacäimpa. ²¹ Edæ æcämenque pedænguipoga iñonte mïnguipoga iñonte ñænængä inte në angä inaa, æcämenque në awënë inaa, æcämenque tæi pïñænte ongongä inaa, æcämenque ingante, Awënë ingampa, ante godö pemönänii mäninäni tömänäni önönänique incæðänimpa. Mönö Codito adocanque ingante ogä æænonte bai cædinque Wængonguï angä ate tömengä wæätë Tæiyä Awënë bacä acäimpa. ²² Ayä Wængonguï tömäo iñömö ongoncoo Codito önöwaca inö pönö wææntodöninque edæ, Bitö edæ Tæiyä Awënë inömi inte edæ æmonga pönï ongoncæbiimpa, angacäimpa. Ayä, Bitö imite godongämæ në pönänäni tömënanäni Ocamö bai iñömite, ²³ tömënanäni wæätë bitö baö bai adoyonque bai incæðänimpa. Codito ingante mänömainö ante apænedinque Wængonguï, Bitö në Awënë inömi inte tömäo iñömö ongoncoo tömancoo bitö nempo ongoncooque bacäimpa. Ayä bitö imite në pönänäni iñömö bacoo inäni yebänäni ininqe bitö ënempodö eyede pönï bacäimpa, ante Wængonguï Codito ingante pönö cægacäimpa.

2

Wængonguï nänö waadete pönëni beyænque quëwëmö

¹ Minitö guiquenē wēenēnedē ēñēnāmaī cæte quēwēmīni inte wēnæ wēnæ mīni cædō beyæ dobæ edæ wæwocaimīni ingamīnīmpa. ² Nē inguipogaque ante pōnēnāni taadō adodō cægonte baī mīnitō māniñedē edæ wēnæ wēnæ cæte quēwengamīnīmpa. Ayæ wēnæidi tæi pīñænte nāni owocabo awēmō iñōmō nāni cægōnō adodō gote baī mīnitō tōmēnāni awēnē mīñæ tee empote godinque wēnæ wēnæ cægamīnīmpa. Nōwo incæ Wængonguī nānō ānō ante nē ēñēnāmaī cæte quēwēnāni guiquenē adocā wēnæ awēnē nānō pōnēwēnō ante ēñente ēwocadinque cædānīpa. ³ Wēenēnedē tōmēnāni tōnō godongāmæ quēwēnīnque mōnō tōmāmō adobaī imæcaque ante pōnēnīnque mōnō towēmāmoque ante quēwengamōīmpa. Quiēmenque ante towencæte ante mōnō cæinēwēnō ante cædinque mōnō ocaidē ædēmenque pōnēnīnque mōnō cæinēwēnonque cæte quēwengamōīmpa. Īnīnque wadāni nāni tente wæquēnēnō baī mōnō adobaī imæcaque ante pōnente nē cæmō iñōmō inte edæ Wængonguī nānō pīinte panguēnēmāmo ante edæ do tente wæquēnēmō ingamōīmpa.

⁴ Mānōmaī ingaīmō iñōmonte Wængonguī mōnō imonte nanguī waadete pōnēnīnque iīmaī nanguī waadedongā inte pōnō waa cægacāīmpa. ⁵ Mōnō ēñēnāmaī cægainō beyæ ante wæwocate wæyōmonte tōmengā pōnō cæcā beyænque mōnō Codito tōnō godongāmæ quēwēmōmpa. Mīnitō edæ Wængonguī nānō waadete pōnō cægainō beyænque quēwēmīni imīnīpa. ⁶ Wængonguī angā Codito nāni omæmōñongā mōnō tōmengā tōnō godongāmæ nāni omæmonte baī mīimō badīnque quēwengamōīmpa. Ayæ mōnō tōmengā nempo quēwēmō iñōmonte Wængonguī iñōmō Itota Codito ingante ææntodōnīnque mōnō imonte oōnædē ææntodonte Itota tōnō pōnō gōnongā tæ contate baī ongōmōmpa. ⁷ Mānōmaī Itota Codito nempo quēwēñōmonte Wængonguī iñōmō, Botō pōnō waadete cædinque godōmenque gomonga cæbo acædānīmpa, ante cægacāīmpa. Ayæ, Mīinguipo badōmo ate botō māniñedē ate odōmōmo adīnque tōmānāni, Wængonguī nānō waadete pōnō cæganca wadāni dicæ adoganca cædānīyaa, ante wæcædānīmpa, ante cæcæte ante mānōmaī cægacāīmpa.

⁸ Edæ Wængonguī nānō waadete pōnō cægainō beyænque mīnitō mīni quēwenquinque wede pōnēmīni bamīnitapa. Incæte mīnitō dicæ nāmā mīni cæinō beyænque nē wede pōnēmīni bamīnitawogaa. Wæætē edæ Wængonguī pōnongā ænīnque mīnitō nē wede pōnēmīni bamīnitapa. ⁹ Īnīnque, Nāmanque cæte quēwēmō aedāni, ante mōnō edæ ānāmaī ingæīmpa. Īñæmpa wīi mōnō cædō beyæ quēwēmōmpa. ¹⁰ Edæ Wængonguī nānō nē badongāīmō iñōmō imōmpa. Ayæ, Codito nempo nē quēwēnāni iīmaī cædinque waa cæcædānīmpa, ante tōmengā wēenēnedē mōnō cæquēnēnō ante eyepæ badongacāīmpa. Īnīnque mōnō imonte badōnīnque tōmengā, Codito Itota nempo quēwēnīnque mīnitō mīni waa cæquēnēnō ante edæ cæte quēwencæmīnīmpa, ante pōnō badongā bagamōīmpa.

Codito beyænque ganca pōnēmōmpa, ante

¹¹ Mānōmaī beyæ mīnitō, Doyedē iīmaī ingatīmpa, ante pōnēedāni. Oodeoidi iñōmō ōnompoca æmontaique eō togæīnāni inte nāmanque ante edæ, “Nē eō togæīmōni imōnīpa,” ante pemonte baī apænedānīpa. Wæætē mīnitō oodeomīni ināmaī nē ēñagāīmīni iñōmīnite, “Bagāamīni imīnipææ,” ante mānīnāni pīiwēnāni wægāmīnīmpa. Īnīnque mīnitō māniñedē æbānō ingaīmīni inōmīni, ante yewæmōmo ate pōnēedāni. ¹² Māniñedē edæ mōnō Codito nempo quēwēnāmaī ingaīmīni inte mīnitō mōni idægocabo nempo adobaī edæ quēwēnāmaī inte nānēnē quēwengamīnīmpa. Īnīnque Wængonguī, iīmaī cōwē pōnō cæcæboīmpa, ante nānō angāinō ante mōnitō godongāmæ Ao ante ēñente quēwēñōmōnīte mīnitō wæætē gobæ nānēnē quēwēnīnque Wængonguī nānō angāinō ante edæ ænāmaī ingamīnīmpa. Watapæ bacæīmpa, ante mōnitō pōnēnō ante mīnitō iñōmō nānēnē quēwente ædō cæte watapæ pōnente toquīmīni. Gobæ quēwēnīnque mīnitō Wængonguī nempo edæ quēwēnāmaī ingamīnīmpa. ¹³ Incæte mīnitō gobæ nē quēwēnōmīni iñōmīnite Itota Codito nāmā wepæ godonte ænīnque mīnitō imīnite ænte māmongā eyequeī pōnī pōnīnque mīnitō nōwo tōmengā nempo quēwēmīnīpa.

¹⁴ Wëenëhedë mōnitō tōnō mīnitō guēadō guēa cædōmō ingaīmō inte mōnō, Nānēnē incāmīnīmpa, ante wææ cæ impa tæcæguedē wææ gōnonte baī cægāmōmpa. Codito iñōmō nē piyænē cædongā inte, Wææ cæ impa, mōnō ānōmpa bæ tate wido cæte baī cædinque mōnō imonte āññōmonque badongā bamōmpa. Īnīnque tōmengā mīmōnē nē piyænē cæte entawēnongā ingā beyænque mōnō adobaī gānē pōnēmōmpa. ¹⁵ Edæ Wængonguī, Īīmaī cæedāni, ante wade wade ante nānō wææ angaīnō ante ēñēnīnque dodāni godōmenque wææ angadānīmpa. Mōnō Codito iñōmō inguipoga pōnīnque mānīne ante tōmānō ante ēñente cæte quēwengacāīmpa. Ayæ, Idæwaa wææ ante impa, ante baī cædinque tōmengā mānīne ante nāmā baonga mongænte wænīnque tee moncate baī cægacāīmpa.

Mānōmaī cædinque tōmengā, Mīnitō mencaboga inte nānēnē quēwēmīni incæte ñōwo piyænē cæte botō nempo godongāmæ quēwencāmīnīmpa, ante cædinque mōnō imonte ænte wempo cægacāīmpa. Īnīnque mōnō edæ piyænē cæte quēwenguīnque edæ āññōmonque bagāmōmpa. ¹⁶ Itota Codito ingante awāa timpodāni wængā Īnīnque tōmengā mōnō guēadō guēa pīinte cægāīmāmo ante ænte mongænte wido cæte baī wængā beyænque mōnō piyænē cæmō bagāmōmpa. Ayæ ado tōmengā awāa nānō wængaīnō beyænque mōnō tōmāmō adocabomō bamō adīnque Wængonguī wæætē piyænē cædinque mōnō imonte Ao ānīnque ængacāīmpa. ¹⁷ Mīnitō guiquēnē gobæ nānēnē quēwēñōmīnīte mōnitō guiquēnē Wængonguī weca eyequeī quēwēñōmōnīte Codito iñōmō inguipoga pōnīnque mōnō tōmāmō imonte apænēdinque, Piyænē cæte gānē pōnente quēwēedāni, ante pōnō apænecā ēñentamōmpa. ¹⁸ Tōmengā nānō pōnō cægāīnō beyænque mōni oodeocabo adobaī mīnitō wamīni adobaī mōnō tōmāmō Wængonguī Ōnōwoca adowocaque ingante ēwocamō inte mōnō Wæmpocā weca tōmāmō do pōmōmpa.

¹⁹ Īnīnque mōnitō Wængonguī quīmōni do bagāīmōni inte Wængonguī nempo quēwēmōni ingaīmōni baī Codito nānō pōnō cægāīnō beyænque mīnitō adobaī mōnitō tōnō adocabomīni do badīnque edæ Wængonguī nempo quēwēmīni ĩmīnīpa. Īnīnque mīnitō ñōwo idæwaa wamīni ingamīnīmpa. Wīī wabæca quēwente baī edæ tōmēmīni oncōnē ponte owote baī mīnitō ñōwo Wængonguī nempo quēwēmīnīpa. ²⁰ Waodāni dica tāno gōnōnīnque tānocaa wænōmēnæca mænōnāni baī Wængonguī adobaī cædinque Itota Codito ingante tāno gōnongā ongōñongante tōmengāa godō mænonte baī cædinque mōnō imonte ĩīmaī cædinque pōnō gōnongā gongæmōmpa. Codito nānō nē da godongāīmōni tōnō tōmengā beyæ nē apænēmōni tōnō iñōmōnīte Wængonguī mōnitō ĩmōnīte ænīnque wænōmēnæca gōnongā gongæñōmōnīte wadāni ĩnānīte gā æænō tæī mænonte baī gōnongā gongænānīpa. ²¹ Codito nempo quēwēñōmōnīte Wængonguī mōnitō ĩmōnīte adocooga gō cæte baī pōnō tæī mænongā ate mōnitō æicō baī bacō baī bamōnīpa. Edæ Wængonguī Tæiyæ Waēmō Ōnōwoca ingante āanque baī ēwocadīnque mōnitō godongāmæ Awēnē tæiyæ waēmō oncō baī bamōnīmpa. ²² Bayōmōnīte mīnitō adobaī tōmengā nempo ongōñōmīnīte Wængonguī mīnitō ĩmīnīte ænīnque mōnitō tōnō godongāmæ māmō adocooga gō cæte tæī mænonte baī cædinque, Mīnitō botō Ōnōwoca tōnō āawocaque baī ēwocadīnque botō owoquincō baī bamīnīpa, ante pōnō badongacāīmpa.

3

Oodeoidi ĩnāmaī ĩnāni ĩnānīte apænecæ gotabopa, ante

¹ Mānīnō beyæ ĩīmaī ante apænēbopa. Botō Pabodobo iñōmō Codito beyæ ante oodēomīni ĩnāmaī ĩmīni ĩmīnīte apænecæte ante cæyōmote botō ĩmote edæ tee mōnedāni wædōmo inte yewæmōmōpa.

² Mīnitō oodeomīni ĩnāmaī ĩmīni iñōmō ĩīmaī ante wabānō ēñēmīnitawo. Wængonguī pōnō angā ēñēnīnque botō mīnitō beyæ tōmengā nānō waadete cædōnō ante nē apænēquēnēmo batabopa. ³ Mānīnō ante botō, Wængonguī awēmō nānō cægāīnō ante botō ĩmote edonque odōmongā atabopa, ante do wædænque yewæmōmo amīnitawo.

Edæ adodö ante ñowo yewæmömopa. ⁴ Ìnque mänömainö ante botö do yewæmöninta adinque mīnitö, Mönö Codito awëmö nänö cægainö ante Pabodo do ate bai ëñengampa, ante ëñëmaiminipa. ⁵ Mönitö wæmæidi nāni quëwëñedë nē quëwengaināni iñömö, Mönö Codito iincayæ ate pöninque æbänö awëmö cæquingää, ante ëñënaimai inte wægadānimpa. Ñowo guiquënë Codito beyæ nē apænedāni tönö mönitö tömengä nänö nē da godönimöni tæiyæ waëmö bamöni iñömönite Wængongui Önowoca mäninö ante edonque odömonte apæneca ëñëmönipa.

⁶ Ìimai ante impa. Mönitö Wængongui nänö pönonguincoo nē ænguimöni iñömönite mīnitö oodeoidi ināmai imini inte mönitö tönö adocabomini badinque edæ mönitö tönö godongämæ nē ænguimini adobai baminipa. Ayæ, Itota Codito tönö pönö cædinque Wængongui nänö, Cöwë cæcæboimpa, ante angainö do cægacaimpa, ante watapæ pönëninque mīnitö mönitö tönö edæ godongämæ quëwencæminipa.

⁷ Wængongui nē tæi piñænongä inte waadete pönö nangui cæcä adinque edæ tömengä beyæ nē cæbo badinque botö Codito ingantedö ante nē watapæ apænebo batabopa. ⁸ Mönö tömämö Wængongui quimö iñömonte botö iñömö wamini bai wii imopa. Botö adoboque wädämo pönö imo incæte Wængongui waadete cædinque pönö angä ëñëmo inte botö mīnitö iminite nē apænebo batabopa. Codito nänö pönö cægainö ante æpodö i, ante mönö ædö cæte tee mante ëñenguüi. Incæte Wængongui waadete pönö cæcä beyænque botö iñömö Codito waa pönö nänö pönö cægainö ante edæ oodeo ināmai imini iminite nē apænequënëmo batabopa. ⁹ Ayæ Wængongui tömancoo nē badongaingä inte wëëñëñedë nāmanque entawëninque awëmö nänö wë wodongäinö ante botö imote odömonte apænecantapa. Ayæ, Pabodo mäninö ante edonque odömonte apænequënegä ingampa, ante tömänāni ëñencædānimpa, ante pönö apæneca æntabopa.

¹⁰ Codito ingante mönö godongämæ pönencabo iñömonte tömengä wadö wadö ante tömänö ante nē ëñengaingä inte mönö tönö godongämæ cæcampa. Mönö tönö mänömai cædinque tömengä, Botö wadö wadö ante tömänö ante botö ëñengainö ante adinque öönædë quëwëñāni awëñëidi tönö mänñömö nē änāni tönö wæcædānimpa, ante cægacaimpa. ¹¹ Wëëñëñedë pedämämo iñönte Wængongui, Cæbo ate awëñëidi incæ wæcædānimpa, ante cöwë pönengacaimpa. Ñowo iñömö tömengä mäninö ante nänö pönengainö ante tömengä mönö Awënë Itota Codito tönö godongämæ cædinque do cægacaimpa. ¹² Codito nempo nē quëwëmö inte mönö tömengä ingante wede mönö pönëñö beyænque guñëñāmai inte Wængongui weca do pöninque apænemompa. ¹³ Mänömai impa, ante edæ mīnitö do ëñëminipa. Ìnque botö mīnitö beyæ ante cædinque botö caate wädö ante pönëninque mīnitö wæætë wädāmai iedāni. Wæætë, Mönitö godömenque ñäö bai ëmoncæmönimpa, ante Pabodo caate wæcampa, ante pönëninque mīnitö wädāmai incæminipa ämopa.

Codito nänö pönëñö ante

¹⁴ Mäninö beyæ mönö Awënë Itota Codito Wæmpocä iñongante botö tömengä önowoca inö da guicapodinque apænebopa. ¹⁵ Tömengä iñömö edæ adocanque näwä Wæmpocä ingampa. Ìnque inguipoga quëwëmö incæ öönædë quëwëñāni incæ tömengä ingante, Mæmpo, ante nē tedemö iñömö mönö tömengä tönö mönö wæmpocabo bai imompa.

¹⁶ Ìnque mönö Wæmpocä ingante apænedinque botö mīnitö beyæ ante iimai ante apænebopa. Wængongui bitö nē ñäö bai entawëmi inömi inte bitö Tæiyæ Waëmö Önowoca ingante epeteoidi inānite da pönömi æninque tömëñāni wæætë edæ mimö tæi piñænte entawencædānimpa, ante apænebopa. ¹⁷ Ayæ, Mönö Codito adobai mīnitö weca pönongante mīnitö mimönë wede pönëninque tömengä ingante ædæmö entawencæminipa, ante mönö Wæmpocä ingante apænebopa. Ayæ, Awæ ædæmö guiwa inte tömëmæ äwäate pæwæ bai cædinque mīnitö iñömö adobai tömengä nänö waadete pönëmämo entawëninque edæ mimönë tæi ongömini bacæminipa. ¹⁸ Ayæ mönitö Wængongui quimöni tönö mīnitö adocabomini inte tæi piñæmini badinque,

Itota Codito nänö waadete pönönö ante ægancadö owoo, ante eñencædänimpa, ämopa. Ayæ, Tömengä nänö waadete pönönö iñömö edæ yepanca pöni owopa, oopänö pöni owopa, æibæ pöni owopa, wincamö pöni owopa, ante eñencædänimpa, ante apænebopa. ¹⁹ Ayæ edæ, Mönö Codito waadete nänö pönönö æbänö gomonga pöni owoo, ante mönö ædö cæte eñenguüi, ante mönö wædö incæte mīnitö mäninö ante eñencæmīnimpa. Ayæ edæ, Mäninö ante eñēmīni inte mīnitö Wængonguü nänö nanguü entawönö edæ eyepæ pöni entawencæmīnimpa, ante botö mönö Wæmpocä ingante apænebopa.

²⁰ Mönö änö ante ayæ mönö pönönö ante eyepæ cædongä inte Wængonguü iñömö mönö imonte tæi piñante nänö cæpāmo ganca cædinque nanguü gomonga cæcä ingampa. İninqe nōwo iñömö mönö Wængonguü ingante waa ate pönente apænecæimpa. ²¹ Edæ do wænte æigainäni tönö ayæ ate eñate quëwenguünäni tönö mönö tömämö Codito ingante godongämæ mönö pönencabo inömö inte Itota Codito ingante ëwocadinque mönö godongämæ apænecæimpa. Mæmpo Wængonguü eñēmi. Bitö adobique nāö ëmongaimi inömi imipa, ante mönö nimpö cædāmaï inte cōwë waa ate apænecæimpa. Mänömaï impa, ante botö, Amëë, ämopa.

4

Codito nempo quëwëninque adocabomö imompa

¹ Waa cæte quëwencæmīnimpa, ante Wængonguü aa pecantapa, ante eñēmīni inte mīnitö tömengä nänö änonque ante eñente cædinque quëwencæmīnimpa. Botö mönö Awënë beyæ tee mönete wæcōmo incæ ämo eñēedäni. ² Mīnitö nämä ængö cædāmaï inte, Önömoque bai imopa, ante pönëninque wadäni inänite edæ ædæmö cæedäni. Æiquedö waa cæquünäni, ante wædāmaï inte edæ piyænë cæte quëwëedäni. Ayæ wadäni mīnitö imīnite wënæ wënæ cædäni wædinque tömënäni inänite wæætë piināmaï inte ædæmö waadete cæedäni. ³ Mīnitö, Mönö pönencabo piyænë cædinque cōwë adodö ante pönente edæ Wængonguü Önöwoca tönö äanque bai ee ëwocacæimpa, ante nanguü cædinque wacä ingä wacä ingä edæ waa cæedäni.

⁴ Mönö Awënë pönö cæcä ate watapæ bacæimpa, ante mīnitö adodeque ante pönente tocæmīnimpa, ante Wængonguü mīnitö imīnite edæ adodeque ante aa pegacæimpa. İninqe mänine, Watapæ bacæimpa, ante mīni pönëne adodeque i bai Wængonguü Önöwoca edæ adobaï adowocaque inte quëwengampa. Tömengä adowocaque nempo quëwënömö inte mönö adobaï edæ adocabomonque inömö imompa. ⁵ Mönö Awënë edæ adocanque pöni inongä iñongante tömengä ingante mönö wede pönönö adobaï adodeque pöni inepa. Ayæ adodö ante pönëninque æpænë guidinque mönö adopænenque guite bai guitamompa. ⁶ Wængonguü adocanque pöni inongä inte tömengä tömämö Wæmpocä adocanque ingampa. Tömengä iñömö edæ Tæiyæ Awënë pöni inongä inte tömämö imonte në aacä ingampa. Tömengä adocanque pöni nempo quëwëñomonte tömengä wæætë mönö tömämö mimönë quëwengampa.

⁷ Incæte mönö Codito, Mīmönë bitö entawenganca ænte cæe, ante tee mante bai cædinque adocanque ingante waadete pönö cædinque wacä ingante waadete pönö cædinque edæ tömämö imonte tömengä nänö pönö cæcoo eyepæ pönongä æninque entawëmompä. ⁸ Codito mänömaï cæcæcæimpa, ante pönëninque awënë Dabii wodi iimaï ante yewæmongacæimpa.

“Tömengä æibæ æicæ cædinque wadäni inänite bæi ongonte nā cæyænte tömengä miñä ænte mäicä æigadänimpa.

Ayæ æidinque tömengä mönö waocabo iñömönte, Mīnitö entawenguünö, ante eyepæ pædæ pönongä ænte entawengamöimpa,”
ante Dabii nänö yewæmönöte angainö bai impa.

⁹ Mänine, “Æigacæimpa,” ante näni angäine iñömö quīnante yewæmongatīi. Edæ, Tömengä inguipoga tadömengadæ do wææningä inte æigacæimpa, ante odömoncæte ante yewæmongatimpa. ¹⁰ Në wæængaingä inongä iñömö adocä do öönædë gömonga æidinque inguipoga tömäo öönædë tömäo tömäo iñömö edæ godömenque æibæ pöni

quëwengä inongä ingampa. ¹¹ Tömengä tömancoo në ënempocä inongä inte adocä mönö waomö imonte pönö angä ænte entawëninque mönö iïmai cämö bamöimpa. Pancamöniya imönite tömengä angä ëñëninque tömengä nänö në da godongaimöni batamönipa. Pancamöniya guiquënë Wængonguï waa pönï nänö pönö cægainö ante në apænemöni batamönipa. Pancamöniya guiquënë Wængonguï beyæ në apænemöni batamönipa. Pancadäniya guiquënë në aadäni badänitapa. Ayæ pancadäniya guiquënë në odömönte apænedäni badänitapa. ¹² Mänömai pönö cædinque mönö Codito mönö ocamö bai inongä inte, Botö baö bai adoyonque bai inäni iñömö ñancæ äate bai tæi piñänäni ëwocacädänimpa, ante pönö cægacäimpa. Mönö imonte tömengä, Minitö Wængonguï quimïni inömïni inte tömänäni inänite në cæmïni inte godö cæcæminimpa, ante pönö cægacäimpa.

¹³ Mïni wede pönënö ante mïnitö tömämïni adoyömö ante pönencæminimpa, ante mönö Codito pönö cægacäimpa. Ayæ, Botö Wængonguï Wëmo iñömöte mïnitö botö imöte ate bai pönencæminimpa, ante tömengä pönö cæcampa. Ayæ æmæwo pæmïni bai mïni baquinque mïnitö botö entawënö ædæmö entawencæminimpa, ante Codito edæ da pönongä eyepæ æmompä. ¹⁴ Inique æmæwo pædimö inte wëñæmö inämai imö inique mönö edæ oda cædämai ingäimpa. Wadäni guiquënë mä pönëninque, Æbänö cämö ate oda cæquïnänii, ante edæ nämæneque tedewënanipa. Tömënäni iñömö edæ babæ cæcæte ante cædinque waa cæte bai cædäni ataqeedäni. Woboyæ ædæ go ædæ go pæmænte bai cædinque tömënäni wadö ante odömönte tedewënanipa. Mänömai wido piñænte bai cædäni incæte mönö iñömö Codito nänö entawënoncoo ænte entawëninque ää mænämai ingäimpa.

¹⁵ Wæätë Wængonguï, Näwangä pönï impä, ante nänö apænegaïnö ante mönö tömänäni inänite waadete pönëninque apænecäimpa. Mänömai cædinque mönö Codito baö bai iñömönte tömengä në Ocamö bai inte pönö angä beyænque mönö ñancæ äadinque godömenque picæmö bamompä. ¹⁶ Mönö baonga wepæ eyepæ ëñadinque ñancæ äadinque tæi piñænte pæte quëwëmompä. Adobai mönö Codito baö tönö adoyonque bai inömö inte mönö tömengä nänö apænedö ante ëñënömo inte ñancæ äate pæte bai quëwëmompä. Ayæ wæätë ocai encamö inte mönö pæ pagænguinque wangö ténämai oguincai bamë impä. Ayæ adobai mönö Codito nänö waadete pönënö ante mïmönë entawëmö inte mönö wacä ingä wacä ingä godö aamö inte mönö pönencabo incæ edæ tæi piñænte entawëmompä.

Codito nempo mönö iïmai quëwëmompä, ante

¹⁷ Inique mönö Awënë nempo quëwënömo inte botö nö ämo ëñëedäni. Wadäni në ëñänämai inäni önonquedö ante pönëninque quëwënanipa. Mïnitö guiquënë adobai quëwengaimïni inte ñöwo wæätë ñimpo cædinque mänömai cædämai ingüënë quëwëmïni. ¹⁸ Tömënäni guiquënë mïmö ënënanipa diyæ Wængonguï weca ponguïnänii. Mïmö ömædënanäni inte tömënäni ocai ëñänämai badäni beyænque Wængonguï weca pönämai inänipa. Edæ wentamö mongænique tömënäni ocai wëmö encadäni inte idiquibæ ante pönënanipa. ¹⁹ Inäni iñömö tömënäni nänö cæquënënö ante ñimpo cædinque ñöwo wæätë guñänämai inte baö nänö towëinënö ante cæcæte ante nämä pædæ godönte bai edæ cædänipa. Edæ, Quiëmë wiwa cæquïi, ante mänïnonque cæcæte ante godömenque cæinente wædänipa.

²⁰ Wæätë mïnitö guiquënë, Mönö Codito æbänö ingäa, ante pönëninque edæ wïi tömënäni nänö cæinëwënö bai mïni cæquinque edæ pönëmïnitapa. ²¹ Tömengä apænecä edæ wïi ëñëmïnitawo. Inämpä, Wængonguï nö pönï nänö apænegaïnö ëñëninque Itota iñömö mïmönë entawengampa, ante mïnitö tömengä nempo quëwëñöminite tömengä mänömainö ante adodö ante edæ do odömönte apænecä ëñëmïnitapa. ²² Mïnitö wëenëñedë mïni cæte quëwengainö ante tömengä iïmai ante odömönte apænecäimpa. Babæ pönente mïni cæinente wæwënö beyæ mïnitö mïmönë wentamö mongænte wæwëmïni inte do mïni entawengainö ante edæ wido cæedäni, ante odömönte apænecäimpa. ²³ Edæ mempoga ëñagaimïni inte mïnitö ëñënö do mïi pönï

encamini inte miinonque ante pönencæminimpa, ante odömonte apæ necä ëñëmïnitapa. ²⁴ Ayæ, Botö pönö badömo ate mïnitö botö bai tæiyæ waëmö ewocadinque nö pönï cæte quëwencæminimpa, ante Wængonguï pönö badongä ate mïnitö miïmini bagaminimpa. Ìninqe tömengä, Mäninö Wængonguï nö pönï nänö entawënö æninqe mïnitö ædæmö entawencæminimpa, ante odömonte apæ necä do ëñëmïnitapa.

²⁵ Mänömaï beyæ mïnitö tömämïni, Mönö adocabomö ïmompä, ante adinqe babæ mïni tedewëninö ante ñimpo cædinque wacä ingante wacä ingante näwangä ante apæneedäni.

²⁶ Ænguï bamïni incæte mïnitö piyænë cædinque wacä ingante wënæ wënæ cædämaï ee aedäni. Edæ gawadecæ ganca nanguï piïninqe edæ mïni wæquinque ïmaimpa.

²⁷ Mänömaï cædinque mïnitö, Wënæ incæ pönö cæcä ate botö ænguï batabopa, ante pönente wædinque ñöwo wæætë, Wënæ botö weca pönämaï incæcäimpa, ante nämä wææ cæedäni.

²⁸ Në awëmö æningä ïñömö ñöwo edæ ee cædinque awëmö ænämaï incæcäimpa. Wæætë, Botö önompoca nanguï cædinque ænte quëwëninque në ænguënänäni ïnänite adobaï godömo æncædänimpa, ante cæcæcäimpa.

²⁹ Mïnitö nämä önöne wææ adinqe wiwa ante tededämaï ïedäni. Wæætë edæ, Wädäni æbänö ante ëñenguënänäni ïnänii, ante pönëninque mïnitö, Tömënanäni tæï piñante entawencædänimpa, ante cædinque në ëñënäni beyænque ante waadete godö cædinque apæneedäni. ³⁰ Wængonguï Tæiyæ Waëmö Önöwoca ïñömö mïnitonga pö guïdinque, Botö æmo beyænque mïnitö ïncayæ ate æmæwo abæ tawænte gote bai quëwencæminimpa, ante odömoncæte ante yewæmonte bai cægacäimpa. Ìninqe mïnitö, Wënæ wënæ möni cædö beyæ ante Wængonguï Önöwoca wæwente badämaï incæcäimpa, ante wææ cædinque edæ ëñente cæedäni.

³¹ Ayæ, Wiï waëmö awædö, ante mïni piïwëninö ante edæ ñimpo cæedäni. Äïmö ante mïni pönëwëmämö adobaï ñimpo cædinque ænguï pönï mïni badimämö edæ ñimpo cæedäni. Yæ ante mïni piïnte ogæ tedewëmämö, wacä ingante ante mïni piïnte tedewëmämö edæ ñimpo cæedäni. Ayæ piïnte cæquinque ante mïni entawëninö ante tömänö edæ wido cæedäni. ³² Wæætë godongämæ waadete cædinque wacä caate wæcä adinqe mïnitö godongämæ Ca ca wæcæminimpa. Ayæ Codito ængä beyænque Wængonguï mïnitö ïmïnite pönö ñimpo cæcampa cæmïni. Tömengä ñimpo cæcä quëwëmïni bai mïnitö adobaï cædinque wädäni wënæ wënæ cæyönänite wacä ingä wacä ingä ñimpo cæmïni quëwënanäni.

5

Wængonguï wëmïni, iïmaï cæte quëwëedäni, ante

¹ Ìninqe Wængonguï wëmïni ïñömö mïnitö tömengä nänö në waademïni ïnömïni inte Wæmpocä nänö cæï bai ante cöwä adinqe adobaï cæedäni. ² Baö, Wængonguï quï, ante godöninque, Oguï wacäimpa, ante iya tänäni bai cædinque Codito mönö ïmonte waadete pönëninque edæ adobaï cægacäimpa. Tömengä ïñömö, Botö Wængonguï quïmo ïmopa, ante nämä wepæ pædæ godöninque mönö ïmonte wæætë ængacäimpa. Ìninqe tömengä nänö waadete pönëno bai mïnitö adobaï waadete pönëninque quëwëedäni.

³ Wæætë edæ mïni pönencabo ïñömïnite waocä adocanque incæ nänöogængä ïnämaï ïñongante godö guëa mönämaï ïedäni. Wentamö mongæ wæcæ wæ, ante edæ wiwa cædämaï ïedäni. Nanguï mäincoo ante æïnente wædämaï ïedäni. Mäninö tömänö cædämaï ïmïni inte mäninö ante edæ adopoque incæ tededämaï ïmäwedäni. Edæ Wængonguï quïmïni tæiyæ waëmö entawëmïni inte mïnitö mäninö tömänö cædämaï incæminimpa. ⁴ Wentamö ante nänï pönëwënö bai mïnitö wæætë adobaïnö ante pönënämaï ïedäni. Önonque ante nänï tedewënö bai mïnitö wæætë adobaï tededämaï ïedäni. Wënæ wënæ ante pönente nänï badete towënö bai mïnitö wæætë adobaï badete todämaï ïedäni. Ìñæmpä Wængonguï quïmïni ïnömïni inte mïnitö mäninö

ante wii pönenguënēmīni īmīnīpa. Wæætē Wængonguī ingante waa ate pönēninque apænequënēmīni īmīnīpa.

⁵ Awënë Odeye Wængonguī nempo ayæ Awënë Odeye Codito nempo edæ ædānidō nē guite ænguīnāni īnānīi. Nānōogængā īnāmaī īñongante nē towēnāni tōnō wentamō pōnente nē cædāni īñōmō tōmēnāni edæ dicæ guite ænguīnāniyaa. Ayæ māincoo ante wacā quī nē æīnente wæwēnāni īñōmō edæ, Māincoo incæ mōnitō wængonguī impa, ante baī cædāni īñōnāni inte tōmēnāni adobaī edæ guite ænāmaī incædānīpa. Ante āmo ēñēedāni. ⁶ Wadāni, Mīnitō oda cæcæmīnīpa, ante ōnonquedō ante tedete cæyōnānite mīnitō wæætē tōmēnāni nāni tededō ante edæ ēñēnāmaī īedāni. Edæ tōmēnāni ēñēnāmaī inte nāni wēnæ wēnæ cædō beyæ Wængonguī ænguī badīnque tōmēnāni īnānite pancæcāīpa. ⁷ Īnīnque mīnitō gooque gomō adīnque tōmēnāni tōnō godongāmæ cædāmaī īedāni.

⁸ Mīnitō īñōmō wēēnēñedē wentamō mongæmīni ingaīmīni inte ñōwo wæætē edæ mōnō Awënë nempo quēwēninque edæ ñāō baī entawēmīnīpa. Īnīnque Mæmpo nānō ñāō ēmōnō baī entawēmīni inte mīnitō ñāō īñōmō cægonte baī edæ waa quēwēedāni. ⁹ Edæ waiwæ waincate baī cædīnque mōnō wadāni īnānite godō waa cæquinque mōnō edæ ñāō īñōmō quēwēmōmpa. Ayæ nō pōnī mōnō cæquinque nāwangā pōnī ante mōnō apænequinque edæ ñāō īñōmō quēwēmōmpa. ¹⁰ Ayæ, Æbānō cæmō ate mōnō Awënë, Waa cæmīni abopa, ante apænequīngā, ante ēñencæte ante cædīnque do ēñēnīmi inte tōmēngā nānō waa adonque cæedāni. ¹¹ Wadāni wēmo īñōmō ōnonque nāni cædō ante adīnque mīnitō īñōmō edæ gooque gomō aedāni. Ayæ tīca ēnente baī cædīnque, Tōmēnāni nāni cædō wēnæ wēnæ impa, ante edonque odōmōmīni acædānīpa. ¹² Awēmō nāni cædō beyæ guīngo imonte wæquēnēnāni īñōnāni mōnō īñōmō edæ guīñēnete wædīnque mānīnō ante edæ tededāmaī ingæīpa. ¹³ Wæætē edæ, Awēmō īñōmō æbānō cædānīi, ante tōmānō ante edæ tīca ēnente edonque acæīpa. ¹⁴ Nāō beyænque edæ edonque amōmpa. Mānōmaī ī beyæ īīmaī ante āmotamīni ante baī apænedānīpa.

“Bitō wangæ möīmi inte ñāni ōmæmonte ængæ gantie.

Edæ ængæ gantiyōmite

Codito incæ pōnō tīca ēnente baī cæcā ate ñāō entawencæbiīpa,” ante apænedānīpa.

¹⁵ Mānōmaī beyæ mīnitō ocaī ōmæcamīni īnāmaī īñōmīni inte wæætē ocaī nē encamīni inte cædīnque, Æbānō waa cæte quēwēnguīmo, ante nāmā waa ate waa cæedāni. ¹⁶ Wadāni ñōwo incæ godōmenque wīwa cædānīpa cæmīnīi. Eyepæ īñōnte mīni cæquēnēnonque ante edæ do cæedāni. ¹⁷ Edæ wēñænāni owempote cædāni baī mīnitō adobaī cædāmaī īedāni. Wæætē, Wængonguī æbānō angantawo, ante ēñēninque mānīnonque ante ēñente cæedāni. ¹⁸ Waodāni bīīnōmæ nāni āmæ bedīnque dowænte badīnque godōmenque pōnēnāmaī cædīnque tōmēnāni nāni ēwente wæwēnguīnque bewēnānīpa. Īnīnque mīnitō īñōmō bete dowænte badāmaī īedāni. Wæætē Wængonguī Ōñōwoca ingante ædæmō ēwocate quēwēedāni. ¹⁹ Āmotamīni ante baī godongāmæ watapæ ante tedeedāni. Awënë Dabīi wodi nānō āmotamīni angaintaa adīnque edæ adodō æedāni. Ayæ mīnitō nāmā mā pōnēninque, Īīmaī Wængonguī beyæ mōnō āmotamīni angæīpa, ante adodō æedāni. Wængonguī Ōñōwoca angā ēñente ēwocadīnque tōmēngā āmotamīni nānō ānōnō ante adodō æedāni. Mīmōno āmotamīni ante baī pōnēninque mīnitō mōnō Awënë ingante watapæ pōnente æedāni. ²⁰ Æbāmē bayonte mīnitō tōmānō beyæ ante edæ Mæmpo Wængonguī ingante cōwē waa ate pōnēninque mōnō Awënë Codito ēmōwo ante apæneedāni.

Mæmpoidi nāni wencabo īīmaī quēwēncædānīpa

²¹ Mōnō Codito ingante guīñente wædīnque mīnitō wīi nāmā mīni pōnēnonque baī cædīnque wæætē edæ, Nē ānāni æbānō ānānīi, ante Ao ate nōīnō ante cæedāni.

²² Onquiyæmīni ēñēedāni. Mīnitō, Mōnō Awënë nānō angainō baī mōnō ēñente cæcæīpa, ante tōmēmīni nānōogænāni īnānite Ao ante ēñente cæedāni. ²³ Edæ

Codito ingante mönō godongāmæ pōnencabo iñōmonte mönō Codito adocā iñōmō, Quēwencæminimpa, ante nē Ængaingā inongā ingampa. Tōmengā tōnō mönō adoyonque bai iñōmonte tōmengā iñōmō mönō Ocamō bai inongā ingampa. Ayæ onquiyængā tōnō onguiñængā adobai adoyonque bai iñōnate onguiñængā iñōmō nē ocamō bai inongā ingampa. ²⁴ İninque Codito ingante mönō godongāmæ pōnencabo incæ tōmengā ingante Ao ante ēñente cæmō bai onquiyænāni adobai tōmēnāni nānōogænāni inānite cōwē edæ Ao ante ēñente cæquēnēnāni inānīpa.

²⁵ Wæætē onguiñæmīni ēñēedāni. Mīnitō Codito nānō waadete pōnēnō bai tōmēmīni nānōogænāni inānite adobai waadete pōnēedāni. Tōmengā ingante mönō godongāmæ pōnencabo iñōmonte tōmengā iñōmō mönō imonte waadete pōnēnīnque mönō imonte æncæte ante pōnō cædinque nāmā wepæ godongacāimpa. ²⁶ Ayæ, Wængonguī nānō apænedō waēmōmæ imæ bai iñōnte mīnitō iñōmō mānīnō ante ēñēnīnque tæiyæ waēmō ēwocate quēwencæminimpa, ante mönō Codito adocā mönō imonte edæ ñā mēnongate bai cægacāimpa. ²⁷ Mānōmaī tæiyæ waēmō badīnque mönō wentamō mongænāmaī inte Codito ingante mönō pōnencabo adocabomō iñōmonte tōmengā iñōmō edæ nānōogængā ænte bai cædinque mönō pōnencabo imonte, Bitō, ante apænegacāimpa. Ayæ mönō cabo iñōmonte tōmengā, Bitō idiquibæ entawēnāmaī iñōmite ædō cæte bitō imite piinte anguiī, ante pōnō cægacāimpa. Ayæ wæætē edæ, Ñā mēnongate bai tæiyæ waēmō emōmī inīnque mönō edæ guēa ñāō apāite bai emongæimpa, ante Codito nānōogængā ænte bai mönō imonte pōnō ængacāimpa.

²⁸ Onguiñænāni iñōmō adobai tōmēnāni, Botō baō, ante nāni pōnē bai tōmēnāni nānōogænāni inānite adobai waadete edæ pōnenguēnēnāni inānīpa. Æcānō tōmengā nānōogængā ingante waadete pōnēna iñōmō tōmengā nāmā baō ante waadete pōnente bai edæ cæcampa. ²⁹ İñæmpa waocā nāmā baō cōwē piīnāmaī ingampa. Wæætē, Botō baō, ante edæ pæ gompodīnque pōnō aacampa. Ayæ adobai Codito ingante mönō godongāmæ pōnencabo iñōmonte edæ tōmengā adobai, Botō baō, ante bai cædinque mönō imonte wææ gompodīnque pōnō aacampa. ³⁰ Edæ mönō Codito nē Ocamō bai inongā inte nē angā iñōngante mönō wæætē tōmengā tōnō adoyonque bai inte ēñente quēwēmōmpa. ³¹ “Mānōmaī beyæ onguiñængā mæmpo tōnō badā inate emō cæte godīnque onquiyængā ingante, Botō nānōogængā, ante æmæwo monte quēwencæcāimpa. Mēnaa inīna incæ tōmēna wæætē nāna gæncaya badīnque adocanque bai bacædaimpa,” ante yewæmongatimpa.

³² Mānōmainō ante nāni yewæmongainō ante edæ wē wodonte bai i iñōnte wīi tōmānō ante ēñēmōmpa. Incæte, Codito ingante mönō godongāmæ pōnencabo iñōmonte mönō tōmengā tōnō adocanque bai imōimpa, ante mīnitō ēñencæminimpa, ante botō apænetabopa. ³³ Incæte onguiñæmī nāmā bitō waadete pōnēnonganca tōmēmī nānōogængā ingante edæ adoganca waadete pōnencæbiimpa. Onquiyæmī adobai, Botō nānōogængā ingampa, ante adīnque edæ ēñente cæcæbiimpa.

6

¹ Wēñæmīni guiquēnē ēñēedāni. Mīnitō mönō Awēnē nempo quēwēnōmīni inte tōmēmīni mæmpoidi inānite edæ ædæmō ēñente cæedāni. Æcānō edæ mānōmaī cædaa tōmengā edæ nō pōnī cæcampa. ² “Wæmpocā ingante wāānā inante waa adīnque tōmēna inate godō waadete cæe,” ante Wængonguī incæ wææ angacāimpa. Tōmengā wade nānō wææ angainō ānīnque, Mīni waa quēwenguīnque cæcæminimpa, ante apænedāmaī ingaingā inte ñōwo iīne ante wææ ānīnque, Mīni waa quēwenguīnque cæcæminimpa, ante mā apænegacāimpa. ³ Edæ iīne ante wææ ānīnque tōmengā, “Mānōmaī cæmīni inīnque mīnitō watapæ quēwēnīnque iīmæca wantæpiyæ quēwencæminimpa,” ante mā apænegacāimpa.

⁴ Wæmpomīni guiquēnē ēñēedāni. Mīnitō wēnāni wīi āināni bacædānīmpa, ante wææ cædinque mīnitō tōmēnāni inānite piinte cædāmaī iedāni. Wæætē, Mönō Awēnē wææ aadīnque mönō imonte pānīnque odōmonte apænecampa, ante adīnque mīnitō tōmengā

nänö cæi bai adobai cædinque wēñænāni inānite ædæmō wææ aadinque mōnō Awēnē nänö apænedō ante odōmonte apænemīni ate tōmēnāni waa pæcædānīmpa.

⁵ Waodāni mīnitō īmīnite ö ænāni inte tōmēnāni beyænque cæte nē quēwēmīni īñōmīnite apænebo ēñēedāni. Īmæca mīnitō awēnēidi inānite mīnitō waa adinque guīñente wædinque tōmēnāni nāni änō ante ēñente cæedāni. Mīnitō Codito angā ēñente mīmōnē nō pōnente cæmīnitawo. Īnīnque edæ īimæca awēnē angā ēñente edæ adobai mīmōnē nō pōnente cæedāni. ⁶ Mīnitō edæ, Awēnē botō imote waa acæcāimpa, ante tōmengā ayongante ēñente cæmīnitawo. Īñæmpa awēnē dæ goyongante adobai cōwē ēñente cæedāni. Codito botō imote nē godonte Ængaingā ingante nē cæte quēwēmō imōmpa, ante pōnēnīnque mīnitō edæ Wængonguī nänö änönö ante mīmōnoque pōnente cæedāni.

⁷ Mīnitō mīmōno piyænē cædinque īimaī ante pōnente cæedāni. Īimæca awēnē ingante cædinque botō wīi waocā beyænque ante cæbopa. Wæætē Wængonguī Awēnē beyænque ante botō īimæca awēnē ingante cæbopa, ante pōnēnīnque pæ piñænte bai cæedāni. ⁸ Mīnitō īimaī ante edæ do ēñēmīnīpa. Mīnitō wacā nänö ö ænimīni inte tōmengā beyænque nē cæte quēwēmīni incæ abæ tawænte ee gote bai nāmā beyænque cæte quēwēmīni incæ mīnitō īmīnite mōnō Awēnē īñōmō, Bitō ægancadō waa cæbii, ante adinque wæætē eyepæ pōni pædæ pōnongā ænguīmīni īmīnīpa.

⁹ Waocā ingante nē ö æmīni guiquēnē ēñēedāni. Mīni nē ö ængaināni inānite adobai waa cæedāni. Tōmēmīni Awēnē incæ tōmēnāni Awēnē adocā inongā inte öönædē owocampa cæmīnīi. Tōmengā īñōmō wacā ingante wadō wacā ingante wadō ate pōnente cædāmaī ingampa. Mänōmainö ante do ēñēmīni inte mīnitō beyænque cæte nē quēwēnāni inānite edæ piīnte ānīnque edæ pæmēnēnāmaī īedāni.

Tæinta wēñate bai mōnō tæi piñænte ewocacæimpa

¹⁰ Nōwo īimaī yewæmōnīnque botō idæwaa yewæmōmopa. Mīnitō mōnō Awēnē nempo nē quēwēnōmīni īñōmīnite tōmengā nänö tæi piñænō pædæ pōnongā ænīnque tæi piñænte entawente quēwēedāni. ¹¹ Mīnitō wææ caaquincoo, ante Wængonguī eyepæ pōni nänö da pōnōnīncoo tōmancoo ænīnque wēñate bai cædinque tæi ongōedāni. Edæ mānīncoo tōmancoo wēñate ongōñōmīni wēnæ awēnē, Oda cæcæmīnīmpa, ante nanguī ēñente cæcā incæte mīnitō wæætē oda cædāmaī inte edæ tæi ongoncæmīnīmpa.

¹² Edæ wīi waodāni inānite mōnō guēadō guēa cæcæimpa. Wæætē wēnæidi awēnēidi tōnō wēnæidi inānite nē änāni īñōnānite mōnō tōmēnāni inānite wæætē guēadō guēa cæcæimpa. Inguipoga wēmō īñōmō tæi piñænte ēnempodāni tōnō öönædē īñōmō wēnæcoo nē wīwa ewocate cædāni tōnō mānīmpodāni māmō ti gotodoncæ cæyōnānite mōnō wæætē guēadō guēa cæcæimpa. ¹³ Īnīnque tōmēnāni piīnte māmō nāni wīwa cæönæ īinque bayonte mōnō wodii wīnōnāmaī inte tōmēnāni inānite wæætē da godongæimpa. Ante ayæ, Tōmāā edæ eyepæ cæte ate mōnō edæ tæ go wæænāmaī inte adiyæ ongongæimpa, ante cædinque mīnitō Wængonguī nänö, Wææ caaquincoo, ante tæinta bai nänö da pōnōnīncoo edæ do eyepæ ænīnque tōmancoo edæ da wēñæedāni.

¹⁴ Wēñadinque edæ wodii wīnōnāmaī inte edæ næ gongænte tæi ongōedāni. Edæ, Tæi wææ caaquincoo, ante pōnō tæi pacadeyænte bai cædinque mīnitō Wængonguī nänö nō pōnēnō entawēnīnque adobai nō entawente quēwēedāni. Tæcætawē inō tæineta mīni wææ wodontawēinta ante wēñate bai cædinque Wængonguī tæiyæ waēmō nänö cædō ante edæ entawente tæi cæte ongōedāni. ¹⁵ Mōnō Codito pōnō cæcā beyænque mōnō godongāmæ piyænē cæcæimpa, ante watapæ mōnō ēñēnō beyæ pogodo gote apænecæte ante cædinque mīnitō awæncata tæi wææ cæwainta wēwate bai cædinque gānē pōnente cæedāni.

¹⁶ Yabæque pōni wææ cæquinta tæinta bai næænte bai cædinque mīni wede pōnēnō ædæmō entawēnīnque quēwēedāni. Īnīnque nē wīwa cædongā ponte gonga encado bai to piyæncate bai cædinque, Mīnitō oda cæcæmīnīmpa, ante cæcā ate mīnitō mīni wede pōnēnō beyænque tōmengā wīwa nänö änō ante edæ ēñēnāmaī incæmīnīmpa. ¹⁷ Ayæ,

Ocamö incainta täinta bai impa, ante wææ wencate bai cædinque mīnitō Codito pōnō ængä beyænque mīni quëwenguinō ante ænte entawencæminimpa. Mīnitō yaëmē wææ næænte bai cædinque Wængonguī Ōnōwoca apænecä ëñëninque nāni yewæmongainta ate ædæmō ëñëninque edæ cōwē entawëedāni.

¹⁸ Ayæ Wængonguī Ōnōwoca ingante ëwocadinque mīnitō tōmengä ingante, Wængonguī bitō cōwē cæcæbiimpa, ante godömenque nanguī apænedinque ñine cædāmaī iedāni. Mänōmaī cæcæte ante mīnitō mīimīni ongōninque wæntæte badāmaī inte Wængonguī quīnāni tōmānāni beyæ ante cōwē apæneedāni. ¹⁹ Ayæ botō beyæ ante adobaī apænemīni ëñëninque Wængonguī pōnō cæcä ate botō edonque tedecæboimpa, ämopa. Edæ Codito ingantedō ante wëëñënedē mōnō ëñëñāmaī ingaïne ante botō ñōwo watapæ ëñëninque guīñënedāmaī inte apænebo ëñencædānimpa, ämopa. Mänōmaīnō ante mīnitō Wængonguī ingante apæneedāni, ämopa. ²⁰ Mänīne ante botō wadāni weca nē gote apænebo beyænque ñōwo gæguincamē encaipobo inte wæbopa. Īninque, Mänīne ante nē apænequëngä inte Pabodo cōwē guīñënedāmaī inte apænecæcäimpa, ante mīnitō botō beyæ ante apæneedāni.

Waa quëwencæminimpa, ante

²¹ Botō Pabodo ĩñōmō æbānō quëwëmoo, ante, Quīnō bai cæboo, ante ëñencæte ante wæmīnitawo. Edæ Tiquico mōnō tōññacä mōnō nē waadecä ĩnongä inte tōmengä ñōwo pōninque mīnitō ĩmīnite mänīnō tōmānō ante apænecä ëñencæminimpa. Tōmengä ĩñōmō mōnō Awënë nempo quëwëninque tōmengä beyæ nē cædongä inte cōwē nē pōngä inte ædæmō cæcä acæimpa. ²² Īninque, Pabodoidi æbānō quëwëñāni, ante tōmengä pōnō apænecä ëñëninque mīnitō wampo pōnëninque tæi pīñænte entawencæminimpa. Ante cædinque botō, Ædæmō apænebi ëñencædānimpa, ante tōmengä ingante mīnitō weca da godōmo pongä aedāni.

²³ Mæmpo Wængonguī tōnō mōnō Awënë Itota Codito mīnitō ĩmīnite waadete pōnō cæda ate mīnitō mīni caipæ incæ gänē entawëninque wede pōnëninque godongāmæ edæ waadete pōnencæminimpa, ämopa. ²⁴ Æcānō mōnō Awënë Itota Codito ingante cōwē waadete pōnente ñimpo cædāmaī ĩna ĩñōmō tōmengä ingante Wængonguī pōnō waadete cæcæcäimpa, ante botō Wængonguī ingante apænebopa. Mänīnque ante yewæmōmopa.

Pidipenteidi inänite Pabodo nänö cadota ante yewæmongainta

Waa quëwëedäni, ante

¹ Itota Codito ingante në cæmõna inte botö tönö Tímoteo guëa apænemõna in-
inque botö Pabodobo adoboque yewæmõmopa. Minitö Pidipoto inõmõ quëwëninque
Wængonguï quimini inõmini inte Itota Codito nempo në quëwëmini inõminite botö,
Acæminimpa, ante yewæmõmopa. Mini pönencabo beyænque ante pancaminiya në
aamini inõminite pancaminiya guiquënë në cæmini inõminite pancaminiya guiquënë
önõminique inõminite botö edæ, Tömämäni edæ acæminimpa, ante yewæmõmopa.
² Mönö Mæmpo Wængonguï mönõ Awënë Itota Codito tönö waadete pönö cæda ate gänë
pönëninque waa quëwëedäni, ämopa.

Në pönëmini beyæ Wængonguï ingante apænebopa, ante

³ Æyedëmë minitö iminite ante pönëmo inte botö Wængonguï ingante waa ate
pönëninque apænebopa. ⁴ Inique minitö beyæ ante Wængonguï ingante wantæ inõ
wantæ inõ apænedinque botö, Waa quëwëminipa, ante watapæ todinque apænebopa.
⁵ Edæ, Botö täno goyedë minitö godongämæ cæminitapa. Ayæ, Mönö Codito ingantedö
ante minitö nõwo ganca godõmenque watapæ apæneminipa, ante pönëninque botö,
Wængonguï bitö pönö cæbi ate pidipenteidi waa cædänipa, ante apænebopa. ⁶ Minitö
botö ayõmo tæiyæ waemö entawencæminimpa, ante në mä badongaingä inongä inte
Wængonguï nõwo Itota Codito nänö ponguinganca godõmenque pönö badõninque cõwë
iinque badongä ate minitö ædæmõ pæimäni bacæminimpa. Mänõmaï impa, ante botö,
Näwangä impa, ante do ëñëmopa.

⁷ Mönö Codito ingantedö ante watapæ möni ëñëninö ante botö wææ äninque,
Näwangä impa, ante apænebopa. Mänine botö apænede beyænque pancayedëña botö
imote tee mönedäni wæbopa. Incæte tee mönedäni wæbo incæ, Näwangä impa, ante
wææ ämo incæ Wængonguï nänö waadete pönö cægäinö ante ænte entawëñõmo minitö
adobaï mäninö ante æninque botö tönö godongämæ entawëminipa. Inique, Mönö
mäninö ante äanque baï entawëmö imompa, ante minitö iminite waadete pönëninque
botö, Minitö ædæmõ pæimäni bacæminimpa, ante nõingä cæte pönëmopa. ⁸ Itota Codito
mönö imonte nanguï waadete pönengantawo. Edæ tömengä waadete nänö pönënö ante
entawëninque botö minitö iminite waadete pönëmopa, ante adinque Wængonguï incæ,
Pabodo näwangä minitö iminite nanguï waadete pönengampa, ante apænebaingampa.

⁹ Inique minitö beyæ ante botö Wængonguï ingante iïmaï ante apænebopa. Mini
waadete pönencabo inõminite Wængonguï pönö cæcä ate godõmenque waadete pö-
nencæminimpa. Ayæ waadete pönëmini inte minitö, Quinö wënæ wënæ i, Quinö waa
i, ante edonque adinque nõ apænte ämini bacæminimpa. ¹⁰ Mönö æbänö cæte waa
quëwënguï, ante edonque adinque minitö Ao ante waa quëwëninque Itota Codito
nänö ponguinganca wentamö mongænämaï inte tee tewardämaï imäni incæminimpa.
¹¹ Ayæ Itota Codito pönö cæcä ate minitö nõ cædinque waa quëwëmini adinque wadäni
Wængonguï ingante waa ate pönëninque apænecædänimpa, ante botö Wængonguï
ingante apænebopa. Ayæ minitö mänõmaï inte waa cæmini adinque tömänäni wæætë
Wængonguï ingante apænedinque, Wængonguï ëñëmi. Bitö nãö baï ëmönõmi inte waa
pönö cæbipa, ante apænecædänimpa, ante cædinque botö minitö beyæ ante Wængonguï
ingante apænebopa.

Pabodo, Codito beyænque quëwëmopa, angampa

¹² Inänäni apænebo ëñëedäni. Mänõmaï cædäni botö wædö incæ wii õnonque
cætimpä. Wæætë, Codito beyænque Pabodo caate wæcampa, ante adinque wadäni

godömenque nanguï inäni Codito ingantedö ante watapæ möni apænedö eñëninque wede pönënanï badänipa. ¹³ Edæ, Codito emöwo apæneca beyænque Pabodo ingante tee mönedänipa, ante tededäni eñëninque odömäno täiyæ awënë oncö wææ wänönäni incæ wadäni wayömö quëwënäni incæ tömänäni do eñënanïpa. ¹⁴ Mönö Awënë nempo quëwënäni incæ, Pabodo tee mönete wæcampa, ante wædinque wodo tömänäni godömenque wede pönente badänipa. Ìninque wede pönëninque täi piñænte entawëninque tömënanï guïñënamäi inte Wængongui nänö apænedö ante godömenque apænedänipa.

¹⁵ Pancadäniya, Pabodo miñæ godömenque nanguï inäni godänipa, ante pönö piinte adinque Codito emöwo ante apænedäni incæte botö imote guëadö guëa piincæte ante apænedänipa. Mänömaï i incæte wadäni guiquënë, Pabodo tönö mönö godongämæ cæcäimpa, ante gänë pönëninque Codito emöwo ante apænedänipa. ¹⁶ Në gänë pönente apænedäni guiquënë, Codito ingantedö ante watapæ miñi eñëninö ante Pabodo wææ ancæcäimpa, ante botö imote godö gö cæcampa, ante do eñënanïpa. Ìninque tömënanï botö imote waadete pönëninque apænedänipa. ¹⁷ Në wæætedö wææte tededäni guiquënë, Pabodo tee mönete wæyongante mönö apænete tomö wæcä tocäi, ante cædänipa. Tömënanï nämä beyænque ante cædäni incæte waa cæte bai cædinque Codito emöwo ante apænedänipa. ¹⁸ Incæte pancadäniya nämä beyænque ante apænedäni incæ pancadäniya nö pönente apænedäni incæ mäninäni tömänäni Codito nänö cægäinö ante näwangä ante do edæ apænedänipa. Mänömaï impa, ante pönëninque botö watapæ tobopa.

Ayæ iimaï ante pönëninque cöwë godömenque nanguï tocæboimpa. ¹⁹ Minitö Wængongui ingante botö beyæ nanguï apænemini eñëninque Itota Codito Önöwoca pönö cæcæcäimpa, ante eñente tobopa. Ìninque ñöwo botö caate wædö ante edæ iincayæ ate ñimpo cædäni ate edæ botö abæ tawænte gote quëwenguinque edæ impa, ante do eñëninque tobopa. ²⁰ Botö wëenënedë botö cæbo bai ñöwo adobai cæinëmo imopa. Ìntai eñate miimö quëwëmo incæ baonque wænönäni wæmo incæ, Mönö Codito ingante waa acædänimpa, ante cædinque botö cöwë guïñënamäi inte täi ongöninque nanguï cædinque watapæ edæ bacæboimpa, ante pönëmopa. ²¹ Edæ inguipoga quëwëmo incæ botö Codito ingante entawëninque tömengä beyænque ante quëwëmopa. Wææte wæmo incæ tömengä beyæ botö godömenque nanguï entawenguïmo imopa.

²² Incæte, Wäiwæ nanguï incæte bai botö cæquinque inguipoga ayæ quëwenguënëmo imopa, ante pönëninque botö, Æbänö anguiimoo, ante eñencæte ante wæbopa. Edæ, Wæncæboimpa, ante anguënëmo imoo. Wææte, Ayæ quëwencæboimpa, ante anguënëmo imoo. Edæ, Æbänö anguënëmo imoo, ante botö edæ eñënamäi imopa. ²³ Edæ wada bæi ongönte æmatæ töö æmatæ töö godöna wæcä bai wædömo inte botö, Ædönö gämænö goquiimoo, ante wæbopa. Codito weca godömenque waëmö pönï quëwencæboimpa, ante botö wadæ goinëmo imopa. ²⁴ Incæte inguipoga quëwëninque miinitö beyænque ante cæquënëmo inte botö ædö cæte wayömö goquiimoo. ²⁵ Ante pönente wædinque botö, Minitö mönö pönëno ante godömenque wede pönëninque watapæ tote quëwencæminimpa, ante cæquiimoo imopa, ante eñëmopa. Ayæ, Ñöwo wænämäi inte botö miinitö weca quëwenguïmo imopa, ante do eñëmopa. ²⁶ Ìninque botö miimoo inte miinitö weca pömo adinque miinitö Itota Codito ingante waa adinque botö beyænque nanguï tocæminimpa.

²⁷ Codito ingantedö ante watapæ mönö eñëninö beyæ ante mönö waa cæquënëmo imopa, ante eñëmini inte miinitö edæ waa cæte quëwëdäni. Mänömaï cæmini ininque botö önömoncaque eñëmo incæ miinitö weca ponte abo incæ, Pidipenteidi adoyömö pönëninque täi ongönänipa, ante tededäni eñëninque tobaïmopa. Ayæ, Codito ingantedö ante watapæ mönö eñëninö ante wadäni eñencædänimpa, ante pidipenteidi iñacabo cædinque nanguï cædänipa, ante botö edæ eñente tobaïmopa. ²⁸ Ayæ piinte cædäni incæte miinitö wææte guïñënamäi inte täi ongöminipa, ante adinque botö tobaïmopa. Minitö mänömaï guïñënamäi inte täi ongömini ate wædinque në piinte änäni wææte, Mönitö wænguinque impa, ante wæcædänimpa. Në pönëmini miñi quëwenguinque

impa, ante adinque tömënäni godömenque wæcädänimpa. Edæ Wængonguï ængä beyenque quëwencæminimpa.

²⁹ Wængonguï waadete pönö cæcä ate mīnitö Codito ingante wede pönëmīnitawo. Edæ adocä pönö cæcä ate mīnitö Codito beyenque cædinque cōwë caate wæquīmīni imīnīpa. ³⁰ Pabodobo doyedë Codito beyæ ante wææ ancæte ante caate wætabopa, ante amīnitawo. Nōwo godömenque wææ cædinque caate wæbopa, ante önömoncaque ëñëmīnitawo. İninque botö wææ äninque caate wæbo bai mīnitö adobai botö tönö godongämæ wææ äninque caate wæmīni imīnīpa.

2

Codito önonganque bayongante Wængonguï da æænongä

¹ Mönö Codito nempo quëwëninque mīnitö wampo pönëmīnitawo. Tömengä waadete pönengä beyenque gancæ pönëmīnitawo. Mönö Codito Önöwoca tönö äawocaque bai ëwocadinque godongämæ watapæ quëwëmīnitawo. Në wæcä ingante godö waadete pönëmīnitawo. Adocanque wæwengä adinque mīnitö äanque bai wæwëninque tömengä beyæ cæmīnitawo. ² Mänömai i ininque adodanque pönëninque mīnitö waa waademīni adinque botö watapæ pönī tobaimopa. Tömämīni äanque bai ëwocadinque, Mönö adoyömö cæcæimpa, ante godongämæ cæmīni adinque botö godömenque nangui watapæ tobaimopa. ³ İninque mīnitö nämanque ante pönëninque, Botö imote waa acädänimpa, ante cädämai iedäni. Yæcado ongoncæboimpa, ante cädämai iedäni. Wæætë, Botö önömoque bai iñömote wadäni wæætë waa pönī inänīpa, ante pönëninque wadänique inänite ængö cæedäni. ⁴ Nämä mīni cæinënö ante cædinque mīnitö wīi mäninonque ante cædinque wæætë edæ wadäni näni cæinënö adobai ante cæedäni.

⁵ Mänömai cædinque mīnitö Itota Codito nänö pönengainö bai adodö ante pönëedäni.

⁶ Tömengä iñömö cōwë näwä Wængonguï inongä ingampa. Incæte, Botö näwä Wængonguïmo ingaimo inte Mæmpo Wængonguï ganca botö ingainö ante ñimpo cädämai incæboimpa, ante tömengä änämai ingacäimpa.

⁷ Wæætë edæ, Mäninö botö ingainö incæ botö edæ ñimpo cæcæboimpa, äninque wææ, önonganque bai bagacäimpa.

Ayæ, Wængonguï ingante në cædömo edæ bacæboimpa, ante badinque wææ, tömengä waomö mönö ëmönö bai nänö ëmonguinque waocä ëñagacäimpa.

⁸ Mänömai ëñate pæte wææ tömengä önonganque inte bai cæyongä Wæmpocä, Bitö wænguino taadö gocæbiimpa, angä ëñëninque edæ Ao ante goyongante wææ, tömengä nänö guiñëñaquinque awæ ñænquedimæ cæte mäo timpodäni wææ tiwadäni ate tömengä caate wægöninque wææ bacaa edæ wængacäimpa.

⁹ Mänömai cæcä adinque Wængonguï wæætë tömengä ingante æmonga pönī da æænongacäimpa.

Ayæ wadäni ëmöwo önöwoque ëmönäni bai tömengä Tæiyæ Awënë inongä inte wīi adobai önöwoque bai ëmoncæcäimpa, ante cædinque Wængonguï edæ, Itota Codito ingampa, ante pönö pemongacäimpa.

¹⁰ Edæ öönädë quëwënäni incæ inguipoga quëwënäni incæ guimonga quëwënäni incæ tömänäni edæ Itota ëmöwo ëñente waa adinque da guicapocädänimpa, ante Wængonguï tömengä ingante pönö pemongacäimpa.

¹¹ Ayæ, Itota Codito ingante adinque tömänäni, Mönö Tæiyæ Awënë inongä ingampa, ante edæ Ao ancädänimpa, ante Wæmpocä cægacäimpa.

Mänömai cæcä adinque, Mæmpo Wængonguï waa pönī cæcampa, ante mönö edæ watapæ apænecäimpa.

Nëmoncoo äo äo cædote bai nöinö cæte quëwëedäni

¹² Mänömai beyæ botö në waademīni iñöminite botö apænëbo ëñëedäni. Mīnitö weca botö quëwënedë mīnitö do ëñente cædimīni inte ñöwo botö wayömö quëwëmo incæ

godömenque eñente cæmīni abopa. Īnīnque cōwē mīni eñente cædinō baī adobaī cædīnque ñōwo mōnō watapæ quēwenguīnō taadonque gocæte ante cædinque, Oda cæte wæcæ wæ, ante cōwā aquēnē quēwēmīnī. ¹³ Wīī cæīnente awædō, ante wæmīnitawo. Edæ Wængonguinque apæneçā eñente entawēnīnque mīnitō tōmengā waa pōnī nānō ānō ante nē eñente cæīnēmīnī bamīnīpa. Oda cæte awædō, ante wæmīnitawo. Adocā Wængonguinque mongæncadæ mongæncadæ cæcā ate tæī pīñæmīnī bate ate eyepæ cæmīnīpa.

¹⁴ Īnīnque, Wīī cæīnente awædō, ante ānāmaī inte mīnitō piyænē cæte mīni cæquēnēnō ante do cædāni. ¹⁵ Edæ mænōmaī cæmīni adīnque wadāni, Wentamō mongænāmaī īmīnīpa, ante abainānīpa. Ayæ inguipogaque quēwēnāni eñēnāmaī inte idiquibæ pōnente cæyōnāni mīnitō wæætē Wængonguī wēñæmīni inōmīni inte tōmēnāni weca quēwēnīnque nēmoncoo āo āo cædote baī nōingā cæte quēwencæmīnīmpa. ¹⁶ Edæ, Codito pōnō cæcā beyænque mōnō quēwengæīmpa, ante edonque apænemīni eñencædānīmpa. Īnīnque, Doyedē botō apænedō ante mīnitō nē eñente cæmīnīpa, ante adīnque botō nanguī todīnque īīmaī ante pōnēmopa. Mīnitō beyæ pæ pagænte cædōmo incæte botō wīī ōnonque cæboīmpa. Wæætē mōnō Codito nānō ponguīōnæ īñonte botō, Mīnitō nō apænemīnitapa, ante adīnque botō tocæboīmpa. ¹⁷ Ayæ, Wængonguī quī, ante baō godōnīnque waodāni baonga tepæ gao caadānīpa. Mīnitō īñōmō wede pōnēmīni inte, Wængonguī quī, ante nāmā godō cæyōmīni botō quēwenguīmāmo incæ mīni godōnīncooga gao caate baī ba edæ waa tobaīmopa. Mīnitō tōnō godongāmæ edæ tobaīmpa. ¹⁸ Mīnitō adobaī, Pabodo mōnō beyæ cæcampa, ante tocæmīnīmpa. Edæ mōnō edæ godongāmæ tocæīmpa.

Tīmoteo tōnō Epapododito

¹⁹ Mīnitō æbānō quēwēmīnī, ante eñēnīnque Tīmoteo wæætē apæneçā eñente tocæboīmpa, ante cædinque botō, Itota Codito Ao angā ate Tīmoteo ingante oo da pōnōmo mīnitō weca poncæcāīmpa, ante pōnēmopa. ²⁰ Mīnitō æbānō quēwēmīnī, ante wæyōmo tōmengā adocanque mīnitō beyæ ante botō tōnō guēa wæcampa. Wadāni guiquēnē mīnitō beyæ ante wædāmaī īnānīpa. ²¹ Tōmānāni edæ nāmā beyænque ante cæīnente wædinque Itota Codito nānō ānōnō ante wīī cæīnēnāni īnānīpa. ²² Cōwā ayōmīni, Tīmoteo īñōmō cōwē waa cæcampa, ante do eñēmīnitapa. Ayæ mōnō Codito ingantedō ante watapæ apænedīnque Tīmoteo tōnō mōna wencaya baī guēa cæmōnāpa, ante do eñēmīnitapa. ²³ Īnīnque, Botō īmote awēnēīdi æbānō apænte anguīnānī, ante eñente ate botō Tīmoteo ingante mānīñedē ate mīnitō weca do da pōnōmo poncæcāīmpa, ante pōnēmopa. ²⁴ Ayæ mōnō Tæiyæ Awēnē Ao angā ate tōmēmo do pōmaīmopa.

²⁵ Ayæ Epapododito mōnō tōnīñacā incæ botō tōnō guēa cæmōna īmōnāpa. Wadāni pīinte cædāni adīnque mōnatō guēa wææ cæmōnāpa. Tōmengā ingante mīnitō, Pabodo beyæ ante godō cæcæbiīmpa, ante do da pōnōmīni ponte cæcā æntabopa. Tōmengā ingante ñōwo wæætē adodō mīnitō weca edæ da pōnōmo ponguēnengā ingampa, ante pōnēmopa. ²⁶ Adocā Epapododito īñōmō mīnitō pidipenteidi īmīnite acæte ante edæ nanguī wæcampa. Ayæ, Epapododito daicawo gawængampa, ante apænedāni eñēnīnque pidipenteidi do wædānīpa, ante eñente wædinque tōmengā wæætē mīnitō beyæ ante nanguī wæwente bacampa. ²⁷ Nāwangā īmpa edæ. Tōmengā daicawo gawænte wodo wængantapa. Incæte Wængonguī tōmengā ingante waadete pōnō gampocā waa bacantapa. Mænōmaī cædinque Wængonguī botō beyæ adobaī ante pōnēnīnque, Pabodo wīī godōmenque wæcæcāīmpa, ante pōnengā inte edæ Epapododito ingante gampocā waa bacantapa.

²⁸ Mænōmaī beyæ, Epapododito wæætē pongā adīnque tocæmīnīmpa, ante cædinque ayæ, Mīnitō tomīni adīnque botō wæwēnāmaī bacæboīmpa, ante cædinque botō tōmengā ingante ñōwo da godoncæboīmpa, āmopa. ²⁹ Pongā ate mīnitō, Mōnō Awēnē nempo quēwēnōmi inte pōe, ānīnque Epapododito ingante waa adīnque godongāmæ watapæ tote cædāni. Ayæ wadāni tōmengā baī adobaī waa cædānīpa, ante adīnque

tömənāni inānite waa adinque waa cædāni. ³⁰ Mīnitō, Pabodo beyæ ædō cæte cæquimōnii, ante, Gobæ awædō, ante wæyōminite Epapododito iñōmō edæ, Wæmo incæ cōwē cæcæboimpa, ante mīnitō cæquēnēnō ante cæcantapa. Codito beyæ ante cæcæte ante edæ tōmengā wodo wængantapa cæminii. Tōmengā ingante edæ waa cædāni, āmopa.

3

Tæi piñænte cæcæimpa, ante

¹ Nōwo iñōmō botō tōniñamīni ēñeedāni. Mōnō Awēnē nempo quēwēninque mīni watapæ toquinque imīnīpa. Mīnitō oda cædāmaī incæmīnīmpa, ante botō adodō adodō ante anca yewæmōmo incæte wædāmaī imopa.

² Īmaī āmopa. Wadāni iñōmō, Mōnō ēō togænte quēwengæimpa, ante nē ānewēnāni inte quintaidi baī wēnæ wēnæ cædinque nāmā baō ēō ēō towēnānīpa. Ante adinque mīnitō tōmēnāni inānite gomō adinque wææ cædāni. ³ Edæ tōmēnāni inānite ee adinque Wængonguī mōnō imonte wæætē pōnō ēō togænte baī cædinque mōnō wentamō mongænō do wido cægacāimpa. Wængonguī Ōnōwoca ingante ænte ewocamō iñōmō inte mōnonque edæ, Wængonguī ingampa, ante tōmengā beyæ cæmōmpa. Itota Codito nempo quēwēmō inte mōnonque wīi inguipoga beyænque quēwēmō imōmpa, ante mōnō tōmengā ingante waa ate apænemōmpa. ⁴ Tōmēnāni guiquēnē inguipogaque ante pōnēninque, Mōnitō cædō beyænque quēwencæmōnīmpa, ante pōnēwēnānīpa. Tōmēnāni nāni pōnēwēnō baī adobaī pōnente baī botō, Tōmēnāni wædænque cæyōnāni botō godōmenque nanguī cædōmo imopa, ante pōnēwencædōmoimpa. Edæ, Nanguī botō cædō beyænque quēwencæboimpa, ante pōnēwencædōmoimpa.

⁵ Edæ tōmēnāni nē ēō togæināni inānitawo. Botō iñōmō adobaī imopa. Tæcæ ēñayōmote ōnōmpo æmæmpoque go mēōnaa go adoōnæque mānimpoōnæ iñonte botō imote do ēō togænāni wægaboimpa. Tōmēnāni idægoidi inānitawo. Botō iñōmō idægo wodi pæimo iñōmo inte tōmengā nānōmocā Beencaminō wodi pæimo iñōmo imopa. Tōmēnāni ebedeoidi inānitawo. Botō iñōmō ebedeobo ēñagaīmo inte nāwā ebedeobo iñōmo imopa. Tōmēnāni Paditeoidi inānitawogaa. Edæ botō Paditeobo iñōmo inte Mōitee wodi nānō wææ angainō ante mōni Paditeocabo wædō ante tōmāā ēñente cædōmo imoi aedāni. ⁶ Ayæ tōmēnāni, Wængonguī beyæ nanguī cæcæimpa, ante apænedānitawo. Edæ, Wængonguī beyæ cæbote, ante edæ botō iñōmō doyedē Codito ingante nāni pōnengaincabo inānite anca togænte pancæte ante cægaboī aedāni. Ayæ oodeoidi guiquēnē, Mōnitō wææ angainō ante nē ēñente cædānique nē nō cædāni inānīpa, ante ānānitawo. Botō iñōmō edæ māniñonque ante cōwē cædōmo inte wentamō mongænāmaī iñōmo imopa.

⁷ Doyedē iñōmō botō mānōmaī godōmenque waa cædīmo inte, Botō toquinque waa pōnī cægaboimpa, ante pōnēwentabopa. Nōwo guiquēnē botō waa cægainō ante, Ōnonquedō ante cægaboī, ante do ēñēmopa. ⁸ Ayæ wææ, Itota Codito botō Awēnē ingante adīmo inte botō tōmengā ingante pōnēninque tōmengā tōnō godōmenque waa pōnī quēwencæboimpa, ante botō, Wēēnēñedē botō entawengaincoo botō waa againcoo incæ edæ ewenguincooque impa, ante pōnēmopa. Edæ Codito beyæ ante cæyōmo botō wēēnē mānincoo tōmancoo edæ dæ ba wætabopa. Īninque, Codito ingante godōmenque ewocacæboimpa, ante nanguī cædinque botō, Wēēnē botō entawengainō ompotacoo baī impa, ante wido cæbopa.

⁹ Edæ, Īmaī cædāni, ante nāni wææ angainō ante ēñente cæbo incæte Wængonguī ayongante botō ædō cæte māniñō beyænque nō entawēmo baquimoo. Wæætē Codito mōnō nē nō cædongā ingante wede pōnēmo inte tōmengā nempo quēwēñōmote Wængonguī pōnō badongā ate nō cæbo bacæboimpa, ante nanguī cæbopa. ¹⁰ Mōnō Codito ingante ate baī pōnencæboimpa, ante cæbopa. Ayæ tōmengā adocā nanguī tæi piñænīnque nāni ōmæmongacāimpa, ante wede pōnēninque botō māniñō tōmengā nē nāni ōmæmongaingā nānō tæi piñænō baī adobaī entawencæboimpa, ante cæbopa.

Ayæ adobaï, Tömengä caate nänö wængai bai botö tömengä beyæ wæncæboimpa, ante pönëninque botö tömengä tönö godongämæ caate wænte bai tömengä nänö ewocadö bai ewocacæboimpa, ante cæbopa. ¹¹ Mänömai cædinque botö, Tömengä wænte ate ñani ömæmonte nänö quëwengai bai botö adobaï wænte ate ñani ömæmoncæboimpa, ante nanguï cæbopa.

Mänömai bacæboimpa, ante nanguï cæbopa, ante

¹² Mänömainö ante apænedinque botö, Codito nänö entawënö bai do entawëmopa, ante dicæ apænebogaa. Picænani bai do badinque nö cædinque oda cædämai imopa, ante dicæ apænebogaa. Incæte Itota Codito incæ edæ, Botö ewocadö bai adobaï ewocacæbiimpa, ante botö imote do bæi ongongacäimpa. Ìninque botö wæætë, Tömengä waa pönï nänö ewocadö bai adobaï ewocacæboimpa, ante bæi ongoncæte ante nanguï cæbopa. ¹³ Ìñänani ëñeedäni. Botö Codito nänö ewocadö ante dicæ eyepæ æmogaa, ante wæbopa. Incæte, Eyepæ ænämäi imopa, ante adinque wæwënämäi imopa. Wæætë, Ìncayæ ate Codito nänö ewocadö bai ædæmö ewocacæboimpa, ante cædinque botö mäninonque ante pönëninque pogodo gote bai cöwë cæbopa. ¹⁴ Wængonguï do, Bitö Itota Codito nempo quëwënömi inte eyepæ cædinque æmonga ponte æe, ante botö imote aa pegacäimpa. Ìninque tömengä, Pædæ pönömo æncæbiimpa, ante nänö angaincoo ante ænte ewocacæte ante botö gänä cæcæte ante pogodo gote bai edæ nanguï cæbopa.

¹⁵ Mönö æmæwo picæmö badömö iñömö tömämö adobainö ante pönenguënëmö imompa. Pancaminiya guiquënë mänömainö ante wii pönëmini adinque Wængonguï, Minitö æbänö nö pönenguënëmini iminii, ante pönö odömongä ate ëñencæminimpa. ¹⁶ Mönö do ëñente quëwenganca mäninganca mönö cöwë nö cæte quëwengæimpa.

¹⁷ Ìñänani ëñeedäni. Botö Pabodobo æbänö cæboo, ante adinque minitö botö cædö bai adobaï godongämæ cæedäni. Ayæ, Mönitö cæmöni bai minitö adobaï cæedäni, ante odömömöni bai pancadäniya adobaï cædäni adinque minitö iñömö, Adobaï cæcæimpa, ante tömënäni inänite cöwä aedäni. ¹⁸ Minitö iminite wantæ wantæ iñö wantæ wantæ iñö apænedimo inte botö ñöwo Ca ca wædinque adodö ante iïmai ante godömenque apænebopa. Mönö Codito awäa wængä incæte nanguï inäni tömengä ingante Baa äninque tömengä nänö wængaiwæ ante piïnte bai cædänipa, ante awædö. ¹⁹ Tömënäni nani ömæe ewente wæquinque mänömai cædänipa. Cænguï beyænque ante pönente quëwënänipa. Wënæ wënæ nani cædö beyæ guingo imonte wæquënänäni incæ tömënäni wæætë guïñëñadämai inte edæ, Waa pönï cæmönipa, ante nämä incæ waa adänipa. Edæ inguipoga beyænque ante cæinente wædänipa.

²⁰ Mönö iñömö mempoga ëñagaimö inte mönö öönædë ömæ do ëamö edæ imompa. Ìninque mönö Awënë Itota Codito, Quëwencæminimpa, ante në Ængaingä ingante nanguï aïnente wædinque mönö, Tömengä æyedënö öönædë edæ wææ ponguingää, ante wänö cömompa. ²¹ Tömengä iñömö tæi piñænongä inte tömancoo edæ bæ tadinque ö æninque Tæiyæ Awënë incæcäimpa. Ìninque, Mönö quëwenguïnämäi aquiiñö ëñamompa, ante adinque tömengä tæi piñænongä inte, Botö baö bai tæiñö mongæncæminimpa, ante badongä ëñaquimö imompa.

4

Mönö Awënë nempo quëwëninque watapæ tocæimpa

¹ Wængonguï botö imote poganta pönö wencate bai cædinque, Bitö waa apænebi ëñente beyænque pidipenteidi ëñente waa cædäni abopa, angä ëñëninque botö minitö beyæ ante watapæ tobopa. Minitö iminite ædæmö waadedinque botö, Æyedënö bee tenguïmoo, ante wæbopa. Ìninque botö në waademini ämo ëñeedäni. Mäninö botö äninö ëñente cædinque minitö mönö Awënë nempo quëwëninque tæi ongöedäni.

² Nöwo Eodia, Tintique, mina onquiyæncaya iminate ämo ëñeeda. Mönö Awënë nempo quëwëninque minatö piyænë cæte adodonque ante cæbæweda, ämopa. ³ Botö

mönö Awënë ingantedö ante watapæ apæneceate ante nanguï cæyömote Codëmente tönö wadäni botö tönö iñacabo cædänitapa. Wængongui, Näni quëwenguinta, ante tömengä nänö yewæmongaintaa tömënanï emöwo dobæ yewæmonte mäë öñompa. Tömënanï botö tönö cæyönänï iina onquiyænna Eodia tönö Tintique iñömö botö tönö adobaï iñacabo nanguï cæda inatapa. Ìninqe bitö cöwë botö tönö guëa cædömi iñömite bitö imite ämopa. Ìina inate bitö waadete apænebi ëñëninque piyænë cæte quëwencædaimpa.

⁴ Ayæ tömämïni iminite, Mönö Awënë nempo quëwëninque watapæ tote quëwëedäni, ämopa. Edæ, Watapæ pönï tote quëwëedäni, ante adodö ante ämo ëñëedäni. ⁵ Mönö Awënë edæ oo pönï poncæcäimpa cæmïni. Ee ædæmö cæte quëwëñömïni tömännäni waadete mïni cædönö ante edonque acædänimpa.

⁶ Ayæ, Quiëmë bacæ wæ, ante mïni wädö ante guiñente wädämaï iedäni. Wængonguinque ingante apæneedäni. Apænedinque, Wængongui, bitö pönö cæbi ate eyepæ inte quëwencæmönimpa, ante quiëmë mïni æncæ wädö incæ ante apæneceamïnimpa. Ayæ tömengä pönö cæcä adinque mïnitö, Bitö pönö cæbi waa æmönipa, ante Wængongui ingante wæætë waa ate pönente apæneedäni. ⁷ Ayæ, Wængongui piyænë cædinque pönö aacä beyæ mïnitö Itota Codito nempo quëwëninque piyænë cædinque mïmönë wädämaï inte nö pönëninque quëwencæmïnimpa. Edæ mönö, Æbämë cæte Wængongui pönö piyænë cæte aacää, ante mönö waocabo ëñënamäï imö incæte tömengä cöwë godömenque aacä ate wädämaï inte quëwëmompä.

Quinö waa i, ante mäninonque ante pönë cöedäni, ante

⁸ Ìñänäni ëñëedäni. Mïnitö æbänö ante pönëë congüenëmïni imïnipa, ante yewæmöninque botö ñöwo æmäwo pönï yewæmömoï aedäni. Näwangä näni apænedö ante pönëë cöedäni. Æbänö waa cæquiï, æbänö nö cæquiï, ante pönëë cöedäni. Quiënö nö i, ante mäninö ante pönëë cöedäni. Mönö æbänö waadete pönenguï, ante pönëninque mönö waa adoncoo ante adobaï pönëë cöedäni. Wadäni waa näni cædinö ante pönëë cöedäni. Mänömaï cædäni ate wadäni waa adänitawo. Ìninqe tömënanï näni waa adinö ante mïnitö mäninö ante pönëë cöedäni. Ìninqe, Quiëmë waa pönï i, ante adinque mäninonque ante pönëë cöedäni.

⁹ Botö odömote apænebo ëñëmïnitawo. Ìninqe botö pönö apænebo ëñëninque mïni ëñëninö bai tömännö ante edæ cæedäni. Botö pædæ pönömo æmïnitawo. Ìninqe botö pædæ pönömo mïni æninö incæ ee mäedäni. Botö entawënö ante, Æbänö entawëmoo, ante edonque amïnitawo. Ìninqe botö entawënö mïni adinö bai mïnitö adobaï entawëninque edæ waa cæedäni. Mänömaï cæmïni adinque Wængongui në gänë pönëongä inte mïnitö tönö godongämæ quëwëninque pönö cæcä ate mïnitö wæætë gänë pönëmïni bacæmïnimpa.

Pidipenteidi mïni pönöni waa æntabopa, Pabodo angampa

¹⁰ Botö wädö ante mïnitö doyedë pönö cædimïni inte ñöwo wæætë tæcæ pönente wædinque wæætë pönö cæmïni æninque botö, Mönö Awënë beyænque pönö cæmïnipa, ante adinque nanguï waa tobopa. Edæ botö wädö ante cöwë waadete pönëmïni incæte mïnitö da pönoncæ cæyömïnite wææ cæte i æiquedö da pönonguimïni. ¹¹ Incæte mänömaï apænedinque botö wïi ænguënëmo inte apænetabopa. Edæ wædænque ëabo incæ nanguï ëabo incæ quiëmë ëabo incæ botö, Æbänö quëwenguï, ante do ëñëmo inte edæ piyænë cæte wädämaï cöwë quëwëmopa. ¹² Ömæpobo wædimö inte botö, Ömaadäni æbänö quëwënanï, ante do ëñëmopa. Adobaï nanguï ëate quëwënimö inte botö, Nanguï ëadäni æbänö quëwënanï, ante do ëñëmopa. Edæ tömo cæmo incæ, gæwænte wæbo incæ, nanguï ëabo incæ, ömæpobo incæ mäninö tömännö ante wægäimo inte botö mänömaï ingäimo beyænque ëñente batäbopa. Ìninqe æyömömë quëwëmö incæ quiëmë bai quëwëmö incæ piyænë cæte wädämaï quëwëmopa. ¹³ Edæ quiëmë beyæ wæbo incæ mönö Codito pönö cæcä ate botö wæætë edæ eyepæ entawëninque tömäa edæ cæbopa.

¹⁴ Incæte botö ömæpobo inte wæyömote mīnitö pönö cæmīni waa æntabopa. ¹⁵ Ayæ adobaī mönö Codito ingantedö ante watapæ möni apænedö ante tæcæ ëñēmīni ate botö Mäatedöniabæ iinque apænedinque wadæ goyömote wadāni Codito ingante nāni godongāmæ pönencabo pönönāmaī iñönānite mīnitö adomīnique da pönömīni æntabopa, ante mīnitö pidipenteidi do ëñēmīnīpa. ¹⁶ Edæ, Tetadōnica nāni quëwëñömö quëwëninque Pabodo ömæpocā bacampa, ante tededāni ëñente wædinque mīnitö wīi adopoque wæætë wæætë da pönömīni æntabopa.

¹⁷ Botö dicæ botö æncæ wædö ante apænetabopa. Wæætë, Pidipenteidi wadāni iñānite nē godönāni iñānīpa, ante adinque Wængonguī wæætë mīnitö imīnite godömenque pönongā æncæmīnīpa, ante apænetabopa. ¹⁸ Iinque botö iñömö idæwaa æntabopa. Botö ænguënēnö æninque godömenque nanguī ænte ëabopa. Edæ, Pabodo quī, ante mīni da pönönincoo Erapododito wæætë botö imote pædæ pönongā æninque botö eyepæ pönī èate quëwëmopa. Mīnitö, Wængonguī quī, ante oguī waquī baī pönö iya tante baī cædinque, Pabodo quī, ante da pönömīni adinque, Waa pönī pönömīnīpa, ante Wængonguī incæ waa acampa. ¹⁹ Botö Wængonguī ñäö baī entawëninque tæi ëmongā iinongā inte tömengā nänö ëadoncoo iñömö edæ bacoo pönī ongompa. Iinque, Mīnitö ænguënēmīni imīnīpa, ante adinque tömengā Itota Codito beyænque cædinque eyepæ pönī edæ da pönongā æncæmīnīpa.

²⁰ Mönö Wængonguī mönö Mæmpo iñongante, Bitö waëmö pönī iñömi imīpa, ante mönö cöwë watapæ apænecæimpa. Edæ ñöwopāmo incæ miimāmo incæ mönö cöwë mänömaī apænecæimpa. Mänömaī impa, äninque botö, Amëë, ämopa.

Mäninque ante yewæmömopa, ante

²¹ Wængonguī quīnāni Itota Codito nempo quëwënönāni iñönānite mīnitö, Waa quëwencæmīnīpa, ante botö beyæ ancæmīnīpa. Ayæ botö tönö godongāmæ ongönāni incæ, Mīnitö æbänö quëwëmīnīi, ante wædānīpa. ²² Edæ Tæiyæ Awënë Tetædo oncönë quëwënāni tönö wadāni Odömā iñömö wayömö quëwënāni tönö Wængonguī quīnāni incæ tömänāni adobaī mīnitö imīnite, Waa quëwencæmīnīpa, änānīpa.

²³ Mönö Awënë Itota Codito mīnitö imīnite waadete pönö cæcæcäimpa, ämopa. Mäninque ante yewæmömopa.

Codotenteidi inänite Pabodo nänö cadota ante yewæmongainta

Waa quëwencæminimpa, ante

¹ Wængonguï angä ëñëninque Itota Codito botö imote da godongä gogaïmo inte botö Pabodobo inömo inte yewæmömopa. Mönö tönñäcä Tímoteo tönö guëa tedete ate botö, Acæminimpa, ante yewæmömopa. ² Mönitö tönñamini ëñëedäni. Codota inömo quëwëninque Wængonguï quimïni inte mïnitö mönö Codito nempo quëwëninque ædæmö cæte pönëmini inöminite botö iïmaï ante yewæmömopa. Mönö Mæmpo Wængonguï tönö mönö Awënë Itota Codito waadete pönö cæda ænte entawëninque mïnitö gänë pönëninque watapæ quëwencæminimpa, ämopa.

Në pönënanï beyæ Pabodo Wængonguï ingante apænecä

³ Mönö Awënë Itota Codito Wæmpocä inongante mönitö mïnitö beyæ ante apænedinque Wængonguï ingante waa ate pönente apænemönipa. ⁴ Edæ, Mïnitö Itota Codito ingante wede pönëmini iminipa, ante do ëñëmönipa. Ayæ, Wængonguï quïnäni inänite tömänäni inänite mïnitö waadete pönëminipa, ante mönitö do ëñëmönipa. ⁵ Edæ, Öönædë ædinque mïnitö watapæ quëwënguinque impa, ante edæ Codito do badongampa. Mänömaïnö ante, Näwangä impa, ante watapæ mïni ëñënö ante mïnitö godömenque wede pönëmini badinque godongämæ waadete pönëmini iminipa. Ininque, Mïnitö mänömaï iminipa, ante adinque mönitö wæætë Wængonguï ingante waa ate pönëninque apænemönipa.

⁶ Doyedë mïnitö weca ponte apænedinque mönitö, Mönö Codito ingantedö ante watapæ apænemöni ëñëninque mïnitö, Wængonguï näwangä waadete pönö cæcampa, ante do ëñëmïnitapa. Mänömainö ante mïni ëñëniönæ incæ mïnitö waincawæ nanguï incawæ bai tæcæ badinque ñowo ganca nanguï apænemïni ëñëninque wadäni mïnitö weca në pönënanï tæiyænäni badäni. Ayæ tæiyænäni badäni bai mönö pönencabo adobaï tömämæca tæiyæmö pönï bamompa. ⁷ Epapada möni në waadedongä incæ, Codito waa pönï nänö pönö cægäinö ante do odömonte apænecä ëñëmïnitapa. Tömengä inömo Itota Codito beyæ në cæcä inongä inte mönö imönite pönëninque ædæmö cæcä ingampa. ⁸ Ayæ mönitö imönite apænedinque tömengä, Codotenteidi inömo Wængonguï Önöwoca nempo quëwëninque në waadete pönënanï inänipa, ante do apænecä ëñentamönipa.

⁹ Mänömaï beyæ mönitö, Mïnitö æbänö iminïi, ante tæcæ ëñëninque mïnitö beyæ ante Wængonguï ingante apænedinque ñimpo cædämaï inte cöwë apænemönipa. Edæ, Wængonguï æbänö angää, ante mïnitö ëñente ëwocacæminimpa, ante mönitö, Wængonguï ëñëmi. Bitö ëñënö ante apænëbi ëñente ëwocadinque Codotenteidi wæætë, Æbänö waa cæte quëwënguiï, ante ëñencädänimpa, ante apænemönipa. ¹⁰ Wængonguï apænecä ëñëninque mïnitö, Mönö Awënë tocæcäimpa, ante cædinque tömengä nänö waa cædö bai mïnitö adobaï waa pönï cæcæminimpa, ante apænemönipa. Ayæ Wængonguï ingante mïnitö doyedë æmæ ate bai æmæ pönënimini inte ñowo wæætë ædæmö ate bai ædæmö pönencæminimpa. Ayæ waa incawæ bai mïnitö adobaï bate cædinque nö mïni waa cæquënonque cæcæminimpa, ante apænemönipa. ¹¹ Wængonguï ñäö ëmöninque tæ pñænongä inte pönö cæcä ate mïnitö edæ tömengä nänö tæi pñænö bai adobaï tæi pñæmïni ëwocacæminimpa, ante apænemönipa. Ayæ, Tömengä mänömaï pönö cæcä ænte ëwocamini inte mïnitö wæntæye badämaï inte ee cædinque piyænë cæte ee cæcæminimpa, ante ämönipa. Ayæ watapæ todinque, ¹² mïnitö mönö Mæmpo ingante waa ate pönëninque apænecæminimpa, ante mönitö Wængonguï ingante apænemönipa.

Edæ Wængonguï quimöni imöni bai tömengä mïnitö iminite pönö badongä ate mïnitö tömengä quimïni do bamïnipa. Ininque mïnitö tömengä ñäö ëmömämöde mönitö

tönö godongämæ pönömīnīte tōmēngā nangūī pōnī pōnōngā ænīnque mīnītō mōnītō tönō godongämæ nē ēamīnī incāmīnīmpa. ¹³ Edæ nē wēmō ēnempodōngā nempo wæwēñōmonte Wængonguī wæætē mōnō īmonte gā pe æmpote ò ænīnque, Botō Wēngā botō nē Waadedōngā īñōmō nē Awēnē Odeye īñōngante mīnītō tōmēngā nempo quēwēncāmīnīmpa, ante māmōngā pongamōīmpa. ¹⁴ Tōmēngā Wēngā nāmā wēpæ petæ petæ wææ beyænque mōnō wēnæ wēnæ cægāīnō ante Wængonguī pōnō ñīmpo cæcā ænīnque mōnō abæ tawænte baī quēwēmōmpa.

Codito wængā beyænque Wængonguī piyænē cæcampa

¹⁵ Mōnō adāmaī ingāīngā Wængonguī æbānō ēmōngāā, ante adāmaī īñōmonte Wængonguī Wēngā īñōmō Mæmpocā baī nē ēmōngā inte mōnō weca pōnīnque, Mæmpocā æbānō ēmōngāā, ante do odōmōngacāīmpa. Wēēnēñedē Wængonguī nānō badōnāmaī ingāñedē adocā incæ Bamoncadēngā baī īnōngā inte do quēwēngacāīmpa. ¹⁶ Īnīnque Mæmpocā pōnō angā ēñēnīnque tōmēngā Wēngā incæ tōmancoo edæ badōngacāīmpa. Mōnō nē adīncoo incæ mōnō adāmaī incoo awēmō ongoncoo incæ adocā tōmancoo badōngacāīmpa. Awēnēīdī incæ nē ānānī incæ, awēnēīdī nānī ēnempodō incæ nē tæī pīñānānī incæ, oōnædē owodōnānī incæ inguīpoga quēwēnōnānī incæ māñīnānī edæ tōmānānī īnānīte Mæmpocā pōnō angā ēñēnīnque Wængonguī Wēngā īñōmō badōngacāīmpa. Badōñōngante Wæmpocā, Bitō quī bacæīmpa, angā Ao ante badōngacāīmpa. ¹⁷ Adocā Wængonguī Wēngā incæ Tānocā quēwēngāīngā ingāmpa. Tōmēngā pōnō angā beyænque tōmēngā nānō badōngāīncoo īñōmō adoyōmō pōnente baī cædīnque tōmēngā nempo godongämæ gōngænte cægōmpa.

¹⁸ Ayæ tōmēngā nē Ōnoncamō baī nē angā īñōngante mōnō tōmēngā īngante mōnō godongämæ pōnencabo wæætē tōmēngā tönō adoyōnque baī īñōmō īmōmpa. Adocā tōmēngā nānō Tæiyæ Awēnē baquinque nē badōngāīngā īnōngā inte tānocā pōnī īngacāīmpa. Ayæ æmōngā pōnī nānō ongōngūīnque tōmēngā wænte ate tānocā nē ñānī ōmæmōngāīngā īnōngā īngāmpa. ¹⁹ Edæ, Botō entawēnō incæ botō Wēngā tōmānō entawēncæcāīmpa, ante pōnō cædīnque Mæmpocā īñōmō nangūī togacāīmpa. ²⁰ Ayæ tōmēngā Wēngā wēpæ awāa gowete wædīnque wængā beyænque Wængonguī mōnō tōmāmō beyæ pōnō cædīnque piyænē cægacāīmpa. Tōmēngā Wēngā tönō māñōmaī pōnō cæcā beyænque mōnō inguīpoga tōmāo quēwēmō tönō oōnædē tōmāo quēwēnānī tönō tōmēngā īngante Ao ānīnque tōmēngā tönō godongämæ piyænē cæte quēwēmō adīnque Wængonguī īñōmō nangūī togacāīmpa.

²¹ Ayæ mīnītō quīquēnē Wængonguī īngante nāwæ pāmænte gogāīmīnī inte wīwa cædīmīnī inte ocaīdē nē pīīnte bagāīmīnī īñōmīnīte, ²² Wængonguī wæætē, Adocā Codito tōmēngā baō ēwēnente wængā beyænque mīnītō botō quīmīnī badīnque botō ayōmo tæiyæ wæmō entawēncāmīnīmpa, ante cæcampa. Īnīnque tōmēngā ñā mēnōngacā ate mīnītō tōmēngā ayōngā wentamō mōngāēnāmaī īmīnī adīnque, Wēnæ wēnæ cæbitapa, ante ædō cæte pīīnte angūī. ²³ Edæ mīnītō tæī mænōnte baī ongōnīnque do mīnī wede pōnēnōnque ante cōwē godōmēnque pōnēmīnī īnīnque tōmēngā weca ponte ongōmaīmīnīpa. Mōnītō mōnō Codito īngantedō ante mōnō pōnēnō beyæ mōnō watapæ bacæīmpa, ante apænēmōnī ēñēmīnītawo. Māñīne ante ñīmpo cædāmaī īmīnī inte mīnītō tōmēngā weca cōwē ongōmaīmīnīpa. Māñīne mīnī ēñēnīne ante mōnītō ñōwo inguīpoga tōmāo quēwēnānī īnānīte apænēmōnī ēñēnānīpa. Māñīne beyænque ante botō Pabodobo nē cæbo batabopa.

Mōnō pōnencabo beyæ botō nē cæbo batabopa, ante

²⁴ Mīnītō beyæ nangūī cædīnque nantate wædīmō incæte botō nangūī tobopa. Ayæ Codito beyæ ante godōmēnque wæquēnēmō inte botō tōmēngā tönō guēa baonque nantate wæbopa. Codito mōnō Ōnoncamō baī nē angā īñōngante mōnō tōmēngā īngante mōnō godongämæ pōnencabo īñōmō tōmēngā tönō adoyōnque baī īmōmpa. Botō īñōmō edæ mōnō cabo beyænque caate wæbopa. ²⁵ Ayæ, Codito īngante nē pōnēnānī beyæ bitō nē cæbi badīnque botō angāīne ante adodō adodō ante tōmānō ante edonque

pöni apænebi eñencædänimpa, ante Wængongui angä eñëninque botö mînitö beyæ nê cæquênemo do bagaboimpa.

²⁶ Mänine Wængongui nänö angaine ante wantæpiyæ wê wodonte bai iñonte mönö mæmæidi cöwê eñënamai ingadänimpa. Nöwo guiquênê Wængongui tömengä quimö iñömonte mänine ante edonque pöni odömonte apænecä eñëmompä. ²⁷ İninque mönitö imönite äninque, Waa pöni botö angaine ante mîni waocabo wëenënedê mîni eñënamai ingaine ante mînitö nïwo tæcæ eñëmîni inte oodeoidi inämaï inäni inänite odömonte apænemîni eñencædänimpa, ante Wængongui cæcampa. Mänömaï beyæ mänine ante apænemöni eñëninque mîni waa pöni nïwö bai entawenguinque eñencæmînimpa. Edæ, Mînitö mönö Codito ingante ewocadinque mîni nïwö emämöde æiyömîni watapæ bacæimpa, ante mönö pönënö ante mänineque impa.

²⁸ Mönö Codito tömengä nänö eñënö ante entawëninque mönitö adocä ingante mönö Codito ingante ante apænemönipa. Tömengä nempo quëwëninque mînitö picænäni bai nê eñëmîni bayöminite Wængongui mînitö imînite waa acæcäimpa, ante mönitö tömänäni inänite waadete odömonte apænemönipa. Ayæ, Eñenguênê quëwëedäni, ante tömänäni inänite wææ ante apænemönipa. ²⁹ Mönö Codito nänö tæi piñænö pönongä ænte entawëninque botö, Nê eñëmîni bacæmînimpa, ante cædinque tæi pæ pagænte cöwê nanguï cæbo imopa.

2

¹ Botö mînitö beyæ nanguï cædinque Daoditea iñömö quëwënanï beyæ adobaï nanguï cæbo aedäni. Ayæ wadäni botö awinca adämaï inäni beyæ adobaï tæi pæ pagænte cædinque nanguï cæbopa, ante apænebo eñëedäni. ² Botö, Tömänäni wæwënamaï inte wampo pönëninque godongämæ waadete pönëninque adocabodäni bai bacædänimpa, ante ædæmö cæbopa. Edæ, Mänömaï badinque tömënäni Codito nänö eñënö ædæmö pöni näni entawenguinque impa, ante pönëninque cæbopa. Ayæ, Mänömaï badinque tömënäni Wængongui nänö nê wê wodongaingä ingante Codito ingante edonque acædänimpa, ante botö mänömaï beyæ ante ædæmö pöni odömonte apænebopa. ³ Edæ, Æbänö i, ante, Æbänö waa cæquiï, ante Wængonguinque nänö nö pönënö incæ mönö Codito mäninö tömänö ante eñëninque waëmö pöni incoo bai wê wodonte mante bai entawengampa. ⁴ Mänömainö ante apænedinque botö, Mînitö oda cædämaï incæmînimpa, ante yewæmonte apænebopa. Edæ wadäni waa pöni tededäni incæ babæ wapiticæ odömoncæte ante tededäni inäni adinque eñënamaï iedäni, ante wææ ämopa. ⁵ Edæ wayömö quëwëmo incæ mînitö weca owote bai botö önöwoca pönëmopa. İninque botö ayömo mînitö mönö Codito ingante wede pönente tæi piñænte ongöninque iñacabo cædinque töingä pöni cæmînipa, ante pönëmopa. Mänömaï imînipa, ante ate bai adinque botö nanguï tobopa.

Codito nempo quëwëninque mîimö quëwëmompä, ante

⁶ Mänömaï beyæ botö iïmaï ämopa. Mînitö Itota Codito ingante mönö Awënë ingante Ao ante do æmînitawo. İninque tömengä ingante do Ao ante ænimîni inte mînitö nïwo adobaï tömengä ingante cöwê Ao ante tömengä nempo quëwëedäni. ⁷ Mînitö waomîni incæ awæ tæimöwæ ædæmö guiwate pæwæ bai Codito nempo quëwëninque cöwê godömenque picæmîni bacæmînimpa. Ayæ mönitö odömonte apænemöni mîni eñënö bai cædinque godömenque wede pönëninque tæi piñænte ongöedäni. Ayæ Wængongui ingante waa ate pönëninque watapæ apæneedäni.

⁸ Wadäni mä pönente önonquedö ante apænedäni eñente wædinque mînitö, Mönö imonte ö æncæte ante babæ apænedänipa, äninque wææ cæedäni. Edæ tömënäni dicæ Codito nänö odömonte apænegainö ante apænedäniyaa. Wæætê waodänique näni odömonte apænegainonque ante Ao äninque tömënäni inguipogaque ante nê pönënäni näni pönënö bainonque ante cædänipa töö.

⁹ Edæ Wængongui tömengä nänö entawënoncoo incæ mönö Codito Waocä nê eñagaingä inongä inte mänincoo tömancoo entawëninque nämä baonga eñacampa.

¹⁰ Öönædē awēnēidi incæ inguipoga awēnēidi incæ nanguī ināni iñōnāni mōnō Codito adocanque Ñænængā pōni inongā inte Tæiyæ Awēnē inongā ingampa. Incæte tōmengā nempo quēwēmīni inte mīnitō tōmengā nānō entawēnō incæ ædæmō entawēmīnīpa.

¹¹ Inique tōmengā nempo quēwēnīnque mīnitō wao ōnompoca ēō togænāmaī imīni incæte mōnō Codito iñōmō ēō togænte baī cædinque mīnitō baonque ante mīni wīwa cægainō ante wido cæcā ate mīnitō tæiyæ waēmō entawente quēwēmīnīpa. ¹² Wængonguī nē tæi pīñænongā inte Itota ingante angā ñāni ōmæmongacāimpa, ante wede pōnēmīni inte mīnitō, Itota tōnō godongāmæ nāñe wænte baī imompa, ante æpænē guimīnītapa. Ayæ adobaī adocā nē tæi pīñænongā ingante wede pōnēnīnque mīnitō æpænē guidinque Itota tōnō ñāni ōmæmonte godongāmæ tao gongænte quēwēmīnīpa.

¹³ Doyedē ēñēnāmaī cædinque do wænguēñēmīni ingaīmīni inte mīnitō inguipogaque ante mīni cæinēwēnō ante ee mongæñōmīnīte Wængonguī angā ate mīnitō Itota tōnō ñāni ōmæmonte quēwengamīnīpa. Edæ wēnæ wēnæ mīni cægainō ante adinque Wængonguī pōnō ñimpo cæcā quēwēmīnīpa. ¹⁴ Mīnitō pante wæquinque ēñēnāmaī cæmīnīpa, ante Wængonguī wade wade ante wææ angā ēñēnīnque dodāni adodō adodō ante yewæmōnāni ate wægāmōimpa. Mānōmaī mōnō imonte ancaa wææ ānāni wæmō adinque Codito iñōmō mānīnecoo mōnō wægāinecoo ante wēā godonte baī cæcā ate dæ batimpa. Edæ awæ timpodāni wæninque Itota Codito mānīnō ante do teēmente mongæ māo wido cægacāimpa. ¹⁵ Ayæ māniwāa wæninque adocā tæi ēmongā inte wēnæidi awēnēidi tōnō nē ānāni nāni wænonguēnencacoo gā pe æmpote ō ænīnque tōmengā, Wænoncaincōo nææmīnīpa wænonguīmīnīi, ante baī wadāni ayōnānīte badete tote baī cægacāimpa.

Öönædē mōnō entawēnō ante æncæte ante cæedāni, ante

¹⁶ Mōnō ee aquēñēnō incæ bitō quīmæ cæmīi, Quīmæ bebīi, ante pōnō apænte pīinte ānānitawo. Wængonguī beyæ ante ææmæ cæcāimpa, ante apænte ancæ pīñānitawo. Wacā māmō i ate becāimpa, ante wææ ānānitawo. Guēmanguīōnæ incæ quīmæ cæbīi, ante mīnitō imīnīte apænte pancæ cædānitawo. Edæ æcāmenque mānōmāinō ante apænte ancæ cæyōnānīte mīnitō wæætē, Tōmēnāni nāni wææ ānīnō ante Codito wēā godonte baī cægacāimpa, ante pōnēnīnque guīñente wædāmaī incæmīnīpa. ¹⁷ Cænguī cænte baī bequī bete baī mōnō ōnōwoca beyæ Codito incæ mōnō guēmanguīmāmo baī inongā ingampa. Inique Codito ingante ænte entawēnīnque mōnō æbānō cænte baī guēmante baī quēwenguīi, ante odōmoncæte ante cædinque dodāni iñōmō ōwocodenganque odōmonte baī cædinque wææ angadānīpa. Mānōmaī beyænque tōmēnāni, ĩmaī cæedāni, ĩmaī beedāni, ĩmaī guēmæedāni, ante wææ angadānīpa.

¹⁸ Pancadāniya mā pōnēnīnque, Ōnōmonque baī inōmō inte mōnō anquedoidi inānīte waa adinque waa cæcāimpa, ante babæ ante wææ ānewēnānīpa. Ayæ mōnitō ānō baī cædāmaī inīnque edæ mīnitō ænte entawēnō ænāmaī inte wæbaīmīnīpa, ante ānewēñōnāni mīnitō wæætē guīñente wædāmaī iedāni. Edæ, Mōnitō ate baī do adīmōni inte āmōni ēñēedāni, ante tōmēnāni Codito Ōnōwoca ingante ēwocadāmaī ināni inte mā pōnēnīnque ānewēnānīpa. Edæ, Nāmāneque ante pōnēnīnque tōmēnāni, Mōnitō adomōnīque waa cæmōni imōnīpa, ante nāmā waa adānīpa. ¹⁹ Mōnō ocai encamō inte cænguī cænīnque mōnō baonga wepæmē tōmāo gogadinque pæmompā. Ayæ adobaī mōnō ocai encadinque oguēmē tōnō baō beyæ cōñe pō cōñe pō cæmompā. Mōnō pōnencabo adobaī Codito tōnō adoyonque baī iñōmonte tōmengā Ōnōncamō baī inongā inte nē angā ingampa. Mōnō mānōmaī imō incæte tōmēnāni wæætē nē Ōnōncamō baī inongā ingante Baa ānīnque nāmā wido tote wææiñō baī edæ wadæ godānīpa. Inique wææiñō baī ināni incæ mīnitō imīnīte wææ ānāni apa quēwēmīnīi.

²⁰ Wēēnēñedē inguipogaque ante nāni wææ angāinō ante nē ēñēngaīmīni incæte ñōwo wæætē Codito tōnō godongāmæ wænīmīni inte mīnitō wænte baī imīni inte mānīne ante ædō cæte ēñēnguīmīnīi. Inguipogaque quēwēmīni imīnīpa diyæ mānīne ante ēñēnte cæquēñēmīni inguīmīnīi. ²¹ “Gampodāmaī, Yædæ bedāmaī, Bæi ongōnāmaī,” ante tōmēnāni nāni wææ ānewēnō ante quīnante ēñēnte cæmīnīi. ²² Iñæmpa

waodänique edæ, Gampodämaï, ante nāni ānoncoo iñōmō tæcæ ænte cæyōmīni edæ dobæ wote ba apa eñewēmīni. Inguipogaque quēwēnāni nāni ānewengainō ante eñēninque tōmēnāni wææ ānānīpa. Dodāni nāni odōmonte apæneganō ante eñēninque wææ ānānīpa. ²³ Tōmēnāni, Ōnōmonque baï iñōmō inte mōnō anquedoidi inānite waa adinque waa cæcæimpa, ante wææ ānewēnānīpa. Ayæ mā pōnēninque, Cædāmaï, Cædāmaï, ante nāmā baō incæ pānānīpa. Īnāni ocai encadōnāni inte wææ ānānīpa, ante pōnēninque wadāni edæ wæætē oda cædānīpa. Īñæmpa, Cædāmaï, Cædāmaï, ante nāni wææ ānewēnō wī eyepæ ī ininque nē eñēnāni inguipogaque nāni cæinēwēnō ante godōmenque wīwa cædānīpa, ante āmo eñēmaimīnīpa.

3

¹ Īninque mōnō Codito nē ñāni ōmæmongaingā tōnō nē ñāni ōmæmongaimīni inte mīnitō æmōnga ongoncoo edæ æinente pōnēdāni. Codito ñōwo Mæmpo Wængonguī tōmēmængā iñō æi tæ contate ongongampa, ante pōnēninque edæ mīnitō, Æmōnga pōnī nē quēwengā tōmengā nānō entawēnō baï adobaï entawengæimpa, ante æinente wædinque quēwēdāni. ² Inguipogaque mōnō quēwēmāmo ante edæ wædāmaï inte wæætē æmōnga mōnō quēwenguinō ante cōwē pōnente quēwēdāni. ³ Edæ do wænte baï ingaimīni inte mīnitō ñōwo Codito tōnō Wængonguī nempo awēmō quēwēñōmīnite mīnitō quēwenguinō ante wī edonque acæimpa. ⁴ Mōnō Codito mīnitō quēwenguinō ante nē pōnongaingā inte ponte a ongōñongā māñīñedē tōmengā ñāō entawēninque nānō tæi emōmāmodē mīnitō adobaï tōmengā tōnō a ongōmīni acæimpa.

Inguipogaque ante wægaimō inte mōnō mīimō quēwēmō

⁵ Mānōmaï impa, ante wædinque mīnitō inguipogaque ante mīni cæinēwēnō ante wænonte baï æmæwo wido cæedāni. Nānōogængā ināmaï iñongante godō mōnāmaï ee aedāni. Wīwa mīni pōnēwēnō ante æmæwo wido cæedāni. Wacā ingante mīni toinente wædō ante æmæwo wido cæedāni. Wīwa mīni cæinēwēnō ante æmæwo wido cædinque ee ate quēwēdāni. Mīni māincooque ante æinēwēnō ante æmæwo wido cæte ñimpo cæedāni. Edæ māincoo ante æinente nē wæcā iñōmō tōmengā, Māincoo incæ botō wængonguī impa, ante baï wæcā apa cæmīni. ⁶ Nē eñēnāmaï cædāni inguipogaque nāni cæinēwēnonque ante cæyōnānite Wængonguī nānō piinguimāmo oo ponguinō anguēnē. ⁷ Mīnitō incæ doyedē inguipogaque ante quēwēninque adobaï mīni cæinēwēnonque ante cægaimīni imīnīpa. ⁸ Nōwo guiquēnē ænguī badāmaï iedāni. Āimīni badāmaï iedāni. Pīinte cædāmaï iedāni. Babæ godō wēnæ wēnæ ānewēnāmaï iedāni. Wīwa apænedāmaï iedāni. Wæætē, Idæwaa wēnæ wēnæ cæte awædō, ante māñinō tōmānō ñimpo cæte ee aedāni. ⁹ Wēēnēñedē mīni entawengaimāmo ante wido cædinque māñīñedē mīni cægainō ante adobaï nē wido cædimīni inte ñōwo iñōmō edæ wacā ingā wacā ingā babæ wapiticæ apænedāmaï iedāni.

¹⁰ Wæætē mīimīni edæ quēwencæmīnīpa, ante Wængonguī do pōnō badongā entawēmīnīpa. Ayæ māñinō ante nē Badongaingā iñōmō cōwē pōnō odōmonte apænecā eñēninque mīnitō mīimīni quēwēmīni inte tōmengā nānō entawēnō baï godōmenque godōmenque adobaï entawēmīni bamīnīpa. ¹¹ Mōnō Codito nempo adoyōmō pōnī iñōmō inte mōnō guidiegoidi incæ oodeoidi incæ adomō iñōmō imōmpa. Nē eō togæināni incæ bagaadāni incæ adomō iñōmō imōmpa. Waodāni incæ cowodēidi incæ adomō iñōmō imōmpa. Wacā beyænque nē cæte quēwēnāni incæ abæ tawænte ee gote baï nāmā beyænque nē cæmōni incæ mōnō tōmāmō adomō pōnī iñōmō imōmpa. Edæ mōnō tōmāmō Codito adocanque nempo quēwēninque tōmengā adocanque ingante nē ewocamō imōmpa.

¹² Wængonguī, Mīnitō botō quimīni badinque tæiyæ waēmō bacæmīnīpa, ante mīnitō imīnite waadete pōnēninque do apænte ængacæimpa. Īninque tōmengā nānō nē apænte ængaimīni inte mīnitō wadāni inānite waadete pōnente godō waa cæedāni. Nāmā ōnōmoque baï imōpa, ante pōnēdāni. Wadāni inānite ædæmō cæedāni. Æiquedō waa cæquināni, ante wædāmaï inte piyænē cæte quēwēdāni. ¹³ Ayæ wacā nānō

cæinënö ante cæcä adinque mīnitō pīināmaī ee amīni cæcædāni. Wacä adobaī mīnitō imīnite wiwa cæcä ate wædinque mīnitō godō ñimpo cæmīni quëwencæcäimpa. Edæ mōnō imonte mōnō Awënë nānō ñimpo cægai bai mīnitō adobaī pīināmaī inte godō ñimpo cæedāni. ¹⁴ Ayæ, Adocabomō mōnō baquinque mōnō waadete pōnengæimpa, ante pōnëninque mīnitō tāno wadāni inānite waadete pōnëninque ayæ tōmënāni inānite mīni godōmenque cæquënënō ante cæedāni. ¹⁵ Mīnitō adocabomīni badinque piyænë cæte quëwencæmīnimpa, ante Wængonguī mīnitō imīnite aa pegacäimpa cæmīni. Mōnō Awënë Codito nānō piyænë cædō pōnongä æninque mīnitō piyænë cæte quëwëedāni. Ayæ Wængonguī ingante cōwë waa ate pōnente quëwëedāni.

¹⁶ Mōnō Codito nānō apænegainō ante ëñëninque mīnitō ædæmō entawëninque nanguī ëñente baedāni. Ininque nanguī ëñëmīni badinque mīni cabo incæ wacä ingä wacä ingä godongämæ odōmonte apæneedāni. Ayæ nanguī ëñëmīni inte mīnitō wacä ingä wacä ingä waadete pōnëninque, ñimai cæcäimpa, ante apæneedāni. Ayæ dodāni Wængonguī ingante waa adinque ämotamīni ante nāni yewæmongainta adinque mīnitō wæætë adodō tee empote æedāni. Ayæ Itota Codito nānō cægainō ante pōnëninque ämotamīni æedāni. Ayæ adobaī Wængonguī Önōwoca pōnō apænecä ëñente ëwocadinque mīnitō ämotamīni ante adodō tee empote æedāni. Mänōmaī ämotamīni äninque Wængonguī ingante cōwë waa ate pōnëninque æedāni. ¹⁷ Ayæ æbämenque ante apænemīni incæ æbämenque cæmīni incæ mīnitō, Mōnō Awënë Itota ëmōwo beyæ impa, ante tōmää cæedāni. Ayæ tōmengä pōnō cæcä beyænque mīnitō eyepæ inte Mæmpo Wængonguī weca pōninque tōmengä ingante waa ate pōnëninque apæneedāni.

Mōnō godongämæ quëwencabo ñimai cæte quëwengæimpa

¹⁸ Onquiyæmīni ëñeedāni. Mōnō Awënë nempo quëwëninque mōnō ëñente cæcäimpa, ante wædinque mīnitō nānōogænāni inānite Ao ante ëñente cæedāni. ¹⁹ Onguñämīni ëñeedāni. Mīnitō nānōogænāni inānite ædæmō waadete pōnëninque tōmënāni inānite piinte cædāmaī iedāni.

²⁰ Wëñämīni ëñeedāni. Mīnitō mæmpoidi inānite ædæmō ëñente cæedāni. Edæ mänōmaī cæmīni adinque mōnō Awënë, Waa pōni cæbi abopa, ancæcäimpa. ²¹ Wæmpomīni ëñeedāni. Mīnitō, Ancaä ämo bai botō wëñængä ænguī badinque guingo imonte wæquënegä, ante pōnente wædinque wæætë wëñænāni inānite nanguī änāmaī inte waadete pōnō cæedāni.

²² Wacä nānō nē ö ænimīni inte tōmengä beyænque nē cæte quëwëmīni iñōmō ëñeedāni. Mīnitō imīnite nē ö ængaingä ingante nē cæmīni inte mīnitō tōmengä nānō ä bai tōmää ëñente cæedāni. Edæ, Awënë Wængonguī incæ botō imote cōwë acampa diyæ, ante guñente wædinque mīnitō imīnite nē ö ængaingä nānō ayedë incæ tōmengä nānō adāmaī iñedë incæ cōwë ëñente cæedāni. Waodānique botō imote waa acædānimpa, ante pōnënāmaī inte mīnitō nō pōnëninque cōwë ëñente cæedāni. ²³ Æbämenque cædinque mīnitō, Wīi waocä beyænque ante cædinque botō Wængonguī Awënë beyænque ante cæcæboimpa, ante pōnëninque tæi ëwocadinque ee cæedāni. ²⁴ Mōnō Awënë iñōmō tōmengä do nānō angainō bai cædinque mīnitō cægainō beyæ ante eyepæ pōni pōnongä æncæmīnimpa. Mänōmainō ante pōnente cæedāni. Edæ, Mōnō Awënë Codito ingante adocanque ingante nē cæmīni imīnīpa, ante ämo ëñëmaimīnīpa. ²⁵ Nē wënæ wënæ cæcä guiquënë tōmengä nānō wënæ wënæ cægānganca eyepæ æncæcäimpa. Edæ Wængonguī iñōmō wacä ingante wadō wacä ingante wadō ate pōnënāmaī inte tōmāmō imonte apænte äninque pōnō nō pōni paga cæcæcäimpa.

4

¹ Awënëidi ëñeedāni. Mīnitō waocä ingante nē ö ænimīni inte ëñeedāni ämopa. Edæ mīnitō Awënëidi imīni bai mīnitō imīnite nē Ængaingä incæ adobaī mīnitō Awënë inongä inte öönædë quëwengampa cæmīni. Mīnitō beyænque cæte nē quëwënāni

inänite mīnitō nōingā cædinque tōmēnāni nāni ænguēnēnō ante adinque eyepæ pædæ godōmīni æncædānimpa.

² Wængonguī ingante cōwē apænedinque, Tōmengā æbānō cæcāā, ante cōwā adinque tōmengā ingante waa ate pōnēninque apæneedāni. ³ Codito æbānō cæcāā, ante dodāni nāni ēñēnāmaī ingaīne incæ botō māniīne ante do ēñēnīmo inte apænebo beyænque botō imote tee mōnedāni wæbopa. Incæte mōnitō māniīne ante apæneyōmōni mīnitō wæætē mōnitō beyæ ante Wængonguī ingante apænedinque iīmaī ante apæneedāni āmopa. Wængonguī ēñēmi. Bitō wi ænete baī cæbi ate Pabodoidi nāni apænedē wadāni mīmōnē guicæimpa, ante apæneedāni. ⁴ Codito æbānō cæcāā, ante botō edonque apænequēnēmo imopa. Īninque mīnitō botō beyæ ante apænedinque, Pabodo edonque apæneccæcāimpa, ante Wængonguī ingante apæneedāni āmopa. ⁵ Wadāni inänite bee tēninque mīnitō ocai encamīni inte ēñente cædāni. Pōnēnāmaī ināni do ēñencædānimpa, ante waa apænete cædāni. ⁶ Ayæ Wængonguī waadete pōnō apæneccā ēñēninque mīnitō adobaī wadāni inänite waadete pōnō apænedinque waa pōni apæneedāni. Wadāni, Æbānō iī, ante ēñencæte ante wæyōnānite mīnitō wæætē nō pōni ēñēmīni inte nōingā apænemīni ēñencædānimpa.

Waa quēwencæmīnimpa, ānānīpa

⁷ Botō Pabodobo æbānō quēwēmoo, ante nē ēñēningā inte Tiquico ñōwo mīnitō weca pōninque māniīnō ante apæneccā ēñencæmīnimpa. Tōmengā mōnō tōniñacā baī iñongante mōnitō tōmengā ingante waa waadete pōnēmōnīpa. Tōmengā mōnō Awēnē nempo quēwēninque mōnitō tōnō godongāmæ cæcā inongā inte mōnō pōnencabo tōmāmō imonte pōnēninque mōnō beyæ cōwē ædæmō cæcā ingampa. ⁸ Mīnitō, Pabodoidi æbānō quēwēnāniī, ante ēñencæte ante wæmīnitawo. Edæ, Tiquico māniīnō ante apænedinque mīnitō imīnite ædæmō apæneccā ēñēninque mīnitō wampo pōnencæmīnimpa, ante cædinque botō ñōwo tōmengā ingante mīnitō weca da godōmo pongā aedāni. ⁹ Tiquico goyongā tōmengā tōnō Ōnetīmo mīni cabo nē inongā incæ guēa gocæcāimpa. Ōnetīmo cōwē ædæmō cæte nē pōnengā ingampa, ante adinque mōnitō tōmengā ingante waadete pōnēmōnīpa. Īninque tōmēna iñōmō, Pabodoidi weca æbānō cædāniī, ante tōmānō ante apænedā ēñencæmīnimpa.

¹⁰ Botō tōnō guēa tee mōnete ongongā Aditadoco iñōmō tōmengā mīnitō imīnite, Waa quēwēedāni, angampa. Ayæ Bedēnabee nānō wænquicā Māadoco adobaī, Waa quēwencæmīnimpa, angampa. Tōmengā ingante æbānō waa cæquiī, ante do āmo ēñēmīnitapa. Īninque tōmengā pongā adinque waa cædāni. ¹¹ Ayæ wacā Itota Yoto nāni ānongā adobaī, Waa quēwencæmīnimpa, angampa. Botō Wængonguī Awēnē Odeye nempo quēwēnāni beyæ cæyōmo oodeoidi incæ wadāni cædāmaī iñōnānite māniīnānique botō tōnō godongāmæ cædinque pōnō ædæmō cædāni æninque botō wampo pōnentabopa.

¹² Ayæ mīni cabo inongā inte Epapada iñōmō tōmengā Itota Codito ingante nē cædongā inte adobaī, Waa quēwēedāni, angampa. Tōmengā Wængonguī ingante nanguī apænedinque, Codotenteidi inänite bitō godō cæbi ate tōmēnāni picænāni baī bacædānimpa. Ayæ bitō angaiñō tōmānō ante ēñente cædāni inte tōmēnāni tæi pīñænte ēwocacædānimpa, ante tōmengā mīnitō beyæ ante cōwē apæneccampa. ¹³ Mīnitō beyæ tōmengā nanguī cæcampa. Daoditea iñōmō nāni pōnencabo beyæ adobaī Yedapodi iñōmō nāni pōnencabo beyæ adobaī tōmengā nanguī cæcampa, ante botō nāwangā apænebo ēñēedāni. ¹⁴ Ayæ, Waa bacædānimpa, ante mōnō nē cædongā tōmengā ēmōwo Odoca tōmengā iñōmō mōnō nē waadecā ingampa. Tōmengā tōnō Deēma, Waa quēwencæmīnimpa, ante adobaī ānapa. ¹⁵ Ayæ botō Pabodobo beyæ ante wæætē Daoditea iñōmō mōnō tōniñadāni inänite mīnitō, Waa quēwēedāni, ædāni. Diimpa inante, Waa quēwēedā, ædāni. Ayæ Codito ingante nāni pōnencabo tōmēnā oncōnē godongāmæ ponte apæneyōnānite mīnitō wæætē botō beyæ apænedinque, Pabodo, Waa quēwēedāni, angampa, ædāni.

¹⁶ Ayæ iinta botö cadota ante yewæmöinta iinque adinque mīnitö, Daoditea iñömö Codito ingante näni godongämæ pönencabo adobaï acæðanimpa, ante cædinque da godömini ænte acæðanimpa. Ayæ daoditeaidi inänite botö cadota ante yewæmöninta adobaï ämīni da pönönäni æninque aedäni.

¹⁷ Ayæ Adoquipo ingante apænedinque, Bitö mönö Awënë pönö angä ëñënimi inte bitö cæquënënö ante tömää ædæmö cæe, æedäni. ¹⁸ Botö Pabodobo tömömo önompoca yewæmöninque, Waa quëwëedäni, ante tömömo ëmöwo ante yewæmömopa. Botö æbänö yæguincamë encapote wæboï, ante pönëninque mīnitö Wængongui ingante apæneedäni ämopa. Wængongui waadete nänö pönö cædö ænte entawencæminimpa, ante mäninque ante yewæmömopa.

1 Tetadönitenteidi inänite Pabodo cadota ante tänota nänö yewæmongainta

Pabodo, Waa quëwëedäni, ante apænecäimpa

¹ Botö Pabodobo inömo imopa. Mönö töninäda Tidibänö tönö Timoteo tönö godongämæ apænete ate yewæmömo aedäni. Mönö Mæmpo Wængonguï nempo ayæ mönö Awënë Itota Codito nempo quëwëninque minitö Tetadönica iñömö quëwëninque Codito ingante godongämæ miini pönencabo ëñëedäni. Mönö Wængonguï waadete pönö cæcä ate minitö gänë entawencæminimpa, ante yewæmömönipa.

Tetadönitenteidi nani wede pönönö

² Mönitö möni apæneyedë minitö tömämäni beyæ ante Wængonguï ingante cöwë waa ate pönëninque apænemönipa. ³ Minitö Itota ingante æbänö wede pönente cæmiini iminipa, ante ayæ tömengä ingante waadete pönëninque æbänö cæmiini iminipa, ante cöwë apænemönipa. Ayæ minitö wæwëmiini incæ, Mönö Awënë Itota Codito pongä ate watapæ bacäimpa, ante pönëninque æbänö wæntæye inämaï ee cæmiini iminipa, ante adinque mönitö Wængonguï mönö Mæmpo weca æyedëmë ponte apænedinque cöwë mäninö ante pönëninque apænemönipa. ⁴ Mönitö töninämiini, minitö Wængonguï nänö në waademäni inömiini inte ëñëedäni. Tömengä minitö iminite apænte ængacäimpa, ante do ëñëmönipa. ⁵ Edæ Itota ingantedö ante mönitö watapæ möni apænedö ante wii önonquedö ante apænetamönipa. Wæætë Wængonguï nämä täi piñænte në angä beyænque mönitö minitö iminite apænedinque Awënë inte bai apænetamönipa. Wængonguï Önöwoca mönitö tönö godongämæ cæcä beyænque mönitö mäninö möni watapæ apænedö ante, Nö impa, ante ædæmö pönëninque apænetamönipa. Mänömaï apænemöni ëñëmäni adinque mönitö, Wængonguï minitö iminite apænte ængacäimpa, ante do ëñëmönipa. Ayæ minitö weca quëwëninque mönitö æbänö minitö beyæ ante quëwentamönii, ante do ëñëmönipa.

⁶ Wængonguï Önöwoca watapæ nänö topämo ante pönongä ænimäni inte minitö nanguï caate wæmiini incæte Wængonguï nänö angainö ante ëñëninque Ao ante æminitapa. Mönitö æbänö cæmönii, ante adinque Awënë Itota Codito æbänö cæcäa, ante adinque minitö adobaï möni cæbaï cæmiini baminitapa. ⁷ Ininque Mäatedöniabæ quëwënanäni tönö Acayabæ quëwënanäni iñömö Itota Codito ingante në pönënanäni inönäni inte tömënanäni tömänäni miini cædi adinque miini cæbaï adobaï cædanitapa. ⁸ Minitö wede pönëninque apænemäni beyænque Wængonguï nänö angainö ante Mäatedöniabæ quëwënanäni tönö Acayabæ quëwënanäni ëñënanäni incæte wii mäniï mëñömongaque iñömö quëwënanäni ëñënanäni. Wæætë ædömë quëwënanäni iñönänite wadäni minitö Wængonguï ingante miini wede pönëmämo ante tededäni do ëñënanäni.

Ininque mönitö mäniï beyæ quinante godömenque apænequii. ⁹ Edæ, Mönitö minitö weca ëñacæ pöninque apænemöni ëñëninque minitö æbänö watapæ ëñëmönitapa, ante mäninänäni në pönënanäni incæ apænedäni ëñëmönipa. Ayæ adodäni minitö iminitedö ante iïmaï ante apænedänipa. Minitö, Mönitö wængonguüidi impa, ante miini cönönincacoo incæ ëmö cæte wadæ pöninque mönö Wængonguï gämænö pömönitapa, ante apænedäni ëñëmönipa. Ayæ, Näwä Wængonguï në Quëwënogä ingante ëñente cæcæmönimpa, ante pömönitapa, ante apænedäni ëñëmönipa. ¹⁰ Ayæ tömengä Wengä öönädë në quëwënogä inte ocæ ëmænte poncæcäimpa, ante minitö wänö cömiini iminipa, ante apænedäni ëñëmönipa. Tömengä do wængaingä iñongante Wængonguï, Nani ömæmöe, angä në nani ömæmongaingä ingampa. Ininque Wængonguï mönö imonte nänö piinte panguimämo ante wæyömonte tömengä Wengä iñömö ængä beyænque quëwënguimö imopa.

2

Pabodo Tetadönica iñömö nänö cædö

¹ Mönitö töninamini eñeedäni. Mönitö minitö weca möni eñacæ pöñedë möni cædinö wii önonque impa, ante minitö do eñëminimpa. ² Mönitö do mini eñëninö bai mönitö wëñëñedë Pidipoto iñömö quëwëñömönite mäninömö quëwënäni mönitö imönite wënæ wënæ cædäni beyænque wæwente intamönipa. Adodäni mönitö imönite, Minitö wënæ wënæ cæmini iminipa, ante tedewënäni eñëninque wætamönipa, ante minitö adobai eñëminimpa. Ayæ minitö weca ponte quëwëñömönite waodäni tæiyænäni mönitö imönite Baa ante, Minitö apænedämai incæminimpa, ante wææ änäni incæte Wængongui mönitö tönö godongämæ cæcä beyænque tömengä ingantedö ante watapæ möni apænedö ante minitö iminute guiñänämai apænetamönipa.

³ Edæ mönitö, Wængongui ingante pönëmini ininque waa imaimpa, ante minitö iminute nangui apænemöni inte wii babæ wapiticæ pönëninque apænemönipa. Wii wentamö entawëninque pönente apænemönipa cæminii. Ayæ adobai, Minitö oda cæcæminimpa, ante cædämai inte mönitö wii wapiticæ apænemönipa. ⁴ Wæætë Wængongui mönitö imönite apænedinque, Waa cæmini abopa, äninque, Minitö Itota ingantedö ante botö watapæ apænedö ante në apænemöni eñencædänimpa, ante angä eñëninque mönitö në apænemöni imönipa. Mönitö, Waodäni mönitö imönite waa acædänimpa, ante cædämai inte wæætë, Wængonguinque mönitö imönite waa acæcäimpa, ante cædinque apænemönipa. Edæ tömengä, Æbänö entawëminii, ante mönö entawëñömö ante në acä ingampa. ⁵ Wadäni nämä beyænque ante, Waa tedemöni eñëninque mönitö imönite wæætë pönö cæcædänimpa, ante babæ cædäni bai mönitö iñömö dicæ mänömainö ante minitö iminute babæ cætamöniyaa. Mänömainö ante do eñëminimpa. Ayæ, Mönitö wii minitö godonte äinta ante beyæ apænetamönipa, ante do eñëminimpa. Æbänö cætamönipa, ante Wængongui në acä ingampa. ⁶ Waodäni mönitö imönite waa acædänimpa, ante mönitö dicæ ämönitawogaa.

Ayæ, Minitö incæ wadäni incæ mönitö imönite waa acædänimpa, ante dicæ ämönitawogaa. ⁷ Edæ, Itota Codito nänö da godongaimöni inömöni inte mönitö minitö iminute, Pönömini äninque quëwencæmönimpa, ämöni bai waa incædönimpa. Wæætë minitö weca quëwëninque mönitö wäänä nänö wëñänäni guiyänäni inänite ædæmö cædä bai adobai minitö iminute cætamönipa. ⁸ Minitö iminute nangui pönö waadete pönemöni inte mönitö, Itota ingantedö ante Wængongui nänö watapæ apænedö ante minitö iminute apænedinque watapæ totamönipa. Ayæ minitö nö möni në waademini iñöminute mönitö minitö beyæ quëwentamönipa. Ayæ minitö beyæ wæmöni incæ adobai watapæ tobaïmönipa. ⁹ Mönitö töninamini eñeedäni. Nangui pönö möni cædinö ante minitö do eñëminimpa. Itota ingantedö ante Wængongui nänö watapæ apænedö ante mönitö minitö weca quëwente apænedinque, Möni quëwengäimpa, ante wii eyepæ godö wædö ante dicæ antamöniyaa. Wæætë edæ, Minitö wædämai incæminimpa, ante mönitö itædë incæ woyowotæ incæ tömëmöni nangui cædinque ænte quëwentamönipa.

¹⁰ Minitö në wede pönëmini weca quëwëninque mönitö tæiyæ waëmö ewocamöni inte nö cæte quëwëñömönite minitö, Wënæ wënæ cæminipa, ante ædö cæte anguimäni. Wæætë mönitö cædinö adinque minitö, Mönitö æbänö quëwëmöni imönii, ante do amini inte në apænemöni iminipa. Wængongui adobai ante do acä ingampa. ¹¹ Edæ waocä mæmpocä tömengä wëñänäni iñönänite tömengä, Minitö eñënguimäni, ante odömongä bai mönitö adobai minitö tömämäni iñöminute adocanque adocanque ingante, Bitö eñënguimi, ante odömonte apænetamönipa. Mänömai cætamönipa, ante minitö do eñëminimpa. ¹² Mini quëwënö adinque Wængongui tocæcäimpa, ante cædinque minitö tæiyæ waëmö quëwencæminimpa, ante mönitö nangui apænetamönipa. Ayæ, minitö mänömai cæte quëwencæminimpa, ante waadete apænetamönipa. Ayæ adobai mönitö wæætë wæætë apænedinque minitö iminute adodö ante ancaa apænetamönipa. Wængongui iñömö, Botö Awënë Odeye nempo quëwëninque minitö botö ñäö emöñömö

botö tönö godongämæ quëwencæminimpa, ante tömengä minitö iminite aa pedingue apænte ængampa.

¹³ Ayæ adobaï mönitö Wængonguï nänö angainö ante minitö iminite apænemöni ëñëninque minitö ö ante do pönëminitapa. Näwangä Wængonguï nänö angainö impa, ante adingue minitö, Wïi waodänique nani angainö impa, ante pönëninque wæætë, Näwangä Wængonguï nänö angainö impa, ante pönëninque ö æminitapa. Ìninqe minitö në wede pönëmini inte Wængonguï nänö angainö entawëmini beyænque nanguï cæmini iminipa, ante ëñëninque mönitö Wængonguï ingante cöwë waa ate pönente apænemönipa. ¹⁴ Oodeabæ iñömö Wængonguï ingante godongämæ nani pönencabo iñömö tömengä nempo quëwëñönänite oodeoidi tömënäni inänite togænte pänäni wädäni bai minitö mönitö tönïñamini iñömini minitö ömæ iñömö në quëwënäni incæ minitö iminite adobaï cædäni wæminitapa. Mänömaï cædäni wædinque minitö Oodeabæ iñömö Wængonguï ingante godongämæ nani pönencabo wädäni bai adobaï wæmini baminitapa.

¹⁵ Oodeoidi iñömö Wængonguï beyæ në apænegainäni inänite wænönäni wængadän-impä. Ayæ ate tömënäni päinäni iñömö Itota Codito ingante wænönäni wængacäimpa. Ayæ ñowodäni adocabodäni incæ mönitö imönite adobaï togænte wido cædänitapa. Mäninäni nani cædinö adingue Wængonguï tömënäni inänite ædö cæte waa aquingää. Adodäni incæ waodäni tömänäni inänite püinte quëwënönänimpa töö. ¹⁶ Edæ oodeoidi inämaï inäni inänite, Codito ængä beyænque minitö quëwencæminimpa, ante apænedämaï incæminimpa, ante cæcæte ante mäninäni oodeoidi incæ mönitö imönite Baa äninque wææ cædänipa töö. Mänömaï cöwë wënæ wënæ cædinque tömënäni wæætë wæætë nani wënæ wënæ cædincoo idæwaa cædänipa. Idæwaa i ñinque Wængonguï nänö ænguï bate püimämo tömënäniya do pongatimpa.

Tetadönitenteidi weca Pabodo ëñacæ pöinente wæcampa

¹⁷ Incæte mönitö tönïñamini ëñëedäni. Tömënäni änäni beyæ mönitö minitö iminite ëmö cæte godinque wïi wantæpiyæ ante gotamönipa. Godinque minitö iminite adämaï imöni incæte mönitö minitö beyæ ante cöwë pönentamönipa. Minitö iminite nanguï äinente wæmöni inte mönitö, Æbänö cæte goquimönii, ante pönëninque nanguï cætamönipa. ¹⁸ Edæ minitö weca pöinente wætamönipa. Botö Pabodobo inömo inte wæætë wæætë nö pöinëmo intabopa. Mönitö pöinëmöni incæte Tatäna wæætë mönitö imönite wææ cæcä wætamönipa. ¹⁹ Mönö Itota Codito nänö ponguïönæ tömengä weca ongöninque mönitö æbänö ante beyæ watapæ bacäimpa, ante pönëmöni imönii. Wïi minitö beyænque toquimönii. Edæ në pönëmini inömini inte minitö do möni në watapæ todömini iminitapa. Ayæ waodäni tæi ëmonte gänä cædinque poganta ænte todäni bai minitö beyænque ante mönitö në toquimöni imönipa. ²⁰ Näwangä impa. Waa pöni cæmini ñinque minitö möni në waa amini inömini inte möni në watapæ todömini iminipa.

3

¹ Mänömaï beyæ mönitö, Minitö iminite adämaï inte awædö, äninque, Ædö cæte godömenque wänö cömöni inguimönii, ante pönëninque mönatö adömönaque Atëna iñömö ongonguënëmöna imönäpa, ante pönente wætamönäpa. ² Ayæ Tímoteo në mönö tönïñacä ingante minitö weca ante da pönömöna pongantapa. Tömengä iñömö Wængonguï tönö godongämæ cædongä iñongante Itota mönö Codito ingantedö ante mönö watapæ apænedö ante ëñencædänimpa, ante odömonte apænedongä ingampa. Tömengä minitö iminite, Mini wede pönënö ante tæi ongonte quëwëedäni, ante ayæ, Wampo pönëninque tæi piñænte cædäni, ante ædæmö apænecæcäimpa, ante mönatö tömengä ingante da pönömöna pongantapa. ³ Wädäni minitö iminite quiëmë cædäni caate wæmini incæte tömämini wadö pönënämaï inte ñimpo cædämaï incæminimpa, ante cædinque Tímoteo ingante da pönömöna pongantapa. Mönö imonte cöwë

mänömaï cædäni caate wæquëñëmö ïmompä, ante mïnitö do edonque pönï ëñëminipa.

⁴ Ayæ mïnitö weca möni quëwëñedë mönitö mïnitö ïminite apænedinque,

Mönö ïmonte quïëmë bai togænte panguinänidö angüënë, ante wæætë wæætë apænetamönipa. Edæ mïnitö ëñënö bai mäninö do batimpa. ⁵ Mänömaï beyæ botö, Ædö cæte godömenque wänö cömo inguïmoo, ante, Mïni wede pönënö æbänö impä, ante botö ëñencæboimpa, ante Tïmoteo ingante da pönömo pongantapa. Wënæ awënë, Oda cæe, ante në änewëñongä ïñömö mïnitö ïminite, Oda cæedäni, angä ëñëninque mïnitö wabänö ëñëminimpa, ante botö ancaï guïñente wætabopa. Mänömaï ëñente cæmïni ïninque mönitö cædinö wo ewente babaimpa, ante pönentabopa.

⁶ Incæte Tïmoteo mïnitö weca quëwëñinque ñöwoque mönitö weca ocæ ëmænte pongantapa. Mïni wede pönënö ante apænedinque tömengä, Wede pönëñänipa, angantapa. Ayæ, Në waadete pönëñäni ïñänipa, ante apænecä ëñentamönäpa. Mïnitö mönatö beyæ cöwë waa pönëmïni ïminipa, ante tömengä apænecä ëñentamönäpa. Ayæ mönatö mïnitö ïminite ainëmöna inte wæmönä bai mïnitö adobai mönatö ïmönate ainëmïni inte wæmïni ïminipa, angantapa. ⁷ Mänömaï beyæ mönitö tönïñamïni ëñëedäni. Quïëmë beyæ wæmönä incæ ayæ mönatö ïmönate togænte pänäni wæwëmönä incæte mönatö mïni wede pönënö beyænque wæætë wampo pönente batamönäpa. ⁸ Mïnitö mönö Awënë ingante ñimpo cædämaï pönëmïni beyænque mönatö ñöwo wampo pönente bai quëwëmönä ïmönäpa. ⁹ Mönatö mönö Mæmpo Wængonguï weca ongöñinque mïnitö beyæ nangui watapæ tomönä inte wæætë apænemönäpa. Incæte mïnitö beyæ ante Wængonguï ingante ædö cæte waa ate pönente eyepæ apænequïmönäa. ¹⁰ Mïnitö mïni wede pönënö ante æbänö ayæ wïi eyepæ pönëmïni, ante wæmönäpa. ïninque, Mïnitö ïminite wæætë adinque mönitö odömonte apænemöni ëñëninque mïnitö eyepæ pönencæminimpa, ante cædinque mönitö woyowotæ itædë Wængonguï ingante nö nangui pönï apænemöni ïmönäpa.

¹¹ Wængonguï mönö Mæmpo incæ mönö Awënë Itota Codito tönö möni goquïñö ante töinö pïnonte bai cæda ate mïnitö weca gocæmönimpa. ¹² Mönitö mïnitö ïminite godömenque waadete pönëmöni bai mönö Awënë Itota pönö cæcä ate mïnitö adobai mïnitö weca wacä ingä wacä ingä godömenque godömenque waadete pönencæminimpa, ämönäpa. Ayæ woadäni tömänäni ïñänite godömenque waadete pönencæminimpa, ämönäpa. ¹³ Tömengä pönö cæcä beyænque mïnitö tæïmö entawente incæminimpa, ämönäpa. Edæ mönö Awënë Itota quïnäni në tæiyæ waëmö ewocadäni tömänäni tömengä tönö godongämæ poncædänimpa. Tömenäni nänï pöñedë mïnitö ïñömö Wængonguï mönö Mæmpo weca pömïni adinque tömengä ædö cæte, Wënæ wënæ cæmïni ïminipa, ante anguingää. Mïnitö tæiyæ waëmö ewocamïni incæminimpa, ämönäpa.

4

Wængonguï waa acæcäimpa, ante mönö quëwënö ante

¹ Mönitö tönïñamïni ëñëedäni. Adodeque ayæ apænequïmöni ïmönäpa. Mïni quëwënö ante Wængonguï waa acæcäimpa, ante mönitö, ïïmaï quëwëedäni, ante do wææ odömonte apænemöni ëñëmïnitawo. ïninque mïnitö Ao ante quëwënömïni ïminipa. Ñöwo ïñömö mönitö Awënë Itota ëmöwo ante apænedinque mïnitö ïminite, Mänïnonque ante gomonga cæte quëwencæminimpa, ante ancaï apænemönäpa.

² Awënë Itota nänö änö ante ëñente cædinque mönitö mïnitö ïminite wææ äninque, ïïmaï cæedäni, antamönäpa. Mäninö möni wææ ante odömonte apænedö ante mïnitö do ëñëñimïnipä. ³ Wængonguï nänö änö ïñömö ïïmaï impä. Mïnitö ïñömö tæiyæ waëmö ewocate quëwenguëñëmïni ïminipa. Wacä nänöogæ ingante godö towente cædämaï inte edæ önonque mïni nänöogænque quëwenguëñëmïni ïminipa. ⁴ Onguïñämïni tömämïni ïñömö, Botö moncæboimpa, ante cædinque mïnitö, Æbänö cæte nänöogæ ämo ate Wængonguï tönö woadäni waa aquïnänïi, ante ëñenguëñëmïni ïminipa. Mïnitö, Tæiyæ waëmö ewocadinque ængäimpa, ante ëñenguëñëmïni ïminipa. ⁵ Wïi wadäni bai, Wængonguï ingante æbänö ingaingä ingää, ante ëñëñämäi ïñäni bai onquiyænque

ante nāni towēnonque ante pōnēnāmaī quēwencāmīnīmpa. ⁶ Mānīnō ante nē pōnengā iñōmō, Botō tōnīñacā nānōogängā ingampa, ante pōnēnīnque tōmengā nānōogä ingante towente cädāmaī īnīnque tōmengā ingante wēnæ wēnæ cädāmaī incæcāīmpa.

Īīmaī wēnæ wēnæ cädāni īnānīte Awēnē Itota pancæcāīmpa. Wēēnēñedē mānīnō ante mīnītō īmīnīte apānedīnque do wææ angamōnīmpa. ⁷ Edæ Wængonguī mōnō īmonte wīī, Towencāmīnīmpa, ante apænte ængacāīmpa. Wæætē, Mīnītō tæiyæ waēmō ēwocate quēwencāmīnīmpa, ante tōmengā mōnō īmonte apænte ængacāīmpa. ⁸ Mānōmaī beyæ æcānō mānīnō ante Pabodo nānō, Īīmaī cädāni, ante nānō wææ odōmonte apānedō ēñēnīnque Baa āna iñōmō tōmengā wīī waodānīque īnānīte ēñēnāmaī īntē Baa angā ingampa. Wæætē Wængonguī mīnītō īmīnīte nānō Tæiyæ Waēmō Ōnōwoca nē pōnongā ingante ēñēnāmaī īntē Baa angā apa quēwēmīnīi.

⁹ Mīni pōnencabo mīni tōnīñadāni iñōnānīte mīni waadete pōnēnō ante mōnītō quīnante yewæmonguīmōnīi. Edæ mīnītō tōmēmīni īmīnīte, Wacā ingā wacā ingā waadete pōnencāmīnīmpa, ante Wængonguī odōmonte apānecā ēñēmīnītapa tōō. ¹⁰ Nō īmpa. Māatedōniabæ tōmāmæ iñōmō mōnō pōnencabo mōnō tōnīñadāni tōmānāni īnānīte do waadete pōnēmīni īmīnīpa. Incæte mōni tōnīñamīni, Mīnītō mānīnō ante gomonga cæte quēwencāmīnīmpa, ante anca apānemōnīpa. ¹¹ Mīnītō piyænē cæte quēwencāmīnīmpa. Wadāni, Æbānō cæquēnēnāni īnānīi, ante cōwē ānāmaī incāmīnīmpa. Ayæ, Wæntæye īnāmaī īntē mīni ōnompoca cæte quēwencāmīnīmpa. Mānīnō do mōni apānedō baī mīnītō, Cæinēmōnīpa, ante cæcāmīnīmpa, āmōnīpa. ¹² Mānōmaī cæmīni baī īimō iñō īimō iñō mīni quēwēnō adīnque wadāni nē pōnēnāmaī īnāni wæætē mīnītō īmīnīte waa acädānīmpa. Ayæ adobaī mīnītō waodāni īnānīte, Pōnōmīni æncāmōnīmpa, ante ānewēnāmaī quēwencāmīnīmpa.

Mōnō Awēnē Itota nānō ocæ ēmænte ponguīōnæ

¹³ Mōnītō tōnīñamīni ēñēdāni. Nē æmæwo wængaināni iñōmō æbānō baquīnānīi, ante mīnītō ēñencāmīnīmpa, ante yewæmōmōnīpa. Wadāni, Mōnō nāni ōmæmongæīmpa, ante pōnēnāmaī īnāni īntē wæwēnāni baī mīnītō wīī adobaī wæwēmīni incāmīnīmpa, ante yewæmōmōnīpa. ¹⁴ Itota æmæwo wæningā incæ nāni ōmæmonte īnongāīmpa, ante pōnēmō īmōmpa. Itota ingante pōnente nē wængaināni iñōnānīte Wængonguī iñōmō mānīnāni īnānīte Itota tōnō tōmengā weca ænte māmongā pōncädānīmpa, ante adobaī pōnēmōmpa.

¹⁵ Wængonguī nānō apānedō baī mōnītō īīmaī ante mīnītō īmīnīte apānemōnīpa. Awēnē Itota nānō ponguīōnæ mōnō nē mīimō quēwēmō īntē ayæ ongōmō iñōmō mōnō wīī tāno tōmengā weca gocæmōīmpa. Wæætē tōmengā ingante pōnēnīnque nē æmæwo wængaināni īntē mānīnāni iñōmō tāno goquīnānidō anguēnē. ¹⁶ Edæ mōnō Awēnē Wængonguī nānō wææ ānonque ante yedæ āñongā Wængonguī anquedoidi tæiyæ awēnē aa pecæcāīmpa. Wængonguī todompeta nāni ancadeca adocanque we we ōncæ cæyongā mōnō Awēnē Codito incæ ōönädē quēwente pō wææncæcāīmpa. Pō wææñongā tōmengā ingante nē pōnente wængaināni tōmēnāni tāno nāni ōmæmoncädānīmpa. ¹⁷ Ayæ ate Wængonguī cæcā beyænque mōnō nē mīimō quēwēmō īntē ayæ ongōmō iñōmō mōnō tōmēnāni tōnō godongāmæ boguīmancodē æicæmōīmpa. Boguīmancodē æidīnque mōnō Awēnē ōönädē īnō wææ pōñongante mōnō tōmengā ingante bee tencæmōīmpa. Īnīnque cōwē Awēnē weca quēwencæmōīmpa. ¹⁸ Mānōmaī beyæ, Mōnō Awēnē Codito incæ ōönädē quēwente pō wææncæcāīmpa, ante pōnēnīnque wampo pōnencädānīmpa, ante cædīnque mīnītō wacā ingā wacā ingā ædæmō apānedāni.

5

¹ Nōwo mōnītō tōnīñamīni ēñēdāni. Æönädō mānīi baquīi, ante mīnītō īmīnīte ædō cæte yewæmonguīmōnīi. ² Edæ mōnō Awēnē Itota nānō ponguīōnæ iñōmō nē awēmō ængā woyowotæ iñontobæ pō guicā baī iñontobæ baquīnō anguēnē, ante mīnītō tōmēmīni waa ēñēmīnīpa edæ. ³ Waodāni, Mōnō piyænē cæte guīñēnāmaī quēwēmōmpa, ante nāni tedeyedē ēnengā iñontobæ wēñæ nantate wacā baī tōmēnāni

adobai iñontobæ nani ömæ ewenguinö baquinö anguenë. Ìninqe ædö cæte wodii winonguinänii.

⁴ Incæte mînitö mönitö tönîñamîni ëñeedäni. Mänîönæ nani wæwente ëönæ në awëmö ænongä pö guicä bai iñontobæ iinqe bayonte mînitö wii wëmö iñömö quëwëminî inte guîñênämaî incæmînimpa. ⁵ Mînitö Wængonguî wëñæmîni ïmîni ïninqe ñäö iñömö tömämîni quëwëminî ïmînimpa. Mönö cöwë wentamö iñömö cædönäni bai wii ïmöimpa. ⁶ Mänömaî beyæ mönö wii wadäni mö ñönäni bai mongæimpa. Wæætë mönö ñäni ömæmöninqe nämä wææ ante quëwëmö ingæimpa. ⁷ Edæ tömënäni në mönäni iñömö woyowotæ mönäni ïnänipa. Ayæ wadäni tî nämæ bedinqe në quidi quidi dowænte ïnäni iñömö woyowotæ bete badänipa. ⁸ Incæte mönö ñäö iñömö cægömö inte nämä wææ ante quëwëmö ingæimpa. Tæïneta wææ wëñate bai cædinque Itota ingante mönö wede pönënö ante mönö waadete pönënö ante mönö entawente quëwengæimpa. Tæïneta ocabogata wææ encate bai cædinque mönö edæ, Wængonguî ængä beyænque quëwencæmöimpa, ante pönënö ante mönö ewocate quëwengæimpa. ⁹ Edæ Wængonguî nänö ænguî bate pïnguimämo ante tömengä, Wii wæwencæmînimpa, ante mönö ïmonte apænte ængacäimpa. Wæætë mönö Awënë Itota beyæ tömengä mönö ïmonte ængä beyænque quëwencæmöimpa. ¹⁰ Tömengä, Botö tönö quëwencæmînimpa, ante mönö beyæ wængacäimpa. Ìninqe mii ïmö incæ wænte ïmö incæ mönö cöwë tömengä weca quëwencæmöimpa. ¹¹ Mänömaî beyæ mînitö iñömö do cæmîni bai gomonga cæedäni. Wampo pönencædänimpa, ante cædinque mînitö wacä ingä wacä ingä ædæmö apænedinqe, Æmæwo pægaimîni inte tæï pïñænte cæedäni, ante odömonte apæneedäni.

Mönö tönîñadäni ïnänite Pabodo nänö änö

¹² Nöwo mönitö tönîñamîni ëñeedäni. Mînitö ïmînite ïmaî apænemönipa. Mînitö weca në nanguî odömonte apænedäni iñönänite mînitö tömënäni ïnänite waa acæmînimpa, ämönipa. Edæ Awënë Itota apænte nänö æninäni inte tömënäni, Mînitö ïmaî waa quëwëedäni, ante mînitö ïmînite në aadäni ïnänipa. ¹³ Tömënäni nani cædö beyænque mînitö tömënäni ïnänite godömenque nanguî waa amîni inte waadete pönëedäni. Mînitö wacä ingä wacä ingä piyænë cæte quëwëedäni.

¹⁴ Mönitö tönîñamîni ëñeedäni. Mînitö ïmînite ïmaî ante ancaa ämönipa. Wæntæye ïnäni ïnänite wææ ante apæneedäni. Guîñente ïnäni wampo pönencædänimpa, ante tömënäni ïnänite ædæmö apæneedäni. Æmæ pönënäni tönö godongämæ cæedäni. Wadäni tömänäni ïnänite mînitö waadete ee cæedäni ämönipa.

¹⁵ Æcämenque ingante wadäni wënæ wënæ cædäni adinqe mînitö Baa ämîni beyænque mäninäni wæætedö wæætë näëmæ wënæ wënæ cædämaî incædänimpa. Wæætë wacä ingä wacä ingä cöwë waa cæcæmönimpa, ante pönëninque cæedäni. Ayæ wadäni tömänäni ïnänite adobai cæedäni.

¹⁶ Mînitö cöwë watapæ tote quëwëedäni. ¹⁷ Wængonguî ingante woyowotæ itædë apænete quëwëedäni. ¹⁸ Mîni quëwenganca quiëmë bai ba incæte mînitö cöwë Wængonguî ingante waa ate pönëninque apæneedäni. Edæ Itota Codito nempo në quëwëminî inte mäninö ante mînitö beyæ ante Wængonguî nänö änö impa.

¹⁹ Wængonguî Önöwoca nänö cæinö adinqe mînitö tömengä ingante ædö cæte, Cædämaî ïe, ante wææ anguimîni. ²⁰ Wængonguî beyæ në apænedäni nani apænedö ëñëninque mînitö badete todämaî quëwëedäni. ²¹ Wæætë waodäni nani apænedö tömänö ante ëñëninque, Æbänö ï, ante edonque ëñengæimpa, ante cædinque mînitö, Nö nani änö ï, Babæ nani änö ï, ante pönëninque do ëñencæmînimpa. Waa änö impa, ante ëñëninque mînitö mäninö ante ö ænte bai quëwëedäni. ²² Quiëmë wënæ wënæ cæquiï, ante adinqe mînitö Baa ante gomö aedäni.

²³ Wængonguî incæ në piyænë cædongä inte pönö cæcä beyænque ædæmö tæiyæ waëmö entawëminî incæmînimpa. Awënë Itota mönö Codito tömengä nänö ponguinganca mînitö iñömö Wængonguî pönö cæcä ate mînitö mimö incæ önöwoca incæ baonga incæ wënæ wënæ cædämaî incæmînimpa. ²⁴ Wængonguî nänö në apænte ænimîni

iñöminite tömengä mīnitō imīnite cōwē pōnēnīnque tömengä nānō änō bai ædæmō cæcæcäimpa.

Pabodo, Waa quēwencæmīnīmpa, angampa

²⁵ Mōnitō tōnīñamīni iñōmō ēñēedāni. Mīnitō mōnitō beyæ ante Wængonguī ingante apæneedāni. ²⁶ Mīnitō pōnencabo iñöminite mōnitō tömāmīni waa quēwencæmīnīmpa, ante waadete pōnēnīnque ämōnīpa. ²⁷ Edæ Awēnē Itota ēñēñongä botō mīnitō imīnite wææ ante, İi yewæmōinta adīnque mīnitō mīni pōnencabo iñöminite adocanque ingante ämīni tömānāni ēñēñōnāni tömengä adotaa adīnque apænecä ēñencædānīmpa, ämopa. ²⁸ Awēnē Itota mōnō Codito mīnitō imīnite waadete pōnō cæcæcäimpa, ante botō mānīnque ante yewæmōmopa.

2 Tetadönitenteidi inänite Pabodo cadota ante ayænta nänö yewæmongainta

Pabodo, Waa quëwëedäni, ante apænecampa

¹ Botö Pabodobo inömo imopa. Mönö töninäda Tidibänö tönö Timoteo tönö godongämæ apænete ate yewæmömo aedäni. Tetadönica inömo quëwëmini inte Codito ingante godongämæ miini pönencabo inömini inte ëñeedäni. Minitö mönö Mæmpo Wængongui nempo ayæ mönö Awënë Itota Codito nempo quëwëmini iminipa. ² Mönö Mæmpo Wængongui tönö mönö Awënë Itota Codito waadete pönö cæda ate minitö gänë entawencæminipa, ante yewæmömönipa.

Itota Codito pongä ate Wængongui apænte pancæcäimpa

³ Mönitö töninämini ëñeedäni. Miini wede pönönö godömenque pæte bai impa, ante ayæ tömämüni wacä ingä wacä ingä miini waadete pönönö waa pönü pæte bai iminipa. Mänömaï beyæ mönitö minitö beyæ ante Wængongui ingante cöwë waa ate pönëninque apænequënemöni imönipa. ⁴ Wadäni minitö iminüte quiëmë togæwëninque wënæ wënæ cædäni caate wæmini incæ quiëmë beyæ wæwëmini incæ minitö wëntæye inämaï inte ee cæminipa. Mänömaï beyæ Wængongui ingante godongämæ nani pönencabo wayömö wayömö quëwëñönänite mönitö incæ miini cæinö ante waa adinque cöwë apænemönipa. Ayæ miini wede pönönö ante cöwë apænemönipa. ⁵ Mäninö ante beyæ Wængongui apænte nänö panguinö ante, Tömengä cöwë nö panguingänö angüënë, ante do ëñëmompä. Mänömaï beyæ minitö Wængongui Awënë Odeye nempo guicæte ante eyepæ waa pönü bacæminipa. Minitö do mäninö Wængongui nempo miini öönædë quëwënguino beyæ wæwente quëwëminipa.

⁶ Wængongui në nö cædongä ingampa. Edæ wadäni minitö iminüte wënæ wënæ cædäni ate wæwëmini inömini tömengä wæætë tömënanü inänite wënæ wënæ cæcä ate wæwencædanipa. ⁷ Ayæ minitö në wæwëmini inöminüte pönö cædinque tömengä mönitö imönüte adobaï pönö cæcä ate tömämö mönö wæwënamäi baquimö imompä.

Mönö Awënë Itota tönö tömengä anquedoidi në tæi piñænte cædäni tönö öönædë ongonte pö gonga bæcote bai godongämæ wæñönänü tömämö ayömö mänömaï bacæimpa. ⁸ Mönö Awënë Itota ingantedö ante mönö watapæ apænedö ante në ëñënamäi cædäni inömo, Wængongui æbänö ingaingä ingää, ante ëñënamäi inäni inönänüte tömengä mäninänü inänüte pante cæcæcäimpa. ⁹ Wængongui adodäni inänüte päninque æmæwo wo ewencæcäimpa. Tömënanü inömo Awënë Itota weca tömengä nänö tæi piñæmämö wæmö pönü nänö emönömö mäninömo pö guidämaï incædanipa, ante Wængongui wææ cæcæcäimpa. ¹⁰ Awënë Itota nänö ponguionæ Wængongui mänömaï cæcæcäimpa. Mänionæ Itota quinäni inömo në tæiyæ wæmö ewocate quëwënanü inte tömengä ingante waa acædanipa, ante poncæcäimpa. Ayæ tömengä në pönënanü weca pönongante tömënanü tömänänü, Tömengä waa pönü cæcä amönipa, ante watapæ ancædanipa, ante cæcæte ante poncæcäimpa. Ayæ minitö adobaï mönitö apænedö ante ëñëninque pönëmini inte tömengä quimüni inömo mönitö tönö adobaï cæcæminipa, ante cæcæte ante poncæcäimpa.

¹¹ Mänömaï beyæ mönitö minitö beyæ ante woyowotæ itædë Wængongui ingante apænemönipa. Wængongui, Miini quëwënguino ante quëwencæminipa, ante minitö iminüte apænte ængä ininque mönitö, Minitö eyepæ waa pönü bacæminipa, ante mönö Mæmpo Wængongui ingante apænemönipa. Minitö, Mönitö waa cæcæmönipa, ante miini änö bai tömänö ante Wængongui nänö tæi piñæmämö inte iinque cæcæcäimpa, ante apænemönipa. Ayæ miini wede pönönö beyæ minitö cæquinö tömänö ante tömengä adobaï iinque cæcæcäimpa. ¹² Mönö Awënë Itota pönö cæcä beyænque minitö waa pönü cæmini adinque wadäni tömengä emöwo ante waa ate apænecædanipa. Ayæ tömengä mänömaï cæcä beyænque wadäni, Minitö waa quëwëmini iminipa, ante minitö

iminite waa acädänimpa. Mönö Mæmpo Wængongui tönö mönö Awënë Itota waadete pönö cæda bai mänömaï bacäimpa, ante mönitö mäninö ante Wængongui ingante apänemönipa.

2

Mönö Awënë Itota nänö ponguïönæ æbänö baquii, ante

¹ Mönitö töninamini ëñeedäni. Mönö Awënë Itota Codito nänö ponguïnö ante ämönipa. Ayæ tömengä æbänö, Botö weca pöedäni, ante gæcä goquimö imompa, ante apænedinque minitö iminite iïmaï ämönipa. ² Minitö weca quëwënäni pancadäniya iñömö, Mönö Awënë nänö ponguïönæ do batimpa, ante änäni ëñëninque minitö idiquibæ pönënämaï bacæminimpa, ämönipa. Edæ mönitö Wængongui beyæ nê apänemöni inte möni apæneyedê incæ möni odömönte apæneyedê incæ möni yewæmöntaa yewæmönedê incæ æyedëmê incæ apänemönipa, ante mäninäni iñömö mönitö imönitedö ante apænedinque, Pabodoidi mäninö ante apænedäni inänipa, ante tededäni ëñëninque minitö guïñente wädämaï iedäni ämönipa. ³ Æcämenque angä æbämê nänö änö ëñëninque minitö oda cæte godämaï iedäni.

Edæ waodäni tæiyænäni Wængongui ingante Baa ante wadæ godäni ate wacä nê wiwa cæcä inte pongä acäimpa. Ayæ tömengä pongä ate mönö Awënë nänö ponguïönæ bacäimpa. Mäningä nê wiwa cædongä iñömö Wængongui æmæwo nänö nê wo ëwenguingä ingampa. ⁴ Æcämenque ingante, Wængongui ingampa, ante waodäni waa adinque ædæ wææninqe apænedäni incæ ayæ quiëmê adinque, Wængongui impa, ante waa adinque apænedäni incæ mäningä nê wiwa cædongä iñömö wængonguïdi nani nê änönäni tömänäni inänite Baa äninque nämä ængö cæte bai cæcä inongampa. Wængongui oncö tæiyæ waëmö oncönê adocä pö guïite tæ contadinque, Botö tömëmö wængonguïmo inömö imopa, angä ingampa.

⁵ Botö minitö weca quëwëñedê mäninö ante minitö iminite apænetabopa. Wïi ëñëminitawo. ⁶ Adocä nê wiwa cædongä iñömö Wængongui nänö äönæ mänionæque edonque pongä acädänimpa. Ininque quïnö beyæ ante mäningä ayæ pönämaï ingää, ante minitö ñowo do ëñëminipa. ⁷ Adocä awëmö nänö wiwa cæpämö incæ do ëñente cædäni inte waodäni tæiyænäni quiëmê wiwa i, ante do cædänipa. Incæte tömënäni inänite, Wiwa cædämaï iedäni, ante nê wææ cædongä iñömö adodö ante godömenque wææ cæcä ingampa. Nê wææ cæcä ingante guiquënë wacä wæætê, Mäninganca idæwaa, äninque ö ængä wadæ gocæcäimpa. ⁸ Mäniñedê nê wiwa cædongä iñömö edonque pongä acädänimpa. Incæte Awënë Itota pöninque tömengä nänö öö guëmämämo inte mäningä ingante wænongå wænguingä ingampa. Tömengä ñäö apäite ëmönongä inte pongä adinque nê wiwa cædongä guiquënë æmæwo wo ëwente bacæcäimpa. ⁹ Wiwa cædongä ingante Tatäna nänö tæi piñæmämö inte da pönongä ponguingä ingampa. Tömengä nänö mä cæ bai quiëmê bamönengæ cæcä adinque waodäni, Æbänö cæcää, ante oda cæte gocädänimpa. ¹⁰ Ayæ quiëmê wænæ wænæ nänö cæpämö beyæ nê æmæwo wo ëwente baquïnäni iñömö oda cæte godänipa. Edæ Wængongui näwangä nänö angainö ante waadete pönënämaï iñönänite Wængongui tömënäni inänite, Quëwencæminimpa, ante ædö cæte ænguingää. Mänömaï beyæ tömënäni æmæwo wo ëwente bacädänimpa.

¹¹ Mänömaï beyæ, Tömënäni nê wiwa cædongä wapiticæ nänö angainö ante pönencädänimpa, ante cædinque Wængongui tæi piñænte cæcä beyænque tömënäni babæ ante pönente oda cædänipa. ¹² Edæ Wængongui näwangä nänö angainö ante nê pönënämaï inänäni inte wæætê, Mönö wentamö mongæmämö incæ waa impa, ante watapæ todinäni iñönänite Wængongui mäninäni tömänäni inänite apænte ante pancæte ante mänömaï cæcampa.

Wængongui, Quëwencæminimpa, ante nê apænte äninäni

¹³ Mönitö töninamini minitö mönö Awënë Itota nänö nê waademini inte ëñeedäni. Inguipoga badönämaï iñedê Wængongui minitö iminite do, Quëwencæminimpa, ante apænte ængacäimpa, ante mönitö minitö beyæ ante tömengä ingante waa ate pönëninque cöwê apænequënemöni imönipa. Tömengä iñömö, Botö Önöwoca pönö cæcä

ate tæiyæ waemö ewocamini inte minitö näwangä botö angainö ante pönëmini beyæ quëwencæminimpa, ante minitö iminite ængacäimpa. ¹⁴ Itota ingantedö ante mönitö watapæ apænedö beyæ Wængongui, Quëwencæminimpa, ante minitö iminite apænte ængacäimpa. Tömengä, Awënë Itota Codito ñäö nänö emönö bai minitö adobai ñäö bai entawencæminimpa, ante cædinque minitö iminite apænte ængacäimpa.

¹⁵ Mönitö töninamini ëñeedäni. Mänömaï beyæ tæi ongonte quëwëedäni. Edæ mönitö önöne inte tedemöni ëñënimini incæ yewæmöinta yewæmömöni adinque ëñënimini incæ minitö mönitö odömönte apænedinö ante ñimpo cädämaï quëwëedäni. ¹⁶ Mönö Mæmpo Wængongui mönö imonte në waadecä inte pönö ædæmö cæcä ate mönö, Tömengä weca cöwë quëwenguimö imompa, ante pönëninque wampo pönëmö inte quëwëompa. Ayæ, Waa bacäimpa, ante mönö pönëmompä. Ininque tömengä tönö mönö Awënë Itota Codito, Iïmaï cæcædaimpa, ante ämönipa. ¹⁷ Tömëna ædæmö apænedä beyænque minitö wampo pönëninque tæi ongonte quëwencæminimpa. Ayæ tömëna cæda beyænque minitö æmæwo pægäimini inte tömäa mini waa cædö ante mini waa änö ante tæi piñænte cæcæminimpa.

3

Minitö mönitö beyæ ante Wængongui ingante apæneedäni

¹ Adodeque ante iinque yewæmömönipa. Mönitö töninamini ëñeedäni. Minitö mönitö beyæ ante Wængongui ingante iïmaï apæneedäni. Mönitö wayömö wayömö gote möni apæneyömö mönö Awënë nänö angainö ante nanguï inäni quingæ ëñencædänimpa, ante apæneedäni. Ayæ, Minitö bai wadäni adobai ii änö ante Wængongui ingante waa ate pönëninque æncædänimpa, ante mäninö ante Wængongui ingante apæneedäni. ² Wadäni në wënæ wënæ cædäni inte wiwa cædäni iñömö tömënäni mönitö imönite wënæ wënæ cædämaï, ante mänii beyæ ante minitö adobai Wængongui ingante apæneedäni. Edæ wiï woadäni tömänäni pönënanäni inänipa.

³ Incæte mönö Awënë cöwë ædæmö aacä inongä ingampa. Tömengä pönö cæcä ate minitö æmæwo pægäimini inte tæi piñænte cæcæminimpa. Ayæ, Tatäna minitö iminite wënæ wënæ cædämaï incæcäimpa, ante Wængongui adobai aacä incæcäimpa. ⁴ Minitö iminite möni wææ änö ante ëñëninque do cæmini incæ godömenque adodö cæcæminimpa, ante Wængongui pönö cæcæcäimpa, ante mönitö do pönëmönipa. ⁵ Wængongui nänö waadete pönëno ante ëñencæminimpa, ante mönö Awënë taadö ëñente odömönte bai pönö odömongä ate minitö mimönë ëñencæminimpa. Itota Codito pönö cæcä beyænque minitö wæntæye inämaï inte ee cæcæminimpa.

Cæcæte ante mönö cæquënëno

⁶ Mönitö töninamini ëñeedäni. Mönitö mönö Awënë Itota Codito emöwo ante minitö iminite wææ ämönipa. Mönö töninadäni pancadäniya wæntæye inäni adinque ayæ möni odömönte apænedö mini ëñente æninö bai quëwënamäi inäni adinque minitö iñömö mäninäni tömänäni inänite gomö aedäni.

⁷ Mönitö cægai bai minitö æbänö adobai cæquënëmini iminipa, ante edæ tömëmini do ëñëminipa. Mönitö minitö weca quëwënedë wæntæye inämaï quëwentamönipa. ⁸ Ayæ adobai æcämenque cænguï ante näni pönöni æninque mönitö önonque ænämaï inte wæætë paga cæte cæntamönipa. Ayæ, Minitö cænguinque ante pönëninque wädämaï incæminimpa, ante mönitö, Tömëmöni cænguï cæncæmönimpa, ante woyowotæ itæde nanguï cædinque quëwentamönipa. ⁹ Mönitö minitö iminite, Möni quëwengäimpa, ante, Cænguï tönö mönitö owoquincö pönömöni æncæmönimpa, ante änämaï intamönipa. Mönitö mänömaï ante bai waa incædönimpa. Wæætë æbänö mönitö cætamönii, ante adinque minitö adobai cæcæminimpa, ante cætamönipa. ¹⁰ Edæ möni minitö weca quëwënedë incæ mönitö minitö iminite, Iïmaï cædäni, ante wææ antamönipa. Adocanque në mönö cæquënëno ante, Wiï cæinëmo, angä iñongante minitö tömengä ingante cænguï godönämaï inguënëmini iminipa.

¹¹ Minitö weca pancadäniya önonque cädämaï a ongonte quëwënäni inänipa, ante änäni ëñëmönipa. Adodäni në Baa äninque cädämaï inäni inte wæætë, Wadäni æbänö quëwënänii, ante godö wëntæ godö wëntæ tededäni inänipa. ¹² Mönitö mäninäni inänite mönö Awënë Itota Codito ëmowo äninque, Minitö iimö iñö iimö iñö nanguï cæte quëwëedäni, ante wææ ämönipa. Tömëmïni cæte beyænque minitö cænguï ænte cæncæmïnimpa, ante ancaa apænemöni imönipa.

¹³ Mönitö tönïñamïni minitö guiquënë, Quiëmë waa impa, ante wëntædämaï inte cöwë cæedäni. ¹⁴ Mönitö minitö imïnite iï yewæmointaa möni yewæmongainö ate adocanque ëñënämaï cæcä ininque, Tömengä æcänö ingää, ante aedäni. Ayæ tömengä guingo imonte wæcæcäimpa, ante tömengä ingante gomö aedäni. ¹⁵ Minitö adocä ingante, Wïi wacä ingampa, ante pönëninque wæætë tömëmïni biwüidi inänite ante bai tömengä ingante wææ ämïni ëñencæcäimpa.

Waa quëwencæmïnimpa, ante Pabodo angampa

¹⁶ Mönö Awënë Itota në piyænë cædongä incæ tömengä pönö cæcä ate minitö æbämenque bamïni incæ cöwë piyænë cæte quëwencæmïnimpa. Mönö Awënë minitö tömämïni weca a ongoncæcäimpa, ämopa. ¹⁷ Botö Pabodobo ñöwo tömëmo önompoca yewæmöninque, Minitö imïnite waa pönëmopa, ante yewæmömo aedäni. Pabodo nänö yewæmointa impa, ante ëñencæmïnimpa, ante cædinque botö tömanta yewæmöninque mänömaï bai yewæmömopa. ¹⁸ Mönö Awënë Itota Codito minitö imïnite waadete pönö cæcæcäimpa, ante botö mäninque ante yewæmömopa.

1 Tímoteo ingante Pabodo cadota ante tãnota nãnö yewæmongainta

Tímoteo ingante Pabodo yewæmongampa

¹ Botö Pabodobo inömo imopa. Itota Codito nãnö në da godongaïmo imopa. Itota Codito waa pöni nãnö inö bai mönö adobai bacæmöimpa, ante pönëmompä. Inique Itota Codito mönö në pönëngä tönö Wængongui mönö imonte në Ængaingä tönö botö imote äna ëñëñömote da godöna godïmo imopa. ² Tímoteo ëñëmi, Bitö acæbiimpa, ante bitö imite yewæmömpä. Edæ mönö wede pönënö ante apænebo në ëñëñimi inte bitö Itota Codito quïmi badinque näwä botö wëmi bai inömi imipa. Inique botö, Mæmpo Wængongui tönö Awënë Itota mönö Codito tönö bitö imite waadete pönö waa cæda ate bitö gänë entawencæbiimpa, ämpä.

Wadäni wapiticæ nãni odömönte apænedö

³ Botö Mäatedöniabæ inömo pöninge bitö imite, Epeto inömo ee ongöe, nangui antabopa. Mäniñömö wadäni babæ wapiticæ nãni odömönte apænedö ante në odömönte apænedönäni inänite bitö, Minitö godömenque mäninö ante odömönte apænedämaï iedäni, ante ämi ëñencædänimpa. Mänömainö ante do botö äninö bai ñöwo adodö ante bitö imite ämpä. ⁴ Ayæ, Dodäni önonque ante nãni tedegainö ante pönënamäi quëwëedäni, ante bitö ancæbiimpa. Ayæ adobai tömënäni wæmæidi tæiyænäni ante pönëninge, Æmönänidö ingainänii, ante ancaa änewëñönäni bitö tömënäni inänite, Minitö mäninö ante pönënamäi iedäni, ancæbiimpa. Edæ mäninö nãni tedewënö beyæ tömënäni, Æbänö i, ante nangui wæætedö wææte änewënänipa töö. Wææte edæ, Wængongui nãnö cædö ante wede pönëninge mönö cæquënenö quiquënë tömënäni nãni tedewënö beyæ pönömenque cætimpä.

⁵ Mänömainö ante äninge botö, Tömënäni mïmö iïmaï entawëninge waadete pönencædänimpa, ante ämpä. Edæ mïmö wæmö pöni entawëninge tömënäni Wængongui ingante wede nãni pönënö beyæ waadete pönencædänimpa. Ayæ adobai nämä apænte adinque wentamö mongænämaï entawënäni inte tömënäni waadete pönencædänimpa. ⁶ Inæmpä pancadäniya mäninö ante ëñëninge Baa ante ñimpo cæte wadæ godinque önonque ante quëwënänipa. ⁷ Möitee wodi nãnö wææ yewæmongainö ante odömönte apæneinëmönipa, ante në änäni incæ tömënäni nãni odömönte apæneyedë quïnö apænedänii, ante ëñënamäi inänipa töö. Adobai quïëmë ante apænedinque tömënäni, iïmaï impä, iïmaï impä, ante apænedäni incæte ëñënamäi inäni inte apænedänipa.

⁸ Möitee wodi nãnö wææ yewæmongainö ante adinque nöingä cæmö inique mäninö tömengä nãnö wææ angainö inömo waa ante imaimpā, ante do ëñëmompā. ⁹ Möitee wodi nãnö wææ yewæmongainö ante Wængongui wii në nö cædäni beyæ pönö wææ angacäimpa. Wææte në ëñënamäi cædäni tönö wadäni mäninö ante ëñëñäni incæ në godömenque wënæ wënæ cædäni tönö tömënäni beyæ pönö wææ angacäimpa, ante do ëñëmompā. Ayæ adobai Wængongui ingante Baa ante në quëwënäni tönö wënæ wënæ cædäni beyæ wææ angatimpā. Në tæiyæ wæmö entawënämaï inönäni beyæ ayæ adobai Wængongui ingante në badete todönäni beyæ wææ angatimpā. Mæmpocä ingante wäänä inante në wænönäni beyæ ayæ adobai waocä ingante në piinte wænönäni beyæ wææ angatimpā. ¹⁰ Nänöogængä inämaï inongante në towënäni beyæ ayæ adobai onguiñænäni nãna onguiñæncaya guëa towënäni beyæ wææ angatimpā. Në cæte quëwëngä bacæcäimpa, ante waocä ingante në godonte äñäni beyæ ayæ adobai në babæ äñäni beyæ wææ angatimpā. Wadäni inänite, Nö ämönipa ëñëedäni, ante në babæ änewënäni beyæ ayæ adobai nö odömönte apænedö incæ në wadö ante cædäni beyæ

wææ angatimpa. Mäninäni tömänäni eñencädänimpa, ante Wængonguï mäninö ante pönö wææ angacäimpa, ante eñëmompä.

¹¹ Edæ Wængonguï ñäö apäite emongampa, ante odömonte apænecæbiimpa, ante tömengä në waa ñongä inte edæ tömengä watapæ nänö apænedö ante pönongä æntabopa. Ayæ nö nänö odömonte apænedö ante Wængonguï nänö pönö angainö ante adodö änö impa.

Wængonguï waadete nänö pönö cædö ante

¹² Itota Codito mönö Awënë pönö cæcä beyænque botö tæi ewocabo batabopa. Tömengä ññömö botö imote waa adinque, Bitö në pönëmi inte cöwë ædæmö cæbi imipa. Ñinque bitö botö beyæ wadäni ñänite në cæbi bacæbiimpa, ante pönö cægacäimpa. Mänömaï beyæ botö tömengä ingante waa ate pönente apænebopa. ¹³ Botö wëenëhedë Itota Codito ingante në godö babæ ante anewengaimo imopa. Tömengä ingante në pönënäni ñänite wænæ wænæ cæquimo, ante në togænömo inte botö në piinte quëwengaimo imopa. Incæte botö në pönënämaï ñnömo inte, Quinö cæquï, ante eñënämaï inte cæbo adinque Wængonguï, Quëwencæbiimpa, ante pönö waadete waa cægacäimpa. ¹⁴ Mönö Awënë botö imo nanguï waadete pönö cæcä adinque botö Itota Codito nempo quëwëninque në wede pönëmo badinque në waadete pönëmo bagaboimpa.

¹⁵ Ñïmaï ante nö pönï näni änö näwangä ante impa, ante ämo eñëmaïminipa. Itota Codito ññömö, Wænæ wænæ cæmïni imïnite æmo beyænque quëwenguïmïni, ante inguipoga wææ pongacäimpa. Tömengä mänömaï cæcä incæte wadäni wænæ wænæ cædäni ññönäni botö tömëmoque godömenque wænæ wænæ në cægaïmo imopa. ¹⁶ Mänömaï beyænque tömëmoque godömenque wænæ wænæ cægaïmo ññömote Itota Codito pönö waadete angä beyænque quëwengaboimpa. Wëenëhedë botö bai në wænæ wænæ cægainäni ñänite adinque Itota Codito, Botö weca cöwë wantæpiyæ näni quëwenguinque pancadäniya botö imote pönenguïnäni ñänipa, ante do eñengacäimpa. Ñinque tömengä, Botö në waadete cædinque ee abo imopa, ante tömënäni ñänite odömoncæte ante cædinque tömengä botö Pabodobo imote mänömaï pönö waadete waa cægacäimpa.

¹⁷ Mönö Wængonguï ññömö cöwë wænämaï në quëwengaingä ñongä inte tömengä iincayæ ate adobai cöwë wænämaï inte Awënë Odeye ñongä ingampa. Tömengä awëmö ññömö quëwënongä ññongante mönö waocabo tömengä ingante ædö cæte aquiï. Tömengä wæætë tömää në eñengaingä ñongä ingampa. Ñinque tömengä adocanque Wængonguï ñongä ññongante mönö tömengä ingante cöwë waa aquïmö angüënë. Tömengä ingante, Bitö ñäö bai emömi ñnömi imipa, ante apænedinque mönö ñïne cædämaï inte cöwë watapæ angæimpa. Cöwë ñïmaï babaimpa, ante Amëë, ämopa.

¹⁸ Tımoteo, botö wëmi eñëmi. Në pönënäni wëenëhedë Wængonguï beyæ apænedinque bitö imitedö ante näni angainö bai adobainö ante apænedinque botö ñïmaï ämopa. Edæ tömënäni näni angainö ante eñente cædinque bitö tontadoidi näni cæbai adobai bitö cæquënëno ante guñënämaï inte wæætë tæi ewocate nanguï cæcæbiimpa.

¹⁹ Wængonguï ingante cöwë wede pönente incæbiimpa. Adobai mïmö entawëmi inte nämä apænte pönëninque wentamö mongænämaï inte bitö cöwë quëwencæbiimpa. Edæ mïni pönencabo ññömïnite pancadäniya nämä apænte änämaï ñäni inte Codito ingante näni pönëninö ante dobæ ñimpo cæte wadæ godänimpa. ²⁰ Ñimëneo tönö Adecantodo adobai Wængonguï ingante ñimpo cædinque wadæ godatapa. Ñinque, Tömëna, Wængonguï ingante mönö wænæ wænæ ante babæ änämaï ingæimpa, ante eñencädäimpa, ante cædinque tömëna ñinate Tatäna nempo pædæ godontabopa.

2

Wængonguï ingante mönö ñïmaï apænecæimpa

¹ Mïni pönencabo ññömïnite botö täno ñïmaï ämopa. Wængonguï ingante mïni apæneyedë quiëmë mïni æinënö ante apænecæmïnimpa. Tömengä ingante waa ate

pönente apænedinque waodäni tömänäni beyæ ante apænenecæminimpa ämopa. ² Awënë odeyeidi incæ pönömenque awënëidi tömänäni incæ mönö imonte waa aayönäni mönö piyænë cæte quëwengæimpa, ante cædinque mīnitō tömēnāni beyæ ante Wængonguī ingante apænenecæminimpa. Edæ Wængonguī ingante mönö cæquēnēnō ante ayæ waodäni inänite mönö cæquēnēnō ante mönö waa cæte quëwencæmōimpa, ante Wængonguī ingante awënëidi beyæ ante apænenecæminimpa. ³ Mänömainō ante mönö apænedō iñömō waa impa. Wængonguī mönö imonte nē Ængäingä inongä inte mäninō mönö apænedō ante waa acampa. ⁴ Waodäni tömänäni näwangä botō angainō ante ëñencædänimpa, ante Wængonguī pönō ængä beyænque quëwencædänimpa, ante nē waa cæinēnongä ingampa.

⁵ Edæ adocanque Wængonguī inongä ingacäimpa. Tömengä waodäni inänite adinque, Wadäni bai inänipa, ante nänēnē quëwengacäimpa. Ininque Itota Codito nē Waocä ëñagaingä inte tæcæguedē adocanque nē pongä inte, Waodäni Wængonguī guidēnāni badinque adoyömō bee tente godongämæ quëwencædänimpa, ante pönō cægacäimpa. ⁶ Tömengä iñömō mönö imonte ante godonte æncæte ante cædinque nämä wepæ incæ godoncæte ante nē pongä ingacäimpa. Wængonguī, Iionæ, ante nänō angaiönæ incæ iinque bayonte mäninō Codito nänō cægainō ante, Nō impa, ante tömänäni inänite nē odömongä ingacäimpa. ⁷ Mäninō ante bitō nē apænebi bacæbiimpa, ante Wængonguī botō imote angä ëñëninque botō tömengä nänō nē da godōmo batäbopa, ante näwangä ämopa. Edæ babæ änämaï imopa. Ayæ näwangä mönö pönēnō ante Wængonguī, Wadäni oodeoidi inämaï inäni adobai pönencædänimpa, ante cædinque botō imote angä ëñëninque botō tömengä nänō nē odömonte apænedömo imopa.

⁸ Wayömō wayömō godongämæ mīni pönencabo ongonte mīnitō onguīñæmīni iñömō nē piināmaï imīni inte Wængonguī ingante apænemīni adinque botō waa tobaïmopa. Wadäni inänite nē piinte wæætedō wææte änämaï inte wææte tæiyæ waëmō entawëmīni inte Wængonguī ingante pædæ æmpote apænenecæminimpa, ante ainëmopa.

⁹ Ayæ onquiyæmīni iñömō waëmō weocoo mongæmīni incæte mīnitō, Botō waëmō weocoo mongæmo adinque wadäni botō imote waa acædänimpa, ante änämaï inte nämä baō ante guiñëñate pönëninque weocoo ædæmō wëñate mongæncæminimpa. Mīnitō ocaguī que que cæmīni incæte oodo badōi tönō pededamō nāni ämō wente cædämaï incæminimpa. Waëmoncoo nāni nanguī godonte ænincoo nāni waa acoo ante mīnitō mongæñämaï incæminimpa. ¹⁰ Wææte edæ Wængonguī ingante, Bitō Wængonguī Awënë imidō anguënë, ante nē watapæ apænemīni imīni ininque mīnitō mīni apæneï bai cædinque mīni waa cæquēnēnō ante pönencæminimpa. Mänömainō ante pönente quëwencæminimpa, ante adobai ainëmopa. ¹¹ Wadäni apæneyönäni mīnitō onquiyæmīni tededämaï inte ëamonca ongonte ëñencæminimpa. Ayæ nē ämöni möni änō ante ëñëninque wadō pönëñämaï inte do ëñente cæcæminimpa, ämopa.

¹² Godongämæ mīni pönencabo weca ongonte mīnitō onquiyæmīni iñömō odömonte apænedämaï incæminimpa, ante botō wææ ämopa. Ayæ adobai onguīñæmīni imīnite onquiyæmīni iñömō, Iïmaï cædäni, ante änämaï incæminimpa, ante wææ ämopa. Wææte tededämaï ëñencæminimpa. ¹³ Wængonguī edæ onguīñængä Adäo ingante täno badöninque ayæ onquiyængä Eba ingante badongacäimpa. ¹⁴ Ayæ Tatäna wīi Adäo ingante wapiticæ mäocä oda cægacäi. Wææte Eba ingante æpiticæmë mäocä oda cædinque do wënæ wënæ cæcä bagacäimpa. ¹⁵ Incæte onquiyænāni Wængonguī ingante godömenque pönëninque cöwë waadete pönëñäni inönäni inte nē nō pönente tæiyæ waëmō entawënäni ininque tömēnāni wëñænāni inänite mäñönänite Wængonguī wææ aacä beyænque quëwencædänimpa, ämopa.

3

Godongämæ mönö pönencabo iñömonte nē aadäni

¹ Iïmaï ante nāni änō nō pönī ante impa. Godongämæ mönö pönencabo iñömonte, Aacæboimpa, ante nē angä iñömō tömengä waa cæquīnō ante pönō cæinengä ingampa.

² Incæte wadāni, Wēnæ wēnæ cæcā ingampa, ante ānāmaī incædānimpa, ante cædinque nē aacā wæætē waa quēwenguēnengā ingampa. Edæ tōmengā nānōogænā adodanque nē manguīwengā incæcāimpa. Tōmengā tōō pōnente nō quēwengā incæcāimpa. Nōinō cæcāimpa, ante pōnēninqe nāmā wææ ante nē cæcā incæcāimpa. Waodāni botō imote waa acædānimpa, ante cædinque waa quēwencæcāimpa. Waodāni inānite, Botō oncōnē pō cæedāni, ante cōwē nē watapæ angā incæcāimpa. Ayæ tōmengā nē waa odōmonte apænecā incæcāimpa. ³ Nē aacā tī nāmæ bete beyæ quidi quidi dowænāmaī quēwenguēnengā ingampa. Wacā ingā do piinte cædāmaī inongā inte wæætē ædæmō cæcā inte quēwencæcāimpa. Tōmengā piyænē cæcā incæcāimpa. Tōmengā godonte nāni æinta ante waadete pōnente wædāmaī incæcāimpa āmopa.

⁴ Nē aacā tōnō godongāmæ quēwēnāni inānite tōmengā waa aaquēnengā ingampa. Tōmengā wēñænāni inānite ædæmō aacā beyæ tōmēnāni wæætē tōmengā ingante waa adinque tōmengā nānō ānō ante ēñente cæte quēwencædānimpa. ⁵ Edæ nē aacā tōnō godongāmæ quēwēnāni inānite tōmengā wīi waa aacā ininque Codito ingante godongāmæ mōnō pōnencabo iñōmonte ædō cæte waa aacā inguingā.

⁶ Itota Codito ingante ñōwo tæcæ pōnēningā wīi nē aacā baquēnengā ingampa. Edæ mānōmaī inongā inongante mīnitō, Nē aabi imipa, āmīni ininque tōmengā nāmā incæ, Adoboque waa cæbo imopa, ante pōnengā imaingampa. Wēnæ awēnē mānōmaī pōnengā beyænque Wængonguī tōmengā ingante apænte nānō panguinō baī nē aacā ingante adobaī apænte pāmaingampa. ⁷ Ayæ adobaī Itota Codito ingante nē pōnēnāmaī ināni nē aacā ingante adinque, Tōmengā nē waa cæcā ingampa, ante acædānimpa, ante cædinque tōmengā waa quēwenguēnengā ingampa. Tōmengā waa cædāmaī ingā adinque tōmēnāni wæætē, Tōmengā wēnæ wēnæ cæcā ingampa, ante piimainānīpa. Tōmengā waa cædāmaī ingā piināni ininque wēnæ awēnē iñōmō, Tōmengā oda cæcæcāimpa, ante godō cæcā ate tōmengā do wēnæ wēnæ cæcā babaingampa.

Mōnō pōnencabo tōnō godongāmæ nē cædāni

⁸ Mōnō pōnencabo tōnō godongāmæ nē cædāni iñōmō adobaī, Mōnō eyepæ cæte quēwēmō ininque wadāni mōnō imonte waa acædānimpa, ante cædinque waa quēwenguēnēnāni inānīpa. Nē cædāni nāmā nāni ānō baī ante nō cæcædānimpa. Tōmēnāni yowepæ wædenque tī nāmæ biinōmæ nāni āmæ wīi nanguī becædānimpa. Babæ cæmōni incæte godonte nāni æinta cōwē godōmenque æncæmōnimpa, ante wadāni nāni pōnēwēnonque ante iināni wæætē māninō ante pōnēnāmaī incædānimpa. ⁹ Edæ nāmā apænte pōnēninqe wentamō mongænāmaī entawēnāni inte tōmēnāni Wængonguī nānō wē wodonte angainō ante tæcæ ēñēninqe tōmēnāni, Nō pōnī mōnō pōnēnō impa, ante cōwē wede pōnenguēnēnāni inānīpa. ¹⁰ Ayæ mānināni inānite mīnitō, Quinō cæmīni imīni, ante ēñencæte ante cōwā acæmīnimpa. Ayōmīni tōmēnāni cōwē waa cæte quēwēnāni adinque mīnitō wæætē tōmēnāni inānite, Mīnitō mōnō pōnencabo tōnō godongāmæ nē cæmīni bacæmīnimpa, ante āmīni bacædānimpa.

¹¹ Tōmēnāni nānōogæidi inānite wadāni waa acædānimpa, ante cædinque adobaī eyepæ cæte waa quēwenguēnēnāni inānīpa. Mānināni iñōmō wadāni inānitedō ante babæ ānāmaī incædānimpa. Wæætē adodāni cōwē tōō pōnente nō quēwēnāni incædānimpa. Tōmēnāni cōwē pōnēninqe, ĩmaī cæcæmōnimpa, ante nāni āninō baī ædæmō cæcædānimpa. ¹² Mōnō pōnencabo tōnō godongāmæ nē cæcā iñōmō tōmengā nānōogænā adodanque nē manguīwengā incæcāimpa. Tōmengā wēñænāni inānite ayæ tōmengā tōnō godongāmæ quēwēnāni inānite tōmengā nē waa aaquēnengā ingampa. ¹³ Mōnō pōnencabo tōnō godongāmæ nē cædāni iñōmō, Nē waa cædināni inānīpa, ante adinque mōnō tōmēnāni inānite waa āmōmpa. Ayæ mānōmaī waa cædināni inte mānināni, Itota Codito ingante pōnēedāni, ante guīñēnāmaī apænecædānimpa.

Wē wodonte nāni angainō edonque pōnī batimpa, ante

¹⁴ Quingæ bitō weca acæ poncæboimpa, ante pōnēmo incæte botō, ĩmaī cæe, ante bitō imite yewæmōmopa. ¹⁵ Botō wæætē wīi quingæ pōmo ininque bitō, Mōnō Wængonguī

tönö godongämæ quëwencabo inömö inte mönö æbänö cæquiï, ante bitö ëñencæbiimpa, ante yewæmömopa. Edæ Wængongui nè Quëwengaingä quimö inömö inte mönö Codito ingante godongämæ mönö pönencabo iñömö mönö cobacadewæ tæi ongö bai tömengä nö nänö angainö ante ñimpo cædämaï inte wæætë wææ cæmö imompa. ¹⁶ Iïmaï ante nö pönï impa. Wængongui ayongä mönö æbänö waa cæte quëwenguiï, ante Wængongui wë wodonte nö nänö angainö incæ ñöwoyedë edonque pönï mönö ëñenö iñömö waa pönï impa. Iïmaï impa.

Wængongui inguipoga iñömö ponte ëñadinque Waocä bacä agadänimpa.

Tömengä ingantedö ante Wængongui Önöwoca, Mäningä waëmö quëwëningä ingampa, angacäimpa.

Tömengä ingante Wængongui anquedoidi do agadänimpa.

Wabæca wabæca näni quëwencabo inänite Itota nänö cægainö ante apænegatimpa.

Tömämæ quëwënanï pancadäniya tömengä ingante pönente bagadänimpa.

Ayæ tömengä ñäö bai ëmöninque öönädë iñömö ocæ ëmænte gogacäimpa.

Mänömaïnö ante näni ämotamïni änö bai impa.

4

Në pönënanï pancadäniya wadæ goquinäni inänipa, ante

¹ Wængongui Önöwoca iïmaï ante edonque pönï apænecampa. Iïnque iïönæidi bayonte Codito ingante nè pönënanï incæ pancadäniya ñimpo cæte tömengä ingante pönënamäi bacadänimpa. Iïnque önöwocaidi incæ nè, Wapiticæ oda cæcadänimpa, ante nè wënæ wënæ cædönäni miñæ tee empo gocadänimpa. Goyönäni wënæidi näni odömönte apænewënö ëñente cæquinäni inänipa. ² Nè babæ änanï nè wadö tedete wadö cædäni iñömö tömënanï mäninö wënæidi näni odömönte apænewënö ante nè odömönte apænedäni inänipa. Iïnanï guiquënë tömënanï nämä näni apænte pönënö ante ömætawënanï inte wënæ wënæ näni cædinö ante wædämaï quëwënanipa. ³ Mäninänï iñömö waodäni inänite wææ äninque, Minitö, Botö nänöogængä, ante onquiyængä ingante mönämäi iedäni, änanipa. Ayæ adobai mönö waa cængui adinque pancaa ante, Cænämäi iedäni, ante wææ änanipa. Iñæmpa Wængongui edæ tömäa cængui badongacäimpa. Tömengä, Botö imote waa ate pönente apænedinque nè pönënanï iñömö botö nö angainö ante ëñënonäni inte cængui ænte cæncædänimpa, angampa.

⁴ Edæ Wængongui nänö badongaincoo tömancoo waa pönï i iñönte mönö Wængongui ingante waa ate pönente apænedinque tömäa cængui æmö ininque pancaa ante ædö cæte Baa ante ænämaï inguiï. ⁵ Iñæmpa Wængongui nänö angainö beyænque ayæ tömengä ingante waa ate pönente apænemö beyænque tömäa cængui iñömö tæiyæ waëmö cængui bapa.

Itota Codito ingante nè waa cæcä

⁶ Bitö godongämæ miñi pönencabo iñöminite bitö mäninö botö änö ëñëninque bitö tönñädäni inänite wæætë odömömi ininque Itota Codito beyæ nè waa cæquimi incæbiimpa. Ayæ Wængongui nänö angainö ante mönö pönënö ante ëñente quëwëninque bitö waa mönö odömönte apænedö ante nè ëñente cædimi inte edæ tömö cænte bai nè nö cæbi incæbiimpa.

⁷ Babæidi bai nè tedewënanï inänite ëñënamäi inte bitö onquiyänäni picänäni incæ önonquedö ante näni tedewëninö ante ëñënamäi incæbiimpa. Wæætë, Wængongui ayongä mönö waa cæte quëwencæte ante cædinque bitö iñömö tæi ewocabo badinque cæcæboimpa, ante godömenque godömenque cæcæbiimpa. ⁸ Mönö baö tææmö bacäimpa, ante cædinque mönö ñimpo cædämaï inte adodö adodö cæmompä. Mäninonque ante mönö cædö guiquënë wædænque waa impa. Wæætë Wængongui ayongä mönö waa cæte quëwëmö ininque mönö ñöwoyedë waa quëwëninque adobai iïncayæ ate waa quëwenguimö incæmöimpa. Iïnque mäninö ante mönö cæquinö

ĩñömö tömää beyæ nõ waa põni i ĩninqe, Mönö tæi ewocaquimö, ante cædinqe mönö ñimpo cædämaĩ inte adodö adodö cæcæimpa.

⁹ Mänömainö ante nõ põni nani änö näwangä ante impa, ante ämo eñëmaiminipa. ¹⁰ Mänömaĩ beyæ tæi piñæninqe nanguĩ cæmö ĩmompä. Edæ, Wængonguĩ nê Quëwengaingä beyænque mönö watapæ quëwengæimpa, ante pönengaimö ĩmompä. Tömengä ĩñömö mönö waocabo tömämö ĩmonte, Quëwenguimĩni, ante nê Ængaingä incæ tömengä ingante nê pönëmö ĩñömönte nõ ængä beyænque mönö quëwengæimpa.

¹¹ Mäninö botö änö ante bitö tömënäni inänite, ĩmaĩ cædäni, ante odömönte apænecæbiimpa, ämopa. ¹² Bitö wii picæmi incæte æcämenque ĩñongante bitö, Botö ĩmote piĩnte adämaĩ incæcäimpa, ante pönente quëwencæbiimpa. Wæætë edæ bitö Wængonguĩ ingante nê pönënäni beyæ ante, Botö cæbaĩ tömënäni adobaĩ cæcædänimpa, ante ĩmaĩ cæcæbiimpa. Apænëbi incæ waa cæte quëwëmi incæ waadete pönëmi incæ wede pönëmi ĩmi incæ nõ pönente waa cæbi incæ bitö, Botö baĩ bacædänimpa, ante cædinqe bitö cædö ante odömömi adinqe tömënäni adobaĩ cæcædänimpa. ¹³ Botö pönämaĩ inguinganca bitö ongöñömö ĩñömö Wængonguĩ angä eñente nani yewë-mongainö adinqe adodö ante ædämö apænëbi eñencædänimpa. Ayæ Wængonguĩ ingantedö ante apænëbi inte odömönte apænëbi eñencædänimpa. Mäninonque cæte ongoncæbiimpa. ¹⁴ Mĩni pönencabo ĩñömönte nê aadäni nani Picæncabo ĩñömö bitonga gampo cædinqe Wængonguĩ beyæ apænëdinqe bitö ĩmite, Bitö nê aabi badinqe nê odömönte apænëbi bacæbiimpa, ante pönö apænëdänitapa. ĩninqe bitö do nê aabi badinqe nê odömönte apænëbi bagaĩmi inte godömenque godömenque cæcæbiimpa.

¹⁵ Edæ waodäni tömänäni bitö æbänö godömenque waa cæbi ĩmi adinqe eñencædänimpa, ante cædinqe bitö mäninonque ante pönëninque godömenque godömenque cæcæbiimpa. ¹⁶ Bitö quëwënö ante, Æbänö quëwëmoo, ante nämä wææ aacæbiimpa. Ayæ bitö odömönte apænëdö ante, Botö nõ pönëninque odömönte apænecæboimpa, ante wææ cæcæbiimpa. Edæ mänömaĩ cæte wæntædämaĩ inte cöwë cæcæbiimpa. Bitö mänömaĩ cæbi ĩninqe tömëmi nämä incæ wantæpiyæ quëwencæbiimpa. Bitö odömönte apænëyömi nê eñënäni ĩñömö adobaĩ bitö cædö beyænque wantæpiyæ quëwencædänimpa.

5

Nê pönënäni inänite æbänö cæcæbiimpa, ante

¹ Onguĩñængä picængä wënæ wënæ cæcä incæte tömengä ingante piĩnte änämaĩ incæbiimpa. Wæætë tömëmi mæmpocä ingante ante baĩ tömengä ingante waadete ämi eñencæcäimpa. Edëninäni ĩñömö tömëmi biwiidi inänite ante baĩ tömënäni inänite waadete ämi eñencædänimpa. ² Onquiyænäni picænäni ĩñömö tömëmi wäänä inante ante baĩ bitö tömënäni inänite adobaĩ waadete ämi eñencædänimpa. Ayæ baquedäni ĩñömö tömëmi biwinqueidi inänite ante baĩ tömënäni inänite waëmö mimönë waadete ancæbiimpa.

³ Owæmpoĩnani nê näwangä ömæpodäni inte quëwënänipa, ante tömënäni inänite waa adinqe pönö cæcæbiimpa. ⁴ Incæte owæmpoingä wëñænäni næængä ĩninqe nänömoidi næængä ĩninqe mäninäni wæætë tömengä beyæ cæquënënanipa. Edæ mäninäni täno tömënäni tönö godongämæ quëwënäni inänite waa adinqe näëmæ nani cæquënëno ante, Æbänö cæquii, ante eñente cæcædänimpa. Mänömaĩ cædinqe tömënäni mæmpoidi tönö mæmæidi tömënäni inänite waadete nani cædi baĩ ĩnani adobaĩ mæmpoidi tönö mæmæidi inänite näëmæ waadete cæcædänimpa. Edæ mänömaĩ cædäni adinqe Wængonguĩ waa acæcäimpa. ⁵ Nê nõ ömæpocä ĩnongä inte adodanque quëwengä ĩninqe tömengä nê owæmpoingä ĩnongä inte Wængonguĩ beyænque watapæ quëwengæimpa, ante pönengä ingampa. Itædë incæ woyowotæ incæ tömengä ñimpo cædämaĩ inte, Botö beyæ cæquimi, ante Wængonguĩ ingante apænëte quëwengampa. ⁶ Wæætë owæmpoingä tote quëwengæimpa, ante nämanque pönente nê quëwënongå guiquënë tömengä miĩ quëwengä incæte do wænte baĩ ingampa töö.

⁷ Töménäni inänitedö ante wænæ wænæ änämaï incädänimpa, ante wææ cædinque bitö mäninö botö änö ante adodö ante ämi ëñencädänimpa. ⁸ Æcänö guidänäni inänite pönö cädämaï inaa ayæ tömengä nani wencabo inänite pönö cädämaï inaa tömengä iñömö Wængonguï nänö angainö mönö pönönö ante do Baa äninque wii ëñente cæcampa. Ayæ në pönänämaï ingä wænæ wænæ cæcä iñongante mäningä iñömö godömenque wænæ wænæ cæcä ingampa töö.

⁹ Owæmpoinä do tetenta wadepo ganca godömenque në picänä inönä inte tömënä nänöogængä wodi ingante në möninanque quëwënä ingadäimpa, ante adinque bitö, Wængonguï qui, ante mönö godonte äninata mäninä owæmpoinä në ænguïnä incädäimpa, ante tömënä ëmowo ante yewæmoncæbiimpa. ¹⁰ Edæ tömënä wëñänäni inänite waa cädä pædäni inänitawo. Wadäni inänite tömënä, Botö oncönë pö beedäni, ante waa apænedä inantawo. Wængonguï quïnäni iñönänite tömënä nämä pönänämaï inte waa cædantawo. Në wæwänäni inänite adinque tömënä tömënäni tönö godongämæ cædantawo. Ayæ, Quiëmë waa cæcäimpa, ante mäninonque ante pönëninque cæte quëwëntawo. Mänömaï quëwënä adinque woadäni, Mäninä nöinä waa cädä inönampa, ante do ëñänäni inänitawo, ante adinque bitö wæætë tömënä ëmowo ante yewæmoncæbiimpa. Ayæ wadäni mäninä bai iñönänite bitö, Wængonguï qui, ante mönö godonte äninata mänimpodänique në ænguïnäni incädänimpa, ante tömënäni ëmowo ante yewæmoncæbiimpa.

¹¹ Wæætë edæ owæmpoinäni wii picänäni iñönänite bitö tömënäni ëmowo ante yewæmönämaï inte Baa ancæbiimpa. Ayæ toïente wæwëninque Codito ingante ñimpo cæte wadæ godinque wæætë, Wacä nänöogængä ingante möinëmopa, ante quëwänäni. ¹² Edæ tömënäni Codito ingante, Botö bitö beyænque cæcæboimpa, ante täno nani angainö ante ñimpo cädäni beyæ Wængonguï apænte pangä wæcädänimpa. ¹³ Ayæ godömenque iïmaï cädänipa. Tömënäni cädämaï inte wæntæye badinque adobaï wacönë wacönë acæte ante önonque godäni inänipa töö. Ayæ wii önonque wæntæyedänique badinque tömënäni, Wadäni æbänö cädänii, ante gote adinque wadäni nani cædönö ante godö wæntæ godö wæntæ tededäni inänipa. Edæ wii nani angüenönö ante do anewänäni. ¹⁴ Mänömaï beyæ botö owæmpoinäni wii picänäni inänite iïmaï ämopa. Minitö wæætë möninque wëñänäni mäedäni. Ayæ oncönë mini cæquënönö ante cædäni. Wadäni edæ mönö imontedö ante wænæ wænæ nani tedewönö ante tededämaï incädänimpa, ante minitö mänömaï cæte waa quëwëedäni, ämopa. ¹⁵ Iñæmpa owæmpoinäni pancadäniya do Itota Codito ingante ëmö cæte godinque Tatäna miñæ tee empocæ godänitapa töö.

¹⁶ Onquiyængä në pönengä iñömö tömengä guidänäni owæmpoinäni næængä ininque tömengä tömënäni beyæ cæcæcäimpa. Codito ingante godongämæ mini pönencabo iñömönite tömengä, Botö guidänäni inänite godömini æncädänimpa, ante änämaï incæcäimpa. Mänömaï cædinque Codito ingante mini godongämæ pönencabo wæætë, Owæmpoinäni näwangä ömæpodäni inänipa, ante adinque tömënäni inänite godömini æncädänimpa, ämopa.

¹⁷ Wængonguï ingante godongämæ mini pönencabo iñömönite në aadäni nani Picæncabo iñömö nö waa aadäni iñönänite minitö tömënäni inänite waa aquënëmüni iminipa. Mäninäni Wængonguï nänö angainö ante në apænedäni inte ayæ në odömonte apænedäni iñönänite minitö godömenque nanguï waa acæminimpa. ¹⁸ Edæ Wængonguï iïmainö ante apæncä ëñëninque yewæmongadänimpa. “Wagada onguiñængä në cæcä inte tömentapo æ yacæimpa, ante ämi pinä pinä gawate cægöñongä bitö tömengä önöne wææ wodönedämaï inte ee abi cæncæcäimpa,” ante yewæmongatimpa. Ayæ godömenque iïmaï ante impa. “Në cæcä iñömö tömengä nänö cædinö beyæ ante në ænguënegä ingampa.” Mänömaï yewæmongadänimpa.

¹⁹ Godongämæ mini pönencabo iñömöni waocä adocanque iñömö bitö imite apænedinque, Mäningä në aacä Picængä iñömö wænæ wænæ cæcantapa töö, ante äñongante bitö ëñänämaï incæbiimpa. Wæætë waoda mënaa në babæ wapiticæ änämaï ina inte

bitö imite apænedinque, Tömengä nê wênæ wênæ cæcantapa, ante adodö apænedä eñëninque bitö nê äna inate eñencæbiimpa. Ayæ waodäni mengäa go adocanque adobai adodö apænedäni eñëninque bitö nê änäni inänite eñencæbiimpa.

²⁰ Nê wênæ wênæ cædönäni incæ ñimpo cædämaï inänipa, ante adinque bitö wæætë godongämæ ongönäni eñëñönäni mäninäni inänite nanguï ancæbiimpa. Godongämæ ongönäni eñëñönäni bitö mänömaï ämi ininque tömënäni wæætë guiñëninque, Wênæ wênæ mönö cæquinö ante cædämaï incæmöimpa, ante pönencædänimpa.

²¹ Mönö Wængonguï ayongä Itota Codito ayongä Wængonguï nänö apænte æninäni anquedoidi ayönäni botö iïmaï ämopa. Mäninö botö äninö ante eñente cædinque bitö, Adoyömö pönï inänipa, ante tömänäni inänite adoyömö godö cæbi incæbiimpa. Wïi adocanque ingante, Botö nê waa adimi imipa, ante tömengä ingante wadö cædämaï incæbiimpa. ²² Æcämenque ingante, Mönö pönencabo beyæ bitö nê cæbi baquïmi, ante pönëmi inte bitö tömengäa quingæ gampo cædämaï ie. Edæ quingæ gampo cæbi nê cæcä badinque edæ tömengä wênæ wênæ cæcä ininque bitö adobai tömengä tönö wênæ wênæ cæbi baquënëmi imipa. Bitö tömëmique godömenque wênæ wênæ nani cæpämö ante tömänö ante Baa ante waa cæte quëwëe.

²³ Bitö cæinca cædente wæbitawo. Ayæ wantæ wantæ iñö wantæ wantæ iñö wênæ wênæ inte wæbitawo. Ininque wïi æpænque bee ämopa. Wæætë biinömæ wædænque bete quëwencæbiimpa.

²⁴ Wængonguï nänö apænte angüönæ badämaï iñedë incæ waodäni pancadäniya wênæ wênæ nani cægäinö do edonque pönï impa. Wadäni guiquënë wênæ wênæ nani cægäinö wë wodonte i incæ mäniñedë edonque pönï baquinö angüënë. ²⁵ Ayæ adobai waodäni waa nani cægäinö do edonque pönï impa. Ayæ ñöwoyedë pancaa waa nani cægäinö wïi edonque pönï i incæte wïi cöwë wë wodonte ingæimpa. Wæætë edonque pönï aquinö angüënë.

6

¹ Waodäni awënëidi nani nê ö æninäni inte awënëidi beyænque cæte ñä cæyænte bai nê quëwënäni iñömö tömënäni tömänäni awënëidi inänite waa eñente cæcædänimpa. Iñæmpa tömënäni nê pönënäni inte wïi waa eñente cædäni bai wadäni wæætë Wængonguï ëmowo ante wênæ wênæ ante babæ angüënëñänimpa. Adobai mönö odömonte apænedinö ante, Wênæ wênæ impa, ante angüënëñänimpa. ² Tömënäni awënëidi iñömö nê pönënäni inäni beyænque nê cædäni iñömö, Botö tönïñacanque inongä inte botö awënë iñömö önonganque ingä awædö, ante pïinämaï incædänimpa. Wæætë edæ nê cædäni iñömö, Botö cæbo nê ængä iñömö nê pönengä inongä inte Wængonguï nänö nê waadecä ingampa, ante adinque tömënäni awënëidi inänite godömenque waa eñente cæcædänimpa.

Näwä mäincoo ante

Ininque Tímoteo eñëmi. Mäninö ante tömënäni inänite odömonte apænedinque bitö adodö adodö ante ancaa ancæbiimpa, ämopa. ³ Pancadäniya wadö ante odömonte apænedinque mönö Awënë Itota Codito nö pönï nänö angäinö ante Baa änänipa. Ayæ mönö odömonte apænedö ante tömënäni Wængonguï ayongä mönö waa cæte quëwenguënënte ante Baa änänipa. Ininque æcänö mänömaï Baa äna iñömö ⁴ tömengä nämä incæ, Botö gomonga waa eñëmopa, ante nê pönënongä ingä incæte tömäa eñëñämaingä ingampa. Tömengä nämänque nänö pönëwënö ante wæætedö wæætë tededinque, Ædedö i, ante wacä tönö guëadö guëa äinëwente wæcampa. Tömengä mänömaï tedecä beyænque wadäni nê gomonga eñengä ingante godö pïinte adänipa. Godongämæ wadodö wadö pïinte tedewënänipa. Wacä ingä wacä ingä, Bitö wênæ wênæ cæbi imipa, ante änewënänipa. Nämä nani wênæ wênæ pönënonque ante, Wadäni wênæ wênæ cædänipa, ante pönëwënänipa. ⁵ Ayæ ocaidë pönente wentamö encadäni inte tömënäni Wængonguï näwangä nänö angäinö incæ eñëñämaï badänipa. Ininque nani cabo incæ wacä ingä wacä ingä guëadö guëa apænëte nani pïincabo inänipa.

Ayæ mäniinani adobai, Wængongui ayongä waa cæte quëwëmö beyænque nanguï éate baquimö, ante pönëwënanipa.

⁶ Ìnæmpa mäincoo quincoomë éacä incæte, Mäniinque éabopa, ante piyænë cæte quëwënongå ìñömö tömengä Wængongui ayongä waa cæte quëwengä beyænque watapæ quëwënongå inte nö nanguï éacä ingampa. ⁷ Edæ mönö ìi inguipoga ìñömö ömaamö pontamompa. Adobai ömaamö inte tao goquimö imompa. ⁸ Incæte mönö cængui tönö weocoo éamö inte mäniinque beyæ mönö watapæ quëwenguinque imompa. ⁹ Wadäni guiquënë, Mäincoo nanguï éainëmönipa, ante quëwënanani inte tömënanani wënæ wënæ nani cæinëmämo badinque oda cæte goquinanidö anguënë. Mänömaï cædinque tömënanani, Quinö önonque impa, ante æinente badänipa. Ayæ wënæ wënæ nani baquinque edæ æinëwënanani inte quiëmë incæ tömënanani æmæwo ömæe nani ëwenguinonque gocädänimpa. ¹⁰ Waodäni nani godonte æinta waadete pönente nani wädö beyæ wädö wädö nani wënæ wënæ cæpämö pompa. Edæ pancadäniya, Mönö godonte ænguinta ængæimpa, ante pönëninque tömënanani nani wede pönenguënëno ñimpo cæte wadæ godinque nämä nani cædö beyænque nanguï wæwente badänitapa.

Mönö wede pönëno ante mönö tæi ëwocate cæcæimpa

¹¹ Bitö guiquënë Wængonguinque ingante në cædömi inte mäniinö tömänö ante ñimpo cæte wodii gote bai quëwencæbiimpa, ämopa. Wæætë mönö nö cæquënëno ante cæte quëwencæbiimpa. Wængongui ayongä mönö waa cæte quëwengæimpa, ante cæcæbiimpa. Mönö wede pönëmämo, ante godömenque pönente quëwencæbiimpa. Waodäni inänite godömenque waadete pönencæte ante cæcæbiimpa. Ayæ tæi piñante entawëninque wëntæye badämaï inte ee cæcæbiimpa. Cöwë ædæmö cæte quëwencæbiimpa. ¹² Wængongui ingante mönö wede pönëno ante mönö cæquënëno ante bitö tæi ëwocate cæcæbiimpa. Mönö wænämaï quëwenguinö goquimö, ante pönente ñimpo cædämaï incæbiimpa. Edæ waodäni tæiyænani ëñëñönani, bitö, Wængongui ingante wede pönente babopa, ante äñömi Wængongui edæ, Mäniinö quëwenguinö gocæbiimpa, ante bitö imite apænte aa pecantapa. ¹³ Wængongui pönö cæcä beyænque quingämenque incæ tömänani quëwënanani inänipa. Itota Codito ìñömö Pontio Pidato ingante apænedinque, Quinö nö impa, ante edonque pönï apænegaingä ingampa. Edæ Wængongui tönö Itota Codito mänömainö ingaina ìñöna botö tömëna ayöna bitö imite, ìimaï cæe, ämopa. ¹⁴ Mönö Awënë Itota Codito nänö ocæ ëmænte ponguinganca bitö mäniinö botö wææ änö tömänö ante waa ëñente cæcæbiimpa, ämopa. Bitö ëñente cædö adinque wadäni ædö cæte, Wënæ wënæ impa, ante anguinänii, ante pönente cöwë waa pönï cæcæbiimpa. Mänömaï ante ämopa.

¹⁵ Wængongui nänö ainenguionæ bayonte Itota ocæ ëmænte poncæcäimpa. Mönö Awënë Wængongui ìñömö tömengä adocanque Wængonguinque ingaingä inte në waa pönï inongä ingampa. Tömënanani awënë odeyedi ìñönänite tömengä Tæiyæ Awënë Odeye inongä ingampa. Ayæ tömengä ìñömö awënëidi tömänani Awënë inongä ingampa. ¹⁶ Tömengä adocanque në wantæpiyæ wænämaï inongä inte në Quëwengä ingaingä ingampa. Tömengä tömää ñäö ìñömö quëwënongå ìñongante waodäni ædö cæte tömengä weca goquinänii. Tömengä mönö waocabo mönö në adämaï ingaingä ingampa. Edæ tömengä ingante mönö ædö cæte aquii. Tömenganque ingante waodäni tömänani waa aquinanidö anguënë. Tömenganque cöwë në tæi piñænongä inte quingämenque quëwënanani ìñönänite tömengä tömänani Awënë inguingänö anguënë. Mänömaï babaimpa, ante, Amëe, ämopa.

¹⁷ Inguipogaque mäincoo në nanguï éadäni inänite bitö iimaï ancæbiimpa. Nanguï éamöni inte mönitö godömenque waa pönï imönipa, ante pönënamai iedäni. Ìnæmpa mäincoo mönö éadincoo ìñömö quingæ dæ ä apa quëwënanani. Ìninqe mïni mäincooque ante wii mäincooque ante pönëedäni. Wæætë, Wængonguinque beyænque watapæ quëwengæimpa, ante pönëedäni, ancæbiimpa, ämopa. Edæ, Mönö qui quinö dæ ä, ante wæmö adinque tömengä mönö imonte, Mïni watapæ quëwenguinque, ante tömää

nē pōnongä ænguimō ïmōmpa. ¹⁸ Mänināni nē nangui ēadāni ïnānite bitō, Minitō quinō waa cæquiī, ante mäninonque cæcæminimpa, ancæbiimpa. Waa mini cæquinō ante minitō nangui cæte quēwencæminimpa. Ayæ do Ao ante minitō mäincoo mini ēadincoo pancacooga pædæ godōmini æncædānie, ancæbiimpa, ämopa. ¹⁹ Mäninō bai nē cædōnānique, Mönō nāmā beyæ ēaquincoo, ante öönædē ïñömō do cō cæte bai cædānipa. Mänōmaī cædinque tōmēnāni, Nō pōni mönō quēwenguinque impa, ante ïincayæ ate æncædānimpa.

Tímoteo ingante, Pabodo ïinque wææ angampa

²⁰ Tímoteo ēñēmi. Wængongui, Wææ aacæbiimpa, ante bitō ïmite quinō pōnongä bitō ö æninō ante wææ ae. Tæiyæ waēmō ewocadāmaī inte wadāni önonquedō ante nāni änönō ante ēñēnāmaī ie. Adobai wadāni, Mönitō ēñente ate nangui encaimōni ïmōnipa, ante nē babæ änāni ïñōnānite bitō wadodō wadō nāni anewēnō ante ēñēnāmaī ie. ²¹ Tōmēnāni nāni anewēnō ante pōnēninque waodāni pancadāniya Wængongui ingante nāni pōnēninō ante do ñimpo cædinque wadæ godināni ïnānipa.

Wængongui bitō ïmite waadete pōnō cæcæcäimpa, ante botō mäninque ante yewæmōmopa.

2 Tímoteo ingante Pabodo cadota ante ayænta nänö yewæmongainta

Tímoteo ingante Pabodo yewæmongampa

¹ Botö Pabodobo inömo imopa. Wængongui nänö änö bai Itota Codito nänö në da godongaïmo imopa. Itota Codito nempo quëwënönäni inönänite Wængongui, Minitö wantæpiyæ mini quëwenguinö ante pönömo ænguimini iminipa, angacäimpa. Mänömai beyæ tömengä botö imo, Mäninö ante apænebi ëñencädänimpa, angä ëñëninque botö tömengä nänö në da godongaïmo imopa. ² Tímoteo ëñëmi. Bitö botö wëmi bai inömi inte botö në waadebi inömi imipa. Bitö acæbiimpa, ante bitö imite yewæmömopa. Mönö Mæmpo Wængongui tönö Awënë Itota mönö Codito tönö bitö imite waadete pönö waa cæda ate bitö gänë entawencæbiimpa, ämopa.

Itota Codito waa pönö nänö ingainö ante

³ Wëenënedë botö wæmæidi nani cægai bai botö adobai nämä apænte pönente adinque wentamö mongænämai entawëmo inte Wængongui beyæ në cæbo imopa. Botö itæde incæ woyowotæ incæ bitö beyæ ante mäningä Wængongui ingante botö apæneyedë adocä ingante cöwë waa ate pönente apænebopa. ⁴ Botö bitö æbänö wëñapæ tamömitapa, ante pönëninque, Botö watapæ tocæboimpa, ante bitö imite ainente imopa. ⁵ Bitö Wængongui ingante nö wede pönëmi imipa, ante adimo inte botö adodö ante wæætë pönëmopa. Edæ bitö ñæñæ Doida bitö wäänä Eönita tönö tömëna täno Wængongui ingante nö wede pönente nana ingai bai bitö inömo ñöwo adobai imipa, ante do ëñëmopa.

⁶ Mänömai beyæ bitö imite iïmai ämopa. Wængongui nänö cædönö ante bitö cæcæbiimpa, ante botö bitonga gampo cæyömo Wængongui pönö cæcä æninque ëwocabi imipa. Ininque mäniinö bitö ëwocadö beyænque bitö godömenque godömenque cæcæbiimpa. ⁷ Wængongui tömengä Tæiyæ Waëmö Önöwoca ingante mönö imonte pönongä æmö ininque mönö wii tömengä beyæ guinente ëwocamompa. Wæætë mäniwoca beyæ tæi ëwocamö imompa. Ayæ adowoca ingante ëwocadinque waodäni inänite waadete pönëmö imompa. Adowoca beyæ mönö, Nöinö cæcæimpa, ante pönëninque nämä wææ ante cæmö imompa.

⁸ Mönö Awënë Itota Codito nänö angainö bitö ëñëninö ante bitö guingo imönämai inte apænecæbiimpa. Botö adobai, Tömengä nänö angainö botö ëñëninö ante botö apænebo beyæ botö imote tee mönedäni wæyömote bitö mäniinö adinque guingo imönämai inte apænecæbiimpa. Wæætë botö tönö Itota ingantedö ante möna watapæ apænedö ante apænedinque bitö Wængongui nänö tæi piñæmämo ante ëwocadinque botö tönö adobai guëa caate wæcæbiimpa. ⁹ Wængongui, Quëwencæminimpa, ante mönö imonte æninque, Minitö tæiyæ waëmö entawente quëwencæminimpa, ante mönö imonte aa pegacäimpa. Mänömai cædinque tömengä wii mönö waa cædinö beyænque wæætë tömengä nänö ainënö ante cægacäimpa. Ayæ wëenënedë inguipoga badönämai inëde tömengä, Itota Codito beyænque, ante pönëninque mönö imonte waadete pönö cægacäimpa. Mäninö nänö waadete pönö cægainö beyænque tömengä mönö imonte æninque aa pegacäimpa. ¹⁰ Incæte ñöwoyedë mönö imonte, Quëwenguimini, ante në Ængaingä Itota Codito pongä ininque tömengä waadete nänö pönö cægainö ante edonque odömongantapa. Ayæ Itota ingantedö ante mönö watapæ apænedö beyæ tömengä, Minitö mempoga wænämai incæminimpa, ante cædinque wantæpiyæ wænämai mönö quëwenguimämo ante edonque odömongacäimpa.

¹¹ Wængongui botö imote apænedinque, Itota ingantedö ante watapæ botö apænedö ante bitö apænebi ëñencädänimpa, angantapa. Angä ëñëninque botö adobai tömengä nänö në da godömo imo inte ayæ në odömonte apænebo imopa. ¹² Mänii beyæ botö mänömai wæwente quëwëmopa. Incæte, Æcänö ingante në wede pönëmö imopa,

ante do ẽñẽmo inte botö guingo imönãmaï ìmopa. Edæ botö quïnö tõmengä ingante godönimo incæ tõmengä mäninö æninque nanguï tæi ewocacä ìnongä inte tõmengä nãnö apænte anguïönæ ganca wææ cæcæcäïmpa. Mäninö ante botö ædæmö ẽñẽmopa.

¹³ Botö bitö ìmite odõmonte apænebo bitö ẽñẽninö ante bitö ñimpo cædãmaï ee nææncæbiïmpa. Wæætë, Mäninö nõ ante mönö adodö adodö ante odõmonte apænedö ìmpa, ante bitö adobaï adodö ante odõmonte apæncæbiïmpa. Mönö Itota Codito nempo quëwëmi inte wede pönëninque waadete pönente odõmonte apæncæbiïmpa.

¹⁴ Wængonguï, Wææ aacæbiïmpa, ante bitö ìmite pönongä ænimï inte bitö tõmengä waa pöni nãnö pönongainö ante wææ aacæbiïmpa. Edæ mönö Wængonguï Önöwoca tönö ewocate quëwëmoppa. Ìnque bitö tõmengä tönö cædinque wææ aacæbiïmpa.

¹⁵ Atiabæ quëwënäni ìñömö tõmãnäni botö ìmote ẽmö cæte godänitapa, ante bitö do ẽñẽmipa. Edæ Piguedo tönö Edömogænæ incæ tõmënäni tönö botö ìmote ẽmö cæte godatapa. ¹⁶ Önetipodo guiquënë botö wæwëmo adinque tõmengä wæætë wæætë pönö cæcä beyænque botö wampo pönentabopa. Ayæ adobaï botö ìmote yæguincamë inte ñä cæyænte tee mönedäni wæyömote tõmengä guingo imönãmaï ingacäïmpa. Ìnque tõmengä tönö godongãmæ quëwënäni ìnänite mönö Awënë Itota Codito waadete pönö waa cæcæcäïmpa, ämopa. ¹⁷ Edæ Odömä nãni quëwëñömö ìñömö pöninque Önetipodo botö ìmo ante nanguï diqui diqui mininque ate ate ìinque mingacäïmpa. ¹⁸ Botö Epeto nãni quëwëñömö mäniñömö quëwëñömote tõmengä æbãnö botö beyæ pönö nanguï cæcantapa, ante bitö do ædæmö ẽñẽmipa. Mänömaï beyæ botö ìinque baquïönæ ìñonte Wængonguï tõmengä ingante pönö waadete waa cæcæcäïmpa, ämopa.

2

Itota Codito beyæ waa tontado bai cæcæcäïmpa

¹ Ayæ bitö botö wëmi bai ìnömi inte ẽñẽmi. Itota Codito nempo quëwëñõmite tõmengä waadete pönö cæcä beyænque bitö tæi ewocabi incæbiïmpa, ämopa. ² Waodäni tæiyænäni ẽñẽñönäni botö æbãnö ante apænebo bitö ẽñẽninö ante bitö wæætë wadäni nẽ pönënäni inte cõwë ædæmö cædäni ìñönänite adodö ante odõmonte apænebi ẽñencædänimpa. Ẽñëninque tõmënäni nẽ nõ cædönäni inte adobaï wadäni ìnänite odõmonte apænequïnäni ìnänipa, ante tõmënäni ìnänite ämi gocædänimpa.

³ Bitö Itota Codito beyæ waa tontado bai ìnömi inte bitö wæwëmi incæ ee on-gonte godõmenque cæcæbiïmpa, ämopa. ⁴ Waocä tontado badinque nãnö cæyedë tõmengä, Botö awënë botö ìmote waa acæcäïmpa, ante tõmengä nãnö änonque ante ẽñente cæcæboïmpa, äninque wadäni tontado ìnãmaï ìnãni nãni cæbaï cædãmaï ìnongä ingampa. ⁵ Gãnä cæcæte ante nẽ owempocä ìñömö, Cõwë nãni cægai bai owempoedäni, ante nãni wææ angainö ante ẽñente cæcä ìninque tõmenganque godõmenque waa owempodique gãnä cædinque poganta æmaingampa. ⁶ Amiña bayedë pancamonga pancamonga æñönäni gönea ante nẽ nanguï cæcä ìñömö tõmengä tãno ænguënegä ingampa. ⁷ Mäninö ìmæca quëwënäni nãni cæ bai ante mënea go adodeque botö äninö ante pönëñõmi mönö Awënë edæ bitö ìmite odõmongä ẽñëninque bitö edonque pöni ẽñencæbiïmpa.

⁸ Itota Codito awënë Dabii wodi nãnö pæingä ìnongä inte do wæninque nẽ ñäni ömæmongaingä ingante ante pönencæbiïmpa. Mäninö ante watapæ botö apænedö ìmpa. ⁹ Mänine beyænque botö caate wæwëmo ìmopa. Edæ nẽ wënæ wënæ cæcä ingante tee mönecönë ñä cæyænäni bai botö ìmote adobaï mäniñe botö apænedö beyænque ñä cædäni wæbopa. Incæte Wængonguï nãnö angainö ædö cæte ñä cæyænte inguïi. ¹⁰ Mänömaï beyæ Wængonguï nãnö apænte æninäni beyænque ante cæyömote wadäni ancaa wënæ wënæ cædäni wæbo incæte botö ñimpo cædãmaï inte godõmenque cæbopa. Edæ Wængonguï nãnö ñäö apäiyömö nãni cõwë quëwenguinque mäniñäni Itota Codito ængä beyænque tõmengä nempo quëwencædänimpa, ante cædinque botö wæwëmo incæte godõmenque cæbopa.

¹¹ Ìmaï ante nãni änö näwangä ante ìmpa.

Mönö Itota Codito tönö godongämæ wængaimö inte adobai tömengä tönö cöwë wänämaï quëwencæmöimpa.

¹² Mönö tömengä tönö ñimpo cädämaï inte ee cæte wæwëmö inte adobai tömengä tönö në awënëidi badinque godongämæ aacæmöimpa.

Mönö, Tömengä ingä dicæ abogaa, ämö ïinque tömengä adobai näëmæ mönö ïmonte, Dicæ abogaa, ämaingampa.

¹³ Mönö wede pönëno ante ædæmö cädämaï ïmö incæte tömengä guiquënë mönö ïmonte cöwë pönëninque cöwë ædæmö cædongä ingampa.

Ïñæmpa tömengä ïñömö nämä nänö ingainö ante ñimpo cädämaï ïnongä inte tömengä wadö ante pönënämaï ingampa.

Wængongui bitö ïmi, Waa cæbi abopa, angingä, ante

¹⁴ Waodäni ïnänite apænedinque bitö, Mäninö ante pönëdäni, ante wæætë wæætë ancæbiimpa. Mönö Wængongui ayongä ïmaï ante wææ ante nanguï apænebi ëñencädänimpa. Minitö, Ædedö ï, ante wadodö wadö ante pïinte tededämaï incæmïn-impä. Ïñæmpa mänömaï bai äninque mönö äno ïñömö önonque ante impä. Ayæ mänömaï ante tedemö ëñëninque në ëñënäni ïñömö æmæ pönente babainänipa, ante bitö wææ ancæbiimpa, ämopa. ¹⁵ Bitö Wængongui ayongä, Botö në waa cæbo incæboimpa, ante nanguï cæcæbiimpa. Në cæbo inte guingo imönämaï incæboimpa, ante cædinque Wængongui nö nänö angainö ante tömëmi në ædæmö ëñente entawëninque mäninonque ante töinö ante wadäni ïnänite waa odömonte apænecæbiimpa. ¹⁶ Tæiyæ waëmö ewocädämaï inte wadäni önonquedö ante tedeyönäni bitö tömënäni ïnänite ëñënämaï inte nänënë wadæ goe. Edæ mäninäni Wængongui ingante ëmö cædinque cöwë godömenque wiwa näni cæquinque wadæ godänipa. ¹⁷ Baö ñömæïñömö aca podinque nanguï godömenque baayö bai mäninäni näni odömonte apænewënö adobai wodo wodo go ïinque wadäni tæiyænäni ëñëninque oda cæcädänimpa.

Mäninäni näni tedewencabo ïñönäni ïmëneo tönö Pideto adodaque ïnapa. ¹⁸ Tömëna Wængongui näwangä nänö angainö ante ñimpo cæte wadæ godina ïnapa. Ayæ, Mönö ñäni ömæmönö ïñömö ïinque bagatimpa, ante tedewëna ëñëninque wadäni pancadäniya näni wede pönëno incæ wido cæte bai quëwënanipa. ¹⁹ Incæte Wængongui näwangä nänö angainö mönö pönëno ïñömö tæi gönonte bai cöwë ongompa. Mäninö ante mënea ante ïmaï yewæmonte bai ongompa. Edæ Wængongui Awënë tömengä quinäni ædänidö ïnänii, ante do ëñengampa. Ayæ tömengä ëmowo ante, Botö Awënë ïnongä ingampa, ante në änäni ïñömö tömënäni tömänäni, Mönö wiwa cædimämo ante wæte wædinque wadæ goquënenäni ïnänipa.

²⁰ Në ëacä oncönë ñænæncönë tömengä nänö waa waa cö cæincade ïñömö oodo inte padata inte näni badöincade mä ongompa. Adobai wacade awæmpaincade daicade incade mä ongompa. Pancacadea ïñömö waëmoncooque da wëincade incadepa. Wacade guiquënë ömæpocooque da wëincade incadepa. ²¹ Waocä wënæ wënæ nänö entawënö ante ñimpo cædinque nämä ñä mënongate bai quëwengä ïinque tömengä ïñömö waëmoncooque da wëincade bai ïnongä inte Wængongui beyæ waa cæcä ïmaingampa. Tömengä tæiyæ waëmö ewocate quëwengä babaingampa. ïinque tömengä Awënë nänö äno ante do cæcä ïmaingampa. Ayæ, Quinö waa cæquinö ï, ante tömengä do cæcä ïmaingampa.

²² Edëninäni wiwa näni cæinënö ante bitö ñimpo cæte wodii gote bai quëwencæbi-impä. Wæætë waodäni mïmö ñä mënongate entawënäni inte Wængongui ingante në apænedäni tönö bitö nö cæquënenö ante cæte quëwencæbiimpa. Mönö wede pönëno ante godömenque pönente quëwencæbiimpa. Waodäni ïnänite godömenque waadete pönencæte ante cæcæbiimpa. Ayæ mönö piyænë cæte quëwenguimämo ante pönëninque cæcæbiimpa. ²³ Önonquedö ante apænedinque në, Ædedö ï, ante wacä tönö guädö guëa tedewengä mänömaï tedecä beyænque wadodö wadö pïinte tedewënanipa, ante do ëñëmipa. ïinque tömënäni në pönënämaï ïnänii inte önonquedö ante apæneyönäni bitö tömënäni tönö godongämæ apænedämaï incæbiimpa.

²⁴ Mönö Awënë ingante në cæcä iñömö tömengä wadäni tönö wadodö wadö piinte tededämaï incæcäimpa. Wæætë tömänäni inänite ædæmö cæcæcäimpa. Ayæ wadäni tömengä ingante wënæ wënæ cædäni adinque tömengä wæætë piinämaï inte piyænë cæcæcäimpa. Ayæ tömengä në waa odömönte apænecä incæcäimpa. ²⁵ Tömengä apænecä ëñëninque në ëñënäni iñömö Baa ante wadö änäni inänite tömengä ædæmö cæte, ïimaï impa, ante odömönte apænecä ëñencædänimpa. Edæ Wængonguï pönö cæcä ate tömënäni nämä incæ, Wënæ wënæ cæmö awædö, ante wædinque tömengä näwangä nänö angainö ante ëñencædänimpa, ante pönente cæcæcäimpa. ²⁶ Ayæ tömënäni ëñënämaï encadäni incæ në ëñenguinäni wæætë bacædänimpa, ante pönente cæcæcäimpa. Wënæ iñömö tömënäni inänite bæi ongöninque tömengä, Botö änö ëñente quëwencæminimpa, ante godö cæcä ate tömengä nänö në bæi ongönäni wæætë aamö cæte wodii gocædänimpa, ante adobaï pönente cæcæcäimpa.

3

Ïinque bayedë waodäni æbänö quëwenguinänii, ante

¹ Tímoteo ëñëmi. Ïinque ëönæ bacæ cæyedë wënæ wënæ ba wæquinö angüënë. ² Mäniñedë edæ waodäni nämanque waadete pönenguinäni inänipa. Tömënäni nani godonte æninta waadete pönente nani wædö ante quëwenguinäni inänipa. Tömënäni nämanque, Botö gomonga waa cæbo imopa, ante pönenguinäni inänipa. Wængonguï ingante godö wënæ wënæ ante babæ anguinäni inänipa. Wadäni inänite badete toquinäni inänipa. Wëñænäni incæ wæmpoda inate ëñënämaï cæquinäni inänipa. Wadäni pönö waa cædäni incæte tömënäni në waa cædäni inänite wæætë waa cædämaï inguinäni inänipa. Ayæ tæiyæ wæmö entawënämaï inguinänimpa. ³ Adobaï waadete pönënämaï quëwenguinäni inänipa. Mäninäni inänite wënæ wënæ cædäni adinque tömënäni wæætë piinque ñimpo cædämaï inte wënæ wënæ cæquinäni inänipa. Wadäni inänitedö ante babæ ante anewenguinäni inänipa. Tömënäni nani cæinewënö ante nämä wææ änämaï inte do cæquinäni inänipa. Ayæ wadäni inänite ædæmö cædämaï inte piinte cæquinäni inänipa. Wadäni, Quinö waa impa, ante piinguinäni inänipa. ⁴ Tömënäni nani guidänäni incæ, Wënæ wënæ bate wæcædänimpa, ante godö odömönguänäni inänipa. Tömënäni pönënämaï inte do wënæ wënæ cæquinäni inänipa. Tömënäni nämä incæ, Botö gomonga waa ëñëmopa, ante pönëwenguinäni inänipa. Wængonguï ingante waadete pönënämaï inguinäni inte wæætë tote quëwengæimpa, ante nämanque waadete pönenguinäni inänipa. ⁵ Tömënäni Wængonguï ayongä waa cæte quëwënäni baï adobaï cædäni incæte Wængonguï nänö tæï piñæmämö piwëninque nämanque cæte quëwënänipa töö.

Ïinque bitö mäninäni inänite gomö ae. ⁶ Mänömaï baï cædäni iñömö waa apænedinque waodäni oncönë wäänë guidänipa. Onquiyænäni wii tæimö entawënäni inte tömënäni nani wënæ wënæ cædi teëmëmö mongænte baï inäni iñönänite oncönë në guidäni iñömö, Onquiyænäni mönitö apænedö ante ëñente cæcædänimpa, ante cædäni ate onquiyænäni wæætë oda cæte godänipa. Mäninäni onquiyænäni iñömö, Quiëmë nani wënæ wënæ cæinëmämö, ante wadö gote wadö gote oda cædänipa. ⁷ Tömënäni cöwë ëñencæte ante cædäni incæte wapiti wapiti cædäni ïinque Wængonguï näwangä nänö angainö ante cöwë ëñente badämaï inänipa. ⁸ Wëenëñedë Möitee wodi Equitobæ tæiyæ awënë ingante apæneyongä Aänee tönö Aämödee në idöna inte Möitee ingante piinque, Önonque angampa, äna ingadäimpa. Ïinque bayedë në wënæ wënæ cædäni guiquënë ïina inöna nana cægäi baï adobaï cædinque Wængonguï näwangä nänö angainö ante Baa ante wadö änäni inänipa. Tömënäni ocaidë pönente wentamö encadäni inte oda cæte godänipa. Ïinque Wængonguï ingante mönö pönëmämö incæ dicæ pönënäniyaa. Wængonguï tömënäni inänite Baa ancæcäimpa. ⁹ Ïñæmpa ædö cæte godömenque cæquinänii. Mänina në idöna nana önonque cægäinö ante edonque agadäni baï tömënäni nani önonque cædinö ante waodäni tömänäni adobaï edonque pöni acædänimpa.

Tímoteo ingante Pabodo iinque wææ angampa

¹⁰ Bitö iñömö, Æbänö botö odömönte apæneboo, ante, Æbänö waa quëwëmoo, ante, Æbänö pönente ante, İımaı cæcæboimpa, ante cæboo, ante bitö tömänö ante do ëñëmipa. Ayæ Wængongui ingante botö pönëmämo ante waodäni inänite botö ee cæpämö ante botö waadete pönëmämo ante botö wæntædämaı inte cæpämö ante bitö adobaı do ëñëmipa. ¹¹ Ayæ botö imote togænte pänäni botö wæpämö ante ayæ botö wæwëmämö ante bitö do ëñëmipa. Wadäni quiëmë wënæ wënæ cæcæte ante botö imote togænte pänäni wæbo incæ botö wæntæye inämaı intabopa. Antioquiya iñömö İcönio iñömö adobaı Ditada näni quëwëñömö mänñömö wënæ wënæ cædäni wæbo incæte mönö Awënë ö ængä beyænque ayæ quëwëmö imopa. ¹² Nö ante impa. Æcänö, Botö Itota Codito nempo quëwëmö inte Wængongui ayongä waa cæte quëwencæboimpa, ante äna tömengä ingante togæwëninque wënæ wënæ cædäni wæquingä ingampa. ¹³ Waodäni wënæ wënæ cædäni tönö, Oda cæcædänimpa, ante nê cædäni iñömö tömënanı nê wënæ wënæ cædinäni inte godömenque wënæ wënæ cæquinäni inänipa. Edæ mäninäni inänite wapiticæ mäodäni oda cæte cædinäni inte tömënanı wæætë wadäni inänite adodö, Æpiticæmë oda cæquinänidö, ante cæcædänimpa.

¹⁴ Bitö guiquënë æbänö ëñëniimi inte, Nö impa, ante pönëninque cöwë ñimpo cædämaı incæbiimpa. Edæ bitö imi ædänidö odömönte apænedäni, ante do ëñëmipa. ¹⁵ Wængongui angä ëñente tæiyæ waëmö näni yewæmongainö ante bitö wëñæmiyedë mä ëñëninque ñöwo ganca do ëñëmitawo. Mäninö ante näni yewæmongainta ate ëñëninque bitö Itota Codito ingante pönëñömi tömengä ængä beyænque quëwencæbiimpa.

¹⁶ Wængongui pönö apænecä ëñëninque waodäni tömënanı näni ëñënonque ante Wængongui beyæ yewæmongadänimpa. Tömënanı Wængongui nänö odömönte apænegainö ante näni yewæmongainta adinque mönö, Æbänö waa impa, ante ëñëninque mönö odömönte apænecæimpa. Wængongui angä ëñente näni yewæmongainta adinque, Quinö mönö wënæ wënæ cædinö İı, ante mönö do ëñëninque nê wënæ wënæ cæcä ingante mönö wææ angæimpa. Ayæ Wængongui angä ëñente näni yewæmongainta adinque nê oda cæte wæcä ingante, Mönö nöinö cæquënëno İımaı impa, ante mönö odömönte apænecæimpa. Nö cæte quëwencæminimpa, ante odömönte apænete ongö ate mönö ëñëno ante mönö waodäni inänite odömönte apænecæimpa. ¹⁷ Edæ Wængongui beyæ nê odömönte apænecä iñömö eyepæ ëñengä inte tömengä nänö waa cæquimämö tömämämö ante cæcæcäimpa, ante odömönte apænecæte ante yewæmongadänimpa.

4

¹ Waodäni miınäni quëwënanı incæ do wængainäni incæ tömänäni inänite mönö Itota Codito nê apænte anguingä inte tömengä Awënë Odeye badinque ponte a ongonğä acæimpa. Tömengä ayongä ayæ mönö Mæmpo Wængongui ayongä botö bitö imite, İımaı cæe, ämopa. ² Wængongui nänö angainö ante apænebi ëñencædänimpa. Waodäni Ao ante, Æñëinëmöni ante änäni incæ Baa ante ëñënamäı inäni incæ bitö cöwë apænebi ëñënanı. Wængongui nänö angainö ante oda cæte wædäni adinque bitö, Mönö nöinö cæquënëno ante cæcæminimpa, ancæbiimpa. Wënæ wënæ cædäni inänite, Ædö cæte mänömaı cæminı, ante nanguı ancæbiimpa. Ayæ adobaı, Wampo pönencædänimpa, ante ædæmö apænebi ëñencædänimpa. Mäninö tömänö cædinque nanguı waadete ee cædinque adodö adodö ante odömönte apænebi ëñencædänimpa.

³ İncayæ ate nö odömönte mönö apænedö ante waodäni Baa anguinäni inänipa. Mäninö ante ëñënamäı incæmönimpa, ante änäni inte tömënanı wæætë, Mönö ëñëinënonque ante odömönte apæneedäni, ante nê odömönte apænedönäni nanguı inäni inänite diqui diqui minte acædänimpa. Mäninuedö ante ëñencæmönimpa, ante anguinäni inänipa. ⁴ Mäninäni näwangä angainö ante ëñënamäı inte wadæ godinque wæætë önonquedö ante dodäni näni angainö ante ëñente cæquinäni inänipa. ⁵ Bitö guiquënë tömëmi quëwenganca æbämë baquıı incæ godömenque cæcæbiimpa. Caate wæbi incæte bitö ñimpo cædämaı inte godömenque cæcæbiimpa. Wængongui waa

põni nänö apænedö ante apænebi eñencædänimpa. Bitö cæquënönö tömää iinque cæcæbiimpa.

⁶ Wængongui qui, ante nani godönö bai botö adobai iñömote wantæ iñonte wænönäni wæncæboimpa. Edæ botö wænguiönæ oo põni impa. ⁷ Botö tæi ewocabo inte Awënë Itota beyæ botö cæquënönö waa põni iinque cætabopa. Gänä cæcæte ante nê pogodo godäni næ gongænämaï nani iinque gonganca godäni bai botö adobai tömömö quëwenganca wæntæye inämaï inte iinque cætabopa. Mönö wede pönönö ante botö ñimpo cædämaï inte cöwë pönentabopa. ⁸ Mönö Awënë nê nö apænte anguingä iñömö tömengä nänö apænte anguiönæ iñonte tömengä, Bitö nö pönente waa cædimi inte bitö waa cædinta ante poganta æncæbiimpa, ante botö imote pönongä æncæboimpa. Wii botö adoboque iñömote pönongä æncæboimpa. Wadäni adobai tömengä nänö pongä aquionæ ante nanguï aïnente nê wänö cönäni inäni adinque tömengä, Minitö nö cæte quëwëniimiinte inte minitö waa cædinta ante poganta æncæminimpa, ante tömënanï tömänäni inänite pönongä æncædänimpa.

Tímoteo quïnö cæcæcäimpa, ante

⁹ Bitö eyepæ inte botö weca quingæ pöe, ämopa. ¹⁰ Deëma iñömö inguipogaque ante botö imote emö cæte Tetadönica nani quëwëñömö gocantapa. Ayæ Quedetente iñömö Gadatiabæ iñömö gocantapa. Adobai Tito Dadämatiabæ iñömö gocantapa. ¹¹ Odoca adocanque botö weca ongongampa. Mäadoco ingante adinque tömengä ingante botö weca ænte mämömi pongäi. Edæ botö cæquënönö ante cæyömote tömengä botö tönö guëa nanguï cæcä ingampa. ¹² Ayæ Tiquico ingante botö Epeto iñömö da godömo gocantapa. ¹³ Botö yacoo ocoi ä weocoo Todoa iñömö Cadopo oncönë botö emö cæte pönincoo bitö ponte ate ænte pöe. Adobai botö dibodocoo ænte mämömi æmoe. Botö tæinetacoo yewæmöintacoo, ante godömenque wæbopa. Mäninta cöwë mämömi æncæboimpa, ämopa.

¹⁴ Adecantodo tæineta nê badongä inongä iñömö botö imote nanguï wënæ wënæ cæcä wætabopa. Mänömaï cæcä adinque Wængongui edæ tömengä nänö wënæ wënæ cædinganca mäninganca tömengä ingante wæætë pancæcäimpa, ämopa. ¹⁵ Mäningä bitö imite adobai wënæ wënæ cædämaï incæcäimpa, ante bitö adobai wææ cæcæbiimpa. Edæ mönö odömonte apænedö ante tömengä cöwë Baa ante wadö ante quëwënonngä ingampa.

¹⁶ Botö imote nê apænte ämongä weca ænte mäodäni gote ongöningue botö nämä incæ wææ ancæte ante mä apæneyömo æcänö botö tönö godongämæ äna edæ dæ änäni wætabopa. Tömänäni edæ botö imote emö cæte wadæ godänitapa. Mänömaï nani cædinö beyæ Wængongui tömënanï inänite piinämaï incæcäimpa, ämopa. ¹⁷ Incæte, Wadäni wii oodeoidi inäni tömämæ quëwënanï Wængongui waa põni nänö apænedö ante eñencædänimpa, ante cædinque mönö Awënë iñömö botö gäänë ongöningue botö tönö godongämæ cæcä beyænque tæi ewocabo inte apænetabopa. Iimæca awënë nempo wæwente quëwëñömote mönö Awënë wæætë gä pe æmpote ö ængä beyænque quëwëmopa. ¹⁸ Mänömaï bai cædinque botö imote quëmë wënæ wënæ cædäni wæbo incæ mönö Awënë Odeye botö imote ænguingä beyænque quëwencæboimpa. Adobai tömengä öönædë nänö aayömö botö imote adimongä ænte mäicä æite goquimo imopa. Wængongui ñäö apäite bai emönongä ingante mönö cöwë waa acæimpa, ämopa. Mänömaï babaiimpa, ante Amëë, ante ämopa.

Tímoteo ingante Pabodo, Waa quëwencæbiimpa, angampa

¹⁹ Pidica tönö Aquidæ nana gæncaya waa quëwencædäimpa, ämopa. Bitö tömëna inate adodö apænebi eñënae. Adobai Önetipodo tönö godongämæ quëwënanï waa quëwencædänimpa, ämopa. Bitö tömënanï inänite adodö apænebi eñënanie. ²⁰ Edaato Coodinto iñömö ayæ a ongongantapa. Ayæ Todopimo nê wënæ wënæ iñongä botö tömengä ingante Miidetö iñömö emö cæte gotabopa. ²¹ Bitö eyepæ inte cöönædepo badämaï iñedë botö weca quingæ pöe, ämopa. Eobodo iñömö tömengä, Bitö waa

quëwencæbiimpa, angä ëñëninque botö bitö ïmite adodö ämo ëñëe. Podænta tönö Diiño ayæ Codaodia tönö möni pönencabo tömämöni bitö ïmite, Waa quëwencæbiimpa, ämönipa.

²² Mönö Awënë Itota Codito bitö tönö ongonde incæcäimpa, ämopa. Ayæ Wængongui bitö ïmite waadete pönö cæcæcäimpa, ante mäninque ante yewämömopa.

Tito ingante Pabodo cadota ante nänö yewæmongainta

Tito ingante Pabodo yewæmongampa

¹ Botö Pabodobo inömo imopa. Wængongui ingante nē cæbo iñömote Itota Codito, Bitö Wængongui nänö nē apænte æninäni inänite apænebi eñencædänimpa, ante da godongä ate botö tömengä nänö nē da godongaïmo imopa. Tömengä, Tömënäni botö imote nänö wede pönönö ante godömenque wede pönencædänimpa, ante cæcæbi-impä, ante da godongä gotabopa. Ayæ, Wængongui näwangä nänö angainö ante eñente entawëninque tömënäni tömengä ayongä waa cæte quëwencædänimpa, ante cædinque Itota Codito botö imote da godongä godimo imopa. ² Edæ, Ìncayæ ate mönö wænämaï quëwenguinö gocæmöimpa, ante eñëninque pönencædänimpa, ante Wængongui nē babæ änämaï inongä inte wëenëñedë inguipoga badönämaï iñedë ïmaï angacäimpa. Mïni wænämaï quëwenguimämo ante pönömo æninque mïnitö wæætë wantæpiyæ cöwë quëwencæmïnimpa, ante cægacäimpa. ³ Mänömaï cædinque tömengä, Ìñedë cæcæboimpa, ante nänö angaiñedë iinque bayedë tömengä nänö angainö ante edonque pönö odömonte apænegacäimpa. Edæ, Quëwencæmïnimpa, ante mönö imonte nē Ængaingä inte Wængongui mäninö nänö angainö ante, Bitö odömonte apænebi eñencædänimpa, ante botö imote angä eñëñömote da godongä godimo imopa.

⁴ Tito eñëmi. Bitö acæbiimpa, ante yewæmömopa. Edæ godongämæ mönö wede pönönö ante apænebo nē eñëmi inte bitö Itota Codito quïmi badinque botö näwä wëmi bai inömi imipa. Ìninque botö, Mæmpo Wængongui tönö Itota Codito mönö imonte nē Ængaingä tönö waadete pönö cæda ate bitö gänë entawencæbiimpa, ämopa.

Cædeta nänö änöwænë iñömö Tito nänö cædö ante

⁵ Cædeta nänö änöwænë iñömö botö cæquënönö ante wï eyepæ cæbo adinque botö, Bitö godömenque quëwëninque tömänö iinque cæcæbiimpa, ante botö bitö imite emö cæte gotabopa. Adobaï wayömö wayömö nänö quëwëñömö godinque bitö botö äninö bai cædinque, Mïni pönencabo iñöminite iinäni nē aadäni Picænäni bacædänimpa, ante cæcæbiimpa, ante cædinque botö bitö imite mänñömö emö cæte gotabopa. ⁶ Wadäni, Nē aacä Picængä wënæ wënæ cæcä ingampa, ante änämaï incædänimpa, ante wææ cædinque nē aacä Picængä wæætë waa quëwenguëngä ingampa. Edæ tömengä nänöogänä adodanque nē manguiwengä incæcäimpa. Tömengä wëñänäni Itota Codito ingante nē pönënäni incædänimpa. Ayæ tömënäni inänite adinque, Babæidi bai quëwënäni inänipa, ante ayæ, Eñënämaï cæte quëwënänipa, ante wadäni änämaï incædänimpa, ante nē aacä Picængä iñömö wææ aacæcäimpa.

⁷ Mönö pönencabo iñömote nē aacä ingante Wængongui, Botö cædö ante cæcæbi-impä, ante pönö angä eñëninque tömengä Wængongui beyæ ante nē cæcä ingampa. Ìninque waodäni, Nē aacä wënæ wënæ cæcä ingampa, ante änämaï incædänimpa, ante wææ cædinque nē aacä wæætë cöwë waa quëwenguëngä ingampa. Wadäni tömengä ingante apænedäni incæ tömengä wæætë, Botö ædö cæte eñenguimoo, ante änämaï incæcäimpa. Tömengä wï quingæ piinte bacæcäimpa. Tömengä ti nämæ nē nanguï bewengä inämaï incæcäimpa. Tömengä piyænë cæcä incæcäimpa. Babæ cæbo incæte godonte nänö æinta cöwë godömenque æncæboimpa, ante wadäni nänö pönëwënonque ante nē aacä iñömö mäninö ante pönënämaï incæcäimpa. ⁸ Wadäni inänite, Botö oncönë pö cæedäni, ante cöwë nē watapæ angä incæcäimpa. Ayæ, Quinö waa impä, ante mäninonque cæinengä incæcäimpa. Nöinö cæcäimpa, ante pönëninque nämä wææ ante cæcä incæcäimpa. Wængongui nänö cædö ante cöwë cædongä inte nē aacä wæætë nämä wææ äninque nämä nänö cæinëwënö ante cædämaï incæcäimpa.

⁹ Ayæ adobaï Wængongui nö pönö nänö angainö ante möni odömonte apænegainö bai adobaï entawëninque tömengä ñimpo cædämaï quëwenguëngä ingampa. Edæ

mönö pönencabo iñömönte tömengä ædæmō apænedinque nö pönī mönö odömönte apænedō ante odömönte apæneceäimpa. Tömengä odömönte apæneceä eñëninque pancadäniya, Baa ante wadō äñäni incæ tömengä wæætē tömënäni inänite, Mäninö ante mīni odömönte apænedinō wapiticæ i apa quëwëminii, ante nē aacä inongä inte wææ ancæcäimpa, ämopa.

¹⁰ Edæ nē odömönte apænedäni inänite, Mönitō eñënämaï cæinëmönipa, ante nē äñäni tæiyænäni inänipa. Tömënäni iñömö önonquedō ante tedewënönäni inte, Wadäni oda cæcädänimpa, ante nē cædönäni inänipa töö. Pancadäniya, Mönö eö togænte quëwengæimpa, ante nē pönënäni nāni cæcabo iñömö godömenque nanguï pönī mänömaï babæ cæte quëwënänipa. ¹¹ Tömënäni, Babæ cæmöni incæte mönitō odömönte apænedō beyænque godonte nāni æinta cöwë æncæmönimpa, ante pönente cædänipa. Mönö odömönte apænedämaï inguënënö ante odömönte apænedäni eñëninque nē eñëñäni pancadäniya tömënäni nāni godongämæ quëwencabo tönö oda cæte wædänipa cæbii. Edæ mäninö tömënäni babæ cæte nāni odömönte apænewënö ante odömönte apænedämaï incædänimpa, ante bitō, Apocænë inguënë quëwëedäni, ante wææ ante cæquënëmi imipa.

¹² Edæ Cædetabæ iñömö nāni quëwencabo incæ adocanque tömënäni wængonguüidi beyæ nē apæneceä iñömö iïmaï ante apænegacäimpa. “Cædetabæ quëwënäni iñömö cöwë babæ ante quëwënäni inte babæidi bai wiwa cædänipa. Tömënäni wæntæye inäni incæ cæowæodäni inte cænänipa töö.” ¹³ Mäninö ante tömengä nänö angainö näwangä ante impa. Inique Itota ingante nē pönënäni incæ oda cæte wædäni adinque bitō, Nö pönënäni incædänimpa, ante tömënäni inänite nanguï ancæbiimpa. ¹⁴ Ayæ, Oodeoidi dodäni nāni önonquedō ante angainö ante pönënämaï incædänimpa, ante bitō tömënäni inänite nanguï ancæbiimpa. Ayæ wadäni Wængonguï näwangä nänö angainö ante Baa ante eñëñämaï inönäni incæ wadō ante wææ änewëñönäni bitō wæætē nē pönënäni inänite, Mäninö tömënäni nāni wææ änewënö ante mīnitō eñente cædämaï iedäni, ante nanguï ancæbiimpa, ämopa.

¹⁵ Edæ nē waëmö entawente quëwënäni inique edæ tömënäni ayönäni quincöomë i incæ tömancoo edæ waëmoncoo imaimpa. Wadäni guiquënë nē wentamö entawente quëwënäni inte Itota ingante pönënämaï inäni inique edæ tömënäni ayönäni quincöomë i incæ tömäancoo edæ wii waëmoncoo imaimpa. Iñæmpa adodäni nämä nāni apænte pönënö incæ wentamö entawente quëwënäni inte tömënäni nāni ocaidë pönënö adobaï wentamö encadäni inänipa töö. ¹⁶ Iñäni iñömö Wængonguï ingante, ate bai pönëmöni imönipa, ante äñäni incæte tömënäni cædö beyænque, Iñäni Wængonguï ingante nē Baa äñäni inänipa, ante edonque pönī bapa. Mäninäni Wængonguï ingante eñëñämaï cædönäni inte edæ mönö waa cæquënënö ante ædö cæte cæquänänii. Inique tömënäni mönö nē baacä bai inönäni inänipa.

2

Nö pönī mönö odömönte apænedö

¹ Bitō wæætē nö pönī mönö odömönte apænedō ante odömönte apæneceäimpa. ² Onguïñænäni picænäni inänite iïmaï ante odömönte apænebi eñencædänimpa. Tömënäni ti nämæ nanguï bete quidi quidi dowænte badämaï incædänimpa. Waodäni mönitō imönite waa acædänimpa, ante onguïñænäni picænäni iñömö nē eyepæ cæte quëwenguënänimpa. Nöinö cæcäimpa, ante pönëninque nämä wææ ante cæte quëwencædänimpa. Itota ingante mönö pönënö ante waodäni inänite mönö waadete pönënö ante tömënäni nöingä cædinque quëwencædänimpa. Wæntædämaï inte ee mönö cædö ante tömënäni adobaï nöingä cædinque quëwënäni incædänimpa, ante bitō odömönte apænebi eñencædänimpa, ämopa.

³ Ayæ onquiyænäni picænäni inänite adobaï iïmaï ante odömönte apænebi eñencædänimpa. Tömënäni, Wængonguï nänö angainö bai mönö tæiyæ waëmö entawengæimpa, ante quëwencædänimpa. Wadäni inänitedö ante babæ äñämaï

incædānimpa. Wadāni nanguī yowepæ wædænque tī nāmæ biinōmæ nāni āmæ ante, Beboe beboe, ante nē bedāni baī iināni iñōmō adobaī cæte quēwēnāmaī incædānimpa. Adodāni, Quinō waa impa, ante māninō ante odōmonte apænecædānimpa, ante bitō onquiyænāni picænāni inānite odōmonte apænebi ēñencædānimpa, āmopa.

⁴ Mānōmaī cæte quēwēnāni inte tōmēnāni wæætē onquiyænāni wīi picænāni inānite, iīmaī cæedāni, ante āninqe, Mīnitō nānōogæidi inānite waadete pōnēninqe mīnitō wēñænāni inānite adobaī waadete pōnente quēwēedāni, ante odōmonte apænedāni ēñencædānimpa. ⁵ Ayæ adobaī onquiyænāni wīi picænāni inānite odōmonte apænedinqe, Nōinō cæcæimpa, ante pōnēninqe mīnitō nāmā wææ ante cæte quēwencæmīnimpa. Mīnitō oncōnē mīni cæquēnēnō cōwē cædinque wadāni inānite ædæmō cæte quēwencæmīnimpa. Ayæ, Mīnitō nānōogæidi nāni ānō ante ēñente cæedāni, āmi ēñente odōmonte apænecædānimpa. Edæ onquiyænāni picænāni mānōmainō ante odōmonte apænedāni ēñēninqe onquiyænāni wīi picænāni wæætē waa cæte quēwēnāni adinqe wadāni Wængonguī nānō angainō ante ædō cæte, Wēnæ wēnæ impa, ante babæ anguināni.

⁶ Onguīñænāni wīi picænāni ināni iñōmō adobaī tōmēnāni, Nōinō cæcæimpa, ante pōnēninqe nāmā wææ ante cæte quēwencædānimpa, ante ædæmō apænebi ēñencædānimpa. ⁷ Bitō tōmēnāni beyæ ante, Botō cæbaī tōmēnāni adobaī cæcædānimpa, ante bitō quiēmē cæbi incæ cōwē waa cæe. Ayæ bitō odōmonte apænedō incæ nōingā ante odōmonte apænedinqe bitō önōneque ānāmaī incæbiimpa. ⁸ Ayæ bitō imite nē Baa ante wadō ānāni wæætē mōnō imonte ante apænedinqe, Mōnitō ædō cæte wēnæ wēnæ anguimōnii, ante wædinque edæ guingo imonte wæcædānimpa, ante cædinque bitō tōmēnāni inānite nōingā ante odōmonte apænecæbiimpa. Edæ mānōmaī nōinō odōmonte apænebi ēñēninqe nē ēñēnāni wæætē, Wēnæ wēnæ odōmonte apænedinō impa, ante ānāmaī incædānimpa.

⁹ Wadāni inānite ō ænāni ate awēnēidi beyænque cæte nē quēwēnāni bate wæyōnānite bitō tōmēnāni inānite iīmaī ante odōmonte apænebi ēñencædānimpa. Edæ tōmēnāni awēnēidi nāni ānō ante tōmānō ēñente cæcædānimpa. Adobaī tōmēnāni, Mōnitō imōnite adinqe awēnēidi tocædānimpa, ante cæcædānimpa. Ayæ tōmēnāni awēnēidi ānāni ēñēninqe wæætedō wæætē ānāmaī incædānimpa. ¹⁰ Adodāni iñōmō awēmō ænāmaī quēwēnāni inte wæætē, Mōnitō cōwē nō ēñente cæmōni imōnipa, ante adinqe mōnitō awēnēidi wæætē, Waa cæmīni imīnipa, ante pōnencædānipa, ante nē cædāni iñōmō waa cæcædānimpa. Tōmēnāni quiēmē cædāni incæ cōwē waa cædāni adinqe wadāni Wængonguī mōnō imonte nē Ængaingā ingante nāni odōmonte apænegaīnō waa impa, ante pōnencædānimpa, ante bitō nē cædāni inānite mānōmainō ante odōmonte apænecæbiimpa, āmopa.

¹¹ Edæ wadāni quīnānidō ināni incæte mōnō Mæmpo Wængonguī tōmānāni inānite waadete pōnō cædinque, Botō æmo beyænque quēwenguimīni, ante odōmongā ininqe edonque pōnī ba agadānimpa. ¹² Tōmengā nānō waadete pōnō cædōnō ante edonque pōnī adinqe mōnō iīmaī ante ēñēmō imompa. Wængonguī ingante wapiticæ pōnēninqe mōnō cædō ante mōnō Baa ante ñimpo cæte quēwengæimpa. Inguipoga ante nāni wēnæ wēnæ cæinēwēnō ante mōnō Baa ante ñimpo cæte quēwengæimpa. Nōwoyedē mōnō, Nōinō cæcæimpa, ante pōnēninqe nāmā wææ ante cæte quēwengæimpa. Wængonguī ayongā waa cæte quēwēninqe ¹³ mōnō Itota Codito nānō pōōnæ watapæ mōnō toquiōnæ ante wānō cōmō imompa. Edæ Itota Codito adocā mōnō Wængonguī mōnō nē tæī piñænongā inongā inte mōnō imonte nē Ængaingā ingacāimpa. Tōmengā iñōmō nē ñāō apāite baī emōnongā inte poncæcāimpa, ante wānō cōmōmpa. ¹⁴ Mōnō wīwa cægāinō tōmānō adinqe tōmengā iñōmō, Botō æmo beyænque quēwenguimīni, ante nāmā wepæ godōninqe wængacāimpa. Ayæ tōmengā, Botō tōmēmo beyæ ante mīnitō imīnite ñā mēnongate baī cæyōmote mīnitō botō quimīni badinqe, Quinō waa impa, ante cæinente bacæmīnimpa, ante cægacāimpa.

¹⁵ Ayæ māninonque ante odōmonte apænedinqe bitō wadāni inānite, ædæmō apænebi ēñencædānimpa. Wadāni wēnæ wēnæ cædāni iñōnānite tōmēnāni inānite,

Ædö cæte mǎnōmaī cæmīnii, ante nanguī āninqe awēnē baī inte apǣnebi ēñencǣdān-
impa. Bitō ĩmite, Ædö cæte awēnē baī cæbii, ante pīinte anguīnānii, ante pōnente
quēwencæbiimpa.

3

Nē pōnēmō, Quīnō waa impa, ante mōnō cæquēñēnō

¹ Bitō weca nē pōnēnāni ĩñōnānite do mōnitō angāinō nāni ēñēñinō incæ bitō
tōmēnāni ĩnānite adodō ante apǣnebi ēñencǣdānimpā. Nē aadāni tōnō gobiedōno
beyǣ nē ānāni ĩnānite ēñēñinque mīnitō tōmēnāni nāni ānō ante ēñente cæcæmīnimpā,
ante apǣnebi ēñencǣdānimpā. Ayǣ, Quīnō waa ĩ, ante mǎnīnō do cæcæmīnimpā, ante
apǣnebi ēñencǣdānimpā. ² Ayǣ æcāmenque ingante wēnæ wēnæ ante babæ ānāmaī
incæmīnimpā. Piyǣnē cæte quēwēninqe mīnitō wadāni tōnō wadodō wadō tedete
pīināmaī incæmīnimpā. Waodāni tōmānāni ĩnānite mīnitō ædæmō cæte quēwencæmīn-
impā, ante bitō mǎnōmaīnō ante apǣnebi ēñencǣdānimpā.

³ Edæ wēēñēñedē mōnō adobaī ocaī òmædæca ingaimō inte ēñēñāmaī cæte
quēwengamōimpā. Mōnō wapiticæ pōnēninqe oda cæte quēwengamōimpā. Quiēmē
mōnō wēnæ wēnæ cæinēnō ante cæte quēwengamōimpā. Quiēmē nāmanque pō-
nente, Waa tote quēwengæimpā, ante cædinque mōnō cōwē ñimpo cædāmaī inte
quēwengamōimpā. Waodāni ĩnānite cōwē wīwa pōnente quēwengamōimpā. Wadāni
godōmenque ēadāni adinque godō pīinte agamōimpā. Wadāni mōnō ĩmonte pīññōnāni
mōnō wacā ingā wacā ingā pīinte quēwengamōimpā. ⁴ Incæte mōnō Wængonguī
mōnō ĩmonte, Quēwenguīmīni, ante nē Ængaingā pōninqe tōmengā nānō waadete
pōnēmāmo ante ayǣ tōmengā nānō ædæmō cædōmāmo ante do odōmongacāimpā.
⁵ Tōmengā wīi mōnō nō cægāinō beyænque, Quēwenguīmīni, ante mōnō ĩmonte
ængacāimpā. Wæætē tōmengā nānō waadete pōnō waa cæinēnō beyænque mōnō
ĩmonte, Quēwenguīmīni, ante ængacāimpā. Mīnitō mempoga ēñacæmīnimpā, ante
Wængonguī mōnō mīmō mēnongacā entawēmompā. Ayǣ Wængonguī mōnō ĩmonte
æñongā tōmengā Tæiyǣ Waēmō Ōnōwoca pōnō cæcā beyænque mōnō mīmō entawente
quēwēmompā. ⁶ Itota Codito mōnō ĩmonte, Quēwenguīmīni, ante nē Ængaingā
beyænque Wængonguī ĩñōmō mōnō ĩmonte eyepæ pōñi pōnō cædinque tōmengā
Ōnōwoca ingante angā pō guicā ate entawente quēwēmompā. ⁷ ĩninqe Wængonguī
waadete pōnō cæcā ate mōnō tōmengā ayongā nō cæte quēwengaimō ĩmompā. Ayǣ
tōmengā nānō waadete pōnō cægāinō beyænque nē ænguīmō inte mōnō, Wænāmaī
quēwengæimpā, ante ee pōnente quēwēmompā.

⁸ Mǎnōmaīnō ante nō ante impā. Edæ Wængonguī ingante do pōnēnāni ĩñōmō, Quīnō
waa ĩ, ante nāni pōnēnonque cōwē cæcædānimpā, ante bitō mǎnīnō ante wæætē wæætē
adodō ante apǣnebi ēñencǣdānimpā, āmopa. Mǎnīnō ante waa pōñi ĩ ĩninqe tōmānāni
beyǣ adodō ante waa ingæimpā. ⁹ Wæætē, Æbānō ĩ, ante nanguī wæætedō wæætē ònon-
quedō ante tedewēnāni baī bitō ĩñōmō tōmēnāni baī tededāmaī incæbiimpa. Dodāni,
Æmōnānidō ingāinānii, ante ancaa nāni ānewēnō ante pōnēnāmaī incæbiimpa. Ayǣ
wæætē godō wæætē godō tedewēnāni ēñēñinque bitō wæætē tededāmaī incæbiimpa.
Ayǣ idægoidi nāni wææ angāinō ante godongāmæ wadodō wadō pīinte tedewēñōnāni
bitō ĩñōmō ĩñāni tōnō tededāmaī incæbiimpa. Edæ mǎnōmaī nāni tededō ĩñōmō
ōnonque tedete ĩ ĩninqe edæ æcāmenque beyǣ waa impā, ante dæ ampa cæbii.

¹⁰ Mīni pōnencabo incæ adocanque mǎnōmaī tedewengā beyænque wadāni nānēneto
nānēñē godinque wacabo wacabo badāni adinque bitō wæætē nē tedewēnongā ingante
adopoque wææ āmi ēñencæcāimpā. Adopoque wææ āmi ate tōmengā ēñēñāmaī inte
gomonga adobaī cæte tedewengā adinque bitō tōmengā ingante wæætē wææ āmi
wæcæcāimpā. Mǎnōmaī mempoga wææ āmi ēñēñinque tōmengā ñimpo cædāmaī
inte gomonga tedewengā ate wædinque bitō tōmengā ingante Baa āninqe gomō ae.

¹¹ Edæ mǎnōmaī cædongā ĩñōmō tōmengā idiquibæ pōnēnongā inte nē wēnæ wēnæ

cæcä ingampa. Tömengä nämä nänö apænte panguinque mänömaï cæcampa, ante do ëñëmipa.

Tito quïnö cæcæcäimpa, ante

¹² Botö cöönædepo iñonte Nincopodi näni quëwëñömö quëwencæboimpa, ante pönentabopa. Ìninqe Adotëma incæ Tiquico incæ æcänö bitö weca goquïnaa, ante pönëninque botö adocanque ingante ämo go pöñongä bitö eyepæ inte botö weca quingä pöe, ämopa. ¹³ Abogado inte në cæcä Teëna tönö Apodo gocæ cæyönate tömëna nänä goquïnö ante nänä ænguënënö wïi eyepæ ëada adinque bitö pædæ godömi ænte godæ. ¹⁴ Mönö tönö godongämæ në pönënäni iñömö wïi önonque cæte quëwencædänimpa. Wæætë edæ wadäni wïi eyepæ ëadäni adinque tömënäni pædæ godönäni æncædänimpa, ante cædinque bitö apænebi ëñëninque tömënäni wæætë, Quïnö waa ï, ante adinque mäniñonque ante cæte quëwencædänimpa.

Waa quëwencæminimpa, ante Pabodo yewæmongampa

¹⁵ Botö tönö në ongönäni tömänäni bitö imite, Waa quëwencæbiimpa, ante apænedänipa, ante botö, Bitö acæbiimpa, ante yewæmömopa. Mönitö imönite në waadete pönënäni inänite bitö, Waa quëwencæminimpa, ante mönitö beyæ ante apænebi ëñencædänimpa. Wængonguï mïnitö tömämïni imïnite waadete pönö cæcæcäimpa, ante mäninque ante botö yewæmömopa.

Pidemöö ingante Pabodo cadota ante nänö yewæmongainta

Pidemöö ingante Pabodo yewæmongampa

¹ Botö Pabodobo inömo inte Itota Codito ingantedö ante apænebo beyænque botö imote tee mönedäni tee mönegaïmo imopa. Mönö tönñacä Tímoteo tönö yewæmömönäpa. Pidemöö möna në waadebi inömi inte mönatö tönö godongämæ cædomi inömite mönatö, Bitö acæbiimpa, ante yewæmömönäpa. ² Bitö oncönë inömo Itota Codito ingante mïni pönencabo godongämæ pönömïnite mönatö mïnitö imïnite adobai yewæmömöna acæminimpa. Ayæ mönö mængä Apia tönö Adoquipo mönitö tönö godongämæ në tontado bai cædongä tönö tömëna acædaimpa, ante yewæmömönäpa. ³ Mönö Mæmpo Wængongui tönö Awënë Itota Codito tönö godongämæ waadete pönö cæda ate mïnitö gänë entawencæminimpa, ämönäpa.

Pidemöö në waadete pönengä inte wede pönengä ingä

⁴⁻⁵ Bitö Awënë Itota ingante wede pönëmi imipa, ante tömengä quïnäni inönäni inänite waadete pönëmi imipa, ante bitö imitedö ante änäni ëñënimö inte botö bitö beyæ ante Wængongui ingante botö apæneyedë adocä ingante cöwë waa ate pönente apænebopa. ⁶ Mäninö Itota Codito ingante bitö wede pönënö ante wadäni inänite cöwë apænebi ëñëninque tömënäni, Mönö tömengä waa pönï nänö entawënoncoo incæ quincodö entawëmö imöö, ante ædæmö ëñente bacædänimpa, ante nanguï cæcæbiimpa, ante botö bitö beyæ ante Wængongui ingante apænebopa. ⁷ Botö tönñabi ëñëmi. Itota Codito quïnäni inönäni inänite bitö waadete pönente cæbi ate tömënäni gancæ entawente todänitapa, ante apænedäni ëñëninque botö nanguï watapæ todinque wampo pönentabopa.

Pabodo Önetïmo beyæ ante Pidemöö ingante angampa

⁸ Mänömaï beyæ mönö Awënë Codito botö imote angä ëñëninque botö awënë bai äninque bitö cæquënënö ante, ïimaï cæe, ante guïñënamäi inte bitö imite wææ ämo bai waa incædönimpa. ⁹ Incæte botö wææ änämaï inte wæætë mönö waadete pönëmämo beyænque ædæmö apænebopa. Botö Pabodobo inömo inte në picæmo imopa. Ayæ ñöwo botö Itota Codito ingantedö ante apænebo beyænque botö imote tee mönedäni tee mönegaïmo inte ämopa. ¹⁰ Ininque botö wengä onguïñængä Önetïmo beyæ ante bitö imite ædæmö apænebopa. Edæ tee mönecönë botö quëwënedë Önetïmo ingante apænebo ëñëninque tömengä në pönengä badinque botö wengä bai bacä æntabopa cæbii.

¹¹ Wëenënedë tömengä bitö beyæ waa cædämaï inte önonque quëwengacäimpa. Incæte tömengä ñöwo inömo bitö beyæ incæ botö beyæ incæ në waa cæcä bacäimpa. ¹² Tömengä botö në waadecä ingä incæte tömengä ingante botö bitö weca ocæ ëmænte da godömo poncæcäimpa. ¹³ Itota ingantedö ante mönö watapæ apænedö beyænque botö imote tee mönedäni ongöninque botö, Pidemöö dæ añonte Önetïmo inömo tömengä beyæ botö weca ongöninque botö tönö guëa cæcæcäimpa, ante pönëninque ainentabopa. ¹⁴ Incæte æbämenque pönö waa cæbi incæ wii botö wææ änö beyænque cæcæbiimpa. Wæætë tömëmique pönente cæcæbiimpa, ante cætabopa. Bitö ëñënamäi inte Ao änämaï inömite botö ædö cæte Önetïmo ingante, Bitö botö weca ongoncæbiimpa, ante anguiïmo. ¹⁵ Önetïmo bitö imite wantæyö wodii godingä inte ñöwo adodö pönongante bitö tömengä ingante wæætë æñömi tömengä cöwë bitö tönö quëwëncæcäimpa. Wabänö mäniï ante beyænque wantæyö wodii gocantawo. ¹⁶ Tömengä ingante bitö godonte ænte mämi ate tömengä bitö beyænque cæte në quëwëningä ingä incæte tömengä ñöwo wii në cæte quëwënanique bai inongä ingampa. Wæætë edæ Itota Codito ingante pönengä badinque tömengä ñöwo godömenque bitö tönñacä inongä inte bitö

nē waadecä ingampa. Edæ tömengä botö nē nangui waadecä ingampa. Ayæ wii bitö nē cædonganque inongä inte tömengä wæætē mönō Awënë quingä ingampa. Mänömaï beyæ tömengä godömenque bitö nē waadecä inongä ingampa.

¹⁷ İninque bitö, Pabodo tönö guëa cæmöna imönapa, ante pönëmi İninque bitö botö imote ämi bai Önetimo ingante adobai ämaïmipa. ¹⁸ Bitö imite wënæ wënæ cæcantawo. Bitö imi quiëmë ante äninque wæætē pönönämaï ingantawo. İninque tömengä nänö pönönämaï İninö ante bitö botö imote wæætē, Pönömi ämoe, ämi ëñëninque botö pædæ pönömo ämaïmipa. ¹⁹ Botö Pabodobo inömo inte tömëmo önompoca inte imainö ante yewämömopa. Tömengä quinö nänö pönönämaï İninö ante botö wæætē tömänö pönömo æncæbiimipa. Botö edæ bitö imite wii Itota Codito ingantedö ante odömönte apænebo bai bitö ayæ pönënämaï inte quëwencædömiimipa. İninque botö apænedö beyæ bitö botö imote wæætē pönönämaï ingä bai inömi imipa. Incæte botö mänömaï beyæ bitö imite wii ancæboimipa. ²⁰ Botö töninabi ëñëmi. Mönō Awënë beyænque bitö botö beyæ pönö cædinque Önetimo ingante waadete pönencæbiimipa, ante wæbopa. Edæ mönō Codito nempo quëwëmöna İninque bitö waadete pönente cæbi ate botö gancæ entawente tocæboimipa, ämopa.

²¹ Bitö cöwë ëñente cæquimi imipa, ante do ëñënimö inte botö, Bitö acæbiimipa, ante yewämömopa. Edæ botö änö ëñente cædinque bitö godömenque cæquimi imipa, ante ëñëmopa. ²² İninque adodeque ayæ äinëmopa. Minitö botö beyæ ante Wængongui ingante mini apænedö beyæ botö imote ñimpo cædäni ate bitö weca acæ poncæboimipa, ante pönëmopa. İninque bitö oncönë adocönë botö owoquincö ante tömää ædæmö cö cæquimi, ämopa.

Pidemöö ingante Pabodo, Waa quëwencæbiimipa, angä

²³ Epapada botö bai adobai Itota Codito beyænque nani nē tee mönegaingä iñömö tömengä botö imote, Pidemöö waa quëwencæcäimipa, ante angä ëñëninque botö bitö imite yewämömopa. ²⁴ Mäadoco tönö Aditadoco ayæ Deëma tönö Odoca botö tönö godongämä cædäni iñömö adobai botö imote, Pidemöö waa quëwencæcäimipa, ante änäni ëñëninque botö bitö imite yewämömopa.

²⁵ Mönō Awënë Itota Codito bitö imite waadete pönö cæcæcäimipa. Mäninque ante botö yewämömopa.

Ebedeoidi inänite cadota ante nani yewæmongainta

Wængongui beyæ tömengä Wengä pönö apænegacäimpa

¹ Wængongui wëenënedë wantæ wantæ iñö apænedinque wantæ iñö wadö bai cædinque wantæ iñö wadö bai cædinque tömengä beyæ nê apænedäni inänite tæmpo pönö apænegacäimpa. Eñëninque tömënanï wæætë adodö ante mönö mæmæidi inänite tæmpo apænegadänimpa.

² Nöwo guiquënë mäniinö ante Wængongui dodäni inänite nänö apænegaiönæ idæwaa bayonte tömengä apænegacäimpa. Wëenë pönï inguipoga dæ iï emönæ dæ añonte Wæmpocä tömengä Wengä ingante, Badöe, angä eñente cæyongä tömengä nänö cædö beyæ Wæmpocä tömancoo badongacäimpa. Mänömaï beyæ nê badongä iñongante Mæmpo Wængongui wæætë, Tömancoo nê ænguingä iñömö botö Wengä adocanque nê ænguingä ingampa ämopa, angacäimpa. ³ Mæmpocä nê tæi emönongä inte ñäö emongä iñongä tömengä Wengä iñömö adobai nê tæi emönongä inte ñäö emongä ingampa. Ìninqe, Wængongui Wengä nö pönï entawëninque nänö quëwengainö bai Mæmpocä iñömö edæ adobai pönï entawëmongä inte edæ nöingä cæte quëwengä ingampa, ante mönö edonque eñengäimpa. Ìnguipo incæ iï emönæ incæ a ongoncoo incæ awëmö iñömö ongoncoo incæ tömengä Wengä adocä tæi piñænte nänö angäinö beyænque tömancoo edæ nöwo ganca cöwë ongoncoo incoopa. Ayæ nämä wepæ godonte wæninqe adocä iñömö wënæ wënæ mönö cæpämö ante ñä mënongagacäimpa. Mänömaï nê ñä mënongaingä inongä inte tömengä do æidinque Wængongui nê tæi emongä tömëmængä inö tæe contadinque ongongampa.

Tömengä ñænængä iñongä anquedoidi pönömenque inäni

⁴ Mänömaï æi contadinque tömengä nê ñænængä iñongante Wængongui iñömö, Bitö emöwo bitö cöwë ænguënegaiwo, ante pemongacäimpa. Wængongui anquedoidi guiquënë wii adobai ñænænäni iñönänite Wængongui tömënanï inänite adobai ante pemönämaï ingacäimpa. ⁵ Edæ anquedoidi iñönänite æcämenque ingante Wængongui dicæ,

“Botö Wëmi inömi imipa.

Nöwoönæ bitö Mæmpobo babopa,”

Ante angantawogaa. Ayæ adobai,

“Botö tömengä Mæmpobo incæboimpa.

Ìninqe tömengä botö Wengä incæcäimpa,” ante anquedo ingante änämaï ingacäimpa.

⁶ Wæætë tömengä Wengä Tänocä iñongante inguipoga da pönöninque Wængongui,

“Botö anquedoidi tömänäni iingä önöwa inö ædæ wææninqe, Bitö Wængongui Wëmi imidö angüënë, ante watapæ apænegadänimpa,” ante apænegacäimpa.

⁷ Ayæ wæætë anquedoidi inänitedö ante apænedinque,

“Tömengä godö cæcä ate tömengä anquedoidi iñömö woboyæ nanguï pæmæ bai quingæ pönï cæcädänimpa.

Ayæ tömengä godö cæcä ate tömengä beyæ nê waa cædäni iñömö gonga bæcoguënëwate bai nanguï cæcädänimpa.”

⁸ Ante apænedinque tömengä Wengä ingante guiquënë Wængongui incæ iïmaï angacäimpa.

“Bitö nê Wængongui inömi inte eñëmi. Awënë Odeye badinque Awënë containpaa tæe contagäimi inte bitö ñimpo cædämaï inte cöwë Awënë Odeyebi inömi inte ongoncæbiimpa.

Īninqwe Awënë Odeyebi ĩnōmi inte bitō nempo quēwēnāni ĩnānite nō pōnī cæte aadinque yaēmē tōēmē pōnī nǣænte baī nē āmi incæbiimpa.

⁹ Nē Wængonguīmo ĩnōmo inte botō ĩñōmō bitō Awënë Wængonguīmo ĩmopa. Īninqwe botō, Nō cæte mōnō quēwenguīnō ante nē waadebi ĩnōmi inte bitō ēñēnāmaī nāni cæinō ante edæ wīī āñēmi ĩmipa.

Mānōmaī ĩmi ante adinque botō ĩmaī pōnō cæbopa. Bitō tōnō godongāmæ ongōnāni Awënë badinque bitō watapæ tocæbiimpa, ante cædinque botō, oginguipæ pōnō gao caate baī nanguī cægaboimpa.”

¹⁰ Ante Mæmpo Wængonguī angacāimpa. Ayæ adobaī tōmengā Wengā ingante apænedinque,

“Bitō Tæiyæ Awënë ĩnōmi inte wēēnēñedē pōnī inguipo mā cō cæte baī cædinque tōmēmi badongabiimpa, angacāimpa.

Ayæ oōnædē ongoncoo adobaī tōmēmi bitō ōnompoca badongaincoo inte ongoncoopa.

¹¹ Mānincoo guiquēnē ĩncayæ ate wido cæte baī bayonte

Bitō guiquēnē cōwē ongonguīmi ĩmipa.

Mānincoo guiquēnē mōnō weocoo pedæncoo woincoo baī bayonte,

¹² waocā yacooque æninqwe topo cæcā baī cædinque bitō wæætē bitō badongaincoo ænte topo cæte baī cæcæbiimpa.

Wæætē miincoo wēñacā baī cædinque bitō wæætē tōmancoo miincoo badōmi ongongæimpa.

Bitō ĩñōmō do bitō ingaī baī adobaī cōwē inguīmi ĩmipa.

Bitō quēwenguīmāmo cōwē inguīnō anguēnē.”

¹³ Āninqwe Wængonguī tōmengā Wengā ingante ĩmaī angacāimpa.

“Botō tōmēmæ ĩnō tæ contate ongōñōmite,

botō bitō ĩmite nē pīinte cædāni ĩnānite bæ tabo tæ wæænāni ate bitō tæī ēmōmi inte pīnā gāwate baī godō cæbi wæcædānimpa,” angacāimpa.

Tōmengā Wengā ingante mānōmainō ante nē angaingā inte Wængonguī dicæ anquedoidi ĩnānite adobaī angantawogaa. ¹⁴ Īñæmpa Wængonguī anquedoidi ĩñōmō baō ōmaadāni inte Wængonguī beyæ nē waa cædāni ĩnānipa. Mānōmaī ĩñōnānite tōmengā, Botō æmo beyænque nē quēwēnāni beyæ mīnitō godō cæcæmīnimpa, ante da pōnongā pōninqwe tōmēnāni mōnō beyæ pōnō waa cædānipa.

2

Wængonguī ængā beyænque quēwēmompa, ante

¹ Mānōmaī beyæ mōnō Awënë apænecā ēñēninqwe mōnō ēñengainō ante mōnō ñimpo cædāmaī inguinque ante mōnō wede pōnente ædæmō ēñente cæcæimpa. ² Edæ anquedoidi incæ Wængonguī beyæ apæneyōnāni tōmēnāni nāni ānō ante dodāni wæætē nē ēñente cæquēnēnāni ingadānimpa. Īninqwe æcānō wīī ēñēninqwe wapiti cæda tōmengā nē tente wæquēnengā ĩñongante dodāni nō cædinque pangadānimpa.

³ Īñānāni ēñēdāni. Wængonguī nānō, Quēwencæmīnimpa, ante angainō ante æcānō mōnō ĩmonte tāno apænecantawo, ante pōnēdāni. Wængonguī Awënë ĩnongā incæ tānocā apænegaingā inte, Botō tōmēmo æmo beyænque quēwencæmīnimpa, ante apænegacāimpa. Ayæ Wængonguī nānō apænegainō ēñente Ao āninqwe wadāni godōmenque mōnō ĩmonte, Nāwangā ĩmpa, ante apænedāni ēñēnimō inte mōnō ædæmō ēñengæimpa. Edæ ēñēnāmaī inte baī ñimpo cæmō ĩninqwe Wængonguī dicæ pānāmaī inte ata cæpocampa quēwenguīmō.

⁴ Īninqwe, Quēwencæmīnimpa, ante nāwangā botō ānō ante ēñencædānimpa, ante cædinque Wængonguī godōmenque cægacāimpa. Tōmengā, Æcānō tōnō cæquīmoo, ante, Æyōmōnō cæquīmoo, ante, Æyedēnō cæquīmoo, ante nāmā nānō angainō baī cædinque ĩmaī pōnō cægacāimpa. Tōmengā, Botō mā cæbo ate wadāni ēñencædānimpa, ante nanguī cægacāimpa. Ayæ, Æbānō cæcāā, ante wæcædānimpa, ante tæī pīñæninqwe wadō wadō cædinque bamōnengæ edæ nanguī cægacāimpa. Tōmengā

Önōwoca ingante da pōnongā pōninque tōmengā wæætē Wængonguī nānō angāināni inānite pōnō cæcā æninque tōmēnāni tōmānāni Wængonguī Önōwoca nānō pōnongā ænganca cægādānimpa. Īninque Wængonguī mǎnōmaī pōnō cæcā adīmō incæ mōnō ēñēnāmaī cæmō baī tōmengā wæætē mōnō imonte ædō cæte ata cæpoquēnengāā.

Itota Codito tōmengā tōniñadāni baī adobaī bagacāimpa

⁵ Ayæ miingui-poga Awēnē nempo mōnō quēwenguimāmo ante apānemōnipa. Īninque miingui-poga mōni ānongui-poga Wængonguī, Æcāmenque ingante āmo awēnē baqingā, ante cædinque, Anquedoidi incæ awēnēidi bacædānimpa, ante dicæ anganta-wogaa. ⁶ Wacā wataa yewæmōninque iīmaī ante Wængonguī ingante āmotamīni ante baī yewæmongacāimpa.

“Wængonguī ēñēmi. Waomōni önōmōnique iñōmōnite bitō ædō cæte waadete cæbii.

Wao wēmōni ēñagāimōni iñōmōnite bitō ædō cæte pōnō waadete cæbii.

⁷ Anquedoidi inānite æmonga ææntodōninque bitō waocā ingante gao wænō gö cæbi ate tōmengā wantæ iñō pōnōmenque ongongantapa.

Ayæ, Waocā nē tæi emōnongā inte ñāō emōñongante wadāni tōmengā ingante waa acædānimpa, ante pōnō badongabiimpa.

⁸ Edæ bitō badongaincoo tōmancoo waocā nempo pōnōmi æninque

waocā tæi emongā inte nē angā bagacāimpa.”

Ante nānō yewæmongaīne baī cædinque Wængonguī tōmengā nānō badongaincoo tōmancoo Waocā nempo pōnongā æninque Waocā nē angā bayongā wacoo wayōmō ongoncoo edæ dæ ampa. Incæte, Tōmengā nempo tōmancoo do ongompa, ante mōnō ñōwo ganca ayæ adāmaī imompa. ⁹ Doyedē mōnō waocabo iñōmōnte Wængonguī waadete pōnō cædinque Itota ingante angā ēñēninque tōmengā wæætē mōnō tōmāmō wænguimāmo beyæ ante cōwē wæwocate wæqingā bagacāimpa. Mānōmaī cædinque Wængonguī anquedoidi inānite æmonga ææntodōninque, Itota wæætē caate wæncæcāimpa, ante cædinque tōmengā ingante gao wænō iñōmō gōnongā ongongacāimpa. Incæte Itota caate wængā beyæ Wængonguī poganta tæiyæ waēmō da wencate baī cædinque, Itota nē tæi emōnongā inte ñāō emongā adinque wadāni tōmengā ingante waa acædānimpa, ante pōnō cægacāimpa. Īninque Itota Tæiyæ Awēnē wencate ongongā ingante do amompa.

¹⁰ Tōmancoo nē badongaingā inongā inte Wængonguī tōmancoo nē enempodongā inte iīmaī angacāimpa. Botō Wēmi ēñēmi. Wadāni incæ botō wēnāni nanguī ināni quēwencædānimpa, ante nē badōmi bitō baquinque caate wæcæbiimpa. Mānōmaī caate bitō wædō beyænque ædæmō picæmi bate nē ēñēnīmi inte bitō botō wēnāni inānite ñāō iñōmō ænte māmōmi poncædānimpa. Pōninque tōmēnāni botō ñāō emōmo baī adobaī ñāō emoncædānimpa, ante Wængonguī nō pōni cægacāimpa. ¹¹ Itota mōnō imonte, Tæiyæ waēmō ewocate quēwencæmīnimpa, ante nē badongā iñongā mōnō tōmengā tōnō adomō mōnō cabo imompa. Mānōmaī imō beyæ tōmengā mōnō imonte ante apānedinque, Botō tōniñamīni iīmīnipa, ante guiñēnedāmaī tedecampa. ¹² Iīmaī ante apānecampa.

“Wængonguī ēñēmi. Bitō emōwo ante botō tōniñadāni inānite apānebo ēñencædānimpa.

Tōmēnāni godongāmæ ongonte ēñēñōnāni botō, Wængonguī iñōmō Tæiyæ Waēmō inongā inte waa pōni cæcā abopa, ante āmotamīni ante baī ancæboimpa.”

¹³ Ayæ adobaī apānedinque,

“Wængonguī ingante botō wede pōnente quēwencæboimpa,” angacāimpa.

Ayæ wæætē adobaī apānedinque,

“Wængonguī botō imote apānedinque, Bitō wēnāni, ante pōnongā ænōmo inte botō, Mōni wencabo mæ ongōmōni aedāni, āmopa.”

Itota incæ Wængonguī beyæ nāni yewæmongainō baī adobaī apānecampa.

¹⁴ Mōnō wænguimāmo ante wēnæ awēnē incæ nē angā iñongante Itota, Botō nāne wænīnque tōmengā ingante edæ omæe ewencæboimpa, ante iīmaī cægacāimpa. Mōnō

Itota wēñāmō inōmō inte mōnō baō tōnō wēpæ ñōmænguiñō ēñamō bai tōmengä nänō wænguinque adobai ñōmænguiñō ēñagacäimpa. Ìninqe tōmengä nämä nänō wänō beyænque wēnæ awēnē ingante bæ tacä ate tōmengä wæætē piñænāmai aquiñ bate nē angä ināmai ingampa. ¹⁵ Ayæ wēnæ awēnē nempo ñä cæyænte bai quēwēninque mōnō wænguimāmo ante guiñente wæyōmonte Itota mōnō beyæ ante wæætē wæninqe mōnō imonte gä pe æmpote ö ængä beyænque quēwēmompä.

¹⁶ Edæ wii anquedoidi inänite ænte pæ mancæte ante cædinque tōmengä wæætē Abadäo wodi pæimō iñōmonte mōnō imonte pōnō æninque pæ mangampa. ¹⁷ Mäninō beyæ Wængongui, Bitō tōniñadāni bai adobai badinque bitō, Wængongui qui, ante nē nō Pönōmi Ñænæmi pōni incæbiimpa. Ayæ bitō tōniñadāni inänite cōwē pōnēninque waadete pōnō waa cædinque ædämō aacæbiimpa, ante tōmengä ingante da pōnongä pongacäimpa. Ayæ adobai, Bitō tōmēnāni wēnæ wēnæ nāni cædō beyæ nämä wēpæ godoncæbiimpa, ante cædinque Wængongui Itota ingante da pōnongä pōninque tōmengä mōnō ēñamō bai adobai ēñadinque waomō mōnō inōmō bai adobai badinque Waocä inongä ingacäimpa. ¹⁸ Mōnō inguipoga quēwēninque wēnæ wēnæ mōnō cæinēnō beyæ wæwēmompä. Wēnæ awēnē, Itota oda cædinque Wængongui ingante ēñēnāmai cæcæcäimpa, ante cæyongä Itota iñōmō mōnō wæwēnō bai adobai wæwengä incæte oda cædāmai ingacäimpa. Ìninqe wēnæ wēnæ cæinente wæwēñōmonte tōmengä adobai do wægaingä inte, Minitō tæi piñænte ongōninque oda cædāmai incæminimpa, ante pōnō tōö æmænte cæcampa.

3

Itota Ñænængä iñongä Möitee wodi wædanğä ingacäimpa

¹ Mōnitō imōnite aa pedinque Wængongui mīnitō imīnite adobai aa pedinque, Tæiyæ waēmō entawencæminimpa, ante badongacäimpa. Ìninqe botō tōniñamīni ēñēedāni. Itota iñōmō Wængongui nänō nē da pōnongaingä ingacäimpa, ante mōnō pōnēnō ante mōnō, Nāwangä impa, ante apænemompä. Ayæ, Wængongui qui, ante nē Godongä Ñænængä pōni iñōmō Itota adocä ingampa, ante mōnō pōnēnō ante, Nāwangä impa, ante apænemompä. Ìninqe mīnitō guiquēnē, Itota æbänō ingacäimpa, ante ònōwēnenque pōnente quēwenguēñēmīni imīnipä. ² Wængongui angä ēñēninque Möitee wodi guiquēnē tōmengä ingante cōwē pōnente cædinque Wængongui tōnō nāni godongämæ quēwencabo inänite ædämō cæte aagacäimpa. Tōmengä nō cæte nänō aagai bai adobai cædinque Itota iñōmō Wængongui angä ēñēninque tōmengä ingante cōwē pōnente cædinque tōmengä tōnō mōnō godongämæ quēwencabo imonte ædämō cæte aacantapä.

³ Edæ, Oncō waa ongompä, ante waa amō incæ mōnō oncō nē badōningä ingante godōmenque waa ate apænecæimpa. Adobai, Möitee wodi nē waa acä ingacäimpa, ante tōmengä ingante waa amō incæ mōnō edæ Itota nē badongaingä ingante godōmenque nangui waa ate apænecæimpa. ⁴ Waocä oncō guiquēnē wii tōmenque ongompä. Edæ waocä mænongä ate oncō edæ ongō amīnipä. Inguipo incæ adobai öönæde ongoncoo adobai wii tōmenque ongoncoopa. Mänincoo tōmancoo Wængongui nänō badongaincooque ongoncoo acäimpa. ⁵ Möitee wodi guiquēnē Awēnē Wængongui ingante nē cæcä inongä inte tōmengä tōnō nāni godongämæ quēwencabo inänite cōwē pōnēninque ædämō cæte aagacäimpa. Mänōmai cædinque tōmengä, Wængongui æbänō iincayæ ate apænequingä, ante odōmōninque, Nāwangä impa, ante apænecäimpa. ⁶ Mōnō Codito guiquēnē Wæmpocä Wengä Onguiñængä inongä inte Wæmpocä tōnō nāni godongämæ quēwencabo inänite cōwē pōnente nōingä pōni cæte pōnō aacampa. Edæ mōnō guiquēnē, Codito waa pōni pōnō cæcä beyænque watapæ bacäimpa, ante mōnō pōnēnō ante wadāni ēñēñōnāni waa tote apænemompä. Ìninqe mōnō guiñēnāmai inte mäninō mōnō pōnēnō ante ædämō entawēninque iinqe baganca ñimpo cædāmai imō ininqe tōmengä tōnō mōnō godongämæ quēwencabo imaimompä.

Wængongui quīnāni nāni guēmanguimāmo ante

⁷ Mänömaï beyæ Wængongui Tæiyæ Waëmö Önöwoca nänö angainö ante mönö ëñente cæcæimpa. Tömengä nänö apænegainö ante iïmainö ante yewæmongatimpa.

“Nöwoönæ incæ tömengä apænecä ëñëninque,

⁸ mïnitö, Mïmö ömædë bawënämaï incæmönimpa, ante cædinque Baa änämaï iedäni.

Dodäni iñömö, Wido cæcæimpa, ante nani önömæca quëwente cæyedë, Wængongui ingampa diyæ panguingää, ante pönëninque wiwa cægadänimpa. Mänömaï cædinque tömënäni Baa ante mïmö ömædënäni nani bawengai bai mïnitö adobai bawënämaï iedäni.

⁹ Mïnitö mæmæidi mäniñömö quëwëninque botö imote wiwa cædäni wægaboimpa.

Incæte botö mäniñedë coadenta wadepo iñonte waa cæbo agadänimpa.

¹⁰ Mäniñedë quëwënäni mänömaï cædäni beyæ botö tömënäni inänite pïinque iïmaï angaboimpa.

‘Botö taadö goquënänäni incæ taadö cöwë adämaï inäni inte tömënäni ancaa oda cædinque mïmö ömædënäni inte bai wadö godänipa.’

¹¹ Äninque botö ænguï badinque, Botö në Quëwëmo ingaïmo inte nöingä ämopa, äninque,

Guëmædäni, ante botö angaiñömö tömënäni cöwë guite guëmänämaï incædänimpa, angaboimpa.”

Ante Wængongui nänö angainö ante yewæmongadänimpa.

¹² Iñänäni ëñëdäni. Mïni pönencabo iñöminite mïnitö wacä ingä wacä ingä waa adinque adocanque incæ mïmö ömædengä badämaï incæcæimpa, ante wææ aedäni. Ayæ adocanque incæ wënæ wënæ entawengä badinque wiwa æmænte Wængongui në Quëwengä ingante ëmö cæte godämaï incæcæimpa, ante wææ aedäni. ¹³ Nöwoönæ, ante në angä nänö angaiönæ iñömö ayæ ñöwo ganca ëönæpa. Iñinque mïnitö ñöwoönæ incæ wacä ingä wacä ingä ædæmö apænedinque, Æcämenque incæ wiwa nani cædö beyænque oda cæte wædinque mïmö ömædengä badämaï incæcæimpa, ante cædinque iïmö iñö iïmö iñö godongämæ iñacabo cædinque tæi ongödäni. ¹⁴ Edæ mönö wëenëñedë wede pönengamöimpa. Nöwo adobai pönëninque iinque baganca wede pönëmö iñinque mönö Codito nempo godongämæ quëwëmaïmompä.

¹⁵ Iñinque adode ante pönente cæcæimpa.

“Nöwoönæ incæ tömengä apænecä ëñëninque mïnitö, Mönitö mïmö ömædëmöni bawënämaï incæmönimpa, ante wææ cædinque Baa änämaï iedäni.

Edæ dodäni, Wido cæcæimpa, ante cædinque edæ Baa ante mïmö ömædënäni nani bawengai bai mïnitö adobai bawënämaï iedäni.”

¹⁶ Wængongui angä önömoncaque ëñëninque, Wido cæcæimpa, ante ædänidö cægadänii. Edæ Mõitee wodi Equitobæ nänö në ænte gogainäni adodäni incæ, Wido cæcæimpa, ante cægadänimpa. ¹⁷ Ayæ adobai Wængongui coadenta wadepo iñonte ædänidö inänite pïinque ænguï bagacäi. Edæ në ëñënämaï inte wënæ wënæ cædäni inänite Wængongui pïinte ænguï bacä ate tömënäni baö ingai önömæca yabæque wæænte öñongatimpa. ¹⁸ Ayæ, Pö guite guëmædäni, ante botö angaiñömö cöwë guite guëmänämaï incædänimpa, ante Wængongui, Botö në Quëwëmo inömo inte nöingä angaboimpa, angacæimpa. Edæ ædänidö inänite mänömaï angacäi. Edæ në ëñënämaï cædäni inänite mänömaï angacæimpa. ¹⁹ Iñinque në pönënämaï inäni inte tömënäni nani pönënämaï inö beyænque guiidämaï ingadänimpa.

4

¹ Botö nempo guidinque guëmancæmïnimpa, ante wëenëñedë nänö angainö ante Wængongui ñöwo incæ adodö ante cöwë angampa. Mänömaï beyæ mïni pönencabo tömämïni tömengä nempo guidinque guëmanguënëmïni iñöminite adocanque incæ oda cædämaï incæcæimpa, ante cædinque mönö godongämæ waa adinque wææ aacæimpa. ² Edæ dodäni inänite Wængongui ingantedö ante watapæ nani apænegainö bai mönö imonte adobai ante watapæ apænedäni ëñëmompä. Incæte dodäni guiquënë

önömoncaque ëñëninque wede pönënanï beyënque guëmänämaï inte wægadänimpa.
³ Mönö në wede pönëmö ïmö guiquënë Wængonguï nempo guïdïnque mïmönë do guëmämompa. Edæ Wængonguï nempo mönö guëmanguënënö ante botö äninta adotaa ïmïänö ante yewæmonte ongö baï batimpa.

“Botö ænguï badïnque, Botö në Quëwëmo ingaïmo inte ämopa, äninque,
 Pö guïite guëmædäni, ante botö angaïñömö tömënäni cöwë guïdämaï incädänimpa,
 angaboimpa.”

Ante Wængonguï beyæ ante yewæmongadänimpa. Incæte doyedë inguïpoga ïi ëmönæ badöninque Wængonguï tömengä nänö cæquënënö ante ïinque badöninque, Idæwaa, angacäimpa. ⁴ Wængonguï önompo æmæmpoque go adoönæque ïñonte ïinque cædïnque ïimö wæiyö nänö guëmangaiönæ ingatimpa, ante ïimaï ante wataa yewæmonte ongompa.

“Önompo æmæmpoque go adoönæque ïñonte ïinque cædïnque ïimö wæiyö ñïmpo cædïnque Wængonguï guëmangacäimpa.”

⁵ Ayæ botö äninta adotaa ïimaï ante yewæmonte ongompa.

“Pö guïite guëmædäni, ante botö äñömö tömënäni cöwë guïdämaï incädänimpa,” angampa, ante yewæmongatimpa.

⁶ ïninque Wængonguï nänö pönö cædö ante watapæ ante apænecä ëñëninque dodäni ïñömö önömoncaque ëñënäni inte tömënäni nänï ëñënämaï cægäinö beyæ guïdämaï ingadänimpa. ïninque, Wængonguï tömengä nänö angäinö ïinque cæcäimpa, ante cædïnque ïincayæ quëwënäni pancadäniya cöwë guïquënënäni ïnönänimpa. ⁷ Mänömaï beyæ, Æönædö ëñenguënëmïni ïimïni, ante odömoncæte ante cædïnque Wængonguï, “Nöwoönæ,” ante awënë Dabii ingante wantæpiyæ ate apænecä ëñengacäimpa. ïninque mänïnö botö do ante yewæmömo mïni adinö baï ante Dabii wodi ïmïänö ante yewæmongacäimpa.

“Nöwoönæ incæ tömengä apænecä ëñëninque mïnitö, Mïmö ömædëmöni bawënämaï incämönimpa, ante cædïnque Baa änämaï ïedäni,” ante yewæmongacäimpa.

⁸ Edæ docä Ootowee wodi tömënäni ïnänite doyedë manguicä guïdïnque Cänaämæ quëwengadänimpa. Incæte tömënäni mänïömæ do guïdïnäni inte näwangä guëmänäni baï Wængonguï ïincayæ ate, Nöwoönæ guëmancæmïnimpa, ante wæætë änämaï incædongäimpa. ⁹ ïninque mönö Wængonguï quïmö ïñömö edæ guëmanguïönæ guëmante baï mönö tömengä nempo quëwëninque mïmönë guëmäninque cætawente wædämaï ingäimpa. ¹⁰ Wængonguï ïinque badöninque tömengä nänö cæquënënö tömää cædïnque ñïmpo cædïnque guëmangacäimpa. Tömengä nänö ñïmpo cæte guëmangaï baï waocä ïñömö Wængonguï nempo guïdïnque në guëmangä ïñömö adobaï tömengä nänö cæquënënö ante, Tömänö do cætïmpa, ante adinque ñïmpo cædïnque guëmangampa.

¹¹ Dodäni nänï ëñënämaï cægäi baï ñöwodäni adobaï cædäni ïinque tömënäni nänï tæ go wæænguinque cæbäinänipa. Mänömaï ïi ïninque, Adocanque incæ mänömaï cæte tæ go wæænämaï incæcäimpa, ante wææ cædïnque mönö tömämö, Wængonguï nempo guïite mïmönë guëmangäimpa, ante nanguï cæcäimpa.

¹² Wængonguï nänö änö ïñömö mïine quëwëne inte tæï piyänë ënepa. Edæ yaëmë yægämë tipængaa engämë bamencaa guïibæ watii co baï Wængonguï nänö änö ïñömö adobaï cædïnque mönö önöwoca incæ do cote baï guïipa. Ayæ bamë tadömengadæmë tæï guïñænte bamïi edonque a baï Wængonguï nänö änö ïñömö adobaï mönö mïmö incæ tadömengadæ tæï guïñænte baï cædïnque mönö pönënö ante mönö cæinënö ante do edonque ba adinque adode incæ apænte baï ampa. ¹³ Wængonguï në apænte änogä ïñongante mönö nämä incæ, Æbänö cægämönii, ante tömengä ingante töingä apænëquënëmö ïmompä. Edæ, Wængonguï ayongä tömengä nänö badongaincoo tömancoo edæ gä ængate ömægacoo baï inte wodönämaï ongompa.

Wængonguï ingante në Godongä Ñænængä Itota ingampa

¹⁴ Mönö beyæ, Wængonguï quï, ante në Godongä Ñænængä pönï ïñömö Wængonguï Wengä Itota ingampa. Tömengä ïñömö nämä wepæ godonte do wængaingä inte ñäni

ömämöninque öönädē æite ongongampa. Ìninqe mōnō, Tōmengā ingante wede pōnēmōnipa, ante nē apænemō inte mōnō wede pōnēnō ante ædæmō pæ mangæimpa. ¹⁵ Wængonguī quī, ante mōnō beyæ nē Godongā Ñænængā pōni ïnongā ïñōmō wēnæ wēnæ cædāmaī ingacäimpa. Incæte aquī ïmō inte wæmō adinque tōmengā wæætē, Botō Waobo ēñadinque aquī bate wægaïmo inte, Aquī mīni wædō æbänō ï, ante do edæ ēñēmopa, angampa. Edæ wēnæ awēnē tōmengā ingante, Wēnæ wēnæ cæe, angā do wægaingā inte tōmengā mōnō wēnæ wēnæ cæinēnō, Æbänō ï, ante do ēñengampa. ¹⁶ Ìninqe mōnō Awēnē ïñōmō nanguī waadete pōnengā inte Awēnē contaimpaa ongongampa cæmōō. Mōnō wēnæ wēnæ cædinō ante tōmengā pōnō ñimpo cæcæcäimpa, ante cædinque mōnō tōmengā weca ponte apænecäimpa. Mōnō caate wæyedē tōmengā pōnō tōō æmænte cæcæcäimpa, ante mōnō tōmengā weca ponte apænecäimpa. Mänōmaī Awēnē ongompaa gäänē pōninque mōnō guññēnāmaī inte apænemō ēñēninque tōmengā waadete pōnō waa cæcä ængæimpa.

5

¹ Wængonguī quī, ante bitō botō ïmote nē pōnōmi ñænæmi pōni bacæbiimpa, ante æcänō ingante Wængonguī angā bacää.

Edæ waocä adocanque ingante apænte æninque Wængonguī angā ate tōmengā ïñōmō nē waocä ïnongā inte waodäni beyæ Wængonguī weca cæcampa. Ìninqe waodäni ïingā weca pōninque, Wængonguī quī, ante pædæ pōnōnāni æninque tōmengā wæætē Wængonguī ingante godongampa. Ayæ, Wēnæ wēnæ cæmōni incæte Wængonguī waadete pōnō ñimpo cæcæcäimpa, ante cædinque waodäni, Wængonguī quī, ante cæningā ænte pōninque pædæ pōnōnāni ængampa. Æninque nē godongā ñænængā ïñōmō nē waocä ïnongā incæte cæningā ingante ænte wænōninque nē ænte pōnāni nāni wēnæ wēnæ cædinō beyæ ante baō iya tangampa. ² Ìninqe wadäni, Æbämē impa, ante ēñēnāmaī nāni wædō ante nē godongā ñænængā ïñōmō nē waocä ïnongā inte adobaī pancaa ēñēnāmaī inte wæcampa. Ayæ oda cæte nāni wædō ante tōmengā adobaī oda cæte wæcampa. Ìninqe wadäni baī aquīingā ïnongā inte tōmengā gänē pōnēninque wadäni ïnānite ædæmō cæte odōmongā adānipa. ³ Mänōmaī ïnongā inte tōmengā wadäni wēnæ wēnæ nāni cædinō beyæ ante, Wængonguī quī, ante iya tæninque adobaī, Botō nāmā wēnæ wēnæ cædinō beyæ godōmopa, ante iya tante Wængonguī ingante godongampa.

⁴ Waocä nāmā incæ, Botō, Wængonguī quī, ante nē godōmo ñænæmo bayōmote wadäni botō ïmote waa acædānimpa, ante ædō cæte anguingää. Ìñæmpa Wængonguī angā beyænque Aadōō wodi nē godongā ñænængā bacä baī wadäni adobaī Wængonguī angā beyænque nē godōnāni ñænænāni badānipa. ⁵ Codito incæ, Nē godōmo ñænæmo badinque nē tæi emōmo inte ñäō emōmo acædānimpa, ante nāmā ante wīi angacäimpa. Wængonguī incæ tōmengā ingante, “Bitō botō Wēmi ïnōmi ïmipa.

Ñöwoönæ bitō Wæmpobo babopa.”

⁶ Angacäimpa. Ayæ godōmenque Wængonguī nänō angainō ante wataa yewæmon-gatimpa.

“Wængonguī quī, ante nē pōnongā Mēequitedeco nänō cōwē ingai baī, bitō adobaī ñimpo cædāmaī inte nē Pōnōmi cōwē incæbiimpa,” ante Codito ingante angacäimpa.

⁷ Codito ïñōmō Waocä ēñate quēwēninque Ca ca wædinque Yæ yæ æninque Wængonguī ingante nanguī apænægacäimpa. Wængonguī bitō adobique eyepæ ïmi inte wææ ämi ïninqe botō wænāmaī ïmaïmopa, angacäimpa. Incæte, Bitō, Wæe, ämi ate botō wæncæboimpa, ante nänō Ao äñinō beyænque Wængonguī tōmengā ingante do ēñengacäimpa. ⁸ Wæmpocä Wēñængā ïnongā incæte Itota nänō caate wæwēmāmo beyænque Wængonguī nänō änō ante ædæmō ēñente cædinque picængā bagacäimpa.

⁹ Tōmengā nänō änō ante nē ēñente cædōmō ïñōmonte tōmengā ædæmō ēñēninque picængā bagaingā inte edæ mōnō ïmonte ængā beyænque mōnō cōwē wænāmaī inte

quëwëmompä. ¹⁰ Tömengä ingante Wængonguï apænte æninqe, Mëequitedeco në pönongä ñænængä pöni nänö ingai bai bitö adobai botö imote në Pönömi Ñænæmi pöni inömi imipa, angacäimpa.

Mönö wede pönönö ante Baa änämaï ingäimpa, ante

¹¹ Mäninö ante botö minitö iminite godömenque nanguï apænequënëmo imopa. Incæte, Æiquedö ëñenguimïnii, ante pönente wædinque botö, Æbänö cæte apænebo ëñenguimïnii, ante wæbopa. ¹² Ìñæmpa minitö doyedë mini ëñengainö ante ñöwo në odömömini baquënëmïni imïnipa. Incæte wacä wæætë minitö iminite Wængonguï nänö angainö ante adodeque adodeque ante odömonte apænecä ëñenguënëmïni adodö bamïni awädö. Edæ wënænäni në goömæ gänäni bai wæætë bamïni inöminite botö ædö cæte täëmö cænguï godonte bai apænebo ëñenguimïnii. ¹³ Goömæ në gangä bai ingä inömö tömengä wënængä bai inöngante mönitö, Æbänö nö cæquïi, ante odömonte apænemöni incæte tömengä inömö cöwë ëñënämaï ingampa. ¹⁴ Wæætë æcänö cöwë waa cæda ina inömö tömengä, Quïnö waa ii, ante, Quïnö wënæ wënæ ii, ante wæætë wæætë ante cædinque do ëñente badinque picængä bai bacampa. Ininqe ædæmö picænäni në badäni beyænque möni nö odömonte apænedö inömö cænguï täëmö bai ongompä.

6

¹ Mönö Codito inguipoga quëwëninque æbänö cægacäi, ante do ëñëmompä. Mönö wænguinö goquinque wënæ wënæ cæmompä, ante wædinque, Idæwaa wënæ wënæ cætabopa, ante mönö Wængonguï gämænö æbänö cæte ocæ ëmænte ponguïi, ante do ëñëmompä. Tömengä ingante æbänö cæte pönenguïi, ante do ëñëmompä. Ininqe mäninö tömänö ante do ëñënimö inte mönö mäninö ante idæwaa tedetamompä. Wæætë, Æbänö cæte godömenque picæmö bai ëñente baquïi, ante mönö ñöwo apænecäimpa. ² Adobai, Æpænë quinante guiquïi, ante, Önompoca quinante godö gampoquïi, ante do ëñëmö inte mönö mäninö ante godömenque tededämaï ingäimpa. Ayæ, Wænte ate ñäni mönö ömæmongäimpa, ante do ëñëmö ininqe, Wængonguï cöwë apænte ancæcäimpa, ante do ëñëmö ininqe mönö mäninö ante ñöwo godömenque tededämaï ingäimpa. ³ Ininqe Wængonguï Ao angä ate botö mäninö minitö do ëñëninö ante tededämaï incæboimpa. Minitö ëñënämaï ininö ante wæætë nanguï apænebo ëñencæminimpa.

⁴ Wængonguï mönö mimönë pönö tica ënente bai cædinque edonque odömonte apænecä ëñëninque mönö ñäö bai entawëmompä. Tömengä öönædë waa pöni nänö da pönongaincoo do ænte quëwëmompä. Ayæ tömengä Tæiyæ Waëmö Önöwoca ingante da pönongä æninqe mönö tömengä tönö äanque bai ewocamompä. Mänömaï ewocamö incæte pancadäniya wadæ godäni inte edæ ædö cæte, Wënæ wënæ cæte awädö, ante ocæ ëmænte ponguinänii. ⁵ Tömënäni inömö, Wængonguï nänö änö waa pöni impa, ante do ëñëninäni inte ayæ, Wængonguï miinguiipo nänö badönedë mäniñedë miimämoque ba ate täi piñænte cæcäimpa, ante do ëñënanipa. ⁶ Incæte mäninö nani wede pönëninö ante Baa ante wadæ godäni bai tömënäni edæ ædö cæte iincayæ ate, Idæwaa wënæ wënæ cæte awädö, ante ocæ ëmænte ponguinänii. Ìñæmpa dodäni Wængonguï Wengä ingante awæ timpote wænönäni bai cædinque iinäni wæætë tömengä ingante adodö wænonte bai cædänipa. Ayæ tömënäni nani æmæwo ewente wæquinque tömänäni ayönäni Wængonguï Wengä ingante badete tote bai cædänipa.

⁷ Edæ cöönæ wantæ wantæ cæ ate woadäni cöne inguipoga tömëmö quiyadäni wææ pæte incapa. Incate amimö ba ate në quiyadinäni nanguï tä pete eyepæ ænäni ininqe Wængonguï wæætë onguipo tömenguipo waa pæ ate adinqe, Waa pæguipo abopa, angampa. Adobai tömengä nänö änö ante wantæ wantæ inö apænedäni ëñëninque woadäni gänë pönënanäni badinque wadäni inänite waadete cædäni ate Wængonguï mäninäni inänite, Minitö waa ëñente cæmiini abopa, ante pönö waa cæcampa. ⁸ Ömentacooque pæguipo daacamenque pæguipo guiquënë nänö æmæwo tante ewenguinque önonguipoque impa. Mäninguipo iya tanguï bai waocä adobai

Wængonguī nānō ānō ante nē Baa angā iñōmō tōmengā nānō æmæwo ëwenguinque Baa angampa.

Watapæ bacæimpa, ante pönëninque tæi ongömompā

⁹ Iñānāni ëñëedāni. Wadāni mǎnōmaī iñānīpa, ante yewæmōmōni incæte mōnitō ayōmōni mīnitō wīi tōmēnāni baī imīni amōnīpa. Wæætē Codito ængā beyænque nē quëwenguimīni iñōmīni inte mīnitō cōwē waa cæmīni imīni amōnīpa. ¹⁰ Edæ mīnitō cōwē waa cædinque Wængonguī ingante waadete pönëninque tōmengā quīnāni beyæ godō waa cægaimīni inte ñōwo godōmenque cæmīnīpa, ante adingā inte Wængonguī dicæ mīni cædō ante pönënamāi inguingāā. Wæætē nē nō cædongā inte tōmengā mīni cædō ante cōwē pönengampa. ¹¹ Codito beyænque watapæ bacæimpa, ante mīnitō wede pönëmīnīpa. Īnīnque mīnitō mǎnīnō mīni wede pönëno ante iīnque baganca wede pönencæte ante cædinque mīni waadete pönō cægāinō baī adobaī iīnque baganca cōwē cæedāni, āmōnīpa. ¹² Edæ nē wede pönënāni wæntæye iñāmaī iñāni iñōmō edæ Wængonguī, Pönōmo æedāni, ante nānō angaincoo cōwē æncædānīpa. Mīnitō iñōmō, Tōmēnāni æbānō cædānīi, ante adīnque tōmēnāni nāni cædō baī adobaī cædinque wæntæye iñāmaī inte Wængonguī nānō angaincoo adobaī æncæmīnīpa, āmōnīpa.

¹³ Wængonguī, Botō ānō baī cōwē cæcæboīpa, ante Abadāo wodi ingante angacāīpa. Mǎnōmaīnō ante nāwangā īpa, ante Abadāo ëñencæcāīpa, ante cædinque tōmengā, Wacā ëmōwo godōmenque tæi pīñængā ëmōwo ante apænebo ëñëninque do ëñencæcāīpa, ante cæyongante wacā nē tæi pīñængā guiquēnē edæ dæ angacāīpa. Īnīnque Wængonguī iñōmō nāmā ëmōwo ante apænedīnque, Wængonguīmo nē Quëwëmo inte nōingā ante āmo ëñëe, ānīnque iīmaī angacāīpa. ¹⁴ “Botō bitō imite pönō waa cæbo ate bitō pæiñāni nangui yebænīnque bacoo bacædānīpa. Botō Wængonguīmo nē Quëwëmo inte āmopa.” ¹⁵ Ante do angā ëñengāingā inte Abadāo wodi wantæpiyæ ænāmaī inte wānō cōñongante Wængonguī tōmengā nānō angāinō baī pönō cæcā ængacāīpa.

¹⁶ Wadāni guiquēnē, Nāwangā āmopa, ante ëñencædānīpa, ante cædinque wacā ëmōwo godōmenque tæi pīñængā ëmōwo apænedīnque ānānīpa. Mǎnōmaī cædinque waocā, Botō godōmenque nē tæi pīñængā tōnō guëa cæte baī ānīmo inte ædō cæte babæ ante wadō cæquīmoo, ante baī apæneyongante wacā Ao angā ate tōmēna nāna guëa cæcāya badapa.

¹⁷ Wængonguī iñōmō, Botō wadō baī ānāmaī iñōmo inte mǎnīi botō angāinō baī cōwē cæcæboīpa, angacāīpa. Ayæ, Mǎnōmaī īpa, ante botō angaincoo nē ænguīnāni ædæmō ëñencædānīpa, ante cædinque Wængonguī nāmā ëmōwo apænedīnque, Botō Wængonguīmo nē Quëwënōmo inte nāwangā āmopa, angacāīpa. ¹⁸ Tōmengā, Botō pönō cæbo beyænque watapæ bacæimpa, ante nānō angāinō ante æncæte ante mōnō Wængonguī gāmænō do wodi winonte pōmōīpa. Īnīnque tōmengā weca do pōnīmō iñōmonte tōmengā wæætē, Mēnea beyæ mōnō watapæ bacæīpa, angampa. Ayæ, Mīnitō wampo pönëninque edæ botō tōnō edæ godōmenque cæcæmīnīpa, ante tōmengā ædæmō apænecampa. Mēnea ante apænebo ëñëedāni. Botō Wængonguīmo iñōmo inte nāmā Wængonguī ëmōwo apænebo beyæ nē ëñëmīni inte mīnitō mǎnīne beyæ pönencæmīnīpa. Ayæ godōmenque wade ante, Wængonguī incæ ædō cæte babæ wapiticæ anguingāā, ante pönencæmīnīpa. Mǎnōmaī Wængonguī mēnea ante cægacāīpa.

¹⁹ Īnīnque wipo gæguīncamē inte tæi ñānoncadodāni ate wāi wocæ baī mōnō iñōmō edæ, Mǎnīne mēnea beyæ watapæ bacæīpa, ante mōnō wede pönëno beyæ tæi ongōmō inte mōnō ædō cæte wadæ goquīi. Mōnō wede pönëno beyænque edæ Wængonguī oncōnē weocoo wææ owoyōmo tadōmengadæncōnē guīi öönædē ñā cæte baī i īnīnque mōnō öönōwoca iñōmō edæ tæi ongōnte baī ëwocāmōmpā. ²⁰ Itota iñōmō tāno beyænte öönædē æidinque mōnō beyæ ante mǎnīncōnē do wāānē guīgacāīpa. Īnīnque Mëequitedeco nē godongā ñænængā nānō ingāi baī badīnque Itota, Wængonguī quī, ante nāmā wepæ nē Godongā Ñænængā pōnī inongā inte edæ cōwē ongongampa.

7

Mëequitedeco bai Itota në Godongä Nñænængä ingampa

¹ Mëequitedeco guiquënë Tadëë nani añömö quëwënäni awënë odeye inongä inte tömengä, Wængongui Æibæ pönï në Quëwengä qui, ante në godongä ingacäimpa. Iñongante Abadäo wodi wadäni awënë odeyeidi inänite wänonte pöñongante Mëequitedeco eyepæ pö bee téninque, Abadäo ëñëmi, angantapa. Bitö imite Wængongui pönö waa cæcæcäimpa. ² Ante pönö waa apæneyongante Abadäo iñömö awënëidi wodi nani mangaincoo tömengä nänö ö ænincoo bacoo pönï incoo adinque önompo tipæmpoga mänimpocato cabo tí gæte cö cædinque, Wængongui qui, äninque Mëequitedeco ingante adocatoque pædæ godongä ængacäimpa.

Mëequitedeco në awënë odeye iñongante tömengä ëmöwo pemonte bai cædinque wadäni, “Awënë inongä inte tömengä në nö cæcä ingampa,” ante angadänimpa. Ayæ, Tadëë “Gänë pönëñömö” nani angaiñömö quëwënäni awënë odeye ingampa, ante pönëninque tömënäni, “Awënë odeye inongä inte tömengä në gänë pönengä ingampa,” ante wawo pemongadänimpa. ³ Tömengä badä ömaacä ingä bai, tömengä wæmpocä ömaacä ingä bai, tömengä nänö ëñagäionæ ömaacä ingä bai, tömengä nänö wængäionæ ömaacä ingä bai ante dodäni tömengä ingantedö ante yewæmongadänimpa. Mänömaï i ininque mönö, Wængongui Wengä nänö cöwë ingä bai Mëequitedeco adobaï, Wængongui qui, ante në cöwë godongä ingampa, ante pönengäimpa.

⁴ Tömengä nñænængä pönï ingacäimpa, ante botö iïmaï ante apænebo pönëedäni. Wængongui qui, ante në godongä nñænængä pönï Mëequitedeco ingampa, ante pönëninque mönö wæmæ Abadäo wodi incæ tömengä nänö ö ænincoo önompo tipæmpoga mänimpocato ongö adinque adocatoque æninque Mëequitedeco nñænængä ingante pædæ godongä ængacäimpa. ⁵ Mönö Abadäo wodi pæimö iñömö tömancabomö inömö incæte adocabodäniya mönö tönïñadäni Debiidi pancadäniya guiquënë, Wængongui qui, ante në godönäni bagadänimpa. Bayönänite Möitee wodi tömënäni inänite iïmaï angacäimpa. Minitö tönïñadäni inänite ämini ëñëninque tömënäni wæætë tömënäni nani ænincoo önompo tipæmpoga mänimpocato ongö adinque adocatoque pædæ pönönäni æncæminimpa, ante wææ angä ëñëninque tömënänique, Wængongui qui bacäimpa, ante në ænäni inänipa. ⁶ Mëequitedeco guiquënë Debii wodi pæingä inämaï ingaingä incæte adocatoque angä ëñëninque Abadäo wodi pædæ godongä ængacäimpa. Do iñömö Wængongui incæ Abadäo ingante apænedinque, Bitö qui, ante botö cöwë pönömo æncæbiimpa, angacäimpa. Incæte wantæpiyæ ate Wængongui nänö në angaingä iñongante Abadäo ingante apænedinque Mëequitedeco iñömö, Wængongui bitö imite pönö waa cæcæcäimpa, ante pönö waa apænegacäimpa.

⁷ Mönö ayömö guiquënë, Nñænænäni inönäni iñömö tömënänique önönänique inänite në godö waa apænedäni inänipa, ante do ëñëniimo inte mönö wadö ante ædö cæte pönenguïi. Ininque, Abadäo wodi önonganque iñongante Mëequitedeco në nñænængä inongä inte edæ mänömaï waa apænegacäimpa, ante mönö edonque ëñëmompa. ⁸ Mäninäni Debiidi guiquënë në nñömæintai ëñadäni inänipa. Incæte tömënäni inänite wadäni, Wængongui qui bacäimpa, ante adocatoque cöwë pönönäni ænäni. Iingä Mëequitedeco guiquënë nñömæintai ëñadämaï bai ingaingä inte në quëwengä ingampa, ante yewæmongatimpa. Tömengä mänömaï në quëwengä bai iñongante Abadäo wodi tömengä ingante, Wængongui qui, ante adocatoque godongä ængacäimpa.

⁹ Mänömaï impa, ante pönëninque botö, Eñencæminimpa, ante nïwo godömenque yewæmömo aedäni. Tömënäni nani æninö önompo tipæmpoga ganca mänimpocato ongö adinque, Wængongui qui, ante adocatoque pædæ godöñönäni Debii nani pæincabo incæ në ænäni inönänimpa. Incæte Debii wodi wæmpocoo ingainga inongä inte Abadäo wodi adocatoque do godongä ininque tömengä pæingä inguingä Debii iñömö wæmpocoo tönö äanque bai adocatoque do godonte bai ayæ ate ëñate quëwengacäimpa. ¹⁰ Edæ Abadäo wodi nänö pæinäni Debiidi inänipa. Ininque Debii ayæ ëñadämaï iñongante

tömengä wæmpocoo Abadäo wodi ingante Mëequitedeco pö bee tente adocatoque æninque Debii nänö ænguënencoo incæ pancacooga adobaï ængacäimpa.

¹¹ Wængonguï doyedë angä ëñëninque Debiidi pancadäniya, Wængonguï qui, ante në godönäni bagadänimpa. Ayæ Wængonguï, İımaï cæedäni, ante angä ëñente yewæmöninque Debiidi wæætë wadäni İñänite odömonte apænedäni ëñengadänimpa. Incæte Debiidi, Wængonguï qui, ante näni godönö beyænque mönö Wængonguï ayongä mönö ædæmö pædäni baï edæ dicæ entawente bamongaa. İñæmpa mäninäni näni godönö beyænque në picænäni baï bamö baï ñöwo wacä në Godongä ingante Wængonguï da pönönämaï incædongäimpa. Ayæ, Wængonguï qui, ante në Pönongä incæcäimpa, ante Codito ingante da pönöninque Wængonguï, Debii wodi pæingä Aadöo nänö pönongä baï Codito adobaï pönoncæcäimpa, ante änämaï inte wæætë, Mëequitedeco nänö pönongä baï cædinque Codito pönongä beyænque waodäni botö ayömö në nö cædäni bacædänimpa, angacäimpa. ¹² Ayæ, Wængonguï qui, ante näni godoncabo İñönänite Wængonguï, Idæwaa cæminipa, äninque wacä ingante, Bitö wæætë botö İmote në Pönömi bacæbiimpa, angacäimpa. Ayæ wacä mänömaï në Godongä bacä beyæ Wængonguï, İımaï cæedäni, ante nänö wææ angainö ante wëä godonte baï cædinque wade äninque wææ angä ingacäimpa.

¹³ İninque Wængonguï ñöwo, Nö Pönömi bacæbiimpa, ante nänö në angaingä İñömö Debiidi näni cabo İñämaï inte wæætë wacabocä İnongä ingampa. Incæte ñöwocä Codito guidëñäni İñömö, Wængonguï qui, ante näni İya täimpaa cöwë godönämaï İñönänimpa.

¹⁴ Edæ, Wængonguï qui, ante oodaaidi näni cabo në godönäni incædänimpa, ante Möıtee wodi dicæ angacäİñaa. Incæte, Mönö Awënë İñömö Oodaa wodi pæingä ingacäimpa, ante edonque acæimpa. ¹⁵ İninque Mëequitedeco nänö ingä baï wacä wæætë, Wængonguï qui, ante në Godongä bacä adımö inte mönö godömenque edonque ëñengäimpa. ¹⁶ Edæ Nöwocä tömengä mäemæidi wıı në godönäni ingadänimpa. İninque, Bitö mäemæidi näni godongä baï bitö adobaï godonte ëñëe, ante ædö cæte anguıı. Wıı tömengä mäemæidi näni cægä baï cædinque tömengä në Godongä bagacäimpa. Wæætë cöwë në wænämaï Quëwenguingä inte tömengä nämä nänö tæı pıñænö beyænque në Godongä bagacäimpa.

¹⁷ Edæ tömengä ingante apænedinque Wængonguï,

“Mëequitedeco, Wængonguï qui, ante në pönongä cöwë nänö ingä baï,

bitö adobaï ñimpo cædämaï inte në Pönömi cöwë incæbiimpa,” ante apænegacäimpa.

¹⁸ İninque, İımaï cæedäni, ante Möıtee wodi wëñëñedë nänö wææ angäine incæ aquııne inte önöneque baï İñönte wëä godonte baï bagatimpa. ¹⁹ Edæ Möıtee wodi, İımaï cæedäni, ante nänö wææ angainö ëñente beyænque mönö Wængonguï ayongä ædæmö pædäni baï dicæ entawente baquımöö. Wængonguï wæætë, Codito pönö cæcä beyænque watapæ quëwencæminiipa, ante ñöwo pönö apænegacäimpa. İninque, Mänömaï impa, ante pönëninque mönö Wængonguï weca pömompaa.

²⁰ Wængonguï wıı önönque angacäimpa. Wæætë tömengä nämä ëmöwo apænedinque, Botö Wængonguımo në Quëwëñömo inte näwangä ämopa, äninque Codito ingante angä ate tömengä wæætë, Wængonguï qui, ante në Godongä bagacäimpa. Wæætë wadäni İñänite guiquënë tömengä wıı nämä ëmöwo apænedinque, Näwangä ämopa, ante änämaï ingä incæte tömëñäni önönque, Wængonguï qui, ante në godönäni bagadänimpa. ²¹ Codito ingante guiquënë Wængonguï İımaï ante apænegacäimpa.

“Bitö ñimpo cædämaï inte, Wængonguï qui, ante në Pönömi cöwë incæbiimpa.

Ante botö në Tæıyæ Awënë İñömo inte nöingä äninque İncayæ ate wadö ante cöwë änämaï incæboimpa.”

²² Wængonguï, Itota botö İmote në Pönongä İnongä inte mıñitö beyæ cæcä ate mıñitö Ao ämıni İninque mönö godongämæ waa cæcäimpa, äninque Wængonguï mönö İmote ñöwo godömenque waa pönı apænegacäimpa. İninque Wængonguï mänömaï nämä ëmöwo apænedinque, Näwangä ämopa, äninque Itota nänö në angaingä İñongante mönö Itota ingante pönëninque, Wængonguï nänö angainö baï cöwë cæcæcäimpa, ante do ëñëmompaa. ²³ Mäninäni guiquënë në ñömæintai ëñagäinäni inte ædö cæte ñimpo

cædāmaī inte Wængonguī ingante nē godōnāni cōwē inguīnānii. Īninqe wīi adocanque nē godongā ingacāimpa. Wacā wacā nē godōnāni bagadānimpā. ²⁴ Itota ĩñōmō nē wænāmaī quēwēnongā inte tōmengā, Wængonguī qui, ante nē Godongā ĩnongā inte cōwē quēwengampā. ²⁵ Edæ tōmengā nē wænāmaī Quēwēnongā inte Wængonguī ingante mōnō beyæ ante cōwē apænedinque, Botō bitō gāmænō nē māmōmo pōnāni ĩnānite bitō pōnō waa cæcæbiimpā, ante ĩmpo cædāmaī inte cōwē apænecampā. Wængonguī ingante cōwē apænecā ĩnongā inte tōmengā cōwē quēwēninqe ædæmō pōnō ængā beyænque mōnō wæætē cōwē wænāmaī quēwenguīmō ĩmompā.

²⁶ Wadāni nāni ēñēnāmaī cæcabo baī wīi ĩnongā inte Itota ĩñōmō tæiyæ waēmō ĩnongā ingampā. Wentamō mongænāmaī ĩnongā ĩñongante tōmengā ingante ædō cæte pīinte apænte anguīnānii. Mānōmaī ingā adinqe Wængonguī tōmengā ingante oōnædē æmonga pōnī ængō cæcā ongongampā. Īninqe tōmengā adocanque pōnī, Wængonguī qui, ante nē nō Godongā Ñænængā pōnī ĩnongā inte mōnō wædō ante eyepæ pōnī pōnō cæcampā. ²⁷ Wadāni nē godōnāni ñænænāni pōnī ĩnāni guiquēnē tōmēnāni tāno godōninqe nāmā nāni wēnæ wēnæ cædō beyæ ante, Wængonguī botō ĩmote waa acæcāimpā, ante cæningā wepæ ĩimō ĩñō ĩimō ĩñō godōnānīpā. Ayæ ate wadāni nāni wēnæ wēnæ cædō beyæ adobaī godōnānīpā. Itota guiquēnē wēnæ wēnæ nāni cædō baī cædāmaī ĩnongā inte nāmā beyænque godōnāmaī ingacāimpā. Ayæ wamō mōnō wēnæ wēnæ cædō beyæ wæætē wæætē godōnāmaī inte tōmengā eyepæ ĩnongā inte adopoque pōnī godongacāimpā. Īninqe tōmengā nāmā wepæ godōninqe eyepæ pōnī godongā adinqe Wængonguī wæætē mōnō ĩmonte waa acampā.

²⁸ Mōitee wodi nānō wææ angāinō ante ēñente cædinque waodāni aquīi ĩnāni nāni cabo ĩñōnānite pancadāniya ĩnānite ānāni Wængonguī ingante nē godōnāni ñænænāni do badānīpā. Wængonguī guiquēnē ĩncayæ ate nāmā ĩmōwo apænedinque, Botō Wengā ædæmō Picængā nē ēñengā bagaingā ingante āmo ate tōmengā nē Pōnongā Ñænængā bacæcāimpā. Botō Wængonguīmo nē Quēwēnōmo inte nāwangā āmopa, angacāimpā.

8

Wængonguī ñōwo nānō angāinō ante Itota ĩninqe cæcā

¹ Mānōmainō ante quīnante yewæmōmōnii. Edæ, Mōnō wædō beyæ ante, Wængonguī quī, ante nē Godongā Ñænængā pōnī inte ongongampā, ante, Nāwangā ĩmpā, ante edonque ēñencæmīnimpā, ante yewæmōmōnīpā. Tōmengā ĩñōmō oōnædē ædinque Awēnē Wængonguī tōmēmængā ĩnō tæ contadinque Tæiyæ Awēnē inte ongongampā, ante yewæmōmōni adinqe ēñencæmīnimpā. ² Mānōmaī ĩnongā inte tōmengā wīi waocā nānō mænongāincōnē cæcampā. Wæætē Wængonguī, Owocæboimpā, ante tæiyæ waēmō nānō mænongāincōnē Itota ĩñōmō mōnō beyæ ante, Wængonguī qui, ante nē Godongā Ñænængā pōnī inte cæcampā.

³ Inguipoga quēwēnāni guiquēnē adocanque ingante, Wængonguī qui, ante bitō nē godōmi ñænāmi pōnī bacæbiimpā, ānāni badinqe tōmengā nē tā nē tā cædinque māincoo cōwē godonguēnengā ingampā. Īninqe māningā Itota guiquēnē adobaī nē Godongā Ñænængā pōnī ĩnongā inte adobaī godonguēnengā ingampā. ⁴ Edæ, ĩncooque godoncæmīnimpā, ante Mōitee wodi wææ angā ēñente cædinque inguipoga nē godōnāni guiquēnē do eyepæ pōnī godōnāni ĩnānīpā. Īninqe tōmēnāni nāni godō baī Itota ĩñōmō ædō cæte godonguēnengā inguīgāā. Inguipogaque quēwengā inte baī tōmengā ĩñōmō edæ Wængonguī ingante nē godongā ĩnāmaī incædongāimpā.

⁵ Tōmēnāni guiquēnē, Wængonguī oōnædē nānō owocō cōwē ongō baī inguipoga adobaī mænonte mānincō ōwocodenganque baī ĩñonte acæimpā, ante adobaī pōnī mænongadānīpā. Mānōmaī mænōninqe tōmēnāni mānincōnenque, Wængonguī qui, ante nē godōnāni inte cædānīpā. Īninqe Wængonguī, Adobaī pōnī mænōincō ongongæimpā, ante cædinque Mōitee wodi nē mænonguīgā ingante doyedē angacāimpā. “Mōitee ēñēmi. Bitō, Æbānō mænonguīi, ante, Æbānō badonguīi, ante botō

onquiyabo iñömö bee tente odömömo adinque badoncæbiimpa. Bitö cöwä adinque botö odömönö bai iincö adobai mänoninque iincönë ongoncoo tömancoo adobai pöni badoncæbiimpa,” angacäimpa. ⁶ Wængongui, Botö Möitee tönö wææ äninque, İmaï cæedäni, ämo ate Ao ämini iinque mönö godongämæ waa cæte quëwengæimpa, ante wëenënedë nänö angainö wædænque waa ingatimpa. Nöwo guiquënë tömengä, Itota ængä beyænque quëwëmini inte Ao ämini iinque minitö botö tönö godongämæ waa cæte quëwencæminimpa, ante nänö änö iñömö godömenque waa pöni impa. Edæ Wængongui nänö änö iinque bacäimpa, ante Itota incæ nö cægacäimpa. Ayæ adobai mäninö në godönäni nani cædö guiquënë wædænque waa iñonte Itota nänö nö cædö guiquënë godömenque waa pöni impa.

⁷ Mäniine edæ, Mönö godongämæ waa cæte quëwengæimpa, ante Wængongui wëenënedë nänö angaine iñömö mönö quëwenguinö ante eyepæ i bai Wængongui ñöwo wade ante änämaï incædongäimpa. ⁸ Incæte waodäni wentamö mongænäni adinque Wængongui doyedë apænedinque, “Botö pönö cæbo ate minitö Ao ämini iinque mönö godongämæ waa cæte quëwengæimpa,

Ante botö në Awënë inömo inte idægoidi inänite oodaaidi inänite iincayæ ate miine ante mä pöni apænecæboimpa.

⁹ Mämæidi doyedë Equitobæ quëwëñönänite botö töö æmænte ænte poncæte ante cædinque,

tömänäni inänite, Mönö godongämæ waa cæcäimpa, äñömote tömänäni wæætë pango cæte gogadänimpa.

Pango cæte godäni ate botö wæætë dadi emæmonte tömänäni inänite adämaï ingaboimpa.

Mänömaï beyæ botö wëenënedë botö angainö bai ñöwo wæætë adobainö ante änämaï incæboimpa, ante botö në Awënemo inömo inte ämopa.

¹⁰ Mäniñedë ate edæ idægoidi inänite botö, İmaï pönö cæbo ate minitö Ao ämini iinque mönö godongämæ waa cæte quëwengæimpa, äninque edæ İmaï cæcæboimpa. İmaï cæedäni, ante botö wææ änö ante godö apænebo ëñëninque mäniine ante mimönë yewæmonte bai entawëninque tömänäni në wede pönänäni incædänimpa. Tömëmo tömänäni Wængonguimo iñömote tömänäni wæætë botö quinäni incædänimpa.

¹¹ Mäniñedë botö angaiñedë ba ate edæ waocä tömengä guidengä ingante ayæ wacä ingante odömonte apænedinque, Bitö Wængongui ingante ate bai pönencæbiimpa, ante quinänte anguingä. İñæmpa mäniñedë ate guiyanga pöni inongä incæ ñænængä pöni inongä incæ tömänäni tömänäni botö imote do adinque pönencædänimpa.

¹² Edæ tömänäni ëñänämaï nani cædö ante botö pänämaï inte waadete godö ñimpo cæcæboimpa.

Ayæ tömänäni wænæ wænæ nani cægainö ante adämaï inte bai botö pönänämaï incæboimpa,” ante Wængongui apænecäimpa.

¹³ Äninque ñöwo, Æmo beyænque quëwëmini inte minitö Ao ämini iinque mönö godongämæ waa cæte quëwengæimpa, ante mä pöni äninque Wængongui wëenënedë, İmaï cæedäni, ante nänö wææ angaine ante, Woïne inte eyepæ inämaï ingaine ënepa, ante bai cæcampa. Woïne iñömö oo dæ baquïne ënepa.

¹ Wængongui wëenënedë dodäni inänite, Botö pönö cæbo ate munitö Ao ämïni ïninqe mönö godongämæ waa cæte quëwengæimpa, angacäimpa. ïninqe tömengä nänö wææ angainö bai cædinque tömënäni, Wængongui ingampa, ante tömengä beyæ cæquënänäni ingadänimpa. Ayæ inguipoga tömengä owoquincö tæiyæ waëmö oncö mænöninqe tömengä weca pöninqe cæquënänäni ingadänimpa. ² Angä ëñëninque dodäni, Wængongui nänö owoquincö, ante æmontaicö badöninqe weocoo odemontai wodönedinqe mencönea badongadänimpa. Yabæcönë, Tæiyæ Waëmö Oncö impa, ante nani ancönë ïñömö mäniñömö gongapæncade doyæncade tæiyæ ti wodönoqui encadocade ongongatimpa. Ayæ awæmpaa badöninqe tömënäni, Wængongui beyæ tæiyæ waëmö päö öñongæimpa, ante cædinque mänimpaa päö ñö cædäni öñongatimpa.

³ Weocoo wacoo nani guimongademö wodöñömö guimongacö ïñömö Tæiyæ Waëmoncö Pönï nani angaincö ingatimpa. ⁴ Mänincönë ogui wacæimpa, ante cædinque, Ogui waqui iya tangæimpa, ante awæmpa oodo nani pönö tee bæimpa badonte cö cædäni ongongatimpa. Ayæ, Mönö godongämæ waa cæcæimpa, ante wææ äninque Wængongui nänö yewæmongainca Tæiyæ Waëmoncönë Pönï ongongæimpa, ante cædinque awæmpa badöninqe oodo yabæpa tee baadinque cæncadempa adobai tee baate nani cönöimpa ongongatimpa. Ayæ oodo æninque aca podonte wamoncade bai bædinque tömënäni önomæca nani cængaimö Mänää nani angaimö æninque oodo nani bædincadedë da wëninque mänincade wæætë oodo ëmompaa cæncadë ïnö da wente cö cæte mangadänimpa. Ayæ adobai Aadöo wodi nänö ongonto tä bocagainto æninque ado oodo ëmompaa cæncadë ïnö da wente ñö cædäni öñongatimpa. Ayæ Wængongui dicaboga nänö, ïimai cædäni, ante yewæmongaine adoyömö ongongæimpa, ante cædinque mäninca æninque ado oodo ëmompaa cæncadë ïnö da wëninque cö cædäni ongongatimpa.

⁵ Mänimpaa yædopaa waomïni mini wënæ wënæ cædö beyæ wepæ godonte impa, ante Wængongui, Botö pönö waadeimpa impapa, angacäimpa. Ayæ Wængongui në ñäö ëmongä weca në owoda ïñömö adobai ñäö bai ëmöna ïñönate tömëna nana ëmönö bai dodäni adobai badonte oodo ëmompaa æmatæ æmatæ tæi goncædäni ongongatimpa. Ayæ tömëna öömä tiyæmäa pömæna gänë ïñömö Wængongui, Botö pönö waadeimpa, ante nänö angaimpa öñongatimpa. Mänimpacoo æbänö impaa, ante mäninque ñöwo yewæmömönipa.

⁶ Tömancoo mänömai cöo cædäni ongöñonte, Wængongui qui, ante në godönäni que ïimö ïñö ïimö ïñö yabæcönë pö guidinque, Wængongui ingampa, ante cægadänimpa. ⁷ Guimongacönë guiquënë në godongä ñænængä ïñömö wadepo ïñö adopoque wadepo ïñö adopoque pö guidinque tömengä adocanque guidongäimpa. Incæte tömengä në godongä ñænængä pönï ïnogä incæ wepæ næænämai inte ædö cæte guiquingä. Edæ wepæ cöwë ænte guidinque tömengä nämä beyæ godö pipo pipo cædinque, Wadäni ëñënamai inte nani wënæ wënæ cægainö incæ ñä mënongacæimpa, ante tömënäni beyæ adobai godö pipo pipo cædongäimpa. ⁸ Mänincö æmontaicö ayæ ongönedë Tæiyæ Waëmoncönë Pönï wii önonque guigadänimpa. Wængongui nänö owodö æidö mäniñedë adobai wii edonque ingatimpa, ante odömoncæte ante Wængongui Tæiyæ Waëmö Önöwoca angä guidämai ingadänimpa.

⁹ Mänömainö ante odömöninqe tömengä mönö ñöwomö imonte wæætë, ïimai ante ëñencæminimpa, ante cægacäimpa. Waocä, Wentamö mongænte awædö, ante në wædongä inte waëmö ïñömö pöninqe, Wængongui qui, ante baö iya tangui tönö bequi cængui godongampa. Mänömai ancaa godongä incæte tömengä mimö nämä nänö apænte entawënö ñä mënongadämai inte wentamö ayæ mongænte entawëngäimpa. ¹⁰ Mänömai cænguinque bequinque ante wææ äninque, Æbänö cæte godonguii, ante ayæ, Æpænenque æbänö cæte mënongaqui, ante dodäni mänincooque ante nani wææ angainö ante ëñente cægadänimpa. ïninqe, Waguiipo ïninqe bayonte önöwoca ædæmö mënongate quëwengæimpa, ante miinguipo ïninqe bagancaque tömënäni mänincooque ante cædönänimpa.

¹¹ Wapāmo mini waa quēwenguinque pōmāmo, ante badoncæte ante mōnō Codito iñōmō, Wængonguī quī, ante nē Godongā Ñænængā pōni inongā inte do pongacāimpa. Pōninque tōmengā waodāni ōnompoca nāni mænongaincōnē guidāmaī inte Wængonguī nānō badongainguipoga cædāmaī ingacāimpa. Wæætē adodō go æidinque tōmengā ōönædē Wængonguī nānō owocōnē ñænæncōnē guidinque nāwā owocōnē cægacāimpa. ¹² Caboda wepæ næænte guidāmaī inte wagada wē wepæ næænte guidāmaī inte mōnō Codito iñōmō edæ nāmā wepæ godōninque ōönædē Tæiyæ Waëmoncōnē Pōni æmæwo guiigacāimpa. Ìninque tōmengā ængā beyænque mōnō æmæwo pōni abæ tawænte baī cōwē quēwēmompā.

¹³ Ñōmæī incæ gampodinque, do wæningā baō incæ gampodinque waocā nāate baī wædongā inte edæ Wængonguī weca ædō cæte ponguingā. Wæætē, Tōmengā waiñacā bate poncæcāimpa, ante cædinque, Wængonguī quī, ante nē godōnāni iñōmō caboda wepæ tōnō wagada onguīñængā wepæ æninque nē nāadingā baonga pipo pipo cædānīpa. Ayæ wagada baquēcā ingante wænonte nē tāninque gōnāique adobāi æninque tōmengā baonga pipo pipo cædinque, Bitō nē nāadīmi inte waiñabi babīpa, ante cægadānīpa.

¹⁴ Mōnō Codito guiquēnē Tæiyæ Waēmō inongā inte nē cōwē Quēwengā Ōnōwoca tōnō guēa cædinque Wængonguī ingante, Bitō quīmo imopa, ante nāmā wepæ godongacāimpa. Tōmengā wepæ iñōmō wīi cæningā wepæ baī inte godōmenque eyepæ pōni wepæ imæmpā. Ìninque mōnō wænguinque wēnæ wēnæ cæyōmonte tōmengā, Mīnitō mīmō entawēmīni inte ñā mēnongate entawente nāmā apænte pōnente quēwencæmīnīmpā, ante nāmā wepæ do godongacāimpa. Ayæ mōnō wēnæ wēnæ cægainō ante wadæ cædinque godōmenque pōnō cæcā ate mōnō Wængonguī nē Quēwengā ingante nē cæmō badinque cæmompā.

¹⁵ Wængonguī mīine ante apænedinque, Mōnō godongāmæ waa cæte quēwengæīmpā, āñongante mōnō waocabo wæætē ēñēnāmaī inte wēnæ wēnæ cæmō adinque Codito iñōmō mōnō wēnæ wēnæ cægainō beyæ ante wæætē wængā beyænque mōnō abæ tawænte baī quēwēmompā. Ñōwo iñōmō Wængonguī mīine ante apænedinque, Botō pōnō cæbo ate mīnitō Ao āmīni ininque mīni ænguīncoo æmæwo æninque mīnitō cōwē mante quēwencæmīnīmpā, ante aa pecā pongamōnīmpā. Ìninque mōnō Codito wæætē, Wængonguī nānō angaincoo æncæmīnīmpā, ante cædinque iinque cæcā ate mōnō nē pōnīmō inte do ænte quēwēmompā.

¹⁶ Waocā, Nāñe wæmo adinque botō māincoo inī iināninque æncædānīmpā, ante emōwo emōwo yewæmongā adinque wadāni wæætē, Nāwangā æmæwo wængāīmpā, ante ēñente ate, Nē wængaingā nānō ante yewæmongainō baī bacæīmpā, ante iinque cædānīpa. ¹⁷ Ìñæmpā, Ìñāni quī bacæīmpā, ante yewæmongā incæte nē yewæmōningā mīingā quēwēñongante tōmengā māincoo ædō cæte tōmēnāni quī baquīī. Wæætē tōmengā æmæwo wængā ate māniñedē ate tōmengā nānō yewæmongāī baī iinque cædānīpa.

¹⁸ Mānōmaī beyæ wēēnēñedē Wængonguī, Mōnō godongāmæ waa cæcæīmpā, ante yewæmongā ate dodāni cæningā wænonte ate wepæ gowete ate godongāmæ Ao āninque iinque cægadānīmpā. ¹⁹ Wængonguī, Ìmaī cædāni, nānō wææ angainō tōmanta adinque Mōitee wodi iñōmō tōmānāni inānite apænecā ēñēnāni ate wepæ gowete ate cægacāīmpā. Wagada wēnāni wepæ tōnō caboda wepæ æninque æpæ tōnō ænte wempo cædēninque iitopowæ nāni āwæ yæpængō æninque obega ocaguī opatawæmæ nāni guipæninguī ænte pæ dacadinque wepæ nāni wempo cædēnimænē bee podonte Mōitee iñōmō, Mānīnta adinque ēñengæīmpā, ante cædinque mānīnta wepæ pipo pipo cægacāīmpā. Ayæ nē ēñēnīnāni tōmānāni baonga wepæ pipo pipo cædinque tōmengā iīmaī angacāīmpā. ²⁰ “Wængonguī, Botō pōnō āmo ēñēninque mīnitō Ao ante ēñente cæmīni ininque mōnō godongāmæ waa cæcæīmpā, ante nānō wææ angainō beyænque iī wepæ īmpā. Ìninque iī wepæ emontāa adinque mōnō Ao ante mānīne ante ēñente cæcæīmpā,” ante Mōitee wodi apænegacāīmpā. ²¹ Ayæ æmontaīcongā wepæ pipo pipo cædinque tōmengā mānīncōnē Wængonguī beyæ nāni cæincooga wepæ

pipo pipo cægacäimpa. ²² Ayä wodo tömancooga ante Wængonguï, Wepä tönö ñä mënongacäimpa, äninque wææ angä cægadänimpa.

Ïnämpa wepä gowedämaï ïñonte mönö wënä wënä cämö adinque Wængonguï në panguënegä inte ædö cæte pönö ata cæpoquingää.

Codito wepä beyænque mönö mimö mënongacäimpa

²³ Öönädë ongoncoo bai inguipoga nani adobai badongaincoo incæ cæningä wænonte ate wepä tönö ñä mënongaquënenäni ingadänimpa. Wæätë näwä öönädë Wængonguï weca gote mönö ongonguinque mönö adocanque në waëmö pönï ïnongä wepä beyænque ñä mënongaquënemö ïmompä. ²⁴ Edæ öönädë Wængonguï nänö owocönë bai ante waodäni önompoca nani tæiyä waëmö pönï badongaincönë mönö Codito guidämaï ingacäimpa. Wæätë öönädë incæ æidinque tömengä mönö beyä ante Wængonguï weca guidinque a ongongampa.

²⁵ Wængonguï quï, ante inguipoga në godongä ñænængä pönï ïnongä guiquënë wïi nämä wepä ænte pöninque cæningä wepä incæ ænte pöninque wadepo ïñö adopoque wadepo ïñö adopoque Tæiyä Waëmoncönë Pönï guicampa. Mönö Codito guiquënë inguipoga në quëwengä bai wïi adobai ïnongä inte wïi wæätë wæätë godoncæte ante öönädë æi guigacäimpa. Wæätë öönädë adopoque æi guidinque tömengä nämä wepä adopoque godongacäimpa. ²⁶ Edæ inguipoga në quëwënäni nani cæi bai cæcä bai tömengä Wængonguï inguipoga nänö badöñedë mä caate wædinque wantæ wantæ ïñö cædinque ñöwo ganca tæmpo caate wæcædongäimpa. Wæätë mönö waocabo tömämö pedænguipoga mönö quëwënö wodo ïinque bayonte tömengä ñöwo pönï adopoque pönï pöninque wënä wënä mönö cædö ante æmæwo wido cæcæte ante nämä wepä godongacäimpa.

²⁷ Mönö waocabo guiquënë në wænguimö ïnömo inte adopoque wænte ate Wængonguï weca pö gongæñömonte tömengä apænte ancæcäimpa. ²⁸ Mönö waocabo nanguï imö ïñömonte mönö Codito ïñömö wënä wënä mönö cædö ante mongæninque adopoque nämä godöninque wængacäimpa. Ayä wæätë pöninque tömengä wïi mönö wënä wënä cædö mongæncæte ante poncæcäimpa. Wæätë tömengä nänö ponguïnö ante në wänö cömö ïñömonte tömengä, Quëwencæminimpa, ante mönö ïmonte æncæte ante poncæcäimpa.

10

¹ Ïincayä ate në Ponguingä ïñömö, Wængonguï quï, ante nämä wepä eyepä godoncæcäimpa, ante ödömoncæte ante cædinque Wængonguï, Ïïmaï cæte cæningä wepä pönödäni, ante do wææ angacäimpa. Incæte mänïi wepä Wængonguï nänö wææ angaimä ïñömö wïi eyepä godonguï ænguï impä. Ïininque mänimä tömengä nänö wææ angaimä beyænque waocä ædö cæte ædæmö ëñente picængä bai baquingää. Ïnämpa idægoidi ïñömö wadepo ïñö wadepo ïñö wepä ancaa godöninque Wængonguï weca pö ædæ wææninque, Bitö Tæiyä Waëmö ïmidö anguënë, ante apænecæte ante pönäni incæte tömënäni tömengä nänö wææ angainö beyænque picænäni bai dicæ badäniyaa. ² Tömengä nänö wææ angainö eyepä i bai tömënäni adopoque godöninque idæwaa godoncædönänimpa. Edæ, Wængonguï ingampa, ante në cædäni ïñömö mäninque godöninque ædæmö ñä mënongate bacædönänimpa. Ayä ïincayä ate tömënäni, Wentamö entawente wænguï wæ, ante nämä apænte wædämaï incædönänimpa.

³ Edæ wïi mänömaï impä. Wæätë, Botö wënä wënä cæte awædö, ante wæätë wæätë nani pönente wæquinque tömënäni wadepo ïñö wadepo ïñö godönönänimpa. ⁴ Edæ, Möni wënä wënä cægäinö ante mënongacäimpa, ante godöñönäni wagada onguïñä wepä tönö caboda wepä eyepä ïmämpa diyä mënongaquïi.

⁵ Cæningä wepä wïi eyepä impä, ante wædinque Codito inguipoga pöninque ïïmaï ante apænegacäimpa.

“Wængonguï ëñëmi. Cæningä baö nani wænonte pönönö tönö cænguï bequï nani, Wængonguï quï, ante pönönö adinque bitö edæ wïi æinëmi ingabiimpa.

Wæætē botō Waobo baquinque bitō botō baō ante badongabiimpa.

⁶ Waodāni, Wængonguī qui, ante iya tāmōni ate Wængonguī waa acæcāimpa, ante tāñōnāni bitō wīi tobi ingabiimpa. Tömēnāni, Wēnæ wēnæ mōni cædō ante Wængonguī pōnō wido cæcæcāimpa, ante pōnōñōnānite bitō Baa angabiimpa.

⁷ Ante adinque botō, 'Wængonguī ēñēmi. Dodāni botō imotedō ante yewæmōninque, Tömengā inguipoga pōninque iīmaī cæcæcāimpa, ante nāni yewæmongainō baī cædinque botō bitō änō ēñente cæcæte ante pōninque a ongōmoī ae,' antabopa,"

⁸ Mōitee wodi guiquēnē, Cænīnāni inānite wænōninque mīnitō, Wængonguī qui, ante pædæ godōninque cænguī tōnō bequi godoncæmīnimpa, ante wææ angacāimpa. Incæte mōnō Codito Mæmpocā ingante tāno apænedinque, Waodāni cæningā nāni wænonte pōnōnō tōnō cænguī bequi nāni, Wængonguī qui, ante pōnōnō adinque bitō wīi æinēmi ingabiimpa. Wængonguī qui, ante iya tāmōni ate Wængonguī waa acæcāimpa, ante ayæ, Wēnæ wēnæ mōni cædō ante Wængonguī pōnō wido cæcæcāimpa, ante pōnō tāñōnāni bitō Baa ante wīi tobi ingabiimpa, ante Codito apænegacāimpa. ⁹ Ayæ, "Bitō änō cæcæte ante pōninque a ongōmoī ae," angacāimpa. Äninque tömengā, iīne botō angainō iñōmō ædæmō ēñenguine bate ongongæimpa, ante cædinque Mōitee wodi wēenēnedē nānō angaine ante da godonte baī cægacāimpa. ¹⁰ Ayæ Wængonguī nānō änō ante nē ēñente cæcā inte Itota Codito, Wængonguī qui, ante baonga ēñadinque adopoque wænīnque nāmā wepæ eyepæ godongā beyænque mōnō wæætē Wængonguī ayongā tæiyæ waēmō ewocamō bate quēwēmompa.

¹¹ Wængonguī qui, ante nē godōnāni guiquēnē tömānāni iīmō iñō iīmō iñō adiyæ gongænte Wængonguī beyæ ante cædānipa. Mānōmaī wæætē wæætē godōninque ado ado godōnāni beyænque tömēnāni wēnæ wēnæ nāni cædō ante ædō cæte wido cæte baquīi. ¹² Māningā mōnō beyæ nē nō Godongaingā guiquēnē adopoque godōninque iīnque baganca eyepæ pōnī godōninque Wængonguī tömēmængā inō æi tæ contate ongongampa. ¹³ Mānōmaī ongōninque, Botō imote pīinte cædāni inānite Wængonguī æyedēnō botō nempo pōnongā æninque botō tæi emōmō inte nē ämo baquīmoo, ante Codito ñōwo ganca wānō congampa. ¹⁴ Edæ tömengā pōnō badongā ate mōnō tæiyæ waēmō ewocate quēwēmō bayōmonte tömengā adoque pōnī nānō godongainō beyænque, Ædæmō picæmīni bacæmīnimpa, ante do badongacāimpa. ¹⁵ Mānīnō ante Wængonguī Tæiyæ Waēmō Önōwoca mōnō imonte adobaī apænegacāimpa. Tömengā tāno apænegacāimpa.

¹⁶ "Mōnō Awēnē iīmaī angacāimpa. Māñīnedē ate iīncayæ ate, botō pōnō cæbo ate Ao änāni iīnque mōnō godongāmæ waa cæte quēwengæimpa, ante iīnque cæcæte ante iīmaī cæcæboimpa, angacāimpa. Botō pōnō apænebo ēñēninque tömēnāni, iīmaī cædāni, ante botō wææ angainō incæ mīmōnē entawencædānimpa.

Botō pōnō apænebo ēñēninque māñīne ante ocai encate ēñencædānimpa.

¹⁷ Ayæ, Wēnæ wēnæ nāni cædō ante ñimpo cædinque botō pōnēnāmaī incæboimpa. Æñēnāmaī nāni cædō ante botō wæætē wæætē änāmaī incæboimpa," angampa.

¹⁸ Iīnque tömengā pōnō ñimpo cæcā ate mōnō edæ, Wēnæ wēnæ mōnō cædō beyæ pānāmaī incæcāimpa, ante quīnante godōmenque godonguīi. Iñæmpa tömengā dobæ ñimpo cægacāimpa.

Mōnō Wængonguī weca pongæimpa, ante

¹⁹ Iñānāni ēñēdāni. Tæiyæ Waēmō Pōnī Oncōnē pō guīte baī mōnō Itota wepæ beyænque guīñēnāmaī inte Wængonguī weca do guīquēnēmō imompa. ²⁰ Weocoo mānīncōnē nāni wææ cægaincoo wægo tē baī Itota baō adobaī wangō cote ingatimpa. Mānōmaī beyæ odemō mīinēmō wi ænete baī i adinque mōnō quēwenguīnemō guīdinque Wængonguī weca edæ do guīimompa. ²¹ Wængonguī nānō godongāmæ owocabo iñōmonte, Wængonguī qui, ante nē Godongā Ñænængā pōnī inongā iñōmō adocā Itota iñōmō mōnō imonte nē aacā inongā ingampa. ²² Mānōmaī beyæ mōnō Wængonguī

weca pö guicæimpa. Wëenëñedë wentamö mönö entawënö ante Itota nämä wepæ inte ñä mënongacä ate mönö nämä apænte nö cæinëmö inte guicæimpa. Ayæ mönö baö waëmömæ äate bai ëmömö ïninqe mönö, Wængonguï tömengä nänö änö bai cöwë ædæmö cæcæcäimpa, ante wede pönëninque mönö guïñëñämaï inte tömengä weca do guicæimpa. ²³ Botö cöwë pönö cæcæboimpa, ante në angaingä ïñömö në ædæmö cæcä ingampa, ante adinque mönö, Tömengä nänö änö bai cæcä beyænque watapæ bacæimpa, ante mönö pönëno ante cöwë wido cædämaï inte mönö pönengæimpa.

²⁴ Ayæ, Mönö pönencabo tömämö waadete pönëninque waa cæte quëwengæimpa, ante cæcæte ante pönente adinque mönö wacä ingä wacä ingä ïmaï godö cæcæimpa. ²⁵ Pancadäniya Wængonguï ingante godongämæ apænecæte ante pönämaï inte wadæ godäni incæte tömënäni nani cæi bai mönö adobaï cædämaï ingæimpa. Wæætë, Codito nänö ponguïönæ oo pönï impa, ate pönente wædinque mönö pönencabo ïñömönte mönö wacä ingä wacä ingä edæ waadete apænedinque, Wængonguï gämænö pöninque watapæ quëwëmini incæminimpa, ante apænecæimpa.

²⁶ Wængonguï nö nänö änö ante do ëñënimö inte mönö, Wïi ëñëinëwædö, äninque godömenque wënæ wënæ cæmö ïninqe edæ wënæ wënæ mönö cædö ante mënongaquimæ ante edæ wepæ dæ ä bai babaimpa. ²⁷ Wæætë mänömaï ancaa ëñëñämaï cæmö ïninqe mönö Wængonguï nänö apænte ante panguimämoque ante guïñente wæcömaïmompä. Edæ mönö Baa ante godömenque wënæ wënæ cæmö ïninqe Wængonguï ingante në pïñäni nani gonte wænguimämoque ante, Mönö adobaï gonte wænca wæ, ante guïñente wæcömaïmompä. ²⁸ Möitee wodi nänö wææ angainö ante, Wïi ëñëinëwædö, ante adocanque në angä ïñongante Waoda mënaa ïna incæ waodäni mengäa go adocanque ïnani incæ, Mänömainö ante apænecä ëñentamönipa, ante apænedäni ëñëninque në äningä ingante waadedämaï inte godö wænongadänimpa.

²⁹ ïninqe adocanque Wængonguï Wengä ingante pïnä gäwate bai cædinque Baa angä adinque tömengä ingante Wængonguï ædö cæte pänämaï inguingäa. Wængonguï, Botö pönö æmo ate mïnitö Ao ämini ïninqe mönö godongämæ waa cæte quëwengæimpa, ante nänö angainö ïninqe bacæimpa, ante cædinque Itota nämä wepæ inte mönö ïmonte ñä mënongacä beyæ tömengä ayongä tæiyæ waëmö ewocamö bagamöimpa. Incæte adocanque Itota nänö në ñä mënongadingä ïnogä inte, Itota wepæ wïi waëmö ï awædö, ante pïingä adinque Wængonguï ædö cæte apænte ante pänämaï inguingäa. Ayæ Wængonguï Önöwoca në waadete pönö cædongä ïñongante adocanque badete tocä adinque Wængonguï tömengä ingante ædö cæte pänämaï inguingäa. Edæ Möitee wodi nänö wææ angainö ante Baa äñäni ïñänite wædænque päninque Wængonguï ïñäni ïñänite godömenque nanguï pönï pancæcäimpa, ante pönëminiyaa.

³⁰ Wængonguï, “Botö tömëmo në panguimo ïmopa. Wiwa nani cædinö beyæ eyepæ pönï godö pämo wæcædänimpa,” angacäimpa. Ayæ, “Botö në Awënë ïnomo inte botö quinäni ïñänite apænte ancæboimpa,” angacäimpa. Mönö ïñömö, Mänömainö ante në apænte pancæ angaingä ingante æbänö ingäa, ante do ëñëmompä. ³¹ Edæ Wængonguï në Quëwengä ïnogä inte edæ ænguï badinque bæi ongonte pangä wæcæ wæ, ante mönö nanguï guïñëñate wæcæimpa.

³² Wëenëñedë Wængonguï apænecä ëñëmini inte mïnitö tæcæ ñäö bai entawëmini ate wadäni pö pïinte guëadö guëa cæyönäni mïnitö mïni caate wæquinque tæi ongöninque godömenque cæmïnitapa. Mänömaï mïni cædinö ante ñöwo pönëedäni. ³³ Pancayedëña ïñömö në pïinte cædäni tömänäni ayönäni mïnitö ïmïnite badete todinque pänänitapa. Pancayedëña guiquënë mïnitö tönïñadäni adobaï caate wæyönänite mïnitö, Adocabomöni ïmönipa, ante bai cædinque në caate wædäni tönö godongämæ ongömïnitapa. ³⁴ Wadäni ïñänite tee mönedäni adinque mïnitö tömënäni tee mönete nani wædö ante pönëninque tömënäni tönö godongämæ wæmïnitapa. Ayæ, Mönö mäincoo öönædë godömenque waa pönï ongoncoo inte cöwë ongongæimpa, ante ëñëmini ïñömïnite wadäni inguipoga mïnitö ëadincoo ö äñäni adinque mïnitö wædämaï inte watapæ tomïnitapa. ³⁵ ïninqe, Mönö wede pönëno beyænque eyepæ pönï ænguimö ïmopa,

ante eññenique mäninö mini wede pönönö ante wido cädämaï iedäni. ³⁶ Ayä, Wængonguï nänö änö ante eññente cämöni ate tömengä, Pönömo æncæminimpa, ante nänö angaincoo ante cöwë pönongä æncæmönimpa, ante cædinque minitö wæntädämaï inte ee cæquëñemini iminipa. ³⁷ Edæ Wængonguï beyä ante do yewæmongatimpa.

“Wantæ wantæ ate nē Ponguingä mönō änongä iñömö do poncæcäimpa.

Edæ tömengä nänö angaiönæ iinque bayonte tömengä eyepæ pönī poncæcäimpa.

³⁸ Nē nō cæte quëwënongä incæ tömengä nänö wede pönönö beyænque quëwencæcäimpa.

Adocä wæætë guññente wædinque wodii winongä adinque, botö tömengä ingante adinque wii tobaïmopa,” ante Wængonguï beyä yewæmongatimpa.

³⁹ Mönö guiquënë tömëñäni nani cæi bai cädämaï iñömö inte wii guññente wædömö inte wodii winönämaï imompa. Edæ wodii winonte bai mönö æmæwo ewente baquëñemö imompa. Wæætë edæ tömengä ængä beyænque mönö quëwënguinque tömengä ingante wede pönëmö imompa.

11

Mönö wede pönönö ante

¹ Wængonguï pönö cæcä ate watapæ bacäimpa, ante mönö pönönö ante mönö, Wængonguï ayä cädämaï ingä incæte cöwë cæquingä ingampa, ante wede pönëmompa. Awinca adämaï emömö incæ mönö mimmöno wede pönëninque awinca do ate emonte bai ewocamö inte mönö, Näwangä bacäimpa, ante do eññemö imompa. ² Dodäni wede pönëñäni iñönänite Wængonguï, Mini wede pönönö beyænque botö minitö iminite waa abopa, ante apænegacäimpa.

³ Wængonguï inguipo tönö iimönæ tömäo badoncæte ante cæyongä quïëmë impa ænte badonguingä. Iñæmpa dæ angatimpa. Iinque mönö nē acoo dæ äñonte mänincoo ænämaï inte tömengä wæætë mä pönëninque angä beyænque mönö nē acoo do bagatimpa. Mänömaï ingatimpa, ante wede pönëninque mönö Ao ämompä.

Dodäni nani wede pönengäinö

Abedo wodi

⁴ Abedo wodi iñömö Wængonguï nänö angainö ante wede pönëninque, Wængonguï quï, ante nō cæte godöninque Cainö wodi wæætë önömonque nänö godönö bai wii godongacäimpa. Tömengä mänömaï wede pönente cæcä adinque Wængonguï, Abedo bitö nō cæte pönömi æmopa, ante apænegacäimpa. Iinque do wænte gogaingä inongä incæte Abedo wodi, Botö wede pönente cægai bai adobai wede pönente cæedäni, ante ñöwo ganca ayä apænete bai apænecampa.

Ënoco wodi

⁵ Ënoco wodi guiquënë nē wede pönengä iñongante Wængonguï, Ënoco eññemi. Bitö botö nē waa adömi inte bitö wænguëñëmämö ante wädämaï inte pöe, äninque inque iñongante ö ænte wo ææntodongä æigacäimpa. Æite gocä ate wadäni ancaa diqui diqui mininque Wængonguï nänö nē wo æntodongä ingante adämaï ingadänimpa. Edæ tömengä ingante Wængonguï ayä ææntodönämaï iñongante wadäni, Ënoco wede pönengä ingante Wængonguï waa acampa, ante do eññönänimpa. ⁶ Edæ Wængonguï weca poncæte ante cædinque waocä, Wængonguï nē Quëwengä ingampa, ante wede pönenguëñengä ingampa. Ayä adobai, Wængonguï ingante nē diqui diqui mimmö iñömönte tömengä, Pöe, äninque pönö waa cæcampa, ante wede pönëninque nē poncæ cæcä pongampa. Mänömainö ante nē wede pönëñäni Wængonguï weca pönänipa. Mäninö ante nē wede pönëñämaï ingä guiquënë tömengä ingante Wængonguï ædö cæte waa aquingä. Edæ waa adämaï ingampa.

Docä Nöwee wodi

⁷ Nōwee wodi Docā nāni ānongā guiquēnē, Æbānō baquīi, ante adāmaī iñongante Wængonguī, Nōwee ēñēmi. Bitō adāmaī imāmo oo pongæimpa cæbii. Angā ēñente guīñente wædinque nē wede pōnengā inte tōmengā nāni wencabo nāni guīte quēwenguīnque wipo ñænængade impo incæ ñænæ oncō baī badongā ate guīte quēwengadān-impā. Nē wede pōnēnānique nāni nō entawēnō baī adobaī nō nānō entawenguīnque Nōwee wodi wede pōnente cægacāimpa. Īnīnque tōmengā adocanque wede pōnēnīnque mānōmaī cædingā iñongante wadāni guiquēnē nāni apænte wænguīnque Baa angadān-impā.

Abadäo wodi

⁸ Abadäo wodi guiquēnē tōmengā wede pōnengā iñongante Wængonguī, Abadäo ēñēmi. Botō pōnōmo bitō ænguīmæ ante botō odōmōmo goe. Angā ēñēnīnque, Æbæmē impā, ante adāmaī iñongā inte Abadäo wede pōnēnīnque ēñente cædinque do gogacāimpa. ⁹ Mānōmaī wede pōnēnīnque wadāni nēmæ gote wacā iñongā inte wantæ iñō quēwengā baī inte æmontaicōnē owogacāimpa. Ayæ Wængonguī nānō angai mā nē ænguīna iñōna inte tōmengā wengā Itæca wodi adobaī tōmengā wengā Aacobo wodi adobaī wantæ iñō quēwente baī æmontaicōnenque owote quēwengadāimpā. ¹⁰ Wængonguī doyedē pōnī, Waodāni nāni öönædē quēwenguīñōmō ante botō iīmaī badoncæboimpā, ante nāmā nānō pōnēnō baī tæī gōnonte mænongacāimpa. Abadäo iñōmō, Botō mānīi iñōmō owocæboimpā, ante nē wædongā inte wede pōnēnīnque piyænē cædinque æmontaicōnenque owote inguipoga quēwengacāimpa.

¹¹ Mōnō imonte pōnēnīnque nē ædæmō aacā iñongā inte Wængonguī iñōmō tōmengā nānō ānīnō baī cōwē cæcæcāimpa, ante nē wede pōnēnā iñōmō Tada wodi ingadāimpā. Mānōmaī beyæ tōmēnā owæntadā iñōnante Wængonguī pōnō cæcā ænīnque tōmēnā picængadedā iñōnā inte tæī piñænīnque yædēmadā bate wēñængā mangadāimpā. ¹² Abadäo wodi wede pōnēnīnque tæī piñænte tapæicā ate wēñængā ēñagacāimpa. Īnīnque adocanque picængadecā inte nē wænte baī iñongā inte wede pōnengā beyænque mōnō tōmengā nānō pæīmō yebænīnque nēmoncoo öönædē owocoo nanguī pōnī i baī mōnō iñōmō adobaī nanguī pōnī imompā. Ēmōnaicoo gāwapæ yæwedeca öñoncoo nanguī pōnī i baī mōnō tōmengā pæīmō imō adobaī nanguī pōnī iñōmonte mōnō, Mānīmpomō imompā, ante ædō cæte anguīi.

¹³ Mānīnāni tōmānāni wede pōnente quēwēnōnāni inte wængadānimpā. Wængonguī nānō, Pōnō cæcæboimpā, angaincoo ayæ ænāmaī iñāni inte tōmēnāni gobæ ongoncoo gomō ate baī, Cōwē æncæmōnimpā, ante wede pōnente piyænē cæte quēwengadānimpā. Wadāni nēmæ wabæca quēwente baī quēwēnīnque tōmēnāni, Wīi mōnitō ömæ iñōnte mōnitō wamōni inte quēwēmōnīpā, ante inguipoga owogadānimpā. ¹⁴ Mānōmaīnō ante nē ānāni iñōmō, Tōmēmōni ömæ ante diqui diqui mēmōni imōnīpā, ante quēwēnānīpā. ¹⁵ Dodāni iñōmō do nāni emō cæte pongaimæ ante pōnente wædāni inte baī tōmēnāni do adodō gocædōnānīpā. ¹⁶ Wæætē adodō māniömæ nāni quēwengaimæ wīi goīnēnīnque tōmēnāni, Mōnō öönædē godōmenque wæmōmæ pōnī gote quēwengæimpā, ante goīnente wægadānimpā. Īnīnque wadāni Wængonguī ingante, Bitō nē wæmōmæ goīnente wædāni tōmēnāni Wængonguīmi imīpā cæbii, ante ānāni incæ tōmengā wæætē, Īñæmpā nē wædōnāni tōmēnāni quēwenguīñōmō nāni wædō ante botō do eyepæ mænongaboimpā, ānīnque guīñēnāmaī inte nanguī tocampā.

Abadäo tōnō Itæca

¹⁷ Wængonguī, Abadäo æbānō botō imote ēñente cæquingāā, ante acæte ante angā ēñēnīnque Abadäo wodi nē wede pōnēnongā inte tōmengā wengā Itæca ingante, Wængonguī quī, ante godongacāimpa. Edæ Abadäo ingante doyedē apænedīnque Wængonguī, Bitō pæīnāni nanguī iñāni inte iīmæ æncædānimpā, ante do angā ēñengacāimpa. Incæte Wængonguī mānōmaīnō angā ante nē ēñēningā incæ tōmengā wengā adocanque pōnī iñongā inte Abadäo, Wængonguī quingā ingampā, ante godoncæ cægacāimpa.

¹⁸ Adocä tömengä wengä ingantedö ante Wængonguï doyedë Abadäo ingante apæned-inque, Bitö wengä Itæca pæinänique inänitedö ante botö, Abadäo pæinäni inänipa, angacäimpa. ¹⁹ Incæte Itæca wodi adocanque pönï iñongante Abadäo wodi, Botö wengä do wengä incæte Wængonguï, Ñäni ömæmöe, angä ininque do ñäni ömæmömaingampa, ante wede pönëninque godoncæ cægacäimpa. Wængonguï guiquënë, Ee ae, ante wææ angä beyænque tömengä wengä ingante wænönämaï ingacäimpa. Ininque Itæca wodi do wæningä inte bai ñäni ömæmonte bai ayæ quëwengacäimpa.

Itæca, Aacobo, Ootee

²⁰ Itæca wodi adobaï, Wængonguï æbänö cæquiringää, ante wede nänö pönëno beyænque ëñëningä inte edæ picængadecä badinque Aacobo wodi tönö Etawoo wodi inate apænedinque, Wængonguï minatö iminate iïmaï pönö waa cæcæcäimpa, ante waa apænegacäimpa.

²¹ Aacobo wodi iñömö, Wængonguï æbänö cæquiringää, ante wede nänö pönëno beyænque do ëñëningä inte wæncæ cæte öñöninque tömengä nänömoda Ootee wodi wëna inate, Minatö iminate Wængonguï pönö waa cæcæcäimpa, ante waa apænegacäimpa. Ayæ ongontoca da cæte ongonte ædæ wææninque, Wængonguï bitö waëmö pönï inömi inte cæquïmidö anguënë, ante watapæ apænegacäimpa.

²² Ootee wodi guiquënë, Wantæ iñö wæncæboimpa, äninque, Mönö idægocabo mönö pæinäni incæ Equitobæ wantæpiyæ quëwënäni ate Wængonguï ænte mäocä wadæ gocädänimpa, ante tömengä nänö wede pönëno beyænque ëñëninque iïmaï angacäimpa. Godinque botö bayetoca ingaï ee ænte næænte godinque da wencæminimpa, angacäimpa.

Möitee wodi

²³ Möitee wodi mæmpoda guiquënë wëñængä ëñacä ate, Wïi önonganque ingampa. Waëmö wëñængä awädö, ante adinque iïmaï cægadäimpa. Mäniñedë Equitobæ awënë odeye iñömö, Onguïñængä ëñacä adinque do wænongæiimpa, angä incæte tömëna guïñënämaï inte tömëna wede nänä pönëno beyænque wëñængä Möitee ingante apäicä mengäa go adocanque mämonque wë wodonte mangadäimpa.

²⁴ Möitee wodi guiquënë picængä bayongante wadäni, Awënë Padaönö wengä wææ Möitee badä ingampa, ante Möitee ingante waa ayönäni tömengä wæætë Wængonguï ingante në wede pönënongå inte edæ Baa angacäimpa. ²⁵ Wæætë edæ, Botö caate wæquinque botö Wængonguï quïnäni tönö godongämæ cæcæboimpa, ante cædinque Möitee wodi, Equitoidi näni wiwa cæte töinö adinque botö wantæ iñö incæ wïi toïnente awädö, ante wido cægacäimpa. ²⁶ Wængonguï iïncayæ ate eyepæ pönï pönongä æncæboimpa, ante wede pönëninque tömengä mäninö ante mïmöno gomö ate bai pönengacäimpa. Ayæ Equitobæ quëwënäni waëmoncoo pönï näni mäincoo ante adinque, Önoncooque ëwenguincooque í awädö, ante Möitee edæ Baa angacäimpa. Wæætë edæ pïinte badete todäni wæcä incæte tömengä, Codito beyænque impa, ante pönëninque godömenque waa pönï togacäimpa.

²⁷ Tömengä iñömö, Awënë odeye Padaönö ænguï badinque pïingä wæcæ wæ, ante guïñente wädämaï inte wæætë wede pönëninque Equitobæ ëmö cæte gogacäimpa. Ayæ Wængonguï në Quëwengä mönö awinca adämaï inongä ingante Möitee wodi iñömö në awinca gomö acä bai ëmongä inte wæntæye badämaï inte godömenque cægacäimpa. ²⁸ Ayæ, Bamoncädë ëñadäni inänite në ëwënongå incæ godö wænoncæcäimpa, ante Wængonguï angä ëñëninque Möitee wodi wæætë, Në ëwënongå nänö wodo pænta goquï ingäiimpa, ante wede pönëninque cægacäimpa. Tömengä wadäni idægoidi tönö Patowa ææmæ mönö cæmæ bai mä cængacäimpa. Ayæ, Në ëwënongå incæ mönö idægocabo bamoncädë ëñadäni inänite wænönämaï incæcäimpa, ante wææ cæcæte ante cædinque Möitee në wede pönënongå inte wadäni tönö godongämæ odemompaa wepæ öni paagacäimpa.

²⁹ Idægoidi guiquënë wede pönëninque gäwapä Opatawämä nani ämä goyæ go nä gongämä ate tæcæguedëmä pöni tao gogadänimpa. Equitoidi guiquënë, Taadö bapa, mönö taocäimpa, ante cæyönänite æpæmpo becadote wængadänimpa.

Adacaba wodi

³⁰ Idægoidi nani wede pönëno beyænque Eedicoo nani quëwëñömö yabæque nani wææ cægainca incæ näwæ cabænte wæængatimpa. Edæ idægoidi önompo æmæmpoque go mëönaa mänimpoönæ iñonte yabæque godongämä cægonte godäni ate cabænte wæængatimpa. ³¹ Onquiyængä Adacaba iñömö mäincoo beyæ ante nê towente nê quëwengä inongä incæte tömengä wede nänö pönëno beyænque iïmai cæte miingä quëwengacäimpa. Idægoda mënaa, Eedicoo iñömö æbänö quëwëñänii, ante acæte ante awëmö pö guiida adinque Adacaba wodi, Ee pöeda, angä beyænque idægoidi wæætë ëñënamä inäni inänite wænöninque tömengä ingante ata cæpodäni quëwengacäimpa.

Wadäni nani wede pönengainö

³² Quinante godömenque ante apænequimoo. Iñäni nê wede pönëni nani cægainö ante botö æiquedö apænequimoo. Guedeönö wodi tönö Badaco wodi ingadaimpa. Ayæ wææ Tantöo wodi tönö Yepetee wodi ingadaimpa. Ayæ wææ Awënë Dabii wodi tönö Tämoedo wodi ingadaimpa. Mäninäni tönö Wængongui beyæ nê apænëgainäni wodi tömänäni wede nani pönëno beyænque iïmai cædinque nanguï cægadänimpa.

³³ Nê wede pönëni iñömö täi ëmonte badinque wabæca awënë odayeidi nempo quëwëñäni inänite bæ tadinque wido cægadänimpa. Pancadäniya wede pönëninque wadäni beyæ wææ äninque nö cægadänimpa. Wacä, Cæcæboimpa, äninque do cæquë-nengä incæ wii cæcä ininque nê pönëni pancadäniya, Bitö änö cæcæbiimpa, änäni ëñëninque do cægacäimpa. Pancadäniya nani wede pönëno beyænque mëñeidi incæ ecadämäi inäni bagadänimpa. ³⁴ Gonga nanguï wo bæco adinque pancadäniya wede nani pönëno beyænque mönæ ëmongatimpa. Wadäni yaëmenca tamencacæ cädäni wædinque nê pönëni pancadäniya aamö cædinque miinäni quëwengadänimpa. Aquii pöni ininäni inte nê wede pönëni pancadäniya täi piñænte bagadänimpa. Wabæca tontadoidi wænönæ pönäni adinque nê pönëni pancadäniya wæætë täi piñæninque wido cädäni gogadänimpa. ³⁵ Tömëni guidëni näñe wænäni ate onquiyænäni wede nani pönëno beyænque do wæninäni quëwëñäni ate ængadänimpa.

Näni caate wægainö

Ayæ adobai nê pönëni inänite wiwa cädäni caate wæyönänite wacä, Ata cæpobo goquimi, angä incæte nê caate wædönäni pancadäniya wæætë, Ee abi caate wæwëmoe, änänitapa. Tömëni, Botö iincayæ ate ñäni ömæmöninque caate botö wædö beyænque godömenque waa quëwencæboimpa, ante wææ äninque Ao änämäi ingadänimpa. ³⁶ Tömëni nani wede pönëno beyæ pancadäniya inänite wadäni badete togadänimpa. Wadäni inänite wæætë tæi tæi pangadänimpa. Wadäni inänite wæætë yaëmengö ñä cæyæninque tee mönedäni wægadänimpa. ³⁷ Pancadäniya inänite dicaca tacadäni wængadänimpa. Pancadäniya inänite ta wiyænäni wængadänimpa. Pancadäniya inänite yaëmenca yedäni wængadänimpa. Pancadäniya obega æmontai tönö caboda æmontai badöninque mäninque wëñate mongæninque ömæpodäni inte wæyönänite wadäni togænte päninque wiwa cægadänimpa. ³⁸ Tömëni nê wede pönëni inte waa pöni inäni iñönänite inguipogaque quëwëñäni wæætë wii tömëni bai inäni inte wænæ wænæ cægadänimpa. Nê pönëni iñömö pancadäniya, Æyömömë gote quëwenguimoo, ante pönente wædinque wodii winonte önömæca wayömö godinque änanquidi wayömö godinque oncontatodë guidinque pancadäniya wë womöñöni pancadäniya onguipodë ææ wote wë womongadänimpa.

³⁹ Ininque Wængongui tömëni inänite, Wede miini pönëno adinque botö waa tobopa, ante apænëgacäimpa. Incæte tömengä nänö, Pönö waa cæcæboimpa, angainö ante tömëni mäniñedë ayæ ænämaï ingadänimpa. ⁴⁰ Edæ tömëni adodäninque wii æncädänimpa, angacäimpa. Wæætë Codito godömenque pönongä äninque mönö

watapæ quëwëñömonte tömënanï mönö tönö godongämæ æninque ædæmö picænäni bai bacædänimpa, ante Wængonguï mönö ïmonte waa cædinque tömënanï beyæ adobai waa cægacäimpa.

12

Itota ingante mönö cöwë adinque quëwengäimpa, ante

¹ Ìninqe boguïmä bacoo owo bai mäninäni ïñömö, Wængonguï cöwë pönö cæcæcäimpa, ante nê wede pönengainäni ïñömö adobai bacoo ongönäni. Edæ, Mönitö wede pönente möni cægai bai minitö adobai wede pönëninque ïimai cædäni, ante a ongonthe bai apænedänipa cæmöö. Tömënanï quingæ pogodo gocæte ante cædäni teëmencoo gä äadäni bai cædinque mönö adobai oda caate mönö wædoncoo ante ñimpo cæcäimpa. Wënæ wënæ mönö cægaincoo ante, Ancaa cæte awædö, äninque mönö wido cæcäimpa. Ayæ taadö ante Itota nänö odömongainonque ante mönö edæ wæntædämaï inte täi piñæninqe pogodo gocäimpa. ² Mönö wede pönente æite godö taadö ante tömengä ïñömö nê täno beyænte gogaingä ingampa. Tömengä adocä incæ mönö wede pönëno ante, Cöwë mänömaï bacäimpa, ante ædæmö badongaingä ingampa. Tömengä ïñömö wadäni tömengä ingante awæ timpodäni wæyongante badete todäni adinque tömengä, Mänömaï cædäni botö caate wædö beyænque botö ïincayæ ate watapæ tocæboimpa, ante nê ëñëningä inte piyænë cædinque caate wædinque wængacäimpa. Tömengä ñowo ïñömö ñäni ömæmonte æite godinque Awënë Wængonguï nänö contaïmpaa tömëmængä inö tæ contate Awënë bate ongöñongä mönö adocä Itota ingante æmö ate bai pönëninque edæ tömengä miñæ tee empote pogodo gocäimpa.

³ Tömengä ïñömö nê wiwa cædäni nanguï piïnte cædäni wæcä incæte piyænë cægacäimpa. Ìninqe minitö ïñömö, Wæntædämaï inte mimö nangæ batawënamäi ingäimpa, ante cædinque, Tömengä æbänö cægacäi, ante pönëdäni. ⁴ Ñowo ganca minitö wënæ wënæ mini cæinente wædö ante wido cæcæte ante minitö wænguï beyæ wepæ dicæ gowete cæminiyaa. ⁵ Ayæ Wængonguï mönö wampo pönencæmöimpa, ante mönö ïmonte, Botö wëmini godömenque cæcæminimpa, ante æbänö pönö angacäi, ante minitö dicæ pönëminiyaa. Ìimai angacäimpa, ante yewæmongatimpa.

“Botö wëmi ëñëmi. Mönö Awënë bitö ïmite, Ëñente cæcæbiimpa, ante pangä wædinque, bitö wæætë badete todämaï incæbiimpa.

Bitö ïmite, Ëñenguëne quëwëe, angä ëñente wædinque wæwënamäi incæbiimpa.

⁶ Ìñæmpa tömengä nänö nê waadete pönënanique inänite päninque mönö Awënë ïñömö, Ëñencæminimpa, ante cæcampa.

Botö wëmini, ante nänö nê ængainänique inänite tömengä pangampa.”

⁷ Ante yewæmongatimpa cæminii. Minitö caate wëmini iminitawo. Ìñæmpa wëñænäni inänite wæmpoidi dicæ pänämaï inguinäniyaa. Mæmpo Wængonguï ïñömö adobai, Botö wëmini iminipa, ante edonque acäimpa, ante nanguï äninque pangä caate wëminipa. Ìninqe tömengä pangä wædinque minitö wæætë, Mönö ëñente quëwenguinque ante Mæmpo Wængonguï pangampa, ante piyænë cæte ee amini pancæcäimpa. ⁸ Tömengä wëñæmö ïñömömonte tömengä tömämö ïmonte edæ nanguï pante angampa. Incæte minitö pancæminiya iminite tömengä pante änämaï ingantawo. Ìninqe minitö, Wii Wængonguï wëmöni imönipa. Wacä wëmöni imönipa, ante wæquënemini iminipa.

⁹ Mönö mæmpoidi waodänique inönäni inte nanguï äninque pänäni adinque mönö, Mæmpocä inongä inte tömengä nänö cæquëñënonque cædinque mönö ïmonte waa cæte pangantapa, ante tömënanï inänite waa atamompa. Mönö Mæmpo Wængonguï adobai mönö ïmonte nanguï äninque pangä adinque mönö quëwenguinque mönö tömengä ingante godömenque Ao ante ëñente cæcäimpa. ¹⁰ Mönö mæmpoidi guiquëne, Æbänö pönö waa cæquimoo, ante pönente ate mönö ïmonte edæ, Ëñencæminimpa, ante wantæ ïñö nanguï änäni ëñente cætamompa. Wængonguï ïñömö edæ, Tæiyæ wæmö botö ewocabo bai minitö adobai tæiyæ wæmö ewocadinque watapæ quëwencæminimpa, ante cædinque mönö waa quëwenguinque ante pönö pangampa. ¹¹ Æcæmenque mönö

imonte nanguĩ äninque päna incæ tömengä pangä ate mönö caate wædinque dicæ quingä watapæ tomongaa. İñæmpa, Caate awædö, ante cöwë ämompä. Wæætë iincayä ate edæ doyedë nani pänö beyænque mönö në ëñente badömo ate mönö nö cæmö badinque gänë pönente entawëmompä.

Mönö wæquinque Wængonguĩ apæñecä ëñënamai imompä

¹² İninque minitö guepænte wædimini inte edæ täi pñæninqe wæntädamaĩ inte nanguĩ cædäni. Önoncapo nanguĩ guecapote wædimini inte edæ guecapodamaĩ inte ængä gantite pogodo gote bai nanguĩ cædäni. ¹³ Mönö cægonguinö, ante minitö taadö ante enga womini mäemö ba ate në podä cædinäni incæ podä cædämaĩ inte tömënäni nani waa baquinque mäninönö töinö gote waa cægongcædänimpa, ante godö waadete cædäni.

¹⁴ Mönö godongämæ piyænë cæte quëwengäimpa, ante minitö nanguĩ täi pñæninqe waodäni tömänäni inänite gänë pönente cædäni. Ayä, Æcänö täiyä waëmö ëwocädamaĩ ingä tömengä iñömö mönö Awënë ingante cöwë adämaĩ incæcäimpa, ante pönente wædinque minitö, Mönö tömämö Wængonguĩ ayongä täiyä waëmö ëwocate quëwengäimpa, ante nanguĩ cædäni. ¹⁵ Wængonguĩ pönö waadete nänö cædö ante mönö tömämö ænte entawengäimpa, ante cædinque minitö cöwä adinque, Adocanque incæ ömætawengä inämaĩ incæcäimpa, ante wææ cædäni. Adocanque wæwente nänö quëwënö beyä piinte bate tedecä ëñëninque minitö, Wadäni nani wentamö mongænguinque adobai piinte badämaĩ incædänimpa, ante wææ cædinque në piingä ingante godö wææ äedäni. ¹⁶ Ayä mini cabo incæ, Nänöogængä inämaĩ iñongante adocanque incæ godö mönämaĩ incæcäimpa, ante cöwä adinque wææ cædäni.

Etawoo wodi iñömö tömengä bamoncadengä inongä inte nänö nanguĩ ænguënencoö ante piinte bai cædinque cænguinque æncæte ante tömancoö godonte beyä adopoque ænte cængacäimpa. Minitö guiquënë, Inguipogaque ante ænte to wædö, ante Etawoo wodi nänö pönëwente cægäinö bai adocanque incæ cædämaĩ incæcäimpa, ante edæ wææ cædäni. ¹⁷ Bamoncadengä inte nänö ænguënencoö ante do piinte bai godön-ingä inte Etawoo wodi iincayä ate, Pönömi æmoe, añongante mæmpocä wæætë Baa angacäimpa, ante do ëñëminipa. Edæ Ca ca wædinque tömengä, Æbänö cæte ænguimoo, ante ancaa angä incæte mæmpocä do Baa äningä inte ñöwo wæætë wadö ante ædö cæte anguingä.

¹⁸ Onquiyabo Wængonguĩ nänö gonga tänongä bæcobo ñænoque dodäni ponte godongämæ ongonte cægönäni bai minitö wii onquiyabo ñænoque pöminipa. Tömënäni wëmö mäë mämönte bai iñömö wini cai päëmämö iñömö nani ponte wægäiñömö bai minitö wii pöminipa. ¹⁹ Todompeta nani ancadeca nanguĩ we öömämö dodäni nani ëñente wægäimämö bai minitö wii adopämö ëñëminipa. Wængonguĩ wææ ante nänö tedepämö tömënäni nani ëñente wægäimämö bai minitö wii adopämö ëñëminipa. Mänimämö ëñente guñente wædinque tömënäni, Idæwaa ämipa. Ædö cæte godö-menque ëñenguimöni, ante wægädänimpa. ²⁰ Edæ “Cæningä incæ onquiyaboga ponte cægongä adinque minitö tæi tacamini wæncæcäimpa,” ante wææ añongante tömënäni ancai guñente wædinque, Wængonguĩ nänö wææ angäinö ante mönitö ædö cæte ædämö ëñente cæquimöni, ante wægädänimpa. ²¹ Onquiyaboga nani ate guñëmämö adinque Möitee wodi incæ, “Ancai guñente botö do do wäate bai wæbopa,” angacäimpa.

²² Minitö guiquënë Tiönoquidi nani änonquidi do ponte bai ëwocaminipa. Edæ Wængonguĩ në Quëwengä öönædë Eedotadëë bai nänö waëmö pönö owoyömö minitö mänñömö do ponte bai ëwocaminipa. Wængonguĩ anquedoidi æpodö müido ganca inönäni inte nanguĩ pönö inäni godongämæ pö bee tente tömënäni nani watapæ ongöñömö minitö mänñömö do ponte bai ëwocaminipa. ²³ Mönö Codito ingante godongämæ mönö pönencabo iñömö bamoncadënäni në ænguimö bayömönte mönö ëmowo ante öönædë yewæmöintaa do yewæmönte ongompä. İninque minitö adocabomini badinque Wængonguĩ weca mönö waocabo tömämö imonte në apænte anguingä weca do pömini iminipa. Në nö cæte quëwengäinäni wænte goyönänite

Wængongui iinque badongä ate do ædæmō picænāni bai badānipa. Tömēnāni önōwoca weca mīnitō do ponte bai ewocaminipa. ²⁴ Wængongui, Botō pönō cæbo ate mīnitō Ao āmini iinque mönō godongāmæ waa cæte quēwengæimpa, ante nānō angainō ante Itota, iinque bacæimpa, ante ædæmō badongacäimpa. Mīnitō iñömō nē badongaingä weca do pōmīni imīnipa. Abedo wodi wepæ onguipoiya gowecä adinque Wængongui wæætē nē wænōningä ingante, Botō weca ongönāmaï gobāwe, angacäimpa. Itota wepæ wīi Abedo wodi wepæ bai imæ adinque Wængongui wæætē, Itota wepæ petæ petæ gowedimæ beyænque botō weca pōedāni, ante cægacäimpa. Mānimæ Itota wepæ nānō petæ petæ gowegaiñömō mīnitō do ponte bai ewocaminipa.

²⁵ Mānōmaï waēmō pōnī iñömō do pōmīni inte mīnitō nē apænecä ingante Baa ānāmaï iedāni. Onquiyabo godongāmæ ongönāni guiquēnē inguipoga wææ angaingä ingante Baa ānināni iñōnānite tömengä ata cæpodāmaï inte pangacäimpa cæminii. Öönædē ongonte nē wææ angaingä ingante ēñēnāmaï inte dadi emænte wadæ gomō bai mönō godōmenque pante wæquēnēmō iñōmonte tömengä cōwē ata cæpodāmaï incæcäimpa.

²⁶ Māniñedē tömengä nānō tedepāmo beyænque inguipo wancæ wancæ cægatimpa. Nōwo iñömō tömengä, “Botō iincayæ ate inguipo adopoque pōnī wancæ wancæ cædinque öönædē adobai wancæ wancæ edæ cæcæboimpa,” angacäimpa. ²⁷ Tömengä, “iincayæ ate adopoque pōnī cæcæboimpa,” angacäimpa, ante pōnēninque mönō iīmaï ante ēñengæimpa. Tömengä adopoque wancæ wancæ cæcä ate tömengä nānō badongaincoo oo pōnī ongoncoo iñömō tömancoo adoyedē ewente bacæimpa. Quincoodō oo ongönāmaï tæi ongoncoo i mānincooque ayæ a ongongæimpa, ²⁸ Iinque mönō Awēnē Odeye nempo quēwēmō iñömō wancæ wancæ cædāmaï inte tæi ongonguimō imompa, ante pōnēninque mönō Wængongui ingante waa ate pōnente apænecæimpa. Mānōmaï cædinque Wængongui ñāō bai nānō tæi emōmāmo ate guiñente wædinque tömengä beyæ cæcæimpa. ²⁹ Edæ mönō Wængongui iñömō edæ gonga wo bæcoqui bai ingānō anguēnē, ante āmo ēñēmaimīnipa.

13

iīmaï cæmō adinque Wængongui waa tocæcäimpa, ante

¹ Mīnitō iñömō, Mönō caipæ imompa, ante mīni waadete pōnēnō bai cædinque cōwē godongāmæ waadete pōnente cæedāni. ² Tömānāni inānite edæ, Pōedāni, ante waadete cæedāni. Mānōmaï cædinque pancadāniya, Botō weca ædānidō ēñacæ pōnānii, ante ēñēnāmaï ināni incæte do waa cædāni ate edæ, Æ, Wængongui nānō da pōnōnāni anquedoidi incæ botō weca pōnānitapa, ante tæcæ abopa, ante todānipa.

³ Tee mönete ongönāni tōnō botō godongāmæ tee mönete wæcōmo bai imopa, ante pōnēninque mīnitō tömēnāni inānite ante cōwē pōnēedāni. Pancadāniya inānite wadāni wīwa godō cædāni ate caate wæwēñōnāni mīnitō adobai pōnēninque, Mönō baō adobai ēñamō inte tömēnāni tōnō godongāmæ caate wæmō bai imompa, ante tömēnāni inānite cōwē pōnēedāni.

⁴ Nānōogængä ināmaï iñongante waocä nē godō guëa mongä tōnō nē godō wīwa towēnāni iñōnānite Wængongui mānināni tömānāni inānite do apænte ante pancæcäimpa cæminii. Mīna gæncaya adomīnaque guëa moncæminaimpa. Ayæ ñānōnāni möninque nāna gæncaya quēwēna ate, Waa impa, ante mönō waa acæimpa.

⁵ Wængongui incæ, “Mīnitō imīnite cōwē emō cæte godāmaï inte botō cōwē aacæboimpa,” angacäimpa. Mānōmaï beyæ mīnitō godonte æinta ante æinente wædāmaï inte mīni ēadincooque ēadinque piyænē cæte quēwēedāni. ⁶ Iinque Wængongui beyæ iīmaï ante nāni yewæmongainō bai ante mönō wede pōnente apænemompa.

“Mönō Awēnē botō tōnō godongāmæ cæcä adinque botō,

Waocä ædō cæte botō imote wēnæ wēnæ cæquingää, ante ēñēmo inte guiñēnāmaï incæboimpa.”

⁷ Nē aadāni iñōmō mīnītō iṃīnīte Wængonguī nānō ānō ante nē apænedāni iñānīte ante pōnēnīnque mīnītō, Tōmēnāni iñōmō waa cædinque edæ watapæ quēwēnānīpa, ante pōnēedāni. Ayæ tōmēnāni nāni wede pōnēnō bai adobai wede pōnēedāni.

⁸ Itota Codito iñōmō wēēnēñedē nānō ingai bai ingā ñōwoōnæ adobai ingā inte tōmengā adocā iñcayæ ate cōwē adobai incæcāimpa.

⁹ Wadāni, Wacā taadō odōmonte apænebo ēñēe, āñōnānīte tōmēnāni mīñæ godāmaī iedāni. Iñæmpa tōmēnāni cænguīnque ante, Æbānō waa pōnī cō cæquīi, ante wææ ānāni incæte mānīi cænguīncoo beyæ tōmēnāni wīi godōmenque watapæ quēwēnānīpa. Iñinque mānīncoo cænte beyæ mōnō mīmō ædō cæte tæi pīñænte entawenguīi. Wæætē edæ Wængonguī nānō waadete pōnō cædō beyænque mōnō tæi pīñænte entawengæimpa. ¹⁰ Æmontaicōnē cædinque, Wængonguī quī, ante nē godōnāni iñōmō tōmēnāni nāni iya tāimpaa godōnīnque pancaa cænguī ænte nē cænguēnēnāni iñōnāni incæte tōmēnāni mōnō Codito mōnō beyæ nāmā nānō wepæ godongainō guiquēnē ædō cæte ænguīnānīi.

¹¹ Cānīnāni iñānīte wænōnāni ate nē godongā ñænængā pōnī inongā iñōmō wepænque ænīnque, Wēnæ wēnæ mōnī cædinō ante Wængonguī pōnō ñā mēnongacæcāimpa, ante cædinque Tæiyæ Waēmō Pōnī Oncōnē wāānē guīdīnque godongampa. Godongā ate baonque, Wentamō mongænte awædō, ante ænīnque tōmēnāni nāni quēwēñōmō yabæque māo iya tangadānīmpa. ¹² Itota adobai, Botō wepæ pōnō mēnongabo ate botō quīmīnī iñōmō tæiyæ waēmō ewocate quēwencæmīnīmpa, ante cædinque wentamō mōnō entawēnō ænte teēmē mongænte godīnque tōmēnāni quēwēñōmō wææ cædinemō tao godīnque yabæque pōnī guīñēñate wædinque caate wængacāimpa cæmōō. ¹³ Tōmengā yabæque pōnī guīñēñate wædinque nānō tao gogai bai mōnō adoyōmō tōmengā weca tao gote ado guīñēñate wæcæimpa. ¹⁴ Iñæmpa inguīpoga mōnō quēwēñōmō tæi ongōmpa diyæ wantæpiyæ quēwenguīi. Wæætē oōnædē iñcayæ ate edæ mōnō cōwē quēwenguīñōmō ante æīnente wædinque wānō cōmōmpa.

¹⁵ Iñinque, Wængonguī quī, ante cænguī godōnāni bai cædinque mōnō iñōmō edæ, Itota emōwo beyænque quēwēmōnīpa, ante nē apænemō inte tōmengā emōwo ante Wængonguī ingante apænedīnque, Bitō tæi emōmī inte waa pōnī cæbīpa, ante watapæ apænecæimpa. ¹⁶ Ayæ ñīmpo cædāmaī inte mīnītō wadāni iñānīte cōwē waa cæedāni. Ayæ wadāni iñānīte mīnī mānīncoo godō nēnempomīnī æncædānīmpa. Mīnītō mānōmaī, Wængonguī quī, ante godōnte bai cædinque nēnempomīnī adīnque Wængonguī mīnī godōnō ante waa acampa. ¹⁷ Mīnītō, Mōnō imonte nē ānāni iñānīte mōnō Ao ante ēñengæimpa, ante pōnēnīnque nē aadāni iñānīte cōwē ēñente cæedāni. Tōmēnāni, Æbānō cæboo, ante adīnque Wængonguī apænte ancæcāimpa, ante ēñēnīnque guīñente wædāni inte nō cædinque aadānīpa cæmīnīi. Tōmēnāni mānōmaī aadīnque watapæ tote quēwencædānīmpa, ante mīnītō wæætē tōmēnāni nāni ānōnō ante ēñente cæedāni. Mīnītō wæætē ēñēnāmaī imīnī adīnque tōmēnāni wæætē edæ, Ædō cæte aaquīmōnīi, ante wæwente badāni iñinque mīnītō adobai todāmaī imaīmīnīpa.

¹⁸ Mōnītō beyæ ante Wængonguī ingante apæneedāni. Mōnītō mīmō entawēmōnī inte wentamō entawēnāmaī imōnīpa, ante nāmā apænte pōnēmōnīpa. Edæ, Quiēmē cæmō incæ mōnō cōwē nō cæte quēwengæimpa, ante cæmōnīpa. ¹⁹ Botō mīnītō weca ocæ emænte pōinēmōpa. Iñinque mīnītō Wængonguī ingante apænedīnque, Wængonguī, bitō pōnō cæbi ate Pabodo mōnītō weca poncæcāimpa, ante apæneedāni, ante nanguī āmōpa.

Mīnītō iṃīnīte Wængonguī waa cæcæcāimpa, ante

²⁰ Wængonguī inguīpoga nānō badōnāmaī iñedē wēēnēñedē pōnī ānīnque edæ, Mōnō godongāmæ waa cæte quēwengæimpa, ante tōmengā nānō angainō bai cōwē nē badongāingā inte iīmaī pōnō cægacāimpa. Edæ mōnō obegaidi bai iñōmonte Awēnē Itota iñōmō mōnō imonte nē Aacā ñænængā inongā inte tōmengā wepæ gowegaimæ eyepæ pōnī godongā ate Wængonguī tōmengā ingante, Eyepæ i, ānīnque, Ñāni omæmōe, angā

ñäni ömæmongacäimpa. Mänömaï gänë pönente në cægaingä inte Wængonguï iñömö,²¹ waa pöni pönongä ænte eyepæ entawëninque mīnitö iñömö tömengä nänö änö bai cæcæminimpa. Tömengä Itota Codito tönö godongämæ cædinque pönö cæcä æninque mönö tömengä nänö waa adoncooque entawengæimpa, ämopa. Itota Codito iñömö ñöwopämo incæ iincayæmämo incæ cöwë në tæi emönongä inte ñäö emongä amönipa, ante mönö tömengä ingante cöwë watapæ apænecäimpa. Mänömaï ingæimpa, ante botö, Amëë, ämopa.

²² Iñänäni ëñeedäni. Botö mäninö tömänö ante apænecæte ante wædænque pönī yewæmömopa. İninque mäninö botö ædæmö apænedinö ante mīnitö piyænë cædinque ëñeedäni, ämopa. ²³ Mönö tönīñacä Timoteo tee mönete wæyongante ñöwo ñimpo cædäni gocantapa, ante apænebo ëñeedäni. Tömengä botö weca quingæ pongä ininque botö tömengä tönö guëa mīnitö weca ëñacæ pömaimönapa. ²⁴ Mönitö beyæ apænedinque mīnitö imīnite në aadäni inänite, Waa quëwencæminimpa, ante apæneedäni. Ayæ adobaï Wængonguï quīnäni tömänäni inänite, Waa quëwencæminimpa, ante mönitö beyæ æedäni. Ayæ, Mīnitö imīnite ante apænedinque Itadiabæ quëwënäni adobaï, Mīnitö waa quëwencæminimpa, ante apænedänipa, ante ämo ëñeedäni. ²⁵ Mīnitö tömämi imīnite Wængonguï pönö waadete cæcæcäimpa. Mäninque ante yewæmömopa.

Tantiago cadota ante nänö yewæmongainta

Tantiago iimäi yewæmongacäimpa

¹ Botö Tantiagobo iñömö Mæmpo Wængongui tönö mönö Awënë Itota Codito inate në cädömo imopa. Idægoidi mini cabo tipæmpoga go mencabominiya inte wabæca nani quëwencabo wabæca nani quëwencabo weca pangocæte godimini iñöminite botö waa pönëmo inte ii yewæmöintaa yewæmömopa.

Wængongui nänö ëñëmämo ante mönö ængæimpa, ante

² Botö töninamini ëñeedäni. Quëëmë beyæ wæwente bamini incæ minitö æyedëmë mänömaï bamini inique edæ mäniñedë incæ cöwë, Mönö watapæ toquinque impa, ante pönëedäni. ³ Mini wede pönëno æbänö i, ante edonque acäimpa, ante cädäni ate caate wæmini incæte minitö, Mönö caate wädö beyænque mönö godömenque pædinque wæntæye inämaï inte ee cæquimö imopa, ante do ëñëminipa. ⁴ Inique, Mönö æmæwo pæcäimpa, ante cædinque minitö wæntæye inämaï inte ee cæedäni. Mänömaï cæte pæmini inique, Mini cædimämo æbänö cæmini iminii, ante adinque edæ, Tömänö wæmö cæmini iminipa, ante abaimpa.

⁵ Minitö weca æcänö nänö ëñëmämo wii eyepæ ina adinque tömengä, Pönömi ëñëmoe, ante Wængongui ingante apænequëngampa. Apæneyongä Wængongui wæætë pönö cæcä æncæcäimpa. Edæ Wængongui iñömö në, Pönömi æmoe, ante änogä ingante wæætë piinte änämaï inte godönongä ingampa. Ayæ tömänäni inänite pönö cædinque tömäa godönongä ingampa. ⁶ Inämpa në angä iñömö wede pönenguëngä inte wii æmæ pönëninque apænecæcäimpa. Edæ në æmæ pönengä iñömö gäwapæ æpæ woboyæ pæmæninque mä conta mä conta gopæ ocæmæ pö cæpæ nänö cægaïmä bai tömengä adobai gocä ingampa. ⁷ Mäningä iñömö Wængongui pönongä æncæboimpa, ante ædö cæte iimäi ante pönengingäa. Wængongui edæ tömengä ingante tömäa godönämaï incæcäimpa. ⁸ Tömengä mënongä pönente quëwengä ingampa. Æbänö cæcäa, ante ëñënämaï inongä inte ædö cæte waa cæquingäa.

⁹ Adocanque mönö töninacä incæ imæca quëwënäni nani ëadincoo në wii eyepæ ëacä incæte tömengä Wængongui pönö cæcä beyænque, Æbänö ëaboo, ante pönëninque watapæ toquëngä ingampa. ¹⁰ Wacä mönö töninacä guiquënë imæca quëwënäni nani ëadincoo në ëacä incæte tömengä wæætë, Botö önömoque imopa, ante pönëninque watapæ toquëngä ingampa. Edæ ongai önönque pododique guinë wæmpa bai tömengä adobai wæncæcäimpa. ¹¹ Edæ nænque tamö ti näwäñonte awæ guingo icate to aminte æmæwo wæmpa. Ongai yædoï gueo odote wæninqe nänö wæmö ënodi wo ewente bapa bai në ëacä iñömö adobai ingampa. Tömengä godonte æ godonte æ tæca cædinque quingæ wæninqe edæ dæ anguingä.

Mönö caate wæpämö

¹² Wængongui ingante në waadedäni inänite tömengä wæætë, Mini cöwë quëwenguinta, ante poganta bai minitö iminite pönömo æncæminimpa, ante angacäimpa. Mäninta Wængongui weca cöwë mönö quëwenguinö impa. Inique waocä caate wæcä incæte tömengä wæntæye badämaï ingä iñömö tömengä nänö toquinque. Wæntæye inämaï inte ee cæcä adinque Wængongui, Mini cöwë quëwenguinta, ante tömengä nänö angainö bai mäningä ingante pönongä æncæcäimpa. ¹³ Waocä nänö cæinëwente wädö beyæ, Wënæ wënæ cæboe, ante cædinque tömengä, Wængongui botö imote, Wënæ wënæ cæcæbiimpa, ante ingampa, ante wii angüëngä ingampa. Edæ Wængongui ingante, Wënæ wënæ cæcæbiimpa, ante waocä ædö cæte anguingäa. Wængongui wæætë wädäni inänite, Wënæ wënæ cæcæminimpa, ante änämaï inongä ingampa cæminii. ¹⁴ Æcämenque incæ, Wënæ wënæ botö cæinente wädö incæ ante wæmö

impa, ante pönëinque tömengä do wënæ wënæ mönō cæinente wædō beyænque wënæ wënæ cæinengä ingampa. ¹⁵ Yædemadä wëñængä pæcä adinque ëñaquingä bai mönō cæinewente wæpāmo adobai entawente pætawëmō ïinque mönō do wënæ wënæ cæmompā. Ayæ wënæ wënæ mönō cæpāmo beyæ mönō æmæwo wænguinque impa.

¹⁶ Botō nē waadete tönïñamïni ëñeedäni. Mïnitō nāmā incæ oda cædāmaï incæminimpā. ¹⁷ Önonque mönō ænō ante mönō waëmō ñäö ëmönoncoo tömancoo incæ mönō Mæmpo Wængonguï öönædē owote nē pönönongä ingampa. Mæmpo Wængonguï öönædē owodinque apäidäni ïinäni badongacäimpā. Adocä nænque wëmō cæbai wayömō wayömō go bai entawënämaingä ingampa. Tömengä wæætē adodonce ingaingä ingampa. ¹⁸ Botō cæinëmopa, ante nē angaingä inte Wængonguï, Nāwangä botō angainō beyænque mïnitō botō wëñämïni bacæminimpā, ante wäänä mangä bai cædinque mönō ïmonte pönō badongacäimpā. Tömengä nänō badongaincoo tömancoo ïñonte mönō tänömō ïnömō ïmompā.

Wængonguï ingante mönō nō ëñente cædō

¹⁹ Botō nē waadete tönïñamïni ëñeedäni. Wacä añongä mïnitō tömämïni quingæ ëñenguënëmïni ïmïnipā. Mïnitō wæætē quingæ apænedämaï inte adobai quingæ pïinte ïnämaï inguënëmïni ïmïnipā. ²⁰ Wængonguï, Nō cæte quëwëedäni, ante waa nänō cæinëmāmo ante waocä nänō pïimāmo beyæ wïi edæ cæcampa. ²¹ Mänömaï beyæ mïnitō wentamō entawëninque mïni wiwa cædō tömää ñimpo cædäni. Adobai quiëmē mïni wënæ wënæ cæpāmo tömämāmo ñimpo cæte ïedäni. Ayæ Wængonguï nänō angainō ante mïnitō mïmönē nänō mingainō ante Ao ante gänē pönente æncæminimpā. Edæ ïi angainō beyænque mïnitō quëwencæminimpā.

²² Mïnitō, Nāmā incæ oda cædāmaï ingæimpā, ante cædinque Wængonguï nänō angainō ante wïi önonque ëñëmïnique inte wæætē, Æbänō ante ï, ante ëñente cædäni. ²³⁻²⁴ Waocä nāmā awinca awocawæntaa adinque nāmā ate ate wadæ godinque, Quinō bai intawo, ante nänō adinca do oda cæte wæcampa. Mänömaï oda cæte wæcä bai Wængonguï nänō angainō ante nē ëñenganque wïi ëñente cæcä ïñömō tömengä adobai oda cæte wæcä ingampa. ²⁵ Wængonguï nöingä nänō wææ angainō ante nāni yewæmongainō ante nē ædæmō cōwē acä guiquënë tömengä ïñömō nänō ëñëninō ante wïi pönente badāmaï inte wæætē cōwē ëñente cæcä ïinque tömengä mänömaï cædinque nänō toquinque cæcampa. Wængonguï nöingä nänō wææ angainō beyænque waocä ñimpo cæte quëwengä ingampa.

²⁶ Wængonguï ingante botō nē ëñente cæbo ïmopa, ante pönengä incæte tömengä önonguënëwa ñä cæguënëwate bai cædāmaï inte wæætē wiwa tedecä ïinque tömengä nāmā incæ oda cæte gobaingampa. Ayæ Wængonguï ingante botō ëñente cæbo ïmopa, ante tömengä nänō änō ante önonque angä ïmaingampa. ²⁷ Nöwadäni tönō owæmpoinäni nāni wæwëñedē mönō tömënäni tönō godongämæ cæcæimpā. Ayæ adobai ïmæcaque ante quëwënäni nāni wënæ wënæ cædimāmo bai mönō, Wentamō badāmaï ingæimpā, ante wææ cæcæimpā. Mänömaï cæmō ïinque mönō Mæmpo Wængonguï ayongante mönō wapiticæ cædāmaï inte wæætē nō ëñente cæmō ïmompā.

2

Wacä ingante wadō wadō ate pönente cædāmaï ingæimpā

¹ Botō tönïñamïni ëñeedäni. Mönō Awënë Itota Codito ñäö ëmonte nē apäigaingä ingante nē pönëmïni inte woadäni ïnänite wadō wadō ate pönente cædāmaï ïedäni. ² ïmaï nāni cæbai ante önowënenque pönëedäni. Edæ onguïñængä nē ëacä ïñömō tömengä nänō önongompo timpoi oodo badöi wempocä ïinque waëmoncoo mongængä inte mïni a ongöñömō guï pongampa. Ayæ onguïñængä nē wïi eyepæ ëacä ïñömō pedæncoo mongængä inte mïni a ongöñömō adobai pongampa. ³ Adinque mïnitō waëmoncoo mongængä ingante, “Bitō ïñömō waa tæ containpaa tæ contæ,” ante apænëmïni ïmïnitawo. Wæætē wïi eyepæ ëacä ingante, “Bitō mänïñömō adiyæ ongöe.

Botö önöwa iñömö tepataa tæ contae,” ante apænemini iminitawo. ⁴ Mänömai apæned-inque minitö weca wii godongämæ wadö wadö ate pönente cæbaiminitawo. Ayæ wænæ wænæ pönëninque apænte ämini babaiminitawo.

⁵ Botö në waadete töninamini ëñeedäni. Wængongui Awënë Odeye ingante në waadedäni inänite tömengä, Botö pönö cæbo ate minitö botö nempo cöwë quëwencæminimpa, angacäimpa. Imæca quëwënäni weca maincoo wii eyepæ ëadäni iñönänite tömengä, Mini wede pönënö nangui ewocadinque minitö botö angainö bai botö nempo quëwencæminimpa, ante tömënäni inänite wii apænte ængantawo. ⁶ Minitö wæætë wii eyepæ ëacä ingante piinte tedemini ate tömengä guingo imonte badingä ingampa. Iñæmpa në ëadäni guiquënë minitö iminite nani wænæ wænæ cædinö beyænque wii wæminitawo. Ayæ adodäni minitö iminite apænte anguinäni weca godoncæte ante wii ænte godanitawo. ⁷ Ayæ minitö, Coditoidi imönipa, ante Codito waa pönï ëmowo ante ëmömïni iñöminite tömënäni adodäni incæ mäniwo ante babæ äninque në wænæ wænæ änäni wii inänitawo.

⁸ Wængongui angä ëñëninque nani yewæmongainö ante adinque minitö waa pönï Awënë nänö wææ angainö ante nö ëñente cæmini ininque waa cæbaimini iminipa. Iñimai ante yewæmonte impa. “Bitö nämä ante pönente, Nämä waadebo imopa, ante nämä bitö waadete pönenganca wadäni inänite adoganca waadete pönëe.” ⁹ Mänömai cædinque minitö maincoo ëacä ingante waa cæmini incæte wii eyepæ ëacä ingante wadö wadö ate pönemini inte wiwa ämini ininque wænæ wænæ cæmini imaiminipa. Ayæ Wængongui nänö wææ angainö önonque wido cæte bai cædimini inte minitö wentamö mongæmini imaiminipa. ¹⁰ Wængongui beyæ Möitee wodi nänö wææ yewæmongainö ante tömänö ante æcämenque në ëñente cæcä incæte mäninö adodanque pönï incæ ëñënamai cæcä inte tömengä mäninö tömänö ante önonque wido cæte bai cædingä inte wentamö mongængä ingampa. ¹¹ Edæ Wængongui, “Nänöogæ inämai iñongante godö guëa mönämäi iedäni,” ante në angaingä inte tömengä adocä godömenque iñimai angacäimpa, “Wacä ingä wænönämäi iedäni.” Minitö wacä nänöogæ iñongante godö guëa mönämäi imini incæte wacä ingante wænömïni ininque minitö Wængongui nänö wææ angainö önonque wido cæte bai cædimini inte wentamö mongæmini imaiminipa.

¹² Wængongui nänö apænte anguiönæ mönö imonte tömengä nänö wææ angainö bai cæcæcäimpa. Mäninö nänö wææ angainö beyænque waocä ñimpo cæte quëwengä ingampa. Ininque minitö tedemini incæ cæmini incæ, Cöwë mänömai impa, ante pönëninque tedecæminimpa. Adobai ante cæcæminimpa. ¹³ Wadäni wæwënäni iñönänite æcämenque wii waadete godö waa cædingä ingäa, ante Wængongui wæætë tömengä ingante godö waadete waa cædämai inte apænte äninque pancæcäimpa. Wadäni wæwënäni inänite æcämenque guiquënë në godö waadete waa cædingä iñongante Wængongui wæætë tömengä ingante nänö apænte anguiönæ godö waadete waa cæcæcäimpa.

Wængongui ingante pönëninque mönö cæquënëno

¹⁴ Botö töninamini ëñeedäni. Waocä, Botö Wængongui ingante wede pönëmo imopa, angä incæte tömengä nänö waa cædinö wæætë dæ ä ininque tömengä mäninö, Wede pönëmpa, ante nänö änö beyænque ædö cæte wænämäi quëwenguingäa. ¹⁵ Iñimai nani cæbai ante önöwënenque pönëedäni. Wængongui ingante wede pönengä iñömö onguiñængä incæ onquiyængä incæ æcämenque incæ tömengä weocoo tönö cængui ömaacä ingampa, ¹⁶ adinque minitö weca adocanque tömengä ingante, “Waa goe, ämopa. Bitö, Yoguidämai, ante weocoo wëñae, cængui eyepæ äninque cæe,” ante angä incæte në ömaacä nänö ænguënëno ante edæ tömengä ingante godönämäi ininque tömengä waa cæcantawogaa. ¹⁷ Adobai iñimai impa. Mönö waa cædinö dæ ä ininque Wængongui ingante mönö wede pönënö incæ önonque bapa.

¹⁸ Incæte wacä iñimai anguingä. “Bitö Wængongui ingante tömëmi wede pönënö ëabi imipa. Botö guiquënë tömëmo waa cædinö ëabo imopa,” ante äñongä botö wæætë, Bitö në cædämai inömi inte Wængongui ingante bitö wede pönënö ante botö imote odömömi aboe, ämopa. Odömömi adinque botö guiquënë botö cædinö ante odömömo

adinque bitō wæætē botō wede pōnēnō edonque pōnī abaimipa. ¹⁹ Wængonguī nāwangā adocanque ingaingā ingampa. Bitō mǎnōmainō ante pōnēmi inte waa pōnī pōnēmi imipa. Wēnæidi diyæ adodō ante pōnēnānipa tōō. Incæte ancai guiñente do do wāate wædānipa. ²⁰ Bitō mǎnōmainō ante nē ōnonque tedebe imi ēñēe. Botō, Mōnō waa cædāmaī imō inique Wængonguī ingante mōnō wede pōnēnō incæ ōnonque imaimpa, ante odōmōmo ate bitō edæ Ao ante ēñenguīmiyaa. ²¹ Edæ mōnō docā Abadāō wodi Wængonguī nānō āmaī cædinque tōmengā wengā onguīñængā Itæca ingante æninque iya taimoga cōnōninque wænoncæ cæyongante Wængonguī adinque, Bitō nō cæte entawēmi āmopa, ante apænægacāimpa. Abadāō wodi nānō cædinō beyænque Wængonguī mǎnōmaī angacāimpa. ²² Bitō ēñēnāmaī imitawo. Abadāō wodi edæ Wængonguī ingante wede pōnēninque ēñente cægacāimpa. Wīi ēñente cægaingā inte baī tōmengā Wængonguī ingante nānō wede pōnengainō ōnonque pōnēmaingā incægacāimpa. Ayæ waa nānō cægainō beyæ Abadāō wodi nānō wede pōnengainō eyepæ pōnī bagatimpa. ²³ Wængonguī angā ēñente nāni yewæmongainō baī iinque batimpa. Iīmaī ante impa. “Abadāō iñōmō Wængonguī, Botō iīmaī pōnō cæcæboimpa, ante nānō angainō ante pōnægacāimpa. Inique Wængonguī, Mǎnōmaī pōnēmi beyæ bitō botō ayōmo nō cæte entawēmi imipa,” ante tōmengā ingante wæætē pōnō angacāimpa. Ayæ Abadāō, Wængonguī æmigo ingampa, ante angadānimpa.

²⁴ Bitō ēñēnāmaī imitawo. Waocā Wængonguī ingante wīi nānō wede pōnēnō beyænque wæætē, Tōmengā æbānō waa cæcāā, ante adinque Wængonguī tōmengā ingante, Bitō nō cæte entawēmi abopa, ante cæcā ingampa. ²⁵ Idægoidi, Ōmæ awēmō ate pōeda, ante mēnaa inate da godōnāni gote pōñōnate Adacaba wodi nē towente quēwengā incæ, Botō oncōnē guieda, ante tōmēna inate wē wodongacāimpa. Ayæ, Wadāni tōmēna inate bæi ongōnāmaī incædānimpa, ante, Wadō taadō goeda, ante da godongā gogadāimpa. Mǎnōmaī cæcā adinque Wængonguī, Bitō cædinō beyænque bitō botō ayōmo nō cæte entawēmi imipa, ante Adacaba ingante adobainō ante pōnō angacāimpa. ²⁶ Mōnō baō ōmæwocāā inte do wænte ī baī Wængonguī ingante mōnō waa cædāmaī wede pōnēnō adobāi do wæningā baī inte edæ ōnonque impa.

3

Mōnō ōnonguēnēwa

¹ Botō tōniñamini ēñēedāni. Minitō weca wīi tæiyænāni, Nē odōmonte apænemōni bacæmōnimpa, ante baīnente wæquēnēnāni incædānimpa. Edæ wadāni inānite pōnōmenque apænte āninque Wængonguī wæætē mōnō nē odōmonte apænemō iñōmonte, Æbānō odōmonte apænemīnii, ante mōnō imonte godōmenque apænte āninque pancæcāimpa. Minitō do ēñēmīnipa. ² Mōnō tōmāmō nanguī ægodawate tæi go wænīnque baī oda cæmō imompa. Nē tedecā iñōmō tōmengā, Æbānō ante tedeboo, ante tōmengā ōnonguēnēwa cōwē wææ aadinque tōmengā wēnæ wēnæ ānāmaī inique nōingā cæbaingā ingampa. Ayæ wēnæ wēnæ cædāmaī incæboimpa, ante nāmā baonga tōmāo wææ aate quēwēnongā ingampa.

³ Cabayo mōnō imonte ēñente cæcæcāimpa, ante tæinta badōinta ōnōne da wēnemō ate, Cabayo baō tōmāñō incæ iñāimæ iñāimæ gocæcāimpa, ante cæmō inique cabayo do ēñente gocampa. ⁴ Iīmainō ante ñænængade wipo ante adobāi ante pōnēedāni. Ñænængade pōnī wipo incæ woboyæ nanguī pæmænte gopa incæte wipo nē dadongā nānō cæinēnō baī, Ædōnō dadiimæ ædōnō dadiimæ wiyate goquīi, ante guiyā awæmpa inte wiyate cæcā gopa. ⁵ Ayæ adobāi mōnō baō tōmāo ēñayōmō mōnō ōnonguēnēwa guiyā enguēnēwamō imompa. Incæte mōnō ōnonguēnēwa inte tededinque, Mōnō nanguī cæmompā, ante tedewēmompā. Ñænængade pōnī ōmædē incæ amimō bayedē guiyā gonga beyæ ōmædē tōmāo gonga bæcodote bapa. ⁶ Ayæ mōnō ōnonguēnēwa adobāi gonga bæcodote baī tedepa. Mōnō baō tōmāo ēñayōmō mōnō ōnonguēnēwa tōmāo mōnō wiwa tedewenguinque wēnæ wēnæ enguēnēwamō imompa. Waomō incæ mǎninguēnēwa beyænque mōnō baō tōmāo inte ēñēnāmaī cæmompā. Ayæ

gonga wacæ tænmönte bæcododäni bai ado önunguënëwa beyæ mönö quëwenganca tömanganca wo ëwente imompa. Edæ ii gonga tadömengadænguipodë öñonte ö ænte wacæ tænmönte bæcodote bai cædinque wënæ incæ mönö imonte cæcä beyænque mönö wiwa tedewëmö imompa.

⁷ Babæidi incæ öömä ëadäni incæ tæntæidi incæ æpænë quëwënäni incæ quingänöidi incæ tömänäni inänite waocä, Botö pæpogate cæninäni bacæminimpa, ante cæcä ingampa. Waocä doyedë nänö cægai beyænque cæninäni bate quëwengadänimpa. ⁸ Ìñæmpa æcänö, Mönö önunguënëwa pæpogate bai bacæimpa, ante cædaa edæ dæ angampa. Edæ, Babæidi cöwë incæmönimpa, ante cæninäni badämaï inäni bai mönö önunguënëwa adobai wënæ wënæ i ïinque ædö cæte waa tedemöö. Wæætë mönö önunguënëwa nanguï wænguimæ enguënëwamö bai imompa.

⁹ Mäninguënëwa inte mönö Mæmpo Wængonguï ingante, Bitö tæiyæ waëmö imidö anguënë, ante waa apænemompa. Wæætë waodäni Wængonguï tömengä nänö ingai bai nänö në badongainäni ïñönänite tömënäni inänite ante mönö adoguënëwa inte wënæ wënæ apænemompa. ¹⁰ Ado önöne incæ wade wade ante mënea ante apænemompa. Adodeque ante waa impa. Adodeque ante wënæ wënæ impa. Botö tönïñamini ëñeedäni. Mäninö bai mönö edæ wii cæquënëmö ingæimpa. ¹¹ Æpæ tayömö ado tayömö ædö cæte waëmömæ wentamömæ äññömonque ta goquimææ. ¹² Botö tönïñamini ëñeedäni. Iigowæ nani äwæ incayö odibomö nani änömö ædö cæte incaquii. Yowewæ incayö iigo mäñeca ædö cæte incaquii. Adobai ado tayömö ædö cæte waëmömæ wentamömæ äññömonque ta goquimææ.

Mönö nö ëñëmämo

¹³ Minitö weca æcänö nö ëñengä ingantawo. Tömengä ïñömö, Nö ëñëmo imopa, ante wadäni ëñencädänimpa, ante cædinque tömengä nänö waa quëwënö inte odömoncæcäimpa. Ayæ tömengä nö ëñengä incæ, Botö önömoque imopa, ante pönëninque tömengä nänö cædinö beyæ odömongä acädänimpa. ¹⁴ Minitö guiquënë wacä quincoo adinque piinte entawëmini ayæ nämanque ante, Mönö ñænæmö badinque waa quëwengæimpa, ante pönente entawëmini ïinque minitö nö ëñëmini incæ, Mönö waa cæmompä, ante ædö cæte anguimïni. Ayæ mänömaï bai godömenque entawëmini ïinque näwangä mini anguënënö ante edæ Baa änämaï ïedäni. ¹⁵ Mäninö ëñëmämo wii Wængonguï nänö nö ëñëmämo i. Wæætë ii inguipogaque ante quëwengä inte waocä mä pönëninque wënæ nänö ëñëmämo ante entawengä ingampa. ¹⁶ Edæ waocä æyedëmë wacä quincoo adinque piinte entawengä ayæ nämanque ante, Botö ñænæmo badinque waa quëwencæboimpa, ante pönente entawengä ïñömö tömengä ædö cæte töingä pönente cæcää. Ìñæmpa quiëmë nani wënæ wënæ cæpämö ante cæcampa.

¹⁷ Waocä Wængonguï nänö nö ëñëmämo ante në entawengä guiquënë waëmö entawengä ingampa. Ayæ wacä ingante cöwë piyænë cæte quëwëngä ingampa. Tömengä në waadete pönengä inte wacä ingante waa ëñëngä ingampa. Wacä ingante ëñente cædongä ingampa. Tömengä, Wæwënämaï incæbiimpa, ante wacä ingante godö waadete waa cædongä ingampa. Ayæ, Quinö waa inguïi, ante mäninö ante cædongä ingampa. Në waodäni inänite wadö wadö ate pönente cædämaï inte tömengä nö pönente quëwëngä ingampa. ¹⁸ Wadäni inänite, Botö piyænë cæcæboimpa, ante në cæcä ïñömö tömengä nänö piyænë cædinö beyæ tömëmö në minongä bai ingampa. Tömengä nänö piyænë cædinö beyæ waodäni wæætë, Quinö nö cæte impa, ante cædäni ïinque tömengä edæ amiñayedë tömëmö tä pete ængä bai incæcäimpa.

4

Inguipoga nani quincoo ante pönënamäi incæmöimpa

¹ Mini cabo quinö beyæ ante guëa wæætedö wæætë piiniquë wæætë godö wæætë godö änewëminಿತawo. Minitö nämä wadö wadö mini cæinënö ante entawente guëa cæte quëwëmini beyænque cöwë godongämæ mini piinte quëwëngüinque iminipa töö.

² Minitö æinente wëmïni incæte ænämäi iminipa. Ìniquë në ëacä ingante wænömïni

incæ tōmengä nänö quincōo ante äinēmīni incæte mīni äinēnō, ante äenämaī imīnīpa. Mänōmaī beyæ mīnitō wæætē godō wæætē godō änewēnīnque guēa wæætedō wæætē pīinīnque guēadō guēa cæte quēwēmīni imīnīpa. Mīni änō ante mīnitō, Pönōmī ämōnie, ante mīnitō Wængonguī ingante apænedāmaī imīni inte mīni äenämaī quēwenguīnque impa. ³ Mīnitō Wængonguī ingante mīni änō ante apænēmīni incæte wēnæ wēnæ ante pönēnīnque apænēmīni beyæ äenämaī imīnīpa. Edæ Wængonguī nänö pönōnī äninque mōnō edæ nāmanque pönente tote quēwengæimpā, ante äinente wæmīni inte äenämaī imīnīpa tōö.

⁴ Waocä nänöogæ ingante wido cæcä baī mīnitō adobaī Wængonguī ingante wido cæmīni imīnīpa. Mīnitō ēñēnämaī imīnitawo. Inguipoga nāni quincōo ante mōnō pönēnō beyæ mōnō Wængonguī ingante pīinte imōmpa. Incæte, Inguipoga nāni quincōo ante nē pönencæboimpā, ante æcänō angä Wængonguī ingante pīinte bacæcäimpā. ⁵ Wængonguī angä ēñēnīnque nāni yewæmongainō iīmaī ante önonquedō ante intawogaa. “Wængonguī cæcä beyænque mōnō tōmengä Önōwoca ingante ewocate quēwēmō imōmpa. Inīnque mānīwoca mōnō imonte waadete pönēnīnque, Botō imote waadete pönenguēnēmīni imīnīpa, ante wæætē edæ godō pīinte acä ingampā.” ⁶ Incæte tōmengä mōnō imonte godōmenque waadete pönō cædinque mōnō tönō godongämæ cædongä ingampā. Mänōmaī beyæ Wængonguī angä ēñente nāni yewæmongainō iīmaī ante impa. “Nāmanque ante, Mōnitō gomonga waa cæmōni imōnīpa, ante nē pönēnāni inānite Wængonguī Baa angampā. Wæætē edæ, Mōnitō önömōnīque baī imōnīpa, ante nē änāni inānite tōmengä pönō waadete cæcampā.”

⁷ Mänōmaī beyæ mīnitō Wængonguī ingante ēñente cæedāni. Wēnæ ingante Baa ante quēwēedāni. Baa ämīni inīnque tōmengä nänēnē wodii winōmaingampā. ⁸ Wængonguī gämänō pōedāni. Pōmīni ate tōmengä wæætē mīnitō weca poncæcäimpā. Mīnitō wēnæ wēnæ cæmīni inōmīni inte önompo mempote baī wæmō pōni quēwēedāni. Ayæ, Wængonguī ingante waadete pönēmōpa, ante ämīni incæ adobaī inguipoga nāni quincōo pönēmīni inte mīnitō mēnonga ante pönente quēwēnōmīni imīnīpa. Inīnque edæ mīmō nā mēnongate baī cædinque tōingä pönente entawēmīni baedāni. ⁹ Mīni nāmā wēnæ wēnæ cædinō ante pönēnīnque mīnitō, Ancaa wæwente awædō, ante wæedāni. Mīnitō Ca ca tote quēwēnō nīmpo cædinque Ca ca wædinque edæ wæwente quēwēedāni. ¹⁰ Mīnitō incæ, Wēnæ wēnæ cæmōnīpa, ante önömōnīque imōnīpa, ante Wængonguī ingante äñōmīni tōmengä wæætē, Wadāni mīnitō imīnite waa acædānīpa, ante mīnitō imīnite ængō cæte baī cæquingänō anguēnē.

Mōnō tōniñacä ingante apænte änāmaī incæmōimpā

¹¹ Botō tōniñamīni ēñēedāni. Mīnitō wacä ingä wacä ingä wēnæ wēnæ ante apænedāmaī iedāni. Æcänō tōmengä tōniñacä ingantedō ante wēnæ wēnæ äna ayæ tōmengä ingante, Wēnæ wēnæ cæbīpa, ante æcänō apænte äna ina māningä Wængonguī nänö wææ angainō incæ wēnæ wēnæ ante apænecampā. Ayæ Wængonguī nänö wææ angainō ante wēnæ wēnæ impa, ante apænte angampā. Wīi tōmengä nänö ēñente cæquinque Wængonguī nänö wææ angainō ante apænte angampā. Wæætē edæ, Mänīnō ante nē apænte ämo imōpa, ante baī cæcampā. ¹² Wængonguī tōmenganque nänö wææ angainō ante nē angaingä ingampā. Mänōmaī beyæ tōmengä adocanque nē apænte anguingä inongäimpā. Adocä pönō cæcä beyænque, Botō ämo beyænque quēwenguīnāni, ante cædongä ingampā. Adobaī tōmengä apænte angä beyænque, Wadāni wo ewente bacædānīpa, ante cædongä ingampā. Bitō guiquēnē nē angāimi imīpa diyæ wacä ingante apænte anguēnēmi imīi.

Baänæ ate æbänö baquīi, ante Wængonguīnque ēñengä

¹³ Mīnitō nōwo botō imote ēñēedāni. Mīnitō nē iīmaī ante tedemīni imīnīpa. “Nōwoönæ incæ baänæ ate incæ mōnitō iī wadāni quēwēñōmō goquīmōni imōnīpa, ante māniñōmō godinque adoque wadepo iñonte mōnitō godonte ænguinta æncæte ante cæquīmōni imōnīpa,” ante ämīni imīnīpa. ¹⁴ Iñæmpā, Baänæ ate æbänö bacæimpā, ante tōmäa ēñēnämaī imīnīpa. Cōwē quēwenguīmōmpā diyæ ēñenguīmōö. Awænæcaque

owo boguimä nænque tamöningue quingæ dæ ba bai mönō quëwënō adobaï do dæ bacæimpa. ¹⁵ Minitō guiquënë iimaï ante anguënëmini iminipa. “Wængongui Ao angä iinque mönitō quëwenguimōni imōnipa. Ayæ Ao angä iinque mönitō ii waa cæqui cæcæmōnipa.” ¹⁶ Ìñæmpa mīnitō, Tömëmōnique äninque cæcæmōnipa, ante pōnëningue tedete quëwënōmini iminipa. Māninō ante tōmānō wënæ wënæ impa. ¹⁷ Waocä, Æbänō waa impa, ante ëñengä incæte cædāmaï ingä inte māningä wënæ wënæ cæcä ingampa.

5

Mäincoo nē ēadāni nāni pōnenguënēnō

¹ Minitō mäincoo nē ēamīni iñōmō ñōwo ëñēedāni. Minitō nanguï Ca ca wæedāni. Edæ, Mönō caate wæquinque nanguï ingæimpa, ante tedecōningue Ca ca wæcæminimpa. ² Minitō mäincoo ēadincoo do wote batimpa. Ayæ mīnitō waëmoncoo tōmancoo cayæ ade cænimpa. ³ Minitō oodo tōnō padata tæinta to tamōningue bai batimpa. Mānii to tamōni beyæ mīni wënæ wënæ cædinō edonque pōni odōmonte ingæimpa. Ayæ quincōmē gonga bæcodōñōmō concædinque æmæwo gonte ba bai mīnitō ii to tamōni beyæ mīni baō incæ adobaï æmæwo gonte ba bai bacæimpa. Ìñæmpa iimæca wodo iinque bayedē incæ tōmëmīni mäincoo ēadincoo do wote baquincoo gæte da wente cæminipææ.

⁴ Aedāni. Wadāni edæ tōmëmīni quëwencodencoos cædināni iñōnānite mīnitō, Paga, ante mīni godonguënenta pæ gompodique godōnāmaï imīnitapa. Ìninque ænāmaï ināni mīnitō imīnitedō ante piinte wædinque, Nē ēadāni iñōmō, Mönitō cædinō beyæ ante dicæ pōnōnāni æntamōniyaa, ante wædōnānipa. Mönō Awënë nē adocanque Tōmää Cægāingä iñōmō nē cædināni nāni wædinō do ëñëningä ingampa. ⁵ Ìimæca quëwëñedē mīnitō quincōo waëmoncoo tōmancoo mante quëwëmīni inte mīnitō cōwë, Nāmā möni watapæ tote quëwengæimpa, ante quëwëñimīni imīnipa. Waocä nānō wænongä wænguiönæ iñonte cæningä nānō wænguinque oguimo pōni ba bai mīnitō cæningä bai adobaï oguimo pōni bamīni imīnitapa tōō. Māniönæ edæ do batimpa. ⁶ Wadāni nō cæte quëwënāni mīnitō imīnite Baa änāmaï iñōnānite mīnitō iñōmō, Mīni pante wæquinque wënæ wënæ cædānipa, ante wapiticæ apænte ämīni inte tōmënāni inānite wænōmīni wænānitapa.

Mönō ee cæpāmo ayæ Wængongui ingante mönō apænedō

⁷ Mänōmaï beyæ botō tōniñamīni ëñēedāni. Minitō mönō Awënë nānō ponguinganca ante wæntædāmaï inte ee cæte wänō cōnōedāni. Aedāni, Nē quiyacä tōmëmō wæænte ate onguipo cōñe ba ate, Tā bocate pæqui, ante cōönæ tedænque ee ongongampa. Cōönæ tedæ iinque baganca amiña bayedē waëmō pōni nānō tōmëmōncoo tā pete gæcæte ante wii ee ongongantawo. ⁸ Mönō Awënë nānō ponguiönæ oo pōni impa, ante mīnitō adobaï ee cæte wänō cōnōedāni.

⁹ Botō tōniñamīni ëñēedāni. Minitō wacä ingä wacä ingä wæætedō wæætë, Wiwa cæcampa, ante godō änāmaï iedāni. Minitō mänōmaï cæmīni iinque Wængongui wæætë mīnitō imīnite apænte ante pämaingampa. Edæ mönō Apænte Anguingä oo poncæcäimpa cæmīni. ¹⁰ Botō tōniñamīni ëñēedāni. Wëñëñedē Wængongui beyæ nē apænëgāināni iñōmō tōmëngä ëmōwo apænedinque wæwënāni incæte wæntædāmaï inte ee cæte quëwengadānipa, ante pōnëningue mīnitō tōmënāni nāni cægaï bai adobaï cæedāni. ¹¹ Wadāni wæwënāni incæte wæntæye ināmaï inte ee cædāni iinque nāni toquinque impa, ante mönō pōnënō ante do ëñëmīnipa. Docä Cōba wodi iñōmō tōmëngä nanguï pōni wæwëngä incæte wæntædāmaï inte piināmaï ingacäimpa. Māninō ante do ëñëñimīni inte ayæ tōmëngä nānō wæwëñedē iinque ba ate Wængongui æbänō tōmëngä ingante nanguï godongä ængāingä ingacäimpa, ante adobaï ëñëmīnitawo. Edæ waodāni wæwënāni iñōnānite mönō Awënë Wængongui ædæmō waadete waa cædongä ingampa.

¹² Botö töninamini eneedäni. Wadö mini pönönö ante pönömenque pönëninque minitö iimaï ante godömenque pönëedäni. Minitö änö näwangä impa, ante wadäni pönencädänimpa, ante cædinque, Botö änö nöingä baquinö angüenë, ante änämaï iedäni. Edæ, Öönæ beyænque imæca beyænque quiëmë beyænque mönö apænemönö näwangä baquinö angüenë, ante tömänö ante edæ apænedämaï iedäni. Minitö wæætë Ao äinëmïni inte “Ao” ante mäninque äedäni. Ayæ minitö Baa äinëmïni inte “Baa” ante mäninque äedäni. Edæ wii mänömaï cæmïni ininque Wængongui wæætë minitö imïnite apænte ante pämaingampa.

¹³ Minitö wæwëmïni ininque Wængongui ingante apænequënëmïni iminipa. Minitö watapæ tomïni ininque Wængongui ingante, Bitö tæiyæ waëmö imidö angüenë, ante ämotamïni ancæminimpa. ¹⁴ Æcänö minitö weca wënæ wënæ ina inönö tömengä Codito ingante mïni godongämæ pönencabo inönöminute në aadäni nani Picæncabo mïni änäni inänite, Pöedäni, ante aa pequënegä ingampa. Aa pecä pönäni ate tömënäni Awënë Itota ëmowo ante apænedinque wædænque ogui wapæ æninque në wënæ wënæ inongä ingante oo paacädänimpa. Ayæ adoyedë wënæ wënæ inongä ingante nani oo paayedë tömengä beyæ ante Wængongui ingante apænecädänimpa. ¹⁵ Ayæ, Wængongui ingante apæneyömonte tömengä enëngampa, ante wede pönëninque apænemö beyænque waocä në wënæ wënæ iningä incæ edæ gançæ bacæcäimpa. Wængongui tömengä ingante pönö cæcä ate waa ba nani ömæmoncæcäimpa. Ayæ adocä nänö wënæ wënæ cædinö beyæ wënæ wënæ ingä ininque Wængongui tömengä nänö wënæ wënæ cædinö adinque nïmpo cæcä quëwëmaingampa. ¹⁶ Mänömaï beyæ minitö wacä ingante wacä ingante apænedinque, Botö wiwa cædimö inte wæbopa, ante äedäni. Mänömaï cædinque minitö, Gançæ bacæmönimpa, ante wacä beyæ ante wacä beyæ ante Wængongui ingante apæneedäni. Waocä në nö cæte quëwëngö inönö Wængongui ingante apænedinque edæ täi piñænte apænecä ingampa. Mäningä nänö apænedö beyænque Wængongui cæcæcäimpa. ¹⁷ Ediya wodi mönö waomö imö bai tömengä adobai ingacäimpa. Incæte tömengä Wængongui ingante, Cöönæ ämi cædämaï ingæimpa, ante ædæmö apænecä ate mëa go adoque tæcæ wædepo ganca edæ cöönæ cædämaï ingatimpa. ¹⁸ Ayæ ate tömengä, Cöönæ ämi cæcæimpa, ante Wængongui ingante wæætë apænecäcäimpa. Apænecä ate öönædë inö wææ cöönæ cægatimpa. Cöönæ wææ cæ ate onguipoga tömëmö do tä bocate pægatimpa.

¹⁹ Botö töninamini eneedäni. Minitö weca æcämenque nö taadö oda cæte gocä adinque wacä tömengä ingante ocæ ëmænte mämongä pongüenengä ingampa. ²⁰ Iimaï pönëedäni. Në wënæ wënæ cæcä wapiticæ taadö gocä adinque æcämenque tömengä ingante nö taadö inö ocæ ëmænte në mämongä ingä tömengä mämongä beyænque në wapiticæ gocä inönö æmæwo nänö wængüenënö nïmpo cæte edæ quëwëncæcäimpa. Ayæ nanguï pönï nänö wënæ wënæ cædinö incæ wadæ cæte ingæimpa, ämopa. Mäninque ante yewëmömopa.

1 Pegodo

cadota ante nänö tänota yewæmongainta

Waa quëwencæminimpa, ante

¹ Botö Pegodobo Itota Codito nänö në da godongaimo inömo inte në yewæmömo imopa. Minitö iñömö tömëmini ömæ quëwëñämaï imini inte näwæ godinque wadäni nëmæ ponte quëwëmini inte pancaminiya Pontobæ quëwëñömïni wamini guiquënë Gadatiabæ quëwëminipa. Wamini Capadotiabæ quëwëñömïni wamini guiquënë Atiabæ quëwëminipa. Wamini guiquënë Bitiniabæ quëwëminipa. Mänömaï wayömö wayömö quëwëmini iñöminite botö, Acæminimpa, ante yewæmömopa. ² Mæmpo Wængongui iñömö minitö iminite wëñëñedë pöni do adinque, Minitö Itota Codito ingante në ëñente cæmini bacæminimpa, ante apænte ængacäimpa. Ayæ, Botö ayömo minitö tæiyæ waëmö ëwocamini bacæminimpa, ante cædinque Wængongui Önöwoca incæ Itota wepæ inte pönö ñä mënongacäimpa. Mänömaï cæcä bagaimini iñöminite botö ñöwo iñömö edæ, Wængongui nangui waadete pönö cæcä ate minitö në gänë pönëmini bacæminimpa, ante yewæmömopa.

Watapæ bacäimpa, ante pönëningue quëwëmompä, ante

³ Itota Codito Wæmpocä iñongante Itota incæ, Botö Wængonguimi inömi imipa, ante Wængongui ingante waa apænecampa. Adocä iñömö mönö Awënë Itota Codito wænte öñöñongante, Ñäni ömæmöe, angä ñäni ömæmongacäimpa. Tömengä ñäni ömæmongä beyænque Wængongui mönö imonte adobaï pönö cæcä ate mönö mempoga ëñate baï inömo inte edæ, Mönö miimö quëwëningue watapæ quëwengäimpa, ante pönente quëwëmompä. Inique mönö iñömö Wængongui ingante apænedinque, Bitö tæi ëmönömi inte waa pöni cæbi æmönipa, ante edæ watapæ apænecäimpa. ⁴ Ayæ Wængongui, Incayæ ate mini ænguincöo, ante öönædë do edæ cö cæte mangampa. Mänincoo iñömö ñömädämaï incoo inique cöwë wentamö badämaï incoo inte edæ wodämaï inguincöo ingäimpa. ⁵ Inguipo pedænguipo iinque bayedë edæ Wængongui pönö ængä beyænque mönö cöwë quëwenguinö ante edonque pöni acäimpa. Inique minitö wede pönëmini beyænque minitö quëwenguimämo iinque baquinganca Wængongui në tæi piñængä inte edæ minitö iminite wææ gompcampa.

⁶ Minitö ñöwo wantæ iñö incæ quiëmë beyænque wënæ wënæ bate wëmini incæte Wængongui pönö wææ gompcä beyænque edæ watapæ tomïni iminipa. ⁷ Oodo waëmö bamongäimpa, ante waodäni gongapamö godö aca podönäni ate oodoque badinque waëmonca pöni ongoncapa. Incæte oodo iñömö incayæ ate ömæe ewente ate edæ dæ bacäimpa. Oodo mini æinënönca waëmonca i iñonte mini wede pönënö iñömö edæ godömenque waëmö pöni impa. Inique mini wede pönënö iñömö wii wido cæqui impa. Cöwë edæ ongongäimpa. Wæætë, Mini wentamö entawëninö edæ dæ go ate mini wede pönënonque edæ waëmö pöni entawencæminimpa, ante cædinque Wængongui pönö angä ate minitö gonga gonte caate baï wëminipa. Mänömaï mini caate wädö beyænque edæ godömenque wede pönëmini bamïnipa. Inique Itota Codito mönö weca ponte a ongöñongante minitö cöwë wede pönëmini inte tömengä önöwa gäänë ædæ wæænte apænedinque, Në tæi ëmönömi inte bitö waa pöni cæbi æmönipa, ante watapæ apænecæminimpa, ante Wængongui cæcampa.

⁸ Itota Codito ingante minitö awinca adämaï inimini incæte tömengä ingante cöwë waadete pönëminipa. Edæ ñöwo ganca adämaï inimini inte minitö tömengä ingante wede pönëningue mini ñäö baï entawëningue watapæ todinque æbämë ante tomïni iminipa. ⁹ Önöwoca mini ewocate quëwenguinö ante æncæte ante wede pönëmini inte minitö ñöwo iñömö edæ do æmini iminipa.

¹⁰ Wængonguī beyæ nē apænegaīnāni iñōmō, Īncayæ ate quēwenguīnāni inānite Wængonguī pōnō cæcā beyænque quēwencædānimpa, ante ñōwomīni imīnitedō ante apænegaīnānimpa. Mānōmainō ante apænedāni incæte tōmēnāni, Ædānidō inānite ante Wængonguī apænecāā, ante ēñēnāmaī inte ēñencæte ante nanguī cægadānimpa.

¹¹ Codito Ōnōwoca tōmēnāni ōnōwoca quēwēnīnque pōnō apænedīnque, Īncayæ ate Codito nanguī caate wæcæcāimpa, angacāimpa. Ayæ, Caate wædingā inte tōmengā wæætē ñāō baī entawengā inte tæī ēmongā edæ bacæcāimpa, ante pōnō apænecā ēñēnīnque tōmēnāni wæætē adodō ante apænegaīnānimpa. Incæte tōmēnāni, Æyedēnō Codito mānōmaī cæquingāā, ante ēñencæte ante wægadānimpa. Æbānō ba ate mānōmaī cæquingāā, ante ēñencæte ante edæ nanguī cægadānimpa.

¹² Ñōwo iñōmō Wængonguī ōōnædē quēwēnīnque tōmengā Tæiyæ Waēmō Ōnōwoca ingante mōnitonga da pōnongā pōnīnque apænecā ēñēnīnque mōnitō wæætē Codito ingantedō ante mīnitō imīnite watapæ apænemōni ēñēmīnitapa. Mānīne adode ante Wængonguī beyæ nē apænegaīnāni iñōmō, Codito waa cæcæcāimpa, ante apænegaīnānimpa. Incæte Wængonguī tōmēnāni inānite apænedīnque, Wīi tōmēmīni beyæ ante apænēmīnīpa, angacāimpa. Īncayæ ate quēwēnāni beyæ ante apænēmīnīpa, ante tōmēnāni inānite angacāimpa. Mānīnō ante Wængonguī beyæ ante æbānō apænedāni, ante ēñēnāmaī ināni inte Wængonguī anquedoidi incæ, Waodāni beyæ Wængonguī æbāmē waa pōni cæcāā, ante ēñēnīnque wædānīpa.

Wængonguī, Tæiyæ waēmō ewocædāni, angampa

¹³ Mānōmaī beyæ mīnitō, Mōnō nanguī cæcæcāimpa, ante edæ tāno pōnente ate cæedāni. Nāmā wææ gompotawente baī ēñēnīnque cæedāni. Itota Codito ponte a ongōnīnque mōnō imonte waadete pōnō cæcā ate watapæ bacæcāimpa, ante edæ mānīnonque ante cōwē pōnente cæedāni. ¹⁴ Wēñænāni wæmpoidi inānite nāni ēñēnīnque cæbaī edæ mīnitō adobaī ēñēnīnque cæedāni. Mīnitō ēñēnāmaī iñedē mīni cæinēwēnō ante do cægaminīmpa. Ñōwo iñōmō nē ēñēmīni badīnque mīni ēñēnāmaī iñedē mīni cæinēwēnō ante edæ cædāmaī iedāni. ¹⁵ Mīnitō imīnite nē apænte aa pegaingā iñōmō edæ tæiyæ waēmō ewocadongā ingampa cæmīnī. Quīēmē cædīnque edæ tōmengā baī adobaī tæiyæ waēmō ewocadīnque edæ tōmāā cæedāni. ¹⁶ Wængonguī incæ, “Botō tæiyæ waēmō ewocabo imopa cæmīnī. Botō ewocabo baī mīnitō adobaī edæ tæiyæ waēmō ewocacæmīnīmpa,” angampa, ante yewæmongatīmpa.

¹⁷ Tōmāmō imonte adoyōmō pōnī cædīnque mōnō Mæmpo iñōmō mōnō cædīnō ante cōwā adīnque nōingā pōnī ante apænte angampa. Īnīnque, Botō Wæmpo, ante nē apænēmīni inōmīni inte mīnitō iñōmō edæ nē nōingā ante apænte angā ingante edæ guīñēnīnque wædīnque quēwēedāni. Inguīpoga quēwēnīnque mīnitō, Wabæca baī ongōnte awædō, ānīnque, Wængonguī weca edæ mōnō ōmæ ingæīmpa, ante pōnente quēwēedāni. ¹⁸ Edæ, Dodāni nāni quēwengāī baī adobaī quēwengæīmpa, ante ānāni ēñēnīnque mīnitō Ao ante ōnonque pōnī cæte quēwengaminīmpa. Mānōmaī quēwēñōmīnīnque Codito wæætē, Mīnitō abæ tawænte baī quēwencæmīnīmpa, ante cædīnque edæ, Quīnō godongantawo, ante mīnitō do ēñēmīnīpa. Īñæmpa oodō incæ padata incæ mōnō, Woquincoo, ancoo iñōnte tōmengā dicæ mānīncooque godongantawogaa.

¹⁹ Wæætē quipi wē, Codotedo, nāni ānongā iñōmō quenta mongænāmaī wentamō ēñadāmaī imāī Codito adobaī inongā inte edæ tōmengā nāmā wepæ tæiyæ waēmō wepæ godōnte ængā beyænque quēwēmīnīpa. ²⁰ Inguīpoga badōncæte ante cædīnque Wængonguī ayæ gō cædāmaī ingāñedē wēēnēñedē pōnī incæ Codito ingante edæ, Mānōmaī cæcæbiīmpa, ante do apænte ængacāimpa. Codito mīnitō beyæ ante edæ ñōwo pōnī incæ inguīpoga pōnīnque ongōngantapa. ²¹ Inguīpoga pōnīnque tōmengā do wænte ōñōñongante Wængonguī, Ñāni ōmæmōe, angā ñāni ōmæmongacāimpa. Ayæ tōmengā ingante godōmenque godō ææntodongā ate tōmengā ñāō entawēnongā inte tōmengā nānō tæī ēmonguīnque edæ æite gogacāimpa. Wængonguī mānōmaī nē cægāingā iñōngante Codito mīnitō imīnite pōnō cæcā beyænque mīnitō wæætē

Wængonguī ingante pönēmīnitapa. Mänömaī beyæ mīnitō, Wængonguī pönō cæcā beyænque watapæ bacæimpa, ante pönēninque tōmengä ingante wede pönēmīni bamīnitapa.

²² Wængonguī nō nänō änō ante ēñente cædinque mīnitō mīmō ñä mēnongate bai badinque mīnitō tōññadāni inānite nē waadete pönēmīni bagamīnīmpa. Nōwo iñömō mīmōno nō pönēninque mīnitō godongāmæ ædæmō waadete pönēninque wacā ingä wacā ingä godō waa cædāni. ²³ Edæ waomō mönō yate pōniwoca wæwocaquī iñonte wīi mäninō beyænque mempoga ēñagamīnīpa. Wæætē Wængonguī nänō änönō mīi quēwenguīnō iñömō edæ wodāmaī inte cōwē ongongæimpa. Mäninō Wængonguī nänō änönō beyænque mīnitō mempoga ēñagamīnīpa. ²⁴ Edæ,
“Waomō gaguīmænque bai iñōmonte gaguīmæ do to aminca bai mönō adobaī aquīi pōni iñömō inte wæwocamōmpa.

Waēmō pōni mönō emōnō iñömō edæ ongai waēmō ængado bai iñonte ongai edæ do guīñē wæno bai mönō emōnō adobaī bacæimpa.

²⁵ Incæte Wængonguī nänō änō iñömō edæ cōwē wodāmaī ongongæimpa.”

Ante edæ ämotamīni ante bai Wængonguī beyæ nāni yewæmongainō bai impa. Mäninō Wængonguī nänō änönō ante mīnitō imīnite do watapæ apænemōni ēñēmīnitapa.

2

¹ Mäninō beyæ mīnitō pīinte mīni pönēwēnō edæ ñimpo cædāni. Wacā adāmaī iñongante babæ mīni cædō ante edæ cædāmaī ñimpo cædāni. Mīnitō wadō apænete wadō mīni cædō ante ñimpo cædāni. Mänömaī cæte mīni quēwēnīnō ante edæ æmæwo ñimpo cædāni. Wacā gomonga ængä ingante godō pīinte adāmaī iedāni. Wacā ingantedō ante babæ ante mīni pīinte änewēnō ante edæ ñimpo cædāni. ² Wēñænāni tæcæ ēñadināni inte goömæ gäinente wædāni bai mīnitō adobaī Wængonguī nänō apænedonque ante ēñencæte ante wæedāni. Edæ tōmengä ængä beyænque mīnitō nē quēwēmīni inte mīnitō önōwoca ædæmō picæmīni mīni pæquinque edæ tōmengä nänō apænedō ante edæ goömæ waēmōmæ beinente bai ēñencæte ante wæedāni. ³ Waēmepæ impa, ante adinque wēñængä goömæ wæætē wæætē becā bai mīnitō adobaī, Mönō Awēnē waingä pōni ingampa, ante do adimīni inte tōmengä weca wæætē wæætē ponte bete bai edæ ēñeedāni.

Nē quēwengä inongä inte Codito wainca bai ingampa, ante

⁴ Oncō dicaca mænoncæte ante cædinque waodāni, Wiwa inca awædō, ante pancaca wido cædāni bai waodāni pancadāniya mönō Awēnē ingante adobaī wido cædānīpa. Wængonguī guiquēnē mönō Awēnē nē quēwengä ingante waa adinque, Botō owocō mænonguinca wainca pōni bai tōmengä ingampa, ante tōmengä ingante apænte æninque ee mangampa. Īninque mīnitō iñömō tōmengä weca pōñömīnite tōmengä, ⁵ Mīnitō mīimīni quēwēñömīni Wængonguī mīnitō imīnite ænte cabo tingæte adoconque mænonte bai cædinque edæ, Botō Önōwoca owoquincō, ante badongä quēwēmīnīpa. Quēwēñömīnite godōmenque tæiyæ waēmō badongä badimīni inte edæ mīnitō iñömō edæ Wængonguī Önōwoca tōnō äawocaque bai ewocadinque, Wængonguī quī, ante nē godōmīni bamīnīpa. Īninque mīnitō Itota Codito emōwo ante apænedinque, Wængonguī quī, ante godōmīni ate tōmengä edæ waa ængampa. ⁶ Edæ Wængonguī apænecā ēñēninque iīmaī ante do yewæmongadānīmpa.

“Tiñoquidi dæguīmōnga mænoncæte ante cædinque dica tänoca gö cæte bai cædinque, Botō nē waa adongä ingante ænte pönō Tānocā pōni gōnōmo gongæncæcāimpa.

Tōmengä ingante nē wede pōnengä ingante wadāni ædō cæte bæ taquīnāni guingo imonte wæquingä,” angacāimpa.

⁷ Mīni pönencabo iñömō, Tānocā nē ongongä iñömō waingä pōni ingampa, ante adinque tōmengä ingante æninque ee māmīnīpa. Wīi pönēnāni guiquēnē tōmengä ingante Baa änānīpa.

“Nē mænōnāni nāni wido cædinca incæ

ñænænca pōnī gōnōninca bate tānoca inte tæi gongæncapa,”
ante Wængonguī beyæ nāni yewæmongainō bai cædānīpa. ⁸ Ayæ adobaī,

“Dicaa nē tao tencawa tæ go wæængā bai ināni inte

tōmēnāni nē Tānocā ingante piinte adinque tæ go wæænte bai oda cædānīpa.”

Ante yewæmongatīpa. Tōmengā nānō angainō ante ēñēnāmaī nāni cædō beyæ oda cædinque tæ edæ go wæænānīpa. Tōmēnāni edæ mānīnonque cædinque nē tæ go wæænguēnēnāni cōwē ingadānīpa.

⁹ Wængonguī nānō nē apænte ængaimīni guiquēnē wēmō iñōmō quēwēñōmīnite tōmengā aa pedīnque, Botō weca botō waēmō pōnī ñāō ēmōñōmō pōedāni, ante cægacāīpa. Mānōmainō cægāingā iñongante mīnitō, Bitō Wængonguī Waēmō pōnī ēmōnōmi inte waa pōnī cæbi edæ æmōnīpa, ante anguēnēmīni imīnīpa. Mānōmainō ante watapæ ancāmīnīpa, ante cædinque tōmengā mīnitō imīnite do apænte ængacāīpa. Īnīnque mīnitō Awēnē wēmīni iñōmīni inte, Wængonguī quī, ante mīnicabo nē godōmīni bai bamīnīpa. Wængonguī, Botō quīmīni imīnīpa, ānīnque tæiyæ waēmō badongā bagaimīni inte mīnitō Wængonguī nempo nē quēwēmīni imīnīpa. ¹⁰ Mīnitō wēēnēñedē adocabomīni ināmaī ingamīnīpa. Nōwo guiquēnē Wængonguī tōnō godongāmæ quēwēmīni inte edæ adocabomīni imīnīpa. Wēēnēñedē guiquēnē tōmengā mīnitō imīnite pōnō waadete cædāmaī ingacāīpa. Nōwo guiquēnē tōmengā pōnō waadete waa cæcā ate quēwēmīnīpa.

Wængonguī ingante nē cæmō imōmpa, ante quēwēedāni

¹¹ Botō nē waademīni edæ ēñēedāni. Mīnitō inguīpoga quēwēmīni incæte inguīpo wīi tōmēmīni omæ bai īmpa. Wæætē wabæca quēwente bai quēwēmīni inte mīnitō onōwoca wentamō mongænāmaī ingæīmpa, ante edæ wææ cædinque mīnitō baonque ante mīni cæinēwēnō ante ñīmpo cædinque edæ cædāmaī iedāni āmopa. ¹² Nē ēñēnāmaī ināni weca quēwēnīnque mīnitō wæætē waa cæte quēwēedāni. Tōmēnāni guiquēnē mīnitō imīnite pīīnīnque, Wēnæ wēnæ cāmīnīpa, ante babæ ānānitawo. Incæte mīnitō waa cāmīni īnīnque tōmēnāni, Waa cæcampa, ante do abāinānīpa. Īnīnque Wængonguī Awēnē nānō apænte āñedē tōmēnāni do agāināni inte Wængonguī ingante, Bitō ñāō bai ēmōmi inte cæbi ate bitō wēnāni waa cædāni amōnīpa, āmaīnānīpa. Īnīnque tōmēnāni waa adīnque waa apæncædānīpa, ante cædinque mīnitō ñōwo incæ waa cæte quēwēedāni.

¹³ Waodāni inānite wadāni edæ, Awēnēidi inānīpa, ante godō gōnōnāni ongōnānīpa. Æcāmē ingante ānāni bayōnānite mīnitō wæætē Wængonguī Awēnē beyænque ante cædinque tōmēnāni inānite edæ ēñente Ao ante cæedāni. Adocanque ingante, Awēnē Odeye, ānīnque godō gōnōnāni ate mīnitō iñōmō, Tōmengā tæiyæ awēnē inte nē angā īnongā ingampa, ante adīnque tōmengā ingante ēñente cæedāni. ¹⁴ Ayæ pancabaa awēnēidi gobedōnadodoidi mīni ānōnāni inānite godō gōnōnīnque awēnē odeye wæætē iīmaī angampa. Mīnitō wēnæ wēnæ cædāni inānite edæ godō pæedāni. Ayæ waa cædāni adīnque mīnitō, Waa cāmīni imīnīpa, ānīnque edæ godō waa cæedāni, ante gobedōnadodoidi inānite godō gōnongā ongōnānīpa cāmīnīi. Mīnitō tōmēnāni inānite adobaī ēñente cæedāni. ¹⁵ Ēñēnāmaī ināni wīwa tedeyōnānite mīnitō waa cāmīni ate wædinque tōmēnāni ædō cæte godōmenque wīwa tedequīnānīi. Īnīnque, Tōmēnāni pæ wēēnedīnque tededāmaī incædānīpa, ante cædinque mīnitō iñōmō edæ waa cæte quēwēedāni, ante edæ Wængonguī angampa cāmīnīi.

¹⁶ Tōmengā ñīmpo cæcā quēwēmīni inte mīnitō, Wacā wææ ānāmaī iñongante botō æbānō cæte waa quēwēnguīmoo, ante adīnque nāmā wææ ante cæedāni. Incæte mīnitō wacā wææ ānāmaī ingā beyænque awēmō wēnæ wēnæ cāmīnitawo. Edæ cædāmaī iedāni. Wæætē Wængonguī ñīmpo cæcā quēwēmīni inte mīnitō tōmengā ingante nē cāmīni inte edæ ēñente cæte quēwēedāni. ¹⁷ Tōmānāni inānite mīnitō, Waodāni inānīpa, ante edæ waa aedāni. Mīni pōnencabo iñōmīnite edæ godongāmæ waadete

pönēdāni. Wængonguī ingante, Wængonguī ingampa, ante guñente wædāni. Awënë odeye ingante, Tæiyæ awënë ingampa, ante edæ waa aedāni.

Codito æbānō caate wægacāi, ante pönēdāni, ante

¹⁸ Pancamīniya iminite wadāni ð ænāni wæðimīni inte mīnitō tōmēnāni beyænque cæmīni bamīnīpa. Īnīnque nē ð ænāni ĩñōmō pōnō waa cædāni incæ pōnō pīinte cædāni incæ mīnitō wæætē, Botō awënë ingampa, ante piyænē cædinque tōmēnāni nāni anganque edæ ēñente cædāni. ¹⁹ Edæ waocā wēnæ wēnæ cædāmaī ĩnongā inte quiēmē beyænque wæwente caate wæcā incæte tōmengā, Wængonguī acampa, ante pōnēnīnque nangæ batawēnāmaī ingā ĩnīnque edæ waa ĩmaīmpa.

²⁰ Wæætē mīnitō wēnæ wēnæ cæmīni beyæ pānāni ate mīnitō piyænē cæmīni ĩnīnque Wængonguī mānīnō beyænque dicæ waa aqingāa. Waa adāmaī ĩmaīngampa. Wæætē waa cæmīni beyænque pānāni caate wædinque mīnitō piyænē cæte ee cæmīni adīnque Wængonguī edæ, Waa cæbīpa, āmaīngampa. ²¹ Botō caate wæðōnō adodō taadō tee empote pōedāni, ānīnque mīnitō beyæ Codito caate wægacāīmpa cæmīnīi. Botō caate cægongāinō adodonque cægonte wæcæmīnīmpa, ante mīnitō ĩmīnite do aa pecā pongamīnīmpa. ²² Tōmengā ĩñōmō edæ cōwē wēnæ wēnæ cædāmaī ingacāīmpa. Ayæ cōwā ayōnāni tōmengā dicæ babæ ante cæcā agadāniyaa. ²³ Tōmengā ingante pīinte badete toyōnāni tōmengā wæætēdō wæætē pīnāmaī ingacāīmpa. Caate wædinque tōmengā wæætē pīinte ānāmaī ingacāīmpa. Wæætē, Nē nō apænte ānongā Wængonguī incæ botō beyæ cæcæcāīmpa, ante pōnēnīnque piyænē edæ cægacāīmpa. ²⁴ Mīnitō wēnæ wēnæ mīni cægaincoo ante Baa ānīnque mongæānāmaī inte nō pōnī cæte quēwencæmīnīmpa, ante cædinque tōmengā nāmā baonga teēmē mongæñongante tōmengā ingante awāa timpodāni edæ wægacāīmpa. Īnīnque tōmengā mongænte nānō wængāinō beyæ mōnō wæætē mānīnō wēnæ wēnæ mōnō cægāinō ante wænte baī ĩñōmō inte nō pōnī cæcæte ante quēwēmō inguēnēmō ĩmōmpa. Tōmengā ingante tæi pānāni nānō āmogate wægāinō beyænque mīnitō wæætē gançæ bamīnīpa. ²⁵ Edæ obegaidi pāmænte godāni baī ingāimīni inte mīnitō ñōwo nē aacā weca adodō ocæ ēmænte pōmīni adīnque tōmengā ĩñōmō edæ mīnitō ðnōwoca beyæ ante wææ aacā ēwocamīnīpa.

3

Mīna gæncaya ĩmaī quēwencæmīnīmpa, ante

¹ Onquiyæmīni ēñēdāni. Mīnitō nānōogæñāni nāni ānonque ante Ao ante ēñente cæedāni. Mīni nānōogæñāni pancadāniya Wængonguī nānō ānō ante pōnēnāmaī ĩnānitawo. Mānōmaī ĩ ĩnīnque mīnitō ĩñōmō, Wīi mōnitō tededō beyæ pōnāni inte tōmēnāni wæætē ēñente mōni cædinō ante adīnque Wængonguī gāmænō poncædānīmpa, ante cædinque piyænē cæte edæ tōmēnāni ĩnānite ēñente cæedāni. ² Mīnitō Wængonguī ingante guñente wædinque waēmō entawēmīni inte ēñente cæte waa quēwēmīni adīnque tōmēnāni wæætē Wængonguī ingante Ao ante pōmāinānīpa. ³ Mīnitō, Waēmō pōnī bacæboīmpa, ante cædinque ocaguī waa pōnī wao wincate odo mongænte wamoncoo mongænte weocoo wæmoncoo wēñate mongæmīnitawo. ĩñæmpa mānōmaī cæmīni beyænque mīnitō dicæ wāimīni bamīniyaa. ⁴ Wæætē tōmēmīni waa entawēnō beyænque wāimīni pōnī baquēnēmīni ĩmīnīpa. Mīnitō ðnōwoca gānē pōnēnīnque ædæmō cæmīni beyæ mīni waa entawēnō edæ wodāmaī inte godōmenque waēmō pōnī ongongæīmpa. Mānīnō mīni waēmō entawēnō baī ante æncæte ante edæ quiēmē ĩmpa diyæ godonte ænguīi. Incæte Wængonguī mānīnō ante adīnque, Waēmō pōnī entawēmi abopa, ante nanguī tocampa.

⁵ Dodāni pōnī mōnō wængānāidi ĩñōmō, Wængonguī pōnō cæcā beyænque waa bacæīmpa, ante wede pōnēnīnque tæiyæ waēmō entawengadānīmpa. Tōmēnāni waēmō pōnī bacæte ante tōmēnāni ðnōwoca gānē pōnēnīnque ædæmō waadete cægadānīmpa. Tōmēnāni nānōogæidi nāni ānonque ante ēñēnīnque Ao ante cægadānīmpa. ⁶ Dodā ñæñænā Tada wodi ĩñōmō Abadāō wodi ingante ēñente cædinque tōmengā ingante,

Nē āmi īmipa, angacāimpa. Mīnitō īñōmō tōmēnā nānā cægāi bai waa cædinque mīni guīñente wæpāmo æbāmē ba incæte guīñente wædāmaī īmīni īnīnque nāwangā nō tōmēnā nānōmomīni babāimīnīpa.

⁷ Onguīñāmīni guiquēnē ēñēedāni. Mīnitō gænāni tōnō quēwēnīnque tōmēnāni beyæ ante cōwē pōnēnīnque waa cæedāni. Botō gængā onquiyængā īnongā inte aquīngā ingā incæte mōna guēa cæcaya īmōnāpa, ante ēñente wædinque mīnitō gænāni īnānite edæ cōwē waa aedāni. Ayæ, Mōna gæncaya Wængonguī ingante apæneyōmōna tōmengā do ēñencæcāimpa, ante cædinque īmaī pōnente cæedāni. Wængonguī īñōmō, Mīna quēwenguīmāmo, ante waadete pōnō cæcā beyænque mōna guēa ænguīncaya īmōnāpa, ante edæ ēñente cæedāni.

Mīni waa cædō beyænque caate wæquīmīni, ante

⁸ Tōmāmīni guiquēnē ēñēedāni. Mīnitō adoyōmō pōnēnīnque Ao ante cæedāni. Nē Ca ca wæcā tōnō edæ adoyōmō Ca ca pōnente wæedāni. Mōnō pōnencabo īmōmpa, ante cædinque godongāmæ waadete pōnēedāni. Wacā caate wæcā adīnque mīnitō tōmengā tōnō guēa wæte bai pōnēedāni. Nāmā ængō cædāmaī īmīni inte mīnitō wæætē edæ, Ōnōmonque bai īñōmō īmōmpa, ante piyænē cæte quēwēedāni. ⁹ Wēnæ wēnæ cædāni wāmīni incæte, Botō wæætē wēnæ wēnæ cæbo wæcā tocæi, ante cædāmaī īedāni. Wīwa ānāni wāmīni inte, Botō wæætē wīwa āmo wæcā tocæi, ante cædāmaī īedāni. Wæætē edæ, Tōmēnāni waa quēwencædānīmpa, ante cædinque mīnitō tōmēnāni īnānite waa apænedīnque godō waa cæedāni. Mānōmaī cæcæmīnīmpa, ante Wængonguī mīnitō īmīnite waa cædinque pōnō aa pegacāimpa cæmīnīi. ¹⁰ Edæ īmaī ante Wængonguī beyæ ante yewæmongatīmpa,

“Wacā tōmengā nānō quēwenguīmāmo ante nanguī æīnente wædinque,

Tæōnæ waa quēwente tocæi, ante nē angā īñōmō

tōmengā īñōmō wēnæ wēnæ tededāmaī inte babæ wapiticæ ānāmaī inte tæōnæ quēwente tocæcāimpa.

¹¹ Tæōnæ quēwencæte ante cædinque tōmengā wēnæ wēnæ nānō cæinō ante emō cædinque dadi emænīnque waa edæ cæquēnengā ingampa.

Ayæ tōmengā piyænē cædinque, Mōnō tōmāmō godongāmæ gānē pōnente quēwengæīmpa, ante nanguī cæquēnengā ingampa.

¹² Mōnō Awēnē awīnca emongā inte nē nō cædāni gāmænō adīnque tōmēnāni īnānite cōwē aacampa.

Ayæ, Botō īmote æbānō ante apænedānīi, ante tōmengā ēamonca ongonte cōwē ēñengampa.

Wēnæ wēnæ cædāni īnānite guiquēnē tōmengā pīnīnque awīncaque acampa,”
ante yewæmongatīmpa cæmīnīi.

¹³ Mīnitō waa cæcæte ante edæ nanguī cæinēmīni bamīni adīnque æcānō wæætē mīnitō īmīnite wēnæ wēnæ cæquīngā. ¹⁴ Incæte mīnitō nō pōnī mīni cædō beyænque caate wāmīni īnīnque edæ mīni waa quēwente toquīnque īmāimpa. Īnīnque īmaī ante nāni yewæmongāinō bai cæedāni. Tōmēnāni nāni guīñente wæpāmo beyæ ante mīnitō īñōmō edæ guīñente wædāmaī īedāni. Edæ guīñēñate wædāmaī īedāni.

¹⁵ Wæætē, Tæiyæ Waēmō Awēnē īnongā ingampa, ante wede pōnēnīnque edæ Codito ingante mīmōno entawēedāni. Ayæ, Watapæ bacæīmpa, ante mīnitō quīnante pōnēmīnīi, ante ēñencæte ante wadāni āñōnānite mīnitō wæætē a ongōnāmaī inte īnonque ante edæ do apænēmīni incæmīnīmpa. Codito mōnitō Awēnē pōnō cæcā beyænque mōnitō, Watapæ bacæīmpa, ante wede pōnēmōnīpa, ante mānīnonque ante do apænēmīni edæ ēñencædānīmpa. ¹⁶ Īnāni īñōmō ēñencæte ante ānānīpa, ante pōnēnīnque mīnitō, Botō wentamō entawēnāmaī incæboīmpa, ante nāmā apænte cædinque guīñente wædinque tōmēnāni īnānite ædæmō apænēmīni ēñencædānīmpa. Mānōmaī cæyōmīni wadāni guiquēnē mīnitō Codito nempo quēwēnīnque mīni waa cædōnō ante pīnīnque babæ ante todānitawo. Īnīnque mīnitō wentamō entawēnāmaī inte ædæmō apænēmīni adīnque tōmēnāni wæætē, Mōnitō babæ ante tedetāmōnīpa, ante ēñēnīnque guīñēnete wæcædānīmpa.

¹⁷ Minitö wënæ wënæ cæmini beyæ caate wæmini inique önonque imaimpa. Wæætë, Wængongui, Caate wæcæminimpa, angä inique minitö waa pönï mini cædö beyænque caate wæmini inique edæ godömenque waa imaimpa. ¹⁸ Minitö nö cædämaï iñöminite Codito iñömö mönö në nö cædongä inte minitö iminite Wængongui weca ænte poncæte ante cædinque wënæ wënæ mini cædö beyænque adopoque caate wængacäimpa. Tömengä baö eñayongante tömengä ingante wænönäni wängä ate Wængongui Önöwoca angä ate ñäni ömæmonte edæ müingä quëwengampa. ¹⁹ Ayæ adobaï Wængongui Önöwoca tömengä ingante ænte mäocä godinque tömengä në wænte gogainäni önöwocaco tee mönete ongoncoo weca gote apænecä eñengadänimpa. ²⁰ Mäninäni në tee mönete ongönäni inänite Nöwee wodi Docä näni änogä doyedë ancaa apænecä incæte tömënäni eñenämaï inte cægadänimpa. Mäninäni në eñenämaï cægainäni iñönänite Codito ñowo tömënäni weca gote apænecäcäimpa. Wængongui iñömö, Wipo ñænængade pönï impo incæ oncö baï mænoncæbiimpa, ante Nöwee ingante do angaingä inte, ñinque mænoncæcäimpa, ante ee wänö congacäimpa. Incæte mäninäni eñenämaï cæyönäni ocho ganca inäni mänimpodänique æpæno yædopaa wogaa gote quëwengadänimpa.

²¹ Mänimæno edæ wogaa godinque tömënäni näni quëwengaï baï minitö adobaï æpænë guidinque quëwëminipa. Incæte wii baonque mënongate beyæ quëwëminipa. Wæætë minitö, Wængongui ayongä botö mimö ñä mënongate entawëmo inte quëwëmopa, ante nämä apænte pönëninque æpænë guimimipa. Edæ guidinque mini ængæ gantidö baï Itota Codito ñäni ömæmonte quëwengä beyænque minitö adobaï ñäni ömæmonte quëwëminipa. ²² Tömengä iñömö do öönädë æite Awënë badinque Wængongui tömëmængä inö edæ tæ contayongante anquedoidi incæ në änäni incæ në tæi piñænte cædäni incæ tömënäni tömänäni edæ tömengä nänö äno ante eñente cædänipa cæminii.

4

Wængongui nänö pönö cæganca mönö cæcäimpa

¹ Në caate wædingä iñömö, Botö idæwaa wënæ wënæ cæte awædö, ante tömengä wiwa nänö cædinö ante do wido cæcampa. Inique minitö, Codito incæ baonga quëwëninque caate wægacäimpa, ante pönëninque, Botö baonga caate wædinque eñente badinque botö wënæ wënæ cædinö ante wido cæcæboimpa, ante piyænë cæte tæi ongödäni. ² Edæ në caate wædingä iñömö, Mönö waocabo baonque ante mönö cæinëwënö ante botö iñömö cædämaï incæboimpa, ante pönëninque edæ ñimpo cædinque inguipoga tömengä nänö quëwenguiganca Wængongui nänö änononque ante eñente quëwengampa. ³ Eñenämaï inäni cæinente wæwente näni änonö ante eñente minitö wënenëdë adobaï quingämë baï cæte quëwengaminimpa. Edæ baonque ante mini toinente wæwënonque ante do cædinque minitö tömënäni näni cæi baï cædinque edæ ti nämæ bete quidi quidi dowæninque beowæo inte cæowæo inte Yæ yæ angaminimpa. Ayæ minitö tömëmini badöninca incæ adinque, Mönitö wængongui ingampa, ante ædæ wænte tedewengaminimpa. Nöwo iñömö minitö mänömaï cæte idæwaa cæmini awædö.

⁴ Tömënäni iñömö baonque ante näni godö toinëwënö ante cæcæte ante pogodo gote baï cædinque minitö iminite, Pongüënë quëwënanii, ante ancaa änanipa. Minitö gomö adinque tömënäni tönö godongämæ godämaï imini adinque tömënäni wæætë, Quimæ awincaque gomö awëminii, ante edæ piinte änewënanipa. ⁵ Incæte mönö waocabo müimö quëwëmö incæ do wænte gogainäni incæ tömämö imonte në oo apænte anguingä iñömö edæ Wængongui inongä ingampa. Inique tömengä, Æbänö cægaminii, ante angä eñente wædinque mänömaï cægainäni wæætë aamö cædämaï inte tömënäni näni cægainö ante edæ do apænecäcäni inänipa. ⁶ Mänömaï beyæ do wængainäni inänite mönö Codito ingantedö ante watapæ apænecatimpa. Tömënäni baö eñate quëwëñönänite waodäni apænte äninque pänäni incæte Wængongui wæætë,

Tömēnāni ōnōwoca ēwocadinque quēwencādānimpa, ante tōmengā waa pōnī nānō cægāinō beyēnque nāni quēwenguinō ante godō apānecā ēñengadānimpa.

⁷ Nōwo iñōmō tōmancoo edæ oo iinque baquīnō anguēnē. Mānōmaī impa, ante ēñente wāmīni inte mīnitō, Mōnō tōingā pōnente Wængonguī ingante apānecāimpa, ante cādinque nāmā wææ aadinque ocai encate pōnēdāni. ⁸ Wēnæ wēnæ cāmō incæte waadete pōnēmō iinque mōnō waadete cādō beyēnque wadāni piyānē cæte pīināmaī iñānīpa. Mānōmaī impa, ante pōnēnīnque mīnitō nē wede pōnēmīni iñōmīni inte cōwē waadete pōnente cædāni. ⁹ Edæ wadāni iñānite, Pōedāni, ānīnque wacā ingā wacā ingā pædæ godōnīnque edæ, Tōmēmo qui impa, ante wædāmaī iedāni.

¹⁰ Wængonguī, Botō pōnō waadete cæbo ate mīnitō ado botō waadete cædōnō ante ænte ēwocadinque godō waadete cædāni, ante adocanque ingante wadō wacā ingante wadō pōnō waadete cæcā ænte ēwocamīnīpa. Iinque mīnitō tōmāmīni mīni ænte ēwocaganca cādinque mīni pōnencabo beyæ godongāmæ waa cæquēnēmīni imīnīpa. ¹¹ Wængonguī pōnō cæcā ænīnque æcānō nānō apānequinganca ēwocacā tōmengā Wængonguī nānō apānedonque ante apānequēnengā ingampa. Æcānō wadāni beyæ ante nānō nē cæquinganca ēwocacā tōmengā Wængonguī nānō tæi pīñænonque entawēnīnque waa cæquēnengā ingampa. Mānōmaī cādinque mīnitō waa cāmīni adīnque mōnō tōmāmō Itota Codito emōwo apānedīnque Wængonguī ingante, Bitō waēmō pōnī iñōmi inte waa cæbīpa, ante apānecāimpa. Tōmengā iñōmō nē tæi emōnongā inte ñāō emōnīnque nē nanguī cædongā ingampa, ante mōnō pedænguipoga quēwēmō incæ iincayæ ponte miinguipoga quēwēmō incæ cōwē watapæ pōnī apānecāimpa. Mānōmaī baquīnō anguēnē, ante botō, Amēē, āmopa.

Codito nempo quēwēnīnque caate wæccāmīnīmpa, ante

¹² Botō nē waademīni ēñēdāni. Mīnitō ñōwo incæ gonga gonte caate baī wāmīni incæte, Quiēmē beyæ mānōmaī caate wæboī, ante guīñente wædāmaī iedāni. Edæ wīi ōnonque caate wāmīnīpa. ¹³ Wæætē, Codito nānō caate wægāinonque godongāmæ ñōwo caate wāmōnīpa, ante pōnēnīnque watapæ toedāni. Mānōmaī caate wædinque tomīni iinque Codito ñāō apāite baī nānō pōñedē godōmenque gomonga watapæ toquīmīni imāimīnīpa. ¹⁴ Mīnitō imīnite wadāni pīinte ānīnque, Codito emōwo ōnonquedō waa adīnque wæcantedō abi, ante badete todāni iinque Wængonguī wæætē, Watapæ quēwencāmīnīmpa, ante pōnongā ænīnque mīnitō tōmengā Ōnōwoca nē ñāō emōnongā ingante ēwocamīni beyæ toquēnēmīni imīnīpa. ¹⁵ Wacā ingante nē godō wænongā ingante do pānāni wæcampa. Wacā qui nē awēmō ængā ingante nē wēnæ wēnæ cæcā ingante adobaī pānāni wæcampa. Adocanque nē cæquēnengā inte ānāmaī iñongante wacā iñontobæ godō ōnonque cæcā ate nē ōnonque cæcā ingante pānāni wæcampa. Mīnitō wæætē nāmā wææ aadinque tōmēnāni nāni cādō baī cædāmaī imīni iinque caate wāmīni incæte ædō cæte mīni wīwa cādō beyæ pānāni caate wæquēnēmīni. Edæ da anguēnē.

¹⁶ Wæætē wadāni mīnitō imīnite, Wææ, Codito emīñæmi imipææ, ante pīinte cædāni caate wāmīni incæte mīnitō guingo imonte wædāmaī iedāni. Wæætē edæ Wængonguī ingante apānedīnque edæ, Bitō ñāō emōmi inte pōnō pemonte baī cæbi ænīnque mōnitō Codito emōwo emonte baī adobaī emōmōnīpa, ante waa apāneedāni.

¹⁷ Edæ iīmaī impa. Wængonguī tōnō mōnō godongāmæ owocabo iñōmonte tōmengā oo apānte ancæcāimpa. Iinque mōnō imonte tāno apānte angā iinque tōmengā wadāni iñānite guiquēnē æbānō cæquingāā. Tōmengā ingantedō ante watapæ apānedāni ate nē ēñente cædāmaī iñāni iñānite apānte ānīnque Wængonguī quingāmē baī nanguī pangā wæquīnāni. ¹⁸ Ayæ Wængonguī beyæ nāni yewæmongāinō baī impa. Nē nō cæcā wodo wænguēnengā iñongante Wængonguī tingā ængā beyēnque quēwēñongā Wængonguī ingante ēñēnāmaī ingā guiquēnē tōmengā ædō cæte quēwenguingāā. Nē wēnæ wēnæ cæcā adobaī edæ ædō cæte quēwenguingāā. ¹⁹ Mīnitō iñōmō Wængonguī nānō ānīnō beyēnque caate wāmīnitawo. Iinque mānōmaī beyēnque

mīnitō, Mōnō imonte nē badongaingā cōwē pōnēninque ædæmō aaqingā ingampa, ante pōnēninque nāmā mīnitō ōnōwoca tōmengā nempo godōninque piyænē cæte godōmenque waa cæquēnēmīni imīnīpa.

5

Mīni pōnencabo æbānō cæte quēwengæimpa, ante

¹ Mīni pōnencabo iñōmīnite pancamīniya nē aamīni Picæmīni mōnō āmīni imīnīpa. Botō iñōmō adobaī nē aabo Picæmo inōmo inte, Mōnō nē Picæncabo, ante mīnitō imīnite ædæmō apænedinque āmopa. Codito caate wæcā nē agaīmo inte botō edæ waadete āmopa. Ayæ Codito ñāō baī nānō ēmōnō edonque pōnī nānō odōmonguīnō ante botō tōmengā tōnō ñāō baī entawēmo inōmo inte edæ, Eñencæmīnīmpa, ante nanguī āmopa. ² Codito ingante nē pōnēnāni iñōmō mīnitō nempo cænīnāni baī ongōñōnānite mīnitō tōmēnāni inānite nē aamīni imīnīpa. Wængonguī, Nē pōnēnāni inānite aacæmīnīmpa, angā eñēninque mīnitō wæætē Baa āmōni inīnque Wængonguī pangā wæcæ wæ, ante guīñente wæmīnitawo. Iñæmpa wīi guīñente beyænque aacæmīnīmpa. Wæætē Wængonguī, Mīnitō do Ao ante aacæmīnīmpa, ante tōmengā nānō ānōnonque ante edæ eñente cæte edæ tōmēnāni inānite ædæmō aedāni. Ayæ edæ godonte æinta ante æinente wæmīnitawo. Iñæmpa wīi æncæte ante wædinque mīnitō edæ, Nē pōnēnāni beyænque nanguī cæinente wædinque cæcæboimpa, ante piyænē cæte aedāni. ³ Waodāni nē cænīnāni baī mīnitō nempo ongōñōnānite mīnitō wæætē imæca awēnēidi nāni pīinte āmaī wīi adobaī pīinte æedāni. Wæætē edæ, Mōnō waa cæte quēwēmō adinque tōmēnāni mōnō baī adobaī waa cæte quēwencædānīmpa, ante cædinque edæ waa cæedāni.

⁴ Mānōmaī cæmīni inīnque mōnō nē Aadongā Ñænængā pōnī inongā iñōmō iincayæ ponte a ongōninque poganta ñāō ēmonta cōwē wodāmaī inta pædæ pōnonte baī cædinque mīnitō imīnite, Mīnitō nē aamīni inte botō ñāō ēmonte ongōñōmō ponte quēwencæmīnīmpa, ancæcāimpa.

⁵ Tæcæ æmæwo pæimīni guiquēnē eñēedāni. Godōmenque picænāni nāni ānīnō eñēninque edæ Ao ante cæedāni. Ayæ gānē entawente pōnēninque, Ōnōmōnique baī mōnitō imōnīpa, ante pōnēninque wacā nānō ānīnō ante eñēninque Ao ante cæedāni. Edæ iīmaī ante yewæmōnte ongōmpa.

“Nāmanque ante, Mōnitō gomonga waa cæmōni imōnīpa, ante nē pōnēnāni inānite edæ Wængonguī Baa angampa. Wæætē edæ, Mōnitō ōnōmōnique baī imōnīpa, ante nē ānāni inānite tōmengā pōnō waadete cæcampa.”

⁶ Ante yewæmongatimpa cæmīnīi. Iincayæ ate eyepæ pōnī bayonte Wængonguī incæ mōnitō imōnite ængō cæcā ongoncæmōnīmpa, ante cædinque mīnitō ñōwo iñōmō nē tæī pīñængā ōnōnempo ongōninque nāmā ængō cædāmaī iedāni. ⁷ Codito mōnō imonte waadete pōnente cæcampa, ante eñente wædinque mīnitō guīñente mīni wædō ante tōmengāa wo cæmīni mongængā ate mīnitō guīñēnāmaī inīnque wæætē guēmancæmīnīmpa.

⁸ Nāmā incæ edæ wææ aedāni. Wēnæidi awēnē iñōmō edæ mēñebo nē pīinte angā baī inongā inte, Æcānō ingante ecate cænguīmoo, ante nē pīinte cædongā inte awēmō diqui diqui mingampa cæmīnīi. Ee aedāni. ⁹ Mīnitō caate wæmīni incæte, Mōnō tōñīñadāni inguipoga tōmāmæ quēwēninque adobaī edæ caate wædānīpa, ante do eñēmīni inte Codito ingante wede pōnēninque adiyæ næ gongæninque wēnæ awēnē ingante cōwē Baa æedāni. ¹⁰ Mānōmaī cædinque wantæ iñō caate wæmīni ate Wængonguī nē waadete pōnō cædongā inte mīnitō imīnite pōnō cæcā ate edæ gancæ bacæmīnīmpa. Ayæ godōmenque pōnō cædinque tōmengā mīnitō imīnite pōnō tæī gōnongā ate mīnitō tæī pīñænte entawēninque wæntædāmaī inte edæ cōwē tæī ongoncæmīnīmpa. Tōmengā adocā iñōmō ñāō baī cōwē ēmōnongā inte mīnitō imīnite aa pedinque, Mīnitō Codito nempo nē quēwēnōmīni inte botō ñāō ēmonte ongōñōmō pō guite quēwēedāni, angacāimpa.

¹¹ Tōmengā iñōmō cōwē tæī ēmōninque nē nanguī cædongā ingampa, ante mōnō

pedænguipoga quëwëmö incæ iincayæ ponte miinguiipoga quëwëmö incæ cöwë watapä pönï apænecæimpa. Mänömaï baquïnö angüenë, ante botö, Amëë, ämopa.

Waa quëwencæminimpa, ante

¹² Botö tönïñacä bai inongä inte Tidibänö iñömö cöwë pönëninque ædæmö cæcä ingampa, ante adinque botö tömengä tönö godongämæ cædinque, Minitö acæminimpa, ante cadota ante ocanta yewæmömopa. Ì cadota adinque minitö ganca pönëninque nanguï cæcæminimpa, ante cædinque botö Pegodobo iñömö, Wængonguï nawangä mänömaï pönö waadete cæcampa, ante yewæmömopa cæminii. Tömengä nänö waadete cædonque ante entawëninque edæ minitö adiyæ täi gongænte ongödäni, ämopa.

¹³ Minitö iminite apænte æninque Codito iñömö Babidönia iñömö tömengä ingante nani godongämæ pönencabo inänite adobaï apænte ængacäimpa. Tömënanï iñömö minitö iminite, Waa quëwencæminimpa, ante apænedänipa. Botö wengä bai inongä inte Mäadoco adobaï, Waa quëwencæminimpa, angampa. ¹⁴ Mïni pönencabo adobaï godongämæ waadete pönëninque, Wængonguï bitö imite waa cæcæcäimpa, ante wacä ingä wacä ingä apæneedäni.

Codito nempo quëwëmini inte tömämïni gänë pönente quëwencæminimpa, ante botö Pegodobo imo yewæmömopa.

2 Pegodo

cadota ante nänö ayänta yewæmongainta

Wængongui mīnitō imīnite waa cæcæcäimpa, ante

¹ Botō Timönö Pegodo inōmo inte Itota Codito ingante nē cædömō iñōmote tōmengä botō imote da godongä godinque botō tōmengä beyæ nē apænebo bagaboimpa. Mönö Wængongui inongä inte Itota Codito iñömō mönō imonte, Quëwencæminimpa, ante nē Ængaingä ingampa. Tōmengä iñömō mönitō imōnite pönö cædinque, Mīni wede pönēnō ante waa pōni entawencæminimpa, ante pönongä ænimōni inte entawēmōnipa. Ayæ adobaī tōmengä nē nō pōni cædongä inte mīnitō imīnite pönongä æninque mīnitō mönitō entawēnō bai ado mīni wede pönēnō ante edæ waa pōni entawēmōnipa. Ininque mīnitō imīnite botō, Acæminimpa, ante yewæmōmopa. ² Mīnitō Wængongui ingante pönēninque Itota Codito mönō Awēnē ingante adobaī pönēninque tōmēna inate edæ ate bai pönencæminimpa, ämopa. Ayæ tōmēna godōmenque pönö cæda ate mīnitō tōmēna nāna gänē pönēnō ante edæ eyepæ pōni entawencæminimpa, ante botō yewæmōmopa.

Codito nänö nē emiñcämō inte mönō iimāi entawēmōmpa

³ Itota Codito iñömō, Nē waa cæbo inte botō ñäö emōmo iñōmote pōedāni, ante mönō imonte do aa pecä pōmōmpa. Mänōmaī Itota Codito weca pōñōmote tōmengä Wængongui nänö tæi pīñæmāmo entawēnongä inte, Quëwēedāni, äninque eyepæ pönö cæcä ænte quëwēninque mönö tōmengä awinca ate bai pönēninque tōmengä nänö waa cædō bai edæ adobaī mönö waa cæmō bamōmpa. ⁴ Tōmengä nē waa cædongä inte edæ ñäö bai emōninque, Botō godōmenque nanguī cædinque waa pōni edæ pönö cæcæboimpa, ante edæ wæætē wæætē angacäimpa. Ininque mīnitō iñömō tōmengä nänö angäinō ante wede pönēñōmīnite Wængongui tōmengä nänö entawēnō pönongä æninque mīnitō Wængongui nänö entawēnō bai adobaī entawencæminimpa. Ayæ māniine ante wede pönēninque mīnitō inguipoga quëwēninque wēnæ wēnæ mönö cæinente wægäinō ante, Ñömænte bacæ wæ, ante wædinque Baa ante edæ aamō cæcæminimpa.

⁵ Codito mänōmaī pönö cæcä beyæ mīnitō wede pönēmīni inte nē waa cæmīni bacæte ante cōwē edæ pæ pagænte cæedāni. Ayæ wææ nē waa cæmīni badinque Æbänö cæte nō cæquīi, ante eñēmīni bacæte ante nanguī cæedāni. ⁶ Ayæ wææ mänōmainō ante mīnitō nē eñēmīni badinque godōmenque nanguī cædinque nāmā wææ aamīni bacæte ante cæedāni. Ayæ wææ nāmā wææ aamīni badinque wæætē nē wæntædāmaī inte ee cæmīni bacæte ante cæedāni. Ayæ wææ nē wæntædāmaī inte ee cæmīni badinque mīnitō wæætē Wængongui nänö ante entawēnō bai entawēninque tōmengä nänö cædō cæte quëwencæte ante cæedāni. ⁷ Ayæ wææ Wængongui nänö cædō bai cæte quëwēmīni badinque mīnitō ayæ, Mönö caipæ, ante godongämæ mīni waa cæcabo bacæte ante cæedāni. Ayæ wææ mīni godongämæ waa cæcabo bamīni inte mīnitō ayæ waodāni tōmānāni inānite waadete pönēninque godō waa cæmīni bacæte ante cæedāni.

⁸ Mänōmaī wede pönēninque tæi ongōninque waadete pönēninque Wængongui nänö cædō ante godōmenque godōmenque entawente cæmīni ininque mīnitō mönō Awēnē Itota Codito ingante ate bai nē pönēmīni inte edæ tōmengä beyæ mīni cæquēnēnō ante oda cæte wædāmaī imāimōnipa. Wæætē edæ awæ nanguī inca bai mīnitō adobaī mīni cæquēnēnō ante do cæcæminimpa. ⁹ Wæætē māninō tōmānō ante entawēnāmaī ingä guiquēnē tōmengä möwoyata bai emōnongä inte inguipogaque waa adinque öönæde iñömō gobæ i ædō cæte aquingäa. Tōmengä nänö wēnæ wēnæ cægäinō ñä do mēnongate impa, ante pönēnāmaī inte önonque quëwengampa. ¹⁰ Inānāni eñēedāni. Wængongui mīnitō imīnite do apænte æninque aa pegacäimpa cæmīni. Mīnitō, Wængongui nänö änōnonque ante eñente entawēninque mönö cōwē tæi gongænte ongongæimpa, ante

nanguĩ cædæni. Edæ mänömaĩnonque ante cæmini inte mĩnitö oda cædæmaĩ inte tæi ongoncæminimpa. ¹¹ Ayæ iincayæ ate nãñe wæmini ate mönö Awënë Odeye Itota Codito iñömö mĩnitö imĩnite æantodongä goyöminite tömengä, Pö guidæni, ante watapæ æmæwo manguicä guiite cöwë quëwencæminimpa.

¹² Mĩnitö mäninö ante do ëñëninque mĩni nõ pöni ëñënö ante ædæmö entawente tæi ongöminĩ incæte botö, Godömenque cöwë pönencæminimpa, ante cædinque adodö adodö ante apænebo ëñencæminimpa. ¹³ Edæ botö, Mĩnitö oda cædæmaĩ inte cöwë pönencæminimpa, ante cædinque botö baonga botö quëwenganca wæætë wæætë apænedinque nõ cæte apænebopa, ante pönëmopa. ¹⁴ Edæ mönö Awënë Itota Codito botö imote edonque apænedinque, Bitö oo pöni wæninque botö weca ææ poncæbiimpa, angacäimpa. ¹⁵ Angä ëñengaĩmo inte botö, Nöwo botö yewæmöninö ante adinque entawëmĩni inte mĩnitö iñömö botö gobo ate cöwë pönencæminimpa, ante cædinque ñöwo incæ tæi piñæninque nanguĩ cæcæboimpa.

Itota Codito Tæiyæ Awënë nänö ëmönö atamönipa

¹⁶ Mönö Awënë Itota Codito iñömö tæi piñængä ingä inte oo poncæcäimpa, ante mĩnitö imĩnite apænedinque mönitö dicæ wadæni nãni mã apænewënö ante apænetamönĩyaa. Wæætë edæ, Tömengä nê Awënë inongä inte mönö Tæiyæ Awënë nänö ëmönö incæ ëmongampa, ante nê agaĩmöni inte mönitö, Nãwangä agamönimpa, ante apænemöni ëñëmĩnitapa. ¹⁷ Edæ Awënë nänö ñäö apæite bai ongöñömö ongonte apænedinque Mæmpo Wængonguĩ incæ, “Iingä botö Wengä inongä inte botö nê waadecä ingampa. Tömengä ingante adinque botö waa tobopa,” ante apænegacäimpa. Ayæ Itota ingante waa adinque tömengä nê ñäö ëmongä ingante odömongä agamönipa. ¹⁸ Änanquidi tömengä tæiyæ waëmö ëmonte nänö ongöñömö godongämæ ongöninque mönitö mäninö ante Wængonguĩ öönæde tedecä ëñentamönipa.

¹⁹ Wængonguĩ beyæ nê apænegainäni nãni yewæmongainö bai mönitö adobai edonque agaĩmöni inte, Nãwangä iñonte yewæmongadänimpa, ante apænemöni ëñenguënëmĩni imĩnipa. Mäninö nãni angainö wëmö iñömö ñäö apæite tica ënente bai i apa quëwëmĩnii. Oque pönente iñonte, Wadaamö æængæimpa, ante wänö cönäni bai mĩnitö adobai mĩni ñäö entawenguinque ante Itota Codito nänö ponguĩönæ ante edæ wänö cöninque wede pönëmĩni ininque waa imaimpa. ²⁰ Iñänäni ëñëdæni. Dodæni Wængonguĩ beyæ nê apænegainäni incæ, Wængonguĩ æbänö ante apænecä ëñente yewæmonguĩmoo, ante pönëninque dicæ mã pönëninque adodeque incæ yewæmongadänĩyaa. ²¹ Wii nãmanque pönëninque yewæmongadänimpa. Wæætë Wængonguĩ Tæiyæ Waëmö Önöwoca nempo quëwëñönänite tömengä pönö apænecä ëñëninque Wængonguĩ nänö apænedonque ante apænegadänimpa, ante ämo ëñëmaimĩnipa.

2

Nê babæ odömonte apænedæni iĩmaĩ cædänipa, ante

¹ Doyedë pancadæniya, Wængonguĩ beyæ apænebopa, äninque babæ apænegadänimpa. Nöwo iñömö wadæni adobai awëmö cædinque, Mĩni cabo oda cæte ëwente wæcæminimpa, ante cædinque babæ ante odömonte apænequĩnãni mĩnitö weca do ongönänipa. Mönö Tæiyæ Awënë incæ tömënäni inänite æncæte ante nãmä wepæ nê godongaingä iñongante tömënäni wæætë nãni quingæ ömæe ewenguinque edæ Baa änänipa cæminii. ² Pancamĩniya nanguĩ imĩni incæ mĩni guĩñente wæquinque tömënäni nãni wentamö mongænte goquĩnö incæ tee empote goquĩmĩni imĩnipa, ante awædo. Mäninö godinque mönö nöingä ëñënonö ante piĩnte cæyöminĩ wadæni adobai mánii taadö nöinö iñonte godö babæ äninque wënæ wënæ änäni baquĩnänimpa, ante awædo. ³ Nê babæ odömonte apænedæni iñömö mĩnitö mæincoo ante ö æinëwente wæwënäni inte nãmæneque nãni pönëwënö ante tededæni ëñëninque mĩnitö do oda cæyöminite tömënäni wæætë ö æmaĩnänipa, ante awædo. Mönö nê pangä önoncadopo do ongongainäni inänipa. Mönö nê pangä iñömö, Oo nãni ewenguinque mänömaĩ

cædānīpa, ante apænte ancæte ante pūinque edæ möwo mönāmaī mīingā inte a ongoncampa.

⁴ Anquedoidi incæ ēñēnāmaī cædāni ate Wængonguī ata cæpodāmaī ingacāimpa. Wæætē, Tömēnāni nāni apænte tente wæquinganca ontatodē wēmō mæ māmonte baī iñōmō guī tee mönete ongoncædānīpa, ante cædinque tōmengā angā ēñēnte tōmēnāni nāni owogaiñōmō tadōmengadæ pōnī dobæ go guīgadānīpa. ⁵ Ayæ doyedē tōmengā nānō nē badongaināni inguipoga quēwēñōnānite Wængonguī tōmēnāni inānite ata cæpodāmaī inte angā ate nē ēñēnāmaī ināni iñōmō edæ æpæmpo bete wængadānīpa. Wæætē Nōwee wodi Docā nāni ānongā guīquēnē, Mōnō nō cæte quēwengæimpa, ante nē apænegaingā iñongante Wængonguī tōmengā tōnō tiæte ganca ināni mānīmpodānique inānite wææ aacā quēwengadānīpa. ⁶ Ayæ, Todōmā tōnō Gōmoda iñōmō quēwēnāni inānite, Mīni apænte wido cæquinque, ante tōmēnāni quēwēñōmō iya tānīnque wido cæcā gōnaiboque bate contagatimpa. Mānōmaī cædinque Wængonguī, Botō imote ēñēnāmaī imīni mīni adobāi tente wæquinque cæmīnīpa, ante wadāni inānite odōmoncæte ante cægacāimpa. ⁷ Ayæ ēñēnāmaī inte cædāni baonque towente quēwēnāni adīnque Dooto wodi iñōmō nē nō cægāingā inte, Wentamō pōnī mongænte quēwēnāni awædō, ante wædongā inte adoyōmō quēwēñongante Wængonguī tōmengā ingante tōō æmænte ö ængā beyænque quēwengacāimpa.

⁸ Tōmengā waa cæquinque nō entawēnongā inte tōmēnāni weca quēwente ayongā iimō iñō iimō iñō ēñēnāmaī cædāni adīnque tōmengā, Ancaa ate awædō, Ancaa ēñēnte awædō, ante wæwēñongante Wængonguī tōmengā ingante do ö ængā beyænque quēwengacāimpa. ⁹ Mānōmaī cædinque Wængonguī, Botō miñæ nē pōnāni caate wædāni adīnque botō do ēñēnte cædinque æmo ate quēwēnānīpa. Wæætē wīwa cædāni inānite botō apænte anguiñōnæ ganca mö ongonte baī mānīnque ñōwo incæ wæætē wæætē pāmo wædānīpa, ante Wængonguī cæcampa. Inīnque, Nō ēñēnte Wængonguī cæcampa, ante mönō edonque ēñengæimpa. ¹⁰ Mānīi babæ ante nē odōmonte apænēwēnāni iñōmō tōmēnāni baonque ante towēinente nāni entawēmāmo ante nē cædāni inōnāni inte edæ awēnēidi inānite, Wīi ēñēinē wædō, ante pīinānīpa. Mānōmaīnō ante nē pīinte ānāni inānite godōmenque pancæte ante Wængonguī mö ongonte baī mangampa. Tömēnāni iñōmō nāmā ængō cædinque guīñēnedāmaī inte edæ nē ñāō entawente tæi emōnāni inānite godō wēnæ wēnæ apænēdinque edæ babæ ante tedewēnānīpa. ¹¹ Iñæmpa anquedoidi tæi pīñænāni inte godōmenque ñænænāni inōnāni incæ Wængonguī ayongante guīñēnete wædinque nē ñāō entawente tæi emōnāni inānite pīinte apænte ānāmaī inānīpa.

¹² Nē babæ ante odōmōnāni guīquēnē tōmēnāni nāni nē adāmaī inō ante mā pōnēnīnque wēnæ wēnæ apænēdinque babæ ante tedewēnānīpa. Babæidi ömæwocadāni inte nāni togænte ecate ewengūinque ononque pōnī cægōnāni baī nē babæ odōmōnāni iñōmō edæ adobāi ēñēnāmaī ināni inte tōmēnāni nāni wængūinque babæ cædinque quingāmē baī quēwēnānīpa. ¹³ Tömēnāni wadāni inānite godō wīwa cædāni inīnque iñāni wæætē nāēmæ godō cædāni wæcædānīpa. Tömēnāni iñōmō, Itædē incæ mönō baonque pōnente towengæimpa, ante cædānīpa. Mīnitō waadete pōnēnīnque godongāmæ cæñōmīni tōmēnāni adoyōmō pōnīnque cæowæo incædō beowæo incædō inte cæyōnāni wentamō nāni mongænō beyænque mīni cabo wæætē baate baī ēñāmīni badīnque wentamō tæ encaa tæ encaa emonte bamīni awædō.

¹⁴ Wacā onquiyængā awīnca adīnque cōwē godō towēinente wædāni inte tōmēnāni iñōmō ñīmpo cædāmaī cōwē wīwa cæinente wædānīpa. Wacā aquīi pīñænāmaī ingā adīnque tōmēnāni, Mōnitō tōnō godongāmæ ponte wēnæ wēnæ cæcæcāimpa, ante cædinque godō waa cæte baī babæ cædānīpa. Botō quī botō quī, ante nē æinente wædāni iñōnānite Wængonguī iñōmō, Tömēnāni nāni wæwocaincabo inānīpa, ante pīinte angampa. ¹⁵ Taadō tōinō oda cædinque edæ docā Beodo wodi wengā Badāō wodi miñæ tōmēnāni tee empote godānīpa. Tōmengā Badāō iñōmō, Nō cædāmaī imo incæte botō māincooque ænte tobote, ante baī cægacāimpa. ¹⁶ Tōmengā Wængonguī beyæ nē

apænecä incæ ocai ömæcacä bai inte wapiticä ëñënamai cæyongante babetadecä iningä incæ bodo incæ iñontobæ wao bai tededinque Badäo ingante wææ angacäimpa.

¹⁷ Mänii ñowodäni në babæ odömönäni iñömö æpæ taquënëñömö æpæ dæ ä bai edæ önönänique inte odömönänipa. Boguimancoo wini cai mongænte önonque ænte poncoo bai tömënäni adobai inäni inte önonque cädänipa. Mänömai cädäni beyæ Wængongui, Tömënäni näni ongonte wæquiñömö, ante mäë mämönte bai iñömö badongacäimpa.

¹⁸ Edæ tömënäni ogæ tededinque, Botö godömenque waa pönii cæbo aedäni, ante önonquedö ante tedewënänipa. Wadäni wapiticä cæte quëwënäni nempo adocanque wodo aamö cæyongante mäninäni në babæ odömönäni iñömö, Bitö mönitö miñæ wæætë pöningue baonque bitö cæinëwënö ante guiñëñadämai inte cæte tocæbiimpa, ante waa cæte bai godö babæ cädänipa. ¹⁹ Mïni ædæmö aamö cæte mönedämai quëwenguingue mönitö miñæ pödäni, ante babæ änewënänipa. Incæte në babæ odömönäni incæ tömënäni näni wiwa cædonque beyænque cæte quëwënäni beyænque näëmæ ñä cæyænte bai inte wädänipa. Edæ quiëmenque ante waocä ëñente cæcää tömengä mäninö nänö ëñente cædö beyænque në cæte quëwënongä inte näëmæ ñäo cæyænte bai inte wæcampa.

²⁰ Inguipoga ñömænguënëmämo beyæ tee mönete bai quëwëninäni inte tömënäni mönö Awënë Itota Codito mönö imonte në Ængaingä ingante do ate bai pönëningue edæ abæ tawënäni inänitapa. Mänömai abæ tawænte godinäni inte tömënäni inguipoga ante näni cæinente wæpämö beyænque wæætë adodö go goyo cæte ægodawate tæ wææntodonte bai wädäni inique tömënäni godömenque näni wënæ wënæ wæwenguingue imaimpa. ²¹ Nöinö taadö do adinäni inte tömënäni näni godömenque wæwenguingue ëmö cæte godänipa. Wængongui tæiyæ waëmö nänö wææ angainö ante odömönäni näni do ëñëninö ante Baa ante wadæ godäni iñömö godömenque wënæ wënæ näni wæquinque impa. Inique mäninö taadö ante tömënäni cöwë adämai inäni inte bai tömënäni beyæ godömenque waa incædönimpa. ²² Tömënäni nöinö taadö ëmö cæte godinäni näni cædö bai ante iimainö ante näwangä ante badete todänipa. “Guinta awæ wëningä adodö cængampa. Odæ wængänä iñömö æpæ pantate ate onguipoipæ wëango wëango nangampa.”

3

Mönö Awënë wæætë adodö poncæcäimpa, ante

¹ Botö në waadedömïni ëñëedäni. Mïnitö möwo mönämai inte nöingä ante pönencæminimpa, ante botö, Mänömai impa, ante mentaa yewæmönique adodö adodö ante yewæmömo aedäni. ² Tæiyæ waëmö entawënäni Wængongui beyæ ante apænedinque näni yewæmongainö ante në adimïni inte mïnitö wæætë pönencæminimpa, ante cæbopa. Mönö Awënë mönö imonte në Ængaingä inte adobai ante wææ angacäimpa. Tömengä nänö da godongaimöni iñömö tömengä nänö wææ angainö ante apænemöni ëñëmïni inte mïnitö wæætë adodö ante pönencæminimpa, ante cædinque yewæmömopa.

³ Iïmai ante täno apænebo ëñencæminimpa. Mönö waocabo inguipoga mönö quëwëmämo wodo iinque bayonte në badete todäni cöwë poncædänimpa. Pöningue tömënäni badete todinque nämä näni wënæ wënæ cæinënö ante edæ do cæquinäni inänipa. ⁴ Tömënäni iïmai ante badete tocædänimpa. “Codito nänö ponguingue impa, ante wädänitedö abi. Iñæmpa Wængongui nänö badongäñedë inguipo nänö cægai bai mëmæidi wodi wænte godäni ate ñowo ganca adobai inte cæ apa guiñëwëminii,” ante badete toquinäni inte poncædänimpa. Apænebo ëñëedäni. ⁵ Wængongui iñæmpa adodeque angä beyænque öönædë owocoo edæ do bagatimpa. Adodeque angä beyænque onguipo æpæ tæcæpæno odæ yate ongönönte tömengä æpæ tönö badongä ongompä. Mänömai impa, ante edonque i incæte tömënäni, Mönö Baa angæimpa, ante beyænque adämai inte bai pönëñämai inänipa. ⁶ Ado æpæ inguipoga mäë ä beyænque Nöwee wodi quëwëngäñedë mäninguipo nänö ingai dæ badinque waguipo bai bagatimpa, ante edæ

ñowodāni iñōmō adobaī pōnēnāmaī inānīpa. ⁷ Ayæ adobaī Wængonguī adodeque angā beyænque öönædē owocoo tōnō iinguipo ñōwo mīni cægonguipo edæ iya tanguinque ongompa. Tömengä, Botō imote nē Baa ānāni inānite botō apænte pante wido cæquiönæ ganca māniī öönæ tōnō iinguipo ongompa, angampa.

⁸ Botō nē waademīni edæ ēñēedāni. Mönō Awēnē ayongante adoönæque incæ edæ, Mīido ganca wadepo baī impa, ante acampa. Mīido ganca wadepo iñonte mönō Awēnē ayongante, Adoönæque baī impa, ante acampa. Mänōmaīnō ante adodeque incæ mīnitō cōwē ēñente pōnēedāni, āmopa. ⁹ Mönō Awēnē, Cōwē pōnō cæbo æncæmīnīmpa, ante nānō angaiñō ante pancadāniya, Æiquedō mönō Awēnē cæquiringäa, ante wädānīpa. Mönō Awēnē iñæmpa wīi wæntæye ingampa. Wæætē, Adocanque wænāmaī incæcāmpa. Wæætē tōmānāni, Idæwaa wēnæ wēnæ cæte awædō, ante botō gāmænō poncædānīmpa, ante cædinque tōmengä māniñō beyænque ee cædāmaī ingampa. Īnīnque tōmengä, Mīnitō wæætē botō gāmænō æiquedō ponguīmīni, ante wānō cōnīnque edæ ee pōnāmaī ingampa.

¹⁰ Incæte nē awēmō ö ængä iñontobæ nānō pōmaī mönō Awēnē nānō poncæ cæönæ iñōmō adobaī iñontobæ ponguīnō anguēnē. Nanguī tæi tæi tēnīnque öönædē owocoo incæ iñontobæ dæ goquīnō anguēnē. Gongā nāni angä nanguī pōni bæco ĩnīnque edæ Wængonguī nānō badongaincoo tōmancoo edæ aca podīnque edæ ewente bacæīmpa. Inguipoga tōmāo ongoncoo dæ ba ĩnīnque inguipo öñōmæca pōni baquīnō anguēnē. ¹¹ Tōmancoo edæ mānōmaī ewenguincooque impa, ante adīnque edæ mīnitō iñōmō, Æbānō quēwenguīi, ante pōnēmīni. Wængonguī nānō cædō baī cōwē cædinque tæiyæ waēmō quēwenguēnēmō ĩmōmpa. ¹² Wængonguī nānō ponguīönæ iñōmō edæ æyedēnō ponguīi, ante wānō cōnīnque, Quingæ pōni pongæīmpa, ante mönō nanguī cæcæīmpa. Māniñōnæ iñonte edæ öönæ incæ gonga bæcote ewente bayonte Wængonguī nānō badongaincoo incæ nanguī ocoi ānīnque tōmancoo aca podīnque ewente baquīnō anguēnē. ¹³ Picæönæ tōnō pedænguipo ömæe ewēnīnque Wængonguī wæætē, Botō mīiönæque tōnō mīinguipoque pōnō badoncæboīmpa, ante nānō angaiñō baī do badoncæcāīmpa. Īnīnque mönō iñōmō, Mīiönæ tōnō mīinguipo iñōmō mönō nō pōni cæte quēwengæīmpa, ante nanguī aīnente wæmōmpa.

¹⁴ Botō nē waadedōmīni ēñēedāni. Mänōmaī bacæīmpa, ante nē aīnente wæmīni inte mīnitō iñōmō edæ, Mönō māniñedē wentamō entawēnāmaī ĩmō adīnque Wængonguī piīnāmaī incæcāīmpa, ante nanguī cædinque edæ nāmā wææ aedāni. Ayæ tōmengä, Botō ayōmo waēmō ewocamīni ĩnīnque edæ mönō godongāmæ piyænē cæte quēwengæīmpa, ante pōnō cæcæcāīmpa, ante edæ nanguī cæedāni. ¹⁵ Mönō quēwengūnque ante mönō Awēnē edæ ee ongonte pōnāmaī ingampa, ante pōnēedāni. Wængonguī pōnō cæcā ate ocai nē encacā bate pōnēnīnque mönō tōniñacā Pabodo mönō nē waadecā inte adobāñō ante mīnitō ĩmīnīte edæ, Acæmīnīmpa, ante yewæmongantapa. ¹⁶ Wængonguī mönō quēwengūnque ante ee pōnāmaī ingampa, ante cadota ante yewæmōnīnque Pabodo adobāñō ante edæ cōwē yewæmongampa. Tömengä nānō yewæmōnīnta pancataa wīi edonque ĩ adīnque nē ēñēnāmaī ĩnāni tōnō aquīi piñænāmaī ĩnāni iñōmō edæ oda cædinque wapiticæ odömōnānīpa. Tömēnāni edæ Wængonguī angä ēñente nāni yewæmongainta tōmantaa adobaī adīnque tōmēnāni nāni æmæwo ewengūnque edæ wapiticæ odömōnānīpa.

¹⁷ Botō nē waademīni ēñēedāni. Mänōmaī impa, ante do ēñēmīni iñōmīnīte Wængonguī nānō wææ angaiñō ante ēñēnāmaī cædāni ĩnāni guiquēnē mīnitō ĩmīnīte tōö æmænte wapiticæ ænte gocæ cædāni ate wædinque mīnitō wæætē tōmēnāni mīñæ godāmaī ĩedāni. Wæætē edæ Tæiyæ Awēnē nempo quēwēmīni inte, Tæi gowæænāmaī incæboīmpa, ante nāmā wææ aedāni. ¹⁸ Mönō Tæiyæ Awēnē Itota Codito ængä beyænque mönō quēwēmōmpa. Īnīnque tōmengä waadete pōnō cæcā ate mīnitō tōmengä ingante ate baī pōnēnīnque wādāni ĩnānite godōmenque waadete godō cæmīni baedāni. Tömengä iñōmō edæ ñōwopāmo iñonte wapāmo mīimāmo iñonte edæ cōwē tæi emongä ĩnongä inte ñāö apāite baī emongampa, ante adīnque mönō ñīmpo cædāmaī

inte tömengä ingante cöwë waa acäimpa. Mänömaï baquïnö angüënë, ante botö, Amëë,
ämopa.

1 Wäö cadota ante nänö tänota yewæmongainta

Mini quëwenguinö ante në pönongä

¹ Æcänö wëenëñedë Wængonguï nänö badongaiñedë do ingacäimpa, ante mäninö ante apænemönipa. Wængonguï nänö Angainö ante në ëmongaingä iñömö Itota adocä, Mini quëwenguinö ante në pönongä ingacäimpa. Mönitö iñömö mäningä apænecä ëñëningä tömengä ingante awinca inte në adimöni imönipa. Adocä ingante cöwä adinque mönitö tömengä ingante në gampodimöni imönipa. Ìninqe möni në ëñëningä ingante ante, awinca inte möni në adingä ingante ante, möni në cöwä adingä ingante ante, möni në gampodingä ingantedö ante apænemönipa. ² Edæ Itota në quëwengaingä iñömö edonque pönï a ongongacäimpa. Mönitö tömengä ingante në adimöni imönipa. Mäningä ingante ante, Näwangä quëwengaingä ingampa, ante apænemöni imönipa. Ayæ mönö Mæmpo Wængonguï tönö guëa cöwë quëwengaingä iñömö tömengä mönö weca ponte a ongongä atamönipa. Ìninqe minitö iminite mäningä ingante ante apænemöni ëñencæminimpa. ³ Ayæ mönö Mæmpo Wængonguï tönö tömengä Wengä onguïñængä Itota Codito tönö mönitö godongämæ cæmöni imönipa. Ìninqe, Minitö adobai mönitö tönö godongämæ cæcæminimpa, ante cædinque mönitö möni në adingä ingante ante, möni në ëñëningä ingante ante minitö iminite apænemöni ëñencæminimpa. ⁴ Mönö eyepæ watapæ toquinque ante mäninö ante minitö iminite yewæmömönipa.

Wængonguï ñäö apäite bai inongä ingampa

⁵ Tömengä nänö angainö möni ëñëninö æbänö i, ante mönitö iïmai ante minitö iminite apænemöni ëñencæminimpa. Wængonguï ñäö apäite bai inongä ingampa. Ìninqe tömengä wentamö nänö entawënö edæ dæ ampa. ⁶ Wentamö iñömö në cægömö ininqe mönö, Tömengä tönö godongämæ cæmönipa, ante ämö ininqe mönö edæ në babæ ämö imaimompa töö. Ayæ mänömai cæmö ininqe mönö, Quinö nöingä impa, ante cædämai imaimompa. ⁷ Wængonguï ñäö apäiyömö mäniñömö ongongä bai mönö adobai ñäö iñömö cægömö ininqe mönö wacä ingä wacä ingä godongämæ cæbaimompa. Ayæ ñäö iñömö cægömö ininqe mönö wënæ wënæ cægainö tömäa adinque tömengä Wengä Itota nämä wepæ inte mönö imonte mënongacä ate mënongate imaimompa.

⁸ Mönö, Botö wënæ wënæ cæpämö dæ ampa, ante ämö ininqe mönö nämä incæ oda cæte wapiticæ go bai cæbaimompa. Ayæ mänömai äninque mönö, Quinö nöingä i, ante ewocadämai quëwëmaimompa töö. ⁹ Wæætë edæ Wængonguï mönö imonte cöwë pönëningä në ædæmö cæcä inongä ingampa. Ayæ në nö cæcä iñongante mönö tömengä ingante, Botö nämä wënæ wënæ cædimö inte awædö, ante ämö ëñëningä tömengä wæætë pïinämai inte mönö imonte pönö ñimpo cæcä quëwencæmöimpa. Ayæ wiwa mönö cæte quëwënö tömäa adinque tömengä wæætë mönö imonte mënongacæcäimpa. ¹⁰ Mönö, Botö cöwë wënæ wënæ cædämai ingaimo imopa, ante ämö ininqe Wængonguï ingantedö ante, Babæ änogä ingänö, ante ämaimompa. Ayæ mänömai ämö ininqe tömengä nänö angainö ewocadämai quëwëmaimompa töö.

2

Mönö Codito wææ angä beyænque mönö quëwenguinque

¹ Botö wëñämïni bai imïni ëñëedäni. Minitö wënæ wënæ cædämai incæminimpa, ante iïmai ante cædinque yewæmömopa. Incæte adocanique wënæ wënæ cæcantawo. Tömengä beyæ wacä, Mæmpo Wængonguï pänämai incæcäimpa, ante mönö në wææ änogä incæ mä ongongampa. Mäningä iñömö në Nö Cæcä inongä inte Itota Codito inongä ingampa. ² Ayæ idægoidi, Mönö wënæ wënæ cægainö ante mönö imö Wængonguï pïinämai incæcäimpa, ante cædinque cæningä wænönäni nänö wængai bai

māninganque adobaī mōnō wēnæ wēnæ cægai beyæ wængacäimpa. Ayæ wii önonque mōnō wēnæ wēnæ cægainonque beyænque wæætē tōmāmæ quēwēnāni nāni wēnæ wēnæ cægai beyæ adobaī wængacäimpa.

³ Mōnō Wængonguī ingaingā ingante ate bai pōnēmō, ante æbānō cæte ēñenguī. Edæ, ĩmaī cæedāni, ante Wængonguī nānō wææ angainō ante ēñente cæmō ĩninqe mōnō edæ, Wængonguī ingante ate bai nē pōnēmō ĩmōpa, ante do ædæmō ēñēmaī-mōpa. ⁴ Waocā ĩñōmō, Wængonguī ingaingā ingante ate bai pōnēmō ĩmōpa, ante nē angā incæte tōmengā Wængonguī nānō, ĩmaī cæedāni, ante wææ nānō angainō ante ēñēnāmaī cæcā ĩninqe māningā nē babæ ānongā ingampa. Ayæ Wængonguī nōingā nānō angainō ante ewocadāmaī quēwengampa tō. ⁵ Wæætē, Wængonguī nānō angainō ante æcānō ēñente cæda ĩñōmō māningā ingante Wængonguī pōnō cæcā beyænque tōmengā Wængonguī waadete nānō pōnēnō ante eyepæ entawente quēwengampa. ĩninqe Wængonguī nānō angainō ante ēñente cæmō inte mōnō, Tōmengā nempo quēwēmō ĩmōpa, ante ædæmō ēñēmōpa. ⁶ ĩninqe æcāmenque, Botō tōmengā nempo nē quēwēmō ĩmōpa, ante nē angā ĩñōmō tōmengā Itota nānō quēwente cægōni bai adobaī quēwente cægonguēnē ingampa.

Itota, ĩmaī cæedāni, ante ñōwo nānō wææ ānō

⁷ Botō nē waademīni ēñeedāni. Mīnitō ĩmīnite, ĩmaī cæedāni, ante wii botō tōmēmō wææ ānō ante ñōwo yewæmōmōpa. Wæætē Itota do nānō wææ angainō ante wēenēñedē mīni ēñente ængainō ante adodō ante yewæmōmo aedāni. ĩi tōmengā do nānō wææ angainō ĩñōmō mīnitō ĩmīnite mōni apænedō mīni ēñēninō ĩpa. ⁸ Incæte mīnitō ĩmīnite Itota, ĩmaī cæedāni, ante ñōwo nānō wææ ānō yewæmōmōpa. Tōmengā tōnō mīnitō quēwente cædīnō beyænque, Mānīnō nō pōni ĩpa, ante edonque pōni acäimpa. Edæ mōnō wēmō ĩñōmō wodēmāa tæcæ bacæ cæyō nō ñāō ĩñōmō tatodonte do apāite ĩpa.

⁹ Botō ñāō ĩñōmō quēwēmō ĩmōpa, ante nē angā incæte tōmengā nānō tōniñacā ingante nē pīingā ingā ĩninqe tōmengā wēmō ĩñōmō ayæ quēwengampa. ¹⁰ Æcānō guiquēnē nānō tōniñacā ingante nē waadete pōnengāā tōmengā ñāō ĩñōmō nē quēwengā ingampa. Tōmengā ñāō ĩñōmō quēwēninqe quīēmē beyænque edæ tēwate goqingāā. Edæ dæ ampa. ¹¹ Wæætē æcānō nānō tōniñacā ingante nē pīingāā wēmō ĩñōmō quēwengampa. Tōmengā wēmō ĩñōmō cægongā inte compocæ compocæ gocā ingampa. Wēmō ĩñōmō quēwēninqe babetamongā bagaingā inte tōmengā ædōnō gocāā, ante ēñēnāmaī ingampa.

¹² Wēñæmīni ēñeedāni. Edæ Itota Codito emōwo beyænque mīni wēnæ wēnæ cægainō ante ñimpo cæte quēwēmīni ĩmīnīpa, ante adinqe botō mīnitō ĩmīnite yewæmōmōpa.

¹³ Mæmpomīni ēñeedāni. Mīnitō edæ, Wēenēñedē nē ingaingā ingante do ate bai pōnengāimīni ĩmīni beyænque botō mīnitō ĩmīnite yewæmōmōpa. Onguīñæmīni tæcæ pæmīni ēñeedāni. Mīnitō edæ godōmenque tæi emōmīni ĩmīni inte wēnæ awēnē ingante Baa ante gānā cæmīni beyænque botō mīnitō ĩmīnite yewæmōmōpa. Wēñæmīni ēñeedāni. Mīnitō edæ mōnō Mæmpo Wængonguī ingante do ate bai pōnengāimīni ĩmīni beyænque botō mīnitō ĩmīnite yewæmōmōpa.

¹⁴ Mæmpomīni ēñeedāni. Mīnitō edæ wēenēñedē nē ingaingā ingante do ate bai pōnengāimīni ĩmīni beyænque botō mīnitō ĩmīnite yewæmōmōpa. Onguīñæmīni tæcæ pæmīni ēñeedāni. Mīnitō edæ tæi emōmīni inte ayæ Wængonguī nānō angainō cōwē ewocate quēwēmīni ĩmīnīpa. Adobaī mīnitō edæ wēnæ ingante godōmenque tæi emōmīni inte Baa ante gānā cæmīnīpa. Mānōmaī beyæ botō mīnitō ĩmīnite yewæmōmōpa.

¹⁵ Inguipogaque ante nāni quēwēmāmo ante waadete pōnēnāmaī ĩedāni. Inguipoga quēwēnāni quīēmē wēnæ wēnæ nāni cæpāmo ante tōmāmāmo ante adobaī waadete pōnēnāmaī ĩedāni. Ayæ æcānō ĩi inguipogaque ante nāni quēwēmāmo ante waadete pōnente ĩna māningā mōnō Mæmpo Wængonguī nānō waadete pōnēnō ewocadāmaī quēwengā ingampa. ¹⁶ ĩi inguipoga ĩñōmō æbānō ĩ, ante acäimpa. Edæ wēnæ wēnæ

cädäni quiëmë beyä nani äinente wädö i, awinca inte adinque nani äinente wädö i, ante wii mönö Mæmpo Wængongui pönö cæcä ate äinenäni. Tömëni, Mäincoo nangui ëamöni imöni aedäni, ante cädäni. Ayä, Nangui cæmöni aedäni, ante cädäni. Incæte tömäa mäni nani äinënö wii mönö Mæmpo Wængongui pönö cæcä ate äinente badäni. Wæätë inguipoga iñömö në mä cädäni inte quiëmë wënæ wënæ nani cæpamo ante adinque wadäni dobæ wënæ wënæ cæinënäni badäni. ¹⁷ Inguipoga mönö quëwëñömö incæ mäninguipogaque ante quëwënäni nani cæinënö incæ oo pöni dæ baquinö angüenë. Wæätë waocä, Wængongui nänö angainö ante në ëñente cæcä inte wantæpiyæ wänämaï quëwencæcäimpa.

Quinö nöingä ante impa, quinö babæ ante impa

¹⁸ Wëñämïni ëñeedäni. Ìnque baquiönæ mönö äönæ oo batimpa. Mäniönæ iñonte Codito ingante wacä në piinte cæcä iñömö, Botö Codito imopa, ante në änewënongå ponguigä, ante ëñëmïnitapa. Edæ mäninö mïni ëñëninö bai ñöwoönæ incæ nangui inäni Codito ingante në piinte cädäni iñömö, Botö Codito imopa, ante në änewënonäni inte edæ do pönänitapa. Mänömaï i ïinque edæ, Ìnque baquiönæ do bapa, ante mönö ëñengäimpa. ¹⁹ Mäninäni iñömö mönö imonte ëmö cæte godänitapa. Incæte tömëni wii nö mönö pönencabo adocabo inämaï inänitapa. Edæ mönö pönencabo adocabodäni ininäni inte bai tömëni edæ wadæ godämaï inte mönö tönö ayä a ongoncädönänimpa. Wæätë do godäni adinque mönö, Mäninäni tömänäni mönö cabo inämaï inänitapa, ante edonque pöni acäimpa.

²⁰ Edæ ogui wapæ gadoncadäni encadäni bai mönö Tæiyæ Waëmö inongä iñömö edæ tömengä Önöwoca ingante mïnitonga angä pö guicä ate mïnitö tömämi tömengä ingante entawëninge, Quinö nö i, ante ëñëmïnipa. ²¹ Mïnitö imïnite yewämöninge botö dicæ, Mïnitö, Quinö nö i, ante ëñënamäi imïnipa, ante yewämömogaa. Wæätë edæ, Mïnitö, Quinö nö i, ante ëñëmïnipa, ante adinque botö mänömaï beyä ante yewämömopa. Ayä babæ nani äninö tönö Wængongui nöingä nänö angainö tönö ædö cæte guëa inguinaa, ante ëñëmïni adinque botö mänömaï beyä ante yewämömopa. ²² Babæ ante në änewënongå æcänö ingantawo. Edæ Itota incæ wii mönö Codito ingaingä ingampa, ante në angä iñömö tömengä në babæ änewënongå ingampa. Mäningä wæätë, Botö Codito inömo imopa, ante Codito ingante në piinte cæcä ingampa. Tömengä edæ mönö Mæmpo Wængongui tönö tömengä Wengä Itota Codito nana Mæmpocaya inate Baa angampa. ²³ Ìi Wengä onguiñangä ingante Baa äninque, Itota incæ wii mönö Codito ingaingä ingampa, ante në änäni iñömö ædö cæte Mæmpo Wængongui nempo quëwënonäni inguinäni. Wæätë tömengä Wengä ingante æcänö Ao äninque, Itota mönö Codito ingaingä ingampa, ante në angä guiquënë tömengä Mæmpo Wængongui nempo në quëwënongå ingampa.

²⁴ Mïnitö guiquënë, Quinö angainö, ante wëenëñedë mïni ëñengainö ante ñöwo godömenque mïnitö mïmönë entawente quëwëedäni. Mäninö ante godömenque entawëmïni inte mïnitö Itota Codito tömengä Mæmpo Wængongui nana Mæmpocaya tömëna nempo cöwë quëwenguimïni imïnipa. ²⁵ Mönö imonte Wængongui, Cöwë cæcæboimpa, ante cædinque iïmaï angacäimpa. Mïnitö wantæpiyæ cöwë wänämaï quëwencæmïnimpa.

²⁶ Wadäni, Mïnitö incæ oda cæcæmïnimpa, ante në cädäni iñönänite botö mïnitö imïnite mäninö ante yewämömopa. ²⁷ Codito tömengä Önöwoca ingante do pönongä ëwocamïnipa. Tömengä ingante cöwë ëwocamïni iñömïnite wacä ædö cæte mïnitö imïnite odömonte apänequingäa. Tömengä Önöwoca incæ tömänö ante odömonte apänecä ëñencæmïnimpa. Ayä tömengä nänö odömonte apänedö iñömö nö pöni i ïinque edæ wii babæ äninö impa. Ìninque mïnitö tömengä mänömaï nänö odömonte apänedïnö bai cædinque godömenque mönö Itota Codito nempo quëwëedäni.

²⁸ Mänömaï beyä botö wëñämïni bai imïni ëñeedäni. Tömengä nempo godömenque quëwëedäni. Edæ, Tömengä pongä mönö aquiönæ mönö guïñënamäi ingäimpa, ante cædinque ayä, Tömengä ponguïönæ mönö tömengä weca ongönninge guingo imönämaï ingäimpa, ante cædinque godömenque tömengä nempo quëwëedäni. ²⁹ Edæ mïnitö,

Itota Codito nö nänö cæte ingainö ante ëñëmini ïninqe edæ mïnitö ïïmaï ante adobaï do ëñëmaïminipa. Quinö waa impa, ante nê cædönäni tömänäni mempoga ëñagainäni inte Wængongui wënäni ïnänipa.

3

Wængongui wënäni

¹ Mönö Mæmpo Wængongui incæ æbänö mönö ïmonte nanguï pönï nê waadete pönëongä inte cægacäimpa, ante apænebo ëñëedäni. Edæ mönö ïmonte, Botö wëmini ïmini ämopa, ante angacäimpa. ïninqe näwangä mänimönö ïmompä. Inguipogaque quëwënäni ïñömö, Mönö Mæmpo Wængongui ingante wïi adinqe pönënamäi ïnänitapa. Mänömaï beyæ mönö ïmonte adobaï adämaï ïnäni inte baï pönënamäi ïnänipa. ² Botö nê waademini ëñëedäni. Nöwoyedë Wængongui wëmö ïnömö inte mönö ayæ ate æbänö baquimöö, ante ayæ wïi edonque amompä. Wæætë, tömengä nänö pöönæ mönö aquiönæ tömengä nänö ingäi baï mönö adobaï bacäimpa, ante ædæmö ëñëmompä. Edæ tömengä æbänö ingaingä ingää, ante mönö edonque acäimpa. ³ Edæ, Tömengä beyænque mänömaï bacäimpa, ante nê pönente todäni tömänäni, Itota Codito tæiyæ waëmö nänö ingäi baï mönö adobaï tæiyæ waëmö bacäimpa, ante nämä incæ cædänipa.

⁴ Nê wënæ wënæ cædäni tömänäni Wængongui nänö, ïïmaï cædäni, ante näni yewæmongainö ante Baa ante nê ëñënamäi cædäni ïnänipa. Edæ wënæ wënæ näni cægäinö incæ Wængonguinque ingante Baa ante näni angäinö impa. Mäninö ante nö ante impa. ⁵ Mïnitö do ëñëminipa. Tömengä edæ mönö wënæ wënæ cægäinö ante mönö ïmonte, Nïmpo cæbo quëwenguimïni, ante cæcæte ante cædinque ëñagacäimpa. Ayæ tömengä wënæ wënæ cædö entawënämaingä ingampa. ⁶ Ayæ edæ tömengä nempo nê quëwënönäni tömänäni wïi godömenque wënæ wënæ cædäni ïnänipa. Godömenque nê wënæ wënæ cædönäni guiquënë tömengä ingante adämaï ïnönäni inte pönënamäi ïninäni ïnänipa töö. ⁷ Wëñæmïni ëñëedäni. Wacä mïnitö ïminite, Wapiticæ gote oda cæquimïni, ante nê mäocæ cæcä ingante gomö aedäni. Wæætë, Quinö waa impa, ante nê cæcä guiquënë tömengä Itota Codito nö nänö cæte ingäi baï adobaï nö cædongä ïnongampa. ⁸ Nê wënæ wënæ cæcä guiquënë wënæ päingä baï inte adocä nempo quëwengampa. Edæ wëenënedë wënæ awënë nänö wënæ wënæ cægäi baï cöwë wënæ wënæ cæcampa. Mänömaï beyæ Wængongui Wengä ïñömö wënæ awënë nänö wënæ wënæ cægäinö ante wo ewencæte ante inguipoga ponte ëñagacäimpa.

⁹ Wængongui wënäni tömänäni wïi godömenque wënæ wënæ cæquïnäni ïnänipa. Edæ tömëmö guidimö baï minte baï cædinque Wængongui nänö quëwënö ante da pönongä æninqe tömënäni cöwë entawente quëwënänipa. Tömënäni edæ Wængongui wënäni inte ædö cæte godömenque wënæ wënæ cæquïnänii. ¹⁰ Æcänö, Quinö waa impa, ante nö cædämaï ïnaa tömengä wïi Wængongui wengä ingampa. Ayæ æcänö tömengä nänö tönïñacä ingante nê waadete pönënamäi ïnaa tömengä adobaï wïi Wængongui wengä ingampa. Wængongui wënäni ædänidö ïnänii, ante ayæ, Wënæ wënäni ædänidö ïnänii, ante mönö mänömaï beyænque edonque pönï ëñëmompä.

Wacä ingä wacä ingä mönö waadete pönengäimpa, ante

¹¹ Mïnitö mä mïni pönënedë mïni ëñëngäinö ïïmaï ante impa. Wacä ingä wacä ingä mönö waadete pönengäimpa. ¹² Mïnitö Cäinö wodi baï wïi ïedäni. Mäningä edæ wënæ nänö päingä baï ingaingä inte tömengä nänö tönïñacä ingante näëmæ wænongä wængacäimpa. Ayæ quïnante tömengä ingante wænongacäi. Edæ tömengä nämä nänö cæinö wënæ wënæ cæinonque ïñonte, Tömengä tönïñacä nänö cæinö wæætë nö cæinonque ï, ante adinqe mänömaï beyænque Cäinö wodi tömengä nänö tönïñacä ingante wænongacäimpa.

¹³ Botö tönïñamïni ëñëedäni. Inguipogaque quëwënäni mïnitö ïminite ancaa pïinäni adinqe mïnitö wæætë, Quïnante pïinäni, ante wædämaï ïedäni. ¹⁴ Mönö tönïñadäni ïnänite nê waadete pönëmö beyænque, Mönö nê wænguënëmö inte mönö wæætë mïi quëwëmö ïmompä, ante edonque ëñëmompä. Nê waadete pönënamäi ingä guiquënë

tömengä iñömö mönō wənguēnēmāmo cōwē ēmō cædāmaī ingampa tōō. ¹⁵ Æcānō tömengä tōniñacā ingante piina tömengä iñömö nē wænongä bai ingampa tōō. Ayæ, Nē wænongä inongä inte tömengä nānō wantæpiyæ wænāmaī quēwenguimāmo ante ædō cæte entawente quēwenguingāā, ante do ēñēmīnīpa. ¹⁶ Nāwangä waadete pōnēninque æbānō cæquiī, ante mönō iīmaī ante ēñengæimpa. Edæ, Itota Codito nāmā incæ mönō beyænque wəngacāimpa, ante adinque mönō, Mānōmaī waadete pōnente cæquiī impa, ante ēñēmompā. Īninque mönō adobaī mönō tōniñadāni beyænque ante mönō nāmā incæ Ao āninque wənguēnēmō imompā. ¹⁷ Māincoo nē ēacā iñömö tömengä tōniñacā nānō quēwenguinō ante wīi eyepæ ēacā acā incæte tömengä ingante waadete cædāmaī ingantawo. Edæ nē ēacā incæ ædō cæte Wəngonguī nānō waadete pōnēnō entawengä ingantawogaa. ¹⁸ Wēñæmīni ēñēedāni. Mönō, Waodāni inānite botō waadete pōnēmo imopa, ante tedemō incæte wīi mānīnō önōne mönō tededō beyæ mönō nōingä cæte waadete pōnēmo imompā. Wæætē edæ waodāni beyæ godō cædinque mönō nōingä waadete pōnengæimpa.

Wəngonguī weca ongote mönō guiñēnāmaī ingæimpa

¹⁹ Mānōmaī cæmompā, ante adinque mönō, Wəngonguī nōingä nānō angainō bai quēwēmō imompā, ante do ēñēmompā. Ayæ adobaī, Tömengä weca mönō a ongōnedē nāmā guiñēnāmaī incæmōimpa, ante ēñēmompā. ²⁰ Botō pante wæquinque wēnæ wēnæ cæbopa, ante mīmōnē nāmā apænte ämō incæte iīmaī ante adobaī ēñēmompā. Wəngonguī edæ wīi mönō mīmōnē ēñēnō bai inongä inte tömengä godōmenque nē ēñēnongä ingampa. Ayæ tömengä tömāā ēñengaingä ingampa.

²¹ Botō nē waademīni ēñēedāni. Botō pante wæquinque wēnæ wēnæ cæbopa, ante mīmōnē nāmā apænte ānāmaī imō ĩninque mönō Wəngonguī weca ongōninque guiñēnāmaī imāimompā. ²² Ayæ tömengä, Īīmaī cæedāni, ante nānō wææ angainō ante ēñente cæmō ĩninque ayæ, Cæmō adinque tömengä tocæcāimpa, ante cæmō ĩninque tömengä ingante quīēmē beyæ ante ämō tömengä wæætē pōnō cæcā æmaimompā. ²³ Tömengä nānō wææ angainō iīmaī impa. Botō Wengä Itota Codito ēmōwo ante pōnēedāni. Ayæ tömengä mönō imonte, Botō wææ angainō bai wacā ingä wacā ingä waadete pōnēedāni. ²⁴ Mānōmainō ante Wəngonguī nānō wææ angainō ante nē ēñente cædāni iñömö tömēnāni tömengä nempo quēwēnōnāni inānīpa. Ayæ adobaī tömēnāni tömengä ingante entawēnānīpa. Wəngonguī tömengä Önōwoca ingante pōnongä ænimō inte mönō māningä tömengä nānō pōnongaiwoca beyæ, Wəngonguī ingante entawēmō imompā, ante do ēñēmompā.

4

Æcānō önōwoca ingante ewocadāni, ante

¹ Botō nē waademīni ēñēedāni. Wadāni, Wəngonguī Önōwoca incæ mōnitonga pō guicā ĩninque ewocamōni imōnīpa, ante nē ānāni incæte mīnitō wīi tömēnāni nāni ānō pōnēedāni. Wæætē, Tömēnāni önōwoca Wəngonguī weca owodīnque pōwocacantawo, ante ēñencæte ante apænte aedāni. Edæ Wəngonguī beyænque nē apænēmōnīpa, ante nē babæ ānewēnōnāni nanguī ināni imæca quēwēnāni weca godānīpa. ² Mīnitō edæ, Māniwoca nāwangä Wəngonguī Önōwoca ingantawoo, ante ēñencæte ante iīmaī ante edonque pōni ēñencæmīnīpa. Edæ, Itota Codito Waocā ēñate pongaingä ingacāimpa, ante ānāni adinque mīnitō, Tömēnāni tömānāni Wəngonguī weca nē pōwocacā ingante nē ewocadāni inānīpa, ante ēñencæmīnīpa. ³ Wæætē Itota ingantedō ante adodō ante nē ānāmaī ināni guiquēnē tömēnāni tömānāni edæ Wəngonguī weca pōwocacā ingante ewocadāmaī inānīpa. Tömēnāni nāni nē ewocadongä iñömö tömengä, Itota Codito Waocā ēñate pongaingä ingacāimpa, ante ānāmaī ingampa. Māningä iñömö Codito ingante nē piinte cædongä iñömö tömengä poncæcāimpa, ante mīni nē ēñēningä ingampa. Nōwoōnæ incæ tömengä do inguipoga mönō quēwēñömö iñömö pongä ataquēedāni.

⁴ Wēñämīni ēñēedāni. Wadāni, Codito ingante nē pūinte cædōnāni iñōnānite mīnitō Wængonguī quīmīni imīni inte godōmenque tæi emōmīni imīnīpa. Edæ Wængonguī Ōnōwoca mīni nē ewocadongā iñōmō tōmengā godōmenque nanguī tæi emongā iñongante wēnæ inguipogaque quēwēnāni nāni nē ewocadongā guiquēnē wædænque tæi emongā ingampa. Īnīnque mīnitō mānīnāni nē babæ ānewēnōnāni inānite Baa ante cædinque godōmenque tæi emōmīni inte gānā cædimīni imīnīpa. ⁵ Mānīnāni inguipoga beyænque quēwēnāni inte mānōmaī beyæ inguipoga quēwēnāni nāni pōnente ānō baī tededāni iñōnānite inguipogaque ante quēwēnāni adodāni inte tōmēnāni inānite ēñēnānīpa tōō. ⁶ Mōnitō Wængonguī quīmōni imōni iñōmōnite, Wængonguī ingante nē ate pōnengā iñōmō tōmengā mōnitō imōnite ēñengampa. Wæætē Wængonguī wengā ināmaī inongā guiquēnē tōmengā mōnō imonte ēñēnāmaī ingampa. Mānōmaī ĩnīnque edæ waocā adocanque ōnōwoca nōingā angā ingante ewocadongā incæ wacā ōnōwoca babæ angā ingante ewocadongā incæ mōnō mānīnō beyænque, Æwocadō ĩ, ante edonque pōnī ēñēmōmpa.

Wængonguī waadete pōnengaingā inte

⁷ Botō nē waademīni ēñēedāni. Mōnō wacā ingā wacā ingā waadete pōnengæimpa. Edæ mōnō waadete pōnēnō incæ Wængonguī nānō da pōnongainō impa. Tōmānāni, Nē waadete pōnēnāni iñōmō Wængonguī wēñænāni nāni mempoga ēñagāincabo inōnāni inte Wængonguī ingaingā ingante ate baī pōnēnānīpa. ⁸ Wæætē nē waadete pōnēnāmaī ināni guiquēnē tōmēnāni Wængonguī ingante wīi ate baī pōnēnāni inānīpa. Edæ Wængonguī nē waadete pōnengaingā ingampa. ⁹ Mōnō imonte Wængonguī nānō waadete pōnēmāmo ĩmaī cæte odōmongacāimpa. Tōmengā edæ, Botō Wengā beyænque quēwēncæmīnīmpa, ante cædinque tōmengā Wengā adocanque ingante inguipoga mōnō quēwēñōmō da pōnongā pongacāimpa. ¹⁰ Æbānō waadete pōnenguīi, ante ĩmaī impa. Mōnō wīi Wængonguī ingante waadete pōnēnīmō imōmpa. Wæætē tōmengā mōnō imonte waadete pōnengā ingaingā ingampa. Ayæ, Mōnō wēnæ wēnæ cægāinō ante mōnō imonte Wængonguī pīnāmaī incæcāimpa, ante idægoidi cæningā ingante wēnōnāni nānō wængāi baī Wængonguī adobaī mōnō wēnæ wēnæ cægāinō beyænque tōmengā Wengā ingante da pōnongā pōnīnque mōnō beyæ wæætē wængacāimpa.

¹¹ Botō nē waademīni ēñēedāni. Wængonguī edæ mōnō imonte mānōmaī nē waadete pōnengaingā ingampa, ante adīnque mōnō adobaī wacā ingā wacā ingā waadete pōnenguēnēmō imōmpa. ¹² Mōnō waocabo tōmāmō Wængonguī ingante cōwē adāmaī imōmpa. Incæte mōnō wacā ingā wacā ingā waadete pōnēmō ĩnīnque Wængonguī ingante entawente quēwēmaimōmpa. Ayæ adobaī wacā ingā wacā ingā waadete pōnēmō ĩnīnque tōmengā pōnō cæcā beyænque mōnō tōmengā nānō waadete pōnēnō ante eyepæ entawente quēwēmōmpa. ¹³ Mōnō tōmengā nempo quēwēmō inte tōmengā ingante adobaī mōnō entawente quēwēmōmpa. Wængonguī tōmengā Ōnōwoca ingante mōnō imonte pōnongā ængāmōimpa. Mānōmaī beyæ mōnō mānīnō ante do ēñēmōmpa. ¹⁴ Mæmpo Wængonguī tōmengā Wengā ingante ānīnque, Inguipoga quēwēnāni tōmānāni inānite bitō æmi beyænque quēwēnguīnāni, ante cæcæbiimpa, ante da pōnongā pongantapa. Pongā adīnque mōnitō nē adīmōni inte wadāni inānite mānīnō ante apænēmōni ēñēncædānīmpa. ¹⁵ Æcānō, Itota Codito Wængonguī Wengā ingaingā ingampa, ante āna iñōmō tōmengā Wængonguī ingante entawente quēwengampa. Tōmengā adobaī Wængonguī nempo quēwengā ingampa.

¹⁶ Ayæ mānīi beyæ Wængonguī mōnō imonte waadete pōnengampa, ante mōnō nē ēñēnōmō inte edæ ædæmō pōnēmō imōmpa. Wængonguī iñōmō nē waadete pōnengaingā ingampa. Tōmānāni nē waadete pōnente quēwēnāni iñōmō tōmēnāni Wængonguī nempo quēwēnānīpa. Wængonguī ingante adobaī tōmēnāni entawente quēwēnānīpa. ¹⁷ Wængonguī nānō waadete pōnēnō ante ædæmō entawēmō ĩnīnque mōnō godongāmæ waadete pōnēmō beyæ tōmengā apænte anguīōnæ iñonte guīñēnāmaī inguīmō imōmpa. Edæ Mæmpo Wængonguī nempo Itota nānō quēwengāi baī mōnō imæca quēwēnīnque adobaī quēwēmō inte mānīñedē guīñēnāmaī inguīmō imōmpa.

¹⁸ Nē waadete pönengä iñömö tömengä guiñenāmaï ingampa. Wæætē edæ tömengä nänö waadete pönēnō æmæwo pæte bai eyepæ ba iñinque tömengä nē waadete pönengä inongä inte ædö cæte guiñenguingää. Nē guiñengä guiquēnē tömengä nänö pante wæwenguinö incæ do pante bai wæwengä ingampa. Tömengä nänö waadete pönēnō ante wii eyepæ ba iñinque tömengä æmæwo pædāmaï bai ingampa.

¹⁹ Wængongui edæ mönō imonte tāno waadete pönengacäimpa. Mänömaï beyæ mönō wæætē waadete pönēmō imompa. ²⁰ Botö Wængongui ingante nē waadete pönēmō imopa, ante nē angä iñömö tömengä wæætē tömengä töninacä ingante nē piinte ingä iñinque tömengä babæ anewēnongä ingampa. Edæ mäningä nänö töninacä ingante nē adingä incæ tömengä ingante waadete pönēnāmaï ingä incæte adocä Wængongui ingante nē adāmaï iningä incæ ædö cæte tömengä ingante waadete pönenguingää. ²¹ Ayæ, İmaï cæedāni, ante Itota Codito mönō imonte iïmaï angacäimpa. Tömämīni Wængongui ingante nē waadete pönēmīni inte mīnitö töninadāni inānite adobaï waadete pönenguēnēmīni iminipa.

5

Inguipogaque nāni quēwēnō ante mönō Baa angæimpa

¹ Tömānāni Itota ingantedö ante, Mönō Codito ingaingä ingampa, ante nē pönēnāni inte Wængongui wēnāni nāni mempoga eñagaincabo inānipa. Ayæ tömānāni Mæmpocä ingante nē waadete pönēnāni iñömö tömēnāni adobaï tömengä Wengä ingante waadete pönēnānipa. ² Mönō Wængongui wēnāni inānite waadete pönēmō imöö, ante eñencæte ante iïmaï ante do eñēmompa. Wængongui ingante waadete pönēmō iñinque ayæ tömengä, İmaï cæedāni, ante nänö wææ angainö ante eñente cæmō iñinque mönō, Nē waadete pönēmō imompa, ante eñēmaïmompa. ³ Wængongui ingante mönō waadete pönēnō iñömö iïmaï ante impa. Wængongui, İmaï cæedāni, ante nänö wææ angainö ante mönō eñente cæcäimpa. Edæ mäninö ante, İmaï cæedāni, ante nänö wææ angainö ante eñente cædinque mönō wii teēmē mongænte bai baquinque cæmompa. ⁴ Edæ Wængongui wēmō mempoga mönō eñagaincabo iñömö mönō tömämō inguipogaque ante nāni quēwēnō ante Baa äninque godömenque tæi emonte gänä cæmompa. Inguipogaque ante nāni quēwēnō ante mönō godömenque tæi emömāmo iñömö iïmaï ante impa. Wængongui ingante mönō wede pönēnō beyænque mönō godömenque tæi emömō inte gänä cæmompa. ⁵ Inguipogaque ante nāni quēwēnō ante Baa ancæte ante æcänö godömenque tæi emongä inte gänä cæcantawoo. Edæ Itota Wængongui Wengä ingaingä ingampa, ante nē pönenganque tömengä godömenque tæi emönongä ingampa.

Wængongui Wengä ingantedö ante nö ante impa

⁶ Nē æpænē guiite pongaingä iñömö nāmā wepæ petæ petæ wæante nē gogaingä iñömö mäningä iñömö Itota Codito inongä ingacäimpa. Tömengä wii æpænenque inte pongacäi wæætē æpænē inte ayæ nāmā wepæ inte pongacäimpa. Ayæ Wængongui Önöwoca incæ tömenganque mäninö ante, Nö ante impa, ante nē apænecä ingacäimpa. Edæ Wængongui Önöwoca nē nöingä inongä ingampa. ⁷ Edæ mäa go adoque ināni mänimpodāni, Nö impa, ante apænete bai nē änāni inānipa. ⁸ Edæ Wængongui Önöwoca incæ æpæ incæ wepæ incæ mäa go adoque mänimpodāni incæ, Nö impa, ante nē apænedāni mäe öñompa. Mänimpodāni iñömö quiēmē äninque adodö ante nē apænedāni inānipa. ⁹ Quiēmē ante waocä incæ, Nö impa, ante nänö apænedinö ante do eñēmompa. Quiēmē ante, Nö impa, ante Wængongui nänö apænegainö guiquēnē godömenque waa pönī impa. Edæ Wængongui tömenganque nänö apænegainö impa. Edæ tömengä Wengä ingantedö ante Wængongui, Nö pönī impa, ante nänö apænegainö impa töö. ¹⁰ Æcänö Wængongui Wengä onguiñængä ingante nē wede pönēna iñömö tömengä, Nö impa, ante Wængongui nänö apænegainö ante entawente quēwengampa. Wæætē edæ æcänö Wængongui nänö apænegainö ante wii pönēna guiquēnē tömengä Wængongui ingantedö ante, Babæ änongä ingänö, ante nē angä ingampa. Edæ Wængongui tömengä Wengä ingantedö ante, Nö impa, ante nänö apænegainö ante mäningä

iñömö pönenämaï ingampa töö. ¹¹ Ayæ mäninö ante tömengä, Nö impa, ante nänö apänegainö ante iïmaï ante impa. Mönö imonte Wængongui, Mini wantæpiyæ cöwë quëwenguinö, ante pönongä æntamompa. Mäninö mönö quëwenguinö ante tömengä Wengä nê quëwëngä inte mönö imonte pönongä ænimö inte entawente quëwë-mompa. ¹² Tömengä Wengä nempo nê quëwëngä iñömö tömengä wantæpiyæ nänö quëwenguinö do entawente quëwëngampa. Wængongui Wengä nempo nê quëwënämaï ingä guiquënë tömengä wæætë wantæpiyæ nänö quëwenguinö ænämaï ingampa.

Wäö iinque nänö angainö

¹³ Minitö Wængongui Wengä ëmowo ante nê pönëmini iñöminite botö mäninö ante yewämömo aedäni. Minitö edæ wantæpiyæ cöwë mini quëwenguinö do entawente quëwëmini iñöminite botö, Eñencæminimpa, ante yewämömopa.

¹⁴ Iïmaï beyænque Wængongui weca guïñenämaï pömö imompa. Mönö quiëmë æncæte ante tömengä ingante apänedinque tömengä nänö änö bai ante apänemö iinque tömengä mönö imonte ëñëmaingampa. ¹⁵ Ayæ, Mönö imonte nê ëñëngä ingampa, ante ëñëmö iinque mönö, Quiëmë ante apänemö ëñëninque tömengä mäninö mönö äninö ante do pönongä æmö imompa, ante ëñëmaïmompä.

¹⁶ Minitö mini tönïñacä wënæ wënæ cæcä incæ wii tömengä nänö æmæwo wænguinque wënæ wënæ cæcä aminitawo. Mänömaï cæyongante nê adingä iñömö mäningä beyæ ante Wængongui ingante apänecæcäimpa. Apänecä ëñëninque Wængongui tömengä ingante wantæpiyæ nänö quëwenguinö pönongä æncæcäimpa. Edæ pancadäniya wënæ wënæ nani cædincoo mongænäni incæ wii tömënäni nani æmæwo wænguinque wënæ wënæ cædänipa, ante botö mäninäni inänitedö ante apänëbopa. Wæætë edæ waocä Wængongui Tæiyæ Waëmö Önöwoca ingante ancaa Baa Baa äninque tömengä nänö æmæwo wænguinque nê wënæ wënæ cæcä ingampa. Iinque botö, Mänömaï Baa äninque nê wënæ wënæ cædingä beyæ ante Wængongui ingante apänecæcäimpa, ante änämaï imopa. ¹⁷ Quiëmë wiwa cæmö mäninö tömänö wënæ wënæ mönö cædö impa. Wæætë wënæ wënæ cæmö incæte wii tömänö mönö wënæ wënæ cædö beyæ mönö nê wængüenëmö bamompa. Pancaa beyænque nê wængüenëmö bamompa.

¹⁸ Wængongui wënäni nani mempoga ëñagaincabo iñömö godömenque wënæ wënæ cædämaï inänipa, ante ëñëmompä. Edæ Wængongui Wengä ëñagaingä inte tömënäni inänite wææ cædongä ingampa. Ayæ wënæ incæ tömënäni inänite gampodämaï inongä ingampa. ¹⁹ Wængongui wëmö imö imompa, ante ëñëmompä. Wæætë wadäni edæ inguipogaque ante nê quëwënäni guiquënë tömënäni tömänäni wënæ awënë nempo quëwënänipa, ante ëñëmompä. ²⁰ Wængongui Wengä do pongä ingacäimpa. Ayæ Wængongui nê nöingä ingaingä ingante ate bai pönencæminimpa, ante cædinque tömengä mönö imö pönö odömongä ate ëñëmompä. Tömengä mänömaï cæcampa, ante adobai ëñëmompä. Ayæ tömengä nê nöingä ingaingä iñongante mönö tömengä Wengä Itota Codito nempo quëwëmompa. Itota Codito nö Wængongui ingaingä ingampa. Ayæ tömengä wantæpiyæ cöwë nê quëwëngä ingaingä inte pönö cæcä beyænque mönö adobai wantæpiyæ quëwëmö imompa. ²¹ Botö wëñämïni bai imini ëñëedäni. Wadäni, Mönitö wængonguïdi impa, ante nani cönönincoo weca godämaï iedäni, ämopa. Mäninque ante yewämömopa.

2 Wäö cadota ante nänö ayänta yewæmongainta

Nöinö mönö änö ante ayæ mönö waadete pönönö ante

¹ Minitö Wængongui ingante mini pönencabo iñöminite botö nê aabo Picæmo mini änömo inte yewæmömpa. Minitö badä nani wencabo bai iñöminite tömengä minitö iminite apænte ængacäimpa. Botö minitö iminite nö waadete pönëmopa. Wii botonque waadete pönëmini inte wæætë mönö Codito nöingä nänö waa pöni angainö ante nê ëñëninäni adobaï tömënanäni tömänäni nani nê waadete pönëmini iñöminite yewæmömo aedäni. ² Edæ mönö nê Nöingä nänö waa pöni angainö ante entawente quëwëmö inte mönö cöwë ñimpo cædämaï entawencæmöimpa. ³ Nê Mæmpocä Wengä Itota Codito tönö Mæmpo Wængongui tömëna godongämæ waadete pönö cædinque, Quëwencæmin-impä, ante mönö imonte waadete waa cæda beyænque mönö gänë entawencæmöimpa. Ìninqe mönö nê nö pönëmö inte mäninö ante cöwë entawente quëwënömö inte mönö wacä ingä wacä ingä waadete pönëmö incæmöimpa.

⁴ Mæmpo Wængongui mönö imonte nänö, Ìimaï cædäni, ante nänö wææ angainö bai ëñente cædinque mini pönencabo iñömini botö, Pancadäniya nöinö cægonte bai quëwënanipa, ante ëñëniimo inte nanguï tobopa. ⁵ Nöwo iñömö minitö iminite ämo ëñëdäni. Minitö Wængongui ingante mini pönencabo iñömö wacä ingä wacä ingä waadete pönëdäni ämpa. Botö nöwo mänömaï äninqe wii tömëmö wææ änö ante yewæmömpa. Wæætë Awënë do wææ nänö angainö ante wëenëñedë mönö ëñente ængainö ante adodö ante yewæmömo aedäni. ⁶ Nê pönënanäni inänite mönö waadete pönëno iimaï impä. Mönö Codito, Ìimaï cædäni, ante nänö wææ angainö ante ëñente cædinque mönö quëwengäimpa. Minitö wëenëñedë do mini ëñëninö bai wææ äninqe tömengä, Minitö cöwë waadete pönente quëwëedäni, angacäimpa.

Waodäni oda cæcædänimpa, ante nê cædäni

⁷ Waodäni edæ oda cæcædänimpa, ante nê cædäni nanguï inäni imæca quëwënanäni weca gote mä ongönänimpa. Mäninäni iñömö Itota Codito Waocä ëñate pongaingä ingampa, ante änämaï nê inäni inänipa. Æcänö tömënanäni bai nê ingä, Waodäni edæ nani oda cæquinque, ante nê cæcä ingampa. Ayæ, Botö Codito imopa, ante Codito ingante püinte cædongä ingampa. ⁸ Minitö iñömö nämä wææ aedäni. Quiëmë cæcæte ante mini cædinö ante minitö, Wë womönämaï ingäimpa, ante cædinque wææ cædäni. Wæætë mini cædinö beyæ Wængongui nänö pönonguincoo tömancoo eyepæ pönongä æncæte ante cædäni.

⁹ Nê pönengä Itota Codito nänö odömonte apænëgainö ante nê ëñëningä incæ wii godömenque ëñente cædinque wadö ante wadæ gocä iñömö tömengä ædö cæte Wængongui tönö godongämæ quëwenguingä. Wæætë Itota Codito nänö odömonte apænëgainö ante godömenque nê ëñente cædongä iñömö tömengä iñömö Mæmpocä tönö ayæ tömengä Wengä tönö godongämæ quëwengampa. ¹⁰ Wacä minitö weca pöninqe mäninö Codito odömonte apænedinö ante odömonte apænedämaï ingampa, ante adinqe minitö tömengä ingante, Botö oncönë pö guiie, ante änämaï iedäni. Ayæ, Waa quëwente pömi, ante änämaï iedäni. ¹¹ Edæ adocä ingante æcänö, Waa quëwente pömi, ante äna tömengä mäningä wënæ wënæ cæyongante tömengä tönö guëa cæte bai cæcampa.

Wäö iinqe nänö angainö

¹² Botö minitö iminite godömenque nanguï äinente wæbo incæte mincayonta inte wentamömæ yewæmöimæ inte wii yewæmöinëmopa. Wæætë minitö weca ëñacæ pöinëmö imopa. Ayæ minitö tönö awincadö awinca adinqe botö apænëinëmö imopa. Mänömaï cædinque botö, Mönö godongämæ eyepæ pöni watapæ tocæmöimpa, ante

cæbopa. ¹³Mönitö tönĩñamĩni ěñěedäni. Wængonguĩ ingante möni pönencabo tömengä nänö ně ængaimöni inte mönitö ĩñömö mĩni pönencabo ĩñöminite, Waa quĕwĕedäni, ämönipa, ante yewæmömopa.

3 Wäö

cadota ante nänö tömanta yewæmongainta

Gayo ingante Wäö nänö waa apænedö

¹ Gayo botö nê waadebi êñëmi. Bitö botö nê nö waadete pönëmi iñömite botö nê aabo Picæmo mîni ânömo inte, Acæbiimpa, ante yewæmömopa.

² Botö nê waadebi êñëmi. Tömëmi önöwoca incæ waa êwocate quëwëmi bai bitö baonga adobai waa êñabi quëwencæbiimpa, äninque ayæ, Bitö quëwenguinö ante bitö cöwê waa pönî quëwencæbiimpa, ämopa. ³ Mönö tönîñadani pancadaniya iñömö pöninque, Gayo iñömö Itota Codito nö pönî nänö angainö ante cöwê nö pönëninque cæcampa, ante apænedänitapa. Ayæ, Gayo ñowo godömenque nöinö cægonte bai quëwengä ingampa, ante apænedäni êñëninque nanguî pönî totabopa. ⁴ Botö wëmîni bai imîni imînitadö ante, Itota Codito nö pönî nänö angainö bai tömënanî nöinö cægonte bai quëwënanî inänipa, ante apænedäni êñëninque botö godömenque watapæ toquinque impa.

⁵ Botö nê waadebi êñëmi. Mönö tönîñadani incæ bitö nê tæcæ adinani inani incæte bitö quinö tömënanî beyæ ante cædinque cöwê pönëninque ædæmö cæbi imipa. ⁶ Codito ingante godongämæ möni pönencabo iñömönite mäninani wæætë, Gayo nê waadete pönengä ingampa, ante mönitö imönite apænedäni êñentamönipa. Tömënanî Wængonguî ingante nê cædani inänipa cæbii. Bitö tömënanî inänite godö cæbi æninque gomonga godani ininque waa imaimpa. ⁷ Edæ tömënanî iñömö Itota ëmowo beyænque tao godänitapa. Mänömaï goyönänite nê êñënamai cædani dicæ pönönani ænanitawogaa. ⁸ Mänömaï beyæ mönö Wængonguî nöingä nänö angainö ante tömënanî tönö godongämæ cæcæimpa, ante cædinque mäninani bai inani mönö oncö pönani adinque mönö, Pö guiite cænte möedani, angüenëmö imopa.

Diatedepeto tönö Deëmetedio

⁹ Codito ingante mîni pönencabo iñömönite botö mînitö imînite do yewæmontabopa. Incæte Diatedepeto iñömö, Botö nê awënë imopa, ante nê cæinënongä inte mönitö imönite Baa äninque nänënë cæcä ingampa. ¹⁰ Mînitö weca botö pöninque tömengä quinö nänö cædö ante edonque pönî apænebo êñencæmînimpa. Edæ tömengä mönitö imönitedö ante önonquedö ante wënæ wënæ apænecampa. Ayæ mäninö ante wîi eyepæ impa, ante pönente ingä ininque tömengä edæ mönö tönîñadani pönani adinque, Pö guiite cænte möedani, änämaï ingampa töö. Wadani guiquënë, Pö guiite cænte möedani, ancæte ante nê cæinënani inänite tömengä adobai, Cædämaï iedani, ante wææ angä ingampa. Ayæ mänömaï cædani adinque tömengä, Mönitö Codito ingante möni godongämæ pönencabo iñömönite mînitö gobæwedani, angampa cæbii.

¹¹ Botö nê waadebi êñëmi. Quinö wënæ wënæ i adinque bitö adodö cædämaï ië. Wæætë quinö waa i adinque adodö cæe. Quinö waa impa, ante nê cædani iñömö Wængonguî wënani inänipa. Quinö wënæ wënæ impa, ante nê cædani guiquënë Wængonguî ingante adämaï inänipa.

¹² Deëmetedio ingantedö ante tömänani waa apænedänipa. Wængonguî nöingä nänö quëwënö bai Deëmetedio adobai nöinö cæte quëwënonngä ingampa, ante acæimpa. Mönitö adobai tömengä ingante ante waa apænemöni imönipa. Ayæ tömengä ingantedö mönö äninö nö impa, ante do êñëmipa.

Wäö iinque nänö yewæmongainö

¹³ Mînitö imînite godömenque nanguî äinente wæbo incæ yewæmöingö inte wentamömæ yewæmöimæ inte wîi yewæmöinëmopa. ¹⁴ Wæætë bitö weca wantæ iñö pöninque botö äinëmö imopa. Pömo ate botö bitö tönö awincadö awinca adinque apænecæmönaimpa.

¹⁵ Bitö piyänë cæte quëwencæbiimpa, ämopa. Mönö æmigoidi iñömö quëwënäni bitö imite, Waa quëwencæbiimpa, ante apænedänimpa. Mönö æmigoidi bitö weca quëwënäni tömänäni inänite wæætë bitö adocanque ingante adocanque ingante apænedinque, Waa quëwencæbiimpa, ante botö beyæ apænebi ëñencädänimpa, ämopa. Mäninque ante yewæmömopa.

Codaa cadota ante nänö yewæmongainta

Waa quëwencæminimpa, ante Codaa yewæmongampa

¹ Botö Itota Codito ingante nê cædömo inte Tantiago tönñabo Codaabo inömo imopa. Mæmpo Wængonguï mînitö imînite waadete pönëninque aa pecä pömîni ininque mînitö Itota Codito nempo nê ongömîni iñöminite botö, Acæminimpa, ante yewæmömopa.

² Wængonguï waadete pönö piyænê cæcä ininque mînitö tömengä nänö gänê entawënö ædæmö entawëninque nanguï waadete pönente waa cæte quëwencæminimpa, ante yewæmömopa.

Babæ ante nê odömönte apænedäni

(2 Pegodo 2.1-7)

³ Botö nê waadedömîni ëñeedäni. Botö, Codito ængä beyænque mönö quëwëmämo æbänö i, ante quingæ yewæmoncæte ante cæyömöte wadäni wënæ wënæ cædäni ate wædinque botö, Mînitö wææ cæedäni, ante yewæmonguënëmo batabopa. Wængonguï quimö iñömonte tömengä iñömö, Wede mîni pönënö ante pönömo æninque mînitö cöwê wææ aedäni, ante æmæwo pöni pædæ pönongä ænte entawëmopma. Ininque botö wæætê, Wede mîni pönënö ante wææ cæcæminimpa, ante yewæmonguënëmo intabopa. ⁴ Wængonguï, Botö imöte nê Baa änäni nâni pante wæquinque wentamö mongæänäni, ante tömënäni inänite apænte æninque pïingampa, ante do yewæmongatimpa. Tömënäni iñömö mînitö weca do awëmö pönänipa cæmîni. Wængonguï pönö waadete nänö cægäinö ante tömënäni wapiticæ cædinque, Mînitö baonque townenque mîni cæinënö ante önonque cæcæminimpa, ante cædinque Wængonguï waadete pönö cæcampa, ante babæ ante odömönte apænedänipa. Ayæ Itota Codito adocanque mönö Tæiyæ Awënê iñongante tömënäni iñömö tömengä ingante Baa änäni.

⁵ Mînitö wæætê tömänö ante ëñënimîni iñöminite botö, Do mîni ëñëninö ante wæætê wæætê adodö ante pönencæminimpa, ante cædinque adodö ante yewæmoncæ cæbo aedäni. Dodäni Equitobæ quëwëñönänite mönö Awënê ænte mäcä godäni ate tömengä nê wede pönënamäi inäni inänite edæ, Ömäe, ante capo wænongä wængadänimpa. ⁶ Ayæ anquedoidi nê awënëidi inönäni incæ pancadäniya tömënäni nâni aagäinö incæ ñimpo cædinque tömënäni nâni quëwengaiñömö ëmö cædinque wadæ gogadänimpa. Adinque Wængonguï, Botö apænte angüönæ iinque bayonte tömënäni inänite botö pancæboimpa, ante ñöwo iñömö gæguincamenca wodämaï inguïmenca tæi goti wininque tömënäni inänite wëmö iñömö mangui tee mönete wææ cæcampa.

⁷ Ayæ Todömä iñömö quëwengainäni tönö Gömoda iñömö quëwengainäni eyequei godongämæ nâni quëwengaincabo nâni quëwengaincabo tönö adobaï wënæ wënæ cædinque nänöogængä inämaï iñongante godö möninque ayæ godömenque quingämê bai wiwa tote quëwengadänimpa. Mänömaï cæte quëwënäni ate Wængonguï angä gonga wææ ti wocæno gonte æmæwo wængadänimpa. Mänömaï godö pangä nâni wængai bai ante odömöninque Wængonguï, Nê wënæ wënæ cædäni adobaï gonga cöwê yædæ yædæ bæcöyömö caate wæquinänidö angüënë, ante mönö imönte odömoncæte ante cægacäimpa.

⁸ Ayæ wiimönte bai mä pönente nê odömönte apænedäni iñömö ñöwo mînitö weca pöninque dodäni nâni cægai bai adobaï pöni cædänipa. Wiwa cædinque tömënäni wentamö mongænte bai edæ baö ñömængui ëñadänipa. Awënëidi inänite edæ Baa änäni. Ayæ anquedoidi öönæde ñäö iñömö quëwënäni inänite edæ babæ æninque wënæ wënæ ante tedewënäni. ⁹ Incæte anquedo awënê Miiguedo incæ tömënäni püinte nâni tedewënö bai adobaï tededämaï ingacäimpa. Möitee wodi baö ini adinque anquedo Miiguedo tönö wënæ awënê iñömö edæ, Æbänö cæquiï, ante guëadö guëa angadäimpa. Äñönote Miiguedo iñömö, Botö nê apænte angüënëmo imopa diyæ

anguimoo, ante pönëninque guiñente wædinque wënæ awënë ingante, Wënæ wënæ cæbipa töö, ante piinte änämaï ingacäimpa. Wæætë, “Wængongui incæ bitö imite Baa angä ëñencæbiimpa,” angacäimpa. ¹⁰ Nöwodäni iñömö tömënanï adämaï inte näni ëñënamäi inönö ante edæ piinque do wiwa tedewënanipa. Wæætë babæidi näni ëñënonque ante ëñëninque tömënanï mäninonque ante näni cædö beyæ wænte näni ñömænguinque godömenque quingämë bai cædänipa.

¹¹ Tömënanï edæ näni Ca ca wæquinque baquinö angüenë. Cainö wodi nänö gogainö incæ edæ do godänipa. Ayæ Badäo wodi, Nanguï æncæboimpa, ante cædinque tömengä nänö oda cægainö incæ tömënanï iñömö adodö ante pogodo godinque, Godömenque nanguï æncæboimpa, ante oda cædänipa. Ayæ Codee wodi, Awënëidi inänite wido cæcäimpa, ante nänö cægainö bai cædinque ñöwodäni näni wænguinque adobai cædänipa.

¹² Minitö waadete pönëninque godongämæ ponte cæñömïni iinänï iñömö guiñënamäi inte adoyömö ponte cænänipa. Minitö tönö godongämæ ongönänï beyænque mini cabo wentamö baate bai ëmömïni awädö. Tömënanï, Në aawëmöni imönipa, ante babæ apænedinque në cænänänï bai inänï inänite pædæ godönämaï inänï inte tömënanique ade cænte bai cædinque wii nöinö ante odömonte apænedänipa töö. Ayæ woadäni, Cöönæ cæ tobaimpa, ante wæyönänite boguïmancoo cöönæye ëmönonte woboyæ pö wido cæ bai cædinque tömënanï näni, Pönömöni æncæminimpa, äninö ante pönönämaï inte edæ babæ cædänipa. Ayæ awæ incayedë ömæcawæ i adinque do bæ wite mempoga wæniwæ bai inänï inte tömënanï mempoga wænte bai inänï inte, Pönömöni cæncæminimpa, ante në babæ änewënanï inänipa. ¹³ Ayæ gäwapæno tadömengadæ ompota öñöñö mængonta mængonta cædinque ompota yabæ tayönöi edonque öñö ai bai tömënanï wiwa cæyönänï wentamö näni entawënö adobai edonque pönï ongö acäimpa. Ayæ nëmö adodonque goquënë incæ oo tobæ wæænte wëmö ba bai tömënanï adobai oda cæte wapiticæ godäni inte edæ tömënanï näni cöwë tadämaï wæwenguinque mä mämönte bai iñömö edæ godäni inänipa.

¹⁴ Ayæ Adäo wodi nänö mömoidi wææ nänö mömoidi wææ nänö mömocä ingaingä inte Ënoco iñömö tömengä Wængongui beyæ apænedinque dodäni babæ ante në odömonte apænedänï inänitedö ante iimainö ante apænegacäimpa. “Mönö Awënë pongä apa quëwënanii. Ayæ tömengä quinäni tæiyæ waëmö inänï adobai müido ganca mänimpodäni pönönänite adopo adopo edæ pö pö cædinque önompo tipæmpoga mänimpoga pönäni inte bacoo inänï mönö Awënë tönö godongämæ poncædänimpa. ¹⁵ Tömengä mänömaï pöninque edæ tömämö imonte apænte ancæcäimpa. Wængongui ingante në Baa änänï inänite tömengä, Minitö mini wæwente baquinque botö imote Baa äninque edæ ëñënamäi cæminipa töö, ancæcäimpa. Ayæ, Mini në Baa änoncabo inömïni inte minitö mini wæwente baquinque edæ botö imote piinte äninque wiwa äminipa. Ämo ëñëmaïminipa, ante edonque apænecæte ante mönö Awënë poncæcäimpa.” Mänömainö ante Ënoco wodi wëenëñedë pönï angacäimpa. ¹⁶ Nöwodäni æbämë cædäni incæ në babæ ante odömonte apænedänï iñömö, Quimæ quëwë, ante piinque piyænë cædämaï inänipa. Taadö ante tömënanï nämä näni cæinëwënonque ante tee empote godänipa. Botö godömenque waa pönï cæbo aedäni, ante nämä ængö cædinque tedewënanipa. Ayæ, Wadäni mönitö wädö ante pönö cæcædänimpa, ante babæ cædinque tömënanï wadäni inänite waa ate bai tædedinque waa pönï cæte bai godö apænedänipa cæminii.

Në pönëminï iñömö iimäi cæcæminimpa, ante

¹⁷ Minitö guiquënë botö në waademini ëñëedäni. Mönö Awënë Itota Codito nänö në da godongainänï incæ, Æbänö baquii, ante näni apænegainö ante iimainö ante pönëedäni.

¹⁸ Tömënanï iñömö minitö iminute apænedinque, “Wodo iimæca iinque bayonte edæ wadäni nämä näni toinëwente godönö ante goquinänï incæ Wængongui ingante Baa

ante badete toquinäni inönäni inte edæ do poncædänimpa,” ante apænedäni ëñëmini-tapa. ¹⁹ İinäni nê badete todäni inönö Wængongui Önöwoca ingante ewocadämaï inäni inte edæ nämä näni cæinënö ante ëñente cædänipa. Minitö adocabomini inönimite tömënäni, Nänëneto nänënë gocæminimpa, ante cædinque pä cæte bai cædäni inänipa.

²⁰ Botö nê waadedömini edæ iïmaï cæedäni. Minitö mönö Tæiyæ Waëmö pönï inongä ingante wede pönëmini inte mäninö mini wede pönënö incæ dica tæi gö cæte ongonca bai impa. Ante adinque minitö oncö dicaboga mænonte bai edæ tæi piñænique godömenque cæedäni. Ayæ Wængongui Tæiyæ Waëmö Önöwoca ingante ewocad-
inque minitö, Tömengä æbänö angää, ante ëñëninque mäninonque ante Wængongui ingante apæneedäni. ²¹ Minitö, Mönö Awënë Itota Codito pönö waadete waa cæcä beyænque mönö wænämaï inte cöwë wantæpiyæ quëwengæimpa, ante æncæte ante wänö cöminitawo. İinque Wængongui nê waadete pönengä nempo cöwë waadete pönëninque ongödäni.

²² Pancadäniya guiquënë, Wabänö quëwenguimoo, ante guïñente wæyönänite minitö tömënäni inänite piinte adämaï inte godö waadete waa cæedäni. ²³ Pancadäniya guiquënë gonga bæcoyömö oo goquinäni iïmaï impa, ante adinque minitö wæætë, Quëwencædänimpa, ante odömonte apænedinque tömënäni inänite ö æmini beyænque quëwencædänimpa. Wadäni guiquënë wiwa cædäni inte nämä baö wentamö mongænte bai ëñayönänite minitö, Näate wæcæ wæ, ante guïñente wædinque tömënäni weocoo näni naadincoo incæ gampodämaï inte tömënäni beyæ wæætë waadete godö waa cæedäni.

Wængongui waëmö pönï ëmönongä ingampa, ante

²⁴ Minitö tæ go wæænte bai oda cædämaï incæminimpa, ante Wængonguinque eyepæ pönï inongä inte töö æmængä ate minitö adiyæ ongonte bai wede pönencæmin-
impa. Ayæ tömengä adocanque eyepæ pönï cædongä inte pönö badongä ate minitö waimini bamini ininque minitö nanguï pönï mini watapæ toquinque tömengä nänö ñäö ëmöñömö ænte mäicä æicæminimpa. ²⁵ Wængongui adocanque pönï inongä inte mönö imonte, Quëwencæminimpa, ante nê Ængaingä ingampa. İinque Itota Codito mönö Awënë nänö cægainö beyænque eyepæ bate quëwëmö inönö mönö iïmainö ante apænecæimpa. Wængongui ëñëmi. Bitö badongaincoo dæ añonte wëënë imämoque inönte ñöwopämo inönte wapämo miimämo inque bayonte bitö adobique cöwë ñäö entawente tæi ëmöninque Awënë nê tæi piñæmi inömi inte tömäo inönö quëwënäni inänite nê Änömi imidö anguënë, ante mönö apænecæimpa. Mänömaï baquinö anguënë, ante botö, Amëë, ämopa.

Wäö ingante Itota Codito Nänö Odömongainö

Wäö wiimonte bai nänö adi, ante yewæmongainö

¹ Wëenënedë quïnö wë wodonte bai ingatimpa, ante Itota Codito nänö odömongainö ante yewæmonte impa. Wængongui iñömö, Wantæ iñonte quïnö bai baquii, ante, Itota tömengä ingante në cædäni inänite odömoncæcäimpa, ante cædinque Itota Codito ingante edonque odömongä agacäimpa. Ayæ Itota Codito wæætë tömengä anquedo ingante, Bitö Wäö botö në cæcä weca godinque odömömi acæcäimpa, ante da pönongä ponte odömongä atabopa. ² Botö Wäömo guiquënë, Quïnö botö adinö tömänö incæ nö impa, ante yewæmömopa. Mäninö Wængongui nänö angainö ante Itota Codito incæ botö imote edonque odömongä adimo inte botö adobai wiimonte bai tömänö botö adinö ante, Nö impa, ante yewæmömopa.

³ Wængongui beyæ botö apænedö ante ii yewæmöintaa yewæmömopa. Mänintaa adinque në apænedäni nani toquinque. Ayæ mäninta botö yewæmöninö ante ëñente cædäni nani toquinque. Edæ iimaï baquionæ wantæ iñö oo baquïnö anguënë.

Godongämæ nani pönencabo tiæte ganca inäni beyæ Wäö yewæmongampa

⁴ Botö Wäömo inömo imopa. Atiabæ iñömö wayömö wayömö incæ Codito ingante godongämæ mini pönencabo onompo æmæmpoque go mencabominiya acæminimpa, ante botö yewæmömopa.

Mönö Mæmpo Wængongui wëenënedë në quëwengaingä inte ñowo quëwengä incæ ayæ wantæpiyæ quëwencæcäimpa. Tömengä Önöwoca incæ onompo æmæmpoque go mëwoga önöwocaidi bai ewocadongä inte Wængongui nänö aacæ tæ contayömö tæcætawë inö në ongongampa. Ininque Mæmpocä tönö tömengä Önöwoca waadete pönö cæda ate minitö gänë entawencæminimpa.

⁵ Ayæ adobai Itota Codito edæ Wængongui ingantedö ante cöwë ædæmö pöni apænedongä inte wængä ate täno ñäni ömæmongaingä ingampa. Tömengä tömämæ awënë odeyedi nani Tæiyæ Awënë Odeye inongä ingampa. Tömengä adobai mönö imonte në waadete pönëngä inte mönö wënæ wënæ cægäinö adinque tömengä wepæ inte mënongacäimpa. Tömengä adobai waadete pönö cæcä ate minitö gänë entawencæminimpa, ämopa. ⁶ Ayæ Itota, Botö Awënë Odeyebo nempo quëwëninque minitö botö tönö godongämæ aamini bacæminimpa, ante pönö badongacäimpa. Ayæ, Botö Mæmpo Wængongui ingante cæcæminimpa, ante Itota pönö cæcä ate mönö Wængongui quï, ante në godömö bagaimö imopa. Tömengä ñäö bai ëmöñongante mönö waocabo tömenganque ingante waa acæimpa. Tömenganque cöwë në tæi piñænongä inte quingämenque quëwënäni iñönänite tömengä tömänäni Awënë inongä ingampa, ante mönö cöwë angæimpa, ante Amëë, ante ämopa.

⁷ Ëñeedäni, tömengä edæ boguimancodë wææñongante, tömänäni tömengä ingante acædänimpa.

Tömengä ingä në timpogainäni incæ adobai tömengä ingante acædänimpa.

Ayæ tömämæ quëwënäni tömänäni tömengä ingante adinque Ca ca wæcædänimpa.

Mänömaï baquïnö anguënë, ante

botö, Amëë, ämopa.

⁸ Wængongui Awënë adocanque Tömää në Cægaingä inte iimaï angampa. “Botö Tänäbo ingaimo inte Tömämo inguimo imopa.” Mänömainö ante në angä iñömö tömengä wëenënedë do quëwengaingä inte ñowo quëwengä incæ ayæ wantæpiyæ quëwencæcäimpa.

Itota Codito në ñäö bai ëmongaingä ingante Wäö nänö adö

⁹ Botö Wäömo inömo imopa. Minitö töninabo inte botö minitö tönö Awënë Odeye Itota nempo quëwëninque mönö tömengä tönö godongämä aamö inömo imopa. Botö minitö tönö godongämä wawëmö imö incæte mönö wëntæye inämaï inte ee cæmompä. Wængongui nänö angainö ante apænedinque ayæ, Itota mönö Codito inongä ingampa, ante, Nö impa, ante botö apænedö beyænque botö wää tēiwænē Patōmoto iñömö tee mönete bai quëwentabopa.

¹⁰ Wængongui Awënë itæde iñonte Wængongui Tæiyæ Waëmö Önöwoca incæ botö imote bæi ongonde bai cæyongä botö önöñabæ inö adocanque tedepämo todompeta nani ancadeca we öonte bai yedæ tē ēñentabopa. ¹¹ Imaï angantapa. “Bitö quinö wiimonte bai abii, ante yewæmöintaa yewæmöe. Yewæmöninque wayömö wayömö incæ Codito ingante godongämä nani pönencabo önompo æmæmpoque go mencabodäniya iñönänite tömënäni inänite da godöe,” ante angantapa. “Epeto quëwëñömö quëwënäni Ætämido quëwëñömö quëwënäni Pedegämo quëwëñömö quëwënäni Tiatida quëwëñömö quëwënäni Tadoditi quëwëñömö quëwënäni Pidadedepia quëwëñömö quëwënäni ayæ Daoditea quëwëñömö quëwënäni Codito ingante godongämä nani pönencabo nani cabo nani cabo iñönänite bitö tömënäni inänite ii bitö yewæmöninta da godömi æncædänimpa.”

¹² Äñongante botö, Æcänö äna ēñëmoo, ante dadi emænte atabopa. Dadi emæñömote yædo concædi ti wodönoincade oodo inte badöincade önompo æmæmpoque go mä ganca ongoncade atabopa. ¹³ Ayæ yædo concædi ti wodönoincade ongöñömö adoyömö tæcæguedē adocanque nē Waocä ēñagaingä bai inte ongongä atabopa. Tömengä doyen-coo önöwa ganca incoo mongæninque ayæ tæcæenëmæ inö pacadeyænta oodo inte badöi ēenëmängä ingantapa. ¹⁴ Tömengä ocabo tönö ocagui iñömö dayö näämænta pönii emö bai adobai encadinque yoguimö ñäö pönii emö bai adobai ñäö bai encacä ingantapa. Ayæ tömengä awinca incæ gonga wo bæcote bai emongä ingantapa. ¹⁵ Tömengä önöwa incæ yaëmenta bodonte nani änö gongapamö guii ocoi äñonte ñäö emö bai tömengä adobai ewacä ingantapa. Tömengä tedeyongä æpæ mä conta goyonte æpæ tē bai adobai tē ēñentabopa. ¹⁶ Tömengä önönempo tömempo incæ nëmöidi æmæmpoque go mä ganca næængantapa. Ayæ tömengä önöne inö yaëmē tipængaa waingamē engamē ēnedinque yædæ tadete ongongantapa. Ayæ tömengä awinca incæ nænque nanguü tamonte bai ñäö bai emongantapa.

¹⁷ Tömengä ingä adinque botö tömengä önöwa inö wænte bai tæ gowææntabopa. Tæ gowææñömo tömengä önompo tömempo inte botö imote gampodinque “Bitö guññänmaï incæbiimpa,” ante äninque edæ, “Tömää badönämaï iñedē botö Do Quëwengäimo imopa. Ayæ tömää iinque bayedē incæ botö Ayæ Pönii nē Quëwëmo incæboimpa,” ante angantapa. ¹⁸ Edæ “Botö nē Quëwengäimo inömo inte nē wænimo incæ ñäni ömæmonte cöwē wantæpiyæ quëwëmo inömo imopa. Waodäni nē wænte godinäni nani wænte ongöñömö ongöñönänite botö, Cöwē wænämaï quëwencæminimpa, ante botö tæi piñæmämo inte nē æmo imopa.

¹⁹ “Mänömaï beyæ bitö wiimonte bai bitö adinö ante quinö ñöwo i, ante quinö iincayæ ate baquii, ante yewæmöe ämopa. ²⁰ Mänii nëmöidi önompo æmæmpoque go mä ganca botö önönempo tömempo incæ mä öñoncoo bitö adincoo ante, Æbänö i, ante bitö ēñänämaï inönö ante botö edonque pönii apænebo ēñencæbiimpa. Botö imote godongämä nani pönencabo önompo æmæmpoque go mencabodäniya iñönänite tömënäni inänite nē aadäni bai nëmöidi inänipa. Ayæ yædo concædi ti wodönoincade oodo inte badöincade önompo æmæmpoque go mä ganca ongoncadecoo bitö adincoo ante, Quinö bai inänii, ante botö adobai bitö imite edonque pönii apænebo ate nē ēñëmi bacæbiimpa. Wayömö wayömö incæ botö imote godongämä nani pönencabo önompo æmæmpoque go mencabodäniya iñömö tömënäni yædo concædi ti wodönoincade bai adobai inänipa,” ante Waocä nē ēñagaingä iñömö botö imote apænegacäimpa.

2

Godongämæ nani pönencabo tiæte ganca inäni inänite Itota nänö änö

Epeto iñömö quëwënanäni inänite Itota nänö änö

¹ Ayæ adocä godömenque apænenecantapa.

“Epeto iñömö Wængonguï ingante godongämæ nani pönencabo inänite në aacä acæcäimpa, ante botö änö ante iïmaï yewæmøe ämopa. ‘Botö edæ nëmøidi önompo æmæmpoque go mëa ganca botö önönempo tömempo në nëæmo imo inte botö adobaï yædo concædi tï wodönoincade oodo inte badöincade önompo æmæmpoque go mencadea incade ongöñömö adoyömö tæcæguedë në cægömo imopa.

² “ ‘Minitö æbänö cæminii, ante do ëñëmopa. Edæ nanguï pöni cædinque mïnitö wæntæye inämaï inte ee cæminipa. Minitö wiwa cædäni inänite Baa ante quëwëminipa, ante do ëñëmopa. Ayæ Wængonguï nänö në da godongaïmöni imönipa, ante në änäni incæte inämaï iñönänite mïnitö, Näwangä inänii, ante ëñencæte ante apænte adinque, Tömënanäni babæ änänipa, ante ëñente wæmïnitapa. ³ Minitö wæntæye inämaï inte ee cæmini iminipa. Ayæ botö ëmöwo apænete beyænque wæwëmini incæte godömenque godömenque cædinque mïnitö mimönë nangæ badämaï iminipa, ante do ëñëmopa.

⁴ “ ‘Incæte adoque pöni mïni cædinö wiï waa abopa. Minitö edæ wiï wëenëñedë bai ædæmö waadete pönëmini iminipa, ante awædö. ⁵ Edæ mïnitö waa cædimïni imïni incæte ñöwo wæætë wënæ wënæ cæmini bamïni awædö. Mäninö ante pönëedäni. Mänii mïni wënæ wënæ cædinö ante, Ancaa wæwente awædö, ante pönente ñimpo cædinque mïnitö wëenëñedë mïni waa cægai bai adobaï cæte quëwëedäni ämopa. Ämo ëñëninque mïnitö mïni wënæ wënæ cædinö ante wædämaï imini adinque botö mïnitö weca pömaïmopa. Pöninque mïni yædo concædi tï wodönoincade nänö ongöñömö ongöñonte botö ö ænguïmodö angüenë. ⁶ Incæte adoque mïni cædinö guiquenë waa abopa. Minitö edæ Nincodaitaidi nani änäni nani cædö ante adinque piïnte iminipa. Botö adobaï tömënanäni nani cædö ante adinque piïnte imopa.

⁷ “ ‘Wayömö wayömö incæ botö imote godongämæ nani pönencabo inänite Wængonguï Önöwoca quinö angää, ante tömengä nänö änö ante në ëamonca imini inte ëñëedäni. Wængonguï waa gönea iñömö mäninö adowænque quëwenguïwæ pædiwæ iwæmpa. Tæi ëmonte në gänä cædäni inänite botö iñömö, Mäniwæ inca cæncæminimpa, ante pædæ godoncæboimpa,’ ante mäninque ämopa,” ante Waocä në ëñagaingä iñömö botö imote apænegacäimpa.

Ætämidöna iñömö quëwënanäni inänite Itota nänö änö

⁸ Ayæ adocä godömenque apænenecantapa.

“Ætämidöna iñömö Wængonguï ingante godongämæ nani pönencabo inänite në aacä acæcäimpa, ante botö änö ante iïmaï yewæmøe ämopa. ‘Tömää badönämaï iñedë botö Do Quëwengaimo imopa. Ayæ tömää iinque bayedë incæ botö Ayæ Pöni në Quëwëmo incæboimpa. Botö në wænimo incæ ñöwo wæætë ñäni ömæmongaimo imopa.

⁹ “ ‘Minitö wæwëmini inte adobaï ömæpomini iminipa, ante botö do ëñëmopa. Incæte mïnitö nö ëamini iminipa. Oodeoidi pancadäniya, Mönitö Wængonguï ingante möni pönencabo imönipa, ante në änäni incæte wiï mänömaï inänipa. Tömënanäni mïnitö iminite ancaa piïnte babæ änewënanäni inänipa, ante botö do ëñëmopa. Mäninänäni iñömö Tatäna ingante nani ëñencabo inte mänömaï cædänipa töö. ¹⁰ Minitö quinö beyæ wæwencæ cæmini imini incæte guïñënanämaï iedäni. Tatäna incæ, Æbänö cæminii, ante acæte ante cæcä beyænque waodäni pancaminiya iminite tee mönecædänimpa. Önompo tipæmpoga ëönæ iñonte wæwenguïmini iminipa. Ininque mïnitö mïni wænguinque wæmini incæ cöwë pönëninque ædæmö cædäni. Mänömaï në cæmini ininque botö, Mïni cöwë quëwenguïnta, ante poganta bai mïnitö iminite pönömo æmaïminipa.

11 “Wayömo wayömo incæ botö imote godongämæ nani pönencabo inänite Wængongui Önowoca quinä angää, ante tömengä nänö änö ante nē ēamonca imini inte ēñeedäni. Wadäni adopoque wäninque nani mempoga wænguimämo bai täi emonte nē gänä cädäni iñömö wæætē mempoga wänämaï incädänimpa,” ante mäinque ämopa,” ante Waocä nē ēñagaingä iñömö botö imote apænecäimpa.

Pedegämo iñömö quëwënnäni inänite Itota nänö änö

12 Ayæ adocä godömenque apænecantapa.

“Pedegämo iñömö Wængongui ingante godongämæ nani pönencabo inänite nē aacä acäcäimpa, ante botö änö ante iïmaï yewämöe ämopa. ‘Botö edæ yaëmē tipængaa waingamē engamē näëmo imopa.

13 “Ædönö quëwënnäni, ante botö do ēñëmopa. Tatäna contaimpa ongonte nänö aayömo adoyömo minitö quëwënnäni imini incæte botö imo edæ ñimpo cädämaï quëwënnäni iminipa. Mäni quëwënnäni Tatäna adoyömo quëwengä ininque, Antipato edæ botö änö ante cöwē pönëninque ædämö apænedongä iñongante mäniñömö quëwënnäni tömengä ingante wänönäni wængantapa. Tömengä wæñedē incæ minitö botö imote edæ, Dicæ pönëmogaa, änämaï iminipa.

14 “Incæte pancaä mäni cädinö wii waa abopa. Edæ pancaminiya docä Badäo nänö odömonte apænecäinö ante ēñëwënnäni awädö. Tömengä iñömö, Badaco godö cæcä beyænque idægoidi tee tēwate bai oda cæcädänimpa, ante cædinque adocä Badaco ingante odömonte apænecä ēñente cægacäimpa. Wadäni, Mönitö wængongui cængui impa, ante nani cönöni ante, Minitö cædäni, ante Badaco iñömö idægoidi inänite odömonte apænecäcäimpa. Ayæ onquiyännäni tönö godö towente cædäni, ante odömonte apænecäcäimpa. 15 Ayæ pancaminiya adobai Nincodaitaidi nani odömonte apænedö ante ēñëwënnäni awädö. 16 Mänömaï beyæ mäni wënæ wënæ cädinö ante, Ancaä wæwente awädö, ante pönente ñimpo cædäni. Minitö mäni wënæ wënæ cädinö ante wädämaï imini adinque botö wantæ iñonte minitö weca pömaimopa. Pöninque tömënnäni nani odömonte apænedö ante nē ēñëwënnäni iñönänite botö önöne incæ yaëmē ënedinque yædæ tadedinque guëadö guëa cæcæboimpa.

17 “Wayömo wayömo incæ botö imote godongämæ nani pönencabo inänite Wængongui Önowoca quinä angää, ante tömengä nänö änö ante nē ēamonca imini inte ēñeedäni. Täi emonte nē gänä cädäni inänite cængui mänaä nani angäinö botö wē wodöni cængui iñonte godömo ænte cæncädänimpa. Adodäni inänite adobai dica näämëntaca godömo æncädänimpa. Wa emöwo ante pemöninque mänincaä yewämöte ingäimpa. Nē ænänique mäniwo ēñënnäni inänipa,” ante mäinque ämopa,” ante Waocä nē ēñagaingä iñömö botö imote apænecäcäimpa.

Tiatida iñömö quëwënnäni inänite Itota nänö änö

18 Ayæ adocä godömenque apænecantapa.

“Tiatida iñömö Wængongui ingante godongämæ nani pönencabo inänite nē aacä acäcäimpa, ante botö änö ante iïmaï yewämöe ämopa. ‘Botö edæ Wængongui Wëmo inömo imopa. Botö awinca incæ gonga wo bæcote bai nē emömo imopa. Botö önöwa incæ yaëmenta bodonte nani änö bai ñäö bai nē ewabo imopa.

19 “Minitö æbänö cæminii, ante mäni waadete pönënnö ante mäni wede pönënnö ante wadäni inänite mäni waa cädö ante botö do ēñëmopa. Minitö wæntæye inämaï inte ee cædinque godongämæ cæminii iminipa, ante ayæ, Wënnëñedē do waa cædimini inte ñöwo godömenque waa cæminii iminipa, ante adobai do ēñëmopa. 20 Incæte adoque pönii mäni cädinö wii waa abopa. Onquiyängä Etäbete nē emongä iñömö edæ, Wængongui beyæ nē apænebo, ante nämä incæ nē angä ingante wido cädämaï imini inte wæætē tömengä ingante ayæ godömenque Ao äminipa töö. Iñämpa tömengä iñömö botö imote nē cädäni inänite nänö odömonte apænedö beyænque oda cæte gocädänimpa, ante cæcä beyæ tömënnäni onquiyännäni tönö godö towente cädänipa.

Wadäni, Mönitö wængongui cængui impa, ante nani cönöni cänänipa töö. Mänömai cæcädänimpa, ante mäningä onquiyängä odömonte apænecäimpa.

²¹ “Tömengä nänö towente cædimämo ante, Botö wänæ wänæ cæbo inte ancaa wæwente awädö, ante pönente wabänö ñimpo cæquingää, ante botö tömengä ingante ee pänämai intabopa. Incæte tömengä nänö wänæ wänæ cädö ante wädämai quëwengä ingampa. ²² Ìninqe botö, Tömengä ingante cæbo beyænque wänæ wänæ bate wæwencæcäimpa, ante cæcæboimpa. Ayæ tömengä nänö odömonte apænedinö bai në ëñente cædäni ññömö tömengä tönö nani guëa godö möwëniinö ante, Mönitö wänæ wänæ cæmöni inte ancaa wæwente awädö, ante pönente ñimpo cædämai ñnani ininqe tömënäni ñänite adobai botö cæbo beyænque nangui wänæ wänæ bate wæwëmainänipa. ²³ Tömengä wänäni ñänite wænömo wæncædänimpa. Ìninqe wayömö wayömö incæ botö imote godongämæ nani pönencabo tömancabodäniya ññömö, Botö incæ tömënäni nani mïmöno tönö ocaidë, Æbänö pönënanii, ante në ëñëmo inömo imopa, ante ëñencædänimpa. Ayæ mïnitö cædi bai ante adinqe botö wæætë adobai mïnitö tömämïni iminite cæcæboimpa.

²⁴ “Wamïni pancamïniya guiquënë Tiatida ññömö quëwëmïni inte mäningä onquiyängä nänö odömonte apænedö ante mïnitö në pönënamai imïnipa. Ayæ Tatäna wë wodonte nänö angainö ante ëñënamai imïnitapa. Ìninqe botö mïnitö imïnite iïmai ämopa. Mïnitö teëmë mongæncoo mongænte gote bai wädämai incæmïnimpa, ante wadö ante änämai incæboimpa. ²⁵ Wæætë botö ocæ ëmænte wæænganca mïnitö edæ do mïni pönëno ante ñimpo cædämai iedäni. Mäninqe ämopa.

²⁶ “Inguipoga ñninqe baganca ædänidö botö änö në cædönäni inte täi ëmonte në gänä cædäni ñänite botö pönö cæbo ate tömënäni nämä täi pïñänäni badinqe tömämæ quëwënäni ñänite në änäni bacædänimpa. ²⁷ Botö Mæmpo botö imote pönö cæcä beyænque Awënë badinqe nämä täi pïñænte inte në ämo bai botö adobai tömënäni ñänite pönö cæbo beyænque awënëidi badinqe aacædänimpa. Tæiyæ awënë tömengä nempo quëwënäni ñänite aacä bai tömengä ññömö tömämæ quëwënäni ñänite, Ìmai cædäni, ante aacæcäimpa. Dai inte bæte cængämö täi ænacä nancate bai cædinque tömengä adobai wabæca wabæca quëwënäni ñänite nangui pante cæcæcäimpa. ²⁸ Mäninäni ñänite botö adobai wadaamö ñäö bayonte apäimö incæ godömo æncædänimpa.

²⁹ “Wayömö wayömö incæ botö imote godongämæ nani pönencabo ñänite Wængongui Önöwoca quïnö angää, ante tömengä nänö änö ante në ëamonca imïni inte ëñëedäni, ante mäninqe ämopa,” ante Waocä në ëñagaingä ññömö botö imote apænecäimpa.

3

Tadoditiidi ñänite Itota nänö änö

¹ Ayæ adocä godömenque apænecantapa.

“Tadoditi ññömö Wængongui ingante godongämæ nani pönencabo ñänite në aacä acæcäimpa, ante botö änö ante iïmai yewæmöe ämopa. ‘Wængongui Önöwoca incæ önompö æmæmpoque go mëwoga önöwocaidi ewocadongä ingampa. Botö ññömö tömengä ingante në ewocate quëwengäimo inte nëmöidi önompö æmæmpoque go mëa ganca ñnani në næænte ingäimo imopa.

“Ìninqe, Mïnitö æbänö cæmïni, ante do ëñëmopa. Mïnitö mïmïni quëwëmïnipa, ante wadäni apænedäni incæte mïnitö wïi waa cæte quëwëmïni inte do wængainäni bai imïnipa töö. ² Edæ, Botö Wængongui ayongä mïni cædinö wïi eyepæ cæmïnipa, ante adinqe botö, Ñnani ömæmöedäni, ante ämopa. Ñnani ömæmöninque mïnitö, Ayæ mïinäni quëwënäni incæ në wæncæ cædäni bai badäni incæte tömënäni wænämai inte wæætë täimö bacædänimpa, ante cædäni. ³ Mänömai beyæ, Quiëmë do ænimïni bai imïni, quiëmë ante do ëñëmïni, ante mäninö ante wæætë adodö ante pönëedäni. Pönëninque mïnitö mäninö ante ëñente cædäni. Ayæ mïni wänæ wänæ cædinö

ante, Ancaa wæwente awædö, ante pönente ñimpo cæedäni. Wæætë mīnitö wī ñāni ömæmonte bai imīni ate wædinque botö incæ mīnitö weca awëmö nē ængä bai pömaimopa. Ayæ, Awëmö nē ængä æyedënö ponguingää, ante ëñenāmaï ināni bai botö adobai mīnitö ëñenāmaï iñömīni mīnitö weca awëmö ponguimo apa quëwëminii.

⁴ “Incæte Tadoditi iñömö mīni quëwencabo iñömīnite pancadāniya tömënāni weocoo wentamö nāmönāmaï bai inināni inte nē waa cæte quëwënānipa. Mānīnāni waa cæte quëwënāni beyæ eyepæ inönāni inte weocoo nāāmæntacoo mongænte botö miñæ gocædānimpa. ⁵ Nē tæi ëmonte gänä cædāni iñömö adobai weocoo nāāmæntacoo mongæncædānimpa. Ayæ, Quëwenguinta, ante Wængonguï nänö yewæmongaintaa mānīnāni ëmōwo do yewæmōi ininque botö cōwë wadæ cædāmaï incæboimpa. Wæætë botö Mæmpo Wængonguï weca ayæ tömengä anquedoidi weca botö, Iñāni botö miñæ gogaināni inānipa, ancæboimpa.

⁶ “Wayömö wayömö incæ botö imote godongämæ nāni pönencabo inānite Wængonguï Önöwoca quīnö angää, ante tömengä nänö änö ante nē ëamonca imīni inte ëñeedāni,” ante māninque ämopa,” ante Waocä nē ëñagaingä iñömö botö imote apænecäimpa.

Pidadedepiāidi inānite Itota nänö änö

⁷ Ayæ adocä godömenque apænecantapa.

“Pidadedepia iñömö Wængonguï ingante godongämæ nāni pönencabo inānite nē aacä acæcäimpa, ante botö änö ante iīmaï yewæmōe ämopa. ‘Botö edæ nē Tæiyæ Waëmö ingaïmo imopa. Nö ante cægaïmo inte botö docä Awënë Dabii nänö wi ænequī nē næængaïmo imopa. Ininque quīnö odemö botö wi ænebo incæ mānīnemö wacä ædö cæte tee mönequingää. Ayæ quīnö odemö botö tee mönebo incæ mānīnemö wacä ædö cæte wi ænequingää.

⁸ “Mīnitö æbänö cæmīni, ante do ëñëmopa. Mīnitö cæcæmīnimpa, ante botö odemö wi ænete bai cæbo aedāni. Æcänö mānīnemö wæætë tee mönequingää. Edæ dæ angampa. Mīnitö wī tæi pīñæmīni imīni incæte botö angainö ante ëñente cæmīni inte botö ëmōwo ante, Dicæ ëñëmōniyaa, ante änāmaï inīmīni imīnipa. Botö do ëñëmopa. ⁹ Möni oodeocabo imōni incæ pancadāniya, Mōnitö Wængonguï ingante möni ëñencabo imōnipa, änāni incæte ināmaï inānipa. Wæætë tömënāni iñömö babæ änewënāni inānipa. Tatāna ingante nāni ëñencabo inānipa töö. Botö godö cæbo ate adodāni mīnitö weca ponte mīnitö önōwa gäänë ædæ wææncædānimpa. Ayæ, Botö mīnitö imīnite nē waadete pönengaïmo imopa, ante botö godö odömömo ëñencædānimpa. ¹⁰ Mīnitö imīnite, Ee cædinque wæntæye ināmaï iedāni, ante botö angainö ante ëñente nē cædimīni imīni adinque botö wæætë mīnitö imīnite wææ aacæboimpa. Inguipoga quëwënāni tömānāni nāni wæwenguimāmo ancaa baquīnö angüënë. Edæ Tatāna, Æbänö quëwënāni, ante acæte ante cæcä ate nāni wæwëñedë botö iñömö, Mīnitö wæwënāmaï incæmīnimpa, ante mīnitö imīnite wææ aacæboimpa.

¹¹ “ ‘Botö oo ocæ ëmænte ponguimo imopa. Wængonguï poganta nänö godonguinta, ante mīnitö imīnite godongä æncæmīnimpa. Māninta mīni ænguinta iñömö wacä ænāmaï incæcäimpa, ante mīnitö mīni entawënö ante godömenque godömenque ñimpo cædāmaï iedāni. ¹² Botö cæbo ate waodāni tæi ëmonte nē gänä cædāni iñömö tömëmö Wængonguï tæiyæ waëmö oncönë wantæpiyæ quëwenguīnānidö angüënë. Tömënāni Wængonguï weca cōwë quëwente taodāmaï incædānimpa. Tömënāniya botö Wængonguï ëmōwo yewæmoncæboimpa. Mīi Eedotadë nāni äñömö iñömö botö Wængonguï nänö quëwëñömö iñonte māni tömengä nänö quëwëñömö incæ öönæde inö da pönongä wæængæimpa. Māni Wængonguï nänö quëwëñömö ëmōwo botö adobai tömënāniya yewæmoncæboimpa. Ayæ botö wawo botö ñōwo pemongaïwo adobai tömënāniya yewæmoncæboimpa.

¹³ “Wayömö wayömö incæ botö imote godongämæ nani pönencabo inänite Wængongui Önöwoca quinö angää, ante tömengä nänö änö ante nē ēamonca imini inte ēñēedäni,’ ante mäninque ämopa,” ante Waocä nē ēñagaingä iñömö botö imote apænecäimpa.

Daoditeaidi inänite Itota nänö änö

¹⁴ Ayæ adocä godömenque apænecantapa.

“Daoditea iñömö Wængongui ingante godongämæ nani pönencabo inänite nē aacä acæcäimpa, ante botö änö ante iimaï yewæmöe ämopa. ‘Botö emöwo Amëe, ante pemongaïmo inte botö cöwë, Näwangä impa, ante nē cöwë ædæmö apænegaïmo imopa. Wëenēñedë Wængongui nänö badongäñedë mäniñedë botö tömengä tönö godongämæ badongaïmo beyænque tömengä nänö badongaincoo tömancoo Awënë badinque botö nē ämo imopa.

¹⁵ “Minitö æbänö cæminii, ante do ēñēmopa. Yoguipä bai inämaï imini incæte ocoi ämä bai adobai inämaï iminipa töö. Iñæmpa yoguipä bai iminipa diyæ waa aquimoo. Edæ ocoi ämä bai iminipa diyæ waa aquimoo. ¹⁶ Minitö yoguipä bai inämaï imini incæte ocoi ämä bai inämaï imini inte wæætë wii eyepæ cæmini inte gänë ämä bai iminipa töö. Mänömaï beyæ botö edæ tömëmo önönë towæ tänonte bai minitö iminite adobai wido cæcæ cæbo apa quëwëminii. ¹⁷ Minitö, Mönitö nanguï ämönï imönipa, ante äminipa. Edæ, Tömëmönï mäincoo gæte da wëninque eyepæ ämönipa, ante äminipa. Iñæmpa mäninö ante wapiticæ pönente äminipa. Minitö mini wæwënö incæ ēñënämaï iminipa töö. Minitö æbänö bate cæminii, ante adinque wadäni, Minitö wodi, ancädänimpa. Ömæpodäni bai imini inte minitö babetamönäni bai imini inte ömaadäni bai imini incæte, Mänömaï imönipa, ante ēñëmünyaa.

¹⁸ “Mänömaï beyæ botö, iimaï cædäni, ante waadete ämopa. Botö pönö cæbo beyænque minitö wæætë waa bate bai nanguï cæcæminimpa, ämopa. Mäninö botö pönö cædö iñömö oodo gongapamö aca podonte ate wæmö oodo bate bai impa. Ininque minitö, Mönitö nanguï ämönï bacæmönimpa, ante cædinque botö weca ponte tömëmo oodo ante godonte æedäni. Ayæ, Ömaamönï inämaï incæmönimpa, ante guingo imönämaï incæmönimpa, ante minitö botö weocoo näämæntacoo godonte ænte mongæedäni. Ayæ minitö, Awinca waa acæimpa, ante cædinque tömëmo awinca cönömöimæ godonte æninque cönömöedäni.

¹⁹ “Botö nē waadete pönänäni inänite botö piinte ämo inte adobai pante cæbo imopa cæminii. Minitö nanguï cædinque mini wënæ wënæ cædinö ante, Ancaa wæwente awædö, ante pönente ñimpo cædäni. ²⁰ Eamonca ēñēedäni. Botö incæ odemö yabæ inö ongonte bai waomini mimöno a ongöninque, Wi ænequï, ante aa peyömo waocä æcämenque incæ ēñëninque odemö wi ænete botö imo, Pö guie, angä ininque botö iñömö edæ tömengä mimönë pö guicæboimpa. Tömengä mimö botö oncö bai iñonte botö tömengä tönö cænte bai cöwë quëwencæboimpa. Ayæ tömengä wæætë botö tönö cænte bai cöwë quëwencæcäimpa. ²¹ Botö tæï emonte nē gänä cægaïmo inte botö Mæmpo nänö aacæ tæ contaïmpaa tömengä tönö guëa tæ contagaïmo bai nē tæï emonte nē gänä cædäni iñömö adobai botö tömëmo aacæ tæ contayömo botö tönö godongämæ tæ contacädänimpa, ante ämo adopaa tæ contaquinäni.

²² “Wayömö wayömö incæ botö imote godongämæ nani pönencabo inänite Wængongui Önöwoca quinö angää, ante tömengä nänö änö ante tömënäni nē ēamonca imini inte ēñēedäni,’ ante mäninque ämopa,” ante Waocä nē ēñagaingä iñömö botö imote apænecäimpa.

4

Öönædë iñömö Wængongui ingante watapæ apænedäni

¹ Botö Wäömo inömo inte ayæ ate æmö ayömote öönædë inö odemö wi ænete atabopa. Todompeta nani ancadeca we öonte yedæ tē bai tedepämo täno botö ēñëninö iñömö

ñöwo wæætē adopämo botö imote iimaï äninque, “Iñömö pö æe. Æñömite botö, Ayæ ate quinä baquënë inguii, ante bitö imite edonque odömömo acæbiimpa,” angantapa.

² Mäninö ante añongä Wængongui Önöwoca incæ botö imote bæi ongonte bai cæyongä botö wiimonte bai adinque iimaï atabopa. Öönädē inö Awënë tæ containpa ayömo adocanque mäninömö tæ contacä atabopa. ³ Mäningä adoyömö nē tæ contadongä inömö dica ñäö bai emonca bai adobai emongä ingantapa. Aatape nani äninca bai codönadina nani äninca bai mäninca mencaa ñäö bai inca bai tömengä adobai emongä ingantapa. Awënë tæ containpa inömö daimē dica bai etēmedada nani äninca emonca bai inte æidämæ waime pöni gongæmēnimpa. ⁴ Mänimpa Awënë nänö aacæ tæ containpa waimpacoo bæinticoatodo ganca mänimpopacoo mäninömö godämæ a ongompapa. Adopacoo inömö nē aadani nē Picænani bæinticoatodo ganca mänimpodani tæ contadinque näamæntacoo mongæninque poganta oodo inte badöinta da wencate a ongönänitapa. ⁵ Awënë tæ containpa inö näinte yædæ yædæ ta gote detæbo tæi tæi tē tēñonte yedæ pöni änimpa. Ayæ Awënë tæ contayömö tæcætawē inö ti wodönoincade önompo æmæmpoque go mencadea wocædöincadecoo a ongönimpa. Wængongui Önöwoca incæ önompo æmæmpoque go mēwoga önöwocaidi bai ewocadongä inte mänincadecoo bai ingampa.

⁶ Ayæ Awënë tæ containpaa tæcætawē inö adobai gäwapæntibæ bai inönte awocawænta bai inimpa. Ayæ Awënë tæ containpa inömö miinani quëwënäni mēnaa go mēnaa inäni godämæ a ongönänitapa. Mäninani inömö tæcætawē inö önönabæ inö tömäo awinca emönäni atabopa. ⁷ Tānocä miingä quëwengä botö adingä inömö nēöo bai emongampa. Ayæ wacä miingä quëwengä botö adingä inömö wagada mæmpo bai emongampa. Wacä miingä quëwengä botö adingä inömö tömengä awinca waocä awinca bai emongampa. Ayæ tömangä miingä quëwengä botö adingä inömö guingämöwæ pao pao gocä bai atabopa. ⁸ Mēa go mēa miinani quëwënäni incæ adocanque adocanque önompo æmæmpoque go adoguënepænque emænte quëwënäni inänipa. Ayæ adodani inte tömēnani baonga godämæ tömanga nangui pöni awinca emonte ænömengadænguënepæ incæ awinca adobai emönänipa. Mäninani edæ itædē woyowotæ ñimpo cædämaï inte iimaï ante ämotamini äänipa.

“Bitö Tæiyæ Waëmö Awënë imidö, bitö Tæiyæ Waëmö Awënë imidö, ante ämönipa.

Wængongui Awënë bitö adobique Tömää nē Cæbi inte

wëenēñedē do nē quëwengäimi imi ñöwobi adobi inömi inte ayæ wantæpiyæ cöwë quëwencæbiimpa.”

Ante ämotamini ante cöwë äänipa.

⁹ Awënë tæ containpaa nē tæ contadongä inte nē wantæpiyæ cöwë quëwengäingä ingante apænedinque mēa go mēa miinani quëwënäni inömö iimaï ante apænedänipa. Bitö ñäö emömi imipa, ante apænedinque tömēnani, Bitö imite waa amönipa. Mönitö bitö imi waa ate pönente apænemönipa, ante apænedänipa. ¹⁰ Mänömaï ante apæneyönäni nē aadani nē Picænani inömö bæinticoatodo ganca mänimpodani Awënë tæ containpaa nē tæ contadongä inte nē wantæpiyæ cöwë quëwengäingä weca ædæ wææninqe tömengä ingante, Bitö Wængongui Awënë imidö anguënë, ante watapæ apænedinque tömēnani poganta gä æncadinque Awënë tæ containpa gäänē cö cædinque iimaï ante ämotamini ante äänipa.

¹¹ “Bitö inömö mönitö Wængongui Awënë imidö, ämönipa. Bitö badöinönö, ante pönente ingäimi inte öönädē ongönäni tönö inguipoga ongönäni tönö tömänäni inänite badongäimi imipa.

Bitö wi badömi bai tömänäni badongainäni quëwënämaï dæ ancædönänimpa.

Mänömaï beyæ bitö eyepæ inömi inömite, Bitö ñäö emömidö anguënë, ante mönitö bitö imite waa amönipa.

Bitö nämä tæi pñænte nē cæbi imidö, ante bitö imite ämönipa,”
ante ämotamini ante äänipa.

5

Wængongui Codotedo yewämöinta wi æmpocampa

¹ Ayæ Awënë nänö aacæ tæ contaimpaa nē tæ contacä iñömö tömengä önönempo tömempo incæ yewämöinta dadi ompointa næængä atabopa. Mäninta tipäataa yewämöinta impa. Adotaa yæwedeta iñömö guiñenca bai inte tee bædinta önompō æmæmpoque go mentaa inimpa. ² Ayæ Wængongui anquedo adocanque nē tæi emongaingä inte yedæ aa pecä atabopa. “Mäninta dadi ompointa wi æmpoqui, ante æcänö nö waa pöni inongä inte eyepæ inte tee bædedinta wäa wäa ænete wi æmpoquingä,” angantapa. ³ Ayæ öönädē incæ inguipoga incæ tadömengadænga incæ cöwä ayönäni, Æcänö mäninta wi æmpoquingä, cæncadenta inö æcänö aquingä, ante edæ dæ angantapa. ⁴ Æcänö nö waa pöni inongä inte eyepæ inte dadi ompointaa wi æmpoquingä iñömö edæ dæ angampa. Cæncadenta inö æcänö aquingä ante dæ angampa, ante adinque nangui pöni Ca ca wætabopa. ⁵ Ca ca wæbo adinque nē aadäni nē Picänäni iñönäni adocanque nē Picængä incæ botö imo, “Wädämaï ie. Wæætē cöwä ae, angantapa. Adocanque onguiñængä iñömö mäninta wi æmpoquingä a ongongampa. Awënë Dabii Pæingä incæ tömengä iñömö docä Oodaa pæinäni nāni cabo iñonte nē nēöo bai tæi emönongä inte nē gänä cæcä ingaingä ingampa. Tömengä iñömö edæ eyepæ inte tee bædedinta önompō æmæmpoque go mentaa wi æmpodique dadi ompointa wi æmpocæcäimpa,” angantapa.

⁶ Ayæ Wængongui Codotedo nāni wänönäni nē wæningä bai ingä atabopa. Tömengä Awënë Wængongui nänö aacæ tæ contayömö tæcæguedē ongöñongä miināni quëwänäni mënaa go mënaa ināni tönö nē aadäni nē Picänäni godämæ a ongönäni atabopa. Tömengä iñömö önömoncawæncōo önompō æmæmpoque go mëwäa emoncadinque awinca önompō æmæmpoque go mëmonga emongacäimpa. Edæ Wængongui Önöwoca incæ önompō æmæmpoque go mëwoga önöwocaidi bai nänö ewocadö bai määni awincacōo inānipa. Adodäni önöwocaidi inānite inguipoga da pönongä pöninge tömënäni inguipoga tömämæ gote cæwodäni inānipa. ⁷ Ayæ Wængongui Codotedo iñömö Awënë tæ contayömö pöninge nē tæ contadongä önönempo tömempo inö dadi ompointa nänö næäninta ö ængantapa. ⁸ Tömengä mäninta ö ængä ate mëa go mëa miināni quëwänäni tönö nē aadäni nē Picänäni bæinticoatodo ganca mänimpodäni Wængongui Codotedo weca ponte ædæ wæänänitapa. Ināni tömānāni ampoqui adapa nāni änö næäninque owæta oodo inte nāni badöinta ogui waaqui eyede enga næänänitapa. Wængongui quinäni tömengä ingante nāni apænedö iñömö määni ogui waaqui bai impa. ⁹ Tömënäni mä äninque iimaï ante ämotamini ante änänitapa.

“Bitö imite wänönäni nē wänimi inte bitö nö waa pöni inömi imipa.

Ininque bitö eyepæ inte dadi ompointaa ænte tee bædedinta wäa wäa ænete wi æmpoquimi imipa.

Woadäni nāni cabo woadäni nāni cabo incæ wadö nāni tedecabo wadö nāni tedecabo incæ

wacä awënë nāni cabo wacä awënë nāni cabo incæ wabæca nāni quëwencabo wabæca nāni quëwencabo incæ woadäni inānite bitö,

Wængongui quimiini bacæminimpa, ante cædinque nāmā wepæ godonte ængabiimpa.

¹⁰ Bitö nempo quëwëninque tömënäni bitö tönö godongämæ aadäni bacädänimpa, ante badongabiimpa.

Mönö Wængongui ingante cæcädänimpa, ante bitö pönö cæbi ate tömënäni,

Mönö Awënë Odeye Wængongui qui, ante nē godönäni bagainäni inānipa.

Mäniināni edæ awënëidi badinque inguipoga quëwänäni inānite aacädänimpa.” ante ämotamini änänitapa.

¹¹ Ayæ ayömo Wængongui anquedoidi iñömö bacōo ināni inte ämotamini änäni ëñëninque, Tömënäni æpodö müido ganca ināni, ante botö ædö cæte tee mampote ëñënguimoo. Edæ miināni quëwänäni tönö nē aadäni nē Picänäni tönö Awënë tæ contaimpa gäänē tæcæguedē ongöñönänte Wængongui anquedoidi iñömö yabæque

godämæ gongænte ongönänitapa. ¹² Mäniñömö godämæ ongöninque tömënäni yedæ äninque iimaï ante ämotamïni änanitapa.

“Wængonguï Codotedo ingante wænönäni në wæningä inte tömengä nö waa pöni inongä inte eyepæ ingampa.

Tömengä edæ täi piñængä ingänö anguënë.

Tömengä quincodö incæ tömancoo në äcä inte tömänö ante ëñenongä ingänö anguënë.

Tömengä täi piñænte inte tömää nänö cæinënö cædongä ingampa.

Tömengä ingante, Bitö imite waa amönipa. Bitö ñäö emömidö anguënë, ante bitö imite watapæ apænemönipa,” änanitapa.

¹³ Ayæ Wængonguï nänö badongainäni öönæde quëwënäni incæ inguipoga quëwënäni incæ tadömengadæ quëwënäni incæ gäwapæntibæde quëwënäni incæ tömänäni adoyedë iimaï ante ämotamïni ante änäni ëñentabopa.

“Awënë täe containpaa në täe contadongä ingante ayæ Wængonguï Codotedo ingante tömëna inate iimaï amönipa.

Mïnatö iminate watapæ amönipa. Mïnatö iminate waa amönipa.

Mïnatö ñäö emöminadö anguënë. Mïnatö täi piñæmïna iminadö anguënë.

Wantæpiyæ iñonte mäniñö ante cöwë ancæmönimpa,” ante änanitapa.

¹⁴ Ante äñönäni mäa go mäa miinäni quëwënäni adobäi, “Iimaï baquinö anguënë,” ante, “Amëë,” änanitapa. Ayæ në aadäni në Picænäni iñömö ædæ wææninque watapæ änanitapa.

6

Tee bædinta önompo æmæmpoque go mentaa

¹ Ayæ Wængonguï Codotedo iñömö tee bædinta önompo æmæmpoque go mentaa incæ yewæmöinta dadi ompointa tee bædedinta tänota wi æmpoyongä atabopa. Ayæ mäa go mäa miinäni quëwënäni incæ adocanque iñömö tömengä nänö tedepämo detæbo të bai inte botö imote, “Pöe,” ante yedæ angä ëñentabopa. ² Tæcæ ayömo cabayo näämænta ëñacä do a ongongä atabopa. Cabayo inte në täe contacä iñömö to piyæncaimpa næængantapa. Tömengä iñömö wadäni inänite guëadö guëa cæte täi emongä inte gänä cædongä iñongante Awënë poganta pönönäni æninque tömengä wæætë guëadö guëa cæcæte ante cabayo mongænte gocantapa.

³ Ayæ Wængonguï Codotedo wæætë tee bædedinta wataa wi æmpoyongante mäa go mäa miinäni quëwënäni incæ wacä iñömö botö imote, “Pöe,” angä ëñentabopa. ⁴ Ayæ wacä cabayo opatawæ gonga emö bai ëñacä pongantapa. Waodäni incæ wacä ingä wacä ingä wænnoncædanimpa, ante cædinque Wængonguï godö angä beyænque cabayo inte në täe contacä iñömö, Inguipoga quëwënäni piyænë cædämaï incædanimpa, ante në cæcä bacantapa. Ayæ, tömengä ingante ñænæ yaëmë bai pönönäni ængantapa.

⁵ Ayæ Wængonguï Codotedo wæætë tee bædedinta wataa wi æmpoyongante mäa go mäa miinäni quëwënäni incæ ayængä iñömö botö imote, “Pöe,” angä ëñentabopa. Tæcæ ayömo cabayo wentamö ëñacä do a ongongä atabopa. Cabayo inte në täe contacä iñömö tee manguï önönempo næængä ingantapa. ⁶ Ayæ mäa go mäa miinäni quëwënäni weca tedepämo bai ëñëñömo, “Todigomö tönö tebadamö näni cænguimö, ante nanguï näni godonte æimö impa, ancæte ante iimaï angä ëñentabopa. Tömää itæde cædäni ate näni cæganca beyæ todigomö mäa diboda pöni tee manguï ganca mäninque godonte æncædanimpa. Adobäi tömää itæde cædäni ate näni cæganca beyæ tebadamö önompo æmæmpoque go adoque diboda tee manguï ganca mäninque godonte æncædanimpa. Ayæ oginguipæ ante odibomö näni ämö eyepæ pæcæimpa, ante ee aedäni. Bïñömæ ante yowe eyepæ pæcæimpa, ante ee aedäni.”

⁷ Ayæ Wængonguï Codotedo wæætë tee bædedinta wataa wi æmpoyongante mäa go mäa miinäni quëwënäni incæ tömengä iñömö botö imote, “Pöe,” angä ëñentabopa.

⁸ Tæcæ ayömo cabayo nämënäa ëñacä do a ongongä atabopa. Cabayo inte në täe contacä iñömö tömengä emöwo, Në Wænöinengä, ante pemonte emongantapa. Waodäni

näni wænte ongöñömö awënë tömengä miñä tee empo pongantapa. Wængongui Codotedo pönö cæcä beyænque tömëna inguipoga quëwënäni inänite adinque mënaa go mënaa iñönänite adocanque ingante wænöninque ayæ wadäni mënaa go mënaa iñönänite adocanque ingante wænöninque nanguï inäni inänite në wænöna badatapa. Tömëna pancadäniya inänite yaëmenca në wænöna badatapa. Ayæ tömëna godö cæda beyænque waodäni pancadäniya gue ænente näni wænguimämo pö wæncædänimpa. Ayæ tömëna godö cæda beyænque pancadäniya quingæ wodonte näni wænguimämo pö wæncædänimpa. Ayæ tömëna godö cæda beyænque pancadäniya babæidi wænönäni beyæ wæncædänimpa.

⁹ Ayæ Wængongui Codotedo wæætë tee bædedinta wataa wi æmpoyongante botö, Wængongui quï, ante näni wëmonca iya täimoga ænömengadæ inö waodäni önö-wocaidi owodäni atabopa. Mäninäni Wængongui nänö angainö ante në ëñente cædäni inte, Itota mönö Codito inongä ingampa, ante, Nö ante impa, ante apænedäni beyæ tömënäni inänite wænönäni wængainäni inänitapa. ¹⁰ Adodäni yedæ äninque iimaï änanitapa, “Awënë Wængongui bitö tömänäni inänite në Aabi inömi imipa. Edæ tæiyæ waëmö inömi inte bitö në nö ante apænebi imipa. Ininque inguipoga quëwënäni mönitö imönite në wænöninäni inänite æiquedö apænte anguimii. Ayæ mönitö wepæ möni gowepæ beyæ ante tömënäni inänite æiquedö panguimii ämönipa.” ¹¹ Mäninäni tömänäni inänite tömengä doyæncoo näämæntacoo pönongä ænanitapa. Æñönänite, “Wædænque ayæ ee ongöedäni,” äninque tömengä, “Minitö iminö do wænönäni wämïni bai wadäni mïni töninadäni ayæ mïinäni quëwënäni inte minitö tönö Wængongui ingante në cædönäni inänite wænoncædänimpa. Inäni inänite wænonguëñänäni inänipa, ante Wængongui nänö änö bai tömënäni inänite iinque näni wænonganca ee ongöedäni,” ämopa, ante angantapa.

¹² Ayæ Wængongui Codotedo wæætë tee bædedinta wataa wi æmpoyongä atabopa. Mäninädë tæimö goinque ocæ ocæ gotimpa. Waodäni tömënäni guidengä wængä ate wæwente beyænque wentamoncoo mongænäni bai nænque iñontobæ adobai wentamö pönï ëmö batimpa. Apäicä pæibo iñedë incæ wepæ bai opatawæ ëmö batimpa. ¹³ Ayæ nëmoncoo öönädë inö owocoo iñömö wææ tæ ayæ waa wææ tæ ayæ waa wææ tæ inguipoga iñömö tæ wææninque igowæmö ayæ icadämaï iñonte nanguï woboyæ pæmæñonte woga woga cædinque tæ wæænte bai adobai tæ wæænänitapa. ¹⁴ Ayæ öönæ incæ mincayonta dadi ompote bai dæ ä batimpa. Ayæ tömanquidi tömää wää tæiwænë iñontobæ wayömö gote dæ ä bai inimpa.

¹⁵ Ayæ awënë odeyeidi incæ ñænænäni inte në cædönäni incæ tontadoidi awënëidi incæ në nanguï ëadäni incæ tæï piñænte cædäni incæ tömënäni guiñente badänitapa. Ayæ awënë në godonte æningä beyænque në cæte quëwënäni incæ nämanque cæte quëwënäni incæ tömënäni tömänäni guiñente badänitapa. Guiñente badinque tömënäni änanquidi æite ontatodë iñömö wë womönänitapa. Ayæ onquiyaboga dicabocodë tæcæguedë go guiite wë womönänitapa. ¹⁶ Ayæ waodäni inänite aa pete bai tömënäni, “Onquiyaboidi ëñeedäni, dicaboidi ëñeedäni, Awënë tæ containpaa në tæ contadongä mönitö imönite adämaï incæcäimpa, ante cædinque minitö mönitonga tæ wæænte beocaedäni,” ante aa pedänitapa. Ayæ, “Wængongui Codotedo ænguï badinque mönitö imönite pänämaï incæcäimpa, ante cædinque tæ wæænte beocaedäni,” ante aa pedänitapa. ¹⁷ “Edæ tömëna näna nanguï pönï ænguï baquiönæ do ba ininque æcänö ayæ quëwenguingä. Edæ dæ ä inguinö angüënë,” ante wædänitapa.

7

Wængongui anquedo nänö në yewæmöinäni

¹ Ayæ ate Wængongui anquedoidi mënaa go mënaa ongönäni atabopa. Adocanque yædæcapæ inö ongöñongante wacä yæwainö ongöñongante wacä imatæ betamonca inö ongöñongante tömangä æmatæ betamonca inö a ongongantapa. Ininque, Woboyæ mëa go mëa iñonte mönö a ongönö inö inguipoga go pæmænämaï, ante cædinque

cädänitapa. Tömänäni ömaa iñömö incæ gäwapæntibæ iñömö incæ adobaï tömäo awæncoo pæyömö incæ woboyæ pæmäenāmaï ingæimpa, ante cädänitapa. ² Wacä anquedo nænque tamönö inö pongä atabopa. Tömengä Wængongui nê Quëwengaingä nänö yewæmöingö næænte pongä atabopa. Wængongui anquedoidi mënaa go mënaa inäni iñömö inguipoga incæ gäwapæntibæ incæ wo ëwente cæcädänimpa, ante cædinque Wængongui godö cæcä beyænque täi pïñænäni badänitapa. Mäninäni inänite Wængongui anquedo ñowo pöningä yedæ aa pecantapa. ³ “Ee ongöedäni. Edæ minitö inguipoga incæ gäwapæntibæ incæ awæncoo incæ ee wo ëwënämaï iñöminite mönitö Wængongui ingante nê cädäni nani önönemö inö tömengä nänö yewæmöi ante täno yewæmoncæmönimpa. Yewæmömöni ate minitö mäniñedé ate wo ëwente cædäni.”

⁴ Ayæ yewæmöinäni æpodänidö badänitapa, ante apænecä ëñentabopa. Tömänäni yewæmöinäni inte tiento coadenta i coatodo miido ganca inänitapa. Idægoidi nani cabo tipæmpoga go mencabodäniya iñönänite iïmaï yewæmöinäni badänitapa.

⁵ Wëenëñedé Oodaa wodi pæinäni nani cabo iñönänite nê yewæmöinäni iñömö tipæmpoga go mëa miido ganca inänitapa.

Ayæ Odoobé wodi pæinäni nani cabo iñönänite nê yewæmöinäni wææ tipæmpoga go mëa miido ganca inänitapa.

Ayæ Gado wodi pæinäni nani cabo iñönänite nê yewæmöinäni wææ tipæmpoga go mëa miido ganca inänitapa.

⁶ Ayæ Atedo wodi pæinäni nani cabo iñönänite nê yewæmöinäni wææ tipæmpoga go mëa miido ganca inänitapa.

Ayæ Nempatadii wodi pæinäni nani cabo iñönänite nê yewæmöinäni wææ tipæmpoga go mëa miido ganca inänitapa.

Ayæ Mänatee wodi pæinäni nani cabo iñönänite nê yewæmöinäni wææ tipæmpoga go mëa miido ganca inänitapa.

⁷ Ayæ Timeönö wodi pæinäni nani cabo iñönänite nê yewæmöinäni wææ tipæmpoga go mëa miido ganca inänitapa.

Ayæ Debii wodi pæinäni nani cabo iñönänite nê yewæmöinäni wææ tipæmpoga go mëa miido ganca inänitapa.

Ayæ Itacado wodi pæinäni nani cabo iñönänite nê yewæmöinäni wææ tipæmpoga go mëa miido ganca inänitapa.

⁸ Ayæ Tabodö wodi pæinäni nani cabo iñönänite nê yewæmöinäni wææ tipæmpoga go mëa miido ganca inänitapa.

Ayæ Ootee wodi pæinäni nani cabo iñönänite nê yewæmöinäni wææ tipæmpoga go mëa miido ganca inänitapa.

Ayæ adobaï Beencaminö wodi pæinäni nani cabo iñönänite nê yewæmöinäni wææ tipæmpoga go mëa miido ganca inänitapa.

Tæiyænäni näämæntacoo mongænte a ongöninque

⁹ Ayæ ate wæetë ayömö tæiyænäni inäni a ongönäni atabopa. Æpodänidö inänii, ante æcänö tee mampote anguingää. Mäninäni wabæca nani quëwencabo wabæca nani quëwencabo inte tæiyænäni incæ waodäni nani cabo waodäni nani cabo inte tæiyænäni incæ wacä awënë nani cabo wacä awënë nani cabo inte tæiyænäni incæ wadö nani tedecabo wadö nani tedecabo inte tæiyænäni incæ mänömaï iñönäni inte ongönänitapa. Inäni iñömö näämænta weocoo doyæncoo mongænäni inte yædëmæmäa önönempe nææninque Awënë nänö aacæ tæ contaimpa gäänë ongöninque Wængongui Codotedo weca a ongönänitapa. ¹⁰ Ayæ tömænäni yedæ äninque iïmaï änänitapa.

“Mönö Wængongui iñömö tömengä nänö aacæ tæ contaimpaa nê tæ contacä inongä inte tömengä adocä mönö imonte, Quëwencæminimpa, ante nê Ængä inongä ingampa.

Ayæ Wængongui Codotedo adobaï mönö imonte, Quëwencæminimpa, ante nê Ængä inongä ingampa,” änänitapa.

¹¹ Nê aadäni nê Picänäni tönö mëa go mëa miinäni quëwënäni Awënë tæ contaimpa gäänë ongönänite Wængongui anquedoidi tömänäni iñömö yabæ inö godämæ

ongönänitapa. Wængongui nänö aacæ tæ contayömö gäänë guidömëmæ ædæ wææn-
inque tömënäni Wængongui ingante, Bitö Wængongui Awënë imidö anguënë, ante
watapæ apænedänitapa. ¹² Ayæ änänitapa.

“Amëë. Mönö Wængongui ingante watapæ apænemönipa.

Ayæ tömengä ñäö ëmongänö anguënë. Tömengä tömänö ante ëñëngä ingänö
anguënë.

Tömengä ingante waa adinque mönitö tömengä ingante waa ate pönente apænemönipa.
Ayæ tömengä tæi piñængä ingänö anguënë.

Tömengä tæi piñængä inte tömää nänö cæinënö cædongä ingampa.

Wantæpiyæ iñonte cöwë mäninö ante ancæmönimpa.

Mänömaï baquïnö anguënë, ante, Amëë,” änänitapa.

¹³ Ayæ në aadäni në Picænäni incæ adocanque botö imo äninque, “Iinäni näämënta-
coo doyæncoo në mongænäni iñömö æmönänidö inänitawo. Edæ ædönö quëwëninäni
inte pönänitawo,” angantapa. ¹⁴ Äñongante botö tömengä ingante, “Awënë bitö tömëmi
do ëñëmipa,” antabopa. Äñömote tömengä wæætë, “Mäninäni nanguï nani wæwen-
gaimämo iinque baganca incæ ayæ miinäni quëwënanäni inänipa. Edæ tömënäni weocoo
doyæncoo, Waëmö pönï bacæimpa, ante Wængongui Codotedo wepænë yamongainäni
inänipa,” ante në aacä në Picængä apæncantapa.

¹⁵ Ayæ adocä godömenque apæncantapa.

“Mänömaï beyæ Wængongui nänö aacæ tæ containpa gäänë a ongöninque tömënäni
itädë incæ woyowotæ incæ Wængongui oncö tæiyæ waëmö oncönë tömengä ingante
cöwë cædänipa.

Iinque oncontai bai tömënäni wænömënæca wo cæcä bai cædinque mänimpaa në tæ
contadongä iñömö

tömënäni inänite ante wææ aacæcäimpa.

¹⁶ Tömënäni cöwë gue ænenämaï tepæ gæwænämaï incædänimpa.

Nænque tömënäniya ti näwänämaï i iinque tömënäni gönämaï incædänimpa.

Quiëmë ocoi ä beyænque tömënäni gonte inämaï inguinänidö anguënë.

¹⁷ Edæ Wængongui Codotedo Wængongui nänö aacæ tæ contayömö gäänë në a ongongä
iñömö

tömengä iñömö mäninäni näämëntacoo në mongænäni inänite në aacä incæcäimpa.

Tömengä edæ tömënäni inänite quëwenguimæ tapænömö iñömö ænte mäocä go-
quïnäni.

Ayæ Wængongui tömënäni wëñapæ nani tamonte wædi tömämæ wadæ cæmon-
cæcäimpa,” angantapa.

8

Tee bædedinta tömanta wi æmpocampa

¹ Ayæ Wængongui Codotedo tee bædedinta tömanta wi æmpoyongante öönädë
iñömö mëedia ooda ganca nöwæ ongonte batimpa. ² Ayæ anquedoidi önompo æmæmpo-
poque go mëa ganca inäni Wængongui weca në a ongönäni inänite atabopa. Mäninäni
inänite tömengä todompeta nani ancade önompo æmæmpoque go mencadea ganca
pædæ godongä ænänitapa. ³ Ayæ wacä anquedo iñömö ogui waaqui iya täincade
oodo inte nani badöincade nææninqe, Wængongui qui, ante nani iya täimpa gäänë
ponte a ongongantapa. Mänimpa oodo inte nani badöimpa Wængongui nänö aacæ tæ
containpa gäänë ongönimpa. Ayæ, Wængongui quinäni tömengä ingante apæneyönäni
bitö ogui waaqui tancæbiimpa, ante cædinque adocä anquedo ingante wacä pöninque
nanguï ogui waaqui godongä ængantapa. ⁴ Ænte önompo næænte ogui waaqui iya
tangä iinque tæëmämämo Wængongui weca æipämoyedë Wængongui quinäni tömengä
ingante nani apænepämo guëa adoyömö æipämotimpa. ⁵ Ayæ adocä anquedo iñömö
ogui waaqui iya täincade æninque iya täimoga gonga ænte eyede wëninque inguipoga
iñömö wæantodongantapa. Wæantodongä ate detæbo tæi tæi tæ goyö yedæ pönï
änimpa. Yædæ yædæ näinimpa. Ayæ goinque gotimpa.

Todompeta nāni ancade

⁶ Ayæ Wængonguī anquedoidi önompo æmæmpoque go mēa ganca ināni todompeta nāni ancade önompo æmæmpoque go mencadea ganca nē nææināni inte todompeta önöne gö cædedinque we we öoncæ cædānitapa.

⁷ Wængonguī anquedo tänocä inömö tömengä todompeta inte we we öongä ate yoguica gonga tönö wepæ adoyömö wempodente bai inguipoga inömö tæ tæ wæænimpa. Tæ tæ wææ ate inguipoga inömö pancabaa nanguī ömæ inömö gonte batimpa. Awæncoo inömö pancacooga incæ adobai nanguī incoo gonte wænimpa. Gaguimæncoo inömö tömancoo gonte batimpa.

⁸ Wængonguī anquedo ayængä inömö tömengä todompeta inte we we öongä ate ñænæ onquiyabo emö bai gonga bæcodote bai inönte wææntodönāni gäwapæntibaa tæi tæi guitimpa. Tæi tæi guī ate gäwapæntibæ inömö pancatibaa incæ nanguī pönī æpæ inömö wepæ batimpa. ⁹ Ayæ gäwapæntibæ cæncadēmæ inö quëwënāni inömö pancadāniya incæ nanguī ināni wænānitapa. Ayæ ñænæ wipocoo pancacooga incæ nanguī wo cæwodincoo inömö wo ewente guitimpa.

¹⁰ Wængonguī anquedo ayængä inömö tömengä todompeta inte we we öongä ate ñænæ nömö inömö cadentato tica wodönote bai öönædē inö owodēmö incæ tæ wææinque önoncooga inömö pancacooga incæ nanguī æpænē inömö tæi tæi guitimpa. Æpæ tayömö adobai cæncadēmæ inö tæi tæi guitimpa ¹¹ Mäninēmö emöwo inömö, Tī Nänömö, ante nāni änēmö impa. Nömö tæi guiyonte nanguī æpæ inömö moncapæ bai tī nāmæ batimpa. Waodāni tæiyænāni inömö imæ tī nāmæ bagaimæ bete wænānitapa.

¹² Wængonguī anquedo ayængä inömö tömengä todompeta inte we we öongä ate nænque pancayömonga tente ba ate apäicä adobai pancayömonga tente ba adinque nāna apäidinö inömö pancaa wëmö batimpa. Némoncoo inömö pancadāniya incæ nanguī ināni wo ewente badāni ate nāni apäidinö inömö pancaa wëmö batimpa. Itædē inönte tipæmpoga go mēa ooda ganca inö mēa go mēa ooda ganca nænque ñäö apäidāmai inimpa. Ayæ woyowotæ inönte tipæmpoga go mēa ooda ganca inö mēa go mēa ooda ganca apäicä tönö nëmoncoo apäidāmai inānitapa.

¹³ Ayæ ayömote guingämöwæ öönædē gämænö pao pao godinque iimaī ante aa pecä eñentabopa. “Inguipoga quëwënāni nāni wæquinque. Nāni wæquinque. Nāni wæquinque impa, angantapa. Edæ Wængonguī anquedoidi mēnaa go adocanque ināni inte tömēnāni todompeta inte we we öoncæ cædāni beyænque inguipoga quëwënāni inömö nanguī pönī wæwenguināni bacædānimpa,” ante guingämöwæ angantapa.

9

¹ Wængonguī anquedo ayængä inömö tömengä todompeta inte we we öongä ate wa nömö öönædē inö owodinque inguipoga tæ wæængainēmö ongö atabopa. Mänii nömö ingante tadömengadænguipo ontatodē wi ænequī godonte inimpa. ² Wi ænequī æninqe ontatodē wi ænecä ate tēemancoo ta æitimpa. Mänii tēemancoo ñænæ gongapamö tēemancoo bai inimpa. Ininque ii tēemancoo tadömengadænguipo ontatodē ta æiyonte nænque tönö öönæ wentamö pönī badaimpa. ³ Tēemancodē inö ñāwāi ta pöninque inguipoga inömö wææñönānite wacä godö cæcä beyænque tömēnāni tæimö badinque emēne inguipoga quëwënāni bai tæ guidāni badānitapa. ⁴ Ayæ tömēnāni inānite, Inguipoga gaguimæncoo incæ gæpæñabocoo incæ awæncoo incæ pæcoo wo ewēnāmai iedāni. Wæætē waodānique önonemö inö Wængonguī nänö yewæmōi inte nē yewæmönāmai ingaināni inānite adinque mīnitö tömēnāni inānite godö cæmīni beyænque nantate wæcædānimpa, ante wacä angantapa. ⁵ Ayæ ñāwāiidi inānite edæ, Wænödāni, änāmai ingä inte tömengä, Mīnitö wæætē tömēnāni inānite önompo æmæmpoque apäicä ganca cæmīni beyæ nanguī pönī wæwencædānimpa, angantapa. Ininque emēne tæ guī waocä nantate wæcä bai tömēnāni nanguī pönī nantate wæwënāni inānitapa.

⁶ Mäniñedē waodāni, Æbänö cæte wænguiṃoo, ante ancaa cædinque wænāmaï incædānimpā. Wæinēmōnīpā, ante ānāni incæte ædō cæte wæmainānīi.

⁷ Ayæ ñāwāiidi iñōmō tontadoidi cabayoidi guēadō guēa cæte nē godāni baï adobaï emōnānitapā. Tömēnāni ocaboga awēnē poganta oodo inte badōnīnta baï wencadānitapā. Ayæ mānīnāni awīncā iñōmō waodāni awīncā baï emōnānitapā. ⁸ Tömēnāni ocaguī iñōmō onquiyængā ocaguī baï encadinque tömēnāni bagacoo iñōmō nēōō baga baï engadānitapā. ⁹ Tömēnāni tæcætawē inō tæīneta inte badōīnta baï wææ mongæñānitapā. Ayæ tontadoidi guēadō guēa wænoncæte ante cædinque ānāni ate cabayoidi pogodo gote awoto baï wēā pōnonte nanguī pōnī ā baï ñāwāiidi iñōmō adobaï ōnonguēnepæ pao pao godīncue āmæ godānitapā. ¹⁰ Tömēnāni ōnōmīñæ incæ emēñe ōnōmīñæmpā baï emīñænānitapā. Tömēnāni nāni tæī pīñæmāmo ōnōmīñæ inō emīñænāni inte ōnompo æmæmpoque apāicā ganca godō cædāni beyæ waodāni nanguī pōnī wæwēnānitapā. ¹¹ Mānīi ñāwāiidi iñōmō awēnē odeye ingante ēñente quēwēnānitapā. Māningā tömēnāni awēnē iñōmō tadōmengadænguipo iñōmō quēwēnāni inānite nē aacā anquedo inongā inte tömengā emōwo ebēdeo tēdēdō, Abadoō, nāni āwo ī ayæ, Nē Wo Ēwengā, ante emongā īnīncue guidiego tēdēdō, Apodīōō, ante pemōnānīpā.

¹² Tāno nāni wæquinque do īncue batimpā. Incæte godōmenque mempoga ganca nanguī pōnī nāni wæquinque ayæ baquīnō anguēñe.

¹³ Wængonguī anquedo ayængā iñōmō tömengā todompeta inte we we ōongā ate tedepāmo tēñō ēñentabopā. Oguī waquī iya tāimpā oodo inte badōimpā Wængonguī wecā mæ ongompā. Mānīmoga ōnōmoncawæ baï mēa go mēa mæ ongōñōmō mānīñōmō tedepāmo tēñō ēñentabopā. ¹⁴ Wængonguī anquedo ayængā todompeta nē næængā ingante īmaï angantapā. “Ñænæ ōnonga Eopadatedō nāni ānonga iñōmō anquedoidi mēnaa go mēnaa ināni iñōmō nē ñā cæyænīnāni inānite bitō ñīmpo cæe,” angantapā. ¹⁵ Edæ mānīnāni anquedoidi mēnaa go mēnaa ināni iñōmō tömēnāni mānīnepo īncue ba ate mānīi apāicā īñonte mānīōnæ incæ mānīi ooda īñonte dobæ nāni cæquinque ante a ongōñōnānite īmaï angantapā. Waodāni tömānāni iñōmō mencabodāniya go adocabodānique quēwēñōnāni adocabodānique inānite mīnitō wænoncæmīnīmpā, angantapā. Ayæ ñōwo tömēnāni inānite ñīmpo cæcā ate tömēnāni wænoncæte ante tao godānitapā. ¹⁶ Ayæ tontadoidi iñōmō cabayo mongæñāni ināni æpodānidō inānīi, ante tee mampote dootiento mīñōō ganca inānitapā. Mānīmpodāni inānīpā, ante ēñentabopā.

¹⁷ Botō wīimonte baï ayōmo cabayoidi tōnō nē mongæñāni iñōmō īmaï emōnāni atabopā. Cabayo nē mongæñāni iñōmō tæcætawē inō tæīneta nāni wææ mongæntacoo pancataa opatawæ gonga gonte baï emontapā. Pancataa wentamō emontapā. Pancataa atopode nāni ā baï wīñadæ emō baï emontapā. Cabayoidi ocabo iñōmō nēōō ocabo baï encadānitapā. Tömēnāni ōnōne inō gonga tōnō tēēmā tōnō atopode nāni ōō waadō tadedānitapā. ¹⁸ Mānīi gonga tōnō tēēmā tōnō atopode iñōmō mēmāmoque go adopāmoque nāni wænōmāmocoo nē tadedāni inte cabayoidi iñōmō waodāni tömānāni mencabodāniya go adocabodānique quēwēñōnāni adocabodānique inānite wænōnāni wænānitapā. ¹⁹ Mānīnāni cabayoidi tömēnāni ōnōne inte tæī pīñænte wænōnīncue adobaï tömēnāni ōnōmīñæ inte tæī pīñænte wænōnānīpā. Edæ tömēnāni ōnōmīñæ iñōmō tæntæ ocabo baï emīñænāni inte waodāni inānite pocænāni wænānitapā.

²⁰ Mānīmāmo wodonte nāni wængāimāmocoo beyæ ayæ wænāmaï quēwēnāni inte wæwēnāni incæte tömēnāni nāni wēnæ wēnæ cægāinō ante, Ancaa wæwente awædō, ante pōnēnāmaï ināni inte ñīmpo cædāmaï inānitapā. Wæætē oodo inte padata inte bodonte inte dica inte awæmpā inte tömēnāni nāni badonte cōnōnīncoo iñōmō adāmaï incoo incæte ēñēnāmaï incoo incæte dao dao godāmaï incoo incæte tömēnāni, Mōnitō wængonguīidi inānīpā, ante ædæ wæænte apænedīncue ñīmpo cædāmaï inānitapā. Ayæ adobaï wēnæidi inānite ædæ wæænīncue, Mīnitō mōnitō wængonguīidi imīnidō anguēñe, ante ñīmpo cædāmaï inte apænedānitapā. ²¹ Ayæ mānīnāni godōmenque waodāni inānite pīinte wænōnāni inte tömēnāni mīi betē yewænāni inānīpā.

Nänöogängä inämaï iñongante towente cædönäni inte tömënäni awëmö ö ännäni inänipa. Mänömaï godömenque cædinque tömënäni nāni wënæ wënæ cægainö ante, Ancaa wæwente awædö, ante pönënämaï inäni inte ñimpo cædämaï inänitapa.

10

Wængongui anquedo dadi ompointa guiyanta næængä

¹ Ayæ wacä anquedo në tæi ëmongä inte öönædë inö wæængä atabopa. Tömengä weocoo mongænte bai boguimancodë pöninque tömengä ocaboga tæcædæca inö daimë godämæ owotapa. Tömengä awinca incæ nænque bai apäidinque tömengä önömënë incæ cobacadewæ gonga gonte ëmö bai ëmënengä ingantapa. ² Tömengä önönempo inö dadi ompointa ininta nāni wi æmpodinta guiyanta næængä ingantapa. Tömengä önöwa tömëwa gäwapæntibaa cö cæwadinque tömengä dipæwa guiquënë ömaa cö cæwacantapa. ³ Mänömaï cö cæwadinque tömengä nëöö ii pepa bai nangui pöni yedæ aa pecantapa. Aa peyongä detæbo önompö æmæmpoque go mëa ganca wæætë tæi tēninque tededänitapa. ⁴ Detæbo önompö æmæmpoque go mëa ganca inäni iñömö tededäni ëñēninque botö yewæmoncæ cætabopa. Tæcæ yewæmoncæ cæyömo öönædë inö tedepämo iïmaï ante tedecä ëñentabopa. “Iñæmpa önompö æmæmpoque go mëa detæbo nāni tededö æbänö ante tededäni, ante wiï ëñenguï i iñinque bitö yewæmönämaï ië,” angantapa.

⁵ Wængongui anquedo botö adingä iñömö gäwapæntibaa tönö ömaa në a ongongä iñömö tömengä önompö tömempo öönædë inö pædæ æmpocantapa. ⁶ Tömengä tömempo pædæ æmpodinque, Wængongui ëñēñongä botö änö ante nöingä baquïnö anguënë, ante iïmaï angantapa. Edæ në wantæpiyæ cöwë quëwengaingä inte öönædë tömää inguipoga tömää gäwapæntibæ tömää badöninque tömengä adobai öönædë owodäni tömänäni inguipoga quëwënäni tömänäni gäwapäa quingänö owodäni tömänäni inänite në badongaingä inte tömengä ëmöwo apænedinque, Botö apænedö nöingä baquïnö anguënë, ante në apænecä iñömö, “Mönö ee ongöñedë do iinque batimpa, angantapa. ⁷ Edæ Wængongui anquedo tömangä pöni iñömö tömengä todompeta we we öoncæ cæyongante Wængongui nänö cæinënö ante wë wodonte bai nänö angainö ante ñöwo iinque cæcæcäimpa. Wængongui ingante në cægäinäni tömengä beyæ në apænegäinäni iñönänite mäninö nänö cæinënö ante do apænegaingä inte Wængongui mäninö bai ñöwo iinque cæcæcäimpa,” angantapa.

⁸ Ayæ öönædë inö tedepämo adopämo do botö ëñēñö ñöwo wæætë botö imote iïmaï angä ëñentabopa. “Wængongui anquedo në gäwapæntibaa tönö ömaa iñömö a ongongä weca godinque bitö tömengä önönempo dadi ompointa ininta nāni wi æmpodinta nänö nææininta æe,” angantapa. ⁹ Angä ëñēninque Wængongui anquedo weca godinque botö tömengä ingante, Dadi ompointa guiyanta pönömi æmoe, ante äñömo tömengä wæætë botö imo, “Æe. Æeninque cæe. Bitö önöne da wëneyömi guiñëmæ bai waëme pöni ingäëimpa. Incæte yo mongænte ate cæncadë guidinque ti nä bacäëimpa. Iñinque cædente wæcæbiimpa,” angä ëñentabopa.

¹⁰ Wængongui anquedo önönempo dadi ompointa guiyanta æninque botö ade cæntabopa. Önöne guiñëmæ bai waëme pöni i incæte yo mongænte ate cæncadë guidinque ti nä badinque cædente wætabopa. ¹¹ Ayæ botö imote angantapa. “Wacä awënë nāni cabo wacä awënë nāni cabo incæ wabæca nāni quëwencabo wabæca nāni quëwencabo incæ wadö nāni tedecabo wadö nāni tedecabo incæ wabæca wabæca nāni awënë odeye cabo iñönänite bitö, Mäninäni inänite æbänö baquii, ante wæætë Wængongui beyæ apænecæbiimpa,” ante angantapa.

11

Wængongui æbänö cæcäa, ante mënaa apænedapa

¹ Wacä botö imote, Tee manguimpa impa, ante cæwipa bai pædæ pönöninque ayæ botö imote, “Goe, angantapa. Wængongui oncö tæiyæ waëmö oncönë godinque mänincö

tönö, Wængongui qui, ante nani iya täimpa tee mäe. Ayæ waodäni adoyömö ædæ wææninqe Wængongui ingante, Bitö Wængongui Awënë imidö angüenë, ante watapæ apænedäni iñömö æpodänidö inänii, ante tee mampote cæe. ² Wængongui oncö tæiyæ waëmö oncönë tee mäninqe yacö boyäa iñömö tee mänämaï ie. Edæ mänincö boyäa wadäni oodeoidi inämaï inäni inänite do godonte intapa. Mäninäni edæ coadenta i doo apäicä ganca mänimpoga iñonte Wængongui nänö tæiyæ waëmö quëwëñömö incæ wo ewente cæcædänimpa. ³ Ayæ botö imotedö ante, Botö æbänö cæboo, ante në, Nö ante impa, ante apænedä iñönate botö godö cæquimo beyænque tömëna tæi piñænte badinque miido dootiento tetenta öönæ mänimpoönæ iñonte botö beyæ apænecædaimpa. Waodäni wæwente beyænque gömæ ëmoncoo mongænäni bai tömëna adobai gömæ ëmoncoo mongæninqe apænecædaimpa,” ante apænecä ëñentabopa.

⁴ Wængongui æbänö cæcää, ante në, Nö ante impa, ante apænedä iñömö tömëna iñömö Wængongui inguipoga Awënë iñongante tömengä weca odibowæ nani äwæ mëwäa ongöwæ bai inapa. Ayæ tömengä weca yædo concædi ti wodönoincade mencadea ongoncade bai mänina iñömö adobai inöna inapa. ⁵ Wadäni, Tömëna inate wënæ wënæ cæinëmopa, ante cædäni ininqe tömëna wæætë në piinte cædäni inänite gonga wo tadete bai cædinque wænöna wæncædänimpa. Edæ, Tömëna inate wënæ wënæ cæinëmönipa, ante në cædäni tömänäni mänömaï wæncædänimpa. ⁶ Wængongui godö cæcä beyænque tömëna tæi piñæna badinque, Wængongui beyæ möna apæneyedë cöönæ cædämaï ingæimpa, ante cædinque öönædë tee mönete bai cæcædaimpa. Ayæ tæi piñæna inöna inte tömëna æyedëmë cæinëna incæ wæætë wæætë cæyönate æpæncoo tömancoo wepænque bacæimpa. Adobai inguipoga tömämæ quëwënäni inänite tömëna cæda ate quiëmë wænömämocoo incæ pö wënæ wënæ bacædänimpa.

⁷ Ayæ tömëna, Wængongui æbänö cæcää, ante iinqe apænedä ate babæcä bai mönö guiñenongä inte tadömengadænguipo inö tadinque tömëna inate guëadö guëa cædinque tæi ëmongä inte gänä cædinque wænongä wæncædaimpa. ⁸ Wænä ate tömëna baonque ñænængade nani quëwëñömö taadö iñömö öñoncædaimpa. Edæ Todömä iñömö quëwënäni wiwa cædäni bai ayæ Equitobæ quëwënäni wënæ wënæ cædäni bai mänii ñænængade nani quëwëñömö në quëwënäni iñömö adobai wënæ wënæ cædänipa. Mänii quëwëñömö adoyömö tömëna Awënë ingante awäa timpote wænönäni wængacäimpa. ⁹ Mëönaa go adoönæque go tæcæ itædë iñonte tömëna baö ini acæte ante pöninqe wacä awënë nani cabo wacä awënë nani cabo incæ waodäni nani cabo waodäni nani cabo incæ wadö nani tedecabo wadö nani tedecabo incæ wabæca wabæca nani quëwencabo incæ waodäni nanguï inäni ponte tömëna baö acædänimpa. Ayæ, Da wënämaï ingæimpa, ante wææ cæcædänimpa. ¹⁰ Tömëna iñömö Wængongui beyæ në apænedäna inöna inte inguipoga quëwënäni inänite nanguï äna wædinäni inte tömënäni ñöwo wæætë watapæ tocædänimpa. Ininqe tömëna mänömaï wænte öñöna ate tömënäni nanguï Yæ yæ todinque wacä ingä wacä ingä, Önonque æe, ante pædæ godönäni æncædänimpa.

¹¹ Mëönaa go adoönæque go tæcæ itædë iinqe go ate Wængongui edæ, Quëwencæmïna, ante tömengä nänö guëmämämo quëwenguimämo woo öongacä ate tömëna iñömö wæætë miina badinque ængæ ganticædaimpa. Ængæ gantiyöna në adäni guiquënë ancai guiñente wæcædänimpa. ¹² Ancai guiñente ayönäni tömëna öönædë inö tedepämo yedæ ante ëñencædaimpa. “Iñömö pö æeda,” angä ëñeninqe tömëna öönædë inö boguimancodë æiyöna tömëna inate në piinte cædinäni edonque acædänimpa. ¹³ Tömëna æiyedë mäniñedë goinque nanguï ocæ ocæ goquimpa. Tömënäni nani quëwëñömö onconcoo bacoo iñonte pancaconga incæ nanguï onconcoo acapowate bogocæ tæ gowæænguimpa. Ado goinque goyedë waodäni tiæte miido ganca wæncædänimpa. Ayæ miinäni quëwënäni ancai guiñeninqe, Wængongui öönædë në quëwëmi imi inte bitö nö tæi piñænte imidö angüenë, ante wæcædänimpa.

¹⁴ Ayæ mempoga nani wæquinque do iinqe batimpa. Incæte godömenque adopoque nanguï pönï nani wæquinque oo pönï bacæimpa.

Todompeta ämæwoya

¹⁵ Wængongui anquedo tömängä iñömö tömengä todompeta we we öongä ate öönädë inö wadäni nani tedepämo yedæ tededinque iimaï änänitapa.

“Mönö Awënë Wængongui tömengä Codito tönö

ingui-poga Tæiyæ Awënë Odeyeda badinque

wantæpiyæ cöwë aacædaimpa,” änänitapa.

¹⁶ Nē aadāni nē Picænāni iñömö bæinticoatodo ganca ināni mānimpodāni iñömö Wængongui weca tömēnāni awēnē tæ contaimpaa nē tæ contadāni inte ñōwo guidömēmæ ædæ wææninqwe Wængongui ingante, Bitö Awënë Wængongui imidö anguēnē, ante watapæ apænedānitapa. ¹⁷ Ayæ iimaï apænedinque,

“Awënë Wængongui bitö adobique Tömää nē Cædömi inte

wēēnēñedē do nē quēwengāimi imi ñōwobi inömi imipa.

Bitö nämä tæi piñæmi inte ñōwo ædæmō nē aabi inömi imipa,

ante adinque bitö imite waa ate pönente apænemönipa.

¹⁸ Wabæca wabæca nāni quēwencabo incæ tömānāni quēwēnāni ængui badānitapa.

Ayæ bitö ængui babi ininque

nē wængāināni inānite bitö apænte panguiönæ do batimpa.

Ayæ bitö beyæ nē apænedönāni iñömö bitö imite nē cædönāni iñönānite

tömēnāni inānite bitö, Minitö cædi beyæ paga cæbo æncæminimpa, ante bitö godonguiönæ dobæ batimpa.

Ayæ bitö quīnāni iñönānite bitö emōwo ante bitö imite nē ēñente cædönāni iñönānite

awēnē bai ināni incæ önönānique ināni incæ tömānāni inānite bitö, Minitö cædi beyæ paga cæbo æncæminimpa, ante bitö godonguiönæ dobæ batimpa.

Ayæ ingui-poga quēwēnāni inānite wadāni nē wo ewente cædönāni iñönānite bitö wo ewente cæquiönæ do batimpa.”

¹⁹ Ayæ öönädë inö Wængongui tæiyæ waemö oncö odemö wibænetapa. Wibæneyö Wængongui, Waodāni æbānō cæte botö tönö godongāmæ waa cæte quēwencædānimpa, ante odömoncæte ante nänö yewæmongainca nāni da wencaincade iñömö mānincönē mä ongoncade atabopa. Ayömote yædæ yædæ nāinimpa. Yedæ pōni ānimpā. Detæbo tæi tæi tēñö yedæ pōni ānimpā. Goinque gotimpa. Ayæ yoguica cōönæ bai nangui cæte wæænimpā.

12

Onquiyængä tönö dadagöö nāni ānongä

¹ Wængongui, Mä pōni odömōmo adinque ēñencædānimpa, ante cædinque öönädë inö waemö pōni badongä a owo atabopa. Edæ onquiyængä iñömö nænque inte weocoo wēñate bai mongæñongä apāicāmo incæ tömengä cæncadēwa ænömengadæwa inö impa. Tömengä, Awënë poganta, ante tipæmpoga go mēa nēmōidi inte godāmæ badōinta wencacantapa. ² Māningä onquiyængä yædēmadā ēnengä iñongante wēñængä ēñacæ cæcä wæte wædinque wēñæ nantate Yæ yæ wæcantapa.

³ Ininque Yæ yæ wæyongante öönädë inö mä pōni Wængongui nänö badöi wadö bai badöi a owo atabopa. Edæ ñænængade obe bai dadagöö nāni ānongä opatawæ ēñacä inte tömengä ocabocoo önompo æmæmpoque go mencaa encacä inte māniï ocabocooga awēnē pogantacoo önompo æmæmpoque go mentaa wencacä ingantapa. Tömengä önömoncawæ adobai önompo tipæmpoga ocabocooga encacä ingantapa. ⁴ Tömengä önöncaimiñænca picæ cæmiñæninqwe öönädë owodāni nēmōidi incæ pancadāniya incæ nangui ināni inānite wææntodongä ingui-poga tæ wæænānitapa. Onquiyængä oo pōni iñongante dadagöö, Wēñængä ēñacä ate cæncæboimpa, ante tömengä weca a ongongantapa.

⁵ Onquiyængä wēñængä onguiñængä ingante mangä ininque tömengä iñömö nänö Awënë baquinque pæcantapa. Tömengä iñömö tæiyæ awēnē tömengä nempo quēwēnāni inānite aacä bai adobai tömāmæ quēwēnāni inānite, iimaï cædāni, ante

aacæcäimpa. Mäningä onquiyängä wëñängä ingante wacä ö ænte Wængonguï weca ayæ tömengä nänö aacæ tæ contayömö mäniñömö ænte mäicä æicantapa. ⁶ Mäniñö bayonte wäänä iñömö önömæca iñömö wodii gocantapa. Tömengä beyæ ante Wængonguï nänö eyepæ cæyömö mäniñömö wodii gocantapa. Mäniñömö miido dootiento tetenta ëönæ mänimpoönæ iñonte tömengä quëwente beyæ cænguï eyepæ pönönäni cæncæcäimpa, ante Wængonguï tömengä nänö owoyömö ante do badongantapa.

⁷ Mäniñedë edæ öönædë iñömö guëadö guëa cæte wænönänitapa. Wængonguï anquedo Miiguedo nani angaingä iñömö tömengä wadäni anquedoidi awënë inongä ingampa. Tömengä tömënäni tönö dadagöö ingante wido cæcæte ante cæyönäni dadagöö wæætë tömengä anquedoidi tönö wæætedö wæætë guëa cädäni incæte ⁸ tömënäni ædö cæte gänä cæquinänii. Edæ ædö cæte öönædë iñömö ayæ quëwenguinänii, ante tömënäni inänite wido cädänitapa. ⁹ Tömënäni iñömö ñænængade dadagöö ingante wido cæte wææntodönänitapa. Mäningä dadagöö iñömö wëenënedë tæntæ ingaingä inte tömengä ëmowo Wënæ Tatäna mëwoga ëmongä ingampa. Adocä, Inguipoga quëwënäni tömänäni oda cæcädänimpa, ante në wapiticæ ænte mäocä ingampa. Tömengä ingante ayæ tömengä anquedoidi inänite inguipoga iñömö wido cæte wææntodönänitapa.

¹⁰ Ayæ ate öönædë iñö tedepämo yedæ ante iimaï ä ëñentabopa.

“Ñöwoönæ mönö Wængonguï mönö imonte, Minitö botö æmæwo æmo beyænque quëwenguimäni, ante tömengä nänö cæönæ batimpa.

Ayæ tömengä nänö tæi piñænö ñöwoönæ ba ininque

tömengä adobaï Tæiyæ Awënë Odeye ñöwoönæ bacäimpa.

Ayæ tömengä nänö apænte ængaingä mönö Codito adobaï nämä tæi piñænongå inte në angä bacäimpa.

Wënæ guiquënë mönö töninädäni inänitedö ante, Wënæ wënæ cädänidö angüënë, ante wapiticæ apænete anewënongå ingampa.

Woyowotæ incæ itædë incæ mönö Wængonguï weca a ongöninque

tömengä mäninäni inänitedö ante në wapiticæ anewënongå iñongante tömengä ingante inguipoga iñömö wææntodönäni wæængantapa.

¹¹ Wængonguï Codotedo wepæ tömengä nänö wænte godongaïmæ beyænque tæi ëmönäni badinque

mönö töninädäni iñömö wënæ ingante gänä cädänitapa.

Ayæ, Wængonguï æbänö cæcää, ante tömënäni nani apænedö beyænque tömënäni tæi ëmönäni badinque wënæ ingante gänä cädänitapa.

Wadäni tömënäni inänite Wængonguï beyæ wænönæ cæyönäni tömënäni,

Mönitö guiñenämäi wæncæmönimpa, ante në änäni inänitapa.

¹² Mänömaï beyæ minitö öönædë iñömö në quëwëmini inte watapæ tocæminimpa.

Wamini guiquënë inguipoga iñömö æpæntibædë iñömö në quëwëmini inte mini wæquinque ingäïmpa.

Edæ wënæ minitö weca wææ pö quëwengäimpa.

Tömengä nänö wo ëwenguinö oo pönï impa, ante ëñente beyænque äingä pönï bacampa. Mänömaï beyæ minitö guiñenguimämo baquinque impa.”

Mänömaï ante yedæ angä ëñentabopa.

¹³ Ayæ dadagöö, Botö imote inguipoga iñömö wido cæte wææntodönäni adi wædö, ante wædinque onquiyängä ingante wëñängä onguinängä në mäningä ingante bæi ongoncæte ante togængantapa. ¹⁴ Incæte Wængonguï, Önömæca iñömö bitö beyæ botö cæyömö pao pao gocæbiimpa, ante cædinque ñænængade guingämowæ onongüenepæ bai tipængüenepäa pönö badongä engüenepænte bai onquiyängä bacantapa. Ininque onquiyängä, Tæntæ botö imote bæi ongönämäi incæcäimpa, ante Wængonguï önömæca tömengä beyæ nänö cæyömö pao pao gocantapa. Mëa go adoque tæcæ wædepo iñonte tömengä mäniñömö quëwente beyæ nänö cænguï eyepæ ænte cænguñömö gocantapa. ¹⁵ Ayæ, Onquiyängä ingante æpæ quingæ mangui bai bæ ta

täi guicäcäimpa, ante cädinque dadagöö tömengä önöne inö önö bai æpæ towæ tadonte bai tao godecantapa. ¹⁶ Dadagöö towæ tadonte bai nänö tao godepæ quingä pönö onguipo incæ onquiyängä beyæ ante cädinque wi ænete cæyö ada guipæntapa. ¹⁷ Ada guipæ adinque dadagöö iñömö onquiyängä ingante godömenque ænguï badinque wadæ godinque, Mäningä onquiyängä wänäni incæ wädäni inänite guëa cæte wänonguimo, ante gocantapa. Tömänäni Wængonguï nänö, Ìimaï cæedäni, ante wææ angainö ante nē ēñente quëwänäni inte, Itota æbänö cæcää, ante nē apænete quëwänäni inönäni iñömö mäninäni mäningä onquiyängä wänäni iñönänite dadagöö, Wänoncæboimpa, ante gocantapa.

13

Mënaa mönö guññönöna

¹ Ayæ dadagöö æpæntibæ yæwedeca ëmönaiya iñömö ponte a ongongantapa.

Ayæ babæcä bai nē guññönongä iñömö æpæntibædē quëwente ta pönongä atabopa. Mönö guññönongä tömengä ocabocoo önömpo æmæmpoque go mencaa encacä inte tömengä önömoncawæ önömpo tipæmpoga ocabocooga inö encacä ingantapa. Awënë pogantacoo tipæmpoga ganca tömengä önömoncawäa da da wencate encacantapa. Ayæ Wængonguï ëmöwo incæ wiwa babæ wapiticæ ante äniwoi tömengä ocabocooga tömancooga inö yewæmonte encacä ingantapa. ² Mäningä mönö guññönongä botö nē adingä iñömö mëne bai ëmönongä incæte tömengä önöwa oto önöwa bai ëwacä inte tömengä önöne nëö önöne bai ënecä atabopa. Ayæ dadagöö nämä nänö tæi piñænö ante mönö guññönongä ingante pædæ godöninge tömengä nänö aacæ tæ contaimpa pædæ godongä ænte tæ contadinque mönö guññönongä nē awënë badinque, Ìimaï cæedäni, ante nanguï angä bacantapa. ³ Ayæ mönö guññönongä adoque ocaboga ämocate wæncæ cæcä bai ingaingä incæte gämæ cæcate ingantapa.

Tömämæ quëwänäni mönö guññönongä ingante adinque ancai guññëninge tömänäni tömengä miñæ godänitapa. ⁴ Dadagöö godö cæcä beyænque mönö guññönongä iñömö awënë badinque dadagöö bai nē angä do bacä impa, ante adinque tömänäni dadagöö ingante, Bitö Awënë Wængonguï bai imidö angüënë, ante apænedänitapa. Adobai mönö guññönongä ingante, Bitö Awënë Wængonguï bai imidö angüënë, ante apænedänitapa töö. Mäninö ante godömenque Ìimaï äninque, “Æcänö mönö guññönongä bai ingä iñömö edæ dæ angampa. Æcänö tömengä ingante guëadö guëa cädinque tæi ëmonte gänä cæquingä.”

⁵ Dadagöö godö cæcä beyænque mönö guññönongä iñömö nämanque pönente änewönongä badinque Wængonguï ingantedö ante babæ wapiticæ ante änewëninge, Botö Wængonguï bai imopa cæminii, änewönongantapa. Ayæ awënë badinque nē angä badingä inte mönö guññönongä iñömö coadenta i doo apäicäa mänimpoga iñonte, Ìimaï cæedäni, ante aacantapa. ⁶ Ayæ tömengä mäniñedē Wængonguï ingantedö ante wænæ wænæ babæ wapiticæ ante änewönongä inte Wængonguï ëmöwo ante tömengä nänö quëwëñömö ante babæ wapiticæ ante änewönongantapa. Tömänäni öönædē nē quëwänäni inänitedö ante adobai babæ wapiticæ ante änewönongantapa. ⁷ Tömengä Wængonguï quinäni inänite guëadö guëa cæcäcäimpa, ante cädinque dadagöö godö cæcä beyænque tömengä nämä tæi piñængä badinque tömänäni inänite tæi ëmongä inte gänä cæcantapa. Ayæ dadagöö godö cæcä beyænque mönö guññönongä iñömö woadäni näni cabo woadäni näni cabo incæ wacä awënë näni cabo wacä awënë näni cabo incæ wadö näni tedecabo wadö näni tedecabo incæ wabæca näni quëwencabo wabæca näni quëwencabo iñönänite tömengä tömänäni awënë badinque tömänäni inänite, Ìimaï cæedäni, ante nē angä bacantapa.

⁸ Mänömaï beyæ tömämæ quëwänäni iñömö tömengä ingante, Bitö Awënë Wængonguï bai imidö angüënë, ante apænedänimpä. Wængonguï inguipoga nänö badöñedē, Botö Codotedo ingante do wänönäni wæncæcäimpa, ante do angacäimpa. Ìingä Codotedo, Näni quëwenguinta, ante nänö yewæmongaintaa ædänidö ëmöwo

yewämönämaï inäni iñömö tömënänique mönö guiñëongä ingante, Bitö Awënë Wængonguï bai imidö anguënë, ante apäñecädänimpa.

⁹ Nē ēamonca imini inte ēñēedāni.

¹⁰ “Æcāmenque ingante ante apäñedinque Wængonguï, Ao bæi ongonte tee mönete bai cæedāni, angä ininque

tömengä ingante do bæi ongonte tee möñecädänimpa.

Æcāmenque ingante ante apäñedinque Wængonguï, Ao yaēmenca wänömīni wæncæcäimpa, angä ininque

tömengä ingante do yaēmenca wänönāni wæncæcäimpa.”

Mänömaï beyä mīnitö Wængonguï quimīni iñömö wæntæye inämaï inte ee cæcæmīn-
impa. Edæ tömengä ingante godömenque wede pönencæmīnimpa.

¹¹ Ayæ ate wacä babæcä bai nē guiñëongä guiquënë onguipodē quēwente ta pöñongä atabopa. Codotedoidi önömoncawæ mēwāa nāni ēmoncadö bai tömengä adobai encacä ingantapa. Incæte tömengä dadagöo bai tedecantapa. ¹² Mönö guiñëongä tänocä pöningä nänö änö beyænque ayængä pöningä iñömö awënë badinque tänocä beyænque äninque, ñimaï cæedāni, ante nē aacä ingantapa. Tānocä pöningä mönö guiñëongä ämocate beyæ nē wæncæ cæcä incæ wæætē gāmæ cæcadingä iñongante ayængä pöningä iñömö tömämæ quēwënāni inānite angä ēñëninque tömānāni tänocä pöningä ingante, Bitö Awënë Wængonguï bai imidö anguënë, ante apäñedänitapa. ¹³ Māningä mönö guiñëongä ayængä pöningä, Mā pönī cæbo adinque ēñencädänimpa, ante cædinque badongampa. Ayæ godömenque mā pönī cæcä beyænque waodāni edonque pönī ayönāni öönædē inö incæ gonga inguipoga wææ adänitapa.

¹⁴ Mönö guiñëongä tänocä pöningä nänö änö beyænque tömengä weca mā cædinque ayængä pöningä iñömö tömämæ quēwënāni inānite oda cæte nāni goquinö ante mäocä godänitapa. Edæ tömënāni inānite äninque, Mönö guiñëongä yaēmenca guiyömo wæætē gāmæ cæcate nē mīingä quēwengä nänö emönö bai adobai badöedāni, angä ēñente badonte concädänitapa. ¹⁵ Mönö guiñëongä ayængä pöningä iñömö eyepæ cædinque mönö guiñëongä tänocä pöningä nänö emönö bai nāni badöninca incæ, Tedecæcäimpa, ante cæcä ate māninca incæ oo guëmangantapa. Tömënāni nāni badöninca ante waodāni Baa äninque, Bitö Awënë Wængonguï bai imidö anguënë, ante apäñedāmaï ināni inānite māninca incæ ä beyænque wänönāni wänänitapa.

¹⁶ Ayæ awënëidi bai ināni incæ önönānique incæ māincoo ēadāni incæ māincoo ömæpodāni incæ wacä godonte æningä beyænque nē cæte quēwënāni incæ nāmanque cæte quēwënāni incæ māñināni tömānāni inānite tömengä nänö änö beyænque önompo tömempo inö yewämöināni badänitapa. Wæætē önompo tömempo inö yewämönämaï ināni inte tömënāni önönemö inö yewämöināni badänitapa. ¹⁷ Tömengä nänö yewämöi yewämönämaï ināni guiquënë tömënāni māincoo ædö cæte godonte ænguñānii. Ædö cæte godonte æñāni weca gote tömënāni māincoo inī godonte ænguñānii. Ayæ māñinö ante yewämöi iñömö mönö guiñëongä tänocä pöningä emöwo impa. Wīi tömengä emöwo yewæmonte i bai tömengä emöwo ante beyæ, Æpodö i, ante yewæmonte impa.

¹⁸ Māñinö ante ēñencæte ante nāni ēñënö ante eyepæ encadāni inte ēñencädänimpa. Ocai nē encacä ininque, Mönö guiñëongä tänocä pöningä nänö, Æpodö i, ante ēñencæte ante cæcæcäimpa. Edæ tömengä, Æpodö i, ante waocä, Æpodö i, ante adopo impa. Tömengä nänö, Æpodö i, ante teitiento teitenta i tei impa.

14

144.000 ganca ināni nāni ämotamini äinö

¹ Ayæ botö ayö mote Wængonguï Codotedo änanquidi iñömö Tiöno nāni anquidi māñiñömö a ongongä atabopa. Tömengä weca waodāni tiento coadenta i coatodo mīido ganca ināni inte Wængonguï Codotedo emöwo adobai tömengä Mæmpo Wængonguï emöwo nāni önönemö inö nē yewämöināni inte a ongönāni atabopa. ² Ayæ botö ēñëñömote öönædē inö tedepāmo ante ñænæ tēñabo ante bai detæbo eyequei tē bai

ëñëninque adobaï waodäni nani adapate nani ampoque inte tæiyænäni ampoyönäni ante bai tedepämo të ëñentabopa. ³Tiento coadenta i coatodo müido ganca inäni iñömö mä äninque waa ämotamini ante änänitapa. Wængongui nänö aacæ tæ containpa gäänë ämotamini äñönäni miinäni quëwënäni mëa go mëa ganca inäni në aadäni në Picänäni tönö ëñänänitapa. Tiento coadenta i coatodo müido ganca inäni inguipoga quëwënäni tönö adoyömö quëwëñönäni, Godonte ämo beyænque quëwenguimini, ante Wængongui nänö në äninäni i ämotamini äinö ante ëñente ancädänimpa. Wadäni guiquënë ædö cæte ëñente anguinäni.

⁴Iinäni iñömö Wængongui ingante ante waëmö quëwencämönimpa, ante cædinque, Onquiyängä, ante në towënämaï ingainäni inänipa. İninque tömënäni Wængongui Codotedo ædönö gocä tömengä miñæ cöwë godänipa. Tömënäni waodäni tönö adoyömö quëwëñönäni Itota, Botö wepæ beyænque quëwenguimini, ante tömënäni inänite ængacäimpa. Tänä amiña bayedë tä pedinque minitö, Wængongui qui baquimpa, ante mini cönöni bai mäninäni adobaï Wængongui quinäni badinque Wængongui Codotedo quinäni inänipa. ⁵Adodäni cöwë babæ änämaï inäni ininque wadäni ædö cæte tömënäni inänitedö ante, Babæ änänipa, ante anguinäni. Tömënäni edæ cöwë wënæ wënæ cädämaï inänipa töö.

Wængongui anquedoidi mënaa go adocanque nani änö

⁶Ayæ Wængongui anquedo wacä iñömö öönädë inö pö pao pao gocä atabopa. Inguipoga në quëwënäni inänite wabæca nani quëwencabo wabæca nani quëwencabo incæ waodäni nani cabo waodäni nani cabo incæ wadö nani tedecabo wadö nani tedecabo incæ wacä awënë nani cabo wacä awënë nani cabo iñönänite anquedo tömänäni inänite Wængongui wantæpiyæ cöwë nänö watapæ apænedö ante ëñencädänimpa, ante apænecæte ante pongantapa. ⁷Mäningä Wængongui anquedo iñömö yedæ iimaï äninque, “Wængongui apænte nänö anguiönæ do iinque bayonte mäniönæ tömämäni miini cægäinö ante tömengä apænte ancæcäimpa. İninque tömengä ingante guñëninque ee aedäni. Adobaï tömengä ingante waa aedäni. Tömengä edæ öönädë incæ inguipoga incæ æpæntibæ incæ æpæ tayömö incæ tömäa në badongaingä ingante minitö, Bitö Awënë Wængongui imidö angüënë, ante ædæ wææninqe watapæ apæneedäni. Mäninqe ämopa,” angantapa.

⁸Mäningä Wængongui anquedo gocä ate wacä Wængongui anquedo ayängä pöninque iimaï angantapa. “Babidönia nani äñömö do wo ewente batimpa. Babidönia nani waëmö quëwëñömö i incæte do wo ewente ba aedäni. Mäniñömö në quëwënäni wënæ wënæ cædinäni iñömö onquiyängä në towengä bai cædinque biinömæ bete quidi quidi dowæninqe towencädänimpa, ante ti nämæ godonte bai cädänipa. Tömënäni mänömaï godö cädäni beyænque wabæca nani quëwencabo wabæca nani quëwencabo wæætë wënæ wënæ cädänitapa. Mäninqe ämopa,” angantapa.

⁹⁻¹⁰Ayæ mäningä Wængongui anquedo gocä ate wacä Wængongui anquedo tömengä pöninque yedæ iimaï angantapa. “Mönö guñëningä tänocä pöningä ingante æcänö, Bitö Awënë Wængongui bai imidö angüënë, ante apænecäa. Ayæ tömengä nänö emönö bai nani badönica gäänë ædæ wææninqe æcänö apænecäa. Wængongui tömënäni inänite nanguï piincæcäimpa. Tömënäni önompo incæ önönemö incæ mönö guñëningä nänö yewæmöi në yewæmöinäni adinque Wængongui adobaï tömënäni inänite nanguï piincæcäimpa.” Äninque Wængongui anquedo godömenque apænecantapa. “Mäninäni Wængongui biinömæ nänö piimæ becädänimpa. Mänimænque äninque tömengä nänö piinte owætadë pe niñængantapa. Mänimænque në bete bai inäni iñömö nanguï pöni wæwencädänimpa. Wængongui tæiyæ waëmö anquedoidi weca ayæ Wængongui Codotedo weca gonga bæcoyömö atopode nani öö wadö gonga bæcoyömö öö wayömö mäniñömö iinäni æmäwo gonte ba bai nanguï wæwencädänimpa,” angantapa.

¹¹ “Ayæ tömënäni gonga bæcoyömö mäniiñömö wæwëñönäni nāni wæwëmāmo tēemā bai cōwē æicōompa. Woyowotæ incæ itædē incæ mänināni edæ guëmānāmaī incædān-impā. Tömënāni iñömö, Mönö guiñëngä tänocä pöningä weca ædæ wææninqe, Bitö Awënë Wængongui bai imidö angüenë, ante nē apænedāni inānīpa. Ayæ tömengä nänö emönö nāni badöinca gäänë ædæ wææninqe nē apænedāni adobai tömengä emowo nänö yewæmōi nē yewæmōināni inte mänināni tömānāni wantæpiyæ mänōmaī guëmānāmaī inte wæwencædānimpā. Māninqe āmopa,” angantapa.

¹² Mänōmaī beyæ mīnitö Wængongui quimīni iñömö tömengä nänö, iīmaī cæedāni, ante nänö wææ angainö ante eñente cædömīni inte ayæ Itota ingante godömenque wede pönēmīni inte mīnitö wæntæye ināmaī inte ee cæcæmīnimpā.

¹³ Ayæ ate botö öönædē inö tedepāmo iīmaī ante eñentabopa. “Bitö iīmaī yewæmōe,” angantapa. “Ñöwo ganca ayæ ate Awënë Itota ingante pönente nē wænāni inte tömënāni nāni toquinque.”

Ante āñongä Wængongui Tæiyæ Waëmö Önöwoca, “Ao āmopa, angampa. Nāni toquinque ingæimpā. Tömënāni nāni nanguī cægainö ñimpo cæte guëmancædānimpā. Edæ tömënāni nāni waa cægainö öönædē iñömö edonque pönī acæimpā,” ante angantapa.

Inguipoga quëwënāni beyæ amiña bai bacæimpā

¹⁴ Ayæ botö ayömo nāamænta boguimā mä owo atabopa. Adocanque Waocä eñagaingä ingä bai iñömö mänii boguimāa tæ contacä atabopa. Tömengä ocaboga awënë poganta oodo inte badöinta encacä inte tömengä nänö önönempe yaëmë bai waingamë idämæ engamë næængä atabopa. ¹⁵ Ayæ ate wacä anquedo Wængongui oncö tæiyæ waëmö oncönë ta pöninge boguimāa nē tæ contacä ingante iīmaī yedæ ante aa pecantapa. “Inguipoga quëwënāni botö imote nē wede pönente waa cædönāni iñömö nē minte pæmö bai ināni inte tömënāni nāni to amiña bayedē bai impā. Wadæ wadæ pinöninge nāni ö æñedē bai do bayonte bitö yaëmë bai bitö nææi ænte gote mänināni inānite wadæ wadæ pinonte bai cædinque ö æe.” ¹⁶ Angä eñëninge boguimāa nē tæ contacä gote inguipoga iñömö tömengä yaëmë bai nänö nææi inte wadæ wadæ pinonte bai cædinque tömānāni nē minte pæmö bai ināni inānite ö ængantapa.

¹⁷ Ayæ öönædē iñömö Wængongui oncö tæiyæ waëmö oncönë ongonde ta pöninge wacä anquedo adobai yaëmë bai waingamë idämæ engamë næænte pongantapa. ¹⁸ Tömengä pongä ate Wængongui anquedo wacä pongantapa. Wængongui oncö tæiyæ waëmö oncönë, Wængongui qui, ante iya tæe, ante nē ānongä inte nāni iya taimoga gäänë ongöninge ta pöninge yaëmë bai waingamë idämæ nē engamë næængä ingante iīmaī yedæ apænecantapa. “Inguipoga tömāo nē wënæ wënæ cædāni iñömö yowecoo bai inānīpa. Mänināni yowe ite bayedē bai ināni adinque bitö yaëmë bai bitö nææi ænte gote yowecoo wangö tadampote gæte bai cædinque tömënāni inānite cæe.”

¹⁹ Angä eñëninge Wængongui anquedo inguipoga iñömö tömengä yaëmë bai nänö nææi inte wangö tadampote cædinque yowecoo gædāni bai tömengä nē wënæ wënæ cædāni inānite adobai cæcantapa. Ayæ yowepæ ante ñænængade nāni pinä pinä gawate cæincadedē yowecoo wææntodonte bai cædinque tömengä wënæ wënæ cædāni inānite Wængongui piinte nänö päiñömö wido cæcantapa. ²⁰ Mänii tömënāni yowecoo ænte pinä pinä gawate cæincade iñömö tömënāni nāni quëwëñömö yabæca ongompa. Mäniiñömö tömënāni inānite pinä pinä gawate bai cædānitapa. Cæyönāni tömënāni wepæ nanguī pönī gotimpā. Cabayo goto winediñömö æi ganca tömënāni wepæ māninganca æi godinque todee tiento quidömetodo ganca māninganca nanguī pönī wepæ gotimpā.

15

Tiæte ganca nāni wæwenguimāmo pompa

¹ Ayæ botö ayömote Wængongui ñöwo wæætë mä pönī odömömo adinque eñencædānimpā, ante cædinque öönædē inö bamönengæ pönī badongä a owo

atabopa. Wængongui anquedoidi önompo æmæmpoque go mënaa inäni inömö öönæde ongönänite tömënanäni inänite, Minitö cæmini beyænque waodäni nänäni wæwenguimämocoo önompo æmæmpoque go mempoga pongæimpa, angä ëñente ænte pönänitapa. Mänii wæwëmämocoo æmæwo ba adinque Wængongui nänö ængui panguimämo eyepæ bapa.

² Ayæ æpæntibæ inömö awocawænta emö bai adinque botö mänintibæ tönö gonga guëa wempodente bæco atabopa. Adotibæ yæwedeca waodäni mä ongönänipa. Mäninänäni inömö mönö guinönongä ayæ pöningä ingante ante ayæ tömengä nänö emönö bai nänäni badöinca ante Baa äninque tömënanäni tæi emonte gänä cædäni inänitapa. Adodäni tömengä emowo ante, Æpodö i, ante Baa ante yewämönämaï inäni atabopa. Wængongui tömënanäni inänite adapate nänäni ampoqui godongä ænte næænte a ongönänipa. ³ Tömënanäni a ongöninque Wængongui ingante në cægaingä Möitee wodi ämotamini nänö angainö ante ayæ Wængongui Codotedo ämotamini nänö angainö ante inäni ämotamini änanäni.

“Awënë Wængongui bitö adobique Tömää Cægaïmi inte

bitö mä cædö inömö wæmö pönäni inönö angüënë.

Bitö tömämæ quëwënanäni Tæiyæ Awënë Odeyebi imidö angüënë.

Quiëmë cædinque bitö në nö cæbi imipa.

⁴ Awënë ëñëmi, Æcämë bitö imite guinönämaï inguingää.

Ayæ bitö emowo ante pönente æcämë waa adämaï inguingää.

Edæ bitö adobique tæiyæ wæmö imipa.

Tömää bitö nö cædinö edonque pönäni ba adinque

wabæca wabæca nänäni quëwëncabo tömänänäni bitö weca ponte ædæ wææninque

bitö imi, Bitö Awënë Wængongui imidö angüënë, ante ancædänimpa.”

⁵ Ayæ ate botö ayömote öönæde inömö Wængongui tæiyæ wæmö oncö incæ æmontaicö bai inte tömengä nänö nänënë owocö inömö wi ænete bayö atabopa. ⁶ Wængongui anquedoidi önompo æmæmpoque go mënaa inäni mänincönë ongonte ta pönänitapa. Tömënanäni cædäni ate waodäni nänäni wæwenguimämo inömö önompo æmæmpoque go mempoga pongæimpa. Tömënanäni weocoo wæmoncoo nino nänäni ancoo nääö bai emoncoo mongænänäni inänipa. Tömënanäni tæcætawë inö pacadeyænta oodo inte nänäni badöinta mongæënëmæinänäni inänipa.

⁷ Ayæ mīnänäni quëwënanäni mënaa go mënaa inönänäni adocanque Wængongui anquedoidi önompo æmæmpoque go mënaa inäni inönänite owætacoo adotaque adotaque pædæ godongä ænänitapa. Mänintacoo önompo æmæmpoque go mentacoo inömö oodo inte nänäni badöintacoo inte Wængongui në wantæpiyæ cöwë quëwengaingä ingä nänö ængui pämämo eyede ënentapa. ⁸ Wængongui nänö nääö apäidö beyæ ayæ tömengä nänö tæi piñämämo beyæ tömengä tæiyæ wæmö oncönë inömö tæëmämämo eyede mä ongompa. Ayæ Wængongui anquedoidi önompo æmæmpoque go mënaa inäni cædäni ate waodäni nänäni wæwenguimämo ante önompo æmæmpoque go mempoga nänäni wæwenguinganca iinque baganca æcämenque incæ Wængongui tæiyæ wæmö oncönë guidämaï incædänimpa.

16

Wængongui nänö ængui panguintacoo

¹ Ayæ ate Wængongui tæiyæ wæmö oncönë inö tedepämo yedæ tæ ëñentabopa. Në angä inömö Wængongui anquedoidi önompo æmæmpoque go mënaa inäni inänite, “Goedäni, äninque, Wængongui owætacoo nänö ængui panguintacoo önompo æmæmpoque go mäa ganca incoo næænte gote inguipoga inömö gao cædäni,” angä ëñentabopa.

² Wængongui anquedo tänocä godinque tömengä owætadë ënë incæ inguipoga gao cæcantapa. Gao cæcä ate mönö guinönongä ayæ pöningä nänö yewämöi në yewämöinänäni inte tömengä nänö emönö bai nänäni badöinca gänë ædæ wææninque

apænedäni iñönänite tömënäni ayaa nantai ñömæi tömäo baadique nantate wædänitapa.

³ Wængonguï anquedo ayæ në gocä tömengä owætadë ënë incæ æpæntibæ cæncadëmæ gao cæcä ate mänimæ iñömö do wæninäni wepæ bai bayonte mänintibædë quëwënäni tömänäni wænänitapa töö.

⁴ Wængonguï anquedo ayæ në gocä tömengä owætadë ënë incæ æpænë tömänonga gao cædinqe æpæ tayömö tömäñömö gao cæcä ate mänimæ tömämæ wepæ batimpa.

⁵ Ayæ ate Wængonguï anquedo æpæ tömämæ beyæ në angä inte iïmaï apæneçä ëñentabopa.

“Mönö Tæiyæ Waëmö inömi ëñemi, bitö wëenëñedë do në quëwengaïmi iïmi ñöwobi adobi inömi imipa.

Mänömaï tömënäni inänite apænte ante päninge bitö nö cædinqe apænte päniimi imipa.

⁶ Edæ bitö quïnäni tönö bitö beyæ në apænegainäni inänite wænönäni ate tömënäni në wænäni wepæ näate bagadänimpa.

Bitö wæætë në wænonte näate badäni näni cægaï beyæ wepæ godömi begadänimpa,” angantapa.

⁷ Ayæ Wængonguï quï, ante näni iya täimoga inö tedepämo të ëñentabopa. “Ao ämopa. Awënë Wængonguï bitö adobique Tömää Cægaïmi inte, Iïmaï pancæboimpa, ante bitö apænte angainö bai cædinqe tömënäni inänite päninge bitö cöwë nö cæte waa pämpa.”

⁸ Wængonguï anquedo ayæ në gocä tömengä owætadë ënë incæ nænque mä owoyömö mäniñömö gao cæcantapa. Ayæ waodäni ämontaiya montæ gongate wæcædänimpa, ante cædinqe në godö angä beyænque nænque nanguï ti näwä batimpa.

⁹ Mänii nanguï ti näwante beyæ waodäni montæ gongate badäni incæte tömënäni näni wënæ wënæ cædinö ante, Ancaa wæwente awädö, ante ayæ pönënämaï inäni inte ñimpo cædämaï inte Wængonguï ingante waa adämaï inänitapa. Tömënäni, Wængonguï cæcä beyænque mönö wæwëmämocoo pönimpa, ante wædinqe Wængonguï ingante püininqe tömengä ëmowo ante wënæ wënæ babæ ante tedewënänitapa.

¹⁰ Wængonguï anquedo ayæ në gocä tömengä owætadë ënë incæ mönö guïñëongä tänocä pöningä nänö aacæ tæ containpaa gao cæcä ate tömengä awënë odeye inongä inte nänö aayömö mä mämonte bai batimpa. Waodäni nantate wædinqe önonguënëwa æo pocænguënëwate wædänitapa. ¹¹ Mänömaï wædäni incæte tömënäni näni wënæ wënæ cædinö ante, Ancaa wæwente awädö, ante godömenque pönënämaï inäni inte ñimpo cædämaï inänitapa. Wæætë nantai baate nantate wædinqe Wængonguï öönædë quëwëongä ingante püinte badinqe wënæ wënæ babæ ante tedewënänitapa.

¹² Wængonguï anquedo ayæ në gocä tömengä owætadë ënë incæ ñænæ önonga Eopadatedö näni änonga mäniinonga gao cæcä ate awënë odeyeidi nænque tamönö quëwente näni ponguïnö taadö ante önö tömäo amimö batimpa.

¹³ Ayæ wænæidi wentamö näni ewocacabo mënaa go adocanque inäni iñömö weque bai inäni ta pönäni atabopa. Dadagöö önönë inö adocanque wënæ ta pongantapa. Mönö guïñëongä tänocä pöningä önönë inö wacä wënæ ta pongantapa. Ayæ Wængonguï beyæ në apænedömo imopa, ante në babæ apænedongä önönë inö wacä wënæ pongantapa. ¹⁴ Mäninäni wænæidi önöwocaidi inäni inte mä cædäni inänipa. Iinäni iñömö tömämæ awënë odeyeidi weca ñneçæ godinqe tömënäni inänite apænedinqe, Awënë Wængonguï adocanque Tömää në Cægaingä inte nänö apænte angüönæ iñonte mïnitö godongämæ ponte guëadö guëa cæcæmïnimpa, ante cædänipa.

¹⁵ “Mönö Awënë nämä incæ iïmaï angantapa. Aedäni. Në awëmö ængä iñontobæ pongä bai botö adobai änämaï inte poncæboimpa. Æyedënö ponguingä, ante në mönämaï ongongä iñömö tömengä wänö cönongä bai inongä inte nänö toquinque. Edæ tömengä, Ömaabo inämaï incæboimpa, ante ayæ, Guïñëñiate wædämaï incæboimpa, ante tömengä weocoo tömë weca ee mangä inongä ingampa,” angantapa.

¹⁶ Mänii wənæidi önöwocaidi tömämæ awënë odeyeidi inänite añecæ gote änäni ëñëninque awënë odeyeidi iñömö tömënäni tontadoidi tönö Adämaguedoö ebedeo tededö nani añömö adoyömö godongämæ pönänitapa.

¹⁷ Ayæ Wængongui anquedo tömangä nê gocä tömengä owætadë ënë incæ woboyæ owoyömö mäniiñömö gao cæcä ate öönädë inö Wængongui tæiyæ waëmö oncönë tömengä nänö aacæ tæ contayömö mäniiñömö tedepämo yedæ tededinque, “Nïwo iinque batimpa,” angantapa.

¹⁸ Ayæ ate yædæ yædæ näinimpa. Detæbo tæi tæi tæ goyö yedæ pönï änimpa. Ayæ goinque nanguï pönï ocæ ocæ gotimpa. Waodäni inguipoga nani quëwenganca tömanganca mänii goinque bai wa goinque cöwë godämaï inimpa. ¹⁹ Goinque ocæ ocæ goyonte tömënäni nani iñænæ quëwëñömö incæ tænguimæ tænguimæ godinque mëñömonga go adoyömonque batimpa. Ayæ wabæca nani quëwencabo wabæca nani quëwencabo incæ tömäo nani quëwëñömö onconcoo acapowate bogocæ tæ gowæänimpa. Wængongui adobai, Babidönia nani waëmö quëwëñömö quëwënäni wënæ wënæ cädänipa, ante pönente wædinque ænguï badinque, Mini wæwenguinque impa, ante owæta biinömæ nänö pïimæ eyede ënë godonte bai cædinque tömënäni inänite nanguï pïininque pangantapa. ²⁰ Tömää wää tëiwænë iñömö yogæ guitimpa. Ayæ onquiyabocoo adobai dæ bibitapæ batimpa. ²¹ Ayæ öönädë inö yoguica cöönæ bai waodäniya tæi tæi wæänimpa. Mäninca tæi tæi wæäninca adocaque incæ wodo tiëë diboda tee mä ganca enca impa. Yoguica wënæ wënæ incapa, ante adinque waodäni, Mäninca mönö wënæ wënæ wæwëmämo impa, äninque Wængongui ingante püinte badinque wënæ wënæ babæ ante tedewënanitapa.

17

Onquiyängä mäincoo beyæ nê towente quëwënongå

¹ Wængongui anquedoidi önompo æmæmpoque go mäa ganca inäni önompo æmæmpoque go mäa ganca owætacoo nê näænäni iñönänite adocanque botö weca ponte, “Pöe, angantapa. Onquiyängä mäincoo beyæ nê towente quëwënongå iñömö æpæncoo yædöpäa nê tæ contacä apænte nänö panguinö ante botö odömömo acæbiimpa. ² Inguipoga awënë odeyeidi incæ tömengä tönö towengadänimpa. Waodäni inguipoga quëwënäni incæ adobai tömengä towëinönö beyæ tömengä biinömæ bete bai quidi quidi dowænte bai pönënamäi cægadänimpa,” ante apænecä ëñentabopa.

³ Wængongui Önöwoca incæ botonga pö guiyongä botö wiimonte bai iimaï atabopa. Wængongui anquedo adocä iñömö botö imote ö ænte mäo önömæca iñömö cönongä ongontabopa. Mäniiñömö ongöinque botö onquiyängä babæcä bai nê guiiñënongåa mongænte a ongongä atabopa.

Mäningä mönö guiiñënongå opatawæ ëñadongä inte ëmöwocoo tömengä baonga godämæ tömangä yewæmöi ëñacä ingantapa. Mäniiwocoo Wængongui ingantedö ante wënæ wënæ babæ wapiticæ äniwocoo inönimpa. Mäningä mönö guiiñënongå nänö ocabocoo önompo æmæmpoque go mäa encacä inte tömengä nänö önömoncawæncoo önompo tipæmpoga ëmoncacä ingantapa. ⁴ Onquiyängä iñömö tömengä weocoo awënëidi waëmoncoo nani mongæncoo tönö opatawæ ëmoncoo mongængantapa. Tömengä, Botö waëmö incæboimpa, ante oodo badöincoo tönö dicamö nani nanguï godonte ænincoo tönö pededamö nani ämö mänimoncoo mongænte ingantapa. Tömengä önönempo owætadë oodo inte badöintadë quimæmë baapæ bai i eyede engapæ näængantapa. Mäningä onquiyängä quiemë nänö wënæ wënæ cæpämö nänö towente quëwënö bai mänintadë näængantapa. ⁵ Adocä onquiyängä tömengä önönemö inö ëmöwo yewæmöi ëmongä ingantapa. Mäniiwo wë wodonte bai i incæte iimaï ante impa. “Babidönia nani waëmö quëwëñömö i incæte onquiyängä nê towengä bai impa.

Waodäni nê godö towënäni wäänä bai mäningä onquiyängä ingampa.

Ayæ adobai inguipoga quëwënäni wiwa nani cæinönö ante nê cädäni wäänä bai adocä onquiyängä ingampa.”

Mänömaï tömengä önönemö inö yewæmonte emongantapa. ⁶ Wængonguï quinäni ingainäni tönö Itota ingante ante apænedäni beyæ në wængainäni tömënäni wepæ bete bai mäningä onquiyængä quidi quidi dowænte bai ingä botö atabopa. Tömengä ingante adinque botö ancai guiñente wætabopa.

⁷ Ancai guiñente wæyömote Wængonguï anquedo botö imote iïmaï angantapa. “Quinante ancai guiñente wæbii. Mönö guiñëñongä iñömö tömengä ocabocoo önömpo æmæmpoque go mencaä encacä inte tömengä önömoncawæncoo önömpo tipæmpoga emoncacä inongä inte onquiyængä ingante në mongængä ingampa. Onquiyængä ingante në mongængä mönö guiñëñongä tönö onquiyængä tömëna nänä wë wodonte iñi æbänö i, ante apænebo ëñëe. ⁸ Adocä mönö guiñëñongä bitö adingä iñömö wëenëñedë quëwengaingä inte ñowo dæ angä incæte ayæ ate tadömengadænguipodë inö ææ ta poncæcäimpa. Ta pöninque tömengä nänö æmæwo ömäe ewenguinque ingæimpa. Wængonguï, Quëwenguinta, ante inguipoga badönämaï iñedë nänö yewæmongaintaa inguipoga quëwënäni tömënäni emöwo në yewæmönämaï inäni iñömö tömënäni iñömö mönö guiñëñongä do quëwengaingä ñowo dæ angä incæte ayæ ate pongä adinque ancai guiñente wæcædänimpa,” ante Wængonguï anquedo apænecantapa.

⁹ Ayæ tömengä wæætë apænecantapa. “Mäninö ante ëñencæte ante ocai ëñënö në encacä inte ëñencæcäimpa. Mönö guiñëñongä tömengä önömpo æmæmpoque go mäa ocabocoo iñömö önömpo æmæmpoque go mäa änanquidi bai inänipa. Mänii änanquidiboga onquiyængä tæ contacä ingampa. Mänii ocabocoo adobai önömpo æmæmpoque go mäa awënë odeyeidi bai inänipa. ¹⁰ Mänimpodäni iñönänite önömpo æmæmpoque awënë odeyeidi inänite wido cædänitapa. Adocanque awënë odeye iñömö ñowo aacä ingampa. Wacä awënë odeye ayæ pönämaï ingä incæte tömengä pöninque wantæ iñö ongonte aacæcäimpa. ¹¹ Önömpo æmæmpoque go mäa ganca awënë odeyeidi nänä cabo iñönänite mönö guiñëñongä adocä inongä incæte tömënäni beyæ ponguingä ingampa. Tömengä iñömö wëenëñedë në quëwengaingä incæ ñowo dæ angä inongä inte tömengä nänö æmæwo ömäe ewenguinque poncæcäimpa,” ante Wængonguï anquedo apænecantapa.

¹² Ayæ tömengä wæætë apænecantapa. “Ayæ önömpo tipæmpoga önömoncawæncoo bitö adimoncawæncoo iñömö önömpo tipæmpoga awënë odeyeidi bai inäni incæte ayæ aadämaï inänipa. Incæte ayæ ate tömënäni inänite änäni ate awënë odeyeidi badinque tömënäni, iïmaï cæedäni, ante änäni bacædänimpa. Ayæ mönö guiñëñongä tönö tömënäni adoque ooda ganca godongämæ aacædänimpa. ¹³ Tömënäni adodö ante pönënäni inte, Mönö tæi piñænö ante guiñëñongä ingante godömö æncæcäimpa. Ayæ awënë odeyeidi inömö inte mönö, iïmaï cæedäni, ante në ämö imö bai mönö tömengä ingante ämö në angä bacæcäimpa.

¹⁴ “Mäninäni Wængonguï Codotedo ingante guëadö guëa cæcædänimpa. Incæte tömengä iñömö awënëidi tömänäni Awënë inongä ingampa. Ayæ waodäni awënë odeyeidi iñönänite tömengä Tæiyæ Awënë Odeye inongä ingampa. Ininque tömengä tæi emönongä inte tömënäni inänite gänä cæcæcäimpa. Tömengä, Botö miñæ tee empo goquimäni, ante waodäni inänite aa pedinque apænte nänö në ængainäni inte tömengä miñæ cöwë ædæmö cæte tee empo godäni inänipa. Mäninäni adobai tömengä tönö godongämæ guëadö guëa cæte wænonguinäni inte tæi emonte gänä cæcædänimpa,” ante Wængonguï anquedo apænecantapa.

¹⁵ Ayæ tömengä wæætë botö imote iïmaï apænecantapa. “Onquiyængä mäincoo beyæ towente quëwëñongä inte æpæncoo yædopäa tæ contacä abitapa. Mänii æpæncoo iñömö tæiyænäni waodäni bai inänipa. Wabæca nänä quëwencabo wabæca nänä quëwencabo incæ wadö nänä tedecabo wadö nänä tedecabo incæ waodäni tæiyænäni inänipa. Mäninäni tömänäni mänii æpæncoo bai inänipa. ¹⁶ Ayæ önömpo tipæmpoga önömoncawæncoo bai awënë odeyeidi tönö mönö guiñëñongä iñömö tömënäni bitö në adinäni inönäni inte onquiyængä mäincoo beyæ në towente quëwëñongä ingante piincædänimpa. Piinque, Tömengä ingante æmæwo ömäe ewengæimpa, ante cæcædänimpa. Tömengä mäincoo tömancoo ö ænäni ate ömacä inte wæyongante

tömengä baö cæninque tömengä ingante æmæwo iya tancædänimpa. ¹⁷ Wængongui, Botö angai bai iinque baganca tömënäni botö pönönö ante cæcædänimpa, ante godö cæcä beyænque mäninäni awënë odeyeidi nani mimönë adodö ante pönënanipa. Pönëninque tömënäni godongämæ Ao äninque, Mönö guiñënogä aacæcäimpa, ante tömengä ingante, Mönö tæi piñænö ante godömö ænguingä, ante godönäni ængantapa.

¹⁸ “Mäningä onquiyængä bitö adingä bai Babidönia nani waëmö quëwëñömö adobai impa. Mäniñömö awënëidi iñömö tömämæ awënë odeyeidi inänite në aadäni inänipa,” ante Wængongui anquedo apænecantapa.

18

Babidönia nani quëwëñömö do wo ëwente batimpa

¹ Ayæ ate Wængongui anquedo wacä inte öönædë inö wææ pongä atabopa. Tömengä tæi piñængä inte nangui angä ingä inte nämä nänö ñäö apäite ëmönö inte inguipoga iñömö ñäö apäicä atabopa. ² Tömengä nänö tedepämo inte iimaï yedæ aa pedinque, “Babidönia nani äñömö do wo ëwente batimpa. Babidönia nani waëmö quëwëñömö i incæte do wo ëwente ba aedäni.

Badinque wënæidi nani owoyömö batimpa.

Wënæidi wentamö ewocadäni tömänäni mäniñömö tee mönincönë bai quëwënanipa.

Ayamöidi baacäidi tömänäni adobai mäniñömö wææ cæte bai owodänipa.

³ Wabæca nani quëwencabo wabæca nani quëwencabo incæ tömänäni

babidöniaidi wiwa nani towëinënö beyæ

tömënäni biinömæ bete quidi quidi dowænte bai wædänipa.

Inguipoga awënë odeyeidi incæ babidöniaidi tönö towënanipa.

Babidönia iñömö quëwënanäni nämanque ante pönente tocæte ante mäincoo nanguï pönï ænte ëadäni beyænque

inguipoga në godonte ænäni iñömö mäincoo nanguï pönï ëadäni badänipa,”

ante Wængongui anquedo aa pecantapa.

⁴ Ayæ öönædë inö wacä tedepämo tedecä ëñentabopa.

“Botö guiidëmini ëñëedäni. Minitö tömënäni weca quëwëmini incæte,

Tömënäni tönö godongämæ wënæ wënæ cædämaï incæmönimpa, ante cædinque wadæ tao pöedäni.

Ayæ, Wængongui tömënäni inänite päninque mönitö imönite pänämaï incæcäimpa, ante pönente wædinque wodii winonte pöedäni.

⁵ Tömënäni wënæ wënæ cædimämo iñömö cabo ti gæte cönöninque bacoo pönï ongompa.

Incæte Wængongui mäninäni nani wiwa cædimämo cöwë pönente wæcampa.

⁶ Tömënäni nani pönönï bai minitö tömënäni inänite adobai godoncæminimpa.

Tömënäni nani pönö cædinö beyæ minitö wæætë adopo godö cædinque mempoga ganca godömenque godö cæmini wæcædänimpa.

Ti nämæ godönäni bete bai wædänitawo. Minitö wæætë tömënäni owætadë ti nämæ adopopæ pe ñiñænte wempo cædëninque,

mempoga pe ñiñænte wempo cædente bai cædinque godömenque ti nämæ godömini bete wæcædänimpa, angantapa.

⁷ Edæ tömënäni nämä incæ, Mönö ñænæmö imompa, ante pönente nanguï waëmö mäincoo ëate quëwënanäni iñönänite

minütö wæætë, Tömënäni ægancadö waëmö quëwënanäni, ante adinque

tömënäni inänite adoganca piinte cæmini nantate wædinque tömënäni wæwente quëwencædänimpa.

Mäninäni iñömö, ‘Awënë odeye nänöogængä bai contate ongömompa. Edæ watapæ quëwëmö imompa.

Wii owæmpoingä bai iñömö inte wæwënämaï cöwë incæmöimpa,’ ante önöwënenque pönente anewënanipa.

⁸ Mänömainö ante në änäni inte adoque itædë iñonte tömënäni nani wæwëmämo iñontobæ pö ate nanguï wæcædänimpa.

Mäniönæ tömënäni nani wænguimämo nani wænguimämo nani gue ænenguimämo pö wæcædänimpa töö.

Tömënäni onconcoo gonga bæcodocæimpa.

Edæ Wængonguï Awënë iñömö Babidönia iñömö quëwënäni inänite në apænte ante pangä iñömö edæ tömengä tömää cægaingä ingampa,” ante apænecantapa.

⁹ Inguipoga awënë odeyedi incæ Babidönia quëwënäni tönö towënäni inte tömënäni adobaï Babidönia quëwënäni tönö nanguï waëmö mäincoo godongämæ ænte èate quëwënäni. Inique Babidönia nani quëwëñömö gonga bæcododique tæemancoo baca baca æi adinque tömënäni wæwente Ca ca wæcædänimpa. ¹⁰ Babidönia iñömö quëwënäni nanguï pönï nani wæwënö adinque awënë odeyedi ancai guiñëninque, Mäninäni tönö godongämæ wæwënämaï incæmönimpa, ante gomonga a ongöninque wæcædänimpa.

“Babidönia mïni waëmö quëwëñömö në quëwëmïni mïni wæquinque ingæimpa.

Mäniñömö quëwëmïni mäincoo nanguï èate inïmïni inte mïni wæquinque.

Wënæ wënæ cæmïni iñömïnite adoque ooda iñonte Babidönia mïni quëwëñömö do apænte pante wo ewente batimpa.” ante wæcædänimpa.

¹¹ Inguipoga mäincoo ænte mante në godonte ænäni iñömö, Edæ æcänö mönö godonguëncoo godonte ænguinaa. Nöwo dæ ä, ante wæwente Ca ca wæcædänimpa.

¹² Iincoo iñömö nani godonguëncoo impa. Oodo tönö padata, dica nani nanguï godonte ænincacoo tönö pededamö nani ämoncoo mä ongoncoopa. Adobaï waëmoncoo nïno nani ancoo tönö awënëidi waëmoncoo nani mongæncoo ayæ teda nani ancoo tönö opatawæ incoo mä ongoncoopa. Quiwæmë oguï wawænque i mäniwæ mä ongoncoopa. Edepante бага inte nani badönincoo tönö awænque nani nanguï godonte æniwæ inte nani badönincoo mä ongoncoopa. Yaëmenta bodonte nani äni inte nani badönincoo tönö iædo nani äni inte nani badönincoo tönö mänömodo nani anca inte nani badönincoo iñömö mänincoo tömancoo mä ongoncoopa, ante wæcædänimpa. ¹³ Cänäda nani antapo tönö oguï waa öni pæcaqui, oguï waqui nani iya täimö tönö ti nä öni pæqui ayæ oguï wapæ öni pæquimæ, biinömæ tönö oginguipæ, waëmö ædina tönö todigomö mänincoo mä ongoncoopa. Cæningäidi tönö obegaidi cabayoidi tönö cabayo inte ñä cæte nani wëä godö awotocoo mä ongoncoopa. Mänincoo tömancoo mä ongoncoopa, ante wæcædänimpa. Ayæ adobaï, Waodäni incæ në cæte quëwencædänimpa, ante cæningäidi bai godonguënemö intamompa, ante wæcædänimpa. ¹⁴ Mäninäni Babidönia quëwënäni inänite iïmaï ancædänimpa.

“Quincamë ante beïnente wæmïni incæ mäninca tömanca mïnitö weca ñöwo dæ ancapa. Mïni èadincoo tönö quïnö waëmö mïni mäincoo iñömö mänincoo tömancoo ñöwo dæ ä inique mïnitö

ömæpomïni inte cöwë wæætë ænämaï incæmïnimpa,” ante ancædänimpa.

¹⁵ Tömënäni mäniñömö quëwënäni inänite mänincoo nani godönincoo beyæ në æninäni inte në nanguï èadinäni incæ Babidönia iñömö quëwënäni nani wæwënö adinque, Mäninäni tönö godongämæ wæwënämaï incæmönimpa, ante gomonga a ongöninque ancai guiñencædänimpa. Ayæ wæwente Ca ca wæcædänimpa. ¹⁶ Ayæ iïmaï yedæ ancædänimpa.

“Babidönia mïni waëmö quëwëñömö në quëwëmïni incæ mïni wæquinque ingæimpa.

Edæ mäniñömö quëwëmïni tömëmïni weocoo waëmoncoo nïno nani ancoo tönö awënëidi waëmoncoo nani mongæncoo tönö opatawæncoo mänincooque mongæmïni imïnitapa.

Mïnitö, Mönö waëmö incæmöimpa, ante oodo inte badöincoo tönö dicamö nani nanguï godonte ænincoo tönö pededamö nani ämö mäniimoncoo mongæmïni imïnitapa.

¹⁷ Incæte adoque ooda iñonte mänincoo mïni èadincoo incæ edæ æmäwo ömäe ewente batimpa, ante në ænte godönäni edæ wæcædänimpa,” ante angantapa.

Æpæntibædo wipocoo nē tōō tōō cædönāni tönō, Wipodē nē godāni, wipodē nē cædönāni tönō, Wipo inte mǎincoo godonte ængæimpa, ante nē mǎo godāni tōmānāni mǎnināni gomonga a ongoncædānimpa. ¹⁸ Babidōnia nāni quēwēñōmō gonga bæ-cododique tēēmancoo baca baca æi adinque iīmaī yedæ ancædānimpa, “Iī Babidōnia nāni waēmō quēwēñōmō bai wayōmō nāni waēmō quēwēñōmō edæ dæ ampa, ante wæcædānimpa,” ante angantapa. ¹⁹ Nē wæwēnāni inte nāni cæi bai onguipo guidimō ænte ocaboga wo ææntodonte wææ guicadinque Ca ca wædinque iīmaī yedæ ancædānimpa,

“Babidōnia nāni waēmō quēwēñōmō nē quēwēnāni nāni wæquinque ingæimpa.

Māniñōmō æpæntibædo wipocoo nē ēadāni inte

tōmēnāni nāni godōnincoo māniñōmō quēwēnāni inānite godonte æninque tōmānāni nanguī ēadāni badānitapa.

Ayæ adoque ooda iñonte Babidōnia nāni quēwēñōmō tōmāo æmæwo omæe ewente batimpa, ante ancædānimpa,” angantapa.

²⁰ Māninō ante ānāni ate, Tōmāmīni oōnædē iñōmō quēwēmīni māniñōmō wo ewente i adinque watapæ tocæminimpa.

Wængonguī quīmīni adobaī

Itota nänö nē da godongaīmīni tönō

Wængonguī beyæ nē apænemīni tönō

mīnitō tōmāmīni māniñōmō wo ewente i adinque watapæ tocæminimpa.

Edæ, Mīnitō imīnite æbānō wēnæ wēnæ cædāni, ante adinque

Wængonguī tōmēnāni nāni quēwēñōmō quēwēnāni inānite apænte āninque pangā ate tocæminimpa, ante angantapa.

²¹ Ayæ Wængonguī anquedo nē tæi ēmongā iñōmō dicabo nāni mō mō equinca bai ñænængade dicabo æninque æpæntibæ cæncadēmæ wo guītōdōninque iīmaī angantapa.

“Māninca æpæntibæ cæncadēmæ tæi wo guītōdōmo gui bai

Babidōnia nāni waēmō quēwēñōmō

wo ewente dæ ba ate cōwē adāmaī incædānimpa.

²² Iñinque, Adapate nāni ampogainō incæ āmotamīni nāni angainō incæ

ōōña bai nāni we we oōngainō incæ todompeta nāni ancadeca nāni we we oōngainō incæ māniñōmō cōwē ēñēnāmaī ingæimpa.

Quiēmē badōnāni incæ nē badongaināni māniñōmō cōwē dæ ancædānimpa.

Tōmēnāni nāni dicabo mō mō equinca inte cæyōnāni dicabo dadi dadi cæyedē ā bai māniñōmō cōwē wīi ēñenguīnānidō anguēnē.

²³ Do nāni tī wodōnoincade māniñōmō cōwē tica ēñēnāmaī ingæimpa.

Onquiyængā ingante nē monguingā māniñōmō cōwē dæ ā mōnāmaī inguīnānidō anguēnē.

Māniñōmō mǎincoo ænte mante nē godonte ænāni iñōmō inguipoga ñænænāni inte ongongadānimpa.

Ayæ idōidi yewænte bai cædinque māniñōmō quēwēnāni, Waēmō mǎincoo, ante wapiticæ ānewēnāni beyænque wabæca nāni quēwencabo wabæca nāni quēwencabo incæ tōmānāni nāni quēwencabo oda cæte gogadānimpa,” angantapa.

²⁴ Wængonguī beyæ nē apænegaināni inānite wænōninque māniñōmō quēwēnāni incæ Wængonguī quīnāni inānite godōmenque wænōnāni wængadānimpa. Edæ inguipoga wænōnāni nē wængaināni tōmānāni māniñōmō wænōnāni wænte bai ingadānimpa.

19

¹ Babidōnia wo ewente ba ate oōnædē iñōmō waodāni tæiyænāni adotedæ ogæ tededāni bai ēñentabopa.

“Mōnō Awēnē ingante watapæ apænecæimpa, ante, Adedoya, āninque,

Mōnō Wængonguī mōnō imonte, Quēwencæminimpa, ante nē Ængā inongā ingampa.

Tömengä ñäö emongä inongä ingampa. Ayæ tömengä täi piñængä inongä ingampa.

² Edæ, Wængongui, ñimai pancæboimpa, ante nänö apænte angainö bai cædinque tömengä cöwë nö cæte waa pangampa.

Babidönia inñömö onquiyængä maincoo beyæ në towente quëwënongå bai impa.

Mäniñömö quëwënanäni në wiwa cædäni beyænque

inguiyoga quëwënanäni wæætë në wiwa cædäni badäni adinque

Wængongui mäniñömö quëwënanäni inänite apænte ante pangantapa.

Wængongui ingante në cædinäni inänite adodäni wænönäni adinque tömengä wæætë tömënanäni inänite wænongä wænänitapa,” ante änänitapa.

³ Ayæ wæætë ogæ tededinque,

“Adedoya,” änänipa.

“Mäniñömö tēemancoo cöwë baca baca æicöompa,” ante änänitapa.

⁴ Mäniñedë Wængongui nänö tæ containpaa tæ contayongante në aadäni në Picænäni bæinticoatodo ganca inäni tönö miinäni quëwënanäni mënaa go mënaa inäni inñömö ædæ wææninque, Bitö Wængongui Awënë imidö angüënë, äninque “Amëë, Adedoya,” ante aa pedänitapa.

⁵ Wængongui nänö tæ containpa inö tedepämo ñimai tededinque, “Wængongui ingante në cæmini inte

tömengä ingante në guiñente ëñente cæmini inñömö

në awënëidi imini incæ önöminique incæ minitö tömämäni,

Mönö Wængongui ingante watapæ apænecæimpa, ante apæneedäni,” angantapa.

Wængongui ingante watapæ apænecæimpa, ante apæneedäni,” angantapa.

Wængongui Codotedo monguingä ææmæ

⁶ Ayæ adobai waodäni tæiyænäni adotedæ ogæ tededäni bai ëñentabopa. Ñænä tēñabo ä bai detæbo eyequei tē bai ëñentabopa.

“Adedoya,

Mönö Wængongui Awënë Tömää në Cægäimi inte

bitö në Awënë badinque aabipa.

⁷ Mönö watapæ pönä entawëninque waa tocæimpa.

Edæ tömengä ingante apænedinque mönö, Bitö ñäö emömi imipa, ante angæimpa.

Edæ Wængongui Codotedo nänö monguinö oo bacæ cæpa cæminii.

Onquiyængä tömengä ingante monguingä inñömö, Botö nänöogængä inguingä oo pon-cæcäimpa, ante nämä incæ eyepæ cæte a ongongampa.

⁸ Tömengä ingante weocoo nino nani ancoo waëmö näämæntacoo

nänö wëñaquincoo, ante pönönäni ængä ingampa.

Wængongui quinäni nani nö cægaincoo incæ

nino nani ancoo waëmö näämæntacoo bai impa.”

⁹ Ayæ Wængongui anquedo botö imote angantapa. “Ñimai ante yewæmoe. ‘Wængongui Codotedo monguingä ææmæ pö becædänimpa, ante wente ængä në ponguinäni nani toquinque.’ ” Tömengä ayæ godömenque äninque, “Mäninö Wængongui nänö nö angainö impa,” ante angantapa.

¹⁰ Ante añongä botö tömengä önöwa inö ædæ wææninque tömengä ingante watapæ

apænecæte ante cæyömote tömengä wæætë, “Mänömai cædämai imawe, angantapa.

Botö önönque bitö bai Wængongui ingante në cæbo imopa. Edæ bitö töninädäni Itota

nänö apænegaïnö në ëñente cædäni bai botö adobai Wængongui ingante në cæbo imopa

cæbii. Edæ Wængonguinque ingante ædæ wææninque, Bitö Wængongui Awënë imidö

anguënë, ante apænee,” ante angantapa.

Itota godö odömongä beyænque Wængongui beyæ në apænedäni inñömö tömengä nänö apænegaïnö ante ewocadinque apænedänipa.

Näämænta cabayoga në tæ contacä mongænte pongampa

¹¹ Botö ayæ ayömote öönädë wi ænete bai bayö cabayo näämænta ëñacä a ongongä atabopa. Cabayo në tæ contacä mongænte pongä inongante, Tömengä cöwë pönëninque

në Ædæmö Cædongä inte, Näwangä impa, ante në Apænegaingä ingampa, ante pemonte

ingampa. Wënæ wënæ cædäni inänite tömengä nö apænte ante pänongä ingampa. Ayæ

guëadö guëa cædinque tömengä nê nō cædongä ingampa. ¹² Tömengä awinca gonga bæcodote bai ëmongä inte tömengä ocaboga pogantacoo encacä ingampa. Tömengäa ëmöwo yewæmonte ii incæte mäniwo tömenganque nänö ëñëwo impa. Wadäni ædö cæte ëñenguinänii. ¹³ Tömengä weocoo yacoo wepænë guipænente mongængampa. Tömengä ëmöwo iñömö, Wængongui nänö Angainö, ante pemonte ingampa.

¹⁴ Öönädë iñömö tontadoidi tömengä miñæ tee empote godänipa. Tömënäni nino nani ancoo waëmö näämæntacoo mongæninque cabayoidi näämænta ëñadäni yabæ tæ contate mongænte godänipa. ¹⁵ Cabayoga nê tæ contacä iñömö wabæca nani quëwencabo wabæca nani quëwencabo incæ waodäni inänite yaëmenca pancæte ante äninque tömengä önönë inö yaëmë tipængaa waingamë engamë ënedinque yædæ tadete ongongantapa. Tömengä iñömö nê tæiyæ awënë tömengä nempo quëwënäni inänite aacä bai adobai tömämæ quëwënäni inänite, Iimaï cæedäni, ante aacæcäimpa. Yowepæ ante yowecoo nani pinä pinä gawate cæincadedë pinä pinä gawate bai cædinque cabayoga nê tæ contacä Wængongui ængui nänö angainö beyænque iñömö tömënäni inänite piinte pancæcäimpa. Wængongui adocanque Tömää nê Cægaingä ingampa. ¹⁶ Cabayoga nê tæ contacä iñömö weocoo yacooga adobai tömengä önontiya ii ëmöwo yewæmonte ëñacampa. “Ayæ waodäni awënë odeyeyidi iñönänite tömengä Tæiyæ Awënë Odeye inongä ingampa. Tömengä iñömö awënëidi tömänäni Awënë inongä ingampa,” ante pemonte ingampa.

¹⁷ Ayæ wacä Wængongui anquedo nænque cæncadëmö inö a ongongä atabopa. Tömengä öönädë gämænö nê cæwodäni tömänäni inänite yedæ ante aa pedinque, “Adayömö godongämæ pödäni. Edæ Wængongui tæiyæ ææmæ ante pö cæedäni. ¹⁸ Awënë odeyeyidi incæ tontado capitäoidi incæ onguiñænäni tæi piñænäni incæ cabayoidi incæ cabayocooga inte nê tæ contate godäni incæ iinäni tömänäni wænäni ate tömënäni baö cæncæte ante pödäni. Waodäni awënë beyænque nê cæte quëwënäni incæ nê nämä cæte quëwënäni incæ awënëidi incæ önönänique incæ tömänäni baö pö cæedäni,” ante aa pecantapa.

¹⁹ Ayæ botö ayömö mönö guiñënogä tönö inguipoga awënë odeyeyidi tönö tömënäni tontadoidi tönö adoyömö godongämæ pöninque, Cabayoga nê tæ contacä ingante ayæ tömengä tontadoidi inänite mönö guëadö guëa cæcæimpa, ante cædäni atabopa. ²⁰ Incæte guëadö guëa cæyönänite tömënäni näëmæ mönö guiñënogä ingante bæi ongöninque, Wængongui beyæ nê apænebo, ante nê babæ äningä ingante adobai bæi ongönänitapa. Nê babæ änogä iñömö mönö guiñënogä beyænque mä pönï cæcä inongäimpa. Ininque mönö guiñënogä tömengä nänö yewæmöi nê yewæmöinäni iñömö tömengä nänö ëmönö bai nani badöninca gäänë ædæ wææninque nê apænedäni inte tömënäni nê babæ änogä nänö mä cædö adinque guiñente wædinque oda cædönänipa. Ininque mönö guiñënogä tönö nê babæ änogä ayæ miina quëwëñönte atopode nani änotibæ gonga bai nani bæcodotibæ cæncadëmæ wido cædänitapa. ²¹ Tömëna miñæ pönäni inänite guiquënë cabayoga nê tæ contacä tömengä önönë inö yaëmenca yædæ tadete ongöninque do wænogä wænänitapa. Ininque nê cæwodäni baö ade cænänique tömänäni nê wænänäni baö tömo pönï cæwënönäni inänitapa.

20

Miido wadepo iñonte æbänö baquii

¹ Wængongui anquedo wacä iñömö tadömengadænguipo ontatodemö wi ænequi tönö nänömencaimë nænämë önönempo næængä inte öönädë inö ta wæængä atabopa. ² Ta wææninque tömengä dadagöö ingante bæi ongöninque tömengä nänö miido wadepo ganca nã cæyænte ongonguinque ante nã cæyængantapa. Mäningä dadagöö wëenëñedë tæntæ nê ingaingä inte wænæ awënë Tatäna ingacäimpa. ³ Mäningä ingante nã cæyæninque tadömengadænguipodë wido cædinque ontatodemö wi ænequi inte tee mönedinque tömengä dæca ontatodemö ædæmö tee moncæcantapa. Waodäni wabæca nani quëwencabo ayæ wabæca nani quëwencabo iñönänite tömengä, Oda

cæte gocædänimpa, ante müido wadepo ganca cædämaï incæcäimpa, ante Wængongui anquedo dadagöo ingante wido cæcantapa. Mänimpodepo iinque ba ate tömengä ingante, Wantæ iñö ñimpo cæte goquingä, ante ñimpo cæcä gocæcäimpa.

⁴ Ayæ awënëidi tæ contaimpaco botö atabopa. Wængongui Awënë godö angä beyænque awënëidi badinque apænte ante në änäni badinäni inte mänimpaa tæ contadäni inänitapa. Ayæ Itota ingante ante apænedinque Wængongui nänö angainö ante apænedäni beyænque tömënäni inänite wangö tamencadäni wængadänimpa. Wangö tamencadäni wængainäni nani önöwocaidi botö ñöwo atabopa. Mäninäni iñömö mönö guiñenongä ayæ pöningä ingante adinque, Bitö Wængongui Awënë bai imidö angüenë, ante apænedämaï inte ayæ tömengä nänö emönö bai nani badöninca gäänë ædæ wæante apænedämaï ingadänimpa. Ayæ tömënäni nani önönemö inö nani onompo inö mönö guiñenongä ayæ pöningä nänö yewæmöi yewæmönämaï ingadänimpa. Adodäni ñäni ömæmöninque adoque müido wadepo ganca Itota Codito tönö godongämæ aadänitapa.

⁵ Mäninäni täno ñäni ömæmönäni incæte wadäni guiquenë në wængainäni incæ müido wadepo iinque go ate ñäni ömæmoncædänimpa. ⁶ Täno ñäni ömæmönäni iñömö në tæiyæ waemö inäni inte nani toquinque. Edæ wadäni në wængainäni mempoga ganca nani wænguimämo iñonte mäninäni iñömö wänämaï incædänimpa. Wæætë, Wængongui qui, ante në godönäni bai tömënäni adobai, Wængongui beyæ, ante ayæ, Itota Codito beyæ, ante cæcædänimpa. Ayæ müido wadepo iñonte Itota Codito tönö godongämæ aacædänimpa.

Tatäna nänö æmæwo ömæ ewenguinö ante

⁷ Tadömengadænguipodë tömengä nänö tee mönecönë ñä cæyænte quëwënongå iñongante Tatäna ingante müido wadepo iinque go ate ñi cæyænäni ta gocæcäimpa.

⁸ Ta godinque tömengä inguipoga æmatæ go æmatæ go godinque Gogobæ nani ämæ ganca go Mäogobæ nani ämæ ganca gocæcäimpa. Inguipoga tömäo godinque tömengä, Wabæca nani quëwencabo ayæ wabæca nani quëwencabo nani oda cæte goquimämo ante cædinque tömënäni inänite, Mönö guëadö guëa cæquinque gocæimpa, ante, Adoyömö godongämæ pöedäni, ante ancæcäimpa. Æpodänidö inänii, ante tömënäni æpæ wedeca emönai bai tæiyænäni inguinänidö angüenë.

⁹ Mäninäni bogænæ tömäo godäni bai tömënäni adobai inguipoga tömäo gocædänimpa. Wængongui nänö waadete quëwëñömö tömengä quinäni quëwëñömö godämæ gocædänimpa. Goyönäni öönæde inö gonga bæcodote gao wææñonte gonte wæncædänimpa. ¹⁰ Ayæ wænæ tömënäni inänite, Oda cæte gocædänimpa, ante në cægaingä ingante Wængongui bæi ongonte atopode nani änantibæ gonga bai nani bæcodotibæ cæncadëmæ wido cæcæcäimpa. Edæ mönö guiñenongä tönö, Wængongui beyæ në apænebo, ante në babæ äningä tönö tömëna dobæ mäniñömö wido cæte ingadäimpa. Ininque mäninäni itæde woyowotæ mäniñömö quëwente cöwë wantæpiyæ nani wæwenguimämo ingæimpa.

Wængongui Awënë tæ contaimpa näämæntapa

¹¹ Ayæ awënë tæ contaimpa ñænæmpa näämæntapa adinque botö mänimpaa në tæ contacä ingä adobai atabopa. Inguipoga tönö öönæ iñömö tömengä ingante ate bai cædinque wodii godinque nana ongöñömö edæ ædömë gote dæ änimpa.

¹² Ayæ në wængainäni tömänäni awënëidi incæ önönänique incæ mänimpa gäänë a ongönäni atabopa. A ongöñönäni mincayontacoo wataa wataa wi æmpote ongoncoopa. Ayæ mincayonta wataa Wængongui, Quëwenguinta, ante tömengä yewæmongaintaa wi æmpote acantapa. Mänii mincayontacoo iñömö, Në wængainäni tömänäni æbänö cægainäni inänii, ante Wængongui mänintacoo nänö yewæmongainö ante wataa wataa tömanta adinque në wængainäni nani cægai ganca, ante tömënäni inänite adoganca apænte ante pangantapa. ¹³ Ayæ æpæntibæ cæncadëmæ do wængainäni wæætë ta pönänitapa. Æmæwo wængainäni incæ ta pönänitapa. Tömënäni nani wænte ongöñömö në ongongainäni inte wadæ ta pönänitapa. Ta pönäni ate, Æbänö cægainäni

inänii, ante adinque Wængongui adocanque adocanque nänö cægai ganca, ante tömengä ingante adoganca apænte ante pangantapa.

¹⁴ Mäniñedë ganca ayæ baganca wänämaï quëwencädänimpa, ante ayæ, Wængainäni näni ongöñömö adobaï dæ bacæimpa, ante cædinque mönö Awënë wængainäni æmæwo näni wængaimämo tönö näni wænte ongöñömö æpæntibæ gonga baï näni bæcodotibæ cæcadëmæ wido cæcantapa. Mänintibæ mempoga ganca æmæwo näni wænguimämo baï impa. ¹⁵ Wængongui, Quëwenguinta, ante nänö yewæmongaintaa adinque, Æcänö ëmowo mänintaa yewæmönämaï i, ante adinque nê yewæmönämaï ingainäni inänite mänintibæ cæcadëmæ wido cæcantapa.

21

Inguipoga münguipo öönæ müönæ

¹ Ayæ öönæ müönæ inguipoga münguipo atabopa. Edæ öönæ picæönæ inguipoga picænguipo dæ iinque batimpa. Ayæ æpæntibæ adobaï dæ änimpa. ² Ayæ godömenque botö ayömote Wængongui nänö tæiyæ waëmö quëwëñömö müi Eedotadëë näni äñömö öönädë inö ta wææ atabopa. Onquiyängä nê moncæ cæcä iñömö, Botö nänöogängä inguingä waa acæcäimpa, ante waëmö weocoo nê mongängä baï i quëwëñömö adobaï waëmö pönï ëmö inte ta wææ atabopa.

³ Ayæ Awënë tæ containpa inö tedepämo yedæ ä ëñentabopa. “Ñowo Wængongui nänö owoquincö waodäni weca ongö iinque tömengä tömënäni tönö quëwenguingä ingampa. Tömënäni tömengä guidënäni bacädänimpa. Ayæ Wængongui incæ, Botö tömëmo minitö Wængonguimo incæboimpa, ante tömënäni weca ongoncæcäimpa. ⁴ Tömënäni wëñapæ tamonte wædi tömämæ Wængongui wadæ cæmoncæcäimpa. Mäniñedë æmæwo mönö wänimämo incæ mönö wæwënimämo incæ Ca ca mönö wædimämo incæ nantate mönö wædimämo incæ tömäa mänimämo dæ angæimpa. Edæ wëñëñedë inimämo incæ iinque batimpa,” angantapa.

⁵ Ayæ Awënë tæ containpaa nê tæ contacä iimaï angantapa. “Tömäa inimämo botö ñowo müi cæcæboimpa,” angantapa. Ayæ, “Mänömainö ante botö äñinö edæ nö pönï i iinque mäninö ante wede pönengæimpa. Mänömaï beyæ bitö iimaï ante yewæmöe,” angantapa.

⁶ Ayæ tömengä wæætë botö imote iimaï äninque, “Dobæ iinque batimpa. Botö Tänobo ingaïmo inte Tömämö inguimo imopa. Wëñëñedë tömäa nê Badongaïmo inte tömäa nê iinque Cæbo incæboimpa. Edæ nê gæwænäni, Æpæ beinëmönipa, ante nê änäni inänite botö æpæ tapæ quëwenguimæ önonque godömo becädänimpa. ⁷ Tæi ëmonte nê gänä cädäni inänite botö mänincoo botö nê godonguincoo godömo æncädänimpa. Ayæ botö incæ tömënäni Wængonguimo incæboimpa. Tömënäni wæætë botö wëñænäni bacädänimpa. ⁸ Wæætë guñente awædö, ante nê änäni tönö nê pönëñämaï inäni guiquënë, nê wiwa cädäni tönö wacä ingante nê wänönäni guiquënë, nê towente quëwënäni tönö idöidi nê inäni guiquënë, Wængongui impa, ante näni badöninca gäänë ædæ wææninque nê apænedäni tönö nê babæ änäni tömänäni guiquënë, mäninäni iñönänite atopode näni änantibæ gonga baï näni bæcodotibæ incæ tömënäni näni wæcöñömö bacæimpa. Mänii näni wænguimämo iñömö mempoga ganca näni æmæwo wænguimämo impa,” angantapa.

Müi Eedotadëë quëwëñömö

⁹ Wængongui anquedoidi önonpo æmæmpoque go mëa ganca inäni önonpo æmæmpoque go mëa ganca owætacoo waodäni iinque näni wæwenguimämocoo eyede engate intacoo nê næænäni iñönänite adocanque botö weca pöninque, “Pöe,” angantapa. “Wængongui Codotedo nänöogängä nê baquingä nê monguingä iñongante botö bitö imite odömömo acæbiimpa,” angantapa. ¹⁰ Ayæ Wængongui Önowoca incæ botö imote bæi ongonte baï cæyongante botö wiimonte baï iimaï atabopa. Wængongui anquedo botö imote ö ænte mäo onquiyaboga tæcædæca pönï cönongä ongonte ayömo

Wængongui täiyä waëmö nänö quëwëñömö Eedotadëë nani äñömö öönädë inö ta wæäñonte tömengä botö imote odömongä atabopa.

¹¹ Mänii quëwëñömö Wængongui ñäö emönongä bai apäitimpa. Ayä dica aatapeca nani anca emö bai awocawænta bai waëmonca inimpa. Waodäni nani nanguï godonte äninca bai ñäö apäite bai Eedotadëë inimpa. ¹² Mänii quëwëñömö godämä tæimö wææ cædi äñowæmö ongönimpa. Ayä wææ cædi odemoncoo iñömö önompo tipæmpoga go mënemonga wææ cædinemö inimpa. Önompo tipæmpoga go mä ganca wææ cædinemö incæ wayömö adodemonque Wængongui anquedo adocanque a ongöñongä wayömö adodemonque Wængongui anquedo a ongöñongante anquedoidi önompo tipæmpoga go mä ganca ongönänitapa. Mäninemö önompo tipæmpoga go mënemonga odemoncooga idægoidi nani cabo tipæmpoga go mencabodäniya iñönänite tömënäni emöwocoo yewæmte inimpa. Wayömö odemonga adocaboque emöwo wayömö odemonga adocaboque emöwo yewæmte inimpa. ¹³ Nænque tamönö inö mä go adoque odemö inimpa. Nænque wæidö inö mä go adoque odemö inimpa. Betamonca inö mä go adoque odemö inimpa. Adobai ämatä inö mä go adoque odemö inimpa. ¹⁴ Mänii quëwëñömö wænömënæca mænonte wææ cæqui, ante nani ñönönincacoo iñömö önompo tipæmpoga go menca inimpa. Mänincacoo önompo tipæmpoga go menca incæ Wængongui Codotedo nänö da godongainäni önompo tipæmpoga go mënä inäni tömënäni emöwo incæ adocanque emöwo wacaa adocanque emöwo wacaa yewæmte ëñacaimpa.

¹⁵ Wængongui anquedo botö imote në apænedingä iñömö tee manguimpa oodo inte badöimpa në næængä atabopa. Mänii quëwëñömö tee mancæte ante mänii wææ cædinemoncoo adobai tee mancæte ante mänii wææ cædi adobai tee mancæte ante tömengä tee manguimpa næængantapa. ¹⁶ Mänii quëwëñömö ämatä adoganca ämatä adoganca mænonte inimpa. Doyä inö betamonca inö adoganca inimpa. Tömengä mänii quëwëñömö tee manguimpa inte tee mante doyä inö äñowæmö inö doo müido dootiento quidömetodo ganca inimpa. Ayä betamonca iñömö adobai doo müido dootiento quidömetodo ganca i atabopa. ¹⁷ Wængongui anquedo waodäni nani tee mänö bai tee mangä ayongä mänii quëwëñömö wææ cædi tæinebo inö tetenta i coatodo mëetodo ganca inimpa.

¹⁸ Mänii wææ cædi aatapeca nani änonca inte mænönï impa. Mänii quëwëñömö guiquënë oodo inte awocawænta bai waëmö inte mænönï impa. ¹⁹ Mänii quëwëñömö wænömënæca mænonte wææ cæqui, ante ñönönincacoo iñömö, Waëmö emongæimpa, ante tömënäni quincacoo nani nanguï godonte änincaoo ænte mämö ñönönincacooga bewodö bewodö cædänitapa.

Tänoca ñönöninca aatapeca nani anca inimpa.

Waca ñönöninca guiquënë tapidoca nani anca inimpa.

Waca ñönöninca guiquënë aagataca nani anca inimpa.

Waca ñönöninca guiquënë etemënaotaca nani anca inimpa.

²⁰ Waca ñönöninca guiquënë ööninteca nani anca inimpa.

Waca ñönöninca guiquënë codönadinaca nani anca inimpa.

Waca ñönöninca guiquënë coditooditoca nani anca inimpa.

Waca ñönöninca guiquënë bedidoca nani anca inimpa.

Waca ñönöninca guiquënë topatioca nani anca inimpa.

Waca ñönöninca guiquënë coditopadatataca nani anca inimpa.

Waca ñönöninca guiquënë aatintoca nani anca inimpa.

Waca tömanca guiquënë ämatitaca nani anca inimpa.

Mänimpoca inimpa.

²¹ Mänii wææ cædinemö iñömö önompo tipæmpoga go mënemonga iñömö pededamö nani ämö önompo tipæmpoga go mëmonga inte mænonte inimpa. Wææ cædinemö incæ wææ cædinemö incæ pededamö adomonque adomonque inte mænöninemö inimpa. Mänii quëwëñömö taadö ñænänö godö oodo inte mænöwate taadö awocawænta bai waëmö inimpa.

²² Mönö Wængongui Awënë adocanque Tömää në Cægaingä tönö Wængongui Codotedo tönö mäninömwö cöwë ongöna inique godongämæ quëwënnäni guiquënë, Mönö Wængongui oncönë guicæimpa, ante quinante anguinäni. Edæ Wængongui tæiyæ waëmö oncö mäninömwö dæ ä atabopa. ²³ Wængongui në nãö bai ëmönongä inte nãö apäiquingä bai inongäimpa. Ayæ Wængongui Codotedo inömwö näni ti wodönoincade bai i inique mänii quëwënnömwö inömwö nænque incæ apäicä incæ quinante godömenque nãö apäiquii. ²⁴ Wabæca näni quëwencabo ayæ wabæca näni quëwencabo inänite Wængongui ængä beyænque në quëwënnäni inte mäninänique mänii nãö apäiyömwö cægoncædänimpa. Adobai inguipoga awënë odayeidi waëmoncoo näni ëadincoo mäninömwö ænte poncædänimpa.

²⁵ Mänii quëwënnömwö woyowotæ inämaï ingæimpa. Inique mäninömwö wææ cædinemoncoo iimö inömwö inömwö inömwö cöwë tee mönedämaï ingæimpa. ²⁶ Wabæca näni quëwencabo ayæ wabæca näni quëwencabo incæ tömënnäni waëmoncoo näni ëadincoo mäninömwö ænte poncædänimpa. Mänii quëwënnömwö waa quëwënnömwö impa, ante waa ate apænecædänimpa. ²⁷ Quiëmë wënæ wënæ i mäninömwö cöwë guidämaï ingæimpa. Në wiwa cædäni incæ në babæ änäni incæ mänii quëwënnömwö guidämaï inguinänidö angüënë. Wæætë Wængongui Codotedo, Quëwenguintaa, ante nänö yewæmointaa në yewæmönäni guiquënë tömënnänique guicædänimpa.

22

¹ Ayæ Wængongui anquedo botö imote önö quëwenguimæ odömongä atabopa. Mänimæ awocawænta bai waëmömwæ impa. Wængongui tönö Wængongui Codotedo näna aacæ tæ containpa inö tapæmpa. ² Mäninömwö tadinque mänii quëwënnömwö taadö nænænö godö tæcæguedë inö ta gopæmpa. Mäninö æmæ wedeca incæ imæ wedeca incæ awæ quëwenguiwæ pæwæ atabopa. Mäniwæ inömwö tömenca wacä apäicä inömwö wacä apäicä inömwö incapa. Inique adoque wadepo inömwö önömwö tipæmpoga go mäa ganca mänimpoga mäniwæ incayedë impa. Wabæca näni quëwencabo ayæ wabæca näni quëwencabo incæ mänimæca quëwënnäni tömännäni mäniwæ önabocoo beyæ ganca bacædänimpa, ante ënabocoo. ³ Wængongui pante nänö angainö beyænque quincömwë wënæ wënæ bagatii mäninö mäninömwö dæ angæimpa. Wængongui tönö Wængongui Codotedo näna aacæ tæ containpa mänii quëwënnömwö mä ongoncæpaimpa. Tömengä ingante në cædönäni inömwö tömengä ingante watapæ apænedinque tömengä ingante cæcædänimpa. ⁴ Tömengä awinca acædänimpa. Ayæ tömengä ëmowo tömënnäni önömwö inömwö yewæmonte incædänimpa. ⁵ Mäninömwö woyowotæ inämaï ingæimpa. Edæ mäninömwö quëwënnäni beyæ Wængongui Awënë në nãö ëmönongä inte apäiquingä inongampa. Inique nænque nãö apäidö incæ ti wodönoincade ënönö incæ quinante ayæ apäiquii. Ayæ mäninömwö quëwënnäni adodäni cöwë wantæpiyæ aacædänimpa.

Itota Codito oo poncæcäimpa

⁶ Ayæ Wængongui anquedo botö imote apænedinque, “Mäninö bitö ënönö nö pönii i inique mäninö ante wede pönengæimpa. Wængongui beyæ në apænedönäni tömengä Önöwoca ingante ëwocadinque apænedänipa. Tömënnäni näni në ëwocadongä Wængongui Awënë inömwö tömengä anquedo ingante apænedinque, Bitö botö imote në cædönäni weca godinque, Æbänö oo pönii baquimpa, ante odömwömi acædänimpa, ante da pönongä pongantapa,” ante botö imote apænecantapa.

⁷ Itota Codito, “Aedäni. Botö oo ocæ ëmænte ponguimo imopa. Ii mincayontaa Wængongui beyæ apænedinque näni yewæmonte angainö ante në ënente cædäni inömwö näni toquinque,” ante apænecantapa.

⁸ Botö Wäömo inömwö imopa. Mäninö Wængongui anquedo nänö äninö ante në ënënimö inte botö mänii tömengä nänö odömwöni inömwö ante në adimo inömwö imopa. Wængongui anquedo angä ënëninque ayæ odömwöngä adinque botö në odömwöningä önöwä inömwö ædæ wæænte tömengä ingante watapæ apænecæte ante cætabopa. ⁹ Cæyömwote

tömengä wæætē, “Mänömaï cædämaï ïmäwe, angantapa. Botö önonque bitö baï Wængonguï ingante nē cæbo ïmopa. Ayæ bitö tönïñadäni Wængonguï beyæ nē apænedönäni tönö ïi yewæmöintaa nāni angainö ante nē ēñente cædäni tönö botö tömēnāni baï adobaï Wængonguï ingante nē cæbo ïmopa cæbii. Edæ Wængonguinque ingante ædæ wææninqe, Bitö Wængonguï Awēnē adobique ïmidö anguēnē, ante apænee,” angantapa.

¹⁰ Wængonguï anquedo godömenque botö ïmote ïïmaï angantapa. “Edæ mänömaï baquïönæ oo pönï ingæïmpa cæbii. ïi yewæmöintaa Wængonguï beyæ apænedinque nāni angainö ante bitö wē wodönāmaï inte do apænee. ¹¹ Nē wēnæ wēnæ cædönāni ïnānite ee abi godömenque wēnæ wēnæ cæcædänimpa. Tömēnāni nāni pönēnö wentamö baï nē entawēnāni ïnānite ee abi godömenque nāni pönēnö wentamö baï entawencædänimpa. Nē nö cædäni ïnānite ee abi godömenque nö cæte quēwencædänimpa. Nē tæiyæ waēmö entawēnāni ïnānite ee abi godömenque tæiyæ waēmö entawencædänimpa.”

¹² Itota Codito, “Aedäni. Botö oo ocæ ēmænte ponguïmo ïmopa. Ocæ ēmænte pöninque botö tömēmo godömo nāni ænguincoo, ante næænte ponguïmo ïmopa. Tömānāni æbänö cædāni, ante adinque botö tömēnāni nāni cægai ganca ante adoganca godömo æncædänimpa. ¹³ Botö Tānobo ingaïmo inte Tömāmo inguïmo ïmopa. Tömāā badönāmaï ïñedē botö Do Quēwengaiïmo ïmopa. Ayæ tömāā ïinque bayedē incæ botö Ayæ Pönï nē Quēwēmo incæboïmpa. Wēēñedē tömāā nē Badongaiïmo inte tömāā nē ïinque Cæbo incæboïmpa.”

¹⁴ Weocoo yamonte baï mïmönē nē mēnongate ïnāni ïñömö tömēnāni nāni toquinque edæ mänïi quēwēñömö wææ cædinemö ïñömö go guïquïnāni ïnānipa. Go guïdinque tömēnāni quēwenguïwæ quēwenguinca bequïnāni ïnānipa. ¹⁵ Wiwa cædäni guiquēnē mänïi quēwēñömö yabæque ïñömö ongonte wæquïnāni ïnānipa. Idöidi nē ïnāni, nē towente quēwēnāni, wacā ingante nē wænönāni yabæque ongönānipa. Wængonguï impa, ante nāni badöninca gäänē ædæ wææninqe nē apænedäni, nē babæ änāni tönö, Babæ äinēmönipa, ante nē änāni tönö tömēnāni tömānāni mänïi quēwēñömö yabæque ïñömö quēwenguïnāni ïnānipa.

¹⁶ “Botö Itotabo ingaïmo ïmopa. Mäninö botö angainö ante nö impa, ante botö ïmote godongämæ nāni pönencabodäni tömānāni ïnānite apænecä ēñencædänimpa, ante cædinque botö do botö anquedo ingante mïnitö weca da pönömo pongantapa. Botö docä Awēnē Dabii nänö Wæmæncoo ingaïmo inte adobaï nänö Pæïmo ïnömo ïmopa. Botö wadaamö baï ñäo bayö apäimö baï ïmopa.”

¹⁷ Wængonguï Tæiyæ Waēmö Önöwoca tönö Wængonguï Codotedo nänöogængä nāni änogä, “Pöedäni,” änapa. Äñöna tömēnāni tömēna ïnate nē ēñēnāni inte adobaï, “Pöedäni,” ancædänimpa, ämopa. Nē gæwænte ïnāni tömānāni pö becædänimpa, ämopa. Nē beinēnāni ïñönānite, Minitö quēwenguïmæ, ante önonque pönonguïmæ incæ pö ænte becæmïnimpa, ante ämopa.

¹⁸ ïi yewæmöintaa Wængonguï beyæ nē apænedäni nāni angainö ante nē ēñēnāni tömānāni ïnānite, Ee aedäni, botö wææ ämopa. Edæ mäninö nāni angainö ante godömenque wadö änāni ïnānite Wængonguï pancæcäïmpa. ïi yewæmöintaa quïēmē nāni pante wæwenguincoo, ante yewæmonte adinque Wængonguï nē wadö änāni ïnānite mänincoo baï godömenque pancæcäïmpa. ¹⁹ Ayæ ïi yewæmöintaa Wængonguï beyæ nē apænedäni nāni angainö incæ pancadea æninqe nē wæä godonte baï cædäni ïnānite Wængonguï quēwenguïwæ quēwenguinca godönāmaï incæcäïmpa. Tömengä adobaï, Botö tæiyæ waēmö quēwēñömö mänïñömö guïdämaï incæmïnimpa, ante ancæcäïmpa. Mänïi quēwenguïwæ ante mänïi quēwēñömö ante ïi yewæmöintaa yewæmonte impa.

²⁰ Mäninö ante, Nö impa, ante nē apænecä ïñömö tömengä ïñömö, “Ao, botö oo ocæ ēmænte ponguïmo ïmopa,” angantapa. Äñongante botö,

Mänömaï baquïnö anguēnē, ante, Amēē, äninque, Awēnē Itota pöe, ämopa.

²¹ Awënë Itota Wængonguĩ nänö guidëñäni inänite waadete godö cæcæcäimpa. Mänömaĩ baquĩnö angüënë, ante botö, Amëë, ante mäninque ämopa.